



Suha' Maseho: Kadadiam anna Pa'dandiam Bakahu

Bambam Bible

Contents

Kadadlam	1
Kaheba Katilallasam natuli' Matius	74
Kaheba Katilallasam natuli' Markus	146
Kaheba Katilallasam natuli' Lukas	187
Kaheba Katilallasam natuli' Yohanes	256
Pa'palakoanna Suho	304
Suha'na Paulus lako Jumaa' dio Roma	362
Uhuna Suha'na Paulus lako Jumaa' dio Korintus	396
Kapenduanna Suha'na Paulus lako Jumaa' dio Korintus	427
Suha'na Paulus lako ingganna Jumaa' dio Galatia	447
Suha'na Paulus lako Jumaa' dio Efesus	460
Suha'na Paulus lako Jumaa' dio Filipi	471
Suha'na Paulus lako Jumaa' dio Kolose	480
Uhuna suha'na Paulus lako Jumaa' dio Tesalonika	488
Kapenduanna Suha'na Paulus lako Jumaa' dio Tesalonika	494
Uhuna Suha'na Paulus lako Timotius	498
Kapenduanna Suha'na Paulus lako Timotius	506
Suha'na Paulus lako Titus	512
Suha'na Paulus lako Filemon	516
Suha' lako to Ibrani	518
Suha'na Yakobus	542
Uhuna Suha'na Petrus	549
Kapenduanna Suha'na Petrus	558
Uhuna Suha'na Yohanes	564
Kapenduanna Suha'na Yohanes	572
Kapentallunna Suha'na Yohanes	574
Suha'na Yudas	576
Pa'palosainna Yesus Kristus lako Yohanes	579

Suha' Maseho: Kadadium anna Pa'dandiam Bakahu

The New Testament and Genesis in the Bambam language of Indonesia

Perjanjian Baru dan bagian dari Perjanjian Lama dalam bahasa Bambam dari Indonesia

Language: Bambam

Provided by: Wycliffe Bible Translators

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2004 Lembaga Alkitab Indonesia

This translation is made available to you under the terms of the Creative Commons Attribution-No Derivatives license 4.0. You may share and redistribute this Bible translation or excerpts from it in any format, provided that:

You include the above copyright information.

You do not make any derivative works that change any of the actual words or punctuation of the Scriptures.

Pictures included with Scriptures and other documents are licensed just for use with those Scriptures and documents. For other uses, please contact the respective copyright owners.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

bbcf158d-c318-5f74-8f6c-6b8464658e66

ISBN: 978-1-5313-0543-7

Kadadiam Bätäna issinna

Inde suha' Kadadiam untula' diona kadadianna langi' anna lino sola ingganna issinna, pellohonna hupatau, pa'pahandusanna dosa sola kamasussaam illaam inde lino, anna naaka susi Puang Allataala umpadeem kasilombunganna kalena anna hupatau. Issinna inde suha' Kadadiam dua gahi' kasallena:

Uhuna hondongam 1-11. Diona kadadianna langi' anna lino sola ingganna issinna anna pellohonna hupatau. Etam too duka' inde ditula' diona Adam anna Hawa, Kain anna Habel, Nuh anna diona bussuam uwai, sola indo ongeam malangka' ma'eham-eham dio Babel.

Ma'penduanna hondongam 12-50. Diona kabuttuanna nene to naponene to Israel mengkalao Abraham to molele-lele kahana kamatapassanna anna kamanuhusanna längäm Puang Allataala. Mane tulasannai Ishak änä'na Abraham anna Yakub (battu diua Israel) änä'na Ishak. Mane tulasannai indo sapulo dua peänäsanna Yakub muane. Iam too diuaam sapulo dua pentoosanna to Israel. Napaitoo'na to untuli'i inde suha' diona mesa änä'na Yakub isanga Yusuf anna kaha-kaha puha dadi tama kalena, nasuhum mengkalao Yakub sule lako ingganna änä'na sitonda hepo'na si mesa-mesa mentieli' lako Mesir.

Moi anna inde suha' untula' diona pa'pahandusanna deem hupatau, sapa' handam too'na tulasam diona pengkähänganna Puang Allataala. Pa'pahandusanna inde suha' umpomakaleso diona Puang Allataala puha umpadadi langi' anna lino sola ingganna issinna, anna nabubum diona pa'dandianna la tontä liu Puang

Allataala unkgambi' umma'na. Too'na illaam inde suha' untula' diona Puang Allataala to uhhotto' ma'hupatau anna untahungkum ingganna to kasalaam. Ia toi umpasule lako pa'dandianna unkgambi' anna umpamoloi umma'na anna Ia muäto' lingkana hupatau. Kasuhunganna anna dituli'i inde suha' anna mala diissam diona kamanontonganna Puang Allataala lako to Israel sola ingganna to matappa', nasuhum tuttuam meada'.

Lesoanna issinna

1. Dipadadi langi' anna lino sola ingganna issinna (1:1-2:25)
2. Hupatau metobä tama dosa (3:1-24)
3. Adam sule lako Nuh (4:1-5:32)
4. Nuh anna wattunna bussu uwai (6:1-10:32)
5. Ongeam malangka' ma'eham-eham dio Babel (11:1-9)
6. Sem sule lako Abram (11:10-32)
7. Abraham, Ishak, anna Yakub (12:1-35:29)
8. Pessubunna Esau (36:1-43)
9. Yusuf anna solasubunna (37:1-45:28)
10. To Israel dio Mesir (46:1-50:26)

Puang Allataala umpadadi langi' anna lino sola ingganna issinna

1:1–2:3

1 Wattunna napahandu' Puang Allataala umpadadi langi' anna lino, ²inde lino tä'pi ma'lesoam anna lo'bäpi; malillim pättä ussamboi le'bo' kalua', anna Penaba Masehona Puang Allataala ma'leba-leba yabona le'bo'.

³Iya ma'kadam Puang Allataala naua: “La dadi masiä!” Iya dadim masiä. ⁴Dadii indo masiä, iya mapia naita Puang Allataala. Napasibala'um indo malillim anna masiä. ⁵Indo masiä nasangai allo anna indo malillim nasangai bengi. Lessu' bengi sule mebengngi', iam too uhuna allo.

⁶Puhai ia too ma'kada oom Puang Allataala naua: "La dadi pesapa'na uwai yabo anna uwai dio." ⁷Iya napadadim indo pesapa' la ussapa' uwai yabo anna uwai dio. ⁸Indo pesapa' nasangai lawwa. Lessu' oom bengi sule mebengngi', iam too allo kaduanna.

⁹Puhai ia too ma'kada oom Puang Allataala naua: "Ingganna uwai dio ibi'na langi' la ma'mesa lako mesa ongeam anna mala deem ongeam tää'na keuwai." Iya dadim ia too. ¹⁰Nasangaim indo mabanginna galantangam anna indo keuwainna nasangai ia le'bo'. Iya mapia oom naita Puang Allataala.

¹¹Anna mane ma'kada Puang Allataala naua: "Galantangam la umpakende' ma'hupa-hupa tanangam susinna: tanangam ma'lise' anna kaju kembua ma'lise' anna mala dipopamulaam liu." Iya dadim ia too. ¹²Indo galantangam umpakende'um ma'hupa-hupa tanangam: tanangam ma'lise' anna kaju kembua ma'lise' anna mala deem liu pamulaam. Iya mapia oom naita Puang Allataala. ¹³Lessu' oom bengi sule mebengngi', iam too allo katallunna.

¹⁴⁻¹⁵Puhai ia too ma'kada oom Puang Allataala naua: "La deem yabo langi' to la ma'pomasiä', la umpasibala' allo anna bengi. Anna la dipangngissanni wattu anna allo sola taum, anna la umpomasiä' lino." Iya dadim ia too. ¹⁶Napadadim Puang Allataala dua handam kasalle to la ma'pomasiä'. Indo kasallena isanga mata allo la umpahe' masiä' anna isanga bulam la umpahe' bengi. Anna napadadii duka' ingganna bintä. ¹⁷Ingganna ia too napadadi asam yabo langi' anna malai umballoi lino ¹⁸anna umpahe' allo anna bengi anna la umpasibala' masiä' anna malillim. Iya mapia oom naita Puang Allataala. ¹⁹Lessu' oom bengi sule mebengngi', iam too allo kaappa'na.

²⁰Puhai ia too ma'kada oom Puang Allataala naua: "Illaam le'bo' la naponnoi ma'hupa-hupa bau anna olo'-olo' senga', anna yabo lawwa la sikatia' ma'hupa-hupa dassi." ²¹Iya napadadim ma'hupa-hupa olo'-olo' le'bo' mengkalao kasallena sule lako bahinni'na umponnoi le'bo', anna umpadadi ingganna hupanna dassi. Iya mapia oom naita Puang Allataala. ²²Anna mane natamba' indo issinna le'bo' naua: "Pembea'koa' anna mala umponnoi liukoa' le'bo'." Susi siam duka' untamba' indo ingganna mentia'na anna malai duka' membea' lako lino. ²³Lessu' oom bengi sule mebengngi', iam too allo kalimanna.

²⁴⁻²⁵Puhai ia too ma'kada oom Puang Allataala naua: "Inde lino la umpassubum ingganna olo'-olo' ma'bitti' appa'na anna tissollo'na, susi manahanna teem malaihananna." Iya napadadim ingganna olo'-olo' ma'bitti' appa'na anna tissollo'na, susi manahanna teem malaihananna. Dadii ia too, iya mapia oom naita Puang Allataala.

²⁶Anna mane ma'kada Puang Allataala naua: "Tapapiaia' hupatau la susikia' anna la ia umpahe' ingganna bau dio le'bo', ingganna dassi yabo lawwa anna olo'-olo' manahanna anna tissollo'na sola ingganna issinna lino."

²⁷Iya napapiam Puang Allataala hupatau susi hupanna. Natampa susi hupanna Puang Allataala. Muane anna baine napadadi.

²⁸Anna mane natamba' anna ma'kadai naua: "Pembea'koa' anna mala umponnoi lino pessubummu anna la unguasaia' ingganna issinna. La umpahe' ingganna bau dio le'bo', ingganna dassi yabo lawwa, anna ingganna olo'-olo' illaam inde lino.

²⁹Pehingngii! Kubeemmokoa' ingganna tanangam ma'lise' anna ingganna kaju kembua ma'lise' illaam

inde lino la mendadi kinandemua'.
³⁰Anna lako ia ingganna olo'-olo' illaam lino sola ingganna dassi yabo lawwa, battu diua ingganna menabanna, kubeem duka' ingganna tanangam la mendadi kinandena." Iya dadim ia too.

³¹Iya naitam Puang Allataala indo ingganna pa'padadinna tä' deem pada samapia. Lessu' oom bengi sule mebengngi', iam too allo kaannanna.

2 Susim too napapuha umpadadi langi' anna lino sola ingganna issinna Puang Allataala.

²Tappana lambi' allo kapitunna puha asammi indo ingganna aka-aka napadadi Puang Allataala. Iya allo iam too naongei tohho Puang Allataala aka dadi asammi pa'padadinna.
³Natamba'um anna napasähä' allo kapitunna, aka allo iam too naongei Puang Allataala tohho aka dadi asammi pa'padadinna.

Adam sola Hawa illaam bela' Eden

2:4-25

⁴Susi inde tulasanna indo anna napadadi Puang Allataala langi' anna lino:

Wattunna anna napadadi Puang Allataala DEBATAnta langi' sola lino,
⁵tä'pi deem humpu' tubo dio mai litä' anna tä'pi deem tanangam mukku' dio mai bela', aka tä'pi deem napatuhum Puang Allataala DEBATAnta uham. Anna pa'depi duka' hupatau unγκähä litä'.
⁶Sapo' anggam deem susi langullo buttu dio mai litä' si umbossi'i ingganna aka-aka lako lino.
⁷Iya mualam sobä' Puang Allataala DEBATAnta anna natampai mesa tau, mane nasimbuhu'i tama illäna penaba mepatubo nasuhum tubo.

⁸Tappana puha ia too, umpapiam bela' Puang Allataala DEBATAnta dio tandai mata allo illaam Eden, anna

napatadongkonni indo tau puha napadadi illaam indo bela'.
⁹Iya napatubom Puang Allataala DEBATAnta ma'hupa-hupa kaju si mapi'dä' diita anna si mapia buana mala diande. Anna illaam tängäna indo bela' tubo satoo' kaju la mala mepatubo anna satoo' kaju la mala mepaissanni kamapiaam anna kakadakeam.

¹⁰Deem mesa salu muola Eden si ullessä'i indo bela'. Umpellei indo bela', iya tibahe appa'um.
¹¹Mesa disangai Salu Pison. Salu ia too muola lako lembäna Hawila, indo ongeam si dipangngalai bulabam.
¹²Bulabanna ongeam ia too mapia. Deem toi duka' dama' bubanau' anna batu masulli'.

¹³Anna kaduanna disangai Salu Gihon. Salu ia too muola lako ia lembäna Kush.
¹⁴Anna katallunna disangai Salu Tigris, mangngola lako ia tandai mata alona Asyur. Anna kaappa'na disangai ia Salu Efrat.

¹⁵Naeli' Puang Allataala DEBATAnta indo tau anna napatadongkonni illaam bela' Eden, aka la nakähä anna najagai.
¹⁶Mane napahentai Puang Allataala DEBATAnta naua: "Ingganna bua kaju illaam inde bela' mala asam muande.
¹⁷Anggam buana indo kaju mepaissanni kamapiaam anna kakadakeam, tä' si'da si'da ia la mala muande. Aka maka muande la mate eta siango."

¹⁸Puhai ia too ma'kadam Puang Allataala DEBATAnta naua: "Tä' mapia ke anggam mesa-mesanna inde tau tubo. Dadi mapia ke dipapiaanni duka' solana, to la sihatam umpamoloi."

¹⁹Anna mane mualai litä' anna natampai ingganna hupanna olo'-olo' si diona galantangam sola ingganna hupanna dassi yabo lawwa. Puhai natampa, nababam lako olona Adam* aka la pantam nasangai anna napehingngii Puang

*2:19 Adam kalembasanna, hupatau.

Allataala aka la nasangaiam. Iai too nasangaiam indo olo'-olo', ia lium too sanganna. ²⁰Iya nasangaim indo ingganna olo'-olo', susi manahanna teem malaihanna sola ingganna dassi.

Sapo' tä'pi ia deem naita Adam la sihatanna nasi'dim la mala umpamoloi.

²¹Iya napalimpe'um mamma' Puang Allataala DEBATanta indo Adam. Mahassanni mamma' naäläim mesa usu'na, mane natampi'i sule indo pangngalaanna. ²²Indo usu' naala illaam mai kalena Adam natampa mesa baine, anna mane nababaam lako olona Adam.

²³Iya nauam Adam:

“Mane inde hi pole' to kusihatangam, aka bukungku napobuku anna baleku napobale.

Anna la disangai baine aka diala illaam mai kalena muane.”[†]

²⁴Iam too anna lako mesa muane la umpellei indona sola ambena anna sialai mesa baine, nasuhum duai la mendadi mesa illaam ingganna-ingganna sia.

²⁵Wattu eta too indo muane sola bainena bassim ma'kambelä, sapo' tä' masihi'.

Metobä tama dosa hupatau

3:1-24

3 Ingganna olo'-olo' malaiha napadadi Puang Allataala DEBATanta yabo galantangam ula'um handam manahhu' mantipu. Indo ula' mekutana lako indo baine naua: “Tappa' si'da haka nalahangkoa' Puang Allataala muande ingganna bua kaju illaam inde bela?”

²Natimba'im indo baine naua: “Ingganna bua kaju illaam inde bela' mala asam kiande, ³sulibanna indo bua kaju illaam inde tängäna bela' aka naua Puang Allataala: ‘Tä' si'da-si'da mala uh-

haka' dapaka ia la muande buana, aka maka' muande la matekoa'.”

⁴Iya nauam indo ula': “Setonganna tä'koa' la mate. ⁵Sapo' ia hi tia anna nauai Puang Allataala, aka maka' muande', la tibukka pikkihammua' anna la susikoa' Puang Allataala la muissam usse'la kamapiaam anna kakadakeam.”

⁶Tappana naita indo baine bua kaju ia too tä' si'da deem pada samapia, la mammi' diande, anna la umpatibukka pikkiham, iya naponge' siaham indo bua kaju dipelahangam anna naandei. Puhai naande, iya nabeemmi duka' muanena naande. ⁷Puhanna naande tappa tibukka siaham pikkihanna anna nais-sammi pole' naua: “Ma'kambelä haki' kita päläe!” Iya mualam daunna kaju ara anna napasiam-pim-ampinni nasapu'iam kalena.

⁸Tappana kahubenni uhhingngim pehhondona Puang Allataala DEBATanta ma'lao-lao illaam indo bela'. Iya bassim le'ba'um tama alla' kaju illaam indo bela' umpembuniam Puang Allataala. ⁹Sapo' natambai Puang Allataala DEBATanta indo muane naua: “O Adam, umbako ngei?”

¹⁰Natimba'im Adam naua: “Kuhingnginna pentekkamu illaam inde bela', iya le'ba' siahama' membuni mahea' aka kuissammi kuua ma'kambelä hä' kao päläe'.”

¹¹Iya ma'kadam Puang Allataala naua: “Menna umpaissaniko anna muissanni muua: ‘Ma'kambeläi?’ Muande haka iko indo bua kaju kupelahangam la diande?”

¹²Natimba'im Adam naua: “Indo baine umpadioannä' ampe'ku, iam too umbeennä' indo bua kaju anna kuandei.”

¹³Iya mekutanam Puang Allataala DEBATanta lako indo baine naua: “Akanna

[†]2:23 muane naua illaam basa Ibrani ISH, anna baine naua ISHAH. Dadi saidi' tasusi moninna indo dua kada.

umpateenni?” Mentimba'um indo baine naua: “Aka natipuä' indo ula' nasuhum kuande indo bua kaju.”

¹⁴Iya ma'kadam Puang Allataala DEBATAnta lako indo ula' naua:

“Ingganna olo'-olo' manahanna anna malaihanna illaam inde lino anggam iko la ditädo. Dadi la tissollo'ko dio litä' tiasa dadammu anna la sobä' kinandemu sule lako matemu, aka taia gau' umpogau'.

¹⁵Dadi mengkalao iko solakoa' inde baine la kupasipobali sule lako pessubummua'. La untikkuko kambutu'na pessubunna, anna pessubunna la nahäppu-häppusangko iko ulummu.”

¹⁶Mane nauai lako indo baine:

“La masussa si'da-si'dako iko ke kebättäko anna la ussi'dingko kamapi'disam kasalle ke keänä'ko. Sapo' moinna anna susi la tontä liu kende' kamohäeammu lako muanemu anna la napahe'ko muanemu.”

¹⁷Anna mane ma'kada lako indo muane naua: “Aka umpehingngii puha hako iko bainemu anna la Kao, nasuhum muandeko indo bua kaju kupelahangam. Dadi la kutädo litä' aka natumä gau'mu, nasuhum la to'do appu' mahihimmu mengkähä mane deenni muande, sule lako matemu.

¹⁸Litä' la umpakende' ingganna humpu' keduhi. Anna ingganna humpu' tubo lako päda la umpokinande.

¹⁹La ullämmä'ko meangga sikummu mengkähä mane deenni muande, lambi' ma'pasuleko sule dokko litä', aka eta muongei buttu. Aka litä'ko ditampa, iya la dadi litä'ko sule.”

²⁰Adam ussangai baina Hawa aka la mendadi indona ma'hupatau.[‡]

²¹Iya napapiaammi Puang Allataala DEBATAnta poheba lollo' olo'-olo' anna napapohebaianni Adam sola baina. ²²Ma'kadam Puang Allataala DEBATAnta naua: “Inde hupatau susingkia' naissammi pole' usse'la kamapiaam anna kakadakeam. Dadi temo pahallu la dijagai indana naalai duka' indo bua kaju mepatubo. Aka maka' mala naande, iya la tubo liu sule lako salako-lakona.” ²³Nasuhum nasua lao Puang Allataala DEBATAnta indo hupatau umpellei bela' Eden anna unγκähäi indo litä' naongei buttu. ²⁴Puhai nasua lao Puang Allataala indo hupatau, iya ussuam sanaka-naka kerub[¶] tohho dio indo ba'bana bela' Eden, tandai mata allo, sola pa'dam ma'nala-nala tiputa' lelem lao pali'. Muampai indo lalam lako too' kaju mepatubo.

Kain sola Habel

4:1-16

4 Iya solam metindo Adam anna Hawa baina lambi' kebättä Hawa sampe undadiam mesa muane. Iya ma'kadam Hawa naua: “Pa'kamasenam too DEBATA nasuhum malaä' undadiam mesa muane.” Iam too anna nasangaim Kain.[§] ²Mane undadiam polei mesa muane, nasangai ia Habel. Tappana kasalle indo dua änä'na, iya si ma'kambi' ia Habel anna si mengkähä litä' ia Kain.

³Pissam wattu muala sabaheam bua pengkähäna indo Kain, anna napehumalasanni längäm DEBATA. ⁴Naala duka' Habel sanaka-naka uhu änä'na dombana, natunu, anna naala asanni

[‡]3:20 Hawa: kalembasanna, *Katuboam*.

[¶]3:24 kerub: sahhupa pesuana Puang Allataala buttu yabo mai suhuga. Indo kerub ma'pani'. Yeh. 1:10, 10:1-17.

[§]4:1 Kain: kalembasanna, *kudadiam*.

lompona napehumalasang. Lambi' tä' deem pada sanapohäe DEBATA Habel sola bua pemala'na. ⁵Sapo' Kain ia sola bua pemala'na tä' napohäe DEBATA. Tä' deem pada sameali-ali Kain anna hosso penabanna.

⁶Iya ma'kadam DEBATA lako Kain naua: "Akanna keaha'ko anna umpa-hosso penabammu? ⁷Aka indo kela ma'gau' mapiako la ussi'dim dako tia duka' kakassiam. Sapo' maka' tä'ko ma'gau' mapia, dosa sihhapam to man-toho' natocho'ungko la napentamai. Sapo' pahallu la umpentaloi."

⁸Iya ma'kadam Kain lako adinna naua: "Habel, talao lako bela'." Sulei lako bela'na, tappa uhhopäi Habel adinna napatei.

⁹Iya ma'kadam DEBATA lako Kain naua: "Umba ngei Habel adimmu?" Natimba' Kain naua: "Tä' kuissam. Aka kao haka too kao si unjagai?"

¹⁰Iya ma'kada pole oom DEBATA naua: "Akanna umpogau'ko kakadakeam? Indo hahana adimmu sihhapam kamaha napengkaalaiä' dio mai naua: 'Napateiä'.' ¹¹Dadi temo kutädoko, tä'ungko la mala ungkähä litä', aka naongi titollo hahana adimmu indo anna umpatei. ¹²Aka moiko la mantanam tä' siam la kembua. Dadi la laoko kalao-lao bäbä ussambai lino ma'dassi tahampo."

¹³Natimba' Kain naua: "O DEBATA moi kela daa itim pesämbä'mu tama kaleku tä' punala la kubela kupendudum. ¹⁴Aka ussuamä' lao umpellei inde ongeam anna tä'ungki' deem la si-ita. Aka la kalao-lao bäbämä' ussambai lino, anna la napateimä' too tau ke deenni kusitammuum."

¹⁵Nauam DEBATA: "Tää'! Maka' deengko la umpatei, la dipabala'i

pempitu tiluppi'." Iya napapiaammi DEBATA tanda dio kalena anna mala tä' la napatei tau ke deenni nasitammuum. ¹⁶Iya le'ba'um Kain umpellei DEBATA lu dekke tandai mata allona Eden anna tohhoi dio Nod.**

Pessubunna Kain

4:17-26

¹⁷Iya solam metindo Kain anna bainena, lambi' kebättä bainena sampe undadiam mesa muane nasangai Henokh. Pissananna umpapiam mesa kota anna nasangai Henokh napasikona änä'na. ¹⁸Indo Henokh undadiam Irad, Irad undadiam Mehuyael, Mehuyael undadiam Metusael, Metusael undadiam Lamekh.

¹⁹Indo Lamekh baju'. Isanga Ada mesa bainena, anna isanga Zila mesa. ²⁰Ada ia ungkeänäsam Yabal. Yabal-um too handam yolo umpatubo olo'-olo' anna si ma'pentieli'-eli'i mebahum.†† ²¹Adinna Yabal isanga Yubal. Yubal-um too handam yolo ma'katapi anna ma'sulim. ²²Zila ia ungkeänäsam Tubal-Kain. Iam too handam yolo mendadi pande gällä anna bassi. Deempi adinna Tubal-Kain baine isanga ia Naama.

²³Pissam wattu ma'kada Lamekh lako indo dua bainena naua:

"O Ada solakoa' Zila, patanannia' talinga inde tula'ku: Puhaä' umpatei mesa änä' muane aka nabasaiä'; umpaletta' sungnga'ä' mesa to mangnguha aka sukka'-sukka' kaleku nahabi'.

²⁴Maka' deem la umpatei Kain, la dipabala'i ia pempitu tiluppi', sapo' maka' kao deem tau la umpateiä' la dipabala'i ia pempitu pulona anna pitu tiluppi'."

** 4:16 Nod: kalembasanna, ongeanna to kalao-lao bäbä.

†† 4:20 bahum: lollo' olo'-olo' si napopapa sola napohindim.

²⁵Iya sola oom metindo Adam anna Hawa lambi' undadiam pole oom mesa muane. Iya nasangaim ia Set,^{‡‡} aka naua Hawa: “Nabala'iannä' Puang Allataala indo kakanna isanga Habel aka puha napatei Kain.” ²⁶Indo Set undadiam mesa muane isanga Enos.

Wattu etam too anna napahandu'i hupatau umpenombai DEBATA.

Pessubunna Adam

5:1-32

5¹⁻²Wattunna anna untampai hupatau Puang Allataala, natampa susi kalena. Napapia dua hupa: muane anna baine. Puhai natampa, natamba'um anna nasangai “Hupatau”.

Iya indem pessubunna Adam:

³Tappana sahatu' tallu puloi taunna dadinna Adam, iya undadiammi mesa muane nasangai Set. Indo Set bangom kaju ambena. ⁴Puhai undadiam Set, tubopi kahua hatu' taunna Adam anna undadiam polepi sanaka-naka änä', muane anna baine. ⁵Ia ham mane matei kaseha hatu' tallu pulo taunna.

⁶Tappana sahatu' limai taunna dadinna Set, undadiammi mesa muane nasangai Enos. ⁷Puhai undadiam Enos, tubopi kahua hatu' pitu taunna Set anna undadiam polepi sanaka-naka änä', muane anna baine. ⁸Ia ham mane matei kaseha hatu' sapulo dua taunna.

⁹Tappana kaseha puloi taunna dadinna Enos, undadiammi mesa muane, nasangai Kenan. ¹⁰Puhai undadiam Kenan, tubopi kahua hatu' sapulo lima taunna Enos anna undadiam polepi sanaka-naka änä', muane anna baine. ¹¹Ia ham mane matei kaseha hatu' lima taunna.

¹²Tappana pitu puloi taunna dadinna Kenan, undadiammi mesa muane, nasangai Mahalaleel. ¹³Puhai undadiam

Mahalaleel, tubopi kahua hatu' appa' pulo taunna Kenan anna undadiam polepi sanaka-naka änä', muane anna baine. ¹⁴Ia ham mane matei, tappana kaseha hatu' sapulo taunna.

¹⁵Tappana annam pulo limai taunna dadinna Mahalaleel, undadiammi mesa muane, nasangai Yared. ¹⁶Puhai undadiam Yared, tubopi kahua hatu' tallu pulo taunna Mahalaleel anna undadiam polepi sanaka-naka änä', muane anna baine. ¹⁷Ia ham mane matei kahua hatu' kaseha pulo lima taunna.

¹⁸Tappana sahatu' annam pulo dua taunna dadinna Yared, undadiammi mesa muane nasangai Henokh. ¹⁹Puhai undadiam Henokh tubopi kahua hatu' taunna Yared anna undadiam polepi sanaka-naka änä', muane anna baine. ²⁰Ia ham mane matei kaseha hatu' annam pulo dua taunna.

²¹Tappana annam pulo lima taunna dadinna Henokh, undadiammi mesa muane nasangai Metusalah. ²²Puhai undadiam Metusalah, tubopi tallu hatu' taunna Henokh silombum Puang Allataala anna natuhu'i pa'elo'na. Anna undadiam polepi sanaka-naka änä', muane anna baine. ²³⁻²⁴Dadi tallu hatu' annam pulo taunna naolaam tubo Henokh silombum liu Puang Allataala mane tä'i deem diita pole aka naäkä'um Puang Allataala längäm suhuga.

²⁵Tappana sahatu' kahua pulo pitu taunna dadinna Metusalah, undadiammi mesa muane nasangai Lamekh. ²⁶Puhai undadiam Lamekh, tubopi pitu hatu' kahua pulo dua taunna Metusalah anna undadiam polepi sanaka-naka änä', muane anna baine. ²⁷Ia ham mane matei kaseha hatu' annam pulo kaseha taunna.

²⁸Tappana sahatu' kahua pulo dua taunna dadinna Lamekh, undadiammi

^{‡‡}4:25 Set: kalembasanna, *dibeemmi*.

mesa muane ²⁹nasangai Nuh^{¶¶} aka naua: “Inde äinä' la mebabaam pepakahangaam illaam pengkähänganta indo taongi madahha muasai pala'ta unghähä inde litä' puha natädo DEBATA.” ³⁰Puhai undadiam Nuh, tubopi lima hatu' kaseha pulo lima taunna Lamekh anna undadiam polepi sanaka-naka äinä', muane anna baine. ³¹Ia ham mane matei pitu hatu' pitu pulo pitu taunna.

³²Tappana lima hatu' taunna dadinna Nuh, undadiammi tallu muane anna nasangai Sem, Ham, anna Yafet.

Gau' kadakena hupatau

6:1-8

6 Tappana tuttuam membea' hupatau lako lino anna buda baine nadadiam, ²iya budam äinä'-änä'na Puang Allataala muita indo äinä' daha sikapi'däsam nasuhum napobaine bäbä ia siam anna ia napohäe. ³Pissananna ma'kadam DEBATA naua: “Tä'um la si masäe kupatohho Penabangku illaam kalena hupatau aka taia to la da'da liu. Sapo' handam masäenam ke sahatu' dua puloi taunna kupatubo.”

⁴Tappana sola metindo indo äinä'-änä'na Puang Allataala^{§§} anna äinä' daha to lino, iya kebättäm lambi' napadadiam äinä'. Indo äinä'na mendadi to kuasa yolona anna buda pa'pogausanna molele-lele. Etam too napahandu' anna deenni tau tonggo illaam inde lino.

⁵Tappana näita DEBATA tuttuam kadäkke' gau'na hupatau lako lino anna ingganna pattuju penabanna kadake liu, ⁶iya menassammi DEBATA anna mapi'di' penabanna aka puham untampa hupatau illaam inde lino. ⁷Iam too anna nauam: “La kutallanni

asam ingganna indo puha kupadadi inde lino susi hupatau susi olo'-olo' manahanna anna malaihanna sola olo'-olo' tissollo'na anna ingganna dassi yabo lawwa, aka menassannä' kela tä' oha kupadadi.” ⁸Sapo' tä' ia la ditallanni Nuh aka angga ham ia umpomasannam penabanna DEBATA.

Nuh nasua DEBATA la umpapia kappala'

6:9-22

⁹⁻¹⁰Indem ia tulasanna Nuh:

Deem tallu äinä'na Nuh isanga Sem, Ham, anna Yafet. Indo Nuh mesa to malolo gau' anna anggam ia tä' deem sassainna illaam lino indo wattu eta too. Aka Nuh ia silombum liu Puang Allataala anna natuhu'i pa'elo'na. ¹¹Sapo' ingganna hupatau senga' ma'gau' kadake asam dio olona Puang Allataala, anna ingganna tau illaam inde lino anggam sikalla-kalla tä' deem untauam padanna. ¹²Tappana näita Puang Allataala angga ham kakadakeam dadi illaam inde lino, aka angga hannu umpoelo' elo'na ingganna hupatau, ¹³iya ma'kadam lako Nuh naua: “Puham kukattu la kuhopui ingganna hupatau sola olo'-olo' illaam inde lino. Anna la kutallanni inde lino aka angga ham ma'gau' kadake ingganna hupatau. ¹⁴Dadi papii mesa kappala' le'bo' la muongi. La kaju gofir umpake anna la ma'sapa'-sapa' illaam hoäna. Anna la ullapi' panti' hindinna, sulibanna anna illaanna. ¹⁵Indo kappala' la umpapia la susi inde: tallu hatu' singkum kalandona, lima pulo singkum kalua'na anna tallu pulo singkum malangka'na. ¹⁶Anna la umpapia tallu todo'na anna la umpapai,

^{¶¶}5:29 Nuh: kalembasanna, la mebabaam pepakahangaam.

^{§§}6:4 Indo diuam äinä'-änä'na Puang Allataala deem muuai: to manuhu' lako Puang Allataala, anna deem muuai: malaika'.

malangka'na indo papana la sasingkum umpellei hindinna. Anna la umba'bai dio sa'dena.

¹⁷ La kupasule mala'bu' umbussui inde lino anna mala tallam asam ingganna menabanna illaam inde lino, lambi' mate asam. ¹⁸ Sapo' iko-iko, ma'dandiä' la deem liu kasilombunganta. Anna la tamakoa' indo kappala' solakoa' bainemu, änä'mu anna manintummu. ¹⁹⁻²⁰ Anna la umbaba toi duka' sanda si sapasam ingganna olo'-olo' anna mala tubokoa' pada-pada illaam indo kappala'. Susi ingganna hupanna dassi teem ingganna hupanna olo'-olo' yabona galantangam, la sule asam napellambi'iko anna malai tubo.

²¹ Anna la uhhempum ingganna la malanna diande anna mala deenna' muande sola indo ingganna olo'-olo' umpasola."

²² Iya napogau' asammi duka' Nuh ingganna indo nasuaam Puang Allataala.

Bussu uwai

7:1-24

7 Tappana dadi indo kappala', ma'kadam DEBATA lako Nuh naua: "Aka anggam iko to malolo penaba dio oloku temo, dadi pentamangkoa' inde kappala' sola ingganna sahapummu. ²⁻³ La umbaba pitu pasanna ingganna olo'-olo' la sipäto'na umpake menomba di Kao anna pitu duka' pasanna ingganna hupanna dassi. Sapo' olo'-olo' senga'na anggam la si sapasam umbaba anna mala ingganna hupanna olo'-olo' illaam inde lino membea' asam. ⁴ Aka la pitu ham benginna anna kupatuhummi uham appa' pulo allona appa' pulo benginna. Tä' deem la monda allo bengi, anna mala hopu asam ingganna menabanna, indo puha kupadadi illaam inde lino."

⁵ Iya napogau' asammi Nuh situhu' indo nasuaam DEBATA.

⁶ Annam hatu'um taunna dadinna Nuh anna nabussui uwai inde lino. ⁷ Iya le'ba'im tama kappala' Nuh sola bainena, änä'na, anna manintunna anna mala tä' ia tallam. ⁸⁻⁹ Tamam duka' ingganna hupanna olo'-olo' sola Nuh susinna: olo'-olo' la sipäto'na dipake menomba, olo'-olo' tää'na sipäto' dipake menomba, ingganna hupanna dassi anna olo'-olo' tissorlo'na. Le'ba' asam tama indo kappala' sanda si sapasam situhu' indo nasuaam Puang Allataala Nuh.

¹⁰⁻¹² Tappana lambi' pitu benginna, napahandu'um tuhum uham mähämbä' anna tesse asam uwai ma'kalimbuä dio mai litä'. Appa' pulo allona appa' pulo benginna uham liu napolalam bussu uwai sampe dadi le'bo' asam inde lino. (Wattu eta too tanggala' sapulo pitu bulam dua. Anna Nuh ia annam hatu'um taunna dadinna.)

¹³ Tappana lambi' indo allo puha dipa'tantu, iya tama asammi ia kappala' Nuh sola bainena anna änä'na isanga Sem, Ham, anna Yafet, sola tallu manintunna. ¹⁴ Anna ingganna olo'-olo' ma'bitti' appa'na anna tissollo'na, susi manahanna teem malaihanna, sola ingganna hupanna dassi. ¹⁵ Anna ingganna hupanna olo'-olo' illaam inde lino tungga' sule sanda si sapasam umpellambi'i Nuh illaam indo kappala'. ¹⁶ Anna indo ingganna hupanna olo'-olo' tama kappala', bihäna anna lakinna situhu' pahentana Puang Allataala lako Nuh. Tappana illaam asanni, natutu'iammi DEBATA ba'bana indo kappala'.

¹⁷⁻¹⁸ Appa' pulo allona appa' pulo benginna naolaam uham mähämbä' anna ma'kalimbuä uwai umbussui lino lambi' tiäkä' indo kappala' muäbä lelem yabona uwai. ¹⁹ Anna tuttuam längäm liu uwai lambi' ingganna tanete malangka' nakabu' asam uwai. ²⁰ Längäm liu uwai

sampe nalambi' sapulo lima singkum malangka'na umpellei pusu' tanete handam malangka'.²¹⁻²³ Napasusim too Puang Allataala untallanni ingganna menabanna illaam lino, susi ingganna hupatau, susi ingganna dassi, teem ingganna olo'-olo' tissollo'na, anna olo'-olo' manahanna anna malaihanna yabona galantangam. Sapo' anggam Nuh sola ingganna issinna kappala', tä' ia tallam.

²⁴Iya nabussuim uwai inde lino sahatu' lima pulo benginna masäena.

Mehe uwai

8:1-22

8 Sapo' tä' ungkalembei Nuh Puang Al-lataala sola ingganna olo'-olo' malaihanna anna manahanna indo napasola illaam kappala', lambi' napasule Puang Allataala hibu' ussimbuhu'i indo uwai nasuhum napahandu'um mehe.²⁻⁴ Aka mondam uham anna tä'um ma'kalimbuä liu uwai dio mai litä', nasuhum tuttuam mehe uwai. Tappana sahatu' lima puloi benginna muäbä indo kappala', iya tiandanga'um yabo pusu'na tanete Ararat. Allo eta too tanggala' sapulo pitu bulam pitu.⁵ Iya tahhu' lium mehe uwai lambi' tanggala' mesai bulam sapulo, silosam pole' dokko diita sanaka-naka pusu'na tanete malangka'.

⁶Lessu'i appa' pulo benginna, nabukkaim Nuh indo suleba'na kappala'⁷ anna ullappa'i mesa kadoaja. Sapo' tä'um ma'pasule indo kadoaja aka lao mandam katia'-tia' lako dio mai sampe matti' uwai.⁸ Iya ullappa' pole oom mesa dangam-dangam, aka la napengngissanni battu la mehe gegem uwai.⁹ Sapo' indo dangam-dangam ma'pasule ia sule umpellambi'i Nuh aka tä'pi deem naongei hampo, aka inde lino nalimbäi asampi uwai. Iya umpengkandoammi limanna Nuh tama sulibam anna nahampoi indo

dangam-dangam anna malai tama sule kappala'.¹⁰ Naampai oom pitu benginna anna mane nalappa' oi indo dangam-dangam.¹¹ Tappana kahubenni, sulem indo dangam-dangam untoä salamba' daum zaitun mane naala. Iam too anna naissammi Nuh naua: "Mehe gegem pole' uwai."¹² Iya naampai oom pitu benginna mane nalappa' oi indo dangam-dangam, sapo' tä'um pole' deem ma'pasule.

¹³Tappana tanggala' mesai bulam mesa, iya matti' lium pole' indo uwai. (Wattu eta too annam hatu'um mesa taunna dadinna Nuh.) Nabukkaim Nuh papana indo kappala' anna kanenne'-nenne'i lao. Iya naitam mabangim galantangam.¹⁴ Tappana tanggala' dua pulo pitui bulam dua, mabangi asammi pole' lao galantangam.

¹⁵Pissananna ma'kadam Puang Allataala lako Nuh naua:¹⁶ "Pessub-ummokoa' illaam mai kappala' sola bainemu, änä'mu anna manintummu.¹⁷ Passubunni duka' ingganna indo olo'-olo' umpasola: ingganna dassi anna ingganna hupanna olo'-olo' si yabo galantangam anna mala membea' umponnoi lino."

¹⁸Iya messubummi Nuh sola änä'na anna bainena anna manintunna.¹⁹ Messubum asammi duka' indo ingganna olo'-olo' ma'bitti' appa'na sola tissollo'na anna ingganna dassi pantam ma'mesa sahhupa oi.

²⁰Pissananna umpasitodo'-todo'um batu Nuh naongei mehumala'. Puhai, naalam sanda si sahhupa dassi anna olo'-olo' senga' indo la sipäto'na napake menomba dio olona DEBATA anna natunui yabo indo ongeam pehumalasang, napopemala'.²¹ Iya bubanau' naudu' DEBATA indo tunuam. Napolalam nadandi illaam penabanna naua: "Tä'um la kutädo inde litä' anna tä'um la kutallanni ingganna issinna

inde lino kahana gau' kadakena hupatau susi inde mane puha kupogau', moinna anna kuissam kuua kadake pattuju penabanna hupatau mengkalao dio mai bahinni'na.

²²Dadi maka' tontä liupi da'da' inde lino la deem liu wattu pantanangam anna wattu pamuppusanna bua pengkähä, wattu masäkke' anna wattu makula', wattu kulla' anna palauham, allo anna bengi."

Puang Allataala ma'dandi lako Nuh

9:1-17

9 Puang Allataala untamba' Nuh sola änä'na naua: "Pembea'koa' anna mala umponnoi lao lino pessubummu. ²La nakahea'koa' ingganna olo'-olo' inde lino susi ingganna dassi yabo lawwa, susi ingganna olo'-olo' yabo galantangam, teem olo'-olo' dio uwai. Anna la unguasai' ingganna indo olo'-olo' aka la kupadokkoangkoa' lisu pala'mu. ³Ingganna menabanna mala asanna' muande sola indo to puha kubeengkoa', ingganna daungkaju anna bua kaju. ⁴Sapo' anggam sahhupa tä' la mala muandea', indo olo'-olo' tää'na diäläi hahana, aka indo haha ongeanna penaba.

⁵⁻⁶Sapo' diona hahamua' la kutuntu' bala'na. Aka iai too umpatitollo hahana hupatau, la napatitollo duka' hupatau hahana; la olo'-olo' daka umpatei, la padanna siangka hupatau. Aka dipapia hupatau susi hupanna Puang Allataala.

⁷Pembea' lampa'koa' anna mala umponnoi lao lino pessubummu.

⁸⁻⁹Anna la kupadeengangkoa' pa'dandiam sola ingganna pessubummu, ¹⁰sola ingganna olo'-olo' tubo yabona inde lino susinna: ingganna dassi anna ingganna olo'-olo' manahanna anna malaihanna, indo umpasola messubum illaam mai kappala'. ¹¹Indem ia pa'dandiangku: Napahandu' temo tä'um

la kupabussu uwai la untallanni lino sola issinna.

¹²⁻¹³Anna la mendadi tanda pa'dandiangku lako ikoa' sule lako ingganna pessubummua' anna ingganna menabanna indo si umpasola, la si kupakende' sahihangku illaam gabum la umpotandaa' diua la tontä liu pa'dandiangku lako lino sule lako salako-lakona. ¹⁴Dadi kupamellum oi too allo anna tindä' oom sahiha, ¹⁵iya kukilalai oom indo pa'dandiangku matim anna lako ingganna menabanna: indo tä'um deem la kupabussu uwai untallanni ingganna menabanna. ¹⁶Iya kende' oi too kuita sahiha illaam gabum, kukilalai oom pa'dandiangku, indo la tontä sule lako salako-lakona lako ingganna menabanna illaam inde lino. ¹⁷Iam too inde la mendadi tanda pa'dandiangku kupadeengam lako ingganna menabanna illaam inde lino."

Änä'na Nuh

9:18-29

¹⁸⁻¹⁹Indem ia änä'na Nuh napasola messubum illaam mai kappala': Sem, Ham, anna Yafet. Anna iam too inde to tallu nene to naponene hupatau lako lino. Ham ia ambena Kanaan.

²⁰Indo Nuh mendadi mesa to si mengkähä bela'. Iam too handam yolo ma'bela' anggur. ²¹Pissam wattu muihu' anggur Nuh lambi' mäbo', iya lentem-lentem bäbäm ma'kambelä illaam bahunna. ²²Muitanna ambena ma'kambelä indo Ham ambena Kanaan, tappa messubummi umpa'tulasam indo kakanna dua. ²³Sapo' indo ia Sem anna Yafet muala ia sambu' anna naballa'i yabo palempenna anna ma'saha boko'i tama bahum ussambu'i ambena indo kambelängam. Napasindum mennenne' liu lako olona indana muitai ambena kambelängam.

²⁴Tappana kilala Nuh, iya naissammi indo gau'na Ham änä' tämpä'na. ²⁵Nasuhum ma'kada naua:

“La seda ia Kanaan.

La naposabua' pälli' ingganna solasubunna.

²⁶Dipuji sanganna DEBATA, Puang Allataala to napenombai Sem.

La diposabua' di too Kanaan naposabua' Sem.

²⁷La Puang Allataala hi too la umpomalobääm ongeanna Yafet anna la masannam sitadongkongam Sem. Anna Kanaan ia la mendadi sabua'na.”*

²⁸Tallu hatu'pi lima pulo taunna tubo Nuh balinna nabussui uwai inde lino.

²⁹Ia ham mane matei kaseha hatu' lima pulo taunna dadinna.

Pessubunna Nuh

10:1-32

10 Iya indem ia tulasanna Sem, Ham, anna Yafet: Puhanna bussu uwai, iya indo tallu änä'na Nuh pantam undadlam änä', muane.

Pessubunna Yafet

²Yafet undadlam Gomer, Magog, Madai, Yawan, Tubal, Mesekh, anna Tiras.

³Anna Gomer ia undadlam Askenas, Rifat anna Togarma.

⁴Yawan naongeí buttu Elisa, Taris, to Kitim, anna to Dodanim. ⁵Iam inde mai peänäsanna Yawan kabuttuanna to umpangngissi bihim le'bo'. Iam too inde mai peänäsanna Yafet pantam untadongkonni litä'na, tungga' deem basana, situhu' kabuttuanna si mesa-mesa.

Pessubunna Ham

⁶Ham undadlam Kush, Mizraim, Put, anna Kanaan.

⁷Kush ia undadlam Seba, Hawila, Sabta, Raema, anna Sabtekha. Anna indo Raema undadlam Syeba anna Dedan.

⁸Deem änä'na Kush muane isanga Nimrod. Iam too inde tau handam yolo bahani ma'bundu' illaam lino. ⁹Napasilolem DEBATA kamatittaam, nasuhum mendadi mesa to matitta moasu lambi' si naua tau: “La susi hako too Nimrod matitta dio olona DEBATA moasu.” ¹⁰Uhuna tallu kota natomahajai Nimrod dio Sinear, isanga: Babel, Erekh, anna Akad. ¹¹Iam too inde appa' kota napa'pahandu'i umpakalua' kahajaanna sule lako Asyur. Dioi Asyur umpadadim appa' kota: kota Niniwe, kota Rehobot-Ir, kota Kalah, ¹²anna kota Resen dio allä'na Niniwe anna Kalah. Indo Resen mesa kota kasalle.

¹³Anna Misraim ia kabuttuanna to Ludim, to Anamim, to Lehabim, to Naftuhim, ¹⁴to Patrusim, to Kasluhim, anna to Kaftorim. Iya to Kasluhim-mi too naongeí buttu to Filistin.

¹⁵Anna Kanaan ia undadlam Sidon, änä' uluana, anna Het sola ¹⁶to Yebusi, to Amori, to Girgasi ¹⁷to Hewi, to Arki, to Sini, ¹⁸to Arwadi, to Semari, anna to Hamati.

Indo pessubunna Kanaan mentale lao mambela, ¹⁹nasuhum malobä pa'bottoanna mengkalao dio Sidon le'ba' lako tandai Gerar, sule lako Gaza, lako tandai Sodom, Gomora, Adma, Zeboim, anna sule lako Lasa.

²⁰Iam too pessubunna Ham. Pantam untadongkonni litä'na, tungga' deem basana, situhu' kabuttuanna si mesa-mesa.

*9:27 Indo tula' diona Kanaan, Sem, anna Yafet sule lako ingganna pessubunna.

Pessubunna Sem

²¹ Undadiam duka' änä' Sem, kakanna Yafet. Iam ia naongi messubum to Eber.

²² Sem undadiam Elam, Asyur, Arpakhsad, Lud, anna Aram.

²³ Aram ia kabuttuanna to Us, to Hul, to Geter, anna to Mas.

²⁴ Anna Arpakhsad ia undadiam Selah. Selah undadiam Eber.

²⁵ Indo Eber undadiam dua änä' bassim muane, mesa isanga Peleg, kalem-basanna titaba-taba lao, aka titaba-taba lao issinna lino eta too. Anna mesa nasangai Yoktan.

²⁶ Indo Yoktan undadiam ia Almodad, Selef, Hazar-Mawet, Yerah, ²⁷ Hadoram, Uzal, Dikla, ²⁸ Obal, Abimael, Syeba, ²⁹ Ofir, Hawila, anna Yobab. Ingganna ia too pessubunna Yoktan.

³⁰ Indo litä' natadongkonni pessubunna Yoktan mengkalao dio Mesa, sule lako ongeam matanete isanga Sefar, dio tandai mata allo.

³¹ Iam too inde pessubunna Sem. Pantam untadongkonni litä'na, tungga' deem basana, situhu' kabuttuanna si mesa-mesa.

³² Susim too pessubunna änä'na Nuh situhu' pentalena lako si mesa-mesa ongeam. Anna iam too naongi mentale hupatau lako lino puhanna bussu uwai.

**Ongeam malangka'
ma'eham-eham dio Babel**

11:1-9

11 Indo eta too anggapi sahhupa basana hupatau illaam lino. ² Pissananna deem buda tau lao umpeä ongeam dekke tandai mata allo. Ul-lambi'um mesa hante pappä' illaam Sinear, iya hapa'im eta.

³⁻⁴ Ma'pattujuim naua: “Tapapiaia' mesa kota kasalle anna tapapiaia' mesa ongeam ma'eham-eham la tapakende'a längäm langi' malangka'na anna malakia' kaissangam anna ma'mesa liu. Tapapiaa' batu tela la tapomapia lälläna, anna malai makahha.” Iya umpapiaim batu tela sola panti' la napopampanti' mane napahandu'i napake'de'.

⁵ Pissananna sulem DEBATA umpetua' indo kota sola ongeam ma'eham-eham napake'de' hupatau. ⁶ Tappana naita DEBATA, ma'kadam naua: “Taitanna' too inde mai hupatau aka ma'mesam anna mesa basana nasuhum mala napadadi susi indee. Inde mane pa'pahandusanna hi too. Senga'um tia ke dako'um, aka iai too napattuju tä' mala tala sule lako. ⁷ Dadi mapia ke tapentama alla'ia' anta pasisala-salaia' basana, anna malai tä' naissam sibasa-basai.”

⁸ Napateemmi too DEBATA nasuhum tiseumbu' indo hupatau lako lino, lambi' tä'um tahhu' mengkähä umpapia mesa kota kasalle. ⁹ Iam too anna disangaim indo kota “Babel”,† aka etam too DEBATA umpasisala-sala basana ingganna hupatau anna napasisähä'-sähä'i ussambai lao lino.

**Pessubunna Sem sule
lako dadi Abram**

11:10-26

¹⁰ Susi inde tulasanna pessubunna Sem:

Dua taunni puhanna bussu uwai, wattu eta too sahatu'um taunna dadinna Sem, iya undadiammi mesa muane-ane nasangai Arpakhsad. ¹¹ Puhai undadiam Arpakhsad, tubopi lima hatu' taunna Sem anna undadiam polepi sanaka-naka änä', muane anna baine.

†**11:9 Babel:** saidi' tasusi moninna mesa kada illaam basa Ibrani, kalembasanna, sisala-sala.

¹²Tappana tallu pulo limai taunna dadinna Arpaksad, undadiammi mesa muane, nasangai Selah. ¹³Puhai undadiam Selah, tubopi appa' hatu' tallu taunna Arpaksad anna undadiam polepi sanaka-naka änä', muane anna baine.

¹⁴Tappana tallu puloi taunna dadinna Selah, undadiammi mesa muane, nasangai Eber. ¹⁵Puhai undadiam Eber, tubopi appa' hatu' tallu taunna Selah anna undadiam polepi sanaka-naka änä', muane anna baine.

¹⁶Tappana tallu pulo appa'i taunna Eber, undadiammi mesa muane, nasangai Peleg. ¹⁷Puhai undadiam Peleg, tubopi appa' hatu' tallu pulo taunna Eber anna undadiam polepi sanaka-naka änä', muane anna baine.

¹⁸Tappana tallu puloi taunna Peleg, undadiammi mesa muane, nasangai Rehu. ¹⁹Puhai undadiam Rehu, tubopi dua hatu' kaseha taunna Peleg anna undadiam polepi sanaka-naka änä', muane anna baine.

²⁰Tappana tallu pulo duai taunna Rehu, undadiammi mesa muane, nasangai Serug. ²¹Puhai undadiam Serug, dua hatu' pitupi taunna tubo Rehu anna undadiam polepi sanaka-naka änä', muane anna baine.

²²Tappana tallu puloi taunna Serug, undadiammi mesa muane, nasangai Nahor. ²³Puhai undadiam Nahor, dua hatu'pi taunna tubo Serug anna undadiam polepi sanaka-naka änä', muane anna baine.

²⁴Tappana dua pulo kasehai taunna Nahor, undadiammi mesa muane, nasangai Terah. ²⁵Puhai undadiam Terah, sahatu' sapulo kasehapi taunna tubo Nahor anna undadiam polepi sanaka-naka änä', muane anna baine.

²⁶Pitu puloi taunna dadinna Terah undadiammi muane tallu nasangai Abram, Nahor, anna Haran.

Pessubunna Terah

11:27-32

²⁷Susi inde tulasanna pessubunna Terah:

Terah undadiam Abram, Nahor, anna Haran. Inde Haran undadiam mesa muane isanga Lot. ²⁸Tubopi Terah ambena Haran anna matei Haran dio kota kadadianna isanga Ur dio Kasdim. ²⁹Abram sipobaine Sarai anna Nahor ia sipobaine Milka, änä'na Haran anna deempi änä'na Haran muane isanga Yiska. ³⁰Indo Sarai tämänä.

³¹Iya le'ba'um Terah umpellei kota Ur-Kasdim la lako Kanaan sola Abram änä'na anna ampona isanga Lot sola Sarai manintunna, baina Abram. Sapu' sulei lako kota Haran, iya hapa' dio ohi. ³²Dua hatu' limai taunna dadinna Terah, iya matem dio Haran.

Abram napasähä' Puang Allataala

12:1-9

12 Ma'kadam DEBATA lako Abram naua:

"Pelleiko banuanna ambemu, sola botto litä'mu anna sahapummu ammu lao lako ongeam la kupatuhoiangko.

²Anna la kupabudangko pessubummu anna la kupopa'mesa. La kutamba'ko anna la kupakaleam mapia sangammu anna la iko napolalam ditamba' tau buda.

³La kutamba' ingganna to umpa'lambeangko, anna la kutädo ingganna to untädoko. Anna iko napolalam la ditamba' ingganna hupatau illaam inde lino."

⁴⁻⁵Iya mengkalaom Abram dio Haran le'ba' lako lembäna Kanaan untuhu' pepahe'na DEBATA solai Sarai baina, anna Lot änä' uhena, anna ingganna pakkulleanna, sola ingganna sabua'na indo naala dio Haran. Wattunna anna

mengkalaoui Abram dio Haran pitu pulom lima taunna dadinna.

⁶Tappana sulei lako Kanaan, naolam Abram indo botto lambi' sule lako too' kaju tumalumbum ma'sanga dio More sikahuku' Sikhem. Indo ongeam napangngissipi to Kanaan wattu eta too.

⁷Iya umpa'paitaammi kalena DEBATA lako Abram anna ma'kadai naua: "Iam too inde ongeam la kubeem pessubummu."

Iya napapiam Abram mesa ongeam pehumalasang lāngām DEBATA to puha umpa'paitaam kalena.

⁸Puhai ia too umpatahhu'um pa'laoanna lu lāngām mesa ongeam tipatanetena anna mebahunni eta. Indo ongeam naongeti napaitāngā kota Betel anna kota Ai. Tandai katampusam ia kota Betel anna tandai mata allo ia kota Ai. Napapia toi duka' eta too ongeam pehumalasang lāngām DEBATA, anna umpenombai DEBATA. ⁹Dako'i, napellei oom indo ongeam anna umpatahhu' oi pa'laoanna ullelei si mesa-mesa ongeam sule lako Negeb.

Abram Dio Mesir

12:10-20

¹⁰Pissam wattu nalambi' kakobeam tau dio Kanaan tā' deem pada samasāe, napolalam le'ba' Abram messihuhu lako lembāna Mesir. ¹¹Tappana la ullambam katonanna lembāna Mesir, iya umpakahi'dim Sarai baina naua: "Sarai, abana mapi'dā' hupammu. ¹²Dadi maka' naitako to Mesir, tā' mala tala naua: 'Indee baina!' Dadi mannassa anna la dipateiā' kao anna la dipatuboko iko. ¹³Dadi dotam muua: 'Adinnaā', anna malaā' dipatubo anna napakamaja tau aka iko napengngitai."

¹⁴Tappana si'da landa' Abram lako lembāna Mesir, iya tā' deem pada sanapemapiaam to Mesir indo Sarai. ¹⁵Susi siam duka' sanaka-naka to kasalle

illaam kahajaam, muitanna Sarai tappa le'ba' natulasam Firaun tomahaja Mesir naua: "Mapia si'da-si'da indo baine sule." Sampe dipasola Sarai lako banuanna Firaun. ¹⁶Tā' deem pada saumpakamaja Abram indo Firaun aka umpohāe Sarai, nasuhum dibeem Abram buda sabua' susi baine susi muane anna buda duka' domba, sapim, keledai anna unta.

¹⁷Sapo' napalambi'i DEBATA indo Firaun ma'hupa-hupa saki mabanda' sola ingganna to illaam banuanna, aka muala Sarai baina Abram. ¹⁸Iya untambai siahām Abram indo Firaun anna nauaanni: "Akanna ma'pateengko? Akanna tā'i umpandanni muua: 'Baineku hi to kao?' ¹⁹Akanna muua hi iko: 'Adingku', nasuhum kuala kao kupobaine? Alai inde bainemu ammu le'ba'a'." ²⁰Iya umpahentam sanaka-naka tau indo Firaun lao muanta' Abram sola baina anna ingganna ebanganna.

Abram anna Lot sisāhā'

13:1-18

13 Iya mengkalaom Abram sola baina anna Lot dio Mesir lu lako lembāna Negeb umbaba asam ingganna ebanganna. ²Indo Abram tā' deem pada sasugi' aka budam olo'-olo'na sola peha'na anna bulabanna.

³Iya le'ba'um untete mobotto-bottoam susi lembāna Negeb, teem sikahuku'na Betel indo naongeti uhu-uhuna umpake'de' bahum dio alla'na Betel anna Ai. ⁴Nalambi'i indo ongeam pehumalasanganna lessu', iya etam naongeti Abram umpenombai DEBATA.

⁵Indo Lot to napasola Abram buda duka' dombana, bekenna, sapinna, anna bahunna. ⁶Sapo' indo ongeam naongeti, tā' sihua la naongeti sola aka buda sugali' olo'-olo'na. ⁷Napolalam si sipengka-pengka to ma'kambi'na Abram anna to ma'kambi'na Lot. Indo botto napangngis-

sipi to Kanaan anna to Feris wattu eta too.

⁸Iya ma'kadam Abram lako Lot naua: "Setonganna tä' mapia kela sipengkaki', anna la sipengka-pengka to ma'kambi'ta aka to mesaki'. ⁹Sapo' susi indee, mapia ke sisähä'ki'. Inde ongeam taongi, beba'ki', dadi iko la umpise'i. Maka' lu lakoko iko tandai kaihi, iya la lu lakoä' kao tandai kanam. Maka' lu lakoko iko tandai kanam, iya la lu lakoä' kao tandai kaihi."

¹⁰Napaleleim lao matanna Lot, iya naita asammi lao lembäna Yordan tä' deem pada sabuda uwainna, sihhapam bela' DEBATA, anggasanna lembäna Mesir ke lakoi tau kota Zoar. (Wattu eta too, tä'pi natallanni DEBATA Sodom anna Gomora.) ¹¹Iam too anna napohäem Lot indo lembäna Yordan, nasuhum mengkalaom ia lu dekke tandai mata allo. Susim too tulasanna Abram sola Lot wattunna anna sisähä'i. ¹²Iya tohho diom ia lembäna Kanaan Abram, anna Lot ia mebahum dio sikhaku' Sodom, napasindum umpasibala'-bala' kota dio lembäna Yordan. ¹³Indo kota Sodom napangngissi to si angga umpogau' kakadakeam dio olona DEBATA.

¹⁴Tappana sisähä' Lot anna Abram, ma'kadam DEBATA lako Abram naua: "Paleleii lao pali' matammu, mengkalao itim muongi ke'de'. ¹⁵Padai too nalambi'na matammu, padam too la kubeengko sule lako pessubummu, la muampuanna' sule lako salako-lakona. ¹⁶Anna la kupalohom banne taummu lambi' tä' deem moi podo la mesa tau la nabela muissa'i. Aka pessubummu la susi budanna sobä', tä' la dibela diissa'. ¹⁷Laongko leleii ingganna litä' ia too, aka la kubeemmoko."

¹⁸Puhai ia too, mentieli'um Abram anna mebahunni dio sikhaku' too' kaju tumalubum ma'sanga dio Mamre,

sikhaku' Hebron. Iya umpapia oom eta ongeam pehumalasam längäm DEBATA.

Abram untaloi buda tomahaja aka umpesäkäi Lot

14:1-16

14 Pissam wattu, deem appa' tomahaja umpamesa buku, isanga Amrafel tomahajanna Sinear, Ariokh tomahajanna Elasar, Kedorlaomer tomahajanna Elam, anna Tideal tomahajanna Goyim; ²Umbundu' lima tomahaja senga' isanga ia Bera tomahajanna Sodom, Birsya tomahajanna Gomora, Syinab tomahajanna Adma, Syemeber tomahajanna Zeboim, anna tomahaja dio mai Bela battu diua Zoar. ³Padam too duka' umpamesa kalena uhhempum sohodadunna dio lembäna Sidim, indo disangaim temo Le'bo' Mässi'. ⁴Sapulo duam taunna nadakka' bata' ulunna Kedorlaomer tomahajanna Elam sapo' tamai kasapulo talunna taunna, umpamesam buku anna manggebai.

⁵Tappana mentama kasapulo appa'na taunna, ma'mesa pole oom Kedorlaomer sola indo tallu solana tomahaja anna sohodadunna, lambi' untaloi to Refaim dio Asyterot-Karnaim, to Zuzim dio Ham, to Emim dio Syawe Kiryatim, ⁶anna to Hori yabo ongeam tipatanetena isanga Seir sule lako El-Paran bihinna pohiallasam. ⁷Puhai ia too, ma'pasuleim lu lako En-Mispat, indo disangaim temo Kadesy, anna umpentaloi duka' ingganna to Amalek anna to Amori to tohho dio Hazon-Tamar.

⁸Pissananna indo lima tomahaja inggena', tomahajanna Sodom, Gomora, Adma, Zeboim anna Bela (battu diua Zoar), umpamesa buku anna menggebai dio lembä Sidim. ⁹Umbali Kedorlaomer, tomahajanna Elam, Tideal, tomahajanna Goyim, Amrafel tomahajanna Sinear, anna Ariokh, toma-

hajanna Elasar. Dadi lima tomahaja mueba appa' tomahaja. ¹⁰Indo dio lembä Sidim naongei buda hano ter. Pissananna indo tomahajanna Sodom anna Gomora napeä lalanna anna lahihi umpellei pa'bundusam, sapo' buda hi mate aka lämmä' dokko indo hano ter. Anna indo malannapi lahi, lu längänni tipatanetena. ¹¹⁻¹²Indo appa' tomahaja umpamesa buku ingngena', patalo ia, sampe ingganna aka-aka dio Sodom anna Gomora susi membaham-bahanna teem mengkinandena, napamuhu asam lao sola taunna. Moi duka' Lot indo änä' uhenä Abram dipahhim toi sola ingganna kullena, aka tohho dio duka' Sodom.

¹³Iya sule siahham mesa to malahi dio mai pa'bundusam umpa'tulasam Abram diona indo kaha-kaha puha dadi. Indo Abram mesa to Ibrani tohho dio siahhuku' too' kaju tumalumbunna Mamre mesa to Amori. Indo Mamre sola solasubunna isanga Eskol anna Aner sangngim sihondä penaba Abram. ¹⁴Tappana naissam Abram naua: "Disakka änä' uheku," iya mengkalao siahham umpasola änä' isalinna to mateha' ma'bundu', tallu hatu' sapulo kahua tau budanna, anna le'ba'i muula' balinna sule lako Dan. ¹⁵Bengii, umbahe-bahem taunna Abram dio Dan anna mane ma'bundu'. Iya umpahissim lium balinna sule lako Hoba tandai lakona Damsyik. ¹⁶Sampe naala asam sule Abram indo ingganna kulle dipamuhu, duka' Lot indo änä' uhenä, sola ingganna kullena anna ingganna baine sola tau senga'.

Melkisedek umpa'lambeam Abram
14:17-24

¹⁷Puhai untaloi Kedorlaomer sola solana, ma'pasulem Abram. Iya le'ba'um tomahajanna Sodom natammui lako lembäna Syawe, si biasa diuam Lembäna Tomahaja. ¹⁸Susi duka'

Melkisedek tomahajanna Salem mesa sandona Puang Allataala To handam matande le'ba' umbabaam hoti sola anggur Abram.

¹⁹Anna indo Melkisedek umpa'lambeam Abram naua:

"La natamba' dako too Puang Allataala To handam matande To umpadadi langi' anna lino.

²⁰Anna dipa'kasallei sanganna Puang Allataala To handam matande aka puhangko nabeem kapataloam."

Iya naalam Abram indo baham-baham pamuhunna Kedorlaomer anna napehumalasanni bahe sapulona nabeem Melkisedek.

²¹Iya ma'kadam ia tomahajanna Sodom lako Abram naua: "Ala asammi tiko itim membaham-bahanna, sapo' kela mala anna umbeem asannä' ia sule ingganna hupataungku."

²²Sapo' natimba' Abram naua: "Ma'pindaä' dio olona Puang Allataala DEBATAngku To handam matande, anna To umpadadi langi' anna lino,

²³moi la dahum suppi tala kualai kullemu dapaka ia la baham-baham senga'. Aka indana muuai: 'Kao hi to kao anna to makakai Abram.' ²⁴Dadi, tä' kao deem la kualä. Tengkanammi ia indo puhannam naande änä'-änä'ku. Sapo' lu lakona solaku Aner, Eskol, anna Mamre, päbäi mammi ia naala tabana."

Pa'dandianna Puang
Allataala lako Abram

15:1-21

15 Puhai ia too, iya nalipim DEBATA Abram anna napa'tula'i naua: "Daa ummahea' Abram, aka Kao la umpa'tippasangko anna la kubeengko mana' kasalle."

²⁻³Sapo' natimba' Abram naua: "O Puang Allataala DEBATAngku, aka gunana la umbeennä' mana' ke tä'i deem änä'ku? Aka tä'pä' umbeem änä', dadi

inde mai kulle puha umbeennä', indo hi tia sabua'ku Eliezer to Damsyik la umpomana'i."

⁴Natimba' DEBATA naua: "Taia sabua'mu la umpomana' kullemu, sapo' änä' ikalemu." ⁵Iya umpasolam messubum Abram anna nauaanni: "Pentongako längäm langi' anna uhhekengko bintä, ke umbelai. Aka padai too budanna bintä, la padam too duka' budanna pessubummu."

⁶Iya unkatappa'im DEBATA Abram nasuhum nasangai DEBATA to malolo.

⁷Mane ma'kada polei DEBATA naua: "Kaom too untässu'iko illaam mai Ur-Kasdim botto litä'mu anna kutetteko sule eta inde pa'bottoam aka la umpomana'."

⁸Natimba' Abram naua: "O Puang Allataala DEBATAngku, la kuaka susi anna mala kuissam kuua inde litä' la kupomana'?"

⁹Natimba' DEBATA naua: "Alaannä' mesa sapim bihä, mesa beke bihä, anna mesa beke laki sapo' la sangngim tallu taummi dadinna. Anna mesapi duka' bukku' sola mesa dangam-dangam sapo' mangguhannapi."

¹⁰Iya naalaammi Abram DEBATA ingganna indo olo'-olo'. Iya sangngim naseseannim, anna napaokko'i napadua bahhi' napasisabaliäm. Anggam indo bukku' sola dangam-dangam tä' ia naseseanni. ¹¹Tappa sule siahäm buda dassi to peande bale uhhampoi indo bale sapo' nahambai Abram.

¹²Tappana la lendu'i allo, tikahu'du'um Abram sampe limpe' mamma'. Pissananna ham tä' deem pada sakähhä bulunna. ¹³Iya ma'kadam DEBATA lako Abram naua: "Indem ia pahallu la umpengngissanni: pessubummu la mendadi to sule dio botto senga', la diposabua' anna la ullambi' pandahhaam appa' hatu' taunna masäena. ¹⁴Anggam ia ke messubummi la buda kullena pa'botto

nababa. Anna indo to la umposabua'i, la nalambi' duka' pesämbä'ku. ¹⁵Sapo' iko-iko la mahendengko anna la ussi'dim kamasannangam sule lako matemu. ¹⁶Anna la appa'pi too lapi'na pessubummu dio botto ia too, mane ma'pasulei sule eta inde. Aka etapi mane nalambi'i to Amori pesämbä'ku, aka la lempam palem kakadakeam napogau' illaam inde botto la naongei pessubummu."

¹⁷Tappana bengi anna malillim pättäm, iya diitam ongeam api pehambu anna ballo ma'lao-lao illaam alla'na indo bale. ¹⁸Allo eta siam duka' anna umpadadii pa'dandiam DEBATA lako Abram naua: "Ingganna inde litä' la kubeem pessubummu mengkalao dio salunna Mesir sule lako salu Efrat. ¹⁹⁻²¹Nakala'pi litä'na to Keni, to Kenas, to Kadmon, to Het, to Feris, to Refaim, to Amori, to Kanaan, to Girgasi, anna to Yebus."

Hagar anna Ismael

16:1-16

16 Indo baina Abram isanga Sarai tä' liupi keänä'. Sapo' deem mesa sabua'na isanga Hagar to Mesir, ²iya ma'kadam Sarai lako muanena naua: "Muissammi muua tä' dio pala'ku la keänä' aka tä' nabeennä' DEBATA. Dadi pobainei indo sabua'ku umba ke keänä'i anna mala deem änä'ku." Iya untuhu'im duka' pattujunna Sarai Abram. ³Naalam Sarai indo to Mesir, sabua'na isanga Hagar anna nabeenni muanena napobaine. Wattu eta too, sapulom taunna tohho Abram dio lembäna Kanaan. ⁴Tappana sola metindo Abram anna Hagar, iya kebättäm. Naissanni Hagar naua: "Kebättämä'," iya napahandu'um malangka' penaba lako Sarai, puäna.

⁵Iya ma'kadam Sarai lako Abram naua: "Inde kamapi'disangku, iko kasuhunganna. Aka kao umpadokkoangko

lisu pala'mu inde sabua'ku, sapo' mane naissam Hagar naua: 'Kebättää,' anna napa'bahinni'imä'. Sapo' DEBATA ham la umpopa'tadongkonganni inde alla' tapoalla'." ⁶Tappa natimba' Abram naua: "Inde sabua'mu, iko unguasai. Iai too masannanna penabammu iam too la umpogausam." Napolalam napakapi'di' Sarai indo Hagar lambi' le'ba' muälläi kalena.

⁷Iya napellambi'im malaika'na DEBATA dio sikhaku' kalimbuä dio pohiallasam, lalam lako Sur. ⁸Anna nauaanni: "O Hagar, sabua'na Sarai, buttu umbako ngei anna la lu umbako ngei?" Natimba' naua: "Laoä' mälläi umpellei puäku Sarai."

⁹Iya natimba'um malaika'na DEBATA naua: "Pa'pasuleko lako puämu sule ammu beho kalemu lako. ¹⁰Aka Kao la umpalohom banne taummu, lambi' tä' pole la dibela dihekem tanda budanna.

¹¹Iko kebättängko. Anna tä'um la masäe anna undadiammoko mesa muane-ane. Anna la ussangai Ismael,³ aka nahingngiam DEBATA pengkalao'mu.

¹²Sapo' indo änä'mu la susi keledai malaiha. La sipobali asam ingganna hupatau, anna ingganna sahapunna."

¹³Puhanna napa'kadai DEBATA, mekutanam illaam penabanna Hagar naua: "Tappa' si'da-sia haka kuita indo To si meita?" Nasuhum ussangai DEBATA: Iko Puang Allataala To si meita. ¹⁴Iam too anna nasangaim tau indo bujum dio alla'na Kadesy anna Bered, bujum Lahai-Roi (kalembasanna: bujum To tubo To si muitäi).

¹⁵Tappana undadianganni Abram änä' muane-ane indo Hagar, iya nasangaim Abram, Ismael. ¹⁶Kahua pulo annam

taunna dadinna Abram anna nadadian-ganni Hagar Ismael.

Sunna' dipotanda pa'dandianna Puang Allataala lako Abram

17:1-27

17 Tappana kaseha pulona kaseha taunna dadinna Abram, iya umpa'paitaammi kalena DEBATA lako Abram naua: "Kaom too Puang Allataala To Handam Kuasa. La manuhu'ko di Kao anna la tä' deem sassaammu. ²La kupadeem mesa pa'dandiam illaam alla'ta, anna la kupalohom banne taummu."

³Lambi' menomba Abram, iya ma'battakada pole oom Puang Allataala naua: ⁴"Indem ia pa'dandiangku matim: la mendadiko pentoosanna hupatau to la umpangngissi lao mobotto-bottoam. ⁵Dadi mengkalao temo tä'ungko la disangai Abram sapo' la disangaingko Abraham. Aka la kupadadiko pentoosanna hupatau to la umpangngissi lao mobotto-bottoam.

⁶Anna la kupalohom banne taummu to la umpangngissi lao mobotto-bottoam, anna la buda mendadi tomahaja. ⁷Dadi la kupadeem pa'dandiangku illaam alla'ta mengkalao iko sule lako pessubummu la tontä sule lako salako-lakona. Anna Kao Debatammu mengkalao iko sule lako pessubummu.

⁸Aka inde dio mai to messihuhupoko illaam inde litä', sapo' kubeemmokoa' temo mengkalao iko sule lako pessubummu. Ingganna lembäna Kanaan la muampuanna' sule lako salako-lakona; anna Kao Debatanna pessubummu.

⁹Anna napahandu' iko la pahallu muanda'i anna umpalako pa'dandiangku sule lako ingganna pessubummu. ¹⁰⁻¹¹Anna la mendadi tanda

³16:11 *Ismael*: kalembasanna, Nahingngiam Puang Allataala.

pa'dandiangku, la pahallu umpogau'a mengkalao iko sule lako pessubummu: ingganna muane la disunna'.⁹ Aka la mendadi tanda pa'dandiam illaam alla'ta. ¹²Dadi kahuanna too benginna subunna änä'-änä' ke muanei, pahallum disunna'; susi änä'-änä' subum illaam banuammu susi sabua' mualli lako to sulibam, moi anna taia pessubummu. La dipateem lium too lako pada lapi'na pessubummu. ¹³Susi änä' undadianna', susi änä' pangngallimmua', sangngim pahallu disunna' anna mala mendadi tanda lako balemua' pa'dandiangku sule lako salako-lakona. ¹⁴Sapo' ingganna muane to tä' disunna' pahallu la muäläia' lao illaam mai alla'-alla'mu, aka tau ia too untekka pa'dandiangku."

¹⁵Mane ma'kada polei Puang Allataala lako Abraham naua: "Diona bainemu Sarai, tä'um la ussangai Sarai sapo' la disangaim Sara. ¹⁶La kutamba' lambi' undadiam mesa muane-ane la kubeengko. Anna la ia mendadi indona hupatau to la umpangngissi lao mobotto-bottoam. Anna la buda mendadi tomahaja pessubunna."

¹⁷Iya menombam Abraham napasindum metaba anna ma'kadai illaam penabanna naua: "La malapaka tia keänä' tau ke sahatu'um taunna? La malapaka tia keänä' Sara aka kaseha pulom taunna?"

¹⁸Ma'kadam Abraham lako Puang Allataala naua: "Kela mala anna Ismael-i untahima mana'."

¹⁹Sapo' natimba' Puang Allataala naua: "Tää', aka bainemu hia Sara la undadianganko mesa muane-ane anna la ussangai Ishak.[§] Ia la kubeem pa'dandiangku anna la tahhu' liu lako pessubunna. ²⁰Anna diona Ismael la kuhingngiam duka' pelauammu. La kutamba' anna la kupabuda

pessubunna anna la undadiam sapulo dua to ma'indo anna la kupadadi mesa kapahentaam kasalle. ²¹Sapo' pa'dandiangku la lu lako hi tia Ishak indo to la nadadianganko Sara ke taum polei, katenanna inde." ²²Puhai ma'tula', iya le'ba'um Puang Allataala umpellei Abraham.

²³Puhanna ia too, allo eta siam untambaim änä'na Abraham isanga Ismael sola ingganna muane illaam banuanna, susi to subum illaam banuanna teem to naalli; anna nasunna' asanni, situhu' pahentana Puang Allataala. ²⁴Kaseha pulo kaseham taunna dadinna Abraham anna disunna'i. ²⁵Anna Ismael ia, änä'na Abraham, sapulo tallum ia taunna. ²⁶Allo etam too anna disunna'i Abraham sola Ismael änä'na. ²⁷Anna ingganna tau to subum illaam banuanna Abraham sola ingganna to naalli lako to sulibam, pada-pada sangngim disunna' sola Abraham.

**Puang Allataala umbakahui
pa'dandianna lako
Abraham la nabeem änä'**

18:1-15

18 Pissam wattu umpa'patandaam oom kalena DEBATA lako Abraham dio too' kaju tumalumbum ma'sanga dio Mamre. Eta too mahassam muokko' Abraham dio olo bahunna kalaoanna mapana' allo. ²Tappana umbangonganni ulunna, iya naitam tallu tau ke'de'-ke'de' di olona. Tappana nakalesoi indo tau, kumondä siahampellei ba'ba bahunna anna lakoi olona ma'balinguntu' menomba. ³Anna ma'kadai naua: "Oa' puäku, kela mala ungkamaseiä', tä'koa' la melolo bäbä umpenggulebanni inde sabua'mua'. ⁴La dialaangkoa' uwai saidi' umbaseiam

⁹17:10-11 *disunna'*: kalembasanna, *ditille*.

[§]17:19 *Ishak*: kalembasanna, *nepetabai*.

bitti'mu** anna muokko'koa' mellube dio inde too' kaju. ⁵La kualapi hoti saidi' muandea' anna malakoa' maläppu' umpatahhu' pa'laoammu, aka sulekoa' inde ongeanna sabua'mu." Natimba'um naua: "Pateemmi too, situhu' pa'elo'mu."

⁶Tappa le'ba' siahram Abraham tama bahunna umpellambi'i Sara anna nauaanni: "Kandi'i muala tappum setangnga lambusam anna ungkahesse'i umpapia hoti."†† ⁷Mane lumumpa'i Abraham lako ongeam sapinna anna umpise'i änä' sapim handam malompona anna nabeenni sabua'na nakandi'i natunu. ⁸Puhai ia too, mualam bumbungam makko sola bumbungam la diihu' anna indo bale sapim anna napessohängänni dio olona indo tosabena. Anna ke'de'i Abraham dio indo too' kaju sikahuku' tosabena mahassam mangngande.

⁹Puhai mangngande, ma'kadam lako Abraham naua: "Umbam Sara bainemu?" Natimba'im naua: "Illaam bahum."

¹⁰Iya ma'kadam naua: "Setonganna la sule oä' taum pole katenanna inde umpellambi'iko, anna wattu eta too, la keänä'um bainemu Sara, mesa muaneane."

Sapo' nahingngi siam Sara dio ba'ba napemboko'i indo tosabe.

¹¹Indo Sara sola Abraham bassim matusse'um, anna Sara ia yabo palempäm. ¹²Iya tappa metabai Sara aka naua illaam inabanna: "La deempaka tia kende' kamohäeam lako muane inde susim kamatuaangku? Anna muaneku duka' matusse'um."

¹³Ma'kada pole oom DEBATA lako Abraham naua: "Akanna metabai Sara napasindum naua illaam penabanna:

'La malapakä' to kao keänä' inde yabo palempämä'?' ¹⁴Ingganna-ingganna sia tä' deem nakapusa'i DEBATA. Taum pole la suleä' umpellambi'iko anna wattu etam too la deemmi änä'na Sara muaneane." ¹⁵Sapo' ma'baho Sara naua: "Tä' deem metabää'," aka mahea'. Sapo' ma'kada DEBATA naua: "Ä, metabai siangko toda'."

Abraham umpa'sambajangam kota Sodom

18:16-33

¹⁶Iya ke'de'im indo tau anna mengkalaoi anna ma'pahandanni dokko Sodom. Iya natuhu'um Abraham lao naanta'. ¹⁷Ma'pikki'um DEBATA naua: "La kubuniangam daka Abraham inde la kupogau?' ¹⁸Tää', aka Abraham la bu'dä' pessubunna anna la pataloam. Anna ia napolalam la ditamba' ingganna hupatau. ¹⁹Aka Kao puha umpilei anna mala napepaondongam lako ingganna pandadianna anna ingganna pessubunna la tontä liu ma'pogau' situhu' pa'elo'na DEBATA illaam umpogau' kamapiaam anna kamaloloam anna mala kuponnoi, aka puha kudandi lako Abraham."

²⁰Puhai ia too ma'kadam DEBATA naua: "Budam pengkaloa'na tau diona Sodom sola Gomora, aka setonganna tä' deem pada samabanda' dosana. ²¹La lao kupetua' tappa' si'da manii susi gau'na situhu' indo pengkaloa'na tau sule längäm oloku. La kupengngissanni tappa' si'da haka tä' daka?"

²²Iya menggih'i'um indo dua to napasola DEBATA anna le'ba'i lu dokko Sodom. Sapo' ke'de'-ke'de' liupi ia Abraham untingngajoi DEBATA. ²³Mengkahuku'um Abraham lako DEBATA anna mekutanai naua: "La

**18:4 *umbaseiam bitti'mu*: kabiasaanna tau eta too si umbaseiam bitti'na tosabena.

††18:6 *setangnga lambusam*: tallu sukat kiha-kiha 22 lite'.

umpempa'deam dakoka to malolo sola to kadake gau'? ²⁴Maaka ke hapam deempi lima pulo to malolo illaam indo kota, la untallanni siangka indo ongeam? Tä' daka la umpengngitai indo to lima pulo anna malai tä' dipempa'deam indo kota? ²⁵Tä' di too la nalambi' penabammu, DEBATA, la umpempa'deam to malolo sola-sola to kadake gau', indana angga' tontä bábäm to mapia gau' anna to kadake gau'. Sapo' naua inabangku inna tä' siangka la ma'pogau' susi. Aka To Mahhotto'nako to lino tä' umpalako ke taiai malolona muundu'."

²⁶Natimba' DEBATA naua: "Maka' deem kulambi' lima pulo to malolo gau' illaam Sodom, iya tä' la kutallanni aka ia la kupengngitai."

²⁷Ma'kada pole oom Abraham naua: "Setonganna umpobahaniä' kaleku ma'tula' matim Debata moi anna kao indee sobä'ä' anna täiabu. ²⁸Pissananna ke kuhänni lima tau; anggam appa' pulo lima to malolo gau'. La untallanni siangka indo ongeam aka kuhämmi lima tau?"

Natimba' naua: "Tä' la kutallanni ke kulambi'i appa' pulo lima to malolo gau' illaam Sodom."

²⁹Mekutana pole oom Abraham naua: "Anna ke anggam appa' pulo?" Natimba' naua: "Tä' liupi la kutallanni aka indo to appa' pulo la kupengngitai."

³⁰Naua pole oom Abraham: "O Debata, tä'ko la keaha' aka la mekutana polepä' pissam: Anna ke anggam tallu pulo to malolo dio?" Natimba' naua: "Tä' la kutallanni ke deenni tallu pulo."

³¹Ma'kada oom Abraham naua: "Setonganna Debata la umpobahani polepä' kaleku mekutana matim: Anna ke deenni dua pulo?" Natimba' naua: "Tä' la kutallanni ke deenni dua pulo."

³²Naua pole oom Abraham: "Kela mala tä'ko la keaha' Debata, aka la meku-

tana polepä' pissam: Anna ke anggam sapulo to malolo gau' dio, la untallanni siangka?" Natimba' DEBATA naua: "Tä' la kutallanni ke deenni kulambi' sapulo to malolo gau' dio."

³³Puhai ma'tula' lako Abraham, iya le'ba'um DEBATA anna ma'pasule ia Abraham lako ongeanna.

Sodom anna Gomora ditallanni

19:1-29

19 Tappana mahammo, iya landa'um indo dua malaika' dio kota Sodom. Siampu' eta too mahassam ma'oko-oko' Lot dio ba'bana kota Sodom. Naitanna sia indo malaika' tappa ke'de' siahanni natammui anna ma'balinguntu'i menomba. ²Mane ma'kadai naua: "Kela malaa' puäku anna lempängkia' lako banuangku, baseingkoa' bitti'mu ammu pa'bengia'. Makale'pa mebunggi' mane untahhusangkoa' pa'laoammu." Sapo' natimba' naua: "Damom, päbäim too ma'bengi lakokam inde pa'hanteam illaam tängä kota."

³Sapo' nakekke' liu Lot, nasuhum lempä lako banuanna. Iya napapiaammi panggandeam mapia anna nagahaganni hoti takebibi' napandeam. ⁴Tappana la mamma' kalei, iya tibombommi sule to Sodom, mengkalao dio änä' gas-sim sule lako tomatua muane ullebo banuanna Lot. ⁵Anna sikatambai naua: "Umbam indo muane sule bengi itim banuammu Lot? Lappasangangkam mai aka la kibobo' kipasola metindo."

⁶Sapo' messubum siaham Lot napasindum unghahabe' sule tutu' ba'ba anna ma'kadai naua: ⁷"Oa' solasubum, kamaseiä' daa umpogau'a' gau' kadake. ⁸Dotam tia inde dua änä'ku baine mualaa', moi anna tä'pi deem lako muane. Sapo' päbäi bábäm too ia kubeengkoa', anna ia mammoa' umpogausam anna ia, la mapiannaa' in-

abammu. Assala'na tä'koa' untumbu inde tosabeku aka tamahamu' illaam banuangku, iya kao ungonai.”

⁹Sapo' natimba' naua: “Päläiko lao Lot! Akanna iko to sule la meäto' pole? Maka' tä'ko le'ba', la kidahha puhako iko anna itim tau dua illaam banuammu.” Lambi' tuttuam umbussum Lot, anna la uhhubä'i ba'ba.

¹⁰Sapo' bassim uhhuntu' Lot tama banua indo tosave dua mane untutu'i ba'ba. ¹¹Anna mane umpabuta asam matanna indo tau dio olo ba'ba mengkalao to mangguha sule lako tomatua, nasuhum sikasapu pole' umpeä ba'ba sapo' tä'um mala nalambi'.

¹²Mane ma'kadai indo malaika' lako Lot naua: “Deempaka kasahapuammu inde, susinna manintummu haka, änä'mu haka muane, änä'mu haka baine; iya kasahapuam senga'mu haka illaam inde kota? Babai asanni le'ba' messubum illaam mai inde ongeam. ¹³Aka inde ongeam la kitallanni, aka makambammi gau' kadakena, sampe kende'um längäm olona DEBATA pengkalao'na tau buda, nasuhum nasuakam sule DEBATA la untallanni inde ongeam.”

¹⁴Iya le'ba' siaham Lot umpellambi'i indo dua tunanganna änä'na, anna nauaanni: “Pasihha'ia' mai anta le'ba'a' aka inde kota la natallanni DEBATA.” Sapo' nasanga hia indo dua tunanganna änä'na napaningoi.

¹⁵Tappana tibukka'i baja, iya ungegannim Lot indo dua malaika', naua: “Pasihha'i bangom ammu pengkalao siahanna! Le'ba'koa' sola bainemu anna itim dua änä'mu baine indana, indana dappo' sahapukoa' natumä' gau' pepahitanna issinna inde kota.”

¹⁶Sapo' bahakäpäm bäbä Lot nasuhum maela' mengkalao, lambi' naanda'im malaika' limanna sola bainena anna indo änä'na, natette sule lako sulibam kota, aka nakamasei DEBATA. ¹⁷Iya messubunna illaam mai indo kota, ma'kada siaham indo mesa malaika' naua: “Lumpa'koa' lao indana matekoa', sapo' daa umpessaile anna daa untohhoa' dio tipalembäna. Sapo' tahhu' längäm liukoa' tipatanetena indana dappo' sahapukoa'.”

¹⁸Sapo' natimba' Lot naua: “Ui le puäku, kela mala anna tä'kam ussua längäm tanete. ¹⁹Abana puhämä' ungkamasei anna sumpu pa'kamasemu lako kaleku lambi' umpesäkäiä'. Sapo' aka inde yabo tanete umpassuaiä' mambela sugali', iya tä' ahamä' landa' längäm anna nalambi'mä' indo katilakaam, iya la mate siamä'. ²⁰illaammi mesa kota bahinni', mahuku' siapi ia. Mala haka ke lu etangkam, anna malakam nasala kamateam?”

²¹Iya natimba'um indo malaika' naua: “Io, la susim too kupatiolai pelauammu. Tä'um ia la kutallanni illaam kota bahinni'. ²²Pasihha'i lao aka tä'ä' mala ma'pogau' ke tä'ko landa' dekke.” Indo kota natuho Lot mesa kota bahinni', iam too anna disangaim Zoar.‡

²³Iya buttum allo anna landa'i Lot lako Zoar. ²⁴Tapakala, iya tibuloso siaham uba' susi mala'bu' sitonda api yabo mai langi' napatuhum DEBATA muä'bäi Sodom anna Gomora. ²⁵Nasuhum indo dua kota anna ingganna issinna lembä ia too dadi täiabu sule lako tanangam. ²⁶Sapo' messaile ohi ia indo bainena Lot, iya ke'de'-ke'de' ia dadi sia.

²⁷Mebengngi'-bengngi'i, le'ba' siaham Abraham lako indo ongeam naongei ke'de' sitingngajo DEBATA isamai',

‡19:22 Zoar: saidi' tasusi moninna mesa kada illaam basa Ibrani, kalembasanna, bahinni'.

²⁸anna ma'pahandanni lako lembäna Sodom anna Gomora. Iya naitam tumbum hambu sondä' langi' sihhapam buttu dio mai dapo' kasalle.

²⁹Susim too wattunna anna natallannii Puang Allataala ingganna kota dio lembä ia too. Nahingngiam Puang Allataala pelauanna Abraham, napolalam untässu'i Lot dio mai katallanganna indo kota naongei.

Lot sola dua änä'na baine

19:30-38

³⁰Sapo' aka indo Lot mahea' tohho dio Zoar, nasuhum umbabai indo dua änä'na baine le'ba' längäm tipatanetena, anna tohhoi illaam mesa leä. ³¹Pissam wattu, indo änä' uluana umpa'tula'i adinna naua: "Inde ambeta matuam, anna tä'um deem muane inde illaam pa'lembängam la tapomuane anna malaki' keänä'. ³²Dadi tapamäbo'i inde ambeta anna metindoki' sola anna mala deem ullombungam pessubunna ambeta."

³³Tappana bengi, iya umbeemmi anggur ambena naihu'. Pissananna mamma'i, napengngoli'im indo änä' uluana sapo' indo ambena mäbo', nasuhum tä' deem nakilalai indo mahassam napogau'.

³⁴Masiäi, umpa'tula'im adinna naua: "Sabengi balimä' kao metindo sola ambe'. Maka' manii bengi, tapamäbo' polei anna metindoko iko duka' sola anna mala deem ullombungam pessubunna ambeta." ³⁵Tappana bengi polei, iya napamäbo' oom anna indo opi adinna metindo sola, sapo' indo Lot mäbo' sampe tä' deem nakilalai aka napogau'.

³⁶Susim too anna bassim kebättäi indo baine, nakebättäi Lot, ambena. ³⁷Pissananna keänä' indo kakanna, iya dadi muane-ane nasangaim Moab. Iam too nene kabuttuanna to Moab sule lako temo. ³⁸Anna keänä' toi duka' indo

adinna, iya muane duka', nasangaim ia Ben-Ami. Iya iam ia nene kabuttuanna to Amon sule lako temo.

Abraham anna Abimelekh

20:1-18

20 Iya mengkalaom Abraham le'ba' lako lembäna Negeb anna tohhoi dio alla'na Kadesy anna Syur. Iya hapa' diom Gerar Abraham messihuhu. ²Indo anna dioi Gerar, ma'tula' Abraham lako tau diona Sara bainena naua: "Indee solasubungku." Nasuhum Abimelekh tomahaja dio Gerar umpopeala Sara.

³Sapo' tappana bengi, iya sulem Puang Allataala illaam pangngimpi umpellambi'i Abimelekh anna ma'kadai naua: "Tä' mala tala mateko, aka mualako itim baine anna to kemuanem tia."

⁴Sapo' indo Abimelekh tadeempi uhhumbu-humbu Sara napolalam ma'kada naua: "O Debata la umpatei hakoka tiko hupataummu to tä' kasalaam, ⁵aka indo hi tia Abraham muuaannä': 'Solasubungku,' anna indo duka' baine muuaannä': 'Solasubungku.' Dadi inde kupogau' buttu di unä' penaba mapia anna pattuju malolo, aka kusanga tappa' tula'na."

⁶Iya natimba'um Puang Allataala illaam pangngimpi naua: "To, abana kuis-sam kuua inde umpogau' buttu di unä' penaba mapia, nasuhum kulabaiko indana umpogau'ko dosa lako kaleku. Iya iam too anna tä'ungko kupäbäi la uhhumbu-humbu itim baine. ⁷Dadi temo, itim baine pasuleanni lako muanena. Aka indo muanena mesa nabi, la napa'sambajanganko indana mateko. Sapo' angga hia, ke tä'i umpasuleam tä' mala tala mateko sola ingganna hupataummu."

⁸Tappana mebengngi', milli'na sia Abimelekh, untambai siahanni ingganna sabua'na anna natulasanni

indo ingganna kada napalosaiam Puang Allataala illaam pangngimpi sabengi, lambi' sangngim tinggi'gi' mahea'.⁹ Puhai ia too, iya untambaim Abraham indo Abimelekh anna nakutanai naua: "Aka isanga umpogausangkam? Aka kasalaangku matim nasuhum la umpaalaiä' kasalaam kasalle anna la ullambanni pakketauangku? Tä' sugali' sihatam la umpateennä'.¹⁰ Aka pattujummu anna umpateenni?"

¹¹ Iya natimba'um Abraham naua: "Aka kupenaba-nabaam kuua tä' manii si ungkahea' Puang Allataala tau illaam inde pa'bottoam, iya la napateimä' too ke deenni to umpohäe baineuku.¹² Mane deenni, abana solasubum si'da hakam tia, aka sola ambekam sapo' tä'kam sola indo, sapo' sialangkam.¹³ Tappana umpelleiä' banuanna ambeku anna laoä' ma'lele-lele lako botto senga', iya kuuaammi inde baineuku: Maka' ungkaha'ia', la si muua ke deenni tasilambisam: 'Indee solasubungku.'"

¹⁴ Iya napasulem Abimelekh indo Sara lako Abraham anna napasibeempi sanaka-naka sabua'na baine anna muane, anna domba sola sapim.¹⁵ Anna mane nauai Abimelekh lako Abraham: "Illaam inde pa'bottoangku, beba'ko umpise'i ongeam la umpohäena."

¹⁶ Anna mane naua lako Sara: "Puham kubeem solasubummu sasa'bu doi' peha', kamannassaanna lako tau tä'ko deem ma'gau' sala."

¹⁷ Puhai ia too, ma'sambajammi Abraham längäm Puang Allataala lambi' bono' siahäm Abimelekh anna baina sola sabua'na nasuhum malam sule keänä'.¹⁸ Aka ingngena'na napatämänä asam DEBATA ingganna baine illaam banuanna Abimelekh kahana Sara, baina Abraham.

Kadadianna Ishak

21:1-7

21 Indo Sara, nakamasei anna natamba' DEBATA umba susi puha nadandi.² Tappana matuai Abraham, iya lambi'um duka' pa'dandianna Puang Allataala illaam indo wattu puha napa'tantu. Napolalam kebättä Sara anna undadianganni Abraham mesa muane-ane.³ Iya nasangaim Abraham Ishak.⁴ Tappana kahua benginna dadinna Ishak, iya nasunna'um Abraham situhu' pahentana Puang Allataala.⁵ Sahatu'um taunna dadinna Abraham anna dadii Ishak änä'na.

⁶ Iya nauam Sara: "Puang Allataala umpopetabaä',[¶] anna ingganna to umpelele, kassi duka'.⁷ Ingngena'na tä' deem tau la muuaam Abraham: 'La mala ma'pasusu Sara.' Sapo' mala siamä' duka' undadiangam änä' Abraham, moi anna illaammi kamatuaam."

Hagar sola Ismael disua lao

21:8-21

⁸ Tappana dipalappa'i sumusu Ishak aka kasalle-sallem, iya ma'hame-hamem Abraham allo eta too.

⁹ Pissam wattu, naita Sara indo änä'na Hagar to Mesir ma'saleo sola Ishak.¹⁰ Iya nauam Sara lako Abraham: "Suai lao indo sabua' sola änä'na. Aka indo änä' sabua' tä' sihatam la umpomana' sabaheam kulleta, aka mana'na asam änä'ku Ishak."

¹¹ Tä' deem pada samapi'di' penabanna Abraham uhhingngi tula' ia too, aka indo Ismael änä'na duka'.¹² Sapo' ma'kada Puang Allataala lako Abraham naua: "Daa ungasussanni diona inde sabua'mu sola änä'na. Tuhu'i pa'elo'na Sara aka Ishak la naongei buttu pes-

[¶]21:6 *umpopetabaä'*: naua illaam basa Ibrani *Ishak*, kalembasanna, *napetabai*.

subummu situhu' pa'dandiangku. ¹³Susi duka' änä'na Hagar la kupabudaam pessubunna anna mala umpangngissi lao botto, aka änä'mu duka'."

¹⁴Masiäi, iya mebengngi'-bengngi'um bangom Abraham anna mualaanni tinallo Hagar sola Ismael, hoti anna uwai ponno pa'pongngiam, anna napasahihii. Mane nasuai lao sola änä'na. Iya le'ba'um Hagar anna kalao-laoi lako pohiallasam si diuaam Bersyeba, tadeem uwainna.

¹⁵Pissananna puhai indo uwai napa'tinallo, iya umpaokko'um änä'na Hagar dio kationganna. ¹⁶Mane le'ba' senga'i ia muokko', umbai' la sahatu' mete' alla'na, aka naua inabanna: "Tä' la kusaha kuita änä'ku la mate." Iya kaoli-olim sumahho Hagar.

¹⁷Nahingngi Puang Allataala sahhona Ismael, iya ma'kadam malaika'na yabo mai langi' lako Hagar naua: "Aka hiko umpomasussa Hagar? Daa ummahea', aka nahingngim Puang Allataala kama-hanna änä'mu. ¹⁸Laoko bangonganni anna umpakahangai aka la kupabu'dä' pessubunna."

¹⁹Iya napatibukkaammi Puang Allataala matanna Hagar, nasuhum muita mesa bujum. Tappa le'ba' siaham umpangngissi ongeam uwainna anna nabeenni änä'na naihu'.

²⁰⁻²¹Indo Ismael naolaam Puang Allataala, iya tuttuam kasallem duka' anna si tohho dio pohiallasam isanga Paran, anna mendadi mesa to si manähä umbälä'du' olo'-olo'. Anna naalaam indona baine to Mesir napobaine.

Kasitallisanna Abraham anna Abimelekh

21:22-34

²²Pissam wattu sule Abimelekh sola pangngulu sohodadunna isanga

Pikhol, untungka Abraham anna nauaanni: "Si natamba' Puang Allataala ingganna pa'palakoammu. ²³Dadi temo pa'pindako dio olona Puang Allataala anna mala iannapi anna ia si untula' lako kaleku anna lako änä'ku sola ingganna pessubungku. Umba susi penaba mapiangku tama kalemu, la umpateemmi too duka' tama kaleku anna lako issinna inde ongeam muongei messihuhu." ²⁴Iya natimba'um Abraham naua: "Abana la ma'pinda si'dää'."

²⁵Puhai, umpenossoim Abimelekh aka deem mesa bujunna naala bäbä sabua'na Abimelekh. ²⁶Iya natimba'im Abimelekh naua: "Setonganna tä' kuissam menna umpogau'i kaha-kaha ia too. Anna tä' toi deem untulasannä' diona ia too. Maneanna kuissam temo."

²⁷Iya naalam Abraham sanaka-naka domba sola sapim anna nabeenni Abimelekh mane sitalli'i. ²⁸Anna deempi pitu änä' domba bihä napasehe Abraham. ²⁹Iya nauam Abimelekh lako Abraham: "La muaka inde pitu änä' domba umpasehe?"

³⁰Natimba'im Abraham naua: "La kubeengko aka la kamakalesoanna diua indo bujum kao umbo'bä'i."

³¹Iam too anna disangaim indo ongeam Bersyeba, aka naongei sitalli' Abraham sola Abimelekh. ³²

³²Puhai sitalli' dio Bersyeba, iya ma'pasulem Abimelekh sola pangngulu sohodadunna isanga Pikhol lako bottona to Filistin. ³³Natanammi Abraham satoo' kaju tamariska dio Bersyeba. Etam too si naongei umpenombai Puang Allataala DEBATanta To la tontä sule lako salako-lakona. ³⁴Puhai ia too, masäepi tohho Abraham dio bottona to Filistin.

§§21:31 Bersyeba: kalembasanna, bujum kasitallisam.

**Puang Allataala umpangngitai
kamatappasanna Abraham**

22:1-19

22 Lessu' asanni ia too, iya napangngitaim Puang Allataala kamantuhusanna Abraham. Ma'kada Puang Allataala naua: "O Abraham!" Natimba' naua: "Indeä' Debata."

²Iya nauaammi: "Le'ba'koa' lako lembäna Moria sola Ishak änä' mesammu anna pa'pakamajammu, aka la umpehumalasam dio oloku. La kupaissanningko too mesa tanete la muongei untunui."

³Makale'nai mebengngi'-bengngi', iya bangommi Abraham ullapi'i keledainna. Puhai, umbisä'um kaju la napake untunu bua pemala'na, mane mengkalaoi sola Ishak anna dua sabua'na lu lako indo ongeam puha natuhoam Puang Allataala. ⁴Tappana tallungngalloi mel-lao, iya mennenne'um lao Abraham. Iya naita mambelam indo ongeam puha natuhoam Puang Allataala. ⁵Ma'kadam Abraham lako indo dua sabua'na naua: "Tohhongkoa' tiko eta indee sola inde keledai, angki lao kami' sola Ishak menomba eta libam. Puhapi mane ma'pasulekam kipellambi'ikoa'."

⁶Iya naalam Abraham indo kaju la dipake untunu bua pemala' anna napapasannii Ishak änä'na, anna umbabai ia api sola piso anna le'ba'i situhu'. ⁷Mahassanni mellao, iya ma'kadam Ishak lako ambena naua: "O ambe'!" Natimba' Abraham naua: "Aka änä'ku?" Meku-tanam Ishak naua: "Deemmi inde api sola kaju sapo' umba hi änä' domba la dipake mehumala'?"

⁸Natimba' Abraham naua: "Puang Allataala hi tia la umpatoka änä' domba la dipake mehumala'." Iya umpatahhu' lium pa'laoanna.

⁹Tappana landa'i Abraham sola änä'na lako indo ongeam napassuai Puang Allataala, iya napapiam Abraham ongeam

pehumalasam. Anna napapaii lokona indo kaju, mane umpungoi Ishak änä'na anna napalängänni indo ongeam pehumalasam yabona indo kaju la ditunu. ¹⁰Puhai, ussintä'um pisona Abraham aka la ussamballem änä'na. ¹¹Sapo' tappa metamba malaika'na DEBATA naua: "O Abraham, O Abraham!" Natimba' naua: "Indeä' Debata."

¹²Iya ma'kadam naua: "Daa umpatei itim änä'mu. Tä' deem la muaka, aka kuissammi pole' kuua umpa'kasallei si'da-siaä' anna umpengkahea'i, nasuhum ahu'ko la umbehoannä' änä'mu, moi anna anggam mesa-mesa."

¹³Mennenne'um lao Abraham iya muitam mesa domba laki dio boko'na, tikädä tandu'na lako kuhha. Iya naalam Abraham indo domba anna napehumalasanni, bala'na änä'na. ¹⁴Iya nasangaim Abraham indo ongeam: "Napatoka DEBATA la dipahalluanna." Iam too anna naua lium tau sule lako temo: "DEBATA la umpatoka kapahalluam yabo tanetena."

¹⁵⁻¹⁶Iya metamba pole oom kapenduanna indo malaika'na DEBATA yabo mai langi' naua: "Ma'battakada DEBATA naua: Umpa'pindaiä' sanganku, aka untuhu' asammi ingganna kupahentaangko, anna tä' deem mabanda' penabammu umbehoannä' änä'mu moi anna anggam mesa-mesa. ¹⁷Dadi la kubeengko tamba' sanda silapi' tadipuha-puha anna la kupasusi budanna bintä yabo langi' pessubummu, anna la susi budanna bungim dio bihim le'bo'. Anna indo pessubummu la untaloi asam ingganna balinna. ¹⁸Anna pessubummu la kupa'polalanni pa'tamba' lako issinna lino, aka untuhu' si'da-siangko pahentaku."

¹⁹Puhai ia too, ma'pasulem Abraham lako indo dua sabua'na, anna pada-padai

mengkalao lu lako Bersyeba, anna tohho dioi.

Pessubunna Nahor

22:20-24

²⁰ Puhai indo kadadlam yabo tanete Moria, napelelem Abraham diua indo Milka bainena Nahor, solasubunna Abraham, undadiammi kahua änä' sangngim muane. ²¹ Uluana isanga Us, mane huntunnai isanga Bus, anna mane Kemuel, iam ia ambena Aram, ²² mane sihuntum-huntunni Kesed, Hazo, Pildas, Yidlaf anna Betuel. ²³ Iya Betuel-um ia ambena Ribka. Iam too indo kahua änä'na Milka nasibalii Nahor, solasubunna Abraham. ²⁴ Anna deempi baine senga'na Nahor isanga Reuma, undadiam duka' änä'. Uluana isanga Tebah mane nahuntunnii Gaham, Tahash, anna Maakha.

Mualli pa'ku'busam Abraham la napallamunni bainena

23:1-20

23 Tappana sahatu' dua puloi pitu taunna dadinna Sara, ² iya matem dio Kiryat-Arba battu diua Hebron, lembäna Kanaan. Iya lakom Abraham nasahoi anna ma'bahata.

³ Puhai ia too ke'de'um Abraham umpellei bainena, lao umpellambi'i to Het anna nauaanni: ⁴ "Kao-kao to mes-sihuhua' illaam alla'-alla'mua', kela mala anna umbeennä' kao duka' pa'ku'busam inde illaam bottomua', aka la kupallamunni baineku."

⁵ Iya natimba'im naua: ⁶ "Pehingngii inde tula'ki matim: Iko mesako to kasalle illaam alla'-alla'ki, dadi petua' mammi pa'ku'busam handam mapianna la umpallamunni bainemu. Aka täkam deem moi podo la mesam ullabaiko."

⁷ Iya menombam Abraham dio olona indo to Het, ⁸ anna ma'kadai naua: "Oa' solasubungku, ke ahungkoa' la kulamum inde baineku, kamaseiä' anna umpelauannä' lako Efron änä'na Zohar ⁹ umba ke nabeennä' indo leä dio bihim bela'na, dio Makhpela. Aka la kualli situhu' angga'na, anna malai kupa'ku'bu'ium kao duka' illaam alla'-alla'mua'."

¹⁰ Wattu eta too, dio siam duka' heem Efron, illaam alla'-alla'na solana. Iya iam mentimba' lako Abraham, nasa'bii ingganna indo to Het to diona heem ma'hempum dio ba'ba tama kota, ¹¹ naua: "O puäku, pehingngii inde tula'ku matim: Indo bela' anna leä la kubeengko, mapianna hia aka nahingngi asam duka' solaku illaam inde kota. Dadi laongko too pallamunni bainemu."

¹² Iya menomba pole oom Abraham dio olona indo to Het. ¹³ Anna mane ma'kadai lako Efron nahingngi asam to dio heem naua: "Kela mala anna umpehingngii inde tula'ku: La kubaja'ko situhu' allinna indo bela'. Alai inde allinna anna malai kupallamunni to mateku."

¹⁴ Natimba'um Efron naua: ¹⁵ "O puäku, setonganna, indo litä' anggam la appa' hatu' doi' peha' allinna, iya la dipoakam ia duka' pada.* Pangku'bu'im too to matem."

¹⁶ Iya tä'um nataba'i Abraham, naissa' manda ham indo doi' peha' appa' hatu' situhu' timbangam doi' indo si biasa napake to ma'balu'. Mane nabaja'i lako Efron nasa'bii indo ingganna to Het mahassam ma'hempum.

¹⁷ Susim too tulasanna indo bela'na Efron dio Makhpela, tandai mata al-lona Mamre, anna mendadii bela'na Abraham. Indo litä', deem bela' deem

*23:15 *appa' hatu' doi' peha' allinna*: Setonganna buda indo allinna, sapo' naägä'i naua la dipoakam ia duka' pada. Batai Yer. 32:9.

leä anna ingganna kaju-kajunna sule lako tubo diona katonam. ¹⁸Indo litä' naakui asam indo ingganna to Het, to ma'hempum dio ba'ba kota eta too, napemammi'um Abraham. ¹⁹Iya ungu'bu'um Sara Abraham napatama leä dio Makhpela, tandai mata allona Mamre, battu diua Hebron dio lembäna Kanaan. ²⁰Susim too tulasanna indo bela' sola leä anna mendadii pa'ku'busanna Abraham.

Kakebaineanna Ishak

24:1-67

24 Pissananna matua punalai Abraham anna puham natamba' DEBATA illaam mentu' salu katuboanna, ²iya ma'kadam lako indo sabua'na handam matua, to si ullima'ianni kullena, naua: "Anda'i ahena too' apangu, ³aka la ma'pindako umpa'pindai Puang Allataala DEBATanta To unguasai langi' anna lino, aka tä'ko la mualaam Ishak änä'ku baine illaam inde Kanaan, botto kuongi. ⁴Sapo' la lu lakoko botto kadadiangu umpeänganni baine peänäsanna solasubungku."

⁵Iya mekutanam indo sabua'na naua: "Indo ke mokai indo baine la umpellei banuanna natuhu'ä' sule eta inde botto muongi? Iya la mala haka kubaba Ishak lako botto kadadiammu?"

⁶Sapo' natimba' Abraham naua: "Jagako! Deem ai la umpasola änä'ku lako! ⁷Puang Allataala DEBATanta to unguasai langi', puhaä' natässu'i illaam mai banuanna ambeku sola botto kadadiangu. Anna puhaä' napa'tula'i anna ma'pinda naua: 'Inde pa'bottoam la kubeem pessubummu.' DEBATA hi too la ussua malaika'na muyoloanganko anna malai ullambisam baine änä'ku.

⁸Sapo' maka' indo hi baine moka un-tuhu'ko, iya lappa'ungko iko dio mai

inde pinda. Anggam ia tä' si'da-si'dako ia pole' mala la umbaba änä'ku lako."

⁹Iya muanda'im too' apanna Abraham indo sabua'na anna ma'pindai, la natuhu' asam ingganna indo nasuaam.

¹⁰Iya mualam sapulo untana puäna indo sabua'na sola ma'hupa-hupa baham-baham keangga' anna le'ba'i lako Nahor mesa kota dio lembäna Aram-Mesopotamia. ¹¹Landa'i, iya napatohhom indo unta dio sulibanna kota ma'päsä dio ampe' bujum aka kahubemmi, anna biasa wattunnam si lao tumimba baine.

¹²Mane mengkaalai längäm DEBATA naua: "O Puang Allataala DEBATA to napenombai puäku Abraham, pa-sule lakoannä' pattujungku allo temo. Pa'patandanni pa'kamasemu lako puäku Abraham. ¹³Indemä' ampe' bujum ke'de' anna la suleim too änä' daha issinna inde kota la tumimba. ¹⁴Kela mala anna dadii susi indee: maka' ma'kadaä' kuua: 'O änä' daha, kamaseiä', beennä' itim uwaimmu la kuihu', anna natimba'i naua: 'Io, ihu'i. Moi untamu la kupaihu' toi.' Iya la iam too umpoelo' la napobaine sabua'mu Ishak. Anna la kuissammi too kuua lko umpa'patandaam pa'kamasemu lako puäku."

¹⁵Tä'pi teppu' tula'na, iya sule siahm mesa änä' daha ussompom timbaanna isanga Ribka, änä'na Betuel. Indo Betuel änä'na Milka nasibalii Nahor, solasub-unna Abraham. ¹⁶Indo änä' daha tä' deem pada samapia anna tä'pi deem lako muane. Iya le'ba'um dokko indo ba'ba bujum anna umpangngissii timbaanna, mane ma'pasulei dio mai sule.

¹⁷Iya lumumpa' siahm indo sabua' napellambi'i anna nauaanni: "Kamaseiä' beennä' saidi' itim uwai illaam timbaammu la kuihu'."

¹⁸⁻¹⁹Natimba'im naua: "Io puäku." Tappa napatuhum siahm anna nabeenni naihu' mane nauai: "La

kutimbaam duka' uwai inde mai untamu anna dipasanta'i naihu."

²⁰Mane natolanni indo timbanna dokko pahabam anna lumumpa' polei lao tumimba, aka la napaihu' asam indo untana sabua'na Abraham. ²¹Iya mengkamma'um indo sabua' napetua'-tua' aka la napengngissanni battu la napasule lako si'da hi DEBATA battu la tä' di indo nalaoui.

²²Tappana puha asanni mangngihu' indo unta, naalaammi indo sabua' antim-antim mesa sola ponto sapasam sangngim bulabam täsä', (la'bi lime gram mabanda'na indo antim-antim anna la'bi sahatu' gram mabanda'na indo ponto). ²³Anna mekutanai naua: "Tulasannä! Mennako keänä'? Deem daka la kiongei dio banuanna ambemu aka la ma'bengikam?"

²⁴Iya natimba'im naua: "Isanga ambeku Betuel änä'na Milka nasibalii Nahor. ²⁵Anna dio banua deem ongeam la malaa' muongei anna buda toi dalame la napa'päsi untamu sola humpu' la naande."

²⁶Tappa ma'balinguntu' siaham indo tau umpuji sanganna DEBATA ²⁷naua: "Kupa'kasallei sangammu Puang Allataala DEBATA to napenombai puäku Abraham. Aka tontä liu pa'kamasemu anna kamanontongammu lako puäku, lambi' untetteä' lako banuanna solasubunna."

²⁸Iya lumumpa' siaham indo änä' daha lako banuanna anna natula' asanni ingganna indo kaha-kaha ia too. ²⁹⁻³⁰Nahingnginna Laban änä' muanena Ribka tula'na indo tau napalanda' Ribka, anna naita toi indo antim-antim sola ponto napake, tappa le'ba' siaham lumumpa' umpellambi'i indo tau lako ampe' bujum. Iya nalambi'um tontäpi ke'de'-ke'de' dio ampe' untana sikahuku' bujum. ³¹Napa'kadaim naua: "O to natamba' DEBATA, daa muindea'

sulibam, maikoa' talulako banua aka dipatokaammokoa' ongeam anna ongeanna untamu dio!"

³²Iya le'ba'im tama banua indo tau. Naleppa'iammi Laban teke'na indo untana anna mane naalaanni dalame la napetindoi untana sola kinande la napandeam. Puhai ia too, nababaammi sule uwai nabaseiam bitti'na indo sabua'na Abraham sola solana. ³³Tappana dibabaanni sule kinande, ma'kadam indo tau naua: "Tä'pä' la mangngande ke tä'pi puha kupalanda' inde tula' kubaba." Natimba'im Laban naua: "Iya maka' deem kada la umpalambi', iya pa'tula'ungko."

³⁴Iya ma'kadam naua: "Kao-kao sabua'naä' Abraham. ³⁵Tä' deem pada sanatamba' DEBATA indo Abraham lambi' sugi' si'da-si'da. Aka nabeem buda domba, sapim, bulabam, peha', sabua' baine anna muane, unta anna keledai. ³⁶Anna Sara bainena indo puäku, moi anna matuam sapo' malapi keänä' mesa muane. Anna ingganna kullena indo puäku puha asammi nabeho lako änä'na. ³⁷Indo puäku puhaä' napopa'pinda naua: "Tä'ko la mualaam baine Ishak änä'ku illaam inde Kanaan, botto kuongei. ³⁸Sapo' la lu lakoko kasahapuanna ambeku umpeänganni baine peänäsanna solasubungku."

³⁹Iya kutimba'um kuua: 'Maaka susi ke mokai sule indo baine?'

⁴⁰Nauaammä': 'DEBATA to kutuhu'i, la ussua malaika'na la umpasolaiko anna mala sule lako pa'laoammu anna malai ullambisam baine inde änä'ku, peänäsanna ambeku. ⁴¹Iapi mane lappa'i pa'pindamu dio oloku ke le'ba'ungko lako kasahapuangku. Moi anna tä'ko la nabeem baine, sapo' la lappa'ungko dio mai pa'pindamu.'

⁴²Iya inggena' suleku dio sa'dena indo bujum, ma'sambajammä' kuua: 'O

Puang Allataala DEBATA to napenombai puäku Abraham, kela mala Iko la umpasule lakoi inde to kulingkai tentomai illaam pa'laoangku. ⁴³Indemä' ampe' bujum ke'de'-ke'de', kela mala anna dadii susi indee: Maka' deem mesa änä' daha sule tumimba, anna kuuaanni: "Kamaseiä' beennä' itim uwaimmu saidi' la kuihu'," ⁴⁴anna natimba'i naua: "Io, ihu'i. Moi la naihu'na untamu la kutimbaampi duka'." Iya la iam too umpoelo' la napobaine änä'na puäku.'

⁴⁵Tä'pi teppu' indo ma'sambajannä' illaam penabangku, iya sule siaham Ribka ussompo timbaanna anna le'ba'i dokko bujum tumimba. Kuuaammi: 'Kamaseiä' beennä' kuihu'.'⁴⁶Tappa napatuhum siaham yabo mai palempenna indo timbaanna anna nauai: 'Ihu'ko, moi untamu la kupaihu' toi.' Iya kuihu'um anna napaihu'pi duka' untaku.

⁴⁷Puhai, kuuaammi: 'Mennako keänä'?' Natimba'um naua: 'Isanga ambeku Betuel änä'na Nahor nasibalii Milka.' Iya kupadekkesammi antim-antim dio illäna anna mane kupapontoi. ⁴⁸Mane ma'balinguntu'ä' umpuji anna umpa'kasallei sanganna Puang Allataala DEBATA to napenombai puäku Abraham. Aka natetteä' illaam inde pa'laoangku umpeä baine pessubunna solasubunna puäku la napobaine änä'na. ⁴⁹Dadi temo, tulasannä' la ungkamasei haka' indo puäku anna untuhu'i pa'elo'na la tä'daka, anna kuissanni menggihi' senga'."

⁵⁰Iya natimba'im Laban sola Betuel naua: "Inde kaha-kaha buttu yabo mai DEBATA, tä'um kami' kiissam la kisangai pole. ⁵¹Petua'i, diom olomu Ribka, pasolam too lao anna mala napobaine änä'na puämu, umba susi kadanna DEBATA."

⁵²Nahingnginna sabua'na Abraham indo tula'na, tappa muoppä umpenombai DEBATA. ⁵³Mane mualai poheba bulabam sola peha' anna

poheba sampim nabeem lako Ribka. Anna deempi duka' lako indona anna Laban. ⁵⁴Puhai ia too, mangngandeim anna muihu'i indo sabua' sola ingganna solana. Iya ma'bengiim eta.

Mebengngi'i bangonnim anna ma'kadai indo sabua' naua: "La ma'pasulengkam lako puäku."

⁵⁵Sapo' natimba' Laban sola indona naua: "Tä'pi tappa la umpasolaa' lao, la indepakia' moi podo si sapulom benginna mane le'ba'koa'." ⁵⁶Iya natimba'um naua: "Tä'unna' la ullabai, aka napasule lakom DEBATA inde pa'laoangku. Dadi lappasammä' anna malaä' ma'pasule lako puäku." ⁵⁷Iya nauam: "Mapia ke tatambaiiä' Ribka anna iai dipopa'elo'." ⁵⁸Iya untambaim Ribka anna nakutanai naua: "La maelo'ungko le'ba' sola inde tau?" Natimba'um naua: "Io, maelo'ä'."

⁵⁹Iya le'ba'um Ribka sola indo to si untahinanai mengkalao bahinni'na sola indo sabua'na Abraham anna solana. ⁶⁰Iya napa'lambeammi solasubunna Ribka naua:

"O Ribka la buda hi too pessubummu la massa'bu-sa'bu anna la makkatalo-talo aka la ia umpangngissi bottona ingganna balinna."

⁶¹Iya ma'kalili'um Ribka sola ingganna sabua'na baine anna mengkalaoi ussäkei unta le'ba' untuhu' indo tau. Susim too inde anna le'ba'i Ribka napa-sola sabua'na Abraham.

⁶²Siampu' eta too, sule Ishak buttu dio mai bujum Lahai-Roi aka tohho dioi lembäna Negeb. ⁶³Pissananna kahubenni messubummi Ishak anna kalao-laoi lako pa'kambisam. Pissananna ma'pahandammi lao, iya muitam unta sule ma'tuhu'-tuhu'.

⁶⁴Siampu' eta too mennenne' lao Ribka, iya muitam Ishak. Tappa tuhum siaham yabo mai untana ⁶⁵anna mekutanai lako sabua'na Abraham naua: "Menna

dipe muane umpenandaikia' dipe mai?" Iya natimba'im naua: "Iam too indo puäku." Iya muala siaham lullunna Ribka anna napa'lullunni umbalu-balui lindona.

⁶⁶Pissananna silambi'i, iya umpa'tulasammi Ishak indo sabua' ingganna pa'palakoanna illaam pa'laoanna. ⁶⁷Iya untettem Ribka Ishak anna napasolai tama bahunna Sara indona Ishak, anna napobainei. Umpakamaja si'da-si'da Ribka indo Ishak, iya tipakahangam pole' pi'di' penabanna, indo puha mate indona.

Pessubunna Abraham nasibalii Ketura

25:1-6

25 Iya kebaine pole oom Abraham umpobaine isanga Ketura. ²Indo bainena undadiangam äna' Abraham isanga Zimran, Yoksan, Medan, Midian, Isybak anna Suah. ³Yoksan undadlam Syeba sola Dedan. Pessubunna Dedan to Asyur, to Letush, anna to Leum. ⁴Midian undadlam Efa, Efer, Henokh, Abida, anna Eldaa. Padam too indee pessubunna Ketura.

⁵Moinna anna napa'manasam asammi lako Ishak ingganna kullena Abraham, ⁶sapo' wattunna anna tubopi, deempi napebeem lako äna' senga'na, indo to nasibalii baine senga'na. Anna mane ussui indo äna' senga'na le'ba' mentieli' dekke tandai mata allona Kanaan umpellei Ishak.

Kamateanna Abraham

25:7-11

⁷⁻⁸Indo Abraham tä' deem pada samahendem. Sahatu' pitu pulo lima taunna tubo mane matei lambi' le'ba' sungnga'na ma'mesa sola nene to naponene. ⁹Tapana matei, iya naku'bu'um äna'na, indo isanga Ishak sola Ismael. Napatama leä dio Makhpela tandai mata allona

Mamre. Yolona, ongeam ia too litä'na Efron to Het, äna'na Zohar. ¹⁰Sapo' litä' ia too naalli Abraham lako indo to Het. Iya etam too dipallamunni Abraham sola Sara bainena. ¹¹Puhai mate Abraham, iya natamba'um Puang Allataala Ishak, äna'na. Wattu eta too, si tohho dio sikhaku' bujum Lahai-Roi.

Pessubunna Ismael

25:12-18

¹²Indem ia tulasanna pessubunna Ismael, äna'na duka' Abraham nasibalii Hagar to Mesir, sabua'na Sara:

¹³⁻¹⁶Ismael undadlam sapulo dua äna', uluana isanga Nebayot, mane huntunnai Kedar, Adbeel, Mibsam, Misyma, Duma, Masa, Hadad, Tema, Yetur, Nafish anna Kedma. Indo sapulo dua äna'na Ismael, iam too kabuttuanna sapulo dua kahajaam, anna sanganna tondä'na sola ongeanna pantam dipakonai sanga kalena. ¹⁷Sahatu' tallu puloi pitu taunna dadinna Ismael anna kattui penabanna lambi' le'ba'um sungnga'na ma'mesa sola nene to naponene. ¹⁸Indo pessubunna umpangngissi alla'na Hawila anna Syur, tandai mata allona Mesir memba'ba lako Asyur. Tä' deem si siala penaba pessubum senga'na Abraham.

Esau sola Yakub

25:19-34

¹⁹Indem ia tulasanna peänäsanna Ishak, äna'na Abraham:

Abraham undadlam Ishak. ²⁰Indo Ishak appa' pulo taunna dadinna anna umpobainei Ribka, adinna Laban äna'na Betuel, mesa to Aram to buttu dio mai Padan-Aram.

²¹Pissananna aka indo Ribka tämänä, iya mengkaalam Ishak längäm DEBATA umpa'sambajangam bainena. Nahingngiam DEBATA sambajanna Ishak napolalam kebättä Ribka. ²²Indo mahassam

kebättä nasi'dimmi angga' si sibobo' indo änä'-änä' illaam tambu'na. Iya nauam Ribka: "Akanna malaä' nahua inde susi?" Napolalam mengkaala längäm DEBATA.²³ Iya ma'kadam DEBATA naua: "Itim ungebättängam dua pentoosam kasalle.

La undadiangko dua pentoosam kasalle la sisähä'.

Adinna la mentondom anna la umpahe' leko' kakanna."

²⁴Tappana lambi' wattunna, iya keänä'um hendu bassim muane. ²⁵Indo kakanna malea kuli'na anna kebulu susi poheba kebulu. Iam too anna disangaim Esau.[†] ²⁶Natuhu' siam änä' kaduanna muanda'i kambutu'na kakanna. Iam too anna disangaim ia Yakub.[‡] Annam pulom taunna Ishak anna keänä'i bainena.

²⁷Indo dua änä'-änä' tuttuam lobo' anna kasalle. Pengkähänganna ia Esau to menduhu' anna si napohäe tohho lako kaliane. Sapo' Yakub ia hapa' penaba anna anggam ia si tohho dio bahum.

²⁸Indo Ishak umpakamaja puha ia Esau, aka bassa' si napande bale pesea'. Sapo' Ribka ia, umpakamaja puha ia Yakub.

²⁹Pissam wattu mahassam ma'nasu Yakub, iya sulem Esau buttu dio mai kaliane, anna tadea' punala nasi'dim.

³⁰Iya ma'kadam lako Yakub naua: "Tadea' punalää', beennä' kao saidi' itim bue malea unnasu." (Iam too anna si diuammi duka' Esau, Edom.)[†] ³¹Iya natimba'im Yakub naua: "Io, mala sapo' la umbeennä' kakakaammu."

³²Iya nauam Esau: "La kuaka duka' inde kakakaam, tä' siam deem gunana ke mate tadea'ä'." ³³Iya nauam Yakub: "Pa'pindako yolo keta umbeem si'daä'." Iya ma'pindam yolo Esau,

anna napebeenni kakakaanna lako Yakub. ³⁴Puhai ia too, iya mualam hoti sola sabaheam indo bue malea anna nabeenni. Iya naandem anna mangngihu' mane ke'de'i le'ba'. Susim too lalanna umpa'bahinni'i kakakaanna Esau.

Ishak tohho dio Gerar

26:1-35

26 Pissam wattu sule oom kakobeam susi indo anna tubopi Abraham. Napolalam le'ba' Ishak lako Abimelekh tomahajanna to Filistin anna tohhoi dio Gerar, ²aka puha umpa'paitaam kalena DEBATA lako Ishak anna nauaanni: "Daa ullao lako Mesir, tohho dioko indo to la kutulasangko. ³Etangko too pessihuhu anna la kukambi'ko sola kutamba'. Ingganna inde pa'lembängam la kupadokkoangko lisu pala'mu sule lako pessubummu. Aka la kupasule lako pa'dandiangku, indo puha kudandi lako ambemu Abraham. ⁴Anna la kupalohom banne taummu susi budanna bintä yabo langi' anna inde pa'lembängam la kupadokkoam asam lisu pala'na pessubummu. Anna pessubummu la kupa'polalanni pa'tamba' lako issinna lino. ⁵Ia anna la kutamba'koa' aka untuhu'i liu tula'ku Abraham anna naanti manda' natobe matoto' ingganna kada pepaondongangku, pahentaku, sola pelahangangku." ⁶Iya iam too anna tohho diom Gerar Ishak.

⁷Tappana napekutanaanni pa'botto diona bainena, iya nauam Ishak: "Indee adingku hi to kao." Moka muuai: "Baineku," aka naua inabanna: "Deem

[†]25:25 *Esau*: kalembasanna, *kebulu*.

[‡]25:26 *Yakub*: kalembasanna, *muanda'i kambutu'*.

[†]25:30 *Edom*: kalembasanna, *malea*.

manii pa'botto umpateiä' aka umpohäe Ribka aka mapidä' hupanna."

⁸Masäe-säei tohho Ishak dio indo ongeam, iya ma'pahandam-handammi Abimelekh tomahajanna to Filistin dio suleba'na, iya muitam Ishak sianda'i lelem Ribka. ⁹Iya untambaim Ishak anna nauaanni: "Bainemu hiko päläe' itim baine, akanna muua hiko: 'Adingku?'" Iya natimba'im Ishak naua: "Aka kupenaba-nabaam kuua deem manii umpateiä' ke kuuai: 'Baineku'."

¹⁰Nauaammi Abimelekh: "Akanna ma'pateem ongko duka? Kahapa too deemmi taungku umpempakoi bainemu, iya umpaalaingkam kami' sala."

¹¹Iya napa'pahentaammi Abimelekh lako ingganna pakketauanna naua: "Menna-menna la ussägai Ishak, battu haka bainena, tä' mala tala dipatei."

¹²Tappana lambi' wattunna pengkähängam, mangngambo'um duka' Ishak, iya tiluppi' sahatu' pa'taunna aka natamba' DEBATA. ¹³Tuttuam kehängäm katomakakaanna, sampe sugi' tangkalantungam. ¹⁴Tä' deem pada sabuda dombana, bekenä, sapinna anna sabua'na, nasuhum nakembuhui to Filistin. ¹⁵Lambi' natambunni asam to Filistin indo bujum puha nabo'bä' sabua'na Abraham, ambena Ishak, indo anna tubopi.

¹⁶Iya ma'kadam Abimelekh lako Ishak naua: "Äläiko lao kalemu illaam mai inde botto litä'ki aka kuasa puha hangko iko anna la kami'." ¹⁷Iya le'ba'um Ishak lu lako lembä Gerar anna tohho dioi mebahum. ¹⁸Dioi, iya nakahoi asammi sule Ishak indo bujum nabo'bä' Abraham indo anna tubopi, aka natambunni to Filistin tappana mate Abraham. Anna nasangai asam sule Ishak indo bujum susi pasangainna Abraham.

¹⁹Pissam wattu umbo'bä' bujum sabua'na Ishak dio lembä ia too, iya

ullambi'um uwai tä' deem pada sabuda. ²⁰Sapo' keaha' indo to ma'kambi' dio Gerar lako indo to ma'kambi'na Ishak naua: "Anungki hi to kami'," sampe nasikalla-kallai. Iam too anna nasangaim Ishak indo bujum, Esek, kalembasanna Kasikallaam.

²¹Iya nabo'bä' polem ia indo sabua'na Ishak bujum senga' sapo' napa'keahasam pole oo, sampe nasikalla-kallai oo. Iya nasangaim ia Ishak, Sitna, kalembasanna Kasipobaliam. ²²Mentieli' pole oom kapentallunna umbo'bä' bujum. Iya tä'um pole' napa'keahasam. Iam too anna nasangaim ia Ishak, Rehobot, kalembasanna Dipalonda, aka naua: "Temo nabeemmakia' DEBATA kalondaam tohho illaam inde pa'lembängam la membea' lampa'."

²³Mane mengkalaoi Ishak lu lako Bersyeba. ²⁴Bengii umpa'paitaammi kalena DEBATA lako Ishak anna ma'kadai naua: "Kaom too inde Puang Allataala to napenombai ambemu Abraham. Daa ummahea' aka la kuundu'ko. La kutamba'ko anna lohonna banne taummu aka puha kudandi lako sabua'ku Abraham."

²⁵Puhai ia too, umpapiam pehumalasangam anna umpenombai DEBATA dio indo ongeam. Iya mebahummi Ishak eta, anna umbo'bä' polei bujum sabua'na.

²⁶Iya sulem Abimelekh dio mai Gerar napasola Ahuzat to si umbalii ma'pikki' anna Pikhol pangngulu sohodadunna umpellambi'i Ishak. ²⁷Iya mekutanam Ishak naua: "Akanna sulekoa' umpellambi'ia'? Kusanga unghahi'di'ä' indo lessu' sampe ussuaä' illaam mai botto litä'mua'."

²⁸Natimba'um naua: "Kiissam kiuä iko to naundu'ko DEBATA. Dadi kiuä: Mapia ke umpadeengkia' kasitallisam. La sitalli'kia' ²⁹anna mala tä'ko deem la ma'pogau' kadake

lako kami', umba susi kami' duka' tä'kam deem la ma'gau' kadake matim. Sapo' tontäkäm ma'pogau' mapia matim anna kipäbäingko le'ba' sola kamasannangam indo lessu'. Anna abana hia to natamba'ko DEBATA.”

³⁰Iya natosabe manappam Ishak, napande anna napaihu'. ³¹Makale'nai mebunggi', sitalli'um pole'. Puhai ia too, nauaammi Ishak: “La masakke hakoa' too illaam panggola-lalangammu.”

³²Allo eta siam too anna sulei sabua'na Ishak ma'tula' naua: “Indo bujum kibo'bä' kilambi'um uwai.” ³³Iya nasangaim Ishak indo bujum, Syeba, kalembasanna Kasitallisam. Susim too tulasanna anna disangai indo kota Bersyeba[§] sule lako temo.

³⁴Tappana appa' puloi taunna Esau, iya umpobainem dua änä' daha to buttu dio mai Het, isanga Yudit, änä'na Beeri, anna Basmat, änä'na Elon. ³⁵Baine ia too umpomasussa penabanna Ishak sola Ribka.

Yakub napa'lambeam Ishak

27:1-40

27 Tappana matuai Ishak anna tä' toom paita, untambaim Esau änä' uluana anna nauaanni: “O änä'ku.” Natimba'im naua: “Aka ambe?” ²Ma'kada oom Ishak naua: “Temo änä'ku illaammä' kamatuaam anna umbai' tä'um la masäe-säeä' tubo. ³Dadi alai bälä'du'umu sola batunna anna laoko umpemäläiannä' olo'-olo' lako kaliane. ⁴Anna umpapia-piannä' nasunna susi indo si kupohäena anna umbabannä' sule kuande. Puhai too kuande, iya kupa'lambeammoko baju anna tubopä'.”

⁵Sapo' nahingngi Ribka indo mahassam ma'tula' Ishak lako Esau. Tappana lessu' Esau lako kaliane

umpapemälängam ambena, ⁶iya naua siaham Ribka lako Yakub: “Mane balinna kuhingngi ambemu umpa'tula'i Esau naua: ⁷‘Pemäläiannä' olo'-olo' anna umpapia-piannä' nasunna. Puhai too kuande, iya kupa'lambeammoko dio olona DEBATA baju anna tubopä'.” ⁸Dadi temo, pehingngii manappai inde tula'ku, änä'ku, anna umalakoi. ⁹Lakoko pa'kambisanta ammu pise'i dua änä' beketa maloppä'na, angku papia-pianni nasunna ambemu indo si napohäena. ¹⁰Anna umbabaanni lao ambemu. Puhai too naande ikom napa'lambeam baju anna tubopi.”

¹¹Sapo' natimba' Yakub naua: “O indo' la mala haka tia aka kebulu ia Esau anna tä' kao kebulu kaleku. ¹²Indo ke nasapui ambe' kaleku anna naissanni pole' naua: ‘Natipüä',’ iya tä' ohi tia la mepa'lambeam sapo' la metädo hi.” ¹³Natimba' indona naua: “O änä'ku, kao ham umpendudum asanni petädona. Tuhu' di inde tula'ku, laongko alai indo beke.”

¹⁴Iya le'ba' siaham duka' Yakub naala indo beke anna nabeenni indona napapia-pia nasunna, susi indo si napohäe Ishak. ¹⁵Mane naalai Ribka poheba handam mapianna Esau änä' uluana, indo si naanna dio banuanna, anna umpapohebai Yakub änä' tämpä'na. ¹⁶Puhai, naalam indo lollo' beke nasapu'iam bahokona Yakub sola limanna aka tä' ia kebulu. ¹⁷Mane nabeenni Yakub indo pa'nasunna sola hoti puha napapia.

¹⁸Iya nababaammi lao ambena anna nauai: “O ambe'.” Natimba'im Ishak naua: “Mennako änä'ku?” ¹⁹Natimba' Yakub naua: “Kao Esau änä' uluamu. Sulemä' aka indo ussuaannä' dadi asammi. Bangommoko ammu tadongkom anna muandei inde bale

[§]26:33 *Bersyeba*: kalembasanna, *Bujum Kasitallisam*.

pesea' pa'nasungku anna malaä' umpa'lambeam." ²⁰Natimba' Ishak naua: "O äänä'ku, muaka hiko susi anna masimpani muala?" Natimba' Yakub naua: "Aka nakamaseiä' Puang Allataala DEBATA to umpenombai nasuhum bale' deem kulambi'." ²¹Iya ma'kada oom Ishak naua: "Mahuku'-huku'ko mai äänä'ku angku sapuko battu Esau si'da hako."

²²Iya lakom duka' Yakub anna nasapui ambena, iya nauam: "Maka' pa'kadammu Yakub-ko, sapo' maka' limammu susi Esau." ²³Tä' naissam Ishak naua Yakub dia, aka kebulu limanna susi limanna Esau. Iam too anna napa'lambeammi. ²⁴Mekutana pole siapi Ishak naua: "Esau si'da hakoka isanga inde ä?" Natimba' Yakub naua: "Io, Esau-ä."

²⁵Iya nauam Ishak: "O äänä'ku beemmä' itim bale kuande, anna puhapi kuande mane kupa'lambeangko." Iya nabeemmi Yakub indo bale naande sola anggur naihu'. ²⁶Puhai, nauam ambena: "Maingko eta inde äänä'ku anna muudunnä'."

²⁷Iya lakom Yakub muudum ambena, iya nauduum Ishak susi bauanna Esau aka pohebana napake, lambi' napa'lambeammi naua:

"Tä' deem pada sabubanau' bauanna äänä'ku, susi bauanna bela' natamba' DEBATA.

²⁸La Puang Allataala hi too umpatuhungangko uham yabo mai langi' anna napomalompoangko bela'mu anna umpomahombo gandummu, nasuhum la kembua tiluppi'-luppi' anna anggurmu la lempam pole' pa'pongngemmu.

²⁹Anna ingganna hupatau, iko la napengkahea'i

anna ingganna issinna mobotto-bottoam iko la napenombai.

Iko toi la umpahe' ingganna solasubummu

anna la napenombaiko pessubunna indomu.

Anna la seda to untädoko,

la ullambi' tamba' to umpa'lambeangko."

³⁰Tappana puha napa'lambeam Ishak, iya le'ba' siahm Yakub. Tä' masäe le'ba'na Yakub, iya sulem duka' Esau kakanna umbaba indo pesea'na. ³¹Iya napapia-piam duka' nasunna mane nababaanni lao ambena anna nauai: "Bangommoko ambe' anna muandei inde bale pesea' kubabaangko anna malaä' umpa'lambeam." ³²Mekutanam Ishak naua: "Mennako?" Naua: "Kao ambe', Esau äänä' uluamu."

³³Tappa tikkedu' Ishak lumalla' anna ma'kadai naua: "Maka' susi, iya menna hi umpemäläii indo olo'-olo' anna nana-sui nababaannä' sule inggena'? Puham kuande indo tä'poko sule, anna puham kupa'lambeam la naampuum mengkalao temo sule lako salako-lakona."

³⁴Tappana nahingngi Esau tä' deem pada samasussa penabanna lambi' kaoli-oli sumahho anna nauai: "Pa'lambeannä' kao duka' ambe'."

³⁵Nauam Ishak: "Sule adimmu natipuä', iya balim naala indo pa'lambe la kubeengko."

³⁶Nauam Esau: "Kapenduangkum natipu, naande sanganna Yakub.** Puham naala kakakaangku, naala pole oom inde pa'lambe la dibeennä'. Tä'um isanga deem pa'lambe senga' la umbeennä', ambe'?" ³⁷Sapo' natimba' Ishak naua: "Aka iam kupadadi puämu anna ingganna solasubunna kupadadi sabua'na anna puham kupalahui gandum sola anggur. Dadi temo tä'um

**27:36 Yakub: kalembasanna, muanda'i kambutu' battu diua natipu.

iko deem la kubeengko, änä'ku.”

³⁸Ma'kada oom Esau lako ambena naua: “Anggam isanga sahhupa pa'lambe muampuam ambe'? Pa'lambeannä' kao duka!” Mane kaoli-oli oi sumahho.

³⁹Natimba'im Ishak naua:

“Ongeammu iko la sikambela litä' malompo
anna tä' la nalambi' uham yabo mai langi'.

⁴⁰Anggam iko la tubo dioko mai kabahaniammu

anna la napahe'ko adimmu.

Sapo' pissam wattu la umbela hi too ullappasam

kalemu dio mai pampahe'na adimmu.”

Yakub le'ba' lako Laban

27:41–28:9

⁴¹Iya umpemannaammi Yakub Esau, aka indo pa'lambe la nabeem ambena lu lako hi Yakub adinna. Iya sipa'tula'um kalena naua: “Tä'um masäe anna matem ambe'. Lessu'i too pa'bahataam, kupateim Yakub.”

⁴²Tappana naissam Ribka pattujunna Esau, indo änä' uluana, iya untambaim Yakub, indo änä' tämpä'na, anna nauaanni: “Napemannaangko too Esau aka indo pa'palakoammu le, mohäe la napateiko. ⁴³Dadi la untuhu'i inde tula'ku: pasihha'i muäläi kalemu lako kakangku, indo isanga Laban dio Haran.

^{44–45}Anna la masäeko tohho dio sampe mehe aha'na kakammu anna nakalembeim indo gau'mu, mane kusuai tau lako naalako. Aka tä' kusaha la simbaha änä'ku dua pa'de illaam allo sangngallo.”

⁴⁶Anna mane ma'kada Ribka lako Ishak naua: “Tä' punalam kusaha muita liu inde lako baine to Het napobaine Esau. Maka' la baine eta pole oo naala Yakub napobaine, dota pissammä' mate.”

28 Iya untambaim Yakub Ishak anna napa'lambeanni mane

nauaanni: “Tä'ko too la umpobaine baine to Kanaan le. ²Sapo' la le'ba' siahangko lako banuanna nenemu Betuel dio Padan-Aram anna umpobainei mesa änä'na muhemu Laban. ³La natamba' di too Puang Allataala To Handam Kuasa kasialaammua', lambi' membea' pessubummu anna mala mendadiko nene to naponene to la umpangngissi lao mobotto-bottoam. ⁴Anna la Puang Allataala hi too untamba'ko sule lako pessubummu umba susi tamba'na Abraham anna la umpuängam inde botto litä' muongei messihuhu. Aka puham nabeem Puang Allataala Abraham.” ⁵Susim too inde tulasanna anna le'ba'i Yakub nasua lao Ishak. Iya le'ba'um lako Padan-Aram lu lako Laban änä'na Betuel to Aram. Indo Laban kakanna Ribka. Ribka indona Yakub sola Esau.

⁶Puhai ia too, iya naissammi duka' Esau naua puham umpa'lambeam Yakub Ishak mane nasuai le'ba' lako Padan-Aram, la umpeä baine dio. Naissam toi duka' naua indo anna umpa'lambeanni Yakub, napakahi'di naua: “Tä'ko la muala baine to Kanaan la umpobaine.” ⁷Anna naissam toi Esau naua: “Indo Yakub untuhu'i pa'elo'na indo' sola ambe', nasuhum le'ba' lako Padan-Aram.” ⁸Naissam pole' Esau naua: “Inde ambeku tä' päläe' umpohäe baine to Kanaan.” ⁹Iam too anna le'ba'um lako Ismael änä'na Abraham anna napobainei änä'na isanga Mahalat, adinna Nebayot, sulibanna indo bainena dua.

Mangngimpi Yakub dio Betel

28:10-22

¹⁰Iya umpelleim Bersyeba Yakub le'ba' lako Haran. ¹¹Tappana ullambi' mesa ongeam, iya tohhom eta ma'bengi aka lendu'um allo. Pissananna la metindoi, mualam

mesa batu napa'allongam. ¹²Mamma'i napangngimpim deem mesa eham ke'de' mengkalao dio ampe'na sule längäm langi' tämpä'na. Anna naita buda malaika'na Puang Allataala ma'sisolä buso' lu längäm lu yabo mai indo eham. ¹³Anna dio sa'dena ke'de' DEBATA ma'kada naua: "Kaom too Puang Allataala DEBATA to napenombai nenemu Abraham sola Ishak ambemu. Inde litä' muongei metindo la kubeengko anna la naampuam sule lako pessubummu. ¹⁴Pessubummu la susi budanna sobä' illaam lino anna ia la umpakalua' inde ongeam lao pali'. Anna iko sola pessubummu la kupa'polalanni pa'tamba' lako ingganna hupatau illaam lino. ¹⁵Pengkilalai, Kao la muundu'ko anna la kuolaam umba-umba muongei le'ba'. Anna la kutetteko sule eta inde. Tä'ko la kutampeam lambi' kupasule lako ingganna indo puha kudandiango."

¹⁶Tappa kilala siahm Yakub anna nauai: "Mane kuissam di kao, inde siam ia päläe' DEBATA." ¹⁷Sapo' mahea' lambi' ma'kada naua: "Tä' deem pada samakähhä inde ongeam. Tä' mala tala banuanna Puang Allataala anna ba'bana suhuga."

¹⁸Tappana masiä, mebengngi'-bengngi'pi, iya bangommi Yakub anna mualai indo batu napa'allongam anna napake'de'i mane natolloi minnä' aka la napotanda pengkilalaam. ¹⁹Indo ongeam nasangai Betel (si diuam yolona kota Lus).

²⁰Anna mane ma'samaja Yakub naua: "Maka' naundu'ä' Puang Allataala anna naolaam illaam pa'laoangku, anna nabeennä' kinande sola poheba, ²¹lambi' ma'pasuleä' sule lako banuanna ambeku sola masakke, iya la Iam too DEBATA kupenombai. ²²Inde batu kupake'de' la mendadi ongeam kafenombaam längäm Puang Allataala.

Anna la si kubeem liu DEBATA bahe sapulona ingganna aka-aka napadokkoannä' lisu pala'ku."

Yakub umpengkähängam Laban ussaho Rahel

29:1-30

29 Iya umpatahhu'um pa'laoanna Yakub le'ba' lako mesa botto tandai mata allona Kanaan. ²Pissananna muitam mesa bujum dio pa'kambisam anna dio ampe'na ma'päsä tallu laoam domba aka si biasa dipaihu' eta. Indo bujum ditutu'i batu kasalle. ³Maka' ti-hempum asammi ingganna domba dio indo ongeam, iya nabengka'im lao indo batu ingganna to ma'kambi' anna umpaihu' dombana. Puhai too napaihu', natutu'i oom sule.

⁴Iya mekutanam Yakub lako indo to ma'kambi' naua: "Oa' solasubum buttu umbakoa' ngei?" Natimba'im naua: "Buttu diokam mai Haran." ⁵Mekutana pole oom Yakub naua: "Muissam daka'i indo Laban ampona Nahor?" Naua: "Io, kiissam." ⁶Mane naua polei: "Masakke-sakke mammaka?" Natimba'i oom naua: "Io masakke-sakke mammi ia. O, dipe ham ia mai änä'na baineä, isanga Rahel sule duka' uhhamba dombana ambena." ⁷Iya nauam Yakub: "Budapi allo, taiapi wattunna pa'hambaam. Paihu'ia' mane laokoa' unγκambi' polei." ⁸Nauam: "Tä'pi la mala kipaihu' ke tä'i sule asam dombaki. Iapi mane kibengka'i tutu'na inde bujum anna kipaihu' dombaki ke sule asammi."

⁹Mahassampi sipa'tula', sule siahm Rahel uhhamba dombana ambena aka abana ia duka' si ma'kambi'. ¹⁰Naitanna Yakub indo Rahel änä'na Laban muhena, uhhamba dombana Laban, iya le'ba' siahm lako indo bujum anna nabengka'i tutu'na anna napaihu' indo dombana. ¹¹Puhai, muudummi Rahel napasindum

kaoli-oli sumahho aka tilalla' sugali'.¹² Anna muuaanni Rahel: “Kao änä'naä' Ribka solasubunna ambemu.” Iya lumumpa' siaham Rahel lako banuanna lao natulasam ambena.

¹³Naissanna Laban naua: “Sule Yakub,” tappa lumumpa' siaham le'ba' natammui. Silambi'na änä' uhena, tappa nakalapu'i napasindum naudum mane napasolai lako banuanna. Iya natula' asammi Yakub kasuhunganna anna sulei umpellambi'i Laban. ¹⁴Nauaammi Laban: “Tappa' si'da hi tia sikahuku' punalapakia' too kita.”

Iya tohhom dio Yakub sabulam.

¹⁵Pissananna ma'kadam Laban lako Yakub naua: “Taia lalanna la umpengkähängam bäbää', moi anna sipohapuki'. Tulasannä', sanaka la kusahoiangko?”

¹⁶Indo Laban deem änä'na dua bassim baine. Indo kakanna isanga Lea anna adinna isanga Rahel. ¹⁷Indo Lea maleke matanna,^{††} sapo' Rahel ia mapi'dä' pa'kaleanna anna hupanna. ¹⁸Indo Yakub tä' deem pada saumpohäe Rahel nasuhum naua lako Laban: “La kupengkähängangko pitu taunna ke umbeennä' Rahel kupobaine.”

¹⁹Natimba' Laban naua: “Dotam tia iko kubeem anna la tau senga'. Taindem sola.” ²⁰Iya mengkähäm Yakub pitu taunna ussaho Rahel. Sapo' indo pitu taunna naangga' anggam sanaka amo benginna tandana umpohäe sugali' Rahel.

²¹Puhai ia too ma'kadam Yakub lako Laban naua: “Sundummi pa'tempoku matim pitu taunna. Beemmä' indo tunangangu aka la kupobainem.”

²²Iya untambai asammi tau Laban issinna indo kota aka la

dipa'hame-hameim kasialaanna. ²³Sapo' bengii, taia Rahel dibeem sapo' Lea hi nababaam lao Laban. Iya iam napasola metindo Yakub. ²⁴(Napasolaampi Laban mesa sabua'na baine isanga Zilpa la si napakasua-sua Lea.)

²⁵Tappana mebengngi' mane naissam di Yakub naua: “Lea hia inde nabeennä' kupobaine!” Tappa le'ba' siaham umpellambi'i Laban anna nauaanni: “Akanna umpateennä' pua'? Kusanga inna kuua la mengkähää' ke Rahel-i kusaho. Akanna untipüä'?”

²⁶Natimba'i Laban naua: “Situhu' kabiasaangki tä' tia mala adinna la muyoloi kakanna kemuane. ²⁷Dadi paganna'i yolo pitu benginna dihame-hamei kasialaammu Lea, mane kubeem poleko Rahel umpobaine, sapo' la ussaho polepi duka' pitu taunna.”

²⁸Iya natuhu'im Yakub. Tappana ganna'i pitu benginna, nabeemmi pole' Rahel änä'na napobaine. ²⁹(Napasolaam duka' mesa sabua'na baine isanga Bilha la si napakasua-sua Rahel.) ³⁰Iya napasolam duka' Yakub indo Rahel metindo. Napohäe puha ia Rahel anna la Lea. Mane napahandu' oi umpengkähängam Laban pitu taunna.

Peänäsanna Yakub

29:31–30:24

³¹Tappana naita DEBATA tangkaam ia dipohäe Lea, iya la dipakebättä' ia, sapo' Rahel ia tämänä. ³²Iya kebättäm ia Lea lambi' undadiam mesa muane-ane nasangai Ruben^{‡‡} aka naua: “Tandana naita DEBATA kamasussaanguku anna temo tantu napohäemä' pole' muaneku.”

³³Iya kebättä' pole oom lambi' undadiam oom mesa muane-ane, iya nasan-

^{††}29:17 *maleke matanna*: Illaam basa Ibrani tä' makaleso kalembasanna, battu la maleke hi matanna battu la makuhibo-hibo hi.

^{‡‡}29:32 *Ruben*: kalembasanna, *nenne'i*, *mesa muane-ane*, anna saidi' tasusi moninna mesa kada kalembasanna, *naitam kamasussaanguku*.

gai ia Simeon^{¶¶} aka naua: “Nabeem poleä' DEBATA inde änä' aka nahingngi naua tä' liupi dipohäe.”³⁴ Kebättä pole oom kapentallunna anna undadiam oo mesa muane-ane, iya ma'kadam Lea naua: “La mendekke'um too pole' penabanna muaneke aka tallum änä'ki sangngim muane.” Iam too anna nasangaim Lewi.^{§§}

³⁵Iya kebättä pole oom kapengngappa'na lambi' undadiam oo mesa muane-ane. Iya nauam Lea: “Inde temo la umpujiä' sanganna DEBATA.” Iam too anna nasangaim Yehuda.* Lessu'i ia too tä'um pole' keänä'.

30 Tappana nasi'dim Rahel tä' liupi ia keänä', iya ungekembuuium kakanna lambi' ma'kada lako Yakub naua: “Beennä' änä' aka maka' tää', iya la mateä'.”² Lambi' keaha' Yakub lako Rahel naua: “Kao haka to kao Puang Allataala to umpatämänäko?”³ Ma'kada Rahel naua: “Inde Bilha sabua'ku, pasolai metindo anna mala nadadiangannä' änä' anna deenni kao duka' peänäsangku.”

⁴Iya nabeemmi Yakub napobaine indo sabua'na anna napasolai metindo.⁵ Iya kebättäm Bilha lambi' undadiangammi Yakub mesa muane-ane.⁶ Ma'kada Rahel naua: “Ma'papada-pada Puang Allataala anna nahingngiam pelauangku lambi' nabeemmä' mesa änä' muane-ane.” Iam too anna nasangaim Dan.†

⁷Kebättä oom Bilha sabua'na Rahel, iya undadiangam pole oom Yakub mesa muane-ane, änä' kaduanna na-

sibalii Bilha.⁸ Ma'kada Rahel naua: “Masäem kupeä lalanna la umpentaloi kakangku, iya kao patalo.” Iam too anna nasangaim Naftali.‡

⁹Tappana nasi'dim Lea tä' lium keänä', muuaammi Yakub: “Pobainei inde Zilpa sabua'ku.”¹⁰ Indo Zilpa sabua'na Lea undadiangam Yakub mesa muane-ane.¹¹ Ma'kada Lea naua: “Kehongko'ä'.” Iam too anna nasangaim Gad.¶

¹²Pissananna keänä' pole oom Zilpa kapenduanna, undadiangam oom Yakub mesa muane-ane.¹³ Iya ma'kada oom Lea naua: “Tä' deem pada samasannänä', tä' mala tala nauaännä' sabaineku: ‘To masannam.’” Iam too anna nasangaim Asyer.§

¹⁴Tappana matäsä' gandum wattunna la diäläi, le'ba'um ma'lao-lao Ruben lako pa'belasam. Iya ullambi'um sahhupa tanangam si dipopakuli,** iya naalam anna nababaanni indona. Tappana naita Rahel, iya muuaammi Lea: “Beennä' kao saidi' itim tanangam pakuli indo nalambi' änä'mu.”¹⁵ Sapo' natimba'i Lea naua: “Tä' liupaka tiko ussanga mualangko muaneke? Anna temo la umpelau oom inde tanangam pakuli nabeennä' änä'ku?” Nauam Rahel: “Maka' umbeennä' itim tanangam pakulinna änä'mu, iya manii too bengi iko opi napasola metindo Yakub.”

¹⁶Sulei Yakub kahubem, natammuium Lea anna nauaanni: “La inde opaki' too sola metindo mani bengi le? Aka puham kusahoi Rahel kubeem tanangam

¶¶29:33 *Simeon*: kalembasanna, *nahingngi*.

§§29:34 *Lewi*: kalembasanna, *mendekke'*.

*29:35 *Yehuda*: kalembasanna, *umpuji*.

†30:6 *Dan*: kalembasanna, *ma'papada-pada*.

‡30:8 *Naftali*: kalembasanna, *umpentaloi*.

¶30:11 *Gad*: kalembasanna, *hongko'*.

§30:13 *Asyer*: kalembasanna, *masannam*.

**30:14 *sahhupa tanangam si dipopakuli*: pakuli tämänä.

pakuli indo nalambi' änä'ku." Iya solam metindo indo bengi eta too.

¹⁷Iya kebättä oom Lea aka nahingngiam Puang Allataala pa'sambajanna lambi' undadiangam pole änä' Yakub kalimanna. ¹⁸Ma'kada Lea naua: "Nabeem pole omä' Puang Allataala änä' bala' penabangku aka kubeem Zilpa muaneke napobaine." lam too anna nasangaim indo änä'na, Isakhar.^{††}

¹⁹Iya kebättä pole oom Lea lambi' undadiangam Yakub änä' kaannanna. ²⁰Naua oom Lea: "Tä' deem pada samapia inde hongko' nabeennä' Puang Allataala. La napa'kasalleimä' too pole' muaneke aka kudadiangammi änä' an-nam, sangngim muane." lam too anna nasangaim indo änä' kaannanna Zebulon.^{‡‡}

²¹Puhai ia too keänä' pole oom Lea undadiam mesa baine-ine, iya nasangaim ia Dina.

²²Indo Rahel nakilalaim duka' Puang Allataala, nasuhum nahingngiam pelauanna lambi' la malam duka' undadiam änä'. ²³Iya kebättäm Rahel lambi' undadiam mesa muane-ane. Iya nauam Rahel: "Nasamboiammä' sihi'ku Puang Allataala." ²⁴Iya nasangaim Yusuf,^{¶¶} aka naua: "Umba-umba aka nahängänniam polepä' DEBATA mesa änä' la muane."

Yakub umpabuda olo'-olo'na

30:25-43

²⁵Tappana puha keänä' Rahel undadiam Yusuf, iya melaum Yakub lako Laban naua: "Kela mala anna umpäbäiä' ma'pasule lako tondä' kadadiangku. ²⁶Anna umpäbäiä' umbaba ingganna baineke sola

änä'ku, aka puham kuasaiam pala'ku, anna kualloiam boko'ku kupengkähänganko."

²⁷Sapo' natimba' Laban naua: "Pehingngii siai too tula'ku, maka' muua iko duka', tä'pä' la umpellei aka situhu' potikangku natamba'ä' DEBATA aka iko napolalam. ²⁸Dadi tula' mammi la pada umba kubeengko sahomu."

²⁹Iya natimba'im Yakub naua: "Iko hi tia la muissanni, aka tä'ungko la kupa'tulasam kapandasangku nasuhum membea' olo'-olo'mu. ³⁰Aka indo anna tä'pä' sule, tä'pi susi kullemu. Sapo' temo to makakangko. Ia anna natamba'ko DEBATA aka pallima'ingku napolalam. Dadi pihampi kao la malaä' umpengkähängam dapo'ku?"

³¹Iya nauam Laban: "Iya aka isanga la kubeengko?" Natimba'im Yakub naua: "Tä' manggi' deem aka-aka umbeennä', sapo' la tontä' kukambisangko dombamu. Anggam ia la deem pelauangku matim ke malai. ³²Allo temo la umpäbäiä' ma'lao-lao tama alla'-alla'na dombamu anna kusähä'i ingganna änä' domba malotäna, anna ingganna domba sola beke dotinna anna buhitti'na. lam too la mendadi sahoku. ³³Ia too la mendadi tanda kamaloloangku illaam allo la taoloinna. Aka maka' suleko dako' umpahessa sahoku anna muitam deem beke tä' doti anna tä' buhitti' anna änä' domba tää'na malotä, la muissammi too muua: 'Pabokona.'"

³⁴Natimba' Laban naua: "Io, tapateemmi too." ³⁵Sapo' napasähä' yolo Laban indo allo eta ingganna beke dotinna anna buhitti'na. Susi toi domba malotä napasehe anna ussuai änä'na najagai. ³⁶Mane nababai lao indo olo'-olo' umpellei Yakub, tallungngallo mel-

^{††}30:18 *Isakhar*: kalembasanna, *bala' penaba*.

^{‡‡}30:20 *Zebulon*: kalembasanna, *napa'kasallei*.

^{¶¶}30:24 *Yusuf*: kalembasanna, *la dihängännipi*.

lao mane tohhoi. Anna indo tohona nakambi' ia Yakub.

³⁷Iya namaja-maja duka' Yakub muala täke tubona kaju hawar, kaju badam, anna kaju berangan anna naäläi kuli'na nasoha-soha sampe masuha' diita. ³⁸Mane napake'de'i dio indo pahabam si natingngajoinna indo bekena sola dombana ke mangngihu'i. Aka si sulei too muihu', sibihä-bihäim eta ke lambi' oom wattunna. ³⁹Dadi maka' ma'laki oom indo olo'-olo' dio sikahuku' indo täke kaju masuha', iya keänä' oi too, dotika, ma'balo-baloka, buhitti'ka. ⁴⁰Mane napasehei Yakub indo änä' domba, anna indo domba senga' napopengngolo lakoi ia indo ingganna domba dotinna anna malotäna Laban. Napateemmi too Yakub uhheppum indo la napotabana anna tä'i napasihau indo tabana Laban. ⁴¹Anna maka' too indo oom olo'-olo' to mapia tubona ma'laki, naala oom Yakub indo täke kaju masuha' anna napadioi indo si napengngoloi ke mangngihu'i anna malai sikahuku' ke ma'lakii. ⁴²Sapo' maka' olo'-olo' malamma sule, iya si tä' ia napadio indo täke kaju masuha' indo si natingngajoinna, nasuhum ingganna malammana indo olo'-olo' tabana ia Laban. Anna ingganna mapia tubona tabana ia Yakub. ⁴³Susim too lalanna anna sugi'i Yakub muampuum buda beke, domba, unta, keledai, anna buda sabua'na muane anna baine.

Yakub sola sahapunna mengkalao buni umpembuniam Laban

31:1-21

31 Pissananna naissam Yakub tula'na änä'na Laban naua: "Naala asammi Yakub kullena ambetaa'. Ingganna katomakakaanna buttu dio mai kullena ambetaa'." ²Anna naita toi

Yakub penabanna Laban tä'um tontä lako kalena.

³Iya ma'battakadam DEBATA lako Yakub naua: "Pa'pasulengko lako botto litä'na ambemu sola kasahapuammu aka la kuolaam dako tia."

⁴Puhai ia too, umpopetambaim Rachel sola Lea Yakub anna mala napellambi'i dio pa'kambisanna. ⁵Tappana silambi', napa'tula'im Yakub naua: "Kuita penabanna ambemua' senga'um, tä'um si susi inde dio mai lako kaleku. Sapo' naundu'ä' anna naolaam Puang Allataala to napenombai ambeku. ⁶Anna la dipa'tulasampokoka' umba susi hesoku lako ambemua' inde dio mai. ⁷Sapo' si napalilingam liu hä' tangnga' lambi' pembudam umpadende sahoku. Sapo' tä' napäbäi Puang Allataala la nakadakeiä'. ⁸Aka maka' too naua oom ambemua': 'Beke buhitti' la sahomu,' iya beke buhitti' asam oom too dadi. Anna maka' too naua: 'Beke ma'balo-balo la sahomu,' iya beke ma'balo-balo oom too dadi. ⁹Dadi napateemmi too Puang Allataala muala olo'-olo'na ambemua' anna napadokkoannä' lisu pala'ku.

¹⁰Wattunna anna la ma'lakii olo'-olo', kupangngimpim kuita ingganna beke laki sule ma'bihä sangngim beke masuha', buhitti' anna ma'balo-balo. ¹¹Anna napalosaiä' malaika'na Puang Allataala illaam indo pangngimpi naua: 'O Yakub.' Iya kutimba'im duka' kuu: 'Indeä' Debata.' ¹²Iya ma'kada pole oom indo malaika' nauaannä': 'Petua'! Eta siam too lako beke laki mahassam ma'bihä sangngim masuha', buhitti', anna ma'balo-balo. Abana too kupateenganko aka kuita asammi pa'pogausanna Laban lako kalemu. ¹³Kaom too Puang Allataala to puha umpa'paitaam kaleku matim dio Betel. Eta too umpake'de'ko mesa batu untolloi minnä' umpotanda pengkilalaam. Anna eta toi duka' muongei ma'samaja lako

kaleku. Dadi temo pa'kalili'ungko ammu pa'pasule lako botto litä'mu.”

¹⁴Iya natimba'um Rahel sola Lea naua: “Aka tä'um too kami' duka' deem la kipomana' kullena ambeki. ¹⁵Aka nahekem to sulengkam to kami', aka tanda lakona napobalusammakam anna pada indo natahima puha asammi napa- pake. ¹⁶Anna indo katomakakaanna ambeki naäläi Puang Allataala, seton- ganna tabaki hi too kami' sola änä'ki. Dadi pogau'i aka napahehangko Puang Allataala.”

¹⁷⁻¹⁸Iya ma'kalili'um Yakub la ma'pasule lako Ishak ambena dio lembäna Kanaan. Ingganna bainena sola änä'na napopessäke längäm unta anna uhhambai ingganna olo'-olo'na anna umbaba ingganna ebanganna indo pallolonganna dio Padan-Aram.

¹⁹Tappana la mengkalao kalei, iya le'ba'um Laban unggontinni bulu dom- bana. Etam anna le'ba'i Rahel umboko indo tau-tau si napa'debatai ambena si diuaam to si uningkambi' kasahapuam.

²⁰Iya naakkalanni Yakub indo Laban to Aram, tä' napaissanni pengkalaoanna.

²¹Iya muala asammi kullena sola ing- ganna ebanganna anna napasihha'i le'ba' ullambam salu Efrat lu lako ongeam tipatanete isanga Gilead.

Laban muula' Yakub

31:22-42

²²Tama ham allo katallunna lessu'na Yakub mane naissanni Laban naua: “Le'ba' membuni hia päläe' Yakub!”

²³Iya uhhempum siaham solasubunna muane anna le'ba'i muula' Yakub. Pitu allona mellao mane ullambi'i Yakub dio ongeam tipatanete isanga Gilead.

²⁴Bengii sulem Puang Allataala umpel- lambi'i indo Laban to Aram napalosai il- laam pangngimpi naua: “Pissa'-pissa' ai la deengko umpakahea'-hea' Yakub moi la tula' sabatta le.”

²⁵Wattu eta too puham umpake'de' bahunna Yakub yabo indo ongeam tipatanete. Tappana ullambi' Yakub Laban, iya umpake'de'um duka' bahunna eta sola solasubunna.

²⁶Puhai, iya ma'tula'um Laban lako Yakub naua: “Akanna muakkalanniä' lambi' le'ba' bääko umbaba buni änä'ku anggasanna to umpamuhu?

²⁷Akanna umbuniangannä' tä' umpaissanni pengkalaoammu? Aka kela umpaissanniä', akanna tala kupäbäiko lao masannam nalahu to menani, to ma'gändä, anna to ma'katapi?

²⁸Sapo' palla' iko penabammu tä' umpäbäiä' muudum yolo ampoku sola änä'ku. Mengkalao to maho hako iko. ²⁹Setonganna moi aka la kupogausangko, sapo' sabengi napakilalää' Puang Allataala to napenombai ambemu naua: ‘Deem aia' la umpakahea'-hea' Yakub.’

³⁰Kuissam kuaa: ‘Ia anna le'ba' bäängko, aka mamalli' sugali'ungko lako ambemu. Sapo' akanna umbokoko tau-tau to si uningkambi' kasahapuanguku?’”

³¹Natimba' Yakub naua: “Setonganna mengkalao bäää' tä'ko deem kupasaha' aka mahea'ä' kuaa: ‘Uhhuntu'iko manii sule baineku aka änä'mu ka iko.’ ³²Anna indo tau-tau muuaannä': ‘Umboko,’ maka' deem ullambi' lako inde mai tau, la dipatei ia. Dadi pahessa asanni aka-akangku, nasa'bii inde mai kasahapuam. Maka' too ke deenni ullambi', alam too.” Aka tä' naissam Yakub naua Rahel dia umbokoi indo tau-tau.

³³Iya le'ba'um Laban tama bahunna Yakub anna nakängkäi. Puhai, lu tama opi bahunna Lea mane tamai bahunna indo dua sabua' to napobaine Yakub. Sapo' tä' deem nalambi' indo tau-tau. Katampasanna lu tama ongeanna Rahel.

³⁴Sapo' puha nabuni Rahel indo tau- tau napalutama ibi'na lapi' unta dio sali

mane naokko'i yabona. Nakängkä asam Laban indo aka-akanna Rahel sapo' tä' deem nalambi'.

³⁵Iya nauam Rahel lako ambena: "Sa'baha'ko ambe', daa ungkeaha' aka tä'ä' mala ke'de' ullaoanni manappako temo aka nalambi' oom bulangku." Napaelä' Laban napeä indo tau-tau sapo' tä' deem nalambi'.

³⁶Iya keaha'um pole' Yakub lako Laban naua: "Kakadakeam aka hi kao kupogau'? Aka sugali' di kao kasalaangku anna muula'ä'? ³⁷Puha asammi ungkängkä pahuhungku, iya umbam indo anummu pa'de? Paokko'um tentomai dio olona inde mai kasahapuanta anna mala naita asam makalesona mennanta malolo!

³⁸Dua pulom taunna kupa'kambisangko lambi' tä' mammi too deem la keänä' tassala dombamu sola bekemu. Anna tä' toi deem la kutunu moi la mesam beke lakimmu. ³⁹Ingganna naandena to peande tä' too kao deem la kutulasangko anna puha oom kubala'i. Susi siam indo nabokona tau naala bengi anna naala allo, kubala'i asam too aka si untuntu'. ⁴⁰Tä' deem si kupesi'dinni mapana'na allo ke masiäi anna dingim ke bengii, lambi' deemmä' si tä' siita kamammasam.

⁴¹Kupetuttu'i dua pulo taunna kuolaam ma'pateem. Aka sapulo appa' taunna kuolaam kupengkähängangko ussaho dua änä'mu anna annam polepi taunna kuolaam ussaho indo beke sola domba umbeennä'. Ia toopi too pembuda umpadende sahoku. ⁴²Kela tä'i naundu'ä' Puang Allataala to napenombai Abraham anna to napenombai anna nakahea' ambeku

Ishak, tä' mala tala ussua bääbää' lao ma'pala' lo'bä. Sapo' Puang Allataala puha muitai sussaku anna hesoku, nasuhum napalosaingko sabengi kattuaana."

Kasitallisanna Laban sola Yakub

31:43-55

⁴³Iya natimba'im Laban naua: "Setonganna itim dua bainemu, Yakub, bassim änä'ku anna ingganna änä'na sangngim ampoku. Anna ingganna itim domba sola beke, kao asam muampuanni. Dadi pada inde lako aka-aka taitaa', sangngim kao puäna. Sapo' tä' deem lalanna la kuanda'-anda'i inde mai änä'ku sola ingganna peänäsanna. ⁴⁴Dadi mapiam ia ke tapadeenni kasitallisam anna tatombonni batu mendadi tanda kasitallisanta." ⁴⁵Iya naalam Yakub mesa batu naosä' la mendadi tanda pengkilalaam. ⁴⁶Mane ma'kadai Yakub lako kasahapuanna naua: "Tombongangkia' batu." Iya naalaim duka' anna natombonni. Puhai natombom indo batu, pada-padam mangngande dio sa'dena. ⁴⁷Iya nasangai ia Laban indo tombongam batu Yegar-Sahaduta.^{§§} Sapo' nasangai ia Yakub Galed.*

⁴⁸Iya ma'kadam Laban lako Yakub naua: "Iam too inde tombongam batu la mendadi tanda pengkilalaanta napahandu' allo temo." Iam too anna disangaim indo ongeam Galed. ⁴⁹Mane naua polei Laban: "DEBATA hi too la unjagai' teem patomali moi anna sikambelaki'." Iam too anna disangaim duka' indo ongeam Mizpa.[†] ⁵⁰Anna naua polepi Laban: "Maka' deem kende' il-

§§31:47 *Yegar-Sahaduta*: basa Aram, kalembasanna, *tombongam batu tanda pengkilalaam*.

*31:47 *Galed*: basa Ibrani, kalembasanna, *tombongam batu tanda pengkilalaam*.

†31:49 *Mizpa*: kalembasanna, *ongeanna to ma'kambi' manjaga*.

laam penabammu la unghahidi' inde mai änä'ku battu la muala poleko baine senga', moi la tä' deem muitako, kilalai Puang Allataala too la muita liuki'.

⁵¹Anna indem ia batu kutombom sola batu kuosä' mendadi tanda illaam alla'ta. ⁵²Dadi susi inde tombongam batu teem inde batu diosä' la mendadi tanda pengkilalaanta tala kao anna tala iko la untekkai umbaba pattuju kadake. ⁵³Aka Puang Allataala to napenombai Abraham sola Nahor anna ambena la ma'pamalolo." Iya ma'pindam Yakub naua: "Sola sanganna Puang Allataala to nakahea' Ishak ambeku, inde kastallisanta la kuanda'i."

⁵⁴Iya napamateim mesa tunuam anna napehumalasan ni yabo indo tanete, anna untambai ingganna kasahapuanna mangngande pada-pada. Puhai, ma'bengiipi yabo indo tanete.

⁵⁵Tappana masiäi mebenggi'-benggi'pi, iya muudummi änä'na sola ingganna ampona Laban anna napa'lambeanni mane ma'pasulei lako Haran.

Bata-bata Yakub la sitammu Esau

32:1-21

32 Tappana umpatahhu' pa'laoanna Yakub, iya natammui sanakana malaika'na Puang Allataala. ²Pisananna naita Yakub indo malaika', iya nauam: "Inde pebahunganna Puang Allataala." Iam too anna nasangaim Yakub indo ongeam Mahanaim.[‡]

³Puhai ia too, ussuam sanakana tau mendiolo umpellambi'i Esau kakanna lako Seir battu diua Edom. ⁴Naua Yakub ma'pakahi'di lako indo ingganna to nasua: "Uaanni puäku Esau: susi inde tula'na sabua'mu Yakub: 'O puäku, si dioä' banuanna Laban mentihuham sule lako temo. ⁵Tentomai

deemmi kuampuam sapim, keledai, domba, beke, anna sabua' muane anna baine. Anna kupalambi'iko inde kaheba umba ke uhhängannä' bua anna malaä' untahima manappa."

⁶Tappana ma'pasulei indo to nasua Yakub nauaammi: "Puhangkam le'ba' umpellambi'i Esau kakammu. Temo mahassammi muola lalam natammuiko umpasola appa' hatu' tau."

⁷Nahingginna Yakub ia too tappa tinggi'gi' mahea' anna manangnga penabanna. Iya namaja-majam napa'dua indo taunna. Susi toi duka' ingganna dombana, bekena, sapinna, anna untana.

⁸Aka naua inabanna: "Maka' sule Esau anna nagasa'i sabaheam, iya malapi lahi sabaheam."

⁹Anna mane ma'sambajam Yakub naua: "O Puang Allataala to napenombai neneku Abraham anna ambeku Ishak. O DEBATA, Iko puha muuaannä': 'Pa'pasuleko lako bottomu anna kasahapuammu anna la kuolaangko.'

¹⁰Tä'ä' la sihatam untahima ingganna pa'kamasemu sola kamanontongammu to puha umpogausannä'. Aka indo anna mengkalaoä' umpellei bottoku ullambam inde Salu Yordan, tä' deem aka kubaba sulibanna tekkengku. Tentomai ma'pasulemä' umpasola inde dua lengkoam tau sitonda olo'-olo'.

¹¹Kupelau sola ponno penaba anna ullappasannä' dio mai aha'na kakangku Esau, aka mahea'ä' sule manii napateiä' sola baine anna ingganna änä'ku.

¹²Aka puha muuaannä': 'La kuolaangko anna la buda pessubummu, lambi' tä' deem tau la umbelai naissa' aka la susi budanna bungim dio bihim le'bo'."

¹³Iya ma'bengim Yakub dio. Mebenggi'i mualam sabaheam olo'-olo'na la nabeem Esau kakanna. ¹⁴Indo la nabeem, dua hatu' beke bihä,

[‡]32:2 *Mahanaim*: kalembasanna, dua pebahungam.

dua pulo beke laki, dua hatu' domba bihä, dua pulo domba laki, ¹⁵tallu pulo unta bihä kalaoanna umpasusu änä'na, appa' pulo sapim bihä, sapulo sapim laki, dua pulo keledai bihä, anna sapulo keledai laki. ¹⁶Nabahe-bahem indo olo'-olo' pantam napopa'mesa mane nabeenni lako sabua'na tungga' najagai. Mane nauai: "Pendiolongkoa' lao sapo' la muäto'a' pellaomu, sallaom oi too lalla oom alla'na solana."

¹⁷Anna ma'pakahi'dii Yakub lako indo sabua'na handam mendiolo naua: "Maka' sitammuko kakangku Esau anna nakutanaiko naua: 'Menna puämu? La umbako? Menna puäna inde mai olo'-olo' uhhambaa'?' ¹⁸La muuaam: 'Olo'-olo'na Yakub sabua'mu la nabeengko. Anna indo Yakub diom duka' mai natuhu'kam.'"

¹⁹Susi siam duka' pepakahi'dinna lako sabua' to mentuhu' kaduanna, katallunna anna ingganna tau to nasua uhhamba indo olo'-olo' naua: "La susi siam tula'mu lako Esau ke ullambi'i. ²⁰Anna la muuaa': 'Sabua'mu Yakub diom duka' mai boko'ki.'" Aka napikki' Yakub naua: "Iam too inde pa'pebeem la umpamehe aha'na Esau. Umba-umba aka malaä' naihusam uwai sumule." ²¹Dadi napa'pakatuam yolo indo olo'-olo' pal'alam penabanna anna ma'bengipi ia dio indo to naongi mebahum.

**Yakub sibobo' Puang
Allataala mehupatau**

32:22-32

²²Bengi eta too bangom Yakub anna umpasolai lao baina dua anna baine lolä'na dua anna sapulo mesa änä'na ullambam salu Yabok. ²³Puhai napalambam, ma'pasulem Yakub

anna umpopebaba asanni aka-akanna dipalambam. ²⁴Sapo' tohho ia Yakub mesa-mesanna. Iya sulem mesa muane sibobo' Yakub sule lako moni mäne'. ²⁵Tappana nasi'dim indo tau tä' la patalo, iya uhhaka'um palona Yakub sampe silesa too' apanna. ²⁶Anna mane ma'kada indo tau naua: "Lappa'ä' aka la masiäm." Sapo' natimba' Yakub naua: "Tä'ko la kulappasam ke tä'i umpa'lambeannä' yolo."

²⁷Mekutanam indo tau naua: "Aka sangammu?" Naua: "Isangaä' Yakub." ²⁸Iya nauam indo tau: "Tä'ungko la disangai Yakub aka puhangko umbali Puang Allataala anna hupatau, iya pataloko. Iam too anna la disangaingko Israel."^e ²⁹Iya naua oom Yakub: "Tulasannä' duka' sangammu." Sapo' natimba'i indo tau naua: "Tä' manggi' umpekutanaam sanganku." Anna mane untamba' Yakub.

³⁰Iya nauam Yakub: "Puhamä' siita Puang Allataala, iya mala mammapä' tubo!" Iam too anna nasangaim indo ongeam Pniel.[§]

³¹Bihha'i allo umpelleim Pniel Yakub, sapo' heppä'um aka silesa too' apanna. ³²Iam too anna sule lako temo ingganna pessubunna Israel tä' lium ia muande bale too' apanna olo'-olo' aka too' apanna Yakub nahaka' Puang Allataala.

Yakub sitammu Esau

33:1-20

33 Pissananna mennenne' lao Yakub, iya naitam sule Esau natuhu' taunna appa' hatu'. Nasuhum umbahe-bahem änä'na lako Lea, lako Rahel, anna lako indo dua baine lolä'na. ²Umpopendiolom indo dua baine lolä'na sola ia duka' änä'na, mane natuhu'i Lea sola änä'na anna mane

^{§32:28} *Israel*: kalembasanna, *umbali Puang Allataala*.

^{§32:30} *Pniel*: kalembasanna, *lindona Puang Allataala*.

Rahel sola Yusuf handam ibundi.
³Mane mellaoui Yakub, ia handam dio olo untammui kakanna. Tappana la sidundui, napahandu'um Yakub umpenombai kakanna. Pempitu menomba mane sitammui.

⁴Sapo' lumumpa' siaham Esau uhhopai Yakub nakalapu'i bahokona naudum anna sisahhoanni adinna.

⁵Tappana naita Esau indo baine sola anä'-änä', iya nauam: "Menna inde mai umpasola?" Natimba' Yakub naua: "Änä'-änä' pa'kamasena Puang Allataala tama kaleku, puäku."

⁶Puhai, bassim le'ba'um duka' lako indo baine lolä'na sola anä'na umpenombai Esau. ⁷Anna mane Lea sola ingganna anä'na, katampasanna Rahel sola Yusuf, anä'na.

⁸Iya mekutanam Esau naua: "Aka pat-tujummu anna deenni indo ingganna tau sola olo'-olo' ma'babangam pantam lao kusitammuum?" Natimba' Yakub naua: "La kupomasannangam penabammu."

⁹Iya nauam Esau: "O adingku, buda siam kao duka' kulleku, pokullem tiko duka' ia too." ¹⁰Natimba'im Yakub naua: "Tä' dako tia la ma'pateem, aka maka' ungamasei si'daä' anna untahimaä' sule inde, iya la untahima hi tia duka' inde pa'lalam penabangku matim. Aka tappana kuita lindomu, kupasihpam muitaä' lindona Puang Allataala aka tä' deem pada saungkalusesiä'. ¹¹Dadi, la muala hi tia inde pa'lalam penabangku matim. Aka Puang Allataala ungamaseiä' lambi' napalahuiä' ingganna kapa-halluangku." Iya mengkahumase lium Yakub lambi' natahimam duka' Esau indo pa'lalam penabanna Yakub.

¹²Iya nauam Esau lako adinna: "Maingkoa' talao anna kuyoloan-gangkoa'." ¹³Sapo' natimba' Yakub naua: "O puäku, muitam inde mai

änä'-änä' sangngim maluppu'pi. Anna la kupaela' inde mai domba sola sapim aka budapi kalaoanna sumusu anä'na. Maka' la dipasihha' dihamba, tä' la sangngallo mellaou anna dappo'um.

¹⁴Dadi pendiolongko too, puäku, anna kipaela'i kami' ibundi. Aka inde mai anä'-änä' sola sapim la unggantam dalam sakilambi'mupa dio Seir."

¹⁵Naua Esau: "Maka' susi, la kutampeangko sanaka-naka taungku." Sapo' natimba' Yakub naua: "Tä'um tia manggi' umpasusi, assala'na masannammi penabammu untahimaä'."

¹⁶Iya mengkalao siam Esau indo allo eta too ma'pasule lako Seir. ¹⁷Sapo' lu lako hia Sukot Yakub anna umpake'de'i banua dio anna umpebahungam duka' olo'-olo'na napentionganni. Iam too anna disangaim indo ongeam Sukot.**

¹⁸Napahandu'na Yakub mengkalao dio Padan-Aram, iya landa'um sitonda kamasakkeam lako Sikhem, dio lembäna Kanaan. Iya umpake'de'im bahunna sikahuku' kota Sikhem. ¹⁹Indo litä' naongi mebahum naalli lako anä'na Hemor, ambena Sikhem, sahatu' doi' peha'. ²⁰Mane umpake'de'i ongeam pehumalasangam eta, anna nasangai El Elohe Israel, kalembasanna Debatanna Israel, Puang Allataala.

Dina nabobo' Sikhem

34:1-31

34 Pissam wattu indo anä'na Yakub baine to nadadiangam Lea isanga Dina, le'ba' ma'saleo-leo sola baine to Kanaan.

²Tappana naita Sikhem, anä'na Hemor, mesa to Hewi mendadi tomahaja illaam botto ia too, iya napellambi'im anna laoi nakondongam nabobo'. ³Tä' deem pada saungkailui Dina, lambi' napeä lalanna umba

**33:17 Sukot: kalembasanna, napentionganni.

ke malai napohäe duka' Dina. ⁴Iya ma'kadam Sikhem lako Hemor ambena naua: "Kutanaianä' indo baine aka mohäeä' la kupobaine."

⁵Naissam Yakub indo gau'na Sikhem puha ungdakei Dina. Sapo' napengkamma'i aka muampaipi änä'na sulei dio mai pa'kambisanna.

⁶Iya sulem Hemor ambena Sikhem umpellambi'i Yakub aka la napa'tula'i. ⁷Iya suleim duka' ingganna änä'na Yakub muane dio mai pa'kambisanna. Nahingginna kaha-kaha ia too sangngim tikkedu' anna mapi'di' penabanna lambi' keaha', aka indo gau'na Sikhem puha umbobo' änä' dahanna, tä' sihatam napogau' aka umpakasihi' to Israel.

⁸Sapo' ma'kada Hemor naua: "Indo änä'ku Sikhem deem penabanna lako änä'mu, kupelau kela maelo'ko anta pasialai. ⁹La sipattuju manappaki' anna mala änä'ku anna änä'mu la siala-ala. ¹⁰Anna malakia' tohho sola-sola illaam inde botto. Anna la beba'koa' umpise'i ongeam la muongeia' umpeä kulle."

¹¹Iya ma'tula'um Sikhem lako ambena Dina sola änä' muanena naua: "Maka' untahimaa' inde pelauangku, iai too umpohäe iam kubeengkoa'. ¹²Tula'ia' aka umpohäe anna la untulasam tooä' duka' sanaka sombanna. Aka la kuponnoi pada umpelau, assala'na maelo'koa' sipobaineä' inde änä' dahammua'."

¹³Sapo' napalilingam tangnga' indo änä' muanena Dina, aka indo Dina adinna puha nakadakei Sikhem. ¹⁴Nasuhum ma'kada lako Hemor anna Sikhem naua: "Kiposihi' la kipasiala änä' dahangki to tadisunna'.^{††} ¹⁵Anggam anna la kitahimai itim pelauammu ke muakuia' susikam. Kalembasanna inde tula'ki, ingganna muane illaam alla'-alla'mua' tä' mala tala disunna'

asam. ¹⁶Puhai too, iya kitahimam pole' pelauammu diona la siala-alakia'. La tohhokia' hapa' sola-sola anna la mendadikia' to mesa. ¹⁷Sapo' maka' mokakoa' untahimai inde peadasangki, la mokakoa' disunna', iya la kibaba lao inde änä' dahangki."

¹⁸Iya natahimam Hemor sola Sikhem indo tula'na. ¹⁹Nasuhum le'ba' siaham Sikhem nakähä ia too aka umpohäe sugali' änä'na Yakub. Anna indo Sikhem handam to dihingngiam illaam kasa-hapuam. ²⁰Iya le'ba'um Hemor sola Sikhem lako ongeam pa'hempungam dio ba'ba kota, anna umpa'tula'i issinna indo kota nauaam: ²¹"Ingganna to Israel to mesakia'. Dadi la tapäbäia' tohho illaam inde bottota sola-solakia' anna la beba' ullelei indo bottota; aka inde botto tä' deem pada samalobä la naongei. Malaa' tapobaine änä'na anna la mala duka' napobaine änä'taa'. ²²Sapo' anggam napohäe tohhokia' sola-sola ma'mesa illaam inde botto, ke taakuia' tatuhu'i mesa pelauanna naua: 'Ingganna muane illaam alla'-alla'mua' la pahallu disunna' susi kabiasaangki.' ²³Dadi la tatuhu'ia' indo pelauanna anna mala indekia' sola. Aka dako'i too ingganna olo'-olo'na sola pakkulleam senga'na la taampuam asanna'."

²⁴Ingganna to ma'hempum eta too maelo' asam la untuhu'i pelauanna Hemor sola Sikhem sampe ingganna muane illaam indo kota disunna' asam. ²⁵Tallu bengii lessu'na, sangngim kaloasampi muane aka disunna'. Mengke'de' dua änä'na Yakub, kakanna Dina isanga Simeon anna Lewi, le'ba' muala pa'danna anna mengkamma-kamma'i le'ba' tama kota anna natapai pa'dam ingganna muane illaam. ²⁶Indo Hemor sola Sikhem napatei duka' anna umpasolai Dina

^{††}34:14 *disunna'*: kalembasanna, *ditille*.

umpellei banuanna Sikhem. ²⁷ Puhai ia too, le'ba' asammi änä'na Yakub tama indo kota anna umpamuhu asanni issinna kota. Aka umpembalasang adinna puha nakadakei Sikhem. ²⁸ Sangngim umpamuhu domba, sapim, beke, keledai, anna ingganna baham-baham, susi illaam kota teem lako ongeam senga'. ²⁹ Muala ingganna baham-baham keangga' anna ingganna baine sola änä'-änä'. Naala asam issi banua illaam indo kota.

³⁰ Ma'kada Yakub lako Simeon anna Lewi naua: "Poko'naa' iko mualaannä saha-saha penaba aka la mekabassim too inde issinna botto. Indo ke umpamesai buku to Kanaan, to Feris, anna ingganna issinna inde pa'bottoam mebundu', dappo'kia' kita sahapu aka tä' dikia' pada umba." ³¹ Sapo' natimba' naua: "Aka tä' kiaku la dipasusi passunda' adingki."

**Puang Allataala ussua
Yakub lako Betel**

35:1-15

35 Ma'battakada Puang Allataala lako Yakub naua: "Kaom too Puang Allataala to puha umpa'patandaam kaleku indo anna le'ba'ko umpembuniam kakammu Esau. Pa'kalili'ko ammu lako Betel, tohhoko dio anna umpake'de'ko mesa ongeam pehumalasang di Kao."

²⁻³ Iya nauam Yakub lako sahapunna sola lako ingganna pentuhu'na: "Pa'kalili'koa' aka la le'ba'kia' lako Betel. Diokia' too umpapiamä' ongeam pehumalasang längäm Puang Allataala to umpamoloii' illaam kamasussaanguku anna to ungkambi'ä' illaam pa'laoanguku umba-umba kuongei. Sapo' tibe asannia' yolo indo tau-tau to si napa'debatai tau senga' anna umpomasehoko' kalemu

ammu bala'i asanna' pohebamu."

⁴ Iya nahempummi indo tau-tau anna muäläi asanni antim-antina nabeem Yakub nalamum dio too' kaju tumalubum ma'sanga sikhaku' kota Sikhem. ⁵ Tappana mengkalao Yakub sola sahapunna anna pentuhu'na, iya napalambi'im Puang Allataala kamaheasang lako ingganna tau illaam pa'lembängam ia too, lambi' mahea'i muula' Yakub sola ingganna to napasola.

⁶ Iya landa'um Yakub sola ingganna to napasola lako lembäna Kanaan dio kota Betel (indo si diuaam yolona Lus). ⁷ Iya umpake'de'um ongeam pehumalasang anna nasangai El Betel. ⁸ Aka etam too naongei Puang Allataala umpa'patandaam kalena lako Yakub indo anna le'ba'i umpembuniam kakanna.

⁸ Etam too mate Debora indo to si umpaliaha Ribka anna dilamum dio too' kaju tumalubum ma'sanga, sau'na kota ia too. Iam too anna si diuaammi Too' Kaju Uwai Mata.

⁹ Tappana ma'pasule Yakub dio mai Padan-Aram, iya umpa'patandaam oom kalena Puang Allataala lako Yakub anna natamba'i. ¹⁰ Mane ma'kadai Puang Allataala naua: "Iko isangako Yakub, napa-handu' temo tä'ungko la disangai Yakub, sapo' la disangaingko Israel." Susim too Puang Allataala mueli' sanganna Yakub nasangai Israel.

¹¹ Anna mane ma'kada polei naua: "Kaom too Puang Allataala To Handam Kuasa. La kupalohom banne taummu to la umpangngissi lao mobotto-bottoam, anna la buda mendadi tomahaja. ¹² Anna indo pa'lembängam to puha kubeem Abraham sola Ishak la kubeengko sule lako pessubummu." ¹³ Tappana puha,

††35:7 *El Betel*: kalembasanna, *Puang Allataala tandaam dio Betel*.

le'ba'um Puang Allataala umpellei indo ongeam naongi umpa'tula'i Yakub. ¹⁴Iya muosä'um batu Yakub, tanda pengkilalaanna, mane natolloi anggur sola minnä' napehumalasang länngäm Puang Allataala.

¹⁵Mane nasangai Yakub indo ongeam naongi Puang Allataala ma'tula', Betel.^{¶¶}

Mate Rahel indo anna undadianni Benyamin

35:16-22

¹⁶Puhai ia too le'ba'um Yakub sola ingganna to untuhu'i umpellei Betel. Tappana la landa' kalei lako Efrata, iya lambi'um wattunna la keänä' Rahel, sapo' mapahhi' keänä'. ¹⁷Masäei mangn-guhiba', tuttuam mapi'di' nasi'dim. Iya nauam indo to ma'pakeänä': "Pomato-hoi penabammu Rahel aka la muane oo änä'mu." ¹⁸Sapo' abana inna la lambi'um ia tempona Rahel la mate. Tappana la kattu penabanna, iya nahakkusam siapi ussangai änä'na Ben-oni,^{§§} sapo' nasangai ia ambena Benyamin.*

¹⁹Susim too kamateanna Rahel lambi' dilamum dio ampe' lalam lako Efrata. (Indo Efrata disangaim temo Betlehem). ²⁰Naosä'um batu Yakub natandaia indo ku'bu'na Rahel anna da'da' liupi sule lako temo.

²¹Puhai ia too, umpatahhu'um pa'laoanna Israel lambi' umpake'de' bahunna tando lakona Migdal-Eder. ²²Tappana tohhoi dio ongeam ia too, iya indo Ruben umpempakoi baine lolä'na ambena isanga Bilha. Kaha-kaha ia too naissam siam Israel.

Peänäsanna Yakub

35:22-26

Änä'na Yakub sapulo dua muane.

²³Lea undadiam Ruben (änä' uluana Yakub), Simeon, Lewi, Yehuda, Isakhar, anna Zebulon.

²⁴Rahel ia undadiam Yusuf anna Benyamin.

²⁵Bilha, sabua'na Rahel, undadiam ia Dan anna Naftali.

²⁶Zilpa, sabua'na Lea, undadiam ia Gad anna Asyer.

Padam too inde peänäsanna Yakub muane dadi dio Padan-Aram.

Kamateanna Ishak

35:27-29

²⁷Iya landa'um Yakub lako Mamre sikahuku' Kiryat-Arba (battu diua Hebron), ongeam naongi tohho Ishak, ambena. Ongeam iam too si naongi Ishak anna Abraham. ²⁸⁻²⁹Indo Ishak tä' deem pada samahendem. Sahatu' kahua pulo taunna tubo mane matei, lambi' le'ba' sungnga'na ma'mesa sola nene to naponene. Iya nalamummi Esau sola Yakub, änä'na.

Pessubunna Esau

36:1-19

36 Susi inde tulasanna peänäsanna Esau (biasa toi duka' diuam Edom). ²Esau umpobaine tallu to Kanaan: Ada, änä'na to Het isanga Elon, anna Oholibama, änä'na Ana, ampona Zibeon to Hewi, ³sola Basmat, adinna Nebayot bassim änä'na Ismael.

⁴Indo Ada undadiam Elifas. Anna indo Basmat undadiam Rehuel, ⁵anna Oholibama undadiam Yeush, Yaelam,

^{¶¶}35:15 *Betel*: kalembasanna, *banuanna Puang Allataala*.

^{§§}35:18 *Ben-oni*: kalembasanna, *änä'ku muane mapi'di'a' undadianni*.

*35:18 *Benyamin*: kalembasanna, *änä'ku muane to umbaba hongko'*.

anna Korah. Iam too ingganna änä'na Esau nadadiangam baina dio Kanaan.

⁶Pissam wattu le'ba' Esau umpellei Yakub, adinna, lu lako botto senga'. Umpasola ingganna baina sola änä'na muane anna baine anna ingganna issi banuanna. Susi toi ingganna dombana, beken, sapinna, anna ingganna kullena indo pallolonganna dio Kanaan nababa asam. ⁷Buda sugali' kullena nasuhum tä'um deem ongeam la mala naongi sola. Aka indo botto naongi tä'um sihua napa'kambi'i olo'-olo'na aka buda sugali'. ⁸Iam too anna mentieli'um ia Esau, battu diua Edom, le'ba' lako ongeam tipatanete isanga Seir.

⁹Indem ia tulasanna pessubunna Esau, nene kabuttuanna to Edom to tohho dio ongeam tipatanete isanga Seir:

¹⁰Änä'na Esau nasibalii Ada isanga Elifas, anna nasibalii Basmat isanga Rehuel, bassim muane.

¹¹Elifas undadiam Teman, Omar, Zefo, Gaetam anna Kenas.

¹²Deempi änä'na nadadiangam Timna baine lolä'na Elifas isanga Amalek. Iam too ampona Ada, baina Esau.

¹³Rehuel ia undadiam Nahat, Zerah, Syama anna Miza. Iam too ampona Basmat, baina Esau.

¹⁴Anna Oholibama änä'na Ana, ampona Zibeon undadiangam Esau änä' isanga Yeush, Yaelam anna Korah.

¹⁵Indem ia änä'na sola ampona Esau nene to naponene to umpangngissi mobotto-bottoam:

Elifas, änä' uluana Esau undadiam nene to naponene to Teman, to Omar, to Zefo, to Kenas, ¹⁶to Korah, to Gaetam anna to Amalek. Iam too peänäsanna Elifas pessubunna Ada, nasibalii Esau dio Edom.

¹⁷Anna Rehuel ia, änä'na duka' Esau undadiam nene to naponene to Nahat, to Zerah, to Syama, anna to

Miza. Iam too peänäsanna Rehuel, pessubunna Basmat, nasibalii Esau dio Edom.

¹⁸Oholibama, baina Esau undadiam nene to naponene to Yeush, to Yaelam, anna to Korah. Iam too peänäsanna Oholibama, indo änä'na Ana.

¹⁹Iam too inde pessubunna Esau sangngim nene to naponene to Edom.

Pessubunna Seir

36:20-30

²⁰Indem ia änä'na Seir, to Hori, issi litä' dio Edom:

Lotan, Syobal, Zibeon, Ana, ²¹Disyon, Ezer, anna Disyan. Padam too inde peänäsanna Seir nene to naponene to Hori dio Edom.

²²Änä'na Lotan isanga Hori anna Heman. Solasubunna Lotan baine isanga Timna.

²³Änä'na Syobal isanga Alwan, Manahat, Ebal, Syefo anna Onam.

²⁴Änä'na Zibeon isanga Aya anna Ana. Ana iam too ullambi' kalimbuä kanam dio pohiallasam indo anna le'ba'i unγκambi' keledainna Zibeon ambena.

²⁵Änä'na Ana isanga Disyon anna Oholibama, baine ia.

²⁶Änä'na Disyon isanga Hemdan, Esyban, Yitran anna Keran.

²⁷Änä'na Ezer isanga Bilhan, Zaawan anna Akan.

²⁸Änä'na Disyan isanga Us anna Aran.

²⁹⁻³⁰Iam too inde nene to naponene to Hori: Lotan, Syobal, Zibeon, Ana, Disyon, Ezer anna Disyan situhu' kabuttuanna anna tadongkonganna dio pa'lembängam Seir.

Tomahajanna to Edom

36:31-43

³¹⁻³⁹Indo anna tä'pi deem tomahajanna to Israel, deemmi ia tomahaja

sibala'-bala' ma'pahenta dio Edom. Mate oi mesa, nabala' oom solana. Indo toma-haja isanga:

Bela änä'na Beor buttu dio mai kota Dinhaba;

Yobab änä'na Zerah buttu dio mai Bozra; Husyam buttu dio mai Teman;

Hadad änä'na Bedad buttu dio mai Awit (iam too untaloi to Midian indo anna sibundu'i dio lembäna Moab);

Samla to buttu dio mai Masreka;

Saul to buttu dio mai Rehobot dio bihim salu;

Baal-Hanan änä'na Akhbor;

Hadar to buttu dio mai Pahu (bainena isanga Mehetabeel, änä'na Matred, ampona Mezahab).

⁴⁰⁻⁴³ Anna indem ia sanganna botto anna kabuttuanna to umpangngissi Edom, pessubunna Esau: Timna, Alwa, Yetet, Oholibama, Ela, Pinon, Kenas, Teman, Mibzar, Magdiel anna Iram. Ia asammi too inde sanga dipakonaiaim pessubunna anna tadongkonganna si mesa-mesa.

Pangngimpinna Yusuf

37:1-11

37 Indo Yakub si tohho dio lembäna Kanaan ongeanna ambena yolona. ²Indem ia peänäsanna Yakub:

Änä'na mesa isanga Yusuf mangnguhapi, mane sapulo pitu taunna dadinna, si uningkambisam dombana ambena sola-solai sanaka-naka kakanna, sangngim änä'na Bilha anna Zilpa bassim bainenapi duka' Yakub ambena. Ingganna gau' kadakena solasubunna si natula' asam Yusuf lako ambena.

³Indo Israel umpakamaja puha ia Yusuf anna la änä' senga'na aka matua ham mane dadii. Pissam wattu napopepapiaam mesa baju tä' deem pada samapia. ⁴Tappana naita solasubunna la'bi puha ia

pa'pakamajanna ambena lako Yusuf, iya sangngim si nakabassim anna tä' si napa'kadai manappa.

⁵Pissam wattu mangngimpi Yusuf. Indo pangngimpinna natula' lako solasubunna nasuhum tuttuam si nakabassii. ⁶Aka ma'tula' Yusuf naua: "Pehingngiia' pangngimpingku: ⁷Kuita mahassam diokia' kahi' bela' unkgutu'i gandum. Iya mellimbangommi pangkutu'ku, ke'de' längäm mane sule asanni kahi' pangkutu'mua' umpali'i umpenombai pangkutu'ku."

⁸Iya sangngim ma'kadam solasubunna lako naua: "Umbai' mohäeko battuam la untomahajaikanni le'? Umbai' mohäeko la ullumbäikam." Iya saundu'um sangngim unkgabassi Yusuf aka indo pangngimpinna anna pa'tula'na.

⁹Mane mangngimpi pole oi. Indo pangngimpinna natula' oo duka' lako solasubunna naua: "Mangngimpi omä': Kuita kahi' mata allo, bulam, anna sapulo mesa bintä sule kahi' menomba dio oloku."

¹⁰Tappana natulasam ambena sola solasubunna indo pangngimpinna, natapakadaim ambena naua: "Aka bäbä hia isanga itim pangngimpimmu iko? La maakam ia susi la solakam indomu anna solasubummu la menomba dio olomu?"

¹¹Sangngim unkgembuhui Yusuf indo solasubunna, sapo' napailaam penaba ia ambena anna si napikki' liu naua: "Aka amo la kalembasanna?"

Yusuf nabalu' solasubunna

37:12-36

¹²Pissam wattu le'ba'i oom solasubunna Yusuf unkgambi' dombana ambena, lu lako sikahuku' Sikhem. ¹³⁻¹⁴Tappana sanaka amoi benginna dio, iya nauam Israel lako Yusuf: "Dioi sikahuku' Sikhem solasubummu ma'kambi' domba. Dadi laoko lako pesi'dinnii, mane suleko untulasannä'."

Natimba' Yusuf naua: "Io ambe'." Iya mengkalao siahampellei banuanna dio lembäna Hebron lu lako Sikhem.

¹⁵ Mahassanni ma'lao-lao lako mesa pa'kambisam dio Sikhem, iya silambi'um mesa tau. Iya mekutanam indo tau naua: "Aka hi iko umpeä?" ¹⁶ Natimba'im naua: "Umpeää' solasubungku. Muita haka iko naongeti ungkambi' dombana?" ¹⁷ Nauam indo tau: "Io kuita, sapo' le'ba'im. Aka kuhingngi sipa'tula'-tula' naua: 'Talulakoa' Dotan.'" Le'ba' siam Yusuf naua lako, iya nalambi'um dioi Dotan.

¹⁸ Sapo' indo solasubunna, mane muita mambela Yusuf anna sipattuju-tujum la napatei.

¹⁹ Sipa'tula'-tula' naua: "Petua'ia' sulem to si mangngimpintaa'. ²⁰ Tapateia' pole' anna tatibeia' dokko inde pambo'bä', mane tauaia': 'Nasakka olo'-olo' to peande.' Anna tapetua'ia' la maaka amo duka' susi indo pangngimpinna."

²¹ Tappana nahingngi Ruben pattuju ia too, aka mohäe ia la nalappasam, iya nauam: "Daa tapateia', ²² daa umpati-tolloia' hahana. Tibe mammia' dokko itim pambo'bä' inde pohiallasam, sapo' daa untappai limaia'." Ilaam penabanna Ruben la umpesäkai Yusuf dio mai pattuju kadakena solasubunna, anna la napopa'pasulei lako ambena.

²³ Ia sia sulena Yusuf umpellambi'i solasubunna, naälai siahampellei solasubunna indo baju mapi'dä'na illaam mai kalena. ²⁴ Mane untibeia' Yusuf dokko pambo'bä' takeuwai. ²⁵ Mahassannii mangngande, iya muita mambelam molengko to Midian pessubunna Ismael sola-sola untana unteke' dama', sahhupa pakuli isanga balsam, anna dama' si bubanau' isanga mur, buttu dio mai Gilead la lu lako Mesir ma'balu'.

²⁶ Ma'kadam Yehuda lako solasubunna naua: "Akam gunana kela

umpateikia' adinta mane tabuniia' hahana? ²⁷ Tabalu' dia' lako to Midian sapo' daa tatappai limaia' aka buku hahataa'." Iya nahingngiam solasubunna indo tula'na. ²⁸ Tappana liu indo to Midian, iya muäläim sule Yusuf dio mai indo pambo'bä' anna nabalu'i dua pulo doi' peha' lako indo to Midian. Iya napasolam lako Mesir.

²⁹ Tappana masäe-säe lessu'na, iya mane sule hia Ruben lako indo bujum. Napetua', iya ke pa'dem ia Yusuf dio. Umpesepäsammi bajunna aka mapi'di' penabanna ³⁰ mane umpellambi'i solasubunna anna nauai: "Pa'dem indo änä'-änä' dio! Iya akam la kupogau?"

³¹ Mane sikaumpatei mesa beke anna naalai indo baju mapi'dä'na Yusuf anna napapuläi hahana. ³² Mane nababai indo bajunna Yusuf lako ambena anna nauai: "O Ambe', kilambi' inde baju dio pa'kambisam, pahessai taia mammaka bajunna änä'mu?"

³³ Tappana napahessa Yakub indo baju, iya nauam: "Tungka iam too inde bajunna änä'ku, mannassa pa'dem tia, puham nasakka anna nasepä'-sepä'i olo'-olo' to peande." ³⁴ Umpessessesammi bajunna Yakub aka husa', anna ma'poheba bahatai. Ma'minggu-minggu naolaam ma'bahata aka kamapi'disanna illaam kamateanna Yusuf, änä'na. ³⁵ Ingganna änä'na muane anna baine sule asam umpakahangai, sapo' moka dipakahanga aka naua: "La ma'bahata liuä' lambi' lako mateku sule lako ullambi'ä' ongeanna änä'ku illaam kamateam." Iya sumahho lium ussahhoi änä'na.

³⁶ Indo Yusuf nabalu' pole indo to Midian lako mesa to mengkähä illaam banuanna Firaun tomahaja dio Mesir, isanga Potifar. Indo Potifar kapalana sohodadu to unjagai banuanna Firaun.

Yehuda anna Tamar

38:1-30

38 Yehuda ia wattu eta too, umpellei ingganna solasubunna anna le'ba'i umpellambi'i mesa to Adulam isanga Hira anna tohhoi sola. ²Etam naongi Yehuda muita mesa änä' daha, änä'na Syua to Kanaan. Napobainem Yehuda baine ia too, anna napasolai metindo. ³Iya kebättäm indo baine lambi' undadlam muane-ane, nasangai Er. ⁴Puhai ia too kebättä oom indo bainena, iya undadlam pole oo muane-ane, nasangai Onan. ⁵Puhai ia too, kebättä oom lambi' undadlam oom muane-ane, nasangai ia Syela. Dio Kezib Yehuda anna dadii Syela.

⁶Iya mualam baine Yehuda napasialaam Er änä' uluana. Indo baine isanga Tamar. ⁷Sapo' indo Er änä' uluana Yehuda, mesa to si ma'gau' kadake dio olona DEBATA, nasuhum napakapodi' sungnga' ia DEBATA.

⁸Pissananna ma'kadam Yehuda lako Onan naua: "Bala'i kakammu umpobaine indo bainena. La umpasola metindo aka tä' mala tala umpadadiangko änä' kakammu." ⁹Napobainem Onan, sapo' aka naissammi naua taia siam ia la ungonkoi ke dadii änä'na. Nasuhum si napasola oi too metindo indo bainena kakanna, napeä oom lalanna anna mala tä' kebättä indana umpadadianni änä' kakanna. ¹⁰Sapo' indo gau'na Onan nakahi'di' DEBATA naita, napolalam napakapodi' duka' sungnga'na DEBATA.

¹¹Iya ma'kadam Yehuda lako Tamar manintunna naua: "Lakongko too banu-anna ambemu ammu kanonnä dio me-paiham to balu, anna kasallepa änä'ku Syela mane umpomuane." Sapo' naua hia illaam penabanna: "Mate pole oo duka' manii susi indo duam kakanna ke

napobainei." Iya le'ba'um duka' Tamar lako banuanna ambena anna tohhoi dio.

¹²Masäe-säei, matem indo bainena Yehuda änä'na Syua. Tappana lendu' bahatanna, le'ba'um Yehuda lako Timna sola indo Hira to Adulam sammuanena la umpellambi'i indo to unggontinganni bulu dombana dio.

¹³Iya napelelem Tamar dio mai tau nauaam: "Mahassam mangngola lalam Yehuda pasanammu la lako Timna, unggontinni bulu dombana." ¹⁴Muälai siahham lao poheba balunna Tamar anna umbala'i pohebana ussapu'i kalena anna ma'lullunni. Mane le'ba'i muokko' dio sa'de ba'ba kota Enaim, sa'de lalam lako Timna. Aka naita kasallem indo Syela, sapo' tä' di dibeem napomuane.

¹⁵Tappana naita Yehuda, iya nasangam baine passunda' aka umbuni lindona Tamar. ¹⁶Iya napellambi'i siahham anna nauaanni: "Mohäeä' la umpasolako metindo." Aka tä' naissam naua manintunna hia. Natimba' indo baine naua: "Aka la umbeennä' ke mohäeko la umpasolaä' metindo?" ¹⁷Natimba' Yehuda naua: "La kupakatuko mesa änä' bekeku." Iya nauam: "Assala'na deem la kuanda'i lambi' umpakatuä'." ¹⁸Ma'kada oom Yehuda naua: "Aka la kubeengko?" Natimba' naua: "Cap meteraimmu sola mani' anna itim tekkem dio limammu." Iya nabeem asammi ingganna indo napelaunna sampe napasola metindo, lambi' kebättä indo baine.

¹⁹Puhai ia too, le'ba'um indo baine muälai pesapu' lindona anna umpa'pohebai sule indo poheba balunna.

²⁰Lessu'na ia too, nauam Yehuda lako sammuanena to Adulam: "Laoko babaangannä' indo baine inde änä' beke, anna mualaannä' sule cap meteraingku sola mani' anna tekkengku." Sapo' pa'dem dio indo baine nalambi'.

²¹ Iya napekutanaam lelemmi ongeanna indo baine naua: “Si umba hia ngei naongi indo baine passunda' inde Enaim, indo si mangngampa eta inde bihim lalam?” Iya sikanatimba'um naua: “Aka tä' deem baine passunda' eta inde.”

²² Iya ma'pasulem anna umpellambi'i Yehuda naua: “Tä' deem kulambi' indo baine, anna naua toi indo to eta: ‘Tä' tia deem baine passunda' eta inde.’”

²³ Iya nauam Yehuda: “Päbäim too naala indo baham-baham, assala'na tä'ki' kaissangam indo pa'pogausanta anna natula'-tula' tau. Malam tia aka kupakatu si'da-siam indo änä' beke, sapo' tää'na ham deem ullambi' indo baine.”

²⁴ Tallu bulanni umbai' lessu'na, natulasammi tau Yehuda naua: “Indo Tamar manintummu kebättäm aka massunda'.” Nasuhum keaha' Yehuda aka naua: “Akanna massunda'i itim manitungku? Babaia' mai anna ditunu mampui'.”

²⁵ Tappana dibaba lako indo Tamar, iya ussuam tau mendiolo umpellambi'ianni pasananna, anna nauaanni: “La muuaam: ‘Iai too ade' muane umpuänganni inde baham-baham, iam too ungkebättäi. Pahessai ade' inde cap meterai sola mani' anna tekkem. Menna amo puäna?’”

²⁶ Tappana napehupa Yehuda indo baham-baham, iya nauam: “Malolo puha hi tia anna kao, aka tä' si'da ohi deem kubeem indo änä'ku Syela.” Iya tä'um deem napasola pole metindo indo baine.

²⁷ Pissananna la keänä' kalei indo baine, iya hendu hia indo änä' illaam tambu'na.

²⁸ Tappana subum indo änä'-änä', mesa umpasubum yolo limanna sabali. Iya naanda'im indo to si ma'pakeänä'

anna nasäke'i bännä malea, mane nauai: “Iam too inde la mendiolo subum.” ²⁹ Sapo' tappa nahuntu' sule limanna indo änä'-änä'. Iya subummi indo solasubunna muane. Iya nauam indo to ma'pakeänä': “Matohomoko iko messubum.” Iya nasangaim Peres.[†] ³⁰ Puhai ia too, subummi duka' indo mesa, indo to disäke' bännä malea. Iya nasangaim ia Zerah.[‡]

Yusuf dio banuanna Potifar

39:1-23

39 Tappana nababa to Midian Yusuf lako Mesir, iya naallim to Mesir isanga Potifar, mesa to si mengkähä illaam banuanna tomahaja Firaun. Ia kapalana sohodadu to si unjagai tomahaja.

² Indo Yusuf tohho illaam banuanna puäna anna nasahum DEBATA anna natamba' liu ingganna pa'palakoanna.

³ Tappana naita anna naissam Potifar naua: “Inde Yusuf to nasahum DEBATA aka ia nakähä ia katambasam,”

⁴ iya saundu'um napakamaja anna ia naala si untahiai. Anna napakuasa illaam banuanna lambi' nabeho lako asam ingganna kullena, anna iai ullima'ianni.

⁵ Napahandu'na eta too, indo umbeenna kakuasaam Yusuf illaam banuanna, anna naanda'iam ingganna kullena, tappa natamba' DEBATA Potifar anna mellängäm kullena;

susi illaanna banua, teem lakona bela'. ⁶ Iya ingganna-ingganna sia nabehoam asammi dokko lisu pala'na Yusuf anna ia asam umpoissanni. Tä'um ia deem aka-aka napikki' sulibanna indo la napohäna naande.

Indo Yusuf mesa änä' muane mapia tubo.

⁷ Pissam wattu kende' penabanna bainena Potifar umpohäe Yusuf. Iya

[†]38:29 *Peres*: kalembasanna, *ma'dallo' messubum*.

[‡]38:30 *Zerah*: kalembasanna, *malea* battu haka *masiä'*.

nababaim naua: “Maiko talao petindo.”

⁸Iya nauam Yusuf: “Mokaä', aka issinna inde banua, äto'na pengkähängam anna kulle, nabeho asammi puäku dokko lisu pala'ku. ⁹Mala diua diona kakuasaam illaam inde banua yabokam lemba' tasitolam. Tä' deem nahä'däsännä' napabehei sulibanna iko aka bainenako. Maakam ia susi la umpogau'ä' kakadakeam kasalle anna la unghähä dosa lako Puang Allataala?”

¹⁰Indo baina Potifar allo-allo si umpa'se'de'-se'de' liu Yusuf, sapo' moka Yusuf la napasola metindo anna tä'um si nakahuku'.

¹¹Deem pissam wattu tama banua Yusuf la unghähä pengkähänganna anna siampu' lo'bä banua. ¹²Sulem indo baine muanda'i bajunna Yusuf anna nauaanni: “Maiko anta petindo sola.” Sapo' ulleddusam bajunna Yusuf, anna lumumpa'i tama sulibam. ¹³Tappana naita indo baina Potifar tohho bajunna Yusuf naanda'i anna le'ba' ia kalena kumondä tama sulibam, ¹⁴⁻¹⁵iya untambai asammi to si mengkähä illaam banuanna anna ma'tula'i naua: “Petua' siaia', indo sabua' to Ibrani nababa muaneke tama inde banua, sule hia la mepa'tomahomahoi, sule la nabobo'ä'. Nauaannä': ‘Talao petindo,’ sapo' tappa kaoli-oliä', iya le'ba' bäbäm lumumpa' taungkilalai bajunna.”

¹⁶Indo baju naanna lium baina Potifar sampe sule muanena. ¹⁷Iya ma'tula'um lako muanena naua: “Indo sabua' to Ibrani umbaba sule, nasändä'-sändä' la nabobo'ä', ¹⁸sapo' kaoli-oliä', iya lumumpa'um tama sulibam taungkilalai bäbäm bajunna.” ¹⁹Nahingningna Potifar indo pa'tula'na baina, tappa hede-hede aha'na.

²⁰Iya napopesakka siahham puäna anna napatamai tahungkum, pa'tahungkunganna ingganna to natahungkum Firaun. ²¹Sapo' naolaam

liu DEBATA Yusuf anna napasahoni pa'kamasena, lambi' napakamäjjä indo kapalana to si unjagai tahungkum. ²²Ingganna pengkähängam anna pa'palakoam illaam tahungkum nabeho asam indo kapalana to si unjagai tahungkum lako Yusuf, nasuhum indo ingganna to ditahungkum illaam pala' limanna. ²³Tä'um ia deem aka-aka napikki' indo kapalana to si unjagai tahungkum aka napalako asammi Yusuf. Aka naundu' DEBATA nasuhum ingganna pa'palakoanna mapia asam anna kembua mapia.

Pangngimpinna kapalana to si umpaihu' anna kapalana to si umpande Firaun

40:1-23

40 Masäe-säei puhanna, deem kapalana to si umpaihu' Firaun sola kapalana to si umpandei, bassim umpogau' kasalaam lako tomahaja, ²napolalam keaha' Firaun lako indo dua kapala. ³Iya bassim napäsä'um tama tahungkum indo dipantahungkunni duka' Yusuf dio banuanna kapalana sohodadu to si unjagai tomahaja. ⁴Masäe naolaam ditahungkunni eta, anna Yusuf nasua indo kapalana sohodadu la si umpamoloi indo dua tau illaam ingganna kapahalluanna.

⁵Pissam wattu simbaha mangngimpi illaam mesa bengi indo dua tau, anna bassim deem kalembasanna indo pangngimpinna. ⁶Tappana sule Yusuf mebenggi', muitam indo dua tau bassim nonno-nonno masussa. ⁷Iya nakutanaim naua: “Maaka hia anna bassim masussakoa' diita?” ⁸Bassim mentimba'um naua: “Mangngimpikam sapo' tä' deem tau mala umbittuiangkam.” Iya natimba'im naua: “Sapo' kuua hi kao Puang Allataala hia kuasa umbittui pangngimpi. Sändä'pi untulasannä'

itim pangngimpimmua?"⁹ Iya indom yolo kapalana to si umpaihu' Firaun untula' pangngimpinna naua: "Kupangngimpi deem kahi' satoo' anggur dio oloku.¹⁰ Indo anggur tallu täkena, iya kendaum händä siaham, mane kembanganni, mane kembuai timbahutu-hutu si matässä'.¹¹ Mahassannä' kahi' muanda'i ihusam anggurna Firaun, iya kualam indo bua anggur anna kupahhai tama ihusanna, mane kubabaanni lao."

¹² Nauaammi Yusuf: "Susi inde kalembasanna itim pangngimpimmu: Indo tallu täke, kalembasanna tallu bengi.¹³ Tallu bengii too, sulengko naala sule Firaun napassubungko illaam mai inde tahungkum, aka la napopengkähäko sule dio pengkähängammu. La si umbeem oo sule Firaun ihusam anggurna susi indo si umpaihu'.¹⁴ Sapo' kilalai hämä' kao ke muongeingko sule ongeammu, pa'tula'iannä' Firaun lalanna anna ditahungkunnä', anna umpelauannä' lako, umbä ke malaä' dipassubum illaam mai inde tahungkum.¹⁵ Aka disakka bäbää' too dio bottoku, botto litä'na to Ibrani, anna tä' toi deem pa'pogausanku inde Mesir la sipäto'na ditahungkunnä'."

¹⁶ Tappana nahingngi indo kapalana to si umpande Firaun naua: "Mapia hia kalembasanna pangngimpinna indo to si umpaihu' Firaun." Iya untula'um duka' pangngimpinna naua: "Kupangngimpi kao mahassannä' kahi' undudum tallu bähä-bähä kinande.¹⁷ Indo bähä-bähä handam yaboam ma'hupa-hupa kinandena Firaun dio. Sapo' mahassam siam kududum, iya sule siaham sanaka-naka dassi anna naandei."

¹⁸ Natimba'i Yusuf naua: "Susi inde kalembasanna itim pangngimpimmu: Indo tallu bähä-bähä kalembasanna tallu bengi.¹⁹ Tallu bengii too napassub-

ummoko Firaun anna naäläi ulummu mane natoke'i bakkemu längäm mesa kaju pantokesam, anna la sulei dassi naande balemu."

²⁰ Tappana tallu bengi, ma'hamehamem Firaun, umpande asam to pengkähäna illaam banuanna aka allo kadadianna. Napesuaammi Firaun dipassubum indo kapalana to si umpaihu'i anna kapalana to si umpandei. Bassim dipassubum illaam mai tahungkum anna dipailaanni alla'-alla'.²¹ Dipopa'pasule ia lako pengkähänganna indo to si umpaihu'i, lambi' si umpaihu' oo sule Firaun.²² Sapo' indo ia kapalana to si umpandei, ditoke' ia susi indo pambittuinna Yusuf.²³ Sapo' lembe bäbäm ia indo kapalana to si umpaihu' Firaun, tä'um unglilalai Yusuf.

Pangngimpinna Firaun

41:1-36

41 Tappana dua taunni lessu'na, iya napangngimpim duka' Firaun mahassam kahi' ke'de'-ke'de' dio bihinna salu Nil.² Iya muitam pitu sapim si mapia kale anna si maloppä' buttu dio mai indo salu, kende' längäm bihim salu anna dioi ma'ande-ande.³ Mane muita polei buttu dio mai indo salu pitu sapim senga' si kadäkke' anna si madokko'. Kende' duka' längäm bihim salu anna umpengngampe'i indo sapim si maloppä'.⁴ Pissananna indo sapim si kädäkke' anna madokko' muande indo sapim si mapia kale anna malompo. Iya tikkedu'um Firaun.

⁵ Tappana mamma' sule, iya mangngimpi pole oom. Muita opi kahi' mesa bätä gandum ungkembuaam pitu bulinna gandum si mabulli' anna si maläppu'.⁶ Mane muita pole boi kende' dio mai indo bätä ia siam, pitu oo bulinna gandum si läkko' anna malasso, nalasso hibu' malussu buttu illaam mai

tandai mata allo. ⁷Pissananna indo buli si läkko' muamma' indo buli si mapi'dä' anna si maläppu'. Tikkedu'i Firaun, iya ke mangngimpi hia.

⁸Mebengngi'i makananom penabanna Firaun umpikki' indo pangngimpinna aka mohäe la naissam kalembasanna. Umpopetambaim ingganna to ma'issam-issam anna to manähä illaam kapahentaanna anna natulasanni indo pangngimpinna, sapo' tä' punala deem moi podo la mesa la naissam umbittuainni.

⁹Iya ma'tula'um lako Firaun indo kapalana to si umpaihu'i naua: "Temo ham mane kukilalai kasalaangku. ¹⁰Indo sanaka amo wattunna lessu' ungkeaha'ikam solakam kapalana to si umpande tomahaja anna untahungkungkam dio banuanna kapalana sohodadu to si unjagai tomahaja. ¹¹Deem pissam bengi bassim mangngimpikam anna bassim deem kalembasanna indo pangngimpingki. ¹²Kitula'um indo pangngimpingki lako mesa änä' muane to Ibrani, sabua'na kapalana sohodadu to si unjagai tomahaja. Iya bassim natulasammakam kalembasanna indo pangngimpingki. ¹³Iya indo ingganna pambittuinna sule lako asam. Dipopa'pasuleä' kao sule lako pengkähängangku, anna ditoke' ia indo kapalana to si umpande tomahaja."

¹⁴Tappa ussua siahanni tau Firaun untambai Yusuf. Dipassubum siahann duka' Yusuf illaam mai tahungkum. Iya unγκällu'im bulu lindona anna ma'pohebai mane dibabai lako olona Firaun. ¹⁵Napa'tula'im Firaun naua: "Sabengi mangngimpiä' sapo' tä' deem tau muissanni umbittui. Sapo' kuhingngi si muissam umbittui pangngimpi." ¹⁶Natimba'im Yusuf naua: "Tä' duka' kuissam kela buttu di kaoui, sapo' Puang Allataala la umpaissanniko

kalembasanna anna mala muissam manappa."

¹⁷Natula'um Firaun indo pangngimpinna naua: "Kupangngimpi ke'de'-ke'de'ä' kahi' dio bihinna salu Nil. ¹⁸Iya kuitam kahi' buttu dio mai indo salu pitu sapim si maloppä' anna mapia kale, anna ma'ande-andei kahi' dio indo bihim salu. ¹⁹Dako'i buttu pole boom dio mai indo salu pitu sapim senga' si mahäkke'-häkke'. Tandana liba' madokko'na kupali'um inde Mesir, iya tä'pi deem kuita la susi kadakena. ²⁰Tä' masäe, iya kuitam indo sapim si kadäkke' anna si madokko'-dokko' muande indo pitu sapim si maloppä' to yolo buttu. ²¹Tappana puha naande, iya tontä liu siam kahi' kuita kalena indo sapim madokko'. Tä' deem tidende tambu'na moi la sai'di'um. Iya tihambammä'.

²²Tä' masäe mamma' omä' sule, iya mangngimpi pole omä'. Mahassanna kuita kahi' illaam mai mesa bätä gandum buttu pitu bulinna gandum si mabulli' anna si maläppu'. ²³Sapo' tä' masäe, kuitam indo bätä ia siam naongi buttu pole boo pitu bulinna gandum si läkko' anna malasso napobua' hibu' buttu illaam mai tandai mata allo. ²⁴Anna mane kuita indo buli gandum si läkko' muamma' indo buli gandum si maläppu'. Inde pangngimpingku puha asammi kutula' lako ingganna to si ma'issam-issam, sapo' tä' tappa' deem moi podo la mesam tau la muissanni kalembasanna."

²⁵Ma'kadam Yusuf lako Firaun naua: "Itim dua pangngimpimmu tontäm, aka mesa kalembasanna. Napalosaiko Puang Allataala kaha-kaha la napadadi inde lembäna Mesir. ²⁶Indo pitu sapim si maloppä' anna pitu bulinna gandum si maläppu' bassim kalembasanna pitu taunna. ²⁷Indo pitu sapim si madokko' anna kädäkke' anna pitu bulinna gandum si malasso anna läkko', kalemb-

basanna la kende' pitu taunna naolaam kakobeam.

²⁸Puha kuua inggenena' napalosaiko Puang Allataala indo la napakende'. ²⁹Dadi muissammi inde pitu taunna la sule, la kende' alaangkinande, la bosa' tau illaam paluäna Mesir. ³⁰Mane sulei pitu taunna kakobeam, nasuhum indo wattu kabosasam la dikalembei tanda mapi'di'na. Ingganna lao mobotto-bottoam la natalappi' kalobahiam mapana'. ³¹Indo kakobeam la liba' mapana'na, nasuhum tä'um la nakilalai hupatau naua: 'Puha kiolai wattu kabosasam.' ³²Penduangko mangngimpi moi anna mesa siam kalembasanna. Aka kaha-kaha ia too puha nakattum Puang Allataala anna la napadadi siaham.

³³Dadi la umpeäko mesa to manähä anna to keaka' la mampahe' illaam inde Mesir. ³⁴Maka' mala, la muäkä'ko si sanaka-naka tau umpatadongkom lako mobotto-bottoam anna uhhempunni bahe limanna ingganna bua pengkähäna hupatau illaam pitu taunna wattu kabosasam inde la sule. ³⁵Indo ingganna gandum pa'hempum la dipapiaam loko lako si mesa-mesa ongeam indo unguasainna anna dianna manappai. ³⁶Maka' too dipasusi, la mala deem kinande toka, la ganna' naande hupatau ke sulei indo kakobeam pitu taunna illaam inde Mesir."

Yusuf muanda'i kakuasaam dio Mesir

41:37-57

³⁷Indo tula'na Yusuf natahima mapia Firaun sola ingganna to mengkähäna illaam kapahentaam. ³⁸Tappana ditula' menna la diäkä', ma'kadam Firaun lako ingganna to mengkähä illaam kapahentaanna naua: "La deem daka talambi' polea' tau la susi inde Yusuf? Aka inde tau mannassa anna to nasahunni Penabanna Puang

Allataala." ³⁹Ma'kada Firaun lako Yusuf naua: "Ikom handam manähä anna keaka' illaam inde botto, tä' deem la susimmu, aka iko napalosa Puang Allataala diona kaha-kaha ia too. ⁴⁰Dadi temo kuäkä'ko la muanda'i kakuasaam illaam inde botto. Iai too muua, iam natuhu' ingganna hupatau to kulumbäi; angga ham kao untondongko aka tomahajaä' kao. ⁴¹Dadi temo kuäkä'ko la muanda'i kakuasaam illaam lembäna Mesir." ⁴²Iya untässu'im sissinna battu diua cap meterainna anna napatamaanni tahuno-hunona Yusuf. Anna napapohebai poheba handam mapia mane napamani'i mani' bulabam. ⁴³Mane napa'pahentaanni Firaun dipalängäm bendi mapi'dä' Yusuf, angga ham bendinna tomahaja untondonni, mane dipopenggulilinni anna metamba-tamba liui sanaka-naka tau dio olona naua: "Penombakoa.'" Susim too lalanna Yusuf naäkä' Firaun mendadi to kuasa dio Mesir.

⁴⁴Ma'kada pole oom Firaun lako Yusuf naua: "Kao tomahaja inde Mesir, sapo' ingganna kaha-kaha tä' mala napogau' hupatau ke taiai pa'elo'mu." ⁴⁵⁻⁴⁶Ussangaim Yusuf Zafnat-Paaneah, anna napasialai Asnat änä'na Potifera sandona to Mesir dio On.

Indo Yusuf tallu pulom taunna dadinna anna naäkä'i Firaun. Iya mengkalao siaham dio banuanna Firaun le'ba' ullelei mobotto-bottoam dio Mesir. ⁴⁷Napahandu' etam too, kende' alaangkinande dio Mesir, lambi' pitu taunna naolaam bosa' hupatau. ⁴⁸Illaam indo pitu taunna kabosasam, naolaam Yusuf ussua hupatau uhhempum kinande lako mobotto-bottoam dio lembäna Mesir, anna naannai illaam si mesa-mesa kota. ⁴⁹Indo gandum pa'hempum buda sugali'um, nasuhum tä' bábäm nabela nahekem Yusuf aka mellitä' bábäm budanna.

⁵⁰Tä'pi sule kakobeam anna dadii dua änä'na Yusuf sihuntum muane nasibalii Asnat. ⁵¹Indo änä' uluana nasangai Manasye^f aka naua: “Napalembeä' Puang Allataala dio mai ingganna pi'di'ku indo di mangnguhanguku anna kamamallisanguku lako banuanna ambeku.” ⁵²Anna indo änä' kaduanna nasangai Efraim[§] aka naua: “Namana'ä' kadeengam anna pandadiam Puang Allataala illaam botto kuongeti dipakamase-mase.”

⁵³Tappana lessu' pitu taunna kabosasam, ⁵⁴sulem kakobeam susi indo pa'tula'na Yusuf. Kende' kakobeam lako ingganna botto, sapo' dio ia Mesir deem ia kinande dipatoka. ⁵⁵Tappana nalambi' kakobeam pakketauanna Firaun, suleim umpelau kinande lako tomahaja. Iya nauaammi: “Pellambi'ikoa' Yusuf anna ia too napahesangkoa' ianna' too la untuhu'.”

⁵⁶Indo kakobeam tä' deem hupatau nasala illaam inde lino. Nabukkaim Yusuf indo ingganna loko gandum anna nabalui' lako to Mesir aka kobe asammi duka' hupatau dio. ⁵⁷Susi toi duka' hupatau buttu dio mai mobotto-bottoam, sulei mangngalli gandum lako Yusuf aka mapana' kakobeam lako lino.

Solasubunna Yusuf le'ba'i lako Mesir

42:1-38

42 Tappana naissam Yakub naua deem ia gandum dio Mesir, nauam lako änä'na: “Akanna kanonnä bääbä hako' iko? ²Kuhingngi kaheba deem ia ade' gandum dio Mesir. Laokoa' lako alliangkia' gandum indana matekia'.”

³Iya le'ba'im lako Mesir indo sapulo solasubunna Yusuf la lao mualli gandum. ⁴Anggam ia Benyamin indo sola indona Yusuf, tä' napäbäi Yakub lao

sola solasubunna aka napa'kalallangam. ⁵Dadi indo to sulei mangngalli gandum, dio duka' heem peänäsanna Israel aka nahua duka' kakobeam dio lembäna Kanaan.

⁶Aka Yusuf to kuasa anna unkapalai pa'balusam gandum, iya ia napellambi'i solasubunna anna napenombai. ⁷Tappana muita solasubunna, tappa naissam naua: “Solasubungku.” Sapo' naägä'i lelem angga' tau senga' umpomato'do' pa'kadanna naua: “Botto umbaa' muongeti buttu?” Mentimba'im naua: “Buttu diokam mai lembäna Kanaan, sulekam la mangngalli kinande.”

⁸Muissam liu ia solasubunna, sapo' sangngim tä'um ia muissam Yusuf. ⁹Tappa nakilalai Yusuf indo pangngimpinna. Iya nauaammi: “Mata-matakoa' inde ä. Sulekoa' la ummata-matai umba naongeti malammana inde botto tää'na dijagai.”

¹⁰Sapo' mentimba'i naua: “Tää' puäki! Anggangkam sule la mangngalli kinande. ¹¹Inde padakam mesa ambe, sangngim to malolokam, taiakam mata-mata.”

¹²Sapo' naua: “Tää'! Sulekoa' la ummata-matai inde botto anna muitaia' umba ngei naongeti kamalammaanna!” ¹³Natimba'i oom naua: “Inde padakam sabua'mu, sapulo duakam ma'solasubum buttu dio mai Kanaan. Sapo' indo tämpä', tohho ia umpasolai ambeki, anna indo mesa pa'dem ia.”

¹⁴Ma'kada oom naua: “Tä' deem gunana itim pa'tula'mua'. Puha kuua ingngena' to mammata-mataikoa'. ¹⁵La dipangngitai pa'tula'mua' battu la tappa' si'da hi. Ma'pindaä' umpolalam sanganna Firaun, tä'koa' mala le'ba' ke tä'i sule indo solasubummua'

^f41:51 *Manasye*: kalembasanna, *mepalembe*.

[§]41:52 *Efraim*: kalembasanna, *mana' sanda silapi'*.

handam tämpä! ¹⁶Sala' mennammua' mala tässu' lao mualai itim adimmu anna senga'-senga'na la kutähämpi inde, anna diitai battu la tappa' si'da hi pa'tula'mua'. Anna maka' kaägä'-ägä'koa', taia too tomahaja Firaun ke tä'koa' kupassala, aka mata-mata si'dakoa' too." ¹⁷Sangngim dipatamam tahungkum, tallu bengi dipaillaam.

¹⁸Tappana tallu bengii nauaammi Yusuf: "Kao duka' mesaä' to mengkahea' längäm Puang Allataala. Dadi anna malakoa' tubo la kupaolaikoa' lalam susi inde: ¹⁹La diolaam diissam diua tau mapia si'dakoa', patohhoia' mesa solasubummu ditähäm inde, anna ikoa' senga'na malam ma'pasule umbabaam kinande kasahapuammua' aka masussa sugali' nahua kakobeam. ²⁰Sapo' indo adimmua' tämpä' la umbabaa' sule inde anna tandaanni diua tappa' si'da pa'tula'mua', anna mala tä'koa' dipatei." Iya natuhu'im indo tula'na Yusuf.

²¹Iya sipa'tula'-tula'um naua: "Indee buanam too indo pa'pogau'taa' lessu'. Nalambi'kia' pole' buana gau' kadaketaa' lako adinta. Taita sianna' maaka susi mapidi'na penabanna indo anna mengkahumase-masei lako kitaa'. Napelau la tahäntänganna' bua sapo' tä' di tapehingngiia', nasuhum nahuakia' kamasussaam temo."

²²Ma'kadam Ruben naua: "Kuuu siam indo eta: 'Daa unghähäa' dosa lako itim änä'-änä!' Sapo' tä'koa' mebollim. Temo nalambi'ungkia' pole' buana indo kamateanna adintaa' Yusuf."

²³Sapo' sangngim tä' napelabillo naua indo pa'tula'na naissam siam Yusuf, aka naägä'i lelem si umpake guhu basa umpa'tula'i. ²⁴Menggihi' Yusuf umpassii uwai matanna, mane napatahhu' oi ma'tula'. Iya mualam Simeon anna nape-suaanni dipungo dio olona solasubunna.

²⁵Puhai, napa'pahentaammi Yusuf dipangngissiam gandum kahunna, anna indo doi'na la sangngim dipasuleam tungga' dipatamaam kahunna, anna la dibeem tinallo naandena lako lalam. Iya napateemmi situhu' pahentana Yusuf. ²⁶Puhai, umpatteke'im keledainna gandum indo kakanna Yusuf anna le'ba'i sule lako tondä'na.

²⁷Tappana tohhoi la ma'bengi, deemmi mesa umbukkai kahunna aka la umpande keledainna, iya muitam doi'na illaam kahum ia handam yaboam. ²⁸Nauam lako solasubunna: "Dipasule doi'ku, petua' siaia' illaam inde kahungku."

Iya sinenne'-nenne'im, sangngim hosso penabanna anna sangngim lumalla' mahea' anna nauai: "Aka amo umbai' isanga napogausangkia' Puang Allataala!"

²⁹Tappana sule lako Kanaan, natula'um lako Yakub ambena indo ingganna kadadiam natammu dio Mesir, naua: ³⁰"Indo to muanda'i kakuasaam dio Mesir nakahha'ikam napa'tula'i anna natanda'kam mata-mata. ³¹Sapo' kiuaam: 'Tau malolokam, taiakam mata-mata. ³²Sapulo duakam ma'solasubum mesa ambeki, sapo' pa'dem mesa anna indo tämpä' tohho ia sola ambeki dio Kanaan.'

³³Iya nauaammakam: 'Anna mannasai diua tau malolokoa', sala' mennammua' la tohho inde anna ikoa' senga'na mala ma'pasule umbabaam gandum kasahapuammua' aka masussa sugali' nahua kakobeam. ³⁴Anna umpasolaia' sule indo solasubummu tämpä' paha' anna makalesoi diua tau malolo si'dakoa' taia mata-mata. Etapi pole' mane kulappasangankoa' indo solasubummu anna la beba'koa' pole' si sule tama inde botto."

³⁵Tappana undo'do'i kahunna, naitam indo doi' pealli gandunna tungga' illaam

asam kahunna. Iya sangngim mahea'um solai ambena. ³⁶Iya nauaammi ambena: "Ikoa' buntu tumäna anna pa'dei änä'ku. Pa'dem Yusuf, pa'de pole oom Simeon, temo la umbaba pole boonna' lao Benyamin. Ingganna kaha-kaha ia too kao asam umpendudunni."

³⁷Ma'kadam Ruben lako ambena naua: "Toko la umpatei indo dua änä'ku muane ke tä'i kupopa'pasuleangko Benyamin. Kao untanggunni."

³⁸Sapo' natimba' naua: "Tä' deem la umpasolakoa' änä'ku lako, aka matem kakanna, iya ia mandam da'da'. Deem manii muakai lako dalam indo la muolaa'. Iya iam too la umpomapi'di'ä' napatei pissam illaam inde kamatuaangku."

Solasubunna Yusuf le'ba' kapenduanna lako Mesir

43:1-34

43 Sapo' tontä liupi ia mapana' kakobeam dio Kanaan. ²Tappana puha indo gandum nababa dio mai Mesir, ma'kada oom Israel lako änä'na naua: "Laokoa' alliam polekia' gandum lako Mesir."

³Iya ma'kadam Yehuda naua: "La maaka susi aka napakahi'di mate-matekam indo to kuasa dio naua: 'Tä'koa' mala sule umpellambi'i poleä' ke tä'i umpasola indo adimmua'." ⁴Dadi maka' umpäbäikam kipasola adingki, bahanikam lako mualli pole kinande. ⁵Sapo' angga hia ke tä'i, tä' kiaku la lako aka inna nauaangkam: 'Tä'koa' mala sule ke tä'koa' sola adimmu.'"

⁶Ma'kada Israel naua: "Akanna mualaannä' kamasussaam? Untula' ohia' iko muua: 'Deempi adingki.'" ⁷Mentimba'im naua: "Anu' napekanuttu'kam; Napekutanaam kasahapuntaa' naua: 'Tubopaka ambemua', deempaka adimmua' mesa?' Iya kitula' asam duka' setonganna. Aka tä' diissam diua

la meuam dia: 'Pasolaia' sule indo adimmu.'"

⁸Nauam Yehuda lako ambena: "Lapasam di itim änä'mu kipasola anna bale' mengkalaokam indana mate tadea' asangkia' sola ampomu. ⁹Kao la untanggunni. Anna kao la umpanuntu'i ke tä'i kupasolaangko sule. Kao toi la umpendudunni kadakena sule lako mateku. ¹⁰Indo kela bale' le'ba'ungkam, ambe', la kapenduankim sule."

¹¹Iya nauam ambena: "Maka' susi alai'a handam mapianna bua pengkähä illaam inde botto, susinna: balsam, duho, hampa-hampa, dama' bubanau', kamihi, anna buana badam. Patamai pa'ponggeammua' anna umbabaannia' indo to kuasa dio. ¹²Babaia' penduam pada indo pealli gandum, anna umpasuleannia' sule indo doi' ullambia' illaam kahummu. Aka umbai' lembena hi tia. ¹³Pasolaia' adimmu ammu laoa' lako indo tau. ¹⁴Puang Allataala ham To Handam Kuasa la umpatamai penaba mapia indo tau anna malai nahäntängangkoa' bua, lambi' napasuleam manappakoa' Benyamin sola Simeon. Anna di kaona kao, maka' abana la dadi susi änä'ku, iya la diakam ia susi."

¹⁵Iya nababam indo pa'lalam penabanna lako indo to kuasa sola doi' penduam pada budanna indo lessu', anna umpasolai Benyamin le'ba'i lako Mesir umpellambi'i sule Yusuf.

¹⁶Tappana muitai Benyamin sule sola solasubunna, nauam Yusuf lako to ungapalai pengkähängam illaam banuanna: "La umpasola lako banua, aka la sola-solakam mangngande maniallo. Dadi la metunuko anna umpatokaangkam kinande."

¹⁷Iya napasolam tama banua indo solasubunna Yusuf anna nakähäi pada indo napahentaam Yusuf.

¹⁸Iya dibabaim tama banuanna Yusuf, lambi' mahea'i aka naua: "Umbai' indo

doi' dipasule sule tama kahuntaa' ka-suhunganna anna dipasulekia' eta inde. Aka dipolalam la didahhikia' anna disakka la diposabua' anna dialaia' keledainta."

¹⁹Tappana dioi olo ba'ba, umpengkahuku'im indo kapalana to mengkähäna Yusuf anna nauaanni: ²⁰"Deem la kiua tuam! Indo lessu' sulekam mualli kinande ²¹⁻²²sapo' tappana ma'pasulekam, dioi indo si diongei ma'bengi, kilambi'um doi'ki illaam kahum dipatempo yabona gandum, tä' deem kuhäm. Tä' kiissam menna amo umpatamai. Sapo' indem indo doi' kipopa'pasule anna umbabapakam doi' la kipopangngalli pole kinande." ²³Nauam indo kapalana to mengkähä: "Tä'koa' la mahea' anna manangnga, aka Puang Allataala to umpenombaia' anna napenombai ambemua', iam too umpatamaangkoa' kahummu doi'. Aka indo doi' peallimmua' balim ia kutahima." Iya le'ba'um muala Simeon anna napasilambi'i solasubunna, ²⁴mane napasolai tama banuanna Yusuf. Naalaammi uwai nabaseiam bitti'na anna mane napandeanni keledainna. ²⁵Naolaam muampai Yusuf la sule ke tängäi allo, iya napatokam solasubunna indo pa'lalam penabanna, aka puham dipaissanni diua la sola-solai manggande.

²⁶Sulei Yusuf naalaim indo pa'lalam penabanna anna nabeenni napasindum menomba. ²⁷Nakutanaim Yusuf naua: "Masakke-sakke mammakoka', anna masakke mammaka ambemua' indo to muuaanna' matuam?" ²⁸Natimba'um naua: "Io, masakke mammi." Anna mane sangngim menomba oo.

²⁹Tappana muita Benyamin adinna, mekutanam naua: "Iangka inde adimmua' indo to muuaanna' tämpä?" Mane ma'kadai lako Benyamin naua:

"Natamba' dangko Puang Allataala, änä'ku." ³⁰Le'ba' siaham Yusuf tama tambinna sumahho, aka manabo inabanna muita adinna.

³¹Puhai sumahho, mendau'um mane messubunni sule. Napengkatähännim nabo inabanna anna ma'kadai naua: "Pamainna' toda' kinande." ³²Ma'meja senga' ia duka' Yusuf mangngande anna ma'meja senga' duka' solasubunna. Anna inganna to Mesir dipalao senga' ia duka' mejanna, aka nakahidi' la sola-sola to Ibrani mangngande. ³³Dipasit-ingngajo mejanna Yusuf anna mejanna solasubunna. Indo solasubunna muokko' dipopa'huntum kaka napahandu' ulua sule lako tämpä'. Tappana naita indo okko'na, iya sangngim mängä-mängä sinenne'-nenne'i. ³⁴Indo kinandena solasubunna sangngim buttu dio mai mejanna Yusuf. Anna kinande dibeem Benyamin pellima pada kinandena solasubunna. Iya kassi mangngande pada-pada sola Yusuf sampe dea'.

Dilambi' indo ihusanna Yusuf

44:1-17

44 Napa'pahentaammi Yusuf lako kapalana to mengkähä illaam banuanna naua: "Pangngissiam asanni kahunna pada la nabelanna nababa, anna tungga' umpatamaanni sule doi'na, patompoi yabona indo gandum. ²Petua'i kahunna indo to handam tämpä' anna umpa'patamai ihusam peha'ku, pasolai pealli gandunna." Napateem asammi duka' indo to mengkähä pada indo dipahesam.

³Makale'na mane tibukka' baja anna le'ba'im umpasola patteke'na. ⁴Tää'ipi mambela naola umpellei indo botto, iya ma'kadam Yusuf lako kapalana to mengkähäna naua: "Kandi'i umpadondo anna ullambi'i too muuaammi: 'Dibeengkoa' iko penaba mapia umbala' kadake hia'! ⁵Akana umbokoka'

ihusam peha'na puäku? Indo ihusam ia too si naihu'i anna si napanjappii uwai. Indee ungtähäkoa' gau' kadake!”

⁶Tappana ullambi' solasubunna Yusuf indo to disua, napa'tula'im susi indo puha napakahi'diam Yusuf.

⁷Mentimba'im naua: “Tä' kiissam itim muuam tuam. Bahanikam ma'pinda keta tä'i deem umpogau'kam kakadakeam.

⁸Aka moi indo doi' kilambi' pissam illaam kahungki dipayaboanna gandum, kipasule asam too sule. Dadi tä' punala ia pole' la umbokokanni peha' battu haka bulabam dio banuanna puämu.

⁹Maka' toko deem sala'-sala' mennangki umpallambi'i indo ihusam, päbäii dipatei ia anna diposabua'kam kami'.”

¹⁰Nauam indo to disua: “Mapia sapo' iai too dipallambi'i indo ihusam, iam kuposabua' anna senga'na mala ia le'ba'.”

¹¹Iya tungga' napasihha'um umpatuhum kahunna anna nabukkai.

¹²Napahessa asammi indo pesuana Yusuf, nahihisam mengkalao kahunna to handam kaka, sule lako kahunna to handam tämpä'. Iya nalambi'um indo ihusam illaam dia kahunna Benyamin. ¹³Sangngim häntä kakanna lambi' umpessessesannii pohebana. Umpatteke'i asammi sule keledainna anna ma'pasulei lako kota.

¹⁴Landa'i Yehuda sola ingganna solasubunna lako banuanna Yusuf, diopi nalambi'. Iya silelem muoppä menomba dio olona. ¹⁵Ma'kadam Yusuf naua: “Maaka anna ma'gau' susikoa'? Tä' daka' tiko muissam muua ingganna gau' kadakemua' kulosa asam aka pa'issanganguku?”

¹⁶Mentimba'um Yehuda naua: “Aka pole la kiuu tuam? Anu' tä' deem la kiola ma'baho battu la ummaloloam kaleki. Napa'patandaam Puang Allataala kasalaangki. Temo taia indo mandi to dipallambi'i ihusam la umposabua', sapo' ia asangki.”

¹⁷Sapo' ma'kada Yusuf naua: “Mal-omba' la kupateem, indo mandi to umboko ihusangu la kuposabua'. Ikoa' senga'na, la ma'pasule manappakoa' iko lako ambemu.”

Napelau Yehuda anna tä'i diposabua' Benyamin

44:18-34

¹⁸Umpengkahuku'im Yusuf Yehuda anna ma'kadai naua: “O puäku, mala haka ma'tula'ä' dio olomu? Tä' la ungtäha'ä'ä' aka kuissam kuua pada siangko tomahaja Mesir. ¹⁹Iko siam puha ungkutanaikam muua: ‘Tubopaka ambemu anna deempaka solasubummu mesa?’ ²⁰Kitimba'im kiuu: ‘Tubopi sapo' matuam, anna mesapi adingki sapo' matua ham ambeki mane dadii. Anna deempi sola indona sapo' matem. Dadi ia mandam tubo anna napakamäjjä ambeki.’

²¹Muuuangukam: ‘Pasolaia' sule anna kuitai.’ ²²Kitimba'im kiuu: ‘Indo änä'-änä' tä' mala sisähä' ambeki, aka maka' la sisähä' la mate ambeki.’ ²³Sapo' muuaam dakam: ‘Tä'koa' mala sule dio oloku ke tä'i solakoa' adimmu.’ ²⁴Tappana sulekam lako ambeki, kitulasammi indo tula'mu.

²⁵Pissananna nasua okam ambeki sule inde mualli kinande, ²⁶kitimba'um kiuu: ‘Tä'kam mala lao lako siita puäki ke tä'i kipasola adingki. Anggam anna malakam lako ke kipasolai.’

²⁷Lambi' ma'kada ambeki naua: ‘Puha muissanna' anggam dua änä'na Rachel, indo balungku. ²⁸Indo kakanna napelleimä'. Tä' mala tapuham naande olo'-olo' to peande aka sule lako temo tä' liupi deem sule. ²⁹Maka' la umbaba pole boa' inde tämpä' anna deenni battu aka muakai, iam too la umpomapi'di'ä' napatei pissam illaam inde kamatuanguku.’

³⁰⁻³¹Maka' tä' la kupasola inde adingku ma'pasule lako ambeki, la

matem too pole' ambeki. Aka matua punalam anna angga ham ia inde änä'na natisäke'i penabanna. Maka' la kipahuai kamapi'disam, iam pole' la umpatei. ³²Mane deenni, puhaä' ma'dandi lako ambe' kuua: 'Kao untanggunni inde änä'mu. Maka' tä' kupopa'pasuleangko, kao umpendudunni kadakena sule lako mateku.'

³³Dadi kupelau matim, puäku, anna kaoui tohho inde umposabua' bala'na ad- ingki, anna päbäii ia ma'pasule sola inde mai kakanna. ³⁴Anu' la kuakam susi ma'pasule lako ambeki ke tä'i kipasola inde änä'na. Tä' la kusaha muita ambeki nahua pi'di' kamasussaam."

Yusuf umpa'paissangam kalena lako solasubunna

45:1-28

45 Tappana tä'um nabela Yusuf untähäm penabanna, iya ussuam ingganna to mengkähäna messubum, aka la umpasoa penabanna anna la umpa'paissangam kalena lako solasubunna. Tappana lessu' asam lako sulibam indo to mengkähäna, ²uhhu'-uhhu'um sumahho Yusuf sampe nahingngi duka' indo to Mesir dio sulibam, anna lambi' kahebana lako banuanna Firaun.

³Ma'tula'um Yusuf lako solasubunna naua: "Kaom too inde Yusuf. Tubopaka ambe'?" Sangngim tä' naissam mentimba' solasubunna aka mahea' sugali' tappana naissam naua Yusuf dia.

⁴Ma'kada oom Yusuf naua: "Maimaiko'." Iya lakoim umpengkahuku'i Yusuf. Naua oom: "Kaom too inde Yusuf indo to umbalu'a' indo lessu' lako tau to la sule inde Mesir. ⁵Daa ummasussaa' sola ussosso kalemumu aka indo pa'pogau'mua' lessu'. Aka setonganna Puang Allataala too umbabaä' sule eta inde umpendioloikoa' la umpesäkäi sungnga'na tau buda. ⁶Temo mane kadua taunna kakobeam. Lima taumpi

la diolaam tä' mengkähä anna tä' deem alaangkinande. ⁷Napopendioloä' Puang Allataala la umpesäkäikoa' muolai inde kaha-kaha memängä-mängä, lambi' napatubokoa' sola pessubummu.

⁸Dadi setonganna taikoa' nasuhum suleä' inde, sapo' Puang Allataala umbabaä' sule. Napatadongkonnä' untomatuai Firaun lambi' nabeennä' kakuasaam illaam banuanna anna illaam lembäna Mesir. ⁹Temo, la umpasihha'a' ma'pasule lako ambe' anna muuaannia': 'Naua änä'mu Yusuf: Naäkä'ä' Puang Allataala muanda'i kakuasaam illaam lembäna Mesir. Dadi la maiko masimpam. ¹⁰Anna mala tohho diokoa' Gosyen, sola-sola änä'mu anna ampomu, patuboammu anna ingganna kullemu anna mala sikahuku'kia'. ¹¹Maka' tohho dioko Gosyen mala mahuku'koa' kubeem kapahalluammu, aka la limapi taunna kakobeam. Dadi inde, kupeä lalanna anna mala tä'koa' kakuhängam sola ingganna kasahapuammu anna pentuhu'mu.'

¹²Temo ungkannassaia' nasa'bii Benyamin, kao Yusuf ma'kale umpa'tula'ikoa'. ¹³Tulasanni ambe' kamatandeangu inde Mesir anna pa'huttusanni pada muitannaa' diona kakuasaangu, mane umpasihha'ia' umpasola sule."

¹⁴Puhai, ungalapu'im Benyamin adinna napasindum sumahho, iya sumahho duka' Benyamin ungalapu'-lapu'i kakanna. ¹⁵Anna mane ungalapu'i asanni solasubunna napasindum sumahho anna naudunni. Puhai, sipa'tula'-tula'um pole'.

¹⁶Tappana lambi' kahebana lako banuanna Firaun diua sulei solasubunna Yusuf, tilalla' duka' Firaun sola ingganna to mengkähä illaam kahajaanna. ¹⁷Iya nauam Firaun lako Yusuf: "Suai solasubummu ma'pasule lako Kanaan unteke'

gandum, ¹⁸anna umpasolai ambemu sola ingganna kasahapuanna sule inde. La kubeem handam mapianna litä' il-laam inde Mesir anna napekamuandei. ¹⁹Anna lako ingganna solasubummu, beenni sanaka-naka bendi anna napakei dio mai umbaba bainena sola änä'na anna ambemu. ²⁰Anna muuaanni: 'Daa ungasahaanna' kullemu umpellei, aka handam mapianna inde lembäna Mesir la muampuanna!'"

²¹Indo tula'na Firaun natuhu' asam änä'na Israel. Iya nabeemmi Yusuf sanaka-naka bendi situhu' pahentana Firaun, anna tinallo la naande muola lalam. ²²Nabeempi sandai si sapasam poheba bakahu. Anggam Benyamin dibeem ia tallu hatu' doi' peha' anna lima pasam poheba bakahu. ²³Umpakatupi duka' ambena sapulo keledai dipatteke'i sanda dio handam mapianna issinna Mesir, anna sapulo keledai bihä dipatteke'i gandum, hoti anna ande-ande senga' la naande muola lalam mengkalao dio Kanaan sule lako Mesir. ²⁴Muuaammi solasubunna: "Pengkalaongkoa', angga hia daa ussianu-anua' lako lalam."

²⁵Le'ba'im umpellei Mesir, ma'pasule lako Kanaan umpellambi'i Yakub ambena. ²⁶Iya napa'tulasammi naua: "Tubopi Yusuf, anna ia to handam kuasa dio Mesir." Tappana nahingngi Yakub kaheba ia too, iya mängä-mängä bäbä aka tä'pi ungkannangam pa'tula'na änä'na. ²⁷Sapo' tappana nahuttusam asam ingganna pa'tula'na Yusuf, anna naita toi indo bendi napa'pakatuam Yusuf la napake lako Mesir, iya sule sule sumanga'na anna ²⁸ma'kadai naua: "Matehede, tubo si'dapi päläe' änä'ku Yusuf! La laoä' lako anna kuita siapi mane mateä'."

Yakub sola kasahapuanna mentieli' lako Mesir

46:1-34

46 Ma'pakahappim Israel anna mengkalaoi umbaba asam kullena. Sulei lako Bersyeba umbabam bua pemala'na lako Puang Allataala to napenombai Ishak, ambena.

²Tappana mamma' bengi, iya nalipim Puang Allataala Israel anna napa'tula'i naua: "Yakub, Yakub." Mentimba'um naua: "Indeä' Debata." ³Ma'kadam Puang Allataala naua: "Kaom too Puang Allataala to napenombai ambemu. Daa ummahea' le'ba' lako Mesir, aka la kupakembea' pessubummu dio. ⁴La kuundu'ko dio Mesir, anna la kubaba sule pessubummu ma'pasule tama inde botto. La ma'kale Yusuf untuhhunganko matammu ke mateko."

⁵Iya mengkalaom Yakub dio Bersyeba. Naalam änä'na indo bendi napakatuam Firaun anna napalängänni sola ingganna manintunna anna ampona. ⁶⁻⁷Iya sangngim nababam lako Mesir olo'-olo'na sola ingganna kulle senga' indo pallolonganna dio lembäna Kanaan. Anna ingganna pessubunna Yakub napasola asam susi ingganna änä'na teem ampona muane anna baine.

⁸Indem ia pessubunna Israel (battu diua Yakub) to napasola lako Mesir: Ruben, änä' uluana; ⁹Änä'na Ruben iam ia: Henokh, Palu, Hezron anna Karmi.

¹⁰Änä'na Simeon iam ia: Yemuel, Yamin, Ohad, Yakhin, Zohar anna mesapi änä'na isanga Saul, to Kanaan indona.

¹¹Änä'na Lewi iam ia: Gerson, Kehat anna Merari.

¹²Änä'na Yehuda iam ia: Er, Onan, Syela, Peres, anna Zerach. Sapo' Er

anna Onan mate dio Kanaan. Peres undadlam Hezron anna Hamul.

¹³ Änä'na Isakhar iam ia: Tola, Pua, Ayub anna Simron.

¹⁴ Änä'na Zebulon iam ia: Sered, Elon anna Yahleel.

¹⁵ Padam too pandadianna Yakub to nadadiangam Lea dio Padan-Aram, anna deempi baine änä'na isanga Dina. Dadi ingganna pessubunna Yakub to buttu dio mai Lea tallu pulo tallu ia asanna.

¹⁶ Änä'na Gad iam ia: Zifyon, Hagi, Syuni, Ezbon, Eri, Arodi anna Areli.

¹⁷ Änä'na Asyer iam ia: Yimna, Yiswa, Yiswi, Beria anna mesapi baine isanga Serah. Änä'na Beria iam ia: Heber anna Malkiel.

¹⁸ Iam too sapulo annam pessubunna Yakub buttu dio mai Zilpa, indo sabua'na Lea to nabeem Laban ambena.

¹⁹ Rahel, bainena Yakub, dua ia änä'na isanga: Yusuf anna Benyamin.

²⁰ Yusuf dio Mesir dua ia änä'na isanga: Manasye anna Efraim, nadadiangam Asnat änä'na Potifera, to muanda'i kasandoam dio On.

²¹ Änä'na ia Benyamin iam: Bela, Bekher, Asybel, Gera, Naaman, Ehi, Rosh, Mupim, Hupim anna Ared.

²² Iam too sapulo appa' pessubunna Yakub buttu dio mai Rahel.

²³ Sitahhu'na änä'na ia Dan: Husim.

²⁴ Änä'na ia Naftali appa' iam: Yahzeel, Guni, Yezer, anna Syilem.

²⁵ Inde to pitu, pessubunna Yakub buttu dio mai Bilha, indo sabua'na Rahel to nabeem Laban ambena.

²⁶ Dadi pessubunna Yakub to napasola le'ba' lako Mesir, annam pulo annam ia asanna, sulibam manintunna. ²⁷ Anna änä'na ia Yusuf subum dio Mesir dua. Dadi pessubunna Yakub dio Mesir pitu pulo ia asanna sola kalena.

²⁸⁻²⁹ Ussuam Yehuda Yakub mendiolo lao umpellambi'i Yusuf umpekutanaam lalam lako Gosyen. Tappana

landa'i lako Gosyen längämmi bendinna Yusuf anna laoi untammui ambena. Silambi'na ambena nakalapu'im anna sumahhoi masäe.

³⁰ Nauam Yakub lako Yusuf: "Temo ahu'mä' pole' mate, aka kuitangko anna kuissammi kuua tubo mammopoko."

³¹ Ma'kadam Yusuf lako solasubunna anna kasahapuanna naua: "La laopä' kupaissanni Firaun kuua: 'Suleim solasubungku anna ingganna kasahapuanna ambeku dio mai Kanaan.'" ³² La kutulasam toi liu kuua: 'Indo ingganna kasahapuangku muane sangngim to si umpatubo domba, beke anna sapim. Anna umbaba dombana, bekena, sola sapinna anna ingganna kullena dio mai Kanaan.'

³³ Dadi maka' too natambaikoa' Firaun anna napekutaanni pengkähängammua', ³⁴ la muuaanna': 'Inna mengkalao bahinni'ki si umpatubokam olo'-olo' anna inna susi mengkalao dio mai tomatuangki,' anna malakoa' napatohho inde Gosyen." Ma'kada susi Yusuf aka indo to Mesir si nakahidi' la umpasola to si ma'kambi'.

Yakub umpellambi'i Firaun

47:1-12

47 ¹⁻² Umpasolam lima solasubunna Yusuf, anna le'ba'i umpellambi'i Firaun. Landa'i, ma'tula'um Yusuf naua: "Sulem ambeku anna solasubungku dio mai Kanaan, sitonda dombana, bekena, sapinna, anna ingganna kullena. Temo dioim Gosyen." Iya umpa'paissangammi solasubunna lako Firaun.

³ Nakutanaim Firaun naua: "Aka pengkähängammua'?" Natimba'im naua: "To ma'kambi'kam susi tomatuangki anna nene to kipunene. ⁴ Sulekam la messihuhu inde aka mapana' kakobeam dio Kanaan. Anna pa'de polem humpu' naande

patuboangki dio. Kela mala umpäbäikam tohho dio Gosyen.”

⁵Ma'kadam Firaun lako Yusuf naua: “Temo sulem ambemu anna solasubummu. ⁶Inde Mesir beba'ko. Päbäii tohho dioi Gosyen, aka etam handam mapianna ongeam inde Mesir. Anna muuaangannä' solasubummu handam manähäna ma'kambi' anna napahesannä' to la unγκambi' patuboangku.”

⁷Umpasola duka' ambena Yusuf lao napa'paissangam lako Firaun. Iya umpa'lambeammi Firaun Yakub. ⁸Nakutanaim Firaun naua: “Sanakam taummu ambe'?” ⁹Natimba'im Yakub naua: “Sahatu' tallu pulom taunna illaannä' pangngola-lalangam. Inde katuboangku naponnoi kamasussaam, anna kappo'di' ke dipasibandinni katuboanna nene to kuponene illaam pangngola-lalanganna.” ¹⁰Puhai, umpa'lambeam polepi Firaun Yakub, mane le'ba'i sule.

¹¹Iya le'ba'um Yusuf umbeem ambena anna solasubunna handam mapianna litä' dio Mesir sikahuku' kota Rameses, situhu' pahentana Firaun. ¹²Napatoka asammi Yusuf la kinandena ambena anna solasubunna sola ingganna kasahapuanna, situhu' budanna änä'na.

Yusuf ma'takka' muoloi kakobeam

47:13-26

¹³Tuttuam mapana' kakobeam nasi'dingam hupatau susi dio Mesir susi dio Kanaan, nasuhum malamma pa'botto aka tä'um deem naande. ¹⁴Ingganna doi' pebaja'na to Mesir anna to Kanaan to sule mualli gandum, nahempum asam Yusuf anna napadioi banuanna Firaun. ¹⁵Tappana tappu' asanni doi'na tau dio Mesir anna Kanaan, suleim to Mesir umpellambi'i Yusuf melau naua: “Tappu'um doi'ki, sapo' beengkam kinande indana matekam.”

¹⁶Natimba' Yusuf naua: “Maka' tappu'unna' ia doi'mu olo'-olo'mua' beennä', anna kubeengkoa' kinande.”

¹⁷Iya umpebeennim olo'-olo'na lako Yusuf nasukasam kinande. Anna nabeenni kinande suka'na dahanna, dombana, sapinna, anna keledainna. Susim too anna malai deem naande taum eta too.

¹⁸Kende'i taum, sule pole oom hupatau lako Yusuf naua: “Tä' kibuniangam setonganna tappu'um doi'ki anna olo'-olo'ki aka muala asammi. Angga ham deem kiampuum, kaleki anna litä'ki. ¹⁹Pesäkäikanni indana matekam, tilaum toi litä'ki. Allikam sola litä'ki, kinande la umbeengkam, anna naposabua'kam Firaun. Beengkam banne ki-ambo' indana tohho bäbäi litä'ki anna malakam tubo.”

²⁰Ingganna litä' dio Mesir naalli Yusuf, anna napuänganni Firaun. Ingganna to Mesir umbalu' asammi litä'na aka mapana' sugali' kakobeam. Susim too anna naampuum asammi litä' Firaun dio Mesir. ²¹Anna ingganna to Mesir naposabua' asam Yusuf. ²²Angga ham tä' naalli Yusuf ingganna litä'na sando aka abana si nabeem ia kapahalluanna Firaun. Iam too anna tä'um ia umbalu' litä'na.

²³Ma'kadam Yusuf lako hupatau naua: “Ikoa' anna litä'mu puham kualli, napuängam Firaun. Indem banne dibeengkoa' la muambo'a'. ²⁴Angga hia ke kende'um la umbahe limaa'; sambaheam la umbeenna' Firaun, anna appa' baheanna la umpobannea' taum pole anna la umpotuboa' sola änä'mu anna ingganna tau illaam banuammu.” ²⁵Mentimba'im naua: “Puhangkam umpesäkäi. Assala'na unγκamasei liukam, päbäi naposabua'kam Firaun.”

²⁶Susim too pa'ulalanna Yusuf muäto' diona bahe limanna bua pengkähä dio Mesir dibeem Firaun. Anna pangngä-

tosam iam too naanda'i liu to Mesir sule lako temo. Angga ham litä'na sando tä' naampuum Firaun.

Pepakahi'dinna Yakub tappana mahuku' kamateanna

47:27-31

²⁷Susim too Israel untadongkonni Gosyen dio Mesir. Mellängäm asam salu katuboanna sahapunna anna membea' pessubunna dio.

²⁸Sapulo pitupi taunna tubo Yakub dio Mesir, nasuhum mala nalambi' sahatu' appa' pulo pitu taunna naolaam tubo. ²⁹⁻³⁰Tappana la mate kale, untambaim Yusuf, änä'na, anna napa'tula'i naua: "Maka' sule tama pa'kamasemu di kao, anda'i inde ahena too' apangku aka la ma'pindako. Anna mala umpasule lako liu pa'kamasemu tama kaleku, tä'ä' la ullaum inde Mesir ke mateä'. Aka kupemulu la dilalum sola tomatuangku dio ku'bu'na. La umbabaä' lako Kanaan anna ullaum dioä'." Natimba' Yusuf naua: "La kupalako situhu' pa'elo'mu."

³¹Ma'kada Yakub naua: "Pa'pindako keta la umpasule lakoi." Ma'pindam Yusuf, iya menombam Yakub längäm Puang Allataala dio pengnguluam petindoanna.

Yakub umpa'lambeam Efraim anna Manasye

48:1-22

48 Pissam wattu sule tau untulasanni Yusuf naua: "Masaki ambemu." Mengkalao siaham Yusuf umpasola indo dua änä'na, isanga Manasye anna Efraim, anna le'ba'i muolläi ambena. ²Tappana naissam Yakub naua sule Yusuf, napengkabelaim bangom anna muokko'i yabo petindoanna.

³Ma'kadam Yakub lako Yusuf naua: "Puham umpa'paitaam kalena Puang Allataala To Handam Kuasa

lako kaleku dio Lus lembäna Kanaan, anna natamba'ä' ⁴naua: 'La kupabuda pandadiammu anna la kupakembea' pessubummu la umpangngissi lao mobotto-bottoam. Anna inde botto la kubeem pessubummu la napomana' sule lako salako-lakona.'

⁵Anna inde dua änä'mu to dadi indem Mesir kulambi', Efraim anna Manasye, la kualä änä' ikale anna la kumana' susi Ruben anna Simeon. ⁶Sapo' maka' deempi änä'mu undadiam pole, la iko ia duka' unkonai. Anna diona mana'na änä' senga'mu, Efraim sola Manasye la umbeenni. ⁷Ia anna kupateenni aka pa'lalam penabangku lako Rahel indomu. Muola lalannä' ma'pasule dio mai Padan anna matei indomu dio Kanaan sikahuku' Efrata anna nababa sugali' penabangku. Kulamum etam, dio ampe'na lalam lako Efrata." (Indo Efrata disangaim temo Betlehem).

⁸Tappana muita änä'na Yusuf, mekutanam Israel lako Yusuf naua: "Menna keänä' indee?" ⁹Natimba' Yusuf naua: "Indee änä'ku nabeennä' Puang Allataala inde Mesir." Nauam Israel: "Pomahukusanä' mai anna kupa'lambeenni."

¹⁰Tä'um masiä' naita Israel aka matuam anna makuhibo-hibom pennenne'na. Napakahuku'im Yusuf indo änä'na lako, iya bassim nakalapu'im Israel naudum. ¹¹Mane nauai Israel lako Yusuf: "Tä'um deem kubai-bai la kuitapoko, sapo' mangngeloham di Puang Allataala, lambi' malapokoa' kuita sola änä'mu temo."

¹²Mualam änä'na Yusuf dio mai abinganna Israel, mane ma'balinguntu'i menomba dio olona ambena. ¹³Puhai, muala oom änä'na Yusuf, indo Efraim, änä' tämpä'na anna napaokko'i dio tandai kaihinna ambena. Anna Manasye ia, änä' uluana, napadio tandai kananna ambena. ¹⁴Sapo' umpasisula' di limanna

Israel, lima kananna napaokko' yabo ulunna Efraim, anna lima kaihinna napaokko' yabo ulunna Manasye, anna ia hi ulua.

¹⁵ Puhai, umpa'lambeammi Yusuf sola änä'na naua:

“Puang Allataala to napenombai neneku Abraham anna ambeku Ishak, iam too to ungkambi' liuä' sule lako temo. ¹⁶ Ia toi Malaika' to ullappasannä' dio mai ingganna kakadakeam. Iam too duka' la untamba' inde änä'-änä' dua.

Kela mala sangangku, sanganna neneku Abraham, anna sanganna ambeku Ishak tontä disa'bu' illaam kalena inde änä'-änä', anna la bakka' pes-subunna umponnoi lao lino.”

¹⁷ Tä' masannam penabanna Yusuf tappana muita ambena umpaokko' lima kananna yabo ulunna Efraim. Naanda'im indo lima kananna ambena la naäkä' dio mai ulunna Efraim anna la napalulakoi ulunna Manasye. ¹⁸ Ma'kadam lako ambena naua: “Daa umpateenni ambe'. Inde hia änä' ulua la umpa'paokko'i lima kanammu yabo ulunna.”

¹⁹ Sapo' moka ambena naua: “Kuis-sam änä'ku, kuissam siam. Manasye la kasalle duka' kakuasaanna anna la buda pessubunna. Sapo' la kasalle puha ia kakuasaanna adinna anna la membea' umpangngissi lao mobotto-bottoam.”

²⁰ Iya bassim napa'lambeammi Israel indo änä'na Yusuf naua:

“La si natula' sangammua' to Israel ke umpa'lambeanni hupatau. La naua: ‘Ma'ulalam dam Puang Allataala anna napasusiko Efraim anna Manasye.”

Susim too napayolo ia Efraim anna na-paibundi ia Manasye.

²¹ Nauam Israel lako Yusuf: “Muitam too inde abana mahuku'um kamateangku, sapo' Puang Allataala la muolaangkoa' anna la nababakoa'

ma'pasule lako botto litä'na nenemu. ²² Anna iko kubeem ongeam mentamungku aka kupakalandoko iko anna la solasubummu. Indo litä' kuala dio mai to Amori aka kutalo illaam pa'bundusam.”

Ma'tampe kada Yakub lako änä'na

49:1-28

49 Untambaim änä'na Yakub naua: “Mai asangkoa' anna umpehingngii, angku tulasangkoa' la maaka susi katuboammua' sola ingganna pessubummu allo di dako'na.

² Ikoa' änä'na Yakub pa'hempungkoa' anna umpatanannii' talinga tula'na Israel ambemu.

³ Ruben änä' uluaku, iko uhu kama-tohoangku, pa'pahandusam läpu'ku. Ikom to handam matande anna kuasa.

⁴ Susiko uwai salu buntu' tä' umbela unguasai kalemu, nasuhum taikom dipaitoo'na aka umpasolako metindo bainena ambemu. Ullängänni anna ungdakeiko petindoangku.

⁵ Simeon anna Lewi to siundu'; Pa'dammua' umpake ma'gau' makahha'.

⁶ Tä'kia' too sola pattuju anna tä'kia' sola pa'palakoam. Aka untuhu'ikoa' nas-summu nasuhum umpangngula'koa' penabammu lao papateam anna uh-hatta'ikoa' uha' kondesanna sapim.

⁷ La napassalako' DEBATA aka penaba makahha'mua' anna aha' kadakemua'.

La kusehangkoa' lako alla'-alla'na pes-subunna Yakub anna la kutähhä'koa' tama alla'-alla'na pessubunna Israel.

⁸ Yehuda, la uhhuppu' balinna; la napa'kasallei anna napenombai solasubunna.

⁹ O änä'ku, susingko singa mangnguha puhai muande pealanna,

- ma'pasulem sule längäm ongeanna la mamma'. Tä' deem bahani la untundanni.
- ¹⁰ Yehuda la muanda'i liu tekkem kahajaam. Pessubunna la ma'pahenta sule lako kasuleanna To muanda'i kakuusaam. Anna hupatau buttu dio mai ingganna kahajaam la mentinum lako pahentana.
- ¹¹ Änä' keledainna Yehuda la disäke' lako handam mapianna too' anggur, anna uwai anggur la natappa'iam pohebana tandana bosa'.
- ¹² La malotä matanna napobua' anggur anna mabusa isinna napobua' bumbungam.**
- ¹³ Zebulon la tohho dio bihim le'bo'; ongeanna la si naongi tisampo kappala' lempä mentulindum, anna at-tasa'na la sule lako Sidon.
- ¹⁴ Isakhar susi keledai matoho ma'päsä illaam alla' teke'na.
- ¹⁵ Tappana muita mapia pellubeanna anna malompona litä', iya ponno penabanna umbaba babaanna anna malängngo' penabanna diposabua' assala'na mala tohho eta.
- ¹⁶ Dan la tohho ma'bisaha anna uhhindim solana, aka pessubunna duka' Israel.
- ¹⁷ La susi ula' lako lalam untikku buni kambutu' daham, nasuhum metobä boko' to ussäkei.
- ¹⁸ O DEBATA, Iko kuhannuam la melappasam dio mai kamasussaam.
- ¹⁹ Gad, la napemäläiko tau napamuhui, sapo' iko hi la umpadondoi anna umpamuhui.
- ²⁰ Asyer, la langa' kinandemu, iko la naongi buttu kinande si naphöhe tomahaja.
- ²¹ Naftali la susiko jonga bihä dilappa', si mapia pa'änäsam.
- ²² Yusuf sihhapangko kaju paha' bua tubo dio sa'de kalimbuä, mahombo täkena mehho lao ullebam bala.
- ²³ Napandasako balimmu, natalimbum tama nabälä'du'.
- ²⁴ Sapo' tontä liu matogom bälä'du'umu anna matoho liu katea'mu, napasukum kuasanna To napenombai Yakub. To Ma'kambi'na anna Hindim Batunna Israel.
- ²⁵ Puang Allataala To Handam Kuasa to napenombai ambemu la umpamoloiko, napatuhungam pa'tamba' yabo mai langi' anna dio mai le'bo' sola hongko' banne tau.
- ²⁶ Hongko' buttu di DEBATA lako ambemu, mayaboam puha ia anna la hongko' buttu illaam mai ingganna tanete masäe. Ingganna hongko' ia too la lu lako Yusuf anna lu dokkoi lisu pala'na, aka ia tika'liu' mapianna pa'palakoanna illaam alla'-alla'na solasubunna.
- ²⁷ Benyamin bahani susi serigala. Mebenggi' muande pealanna, kahubenni nataba-tabam la'binna.”
- ²⁸ Iam too inde diona pessubunna Israel anna kada napayolo lambam natampeam sapulo dua änä'na situhu' la sihatanna si mesa-mesa pandadianna.

Kamateanna Yakub

49:29–50:14

^{29–30} Ma'pakahi'dim Yakub lako änä'na naua: “Mahuku'um kamateangku. Angga hia la ullaamum dioä' too Kanaan siampe' neneku anna tomatuangku, illaam indo leä dio Makhpela sitingngajo Mamre. Indo leä sola bela' lako ampe'na puha naalli Abraham lako Efron to Het, la napa'ku'bu'i. ³¹ Etam naongi Abraham sola Sara bainena dilamum. Eta toi naongi Ishak sola Ribka bainena dila-

** 49:12 battu diua: La malotä puha matanna anna anggur, anna mabusa puha isinna anna bumbungam.

mum, anna eta duka' kupallamunni Lea.
³²Indo litä' anna ku'bu' pangngallinna neneku Abraham lako to Het."

³³Tappana puha ma'pakahi'di lako änä'na, iya metindom anna ummaloloanni bitti'na anna kattui penabanna lambi' le'ba'um sungnga'na ma'mesa sola nene to naponene.

50 Ussämbäsammi kalena Yusuf sumahho napasindum ungalapu'i ambena naudum. ²Mane ussuai sabua'na to si biasa ullima'i to mate, ussussui bauam bubanau' bakkena Israel, ambena, anna malai tä' bosu. Iya napateemmi situhu' tula'na Yusuf. ³Appa' pulo allona diolaam unghähäi aka inna si pada masäena diolaam umpessussuam bauam bubanau' anna malai tä' bosu to mate. Anna pitu pulo allona naolaam to Mesir ma'bahata.

⁴Tappana lendu'i pa'bahataam, nauam Yusuf lako to dipake illaam banuanna Firaun: "Kamaseiä' laoko uaangannä' Firaun: 'Naua Yusuf: ⁵Indo anna la mate kalem ambeku napopa'pindaä' naua: "La ullaam dioä' too indo ku'bu' kupatoka dio Kanaan." Dadi la laopä' ullaam ambeku anna balii too ma'pasulemä'."

⁶Nauam Firaun: "Uaanni Yusuf: Laoko lamum ambemu situhu' pa'pindamu."

⁷Iya le'ba'um Yusuf la ullaam ambena napasolai ingganna to dipake anna matua ulunna illaam banuanna Firaun sola matua ulunna illaam lembäna Mesir. ⁸Le'ba' asam duka' issi banuanna Yusuf, ingganna solasubunna sola ingganna issi banuanna ambena. Angga ham änä'-änä' anna olo'-olo'na tohho dio Gosyen. ⁹Natuhu'pi buda to ma'bendi anna to ma'daham lambi' indo to le'ba' umpasolai ma'obim-obim.

¹⁰Tappana sulei lako ongeam palullusam gandum isanga Goren-Haatad,

lambam libanna Salu Yordan, etam tohhoi umbatim anna ma'bahatai pitu benginna. ¹¹Tappana naita pa'botto dio Kanaan pa'bahataanna to Mesir dio, iya nasangaim indo ongeam Abel-Mizraim^{††} aka naua: "Naongi to Mesir umbatim anna ma'bahata."

¹²Susim too pa'palakoanna änä'na Yakub umpasule lako pepakahi'dinna ambena. ¹³Nababa bakkena lako Kanaan anna nalamunni dio Makhpela sitingngajo Mamre, illaam leä naalli sola bela' Abraham lako Efron to Het napa'ku'bu'i. ¹⁴Puhai melamum, ma'pasulem Yusuf lako Mesir sola solasubunna anna ingganna to napasola lao melamum lako Kanaan.

Yusuf umpakahanga solasubunna

50:15-21

¹⁵Tappana mate Yakub sangngim mahea'um solasubunna lako Yusuf naua: "La maakangkia' susi ke napaillaam penabai Yusuf indo gau' kadaketaa' lako kalena?" ¹⁶Iya ussuam tau lao umpel-lambi'i Yusuf naua: "Indo anna tubopi ambemua', ma'pakahi'di naua: ¹⁷'La untulasanna' Yusuf muua: La muampunni kasalaanna sola dosana solasubummu lako kalemu.' Dadi kela mala muampunni kasalaanna inde mai sabua'na Puang Allataala to napenombai ambemua'." Tappana dipalandasam Yusuf indo tula'na solasubunna, iya sumahhom aka mapi'di' penabanna.

¹⁸Iya suleim solasubunna menomba lako Yusuf naua: "La umposabua'kanni." ¹⁹Sapo' naua Yusuf: "Daa unghaheä'ä', aka Puang Allataala hakä' too kao anna la kupasalakoa?" ²⁰Aka moi anna unghalebuia' indo gau' kadake umpogausannä', sapo' gau' ia too napopangkakka' Puang Allataala tama kaleku, anna malaä' umpesäkäi sungnga'na tau buda

^{††}50:11 *Abel-Mizraim*: kalembasanna, pa'bahataanna to Mesir.

tentomai. ²¹ Dadi, daa ummahea'a' aka ingganna kapahalluammu sola pandadi-ammua' la kubeengkoa'." Malutte' Yusuf ma'kada lako solasubunna napamat-tangam penabanna.

Kamateanna Yusuf

50:22-26

²² Iya dio lium Mesir Yusuf anna solasubunna. Sahatu' sapulo taunna dadinna mane matei. ²³ Muitapi peampoanna sule lako lapi' katallunna pessubunna Efraim anna muabimpi änä'na Makhir pessubunna Manasye.

²⁴ Iya nauam Yusuf lako solasubunna: "Mahuku'um kamateangku, sapo' la

naundu' dako'a' too Puang Allataala messubum illaam mai inde botto, lao lako botto puha nadandi sola umpa'pindai kalena lako Abraham, Ishak anna Yakub. ²⁵ La Puang Allataala hi too muundu'koa' messubum illaam mai inde botto." Mane ussuai pessubunna Israel ma'pinda keta la nababai duka' bukunna lako Kanaan.

²⁶ Wattunna anna matei Yusuf dio Mesir sahatu' sapulom taunna dadinna. Iya disussuim duka' bauam bubanau' bakkena indana bosii, mane dipatamai patti.

**Kaheba Katilallasam
natuli' Matius
Bätäna Issinna**

Inde suha' natuli' mesa passikolanna Puang Yesus isanga Matius. Illaam inde suha', natuli' Matius diona Kaheba Katilallasam naua: Puang Yesus-um too indo To dilanti' la mepasalama' to puha nadandi Puang Allataala. Anna illaam inde suha', Puang Yesus si disa'bu'pi duka' "pessubunna tomahaja Daud" (1:1; 9:27; 12:23; 15:22; 20:30-31; 21:9, 15; 22:41-45). Deempi duka' natula' illaam inde suha' diona pa'palakoanna Puang Yesus ungganna'i ingganna indo Battakadanna Puang Allataala to puha napayolo lambam nabi (batai: 1:22-23; 2:5-6, 15, 17-18, 23; 3:3; 4:14-16; 8:17; 12:17-21; 13:35; 21:4-5, 16; 26:31; 27:9-10).

Indo Puang Yesus nadadiam mesa to Yahudi anna lobo' illaam peadasanna to Yahudi. Moi anna susi, sapo' indo Kaheba Katilallasam nababa, battu diua kasalamasam, tä' angga mandi lu lako to Yahudi, sapo' mala asam natahima ingganna hupatau illaam inde lino.

Illaam inde suha'na Matius, pembuda ma'tula' Puang Yesus diona la ma'pahentam Puang Allataala. Deem duka' napomasiä' Puang Yesus diona kalembasanna indo Pempaondonganna Musa.

Deem lima too'na tula'na Puang Yesus dilambi' illaam inde suha'na Matius: (1) Papatuduanna Puang Yesus yabo mesa tanete. Illaam papatuduam ia too natula' Puang Yesus indo la sihatanna napogau' mesa to untuhu'i si'da-si'da Puang Allataala (hondongam 5-7); (2) Pepakahi'dinna Puang Yesus lako passikolanna anna mala napalako manappa indo pengkähängam nabeem Puang Yesus (hondongam 10); (3)

Sanaka-naka pehapangam napalao Puang Yesus diona ke ma'pahentam Puang Allataala (hondongam 13); (4) Papatuduam diona la diaka susi ma'palako ke mendadim tau pentuhu'na Puang Yesus (hondongam 18); anna (5) Papatuduam diona allo ma'katampasanna anna kasuleanna Änä' Mentolino, battu diua Puang Yesus (hondongam 24-25).

Lesoanna issinna

1. Kalohonganna anna kadadianna Puang Yesus (1:1-2:23)

2. Pengkähänganna Yohanes to si mantedo' (3:1-12)

3. Puang Yesus ditedo' anna napa'sändä'i tomahajanna setam (3:13-4:11)

4. Pengkähänganna Puang Yesus lako hupatau dio Galilea (4:12-18:35)

5. Pa'lao-laona Puang Yesus mengkalao dio Galilea sule längäm Yerusalem (19:1-20:34)

6. Ma'katampasanna pa'palakoanna Puang Yesus dio Yerusalem anna lako sikahuku'na (21:1-27:66)

7. Katuboanna sule Puang Yesus anna umpa'paitaam kalena (28:1-20)

Kalohonganna Puang Yesus

1:1-17

Luk. 3:23-38

1 Susi inde kalohonganna Yesus Kristus peampoanna tomahaja Daud, peampoanna Abraham.

²Keänä' Abraham undadiam Ishak, keänä' Ishak undadiam Yakub, keänä' Yakub undadiam Yehuda anna ingganna solasubunna.

³Keänä' Yehuda undadiam Peres anna Zerah nasibalii Tamar,

keänä' Peres undadiam Hezron, keänä' Hezron undadiam Ram,

⁴keänä' Ram undadiam Aminadab, keänä' Aminadab undadiam Nahason,

keänä' Nahason undadium Salmon,
⁵ keänä' Salmon undadium Boas nasibalii Rahab,
 keänä' Boas undadium Obed nasibalii Rut,
 keänä' Obed undadium Isai,
⁶ keänä' Isai undadium tomahaja Daud,
 keänä' Daud undadium Salomo nasibalii indo bainena to mate Uria,^{‡‡}
⁷ keänä' Salomo undadium Rehabeam,
 keänä' Rehabeam undadium Abia,
 keänä' Abia undadium Asa,
⁸ keänä' Asa undadium Yosafat,
 keänä' Yosafat undadium Yoram,
 keänä' Yoram undadium Uzia,
⁹ keänä' Uzia undadium Yotam,
 keänä' Yotam undadium Ahas,
 keänä' Ahas undadium Hizkia,
¹⁰ keänä' Hizkia undadium Manasye,
 keänä' Manasye undadium Amon,
 keänä' Amon undadium Yosia,
¹¹ keänä' Yosia undadium Yekhonya
 anna ingganna solasubunna. Wattu eta too dipassa to Israel dipahhim lako Babel.
¹² Puhai dipahhim lako Babel,
 iya keänä'um Yekhonya undadium Sealtiel,
 keänä' Sealtiel undadium Zerubabel,
¹³ keänä' Zerubabel undadium Abihud,
 keänä' Abihud undadium Elyakim,
 keänä' Elyakim undadium Azor,
¹⁴ keänä' Azor undadium Zadok,
 keänä' Zadok undadium Akhim,
 keänä' Akhim undadium Eliud,
¹⁵ keänä' Eliud undadium Eleazar,
 keänä' Eleazar undadium Matan,
 keänä' Matan undadium Yakub,
¹⁶ keänä' Yakub undadium Yusuf
 indo muanena Maria to undadium

Puang Yesus battu diua To dilanti' la mepasalama'.^{¶¶}

¹⁷ Dadi, mengkalao dio Abraham sule lako tomahaja Daud, sapulo appa' lapi'na. Mengkalao dio Daud sule lako wattu'na dipahhim to Israel napahhim to Babel, sapulo appa' lapi'na. Anna mengkalao dio wattu'na dipahhim to Israel sule lako kadadianna To dilanti' la mepasalama', sapulo appa' oo duka lapi'na.

Kadadianna Puang Yesus

1:18-25

Luk. 2:1-7

¹⁸ Susi inde tulasanna indo anna dike-bättänganni Yesus Kristus sule lako disubungam: Puhai mekutana Yusuf la umpobaine Maria, iya kebättä hia. Moi anna tä'pi deem sola muane, sapo' kebättä aka kakuasaanna Penaba Maseho. ¹⁹ Indo Yusuf mesa to meada', dadi maelo' la unkgattui Maria. Sapo' la mengkamma'-kamma' unkgattui aka moka la umpakasihi'i dio olona tau buda.

²⁰ Mane mahassam ma'pikki'-pikki' Yusuf la unkgattui Maria, iya napalosaim mesa malaika' nasua Debata illaam pangngimpi nauaam: "O Yusuf peampoanna tomahaja Daud, daa ummahea' umpobaine Maria, aka indo bättäna, kakuasaanna Penaba Maseho umpadadii. ²¹ La undadium mesa änä' muane-ane anna la ussangai Yesus^{§§} aka Ia la ullappasam umma'na dio mai dosana."

²² Ia asanna ia too dadi anna mala sule lako indo kadanna Debata napalombum nabi naua: ²³ "Patanannii'a talinga, indo

‡‡1:6 to mate Uria, 2Sam. 11:3-26.

¶¶1:16 To dilanti' la mepasalama': illaam basa Yunani diuaam Kristus; illaam basa Ibrani diuaam Mesias.

§§1:21 Yesus: kalembasanna, Debata mepasalama'.

änä' daha la kebättä lambi' undadiam mesa änä' muane-ane anna la disangai Imanuel, kalembasanna 'Puang Allataala muundu'kia.'**

²⁴Tappana milli' Yusuf, iya napalako siaham indo napahentaam malaika'na Debata lambi' umpobaine Maria. ²⁵Sapo' tä' deem moi podo la siampe'um metindo sula lako keänä' Maria. Tappana dadi, iya nasangaim Yusuf indo änä'-änä', Yesus.

To umpotanda bintä lao umpenombai Puang Yesus

2:1-12

2 Indo anna disubunganni Puang Yesus dio kota Betlehem illaam lembäna Yudea, wattu eta too Herodes mendadi tomahaja dio Yerusalem. Iya sulem dio Yerusalem sanaka-naka to tandai mata allo si manähä muita bintä napotanda. ²Anna mekutanai naua: "Umba hia ngei naongei indo änä'-änä' mane subum, indo tomahajanna to Yahudi? Aka puha kiita bintäna dio bottoki dio tandai mata allo, nasuhum sulekam la kipenombai."

³Tappana naissam tomahaja Herodes tula' ia too, iya tä' deem pada satikkedu' anna husa' penabanna, susi toi duka' ingganna issinna Yerusalem sangngim tikkedu'. ⁴Iya tappa nahempum siaham Herodes ingganna kapala sando anna to ullatta' Pepaondonganna Musa anna napelau katähängam naua: "Situhu' Battakada Debata umba ngei la subum indo To dilanti' la mepasalama', indo puha nadandi Puang Allataala?" ⁵Natimba'im naua: "Dio kota Betlehem illaam lembäna Yudea, aka abana inna susi Bat-

takadanna Puang Allataala puha nasuha' mesa nabi naua:

⁶'O kota Betlehem illaam lembäna Yehuda,

tä'ko la mala dipa'bahinni'i illaam alla'-alla'na kota senga' to palumbängam illaam lembäna Yehuda.

Aka iko la naongei kende' tomahaja to la uningkambi' umma'ku to Israel.'**†

⁷Puhai ia too, iya mengkamma'-kamma'um Herodes untambai indo to si manähä muita bintä napotanda anna nakutanai naua: "Piham anna uhunaia' muita indo bintä umpotanda?" ⁸Puhai nakutanai, iya nasuam le'ba' lako Betlehem anna napakahi'dii naua: "Laongkoa' peä manappai indo änä'-änä', anna maka' too ullambi'unna', iya sulekoa' tulasannä' kao anna mala laoi' duka' kupenombai."

⁹⁻¹⁰Tappana puha natahima indo pepakahi'dinna tomahaja Herodes, iya le'ba'im umpatahhu' pa'laoanna. Iya naita oom indo bintä to naita illaam tandai mata allo. Tä' deem la susi katilallasannai tappana muita indo bintä mellao yabo langi' umpendiolo'i lambi' tohho yabo sipatunna ongeanna indo änä'-änä'. ¹¹Tappa le'ba'i siaham tama indo banua, iya ullambi'um indo änä'-änä' sola Maria indona, iya ma'balinguntu'im dio olona indo änä'-änä' menomba. Mane umbukkai pa'ponggeanna anna mualai bulabam, lite kaju si bubanau', anna dama' si bubanau' isanga mur, pa'lalam penabanna lako indo änä'-änä', tanda pa'pakasallena. ¹²Sapo' aka napalosai Debata illaam pangngimpi naua: "Daa muola lako' Herodes," nasuhum lalam senga' naola ma'pasule lako bottona.

*1:23 Yes. 7:14.

†2:6 Mi. 5:1.

**Yusuf sahapu nasua
Debata lako Mesir**

2:13-15

¹³Tappana le'ba'i indo to si manähä muita bintä napotanda, iya ussuam mesa malaika' Debata umpalosai Yusuf illaam pangngimpi naua: "O Yusuf, bangom siahangko ammu pasihha'i umbaba lao inde änä'-änä' sola indona lako lembäna Mesir, aka mahassammi napeä Herodes inde änä'-änä' la napatei. La tohhokoa' dio lambi' kubeem pole oko pahenta la sitahhu'na umpogau'."

¹⁴Iya tappa bangom siaham duka' Yusuf indo bengi eta too anna le'ba'i umbaba indo änä'-änä' anna Maria indona lako Mesir. ¹⁵Iya tohhoim dio sule lako mate Herodes. Kaha-kaha ia too dadi anna mala sule lako indo kadanna Debata puha natula' loppo' nabi naua: "Kutambai änä'ku dio mai Mesir."[‡]

Buda änä'-änä' dipatei dio Betlehem

2:16-19

¹⁶Tappana naissam Herodes naua: "Naakkalanniä' indo to si manähä muita bintä napotanda," iya tä' deem pada sakeaha'. Nasuhum umpassubum mesa pahenta naua: "Ingganna änä'-änä' ke muanei mengkalao mane subum sule lako dua taum dadinna la dipatei asam, susi illaam kota Betlehem teem lako kota sikahuku'na." Ia too napasikannai Herodes situhu' indo katähängam natula' indo to umpotanda bintä. ¹⁷Iya sule

lakom indo to puha natula' loppo' nabi Yeremia naua:

¹⁸"Ha'ba to umbatim dio kota Rama,[¶] Rahel ussahhoi änä'na[§] anna moka si'da-si'da dipakahanga aka pa'deim änä'na naita."

**Yusuf sahapu ma'pasule
dio mai Mesir**

2:19-23

¹⁹Indo anna matei Herodes, diopi Mesir Yusuf sahapu wattu eta. Iya napalosai oom mesa malaika'na Debata illaam pangngimpi naua: ²⁰"Bangongko ammu babai itim änä'-änä' sola Maria indona anna ma'pasulekoa' lako Israel, aka indo to la umpatei itim änä'-änä' puham mate." ²¹Iya bangommi duka' Yusuf anna umbabai indo änä'-änä' sola indona anna le'ba'i lako Israel. ²²Sapo' mahea' ma'pasule lako lembäna Yudea, aka napelele diua Arkhelous umbala' Herodes ambena mendadi tomahaja dio. Iya napalosai pole oom mesa malaika'na Debata illaam pangngimpi naua: "Lu lakokoa' lembäna Galilea ammu tohho dioa'." Iya lu lakom Galilea ²³anna tohhoi illaam mesa tondä' diuaam Nazaret. Susim too anna mala sule lako indo tula'na Debata diona Änä'na napalombum nabi naua: "La diuaam to Nazaret."

**Yohanes to si mantedo' untula' loppo'
pengkähänganna Puang Yesus**

3:1-12

3 Masäei lessu'na ia too, iya sulem Yohanes to si mantedo' dio pohial-

[‡]2:15 Hos. 11:1.

[¶]2:18 kota Rama: Rama mesa kota sikahuku' Yerusalem. Illaam taum 586 ahena kadadianna Puang Yesus buda to Yahudi nahempum to Babel aka la dibuam lako Babel (Yer. 40:1). Wattu eta too ha'ba to umbatim dio Rama. Iam too nasusiam indo anna napesuanni Herodes dipatei ingganna änä'-änä' muane dio Betlehem.

[§]2:18 Rahel: Indo Rahel bainena Yakub battu diua indona Yusuf sola Benyamin nasuhum dihekem indona to Yahudi. Dadi dipake sanga Rahel, kalembasanna ingganna baine to Yahudi dio Betlehem anna sikahuku'na umbatinni kamateanna änä'na.

lasam illaam lembäna Yudea anna napahandu'i umpalanda' kadanna Puang Allataala naua: ²“Tihokongannia' ingganna gau' kadakemu aka bambannam umpalako kapahentaanna Puang Allataala.” ³Yohanes iam too inde indo puha napayolo lambam nabi Yesaya naua:

“Deem tau dio pohiallasam metambata-tamba naua:

‘Patokaanni lalam Debata, maloloanganni lalam la naolanna.’”^{***}

⁴Indo Yohanes to si mantedo' umpa'poheba bulu unta anna ma'beke' lollo'.^{††} Anna bati' sola duho si naande. ⁵Iya sulem buda tau buttu yabo mai Yerusalem, anna dio mai lembäna Yudea anna ingganna tondä' dio sikhaku'na Salu Yordan umpellambi'i Yohanes. ⁶Sangngim muakui dosana anna natedo'i dio Salu Yordan.

⁷Anna buda toi duka' to illaam kakalebuanna Parisi anna to illaam kakalebuanna Saduki sule umpellambi'i Yohanes aka maelo' la ditedo'. Sapo' naitanna Yohanes sulei, iya nauaammi: “O inggammua' to si mambaba bulim, pessubunna to kadake gau'!^{‡‡} Ussanga haka iko la malakoa' lappa' dio mai aha' kasallena Puang Allataala? ⁸Pa'baju polekoa' anna pa'dodo pole anna mala tandaam diua ussošo si'dangkoa' gau'mu anna untingko' basabammu. ⁹Daa muuaia': ‘Tä'kam la napassala Puang Allataala aka peampoannakam Abraham.’ Aka kutulasangkoa', inde mai batu la mala duka' napadadi Puang Allataala peampoanna Abraham!

¹⁰Tentomai la dipembattaammi wase di ada'na Puang Allataala dilemposam ingganna kaju tää'na kembua manappa anna ditibe'i tama api. ¹¹Kao-kao uwai kupake untedo'koa' mendadi tanda katihokongammua'. Sapo' dako'i too sulem to kuasa puha la anna la kao. Aka moi la kubabaam sapatunna, tala sihatannä'. Ia-Ia Penaba Maseho anna api la napake natedosangkoa'. ¹²Sihhapam to ma'tappi tokam dio limanna petappi la nase'laam banne maläpu' anna läkko'na. Ingganna banne maläpu' la dianna manappa tama loko, anna läkko'na la ditibe ia tama api tapi'de-pi'de.”

Puang Yesus natedo' Yohanes

3:13-17

Mrk. 1:9-11; Luk. 3:21-22; Yoh. 1:32-34

¹³Wattu eta too, mengkalaom Puang Yesus dio Galilea le'ba' lako Salu Yordan. Dioi, umpellambi'im Yohanes anna napelau'i la natedo'. ¹⁴Sapo' moka salapi Yohanes untedo'i, naua: “Setonganna tuam, Iko hia la sihatam untedo'ä! Maaka anna Iko ohi muuai: ‘Tedo'ä’?”

¹⁵Sapo' natimba'i Puang Yesus naua: “Päbäi untedo'ä' temo. Aka ia anna tapateenni aka pahallu la taponnoi asam ingganna pa'elo'na Puang Allataala.” Iya natuhu'im pelauanna lambi' natedo'.

¹⁶Puhai ditedo', iya kende'um dio mai uwai. Iya naita siahm Puang Yesus tibukka langi' anna tuhunni Penabanna Puang Allataala susi dangam-dangam uhhampoi. ¹⁷Iya dihingngi siahm

^{**}3:3 Yes. 40:3.

^{††}3:4 *umpa'poheba bulu unta anna ma'beke' lollo'*: Indo pohebana Yohanes susim too indo si napa'poheba nabi Elia yolona (2Haj. 1:8). Aka napemmitai liupi to Yahudi la sule pole Elia tama lino umpatokaam lalam indo To dilanti' la mepasalama' (Mal. 4:5-6, Mat. 11:14; 17:10-13).

^{‡‡}3:7 *to si mambaba bulim, pessubunna to kadake gau'*: Indo dituli' illaam basa Yunani, naua ia ke basa Bambanni: *peampoannakoa' ula'*, aka ula' si napakonai to Yahudi ke deenni tau si mambaba bulim.

kamaha buttu yabo mai suhuga naua: “Iam too inde Änä' pa'pakamajangu to umpomasannam penabangku.”

**Puang Yesus napa'sändä'i
tomahajanna setam**

4:1-11

Mrk. 1:12-13; Luk. 4:1-13

4 Puhai ia too, iya natettem Penaba Maseho Puang Yesus lako pohiallasam aka la napa'sändä'i tomahajanna setam. ²Dioi, iya puasam Puang Yesus appa' pulo allona appa' pulo benginna nasuhum tadea'.[¶] ³Iya sulem tomahajanna setam umpa'sändä'i naua: “Maka' Änä'na tongangko Puang Allataala, sui inde mai batu mendadi hoti!” ⁴Sapo' natimba'i Puang Yesus naua: “Tää', aka puha tisuha' illaam Battakada Debata naua:

‘Taia kinande mandi la napotubo hupatau, sapo' setonganna too'-too'na katuboanna hupatau ingganna kadanna Puang Allataala.’”^{§§}

⁵Puhai ia too, umpasolam Puang Yesus lako indo Kota Maseho battu diua Yerusalem anna napayaboi bubunganna Banua Debata ⁶anna nauaanni: “Maka' Änä'na tongangko Puang Allataala, tobängangko kalemu inde dokko aka deem tisuha' illaam Battakada Debata naua: ‘Puang Allataala la ussua malaika'na unjagaiko; la natahimaiko anna mala moi bitti'mu tala tihuai lako batu.’”^{*}

⁷Natimba' pole oom Puang Yesus naua: “Tää', aka puha tisuha' illaam Battakada Debata naua:

‘Daa umpa'sändä'i Puang Allataala Debatammu.’”[†]

⁸Iya umbabai pole oom Puang Yesus indo tomahajanna setam anna napa-solai längäm tanete malangka'. Yaboi, napaitai asammi ingganna kapahentaam illaam inde lino sola kakasalleanna anna kamapiaanna ⁹anna nauai: “La kubeem asangko ingganna issinna inde lino ke ma'balinguntu'ko dio oloku umpenombaiä'.”

¹⁰Natimba' pole oom Puang Yesus naua: “Päläiko lao Setam! Aka tisuha' illaam Battakada Debata naua: ‘Penombaiko Puang Allataala Debatammu anna anggam pa'elo'na la mala umpalako.’”[‡]

¹¹Iya le'ba' mandam indo tomahajanna setam umpellei Puang Yesus. Iya sulem sanaka-naka malaika' untahiai.

**Puang Yesus umpahandu'
pengkähänganna dio Galilea**

4:12-17

Mrk. 1:14-15; Luk. 4:14-15

¹²Tappana naissam Puang Yesus naua ditahungkum Yohanes to si mantedo',[¶] iya mengkalaom Ia dio Yudea le'ba' lako lembäna Galilea. ¹³Tä'um hapa' dio Nazaret sapo' mentieli' lako kota Kapernaum anna tohho dioi. Indo Kapernaum dio bihinna le'bo' Galilea illaam attasa'na Zebulon anna Naftali. ¹⁴Lu lako Kapernaum Puang Yesus anna mala sule lako

[¶]4:2 *puasa*: kalembasanna, diala ikale tamangngande tamangngihu', tä' dipempas-saam. Anggam dipasatutui penaba illaam sitingngajo Puang Allataala.

^{§§}4:4 Pass. 8:3.

^{*}4:6 Puj. 91:11-12.

[†]4:7 Pass. 6:16.

[‡]4:10 Pass. 6:13.

[¶]4:12 *ditahungkum Yohanes to si mantedo'*: Indo tomahaja Herodes Antipas untahungkum Yohanes aka muuaam Herodes: *Madosako aka mualako bainena solasubummu umpobaine*. Diona kaha-kaha ia too natula' Matius illaam 14:3-12.

indo kadanna Debata napalombum nabi Yesaya naua:

¹⁵“Attasa'na Zebulon anna Naftali illaam lembäna Galilea, dio lalam lako le'bo' Galilea, tandai libanna Salu Yordan, naongei buda tau taianna to Yahudi.

¹⁶Anna tau ia too tubo illaam kamalillingam anna illaam lembäna kamateam. Sapo' nalambi'um pole' kamasiäsam kasalle,

anna nadelle'im mata allo katuboam.”[§]
¹⁷Sulena Puang Yesus dio Kapernaum, iya napahandu'um napa'paissangam lako tau buda naua: “Tihokongannia' gau' kadakemu, aka bambannam umpalako kapahentaanna Puang Allataala!”

**Appa' to modala napadadi
Puang Yesus passikolanna**

4:18-22

Mrk. 1:16-20; Luk. 5:1-11

¹⁸Mahassanni mellao Puang Yesus uhhuttu' bihinna le'bo' Galilea, iya muitam dua to ma'solasubum isanga indo kakanna Simon (biasa toi diuaam Petrus) anna isanga ia indo adinna Andreas mahassam modala, aka abana inna to si modala. ¹⁹Iya napa'kadaim Puang Yesus naua: “Maikoa' ammu tuhu'ä' aka la kupadadikoa' to undala hupatau anna mala natuhu'ä'.” ²⁰Iya ullappa' siaham duka' dalana anna le'ba'i untuhu' Puang Yesus.

²¹Napatahhu' oom mellao, iya muita oom to ma'solasubum isanga Yakobus anna Yohanes, änä'na Zebedeus, mahassam umpapia-piai dalana illaam lopinna. Iya natambaim duka' Puang Yesus, ²²iya bassim umpellei siaham duka' lop-

inna sola ambena, anna le'ba'i untuhu' Puang Yesus.

**Puang Yesus ma'pa'guhu
anna buda tau napabono'**

4:23-25

Luk. 6:17-19

²³Illaam lembäna Galilea, le'ba' Puang Yesus ullelei pa'sambajanganna to Yahudi ma'pa'guhu anna umpa'pakahebaam Kaheba Katilallasam naua: “Bambannam umpalako kapahentaanna Puang Allataala.” Anna umpabono' ingganna to masaki anna umpapia pole dadinna to sala dadi. ²⁴Indo pa'pogausanna Puang Yesus napelele asam tau dio lembäna Siria, nasuhum buda tau sule ullombai sangngim umbaba to masakinna. To masaki ia too nahua ma'hupa-hupa saki anna kamapi'disam susinna: to napentamai setam, to limpu mänesam, to mate kalena anna budapi saki senga'. Iya sangngim napabono' Puang Yesus, ²⁵nasuhum tä' deem pada sabuda tau untuhu' lelenni. Deem to buttu dio mai lembäna Galilea, deem to buttu dio mai lembäna Sapulo Kota, deem to buttu yabo mai Yerusalem, deem to buttu dio mai lembäna Yudea, anna deem to buttu dipe mai lambam libanna Salu Yordan.

**Puang Yesus umpa'guhu
passikolanna yabo mesa
tanete (5:1-7:29)**

5 Tappana naita Puang Yesus buda tau sule ullombai, iya le'ba'um längäm mesa tanete. Muokko'i, iya sulem napellambi'i passikolanna. ^{**} ²Iya

[§]4:16 Yes. 9:1-2.

^{**}5:1 *passikolanna*: taia indo mandi to sapulo dua suhona diuaam *passikolanna*.

napahandu'um Puang Yesus ma'pa'guhu naua:

Kehongko' anna maupa' to untuhu'i pa'elo'na Puang Allataala

5:3-12

Luk. 6:20-23

³“Kehongko' anna maupa' to umpopengkadio kalena dio olona Puang Allataala,

aka tau ia too mendadim umma'na Puang Allataala illaam kapahentaanna.

⁴Kehongko' anna maupa' to masussa penaba, aka tau ia too la napakahanga Puang Allataala.

⁵Kehongko' anna maupa' to umpopengkadio penabanna, aka la napasule lakoam Puang Allataala indo puha nadandiam tau ia too.

⁶Kehongko' anna maupa' to muinabana kamaloloam, aka tau ia too la napaponnoiam Puang Allataala pa'pemulunna.

⁷Kehongko' anna maupa' to si pa'häntängam bua, aka tau ia too la nakamasei Puang Allataala.

⁸Kehongko' anna maupa' to satutu penabanna lako kamapiaam, aka tau ia too la silambi' Puang Allataala.

⁹Kehongko' anna maupa' to umpasikipiai hupatau, aka tau ia too la mendadi änä'na Puang Allataala.

¹⁰Kehongko' anna maupa' to dipahuai pandahhaam kahana untuhu'i pa'elo'na Puang Allataala, aka tau ia too mendadim umma'na Puang Allataala illaam kapahentaanna.

¹¹Kehongko'koa' anna maupa' ke disangai bääbäkoa' to kadake gau', dipahuai pandahhaam, anna dipakolo'-kolo'i aka untuhu'ä'. ¹²Susi siam duka' yolona buda nabi didahha. Dadi la kassi mandakoa' ia anna tilalla' ke nalambi'koa' kaha-kaha ia too, aka la nabeengkoa' Puang Allataala mana' kasalle yabo suhuga.”

To unkatappa'i Puang Yesus dipasihhapam sia anna ballo

5:13-16

¹³Anna mane naua: “Ikonna' too dipasihhapam sianna lino. Indo sia ke matämmä'um, la malapaka dipamasim sule? Tä'um tia deem gunana, angga ham la ditibe anna nasihondo-hondo'i tau.

¹⁴Anna ikonna' too dipasihhapam ballo ummasiä'i hupatau illaam inde lino. Mesa kota yabo tanete tä' mala tala naita hupatau. ¹⁵Anna tä' deem tau la umpau' lampu anna mane nasa-longo'i baka. Sapo' naala hi tia anna napayaboi matandena anna mala muindo ingganna issinna banua. ¹⁶Susim too pa'pogausammua' la sihhapam ballo paindo naita tau buda napolalam dipuji anna dipa'kasallei Ambemu yabo suhuga aka naita pa'pogausam mapiammua'.”

Puang Yesus umpomasiä' diona pahenta illaam peadasanna to Yahudi

5:17-20

Luk. 16:17

¹⁷Anna mane naua: “Daa ussangaia' suleä' inde lino la umpa'dei Pepaondonganna Musa anna pepa'guhuam illaam suha'na ingganna nabi. Tä' suleä' la umpa'dei, sapo' setonganna suleä'

la kuganna'i.^{††} ¹⁸Setongam-tonganna, assala'na hia tontä liupi langi' sola lino, tä' duka' deem la mala dikuhänni moi podo la sakini'um pahentana Puang Allataala ke täpi sule lako ingganna issinna. ¹⁹Iam too anna kutulasammokoa' kuua: menna-menna untekka moi podo la sabaheam saidi'um issinna pahentana Puang Allataala, moi la handam bahinni'na, anna nauai lako solana: 'Daa tatuhu'ia,' tau ia too la dihekem to handam bahinni' illaam kapahentaanna Puang Allataala. Sapo' menna-menna umpalako pahentana Puang Allataala anna napepatuduanni lako solana, tau ia too la dihekem to keangga' illaam kapahentaanna Puang Allataala. ²⁰Dadi la pahallua' umpaillaam penaba inde tula'ku: Tä' siakoa' la mala mendadi umma'na Puang Allataala illaam kapahentaanna, ke tä'i mentondom puhaa' iko kamanuhusammu lako Puang Allataala anna la kamanuhusanna indo to ullatta' Pepaondonganna Musa sola to illaam kakalebuanna Parisi."

Pepakilalaam diona aha'

5:21-26

Mrk. 11:25; Luk. 12:58-59

²¹Anna mane naua: "Muissammia' indo pepatuduam puha dibeem nene to taponene naua: 'Daa umpapateam; menna-menna papateam, tau ia too la dihotto'.^{‡‡} ²²Sapo' Kao-kaao kuuaangkoa' tentomai: menna-menna keaha' lako solana,^{¶¶} pahallu la dihotto'. Menna-menna muuaam solana: 'Takegunako iko,' tau ia too

la dipopengngolo lako kakalebuanna To Mahhotto' Handam Malangka' illaam peadasam. Anna menna-menna muuaam solana: 'To mahoko iko,' sipäto' ia la dipatama api nahaka.

²³Dadi, maka' la memala'koa' dio ongeam pehumalasma, sapo' untkilalai deempi to mapi'di' penaba tama kalemu, ²⁴ia la pahallu umpatohho salapi yolo itim kapehumalasma anna le'ba'poko yolo sikapiai indo solamu. Mapiapi sule alla'mua', anna mane suleko sule umpatahu'i indo kapehumalasma dio olona Puang Allataala.

²⁵Maka' hapanna deem tau umpa-hapa'koa' lako to mahhotto', iya la masimpangkoa' too sikapiai sule sumala tä'poko' landa' lako olona indo to mahhotto'. Aka maka' tä' ussimpannia' sikapiai yolo, iya la nabeho lakoko too indo to mahhotto'. Anna indo to mahhotto' la umpalulakoko pulisi. Anna mane indo pole' pulisi la untibekoa' tama tahungkum. ²⁶Setongam-tonganna, tä' siako la mala dipassubum illaam mai tahungkum kela deempi tohho moi podo la himi'um indammu."

Diona lullusam bannetau

5:27-30

²⁷Anna mane naua: "Muissammia' indo pepatuduam puha dibeengkoa' naua: 'Daa ullullu' pa'bannetauam.'^{§§} ²⁸Sapo' Kao-kaao kuuaangkoa' tentomai: menna-menna unnenne'i mesa baine anna nakailui, tau ia too ullullu'um pa'bannetauam illaam penabanna aka hapammi bali ma'pogau'. ²⁹Maka' hapanna mata kanammu la umpomadosako, kalessu'i lao ammu tibe. Aka

^{††}5:17 *suleä' la kuganna'i*: mala duka' diua: suleä' la umpomasiä' manappai kalembasanna.

^{‡‡}5:21 *Täss. 20:13, Pass. 5:17.*

^{¶¶}5:22 *keaha' lako solana*: illaam sanaka-naka suha' yolona naua: keaha' lako solana ke tä'i ma'battuum.

^{§§}5:27 *Täss. 20:14, Pass. 5:18.*

dotam tia sabali-bali matammu, anna la sakalebu kalemu sapo' iam nasuhum ditibeko tama nahaka. ³⁰Maka' lima kanammu la umpomadosako, poloi lao ammu tibe. Aka dotam tia sabali-bali li-mammu, anna la sakalebu kalemu sapo' iam nasuhum ditibeko tama nahaka.”

Diona kasisähäsam

5:31-32

³¹Anna mane naua: “Deem duka' mesa pepa'guhuam naua: Menna-menna untibe bainena, pahallu umbeem suha' kasisähäsam bainena.* ³²Sapo' Kao-kao kuuaangkoa' tentomai: menna-menna untibe bainena sulibanna ke ullullu'i muanena indo baine anna kemuane polei, iya indo too muanena nasuhum ullullu' pa'bannetauam indo bainena. Anna menna-menna umpobainei indo baine to natibe muanena, tau ia too ullullu' duka' pa'bannetauam.”

Puang Yesus ullaham tau ma'pinda

5:33-37

³³Anna mane naua: “Muissammia' indo pepatuduam puha dibeem nene to taponene naua: ‘Daa umpa'pinda-pinda bäbä. Sapo' ia hia la pahallu umpasule lako indo to puha umpa'pindai dio olona Debata.’† ³⁴Sapo' Kao-kao kuuaangkoa' tentomai: Tä' si'da-si'dakoa' la mala ma'pinda-pinda, moi la suhuga tala malai' umpa'pindai, aka suhuga ongeanna okkosam kahajaanna Puang Allataala. ³⁵Tä' tookoa' mala la umpa'pindai lino, aka inde lino pehhondoanna Puang Allataala. Anna

tä' tookoa' la umpa'pindai Yerusalem, aka inde Yerusalem kota naongei Tomahajanna ingganna tomahaja. ³⁶Tä' tookoa' la umpa'pindai ulummu, aka tä' sia deem kakuusaammua' la umpomabusa beluä'mu battu haka la umpomalotä, moi podo la salamba'um. ³⁷Sapo' ia hia, uako: ‘Io,’ ke ioi, anna uako: ‘Tää,’ ke tä'i. Sulibanna ia too pengkähänganna ia To Kadake Gau' battu diua tomahajanna setam.”

Tä' tau mala umpatumpui gau' kadakena solata

5:38-42

Luk. 6:29-30

³⁸Anna mane sitahhu'na tula'na naua: “Muissammia' indo pepatuduam puha dibeengkoa' naua: ‘Diäläiam matanna to muäläi matanna solana anna dihimpoiam isinna to uhhimpoi isinna solana.’‡ ³⁹Sapo' Kao-kao kuuaangkoa' tentomai: Daa umpabala'i to umpogausangkoa' kakadakeam. Sapo' ia hia, maka' deem tau untampilim papo kanammu, beem polepi duka' papo kaihimmu. ⁴⁰Anna maka' deem tau umpahapa'koa' lako to si mahhotto' aka nakailui bajummu, beem polepi duka' jubamu.¶ ⁴¹Maka' deem tau ussuako la umbabaam babaanna sakilo mambelanna, iya babaanni dua kilo mambelanna. ⁴²Maka' deem aka-akammu napelau tau, iya beenni. Anna maka' deem tau umpelau aka-akammu la naindam, daa untumpu pala'i pelauanna.”

*5:31 Pass. 24:1-4.

†5:33 Sand. 19:12, Pah. 30:2.

‡5:38 Täss. 21:24; Sand. 24:20; Pass. 19:21.

¶5:40 *juba*: susi jas sapo' kalando. To Yahudi muane si ma'baju anna ma'juba. Masuli' puha ia juba anna la baju biasa. Situhu' pahentana to Yahudi, tä' mala napaalai bengi unta'ga' jubana solana anna napasuleammi sule aka pa'de la napa'juba mamma'. (Täss. 22:26-27).

Kamasei duka' balimmu

5:43-48

Luk. 6:27-36

⁴³ Anna mane naua: “Muissammia' indo pepatuduam puha dibeengkoa' naua: ‘Kamaseia' ia solamu ammu kabassia' ia balimmu.’[§] ⁴⁴ Sapo' Kao-kao kuuaangkoa' tentomai: Kamaseikoa' balimmu ammu pa'sambajanganni to undahhako. ⁴⁵ Maka' umpateemmia', iya la tuttuam tandaammi too diua änä'na si'da-si'dangkoa' Ambemu yabo suhuga. Aka Puang Allataala umpadadiam mata allo lako to umpogau' kamapiaam anna susi toi lako to umpogau' kakadakeam. Ia toi umpatuhungam uham lako to umpogau' kamaloloanna Puang Allataala anna susi toi lako to umpogau' kakadakeam. ⁴⁶ Aka maka' anggam to ungamaseikoa' la ungamasei, iya aka hi la napolalam Puang Allataala la nabala'iangkoa' hesomu? Aka moi indo tuam passima, si ussangaia' to madosa, si ungamasei toi duka' to ungamasei. ⁴⁷ Susi toi, maka' angga mandi to ussipohäeanna' la umpa'kadai, iya tä' siam tia isanga deem alla'na pa'pogausammu anna pa'pogausanna tau senga'. Aka to tama'debata duka' anna napogau'i ia too, damo aham ia ikoa'. ⁴⁸ Umba susi Ambemu yabo suhuga tepu pa'kamasena, la susingkoa' too duka' pahallu la tepua' pa'kamasemu.”

Tä' la umpemmitaia' la dipuji ke ma'kamasekoa'

6:1-4

6 Anna mane naua: “Deem akoka' la umpalako tuntusam peadasammu kela muuaia': ‘Anna malaä' naita tau buda.’ Aka maka' ma'pogau' susikoa', iya

tä'um deem la napolalam Ambemu yabo suhuga la nabala'iangkoa' hesomu.

² Maka' deem la umpa'kamaseam lako to mase-mase, tä'koa' la susi to ma'dua tambu'. Aka si napohäe ia umpa'paita-itaam pa'pogausanna dio olona tau buda susi tama pa'sambajangam, teem lako lalam mahoa' aka naua: ‘Anna malaä' napuji tau buda.’ Setongam-tonganna tau susi ia too untahimam ia sahona ke napujim tau buda. ³ Sapo' maka' deenna' aka-akammu la umbeem to mase-mase, pahallu tala naudui dali' tanahingngi kasisi'. ⁴ Anggam iko la muissanni sola Ambemu yabo suhuga, aka nalosa asam ia ingganna membuninna, nasuhum ia la umbala'iangko indo pa'pogau'mu tää'na naita tau senga'.”

Pepatuduam diona ma'sambajam

6:5-15

Luk. 11:2-4

⁵ Anna mane naua: “Maka' ma'sambajangkoa', tä'koa' la susi to ma'dua tambu' si napohäe ke'de' ma'sambajam illaam tängä-tängäna tau buda illaam pa'sambajangam, battu haka lako lalam mahoa' aka naua: ‘Anna malaä' naita tau buda.’ Setongam-tonganna, tau susi ia too untahimam ia sahona ke napujim tau buda. ⁶ Sapo' ikoa'-iko ke ma'sambajangkoa', la lu tamako tambimmu ammu tutu'i ba'bamu, anna mane ma'sambajangko längäm Ambemu to tadiita. Iya la nabala'iammoko too Ambemu to ullosa ingganna membuninna, indo pa'pogau'mu tää'na naita tau senga'.

⁷ Maka' ma'sambajangkoa', tä'koa' la susi indo to tä' ungmaleso manappa Debata si umpa'sule-sulei tula'na lambi' kalandu sugali'. Nasanga hia la nahingn-

[§]5:43 Sand. 19:18.

giam puha ia Debata sambajanna ke kalandoi tula'na. ⁸Daa umpasusiia! Aka setonganna tä'pia' deem lemba' dio pudu'mu anna naissammi Ambemu yabo suhuga indo umpahalluanna. ⁹Sapo' la muua hia' ia ma'sambajam:

'Ambeki yabo suhuga,

dipa'kasallei sanga masehomu,

¹⁰kela mala Ikom ma'pahenta,

anna dituhu'i pa'elo'mu

illaam inde lino umba susi yabo suhuga.

¹¹Beengkanni kinande la sihuanna kiande allo temo.

¹²Anna muampunniangkanni kasalaangki,

umba susi muampunnikam duka' to kasalaam lako kaleki.

¹³Anna daa ullappa'kam tama pa'sändäsam,

sapo' la ullappasangkam dio mai kakuasaanna kakadakeam.

[Aka lko to umpuängam kaphentaam, kakuasaam, anna kamatandeam sule lako salako-lakona. Amin.]'

¹⁴Aka maka' muampunniko kasalaanna padammu ma'hupatau, la naampunniangkoa' duka' kasalaammu Ambemu yabo suhuga. ¹⁵Sapo' maka' tä'koa' muampunni kasalaanna padammu, iya la tä'koa' too duka' la naampunniam kasalaammu Ambemu yabo suhuga."

Lalanna diaka susi puasa

6:16-18

¹⁶Mane nauai: "Maka' puasakoa',** tä'koa' la susi to ma'dua tambu' si naägä'i lelem umpesahongko-hongkonganni kalena aka naua: 'Anna mala naissam tau senga' naua ma'puasa.' Setongam-tonganna, tau susi ia too untahimam ia sahona ke napujim tau buda. ¹⁷Sapo' maka' puasakoa',

pendau'koa' ammu pa'dakka, ¹⁸anna mala tä' naissam tau senga' naua: 'Ma'puasa.' Anna mala anggamm Ambemu to tadiita la muissanni. Iya la nabala'iammoko too Ambemu, to ullosa ingganna membuninna, indo to umpogau' tää'na naita tau senga'."

Paitoo'naia' illaam penabammu kaphentaanna Puang Allataala

6:19-24

¹⁹Anna mane naua: "Daa uhheppum kulle illaam inde lino. Aka kulle inde lino tontäm bu'busanna, takkasam, anna la naboko to maboko. ²⁰Sapo' la uhheppum yabo hia' ia suhuga kullemu. Aka tala naande ia bu'bu', tala takkasam, anna tä' toi la mala naboko to maboko. ²¹Aka umba-umba naongei kullemu, la eta siam too duka' naongei penabammu."

²²Anna mane naua: "Inde matanta sihhapam ballo illaam kaleta ma'pomasiä'. Aka maka' masiä' matammu, iya masiä' asam too duka' sakalebu kalemu. ²³Sapo' maka' kadakea' matammu, mannassa anna sihhapangko nabutai malillim. Maka' ussangaiko kalemu masiä' sapo' pi'de hi indo kamasiäsam illaam kalemu, mannassa anna tä'i deem pada samalillim katuboammu dio olona Puang Allataala.

²⁴Tä' deem mesa sabua' la nabela umpengkähängam dua puäna. Aka la natuhu'i manappam too mesa, anna la napaiboko'na bäbä mesa. Battu diua la napakalando puha ia mesa anna tä' bäbä la napehingngii mesa. La susingkoa' too duka', tä' siaan' la umbela umpalulängäm penabammu Puang Allataala ke anggakoa' umbumbu' kulle di lino."

**6:16 puasa: Petua' dioi pemasiä'na Mat. 4:2.

**Tä' tau mala malallam
diona salu katuboam**

6:25-34

Luk. 12:22-31

²⁵“Iam too anna kuuaammokoa': Daa ummalallanna' diona salu katuboammu, la muua: 'Aka amo la diande sola di-ihu.' Anna tä' toi la malallangkoa' diona bätä puntimmu, la muua: 'Aka amo la dipa'poheba.' Tä' daka tia kalando puha ia katuboammu anna la kinande? Anna bätä puntimmu kalando puha ia anna la poheba? ²⁶Penabaam siaia' too dassi-dassi yabo lawwa. Tä' deem mangngambo', tä' deem mepahe, damom ia ditula'i la deem ma'pakissim. Moinna anna susi, sapo' tontä liu duka' naban-neiam salu katuboanna Ambemu yabo suhuga. Tä' daka tia keangga' puhakoa' iko anna la dassi-dassi ia too? ²⁷Akam gunana la malallangkoa' diona kapa-halluammu? Mennangka iko tau muita to malallam diona salu katuboanna la mala ullombunni sungnga'na moi podo la saidi'um?

²⁸Akanna malallangkoa' diona la umpa'pohebana? Penabaam siaia' too indo bunga-bunga lako kaliane. Tä' deem mengkähä, dapaka ia la umpapia poheba. ²⁹Sapo' mentondom puha ia mapianna anna la pohebana tomahaja Salomo yolona, moinna anna tä'i deem pada sasugi'. ³⁰Indo duka' kuhha tubo temo la bambanna siam ditibe tama api anna napomapi'däi Puang Allataala, damo ahanna' ia iko keangga' puha hakoa' tiko anna la indo kuhha. Kuhäm sugali'a' kamatappasammu! ³¹Iam too anna tä'ungkoa' la malallam diona salu katuboammu, la muua: 'Aka amom la kiande, aka amom la kiihu', anna aka amom la kipa'poheba.' ³²Si naua asammi too ingganna

hupatau to tä' unkgaleso manappa Puang Allataala. Sapo' tä' iko la umpasusia', aka inna naissam loppo'um Ia Ambemu yabo suhuga ingganna kapahalluammu. ³³Ia hia, paitoo'naia' illaam penabammu kapahentaanna Puang Allataala anna umpalako liui pa'elo'na, iya la napasondoingkoa' too ingganna la kapahalluammu. ³⁴Dadi tä'ungkoa' la malallam diona makale'na. Aka kamalallangam allo makale', eta opa ia duka' umpikki'i. Budam kamasussaammu allo temo, damom uhhängänni liui.”

Daa umpasala padammu hupatau

7:1-6

Luk. 6:37-38, 41-42

7 Anna mane naua: “Daa umpasala padammu hupatau indana napasalako duka' Puang Allataala. ²Aka umba susi umpasalako padammu hupatau, la susim too duka' napasalako Puang Allataala. Aka pempadai too umpasalako solamu, iya la pempada siam too duka' napasalako Puang Allataala.

³Akanna la muita leko'ko butanna solamu pada tahubu' kaju anna tä'ko iko la ussi'dim butammu pada talakaju illaam matammu? ⁴Maakam ia susi la malako muuaam solamu: 'Maiko solaku anna kuäläiangko itim tahubu' kaju illaam matammu,' moi kela daa pada iko talakaju illaam matammu? ⁵O, to ma'dua tambu! Äläi yolo indo butammu pada talakaju anna mala masiä' pen-nenne'mu muäläiam butanna solamu pada nennu'.”

⁶Puhai ia too, natula' polepi Puang Yesus mesa pehapangam naua: “Daa umbeenni asu ingganna masehona aka nasumbali'iko manii anna nahopäiko.

Anna daa umbeenni babi mani' mutiarammu indana napa'kuttä'i."††

**Pelau kapahalluammu längäm
Puang Allataala anna naponnoiango**

7:7-11

Luk. 11:9-13

⁷Mane naua pole oi: "Si pelau kapahalluammu längäm Puang Allataala anna naponnoiango. Peäi kapahalluammu anna ullolonganni. De'de'i ba'ba anna mala natungka'iangko. ⁸Aka menna-menna melau la diponnoiam pelauanna, anna menna-menna mameä la nalolongam, anna menna-menna unde'de' ba'ba la ditungka'iam.

⁹Tä' sia deem tau la palla' penabanna umbeem batu änä'na ke umpelau hoti. ¹⁰Susi toi duka' tä' deem tau la palla' penabanna umbeem ula' änä'na ke umpelau bau. ¹¹Dadi ikoa' duka' to madosa anna muissanni umbeem änä'mu la napomapianna, damo aham la Ambemu yabo suhuga la umbeem indo la napomapianna lako si mesa-mesa hupatau to melau dio olona."

**Diona kinisam ahe apam
anna lalanna la tinanda lako
katuboam sule lako salako-lakona**

7:12-14

¹²Anna mane naua: "Iai too umpohäe la napogausango solamu, iam too duka' la umpogau' lako solamu. Iam too inde punggu' tannunna issinna suha' Pepaondonganna Musa anna suha'na ingganna nabi."

¹³Mane nauai: "Ola tamako ba'ba masiki'. Aka ba'ba kalua' anna lalam malobä diola tinanda tama nahaka. Anna buda tau muola eta. ¹⁴Sapo' ba'ba

masiki' anna lalam masiki' la diola tinanda lako katuboam sule lako salakolakona, anna anggam sai'di' tau muola lalam ia too."

**Diona nabi tatappa', pa'palakoanna
la umpomannasai**

7:15-20

¹⁵Anna mane naua: "Jagai manapaia' to ussangai kalena nabi sapo' setonganna to mebaba bulim. Si sulekoa' napellambi'i ma'madotta'-dotta' lelem anggasanna domba, sapo' setonganna susi liu hia olo'-olo' to peande. ¹⁶Sapo' la muissanna' untandai aka la muita dioa' pa'palakoanna. Aka la deem daka tia tau umpuppu' bua anggur dio mai balambane' battu haka la umpuppu' bua ara yabo mai kaju bahani? ¹⁷Susi toi duka' mesa kaju ke mapiai, la mapia siam tia duka' buana, anna mesa kaju ke kadakei, la kadake siam tia duka' buana. ¹⁸Aka tä' sia deem la mala mesa kaju mapia la ungkembuaam bua kadake, battu haka mesa kaju kadake la ungkembuaam bua mapia. ¹⁹Ingganna kaju ke tä'i mapia buana, mannassa anna la dilelennii lao anna ditunui. ²⁰Susim too duka' nabi tatappa', la diita diopi yolo pa'palakoanna mane mannassai."

**Tä' ia la naakui Puang Yesus to dio
bäbä pudu'na naua: "Ma'Debataä"**

7:21-23

²¹Mane nauai: "Taia tia indo to anggam muuaam bäbäa: 'Debatangku Puang Yesus,' la mendadi umma' illaam kapahentaam suhuga. Sapo' anggam tia indo to umpalako pa'elo'na Ambeku yabo suhuga la mala mentama kapahentaanna. ²²Aka illaam allo ma'katampasanna la buda tau sule

††7:6 Indo *asu* anna *babi* si nasangai to Yahudi makussi'. Illaam inde pehapangam indo to Yahudi dipasihhapam indo *asu* sola babi. Aka indo to Yahudi moka umpehingngii Battakada Debata aka tä' napa'kasallei. Anna Battakada Debata dipasihhapam mani' mutiara anna ingganna masehona.

dio oloku to tä' umpalako pa'elo'na Ambeku yabo suhuga anna nauaannä': 'O Debata, tä' daka tia puhangkam mendadi pelombum pudu'mu illaam umpa'pakahebaam Battakada Debata, si uhhambaikam liu setam, anna umpadadikam tanda memängä-mängä?'²³ Sapo' tappa la kulompä kuua: 'Tä'koa' iko kuissam. Päläikoa' lao inggannakoa' to si umpogau' kakadakeam.'"

To umpehingngii manappa kadanna Puang Yesus dipasihhapam to umpake'de' banua yabona batu

7:24-27

Luk. 6:47-49

²⁴Anna mane naua: "Menna-menna umpehingngii manappa ingganna inde kadanku anna napatama tambu'i lambi' nakedoam, tau ia too sihhapam mesa to keaka' umpake'de' banuanna yabona batu. ²⁵Tappana tuhum uham sitonda hibu' tatta' nasuhum ma'butu-butu uwai unta'du indo banua sola natappi hibu'. Sapo' tä' deem tige'ge' aka napake'de' yabona batu. ²⁶Sapo' menna-menna uh-hingngi gändä-gändä kadanku anna tä'i napailaam tambu' dapaka ia la nakedoam, tau ia too dipasihhapam ia to maho kalebu umpake'de' banuanna yabona bungim. ²⁷Tappana tuhum uham sitonda hibu' tatta' nasuhum ma'butu-butu uwai unta'du indo banua anna la meliliam hibu' untappii, lambi' titale bangke' aka napake'de' yabona bungim."

To unkapilla'i kakuasaanna Puang Yesus ma'pa'guhu

7:28-29

²⁸Tappana puha ma'tula' Puang Yesus, iya sangngim mängä-mängä tau uh-hingngii pepa'guhuanna, ²⁹aka tä' ia ma'pa'guhu susi indo to ullatta' Pepaon-

donganna Musa. Sapo' ma'pa'guhu Ia Puang Yesus sitonda kakuasaam.

Puang Yesus umpabono' mesa to dolengam

8:1-4

Mrk. 1:40-45; Luk. 5:12-16

8 Tappana tuhunni Puang Yesus yabo mai indo tanete, iya ma'silullu'um tau buda untuhu'i. ²Iya sulem duka' mesa to dolengam umpellambi'i anna ma'balinguntu'i dio olona anna nauai: "O Tuam, kuissam kuua malaä' umpabono' ke umpoelo'i." ³Iya uhhaka'um indo tau napasindum naua: "Maelo'ä', bono'ungko!" Lambi' masapu eta siahanni indo sakinna. ⁴Puhai, napakahi'dim Puang Yesus naua: "Pengkilalai manappai le, tä' too la mala untulasam tau senga' inde pa'pogau'ku. Sapo' la le'ba'ko umpa'paitaam kalemu lako sando anna la umbabako bua pemala'mu, umba susi puha napepaondongam Musa. Aka la mendadi tanda lako tau buda diona kabonosammu."

Puang Yesus umpabono' sabua'na punggabana sohodadu

8:5-13

Luk. 7:1-10; Yoh. 4:46-53

⁵Tappana mentamai kota Kapernaum Puang Yesus, iya sulem mesa punggabana sohodadunna to Roma untammui anna nauai: ⁶"O tuam, kela malako ungmaseiä' aka deem mesa sabua'ku dio banua metindo liu aka mate kalena anna tä' deem pada samasanta!"

⁷Natimba' Puang Yesus naua: "La lakoä' anna kupabono'i."

⁸Sapo' naua indo punggabana sohodadu: "O Tuam, tä' punalää' sihatam la tamako banuangku. Pa'tula' mammoko moi podo sabattam aka la bono'um

tia indo sabua'ku. ⁹Setonganna, kuisam duka' diona pampahesam, aka kao duka' mesaä' to dipahe'. Sapo' deempi duka' tando dokkoku to kupahe'. Aka maka' kuuaam indo sohodadu to kupahe': 'Le'ba'ko,' iya le'ba' duka'. Anna maka' kuuaam: 'Maiko,' iya sule duka'. Susi siam too duka' sabua'ku ke kuuaanni: 'Kähäi inde,' iya tä' mala tala nakähä."

¹⁰Tappana nahingngi Puang Yesus indo pa'tula'na, iya tä' deem pada sanakapilla'i, nasuhum ma'kada lako indo tau buda to untuhu'i naua: "Setongam-tonganna, tä' punalapi deem la kulambi' to Israel moi podo la mesam la susi kamatappasanna inde dio tau! ¹¹Nasuhum kutulasangkoa' tentomai kuua: buda tau taianna to Yahudi la sule, buttu illaam mai tandai mata allo anna buttu illau' mai tandai katampusam, la mendadi umma' illaam kapahentaam suhuga, anna muokko'i ma'hame-hame sola-sola Abraham, Ishak, anna Yakub ke illaammi allo ma'katampasanna. ¹²Anna indo to la muongei battuam ongeam ia too, to si disangai umma'na Puang Allataala, ia leko' di ditibe tama indo ongeam handam malillim anna illaanni sumahho lumoa' sikekko' isinna tamate tatubo."

¹³Anna mane ma'kada pole oo Puang Yesus lako indo punggabana sohodadu naua: "Le'ba'ungko aka la dadim tia lako kalemu situhu' kamatappasammu."

Iya bono' eta siaham duka' indo sabua'na.

Puang Yesus umpabono' buda to masaki

8:14-17

Mrk. 1:29-34; Luk. 4:38-41

¹⁴Pissam wattu le'ba' Puang Yesus lako banuanna Petrus, iya ullambi'um pasananna Petrus baine, metindo aka lumalla'. ¹⁵Iya le'ba' siaham lako ampe'na anna naanda'i limanna. Iya tappa masapu eta siaham sakinna lambi' bangommi maläppu' anna tappa untahiai Puang Yesus.

¹⁶Tappana lendu' allo, iya suleim tau umpasola buda to napentamai setam. Iya angga mandi ma'tula' Puang Yesus uhhambai lao indo setam anna bono'im. Anna ingganna to masaki to dio heem eta too napabono' asam duka'. ¹⁷Napogau' Puang Yesus kaha-kaha ia too anna mala sule lako indo kadanna Debata napalombum nabi Yesaya naua: "Ia umpassam kamapi'disanta anna Ia toi umpendudum sakinta."^{††}

Lalanna la untuhu' Puang Yesus

8:18-22

Luk. 9:57-62

¹⁸Tappana naita Puang Yesus tä' deem pada sabuda tau umpali'i lao, iya nauam lako passikolanna: "Talulibanna' kita lambam libanna le'bo'." ¹⁹Tappana la mengkalao, iya sulem mesa to ullatta' Pepaondonganna Musa umpel-lambi'i Puang Yesus anna nauai: "O Tuangguhu, la kutuhu' liuko illaam pa'laoammu, moi umba ngei muola."

²⁰Iya natimba'um Puang Yesus naua: "Asu pangngala' ia deem leäna, anna ingganna dassi yabo lawwa deem sehäna, sapo' Kao-kao to disangai Änä'

^{††}8:17 Yes. 53:4.

Mentolino tä' Kao deem la manontom kuongei metindo.”

²¹ Puhai, iya sule pole boom duka' mesa passikolanna anna nauai: “O Tuam, la mala haka ke laopä' yolo ulla-um ambeku mane suleä' kutuhu'ko?”
²² Sapö' natimba' Puang Yesus naua: “Maingko ammu tuhu'ä! Päbäi mammi ia duka' itim matim to mate ullaum to matena.”[¶]

Puang Yesus umpamattam hibü' tatta'

8:23-27

Mrk. 4:35-41; Luk. 8:22-25

²³ Puhai ia too, le'ba'um längäm lopi Puang Yesus sola passikolanna. ²⁴ Yaboi, iya sule siaham hibü' tatta' illaam indo le'bo', nasuhum natappi bombam indo lopi naongei lambi' saidi' tatallam. Sapö' wattu eta too mamma' Ia Puang Yesus. ²⁵ Iya natundam siaham passikolanna Puang Yesus anna nauaanni: “O Tuang-guhu, pesäkäikam, aka la tallam tau!”

²⁶ Iya natimba'um Puang Yesus naua: “Akanna mahea' sugali' dakoä' iko? Kuhäm punalaa' kamatappasammu!” Anna mane ke'de' umpa'kadai indo bombam sola hibü' tatta'. Iya tappa mattam siaham.

²⁷ Sangngim pilla' indo passikolanna anna sipa'tula'-tula'i naua: “Tau aka hia isanga indea'i? Aka moi hibü' sola bombam mala toi napahe!”

Puang Yesus umpabono' dua to napentamai setam

8:28-34

Mrk. 5:1-20; Luk. 8:26-39

²⁸ Tisampoi lopinna Puang Yesus sola passikolanna lambam libanna le'bo' Galilea dio attasa'na to Gadara, iya

natammui siaham dua tau buttu dio mai ku'bu' to napentamai setam. Indo tau ia too si ma'tatta' la umpongko tau, nasuhum tä' deem tau bahani la muolai indo dalam eta. ²⁹ Muitanna Puang Yesus, iya bassim kaoli-oli siaham naua: “O Yesus Änä'na Puang Allataala, la muaka hakam kami' isanga? Maelo'ungko isanga la undahhakam moi anna tä'pi lambi' wattunna?”

³⁰ Dio indo sikahuku' ongeam ia too deem babi buda mahassam menduhu'. ³¹ Iya napelaum indo setam lako Puang Yesus naua: “Maka' la umpassakam mes-subum illaam mai kalena inde tau, kipelau kela mala anna ussua tamakam kalena inde lako babi buda.”

³² Tappa naua siaham Puang Yesus: “Päläikoa' lao!” Iya tappa messubum siaham duka' indo setam anna umpentamai indo babi buda. Nasuhum sikakondä untobängam bäbä kalena dokko kumila' tahhu' dokko le'bo', lambi' mate asam napusa'i uwai. ³³ Naitanna to unjagai indo babi kadadiam ia too, tappa le'ba' siaham sikakondä lako kota anna napalelei, susi indo babinna mate asammi napusa'i uwai, teem indo dua tau to napentamai setam. ³⁴ Nahingnginna issinna kota indo kaha-kaha ia too, iya le'ba'i siaham umpellambi'i Puang Yesus. Silambi'na, iya nauaim: “Kipelau matim anna tä'ko inde bottoki.”

Puang Yesus umpa'patandaam kakuasaanna muampunni dosa

9:1-8

Mrk. 2:1-12; Luk. 5:17-26

9 Puhai ia too, le'ba'um Puang Yesus sola passikolanna längäm lopi anna ma'pasulei-sule libam indo kota si bi-

[¶]**8:22** Päbäi mammi ia duka' itim matim to mate ullaum to matena: Kalembasanna, päbäi to mate di ada' battu diua to tamatappa' lako Puang Yesus umpalako indo ingganna si napogau'na inde lino.

asa naongei tohho.^{§§} ²Tappana sulei libam, iya natammuim tau umbulle mesa to mate kalena metindo dio ampa'na. Tappana naita Puang Yesus kamatappasannai, iya ma'kadam lako indo to mate kalena naua: “Pomahan-nui penabammu änä'ku, aka diampunni-ammoko dosamu.”

³Wattu eta too dio duka' heem sanaka-naka to ullatta' Pepaondonganna Musa uhhinggi tula'na Puang Yesus. Iya nauaim illaam penabanna: “Akanna deenni tau muangga' kalena sipadaam Puang Allataala?”

⁴Sapo' tappa nalosa Puang Yesus issi penabannai nasuhum naua: “Akanna malaia' umpakende' pikkiam kadake illaam penabammu? ⁵Mennaka la madomi' dadi lako inde tau, ke diuaanni: ‘Diampunniammoko dosamu,’ anna la diuaam: ‘Bangongko ammu pellao?’ ⁶Sapo' la kupa'patandaam temo anna malaa' ungkaleso manappa muua illaam inde lino kuasaä' To diuaam Änä' Mentolino muampunni dosa.” Mane ma'kadai lako indo to mate kalena naua: “Bangongko, babai ampa'mu ammu le'ba' lako banuammu.” ⁷Tappa bangom siahham duka' indo to mate kalena anna le'ba'i lako banuanna. ⁸Tappana naita tau buda indo kadadiahm ia too, iya sangngim mahea' anna umpuji Puang Allataala naua: “Tä' si'da deem untondonni kakuasaanna Puang Allataala nabeem lako hupatau!”

**Puang Yesus untambai Matius
napadadi passikolanna**

9:9-13

Mrk. 2:13-17; Luk. 5:27-32

⁹Puhai ia too, le'ba'um Puang Yesus umpellei indo ongeam. Mahassanni mel-

lao, iya muitam mesa tuam passima isanga Matius muokko' illaam kätto'na. Iya napa'kadaim Puang Yesus naua: “Maiko anna untuhu'ä.” Iya ke'de'um duka' anna le'ba'i natuhu'.

¹⁰Mahassanni mangngande Puang Yesus sola passikolanna dio banuanna Matius, iya suleim sanaka-naka tuam passima sola tau senga' anna muokko'i sola-sola mangngande. Ingganna indo to sule si nasangai to Yahudi to madosa. ¹¹Tappana naita to mentama kakalebuanna Parisi, iya ma'kadam lako passikolanna Puang Yesus naua: “Akanna naakui tuangguhummua' sola-sola mangngande tuam passima anna to madosa senga'?”

¹²Sapo' nahingngi Puang Yesus indo pekutanaanna, iya natimba'im naua: “Tä' tia deem to bono' la umpahal-luam tuandotto', anggam tia to masaki. ¹³Paela' siaia' too umpenabaam kalem-basanna indo issinna Battakada Debata naua: ‘Handam kupaitoo'na, pa'kamase taia olo'-olo' dipehumalasangam.’ Aka Kao-kao, suleä' inde lino taia to ussanga kalena malolo la kutambai, sapo' suleä' untambai to madosa.”*

Puang Yesus umpomasiä' diona puasa

9:14-17

Mrk. 2:18-22; Luk. 5:33-39

¹⁴Puhai ia too, iya suleim passikolanna Yohanes to si mantedo' umpellambi'i Puang Yesus anna nauaanni: “Maaka hia anna si puasakam kami' situhu' peadasam sola to illaam kakalebuanna Parisi anna tä' ia passikolammu?”

¹⁵Natimba' Puang Yesus umpake pehapangam naua: “Aka la deem daka tia to ullomba kakabengam la masussa pen-

§§9:1 kota si biasa naongei tohho: kota Kapernaum diuaam (batai 4:13).

*9:13 Hos. 6:6.

aba ke diopi heem indo to mane dipake-baine? Mannassa anna tä'i deem! Sapo' la deem wattunna indo to mane dipake-baine la diäläi illaam mai alla'-alla'na to ullombai. Iya etapi too pole' mane puasai.

¹⁶ Mane deenni, tä' tia deem tau la umpopetampi' sampim bakahu lako poheba malusa, aka tingkahussui too indo sampim bakahu, iya tuttuam kalua'um sesse'na indo poheba malusa. ¹⁷ Susi toi duka' tä' tia deem tau la muala anggur bakahu anna napatamai pa'ponggeam malusa. Aka indo anggur bakahu la untesseam pa'ponggeam malusa, katampasanna bassim labu', susi anggurna teem pa'ponggeanna. Anggur bakahu pahallu la dipalutama duka' pa'ponggeam bakahu anna mala bassim mapia."[†]

**Puang Yesus umpatubo sule mesa
änä'-änä' anna umpabono' mesa
baine masäem nahua saki baine**

9:18-26

Mrk. 5:21-43; Luk. 8:40-56

¹⁸ Mahassampi ma'tula' Puang Yesus, iya sule ham mesa to pebaba illaam pa'sambajanganna to Yahudi umpellambi'i Puang Yesus anna ma'balinguntu'i dio olona napasindum naua: "Deem mesa änä'ku baine, ia sia matena. Sapo' kela malako laoki' sola anna uhhaka'i anna mala tubo sule."[†] ¹⁹ Iya ke'de' siaham duka' Puang Yesus

sola passikolanna anna le'ba'i sola indo tau.

²⁰⁻²¹ Muolai lalam, iya sulem mesa baine, sapulo duam taunna nahua saki baine. Naua illaam penabanna indo baine: "Assala'na mala moi podo kuantim bajunna, iya la malamä' bono'." Iya le'ba'um lako boko'na Puang Yesus anna naantii tähämpä' bajunna.

²² Iya menggihi'um Puang Yesus lako boko'na anna nauai: "Pomatohoi penabammu, änä'ku! Bono'ungko aka unkatappa'ia'." Iya bono' eta siaham duka' indo baine.

²³ Tappana landa' Puang Yesus lako banuanna indo to untambai, iya ul-lambi'um tau buda dio. Deem sanakanaka to umponi sulim to mate anna buda tau umbatim. ²⁴ Iya nauam Puang Yesus: "Le'ba'koa' aka inde änä'-änä' tä' tia mate sapo' mamma' bäbä hi tia!" Sapo' silele mandi umpetabai Puang Yesus. ²⁵ Tappana messubunni indo tau buda, iya le'ba'um Puang Yesus tama tambinna indo änä'-änä'. Sulei tama, naanda'im limanna anna nabangonganni lambi' tubo sule. ²⁶ Kaha-kaha ia too napelele asam ingganna hupatau illaam pa'lembängam ia too.

**Puang Yesus umpabono' dua to buta
9:27-31**

²⁷ Puhai ia too, umpatahhu' oom pa'laoanna Puang Yesus. Iya muolai lalam nahingngim dio mai boko'na dua to buta katamba-tamba naua: "O peam-

[†]9:17 Indo to Yahudi si muala lollo' beke napapaii pa'ponggeam anggur. Sapo' maka' malusam indo pa'ponggeam anna dipatamai anggur bakahu, iya hedei too indo anggur bakahu mala untesseam indo pa'ponggeam malusa aka mato'do'um tä'um mala sumbakka'. Susi inde kalembasanna indo pehapanganna Puang Yesus: tä' mala dipasiikoi indo pepatuduam bakahu nababa Puang Yesus anna indo pepatudu-anna to Yahudi.

poanna tomahaja Daud, kamaseikam kami!"²⁸

²⁸Tappana tama banua Puang Yesus, iya sule siaham duka' indo dua to buta anna natuhu'i tama. Iya nakutanaim naua: "Ungkatappa'i haka la malakoa' kupabono'?"

Natimba'im naua: "Io, kikatappa'i, Tuam."

²⁹Iya nahakasammi matanna anna nauaanni: "Bono'ungkoa', situhu' kamatappasammu."³⁰ Iya tappa masiä' siaham pennenne'na. Sapo' napakahi'di mate-mateam Puang Yesus naua: "Deem aia' la lao untula' inde kupogausangkoa' le!"³¹ Sapo' tappa le'ba' dia napalele kaha-kaha ia too lako dio mai illaam pa'lembängam ia too.

Puang Yesus umpabono' mesa to pepe

9:32-34

³²Le'ba'na indo dua to buta, iya sule pole oom tau umpasola mesa to pepe. Ia anna pepei aka napentamai setam.³³ Tappana puha nahambai lao Puang Yesus indo setam illaam kalena, iya mala siaham ma'tula'. Nasuhum sangngim nakapilla'i pada to muitai kadadiam ia too anna sipa'tula'tula'i naua: "Maneanna si'da pole' diita inde kadadiam susi illaam alla'-alla'na to Israel."

³⁴Wattu eta too dio duka' heem sanaka-naka to mentama kakalebuanna Parisi muita kaha-kaha ia too. Iya sipa'tula'-tula'um naua: "Kuasanna hi tia tomahajanna setam illaam kalena nasuhum mala uhhambai lao setam."

Tä' deem pada sahäntä buana Puang Yesus muita tau buda sihhapam domba tä' deem to unγκambi'i

9:35-38

³⁵Puhai ia too, iya ulleleim mobotto-bottoam Puang Yesus si ma'pa'guhu illaam pa'sambajanganna to Yahudi anna umpa'pakahebaam Kaheba Katilallasam naua: "Bambannam umpalako kapahentaanna Puang Allataala." Anna umpabono' ingganna to masaki anna umpapia pole dadinna to sala dadi.³⁶ Wattu eta too tä' deem pada sahäntä buana Puang Yesus tappana muita tau buda masussa penaba anna kattu hannu. Aka sihhapam domba tä' deem to unγκambi'i.³⁷ Iya umpa'tula'i siaham passikolanna naua: "Indo tau illaam inde lino sihhapam pahe matäsä'um. Buda indo pahe matäsä', sapo' saidi' to mepahe.³⁸ Dadi pelauia' längäm puäna indo pepaheam anna mala ussua buda tau umpepaheanni."

Puang Yesus ussämpä limanna indo sapulo dua suhona

10:1-15

Mrk. 3:13-19; 6:6-13; Luk. 6:12-16; 9:1-6

10 Puhai ia too, untambaim indo sapulo dua passikolanna Puang Yesus anna nabeenni kakuasaam la uhhambai lao setam, umpabono' ingganna to masaki, anna umpapia pole dadinna to sala dadi.²⁻⁴ Indo to sapulo dua suhona Puang Yesus, isanga Simon, biasa toi duka' si diuam Petrus,

²⁸**9:27** *peampoanna tomahaja Daud*: Indo anna ma'kadai indo to buta muuam Puang Yesus: *O peampoanna tomahaja Daud*, indo kada ia too naissam asam to Yahudi napekalembasam naua: *Mesias battu diua To nalanti' Puang Allataala napa'kadai*. Aka indo to Yahudi umpemmitai liu Mesias pessubunna Daud la sule umpabono' ingganna to masaki anna la ma'pahenta umba susi tomahaja Daud ma'pahenta yolona (2Sam. 7:12-14; Puj. 89:3-37; Yes. 11:1-3, 10, 35:5-6).

anna Andreas solasubunna Petrus,
 anna Yakobus sola Yohanes to
 ma'solasubum, bassim änä'na
 Zebedeus,
 anna Filipus, Bartolomeus,
 Tomas, Matius indo tuam passima
 yolona,
 Yakobus (änä'na Alfeus), Tadeus,
 Simon to illaam kakalebuanna Zelot,[†]
 anna Yudas Iskariot to la umbalu' Puang
 Yesus.

⁵Inde sapulo dua suhona Puang
 Yesus sanggim nasämpä limanna anna
 napakahidii naua: "Tä'koa' la mala lu
 lako tondä'na taianna to Yahudi, anna
 tä' tookoa' duka' la lu lako bottona
 to Samaria, ⁶sapo' la lu lakokoa' to
 Israel, indo to sihhapam domba bulim.
⁷Sulekoa' too lako, iya muuammia':
 'Bambannam umpalako kapahentaanna
 Puang Allataala!' ⁸Pabono'koa' to
 masaki, patubokoa' sule to mate,
 sapuianni sakinna to dolengam, anna
 la uhhambaikoa' lao setam. Inde
 kakuasaam dibeem bäbäkoa'i, dadi la
 pahallukoa' duka' umpabono' bäbä to
 masaki.

⁹Mane deenni, tä'koa' la mala um-
 baba doi' illaam pa'laoammu, susi doi'
 bulabam, doi' peha', battu haka doi'
 tembaga. ¹⁰Angganna' poheba illaam
 kalemu la umpake. Tä'koa' la umbaba
 taa', tä' tookoa' la umbaba dua baju,
 sandala', anna tekkem. Aka ingganna to
 mengkähä abana sipäto' la diponnoiam
 kapahalluanna.

¹¹Maka' sulekoa' lako mesa kota
 battu haka tondä', iya la umpeäa' banua
 muongei indo la ahuna untahima
 manappakoa', anna la tohho liukoa'
 eta sampe le'ba'koa' umpellei indo
 ongeam ia too. ¹²Anna maka' la

mentamakoa' mesa banua, la muuaa':
 'Handandanni Debata untamba'koa'.
¹³Maka' natahima manappakoa' indo
 to ma'banua, iya la natahima si'da too
 indo pa'tamba' umpelauanna'. Sapo'
 maka' tä'koa' natahima, iya pelauia'
 längäm Puang Allataala anna nääläi
 sule indo pa'tamba' umpelauanna'
 ingngena'. ¹⁴Anggam ia, maka' deem
 to ma'banua battu haka pa'tondä'
 tä' untahimakoa', battu haka tä'
 naaku umpehingngii tula'mua', iya la
 umpelleia' lao indo banua haka tondä'
 daka, anna la umpemassianna' sobä'
 dio bitti'mu, anna mala mendadi tanda
 diua ditumpu pala' ia indo tondä' ia
 too. ¹⁵Aka setongam-tonganna, maka'
 too ke lambi'um indo allo la naongei
 Puang Allataala umpopa'tadongkongam
 hupatau, la mabanda' puha ia
 tahungkunna issinna indo tondä' ia
 too anna la issinna kota Sodom anna
 Gomora."[§]

Tä'koa' la umpakabeba penabammu ke deenni tau la undahhako'

10:16-33

Mrk. 13:9-13; Luk. 21:12-19; 12:2-9

¹⁶Anna mane naua pole umpakahidi
 suhona: "Pengkilalai manappaia', la
 sihhapangkoa' too domba kusua tama
 alla'-alla'na olo'-olo' to peande. La
 majaga liukoa' sihhapam langkasi**
 anna la malunä' penabakoa' sihhapam
 dangam-dangam. ¹⁷La majaga
 polepokoa' too liu, aka la deem too tau
 ussakkakoa' anna nababakoa' lako olona
 to mahhotto' illaam peadasam, anna
 natembe'koa' illaam pa'sambajanganna.
¹⁸Anna la dibabakoa' lako olona
 to ma'pahenta anna tomahaja aka

[†]10:2-4 kakalebuanna Zelot: kakalebuanna to umbali kapahentaanna Roma.

[§]10:15 Sodom anna Gomora: Kad. 19:24-28.

**10:16 langkasi: Indo dituli' illaam basa Yunani, naua ia ke basa Bambanni: ula'.

untuhu'ia'. Iya wattu etam too la muongea' mendadi sa'bingku dio olona anna lu lako hupatau to taungkaleso manappa Puang Allataala. ¹⁹Sapo' maka' la dihotto'ungkoa', tä'koa' la umpakabeba penabammu la muua: 'Aka amom isanga la diua mentimba'?' Aka indo tula' la umpopentimba'a' taia tula' di kalemu bäbäa' sapo' la napasondoikoa' Puang Allataala. ²⁰Aka setonganna indo tula' la umpokada taia gatti kalemu bäbäa', sapo' la napalosaikoa' Penaba Masehona Ambemu yabo suhuga.

²¹Anna la kende' too tatta' asu lambi' to ma'solasubum la palla' penabanna umpopepatei solasubunna. Susi toi duka' ambe la umpallasam änä'na anna änä' la umbali tomatuanna sampe napatei. ²²Anna la nakabassi asangkoa' too tau aka unkatappa'ia'. Sapo' iai too mentobe manda' anna mengnganti matoto' illaam kamatappasam lako kaleku sule lako ma'katampasanna, tau iam too la dipasalama'. ²³Maka' too didahhako'a' dio mesa ongeam, iya la masimpangkoa' too muäläi kalemu anna le'ba'koa' lako ongeam senga'. Setongamtonganna, tä'pi la ussambaa' ingganna ongeam illaam lembäna Israel, anna sulemä' sule to disangai Änä' Mentolino.

²⁴Mesa passikola tä' tia la matande puha ia anna la tuangguhunna, susi siam duka' mesa sabua' tä' tia la matande puha ia anna la puäna. ²⁵Handam malannam tia ke sipadaanni tuangguhunna indo mesa passikola, susi siam duka' indo sabua' anna puäna. Dadi Kao duka' to mampahe' anna si nasangaiä' 'Beelzebub,' battu diua tomahajanna setam, iya senga'unna' tiko to dipahe'.

²⁶Sapo' tä'a' la unkahea' tau ia too. Aka ingganna aka-aka tisambona la dipakaleängam asam, anna ingganna aka-aka tibuninna, la dipatandaam. ²⁷Aka inde kupa'tula'ikoa' temo kada

ditambimpi, sapo' la pahallua' lao umpa'paissangam. Inde tentomai mato-mato kupa'bisi'ikoa', sapo' la pahallua' lao umpebangkoam lako ingganna hupatau. ²⁸Anna tä' la unkahea'a' indo to anggam mala umpatei bätä punti, aka tä' ia deem kakuasaanna la umpatei bätä sungnga'. La mahea' lako hakoa' la Puang Allataala to kuasa umpakahio sungnga' anna bätä punti illaam nahaka. ²⁹Taissanna' pada-pada taua dua dena' sai'di allinna aka anggam mesa himi'. Moinna anna susi, sapo' tä' la mala mate bäbä, moi podo la mesam, ke tä'i napoelo' Ambemu yabo suhuga. ³⁰Senga'unna' tiko, aka meangгаа' beluä'mu puha nahekem asam di tia. ³¹Dadi, iam too anna tä'ungkoa' la mahea', aka moi la pada umba budanna dena' tala sipadaannia' angga'mu.

³²Menna-menna muakui kamatappasanna di Kao dio olona hupatau, tau iam too duka' la kuakui dio olona Ambeku yabo suhuga kuua: 'Iam too inde pentuhu'ku.' ³³Sapo' menna-menna umbahoiä' dio olona hupatau, tau iam too duka' la kubahoi dio olona Ambeku yabo suhuga."

Kaha-kaha la ullambi' to untuhu' Puang Yesus

10:34–11:1

³⁴"Tä' la ussanga'a' suleä' inde lino anna la umbabaä' kasiolaam. Aka suleä' inde lino tä' umbaba kasiolaam, sapo' suleä' umbaba kasipengkaam. ^{35–36}Kasuleangku inde lino la deem to ma'hapu illaam mesa banua natuhu'ä' piha anna la tä' piha nasuhum kende' kasipengkaam illaam alla'-alla'na. Susi änä'-änä' muane la sipengka ambena, teem änä'-änä' baine la sipengka indona, anna manintu baine la sipengka pasananna baine, battu diua to ma'hapu la sipengka-pengka paka ia.

³⁷ Menna-menna umpaaha puha ia ambena sola indona anna la Kao, tau ia too tä' ia la sihatam mendadi umma'ku. Susi siam duka' to umpaaha puha ia änä'na muane battu haka änä'na baine, anna la Kao. ³⁸ Menna-menna tä' umpassam kaju sitambenna^{††} anna natuhu'ä', tau ia too tä' duka' la sihatam mendadi umma'ku. ³⁹ Menna-menna umpakalando puha ia katuboam di lino anna la Kao, tau ia too tä' ia la ullambi' katuboam sule lako salakolakona. Sapo' menna-menna ahu' mate aka natuhu'ä', tau ia too la ullambi' indo katuboam sule lako salakolakona.

⁴⁰ Menna-menna untahimako', sihha-pam siam tia Kao ma'kale natahima. Anna menna-menna untahimaä', sihha-pam siam tia duka' indo To ussuaä' ma'kale natahima. ⁴¹ Menna-menna untahima manappa mesa nabi aka nais-sam naua mesa pelobum pudu'na Puang Allataala, tau ia too la untahima mana'na yabo mai Debata sipadaam mana'na mesa nabi. Anna menna-menna untahima manappa mesa to meada' aka naissam naua to si meada', tau ia too la untahima duka' mana'na sipadaam mana'na mesa to meada'. ⁴² Anna menna-menna umbeem pentuhu'ku to handam matuna moi podo uwai händäm aka naissam naua pentuhu'na Puang Yesus, mannassa anna tau ia too la untahima sahona."

11 Tappana puha umpatudu indo sapulo dua suhona Puang Yesus, iya le'ba'um ullelei mobotto-bottoam illaam lembäna Galilea ma'pa'guhu anna umpa'pakahebaam Kaheba Katilallasam.

**Yohanes to si mantedo' ussua
passikolanna napalandasam
pekutanaam diona
kalena Puang Yesus**

11:2-19

Luk. 7:18-35

²⁻³ Wattu eta too mahassam ditahungku Yohanes to si mantedo'. Tappana naissanni naua si umpogau' tanda memängä-mängä Kristus, iya umpakahi'dim sanaka-naka passikolanna anna nasuai naua: "Laokoa' kutanai muua: 'Ikongka indo To nalanti' Puang Allataala masäem diampai? Iya la tau senga' daka too?'"

⁴ Sulei lako umpellambi'i Puang Yesus, iya nakutanaim lambi' natimba'im naua: "Pa'pasulengkoa' anna untulasanni umba susi puhaa' uhhingngi anna muita. ⁵ Susinna to buta mala paita, to mate kalena mala mellao, to dolengam masapu dolenganna, to binga mala pahingngi, to mate tubo sule, anna Kaheba Katilallasam dipa'pakahebaam lako to handam matuna.^{‡‡} ⁶ Kehongko' anna maupa' to tä' bata-bata lako kaleku."

⁷ Tappana le'ba'i passikolanna Yohanes, iya umpa'tula'im tau buda Puang Yesus diona Yohanes naua: "Aka untungkaa' lako pohiallasam umpellambi'i Yohanes? Laokoa' umpetua' to ma'tille tipae'? ⁸ Iya aka haka' too untungka lako? Lao hakoka' too umpetua' to ma'poheba mapi'dä'? Sapo' situhu' Kao pikkihangu dio hi tia banuanna tomahaja indo to ma'poheba mapi'dä'. ⁹ Dadi aka hia' untungka lako? Lao hakoka' too umpetua' nabi? Maka' iaa' untungka, tappa' ia pole'. Aka

^{††}10:38 *umpassam kaju sitambenna*: kalembasanna, ahu' muoloi kamasussaam sule lako ahu' la dipatei.

^{‡‡}11:5 Inde tula'na Puang Yesus puha natula' loppo' nabi Yesaya diona To dilanti' la mepasalama'. Yes. 35:5-6, 61:1.

kutulasangkoa' temo kuua setonganna indo Yohanes mentondom puha ia anna la nabi senga'.¹⁰ Aka Yohanes-um too indo nauaam illaam Battakada Debata: 'Indem ia pesuaku kupake'de' la umpendioloanganko, aka iam too to la umpatokaangko lalam la muola.'^{¶¶}

¹¹Setongam-tonganna, pempom dio mai ingganna hupatau illaam inde lino, tä' deem la untondom Yohanes to si mantedo'. Sapo' mentondom puha ia ingganna to mentamam kapahentaanna Puang Allataala moi anna matunai.¹² Mengkalao napahandu'na Yohanes to si mantedo' umpa'pakahebaam Kaheba Katilallasam sule lako temo, deem liu to kadake gau' umpobali kapahentaanna Puang Allataala anna si napeä liu lalanna la napentandolängänni.¹³ Mengkalao suha' Pepaondonganna Musa anna tula'na ingganna nabi sule lako Yohanes sangngim ma'tula' diona inde dadi temo.

¹⁴Anna maka' untahima inde tula', iya Yohanes-um too indo diuaam Elia to inna dipayolo lambam kasuleanna.^{§§}

¹⁵Lako ingganna ma'hupatau pahallu la umpatanam talinganna umpalempe sulim patomalinna anna napailaam penabai inde tula'ku!

¹⁶Akam la dipasihhapangam inde hupatau lapi' temo? Sihhapam liu indo änä'-änä' si ma'ko'bom-ko'bom lako pasa' anna metambai muuaam solana:

¹⁷'Kiponiammoko' sulim sapo' moka hako' iko sumajo.

Umpeniammakam kelom bahata, sapo' moka hako' iko sumahho.'

¹⁸Aka sule Yohanes si bassa' puasa anna tä' toi muihu' anggur. Sapo' si nasangai hi tau: 'To napentamai setam!'¹⁹ Pissananna suleä' to

disangai Änä' Mentolino, iya si mangngandä' Kao anna mangngihu' illaam pa'hame-hameam. Sapo' si nasangai bäbä hä': 'To si mangngande sasa anna to si umpamäbo' kalena, sangkalamma'na tuam passima anna to madosa senga.' Moinna anna susi, sapo' tä' mala tala ma'tandaam kamanähänganna anna kakeakasanna Puang Allataala la lemba' illaam pa'palakoanna."

Puang Yesus usosso to Yahudi dio lembäna Galilea to moka matappa'

11:20-24

Luk. 10:13-15

²⁰Puhai ia too, iya napahandu'um Puang Yesus usosso issinna kota to handam pembuda naongi umpadadi tanda memängä-mängä aka mokai untihokongam dosana, naua: ²¹"La tilakako' iko ingganna issinna kota Korazim anna kota Betsaida aka mokako' muondo' gau' kadakemu. Aka indo tanda memängä-mängä kupadadi illaam alla'-alla'mua', kela kupadadi diom kota Tirus anna Sidon, la masäem untihokonganna gau' kadakena hupatau dio, lambi' ma'poheba bahata anna umpaponnoi täiabu ulunna aka usosso gau'na. ²²Dadi kuuaangkoa' tentomai: maka' too ke lambi'um indo allo la naongi Puang Allataala umpopa'tadongkongam hupatau, la mahingngam leko' ia tahungkunna issinna kota Tirus sola Sidon anna la tahungkummua'. ²³Anna ikoa'-iko to Kapernaum, ussanga hia' iko umbai' la dipatiäkä' längängkoa' suhuga? Sapo' setonganna la ditibe tama hako' iko lembä bolom. Aka indo tanda memängä-mängä kupadadi illaam

^{¶¶}11:10 Mal. 3:1.

^{§§}11:14 Mal. 4:5-6.

alla'-alla'mua', kela kupadadi diom indo kota Sodom yolona,* iya tä' la natallanni Puang Allataala kota ia too. ²⁴Dadi kuuaangkoa' duka' tentomai: maka' lambi'um indo allo la naongeti Puang Allataala umpopa'tadongkongam hupatau, la mahingngam leko' ia tahungkunna issinna kota Sodom anna la tahungkummu'."

**To untuhu'i Puang Yesus la
ullambi' kamalubeam**

11:25-30

Luk. 10:21-22

²⁵Wattu eta too ma'sambajam Puang Yesus naua: "O Ambe', Puäna langi' anna lino! Ma'kuhhu' sumanga'ä' matim olomu, aka indo kada ditambimmu tä' umpapähänni lako to naangga' manähä anna keaka' hupatau, sapo' umpapähänni leko' ia lako to naangga' matuna hupatau. ²⁶O Ambe' abana inna ia pa'elo'mu."

²⁷Puhai ma'sambajam, iya nauam: "Ingganna-ingganna sia puha asammi napadokkoannä' lisu pala'ku Ambeku. Tä' deem moi podo la mesa hupatau la muissam manappa Änä'na Puang Allataala sulibanna Ambe', anna tä' toi deem moi podo la mesa hupatau la muissam manappa Ambe' sulibanna Änä'na, anna to napelo' Änä'na, anggam ia la muissam manappa Ambeku.

²⁸Maikoa' inggannakoa' to malupu' anna to umpendudum kabiasam mabanda' illaam peadasam anna kupopellubekoa'. ²⁹Babai inde ajoka kupapassanniangoa' ammu pe'guhua' lako kaleku. Aka Kao-kao malunä' penabaä' anna mahempo penaba. Aka maka' umpateenna', iya la tialaa' inabammu umba susi

mesa to ussi'dim kamalubeam. ³⁰Aka indo ajoka la kupapassanniangoa' mahingngam, anna indo dudungam la kupadudunniangoa' tä' mabanda'."

**Puang Yesus napasala to illaam
kakalebuanna Parisi aka mengkähä
passikolanna illaam allo Katohhoam**

12:1-8

Mrk. 2:23-28; Luk. 6:1-5

12 Pissam wattu illaam allo Katohhoam ma'lao-lao oom Puang Yesus sola passikolanna, iya umpa'tängäim mesa bela' gandum. Mahassam siam mellao napasindum siam ia passikolanna muala gandum anna naandei aka tadea'. ²Tappana naita to illaam kakalebuanna Parisi, iya ma'kadam lako Puang Yesus naua: "Petua'pi inde lako passikolammu untekkä pelahangam illaam peadasam umpogau' tala malanna dikähä illaam allo Katohhoam!"

³Sapo' natimba'i naua: "Tä'paka' tiko deem umbata diona pa'pogausanna Daud sola pentuhu'na wattunna anna tadea'i?† ⁴Wattu eta too le'ba' Daud tama bahum kapenombaam anna naandei indo hoti puha dipehumalasang solai pentuhu'na, moi kela daa anggam tia sando mala muandei. ⁵Tä'pia' duka' deem isanga umbata illaam Pepaondonganna Musa diona indo sando si untkähä liu pengkähängam di ada' illaam allo Katohhoam illaam Banua Debata, nasuhum untekkä indo pelahangam naua: 'Tä' tau mala mengkähä illaam allo Katohhoam?' Sapo' moinna anna susi, tä' siam duka' dipasala. ⁶Patama tambu' manappaia' inde tula'ku kuua: eta inde temo deem mentondom puha Ia anna la Banua

*11:23 Sodom: Kad. 19:24-29.

†12:3 1Sam. 21:1-6.

Debata. ⁷Aka illaam Battakada Debata deem tisuha' naua: 'Pa'kamase Kao handam kupaitoo'na, taia olo'-olo' dipehumalasangam.[‡] Aka maka' la muissam manappaa' kalembasanna tula' ia too, iya mannassa anna tä'koa' la umpasala to tä' deem kasalaanna. ⁸Aka setonganna, Kao hia Änä' Mentolino puäna allo Katohhoam.”

**Puang Yesus umpabono' to
mate limanna sabali
illaam allo Katohhoam**

12:9-14

Mrk. 3:1-6; Luk. 6:6-11

⁹Tappana umpellei indo ongeam Puang Yesus sola passikolanna, iya le'ba'um lako mesa pa'sambajanganna to Yahudi. ¹⁰Illaam indo pa'sambajangam, deem mesa tau mate limanna sabali. Eta too deem sanaka-naka to illaam kakalebuanna Parisi maelo' la umpeängam tuntungam su'be' Puang Yesus lambi' nakutanai naua: “Situhu' peadasam, la mala haka dipabono' tau illaam allo Katohhoam?”

¹¹Sapo' natimba'i Puang Yesus umpake mesa pehapangam naua: “Hapanna la deem mesa solamua' umpuängam mesa domba anna mehonno'i dokko gahoä sapo' illaam allo Katohhoam, iya tä' daka tia la napemäläi dio mai? ¹²Kuua hi Kao keangga' puha siam tia hupatau anna la domba. Dadi setonganna tä' tau dilaham la umpogau' kamapiaam illaam allo Katohhoam.”

¹³Puhai ia too, nauam Puang Yesus lako indo to mate limanna: “Äkä'i limammu!” Naäkä' siahham duka' indo limanna, iya bono' eta siahham susi indo

lima sabalinna. ¹⁴Tappa messubunni siahham indo to illaam kakalebuanna Parisi anna le'ba'i sipattuju-tuju la naaka susi anna malai dipatei Puang Yesus.

**Puang Yesus to napilei Puang
Allataala mendadi pesuana**

12:15-21

¹⁵Sapo' naissam Puang Yesus indo pattuju kadakena to illaam kakalebuanna Parisi, nasuhum le'ba' umpellei indo ongeam. Iya nula'um tau buda, anna napabono' asanni Puang Yesus pada indo to masaki eta too. ¹⁶Sapo' napa'pakahi'diam lako indo tau buda naua: “Tä' si'da-si'daa' too la mala untula' lako tau senga' diona Kaleku.”

¹⁷Ia asanna ia too dadi anna mala sule lako indo kadanna Debata napalombum nabi Yesaya naua:

¹⁸“Petua'i, iam too inde Pesuaku to puha kupilei,
to kupakamaja anna to umpomasannam penabangku;
La kupatamai Penabangku,
anna la umpa'pakahebaam diona indo kamaloloangku untingngajo hupatau.

¹⁹Tä' Ia la naaku patelä-telä, anna tä' si kaoli-oli bäbä,
anna tä' toi la naaku salle-salle kada lako ongeanna tau buda.

²⁰La sa'baha' muoloi to matuna,
sihhapam bulo sai'di' mandam tapolo tä' la napasilalla pissam,
anna sihhapam lampu ma'miä'-miä' mandam tä' la napi'dei pissam.
La napateem liu sampe sule lako indo pengkähänganna la umpopatato kamaloloanna Puang Allataala.

²¹Anna Ia la napassedanni hannu ingganna hupatau.”[¶]

[‡]12:7 Hos. 6:6.

[¶]12:21 Yes. 42:1-4.

**Kuasanna Penaba Maseho
nasangai to Parisi kuasanna
tomahajanna setam**

12:22-37

Mrk. 3:20-30; Luk. 11:14-23; 6:43-45

²²Puhanna ia too, sulem sanaka-naka tau umpasola mesa to napentamai setam nasuhum buta anna pepe. Iya napabono' siaham Puang Yesus lambi' mala pole' paita anna mala toom ma'tula'. ²³Iya sangngim pilli' anna mängä-mängä ingganna to muitai kadadiam ia too naua: "Umbai' iangka tia isanga inde indo peampoanna tomahaja Daud masäem dipemmitai!"⁸

²⁴Sapo' tappana nahingngi to illaam kakalebuanna Parisi diona kadadiam ia too, iya nauaim: "Kuasanna hi tia Beelzebul battu diua tomahajanna setam illaam kalena nasuhum mala uhhambai lao setam."

²⁵Sapo' nalosa Puang Yesus tama pikkihannai nasuhum ma'tula' lako indo to illaam Parisi naua: "Maka' deem mesa kahajaam tä' mala mesa penaba hupataunna illaam, mannassa anna la kahenggängannai dadi. Susi toi duka' ke deenni mesa tondä' battu haka mesa pandaposam ke sikabassi-bassii issinna, mannassa anna la titale bangke'i issinna. ²⁶Susi siam too duka' kapahentaanna setam. Maka' la uhhambai lao setam indo tomahajanna setam, iya iam tia isanga sipobali-bali paka ia, nasuhum kende' kahenggänganna. ²⁷Tentomai untanda'ä' umpake kakuasaanna Beelzebul uhhambai lao setam. Dadi

maka' susi, iya kuasanna haka duka' Beelzebul napake pentuhu'mua' uhhambai lao setam? Mannassa anna sala pikki'koa', aka taia duka' kakuasaanna setam napake pentuhu'mua' uhhambai lao setam! ²⁸Sapo' setonganna uhhambaiä' lao setam aka kakuasaanna Penabanna Puang Allataala muundu'ä'. Dadi mannassa diua umpalakom kapahentaanna Puang Allataala illaam alla'alla'mua'.

²⁹Aka umba susi mesa to maboko mentama banuanna mesa to matoho la napabokoi, la napungo hi tia yolo indo to matoho mane naalai indo la nabokona, susimä' too duka' kutaloi yolo tomahajanna setam anna mane kuhambai lao indo pentuhu'na.

³⁰Menna-menna tä' untuhu'ä', tau ia too nabaliä'. Susi toi duka' lako to tä'kam pada kähä mahhempum, tau ia too, to mantaleam ia. ³¹Iam too kasuhunganna anna kutulasammokoa' kuua: ingganna hupanna dosa anna pantelle mala asam naampunni Puang Allataala, sulibanna untelle Penaba Maseho. Aka to untelle Penaba Maseho tä' si'da-si'da ia la mala diampunni. ³²Deem sia ia paleleanna la diampunni to untelleä' to disangai Änä' Mentolino. Sapo' tä' si'da-si'da ia deem paleleanna la diampunni mengkalao illaam inde lino sule lako lino tando lako to untelle Penaba Maseho.**

³³Maka' mapia satoo' kaju, mapia siam tia duka' buana. Sapo' maka' kadake, iya kadake siam tia duka' buana. Si mesa-mesa kaju diissam ditandai ke diitam buana. ³⁴O ingammua' to si mambaba bulim

⁸**12:23** *peampoanna tomahaja Daud*: naissam asam to Yahudi napekalembasam naua: *Mesias battu diua To nalanti' Puang Allataala diuaam*.

****12:32** Ma'tula' susi Puang Yesus aka kakuasaanna Penabanna Puang Allataala muundu'i nasuhum mala uhhambai lao setam. Sapo' naua hi to illaam Parisi: *Kuasanna hi tia Beelzebul battu diua tomahajanna setam illaam kalena nasuhum mala uhhambai lao setam*. Iam too diuaam untelle Penaba Maseho. Batai duka' Mrk. 3:28-30.

pessubunna to kadake gau!^{††} Tä' tia deem la mala mapia pessubungam pudu'mua' aka to kadake gau'koa'. Aka iai too tianna illaam unä' penabanna si mesa-mesa hupatau, ia siam tia duka' messubum dio pudu'na. ³⁵Lako to mapia gau', mannassa anna mapia siam tia duka' pessubungam pudu'na aka mapia illaam unä' penabanna. Sapo' lako to kadake gau', mannassa anna kadakei pessubungam pudu'na aka kadake illaam unä' penabanna. ³⁶Dadi kuaangkoa' tentomai: Maka' lambi'um indo wattu la naonget Puang Allataala umpopa'tadongkongam hupatau, la nalambi' ia pekutanaanna Puang Allataala lako hupatau to nakabuttui ingganna tula' takeguna. ³⁷Aka pessubungam pudu'mu nasuhum tä'ko napasala Puang Allataala, anna pessubungam pudu'mu siam duka' nasuhum napasalako Puang Allataala."

**Napelau to illaam kakalebuanna
Parisi anna umpadadii tanda
memängä-mängä Puang Yesus**

12:38-42

Luk. 11:29-32

³⁸Wattu eta too ma'kada sanakanaka to ullatta' Pepaondonganna Musa anna to illaam kakalebuanna Parisi lako Puang Yesus naua: "O tuanguhu, maelo' punalakam kela mala anna umpadadiko tanda memängä-mängä anna mala kiis-sam kiua buttu yabo si'dako mai Puang Allataala!"

³⁹Sapo' natimba'i naua: "Ia anna maelo'koa' la kupadadiam tanda

memängä-mängä inde to tubokoa' lapi' temo aka sangngim ma'gau' kadakekoa' anna tä'koa' manontom lako Puang Allataala. Sapo' tä' la dipadadiangkoa' tanda memängä-mängä senga' sulibanna tanda memängä-mängä la dadi lako kaleku umba susi dadi lako kalena nabi Yunus yolona. ⁴⁰Aka umba susi nabi Yunus yolona tohho illaam tambu' bau tonggo tallungngallo tallum bengi, la susimä' too duka' to disangai Änä' Mentolino la tohho dio apa' mahihinna litä' tallungngallo tallum bengi. ⁴¹Illaam indo wattu la naonget Puang Allataala umpopa'tadongkongam hupatau, la dipatibangom to Niniwe anna iai umpasalakoa' to tubo lapi' temo. Aka indo ia to Niniwe untihokongam ia gau' kadakena tappana uhhingngi kadanna Debata napalanda' nabi Yunus. Sapo' mokakoa' iko untihokongam gau'mu, moi kela daa inde to umpa'tula'ikoa' temo mentondom puha la anna la nabi Yunus.^{‡‡} ⁴²Anna illaam indo wattu la naonget Puang Allataala umpopa'tadongkongam hupatau, la dipatibangom indo tomahaja baine to umpahenta paluäna Syeba yolona."[¶] Indo tomahaja ia too la napasalakoa' inde to tubokoa' lapi' temo, aka ahu' ia le'ba' umpehingngii kakeakasanna tomahaja Salomo moi anna mambela lalam naola. Sapo' ikoa'-iko mokakoa' umpehingngii inde tula'ku sitingngajokia' kita moi kela daa mentondom puha hä' Kao anna la tomahaja Salomo."^{§§}

^{††}12:34 to si mambaba bulim, pessubunna to kadake gau': Indo dituli' illaam basa Yunani, naua ia ke basa Bambanni: *peampoannakoa' ula'*, aka ula' si napakonai to Yahudi ke deenni tau si mambaba bulim.

^{‡‡}12:41 Yun. 3:5.

^{¶¶}12:42 tomahaja baine to umpahenta paluäna Syeba: illaam basa Indonesia naua: ratu dari selatan, aka indo Syeba abana dio tandai selatan.

^{§§}12:42 1Haj. 10:1-10, 2Tul. 9:1-12.

**To kadake gau' dipasihhapam
to napentamai setam**

12:43-45

Luk. 11:24-26

⁴³ Mane naua polei: “Maka' deem mesa setam messubummi illaam mai kalena tau, iya la le'ba' kalao-lao lako ongeam mabanginna umpeä ongeam la naongeto hho. Sapo' tä' deem nalambi' ongeam la mala naongeto. ⁴⁴ Iya nauam: ‘La ma'pasuleä' sule lako indo ongeangu inggenä.’ Iya le'ba'um sule lako indo ongeanna, iya lo'bä liupi nalambi', sihhapam banua bahassi anna tiäto' mapia la naongeto. ⁴⁵ Iya le'ba' siahäm untambai solana pitu, sapo' kadake puha ia indo solana anna la kalena. Anna to hho asanni illaam kalena indo tau. Ma'katampasanna, tau ia too la tuttuam tama kakajuanna indo kakadakeam illaam kalena anna indo anggapi mesa setam umpentamai. La susim too duka' ulambi'i to kadake gau' inde lapi' temo.”

**To umpalako pa'elo'na Puang
Allataala, iam too diuaam
sahapunna Puang Yesus**

12:46-50

Mrk. 3:31-35; Luk. 8:19-21

⁴⁶ Mahassampi ma'tula' Puang Yesus lako tau buda, iya sule ham indona sola solasubunna ke'de' dio sulibam maelo' la napellambi'i. ⁴⁷ Iya ma'kadam mesa tau lako Puang Yesus naua: “O Tuanguhu, illaam sulibam indomu anna solasubummu. Maelo' ade' la napa'kadaiko.”

⁴⁸ Iya natimba'im naua: “Aka menaa' iko diuaam indoku? Anna menna diuaam solasubungku?” ⁴⁹ Anna mane untuho lako ingganna passikolanna na-

pasindum naua: “Indem ia mai diuaam indoku anna solasubungku ä. ⁵⁰ Aka menna-menna umpalako pa'elo'na Ambeku yabo suhuga, tau iam too sihhapam solasubungku anna indoku.”

**Pehapangam diona
mesa to mangngambo'**

13:1-9

Mrk. 4:1-9; Luk. 8:4-8

13 Allo eta siam too anna le'ba'i Puang Yesus umpellei indo banua lu lako le'bo' Galilea anna muokko'i dio bihinna. ² Iya sulem buda tau ma'silullu' ullombai nasuhum tä'um ia deem naongeto napobua' tau buda. Iya lu längämmi Ia lopi illaam le'bo' anna muokko'i. Anna yabo ia galantangam tau buda. ³ Iya umpalaom buda pepa'guhuam Puang Yesus sapo' nababa pehapangam naua: “Deem mesa tau le'ba' mangngambo'.” ⁴ Tappana naambo' indo bannena, iya deemmi sabaheam tappa lako lalam. Iya suleim dassi naande sampe puha. ⁵ Deem tappa lako bobom batu, nasuhum masimpam tubo aka manipi' litä'na. ⁶ Sapo' tappana naalloi, iya malasso siahäm nasuhum mabangi aka tä' mandalam waka'na. ⁷ Deem toi tappa lako alla' kuhha keduhi. Tappana tuttuam mahombo indo kuhha, iya umpissim indo tanangam sampe tä' mala kembua. ⁸ Sapo' deem duka' tappa lako litä' malompo, iya mapi'dä' ia tubona nasuhum kembua tiluppi'-luppi'. Deem tiluppi' sahatu', deem tiluppi' annam pulo anna deem tiluppi' tallu pulo. ⁹ Lako ingganna ma'hupatau pahallu la umpatanam talinganna umpalempe sulim patomalinna anna napaillaam penabai inde tula'ku!”

**Napomasiä' Puang Yesus
kasuhunganna anna si umpakei
pehapangam ma'tula'**

13:10-17

Mrk. 4:10-12; Luk. 8:8-10

¹⁰Puhai ia too, iya umpengngampe'im Puang Yesus indo passikolanna anna nakutanai naua: "O Tuangguhu! Akanna umbaba pehapanganni indo tula'mu lako tau buda?"

¹¹Iya natimba'im naua: "Aka angganna' iko dipaissanni indo kada ditambim diona kapahentaanna Puang Allataala, sapo' tä' ia dipaissanni tau buda. ¹²Aka menna-menna umpaillaam penabai, tau ia too la dihängänniam polepi kapaissanganna, lambi' tuttuam buda naissam. Sapo' to moka umpaillaam penabai, iya la diäläi pissam ia lao indo kapaissangam nasanga deemmi illaam kalena. ¹³Iam too kasuhunganna anna kubaba pehapangammi lako inde mai tau aka la naita liu sapo' tä' la naala akkalanna; anna la nahingngi liu sapo' tä' la naissam kalembasanna, anna tä' toi la napähäm. ¹⁴Nasuhum la sule lako pole' indo kadanna Debata napalanda' nabi Yesaya naua:

'La nahingngi liu, sapo' tä' la mala naala pikkihanna,
anna la naita liu, sapo' tä' la mala naala akkalanna.

¹⁵Aka inde mai tau makahha'um penabanna,
anna si ma'binga-binga
sola ma'buta-buta.
Napateem indana paitai matanna,
pahingngi talinganna,
anna indana naalai penabanna,
lambi' ma'pasule sule lako Kaleku na-
suhum kupabono'.'

¹⁶Sapo' ikoa'-iko tä' deem pada sakehongko'koa' inggannakoa' passikolangku, aka paitaa' matammu anna pahingngi talingammu. ¹⁷Aka setongam-tonganna, buda nabi anna to meada' yolona maelo' la naita inde to muitaa' temo, sapo' tä'um ia mala naita. Anna maelo' la nahingngi inde to uhhingngia' temo, sapo' tä'um ia mala nahingngi."

**Natula' kalembasanna Puang
Yesus indo pehapangam
diona to mangngambo'**

13:18-23

Mrk. 4:13-20; Luk. 8:11-15

¹⁸Anna mane naua Puang Yesus: "Patanannia' talinga kalembasanna indo pehapangam diona to mangngambo'. ¹⁹Indo diuaam banne tappa lako lalam, dipasihhapam to uhhingngi Battakadanna Puang Allataala diona kapahentaanna, sapo' tä' naissam napekalembasam. Iya sulem tomahajanna setam anna nahappai indo to puha diambo' illaam penabanna indo tau. ²⁰Indo banne tappa lako bobom batu, dipasihhapam ia mesa tau tappana umpehingngii Battakadanna Puang Allataala, iya tappa natahima sola ponno penaba. ²¹Sapo' tä' siam masäe aka tä' kewwaka' illaam kalena. Deenna too kamasussaam anna pandahhaam uhhuai aka untuhu'i Battakadanna Puang Allataala, iya soho' boko' siaham aka tä' mandalam kapeimanganna. ²²Indo banne tappa lako alla' kuhha keduhi dipasihhapam ia to uhhingngi Battakadanna Puang Allataala, sapo' tä' mala kembua mapia aka nakadakei kamalallanganna diona salu katuboanna anna maelo' sugali' la to makaka lambi' umpa'lembeim ia Battakadanna Puang

*13:15 Yes. 6:9-10.

Allataala. ²³Anna indo banne tappa lako litä' malompo, dipasihhapam ia to uhhingngi Battakada Debata anna napekalembasam manappai, nasuhum kembua tiluppi'-luppi'. Deem tiluppi' sahatu', deem tiluppi' annam pulo, anna deem tiluppi' tallu pulo."

**Pehapangam diona
hea illaam alla'na gandum**

13:24-30

²⁴Pehapangam senga' opi natula' Puang Yesus naua: "Kaphentaanna Puang Allataala dipasihhapam issinna inde tula': Deem mesa tau muambo' gandum dio bela'na. ²⁵Sapo' mamma' asanni tau, iya sulem balinna untantam bungam hea tama alla'na indo gandum, mane le'ba'i sule. ²⁶Tappana tubo indo gandum anna napahandu'um tuho-tuhoam buana, iya diitam duka' tubo indo hea.

²⁷Iya le'ba' siaham indo to mengkähäna umpellambi'i puäna indo bela' anna nauaanni: 'O tuam, taia haka tia gandum asam indo muambo' dio bela'mu? Umpasiambo' isanga bungam hea anna tuboi duka?'

²⁸Iya natimba'im naua: 'Balinta hi tia muambo' bungam hea.'

Mekutana pole oom indo to mengkähäna naua: 'Muaku haka ke le'ba'kam kihebu'i indo heana?'

²⁹Sapo' naua indo puäna bela': 'Tä' mala, aka tihebu' duka' manii indo gandum ke uhhebuingkoa' hea. ³⁰Päbäi mammi bassim tubo sule lako disäe' indo gandum. Etapa mane kuuaanni to mengkähäku: Hempunnia' yolo itim hea anna umba'ba-ba'basannii mane un-

tibeia' tama api. Anna mane uhhepungannä' ia indo gandum anna muanannä' tama loko."

**Dua pehapangam diona
kaphentaanna Puang Allataala
la tuttuam tiballa' kalua'**

13:31-35

Mrk. 4:30-34; Luk. 13:18-21

³¹Pehapangam senga' opi natula' Puang Yesus naua: "Kaphentaanna Puang Allataala sihhapam mesa lise'na sesawi natanam tau lako bela'na. ³²Ingganna tanangam ma'lise', lise'nam kaju sesawi handam bahinni'. Sapo' maka' tubom, iya kasalle puha ia anna la tanangam senga' illaam bela', nasuhum mala naongei dassi ma'sehä täkena."

³³Anna mane muala pole mesa pehapangam senga' naua: "Kaphentaanna Puang Allataala mala duka' dipasihhapam bibi' hoti naala baine anna naboloanni appa' pulo lite' tehigu[†] sampe nasamba asam lambi' sumbakka'."

³⁴Ingganna ia too natula' asam Puang Yesus lako indo tau buda nababa pehapangam. Anna tä' deem si ma'tula' senga' ke tä'i nababa illaam pehapangam, ³⁵anna mala sule lako indo kadanna Debata napalombum mesa nabi yolona naua:

"La pehapangam kupake ke ma'pa'guhua';

La kupomasiäsam pole' indo kaha-kaha to dipokada ditambimpi mengkalao dio mai dipadadonna inde lino."[‡]

[†]13:33 *appa' pulo lite' tehigu*, naua illaam basa Yunani: tallu *satastehigu*, sipadaam *appa' pulo lite' tehigu*.

[‡]13:35 Puj. 78:2.

**Puang Yesus umpomasiä'
indo pehapangam diona hea
illaam alla'na gandum**

13:36-43

³⁶ Puhai ma'tula' Puang Yesus lako indo tau buda, iya le'ba'um napellei anna lu tamai mesa banua. Iya napel-lambi'im passikolanna anna nauaanni: "Kela mala Tuanguhu anna untu-lasangkam kalembasanna indo peha-pangam diona hea illaam alla' gan-dum." ³⁷ Iya napomasiäsammi duka' naua: "Indo to muambo' gandum, Änä Mentolino diuam battu diua Kao. ³⁸ Anna indo ia bela', kalembasanna inde lino diuam. Gandum ia, kalembasanna indo to mendadim umma'na Puang Al-lataala. Anna indo hea, kalembasanna indo to untuhu'i tomahajanna setam. ³⁹ Anna balinna Puang Allataala battu diua to untantam hea, kalembasanna tomahajanna setam. Anna wattunna disäe' gandum, kalembasanna indo allo ma'katampasanna diuam. Anna indo to massäe', kalembasanna malaika'.

⁴⁰ Umba susi indo hea dihempum mane ditibei tama api, la susim too duka' ullambi'i lako pentuhu'na tomahajanna setam illaam allo ma'katampasanna. ⁴¹ Aka illaam allo ia too, Kao to disan-gai Änä Mentolino la ma'kaleä' us-sua malaika'ku uhempum ingganna to si mebaba bulim sola ingganna to si umpogau' kakadakeam illaam kapahen-taangu. ⁴² Anna ingganna tau ia too, la ditibe ia tama api tapi'de-pi'de. Anna il-laanni sumahho lumoa' sikekko' isinna tamate tatubo. ⁴³ Sapo' lako hupatau to umpalako pa'elo'na Puang Allataala la muampuam ia kamatandeam la mesilo susi mata allo illaam kapahentaanna Ambena yabo suhuga. Lako ingganna

ma'hupatau pahallu la umpatanam talin-ganna umpalempe sulim patomalinna anna napailaam penabai inde tula'ku!"

**Pahallu dipakalando puha ia
mendadi umma'na Puang Allataala
anna la kaha-kaha di lino**

13:44-46

⁴⁴ Anna mane untula' oi pehapangam Puang Yesus naua: "Indo kapahentaanna Puang Allataala sihhapam mesa baham-baham masuli' tilamum illaam bela'. Pis-sananna nalambi' mesa tau indo baham-baham masuli'. Tappa nalamum sule anna mane le'ba' umbalu' asam ing-ganna kullena aka tilalla' sugali' anna laoi naalliam indo bela'. ⁴⁵ Mane deenni, to la mendadi umma' illaam kapahen-taanna Puang Allataala sihhapam mesa pa'bulele umpeä mutiara handam ma-sulli'. ⁴⁶ Tappana nalambi', iya le'ba' sia-ham umbalu' asam kullena anna mane ma'pasule mualli indo mutiara."

Pehapangam diona dala

13:47-50

⁴⁷ Anna mane untula' oi mesa pehapangam Puang Yesus naua: "Kapahentaanna Puang Allataala illaam allo ma'katampasanna, mala dipasihhapam mesa dala dipessämbäsam dokko le'bo' lambi' ussukka ma'hupa-hupa bau. ⁴⁸ Tappana nasi'dinni indo to modala ponnom bau illaam indo dalana, iya nasibeso-besoim längäm galantangam mane nase'lai bau kadake anna bau mapia. Ia bau mapia napalutama pa'ponggeanna, anna ia bau kadake natibe lao. ⁴⁹ La susim too ke illaammi allo ma'katampasanna, aka la sule malaika' tama inde lino usse'la to kadake gau'^f anna to untuhu'i pa'elo'na Puang Allataala. ⁵⁰ Indo to kadake gau'

^f13:49 to kadake gau': kalembasanna, to tä' sahani si'da-sia, battu diua to tä' tubo bakahu.

la ditibe ia tama api tapi'de-pi'de. Anna illaanni sumahho lumoa' sikekko' isinna tamate tatubo.”

Baham-baham malusa anna bakahu dipasihhapam Battakada Debata susi indo yolona teem indo bakahunna nababa Puang Yesus

13:51-52

⁵¹ Anna mane mekutanai Puang Yesus lako passikolanna naua: “Muisam daka' kalembasanna pada inde tula'ku?”

Natimba'im passikolanna naua: “Io, ki-issammi kalembasanna.”

⁵² Iya nauam Puang Yesus: “Mapia, dadi ingganna tuangguhu illaam peadasam to mendadim umma' illaam kapahentaanna suhuga mala dipasihhapam mesa puäna banua muala baham-bahanna illaam mai pa'ponggeanna susi malusanna teem bakahunna.”

Puang Yesus natumpu pala' satondä'na

13:53-58

Mrk. 6:1-6; Luk. 4:16-30

⁵³ Tappana puha asam natula' Puang Yesus ingganna indo pehapangam, iya le'ba'um ⁵⁴ sule lako tondä'na. Dioi, le'ba'um tama pa'sambajanganna to Yahudi anna ma'pa'guhui illaam. Iya mängä-mängä asam to uhhingngii tula'na lambi' sipa'tula'-tula' naua: “Menna hia umbai' umpa'guhui inde tau anna ma'pateem sugali'i manähäna? Anna menna hia umbai' umbeenni kuasa nasuhum ma'pateem inde kakuasaanna umpogau' tanda memängä-mängä? ⁵⁵ Akanna malai susi, kusanga toda' änä'na tukam kaju anna Maria indona anna solasubunna isanga Yakobus, Yusuf, Simon, sola Yudas! ⁵⁶ Anna kusanga si sola-sola siangkia' indo solasubunna baine. Menna isanga napangngalai inde kamanähängam

anna kakuasaam?” ⁵⁷ Ma'katampasanna sangngim meali-ali nasuhum untumpu pala' Puang Yesus.

Iya ma'kadam Puang Yesus naua: “Mesa nabi dipa'kasallei ke lakoi ongeam senga', sapo' tä' ia dipa'kasallei ke illaanni botto litä'na anna illaam banuanna.” ⁵⁸ Iam too anna tä'um ia umpogau' buda tanda memängä-mängä dio tondä'na aka tä' nakatappa'i solana.

Tulasanna kamateanna Yohanes to si mantedo'

14:1-12

Mrk. 6:14-29; Luk. 9:7-9

14 Wattu eta too napelele duka' Herodes indo tomahaja dio lem-bäna Galilea diona Puang Yesus. ² Iya ma'kadam lako to mengkähä illaam banuanna naua: “Indo muuaanna' Puang Yesus, iya indo hi tia Yohanes to si mantedo' tubo sule! Iam too anna deemmi kakuasaanna umpogau' tanda memängä-mängä.”

³⁻⁴ Ia anna ma'pikki' susii Herodes, aka ia ussua tau ussukka Yohanes anna mane napopesangkala illaam tahungkum. Ditahungkum Yohanes aka nasalla Herodes indo anna natappakadai naua: “Tä' punala sipäto' mualako Herodias bainena Filipus solasubummu umpobaine, aka tä' sihondoi peadasantaa.” ⁵ Setonganna maelo'um Herodes kela dipatei Yohanes eta too, sapo' mahea' ohi lako to Yahudi aka buda tau ussangai Yohanes nabi.

⁶ Tappana lambi' allo kadadianna Herodes, iya sumajom mesa änä'na Herodias baine dio olona Herodes sola tosabena. Iya tä' deem pada satiala inabanna Herodes muitai indo sajona, ⁷ nasuhum ma'pinda yolo lako indo to sumajo mane nauai: “Pelalui situhu' pa'pohäemu, aka tä' mala tala kuponnoi pelauammu.” ⁸ Iya napatuduim indona

indo to sumajo lambi' le'ba' lako tomahaja Herodes anna nauai:

“Kupelau anna umpadioannä' baki ulunna Yohanes to si mantedo'.”

⁹Tappana nahingngi Herodes indo pelauanna, tappa masussa siahham penabanna aka la dipatei Yohanes. Sapo' anu' aka puham ma'pinda lako indo baine nahingngi tosabena, nasuhum muuaam sohodadunna: “Paolaia' pelauanna. ¹⁰Laoko'a' äläianni ulunna Yohanes lako tahungkum.” ¹¹Tä' masäe, iya sulem dibaba ulunna Yohanes dipadio baki anna dibeenni indo baine. Iya naalam duka' anna nababaanni lako indona. ¹²Lessu'i ia too, iya sulem passikolanna Yohanes naala indo bakkena anna nalamunni. Puhai, le'ba'um umpa'tulasam Puang Yesus diona kaha-kaha ia too.

Puang Yesus umpande la'bi lima sa'bu tau

14:13-21

Mrk. 6:30-44; Luk. 9:10-17; Yoh. 6:1-13

¹³Naissanna Puang Yesus diona kamateanna Yohanes, iya le'ba' siahham längäm lopi sola passikolanna aka la lao umpeä ongeam mabuninna. Sapo' tappana naissanni tau buda naua le'ba' Puang Yesus lambam libanna le'bo', iya mengkalaoi siahham dio kotana anna le'ba'i naula', sapo' mangngola galantanganni ia. ¹⁴Tuhunna Puang Yesus yabo mai lopi, iya muitam tau buda lambi' häntä buana nasuhum napabono' asam pada indo to masaki eta too.

¹⁵Kahubenni, iya napellambi'im passikolanna anna nauaanni: “La bengi kalem! Moi kela daa pohiallasam inde taongeia'. Umbai' mapia ke ussuam le'ba' inde lako tau buda anna mala lao mualli kinande lako tondä' sikhaku'na inde ongeam.”

¹⁶Sapo' natimba' Puang Yesus naua: “Tä' manggi' le'ba' aka ikoa' la umpandei.”

¹⁷Iya nauam indo passikolanna: “Aka angga ham lima hoti anna dua bau kiampuam.”

¹⁸Natimba' oom Puang Yesus naua: “Babaannä' to mai o!” ¹⁹Iya nasuam Puang Yesus indo tau buda muokko' lako alla' humpu' anna mane naala indo lima hoti anna dua bau, mane mentongai längäm langi' nakuhhu'i sumanga' längäm Puang Allataala. Puhai ia too, napiä'-piä'um indo hoti mane nabeenni passikolanna natabaam lako indo tau buda. ²⁰Iya mangngandeim sampe dea'. Tappana puhai mangngande, iya nahempummi passikolanna indo tää'nam naande, iya ponnopi sapulo dua baka. ²¹Indo to mangngande eta too kiha-kiha lima sa'bu muane, tä'pi ia dihekem baine sola änä'-änä'.

Puang Yesus mellao yabona uwai

14:22-33

Mrk. 6:45-52; Yoh. 6:16-21

²²Puhai ia too, muuaammi passikolanna Puang Yesus: “Längängkoa' inde lopi ammu pendiolonna' lambam,” napasindum siam ussua duka' lao indo tau buda. ²³Tappana puhai ussua indo tau buda ma'pasule, iya lu längämmi Ia tanete Puang Yesus ma'sambajam mesa-mesanna. Yabo liupi Ia tanete sule lako bengi. ²⁴Wattu eta too indo lopinna passikolanna mambelam naola umpellei bihim le'bo'. Sapo' natammui hibu' tatta', nasuhum napalusau' napaludekke bombam indo lopinna.

²⁵Tappana la tibukka' kalei baja, iya sulem Puang Yesus umpellambi'i passikolanna mellao yabona uwai. ²⁶Naitanna passikolanna mellao yabona uwai, iya sangngim mahea' anna sikakissä'i naua: “Äiiti, anitu dio mai!”

²⁷Sapo' tappa ma'kada Puang Yesus naua: "Pahapa'ia' penabammu, daa ummahea' aka Kao hi to Kao!"

²⁸Naua siaham Petrus: "O Debata, maka' Iko si'da, popellaoä' kao duka' yabona uwai anna mala kupellambi'iko."

²⁹Natimba' duka' Puang Yesus naua: "Maiko!"

Iya tuhum siaham duka' Petrus yabo mai indo lopi anna le'ba'i la umpellambi'i Puang Yesus mellao yabona uwai. ³⁰Sapo' tappana nasi'dim indo hibu' kasalle, iya tappa mahea' lambi' napahandu' siaham la tallam, napolalam kaoli-oli metamba naua: "O Debata, kamaseiä' kao!"

³¹Nakandoi siaham duka' Puang Yesus anna nauaanni: "Akanna bata-batai penabammu? Kuhäm sugali'pi kamatap-pasammu di Kao!"

³²Puhai nakandoi, iya bassim le'ba'um längäm lopi, iya mattam siaham duka' indo hibu'. ³³Nasuhum ingganna indo to yabo lopi umpenombai Puang Yesus napasindum naua: "Abana Änä'na si'dako Puang Allataala."

Puang Yesus umpabono' buda to masaki dio Genesaret

14:34-36

Mrk. 6:53-56

³⁴Tisampoi lopinna Puang Yesus sola passikolanna, iya tappa Genesaret nalambi'. ³⁵Tappana naissam indo to eta naua sule Puang Yesus, iya napalele siaham illaam indo pa'lembängam ia too, nasuhum ingganna to masaki eta too dibaba asam lako Puang Yesus. ³⁶Anna napelau'i lako Puang Yesus naua: "Kela mala anna naantii moi podo tähämpä' jubamum to masakingki, iya la malam too bono'." Lambi' ingganna to muantii mala asam bono'.

Ada' kabiasaanna nene to naponene to Yahudi sisala pahentana Puang Allataala

15:1-9

Mrk. 7:1-7

15 Puhai ia too, sulem sanaka-naka to illaam kakalebuanna Parisi anna to ullatta' Pepaondonganna Musa buttu yabo mai Yerusalem umpellambi'i Puang Yesus anna nakutanai naua: ²"Maaka hia isanga anna untekkai ada' kabiasaam passikolammu indo puha napaandom nene to taponene naua: 'Manggi' tau si umbasei yolo lima mane manggande tau!'"

³Natimba' Puang Yesus naua: "Sapo' akanna untekkakoa' duka' pahentana Puang Allataala anna tambum lakokoa' pepaondonganna nene to umponene? ⁴Aka puha ma'battakada Puang Allataala naua: 'Pa'kasalleiko ambemu sola indomu;' anna: 'Menna-menna umpakaänä'-änä' ambena battu haka indona, tau ia too la dipatei.'⁵⁻⁶ Sapo' si muua hia' iko ma'patudu lako tau: 'Tä' tau pahallu umpa'kasallei ambeta sola indota ke diuai: indo la kutahiaiangkoa' battuam, iya puham kupehumalasang lako Puang Allataala.' Dadi, aka angгаа' iko ada' kabiasaammu umpaitoo'na, nasuhum umpa'pa'deingkoa' pole' pahentana Puang Allataala. ⁷Ikoa'-iko sangngim to ma'pudu' pandengkoa' anna ma'lila manähä! Abana tappa' kadanna Puang Allataala natula' loppo' nabi Yesaya yolona diona panggauammua' naua:

⁸'Itim matim tau dio bäbä pudu'na napa'kasalleiä', sapo' setonganna illaam penabanna napemboko'ia'.

§15:4 Täss. 20:12, 21:17, Sand. 20:9, Pass. 5:16.

⁹Alla'um napenombaiä' aka anggam pepa'guhuam hupatau napepatuduam, mato-mato ia kupepatuduam anna taia hia. ”**“

Diona to la unkladakei hupatau dio olona Puang Allataala

15:10-20

Mrk. 7:8-23

¹⁰Puhai ia too, iya untambaim tau buda Puang Yesus anna napa'tula'i naua: “Pehingngii manappaia' inde tula'ku anna umpaillaam penabai! ¹¹Ingganna kinande lu tamanna kalena hupatau, tä' ia la nakadakei dio olona Puang Al-lataala. Sapo' indo hi tia messubunna dio pudu'na hupatau unkladakei.”

¹²Puhai ia too, iya napengngampe'im passikolanna anna nauaanni: “O Tuangguhu, muissam daka muua meali-ali indo to illaam kakalebuanna Parisi tappana nahingngi indo tula'mu inggenä'?”

¹³⁻¹⁴Sapo' natimba'i Puang Yesus naua: “Muakaa' tiko umpehingngii itim matim to illaam kakalebuanna Parisi! Aka ingganna tanangam ke taiai Ambeku yabo suhuga untananni, mannassa anna la dihebu'i sule dokko waka'na. Anna indo to illaam Parisi pebabammua', sihhapam di tia to buta aka tä' muita lalam la naolanna. Aka maka' tia to buta untette to buta, katampasanna bassim metobä dokko gahoä.”

¹⁵Iya nauam Petrus: “Mala haka ke untulasangkam kalembasanna indo pehapangam, Tuangguhu?”

¹⁶Natimba' Puang Yesus naua: “Aka tä'paka' tiko duka' isanga muissam! ¹⁷Ingganna dipalutamanna sädä le'ba' dokko tambu' anna tahhu' ditibe lao.

¹⁸Sapo' indo tula' mengkalao illaam penaba messubum dio pudu', iya ia hi tia unkladakei hupatau dio olona Puang Allataala. ¹⁹Aka illaam penabanna hupatau naongei kende' ma'hupa-hupa kakadakeam susinna: pikkiham kadake, papateam, lullusam bannetau, gau' sessu', maboko, sa'bi tatappa', anna ma'pakolo'-kolo'i. ²⁰Ingganna kaha-kaha ia too unkladakei hupatau, taia hi tia indo tä' tau umbasei lima kela mangngandei tau.”

Mesa baine to Kanaan unkatappa'i Puang Yesus

15:21-28

Mrk. 7:24-30

²¹Puhai ia too, iya le'ba'um umpellei indo ongeam Puang Yesus anna lu lakoi lembäna Tirus sola Sidon. ²²Dioi, napel-lambi'im mesa baine to Kanaan, indo to si nakahidi' to Yahudi anna katambatambai naua: “O Tuam, peampoanna tomahaja Daud, kamaseiä' kao! Deem änä'ku baine napentamai setam anna tä' deem pada sanasussai.”

²³Sapo' tä' mandi deem natimba'i Puang Yesus. Iya napengkahuku'im passikolanna anna napelaui naua: “O Tuangguhu, kamase-maseikam anna ussui lao inde dio baine, aka dio lium mai boko'taa' kaoli-oli mehahu'!”

²⁴Iya nauam Puang Yesus: “Kao-kao anggamä' nasua Puang Allataala la umpamoloi peampoanna Israel, aka sihhapam domba bulim.”

²⁵Iya sule siaham dio olona Puang Yesus indo baine anna ma'balunguntu'i napasindum naua: “O Tuam, häntängäm dä' kao bua!”

²⁶Natimba' Puang Yesus naua: “Aka tä' punala sihatam kela dialai kinande di-

**15:9 Yes. 29:13.

patokaam änä'-änä' anna ditibeanni lako asu."

²⁷Natimba' oom duka' indo baine naua: "Abana tappa'ko, Tuam! Sapo' kuua hi kao, indo asu dio ibi' meja mala hi tia duka' muande kinande tikadanna puäna."

²⁸Iya nauam Puang Yesus: "Matappa' si'dako, indo! Abana si'da la dipatiolai pelauammu." Iya bono' eta siaham duka' indo änä'na.

**Puang Yesus umpabono'
buda to masaki**

15:29-31

²⁹Tappana umpellei indo ongeam Puang Yesus, iya le'ba'um uhhuttu' bihim le'bo' Galilea mane lu längänni mesa tanete anna muokko'i yabo. ³⁰Yaboi, iya sulem tau buda ma'obim-obim umpasola to masakinna anna napadioi olona Puang Yesus. Indo to masaki, deem to mate sapolona, to buta, to kempo', to pepe, anna budapi to masaki senga', lambi' napabono' asam. ³¹Iya mängä-mängä asammi indo tau buda muitai aka to pepe mala ma'kada, to kempo' bono', to mate sapolona mala mellao, anna to buta mala paita. Napolalam sangngim umpa'kasallei Puang Allataala Debatanna to Israel.

**Puang Yesus umpande
la'bi appa' sa'bu tau**

15:32-39

Mrk. 8:1-10

³²Puhai ia too, iya uhhempummi passikolanna Puang Yesus anna nauaanni: "Tä' deem pada sahäntä buaku muitai inde lako tau buda, aka tallungngallo tallu bengingkia' inde sola-sola, iya pa'dem la naande. Sapo' tä' ohi palla' penabanku la ussua bäbäi ma'pasule lako banuanna, aka lako manii lalam anna tissämbä'i malimpä."

³³Natimba'im passikolanna naua: "Pusa'kam pole' umpikki'i aka indekia' pohiallasam. Dadi la umbam ia ngei diala kinande dipandeam inde lako tau pada budanna?"

³⁴Iya nauam Puang Yesus: "Aka sanakapia' hotimmu?"

Natimba'um naua: "Angga ham pitu, anna deempi duka' sanaka-naka bau bahinni'."

³⁵Iya nauam Puang Yesus lako indo tau buda: "Okko'koa' lako itim paha'baja." ³⁶Anna mane naala indo hoti pitu sola bau anna nasambajannii längäm Puang Allataala, mane napiä'-piä'i anna mane nabeem passikolanna napa'tahiaam lako indo tau buda. ³⁷Dea' asanni indo tau buda, iya nahempummi passikolanna indo tää'na naande, iya ponno polepi pitu baka. ³⁸Indo to mangngande eta too appa' sa'bu muane, tä'pi ia diissa' baine sola änä'-änä'. ³⁹Puhai ia too, iya nasuam Puang Yesus ma'pasule lako banuanna indo tau buda, anna mane le'ba'i la längäm lopi la lu lako lembäna Magadan.

**Napelau to illaam Parisi anna to
illaam Saduki la umpadadi tanda
memängä-mängä Puang Yesus**

16:1-4

Mrk. 8:11-13

16 Deem sanaka-naka to illaam kakalebuanna Parisi sola to illaam kakalebuanna Saduki maelo' la umpeängam tuntungam su'be' Puang Yesus. Iya napellambi'im anna nauaanni: "Paitaikanni tanda memängä-mängä anna mala kiissam kiuu buttu yabo si'dako mai suhuga."

²Sapo' natimba' di Puang Yesus naua: "Maka' la lendu' allo anna maleai bihim langi', mannassa anna la muuaia'i: 'La kulla' opi makale.'" ³Anna maka'

mebengngi' anna ma'ku'dunni kaliane, tä' mala tala muuaa: 'E, la uham allo.' Dadi muissanna' usse'la tanda kela uhanni anna la kulla', sapo' tä' leko'a' ia muissam umpekalembasam inde tanda dipadadi illaam alla'-alla'mua' tentomai. ⁴Maelo'koa' la kupadadiam tanda memängä-mängä aka ikoa' to tubo lapi' temo sangngim ma'gau' kadakekoa' anna tä'koa' manontom lako Puang Allataala. Sapo' tä' la dipadadiangkoa' tanda memängä-mängä senga' sulibanna tanda memängä-mängä la dadi lako kaleku, umba susi dadi lako kalena nabi Yunus yolona." Puhai ma'tula' Puang Yesus, iya le'ba'um umpellei indo tau.

**Pepatuđuanna to illaam
kakalebuanna Parisi anna to
illaam kakalebuanna Saduki
dipasihhapam bibi' hoti**

16:5-12

Mrk. 8:14-21

⁵Tappana landa'i libam lambam libanna le'bo' Galilea Puang Yesus sola passikolanna, iya mane nakilalai hi passikolanna naua: "Tä'kia' umbaba hoti." ⁶Wattu eta too siampu' umpakainga' passikolanna naua: "La majaga manappakoa' too indana nakadakeikoa' bibi' hotinna to illaam kakalebuanna Parisi anna to illaam kakalebuanna Saduki."

⁷Tappana nahingngii passikolanna, iya sipa'tula'-tula'um naua: "Umbai' ia hi tia anna ma'kada susii, aka tä'kia' umbaba hoti."

⁸Sapo' naissam Puang Yesus diona indo natula' passikolanna, nasuhum ma'kada naua: "Abana si'da pada nipi'pia' bulu la'lahi kamatappasammu. Akanna ussitimba'-timba'i hakoa' iko diona pa'dena hotimmu? ⁹Tä' liupia' isanga natama pikkihammu? Anna tä' toia' umbai' ungilalalai indo lessu'

le', lima hoti kupiä'-piä', iya malaa' umpa'tahiaam lako tau la'bi lima sa'bu, anna sanaka-naka polepi baka tää'nam diande uhhempunna! ¹⁰Anna susi toi duka' indo pitu hoti mala umpadea' la'bi appa' sa'bu tau anna sanaka-naka polepi duka' baka uhhempunna' tää'nam diande. ¹¹Akanna tä' liuia' mala natama pikkihammu, aka taia bibi' hoti diande kuuuam? Indo hia bibi' hotinna to illaam kakalebuanna Parisi anna to illaam kakalebuanna Saduki kuuuam la unjagai manappaa' indana nakadakeikoa'." ¹²Katampasanna naissam asam pole' passikolanna naua: "Taia hia bibi' hoti si dipake ma'hoti nauuam, sapo' setonganna indo hia pepa'guhuanna to illaam Parisi anna to illaam Saduki la dijagai."

**Pangngakuanna Petrus naua Puang
Yesus To dilanti' la mepasalama'**

16:13-20

Mrk. 8:27-30; Luk. 9:18-21

¹³Puhai ia too, le'ba'um Puang Yesus lako lembäna Kaisarea Filipi. Muolai lalam mekutanam lako passikolanna naua: "Situhu' tula'na tau, menna di-uaam Änä' Mentolino?"

¹⁴Iya natimba'im naua: "Deem tau muuai: 'Yohanes to si mantedo' tubo sule;' deem muuai: 'Nabi Elia sule sule;' deem duka' muuai: 'Nabi Yerima tubo sule;' anna piha muuai: 'Mesa nabi senga' tubo sule.'"

¹⁵Iya mekutana oom lako passikolanna naua: "Maka' susi, iya akaa' iko ussangaiannä'?"

¹⁶Tappa natimba' Simon Petrus naua: "Ikom too indo To dilanti' la mepasalama', Änä'na Puang Allataala Debata tubo."

¹⁷Iya nauam Puang Yesus: "Kehongko'ko anna maupa' Simon, änä'na Yunus, aka taia hupatau

umpaisanniko itim tula'mu temo, sapo' ma'kale Ambeku yabo suhuga umpalosaiko. ¹⁸Dadi tentomai kusangaingko Petrus, (kalembasanna, batu longkahhim.) Anna yabona inde batu la kupake'de' kakalebuanna umma'ku.†† Anna kakalebuam ia too tä' ia la mala nataloi kamateam. ¹⁹Anna la kupadokkoangko lisu pala'mu pegontinna kapahentaanna suhuga. Iai too umpekadakeam illaam inde lino, ia siam too duka' napekadakeam Puang Allataala. Anna iai too umpemapiaam illaam inde lino, ia siam too duka' napemapiaam Puang Allataala.” ²⁰Anna mane muuaam passikolanna: “Moi la menna tala untulasannia' muua: ‘Iam too indo To nalanti' Puang Allataala la mepasalama.’”

**Puang Yesus umpaisanni
loppo' passikolanna diona
kamateanna anna diona la
napogau' to maelo' untuhu'i**

16:21-28

Mrk. 8:31-9:1; Luk. 9:22-27

²¹Wattu etam too anna napahandu'i Puang Yesus umpaisanni loppo' passikolanna diona indo kamapi'disam la napendudum, naua: “Tä' mala tala längännä' Yerusalem anna la napahuaiä' pandahhaam matua ulunna to Yahudi anna ingganna kapala sando sola to ullatta' Pepaondonganna Musa lambi' la napateiä'. Sapo' illaam allo katallunna la dipatibangonnä' sule dio mai alla'na to mate.”

²²Tappa nababai siaham lao Petrus umpelle-pellei solana anna nauaanni: “Daa umpa'kada susi Debata, la tä' di too napahuaiiko Puang Allataala kaha-kaha ia too! La napasikambela hako too.”

²³Iya umpenggihi'im Petrus anna nauaanni: “Päläiko lao Setam! Ullabaiko pengkähänganku! Aka taia iko pa'elo'na Puang Allataala umpikki', sapo' angga iko pikkiham hupatau illaam penabammu.”

²⁴Anna mane ma'tula' lako passikolanna naua: “Menna-menna maelo' untuhu'ä' pahallu la ullappa' pa'elo' kalena, anna umpassam kaju sitambenna, anna natuhu'ä'.‡‡ ²⁵Aka menna-menna umpa'kadua-duai katuboam di lino, tau ia too tä' ia la ullambi' katuboam sule lako salako-lakona. Sapo' menna-menna ahu' mate aka natuhu'ä', tau ia too la ullambi' ia indo katuboam sule lako salako-lakona. ²⁶Tä' deem gunana lako mesa tau moi la muampuam ingganna issinna lino kela sägä hi sungnga'na. Aka setonganna tä' ia deem bala'inna sungnga'na hupatau. ²⁷Aka Kao to disangai Änä' Mentolino la suleä' naponnoi kamatandeanna Ambeku, anna la natuhu'ä' ingganna malaika'na. Wattu eta too, la kupalambi'i buana situhu' pa'pogausanna hupatau si mesa-mesa. ²⁸Setongam-tonganna, deengkoa' to dio heem temo tä'pi la mate anna muitam Änä' Mentolino sule mendadi Tomahaja ma'pahenta illaam kapahentaanna.”¶¶

††16:18 yabona inde batu la kupake'de' kakalebuanna umma'ku: kalembasanna, Petrus natuhu Puang Yesus la mendadi pekutu'na umma' petauanna.

‡‡16:24 umpassam kaju sitambenna: kalembasanna, ahu' muoloi kamasussaam sule lako ahu' la dipatei.

¶¶16:28 Änä' Mentolino sule mendadi Tomahaja ma'pahenta illaam kapahentaanna: kalembasanna, madomi' indo la katibangonganna sule Puang Yesus dio mai alla'na to mate anna katuhunganna Penaba Maseho nauaam.

**Tallu passikolanna muita
Puang Yesus dipomatande**

17:1-13

Mrk. 9:2-13; Luk. 9:28-36

17 Annanni benginna puhanna ia too, iya umbabaim Petrus Puang Yesus anna indopi to ma'solasubum isanga Yakobus sola Yohanes, anna le'ba'i längäm mesa tanete malangka', anna yaboi paka-paka ia. ²Iya naitam indo to tallu tieli' hupanna Puang Yesus. Indo lindona pangkähhä susi mata allo anna indo pohebana mesilo mabussä'. ³Pissananna, naita ham duka' indo dua nabi yolona isanga Musa sola Elia mahassam sipa'tula' Puang Yesus.

⁴Iya ma'kadam Petrus lako Puang Yesus naua: "O Debata, tä'um deem la susi kamasannangantaa' eta inde. Kela muaku anna kupake'desangkoa' tallu bahum: mesa Iko, mesa Musa anna mesa Elia."

⁵Mahassampi ma'tula' Petrus, iya tuhummi gabum mabussä' ussikuku'i indo ongeam. Anna dihingngii kamaha buttu illaam mai indo gabum naua: "Iam too inde Änä' pa'pakamajanku to umpomasannam penabangku. Pahallua' la umpehingngii!"

⁶Nahingnginna indo kamaha, iya sangngim muoppäm dokko litä' aka tä' deem pada samahea'. ⁷Sapo' tappa napellambi'i Puang Yesus anna nahaka'i napasindum naua: "Bangongkoa', daa ummahea'!" ⁸Umbangongam siaham duka' ulunna, iya angga ham mesa-mesanna Puang Yesus naita.

⁹Tappana tuhunni Puang Yesus sola indo to tallu yabo mai indo tanete, iya napakahi'dim naua: "Deem aia' la untula' säkä indo to puhaa' muita yabo tanete le, ke tä'i puhaä' dipatibangom to disangai Änä' Mentolino dio mai alla'na to mate!"

¹⁰Iya nakutanaim passikolanna naua: "Sapo' maaka hia anna nauai to ullatta' Pepaondonganna Musa: 'Tä' mala tala sule yolo nabi Elia anna mane sule indo To dilanti' la mepasalama?'"

¹¹Natimba' Puang Yesus naua: "Abana pahallu la sule yolo Elia umpatoka ingganna-ingganna sia. ¹²Sapo' kuuaangkoa' tentomai: Abana puham sule Elia, sapo' tä' naissam hupatau nasuhum ia siam anna ia napogausam. La susimä' too duka' to disangai Änä' Mentolino, la ia siam anna ia napogausannä' hupatau." ¹³Tappana nahingngi passikolanna indo pa'tula'na, iya mane sikanapähäm di pole' naua: "Yohanes to si mantedo' päläe' nauaam: 'Elia.'"

**Puang Yesus umpabono' mesa
änä'-änä' to napentamai setam**

17:14-21

Mrk. 9:14-29; Luk. 9:37-43

¹⁴Tappana ma'pasule Puang Yesus sola indo tallu passikolanna lako indo tau buda, iya sule siaham mesa tau anna ma'balinguntu'i dio olona Puang Yesus ¹⁵napasindum naua: "O Tuam! Kama-seiannä' kao änä'ku anna umpabono'i, aka limpu mänesam anna tä' deem pada sanasussai. Aka si bassa' punala songka tama api anna deem toi lu dokko uwai. ¹⁶Anna puham kubabaam lako passikolammu, sapo' tä' mala napabono'."

¹⁷Iya ma'kadam Puang Yesus naua: "Kukapusa'i si'dakoa' pole' inde to tubo lapi' temo, aka kuhäm sugali'a' kamat-appasammu! Anna tä' liupia' muissam usse'la kamapiaam anna kakadakeam. La pada polepi isanga umba masäena sola-solakia' anna la pada polepi isanga umba masäena la kusa'bahasangkoa'?" Mane nauai: "Babaannä' mai itim änä'-änä'!" ¹⁸Iya nakissä'im Puang Yesus indo

setam illaam kalena indo änä'-änä'. Iya tappa bono' eta siaham.

¹⁹ Puhai, iya napellambi'im passikolanna sapo' paka-paka ia ham anna nakutanai naua: “Maaka hia isanga anna tä'i kami' mala kihambai lao indo setam?”

²⁰ Iya natimba'im Puang Yesus naua: “Aka kuhäm sugali'a' kamatappasammu. Setongam-tonganna, maka' la deenna' kamatappasammu moi podo padam i'di', iya tä' deem aka-aka la ungapusa'i. Maka' ussua inde dio buntu mentieli' lako ongeam senga', tä' mala tala tieli'.

²¹ [Sapo' inde setam susi, tä' sia mala disua lao ke tä'i tau ma'sambajam yolo sola puasa.]”^{§§}

Napa'paissangam pole oom Puang Yesus diona la kamateanna

17:22-23

Mrk. 9:30-32; Luk. 9:43-45

²² Tappana ma'mesai Puang Yesus sola passikolanna dio lembäna Galilea, iya nauam Puang Yesus: “Kao to disangai Änä' Mentolino la dibeho tama pala' li-manna hupatau. ²³ La napateiä', sapo' illaam allo katallunna la dipatibangonnä' sule.” Tappana nahingngi ingganna passikolanna pa'tula'na, iya tä' deem pada samasussa nasi'dim.

Diona pamajasam tanggungam tama Banua Debata

17:24-27

²⁴ Tappana sule Puang Yesus sola passikolanna lako kota Kapernaum, iya sule siaham indo to si uhhepump tanggunganna tau tama Banua Debata umpellambi'i Petrus anna nauaanni: “Si nabaja' daka duka' tuangguhummua' indo tanggungam tama Banua Debata?”

²⁵ Natimba' Petrus naua: “Io, si nabaja'!”

Tappana sule tama banua Petrus, iya tä'pi deem ma'tula' anna nakutanaim Puang Yesus naua: “Maaka iko susi pikkihammu Simon diona indo sima si dibaja' lako to ma'pahenta? La ha'ja' illaanna haka botto umbaja'i, la ha'ja' lakona haka ongeam senga', indo to puha nataloi?”

²⁶ Natimba' Simon Petrus naua: “Indo ha'ja' lako ongeam senga'!”

Iya nauam Puang Yesus: “Dadi maka' tä'um ia pahallu mamaja' ha'ja' illaam botto, iya la susingki' too duka' tä'ungki' pahallu la umbaja' tanggunganta tama Banua Debata aka issinnangki' kapahentaanna Puang Allataala. ²⁷ Sapo' päbäim too tabaja', indana masussai penabanna. Dadi le'ba'ungko popekam lako le'bo' Galilea. Alai indo bau uhuna naala pekammu anna umbekkä'i sädäna, aka la ullambi'um too doi' illaam la ganna' tabajasam tanggunganta duaki' tama Banua Debata. Alai indo doi' anna laoko umbajasangki' tanggunganta.”

To la handam matande illaam kapahentaanna Puang Allataala

18:1-5

Mrk. 9:33-37; Luk. 9:46-48

18 Wattu eta siam too duka' anna mekutanai passikolanna naua: “O Tuangguhu, menna handam la matande illaam kapahentaanna Puang Allataala?”

² Iya untambaim mesa änä'-änä' Puang Yesus anna nasuai ke'de'-ke'de' dio olona passikolanna ³ anna nauai: “Setongam-tonganna kutulasangkoa' tentomai kuua: maka' tä'koa' ma'baju pole anna ma'dodo pole lambi' ma'penaba susi inde änä'-änä', iya la tä'koa' too mala mendadi

^{§§}17:21 puasa: Petua' dioi pemasiä'na Mat. 4:2.

umma'na Puang Allataala illaam kapahentaanna. ⁴Menna-menna umpomahempo penabanna la susi inde dio änä'-änä', tau iam too la handam matande illaam kapahentaam yabo suhuga. ⁵Anna menna-menna untahima änä'-änä' susi inde aka umpolalam kamatappasanna di Kao, tau ia too sihhapam siam Kao natahima.”

Diona kaha-kaha la mebaba bulim

18:6-9

Mrk. 9:42-47

⁶“Sapo' menna-menna umpabulim inde änä'-änä' to puha matappa' nasuhum la tä'um nakatappa'ia', tau ia too aha leko'um dipatoke'i batu peepe' bahokona anna ditibe dokko le'bo' mandalam.

⁷Tä' deem pada satilaka hupatau illaam inde lino aka deem to umpabulinni. Moi anna abana inna la dadi susi, sapo' tilaka lako hupatau to umpakende'i. ⁸Maka' hapanna limammu la umpomadosako battu haka bitti'mu, mapia leko'um tia ke umpoloi lao anna untibe. Aka aham tia sabali-bali limammu battu haka bitti'mu sapo' la ullambi'ko katuboam sule lako salakolakona, anna la tontä liu dua limammu battu bitti'mu sapo' ditibe hako tama api tapi'de-pi'de. ⁹Anna maka' matammu la umpomadosako, kalessu'i lao anna untibe. Aka aha leko'um tia sabali-bali matammu sapo' ullambi'ko katuboam sule lako salakolakona, anna la tontä liu dua matammu sapo' ditibe hako tama api nahaka.”

Pehapangam diona domba bulim

18:10-14

Luk. 15:4-7

¹⁰“Patananni manappaia' talinga inde tula'ku: tä'koa' too la mala umpabasisii moi podo la mesam inde änä'-änä'. Aka pahallua' la umpengkilalai manappa muua deem malaika' yabo suhuga dio olona Ambeku si unjagai liu inde mai änä'-änä'. ¹¹[Aka inde Änä' Mentolino sule inde lino la umpaitai lalam to bulim anna mala tä' ullambi' katilakaam.]

¹²Maakaa' iko susi pikkihammu, aka la napogau' ke deenni mesa tau muampuam sahatu' domba sapo' bulim mesa? Mannassa anna la napellei yabo tanete indo dombana kaseha pulo kaseha anna le'ba'i nahuttu' indo mesanna. ¹³Anna maka' nalambi'um indo to bulim, tä' mala tala natilalla'i puha ia indo mesa to puha pa'de sala anna la indo to kaseha pulo kaseha to tä' bulim. ¹⁴Susim too duka' Ambemu yabo suhuga, tä' napohäe kela deenni moi podo la mesam inde mai änä'na la bulim.”

Diona umpakilala solasubunta to matappa' ke umpogau'i dosa

18:15-20

¹⁵“Maka' deem solamu to matappa' kasalaam lako kalemu, iya laoko pellambi'i mesa-mesammu anna umpakilalai. Anna maka' natahima indo tula'mu, iya ikom too nasuhum mesa penabakoa' sule. ¹⁶Sapo' maka' tä'ko napehingngii, iya babai solamu mesa haka dua haka anna napasolaiko. Aka situhu' Battakada Debata, maka' duam tau battu haka tallu sisa'bi-sa'biam diona mesa kaha-kaha, iya tä'um too la dibata-batai.* ¹⁷Anna maka' moka pole boo umpehingngii indo solamu,

*18:16 Pass. 19:15.

palulakoia' jumaa' indo kaha-kahana. Anna maka' moka duka' umpehingngii jumaa', iya pasusinna' too tuam passima battu haka tau senga' to tä' muissam Puang Allataala.

¹⁸ Aka kutulasangkoa' tentomai kuua: iai too umpekadakeam illaam inde lino, ia siam too duka' napekadakeam Puang Allataala. Anna iai too umpemapiaam illaam inde lino, ia siam too duka' napemapiaam Puang Allataala.

¹⁹ Anna mesa polepi la kutulasangkoa' tentomai kuua: maka' deem dua to matappa' illaam inde lino mesa penaba ma'sambajam, tä' mala tala napasule lako pelauanna Ambeku yabo suhuga. ²⁰ Aka umba-umba naongi to unkatappa'ia' dua haka tallu haka ma'hempum, la etamä' too duka' tohho illaam alla'-alla'na."

Pehapangam diona mesa to dipake tä' siampuam pa'kamase

18:21-35

²¹ Puhai ia too, iya sulem Petrus umpellambi'i Puang Yesus anna nakutanai naua: "O Debata, la pissanakaä' muampunni solaku ke deenni umpogau' kasalaam lako kaleku? La ganna'ungka ke pempitui?"

²² Natimba' Puang Yesus naua: "Tä'pi ganna' kela anggai pempitu, sapo' la pempitu pulo hia sanda si pitu. ²³ Aka maka' umpalakom kapahentaanna Puang Allataala, iya la sihhapam mesa tomahaja la ussinga' pa'painsanna lako mesa to dipake illaam kahajaanna. ²⁴ Tappana napahandu' la nahekem

indo pa'painsanna, iya dipasolaammi sule mesa to dipake illaam kahajaanna aka kaindangam la'bi lima juta bidä.[†] ²⁵ Sapo' aka tä' la nabela nabaja' indo indanna pada buda, nasuhum naua indo tomahaja: 'Balusannä' kalena, pasibalu'i baina sola änä'na anna ingganna aka-akanna anna mala deem nabajasam indanna.'

²⁶ Lambi' muoppä dio olona indo tomahaja anna mengkahumase-masei naua: 'O tuam, sa'bahasam salapä' yolo säpäi' aka tontäm kubaja'na asam indo indangu.' ²⁷ Iya häntä siaham buana indo tomahaja uhhingngi pengkahumasena indo tau, nasuhum naangga' puha bäbäm indo indanna, lambi' nauaam: 'Le'ba'ungko, tä'um manggi' umbaja' indo indammu.'

²⁸ Tappana umpellei indo banuanna tomahaja, iya sitammum solana to dipake duka' illaam kahajaam. Sapo' ma'painsam ia indo to dilappasam inggena' lako indo solana sapulo bidä.[‡] Iya tappa nahopäi siaham anna natekkei napasindum naua: 'Baja' siaham temo indo indammu!'

²⁹ Iya muoppä siaham dio olona indo solana anna mengkahumase-masei naua: 'Sa'bahasam salapä' yolo säpäi' aka tontäm kubaja'na indo indangu.'

³⁰ Sapo' moka hi umpehingngii pengkahumase-masena indo solana, lambi' napopetahungkum di sampe nabaja' asam indo indanna. ³¹ Tappana naita ingganna sola senga'na indo pa'palakoanna, iya tä' deem pada sahäntä buana lako indo to ditä'gähhä',

[†]18:24 *la'bi lima juta bidä*: Indo dituli' illaam basa Yunani, naua ia ke basa Bambanni: *sapulo sa'bu talenta*. Mesa talenta la'bi sapulo lima taunna nasaho mesa tau. Tau ia too kaindangam doi' la mala disahoiyam sapulo sa'bu tau illaam sapulo lima taunna mengkähä. Dadi tä' naala pikkiham la nabela nabaja' tau ia too indo indanna pada budanna.

[‡]18:28 *sapulo bidä*: Indo dituli' illaam basa Yunani, naua ia ke basa Bambanni: *sahatu' dinar*. Mesa dinar sipadaam sahona tau sangngallo. Dadi, mannassa anna mambelläi alla'na indo indanna anna indo pa'painsanna (batai 18:24).

nasuhum le'ba' lako indo tomahaja anna natulasanni ingganna indo pa'pogau'na.

³²Iya napopetambai siaham tomahaja indo tau anna nauaanni: 'Tau kadake punalako iko! Puhangko kupa'deiam asam indammu aka mengkahumase-maseko dio oloku, iya palla' di iko penabammu umpateem solamu. ³³Man-nassa anna tä' iko muissam umbajuum penabammu! Kusanga hi kao la muissammi duka' untkamasei solamu aka puhangko duka' kukamasei.' ³⁴Tä' deem pada sakeaha' indo tomahaja, lambi' napopetahungkum sampe puha asam nabaja' indo indanna. ³⁵Dadi, la nap-ateemmokoa' too duka' Ambeku yabo suhuga, ke tä'koa' duka' muampunni padammu sola sakalebu penabammu."

Diona kasialaam anna kasisähäsam

19:1-12

Mrk. 10:1-12

19 Tappana puha ma'pa'guhu Puang Yesus, iya umpelleim lembäna Galilea anna le'ba' lakoi lembäna Yudea, sapo' muola dipe lambam libanna Salu Yordan. ²Iya ma'silullu'um tau buda muula'i, lambi' napabonosam indo to masakinna.

³Eta too deem sule sanaka-naka to illaam kakalebuanna Parisi maelo' la umpeängam tuntungam su'be' Puang Yesus lambi' nakutanai naua: "La situhu' daka peadasam ke untibei bainena mesa muane ia mammo anna ia napolalam?"

⁴Sapo' natimba' Puang Yesus naua: "Tä' daka' tiko deem umbata illaam Battakada Debata diona indo anna umpadadii lino Debata Metampa, inna

napasilolemmi muane anna baine?[†]

⁵Puhai napadadi, iya nauam: 'Iam too anna mesa muane la umpellei indona sola ambena anna sialai mesa baine, nasuhum duai la mendadi mesa illaam ingganna-ingganna sia.'[§] ⁶Dadi, tä'um la dua sapo' la mendadi mesam. Iam too kasuhunganna anna iai too puha napamesa Puang Allataala tä'um mala napasisähä' hupatau." ⁷Iya mekutana pole oom indo to illaam kakalebuanna Parisi naua: "Maka' susi, iya maaka hi anna napa'pahentaanni Musa diona la umpapia suha' kasisähäsam mesa muane anna nabeenni bainena kela natibei?"^{**}

⁸Natimba' Puang Yesus naua: "Ia hi tia anna napäbäikoa' Musa untibe bainemu aka kamakahhasam penabam-mua! Sapo' setonganna tä' tia susi indo pahandu'na. ⁹Pehingngii manap-paia' inde tula'ku temo kuua: menna-menna untibe bainena sulibanna ke ullullu'i muanena indo baine anna kebaine polei, tau ia too ullullu' pa'bannetauam."

¹⁰Iya nauam passikolanna: "Maka' susi kasilombunganna muane anna baine, iya aha pissammi tä' tau sipobaine."

¹¹Natimba' Puang Yesus naua: "Tä' ia asanna tau la mala untahima inde tula', sapo' anggam indo to nasahum Puang Al-lataala la mala untahimai. ¹²Anu' deem tau tä' la kebaine aka inna silolem illaam mai tambu'na indona. Anna deem tau tä' kebaine aka napasalaam tau senga.'^{††} Anna deem duka' tau gatti kalena bähä aka naua: 'Anna malaä umpasatutu pen-abangku lako kapahentaanna suhuga.'

[†]19:4 Kad. 1:27, 5:2.

[§]19:5 Kad. 2:24.

^{**}19:7 Pass. 24:1.

^{††}19:12 *napasalaam tau senga'*: kalembasanna, dibuto. Wattu eta too si biasa dibuto sabua' indana ungkaibundii puäna.

Menna-menna umbelai natahima inde tula'ku, la pahallu napaiilaam penaba manappa.”

**Puang Yesus
umpasambajangam änä'-änä'**

19:13-15

Mrk. 10:13-16; Luk. 18:15-17

¹³ Pissam wattu sule sanaka-naka tau umbaba änä'na lako Puang Yesus aka naua anna mala naanda'i anna napa'sambajangam. Sapo' nakeaha'i hi passikolanna Puang Yesus indo tau. ¹⁴ Iya nauam Puang Yesus: “Päbäi mammi napellambi'ia' itim matim änä'-änä'. Daa ullabai, aka tau susim too itim matim la mendadi umma'na Puang Allataala illaam kapahentaanna.”^{‡‡} ¹⁵ Anna mane naanda'i anna napa'sambajanganni, mane le'ba'i Puang Yesus.

**Mesa to makaka mapahhi'
la mendadi umma' illaam
kapahentaanna Puang Allataala**

19:16-30

Mrk. 10:17-31; Luk. 18:18-30

¹⁶ Pissam wattu sule mesa muane umpellambi'i Puang Yesus anna nakutanai naua: “O Tuangguhu, pa'pogausam mapia aka la kupogau' anna malaä' ullambi' katuboam sule lako salakolakona?”

¹⁷ Natimba' Puang Yesus naua: “Akanna ungkutanaiä' diona pa'pogausam mapia? Tä' deem moi podo la mesa tau mapia gau' sulibanna Puang Allataala. Maka' maelo'ko la untahima katuboam sule lako salako-lakona, tuhu'i manappako ingganna pahentana Puang Allataala.”

¹⁸ Iya mekutana pole oo indo tau naua: “Pahenta umba kabam muuaam?”

Natimba' Puang Yesus naua: “Daa umpapateam, daa ullullu' pa'bannetauam, daa umpaboko, daa ussa'bi tatappa' lako padammu hupatau, ¹⁹ pa'kasalleiko indomu sola ambemu, kamaseiko padammu hupatau umba susi ungkamasei kalemu.”^{¶¶}

²⁰ Iya natimba'um indo to mangnguha naua: “Kutuhu'i asammi pahenta ia too! Akapi senga'na la pahallu kupogau'?”

²¹ Iya nauam Puang Yesus: “Maka' maelo'ko la tepu kamanuhusammu, iya le'ba'ko balu' asam ingganna kullemu anna umbeenni to mase-mase allinna. Aka maka' umpateem, iya la muam-puammoko too kulle yabo suhuga. Puhai too, sulengko pole' untuhu'ä'.”

²² Tappana nahingngi indo to mangnguha tula' ia too, iya le'ba' siaham matussa penabanna aka buda kullena.

²³ Iya nauam Puang Yesus lako passikolanna: “Setongam-tonganna, tä' deem pada samapahhi' mesa to makaka la mendadi umma'na Puang Allataala illaam kapahentaanna. ²⁴ Anna mane deenni kuua: madomi' leko'um ia mesa unta muola tama tottä'na dahum, anna la mesa to makaka la mentama kapahentaanna Puang Allataala.”

²⁵ Tappana nahingngi passikolanna indo pa'tula'na Puang Yesus, iya sangngim mängä-mängä anna sipa'tula'-tula'i naua: “Maka' susi, iya la menna bäbä hi umbai' la mala dipasalama'?”

²⁶ Iya umpaleleim mata passikolanna anna nauai: “Nakapusa'i ia hupatau diona to la mala dipasalama', sapo' tä' Ia Puang Allataala.”

^{‡‡}19:14 Mat. 18:2-4.

^{¶¶}19:19 Täss. 20:13-16, Pass. 5:17-20.

²⁷Iya nauam Petrus: “Kitampeam asammi kami' aka-akangki aka kituhu'ko! Iya akam kami' la sahoki?”

²⁸Natimba' Puang Yesus naua: “Setongam-tonganna, illaam indo wattu la dipadadi pole ingganna-ingganna sia, Kao to disangai Änä' Mentolino la muokko'ä' yabo okkosam kahajaangu. Wattu etam too duka' ikoa' inde to sapulo dua pentuhu'ku la dipatadongkongkoa' yabo sapulo dua okkosam kahajaam, aka la umpahe'koa' indo pessubunna sapulo dua too'na to Israel. ²⁹Anna lako to untampeam banuanna, battu haka solasubunna, battu haka tomatuanna, battu haka änä'na, battu haka bela'na aka natuhu'ä', tau ia too la dibala'iam pessahatu' tiluppi' anna la dimana'pi katuboam sule lako salako-lakona. ³⁰Sapo' la deem too dadi ke dako'i buda to matande tentomai, la mendadi to madio, anna to madio tentomai la mendadi to matande.”

Pehapangam diona to mengkähä illaam bela' anggur

20:1-16

20 Sitahu'na tula'na Puang Yesus naua: “Kapahentaanna Puang Allataala dipasihhapam issinna inde tulasam: Deem mesa to ma'bela' mebengngi'-bengngi' le'ba' umpeä tau la nasahoi, aka la napopengkähä illaam bela' anggurna. ²Tappana silambi' to mosaho, iya sipa'tula'um lambi' kattu tula'na la nasahoi mesa doi' peha' sangngallo. Puhai, iya nasuam tama indo bela'na.

³Umbai' la tette' kasehai mebengngi', iya le'ba' pole oom indo puäna bela' umpeä pole to mosaho. Iya muitam tau ma'saleo bäbä dio pasa'. ⁴Iya nauaammi: 'Laokoa' duka' pengkähängannä' lako bela'ku angku sahoikoa' la sipäto'na.' ⁵Iya le'ba'im duka' napengkähängam.

Umbai' la tette' sapulo duai, iya le'ba' pole oom umpeä to mengkähä. Anna umbai' la tette' tallui kahubem, iya napateem oom. ⁶Kiha-kiha la tette' limai kahubem, iya le'ba' pole boom. Iya ullambi' oom tau ma'saleo bäbä. Iya nauaammi: 'Akanna etakoa' inde mesangngallo ma'saleo bäbä, tä' mengkähä?’

⁷Natimba'im indo tau naua: 'Aka tä' kami' deem kiongei mosaho.'

Iya nauam indo puäna bela': 'Lakokoa' bela'ku anna umpengkähängannä.'

⁸Tappana lendu' allo, iya untambaim mando'na anna nauaanni: 'Tambai asanni indo to mengkähä ammu beenni sahona. Popengkalao dioi indo to handam ibundi mentama sule lako indo to handam yolo.' ⁹Sulei indo to mentama kiha-kiha la tette' lima kahubem, iya nabeemmi sahona sandai si mesa doi' peha'. ¹⁰Puha asanni dibeem indo solana, iya suleim duka' indo to handam yolo mentama. Iya nauaim illaam penabanna: 'La buda puha too kami' kitahima aka kipesangngalloi kami' mengkähä.' Sapo' angga hi duka' sanda si mesa doi' peha' dibeem. ¹¹Tappana dibeenni sahona, iya sileleim ia keaha'-aha' lako indo puäna bela' naua: ¹²'Palla' dako iko umpasipadaam sahoki inde lako to anggam satette' mengkähä, moi kela daa mesangngallo bantahikam kami' nadä'dä' allo.'

¹³Sapo' naua indo puäna bela' lako indo mesa to mengkähä: 'O solaku! Setonganna tä' kao deem kasalaangu. Tä' daka tia kattunna' tula'ta la ahu'ungkoa' disahoi mesa doi' peha' sangngallo? ¹⁴Alaia' inde sahomu ammu le'ba'a' aka abana inna kuua la pada siam duka' kubeem inde lako to ibundi mentama. ¹⁵Aka la tä' daka tia mala kao muäto' kulleku situhu' pa'elo'ku? Kembuhukoa' isanga aka kukamasei indo to handam ibundi mentama?’”

¹⁶ Mane naalai Puang Yesus pungngu' tannunna inde pehapangam naua: "La susim too lako tau to madio tentomai, la ia pole' matande ke dako'i. Anna lako tau to matande tentomai, la tä'um matande ke dako'i."§§

**Kapentallunnam napa'paissangam
Puang Yesus diona la kamateanna**

20:17-19

Mrk. 10:32-34; Luk. 18:31-34

¹⁷ Tappana illaanni pangngola-lalangam Puang Yesus la längäm Yerusalem, iya untambaim indo sapulo dua passikolanna napasähä' anna napa'tula'i naua: ¹⁸ "Inde tentomai la längämmakia' Yerusalem. Yabokia' too, iya dibehomä' to disangai Änä' Mentolino lako ingganna kapala sando sola to ullatta' Pepaondonganna Musa anna la nakattu naua: 'Pahallu la dipopepatei.' ¹⁹ Anna la nabehoä' lako to tamuissam Puang Allataala aka la natelleä' anna nadahha lambi' napateiä' yabo kaju sitambem. Sapo' illaam allo katallunna la dipatibangonnä' sule."

**Yakobus anna Yohanes napelauam
indona la bassim mendadi to kuasa
ke ma'pahentam Puang Yesus**

20:20-28

Mrk. 10:35-45

²⁰ Puhai ia too, iya sulem baina Zebedeus sola indo dua änä'na* umpellambi'i Puang Yesus anna ma'balinguntu'i dio olona napasindum

naua: "O Tuangguhu, kela mala anna untahimai inde pelauangku!"

²¹ Natimba' Puang Yesus naua: "Aka umpelau?"

Iya nauam indo baine: "Kupelau kela mala anna umpadioi tandai kanammu mesa inde änä'ku anna umpadio tandai kaihimmu mesa, ke mendadi tomahajangko."

²² Sapo' natimba' Puang Yesus naua: "Setonganna tä' muissanna' itim pelauammu. La untuaka' duka' umpendudum indo kamapi'disam la kupendudum?"†

Iya natimba'um naua: "Kitua!"

²³ Natimba' pole oom Puang Yesus naua: "Tappa' tula'mu, abana la umpendudunna' duka' indo kamapi'disam la kupendudum. Sapo' anggam ia indo diona la muokko' dio tandai kanangku battu tandai kaihingku, taia Kao issangku. Aka ongeam ia too dipatokaam lako hupatau to puha napa'tantu Ambeku."

²⁴ Tappana naissanni indo to sapulopi passikolanna kaha-kaha ia too, iya tä' deem pada sakeaha' lako indo to dua to ma'solasubum. ²⁵ Nasuhum natambai asam Puang Yesus anna napa'tula'i naua: "Muissanna' muua illaam inde lino ingganna to ma'pahenta umpake palu-palu bassi umpahenta pakketauanna, anna ingganna to kasallena umpalao makahha' kakuasaanna lako to nalumbäi. ²⁶ Sapo' ikoa' iko, tä'koa' la mala ma'pateem. Aka iai too maelo' la diangga' illaam alla'-alla'mua', iam too la umpopengkadio kalena dio olona solana sihhapam mesa sabua'. ²⁷ Anna menna-menna maelo' la mendadi to kasalle, tau

§§**20:16** Indo tungka issinna inde balajam illaam basa Yunani, naua ia illaam basa Bambam: *To ibundi la mendadi to mendiolo anna to mendiolo la mendadi to ibundi*. Kalembasanna: to mendiolo matappa' anna to ibundi matappa' la pada-pada bäbä dio olona Puang Allataala ke illaammi allo ma'katampasanna, sangngim to salama'.

***20:20** *indo dua änä'na*: indo Yakobus anna Yohanes diuaam. Batai Mat. 4:21.

†**20:22** *umpendudum indo kamapi'disam la kupendudum*: Indo dituli' illaam basa Yunani, naua ia ke basa Bambanni: *muihu'i indo ihusam pandahhaam la pahallu kuihu'*.

ia too la pahallu umpomahempo penabanna anna la ahui dipakasua-sua.²⁸ Aka susimä' Kao to disangai Änä' Mentolino tä' suleä' la dipamoloi, sapo' suleä' la umpamoloi hupatau anna la ahui'pä' dipakattu sungnga', aka la ussolonnä' tau buda dio mai dosana anna malai lappa'."

**Puang Yesus umpabono' dua to buta
20:29-34**

Mrk. 10:46-52; Luk. 18:35-43

²⁹Tappana le'ba' Puang Yesus sola passikolanna umpellei kota Yerikho, iya ma'silullu' oom tau buda untuhu'i.
³⁰Wattu eta too deem dua to buta muokko' dio bihim lalam. Tappana nahingngi diua liu Puang Yesus, iya katamba-tambam naua: "O Tuam, peampoanna tomahaja Daud, kamaseikam kami!"

³¹Sapo' nakuapai hi tau buda naua: "Pengkamma'koa!"

Sapo' tuttuam napekasallei mandi metamba naua: "O Tuam, peampoanna tomahaja Daud, kamaseikam kami!"

³²Iya tohhom Puang Yesus anna natambai mane nauaanni: "Aka umpohäe la kupogausangkoa?"

³³Natimba' naua: "O Tuam, maelo' punalakam duka' la paita."

³⁴Iya häntä siahm buana Puang Yesus muitai, lambi' nahakasam matanna. Iya bassim paita siahm sampe le'ba' duka' untuhu' Puang Yesus.

**Puang Yesus dipa'kasallei anna
dipakahoa' kasuleanna tappana
la umpenandai Yerusalem**

21:1-11

*Mrk. 11:1-10; Luk.
19:28-38; Yoh. 12:12-15*

21 Tappana la umpenandai Yerusalem Puang Yesus sola passikolanna, iya lempä salapi dio Betfage, mesa tondä' dio Tanete Zaitun, mane ussuai dua passikolanna ²naua: "Le'ba'koa' lako dio tondä' tapenandaia'. Aka sulekoa' too lako, iya ullambi'unna' mesa keledai bihä disäke' sola änä'na. Bukkaia' anna umbabaam duaä' sule.
³Anna maka' too deengkoa' ungkutanai naua: 'Akanna mualai?' iya la muuaanna: 'Aka napahalluam Debata, anna la bale' dipasule siam sule.'"

⁴Ia asanna ia too dadi anna mala sule lako indo kadanna Debata napalombum nabi naua:

⁵"Palandasannia' inde tula' lako issinna kota Sion[‡] muua:

'Petua'ia' tomahajammu sule napellambi'iko,

tä' deem pada samahempo penaba anna ussäkei mesa keledai.

Ussäkei mesa keledai lundaha.'"[¶]

⁶Iya le'ba'um duka' indo dua passikolanna anna napalako asanni pada indo napakahi'diam. ⁷Naalam indo keledai sola änä'na anna le'ba'i nababaam. Sulei lako, muäläiim jubana anna nalapi'ianni, mane nasäkei Puang Yesus. ⁸Wattu eta too buda tau muäläi jubana anna naampa'i lako lalam la naolanna Puang Yesus tanda pa'pakasallena. Anna buda toi duka' tau senga' ussäppe'i palapa andulam anna

[‡]21:5 *issinna kota Sion*: Indo dituli' illaam basa Yunani, naua ia ke basa Bambanni: *änä' daha illaam Sion*. Sion mesa sanganna Yerusalem. Ingganna issinna Yerusalem si bassa' disangai änä' daha illaam Sion.

[¶]21:5 Za. 9:9.

naampa'i duka' lako lalam. ⁹Ingganna tau to ullahui, susi yolona teem ibundinna sikaahhe naua:

“Tapujia' peampoanna tomahaja Daud! Katambasam to sule illaam sanganna Debata!

Tapa'kasalleia' Puang Allataala To Handam Matande!”[§]

¹⁰Tappana mentamai kota Yerusalem Puang Yesus, iya gege' siaham issinna indo kota anna nauai: “Menna hia umbai' isanga?”

¹¹Iya natimba'im indo tau buda to ul-lahu lelem Puang Yesus naua: “Iam too inde diuaam Puang Yesus, mesa nabi buttu dio mai Nazaret mesa tondä' il-laam lembäna Galilea.”

Puang Yesus ussua lao to sibalul-balul illaam pa'hanteanna Banua Debata

21:12-17

Mrk. 11:15-19; Luk. 19:45-48; Yoh. 2:13-16

¹²Puhai ia too, le'ba'um Puang Yesus tama pa'hanteanna Banua Debata. Sulei tama, iya ullambi'um to si balul-balul illaam. Tappa nasua siaham lao Puang Yesus anna napembalisannii mejana indo to si ussuka'i doi'na to buttu dio mai botto senga' anna usseham okkosanna to si umbalu' dangam-dangam. ¹³Anna mane umpatula'i indo tau buda naua: “Deem tisuha' illaam Battakada Debata naua:

‘Banuangku la naongei hupatau ma'sambajam,’

sapo' umpadadi hia' iko pa'mesaanna pa'bulele kalasi anna pa'tombonganna to maboko allo.”**

¹⁴Iya suleim to buta sola to mate sapolona umpellambi'i Puang Yesus il-

laam indo Banua Debata lambi' napabono' asam. ¹⁵Iya sangngim keaha'um indo kapala sando sola to ullatta' Pepaondonganna Musa tappana naita indo tanda memängä-mängä napadadi Puang Yesus. Anna keaha' toi muita indo änä'-änä' sikaahhe illaam Banua Debata naua: “Tapujia' anna tapa'kasallei peampoanna tomahaja Daud!”

¹⁶Nasuhum ma'kada lako Puang Yesus naua: “Tä' isanga uhhingngi tula'na inde lako änä'-änä'?”

Natimba' Puang Yesus naua: “Kuhingngi. Sapo' tä' daka' tiko deem umbata illaam Battakada Debata naua: ‘O Debata, Iko umpatudu änä'-änä' sola änä'-änä' malea anna malai naissam untula' pampujiam matim olomu!’”††

¹⁷Puhai ia too, iya le'ba'um Puang Yesus umpellei indo tau buda anna lu lakoi mesa tondä' isanga Betania, anna etai ma'bengi.

Puang Yesus umpanata'i satoo' ara

21:18-22

Mrk. 11:12-14, 20-26

¹⁸Mebengngi'i, iya le'ba'um Puang Yesus sola passikolanna ma'pasule lako Yerusalem. Wattu eta too tadea' Puang Yesus. ¹⁹Iya muitam satoo' ara dio ampe' lalam. Iya le'ba'um lako too'na, sapo' tä' deem buana, anggam paka daum bäbä nalambi'. Nasuhum napanata'i Puang Yesus naua: “Tä'ungko iko deem la kembua sampe matemu!” Iya malasso siaham lambi' mate.

²⁰Tappana naita passikolanna kadadiam ia too, iya tä' deem pada sanakapilla'i nasuhum ma'kada naua:

§21:9 Puj. 118:26.

**21:13 Yes. 56:7.

††21:16 Puj. 8:3.

“Maaka hia umbai' anna malai tappa mahekk'o' bābā inde dio kaju ara?”

²¹Iya nauam Puang Yesus: “Setongam-tonganna, assala'na deenna' kamatapassammu anna tā' tookoa' la bata-bata, malaa' duka' umpogau' inde kupogau' tentomai. Anna tā' angga mandi ia too la malaa' umpogau', sapo' la malapokoa' duka' ussua inde dio buntu mentieli' tama le'bo', anna tā' mala tala dadi. ²²Aka iai too umpelaua' lāngām Puang Allataala sola ponno kapahhannuam, tā' mala tala naponnoiangoa' indo pelauammu.”

**Pekutanaanna to umpeängam
tuntungam su'be' Puang Yesus diona
kabuttuanna kakuasaanna**

21:23-27

Mrk. 11:27-33; Luk. 20:1-8

²³Puhai ia too, iya tahhu'um Puang Yesus sola passikolanna tama Banua Debata. Tappana ma'pa'guhu illaam, iya sulem sanaka-naka kapala sando sola matua ulunna to Yahudi umpelambi'i anna nakutanai naua: “Aka isanga umpolalam anna umpogau'i inde mai ingganna pa'pogausam, anna menna umbeengko kakuasaam?”

²⁴Sapo' natimba'i Puang Yesus naua: “La kukutanaikoa' duka'! Maka' too muissanna' untimba'i, iya etapi too anna mane kutulasangkoa' duka' menna umbeennä' inde kakuasaam. ²⁵Menna umbeenni kakuasaam Yohanes anna si mantedo'i? Puang Allataala haka hupatau haka?”

Iya sipa'tula'-tula'um naua: “Mapahhi' la ditimba'i, aka taua hia' manii: ‘Kakuasaanna Puang Allataala,’ iya la nauaammakia' too: ‘Akanna tā'ia' unkatappa'i?’ ²⁶Iya la taua hia' manii: ‘Kakuasaanna hupatau,’ iya tā' ohi aka mahea' tau lako tau buda. Aka inde

Yohanes nakatappa'i asam tau naua: ‘Abana mesa nabi.’”

²⁷Lambi' angga ham pentimba'na lako Puang Yesus naua: “Tā' kiissam la kitimba'i indo pekutanaammu.”

Nasuhum naua Puang Yesus: “Maka' susi, iya tā' duka' kuaku la kutulasangkoa' menna umbeennä' kakuasaam nasuhum kupogau' kaha-kaha ia too.”

**To kasallena to Yahudi
napasihpam Puang Yesus mesa
änä' tā' untuhu'i ambena**

21:28-32

²⁸Iya umpalao oom mesa pehapangam Puang Yesus naua: “Maakaa' iko susi pikkihammu diona inde kaha-kaha: Deem mesa tau dua änä'na bassim änä' muanem. Indo tau le'ba' umpellambi'i indo änä' uluana anna nauaanni: ‘O änä'ku, laoko temo pengkähängki' lako bela' anggurta.’

²⁹Sapo' natimba' naua: ‘Mokaä.’ Puhai naua: ‘Mokaä,’ iya ussossom kalena anna mane le'ba' lako indo bela'na ambena anna mengkähäi. ³⁰Puhai umpa'tula'i indo änä' uluana, iya lu lako opi indo änä' tämpä'na anna nauaanni duka' umba susi indo tula'na lako änä' uluana. Natimba' indo änä' tämpä'na naua: ‘Io, lao hamä' ambe.’ Sapo' dio bābā pudu'na naua: ‘Io,’ aka tā' di le'ba'. ³¹Dadi situhu' pikkihammua', mennanna kabam umpalako pa'elo'na ambena inde dua änä'?”

Mentimba'im naua: “Indo änä' ulua.”

Iya nauam Puang Yesus: “Tappa' pentimba'mua'. Sapo' setongam-tonganna, mendiolo leko'um ia tuam passima sola baine passunda' mendadi umma'na Puang Allataala illaam kapahentaanna anna la ikoa'. ³²Aka sule Yohanes to si mantedo' umpaitaikoa' lalam kamaloloam, iya moka hako' unkatappa'i. Sapo' nakatappa'i leko' ia tuam

passima sola baine passunda'. Moinna anna muitanna' matappa' indo to si di-angga' kadake gau', sapo' moka siangkoa' iko muondo' gau'mu anna tä' untkat-appa'i indo tula'na."

To kasallena to Yahudi dipasihhapam to untesam bela' anggur

21:33-46

Mrk. 12:1-12; Luk. 20:9-19

³³ Mane umpalao oi mesa pehapangam Puang Yesus naua: "Deem mesa tau muampuam sangngenam litä' lo'bä. Pissam wattu natanannim anggur anna nabalai lao pali'. Puhai, umbo'bä'um pallullusam anggur mane umpake'de'i lempo batu la naongei to mangngampana. Puha asanni, iya napa'petesangammi anna mane le'ba' lako botto mambela. ³⁴ Tappana naagiam la matäsä' indo bua anggurna, iya ussuam sanaka-naka sabua'na le'ba' umpellambi'i indo to mantesanna, aka la natahimaam bahena. ³⁵ Sapo' tappana sulei lako, iya ke nasakka hia indo to mantesam. Deem natembe' puso, deem naleba'i batu, anna deem napatei. ³⁶ Iya ussua pole oom sabua'na indo puäna bela', buda puha ia anna la indo yolona. Sapo' napateem pole oo duka'. ³⁷ Katampasanna, ussua änä' ikalena aka naua inabanna: "Tä'um tia pole' la

napatei inde änä'ku aka la nakalaja' di tia.'

³⁸ Sapo' naitanna indo to mantesam, iya sipattuju-tuju oom naua: 'Iam too inde to la ullombum kullena tomatuanna. Tapateia' anna mala taalaa' inde bela'na.' ³⁹ Lambi' nasakka anna napa'tibeanni lako bihim bela' mane naula'i napatei.

⁴⁰ Dadi, maka' sule indo puäna bela', iya aka umbai' la napogau' lako indo to mantesanna?"

⁴¹ Iya natimba'im indo kapala sando sola matua ulunna to Yahudi naua: "Mannassam tia anna la umpatei indo to kadake gau', mane napa'petesangam polei indo bela'na lako tau senga' to la si umbeenni tabana ke lambi' oom wat-tunna."**

⁴² Iya nauam Puang Yesus: "Tä' daka' tiko deem umbata illaam Battakada Debata naua:

'Indo batu natibe tukam, ia leko' di diala dipobatu longkahhim."^{¶¶} Kaha-kaha ia too mala dadi aka pa'pogau'na Debata, anna takamängä-mängäia' kita pa'pogausam ia too!'^{§§}

⁴³ Iam too anna kutulasammokoa' kuua: Indo panggalatabamua' illaam kapahentaanna Puang Allataala la naäläi sule anna la napalulakoanni tau senga' to untuhu'i pahentana lambi'

****21:41** Illaam inde pehapangam Puang Allataala dipasihhapam puäna bela' anggur. Kapahentaanna Puang Allataala dipasihhapam indo bela' anggur. To kasalle illaam peadasanna to Yahudi dipasihhapam to mantesam. Ingganna nabinna Puang Allataala dipasihhapam sabua'na indo puäna bela'. Anna Puang Yesus la dipasihhapam änä'na puäna bela'. Kalembasanna inde pehapangam: Indo yolona Puang Allataala ussua ingganna nabi lao umpellambi'i to Yahudi. Sapo' deem napatei anna deem nadahha. Katampasanna ussua Änä' ikalena lao umpellambi'i to Yahudi. Sapo' la napopepatei duka' to kasallena to Yahudi. Iam too anna la dipassalam indo to kasallena to Yahudi, anna tau taianna to Yahudi la mendadi ia pole' umma'na Puang Allataala illaam kapahentaanna.

^{¶¶}**21:42** *batu natibe tukam*: Puang Yesus diuam aka Ia handam napa'bahinni'i to Yahudi, ma'katampasanna Ia leko' di handam keangga' illaam kapahentaanna Puang Allataala.

^{§§}**21:42** Puj. 118:22-23.

ungkembuaam bua la sihatanna.
⁴⁴[Anna menna-menna metobä dokko
 indo batu la huppu'-huppu' bukunna,
 anna menna-menna natappai indo batu
 la dahi kapu'.**]

⁴⁵Tappana nahingngi kapala sando
 sola to illaam kakalebuanna Parisi indo
 pehapangam napalao Puang Yesus, iya
 silele pole' naua: "Kita hia' kita päläe'
 napasihim indo pehapanganna!" ⁴⁶Lambi'
 umpeäim pole' lalam la ussakka Puang
 Yesus, sapo' mahea' ohi lako tau buda
 aka inde Puang Yesus nasangai tau buda
 mesa nabi.

**To moka untuhu'i Puang
 Yesus dipasihpam to moka
 ullomba pa'pakabengam**

22:1-14

Luk. 14:15-24

22 Mane napatahhu' oi tula'na
 Puang Yesus lako to kasallena
 to Yahudi sapo' nababa illaam liupi
 pehapangam naua: ²"Kaphentaanna
 Puang Allataala dipasihpam issinna
 inde tula': Pissam wattu deem mesa
 tomahaja umpatoka asam bannena
 saha kakabenganna änä'na. ³Toka
 asanni, iya ussuam sanaka-naka
 sabua'na lao untambai indo ingganna to
 puha diuam la ungdadioi heem indo
 pa'hame-hameanna änä'na. Sapo' mokai
 hi sule ullombai.

⁴Iya ussua pole oom sabua' senga'na
 napasindum napakahi'di naua: "Tulasam
 manappai indo ingganna to ditam-
 bai muua: toka asammi ade' indo la
 dipa'tahiaam! Puha asammi natunu ing-
 ganna indo sapim malompona anna
 ingganna senga'-senga'na toka asammi.
 Maingkoa' ade' talako pa'pakabem!"

⁵Sapo' ma'lembe-lembei mandi indo
 to puha diuam. Piha lu lako bela'na
 anna piha lu lako pengkähängam
 senga'na. ⁶Anna deem piha ussakka
 indo sabua'na tomahaja lambi' nadahha
 anna deem napatei. ⁷Tappana naissam
 tomahaja indo kadadium ia too, iya
 tä' deem pada sakeaha' lambi' ussua
 sohodadunna anna le'ba'i umpatei indo
 to papateam anna mane nasobe kotana.

⁸Puhai ia too, iya untambai oom
 sabua' senga'na anna nauaanni: "Toka
 asammi ingganna indo la dipakena il-
 laam inde pa'pakabengam, sapo' indo to
 ditambah tä' ia sihatam la sule ullombai.
⁹Dadi, la lu lakokoa' lalam mahoa' anna
 iai too liu ianna' untambai sule ullombai
 inde pa'pakabengam." ¹⁰Iya mengkalao
 siahham ingganna indo sabua'na anna un-
 tambai asanni tau pada naitanna lako
 lalam. Susi to mapia gau' teem to kadake
 gau', sampe ponno tosabe indo ongeam
 diongei ma'hame-hame.

¹¹Sule asanni tau, iya le'ba'um tama
 indo tomahaja untammui tosabena.
 Sapo' sulei tama, iya muitam mesa tau
 tä' ia ma'poheba kakabengam. ¹²Iya
 nauam indo tomahaja lako indo tau:
 'O solasubum, akanna suleko duka' ke
 tä'ko ma'poheba kakabengam?' Sapo'
 kanonnä mandi indo tau.

¹³Iya muuaammi sabua'na indo tom-
 ahaja: 'Pungoia' inde dio tau anna
 untibeia' tama indo ongeam handam
 malillim anna illaanni sumahho lumoa'
 sikekko' isinna tamate tatubo."

¹⁴Anna mane naala Puang Yesus
 pungngu' tannunna indo pehapangam
 naua: "Buda tau natambai Puang Al-
 lataala, sapo' saidi' napilei la mendadi
 umma'na."

***21:44** Puang Yesus dipasihpam indo batu. Kalembasanna, menna-menna untumpu pala' Puang Yesus la dipasihpam to dihuppu'-huppu' bukunna lambi' tä'um ia deem la ullambi' katuboam.

**To illaam kakalebuanna Parisi
umpalilingam tangnga' Puang
Yesus umpake pekutanaam
diona pamajasam sima**

22:15-22

Mrk. 12:13-17; Luk. 20:20-26

¹⁵ Puhai ia too, iya le'ba'im indo to illaam kakalebuanna Parisi sipattuju-tuju la naaka susi ungkutanai Puang Yesus aka napeä lalanna anna malai napetidom. ¹⁶ Kattui tula'na, iya ussuam sanaka-naka pentuhu'na sola sanaka-naka to muundu'i tomahaja Herodes umbaba mesa pekutanaam lako Puang Yesus. Sulei lako, iya untede-tem yolo Puang Yesus naua: "O Tuangguhu, kiisam kiua mesako to umpake tappa' anna sindoho anna anggako umpepatudum ulalanna Puang Allataala sola undu' lollä. Moi Iko menna tala ungalaja'i aka umpapada-pada bäbäko hupatau. ¹⁷ Iam too anna kipelaum kiua kela mala anna untulasangkam issi penabammu. Situhu' peadasam tapendudunna', la sipäto' dakika' umbaja' sima lako tomahaja dio Roma, la tä' daka?"

¹⁸ Sapo' nalosa Puang Yesus pattuju kadakena lambi' ma'kada naua: "Oa' to ma'pudu' pandem anna ma'lila manähä, akanna umpalilingannä' tangnga'? ¹⁹ Paitaipä' mesa indo doi' si dipake umbaja' sima." Iya mualam mesa doi' peha' anna nabeenni. ²⁰ Iya mekutanam Puang Yesus naua: "Menna kegamba' anna menna kesanga inde dio doi'?"

²¹ Iya natimba'im naua: "Gamba'na anna sanganna tomahaja dio Roma."

Iya nauam Puang Yesus: "Maka' susi, iya beennia' tabana tomahaja dio Roma la sipäto'na umbeem, anna beennia' duka' Puang Allataala la sipäto'na um-

beem."† ²² Nahingginna indo to illaam kakalebuanna Parisi pentimba'na, tappa pilla' asam anna mängä-mängä, lambi' le'ba'i bäbä umpellei Puang Yesus.

**To illaam kakalebuanna Saduki
umpekutanaam diona
katuboanna sule to mate aka
umpä'sändä'i Puang Yesus**

22:23-33

Mrk. 12:18-27; Luk. 20:27-40

²³ Allo eta siam too duka' anna sulei sanaka-naka to illaam kakalebuanna Saduki battu diua to tä' unkatappa'i katuboanna sule to mate umpel lambi'i Puang Yesus, anna nakutanai naua: ²⁴ "O Tuangguhu puham napaondom Musa naua: 'Maka' deem mesa muane mate anna tä'i deem änä'na, iya indo bainena pahallu la napobaine solasubunna indo to mate, anna mala deem pessubunna.' ²⁵ Iya la maakam ia susi indee, aka pissam wattu deem pitu muane ma'solasubum. Uhuna kebaine indo handam ulua. Sapo' tä'pi deem änä' nasibalii indo bainena anna matem indo muane, nasuhum napembala' huntunna umpobaine indo baine. ²⁶ Iya tä'pi keänä' anna mate pole boom duka' indo to umpembala' kakanna. Iya napobaine pole boom indo huntunna sapo' susi asam sule lako kapitunna. ²⁷ Katampasanna mate duka' indo baine. ²⁸ Dadi, maka' lambi'um wattunna la tubo sule to mate, iya mennannam kabam la napomuane indo baine, aka bali asam di napomuane pada indo to ma'solasubum."

²⁹ Natimba' Puang Yesus naua: "Abana si'da hi tia la muuaa' aka bulingkoa'. Aka tä'koa' muissam manappa kalem-basanna Battakada Debata anna tuli

†**22:21** *beennia' duka' Puang Allataala la sipäto'na umbeem:* Indo la sipäto'na dibeem Puang Allataala handam too-too'na kaleta sakalebu la dibehe lako.

tamuissangkoa' ia kakuasaanna Puang Allataala. ³⁰Aka susi hia' tia inde ä: maka' too lambi'um wattunna la tibangom sule to mate, iya tä'um tia deem to la siala anna tä' toi deem to la ma'pasiala. Sapo' umba susi katuboanna malaika' yabo suhuga tä' kemuane tä' kebaine, la susim too duka' hupatau. ³¹Tä' paka' tiko deem umbata indo puha natula' loppo' Puang Allataala diona katibangonganna sule to mate, indo naua: ³²'Kaom too inde Puang Allataala to napenombai Abraham, Ishak, anna Yakub'? Dadi moinna anna puham mate indo to tallu, sapo' mannassa anna tuboi temo aka anggam to tubo mala umpenombai Puang Allataala.'*³³ Tappana nahingngi tau buda indo tula'na, iya tä' deem pada sanakapilla'i indo pepa'guhuanna.

Pungngu' tannunna pahenta

22:34-40

Mrk. 12:28-34; Luk. 10:25-28

³⁴Tappana naissam to illaam kakalebuanna Parisi naua umpopa'luttu' to illaam kakalebuanna Saduki Puang Yesus, iya ma'hempummi umpeä pole lalam. ³⁵Iya mekutanam mesa to ullatta' Pepaondonganna Musa lako Puang Yesus aka maelo' la napetidom naua: ³⁶"O Tuangguhu, umbanna handam pahallu la dipa'kasallei pada indo Pepaondonganna Musa?"

³⁷Natimba' Puang Yesus naua: "Kamaseikoa' Debata, Puang Allataala to umpenombai sola sakalebu penabammu anna mentu' pikkihammu."³⁸ Iam too inde handam too'na pahenta. ³⁹Anna pa-

henta kaduanna susi siam indo uhuna naua: 'Kamaseikoa' padammu hupatau umba susi ungamasei kalemu.'³⁸ ⁴⁰Iam too inde dua pahenta, pungngu' tannunna issinna Pepaondonganna Musa anna suha'na ingganna nabi."

Diona kasilombunganna Puang Yesus anna tomahaja Daud

22:41-46

Mrk. 12:35-37; Luk. 20:41-44

⁴¹Mahassanni siapi ma'hempum to illaam kakalebuanna Parisi anna nakutanaim Puang Yesus naua: ⁴²"Maakaa' iko susi pikkihammu diona indo To nalanti' Puang Allataala la mepasalama'? Menna kepeessubum?"

Iya natimba'im to illaam kakalebuanna Parisi naua: "Peampoanna tomahaja Daud."

⁴³Iya nauam Puang Yesus: "Maka' susi, iya maaka hi anna nasangai tomahaja Daud 'Debatangku,' indo To dilanti' la mepasalama' wattunna anna nasahunni Penaba Maseho Daud? Aka naua Daud eta too:

⁴⁴'Ma'kada Puang Allataala lako Debatangku naua:***

Okko'ko dio tandai kanangku sule lako wattunna la kupopa'bukku ingganna balimmu

dio olomu lambi' uhhondoi dokko.'††

⁴⁵Dadi makaleso anna ma'kalei tomahaja Daud muuai: 'Debatangku To nalanti' Puang Allataala.' Iya maaka hi susi anna la ia ohi umpoampoi?"⁴⁶ Sapo' sangngim ma'luttu' mandi indo to illaam kakalebuanna Parisi. Allo etam too anna napahandu'i tä'um deem tau moi podo

‡22:32 Täss. 3:6.

*22:37 Pass. 6:5.

§22:39 Sand. 19:18.

**22:44 *Debatangku*: To dilanti' la mepasalama' diuaam, battu diua Mesias.

††22:44 Puj. 110:1.

la mesam bahani mekutana pole lako Puang Yesus.

**Puang Yesus umpesalaam
pa'palakoanna to ullatta'
Pepaondonganna Musa anna to Parisi**

23:1-12

Mrk. 12:38-39; Luk. 11:43, 46; 20:45-46

23 Puhai ia too, iya ma'kadam Puang Yesus lako tau buda anna lako passikolanna naua: ²“Indo to ullatta' Pepaondonganna Musa anna to illaam kakalebuanna Parisi dibeem kakuusaam la umpepa'guhuam Pepaondonganna Musa. ³Dadi pahallukoa' la untuhu'i ingganna indo pepa'guhuanna. Sapo' ia hia, daa untuhu'i pa'palakoanna aka tä' sihondoi indo pepa'guhuanna anna pa'palakoanna. ⁴Aka si umpapia pahenta mabanda' illaam peadasam anna umpadudunnii hupatau. Sapo' tä' punala deem la naaku umpamoloi hupatau, moi la sai'di'um, anna mala nabela napalako indo pahenta. ⁵Napogau' indo ingganna pa'palakoanna aka naua: ‘Anna malaä' naita tau.’ Si naägä'i lelem umpakasalle pa'ponggeam Battakada Debata indo si nasäke' yabo kidena[‡] anna napakalando puha ia hombe-hombe tähämpä' jubana anna la indo biasanna.[¶] ⁶Anna si umpise'i ongeam dipa'kasalleinna ke illaanni pa'hame-hameam, anna moka toi muokko' illaam pa'sambajangam ke tä'i dio olo. ⁷Anggam anna si napohäei ke napa'kasallei hupatau illaam pasa', anna manggi' toi si diuaam ‘Tuangguhu.’

⁸Sapo' ikoa'-iko, daa umpäbäi solamu la nauaangko: ‘Tuangguhu,’

aka anggam mesa Tuangguhummu, anu' pada-padakoa' sangngim to ma'solasubum. ⁹Anna tä' tookoa' la muuaam solamu ‘Ambe,’ aka anggam mesa Ambemu yabo suhuga. ¹⁰Anna daa umpäbäi solamu la nauaangko: ‘to mampahe’, aka anggam mesa To mampahe'mua', iam too indo To dilanti' la mepasalama'. ¹¹Iai too maelo' la handam diangga' illaam alla'-alla'mua', iam too la umpopengkadio kalena dio olona solana sihhapam mesa sabua'. ¹²Menna-menna ussanga-sanga kalena la dipomahempo, sapo' menna-menna umpopengkadio kalena la dipomatande.”

**Puang Yesus umbeem tula'
makahha' to kasallena to Yahudi**

23:13-36

Mrk. 12:40; Luk. 11:39-42, 44, 52; 20:47

¹³“La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka untutusangkoa' dalam hupatau la tinanda tama kapahentaanna Puang Allataala. Mokakoa' iko tama anna ullabai tookoa' duka' hupatau to la maelo' mentama.

¹⁴ [La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka si umpamasingangkoa' tula' to balu-balu baine, lambi' sule lako banuanna si mualaa'. Si muägä'ia' umpakalando sambajammu aka muuaa' anna malaä' nauaam tau: ‘Tau mapia,’ anna ke

[‡]23:5 pa'ponggeam Battakada Debata indo si nasäke' yabo kidena: Disangai illaam basa Yunani *Filakteri*. Indo *Filakteri* mesa pa'ponggeam bahinni', lollo' dipapiai. Illaam indo pa'ponggeam ia too dipatama suha' sanaka-naka balajanna Battakada Debata susinna: Täss. 13:1-10; 13:11-16; Pass. 6:4-9; 11:13-21.

[¶]23:5 hombe-hombe tähämpä' jubana: Pah. 15:37-41.

tau kadake hako'a' iko. Nasuhum la nalambi'koa' pesämbä' mabanda'na Debata.] ¹⁵La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka ussambaikoa' lino umpeä hupatau la umpalutama peadasammua', moi la anggam mesa utuhu'koa', la ahu' tookoa'. Sapo' tappana sola peadasangkoa', iya umpadadinna' bannena nahaka aka penduam tiluppi'um ia pole' kakadakeanna ke dipasiitakoa'.

¹⁶La ullambi'koa' iko katilakaam inggannakoa' to pebaba sihhamam to buta. Aka muuaam dakoa' hupatau: 'Tä'koa' nasäke' tula'mu ke umpa'pindaikoa' Banua Debata, anggam nasäke'koa' ke umpa'pindai indo pangkakka' bulabam illaanna.'

¹⁷Oa' to maho anna to buta pikkiham! Ussanga hia' iko keangga' puha ia indo pangkakka' bulabam anna la indo Banua Debata, moi kela daa indo hi tia Banua Debata umpomasehoi indo pangkakka' bulabam illaam!

¹⁸Anna si muuapia' liu: 'Tä'koa' nasäke' tula'mu ke umpa'pindaikoa' ongeam pehumalasam, anggam nasäke'koa' ke umpa'pindai indo bua pemala' yabo ongeam pehumalasam.' ¹⁹Oa' to buta pikkiham! Ussanga hia' iko keangga' puha ia indo bua pemala' anna la indo ongeam pehumalasam, moi kela daa indo hi tia ongeam pehumalasam umpomasehoi indo bua pemala' yabona!

²⁰Dadi menna-menna umpa'pindai ongeam pehumalasam, tau ia too umpa'pindai duka' indo bua pemala' yabona indo ongeam pehumalasam.

²¹Anna menna-menna umpa'pindai

Banua Debata, tau ia too umpa'pindai duka' Puang Allataala to tohho illaanna. ²²Anna menna-menna umpa'pindai suhuga, tau ia too umpa'pindai duka' okkosam kahajaanna Puang Allataala anna umpa'pindai polepi duka' Puang Allataala to untadongkonii okkosam ia too.

²³La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka ikoa'-iko umpa'kasallei leko'a' ia kaha-kaha bahinni' susinna umpatamaa' peadasammu bahe sapulona hampa-hampa indo si tubo bäbä isanga selasih, adas matannim, anna jintan. Sapo' indo handam pahallunna la dipalako si'da-si'da illaam Pepaondonganna Musa, ia leko'unna' tä' umpalako, susinna undu' lollä anna pa'kamase lako padammu, anna kamanontongam längäm Puang Allataala. Moi kela daa iam too inde handam pahallua' la umpalako. Sapo' tä' sianna' duka' la umpa'kalembei indo senga'na. ²⁴Oa' to pebaba buta! Umbanna' iko naola pikkihammu anna muäläi leko'a' ia indo kasisi' illaam ihusammu, anna muamma' kalebua' ia indo unta pada tonggo illaam!^{§§}

²⁵La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka sihhamangkoa' to umbasei tangkihi' anna pihim, nabasei leko' sulibanna anna tä' ia hoäna. Anna hoäna hi naponnoi kakadakeam. Susingkoa' too aka naponnoikoa' kakadakeanna indo pangngala kahha'mua' anna

§§23:24 Indo kasisi' anna bale unta bassim pemali la naande to Yahudi. Kalem-basanna, natuhu'i indo pahenta bahinni'na sapo' natekka indo kasallena.

indo pa'podo kaoammua'. ²⁶O inggannakoa' to illaam Parisi to buta di ada', bahassii'a' yolo illaam hoäna tangkihi'mu sola pihimmu, aka la bahassim tia duka' sulibanna.

²⁷La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka sihhapangkoa' ku'bu' dipamillo' sulibanna lambi' mapi'dä' diita, sapo' illaanna ponno buku hekko' sola kabubosiam. ²⁸Susi liungkoa' too, maka' diitakoa' mato-mato tau mapiakoa' sapo' setonganna to ma'dua tambu' dakoa' anna ponnoa' penabammu kakadakeam.

²⁹La ullambi'koa' iko katilakaam inggannakoa' to ullatta' Pepaondonganna Musa anna to illaam kakalebuanna Parisi, o inggannakoa' to ma'dua tambu' anna ma'tallu sumusu! Aka umpapi-aammia' pole' ku'bu'na ingganna indo nabi yolona anna umpomapi'dä' tookoa' ku'bu'na indo to meada' yolona. ³⁰Anna mane si muua lelenä': 'Kela kilambi'um indo nene to kiponene yolona, inna tä' sia la kiaku sola umpatei indo nabi.' ³¹Dadi maka' susi, iya iko sianna' tia isanga ma'kale muuai: 'Kami'um too pes-subunna indo to umpatei nabi.' ³²Iya pa-sule lakonna' indo pa'pogausanna nene to umponene yolona umpogau' dosa.

³³O inggannakoa' to si mambaba bulim, pessubunna to kadake gau!*' Tä'um deem lalanna la messubungkoa' illaam mai pa'tahungkungam, aka abana inna la bannenakoa' nahaka! ³⁴Pehingngii manappaia' inde tula'ku: la kusua sule sanaka-naka nabi, to manähä, anna tuangguhu la umpellambi'ikoa'. Sapo' deenna' la umpatei, deenna' la umpäso' yabo kaju

sitambem, deem toi la untembe'a' illaam pa'sambajangammu, anna deem piha la umpadondoa' lako kota senga' anna undahhaia'. ³⁵Nasuhum illaam ia too la ditahungkum pättä'koa' aka umpateikoa' tau tä' deem kasalaanna, mengkalao dio Habel napatei nene to umponene sule lako Zakharia indo änä'na Berekhya to napatei illaam alla'na Banua Debata anna ongeam pehumalasam. ³⁶Setongam-tonganna, ia asanna ia too la umpendudunna' inde to tubokoa' lapi' temo."

**Mapi'di' penabanna Puang
Yesus muita to Yerusalem
aka umpogau' kakadakeam**

23:37-39

Luk. 13:34-35

³⁷"O inggannakoa' issinna kota Yerusalem! Palla' dia' iko penabammu umpatei buda nabi anna ulleba'ia' batu sampe mate to nasua Puang Allataala umpellambi'ikoa'. Si kunaba-naba liu la kuhempungkoa' sihhapam änä' mäne' napakumbäi pani'na indona, sapo' mokakoa'. ³⁸Patanannii'a' talinga inde tula'ku anna umpaillaam penabai: la natampeammi Puang Allataala tadongkongammua' lambi' la maitu-itu. ³⁹Kutulasangkoa', mengkalao temo, tä'mä' deem la muita pole sule lako wattunna suleä' sule lambi' muuaa': 'Katambasam indo To sule illaam sanganna Debata!'"

Banua Debata la ditaleam

24:1-2

Mrk. 13:1-2; Luk. 21:5-6

24 Puhai ia too, messubummi Puang Yesus illaam mai Banua De-

***23:33** to si mambaba bulim, pessubunna to kadake gau': Indo dituli' illaam basa Yunani, naua ia ke basa Bambanni: *peampoannakoa' ula'*, aka ula' si napakonai to Yahudi ke deenni tau si mambaba bulim.

bata. La napellei, iya napengkahuku'im passikolanna anna nauai: "O Tuang-guhu, petua' siai too inde lako banua illaam pa'hanteanna Banua Debata."² Iya nauam Puang Yesus: "Ungkaleso asam daka' inde lako banua? Setongam-tonganna tä' deem moi podo la mesa batu la tääto' liu sitodo' solana aka pis-sam wattu la ditaleam asam."

**Puang Yesus untula' loppo'
indo kamasussaam illaam
allo ma'katampasanna**

24:3-14

Mrk. 13:3-13; Luk. 21:7-19

³Tappana muokko' Puang Yesus yabo Tanete Zaitun sulena lako, iya napengkahuku'im passikolanna anna nakutanai paka-paka ia naua: "O Tuanguhu, tulasampakam piham la dadi ingganna indo puha untula' ingngena'? Aka la tandana kela sulengko anna la kapuhaanna lino?"

⁴Natimba' Puang Yesus naua: "Majakoa' indana deenni tau la umbaba bulingkoa!' ⁵Aka la buda too tau sule umboko sangangku anna la buda tau nababa bulim aka la naua: 'Kaom too inde To nalanti' Puang Al-lataala.' ⁶Maka' too uhhingngingkoa' ah-hena to sipate-patei anna kahebanna to sibundu'-bundu', iya tä'koa' too la mahea' aka abana hi tia inna la dadi kaha-kaha ia too, sapo' taiapi indo allo ma'katampasanna. ⁷Aka la sipate-patei hupatau anna kahajaam pada kahajaam la sibundu'-bundu'. Anna umba-umba ngei ongeam la kende' kakobeam anna la dadi lino' kasalle. ⁸Sapo' ia asanna ia too mane pa'pahandusanna kamapi'disam sihhapam mesa baine mane mahassam mangnguhiba'.

⁹Wattu eta too, la disakkakoa' anna dibehokoa' lako to la undahhako'a' lambi'

dipateikoa'. Anna la nakabassikoa' ing-ganna hupatau illaam inde lino aka untuhu'ä'. ¹⁰Wattu eta too buda pen-tuhu'ku la ma'soho boko' lambi' la umpe-beem solana didahha anna la sikabassi-bassi paka ia. ¹¹La buda too kende' to us-sangai kalena nabi sapo' setonganna taia nabi. Anna buda tau la nababa bulim. ¹²La tuttuam membea' gau' kadake, nasuhum buda hupatau la tuttuam tikuhu' pa'kamasena. ¹³Sapo' iai too mentobe manda' anna mengnganti matoto' illaam kamatappasam lako kaleku sule lako ma'katampasanna, tau iam too la di-pasalama'. ¹⁴Anna inde Kaheba Katilal-lasam diona la ma'pahentam Puang Al-lataala, la dipaissanni asam yolo hu-patau illaam inde lino. Puhai too, mane sule hi indo allo ma'katampasanna.

**Puang Yesus umpa'paissangam
loppo' kamasussaam la dadi ke dako' i**

24:15-28

Mrk. 13:14-23; Luk. 21:20-24

¹⁵La muitakoa' too indo 'To ungkähä kakadakeam la metallangam,' ke'de' il-laam indo ongeam maseho. Kaha-kaha ia too puha napayolo lambam nabi Daniel yolona. (Inde kada la pahallu napasalui manappa penabanna to mam-bata.) ¹⁶Wattu eta too ingganna indo to dio Yudea pahallu la sikalumpa' längäm tanete, ¹⁷anna to sulibam banua tä'um la tama banua muala pahuhunna, ¹⁸anna to mahassam dio bela'na tä'um la ma'pasule lako banuanna muala po-hebana, anna mala masimpam muäläi kalena le'ba' umpellei indo kamasus-saam. ¹⁹Tä' ia deem pada samasussa lako baine to mahassam kebättä anna to ma'pasusu. ²⁰Pa'sambajangkoa' anna mala tä' dadi indo kadadiam ia too il-laam wattu palauham battu haka allo

Katohhoam.[†] ²¹Aka wattu eta too la kende' pi'di' tanggana-gana. Pi'di' susi ia too tä'pi deem nasi'dim hupatau mengkalao dio mai pa'pahandusanna inde lino sule lako temo. Sapo' lessu'i too, iya tä'um deem la kende' pole pi'di' susi. ²²Aka maka' hapanna la masäe wattungna mane napamondai Puang Allataala kaha-kaha ia too, iya tä'um deem la tubo hupatau moi podo la mesa. Sapo' kahana pa'kamasena lako hupatau to puha napilei, nasuhum la bale' napamonda kamasussaam ia too.

²³Mane deenni, maka' too deem tau muuaangkoa: 'Indem indo To nalanti' Puang Allataala!' battu haka naua: 'Dionnä!' iya tä' la umpehingngiia'. ²⁴Aka la buda too tau naägä'i naua: 'Kaom too indo To nalanti' Puang Allataala.' Anna deem toi la muuai: 'Kaom too mesa nabi.' Anna indo tau la deem duka' pa'pogausam mepilla'-pilla' napadadi anna tanda memängämängä, aka naua pattujunna: 'Umba ke deenni tau to puha dipilei kubaba bulim.' ²⁵Pengkilalai manappaia', aka puhangkoa' kupayolo lambangam kaha-kaha ia too.

²⁶Anna maka' too deem tau muuaangkoa: 'Petua'i, dio pohiallasam indo To nalanti' Puang Allataala,' iya tä'koa' la lako. Anna maka' deem tau muuaangkoa: 'Illaam tambim,' daa umpehingngii. ²⁷Aka kasuleangku to disangai Änä' Mentolino la naissam asam ingganna hupatau, aka la sihhapam liu tikiäna kila' mengkalao illaam mata allo sule sau' katampusam

pangkähhäna. ²⁸Umba-umba naongeti bakke, etam too duka' naongeti dassi peande bakke ma'tombom."[‡]

Puang Yesus untula' loppo' la kasuleanna ma'penduanna

24:29-36

Mrk. 13:24-32; Luk. 21:25-33

²⁹"Puhai too indo kamasussaam, iya la pi'de mata allo anna tä'um la paindo bulam, anna la honno'i yabo mai langi' bintä anna ingganna issinna langi' la titehha' bäbä.[†] ³⁰Anna mane naita hupatau tanda kasuleangku to disangai Änä' Mentolino yabo langi' lambi' la sikauhhu' ingganna hupatau ussahoi kalena. Anna wattu eta too la naita hupatau inde Änä' Mentolino tuhum yabo mai langi' umpehhondoi gabum naponnoi kamatandeam taditondom anna naponnoi toi kakuasaam.[§] ³¹La diponi mesa sangkakala kasalle anna la ussuaä' ingganna malaika'ku lao nahempungannä' ingganna hupatau to puha kupilei illaam inde lino mengkalao illaam mata allo sule sau' katampusam.

³²Diona kaha-kaha ia too, mala di-ala pehapangam dio mai mesa kaju ara. Maka' too mukku'um tähe'na anna kendaum händäm, iya la muissammia' too muua la bale' sulem kulla' kalando. ³³La susim too ke muitanna' dadi asam indo puha kutulasangkoa', iya la muissammia' too duka' muua la bale' sule lakom indo pattujunna Puang Allataala. ³⁴Setongam-tonganna, ingganna kaha-kaha ia too la dadi yolo anna mane

[†]24:20 *allo Katohhoam*: Situ' peadasanna to Yahudi, tä' tau mala le'ba' mambela ke illaanni allo Katohhoam.

[‡]24:28 *Umba-umba naongeti bakke, etam too duka' naongeti dassi peande bakke ma'tombom*: Inde tula' madomi' mesa tula'na tomatuanna to Yahudi naala pehapangam Puang Yesus. Kalembasanna, maka' sulem Puang Yesus la naissam asam tau.

[†]24:29 Yes. 13:10, 34:4.

[§]24:30 Dan. 7:13.

mate asam ingganna to tubo lapi' temo.
³⁵Langi' anna lino la pa'de ke dako'i,
 sapo' kadangku ia, la da'da' liu sule lako
 salako-lakona.”

**Pahallu tau majaga aka tä'
 diissam wattunna allo
 kasuleanna Puang Yesus**

24:36-44

Mrk. 13:32-37; Luk. 17:26-30, 34-36

³⁶“Sapo' setonganna tä' deem moi
 podo la mesa tau muissanni wattunna
 kaha-kaha ia too. Moi malaika' yabo
 suhuga tala naissanni, moi Änä'na Puang
 Allataala, anggam mesa-mesanna Am-
 beku yabo suhuga muissanni. ³⁷Aka
 umba susi dadi indo anna wattunnai
 Nuh, la susim too duka' kasuleangku
 to disangai Änä' Mentolino. ³⁸Wattunna
 anna tä'pi bussu uwai, ingganna hu-
 patau illaam inde lino ma'masannam-
 sannam mangngande mangngihu', siala-
 ala, anna ma'pasiala sule lako wat-
 tunna mentama kappala' Nuh. ³⁹Tap-
 pana nabussui uwai mane kilala hi pole'
 aka uhhuai. La susim too duka' ka-
 suleangku to si disangai Änä' Mentolino.
⁴⁰Aka maka' deem dua muane mahas-
 sam mengkähä dio bela'na anna suleä',
 iya mesa la dipasola lao anna mesa la di-
 patohho. ⁴¹Battu haka deem dua baine
 mahassam manggilim, mesa la dipasola
 lao anna mesa la dipatohho. ⁴²Dadi,
 iam too anna la majagangkoa' aka tä'
 la muissanna' wattunna kasuleanna De-
 batammu. ⁴³Penabaam siaia' too, maka'
 hapanna la naissam to ma'banua wat-
 tunna la sule to maboko, mannassam tia
 anna tä'i la mamma' anna mala tä' tama
 banuanna indo to maboko. ⁴⁴Iam too
 anna la pahallungkoa' duka' majaga liu,
 aka indo kasuleangku to disangai Änä'
 Mentolino tä' la umbai-baia'.”

**Pehapangam diona mesa sabua'
 manuhu' battu haka tä' manuhu'**

24:45-51

Luk. 12:41-48

⁴⁵Anna mane naua Puang Yesus:
 “La pahallukoa' sihhapam mesa sabua'
 manuhu' anna keaka' to naäkä' puäna
 mendadi punggabana ingganna solana,
 nasuhum ia la si untabaam kinande
 solana ke lambi' oom wattunna.
⁴⁶Kehongko' anna maupa' lako
 indo sabua' ke tontä' liui manontom
 umpalako manappa pengkähänganna
 nalambi' puäna ke ma'pasulem.
⁴⁷Setongam-tonganna, tä' mala tala
 naäkä' puäna sabua' ia too la nalima'iam
 ingganna kullena. ⁴⁸Sapo' maka' kadake
 gau' indo sabua', iya la nauam too
 illaam penabanna: ‘Masäepi mane sulei
 puäku,’ ⁴⁹lambi' umpongkoim solana
 anna mangngande mangngihu'i sola to
 si umpamäbo' kalena. ⁵⁰Pissananna
 tappa sule säkä-säkä ham indo puäna
 illaam wattu tadibai-bai. ⁵¹Sulena,
 naala siaham indo sabua'na anna
 nadahhai napaambi' mate, mane
 napa'tibeanni tama ongeanna to ma'dua
 tambu', anna illaanni sumahho lumoa'
 sikekko' isinna tamate tatubo.”

**Pehapangam diona sapulo änä' daha,
 lima matua tambu' anna lima tää'**

25:1-13

25 Anna mane naua Puang Yesus:
 “Maka' lambi'um wattunna
 umpalako kapahentaanna Puang
 Allataala, la sihhapam issinna inde
 tulasam naua: Deem sapulo änä' daha
 muala oborna anna le'ba'i untammui
 mesa muane to la kebaine. ²Indo
 sapulo änä' daha si limaam, lima matua
 tambu' anna lima tää'. ³Indo lima to tä'
 matua tambu' umbaba oborna, sapo'
 tä' umbaba polepi minnä'. ⁴Sapo' indo

ia lima to matua tambu', umbaba ia oborna napasibabapi minnä'na. ⁵Sapo' aka maela' sule indo to la kebaine, nasuhum silele tikahu'du' lambi' mamma'.

⁶Tappana tängä bengi, iya katamba-tambam tau naua: 'Sulem indo to la kebaine! Maikoa' tammui!'

⁷Bangom siaham indo sapulo änä' daha anna umpapia-piai oborna. ⁸Iya nauam indo to tä' matua tambu': 'Beengkam kami' itim minnä'mu saidi' aka la pi'dem kami' oborki.'

⁹Natimba' indo to matua tambu' naua: 'Tä' mala aka la sikapui'i bäbäkia'. Dotam tia lao polekoa' iko duka' mualli minnä' lako to ma'balu.'

¹⁰Tappana le'ba'i indo änä' daha to tä' matua tambu' mualli minnä', iya sule siaham indo to la kebaine. Lambi' le'ba'im indo lima änä' daha to matua tambu' sola-sola indo to la kebaine tama mesa banua la diongei ma'hame-hame. Sulei tama, iya ditutu'i siaham ba'ba.

¹¹Tä' masäe, iya sulem duka' indo lima änä' daha to tä' matua tambu' anna metamba-tambai naua: 'O tuam! Tungka'ikam kami!'

¹²Sapo' natimba'i indo to la kebaine naua: 'Setongam-tonganna, tä'koa' iko kuissam.'"

¹³Mane naalai Puang Yesus pungngu' tannunna inde pehapangam naua: "Iam too anna la majaga liungkoa' aka tä' deem tau la muissanni wattunna kasuleangku sule."

Pehapangam diona tallu sabua'

25:14-30

Luk. 19:12-27

¹⁴Anna mane naua: "Maka' umpalakom kapahentaanna Puang Allataala dipasihpam issinna inde tulasam susi naua: Pissam wattu, deem mesa tau la le'ba' lako botto senga'. La

mengkalaoui, untambaim tallu sabua'na anna napadokkoanni lisu pala'na doi'na aka la nagihisam. ¹⁵Sapo' umpetua' indo sabua'na anna nabeenni situhu' la kapa'belaanna. Mesa nabeem lima sa'bu doi' bulabam, mesa nabeem dua sa'bu, anna mesa nabeem sasa'bu. Puhai, iya le'ba'um. ¹⁶Puhanna dibeem indo doi', iya le'ba' siaham ia nagih'i indo to dibeem lima sa'bu, sampe mala kehängäm lima sa'bu doi' bulabam. ¹⁷Susi toi duka' indo to dibeem dua sa'bu, kehängäm ia dua sa'bu doi' bulabam. ¹⁸Sapo' indo ia to dibeem sasa'bu, le'ba' ia umbo'bä' litä' anna nalamunni.

¹⁹Masäei, iya sulem sule indo puäna. Sulena, iya sihekemmi sabua'na. ²⁰Indo to dibeem lima sa'bu doi' bulabam le'ba' lako olona puäna anna nauaanni: 'O tuam, indo doi' umbeennä', iya kugih'i lessu'mu sampe tiluppi' dua mendadi sapulo sa'bu.'

²¹Natimba' indo puäna naua: 'Mapia! Abana si'da sabua' mapiako anna manuhu'. Malako dikatappa'i, aka manuhu'ko illaam kaha-kaha bahinni', iya temo la kupadokkoangko lisu pala'mu babaam kasalle. Maiko anna mangngala tabako duka' illaam katilallasangku.'

²²Puhai, iya sulem duka' indo to dibeem dua sa'bu doi' bulabam anna nauai: 'Indo doi' dua sa'bu umbeennä', iya kugih'i lessu'mu sampe tiluppi' dua mendadi appa' sa'bu.'

²³Natimba' indo puäna naua: 'Mapia! Abana si'da sabua' mapiako anna manuhu'. Malako dikatappa'i, aka manuhu'ko illaam kaha-kaha bahinni', iya temo la kupadokkoangko lisu pala'mu babaam kasalle. Maiko anna mangngala tabako duka' illaam katilallasangku.'

²⁴Katampasanna sule duka' indo to dibeem sasa'bu doi' bulabam anna nauai:

'O tuam, kuissam kuua mesako to makahha'. Aka si umpepaheko iko pahe taiko muambo'i anna si umpakissingko pahe taiko untananni. ²⁵Iam too kasuhunganna anna le'ba'mä' kulamum dokko litä' indo doi'mu, aka kuua pa'de manii anna ungueaha'ia'. Dadi alam too sule inde doi'mu.'

²⁶Natimba' indo puäna naua: 'O sabua' to kadake gau' anna to busungam! Muissammi le', muua kao mesaä' to si umpepahe pahe takao muambo'i anna si umpakissim pahe takao untananni! ²⁷Maka' susi, iya akanna tä'i umbeem inde doi' lako to si umpakeänä' doi', anna mala kutahima sitonda änä'na ke suleä'?'

²⁸Anna mane naua lako sabua' senga'na: 'Alai itim doi' anna umbeem polepi lako indo to muampuam sapulo sa'bu doi' bulabam. ²⁹Aka menna-menna mala dikatappa'i umpalako indo puha dibeem, tau ia too la dihängänniam polepi anna mala tuttuam buda naampuam. Sapo' menna-menna tä' mala dikatappa'i umpalako indo puha dibeem, iya la diäläi pissam ia lao illaam mai kalena. ³⁰Dadi tibeit itim sabua' takeguna tama indo ongeam handam malillim anna illaanni sumahho lumoa' sikekko' isinna tamate tatubo.'"

**Hupatau dipopa'tadongkongam
illaam allo ma'katampasanna**

25:31-46

³¹Anna mane naua Puang Yesus: "Maka' sulemä' to disangai Änä' Mentolino naponnoi kamatandeam nalahuä' ingganna malaika', iya la muokko'ä' yabo okkosam kahajaanguk tadisihanteam. ³²Iya wattu etam too ingganna hupatau illaam inde lino la tihempum dio oloku anna

kuse'lai sihhapam mesa to ma'kambi' umpasisähä' dombana anna bekena. ³³Indo ia domba la kupalulako tandai kananguk anna indo ia beke la kupalulako tandai kaihingku.** ³⁴Anna la ma'kadaä' to disa'bu' Tomahaja lako indo to dio tandai kananguk kuua: 'Maikoa' inggannakoa' to puha natamba' Ambeku anna mendadikoa' umma'na illaam kapahentaanna indo inna puha dipatokaanguk' handu' dipadadinna inde lino. ³⁵Aka wattungku tadea' umbeennä' kuande, wattungku mabähäm umbeennä' kuihu', wattungku tama tondä'mua' umpatama manappä' banuammua'. ³⁶Wattunna pa'de pohebaku umbeennä' poheba, wattungku masaki umpamoliä', anna wattunna illaannä' tahungkum si le'ba'koa' muolläiä'.'

³⁷Iya la natimba' indo to meimam naua: 'O Debata, umba ngei kiitako tadea' anna kibeengko muande, battu mabähhängko anna kibeengko muihu'? ³⁸Umba ngei anna deengko kiita tama tondä'ki anna kipatamako banua? Anna umba ngei kiitako tä' ma'poheba anna kibeengko poheba? ³⁹Anna umba ngei anna kiitako masaki battu illaanguk tahungkum anna kiölläiko?'

⁴⁰Iya la kutimba'i kuua: 'Setongam-tonganna, iai too umpogau'a' lako inde solasubungku to handam matuna, iya iam too umpogau'a' lako kaleku.'

⁴¹Puhai, iya la kuuaammi indo to dio tandai kaihingku: 'Päläikoa' lao, daa muetaa' inde inggannakoa' to nahua tädona Puang Allataala, ammu le'ba'a' tama api tapi'de-pi'de indo to puha dipatokaam tomahajanna setam sola ingganna malaika'na. ⁴²Aka ikoa'iko wattungku tadea' tä' umbeennä' kuande anna wattungku mabähäm

**25:33 domba...beke Indo domba, kalembasanna to untuhu'i Puang Yesus, anna indo beke, kalembasanna taia pentuhu'na Puang Yesus.

tä' umbeennä' kuihu'. ⁴³Wattungku tama tondä'mua' mokakoa' umpatamaä' banuammu, wattungna pa'de pohebaku tä' ussaha'daia' umbeennä' poheba. Susi toi wattungna masakiä' anna illaannä' tahungkum tä' deem si muolläiä'.

⁴⁴Iya la nua indo to dio tandai kaihingku: 'Umba ngei deengko kiita tadea' Debata battu haka mabähäm, battu haka tamako tondä'ki battu haka pa'de pohebamu battu haka masakiko battu illaangko tahungkum anna tä'ko kipamoloi?'

⁴⁵Iya la kutimba'i kuua: 'Setongam-tonganna, ingganna pa'palakoammua' indo tä'koa' umpamoloi inde solasub-ungku to handam matuna, iya setonganna tä' tia anggam ia tä' umpamoloia', sapo' Kaopi duka' tä' umpamoloi.'

⁴⁶Anna ingganna indo tau ia too la dipalutama ia ongeam pandahhaam sule lako salako-lakona. Sapo' indo ia to umpalako pa'elo'na Puang Allataala, la ullambi' ia katuboam sule lako salako-lakona."

Matua ulunna to Yahudi ma'pattuju la umpopepatei Puang Yesus

26:1-5

Mrk. 14:1-2; Luk. 22:1-2; Yoh. 11:45-53

26 Tappana puha asam natula' Puang Yesus ingganna indo pepa'guhuam, iya ma'kadam lako passikolanna naua: ²"Umba susi puha taissanna' pada-pada la dua bengi ham anna lambi' oi allo Kalappasam.†† Wattu eta too Kao to disangai Änä' Mentolino la dibehoä' tama pala' limanna to la umpateiä' yabo kaju sitambem."

³Wattu eta siam too duka' anna ma'hempunni ingganna kapala sando sola-sola matua ulunna to Yahudi dio

banuanna sando too' isanga Kayafas. ⁴Sipattuju-tuju umpeä lalam aka la ussukka membuni Puang Yesus anna la napopepatei. ⁵Sapo' nauai: "Tä' la tapasipatuaia' allo kasalle, indana kende'i passikallaam illaam botto."

Puang Yesus natolloi minnä'-minnä' masuli' mesa baine

26:6-13

Mrk. 14:3-9; Yoh. 12:1-8

⁶Tappana dioi tondä' Betania Puang Yesus illaam banuanna Simon indo to dolengam yolona, ⁷iya sulem mesa baine umbaba mesa buli-buli mapindäm kessi minnä'-minnä' bubanau' si masulli' allinna. Mahassanni mangngande Puang Yesus, iya le'ba'um indo baine lako ampe'na anna natolloianni ulunna indo minnä'-minnä'na tanda pa'pakasallena.

⁸Tappana naita passikolanna Puang Yesus pa'palakoanna indo baine, iya silelem keaha' aka illaam penabanna naua: "Aka oom ia duka' gunana minnä'-minnä' masulli' dikatoa-toai bäbä? ⁹Aka indo kela nabalu'um inde dio minnä'-minnä'na ma'pateem masuli'na anna natabanni to mase-mase, la mapia leko' ia."

¹⁰Sapo' nalosa Puang Yesus tama penabanna indo passikolanna nasuhum naua: "Akanna umpasalakoa' inde baine? Päbäi mammi napateem. Aka inde napateem, mesa pa'pogausam mapia lako kaleku. ¹¹Aka to mase-mase ia la sola-sola liukoa', sapo' Kao-kao tä'kia' la sola liu. ¹²Aka inde natolloiä' minnä'-minnä'na temo, napogau' loppo'um ia indo la dipogau' ke dilamummä'. ¹³Setongam-tonganna, umba-umba naongi Kaheba Katilallasam dipa'pakahebaam, etam

††26:2 *allo Kalappasam*: indo si diuam *Paskahillaam* basa Indonesia. Allo eta too napakahoa' to Yahudi indo wattungna nalappasam Puang Allataala nene to naponene dio mai kasabuasam dio Mesir (Täss. 12).

too duka' la dipotulasam pa'pogausanna inde baine anna mala dikilalai liu."

Yudas umpeä lalam la umbalu' Puang Yesus

26:14-16

Mrk. 14:10-11; Luk. 22:3-6

¹⁴ Puhai ia too, deem mesa to tihekem sapulo dua passikolanna Puang Yesus isanga Yudas Iskariot le'ba' umpellambi'i kapala sando, ¹⁵ anna nauai: "Sanaka la umbeennä' ke kupamoloikoa' la ussakka Puang Yesus?" Iya natimba'im naua: "La kibeengko tallu pulo doi' peha'." Iya nahekemmi anna mane nabeem. ¹⁶ Napa-handu'um eta too umpeä liu lalam Yudas la umbalu' Puang Yesus.

Puang Yesus sola passikolanna umpengkilalai allo Kalappasam

26:17-25

Mrk. 14:12-21; Luk. 22:7-14, 21-23; Yoh. 13:21-30

¹⁷ Ilaam pa'pahandusanna allo kasalle Hoti Tä' Diboloi Bibi' Hoti, sulem passikolanna Puang Yesus umpellambi'i anna nauai: "La umbakam ngei umpatokaangko kinande indo si diande ke umpengkilalai tau allo Kalappasam?"

¹⁸ Iya nauam Puang Yesus: "Le'ba'koa' libam kota Yerusalem anna umpellambi'ia' indo mesa solata anna muuaania': 'Naua Tuangguhu: la lambi'um wat-tunna indo to puha napa'tantu Puang Allataala diona kaleku. Dadi illaam banu-ammu la kiongei sola-sola passikolangku umpengkilalai allo Kalappasam.'" ¹⁹ Iya le'ba'um duka' indo passikolanna libam Yerusalem anna napalakoi pada indo nauaam Puang Yesus lambi' umpatoka kinande indo si diande illaam allo Kalappasam.

²⁰ Tappana bengi, iya mangngandem Puang Yesus sola-sola indo sapulo

dua passikolanna. ²¹ Mahassanni mangngande, iya nauam Puang Yesus: "Setongam-tonganna, deem mesa solamua' illaam inde alla'-alla'taa' la umbalu'ä'."

²² Iya sangngim masussa siaham penabanna anna sibala'-bala'i mekutana lako Puang Yesus naua: "Takao mammaka kao, Tuam?"

²³ Natimba' Puang Yesus naua: "Iai too kupasola unduhu hoti dokko lojam-lojam, iya iam too la umbalu'ä'. ²⁴ Abana hi tia Kao to disangai Änä' Mentolino inna la mateä', umba susi puha tisuha' illaam Battakada Debata. Sapo' tä' deem pada satilaka lako indo to umbalu'ä'. Mala leko'um ia kela tä'um ia didadiam!"

²⁵ Iya nauam duka' Yudas indo to la umbalu' Puang Yesus: "Takao mammaka kao, Tuangguhu?"

Natimba' Puang Yesus naua: "Iya pasaluim too penaba o!"

Pa'tosabeam sanda maseho

26:26-30

Mrk. 14:22-25; Luk. 22:15-20; 1Kor. 11:23-25

²⁶ Mahassanni mangngande, iya mualam mesa hoti Puang Yesus anna nakuhhu'i sumanga' längäm Puang Allataala mane napiä'-piä'i anna nabeenni lako passikolanna napasindum naua: "Iam too inde baleku, alaia' ammu andei."

²⁷ Puhai, mualam mesa ihusam kessi anggur anna nakuhhu'i sumanga' mane nabeem oi lako passikolanna anna nauai: "Thu'ia' indee, ²⁸ aka iam too inde hahaku la dipatitollo la umpomannassa pa'dandianna Puang Allataala lako buda hupatau anna mala naam-punniam dosana. ²⁹ Sapo' kuuaangkoa' tentomai: tä'mä' Kao deem la muihu' pole anggur sampe lambi' wattunna la

muihu'ä' anggur bakahu sola-solakia' illaam kapahentaanna Ambeku.”

³⁰ Puhai, iya umpeniammi mesa pampujiam, mane le'ba'i la längäm Tanete Zaitun.

Natula' loppo' Puang Yesus diona la nabahoi Petrus

26:31-35

Mrk. 14:26-31; Luk.

22:31-34; Yoh. 13:36-38

³¹ Iya umpatahhu'um tula'na Puang Yesus lako passikolanna naua: “Illaam inde bengi la le'ba'koa' umpelleiä' aka deem tisuha' illaam Battakada Debata naua:

‘La kupatei to ma'kambi'na anna ingganna dombana la tiseмбу' lao.’^{‡‡}

³² Sapo' maka' too dipatibangommä' sule, la kupendioloikoa' lako Galilea.”

³³ Iya tappa ma'kada Petrus naua: “Moi la le'ba' asam solaku napelleiko aka indo kadadiah la uhhuako, inna tä' sia kao deem la kupelleiko.”

³⁴ Natimba' Puang Yesus naua: “Setongam-tonganna, illaam inde bengi tä'pi la moni mäne' anna pentallummä' umbahoi.”

³⁵ Iya naua oom Petrus: “Toko moiä' kao la dipatei solaki', tala kubahoiko!” Anna susi siam duka' tula'na ingganna solana Petrus.

Puang Yesus ma'sambajam illaam mesa ongeam isanga Getsemani

26:36-46

Mrk. 14:32-42; Luk. 22:39-46

³⁶ Puhai ia too, iya le'ba'um Puang Yesus sola passikolanna lu lako

mesa ongeam isanga Getsemani. Dioi, muuaammi passikolanna: “Okko'ungkoa' too eta inde angku laopa eta lako pa'sambajam.” ³⁷ Iya umbabaim Petrus sola indo to dua änä'na Zebedeus napasola.^{¶¶} Wattu eta too tä' deem pada samasussa anna husa' penabanna Puang Yesus nasi'dim. ³⁸ Nasuhum naua lako indo passikolanna to napasola: “Masussa si'da-si'da penabangku kusi'dim, angga' la mateä'. Tohhongkoa' too eta inde, sapo' tä'koa' la lembe.”

³⁹ Iya mentudendem saidi' anna untapposanni kalena dokko litä', anna ma'sambajanni naua: “O Ambe', kela mala anna muäläi illaam mai kaleku inde kamasussaam kupendudum. Sapo' la pa'elo'mu dadi, taia la pa'elo'ku.”

⁴⁰ Puhai ma'sambajam, iya ma'pasulem lako indo tallu passikolanna sapo' mamma'i hi nalambi'. Iya ma'kadam lako Petrus naua: “Tä' siangka tiko isanga la umbela umpasolaiä' moi podo satette'um! ⁴¹ Majagakoa' ammu pa'sambajam indana napa'sändä'ikoa' setam. Aka abana hi tia mohäe penabammua' la umpalako kamaloloam, sapo' napomalammakoa' sipa' hupataummu.”

⁴² Puhai umpa'tula'i passikolanna, iya le'ba' pole oom kapenduanna ma'sambajam naua: “O Ambe', maka' abana inna la kuoloi inde kamasussaam anna lalam tä'um la mala kusalai, iya pa'elo'mum too isanga la dadi.”

⁴³ Puhai, ma'pasule oom sule, iya nalambi' mamma' oo sule aka nataloi sugali'um matanna. ⁴⁴ Iya le'ba' pole oom sule ma'sambajam kapentallunna, nasulei umba susi indo issi sambajanna inggena'.

^{‡‡}26:31 Za. 13:7.

^{¶¶}26:37 indo to dua änä'na Zebedeus: Yakobus anna Yohanes diuaam. Batai 4:21 anna 10:2.

⁴⁵Tappana ma'pasule lako passikolanna, iya nauam: "Mamma' liupokoa' isanga? Tä' liupokoka' tiko malube! Petua'ia' tentomai lambi'um wattunna Kao to disangai Änä' Mentolino la dibehoä' tama pala' limanna to madosa. ⁴⁶Bangommokoa' anta laoa'. Petua'ia' diom mai indo to la umpopesakkaa'!"

Puang Yesus disakka

26:47-56

Mrk. 14:43-50; Luk. 22:47-53; Yoh. 18:1-11

⁴⁷Mahassampi ma'tula' Puang Yesus, iya sule ham Yudas indo to tihekem duka' sapulo dua passikolanna Puang Yesus umpasola tau bu'dä' sanda pa'dam sola bose, nasua kapala sando anna matua ulunna to Yahudi. ⁴⁸Indo Yudas to umbalu'i, puham untula' loppo' tanda lako indo to napasola naua: "Iai too ku-udum, iam too la ussakkaa'." ⁴⁹Sulena Yudas tappa umpellambi'i Puang Yesus anna nauai: "O Tuangguhu!" Anna mane muudum Puang Yesus.

⁵⁰Sapo' ma'kada Puang Yesus naua: "O solaku, aka untungka sule?"^{§§}

Iya le'ba' siaham lako indo tau buda anna ussakkai Puang Yesus. ⁵¹Sapo' deem mesa solana Puang Yesus ussintä' pa'danna anna umbattai mesa sabua'na sando too', iya mäläi talinganna. ⁵²Naua siaham Puang Yesus: "Daa! Patamai sule banuanna pa'dammu! Aka menna-menna umpopanaka pa'dam, pa'dampi duka' muandei. ⁵³Ussanga haka' tiko tä' la mala kupelau längäm Ambeku yabo suhuga anna napatuhungannä' la'bi sapulo dua tuntunganna sohodadu malaika' napamoloiä' kela kupahallu-anni? ⁵⁴Sapo' maka' la kupateem, iya tä'

la sule lako indo puha tisuha' illaam Battakada Debata diona abana hi tia inna la dadi inde kadadiam temo."

⁵⁵Anna mane naua Puang Yesus lako indo tau buda: "Ussangaa' isanga pehampo'ä' anna sulekoa' sanda pa'dam sanda bose la ussakkaa'? Kusanga allo-alloä' muokko' illaam Banua Debata ma'pa'guhu anna tä' di ussakkaa'. ⁵⁶Sapo' abana hi tia la susi anna mala sule lako indo puha nasuha' nabi illaam Battakada Debata."

Puhai, iya sikalumpa'um lao ingganna indo passikolanna napellei.

Puang Yesus dio olona to si mahhotto' illaam peadasam

26:57-68

Mrk. 14:53-65; Luk. 22:54-55, 63-71; Yoh. 18:12-14, 19-24

⁵⁷Tappana disakka Puang Yesus, iya dipasolam lako banuanna sando too' isanga Kayafas. Eta too mahassam ma'hempum to ullatta' Pepaondonganna Musa sola matua ulunna to Yahudi. ⁵⁸Iya natuhu' kalamba'um Petrus sule lako bihim pa'hanteanna sando too'. Sulei lako, iya tahhu'um tama anna muokko'i sola to unjagai Banua Debata, aka maelo' la napengngissanni aka la dadi lako kalena Puang Yesus.

⁵⁹Iya umpalilimmi tangnga' kapala sando sola ingganna solana to tihekem duka' To Mahhotto'na to Yahudi la umpeängam tuntungam su'be' Puang Yesus anna nadakasam pa'posangasanga anna mala dipatei. ⁶⁰Moinna anna budam tau sisolom-solom le'ba' lako olo mendadi sa'bi tatappa', sapo' tä' punala deem la siundu'-undu' kadanna la nasuhungam mala dipatei Puang Yesus. Ma'katampasanna le'ba' lako olo

§§26:50 O solaku, aka untungka sule?: illaam basa Yunani mala duka' kalembasanna naua: O solaku, palakom indo maelo' umpogau'.

dua tau ⁶¹anna nauai: “Puha kihingngi inde tau naua: ‘Mala kukadakeam inde Banua Debata, sapo' la tallungngallo mandi kuolaam unglähäi anna ke'de'um sule.’”

⁶²Iya ke'de'um siaham sando too' anna ungtutanai Puang Yesus naua: “Tä' liu siam isanga la untimba'i inde lako pa'pahapa'na tau?” ⁶³Sapo' mengkamma' mandi Puang Yesus.

Iya ma'kada pole oom indo sando too' naua: “Pa'pindaipoko Puang Allataala Debata tubo ke abanai iko si'dam indo To dilanti' la mepasalama', battu diua Änä'na Puang Allataala!”

⁶⁴Natimba' Puang Yesus naua: “Ikom ma'kale muuai. Sapo' kuuaangkoa' duka' tentomai: illaam allo la taoloinna la muitakoa' Änä' Mentolino, battu diua Kao, la muokko' dio tandai kananna To Handam Kuasa anna la suleä' sule umpehhondoi gabum yabo langi!”*

⁶⁵Iya tappa umpesepäsam siaham pohebana sando too' aka keaha' anna nauai: “Tahingnginna' untelle Puang Allataala. Akapi gunana la umpeä liukia' sa'bi? Aka uhhingngi asammia' kadanna inde dio tau untelle Puang Allataala!”

⁶⁶Dadi maakaa' iko susi pikkihammu?”

Pada-pada mentimba' naua: “Abana sihatam la dipatei aka kasalaam!”

⁶⁷Iya deemmi sanaka-naka tau untikkudui lindona, deem piha undänggu'i, anna deem toi ussapu'i matanna Puang Yesus napasindum natampilim ⁶⁸anna nauai: “O To dilanti' la mepasalama', pentopaipi menna untappai limako?”

Petrus umbahoi Puang Yesus

26:69-75

Mrk. 14:66-72; Luk. 22:56-62;

Yoh. 18:15-18, 25-27

⁶⁹Wattu eta too mahassampi duka' dio pa'hanteam Petrus, iya sulem mesa sabua' baine anna ungtutanai Petrus naua: “Iko duka' mesa to si sola liu indo Yesus to Galilea, le?”

⁷⁰Sapo' tappa ma'baho Petrus dio olona ingganna tau eta too naua: “Tä' kuissam kalembasanna itim tula'mu!”

⁷¹Mane le'ba'i lako ba'ba bala pa'hanteam. Dioi, naita pole oom mesa sabua' baine, iya nauam indo baine lako to dio heem eta too: “Inde dio tau abana solana Yesus indo to Nazaret.”

⁷²Iya ma'baho oom Petrus sampe ma'pinda. Anna mane naua: “Tä' si'da si'da kuissam tau ia too.”

⁷³Tä' masäe, iya sangngim nauam indo to ke'de'-ke'de' dio ampe'na Petrus: “Mannassa anna solanako aka susi liua' loeam tula'mu.” ⁷⁴Iya ma'pindam pole' Petrus naua: “Naitaä' Debata, kela kuis-sanni indo tau!”

Ia sia teppu'na dio pudu'na Petrus tula'na, iya moni siaham mäne'. ⁷⁵Tappa nakilalaim pole' Petrus indo pa'tula'na Puang Yesus naua: “Tä'pi la moni mäne' anna pentallummä' umbahoi.” Iya le'ba' siaham Petrus lako sulibam anna ma'pase'go'i sumahho.

Puang Yesus dibaba lako olona Pilatus

anna kamateanna Yudas

27:1-10

27 Mebengngi'-bengngi'pi, iya
umpasahandammi kada
ingganna kapala sando sola matua

*26:64 Dan. 7:13.

ulunna to Yahudi la umpatei Puang Yesus. ²Iya umpungom Puang Yesus anna nababai lako olona Pilatus, mesa Gubernur illaam kapahentaanna Roma.

³Tappana naissam Yudas indo to umbalu' Puang Yesus naua dipasala Puang Yesus lambi' la dipatei, iya usosso siaham kalena. Nasuhum napasule asam sule indo sahona tallu pulo doi' peha' lako ingganna kapala sando sola matua ulunna to Yahudi anna mane naua: ⁴“Abana madosa si'da-si'daä' aka umbalu'ä' tau tä' deem kasalaanna sampe la dipatei!”

Sapo' nauai indo kapala sando sola matua ulunna to Yahudi: “Taia kami' is-sangki itim. Issammu oom tiko duka!”

⁵Iya napa'tibeammi Yudas indo doi' tama Banua Debata anna le'ba'i mentujo untoke' kalena.

⁶Iya nahuhu'im kapala sando indo doi' anna nauai: “Inde doi' tä' la mala dipalutama pa'ponggeam pehumalasang illaam Banua Debata, aka doi' haha.”[†]
⁷Tappana sahandanni kadanna indo kapala sando, iya naalliammi sangngenam litä'na pa'tampa kuhim la si dipa'ku'bu'i to sule ke deenni mate. ⁸Iam too anna disangai lium indo pa'ku'busam sule lako temo: “Litä' Haha.” ⁹Iya sule lakom indo to puha natula' loppo' nabi Yeremia naua: “Ussahandanni kada to Israel la tallu pulo doi' peha' allinna lambi' natahima anna ¹⁰naallianni sangngenam litä'na pa'tampa kuhim, umba susi pahentana Debata lako kaleku.”

Puang Yesus dio olona Pilatus

27:11-26

*Mrk. 15:1-15; Luk. 23:1-5,
13-25; Yoh. 18:33-19:16*

¹¹Tappana dio olona Pilatus Puang Yesus, iya nakutanaim naua: “Ikongka indo tomahajanna to Yahudi?”

Natimba'i Puang Yesus naua: “Ikom ma'kale muuai.”

¹²Sapo' indo ingganna tula' napakolo'-kolo'iam ingganna kapala sando sola matua ulunna to Yahudi, tuli tanatimba'i Puang Yesus. ¹³Nasuhum mekutana pole oom Pilatus naua: “Tä' isanga uh-hingngi inde lako tula'na to diposa'bi?”

¹⁴Sapo' tä' mandi deem natimba'i Puang Yesus moi podo la sabattam kada, nasuhum mängä-mängä bäbäm pole' Pilatus.

¹⁵Maka' lambi' oom allo Kalappasam si biasa nalappasam gubernur mesa to ditahungkum situhu' pelauanna tau buda. ¹⁶Eta too deem mesa to ditahungkum molele-lele gau' kadakena, isanga Yesus Barabas. ¹⁷Iya tihempum asanni tau buda, mekutanam Pilatus naua: “Mennanna kabam umpohäea' la kulappasam tentomai? La Yesus Barabas daka, la inde haka Yesus to si di-uaam To dilanti' la mepasalama?” ¹⁸Ia anna ma'kada susii Pilatus aka naissam naua ia hi tia anna nababai sule aka nakembuhui.

¹⁹Mahassam siapi muokko' Pilatus illaam okkosam si naonngi mahhotto' anna nalambi'um pepasanna bainena naua: “Tä'ko too la ungalako-lakoannii itim kaha-kahana tau to tä' deem kasalaanna le, aka iam napolalam manggimpi kadakeä' sabengi.”

²⁰Sapo' indo ingganna kapala sando sola matua ulunna to Yahudi ussas-

[†]27:6 doi' haha: kalembasanna, kulle malussu.

ungam liu tau buda melau lako Pilatus anna mala Barabas dilappasam, anna dipatei ia Puang Yesus.

²¹Iya mekutana pole oom Pilatus lako indo tau buda naua: “Mennanam kabam indo to dua umpohäea' la kulappasangkoa?”

Natimba'im naua: “Barabas!”

²²Mekutana oom Pilatus naua: “Maka' susi, iya aka ia la kupogausam indo Yesus si diuam To dilanti' la mepasalama?”

Natimba'i oom naua: “Päso'i yabo kaju sitambem anna malai mate!”

²³Mekutana pole oom Pilatus naua: “Anu' aka hia kasalaanna?”

Sapo' tuttuam sikaoli mandi naua: “Päso'i yabo kaju sitambem anna malai mate!”

²⁴Tappana tä'um deem lalam senga' naita pole Pilatus anna mala dilappasam Puang Yesus, anna naua toi: “Kende' manii kahusam illaam pa'bottoam ke tä'i dipaolai lalam penabanna tau buda,” iya mualam uwai anna umbasei limanna dio olona indo tau buda napasindum naua: “Taia kao issangku kamateanna inde dio tau, issammu onna' tiko duka!”

²⁵Natimba'i indo tau buda naua: “Yaboko iko tanahambui dioko tanato'doi kamateanna inde tau. Aka kami' oom too kami' duka' la umpendudunni pa'pogausam ia too sule lako peampoangki!”

²⁶Iya ullappasammi ia Barabas anna ussuai tau untembe' talukum Puang Yesus mane napesuaanni dipäso' yabo kaju sitambem.

Puang Yesus natelle sohodadu dio Banua Gubernur

27:27-31

Mrk. 15:16-20; Yoh. 19:2-3

²⁷Puhai ia too, nababam sohodadunna Gubernur Pilatus Puang Yesus lako Banua Gubernur, anna untambai asanni ingganna solana anna nalilinni lao pali'. ²⁸Mane muäläianni pohebana Puang Yesus anna nabala'ianni juba mellolo pao susi bajunna tomahaja, ²⁹anna muananni songko' susi songko' tomahaja sapo' keduhi anna napasongko'ianni. Anna mane napatetäi tekkem lima kananna[‡] anna sangngim ma'balinguntu' leleni menomba dio olona Puang Yesus anna natelle-tellei naua: “O tomahajanna to Yahudi, kipa'kasalleiko!” ³⁰Anna natikkudui mane naalai indo tekkem dio limanna anna nahabisanni ulunna. ³¹Puhai natelle, naäläiammi sule indo juba napapakeiam anna napapohebai sule indo inna pohebana. Anna mane dibaba lao la dipäso' yabo kaju sitambem anna malai mate.

Puang Yesus dipäso' yabo kaju sitambem

27:32-44

Mrk. 15:21-32; Luk. 23:26, 33-43; Yoh. 19:17-24

³²Mahassanni mellao umpellei kota, iya sitammum mesa tau isanga Simon buttu dio mai kota Kirene. Iya napapassaim sohodadu umpassam indo kaju sitambem. ³³Landa'i lako mesa ongeam si diuam Golgota, kalembasanna ongeam kahohä' ulu, ³⁴iya dibeemmi Puang Yesus

[‡]27:29 napatetäi tekkem lima kananna: si untetä tekkem tomahaja tanda kakuasaanna. Iam too anna umpatetäim duka' tekkem Puang Yesus aka natelle.

anggur diboloi susi pa'du mapäi'na.[¶] Sapo' tappana nasi'dim, iya moka muihu'i. ³⁵Iya napäso'um lako indo kaju sitambem. Puhai, nataba-tabam sohodadu indo pohebana, sapo' naundi. ³⁶Anna mane muokko'i lako indo ampe'na kaju sitambem aka najagai. ³⁷Yabo tondom ulunna Puang Yesus tisuha' diona kasuhunganna anna dipäso'i yabo kaju sitambem naua: IAM TOO INDE YESUS TOMAHAJANNA TO YAHUDI. ³⁸Wattu eta too deem duka' dua pehampo' nasimbahaam dipäso' yabo kaju sitambem, mesa dio tandai kananna anna mesa dio tandai kaihinna. ³⁹Ingganna to muolai ongeam ia too si muillim-illim tandana untelle Puang Yesus napasindum ⁴⁰naua: "Kusanga paha' la ungdakeangko Banua Debata anna la tallungngallo muolaam umpake'de' sule! Maka' Änä'na tongangko Puang Allataala, iya lappasangko kalemu anna tuhungko yabo mai itim kaju sitambem!"

⁴¹Susi toi duka' kapala sando anna to ullatta' Pepaondonganna Musa sola matua ulunna to Yahudi sangngim untelle Puang Yesus ⁴²naua: "Maka' tau senga' mala napasalama', sapo' maka' kalena tä' ohi ia mala napasalama'. Maka' tomahajanna si'da to Israel, iya la tuhummi too yabo mai inde dio kaju sitambem, anna kikatappa'i pole'. ⁴³Anna angga ha ade' Puang Allataala si napassedanni hannu, iya la taitanna' too pole' battu la sule si'da hi Puang Allataala temo napasalama'. La'bi-la'binna aka puha naua: 'Änä'naä' Puang Allataala.'" ⁴⁴Moi indo to dua pehampo' to nasimbahaam dipäso' yabo kaju sitambem untelle duka' Puang Yesus.

Kamateanna Puang Yesus

27:45-56

Mrk. 15:33-41; Luk.

23:44-49; Yoh. 19:28-30

⁴⁵Tappana tängä allo, iya malillim pättäm dio indo pa'lembängam sule lako tette' tallu kahubem. ⁴⁶Tette' tallu kahubem, iya metambam Puang Yesus naua: "Eli, Eli, lama sabaktani?" Kalembasanna, O Puang Allataala, Debatangku, aka hi anna untampeannä'?

⁴⁷Nahingnginna petambana indo to ke'de' eta too, iya deemmi sanaka-naka muuai: "Pehingngiia'i, untambai nabi Elia!"

⁴⁸Iya napasihha' siaham mesa tau muala bunga karang[§] anna nahammei dokko anggur maissu', mane napadekke'i lako pesoka anna napadu'dui pudu'na Puang Yesus. ⁴⁹Sapo' deem piha muuai: "Dako'pa yolo anta petua'ia' battu la sule si'da hi Elia napasalama'!" ⁵⁰Iya metamba pole oom mane umbehoi sungnga'na, iya kattu pole' penabanna.

⁵¹Wattu eta too, indo sampim pesapa' illaam Banua Debata tappa sesse' tipa'dua mengkalao yabo sule dokko. Anna tappa dadi lino' kasalle anna piä'piä' batu kasalle. ⁵²Anna buda lokko' titungka' anna buda toi duka' umma'na Puang Allataala to puham mate dipatubo sule. ⁵³(Puha ham tibangom sule Puang Yesus dio mai alla'na to mate mane le'ba' di duka' indo to tubo sule tama Yerusalem indo kota maseho, lambi' buda tau muitai.)

⁵⁴Tä' deem pada samahea' indo sohodadunna to Roma sola punggabana to mahassam unjagai Puang Yesus tappana nasi'dinni indo lino' kasalle anna muita

[¶]27:34 *anggur diboloi susi pa'du mapäi'na*: Kabiasaanna to eta si napateem aka naua anna mala tä' mapi'di' ke basai tau. Sapo' tä' naaku Puang Yesus la muihu'i aka moka ke tä'i la ussi'dim kamapi'disam ia too.

[§]27:48 *bunga karang*: mangnguhanna batu panga' si tubo dio le'bo', susi lomo' malunä'na.

ingganna indo kadadiam ia too, lambi' ma'kada naua: "Abana Änä'na si'da hia päläe' Puang Allataala!"

⁵⁵Deem duka' buda baine umpetua' mambelai, indo to si untuhu' liui napamoloi mengkalao dio Galilea. ⁵⁶Dio duka' heem eta too Maria Magdalena, indona Yakobus anna Yusuf isanga duka' Maria, anna bainena Zebedeus.

Bakkena Puang Yesus dipatama lokko'

27:57-61

Mrk. 15:42-47; Luk.

23:50-56; Yoh. 19:38-42

⁵⁷Tappana mahammo allo eta too, iya sulem mesa to makaka isanga Yusuf to Arimatea, mesa duka' passikolanna Puang Yesus. ⁵⁸Anna le'ba'i umpel-lambi'i Pilatus umpelau bakkena Puang Yesus. Iya napa'pahentaammi Pilatus anna mala dipaolai pelauanna. ⁵⁹Iya le'ba' siaham Yusuf muala indo bakkena Puang Yesus anna nabalunni sampim mabusa, ⁶⁰anna mane laoi napandam tama lokko' kalena, tä'pi masäe anna napapai dio mesa tanete batu. Puhai, iya ullolimmi batu kasalle natutu'iam ba'bana, mane le'ba'i. ⁶¹Wattu eta too muokko' Maria Magdalena anna mesapi baine isanga duka' Maria dio olona indo lokko'.

Lokko'na Puang Yesus dijagai

27:62-66

⁶²Tappana illaanni allo Katohhoam masiäna indo kadadiam ia too, iya le'ba'im kapala sando sola to illaam kakalebuanna Parisi umpellambi'i Pilatus ⁶³anna nauaanni: "O tuam, kiki-lalai tula'na indo to umbaba bulim hupatau, deem naua indo anna tubopi: 'Illaam allo katallunna la tibangonnä' sule.'" ⁶⁴Dadi kela mala anna ussuako tau unjagai indo lokko' sule lako allo katal-

lunna. Aka maka' tä' la dipateem, iya la sule too passikolanna anna nabokoi indo bakkena mane nauai lako tau buda: "Tubom sule." Nasuhum la tuttuam buda pole' tau dibaba bulim inde la ditinggajona anna la indo lessu'na."

⁶⁵Natimba' Pilatus naua: "Pasolaia' sanaka-naka sohodadu anna le'ba'koa' sola unjagai manappai indo lokko'na."

⁶⁶Iya le'ba'im lako indo lokko' anna napadekke'i mesa tanda indo batu ditutu'iam anna mala naissam ke deenni untungka'i. Anna najagai polepi ba'bana, aka naua deem manii tau untungka'i.

Katibangonganna Puang Yesus dio mai alla'na to mate

28:1-10

Mrk. 16:1-8; Luk. 24:1-12; Yoh. 20:1-10

28 Tappana lessu' allo Katohhoam, la tibukka' kalei baja allo Minggu, iya le'ba'um Maria Magdalena anna mesa solana isanga duka' Maria lao umpetua' indo lokko'.

²Wattu eta too pissananna toko dadi lino' kasalle. Aka tuhum mesa malaika'na Debata yabo mai suhuga anna nalolinni lao indo batu pelapa'na anna muokko'i yabona. ³Indo malaika' pangkähhä susi kila' lindona anna mabusa susi kapa' jubana. ⁴Anna indo to unjagai indo lokko' sangngim lumalla' mahea' lambi' sikalentem bäbä anggasanna to mate.

⁵Sulena lako indo baine, tappa napa'kadai indo malaika' naua: "Daa ummahea'a! Aka setonganna kuissam kuua sulekoa' umpeä Puang Yesus indo to puha dipäso' yabo kaju sitambem. ⁶Sapo' pa'dem inde, aka puham tubo sule umba susi puha natula' loppo' yolona. Maikoa' anna umpetua'ia' indo ongeanna dipandam. ⁷Pasihha'ia' le'ba' anna umpaissanni ingganna passikolanna muua: "Tubom sule Puang

Yesus dio mai alla'na to mate anna le'ba'um lako Galilea napendioloikoa'. Diopi mane silambi'koa'.⁷ Pengkilalaia' inde tula' puha kuuaangkoa'."

⁸Napasihha' siaham indo baine umpellei indo lokko' la diua mahea' anna tilalla' ohi, anna kumondäi lao la umpa'paissangam kaha-kaha ia too lako ingganna passikolanna Puang Yesus. ⁹Lakoi lalam, tappa napellambi'i siaham Puang Yesus anna nauai: "Sitammukia!" Iya bassim uhhopäi siaham Puang Yesus anna nakalapu'i bitti'na napasindum napenombai. ¹⁰Nauaammi Puang Yesus: "Daa ummahea', sapo' laokoa' paissannii ingganna solasubungku, anna mala le'ba'i lako Galilea. Diopi mane siitakam."

**Umpadadi bäbä tula' matua
ulunna to Yahudi la umbahoi
katuboanna sule Puang Yesus**

28:11-15

¹¹Lessu'i indo baine, iya le'ba'um duka' tama kota Yerusalem indo to unjagai lokko'na Puang Yesus anna natula'i lako kapala sando ingganna indo kaha-kaha puha dadi. ¹²Iya sipattuju-tuju siaham indo kapala sando sola matua ulunna to Yahudi. Sahandanni kadanna, iya umbeemmi buda doi' indo sohodadu to unjagai lokko'na Puang Yesus, ¹³anna nauaanni: "Uakoa': 'Indo bakkena Puang

Yesus sule naala bengi passikolanna tappana mamma'kam.'¹⁴ Pissananna hi manii anna naissanni gubernur kaha-kaha ia too, kipa'tula'i manappa ham anna mala tä'koa' naaka."¹⁵ Iya naalam duka' indo doi' anna napalako asanni pada indo dipakahi'diam. Nasuhum tula' iam too napalobum liu to Yahudi sule lako temo.

**Puang Yesus ussua passikolanna
la lao umpa'pakahebaam
Kaheba Katilallasam**

28:16-20

¹⁶Puhai ia too, iya le'ba'um duka' indo sapulo mesapi passikolanna Puang Yesus lako mesa tanete dio Galilea indo puha natulasam loppo' Puang Yesus. ¹⁷Tappana muita Puang Yesus, iya napenombai siaham. Sapo' deempi sanaka-naka solana bata-bata. ¹⁸Iya napengkahuku'im Puang Yesus anna nauaanni: "Ingganna kakuasaam susi yabo suhuga teem illaam inde lino puha asammi dipadokkoannä' lisu pala'ku. ¹⁹Dadi la le'ba'koa' umpellambi'i asam hupatau sule lako lili'-lili'na lino anna umpadadiia' passikolangku. Tedo'ia' sola sanganna Ambe', Änä'na, anna Penaba Maseho, ²⁰anna umpa'guhuia' umpalako ingganna indo puha kupahentaangkoa'. Anna la umpengkilalaia', la tontä liuä' too manontom muundu'koa' sule lako allo ma'katampasanna."

Kaheba Katilallasam natuli' Markus Bätäna issinna

Situhu' to Sahani yolona, inde suha' natuli' mesa tau isanga Markus. Indo Markus si napasola Petrus illaam pa'laoanna umpa'pakahebaam Kaheba Katilallasam. Iai too natulasam Petrus, iam natuli' Markus tama inde suha'.

Illaam inde suha', natuli' Markus diona pa'palakoanna anna pepatudu-anna Puang Yesus. Umpa'pakahebaam Kaheba Katilallasam buttu yabo mai Puang Allataala, naua: "Lambi'um wattunna la umpalako kapahentaanna Puang Allataala. Pengkatoba'koa' ammu katappa'i Kaheba Katilallasam" (1:14-15). Kuasa Puang Yesus la umpabono' to masaki anna uhhambai ingganna setam illaam mai kalena hupatau. Moi anna susi, sapo' untumpu pala' ia Puang Yesus to kasallena to Yahudi lambi' sipattuju-tuju la naaka susi anna malai dipatei Puang Yesus (3:6). Sapo' kaha-kaha ia too inna natula' loppo'um lako passikolanna naua: "La natelleä', la nasitikkudu-kuduiä', la nadahhaä', anna la napateiä'," (8:31, 9:31, 10:33-34). Moi anna naissam loppo'um indo pattujunna, sapo' le'ba' mandi längäm Yerusalem, aka inna la umbeho kalena dipatei anna mala ussolom hupatau dio mai dosana (10:45). Puhai mate Puang Yesus, tubom sule dio mai alla'na to mate (16:1-8).

Ia anna natuli'i inde suha' Markus anna mala makaleso diua Puang Yesus-um too indo To nalanti' Puang Allataala la mepasalama' anna Ia toi Änä'na Puang Allataala (1:1,11,24; 3:11; 5:7; 8:29;

9:7; 14:61-62; 15:39). Anna maelo' duka' Markus umpomatoto' kamatappasanna to umbatai anna mala tontä liu manontom untuhu'i Puang Yesus illaam muoloi ingganna-ingganna sia (8:34-38; 10:29-31).

Lesoanna issinna

1. Pa'pahandusanna pengkähänganna Puang Yesus, Änä'na Puang Allataala (1:1-13)

2. Tanda memängä-mängä napogau' Puang Yesus sola pepatuduanna illaam lembäna Galilea (1:14-6:13)

3. Tanda memängä-mängä napogau' Puang Yesus sola pepatuduanna dio kota sikahuku'na Galilea (6:14-8:30)

4. Längäm Yerusalem Puang Yesus aka la umbeho kalena dipatei (8:31-10:52)

5. Pengkähänganna anna pepatudu-anna Puang Yesus yabo kota Yerusalem (11:1-13:37)

6. Puang Yesus disakka, dihotto', anna dipatei (14:1-15:47)

7. Puang Yesus tubo sule (16:1-20)

Yohanes umpa'pakahebaam la kasuleanna Puang Yesus

1:1-8

*Mat. 3:1-6, 11-12; Luk.
3:3-6, 15-17; Yoh. 1:19-28*

1 Iam too inde pa'pahandusanna Kaheba Katilallasam diona Yesus Kristus Änä'na Puang Allataala.

²Deem tisuha' illaam suha'na nabi Yesaya naua:

"Indem ia pesuaku kupake'de' la umpendioloanganko aka iam too to la umpatokaangko lalam.**

³La dio pohiallasam metamba-tamba naua:

'Patokaanni lalam Debata,

**1:2 Mal. 3:1.

maloloanganni dalam la naolanna.”^{††}

⁴Iam too nakähä Yohanes to si mantedo' anna mengke'de'i dio pohiallasam anna umpalanda' kadanna Puang Allataala naua: “Tihokongannia' ingganna kasalaammu ammu behoia' kalemu ditedo', anna mala naampunni-angkoa' dosamu Puang Allataala.” ⁵Iya sulem buda tau buttu dio mai lembäna Yudea anna Yerusalem umpellambi'i Yohanes. Sangngim muakui dosana anna natedo'i dio Salu Yordan.

⁶Indo Yohanes to si mantedo' umpa'poheba bulu unta anna ma'beke' lollo'.^{‡‡} Anna bati' sola duho si naande.

⁷Anna si napa'pakahebaam naua: “Lessu'ä' too, iya la deemmi sule to kuasa puha Ia anna la kao, aka moi la ma'balinguntu'ä' dio olona umbukkaianni pekapu' sapatunna, tala sihatannä'. ⁸Anna kao-kao uwai kupake untedo'koa'. Sapo' Ia-Ia Penaba Maseho la napake natedosangkoa'.”

Puang Yesus natedo' Yohanes anna napa'sändä'i tomahajanna setam

1:9-13

Mat. 3:13-4:11; Luk. 3:21-22; 4:1-13; Yoh. 1:32-43

⁹Wattu eta too sule Puang Yesus dio mai tondä Nazaret dio lembäna Galilea, iya natedo'um Yohanes dio Salu Yordan.

¹⁰Tappana kende' dio mai uwai, naitam tibukka langi' anna tuhunni Penaba Maseho susi dangam-dangam uhhampoi. ¹¹Anna dihingngi siaham kamaha buttu yabo mai suhuga naua: “Ikom too inde änä' pa'pakamajangku to umpomasannam penabangku.”

¹²Puhanna ia too natettem Penaba Maseho Puang Yesus lako pohiallasam.

¹³Iya tohhom dio appa' pulo benginna napa'sändä'i tomahajanna setam. Wattu eta too illaam alla' olo'-olo' to peande Puang Yesus anna buda duka' malaika' muolaanni.

Puang Yesus umpahandu' pengkähänganna dio Galilea

1:14-15

Mat. 4:12-17; Luk. 4:14-15

¹⁴Puhai ditahungkum Yohanes, iya le'ba'um Puang Yesus lako Galilea umpa'pakahebaam Kaheba Katilallasam buttu yabo mai Puang Allataala.

¹⁵Naua: “Lambi'um wattunna la umpalako kapahentaanna Puang Allataala. Pengkatoba'koa' ammu katappa'i Kaheba Katilallasam.”

Puang Yesus untambai appa' to modala napadadi passikolanna

1:16-20

Mat. 4:18-22; Luk. 5:1-11

¹⁶Mahassanni mellao Puang Yesus uhuttu' bihinna le'bo' Galilea, iya muitam to sipoadi isanga Simon anna Andreas mahassam modala aka abana inna to si modala. ¹⁷Napa'kadaim naua: “Maikoa' ammu tuhu'ä' aka la kupadadikoa' to undala hupatau anna mala natuhu'ä'.”

¹⁸Iya ullappa' siaham duka' dalana anna le'ba'i untuhu' Puang Yesus.

¹⁹Napatahhu' oom mellao, iya tä'pi mambela naola anna muita oom to ma'solasubum isanga Yakobus anna Yohanes änä'na Zebedeus mahassam umpapai dalana illaam

^{††}1:3 Yes. 40:3.

^{‡‡}1:6 *umpa'poheba bulu unta anna ma'beke' lollo'*: Indo pohebana Yohanes susim too indo si napa'poheba nabi Elia yolona (2Haj. 1:8). Aka napemmitai liupi to Yahudi la sule pole Elia tama lino umpatokaam dalam indo To dilanti' la mepasalama' (Mal. 4:5-6, Mat. 11:14; 17:10-13).

lopi. ²⁰Natambai oom Puang Yesus iya mengkalao siaham umpellei ambena illaam lopi sola ingganna to mengkähäna anna le'ba'i natuhu'.

**Puang Yesus umpabono' to
napentamai setam illaam
pa'sambajangam dio Kapernaum**

1:21-28

Luk. 4:31-37

²¹Landa'um Puang Yesus sola passikolanna lako Kapernaum. Tappana lambi' allo Katohhoam, le'ba'um Puang Yesus tama pa'sambajanganna to Yahudi anna ma'pa'guhui. ²²Iya sangngim mängä-mängä tau uhhingngii pepa'guhuanna, aka tä' ia ma'pa'guhu susi indo to ullatta' Pepaondonganna Musa. Sapo' ma'pa'guhu Ia Puang Yesus sitonda kakuasaam.

²³Siampu' eta too illaam indo pa'sambajangam, deem mesa tau napentamai setam. Indo tau kaoli-oli naua: ²⁴“O Yesus to Nazaret, la muaka hakam kami? Abana isanga suleko la ungdakeikam? Aka kuissam kuua iko To Masehoko buttu di Puang Allataala.”

²⁵Sapo' tappa nakuapai Puang Yesus naua: “Pengkamma'ko, pessubungko illaam mai kalena itim tau.”

²⁶Indo setam undodä' yolo indo tau mane messubunni napasindum kumissä'. ²⁷Tä' deem pada sanakamängä-mängäi tau buda, napolalam sipa'tula-tula' naua: “Aka hia isanga indea'i anna malai umpahe' ingganna setam nasua lao? Mesa pepa'guhuam bakahu ponno kakuasaam!”

²⁸Napolalam tappa molele-lele kaheba diona Puang Yesus illaam lembäna Galilea.

**Puang Yesus umpabono'
buda to masaki**

1:29-34

Mat. 8:14-17; Luk. 4:38-41

²⁹Messubunna illaam mai pa'sambajangam, le'ba'um Puang Yesus sola Yakobus anna Yohanes lako banuanna Simon sola Andreas. ³⁰Sulei lako, iya ullambi'um pasananna Simon baine, mahassam metindo aka lumalla'. Natulasam siaham sakinna lako Puang Yesus. ³¹Iya le'ba' siahanni lako ongeanna indo baine, naanda'i limanna anna nabangonganni, iya tappa masapu eta siaham sakinna anna tappa nabela ma'tahia.

³²Tappana lendu' allo, le'ba'im tau lako Puang Yesus umpasola ingganna to masakinna anna to napentamai setam. ³³Tapakala anna ma'silullu'um pa'tondä' dio olo ba'ba. ³⁴Iya buda tau napabono' eta too, to ussi'dim ma'hupa-hupa saki anna buda setam nahambai. Anna tä' napäbäi indo setam ma'kada-kada aka sangngim naissam naua Puang Yesus-um too indo To dilanti' la mepasalama'.

**Puang Yesus ma'pa'guhu
illaam lembäna Galilea**

1:35-39

Luk. 4:42-44

³⁵Makale'na mane nannahi anna bangommi Puang Yesus anna le'ba'i lako ongeam mabuni-buninna ma'sambajam. ³⁶Sapo' le'ba' nahuttu' Simon sola solana. ³⁷Tappana nalambi' nauaammi: “O Tuangguhu nasipeä-peäiko tau.”

³⁸Sapo' natimba' naua: “La lu lako opakia' ongeam senga' lako inde botto sikahuku'ta, anna mala kupa'guhu duka' to eta diona Kaheba Katilallasam, aka iam too kutungka sule.” ³⁹Iya ulleleim pa'sambajanganna to Yahudi dio lem-

bäna Galilea umpa'paissangam Kaheba Katilallasam anna buda duka' setam nahambai.

**Puang Yesus umpabono'
mesa to dolengam**

1:40-45

Mat. 8:1-4; Luk. 5:12-16

⁴⁰Pissam wattu, deem mesa to dolengam sule umpellambi'i Puang Yesus anna ma'balinguntu'i dio olona anna nauai: "Kuissam kuua malaä' umpabono' ke umpoelo'i."

⁴¹Iya tappa tigaha' penabanna aka häntä buana, lambi' uhhaka' indo tau anna nauai: "Maelo'ä', bono'ungko!"

⁴²Iya masapu eta siahanni sakinna.

⁴³Tappa nasua le'ba' anna napakahi'dii

⁴⁴naua: "Pengkilalai manappai le, tä' too la mala untulasam tau senga' inde pa'pogau'ku. Sapo' la le'ba'ko umpa'paitaam kalemu lako sando anna la umbabako bua pemala'mu, umba susi puha napepaondongam Musa. Aka la mendadi tanda lako tau buda diona kabonosammu."^{¶¶}

⁴⁵Sapo' indo tau le'ba' dia napalele diona ia too, anna natula' lako dio mai nasuhum tä'um pole' si ändä-ändängam Puang Yesus mentama kota, angga hannu tohho lako ongeam kasala-salaanna. Sapo' moi anna susi, tä' siam duka' kattu sule tau umpellambi'i dio mai ingganna ongeam.

**Puang Yesus umpabono'
mesa to mate kalena**

2:1-12

Mat. 9:1-8; Luk. 5:17-26

2Pissananna lessu'i sanaka amo benginna, sule pole oom Puang Yesus lako kota Kapernaum. Iya

napelele siaham issinna kota kasuleanna dio indo banua. ²Iya sule siahanni tau ma'silullu' ullombai lambi' sisippi'-sippi' illaam indo banua anna pih'i sule lako olo ba'ba napobua' tau buda. Iya ma'tula'um Puang Yesus umpalanda' kadanna Puang Allataala. ³Mahassanni ma'tula', sule pole ohanni sanaka-naka tau umpasola mesa to mate kalena appa' tau umbullei. ⁴Sapo' tä' deem naola umbabai lako olona Puang Yesus aka nalabai tau buda. Iya lu längännim ia papa anna naso'boii sipatunna Puang Yesus mane nalollohanni dokko olona indo to mate kalena sitonda ampa'na. ⁵Tappana naita Puang Yesus kamatappasannai, iya ma'kadam lako indo to mate kalena naua: "O änä'ku, diampunnim dosamu."

⁶Sapo' eta too, dio duka' heem sanaka-naka to ullatta' Pepaondonganna Musa. Iya nauaim illaam penabanna: ⁷"Akanna deenni tau ma'kada susi? Aka hia umbai' anna muangga'i kalena sipadaam Puang Allataala? Aka tä' deem tau moi podo la mesa la mala muampunni dosa, sulibanna Puang Allataala!" ⁸Sapo' tappa nalosa Puang Yesus issi penabanna indo to ullatta' Pepaondonganna Musa. Iya ma'kadam Puang Yesus naua: "Akanna ma'pikki' susi hako' iko? ⁹Mennaka la madomi' dadi lako inde to mate kalena, ke diuaanni: 'Diampunniammoko dosamu;' anna la diuaam: 'Bangongko, äkä'ko ampa'mu ammu pellao'?" ¹⁰Sapo' la kupa'patandaam temo anna malaia' ungaleso manappa muua illaam inde lino kuasa'i To diuaam Änä' Mentolino muampunni dosa." Mane ma'kadai lako indo to mate kalena naua: ¹¹"Bangongko, babai ampa'mu ammu le'ba' lako banuammu!"

^{¶¶}1:44 Sand. 14:1-32.

¹²Iya bangom siaham indo to mate kalena muäkä' ampa'na anna messub-
unni naita indo tau buda. Iya sangngim
pilla' to muitai anna umpa'kasallei
Puang Allataala naua: “Maneanna si'da
pole' diita inde susi.”

**Puang Yesus untambai Lewi
napadadi passikolanna**

2:13-17

Mat. 9:9-13; Luk. 5:27-32

¹³Puhai ia too le'ba' oom Puang Yesus
lako bihinna le'bo' Galilea. Eta too buda
oom tau sule untammui iya napa'guhumi.

¹⁴Pissananna mahassam oi mellao, iya
muitam mesa tuam passima isanga Lewi
änä'na Alfeus muokko' illaam kätto'na.
Napa'kadaim Puang Yesus naua: “Maiko
anna untuhu'ä.” Iya ke'de'um duka' anna
le'ba'i natuhu'.

¹⁵Mahassanni mangngande Puang
Yesus sola passikolanna dio banuanna
Lewi, iya deem duka' sanaka-naka
tuam passima sola tau senga' sola-sola
mangngande, aka budam tau susi
untuhu'i. Ingganna indo to sule
si nasangai to Yahudi to madosa.

¹⁶Tappana naita sanaka-naka to ullatta'
Pepaondonganna Musa to mentama
kakalebuanna Parisi, ma'kadam lako
passikolanna Puang Yesus naua:
“Akanna naakui tuangguhummua'
sola-sola mangngande tuam passima
anna to madosa senga'?”

¹⁷Sapo' nahingngi Puang Yesus indo
pekutanaanna, iya natimba'um naua:
“Tä' tia deem to bono' umpahalluam
tuandotto', anggam tia to masaki. Kao-

kao suleä' inde lino taia to ussanga
kalena malolo la kutambai, sapo' suleä'
untambai to madosa.”

**Pentimba'na Puang Yesus lako to
umpekutanaam diona puasa**

2:18-22

Mat. 9:14-17; Luk. 5:33-39

¹⁸Pissam wattu mahassanni
puasa passikolanna Yohanes anna
passikolanna to illaam kakalebuanna
Parisi. Iya sulem tau umpellambi'i
Puang Yesus anna mekutanai naua:
“Maaka hia anna puasai ia passikolanna
Yohanes sola passikolanna to illaam
kakalebuanna Parisi anna tä' ia
passikolammu?”^{§§}

¹⁹Natimba'im umpake pehapangam
naua: “Aka la deem daka tia to ullomba
kakabengam tä' la mangngande ke diopi
heem indo to mane dipakebaine? Man-
nassa anna tä'i deem!”²⁰Sapo' la deem
wattunna indo to mane dipakebaine la
diäläi illaam mai alla'-alla'na to ullom-
bai. Iya etapi too pole' mane puasai.

²¹Tä' tia deem tau la umpopetampi'
sarpim bakahu lako poheba malusa,
aka tingkahussui too indo sarpim
bakahu, iya tuttuam kalua'um sesse'na
indo poheba malusa. ²²Susi toi duka'
tä' tia deem tau la muala anggur
bakahu anna napatamai pa'ponggeam
malusa. Aka indo anggur bakahu mala
utesseam pa'ponggeam malusa.
Iya katampasanna bassim labu'.
Dadi anggur bakahu manggi' duka'
dipalutama pa'ponggeam bakahu.”*

^{§§}**2:18** puasa: Petua' dioi pemasiä'na Mat. 4:2.

***2:22** Petua' dioi pemasiä'na Mat. 9:17.

Pentimba'na Puang Yesus lako to illaam Parisi diona passikolanna mengkähä illaam allo Katohhoam

2:23-28

Mat. 12:1-8; Luk. 6:1-5

²³Pissam wattu illaam allo Katohhoam umpa'tängäi bela' gandum Puang Yesus sola passikolanna. Mahassam siam mellao napasindum siam ia passikolanna muala gandum. ²⁴Iya ma'kadam sanaka-naka to illaam kakalebuanna Parisi lako Puang Yesus naua: "Petua'pi inde lako passikolammu, maaka hia anna untekkai pelahangam illaam peadasam umpogau' tala malanna dikähä illaam allo Katohhoam?"

²⁵⁻²⁶Natimba'im naua: "Tä'paka' tiko deem umbata diona pa'pogau'na Daud indo anna tadea'i wattunna Abyatar muanda'i babanganna sando too'? Wattu eta too le'ba' Daud tama bahum kapenombaam anna naandei indo hoti puha dipehumalasang mane nabeenni duka' lako pentuhu'na, moi kela daa anggam tia sando mala muandei.†

²⁷Aka allo Katohhoam dipadeem la napakeguna hupatau, taia hupatau la napakeguna allo Katohhoam.

²⁸Setonganna Kao hia Änä' Mentolino puäna allo Katohhoam."

Puang Yesus umpabono' to mate limanna sabali illaam allo Katohhoam

3:1-6

Mat. 12:9-14; Luk. 6:6-11

3 Pissam wattu tama oom pa'sambajanganna to Yahudi Puang Yesus. Illaam indo pa'sambajangam deem mesa tau mate limanna sabali.

²Eta too deem sanaka-naka tau maelo' umpeängam tuntungam su'be' Puang Yesus, iya napaolamata lium aka nauai: "Umba ke toko umpabono'i indo to masaki illaam allo Katohhoam anna mala deem dipa'palu'bi'."

³Pissananna ma'kadam Puang Yesus lako indo to mate limanna sabali, naua: "Ke'de'ko illaam inde tängä-tängäna tau."

⁴Anna mane mekutana lako tau buda naua: "Umbanna la sihatam dipogau' ke illaanni allo Katohhoam, kamapiaam daka, kakadakeam daka? La umpesäkäi hakika solata, la dipatei haka?" Sapo' ta' deem tau mentimba' moi podo la mesa.

⁵Iya keaha'um Puang Yesus lako to illaam kakalebuanna Parisi, sapo' häntä ohi buana aka tää'i ungkamasei solana. Unnenne'i asammi indo tau buda anna mane ma'kada lako indo to mate limanna naua: "Äkä'i limammu!" Iya muäkä'um duka' limanna, iya tappa bono' eta siaham.

⁶Tappa messubunni siaham indo to illaam kakalebuanna Parisi anna le'ba'i sipattuju to muundu'i tomahaja Herodes la naaka susi anna mala dipatei Puang Yesus.

Buda to masaki umpellambi'i Puang Yesus aka kakuasaanna umpabono'i

3:7-12

⁷Lessu'na ia too muäläim kalena Puang Yesus sola passikolanna lu lako le'bo' Galilea. Iya buda tau muula'i, to buttu dio mai Galilea anna dio mai Yudea. ⁸Susi duka' yabo mai Yerusalem, Idumea, dipe mai lambam libanna Salu Yordan tandai mata allo, dio mai lembäna Tirus anna lembäna Sidon. Aka napeleim ingganna indo puha napogau' Puang Yesus. ⁹Ussuam passikolanna napatokaam lopi la naongei

†2:25-26 1Sam. 21:1-6 2:26: Sand. 24:9.

aka indana nasissippi'-sippi'i tau buda.
¹⁰Aka ingganna to masaki ma'silullu' lako sa'dena maelo' asam muantii aka budam napabono'. ¹¹Anna ingganna to napentamai setam muitanna Puang Yesus tappa menomba dio olona anna metambai naua: "Ikom too Änä'na Puang Allataala!" ¹²Sapo' indo ingganna setam tä' si'da-si'da napäbäi Puang Yesus la naua pole susi indo to naua ingngena'.

**Puang Yesus muäkä'
 sapulo dua pesuana**

3:13-19

Mat. 10:1-4; Luk. 6:12-16

¹³Puhai, lu längämmi tanete Puang Yesus anna untambai tau pada indo to napohäe. Iya suleim. ¹⁴Napileim sapulo dua to la napasola lelem anna nauaanni: "Ikonna' too inde la mendadi pesuaku la umpa'paissangam Kaheba Katilallasam ¹⁵anna la kubeengkoa' kakuasaam uhhambai setam." ¹⁶⁻¹⁹Indem ia sanganna indo to sapulo dua:

Simon (si nauaam toi Puang Yesus Petrus)

Yakobus anna Yohanes (bassim änä'na Zebedeus nasangai Boanerges, kalembasanna "peänäsanna guntu' yabo langi").

Andreas

Filipus

Bartolomeus

Matius

Tomas

Yakobus (änä'na Alfeus)

Tadeus

Simon to illaam kakalebuanna Zelot,[‡]

Yudas Iskariot indo to la umbalu' Puang Yesus.

**Kuasanna Puang Yesus anna
 tomahajanna setam**

3:20-30

Mat. 12:22-32; Luk. 11:14-23

²⁰Puhanna ia too ma'pasulem Puang Yesus anna tamai banua. Iya ma'silullu' oom tau buda ullombai lambi' tä'um napempakalai mangngande sola passikolanna. ²¹Iya nauam piha tau: "Tatta'um." Iya nahingnginna kasahapuanna, le'ba' siahm natambai.

²²Eta too sule duka' sanaka-naka to ullatta' Pepaondonganna Musa yabo mai Yerusalem. Iya nauaim: "Kuasanna hi tia Beelzebul battu diua tomahajanna setam illaam kalena anna malai uhhambai lao setam."

²³Iya natambaim Puang Yesus anna natulasanni pehapangam naua: "La maakam ia susi tomahajanna setam la uhhambai lao setam? ²⁴Aka to mesa kapahentaam la pantam lao anna la sibali-bali paka iai, tä' tia la mala manontom. ²⁵Susi duka' to sahapu illaam dapo'. Maka' tä' deem kakalebuanna, kasahapuam ia too la henggä. ²⁶Susi siam too duka' kapahentaanna setam. Maka' tä' deem kamesaanna anna anggam sipobali-bali, kapahentaam ia too tä' la masäe anna pa'dem. ²⁷Umba susi mesa to maboko mentama banuanna mesa to matoho la napabokoi la napungo hi tia yolo indo to matoho mane naalai indo la nabokona, susimä' too duka' kutaloi yolo tomahajanna setam anna mane kuhambai lao indo pentuhu'na.

²⁸Aka kutulasangkoa' temo kuua: ingganna hupanna dosa anna pantelle mala asam naampunni Puang Allataala, sulibanna untelle Penaba Maseho.

²⁹Sapo' to untelle Penaba Maseho tä'um ia la mala diampunni aka

[‡]3:16-19 kakalebuanna Zelot: kakalebuanna to umbali kapahentaanna Roma.

pa'pogausam ia too dipodosam ia sule lako salako-lakona.”

³⁰Ma'kada susi Puang Yesus aka deem tau untellei naua: “Napentamai setam.”

**Iai too umpogau' pa'elo'na
Puang Allataala iam
too sahapunna Puang Yesus**

3:31-35

Mat. 12:46-50; Luk. 8:19-21

³¹Puhai ia too sulem indona anna solasubunna Puang Yesus. Iya naampaim dio sulibam anna nauai: “Pa'kadaianä Puang Yesus.” ³²Wattu eta too buda tau muokko' umpali'i. Iya nauaammi: “O Tuangguhu, illaam sulibam indomu anna solasubummu napeäko!”

³³Natimba' naua: “Aka mennea' iko diuaam indoku anna solasubungku?” ³⁴Mane napalelei mata indo to umpali'i anna nauai: “Indem ia mai diuaam indoku anna solasubungku ä. ³⁵Aka mennea-menna umpalako pa'elo'na Puang Allataala, tau iam too sihhapam solasubungku anna indoku.”

**Pehapangam diona
mesa to mangngambo'**

4:1-20

Mat. 13:1-23; Luk. 8:4-15

4 Pissam wattu ma'pa'guhu oom Puang Yesus dio bihinna le'bo' Galilea. Iya sulem buda tau ma'silullu' ullombai nasuhum tä'um ia deem naonget napobua' tau buda. Iya lu längämmi Ia lopi illaam le'bo' anna muokko'i. Anna yabo ia galantangam tau buda. ²Iya umpalaom buda pepa'guhuam sapo' natula' umpake pehapangam. Ma'kada naua: ³“Pehingngiia', deem mesa tau le'ba' mangngambo'. ⁴Tappana naambo' indo

bannena, iya deemmi sabaheam tappa lako lalam. Iya suleim dassi naande sampe puha. ⁵Deem tappa lako bobom batu, nasuhum masimpam tubo aka manipi' litä'na. ⁶Sapo' tappana naalloi, iya malasso siaham nasuhum mabangi aka tä' mandalam waka'na. ⁷Deem toi tappa lako alla' kuhha keduhi. Tappana tuttuam mahombo indo kuhha, iya umpissim indo tanangam nasuhum tä' mala kembua. ⁸Anna sabaheam tappa lako litä' malompo. Iya mapi'dä' ia tubona nasuhum kembua tiluppi'-luppi'. Deem tiluppi' tallu pulo, deem tiluppi' annam pulo, anna deem tiluppi' sahatu'.”

⁹Puhai ia too nauam Puang Yesus: “Lako ingganna ma'hupatau pahallu la umpatanam talinganna umpalempo sulim patomalinna anna napailaam penabai inde tula'ku!”

¹⁰Tappana angga ham Puang Yesus sola pentuhu'na anna sapulo dua pesuana, iya mekutanaim naua: “Aka hia kalembasanna indo pehapangam ingngena'?”

¹¹Iya natimba'im naua: “Angganna' iko dipaissanni indo kada ditambim diona kapahentaanna Puang Allataala. Sapo' ditula' pehapangam ia lako tau senga'. ¹²Anna mala:

‘Moi la naita, tala naalai akkalanna, moi la nahingngi, tä' siam la naissam napekalembasam.

Aka ma'pasule manii anna naampunnii Puang Allataala.”^f

¹³Mane nauai: “Tä' daka tiko muissanna' inde pehapangam? Aka maka' susi, iya la tä' dia' too muissam pehapangam senga'. ¹⁴Indo to mangngambo' dipasihhapam to untula' Battakadanna Puang Allataala. ¹⁵Banne tappa lako lalam dipasihhapam to uhingngi Battakadanna Puang Allataala sapo' nahap-

^f4:12 Yes. 6:9-10.

pai siam tomahajanna setam. ¹⁶Banne tappa lako bobom batu, dipasihhapam ia to uhhingngi Battakadanna Puang Allataala anna tappa natahima sola ponno penabai. ¹⁷Sapo' tä' siam masäe aka tä' kewwaka' illaam kalena. Deenna too kamasussaam anna pandahhaam uhhuai aka untuhu'i Battakadanna Puang Allataala, iya soho' boko' siaham. ¹⁸⁻¹⁹Banne tappa tama alla' kuhha keduhi dipasihhapam ia to uhhingngi Battakadanna Puang Allataala sapo' anggam malallam umpikki' salu katuboanna. Iya napakalandom ia kulle, muula' dam ia kamohäeanna lako ingganna-ingganna sia, ungkalembeim ia Battakadanna Puang Allataala nasuhum tä' mala kembua. ²⁰Anna banne tappa lako litä' malompo dipasihhapam ia to uhhingngi Battakadanna Puang Allataala anna natahima mapiai nasuhum kembua tiluppi'-luppi'. Deem tiluppi' tallu pulo, deem tiluppi' annam pulo, anna deem tiluppi' sahatu'."

**To deem kamohäeanna
umpehingngii Battakadanna Puang
Allataala la dihängänniam polepi**

4:21-25

Luk. 8:16-18

²¹Iya ma'kada oom Puang Yesus lako tau buda naua: "Tä' tia deem tau la umpau' lampu anna nasalongo'i baka battu diua napadio ibi' sahitgam sapo' napayabo hi tia inna ongeanna. ²²Anna mala tä' deem aka-aka la tibuni sapo' la dipatandaam asam anna tä' deem aka la disamboi sapo' la dipakäleängam asam. ²³Lako ingganna ma'hupatau pahallu la umpatanam talinganna umpalempe sulim patomalinna anna napaillaam penabai inde tula'ku!

²⁴Dadi pehingngii manappaia' inde pepatuduanguku! Aka maka' deem kamohäeammu umpehingngii Battakadanna

Puang Allataala la nahängänniam polepoko Puang Allataala. ²⁵Aka menna-menna umpaillaam penabai, tau ia too la dihängänniam polepi kapaissanganna. Sapo' to moka umpaillaam penabai, iya la diäläi pissam ia lao indo kapaissangam nasanga deemmi illaam kalena."

**Kapahentaanna Puang Allataala
mellao tibuni sapo' manontom**

4:26-29

²⁶Umpatahhu' liupi pepa'guhuanna Puang Yesus naua: "Kapahentaanna Puang Allataala sihhapam to muambo' banne lako litä'. ²⁷⁻²⁸Puhai naambo' nappelleim lao. Iya napahandu'um mukku', lobo', kendaum, kembua, sule lako kessi, tä' ia naissam indo to mangngambo' aka abana inna litä' ia umpatuboi. ²⁹Tappana matäsä' buana, iya sulem indo puäna anna nakandaoui aka lambi'um wattunna dipepahe."

**Pehapangam diona
kapahentaanna Puang Allataala
la tuttuam tiballa' kalua'**

4:30-34

Mat. 13:31-35; Luk. 13:18-19

³⁰Ma'kada pole oom Puang Yesus naua: "Akam la dipasihhapangam kapahentaanna Puang Allataala? ³¹Kapahentaanna Puang Allataala sihhapam mesa lise'na sesawi ditanam lako bela'. Ingganna tanangam ma'lise', lise'nam kaju sesawi handam bahinni'. ³²Sapo' tappana ditanam dio bela', iya tubom dio mai mahombo lambi' kasalle ia anna la tanangam senga' illaam bela', nasuhum mala naongeti dassi ma'sehä täkena aka kationgam."

³³Susim too Puang Yesus umpalanda' kadanna Puang Allataala sola ma'hupahupa pehapangam la malanna nais-sam to uhhingngii. ³⁴Dadi tä' deem si ma'tula' senga' ke tä'i nababa illaam pe-

hapangam. Anna maka' lu lako mandi passikolanna si napomasiä' si mesa ia.

Puang Yesus umpamattam hibu' tatta'

4:35-41

Mat. 8:23-27; Luk. 8:22-25

³⁵Kahubenni indo allo eta too, ma'kada oom lako passikolanna naua: "Maikoa' anna ma'lopikia' lambam libam inde le'bo'." ³⁶Iya umpelleim tau buda anna ma'mesai längäm indo lopi naongeti muokko' Puang Yesus ingngena' aka la napasola lao. Yabo asanni, iya mengkalaom, anna budapi lopi senga' untuhu'i.

³⁷Sapo' tä'pi mambela-bela naola, anna sule ham hibu' tatta' sitonda bombam kasalle untappi indo lopinna, napolalam nasopa'i uwai, iya saidi' tatallam.

³⁸Wattu eta too mahassam Ia mamma' Puang Yesus dio ampa' illau' tämpä'na lopi. Iya natundammi napasindum naua: "O Tuangguhu akanna ma'lembe-lembe hako lko? Moi kela daa la tallammakia'."

³⁹Iya bangommi duka' anna umpamattanni indo hibu' tatta' anna mane ma'kada tama le'bo' naua: "Hapa'ko, mattangko!" Iya mattam siaham indo hibu' tatta' anna hapa' indo bombam sampe malino siaham indo le'bo'. ⁴⁰Puhai ia too ma'kadam lako passikolanna naua: "Akanna mahea' sugali' hako' iko? Tä' liu pokoka' tiko uhhannuannä'?"

⁴¹Iya silelem mängä-mängä anna mane sipa'tula'-tula' naua: "Tau menna hia isanga inde! Aka moi hibu' sola bombam mala toi napahe'!"

To napentamai setam dio Gerasa napabono' Puang Yesus

5:1-20

Mat. 8:28-34; Luk. 8:26-39

5 Puhai ia too, iya landa'um Puang Yesus sola passikolanna libam bihinna le'bo' Galilea dio attasa'na to Gerasa. ²Ia sia tuhunna Puang Yesus yabo mai lopi, iya napellambi'im mesa to napentamai setam, buttu dio mai ku'bu'.

³Indo tau sitohho lakom ku'bu', anna tä'um mala disäke', aka moi hante bassi nakattu-kattu toi. ⁴Aka deemmi si nasändä' tau nasangkala anna nahante bassii sapo' nakattu-kattu indo hante bassi anna napolo-polo indo sangkala. Iam too anna nasoho'i asammi tau. ⁵Allo bengi si ussambai ku'bu' anna tanetene nete napasindum kaoli-oli, anna si untutu'i kalena batu lambi' basa-basa.

⁶Tappana muita mambela Puang Yesus tuhum yabo mai lopi, iya lumumpa'um napellambi'i anna menombai dio olona.

⁷⁻⁸Iya ma'kadam Puang Yesus lako indo setam illaam kalena indo tau naua: "Pessubungko lao setam!" Iya kumissä' gegem anna meolii naua: "O Yesus Änä'na Puang Allataala To Handam Matande, la muaka hä' kao? Pa'pindaiko Puang Allataala keta tä'i la undahhää'."

⁹Iya nakutanaim Puang Yesus naua: "Aka sangammu?"

Natimba'um naua: "Isangaä' Legion aka budakam." ¹⁰Iya napa'sule-suleim mengkahumase-mase lako Puang Yesus anna napelau naua: "Kela mala anna tä'kanni uhhambai lako lembä senga'."

¹¹Sikahuku' indo ongeam naongeti deem buda babi mahassam menduhu' lako pili' tanete. ¹²Iya napelaum indo setam lako Puang Yesus naua: "Kela

§5:9 Legion: kalembasanna, Massa'bu.

mala ussua tamakam kalena inde lako babi.”¹³ Napatuhu'im duka' Puang Yesus pelauanna, iya messubum siaham illaam mai kalena indo tau anna umpentamai indo babi buda. Pissananna ham ia sikakondä indo babi buda untobängam bäbä kalena dokko kumila' tahhu' dokko le'bo', lambi' mate asam napusa'i uwai (umbai' deem la dua sa'bu budanna).¹⁴ Iya sikalumpa'um le'ba' indo to unjagai babi napalele diona kaha-kaha ia too lako kota anna tondä' sikahuku'na. Iya le'ba'im duka' tau umpetua'i kadadiam ia too.¹⁵ Sulei lako Puang Yesus indo tau, iya ullambi'um indo to bali napentamai setam mahassam muokko' anna ma'pohebam pole', aka malinom. Sangngim mahea'um tau muitai.¹⁶ Inganna to muitai umpa'tulasam indo to sule maaka susi indo to napentamai setam inggena' anna indo babi buda.¹⁷ Iya napelaum indo pa'botto lako Puang Yesus naua: “Kela mala anna tä'ko inde bottoki.”

¹⁸ La längänni lopi Puang Yesus, iya napelaum indo to bali napentamai setam naua: “O Tuangguhu, mala haka ke umpasolaä' kao?”

¹⁹ Sapo' tä' napäbäi, anggam nauaam: “Pa'pasuleko lako tondä'mu anna untulasanni kasahapuammu anna satondä'mu indo puha napogausangko Debata, anna maaka susi pa'kamasena Debata tama kalemu.”²⁰ Iya le'ba'um indo tau anna natula'i illaam lembäna Sapulo Kota indo puha napogau' Puang Yesus tama kalena. Iya sangngim pillä' tau uhhingngii.

Änä'na Yairus napatubo sule Puang Yesus anna umpabono' mesa baine masäem nahua saki baine

5:21-43

Mat. 9:18-26; Luk. 8:40-56

²¹ Tappana lamban Puang Yesus anna passikolanna ma'pasule, iya ma'silullu'oom tau ulleboi dio bihim le'bo'.

²² Iya sulem duka' mesa tau isanga Yairus. Tau ia too mesa to pebaba illaam pa'sambajanganna to Yahudi dio kota eta too. Muitanna Puang Yesus, iya sule siaham menomba dio olona anna²³ mengkahumase-masei melau naua: “Deem mesa änä'ku baine mahassam masaki masanta' sapo' kela malako laoki' sola anna uhhaka'i anna mala bono'.”

²⁴ Iya le'ba' siaham sola Yairus. Buda tau untuhu'i nasissippi'-sippi'i.

²⁵ Sapo' illaam alla'-alla'na indo tau buda, deem mesa baine sapulo duam taunna nahua saki baine tä' deem monda.²⁶ Budam tuandotto' naongei ma'pakuli, iya puha mandam kullena napopamaja' sapo' tä' deem moi podo la mesam mala umpabono'i. Tuttuam kehängäm mandi sakinna.²⁷ Baine ia too pembudam uhhingngi tanda memängä-mängä si napogau' Puang Yesus. Iya umpealla'um tau buda anna umpengkahuku'i boko'na Puang Yesus²⁸ aka naua: “Assala'na mala moi podo kuantim bajunna, iya la malamä' bono'.”

²⁹ Iya naantinna bajunna, monda siaham sakinna anna maläppu'um nasi'dim.

³⁰ Puhanna ia too, nasi'dim siaham Puang Yesus deem kuasa messubum illaam mai kalena. Iya mengghihi'um lako boko'na anna mekutanai naua: “Menna hia muanti bajungku?”

³¹ Iya natimba'im passikolanna naua: “Muita haka inde mai tau mesissippi'-sippi'i, akanna mekutana ohako?”

³²Sapo' tontä umpalilim lao matanna umpeä indo to muantii bajunna. ³³Iya ussi'dingammi kalena indo baine to muantii, lambi' tappa lumalla' mahea' napasindum le'ba' lako olona menomba anna naakui naua: "O Tuangguhu, kao hi to kao muantiko aka maelo'ä' la bono'."

³⁴Iya ma'kadam Puang Yesus lako indo baine naua: "O änä'ku, bono'ungko aka unkatappa'ia'. Laongko, la naundu'ko masakke naapi' mahuhindim, aka bono' manappangko tia."

³⁵Mahassampi ma'tula' anna sule hannu to untambai Yairus dio mai banuanna naua: "Indo änä'mu, matem. Damom too ussussai Tuangguhu."

³⁶Tä' napehingngii Puang Yesus pada indo to ma'tula' anna ma'kadai lako Yairus naua: "Daa ummahea', pomanon-tonni kamatappasammu!" ³⁷Iya napatahhu' siam mellao sapo' anggam napäbäi untuhu'i Petrus anna indo to sipoadi Yakobus anna Yohanes.

³⁸Pissananna landa'i lako banuanna Yairus ullambi'um tau sikaoli muuhhu'. ³⁹Iya tamam banua Puang Yesus anna ma'kadai lako indo to sikauhhu' naua: "Daa ussahhoa' aka itim änä'-änä' tä' tia mate sapo' mamma' bäbä hi tia!" ⁴⁰Sapo' napetabai mandi. Iya nasuaim Puang Yesus messubum mane tamai tambinna indo to mate, anggam napasola indona sola ambena anna tallu passikolanna.

⁴¹Sulena tama naanda'im limanna anna nauai: "*Talita kum,*" kalembasanna: O änä'ku, bangongko!

⁴²Iya tappa bangom siaham indo änä'-änä' anna kalao-laoui. (Indo änä'-änä' sapulo duam taunna.) Ingganna to muitai kadadiam ia too sangngim mängä-mängä. ⁴³Iya ma'pakahi'dim Puang Yesus lako indo to muitai naua: "Pissa'-pissa' ahanna' la untula' lako tau inde kadadiam." Mane nauai: "Beennia' kinande."

Ditumpu pala' Puang Yesus dio Nazaret

6:1-6

Mat. 13:53-58; Luk. 4:16-30

6 Iya umpelleim indo ongeam Puang Yesus anna lu lakoi tondä'na sola passikolanna. ²Lambi'i allo Katohhoam napahandu'um Puang Yesus ma'pa'guhu illaam pa'sambajanganna to Yahudi. Eta too buda tau umpehingngii pepa'guhuanna. Sapo' mängä-mängä asam uhhingngii pepa'guhuanna aka naponnoi kuasa lambi' sipa'tula'-tula' naua: "Naala umba hia ngei isanga kamanähängam? Kakeakasam aka hia isanga illaam kalena? Maaka hia anna malai Ia umpapia tanda memängä-mängä? ³Taia haka tia indo tukam kaju änä'na Maria, solasubunna Yakobus, Yoses, Yudas, anna Simon? Anna indo solasubunna baine sola-sola liukia' inde?" Ingganna to uhhingngii sangngim meali-ali nasuhum untumpu pala' Puang Yesus.

⁴Iya ma'kadam Puang Yesus lako indo tau buda naua: "Mesa nabi dipa'kasallei ke lakoi ongeam senga', sapo' tä' ia dipa'kasallei ke illaanni botto litä'na, alla'-alla'na kasahapuanna anna illaam banuanna." ⁵Dadi tä'um umpogau' tanda memängä-mängä sulibanna uhhaka' sanaka-naka to masaki lambi' bono'.

⁶Tä' deem pada samängä-mängä Puang Yesus muita satondä'na aka tä' nakatappa'i.

Puang Yesus ussua suhona umpa'pakilalaam diona katihokongam

6:6-13

Mat. 10:5-15; Luk. 9:1-6

Iya le'ba'um Puang Yesus ullelei mobotto-bottoam napasindum

ma'pa'guhu. ⁷Untambai indo sapulo dua suhona anna nabeenni kakuasaam uhhambai setam, mane nasuai tungga' lao si dua. ⁸⁻⁹Anna napakahi'di naua: “Angganna' mala umbaba poheba illaam kalemu, tekkem, anna sapatummu. Sapo' tä'um ia la manggi'a' umbaba tinallo, ongeam tinallo, anna doi'.” ¹⁰Mane napakahi'di polei naua: “Maka' mentamako'a' mesa tondä', iai too banua muongei, iya eta liungkoa' too lambi' umpelleia' indo tondä'. ¹¹Angga hia ke deenni mesa tondä' untumpu pala'koa', iya pelleia' lao indo ongeam sapo' pempassiannia' sobä' dio bitti'mu, aka la mendadi tanda lako tondä' ia too la natumpu pala' Puang Allataala.”

¹²⁻¹³Iya le'ba'im indo passikolanna anna napa'paissanganni lako ingganna tau naua: “La pahallukoa' untihokongam gau'mu.” Anna buda setam nahambai, buda to masaki si napasussui minnä'-minnä' anna napabono'i.

Tulasanna kamateanna Yohanes to si mantedo'

6:14-29

Mat. 14:1-12; Luk. 9:7-9

¹⁴Napelele duka' tomahaja Herodes diona Puang Yesus aka molele-lelem sanganna anna buda tau muuai: “Indo Yohanes to si mantedo' tubo sule! Iam too anna deemmi kakuasaanna umpogau' tanda memängä-mängä.”

¹⁵Piha tau muuai: “Nabi Elia hi tia.”

Deem duka' muuai: “Mesa hi tia nabi yolona tubo sule.”

¹⁶Tappana nahingngi Herodes diona kaha-kaha ia too, iya ma'kadam naua: “Yohanes to si mantedo' si'da hi tia itim, indo to bali kupopelemo'i ulunna sapo' tubo sule.”

¹⁷Aka abana Herodes si'da hi tia ussua tau ussukka Yohanes napope-

sangkala illaam tahungkum aka nasalla indo anna natappakadai Yohanes diona indo umpobaine Herodias bainena Filipus, solasubunna. ¹⁸Nauaam Yohanes eta too: “Tä' punala sipäto' mualako Herodias bainena Filipus solasubummu umpobaine, aka tä' sihondo'i peadas-antaa'.” ¹⁹Iam too napolalam Herodias umpemannaam Yohanes, sapo' tä'pi mala tappa napatei, ²⁰aka ungalajapi Yohanes Herodes eta too, aka naissam naua inde tau to malolo anna to maseho. Dadi napengkamma'ipi. Sapo' uhhingngi oi too Yohanes, iya ma'dua penaba oom, pissam husa' penabanna, sapo' deem ohi naphäe.

²¹Sapo' katampasanna sule lako duka' pattujunna Herodias wattunna anna umpakaho'a' allo kadadianna Herodes. Indo allo eta too untambai asam to kasallena illaam kapahentaam, anna ingganna pangngulunna sohodadu sola ingganna to kasalle illaam lembäna Galilea. ²²Illaaam indo kamahoasam eta too, sumajo änä'na Herodias baine lambi' tä' deem pada salosso' inabanna Herodes sola ingganna tosabena muitai. Iya ma'kadam tomahaja lako indo to sumajo naua: “Iai too umpemulu iam kubeengko.” ²³Anna ma'dandi lako naua: “Ia mammo anna ia umpelau, moi la sasesena inde kapahentaangku kubeem tooko.”

²⁴Iya le'ba'um indo to sumajo ungkutanai indona naua: “Aka la kupelau?”

Natimba' naua: “Ulunna Yohanes to si mantedo'.”

²⁵Iya napasihha' siahama le'ba' lako tomahaja anna nauai: “Temo kupelau anna umpadioannä' baki ulunna Yohanes to si mantedo'.”

²⁶Tappana nahingngi tomahaja pelauanna, tä' deem pada samasussa penabanna aka la dipatei Yohanes. Sapo' tä'um mala natumpu pala' aka puhama ma'pinda lako indo baine

nahingngi tosabena. ²⁷Ussua siahm mesa passappi'na indo tomahaja lao muäläi ulunna Yohanes. Iya le'ba' siahm indo tau lako tahungkum anna ullempo'i ulunna Yohanes. ²⁸Mane nababai sule indo ulu napadio baki anna nabeenni indo to sumajo. Iya naalam duka' anna nababaanni lako indona.

²⁹Tappana naissam passikolanna Yohanes diona ia too, iya le'ba'im naala indo bakkena anna nalamunni.

**Lima hoti anna dua
bau natamba' Puang Yesus
umpadea' tau la'bi lima sa'bu**

6:30-44

Mat. 14:13-21; Luk. 9:10-17; Yoh. 6:1-13

³⁰Tappana ma'pasulei indo suhona Puang Yesus, iya ma'hempummi anna natulasanni indo puha nakähä anna puha napepa'guhuam.

³¹Anu' aka tuttuam buda tau sule anna le'ba', lambi' tä' deem mala mangngande Puang Yesus sola passikolanna. Iya ma'kadam lako passikolanna naua: "Maikoa' talulako ongeam kasala-salaanna anna malai pakakitaa' mellube säpäi'." ³²Iya mengkalao siahm ma'lopi le'ba' lako ongeam kasala-salaanna umpasähä kalena. ³³Sapo' naitanna tau buda le'ba' anna naissam la naongei lao, tappa sikakondä lao naheba' muola galantangam lambi' nayoloi landa'. Indo tau buda buttu dio mai kotana si mesa-mesa illaam pa'lembängam eta too.

³⁴Tuhunna Puang Yesus yabo mai lopi, iya muitam tau buda lambi' häntä buana aka sihhapam domba tä' deem to ungkambi'i. Nasuhum nabeem ma'hupa-hupa pepa'guhuam.

³⁵Kahubenni, iya napellambi'im passikolanna anna nauaanni: "La bengi

bäbäm! Moi kela daa pohiallasam inde taongea'." ³⁶Mapia ke ussuai inde lako tau buda anna mala lao mualli kinande lako tondä' anna lako to ma'liangam."

³⁷Sapo' natimba'i naua: "Iko hanna' umpandei."

Iya nauam passikolanna: "Umba bäbäm too kami' ngei la kipangngalai pealli pada buda aka umbai' la pa'duapuloam bidä mane ganna'i dialliam hoti dipandeam?"

³⁸Iya nakutanaim naua: "Sanakapia' hotimmu? Petua'pi!"

Puhai napetua', iya nauam: "Angga ham lima kalebu hoti anna dua käju bau."

³⁹Lambi' naua Puang Yesus lako indo tau buda: "Äto'koa' kalemu, ammu okko'a' lako alla' humpu'."

⁴⁰Iya muokko'im duka'. Deem sahatu' sallaoam, deem lima pulo. ⁴¹Iya naalam Puang Yesus indo lima hoti anna dua bau mane mentongai längäm langi' nakuhhu'i sumanga' längäm Puang Allataala. Puhai ia too napiä'-piä'um indo hoti mane nabeenni passikolanna natabaam lako indo tau buda. Susi siam duka' indo bau. ⁴²Iya mangngandeim sampe dea'.

⁴³Tappana puhai mangngande, iya nahempummi passikolanna indo tää'nam naande, iya sapulo duapi baka ponno. Senga'pi la'bi bau. ⁴⁴To mangngande wattu eta too lima sa'bu muane mandi dihekem.

Puang Yesus mellao yabona uwai

6:45-52

Mat. 14:22-33; Yoh. 6:16-21

⁴⁵Puhai ia too, muuaam siahm passikolanna Puang Yesus: "Längängkoa' inde lopi ammu pendiolonna' lambam libam Betsaida," napasindum siam ussua duka' lao indo tau buda. ⁴⁶Iya lessu' asanni indo passikolanna sola tau

buda, iya le'ba'um ia längäm tanete ma'sambajam.

⁴⁷ Bengii, iya illaammi tängä le'bo' indo lopi naonget passikolanna anna Puang Yesus ia tohho yabo galantangam mesa-mesanna. ⁴⁸ Iya tappana la tibukka' kale baja, muitam passikolanna sängä' nabela umbose lopinna aka napobua' hibu' tatta'. Iya le'ba' siahham napellambi'i mellao yabona uwai sapo' mato-mato la tahhu' napelebanni. ⁴⁹⁻⁵⁰ Naitanna indo passikolanna mellao yabona uwai, iya mahea'im anna kaoli-olii aka nasanga anitu. Sapo' tappa ma'kada naua: "Pahapa'ia' penabammu, daa ummahea', aka Kao hi to Kao!" ⁵¹ Lambi' le'ba' längäm lopi umpellambi'i passikolanna, iya mattam siahham hibu'. Lambi' tä' deem pada samängä-mängä anna tä' naala akkalanna. ⁵² Susi siam tanda memängä-mängä diona lima hoti tä' liupi mentama pikkihanna anna mapahhi' napenabaam aka tä' nalambi' penabanna diona kakuasaanna Puang Yesus.

Puang Yesus umpabono' buda to masaki dio Genesaret

6:53-56

Mat. 14:34-36

⁵³⁻⁵⁴ Tappana tisampo lopinna Puang Yesus sola passikolanna dio Genesaret, iya umpatuhunnim sampahajana anna mane le'ba'i längäm galantangam. Iya tappa naissam siahham tau naua: "O, sule Puang Yesus!" ⁵⁵ Iya sikakondä siahham ullelei tondä'na, anna mualai to masakinna mane nababai le'ba' napa-sitonda ampa'na anna iai too naonget Puang Yesus etam too napambabai lako. ⁵⁶ Umba-umba ongeam naonget sule, lako haka mesa tondä', lako haka kota, battu ongeam senga', buda liu tau sule umbaba to masakinna tihempum dio pasa' anna napelau'i lako naua: "Kela mala anna naantii moi podo tähämpä'

jubamum to masakingki, iya la malam too bono'." Lambi' ingganna to muantii mala asam bono'.

Kabiasaanna to Yahudi sisala pahentana Puang Allataala

7:1-23

Mat. 15:1-20

7 Pissam wattu sulei yabo mai Yerusalem sanaka-naka to illaam kakalebuanna Parisi anna to ullatta' Pepaondonganna Musa umpellambi'i Puang Yesus. ² Wattu eta too muita sanaka-naka passikolanna Puang Yesus mangngande bäbä, tä' umbasei yolo limanna situhu' kabiasaanna to Yahudi. ³ Aka situhu' kabiasaanna nene to naponene to illaam kakalebuanna Parisi anna to Yahudi senga', si tä' mala mangngande ke tä'i umbasei yolo limanna. ⁴ Anna maka' sule dio mai pasa' tä' mala mangngande ke tä'i membese yolo. Anna napepaondongam toi duka' lako peampoanna naua: "Manggi' tau umbasei ihusam, tehhesam, anna ingganna pangkakka' gällä," anna budapi kabiasaam senga' manggi' natuhu'i.

⁵ Iam too anna mekutanam lako Puang Yesus naua: "Akanna tä'i untuhu'i kabiasaanna nene to taponene indo passikolammu, mangngandei bäbä, tä' umbasei yolo limanna?"

⁶ Natimba' naua: "Ikoa'-iko anggangkoa' ma'pudu' pandem anna ma'lila manähä. Abana tappa' kadanna Puang Allataala natula' loppo' nabi Yesaya yolona diona panggauammua' naua:

'Itim matim tau dio bäbä pudu'na napa'kasalleiä' sapo' setonganna illaam penabanna napemboko'ia'.

⁷ Alla'um napenombaiä'

aka anggam pepa'guhuam hupatau napepatuduam, mato-mato ia kupepatuduam anna taia hia.”**

⁸⁻⁹ Mane nauai Puang Yesus: “Umpa'bahinni'ikoa' pahentana Puang Allataala anna muanda'-anda'ikoa' kabiasaam hupatau. Si manähhäkoa' untampeam pahentana Puang Allataala anna umpasulleia' kabiasaammu! ¹⁰ Puham napaondom Musa naua: ‘Pa'kasalleiko ambemu sola indomu,’ anna: ‘Menna-menna umpakaänä'-änä' ambena battu haka indona, tau ia too la dipatei.’†† ¹¹⁻¹² Sapo' si muua hia' iko ma'patudu lako tau: Tä' tau pahallu muola oloanta lako ambeta sola indota ke diuai: ‘Indo la kutahiaiangkoa' battuam, puham kupehumalasang lako Puang Allataala.’ ¹³ Kahana umpateenna', iya umpa'pa'deingkoa'i pahentana Puang Allataala anna kabiasaammuia' umpalako. Anna budapi susinna si umpogau'a.”

¹⁴ Puhai ia too, iya untambaim tau buda Puang Yesus anna napa'tula'i naua: “Pehingngii manappaia' inde tula'ku anna umpaillaam penabai! ¹⁵ Ingganna lu tamanna kalena tau tä' ia la nakadakei, sapo' messubunna hi tia illaam mai kalena iam too ungdakei. ¹⁶ [Pehingngiia' anna umpaillaam tambu'ia' inde tula'ku!]”

¹⁷ Puhai ma'tula', umpelleim indo tau buda anna lu tamai mesa banua, iya nakutanaim passikolanna naua: “Aka kalembasanna indo pehapangam untula' ingngena?”

¹⁸ Iya natimba'um naua: “Aka tä'paka' tiko duka' muissam? Aka kinande dipatama sädä tä' ia ungdakei hupatau, ¹⁹ aka ia too tä' lu tama penaba sapo' lu tama tambu', anna tahhu' ditibe lao.”

Naägä'i Puang Yesus natula' kada ia too, anna mala naissam tau buda naua tä' deem kinande pemali diande.

²⁰⁻²² Mane ma'kada polei Puang Yesus naua: “Indo hia mengkalao illaanna penabanna hupatau lembe' dio pang-gauanna ia hi tia ungdakei, susinna: pikkiham kadake, gau' sessu', maboko, papateam, lullusam bannetau, mailu anna matinna, gau' kadake, manipu, möhäe sugali', kembuhu, ma'pakolo'-kolo'i, malangka' penaba, anna tä' muissam se'la. ²³ Ingganna kakadakeam ia too mengkalao illaam penaba anna iam too ungdakei hupatau.”

Mesa baine taia to Yahudi matappa'

7:24-30

Mat. 15:21-28

²⁴ Puhai ia too umpelleim Galilea Puang Yesus anna le'ba'i lako lembäna Tirus. Sulei lako melolo tamam mesa banua, aka pattujunna indana deenni muissanni kasuleanna. Sapo' tä' dia mala aka naissam liu tau kasuleanna.

²⁵⁻²⁶ Pissananna deem mesa baine tappa naissam kasuleanna, iya napellambi'im napasindum ma'balinguntu' dio olona anna nauai: “Kupelau kela mala umpabonosannä' änä'ku baine, aka napentamai setam.” (Indo baine taia to Yahudi sapo' to Siro-Penesia.)

²⁷ Sapo' natimba'i Puang Yesus naua: “Päbäii duka' medea' yolo änä' ikale aka tä' mapia kela dialai kinande dipatokaam änä'-änä' anna ditibeanni lako asu.”

²⁸ Naua oom indo baine: “Abana tappa'ko, Tuam! Sapo' kuua hi kao, indo asu dio ibi' meja mala hi tia duka' muande kinande honno'na änä'-änä'.”

**7:7 Yes. 29:13.

††7:10 Täss. 20:12, 21:17, Sand. 20:9, Pass. 5:16.

²⁹Nasuhum ma'kada Puang Yesus naua: “Uhhuako kada, dadi le'ba'ungko aka indo setam to umpentamai änä'mu, mäläim illaam mai kalena.”

³⁰Iya le'ba'um indo baine lako banuanna. Sulei lako, ullambi'um änä'na metindo masannam, aka indo setam to umpentamai mäläim lao.

**Puang Yesus umpabono'
to ia binga ia mämä**

7:31-37

³¹Lessu'i eta too, umpelleim lembäna Tirus Puang Yesus anna untahusanni pa'laoanna lako le'bo' Galilea naola lako Sidon, muolai lembäna Sapulo Kota.

³²Wattu eta too deem sanaka-naka tau sule umpasola mesa tau ia binga ia mämä. Napelaum naua: “O Tuangguhu, antiangkam inde to bingangi anna mala bono'.”

³³Iya natässu'im duka' Puang Yesus indo to binga dio mai alla'na tau buda anna napalao senga'i mane napehosisanni tahuno-hunona tama talinganna mane untikkudui tahuno-hunona anna natu'doanni lilana.

³⁴Anna mentongai längäm langi' napasindum umbussangam penabanna mane ma'kadai naua: “*Efata!*” (kalembasanna: “Titungka'ko!”).

³⁵Iya tappa titungka' siaham talingganna indo tau anna makalesom pole' pa'tula'na. ³⁶Ingganna indo to sule wattu eta too napakahi'di asam Puang Yesus nauaam: “Deem aia' untula' le, moi la menna tala untulasanni.” Sapo' tuttuam dilaham, tuttuam napalele mandi sau' dekke.

³⁷Ingganna to uhhingngii kaheba ia too sangngim pilla' anna mängä-mängä naua: “Tä' deem tanaissam napadadi. Mala umpopahingngi to binga anna mala umpatappa' tula'na to mämä.”

**Pitu hoti natamba' Puang Yesus mala
umpadea' tau appa' sa'bu**

8:1-10

Mat. 15:32-39

8 Pissam wattu, ma'hempum oom tau buda sola Puang Yesus. Indo tau buda tappu'um kinandena. Tappa untambaim passikolanna anna nauai: ²“Tä' deem pada sahätä buaku muitai inde lako tau, aka tallungngallo tallu bengingkia' inde sola-sola, iya pa'dem la naande. ³Sapo' maka' la kusua bäbä lako banuanna, iya lako manii lalam anna tissämbä'i malimpä. La'bi-la'binna to sule mambela.”

⁴Sapo' natimba'i passikolanna naua: “Pusa'kam pole' aka diokia' inde pohiallasam, umbam ia ngei la dipangngaliam kinande pada budanna?”

⁵Iya nauam: “Anu' sanakapia' hotimmu?”

Natimba' passikolanna naua: “Angga ham pitu.” ⁶Iya nauam Puang Yesus lako indo tau buda: “Okko'koa' lako itim paha'baja.” Anna mane naala indo hoti pitu anna nasambajannii längäm Puang Allataala, mane napiä'-piä'i anna mane nabeem passikolanna natabaam lako indo tau buda. ⁷Deempi duka' baunna saidi' sapo' si bahinni'. Iya naala oom duka' anna nakuhhu'i oi sumanga' mane nabeenni passikolanna anna nataba pole oi. ⁸Dea' asanni indo tau buda, iya nahempummi passikolanna indo tää'nam naande, iya ponno polepi pitu baka. ⁹Indo to mangngande kiha-kiha appa' sa'bungna. Puhai mangngande nasuam Puang Yesus ma'pasule lako ongeanna. ¹⁰Lessu'na tau buda, längäm siaham lopinna solai passikolanna anna le'ba'i lako lembäna Dalmanuta.

To Parisi umpelau tanda

8:11-13

Mat. 16:1-4

¹¹ Dioi, iya sulem sanaka-naka to illaam kakalebuanna Parisi umpellambi'i Puang Yesus anna nateläi tula'na aka la napa'sändä'i. Iya napellambi'im anna nauaanni: "Paitaikam tanda yabo mai suhuga."

¹² Tappa umbussangam penabanna anna ma'kadai naua: "Maaka hia inde mai hupatau temo anna umpelau tanda? Aka kutulasangkoa', setonganna tä' deem la kupaitai tanda inde mai hupatau."

¹³ Anna le'ba'i umpellei indo tau, längäm sule lopinna anna lambanni.

Tä' liupi naissam passikolanna naua Puang Yesus to ponno kuasa

8:14-21

Mat. 16:5-12

¹⁴ Tappana längänni lopi, iya tä' dia nakilalai indo passikolanna Puang Yesus umbaba hoti buda-buda, anggam sakalebu nababa. ¹⁵ Siampu' eta too umpakainga' passikolanna naua: "La majagakoa' too indana nasägäikoa' bibi' hotinna Herodes anna to illaam kakalebuanna Parisi."

¹⁶ Tappana nahingngii passikolanna, iya sipa'tula'-tula'um naua: "Umbai' ia hi tia anna ma'kada susii aka tä'kia' umbaba hoti."

¹⁷ Sapo' naissam Puang Yesus indo tula'na passikolanna iya tappa ma'kadam naua: "Akanna ussitimba'-timba'i hakoa' iko diona pa'dena hotimmu? Tä' liupia' isanga natama pikkiammu? Tä' liupia' isanga

muissam manappaä'? ¹⁸ Kusanga siampuangkoa' mata, akanna tä'ia' umpetua'; siampuangkoa' talinga, akanna tä'ia' umpehingngii? Tä' daka tia ungilalailai' ¹⁹ indo anna kupiä'-piä'i lima hoti dipandeam lima sa'bu tau? Sanakapi baka ponno tää'nam naande tau buda indo uhheppunna'?"

Natimba' naua: "Sapulo duapi."

²⁰ Mane naua polei: "Ungkilalai haka' anna kupandei appa' sa'bu tau anggam pitu hoti dipiä'-piäsam, iya sanakapi baka tää'nam diande uhheppunna'?"

Natimba' oom naua: "Pitupi baka gege."

²¹ Iya nauam Puang Yesus: "Tä' liupaka' tiko umpähäm'?"

To buta napabono' Puang Yesus dio Betsaida

8:22-26

²² Landa'i Puang Yesus sola passikolanna lako Betsaida, iya deem tau untette to buta lako Puang Yesus anna nauai: "O Tuanguhu, antiangkam inde to butangki anna malai paita." ²³ Iya naanda'im limanna anna natettei lako sulibam kota, anna mane natikkudui matanna napasindum naanda'i anna nakutanai naua: "Deemmaka aka-aka muita temo?"

²⁴ Iya mennenne'um lako olona anna nauai: "To, kuitam tau kalao-lao, sapo' susi bäbä too' kaju." ²⁵ Iya naanti pole oom matanna. Puhai, napengkalissä'-lissä'im mennenne' lao, iya masiä' siahanni naita anna makaleso asammi ingganna aka-aka.

²⁶ Puhanna ia too, nasuam ma'pasule lako banuanna sapo' nauaam: "Anggam ia tä'ko la mala ma'pasule tama indo kota anna untulasanni solamu."

**Pangngakuanna Petrus naua Puang
Yesus To dilanti' la mepasalama'**

8:27-30

Mat. 16:13-20; Luk. 9:18-21

²⁷ Puhai ia too le'ba'um Puang Yesus sola passikolanna ullelei mobotto-bottoam lako Kaisarea Filipi. Muolai lalam, nauam Puang Yesus: "Situhu' tula'na tau, aka si nasangaianä'?"

²⁸ Iya natimba'im naua: "Deem tau muuai: 'Yohanes to si mantedo' tubo sule;' deem muuai: 'Nabi Elia sule sule;,' deem duka' muuai: 'Mesa nabi senga' tubo sule.'"

²⁹ Iya mekutanam lako passikolanna naua: "Maka' susi, iya akaa' iko ussangaianä'?"

Tappa natimba' Simon Petrus naua: "Ikom too indo To dilanti' la mepasalama'."

³⁰ Iya nauam Puang Yesus: "Io, tappa', sapo' daa untula' poleia' lako tau senga'!"

**Puang Yesus umpaissan
loppo' passikolanna diona la
kamateanna anna diona la
napogau' to maelo' untuhu'i**

8:31-9:1

Mat. 16:21-28; Luk. 9:22-27

³¹ Lessu'i ia too napahandu'um Puang Yesus ma'pa'guhu naua: "Kao to disangai Änä' Mentolino la ussi'dim ma'hupahupa pandahhaam anna la natumpu pala'ä' matua ulunna to Yahudi anna ingganna kapala sando sola to ullatta' Pepaondonganna Musa lambi' la napateiä'. Sapo' illaam allo katallunna la tibangonnä' sule dio mai alla'na to mate."

³² Napomasissä' Puang Yesus natula' kaha-kaha ia too, sapo' tappa nababai lao Petrus umpelle-pellei solana anna nauaanni: "Daa umpa'kada susi."

³³ Iya tappa menggihi' Puang Yesus umpalelei mata passikolanna anna ungkeaha'i Petrus naua: "Pälläiko lao Setam! Aka taia iko pa'elo'na Puang Allataala umpikki', sapo' angga iko pikkiham hupatau illaam penabammu." ³⁴ Mane uhheppunni tau buda sola passikolanna anna nauaanni: "Menna-menna maelo' untuhu'ia' pahallu la ullappa' pa'elo' kalena anna umpassam kaju sitambenna, anna natuhu'ä',^{††}

³⁵ Aka menna-menna umpakalando puha ia katuboam di lino anna la Kao, tau ia too tä' ia la ullambi' katuboam sule lako salako-lakona. Sapo' menna-menna ahu' mate aka natuhu'ä' anna umpa'pakahebaam Kaheba Katilallasam, tau ia too la ullambi' indo katuboam sule lako salako-lakona. ³⁶ Tä' deem gunana lako mesa tau moi la muampuam ingganna issinna lino kela sägä hi sungnga'na. ³⁷ Aka setonganna tä' ia deem bala'inna sungnga'na hupatau. ³⁸ Aka menna-menna umpa'kasihisannä' anna umpa'kasihisam pepa'guhuangku illaam inde alla'-alla'na to umpogau' kasedaam anna to sässä' lalam, tau ia too la kupa'kasihisam duka' ke sulemä' to disangai Änä' Mentolino naponnoi kamatandeanna Ambeku anna natuhu'ä' ingganna malaika' maseho."

9 Mane nauai: "Aka kutulasangkoa', setonganna deengkoa' to dio heem temo tä'pi la mate anna muitam Puang Allataala umpalako kapahentaanna sola kakuusaanna."

^{††}8:34 *umpassam kaju sitambenna*: kalembasanna, ahu' muoloi kamasussaam sule lako ahu' la dipatei.

**Tallu passikolanna muita Puang
Yesus dipomatande yabo tanete**

9:2-13

Mat. 17:1-13; Luk. 9:28-36

²Annanni benginna puhanna ia too, iya umbabaim Petrus, Yakobus, anna Yohanes Puang Yesus le'ba' längäm mesa tanete malangka', anna yaboi paka-paka ia. Iya muitaim Puang Yesus tieli' hupanna. ³Anna pangkähä pohebana tä' deem tau illaam inde lino la mala umpasusii mabusanna. ⁴Iya tappa muitam Puang Yesus mahassam sipa'tula' indo dua nabi yolona isanga Elia anna Musa.

⁵Iya ma'kadam Petrus naua: "O Tuangguhu tä'um deem la susi kamasannangantaa' eta inde. Mapia ke kipake'desangkoa' tallu bahum: mesa lko, mesa Musa, anna mesa Elia." ⁶Ia anna ma'kada susii Petrus aka tä' bäbä naissam aka la naua aka sangngim mahea'.

⁷Iya nasikuku'im gabum anna nahingngii kamaha buttu illaam mai indo gabum naua: "Iam too inde Änä' pa'pakamajanku. Pahallua' la umpehingngii!" ⁸Pissananna ham ia sikapeä indo passikolanna aka angga ham mesa-mesanna Puang Yesus naita, pa'de bäbäm ia indo to dua.

⁹Tappana tuhunni Puang Yesus sola indo to tallu yabo mai indo tanete, iya napakahi'dim naua: "Deem aia' la untula' säkä indo to puhaa' muita yabo tanete le, ke tä'i puhaä' dipatibangom to disangai Änä' Mentolino dio mai alla'na to mate!"

¹⁰Sangngim napehingngii indo pepakahi'dinna napasindum sipa'tula'-tula' naua: "Aka hia umbai' nasanga 'la tubo sule dio mai alla'na to mate?" ¹¹Iya nakutanaim passikolanna naua: "Sapo' maaka hia anna nauai to ullatta' Pepaondonganna Musa: 'Tä'

mala tala sule yolo nabi Elia anna mane sule indo To dilanti' la mepasalama'?"

¹²Natimba' Puang Yesus naua: "Abana pahallu la sule yolo Elia umpatoka ingganna-ingganna sia. Sapo' naala haka' ia inabammu indo to puha tisuha' diona Änä' Mentolino la ussi'dim ma'hupahupa kamasussaam anna la ia siam anna ia dipogausam? ¹³Sapo' kuuaangkoa' tentomai: Abana puham sule Elia, anna ia siam napogausam tau anna ia, umba susi indo puha tisuha' illaam Battakada Debata."

**Puang Yesus umpabono' mesa
änä'-änä' to napentamai setam**

9:14-29

Mat. 17:14-21; Luk. 9:37-43

¹⁴Tappana ma'pasule Puang Yesus sola Petrus, Yakobus, anna Yohanes, iya ullambi'um indo passikolanna to kasehapi nalebo tau buda sola sanakanaka to ullatta' Pepaondonganna Musa mahassanni sitimba'-timba'. ¹⁵Iya muitanna sia Puang Yesus indo tau buda sangngim pilla' anna sikalumpa' untammuii. ¹⁶Iya mekutanam lako passikolanna naua: "Aka hia' iko ussitimba'-timba'ianna' inde lako tau?"

¹⁷Iya ma'kadam mesa tau illaam mai alla'na indo tau buda naua: "O Tuangguhu, kubabangko sule inde änä'ku aka napentamai setam nasuhum maho. ¹⁸Aka maka' too nasulei oom indo setam, iya si angga' dipehhabisam dokko litä', si ma'tambuha-buha sädäna, sikukku isinna anna mato'do' kalena. Iya puham kupelau lako itim matim passikolammu anna nahambaii lao indo setam sapo' tä' dia mala."

¹⁹Iya ma'kadam Puang Yesus naua: "Kukapusa'i si'dakoa' pole' inde to tubo lapi' temo, aka kuhäm sugali'a' ka-matappasammu! La pada polepi isanga umba masäena sola-solakia' anna la

pada polepi isanga umba masäena la kusa'bahasangkoa?" Mane nauai: "Babaännä' mai itim änä'-änä'."

²⁰Iya nababaammi lako. Muitanna sia Puang Yesus indo setam, tappa undodä' indo änä'-änä', iya tissämbä' siahanni anna tibalintam lelem ma'tambuha-buha sädäna.

²¹Mekutanam Puang Yesus lako ambena indo änä'-änä' naua: "Masäengka ma'pateem?"

Iya naum indo ambena: "Bahinni'pi anna napahandu'um ma'pateem. ²²Si kapuhaammi la umpatei inde änä'ku indo setam si natobängam tama api anna dokko uwai. Sapo' kela mala ungkama-seikanni anna umpamoloikam umba ke malai bono'."

²³Iya natimba'im naua: "Akanna muuai: 'Umba ke malai?' Aka kutulasangko, tä' ia deem nakapusa'i lako to deem kamatappasanna."

²⁴Tappa ma'kada kasalle indo ambena naua: "Kukatappa'iko sapo' pamoloiä' anna malai tuttuam kehängäm kamatappasangku."

²⁵Pissananna naita Puang Yesus tuttuam buda tau sule ulleboi, iya nakissä'im indo setam to si ma'pabinga anna ma'pamaho naua: "Pessubungko illaam mai kalena inde änä'-änä', anna tä'ungko mala la tama pole."

²⁶Iya messubum eta siaham indo setam napasindum kumissä' anna undodä'i indo änä'-änä', iya diita siahanni anggasannam to mate. Iya budam tau muuai: "Matem." ²⁷Sapo' tappa naanda'i Puang Yesus limanna indo änä'-änä' la nabangongam, iya bangom siahanni.

²⁸Pissananna illaanni banua Puang Yesus sola passikolanna paka-paka ia ham, iya nakutanaim passikolanna naua: "Maaka hia isanga anna tä'i kami' mala kihambai lao indo setam?"

²⁹Natimba'im naua: "Indo setam susi tä' mala dihambai ke tä'i ma'sambajam tau yolo."

Kapenduanna Puang Yesus untula' diona la kamateanna

9:30-32

Mat. 17:22-23; Luk. 9:43-45

³⁰Iya mengkalaom Puang Yesus sola passikolanna umpatahhu' pa'laoanna muolai Galilea. Eta too napeä lalanna anna malai tä' naissam tau senga' ongeanna, ³¹aka angga opi passikolanna mahassam nabeem pepa'guhuam. Natula'um lako passikolanna naua: "Kao to disangai Änä' Mentolino la dibeho tama pala' limanna hupatau. La napateiä', sapo' illaam allo katallunna la tibangonnä' sule."

³²Sapo' tula' ia too tä' natama akkalanna passikolanna kalem-basanna, sapo' sangngim malaja' umpekutanaanni.

To la kesanga dio olona Puang Allataala la mengkadio anna maelo' dipahe'

9:33-37

Mat. 18:1-5; Luk. 9:46-48

³³Pissam wattu landa' oom Puang Yesus sola passikolanna lako Kaper-naum. Tappana illaanni banua, mekutanam lako passikolanna naua: "Aka hia' iko ussibetä'-betä'i dio mai lalam inggena?" ³⁴Sapo' sangngim mengkamma' aka indo nasibetä'-betä'i naua: "Men-nakia' handam matande?"

³⁵Iya muokko'um Puang Yesus anna untambai indo to sapulo dua anna nauaanni: "Iai too maelo' la kesanga, la mengkadio anna maelo' dipahe'." ³⁶Mane untettei änä'-änä' tama alla'-alla'na anna nakalapu'i mane

nauai: ³⁷“Menna-menna untahima änä'-änä' susi inde aka umpolalam kamatappasanna di Kao, tau ia too sihhapam siam Kao natahima. Anna menna-menna untahimaä', tä' anggam Kao natahima sapo' To ussuää' duka' natahima.”

**Pa'kamase lako to ussa'bii
kasalamasam tä' la pa'de sahona**

9:38-41

Luk. 9:49-50

³⁸Iya ma'kadam Yohanes lako Puang Yesus naua: “O Tuangguhu deem ki-ita mesa tau uhhambai setam umpake sangammu, sapo' tä' kipäbäi aka taia indo to si tapasolaa'.”

³⁹Sapo' natimba' naua: “Daa ullahanni, aka tä' tia umpogau'na tanda memängä-mängä mesa tau umpake sanganku, iya la natelle-tellemä' Kao. ⁴⁰Aka iai too tä' umbalikia', iam too solata. ⁴¹Kutulasangkoa' setonganna menna-menna umbeengkoa' uwai saihusam aka to untuhu'koa' Kristus, mannassa anna tau ia too la untahima sahona.”

**Ingganna kaha-kaha la
mebulingam la ditibe lao
anna umpamasinni tau kale**

9:42-50

Mat. 18:6-9; Luk. 17:1-2

⁴²Mane naua polei Puang Yesus: “Menna-menna umpabulim inde änä'-änä' to puha matappa' nasuhum la tä'um nakatappa'ia', tau ia too aha leko'um dipatoke'i batu peepe' bahokona anna dipa'tumbusanni tama le'bo'. ⁴³Anna maka' hapanna limammu la umpomadosako, mapia leko'um tia ke umpoloi lao. Aka aham tia sabali-bali limammu sapo' la ullambi'ko katuboam sule lako salako-lakona, anna la tontä

liu dua limammu, sapo' ditibe hako tama nahaka api tapi'de-pi'de.[⁴⁴Aka ongeam ia too tala mate olli'na tala pi'de apinna.] ⁴⁵Anna maka' hapanna bitti'mu la umpomadosako, mapia leko'um tia ke umpoloi lao. Aka aham tia kempo'ko sapo' la ullambi'ko katuboam sule lako salako-lakona, anna la tontä liu dua bitti'mu, sapo' ditibe hako tama nahaka.[⁴⁶Aka ongeam ia too tala mate olli'na tala pi'de apinna.] ⁴⁷Anna maka' matammu la umpomadosako, kalessu'i lao. Aka aha leko'um tia sabali-bali matammu sapo' mendadiko umma'na Puang Allataala illaam kapahentaanna, anna la tontä liu dua matammu sapo' ditibe tama hako nahaka. ⁴⁸Aka ongeam ia too tala mate hia olli'na tala pi'de apinna.

⁴⁹Si mesa-mesa tau la disehoi umpake api umba susi tunuam disehoi umpake sia.

⁵⁰Setonganna sia mapia, sapo' maka' matämmä'um la malapaka tia dipamasim sule? Dadi la pahalluko too umpamasim liu kalemu, anna la tubokoa' sikamase mesa sola mesa.”

**Diona kasisähäsam anna
lullusam banne tau**

10:1-12

Mat. 19:1-9

10 Mengkalao etam too Puang Yesus le'ba' lako lembäna Yudea anna lambanni libam Salu Yordan iya nalebo oom tau buda. Iya ma'pa'guhu oom, umba susi si napogau'. ²Eta too deem sule sanaka-naka to illaam kakalebuanna Parisi maelo' la umpeängam tuntungam su'be' Puang Yesus lambi' nakutanai naua: “La situhu' daka peadasam ke untibe baina mesa muane?”

³Sapo' natimba' naua: “Akaka napaondongangkoa' Musa?”

⁴Iya natimba'um naua: “Napäbäi Musa sisähä' sapo' manggi' napapiaam suha' kasisähäsam muanena.”^{¶¶}

⁵Iya nauam Puang Yesus: “Ia hi tia anna natuli'i Musa pepaondongam ia too aka kamakahhasam penabammua'.⁶ Aka dadinna inde lino, iya napadadim Puang Allataala muane anna baine,^{§§ 7-8} anna nauai: 'Iam too anna mesa muane la umpellei indona sola ambena anna sialai mesa baine, nasuhum duai la mendadi mesa illaam ingganna-ingganna sia.’* Dadi, tä'um la dua sapo' la mendadi mesam. ⁹Iam too kasuhunganna anna iai too puha napamesa Puang Allataala tä'um mala napasishä' hupatau.”

¹⁰Tappana illaanni banua, mekutana oom passikolanna lako Puang Yesus naua: “Aka kalembasanna indo tula'mu ingngena?”

¹¹Iya natimba'im naua: “Menna-menna untibe bainena anna laoi kebaine pole, tau ia too ullullu' pa'bannetauam. ¹²Anna maka' baine untibe muanena anna kemuane polei, ullullu' duka' pa'bannetauam.”

Puang Yesus untamba' änä'-änä'

10:13-16

Mat. 19:13-15; Luk. 18:15-17

¹³Pissam wattu sule sanaka-naka tau umbaba änä'-änä' bahinni'na lako Puang Yesus anna mala natamba', sapo' nakeaha'i hi passikolanna. ¹⁴Pissananna naitai Puang Yesus, iya keaha'um naua: “Päbäi mammi napellambi'ia' itim matim änä'-änä'. Daa ullabai, aka tau susim too itim matim la mendadi umma'na Puang Allataala illaam kapahentaanna. ¹⁵Aka kutulasangkoa',

setongam-tonganna, menna-menna tä' susi änä'-änä' untahima kapahentaanna Puang Allataala, tau ia too tä' la mendadi umma' petauanna.” ¹⁶Iya nakalapu'im indo änä'-änä' anna naanda'i ulunna natamba'.

Mesa to makaka mapahhi' la mendadi umma' illaam kapahentaanna Puang Allataala

10:17-31

Mat. 19:16-30; Luk. 18:18-30

¹⁷Tappana mengkalao Puang Yesus la umpatahhu' pa'laoanna, iya sulem mesa tau ma'sihha'-sihha' umpellambi'i anna ma'balinguntu'i dio olona, anna mekutanai naua: “O Tuangguhu to mapia gau', aka la kupogau' anna malaä' ullambi' katuboam sule lako salako-lakona?”

¹⁸Natimba' naua: “Akanna muuaannä' to mapia gau'? Tä' deem mesa tau la mapia gau' sulibanna Puang Allataala. ¹⁹Mannassa muissammi ingganna pahentana Puang Allataala naua: 'Daa umpapateam, daa ullullu' pa'bannetauam, daa umpaboko, daa ussa'bi tatappa' diona padammu hupatau, daa untengko solamu, anna pa'kasalleiko indomu sola ambemu.’”[†]

²⁰Iya natimba'um indo tau naua: “O Tuangguhu, kutuhu'i asammi pahenta ia too mengkalao bahinni'ku.”

²¹Iya nanenne'im Puang Yesus nakamase-masei mane nauaanni: “Deempi mesa tä' umpogau', le'ba'ko balu'i ingganna aka-akammu, anna umbeenni to mase-mase. Aka maka' umpateem, iya la muampuammoko too kulle yabo suhuga. Puhai too, sulengko pole' untuhu'ä.” ²²Sapo' tappana

^{¶¶}10:4 Pass. 24:1-4.

^{§§}10:6 Kad. 1:27, 5:2.

*10:7-8 Kad. 2:24.

[†]10:19 Täss. 20:12-16, Pass. 5:16-20.

uhhingngi tula'na Puang Yesus, hosso siahm penabanna anna ma'pasulei masussa, aka buda kullena.

²³ Iya umpaleim mata passikolanna anna nauai: "Tä' deem pada samapahhi' to buda kullena la mendadi umma'na Puang Allataala illaam kapahentaanna."

²⁴ Iya sangngim mängä-mängäm passikolanna uhhingngii tula'na. Anna mane naua pole Puang Yesus: "Oa' änä'ku, mapahhi' si'da-si'da tau mentama kapahentaanna Puang Allataala. ²⁵ Aka madomi' leko'um ia mesa unta muola tama tottä'na dahum, anna la mesa to makaka la mentama kapahentaanna Puang Allataala."

²⁶ Tuttuam mängä-mängäm pole' passikolanna uhhingngii, nasuhum sipa'tula'-tula' naua: "Maka' susi, iya menna bäbä hi umbai' la mala dipasalama?"

²⁷ Iya unnenne'im passikolanna anna nauai: "Nakapusa'i ia hupatau, sapo' tä' Ia Puang Allataala aka tä' ia deem tanais-sam nagahagai."

²⁸ Iya ma'kadam Petrus lako Puang Yesus naua: "Kitampeam asammi kami' aka-akangki aka kituhu'ko!"

²⁹ Natimba'im naua: "Kutulasangkoa': setonganna menna-menna umpellei banuanna, battu haka solasubunna, battu haka indona, battu haka ambena, battu haka änä'na, battu haka bela'na, aka natuhu'äi anna umpa'pakahebaanni Kahaba Katilallasam, ³⁰ la natahima siam sule bala' sullena tau ia too wattu temo tiluppi' sahatu': banua, solasubum, indo', änä', anna bela', moinna anna la silolem pandahhaam. Anna illaam wattu mane la sule la untahima katuboam sule lako salako-lakona. ³¹ Sapo' la deem too dadi ke dako'i buda to matande tentomai, la mendadi to madio, anna to madio tentomai la mendadi to matande."

Kapentallunna umpa'paissangam la kamasussaanna Puang Yesus

10:32-34

Mat. 20:17-19; Luk. 18:31-34

³² Tappana le'ba'i längäm Yerusalem Puang Yesus sola passikolanna, iya mendiolo Ia Puang Yesus. Muolai lalam sangngim tillä'bä' buana passikolanna, anna ingganna indo to untuhu'i sangngim mahea'. Iya untambaim indo sapulo dua passikolanna anna natulasanni aka la dadi lako kalena. ³³ Naua: "Inde tentomai la längämmakia' Yerusalem. Yabokia' too, iya dibehomä' to disangai Änä' Mentolino lako ingganna kapala sando sola to ullatta' Pepaondonganna Musa anna la nakattu naua: 'Pahallu la dipopepatei.' Anna la nabehoä' lako to tamuissam Puang Allataala. ³⁴ Aka la natelleä', la nasitikkudu-kuduiä', la nadahhaä', anna la napateiä', sapo' allo katallunnai too la dipatibangonnä' sule."

Pelauanna Yakobus sola Yohanes

10:35-45

Mat. 20:20-28

³⁵ Puhai ia too sulem Yakobus sola Yohanes, änä'na Zebedeus anna ma'kadai lako Puang Yesus naua: "O Tuangguhu kipelau kela mala anna untahimai pelauangki."

³⁶ Iya natimba'um naua: "Aka umpohäe la kupogausangkoa'?"

³⁷ Iya ma'kadam naua: "Maelo'kam la muokko'kia' sola yabo kamatandeammu ke lambi'um wattunna, mesakam dio tandai kanammu, mesa dio tandai kaihimmu."

³⁸ Sapo' natimba' Puang Yesus naua: "Setonganna tä' muissanna' itim pelauammu. La untuaka' duka'

umpendudum indo kamapi'disam la kupendudum anna umpassam indo pandahhaam la kupassam?"

³⁹ Iya natimba'um naua: "Kitua!"

Iya nauam Puang Yesus: "Tappa' tula'mu, abana la umpendudunna' duka' indo kamapi'disam la kupendudum anna la umpassam indo pandahhaam la kupassam."[‡] ⁴⁰ Sapo' anggam ia indo diona la muokko' dio tandai kanangku anna tandai kaihingku, taia Kao issangku. Aka ongeam ia too dipatokaam lako hupatau to puha napa'tantu Ambeku"

⁴¹ Tappana naissanni indo to sapulopi passikolanna kaha-kaha ia too, iya tä' deem pada sakeaha' lako Yakobus anna Yohanes. ⁴² Nasuhum natambai asam Puang Yesus anna napa'tula'i naua: "Muissanna' muua indo to disangai to ma'pahenta umpahenta pakketauanna umpake palu-palu bassi, anna ingganna to kasallena umpalao makahha' kakuusaanna lako to nalumbäi. ⁴³ Sapo' ikoa'-iko, tä'koa' la mala ma'pateem. Aka iai too maelo' la diangga' illaam alla'-alla'mua', iam too la umpopengkadio kalena dio olona solana sihhapam mesa sabua'. ⁴⁴ Anna menna-menna maelo' la mendadi to kasalle, tau ia too la pahallu umpomahempo penabanna anna la ahu' dipakasua-sua illaam ingganna-ingganna sia. ⁴⁵ Aka susimä' Kao to disangai Änä' Mentolino tä' suleä' la dipamoloi, sapo' suleä' la umpamoloi hupatau anna la ahu'pä' dipakattu sungnga' aka la ussolonnä' tau buda dio mai dosana anna malai lappa'."

Mesa to buta isanga Bartimeus napabono' Puang Yesus

10:46-52

Mat. 20:29-34; Luk. 18:35-43

⁴⁶ Pissam wattu Puang Yesus sola passikolanna lambi' lako kota Yerikho. Messubunni illaam mai indo kota, iya ma'silullu'um tau untuhu'i. Iya deemmi mesa to buta isanga Bartimeus änä'na Timeus, muokko' dio bihim dalam aka si kapelau-lau lako to liu dalam. ⁴⁷ Tappana nahingngi dio hia heem Puang Yesus to Nazaret iya metamba-tamba siaham naua: "O Yesus peampoanna tomahaja Daud, kamaseiä' kao."

⁴⁸ Sapo' nakuapai hi tau buda naua: "Pengkamma'ko!" Sapo' tuttuam napekasallei mandi metamba naua: "O peampoanna tomahaja Daud kamaseiä' kao!"

⁴⁹ Iya tohhom Puang Yesus anna ma'kadai naua: "Tambaiännä' mai."

Iya sikauntambaim duka' indo to buta anna nauaanni: "Pomahannui penabammu ammu ke'de' aka natambaingko!" ⁵⁰ Iya untampe bäbäm bajunna anna napasihha'i ke'de' le'ba' napellambi'i.

⁵¹ Iya nakutanaim Puang Yesus naua: "Aka umpohäe la kupogausangko?"

Iya natimba'um naua: "O Tuangguhu, maelo' punalaä' duka' la paita."

⁵² Iya nauaammi: "Bono'ungko aka unngkatappa'ia'. Le'ba'ungko too." Iya paita eta siahanni anna le'ba'i untuhu' Puang Yesus.

[‡]10:39 *umpassam indo pandahhaam la kupassam*: Indo dituli' illaam basa Yunani, naua ia ke basa Bambanni: *ditedo' sola pantedosam indo tä' mala tala kutahima*. Indo nauaam *pantedosam*, mesa pehapangam anna kalembasanna *pandahhaam*. Batai Rm. 6:3-4.

**Puang Yesus dipa'kasallei anna
dipakahoa' sulena lako Yerusalem**

11:1-11

*Mat. 21:1-9; Luk.
19:28-38; Yoh. 12:12-15*

11 Tappana la umpenandai Yerusalem Puang Yesus sola passikolanna, sikhaku'pi tondä' Betfage anna Betania dio Tanete Zaitun, iya ussuam dua passikolanna mendiolo ²naua: “Le'ba'koa' lako dio tondä' tapenandaia'. Aka sulekoa' too lako, iya ullambi'unna' mesa keledai lundaha disäke' lombe', tadeempi disäkei. Bukkaia' anna umbabaia' dio mai. ³Anna maka' too deengkoa' ungkutanai naua: ‘Akanna mualai?’ uanni: ‘Aka napahalluam Debata, anna la bale' dipasule siam sule.’”

⁴Iya le'ba'i siaham anna nalambi' si'da mesa keledai lundaha dio olo ba'ba disäke' lombe', dio bihim lalam. Iya nabukkaim. ⁵Wattu eta too deem sanaka-naka tau dio nalambi'. Naitanna indo tau nabukkai, iya tappa nakamba-hoannim naua: “Akanna umbukkaia'?”

⁶Iya natimba'im susi indo tula' bali napakahidiam Puang Yesus.

Iya nauai mandam indo tau: “O, iya babaia' lao.” ⁷Iya naalam indo keledai anna le'ba'i nababaam Puang Yesus. Sulei lako, muälaiim jubana anna nalapi'ianni, mane nasäkei Puang Yesus. ⁸Wattu eta too buda tau muälai jubana anna naampa'i lako lalam la naolanna Puang Yesus tanda pa'pakasallena, anna deem toi duka' tau muampa' palapa andulam naala lako bela'. ⁹Ingganna tau to ullahui susi yolona teem ibundinna sikaahhe naua:

“Tapujia' Puang Allataala!

Katambasam to sule illaam sanganna Debata!

¹⁰Natamba' Puang Allataala pessubunna tomahaja Daud to la dipotomahaja allo di dako'na.

Tapu'kasalleia' Puang Allataala To Handam Matande!”^f

¹¹Landa'na Puang Yesus lako Yerusalem, tappa melolo tama Banua Debata anna napahessa asanni lao pali'. Sapo' aka la bengim, iya bale' le'ba' lako Betania solai sapulo dua passikolanna.

Puang Yesus umpanata'i kaju ara

11:12-14

Mat. 21:18-19

¹²Masiä polei, mengkalao oom Puang Yesus sola sapulo dua passikolanna. Umpelleinna tondä' Betania, iya tadea'um ia Puang Yesus. ¹³Mennenne'um lao, iya muita mambelam kaju ara tumalumbum daunna. Iya napenandaim lako aka naua inabanna: “Umba ke deenni buana.” Sapo' sulei lako, anggam daunna nalambi', tadeem buana aka abana taia opi wattunna la kembua. ¹⁴Tappa napanata'i Puang Yesus naua: “Tä'um iko deem la naande hupatau buamu sule lako salako-lakona.” Iya indo tula'na nahingngi asam duka' passikolanna.

**Puang Yesus ussua lao to
sibalu'-balu' illaam Banua Debata**

11:15-19

*Mat. 21:12-13; Luk.
19:45-48; Yoh. 2:13-16*

¹⁵Tappana sulei lako Yerusalem Puang Yesus sola passikolanna, iya le'ba'im tama pa'hanteanna Banua Debata. Sulei tama, iya ullambi'um to si

^f11:10 Puj. 118:26.

balu'-balu' illaam. Tappa nasua siaham lao Puang Yesus anna napembalisannii mejana indo to si ussuka'i doi'na to buttu dio mai botto senga' anna usseham okkosanna to si umbalu' dangam-dangam. ¹⁶Anna ingganna to la umbaba aka-aka tä' napäbäi muola tama Banua Debata. ¹⁷Mane ma'pa'guhui lako tau buda naua: "Tä' daka tia puha tisuha' illaam Battakada Debata naua:

'Banuangku la naongi ingganna hu-patau ma'sambajam,'
sapo' umpadadi hia' iko pa'mesaanna pa'bulele kalasi anna pa'tombonganna to maboko allo."[§]

¹⁸Tappana nahingngi kapala sando sola to ullatta' Pepaondonganna Musa kadadiah ia too, iya ma'pattujuim la napeä lalanna anna mala dipatei Puang Yesus. Aka silele mahea' lako tappana muita buda tau nakapilla'i pepa'guhuanna.

¹⁹Mahammoi, messubum oom Puang Yesus sola passikolanna umpellei Yerusalem.

Diona sambajam diala pepa'guhuam dio mai kaju ara mahekko'

11:20-26

Mat. 21:20-22

²⁰Tappana masiä pole, mebengngi'-bengngi'pi anna liu oom Puang Yesus sola passikolanna lako indo kaju ara. Iya naitam mahekko'um sule dokko waka'na. ²¹Iya nakilalai siaham Petrus indo puha naua Puang Yesus teem isamai' lako indo kaju ara. Iya ma'kadam Petrus naua: "O Tuangguhu, petua' siai dio kaju ara puhanna umpanata'i, iya mahekko' siaham."

²²Iya nauam Puang Yesus: "Katappa'ikoa' Puang Allataala! ²³Aka

maka' ussua inde dio buntu mentieli' tama le'bo', iya la mala si'da tiäkä' tama ke deennia' kamatapassammu. Sapo' maka' bata-batakoa', iya tä' la mala dadi. ²⁴Iam too anna kuuaammokoa', iai too umpelaua' längäm Puang Allataala sola ponno kapahhannuam, tä' mala tala untahimaa'. ²⁵Anna maka' la ma'sambajangkoa' anna deenni pi'di' penabammua' lako mesa tau, ampunniia' yolo mane ma'sambajangkoa' anna mala naampunniangkoa' kasalaammu Ambemu yabo suhuga."²⁶ [Sapo' maka' tä'koa' muampunni kasalaanna padammu, iya tä'koa' too duka' la naampunniam kasalaammu Ambemu yabo suhuga.]

Pekutanaanna to umpeängam tuntungam su'be' Puang Yesus

11:27-33

Mat. 21:23-27; Luk. 20:1-8

²⁷Iya ma'pasuleim sule lako Yerusalem Puang Yesus sola passikolanna. Pissam wattu mahassanni ma'lao-lao illaam Banua Debata, iya sulem sanaka-naka kapala sando anna to ullatta' Pepaondonganna Musa sola matua ulunna to Yahudi umpellambi'i Puang Yesus ²⁸anna nauai: "Aka isanga umpolalam anna umpogau'i inde mai ingganna pa'pogausam, anna menna umbeengko kakuasaam?"

²⁹Sapo' natimba' naua: "La kuku-tanaikoa' duka' yolo, puhapia' untimba'i mane kutulasangkoa' duka' menna um-beennä' inde kakuasaam. ³⁰Menna um-beenni kakuasaam Yohanes anna si mantedo'i? Puang Allataala haka hu-patau haka? Timba'ipia'!"

³¹Iya sipa'tula'-tula'um naua: "Mapahhi' la ditimba'i, aka taua hia'

§11:17 Yes. 56:7.

manii: 'Kakuasaanna Puang Allataala,' iya la nauaammakia' too: 'Akanna tä'ia' unkatappa'i?' ³²Iya taua hia' manii: 'Kakuasaanna hupatau,' iya tä' ohi aka inde Yohanes nakatappa'i asam tau naua: 'Abana mesa nabi.'"

³³Lambi' angga ham pentimba'na lako Puang Yesus naua: "Tä' kiissam la kitimba'i indo pekutanaammu."

Nasuhum naua Puang Yesus: "Maka' susi, iya tä' duka' kuaku la kutulasangkoa' menna umbeennä' kakuasaam nasuhum kupogau' kaha-kaha ia too."

**To untumpu pala' Puang
Yesus dipasihpam to
utesam bela' anggur**

12:1-12

Mat. 21:33-46; Luk. 20:9-19

12 Anna mane umpalao pehapangam Puang Yesus lako indo to mekutana inggena' naua: "Pissam wattu deem mesa tau umbukka bela' anggur anna nabalai lao pali'. Puhai, umbo'bä'um pallullusam anggur mane umpake'de'i lempo batu la naongei to mangngampa. Puha asanni, iya napa'petesangammi anna le'ba'i lako botto mambela. ²Tappana naagiam la matäsä' indo bua anggurna, iya ussuam mesa sabua'na le'ba' umpellambi'i indo to mantesanna aka la natahimaam bahena. ³Sapo' sulei lako, iya ke nasakka hi ia, anna natembe' pusoi mane nasuai ma'pasule ma'pala' lo'bä. ⁴Iya ussua pole oom mesa sabua'na le'ba' pole lako indo

to mantesam. Sulei lako, natembe' pole oom lambi' basa-basa ulunna anna napakasihi'-sihi'i. ⁵Iya ussua pole oom mesa sabua'na. Sapo' sulei lako, tä'um ia pole' angga natembe', sapo' toko napateim ia. Tä' angga ia mandi inde, sapo' budapi senga'na, deem natembe' anna deem napatei. ⁶Nasuhum angga ham änä' pangkaha'na da'da'. Katampasanna nasua pissammi indo änä'na aka naua inabanna: 'La nakalaja'um tia pole' inde änä'ku.' Sapo' sulei lako indo änä'na, ⁷iya sipattuju-tuju oom indo to mantesam naua: 'Iam too inde to la ullumbang kullena tomatuanna. Tapateia' anna mala taalaa' inde bela'na.' ⁸Lambi' nasakka anna napatei, mane natibei lako bihim bela'."

⁹Puhai umpalao pehapangam Puang Yesus, iya ma'kadam naua: "Aka umbai' la napogausam indo puäna bela'? Tä' mala tala lao napempa'deam indo to mantesanna anna napa'petesangam polei indo bela'na lako tau senga'." ¹⁰Tä' daka' tiko deem umbata illaam Bat-takada Debata naua:

'Indo batu natibe tukam, ia leko' di diala dipobatu longkahhim.

¹¹Kaha-kaha ia too mala dadi aka pa'pogau'na Debata, anna takamängä-mängäia' kita pa'pogausam ia too!'"^{††}

¹²Sapo' tappana nahingngi pangngulunna to Yahudi indo pa'tula'na Puang Yesus, iya nauam: "Kitaa' napasihim." Iya umpeäm lalam anna mala disakka Puang Yesus sapo' mahea' lako tau buda sampe napellei bäbäpi.

**12:9 Petua' dioi pemasiä'na Mat. 21:33-41.

††12:11 Puj. 118:22-23.

**Pangngulunna to Yahudi
umpalilingam tangnga' Puang
Yesus umpake pekutanaam
diona pamajasam sima**

12:13-17

Mat. 22:15-22; Luk. 20:20-26

¹³Puhai ia too, ussuam sanaka-naka to illaam kakalebuanna Parisi anna to muundu'i tomahaja Herodes indo pangngulunna to Yahudi umbaba mesa pekutanaam lako Puang Yesus, aka pattujunna umba ke malai napetidom. ¹⁴Iya umpellambi'im Puang Yesus indo to disua anna natede-tedei naua: "O Tuanguhu, kiissam kiua mesako to umpake tappa' anna sindoho anna moi menna tala ungkahea'i. Aka Iko to umpapadapada bábäko hupatau, anna anggako umpepa'guhuam ulalanna Puang Al-lataala sola undu' lollä." Anna mekutanai naua: "Situhu' peadasam, sipäto' dakika' umbaja' sima lako tomahaja dio Roma, tä' daka?"

¹⁵Sapo' naissam Puang Yesus pudu' pandenna lila manähäna lambi' ma'kada naua: "Akanna umpalilingannä' tangnga'? Babaampä' mai mesa doi' peha'mua' angku petua'!" ¹⁶Iya mualam doi' peha' anna nabeenni. Iya mekutana pole oom naua: "Menna kegamba' anna menna kesanga inde dio doi'?"

Iya natimba'im naua: "Gamba'na anna sanganna tomahaja dio Roma."

¹⁷Iya nauam Puang Yesus: "Maka' susi, iya beennia' tabana tomahaja dio Roma la sipäto'na umbeem, anna beennia' duka' Puang Allataala la sipäto'na umbeem."**

Iya pilla' asam uhhingngii lambi' ma'kada naua: "Tä' deem diola lako."

**To Saduki umpa'sändä'i Puang
Yesus umpekutanaam diona
katuboanna sule to mate**

12:18-27

Mat. 22:23-33; Luk. 20:27-40

¹⁸Puhai ia too, iya sulem sanaka-naka to illaam kakalebuanna Saduki battu diua to tä' unkatappa'i katuboanna sule to mate umpellambi'i Puang Yesus, anna nakutanai naua: ¹⁹"O Tuanguhu, puhangkia' nasuhasam Musa illaam suha' pepaondonganna naua: 'Maka' deem mesa muane mate anna tä'i deem änä'na, iya indo siam solasubunna la umpobainei indo bainena, anna mala deem pessubunna.' ²⁰Iya la maakam ia susi indee: aka pissam wattu deem pitu muane ma'solasubum. Uhuna kebaine indo handam ulua. Sapo' tä'pi deem änä' nasibalii indo bainena anna matem indo muane. ²¹Iya napessullem mesa solasubunna napobaine indo bainena. Sapo' tä'pi masäe napobainena anna mate pole oom duka', tä'pi duka' deem änä'na nasibalii indo baine. Iya susi siam duka' indo solasubum katallunna. ²²Ma'sahha' tula', sampe indo pitu to ma'solasubum sibala'-bala' umpobaine indo mesa baine sapo' sangngim tä' deem änä' nasibalii. Iya tappana tappu'i indo muane mate asam, iya matem duka' indo baine. ²³Dadi, maka' lambi'um wattunna la tubo sule to mate, iya mennannam kabam la napomuane indo baine, aka bali asam di napomuane indo to pitu ma'solasubum?"

²⁴Natimba' Puang Yesus naua: "Inna la muua hia' tia, aka bulingkoa'. Aka tä'koa' muissam manappa kalembasanna Battakada Debata anna tuli tamuis-sangkoa' ia kakuasaanna Puang Al-lataala. ²⁵Aka susi hia' tia inde ä: maka'

**12:17 Petua' dioi pemasiä'na Mat. 22:21.

too tubom tau sule dio mai alla'na to mate, iya tä'um tia deem to la siala anna tä' toi deem to la ma'pasiala. Sapo' umba susi katuboanna malaika' yabo suhuga tä' kemuane tä' kebaine, la susim too duka' hupatau.

²⁶ Mane deenni, tä' paka' tiko deem umbata diona katuboanna sule to mate illaam suha' Pepaondonganna Musa, indo tulasanna api ma'nala-nala illaam satoo' kaju-kaju naonge buttu kadanna Puang Allataala lako Musa naua: 'Kaom too inde Puang Allataala to napenombai Abraham, Ishak, anna Yakub?'^{¶¶}
²⁷ Dadi moinna anna puham mate indo to tallu, sapo' mannassa anna tuboi temo aka anggam to tubo mala umpenombai Puang Allataala. Dadi mannassa anna bulim si'da-si'dakoa!"

**Pahenta handam
pahallu dipa'kasallei**

12:28-34

Mat. 22:34-40; Luk. 10:25-28

²⁸ Tappana mahassam sipa'tula' Puang Yesus sola indo to illaam kakalebuanna Saduki, iya sulem mesa to ullatta' Pepaondonganna Musa anna napehingngii indo kasitimbasanna. Nahingnginna, tappa naakui illaam penabanna naua: "Tappa' inde pentimban'na Puang Yesus." Nasuhum mekutana lako naua: "Umbannam kabam handam pahallu dipa'kasallei pada indo pahenta?"

²⁹ Iya natimba'im naua: "Handam too'na pahenta indo to puha napepaondongam Musa naua: 'Pehingngiia' to Israel, anggam mesa Debatanta, diuam Puang Allataala.
³⁰ La ungkamaseia' sola sakalebu penabammu anna mentu' pikkihammu

anna mentu' kamatohoammu.' ³¹ Mane deenni: 'La ungkamaseikoa' padammu hupatau umba susi ungkamasei kalemu.' Iam too inde dua too'na pahenta. Tä'um deem tando längänna pole."

³² Iya ma'kadam indo to ullatta' Pepaondonganna Musa naua: "Tappa' tula'mu Tuangguhu, Puang Allataala anggam mesa aka tä'um deem debata senga'. ³³ Anna abana hupatau pahallu la ungkamasei Puang Allataala sola sakalebu penabanna anna mentu' pikkihanna anna mentu' kamatohoanna, anna la ungkamasei padanna hupatau umba susi ungkamasei kalena. Kalando hi tia pa'pogausam susi anna la umpadeem tunuam sola pemala' senga' lako olona Puang Allataala."

³⁴ Tappana nahingngi Puang Yesus indo tula'na mapia, iya nauaammi: "Saidi' danni anna tamendingko pakketauanna Puang Allataala."

Lessu'na eta too tä'um pole' deem tau la bahani umpadeem pole pekutanaam lako Puang Yesus.

**Diona kasilombunganna Puang
Yesus anna tomahaja Daud**

12:35-37

Mat. 22:41-46; Luk. 20:41-44

³⁵ Mahassanni ma'pa'guhu Puang Yesus illaam Banua Debata, iya umpalaom pekutanaam naua: "Maaka hia anna nauai to ullatta' Pepaondonganna Musa: 'Indo To nalanti' Puang Allataala la mepasalama' peampoanna Daud?' ³⁶ Aka Daud duka' to nasahum Penaba Maseho anna nauai: 'Ma'kada Puang Allataala lako Debatangu naua.'^{§§}

Okko'ko dio tandai kanangku

^{¶¶}12:26 Täss. 3:6.

^{§§}12:36 *Debatangu*: To dilanti' la mepasalama' diuam, battu diua Mesias.

sule lako wattunna la kupopa'bukku ingganna balimmu dio olomu lambi' uhhondoi dokko.*

³⁷Dadi makaleso anna ma'kalei Daud muuai: 'Debatangku To nalanti' Puang Allataala.' Iya maaka hi susi anna la ia ohi umpoampoi?"

Tula'na Puang Yesus napatannini talinga tau buda aka tä' deem pada sanapohäe.

Puang Yesus umpakilala tau buda indana napabulinni to ullatta' Pepaondonganna Musa
12:38-40

Mat. 23:5-7; Luk. 20:45-47

³⁸Illaam pepa'guhuanna Puang Yesus naua: "Majagakoa' lako to ullatta' Pepaondonganna Musa indana napabulingkoa'. Aka si biasa too ma'lao-lao tama pasa' ma'baju tihui' anna maelo' dipa'kasallei. ³⁹Anna si moka muokko' illaam pa'sambajangam ke tä'i dio olo, anna si umpise'i toi ongeam dipa'kasalleinna ke illaanni pa'hame-hameam. ⁴⁰Anna si umpamasingam tula' to balu-balu baine lambi' sule lako banuanna naala. Si naägä'i umpakalando sambajanna anna mala nauaam tau: 'Tau mapia' anna ke tau kadake hia. Nasuhum la nalambi' pesämbä' mabanda'na Debata."

Bua pemala'na mesa to balu-balu baine mase-mase
12:41-44

Luk. 21:1-4

⁴¹Pissam wattu muokko' Puang Yesus untingngajoi patti pehumalasang illaam Banua Debata, anna umpetua'i to umpatama patti bua pemala'na. Iya sulem buda to makaka umbaba doi'

anna si buda napatama. ⁴²Pissananna iya sulem duka' mesa to balu-balu baine anna mase-mase polepi, umbaba dua doi' gällä handam saidi' angga'na napatama.

⁴³Iya untambaim passikolanna anna nauai: "Kutulasangkoa', buda puha ia bua pemala'na inde to balu-balu baine anna la ingganna inde to umpatama bua pemala'na. ⁴⁴Aka inde lako tau la'binna ia kullena napatama. Sapo' inde ia to balu-balu baine moi anna mase-mase, napebeem asam ia indo deenna lako kalena, moi anna anggam ia la napotubo."

Banua Debata la ditaleam anna pa'pahandusanna kamasussaam

13:1-13

Mat. 24:1-14; Luk. 21:5-19

13 Tappana messubum Puang Yesus illaam mai Banua Debata, iya ma'kadam mesa passikolanna naua: "Tuangguhu, petua'pi Iko inde dio hindim batu tä' deem pada samatoto' anna inde banua tä' deem pada samapia."

²Iya natimba'im naua: "Muita inde banua tä' deem la susi mapianna sapo' tä' deem moi podo la mesa batunna la tiäto' liu sitodo' solana aka pissam wattu la ditaleam asam."

³Anna mane le'ba' längäm Tanete Zaitun Puang Yesus sola Petrus, Yakobus, Yohanes, anna Andreas anna muokko'i yabo paka-paka ia, mengngolo libam Banua Debata. Iya mekutanaim naua: ⁴"O Tuangguhu, tulasampakam piham la dadi ingganna indo puha untula' ingngena'? Anna aka la tandana kela lambi'um wattunna la ditaleam?"

⁵Sapo' ma'kada Puang Yesus naua: "Majagakoa' indana deenni tau la um-

*12:36 Puj. 110:1.

baba bulingkoa! ⁶Aka la buda too tau sule umboko sangangku anna la buda tau nababa bulim aka la naua: 'Kaom too inde To nalanti' Puang Allataala. ⁷Maka' too uhhingngingkoa' ah-hena to sipate-patei anna kahebanna to sibundu'-bundu', iya tä'koa' too la mahea' aka abana hi tia inna la dadi kaha-kaha ia too, sapo' taiapi indo allo ma'katampasanna. ⁸Aka la sipate-patei hupatau anna kahajaam pada kahajaam la sibundu'-bundu'. Anna umba-umba ngei ongeam la dadi lino' kasalle anna la sule kakobeam. Sapo' ia asanna ia too mane pa'pahandusanna kamapi'disam sihhapam mesa baine mane mahassam mangnguhiba'.

⁹Sapo' pahallukoa' majaga, aka la disakkakoa' anna dibehokoa' lako to mahhotto' illaam peadasam anna la ditembe'koa' illaam pa'sambajangam. Anna mane dibabakoa' lako olona to ma'pahenta anna tomahaja aka untuhu'ä. Iya wattu etam too la muongeia' mendadi sa'bingku dio olona. ¹⁰Aka Kaheba Katilallasam la dipa'paissangam yolo sule lako lili'-lili'na lino. ¹¹Mane deenni, maka' too disakkakoa' anna dibabakoa' lako to ma'pahessa, iya tä'koa' la umpakabeba penabammu la muua: 'Aka amom isanga la diua mentimba?' Sapo' wattu eta too la untula'a' indo to napasondoiangkokoa' Puang Allataala. Aka indo tula' la umpopen-timba'a' taia tula' di kalemu bäbä, sapo' tula'na Penaba Maseho.

¹²Anna la kende' too tatta' asu lambi' to ma'solasubum la palla' penabanna umpopepatei solasubunna. Susi toi duka' ambe la umpallasam änä'na anna änä' la umbali tomatuanna sampe napatei. ¹³Anna la nakabassi asangkokoa' too tau aka unkatappa'ä. Sapo' iai too mentobe manda' anna mengnganti matoto' illaam kamatappasam lako kaleku sule

lako ma'katampasanna, tau iam too la dipasalama'."

Puang Yesus umpa'paissangam loppo' kamasussaam la dadi ke dako'i

13:14-23

Mat. 24:15-28; Luk. 21:20-24

¹⁴"Maka' muitakoa' 'To ungkähä kakadakeam la metallangam,' ke'de' illaam ongeam tasihatanna la naongei, indo to dio Yudea pahallu sikalumpa' längäm tanete. (Inde kada la pahallu napasalui manappa penabanna to mambata.) ¹⁵Anna to sulibanna banua tä'um la tama banua muala pahuhunna ¹⁶anna to mahassam dio bela' tä'um la ma'pasule lako banuanna muala pohebana, anna mala masimpam muäläi kalena le'ba' umpellei indo kamasussaam. ¹⁷Tä' ia deem pada samasussa lako baine to mahassam kebättä anna to ma'pasusu. ¹⁸Pa'sambajangkoa' anna mala tä' dadi indo kadadiam ia too illaam wattu palauham. ¹⁹Aka wattu eta too la kende' pi'di' tanggana-gana. Pi'di' susi ia too tä'pi deem nasi'dim hupatau handu' napadadinna Puang Allataala inde lino sule lako temo. Sapo' lessu'i too, iya tä'um deem la kende' pole pi'di' susi. ²⁰Aka maka' hapanna la masäe wattunna mane napamondai Puang Allataala kaha-kaha ia too, iya tä'um deem la tubo hupatau moi podo la mesa. Sapo' kahana pa'kamasena lako hupatau to puha napilei mendadi umma'na, nasuhum la bale' napamonda kamasussaam ia too.

²¹Mane deenni, maka' too deem tau muuaangkokoa': 'Indem indo To nalanti' Puang Allataala!' battu haka naua: 'Dionnä!' iya tä' la umpehingngiia'. ²²Aka la buda too tau naägä'i naua: 'Kaom too indo To nalanti' Puang Allataala.' Anna deem toi la muuai:

'Kaom too mesa nabi.' Anna indo tau la deem duka' pa'pogausam mepilla'-pilla' napadadi anna tanda memängä-mängä, aka naua pattujunna: 'Umba ke deenni tau to puha dipilei kubaba bulim.'²³ Dadi la muissanna' unjagai aka puhangkoa' kupayolo lambangam ingganna kaha-kaha ia too."

Kasuleanna Änä' Mentolino

13:24-37

Mat. 24:29-36; Luk. 21:25-33

²⁴ "Puhai too indo kamasussaam, iya la pi'de mata allo anna tä'um la paindo bulam,²⁵ anna la honno'i yabo mai langi' bintä anna ingganna issinna langi' la titehha' bäbä.²⁶ Anna wattu eta too ingganna hupatau la naitä' to disangai Änä' Mentolino tuhum yabo mai langi' illaam gabum naponnoi kakuusaam tadi-tondom anna kamatandeam.²⁷ Anna la ussuaä' ingganna malaika'ku lao nahempungannä' ingganna hupatau to puha kupilei illaam inde lino mengkalao illaam mata allo sule sau' katampusam anna mengkalao illaam inde lino sule lako handanna langi'.

²⁸ Diona kaha-kaha ia too, mala di-ala pehapangam dio mai mesa kaju ara. Maka' too mukku'um tähe'na anna kendaum händäm, iya la muissammia' too muua la bale' sulem kulla' kalandö.²⁹ La susim too ke muitanna' dadi indo puha kutulasangkoa', iya la muissammia' too duka' muua la bale' sule lakom indo pattujunna Puang Allataala.³⁰ Setongam-tonganna, ingganna kaha-kaha ia too la dadi yolo anna mane mate asam ingganna to tubo lapi' temo.³¹ Langi' anna lino la pa'de ke dako'i,

sapo' kadangku ia, la da'da' liu sule lako salako-lakona.

³² Sapo' setonganna tä' deem moi podo la mesa tau muissanni wattunna kaha-kaha ia too. Moi malaika' yabo suhuga tala naissanni, moi Änä'na Puang Allataala, anggam mesa-mesanna Ambeku yabo suhuga muissanni.³³ Dadi la majaga si'da-si'dakoa' aka tä' la muissanna' wattunna.³⁴ La sihhapam mesa puäna banua la le'ba', sapo' umbeem kakuusaam sabua'na anna nabahe-baheanni pengkähängam. Anna umpakahi'dii to unjagai ba'ba naua: 'La majaga si'da-si'dako too le!'³⁵ Iam too anna la majagangkoa' aka tä' la muissanna' wattu kasuleanna indo puäna banua. Battu la mahammo hi, battu la tängä hi bengi, battu la moni hi mäne', battu la mebengngi' di.³⁶ Aka toko sule säkä-säkä manii anna nalambi'koa' mamma'.³⁷ Inde tula'ku tä' anggam ikoa' kuuaam sapo' kuuaam asam duka' ingganna tau: La majagakoa'!"

Pangngulunna to Yahudi ma'pattuju la umpatei Puang Yesus

14:1-2

Mat. 26:1-5; Luk. 22:1-2; Yoh. 11:45-53

14 La dua bengipi mane lambi' oi wattunna dipakahoa' pengkilalaam allo Kalappasanna to Yahudi dio mai kasabuasam anna allo kasalle Hoti Tä' Diboloi Bibi' Hoti. Iya umpeäm lalam kapala sando sola to ullatta' Pepaondonganna Musa la ussukka membuni Puang Yesus aka la napatei.[†] ² Sapo' nauai: "Tä' la tapasipatuaia' allo kasalle, indana kende'i passikallaam illaam botto."

[†]14:1 *allo Kalappasam*: Petua' dioi pemasiä'na Mat. 26:2.

**Puang Yesus natolloi minnä'-minnä'
masulli' mesa baine**

14:3-9

Mat. 26:6-13; Yoh. 12:1-8

³Pissam wattu dio tondä' Betania Puang Yesus mahassam mangngande illaam banuanna Simon indo to dolengam yolona. Iya sulem mesa baine umbaba mesa buli-buli mapindäm, kessi minnä'-minnä' bubanau' si masulli' allinna. Iya tappa napoloi siahanni ulunna indo buli-buli, anna natolloanni yabo ulunna Puang Yesus tanda pa'pakasallena. ⁴Deem sanaka-naka tau meali-ali muitai, lambi' sipa'tula'-tula' naua: “Aka oom ia duka' gunana minnä'-minnä' masulli' dikatoa-toai?” ⁵Dotam tia dibalu' anna ditabaanni to mase-mase allinna, aka maka' la dibalu' deem la si tallu pulo bidä allinna.” Lambi' silele keaha' lako indo baine.

⁶Sapo' naua Puang Yesus: “Akanna umpasalakoa' inde baine? Päbäi mammi napateem. Aka inde napateem, mesa pa'pogausam mapia lako kaleku. ⁷Aka to mase-mase ia la sola-sola liukoa'. Malaa' umpamoloi ke abanai deenna' kamamaseammu. Sapo' Kao-Kao tä'kia' la sola liu. ⁸Iya inde ia baine napogau' loppo'um ia indo malanna napogau'. Aka inde natolloiä' minnä'-minnä'na temo, napogau' loppo'um ia indo la dipogau' ke dilamummä'. ⁹Setongam-tonganna, umba-umba naongei Kaheba Katilallasam dipa'pakahebaam, etam too duka' la dipotulasam pa'pogausanna inde baine anna mala dikilalai liu.”

**Yudas umpeä lalam la
umbalu' Puang Yesus**

14:10-11

¹⁰Deem mesa to tihekem sapulo dua passikolanna Puang Yesus isanga Yudas Iskariot, le'ba' umpellambi'i

sanaka-naka kapala sando aka illaam penabanna maelo' la umbalu' Puang Yesus. ¹¹Sangngim kassi uhhingngii anna ma'dandi la nabeem doi'. Iya umpeä lium lalam Yudas la umbalu' Puang Yesus.

**Puang Yesus sola passikolanna
muande kinande Kalappasam**

14:12-21

*Mat. 26:17-25; Luk. 22:7-14,
21-23; Yoh. 13:21-30*

¹²Illaam pa'pahandusanna allo kasalle Hoti Tä' Diboloi Bibi' Hoti si ditunu domba pengkilalaam Kalappasanna to Yahudi dio mai Kasabuasam. Allo eta too ma'kada passikolanna lako Puang Yesus naua: “La lu umbakam ngei umpatokaangko kinande indo si diande ke umpengkilalai tau allo Kalappasam?”

¹³Iya ussuam dua passikolanna naua: “Le'ba'koa' libam kota Yerusalem, iya la silambi'ungkoa' too mesa muane umbaba busso kessi uwai. Tuhu'ia' ¹⁴lako banua naongei anna muuaannia' indo to ma'banua: Nauaangkam Tuangguhu: ‘Uaanni: Umba ngei tambim to bali umpatoka la kiongei sola Tuangguhunki mangngande kinande allo Kalappasam?’ ¹⁵Iya la napaitaingkoa' too mesa tambim kalua' tando längäm puha asammi napatoka sule lako pangkakka'. Etanna' too la muongei ma'patoka.”

¹⁶Iya le'ba'um indo dua passikola libam Yerusalem. Sulei libam, nalambi' si'da susi liu indo tula'na Puang Yesus. Iya napatokam indo kinande si diande illaam allo Kalappasam.

¹⁷Bengii, sulem Puang Yesus umpasola sapulo dua passikolanna. ¹⁸Mahasanni mangngande, iya nauam Puang Yesus: “Setongam-tonganna, deem mesa solamua' illaam inde alla'-alla'taa' la umbalu'ä'.”

¹⁹Iya sangngim masussa penabanna anna sibala'-bala'i mekutana naua: "Taia mammaka kao, Tuangguhu?"

²⁰Natimba'im naua: "Sala'-sala' nennammua' inde to sapulo duakoa'. Iai too kusolapihingam unduho hoti, iya iam too. ²¹Abana hi tia Kao to disangai Anä' Mentolino inna la mateä', umba susi puha tisuha' illaam Battakada Debata. Sapo' tä' deem pada satilaka lako indo to umbalu'ä. Mala leko'um ia kela tä'um ia didadialam!"

**Hahana Puang Yesus la
dipatitollo la ungganna'i
pa'dandianna Puang Allataala**

14:22-26

*Mat. 26:26-30; Luk.
22:15-20; 1Kor. 11:23-25*

²²Mahassanni mangngande, iya mualam mesa hoti Puang Yesus anna nakuhhu'i sumanga' längäm Puang Allataala mane napiä'-piä'i anna nabeenni lako passikolanna napasindum naua: "Iam too inde baleku, alaia' ammu andei."

²³Puhai, mualam mesa ihusam kessi anggur anna nakuhhu'i sumanga' mane nabeem oi lako passikolanna. Iya naalam duka' anna nasibala'-bala'i naihu'. ²⁴Anna mane ma'kadai naua: "Iam too inde hahaku la dipatitollo la umpomannassa pa'dandianna Puang Allataala lako buda tau. ²⁵Setonganna kutulasangka': Tä'mä' Kao deem la muihu' pole anggur sampe lambi' wattunna la muihu'ä' anggur bakahu illaam kapahentaanna Puang Allataala."

²⁶Puhai, iya umpeniammi mesa pampujiam, mane le'ba'i längäm Tanete Zaitun.

Petrus la umbahoi Puang Yesus

14:27-31

*Mat. 26:31-35; Luk.
22:31-34; Yoh. 13:36-38*

²⁷Iya umpatahhu'um tula'na Puang Yesus lako passikolanna naua: "La le'ba'koa' umpelleiä' aka deem tisuha' illaam Battakada Debata naua:

'La kupatei to ma'kambi'na anna ingganna dombana la tisembu' lao.*[‡]

²⁸Sapo' maka' too dipatibangommä' sule, la kupendioloikoa' lako Galilea."

²⁹Iya ma'kadam Petrus naua: "Moi la le'ba' asam solaku napelleiko, inna tä' sia kao deem la kupelleiko."

³⁰Natimba' Puang Yesus naua: "Setongam-tonganna, illaam inde bengi tä'pi la penduam moni mäne' anna pentallummä' umbahoi."

³¹Sapo' tuttuam napomatohhä mandi duka' pa'kadanna Petrus naua: "Toko moiä' kao la dipatei solaki', tala kuba-hoiko!" Anna ingganna solana Petrus ma'kada susi siam duka'.

**Puang Yesus ma'sambajam
illaam Getsemani**

14:32-42

Mat. 26:36-46; Luk. 22:39-46

³²Puhai ia too, iya le'ba'um Puang Yesus sola passikolanna lu lako mesa ongeam isanga Getsemani. Dioi, muuaammi passikolanna: "Okko'ungkoa' too eta inde anna laopä' ma'sambajam."

³³Umbabaim Petrus sola Yakobus anna Yohanes napasola. Tä' deem pada samahea' Puang Yesus anna husa' penabanna nasi'dim. ³⁴Nauam: "Masussa si'da-si'da penabangku kusi'dim, angga'

*14:27 Za. 13:7.

la mateä'. Tohhongkoa' too eta inde, sapo' tä'koa' la lembe.”

³⁵Iya mentudendem saidi' anna untap-posanni kalena dokko litä' napasindum ma'sambajam kela mala anna lappa'i dio mai kamasussaam ia too. ³⁶Naua: “O Papa', O Ambeku, tä' Iko deem aka unkapusa'i ke umpoelo'i. Lappasannä' dio mai inde kamasussaam kuoloi temo, sapo' la pa'elo'mu dadi, taia la pa'elo'ku.”

³⁷Puhai ma'sambajam ma'pasulem. Iya ullambi'um indo to tallu to napasola inggena' mahassam mamma'. Iya ma'kadam lako Petrus naua: “Simon, mamma'ko isanga? Tä' dakoka tiko mala majaga moi podo satette'um? ³⁸Majagakoa' ammu pa'sambajam indana napa'sändä'ikoa' setam. Aka abana hi tia mohäe penabammua' la umpalako kamaloloam, sapo' napomalammakoa' sipa' hupataummu.”

³⁹Anna mane le'ba' pole oo ma'sambajam, susi siam indo pa'sambajanna inggena'. ⁴⁰Puhai, ma'pasule oom sule, iya nalambi' mamma' oo sule aka nataloi sugali'um matanna. Iya sangngim tä' bäbä naissam aka la naua mentimba'.

⁴¹Tappana ma'pasule kapentallunna iya nauam: “Mamma' liupokoa' isanga? Tä' liupokoka' tiko malube! Sihua mia! Aka lambi'um wattunna Kao to disangai Änä' Mentolino la dibehoä' tama pala' limanna to madosa. ⁴²Bangommokoa' anta laoa'. Petua'ia' diom mai indo to la umpopesakkaa'!”

Puang Yesus disakka

14:43-52

Mat. 26:47-56; Luk. 22:47-53; Yoh. 18:1-11

⁴³Mahassampi ma'tula' Puang Yesus, iya sule ham Yudas indo to tihekem duka' sapulo dua passikolanna Puang Yesus umpasola tau buda sanda pa'dam

sola bose, nasua kapala sando anna to ullatta' Pepaondonganna Musa sola matua ulunna to Yahudi. ⁴⁴Indo Yudas to umbalu'i, puham untula' loppo' tanda lako indo to napasola naua: “Iai too kuudum, iam too la ussakkaa' anna umbabai, sapo' jagai manappai.”

⁴⁵⁻⁴⁶Iya landa'i lako, tappa umpel-lambi'im Puang Yesus anna nauai: “O Tuanguhu!” anna mane naudum, iya sikanasakkam. ⁴⁷Deem mesa tau eta too ussintä' pa'danna anna umbattai mesa sabua'na sando too', iya mäläi talinganna. ⁴⁸Iya ma'kadam Puang Yesus lako indo tau buda naua: “Ussangaa' isanga pehampo'ä' anna sulekoa' sanda pa'dam sanda bose la ussakkaa'?” ⁴⁹Kusanga allo-allokoa' kupa'guhu illaam Banua Debata iya tä' dä' ussakka. Sapo' abana hi tia la susi anna mala sule lako indo puha tisuha' illaam Battakada Debata.”

⁵⁰Iya sikalumpa'um lao ingganna indo passikolanna napellei. ⁵¹Deem mesa änä' muane anggam sambu' illaam kalena le'ba' ia untuhu' Puang Yesus. Naanda'im duka' tau buda la nasakka, ⁵²sapo' nalappa' indo sambu'na anna lumumpa'i lao ma'kambelä' bäbä.

Puang Yesus dio olona to si mahhotto' illaam peadasam

14:53-65

Mat. 26:57-68; Luk. 22:54-55, 63-71; Yoh. 18:12-14, 19-24

⁵³Iya dipasalam Puang Yesus lako sando too'. Eta too ma'hempum ingganna kapala sando anna matua ulunna to Yahudi sola to ullatta' Pepaondonganna Musa. ⁵⁴Iya natuhu' kalamba'um Petrus sule lako pa'hanteanna sando too' anna muokko'i mendähä sola to unjagai Banua Debata.

⁵⁵Iya umpalilimmi tangnga' kapala sando sola ingganna solana to

tihekem duka' To Mahhotto'na to Yahudi la umpeängam tuntungam su'be' Puang Yesus anna nadakasam pa'posanga-sanga anna mala dipatei, sapo' tä' deem nalambi'. ⁵⁶Budapi tau si umpakolo'-kolo'i Puang Yesus, sapo' tä' deem mala sipako-pako tula'na. ⁵⁷Sanaka-nakapi tau ke'de' uhhängänni pa'pakolo'-kolo'inna solana naua: ⁵⁸“Deem kihingngi tula'na inde tau naua: ‘La kukadakeam inde Banua Debata pa'papianna hupatau angku papia polei senga'na, la tallungngallo liu anna dadim aka taia pa'papia hupatau.’” ⁵⁹Sapo' tä' asam deem mala mentama tula'na.

⁶⁰Iya ke'de'um sando too' illaam alla'-alla'na tau anna ungkutanai Puang Yesus naua: “Tä' liu siam isanga la untimba'i inde lako pa'pahapa'na tau?”

⁶¹Sapo' mengkamma' mandi Puang Yesus. Iya mekutana pole oom sando too' naua: “Iko si'da haka To dilanti' la mepasalama', Änä'na Puang Allataala To handam dipa'kasallei?”

⁶²Iya natimba'im naua: “Kaom too, anna illaam allo la taoloinna la muitakoa' Änä' Mentolino, battu diua Kao, la muokko' dio tandai kananna To Handam Kuasa anna la suleä' sule illaam gabum yabo langi!”

⁶³Iya tappa umpesepäsam siahham pohebana sando too' aka keaha' anna nauai: “Akapi gunana la umpeä liukia' sa'bi? ⁶⁴Aka uhhingngi asammia' kadanna inde dio tau untelle Puang Allataala! Dadi maakaa' iko susi lalam penabammu?”

Sangngim umpasala Puang Yesus anna nauai: “La dipatei.”

⁶⁵Iya deem sanaka-naka tau untikkudui anna mane nasapu'iam matanna anna nadänggu'i napasindum naua: “O nabi, pentopaipi, menna untappai limako?” Anna to ma'honda duka' untampilinni Puang Yesus.

Petrus umbahoi Puang Yesus

14:66-72

Mat. 26:69-75; Luk. 22:56-62;

Yoh. 18:15-18, 25-27

⁶⁶Wattu eta too mahassampi dio pa'hanteam Petrus, iya sulem mesa baine sabua'na sando too'. ⁶⁷Tappana muita Petrus mahassam mendähä, iya napengkaleso-lesoim lindona anna nauaanni: “Iko duka' si sola liuko indo Yesus to Nazaret.”

⁶⁸Sapo' tappa ma'baho naua: “Tä' kuisam aka hi iko isanga untula',” anna le'ba'i lako olo ba'ba, [iya moni siahham mäne].

⁶⁹Puhai ia too, naita pole oom mesa sabua' baine. Iya ma'kadam indo baine lako to dio heem eta too naua: “Inde dio tau abana solana.”

⁷⁰Iya nabahoi pole oom Petrus. Tä' masäe, iya ma'kadam duka' indo to dio heem eta too naua: “Mannassa anna solanako aka to Galileako duka'.”

⁷¹Iya ma'pindam pole' Petrus naua: “Naitää' Debata, kela kuissanni indo to muuaanna!”

⁷²Iya moni siahham mäne' kapendunna. Iya tappa nakilalaim pole' Petrus indo tula'na Puang Yesus naua: “Tä'pi la penduam moni mäne' anna pentallummä' umbahoi.” Iya ma'pase'go'um sumahho.

Puang Yesus dio olona gubernur Pilatus

15:1-15

Mat. 27:1-2, 11-26; Luk. 23:1-5, 13-25; Yoh. 18:28-19:16

15 Mebengngi'-bengngi'pi anna umpasahandammi kada kapala sando sola matua ulunna to Yahudi anna to ullatta' Pepaondonganna Musa sola to si mahhotto' illaam peadasanna

to Yahudi. Iya umpungom Puang Yesus anna nababai lako olona Pilatus. ²Mekutanam Pilatus lako Puang Yesus naua: “Ikongka indo tomahajanna to Yahudi?”

Natimba'um naua: “Ikom ma'kale muuai.”

³Iya ma'tula'um ingganna kapala sando umpakolo'-kolo'i Puang Yesus.

⁴Mekutana pole oom Pilatus naua: “Tä' isanga la untimba'i inde mai tau? Uhhingngi haka buda natandasangko?”

⁵Sapo' tä' liu siam mentimba' nasuhum mängä-mängä bäbä Pilatus.

⁶Maka' lambi' oom allo kasalle ia too, si biasa dilappasam mesa to ditahungkum situhu' pelauanna tau buda.

⁷Wattu eta too deem mesa to ditahungkum isanga Barabas anna budapi solana to puha papateam aka umbalibali to ma'pahenta. ⁸Iya sulem tau buda melau lako Pilatus anna mala dipalako kaha-kaha ia too susi biasa. ⁹Iya mekutanam Pilatus naua: “La muaku haka' ke kulappasanni inde tomahajanna to Yahudi?” ¹⁰Ia anna ma'kada susii Pilatus aka naissam naua ia hi tia anna nababai sule ingganna indo kapala sando aka nakembuhui.

¹¹Sapo' umpatudui tau buda indo kapala sando naua: “Pelauia' anna mala Barabas dilappasam.”

¹²Iya mekutana pole oom Pilatus lako indo tau buda naua: “Maka' susi, iya aka la kupogausam inde to ussangaia' tomahajanna to Yahudi?”

¹³Iya sikatambam naua: “Päso'i yabo kaju sitambem anna malai mate!”

¹⁴Mekutana pole oom Pilatus naua: “Anu' aka hia kasalaanna?”

Sapo' tuttuam sikaoli mandi naua: “Päso'i yabo kaju sitambem anna malai mate!”

¹⁵Mohäe Pilatus la umpalossosam penabanna tau buda lambi' ullappasam

ia Barabas anna ussuai tau untembe' talukum Puang Yesus mane napesuaanni dipäso' yabo kaju sitambem.

Puang Yesus natelle sohodadu to dio mai Roma

15:16-20

Mat. 27:27-31; Yoh. 19:2-3

¹⁶Iya napasolam sohodadu Puang Yesus lako Banua Gubernur indo si diongei ma'bisaha, anna untambai asanni ingganna sohodadu ma'hempum.

¹⁷Anna napapakei juba mellolo pao susi bajunna tomahaja anna muananni songko' susi songko'na tomahaja sapo' keduhi anna napasongko'ianni.

¹⁸Anna mane napekatabe'i lelem naua: “O tomahajanna to Yahudi, kipa'kasalleiko!” ¹⁹Nahabi' bulo ulunna, natikkudui anna ma'balinguntu' leleni menomba. ²⁰Puhai natelle, naäläiammi sule indo juba mellolo pao napapakeiam anna napapohebai sule indo inna pohebana.

Puang Yesus dipäso' yabo kaju sitambem

15:20-32

*Mat. 27:27-44; Luk. 23:26,
33-43; Yoh. 19:2-3, 17-24*

Anna mane dibaba lao Puang Yesus la dipäso' yabo kaju sitambem anna malai mate. ²¹Wattu eta too deem mesa tau isanga Simon to Kirene, ambena Aleksander sola Rufus, mane sule dio mai sulibanna kota Yerusalem. Iya napassaim umpasam kaju sitambenna Puang Yesus. ²²Indo sohodadu umpasola Puang Yesus lako mesa ongeam isanga Golgota, kalembasanna ongeanna kahohä' ulu. ²³Anna mane nabeem anggur sihau mur, sapo' tä'

naaku naihu'.²⁴ Iya napalängämmi kaju sitambem anna mane nataba-taba pohebana sapo' naundi. ²⁵Tette' kaseham mebengngi' anna dipalängänni kaju sitambem Puang Yesus. ²⁶Yabo indo kaju sitambenna dituli' kasuhunganna anna dipäso'i, naua: TOMAHAJANNA TO YAHUDI. ²⁷Deem duka' dua pehampo' nasimbahaam dipäso' yabo kaju sitambem, mesa dio tandai kananna anna mesa dio tandai kaihinna.[²⁸Iya diganna'im issinna Battakadanna Puang Allataala naua: "La dihekem duka' mesa tau kadake illaam alla'na tau kadake."]

²⁹Ingganna to muolai ongeam ia too si muillim-illim tandana untelle Puang Yesus napasindum naua: "Kusanga paha' la ungdakeangko Banua Debata anna la tallungngallo muolaam umpake'de' sule!" ³⁰Iya lappasangko kalemu anna tuhungko yabo mai itim kaju sitambem!" ³¹Susi toi duka' kapala sando anna to ullatta' Pepaondonganna Musa sipa'tula'-tula' mantelle naua: "Maka' tau senga' mala napasalama', sapo' maka' kalena tä' ohi ia mala napasalama'. ³²Maka' abana si'da tomahajanna to Israel anna To nalanti' Puang Allataala, iya la tuhummi too yabo mai inde dio kaju sitambem anna mala taitaia' anta katappa'ia." Moi duka' indo to dua to nasimbahaam dipäso' yabo kaju sitambem untelle duka' Puang Yesus.

Kamateanna Puang Yesus

15:33-41

Mat. 27:45-56; Luk.

23:44-49; Yoh. 19:28-30

³³Tappana tängä allo, iya malillim pättäm dio indo pa'lembängam sule lako tette' tallu kahubem. ³⁴Tette' tal-lui kahubem, iya metambam Puang

Yesus naua: "Eloi, Eloi, lama sabakhtani?" Kalembasanna, O Puang Allataala, Debatangku, aka hi anna untampeannä'?

³⁵Nahingnginna petambana indo to ke'de' eta too, iya deemmi sanaka-naka muuai: "Pehingngiia'i, untambai nabi Elia!" ³⁶Iya napasihha'um mesa tau muala bunga karang[§] anna nahammei dokko anggur maissu', mane napadekke'i lako pesoka anna napadu'dui pudu'na Puang Yesus napasindum naua: "Taampaipia' anna tapetua'ia' battu la sule si'da hi nalappasam Elia."

³⁷Iya metamba pole oom mane kattui penabanna.

³⁸Wattu eta too, indo sampim pe-sapa' illaam Banua Debata tappa sesse' tipa'dua mengkalao yabo sule dokko.

³⁹Deem mesa punggabana sohodadu mahassam ke'de' dio olona Puang Yesus. Tappana naitai maaka susi kamateanna, iya nauam: "Abana Änä'na si'da hia päläe' Puang Allataala!"

⁴⁰Deem duka' sanaka-naka baine umpetua' mambelai, susinna Maria Magdalena, Salome, anna Maria indona Yakobus Mangnguha sola Yoses. ⁴¹Baine ia too sangngim to untuhu'um Puang Yesus, anna si natahiai indo anna si diopi Galilea. Anna budapi baine senga' dio duka' heem eta too, to napasola sule dio Yerusalem.

Bakkena Puang Yesus dipatama lokko'

15:42-47

Mat. 27:57-61; Luk.

23:50-56; Yoh. 19:38-42

⁴²Allo eta too allo pa'patokaam la mentama allo Katohhoam. Tappana mahammo, ⁴³iya deemmi mesa tau isanga

^{§15:23} Petua' dioi pemasiä'na Mat. 27:34.

^{§15:36} *bunga karang*: mangnguhanna batu panga' si tubo dio le'bo', susi lomo' malunä'na.

Yusuf to Arimatea, mesa to kasalle il-laam bilanganna To Mahhotto' Handam Malangka', napengkasahai umpel-lambi'i Pilatus anna umpelau bakkena Puang Yesus. Indo Yusuf mesa to masäe allom muampai kapahentaanna Puang Allataala. ⁴⁴Mängä-mängä Pilatus tappana napekaheba diua matem Puang Yesus. Iya untambaim pangngulunna sohodadu anna nakutanai naua: "Mate si'dangka Yesus?" ⁴⁵Tappana nahingngi pa'tula'na, iya umpäbäim Yusuf lao muala bakkena Puang Yesus. ⁴⁶Iya muallim sampim mabusa Yusuf anna laoi napatuhum anna nabalunni. Anna mane laoi napandam tama lokko' dipapia dio mesa tanete batu. Puhai, iya ul-lolimmi batu kasalle natutu'iam ba'bana. ⁴⁷Indo ongeam dipampandanni bakkena naita Maria Magdalena sola Maria indona Yoses.

**Puang Yesus tubo sule dio
mai alla'na to mate**

16:1-8

Mat. 28:1-10; Luk. 24:1-12; Yoh. 20:1-10

16 Tappana lessu' allo Katohhoam, muallim bauam bubanau' Maria Magdalena anna Maria indona Yakobus anna Salome aka la lao nasussuiam bakkena Puang Yesus illaam lokko'. ²Buttunna allo indo allo Minggu eta too, iya le'ba'im lako ku'bu'. ³Iya sipa'tula'tula'um naua: "Mennangkia' la umbehoiam indo batu pelapa'na ku'bu'?" ⁴Sapo' mahuku'i lako, iya naitam indo batu dilapasam ba'ba lokko' puham dilolim lao. ⁵Iya le'ba'im tama indo ku'bu', iya naitam mesa to mangnguha ma'poheba mabusa muokko' dio tandai kanam, iya sileleim tikkedu' anna mängä-mängä.

⁶Sapo' ma'kada indo to mangnguha naua: "Daa ummahea'a! Kuissam kuua umpeäkoa' Yesus to Nazaret indo to

puha dipäso' yabo kaju sitambem, sapo' pa'dem inde aka tubom sule. Petua'ia indem ongeanna. ⁷Dadi le'ba'ungkoa' temo anna umpaissanni Petrus sola passikola senga'na muua: 'Mendiolom ia lako Galilea Puang Yesus, diopi mane silambi'koa' umba susi puha nauaungkoa'."

⁸Iya le'ba'i siaham sikalumpa' umpellei indo lokko' aka tikkedu' lambi' lumalla' mahea' muita kadadiahm ia too. Tandana mahea'i, iya tä' deem natula' lako tau.

**Puang Yesus umpa'patandaam kalena
anna mane tiäkä' längäm suhuga**

16:9-20

⁹[Tappana puha tubo sule Puang Yesus indo mebangngi'-bangngi' allo Minggu eta too, iya uhu-uhuna umpa'paitaam kalena lu lako Maria Magdalena indo to puha nahambaiam pitu setam illaam mai kalena. ¹⁰Iya tappa le'ba'um indo baine napa'paissangam lako ingganna to si untuhu'i anu' mahassannipi ma'bahata anna tää'i liupi tipoli' uwai matanna wattu eta too. ¹¹Sapo' tappana sikanahingngi naua tubom sule Puang Yesus anna deemmi umpa'paitaam kalena, tä' liu siaham nakannangam. ¹²Lessu'i eta too umpa'paitaam pole oom kalena, sapo' senga'um hupanna, lako dua pentuhu'na wattunna anna le'ba'i umpellei tondä'. ¹³Iya ma'pasulem sule aka la natula' lako solana indo pangngitanna. Sapo' tää'i liupi kannam. ¹⁴Katampasanna umpa'paitaam kalena lako sapulo mesa passikolanna wattunna mahassanni mangngande. Sangngim nasosso Puang Yesus aka tä' ungnangam pa'tula'na to puha muitai katuboanna sule. ¹⁵Iya ma'kadam Puang Yesus lako naua: "Le'ba'koa' lako lili'-lili'na lino ammu pa'pakahebaannia' Kaheba

Katilallasam lako ingganna hupatau.
¹⁶Menna-menna unkatappa'i
 anna ditedo'i iam too la salama',
 sapo' menna-menna tä' matappa' la
 ditahungkum ia. ¹⁷Tanda-tandana
 to matappa' mala la umpogau'
 susinna: uhhambai lao setam umpake
 sanganku, anna la umpake basa
 maneanna natula', napalosaia Penaba
 Maseho. ¹⁸Moi anna la muanda'i ula'
 battu la muihu' hasum sapo' tä' la mala

nasägäi, anna la uhhaka' to masaki
 napolalam bono'."

¹⁹Puhai ma'tula' lako passikolanna,
 iya tiäkä'um längäm suhuga anna
 muokko'i dio tandai kananna Puang
 Allataala. ²⁰Iya le'ba'im passikolanna
 umpa'pakahebaam Kaheba Katilallasam
 lako si mesa-mesa ongeam illaam lino
 anna napasolai Debata mengkähä
 umpakatoto' kadanna napa'patandaam
 umpadadi tanda memängä-mängä.]

Kaheba Katilallasam natuli' Lukas

Bätäna issinna

Inde suha' natuli' Lukas mesa tuandotto' si umpasolai Paulus illaam pa'laoanna umpa'pakahebaam Kaheba Katilallasam diona Puang Yesus (Kol. 4:14; 2Tim. 4:11; Flm. 24). Maelo' la natuli' inde suha' diona Puang Yesus, nasuhum napellantunni manappa mengkalao pahandu'na ingganna pa'palakoanna Puang Yesus (1:1-3).

Illaam inde suha', natuli' Lukas diona Kaheba Katilallasam naua Puang Yesus-um too indo To dilanti' la mepasalama' to puha nadandi Puang Allataala. Sule inde lino aka la umpasalama' ingganna hupatau to matappa' lako, susi to Yahudi teem taianna to Yahudi (2:10; 2:30-32; 3:6; 24:47), umba susi natula' naua: "...suleä' umpeä' anna la umpasalama' ingganna to bulim" (19:10).

Illaam issinna inde suha', deem sanaka-naka handanna napaitoo'na Lukas. Natuli' diona pa'kamasena Puang Yesus lako hupatau tandaam illaam pa'palakoanna, susinna lako to mase-mase (6:20; 7:22; 14:12-13; 21:1-4), to madosa (5:30; 7:37-50; 15:1-2), baine (7:11-17; 8:2-3; 10:38-42; 13:10-13; 21:1-4; 23:27-31) anna änä'-änä' (8:41-42; 54-55; 9:38-42; 9:46-48; 18:15-17). Natuli' toi duka' diona sambajam, pengkähänganna Penaba Maseho, pengkähänganna baine to umpamoloi Puang Yesus, kaampunganna dosa, anna budapi senga'na.

Lesoanna issinna

1. Kada passu'bö' (1:1-4)

2. Kadadianna Yohanes to si mantedo' anna kadadianna Puang Yesus (1:5-2:52)

3. Kada napalambi' Yohanes to si mantedo' (3:1-20)

4. Puang Yesus ditedo' anna napa'sändä'i tomahajanna setam (3:21-4:13)

5. Pengkähänganna Puang Yesus lako hupatau dio Galilea (4:14-9:50)

6. Pa'lao-laona Puang Yesus mengkalao dio Galilea sule längäm Yerusalem (9:51-19:27)

7. Ma'katampasanna pa'palakoanna Puang Yesus dio Yerusalem anna lako sikahuku'na (19:28-23:56)

8. Katuboanna sule Puang Yesus anna umpa'paitaam kalena lako passikolonna anna wattunna tiäkä' längäm suhuga. (24:1-53)

1 O Teofilus to dipa'kasallei, budam tau umpeäi lalanna anna malai natuli' situhu' tonosanna ingganna indo kadadiam to puha dadi illaam alla'-alla'na hupatau. ²Sikanatuli' situhu' indo puha natulasangkia' to umpa'pakahebaam Battakada Debata, indo to muitai sola mata mengkalao pahandu'na kadadiam ia too. ³Dadi tappana kupellantunni manappa mengkalao pahandu'na kaha-kaha ia too, iya kuuam mapia ke kutuli'i situhu' tonosanna ingganna ia too anna malai umbata. ⁴Kupateem anna malai muissam muua indo to puha dipa'guhuangko abana tappa' si'da.

Kadadianna Yohanes to si mantedo' dipa'paissangam

1:5-25

⁵Wattunna anna mendadi tomahajai Herodes dio lembäna Yudea, deem mesa sando isanga Zakharia, mentama duka' kamesaanna to mate Abia. Bainena Zakharia isanga Elisabet, mesa duka' pesubunna sando Harun. ⁶Indo to dua, malolo pa'palakoanna dio olona Puang Allataala, aka bassim tä' deem sasainna kamanuhusanna untuhu'i ing-

ganna pahentana Debata. ⁷Sapo' indo to sipobaine tä' deem änä'na, aka abana tämänä Elisabet, anna bassim matuam.

⁸Pissam wattu, lambi' oom wattunna la ma'palako sando to mentama kamesaanna to mate Abia, nasuhum Zakharia umpalako oloam sando dio olona Puang Allataala. ⁹Situhu' kabiasaam, si diundi indo to la umpalako oloam sando illaam Banua Debata la untunu tunuam bubanau', iya Zakharia nahua eta too. ¹⁰Mahassanni dipalako indo hettem tunuam bubanau', sulibam ia tau buda ma'sambajam.

¹¹Wattu etam too naongi umpa'paitaam kalena mesa malaika'na Debata lako Zakharia. Indo malaika' ke'de' dio tandai kananna indo meja dipantunui tunuam bubanau'. ¹²Naitanna Zakharia indo malaika', tappa tikkedu' anna mahea'. ¹³Sapo' ma'kada indo malaika' naua: "O Zakharia, daa ummahea', nahingngiammi Puang Allataala pa'sambajammu. Nasuhum la nadadianganko bainemu Elisabet mesa änä' muane-ane anna la ussangai Yohanes. ¹⁴Tä' deem pada la satiala inabammu ke dadim indo änä'-änä', anna la buda tau kassi wattu eta too. ¹⁵Aka indo änä'mu, mesa to la keangga' dio olona Debata. La tä' mala muihu' anggur sola uwai senga' indo si mepamäbo'na. Anna subunna too, iya naponnoim Penaba Maseho. ¹⁶La buda to Israel napopengngolo sule lako Puang Allataala, Debata to naponombai nene to naponene. ¹⁷Anna la umpendioloangam Debata sule naponnoi kuasa susi nabi Elia. La umpasikapiai ambe anna änä', anna lako tau to tä' manuhu' la napatinanda sule lako lalanna to si umpogau' kamaloloam. Pa'palakoam iam too umpaitai lalam hupatau anna mala toka penabanna la mendadi umma'na Debata."

¹⁸Iya natimba'im Zakharia lako indo malaika' naua: "Tä' natama pikkihangu itim tula'mu, aka kao illaammä' kamatu-aam, susi siam duka' baineku."

¹⁹Natimba' indo malaika' naua: "Kaom too Gabriel to si nasua Puang Allataala. Anna nasua omä' temo umpalambisango inde Kaheba Katilallasam. ²⁰Inde to puha kutula' tä' mala tala dadi ke lambi'um wattunna. Sapo' aka tä'ko kannam, nasuhum tä'ko la mala ma'kada sule lako diganna'i inde kaha-kaha puha kupokada."

²¹Wattu eta too, mamali'um tau buda muampai Zakharia anna sangngim mängä-mängä naua: "Akanna masäe sugali'i illaam Banua Debata?" ²²Pissananna ham ia messubum illaam mai tä'um mala ma'kada, iya napakana mandam lako tau buda indo to naita illaam Banua Debata. Naissam pole' tau buda naua: "Deem aka-aka napaitaiam Debata illaam."

²³Tappana puha wattu pengkähänganna Zakharia illaam Banua Debata, iya ma'pasulem lako tondä'na. ²⁴Tä' masäe lessu'na ia too, iya kebättä' si'da ham Elisabet bainena, lambi' unguhum kalena illaam banua lima bulanna. ²⁵Iya nauam Elisabet: "Inde kaha-kaha napa-dadi Debata tama kaleku, solanapi pa'kamasena di kao nasuhum tä'mä' pole' la si napa'bahinni'-hinni'i solaku."

Kadianna Puang Yesus dipa'paissangam

1:26-38

²⁶Annanni bulanna tambu'na Elisabet, iya nasuam Puang Allataala indo malaika' isanga Gabriel lao lako Nazaret, mesa tondä' dio lembäna Galilea. ²⁷Dioi, umpellambi'im mesa änä' daha isanga Maria. Indo Maria balim nakutanai muane isanga Yusuf, mesa duka' peampoanna tomahaja Daud. ²⁸Iya ma'kadam indo malaika' lako Maria naua: "O to

kehongko! Naundu'ko anna namana' Debata.”

²⁹Tikkedu' Maria uhhingngi tula'na indo malaika' lambi' mekutana illaam penabanna naua: “Aka hia umbai' kalembasanna indo tula' ingngena?”
³⁰Iya nauam indo malaika': “O Maria, daa ummahea' aka iko mesako to napilei Puang Allataala la natamba'.³¹ La kebättäko anna la undadiangko äänä' la muane-ane anna la ussangai Yesus.³² La mendadi mesa to kasalle anna la diuaam Änä'na Puang Allataala To Handam Matande. La napatadongkom Puang Allataala Debatanta mendadi tomahaja illaam kapahentaanna tomahaja Daud nene to naponene.³³ Anna la umpahenta pessubunna Yakub sule lako salako-lakona, anna kapahentaanna tä' deem la meangganna.”

³⁴Iya ma'kadam Maria lako indo malaika' naua: “La mala haka tia sule lako itim kadammu aka tä'pä' deem si-isso muane.”

³⁵Sapo' naua indo malaika': “Penaba Maseho la ussalokko'ko anna kakuasaanna To Handam Matande la mengkähä illaam kalemu. Iam too anna la diuaammi indo äänä'-äänä' la undadiam: ‘To Malolo, Änä'na Puang Allataala.’³⁶ Ungkilalai haka indo Elisabet sahapummu, annammi bulanna tambu'na temo, moi anna illaammi kamatuaam anna si naua asammi tau: ‘Tämänä.’³⁷ Aka tä' ia deem nakapusa'i Puang Allataala.”

³⁸Iya nauam Maria: “Kao sabua'naä' Debata; iai too muua, iam too la dadi tama kaleku situhu' indo tula'mu.” Iya le'ba'um indo malaika' umpellei Maria.

Maria lao umpessitai Elisabet

1:39-45

³⁹Puhanna ia too, tappa le'ba' siaham Maria lako mesa kota dio lembäna Yudea yabo tipatanetena.⁴⁰ Sulei

lako, iya le'ba'um tama banuanna Zakharia anna umpa'kadai Elisabet.
⁴¹Nahingnginna Elisabet pa'kadanna Maria, tappa pahiu siaham indo äänä'-äänä' illaam tambu'na. Iya nasahum siaham Penaba Maseho Elisabet,
⁴²lambi' metamba naua: “Ingganna baine iko handam ma'kalolosam tamba'mu, anna la ditamba' toi indo äänä'-äänä' la undadiam.⁴³ Setonganna tä' sihatannä' la napellambi'i indona Debatangku.⁴⁴ Aka kuhingnginna pa'kadammu, tappa pahiu siaham indo äänä'-äänä' illaam tambu'ku, kassi.
⁴⁵Kehongko'ko anna maupa', aka unkatappa'i muua indo kadanna Debata tama kalemu tä' mala tala dadi!”

Kada katilallasanna Maria umpuji Debata

1:46-56

⁴⁶Iya ma'kadam Maria naua:
“Mengkalao illaam unä' penabangku lemba' dio pudu'ku umpujiä' Debata,
⁴⁷anna kutilalla'i sola sakalebu penabangku längäm Puang Allataala to umpasalama'ä',
⁴⁸aka moinna anna mesaä' to handam matuna, sapo' tontää' napailaam penaba.
Napahandu' temo la nauaam asannä' ingganna lapi'na hupatau: ‘To kehongko!’

⁴⁹Aka Puang Allataala To Handam Kuasa puha umpogau' tanda memängä-mängä tama kaleku.

Maseho sanganna!

⁵⁰Pa'kamasena Puang Allataala tihandu' lako ma'hupatau sule lako ampo-ampona to mengkahea' dio olona.

⁵¹Katea' bassinna umpogau' pa'pogausam kasalle.

Puha usseham ingganna to malangka' penaba anna ingganna pattujunna napompoi asam.

⁵²Buda tomahaja napatuhum yabo mai okkosam kahajaanna, sapo' to madio napomatande.

⁵³Umpadea' kamapiaam ingganna to tadea', sapo' to makaka nahambai ia lao ma'pala' lo'bä.

⁵⁴Umpamoloi pessubunna Israel sabua'na, tä' deem lembe nakamasei.

⁵⁵Aka Puang Allataala tä' ungaklembei pa'dandianna lako Abraham nene to naponene, sola ingganna pessubunna sule lako salako-lakona."

⁵⁶Umbai' tallu bulampi tohho Maria dio sola Elisabet, mane ma'pasulei lako banuanna.

Kasubunganna Yohanes to si mantedo'

1:57-66

⁵⁷Tappana lambi' wattunna keänä' Elisabet, iya undadiammi mesa änä' muane-ane. ⁵⁸Naissanna ingganna sambanuanna sola kasahapuanna maaka susi pa'kamasena Debata lako Elisabet, iya tä' deem pada satilalla' duka' sola Elisabet.

⁵⁹Kahuai benginna subunna indo änä'-änä', iya suleim anna nasunna'i.** Sangngim mohäe la nasangai Zakharia napasikona ambena, ⁶⁰sapo' naua indona: "Tää', aka la disangai hi tia Yohanes."

⁶¹Natimba'iim naua: "Aka tä' deem kasahapuammua' ma'sanga susi."

⁶²Iya umpa'pakana-kanam limanna lako Zakharia hapam nakutanai naua: "Aka la disangaiam inde änä'-änä'?"

⁶³Iya umpelaum batu tuli' anna natuli'i naua: "La disangai Yohanes." Iya sangngim mängä-mängä pole'. ⁶⁴Wattu

eta siam anna tibukkai sule pudu'na Zakharia, lambi' mala sule ma'kada anna umpujii Puang Allataala. ⁶⁵Ingganna sambanuanna sangngim mahea', anna ia mandam natula' lako dio mai ingganna tau dio tipatanetena Yudea. ⁶⁶Ingganna to uhhingngii kaha-kaha ia too sangngim mekutana illaam penabanna naua: "La dadi aka amo indo änä'-änä' ke dako'i?" Aka mannassa anna naundu'i Debata.

Kadanna Puang Allataala napalombum Zakharia

1:67-80

⁶⁷Indo Zakharia ambena indo änä'-änä' nasahum Penaba Maseho, nasuhum umpalombum kadanna Debata naua:

⁶⁸"Tapujii' sanganna Puang Allataala Debatanna to Israel, aka sulem umpellambi'i umma'na anna nalappasam.

⁶⁹Nabeengkia' To Mepasalama' tä'um deem tondonna, pessubunna tomahaja Daud sabua'na.

⁷⁰Umba susi puha nadandi Puang Allataala napalanda' ingganna nabi masehona yolona,

⁷¹la nalappasangkia' dio mai balinta anna kakuasaanna ingganna to ungakbassikia'.

⁷²Susim too umpatandaam pa'kamasena anna ungganna'i pa'dandiam masehona indo to puha nadandi lako nene to taponene.

⁷³Indo pa'dandiam to puha napa'pindai lako Abraham nene to taponene naua:

⁷⁴'La kulappasangkoa' dio mai balimmu, anna mala beba'koa' umpalako pa'elo'ku,

⁷⁵anna la tontä liukoa' tubo situhu' pa'elo'ku anna umpogau'

**1:59 *disunna'*: kalembasanna, *ditille*. Situ'hu' pepaondonganna to Yahudi pahallu *disunna'* asam muane dipotanda diua mendadim umma'na Puang Allataala. Pahallu *disunna'* änä'-änä' ke kahuam benginna dadinna.

kamaloloam dio oloku upu' salu katuboammua'.

⁷⁶Anna iko änä'ku, la disangaiko nabinna Puang Allataala To Handam Matande;

Aka ikom too disua mendiolo la umpa-tokaam lalam Debata.

⁷⁷La umpa'paissangam lako umma'na muua la mala tau dipasalama'

ke naumpunnim Puang Allataala dosata.

⁷⁸Napateem aka tä' deem pada sakasalle pa'kamasena Puang Allataala lako kita,

lambi' tuhum yabo mai suhuga napellambi'ikia'

sihhapam bihha'na allo ke mebengngi',

⁷⁹la muindo ingganna hupatau to tubo illaam kamalillingam

anna illaam lembäna kamateam,

la napatinanda lako lalam kamasannangam."

⁸⁰Iya tuttuam kasallem indo änä'na Zakharia anna tuttuam manontom. Iya tohhom dio pohiallasam sampe lambi' wattunna umpa'patandaam kalena lako to Israel.

Kadadianna Puang Yesus

2:1-7

Mat. 1:18-25

2Wattu eta too umpassubum pahenta tomahaja Agustus la dihekem ingganna hupatau illaam kapahentaanna Roma. ²Iam too inde uhu-uhuna dipadeem pahhekenganna hupatau wattunna Kirenius mendadi gubernur dio Siria. ³Iya le'ba'um ingganna tau lako tondä'na si mesa-mesa anna mala dihekem dio.

⁴Iya mengkalaom duka' Yusuf dio tondä' Nazaret dio lembäna Galilea le'ba' längäm kota Betlehem dio lembäna

Yudea, ongeam kasubunganna tomahaja Daud, aka inna pessubunna tomahaja Daud. ⁵Umpasola Maria to la napobaine la lao dihekem. Eta too mahassammi kebättä Maria. ⁶Dioi, iya lambi'um wattunna la keänä'. ⁷Iya ungeänäsammi änä' uluana muane-ane. Iya nabe'be'im sampim anna nalole'i dokko pahabam, aka tä'um deem banua mala naonge'i tohho.

To ma'kambi' napellambi'i malaika'

2:8-20

⁸Dio indo ongeam deem sanaka-naka to ma'kambi' tohho dio pa'kambisanna ma'bengi unjagai dombana.

⁹Pissananna ham ia umpa'paitaam kalena mesa malaika'na Debata lako indo to ma'kambi', anna kakuasaanna Debata pangkähhä umpali'i lao, lambi' sangngim mahea'. ¹⁰Sapo' ma'kada indo malaika' naua: "Daa ummahea'a', aka suleä' umbaba kaheba mapia tä' deem pada saumpatilalla' ingganna hupatau: ¹¹Bengi temo dipadadiammokoa' dio botto litä'na tomahaja Daud mesa to la umpasalama'koa'. Iam too Kristus, Debatanta.†† ¹²Anna la susi inde tandana: La ullambi'koa' mesa änä'-änä' malea dibe'be'i sampim dilole' dio pahabam."

¹³Iya tappa diita oham buda malaika' senga' sola indo mesa malaika' buttu yabo mai suhuga umpuji Puang Allataala naua:

¹⁴"Dipa'kasallei Puang Allataala yabo ongeam handam matande, anna la masannam hupatau illaam inde lino to naphäe Debata."

¹⁵Tappana le'ba' indo malaika' ma'pasule längäm suhuga, iya sipa'tula'-tula'um indo to ma'kambi' naua: "Maikoa' talako kota Betlehem

††2:11 *Kristus*: Kristus anna Mesias tontäm: *Kristus* illaam basa Yunani anna *Mesias* illaam basa Ibrani. Bassim kalembasanna *To dilanti' la pasalama*'.

anta petua'ia' indo kadadiam dio, indo puhakia' napaissanni Debata.”

¹⁶Mengkalaoui siaham lako, iya ullambi'um Maria sola Yusuf anna indo änä'-änä' dilole' dio pahabam. ¹⁷Tappana nalambi', iya natulasammi indo puha napaissanniam malaika' diona indo änä'-änä'. ¹⁸Lambi' sangngim mängä-mängä ingganna tau uhhingngii indo tula'na to ma'kambi'. ¹⁹Sapo' kaha-kaha ia too napaillaam penaba ia Maria anna napenaba-nabaam liui. ²⁰Iya ma'pasuleim indo to ma'kambi' lako ongeanna napasindum umpuji anna umpa'kasallei Puang Allataala aka ingganna indo puha nahingngi anna naita tä' deem la sisala indo puha natulasam malaika'.

**Puang Yesus nababa
tomatuanna längäm Yerusalem**

2:21-40

²¹Tappana kahua benginna dadinna indo änä'-änä', iya disunna'um anna disangai Yesus umba susi passangainna loppo' malaika' indo anna tä'pi nakebät-tängam indona.

²²Tappana lambi' wattunna la dibahassii Maria situhu' Pepaondonganna Musa aka mane puha keänä',^{‡‡} iya nababam Yusuf sola Maria indo änä'-änä' längäm Yerusalem nabeho lako Debata ²³umba susi puha tisuha' illaam Pahentana Debata naua: “Ingganna änä' ulua muane tabana ia Debata.”^{¶¶} ²⁴Anna umbaba bua pemala'na situhu' indo puha napokada illaam Pahentana Debata naua: “sapasangka bukku' duaka änä'na dangam-dangam.”^{§§}

²⁵Wattu eta too deem mesa tau dio Yerusalem isanga Simeon, mesa to meimam si mengkahea' längäm

Puang Allataala anna nasahum Penaba Maseho, umpemmitai liu wattunna Puang Allataala la ullappasam to Israel. ²⁶Anna inna puham napalosai Penaba Maseho naua: “Tä'poko la mate ke tä'ko silambi' yolo indo To nalanti' Debata la mepasalama'.” ²⁷Iya nagaha'um Penaba Maseho Simeon nasuhum mentama Banua Debata. Wattu etam too duka' anna nababai tomatuanna Puang Yesus tama Banua Debata aka la umpalako indo situhu'na Pepaondonganna Musa. ²⁸Iya naalam indo änä'-änä' nakaleppe' anna napasindunni umpuji sanganna Puang Allataala naua:

²⁹“O Debata, umpasule lakom pa'dandiammu tama kaleku. Dadi masannammä', pübäimä' pole' mate.

³⁰Aka kusa'biim sola matangku To Mepasalama' buttu di Iko

³¹indo to umpatokaam lako ingganna hupatau.

³²Inde To Mepasalama' la sihhapam masiä' muindo taianna to Yahudi, anna la umbaba kamatandeam lako to Israel umma'mu.”

³³Iya bassim mängä-mängäm ambena sola indona uhhingngii indo tula'na Simeon diona indo änä'na. ³⁴Iya napelauammi tamba' Simeon indo to sahapu mane ma'kadai lako Maria, indona indo änä'-änä' naua: “Inde änä'mu puham natuho Puang Allataala la uhhonnosam buda to Israel, anna la buda napomatande. Anna la mendadi mesa tanda yabo mai Puang Allataala la natumpu pala' hupatau ³⁵anna mala tandaam pikkihanna anna lalam penabanna lako si mesa-mesa hupatau. Anna iko-iko Maria, la ussi'dingko

^{‡‡}2:22 Sand. 12:2-4.

^{¶¶}2:23 Täss. 13:2,12,15.

^{§§}2:24 Sand. 12:6-8.

kamapi'disam sihhapam nabuno pa'dam."

³⁶⁻³⁷Wattu eta too deem polepi mesa nabi baine isanga Hana, änä'na Fanuel, pessubunna Asyer. Indo Hana matusse'um aka kahua pulom appa' taunna dadinna. Iya masäem mendadi to balu baine aka anggam pitu taunna sola muanena balinna siala anna matem muanena. Tä' si'da-si'dapi deem la umpellei Banua Debata, allo bengi umpalako liu kapenombaam dio olona Puang Allataala, puasa anna ma'sambajam. ³⁸Eta siam too duka' anna sulei ma'kuhhu' sumanga' längäm Puang Allataala anna natula'i diona änä' ia too lako tau buda to muumpai kalappasanna to Yerusalem.

³⁹Tappana puha napalako Yusuf sola Maria ingganna indo situhu'na Pahenta Debata, iya ma'pasulem lako tondä' Nazaret dio lembäna Galilea. ⁴⁰Indo änä'-änä' tuttuam kasalle anna matoho; ponno kakeakasam, anna napakamaja Puang Allataala.

Sapulo duam taunna Puang Yesus anna illaanni Banua Debata

2:41-52

⁴¹Taum-taum le'ba' liu tomatuanna Puang Yesus längäm Yerusalem umpakahoa' allo Kalappasam.*

⁴²Tappana sapulo dua taunna Puang Yesus, iya le'ba'i oom längäm Yerusalem ma'pakahoa' situhu' kabiasaanna.

⁴³Tappana puha allo kasalle ia too, iya ma'pasuleim, sapo' tohho ia Puang Yesus yabo Yerusalem tä' naissam tomatuanna. ⁴⁴Nasanga siam ia duka' sola tau buda muola lalam. Sangngallo ham mellao mane napeäi lako alla'-alla'na kasahapuanna anna issanganna. ⁴⁵Sapo' tä' deem nalambi', nasuhum ma'pasule sule längäm

Yerusalem napeä. ⁴⁶Napetallunggalloi napeä mane nalambi'i illaam Banua Debata mahassam muokko' illaam alla'-alla'na tuanguhu illaam peadasam napehingngii tula'na anna nakutanai. ⁴⁷Ingganna to dio heem eta too sangngim mängä-mängä uhhingngi kamanähänganna anna pentimba'na indo änä'-änä'. ⁴⁸Anna mängä-mängä toi duka' tomatuanna muitai. Iya ma'kadam indona lako naua: "O änä'ku, akanna umpateem dakam kami? Husa'kam sola ambemu umpeäko."

⁴⁹Iya natimba'im Puang Yesus naua: "O ambe' solakoa' indo', akanna umpeää'? Tä' daka tiko muissanna' muua Kao pahalluä' la illaam banuanna Ambeku?" ⁵⁰Sapo' tä' naissam tomatuanna kalembasanna indo tula'na.

⁵¹Puhai ia too, iya sola-solam ma'pasule lako Nazaret, anna tontä liu manuhu' lako tomatuanna. Anna ingganna indo kaha-kaha napailaam penaba liu indona. ⁵²Tuttuam lobo' Puang Yesus anna tuttuam keaka'. Tuttuam napakamaja Puang Allataala anna napohäe hupatau.

Diona Yohanes to si mantedo'

3:1-20

Mat. 3:1-12; Mrk. 1:1-8; Yoh. 1:19-28

3 Illaam taum kasapulo limanna ma'pahenta tomahaja Tiberius, eta too Pontius Pilatus mendadi gubernur dio Yudea, anna Herodes muanda'i kapahentaam dio Galilea, anna Filipus solasubunna Herodes muanda'i kapahentaam dio Iturea anna dio Trakhonitis, anna Lisianis muanda'i kapahentaam dio Abilene. ²Anna to mendadi sando too' wattu eta too isanga Hanas anna Kayafas. Iya taum etam too anna ma'kadai

*2:41 *allo Kalappasam*: Petua' dioi pemasiä'na Mat. 26:2.

Puang Allataala lako Yohanes änä'na Zakharia dio pohiallasam. ³Nasuhum le'ba' Yohanes lako ingganna ongeam dio lembäna Salu Yordan umpalanda' kadanna Puang Allataala naua: "Tihokongannia' ingganna kasalaammu ammu behoia' kalemu ditedo' anna mala naampunniangkoa' dosamu Puang Allataala." ⁴Umba susi puha napayolo lambam nabi Yesaya illaam suha'na naua:

"Deem tau dio pohiallasam metambata-tamba naua:

'Patokaanni dalam Debata,
maloloanganni dalam la naolanna.

⁵Mellembäna la ditambunni,
matanetena sola mabuntunna la
dipomahante,
anna ma'lekko-lekkona la dimaloloam
anna ma'bo'bä'-bo'bä'na la
dipomahampa'.

⁶Anna ingganna hupatau illaam inde lino la muita kasalamasam buttu yabo mai Puang Allataala."[†]

⁷Ma'kada Yohanes lako tau buda indo to sule la ditedo' naua: "O inggam-mua' to si mambaba bulim, pessubunna to kadake gau![‡] Ussanga haka' iko la malakoa' lappa' dio mai aha' kasallena Puang Allataala? ⁸Pa'baju polekoa' anna pa'dodo pole anna tandaanni diua us-sosso si'dangkoa' gau'mu anna untingko' basabammu. Daa muuaia': 'Tä'kam la napassala Puang Allataala aka peampoan-nakam Abraham.' Aka kutulasangkoa', inde mai batu la mala duka' napadadi Puang Allataala peampoanna Abraham!

⁹Tentomai la dipembattaammi wase di ada'na Puang Allataala dilemposam ingganna kaju tää'na kembua manappa anna ditibe'i tama api."

¹⁰Iya mekutanam tau buda lako Yohanes naua: "Maka' susi, iya aka pahallu la kipogau?"

¹¹Natimba'im naua: "Menna-menna muampuum dua baju, la naala mesa anna nabeenni lako to tä' deem bajunna. Anna menna-menna muampuum kinande la napateem siam duka'."

¹²Deem duka' sule sanaka-naka tuam passima maelo' la ditedo', iya mekutanam duka' naua: "O tuangguhu, aka kami' la pahallu kipogau?"

¹³Natimba'im Yohanes naua: "Daa umpala'bii umpelau anna indo puha diuaangko."

¹⁴Iya mekutanam duka' sanaka-naka sohodadu naua: "Anna kami', aka kami' la kipogau?"

Natimba' Yohanes naua: "Daa umpangngala bäbäa' lako tau ke taiai lalanna anna tä' tookoa' la umpakolo'-kolo'i bäbä kakadakeam tau anna malai nabaja'. Paganna'unna' iko duka' indo sahomu!"

¹⁵Iya sangngim mekutanam illaam penabanna indo tau buda naua: "Iangka tia umbai' indo To dilanti' la mepasalama' masäem diampai?"

¹⁶Iam too anna nauam Yohanes lako indo tau buda: "Kao-kao uwai kupake untedo'koa'. Sapo' dako'i too sulem To kuasa puha Ia anna la kao. Aka moi la kubukkaiam pekaptu' sapatunna tala sihatannä'. Ia-Ia Penaba Maseho anna api la napake natedosangkoa'. ¹⁷Sihhapam to ma'tappi tokam dio limanna petappi la nase'laam banne maläpu' anna läkko'na. Ingganna banne maläpu' la di-anna manappa tama loko, anna läkko'na la ditibe ia tama api tapi'de-pi'de."

¹⁸Anna budapi kada penännä' senga' natula' Yohanes wattunna anna

[†]3:6 Yes. 40:3-5.

[‡]3:7 to si mambaba bulim, pessubunna to kadake gau': Indo dituli' illaam basa Yunani, naua ia ke basa Bambanni: *peampoannakoa' ula'*, aka ula' si napakonai to Yahudi ke deenni tau si mambaba bulim.

umpa'pakahebaanni indo Kaheba Katilallasam.

¹⁹Sapo' indo ia Herodes to muanda'i kakuusaam dio Galilea nakeaha'i ia Yohanes aka umpobaine Herodias, baina solasubunna, anna dionapi kakadakeam senga' napogau'. ²⁰Sapo' uhhängänni mandi kakadakeanna aka umpatama tahungkum Yohanes.

Puang Yesus ditedo'

3:21-22

Mat. 3:13-17; Mrk. 1:9-11; Yoh. 1:32-34

²¹Tappana puha natedo' Yohanes indo ingganna tau buda, iya untedo'um duka' Puang Yesus. Puhai natedo', iya ma'sambajammi Puang Yesus. Iya tappa tibukka siaham langi' ²²anna tuhunni Penaba Maseho anggasanna dangam-dangam uhhampoi. Anna dihingngi siaham kamaha buttu yabo mai suhuga naua: "Ikom too inde änä' pa'pakamjangku to umpomasannam penabangku."

Kabuttuanna nene to naponene Puang Yesus

3:23-38

Mat. 1:1-17

²³Kiha-kiha tallu pulom taunna dadinna Puang Yesus anna umpahandu'i pengkähänganna. Anna situhu' passangainna tau, Puang Yesus änä'na Yusuf.

Indo Yusuf änä'na Eli, ²⁴Eli änä'na Matat,

Matat änä'na Lewi, Lewi änä'na Malkhi, Malkhi änä'na Yanai, Yanai änä'na Yusuf,

²⁵Yusuf änä'na Matica, Matica änä'na Amos,

Amos änä'na Nahum, Nahum änä'na Hesli,

Hesli änä'na Nagai, ²⁶Nagai änä'na Maat,

Maat änä'na Matica, Matica änä'na Sime'i,

Sime'i änä'na Yosekh, Yosekh änä'na Yoda,

²⁷Yoda änä'na Yohanan, Yohanan änä'na Resa,

Resa änä'na Zerubabel, Zerubabel änä'na Sealtiel,

Sealtiel änä'na Neri, ²⁸Neri änä'na Malkhi,

Malkhi änä'na Adi, Adi änä'na Kosam, Kosam änä'na Elmadam, Elmadam

änä'na Er,

²⁹Er änä'na Yesua, Yesua änä'na Eliezer, Eliezer änä'na Yorim, Yorim änä'na

Matat, Matat änä'na Lewi, ³⁰Lewi änä'na

Simeon, Simeon änä'na Yehuda, Yehuda änä'na

Yusuf, Yusuf änä'na Yonam, Yonam änä'na

Elyakim, ³¹Elyakim änä'na Melea, Melea änä'na

Mina, Mina änä'na Matata, Matata änä'na

Natan, Natan änä'na Daud, ³²Daud änä'na Isai,

Isai änä'na Obed, Obed änä'na Boas, Boas änä'na

Salmon, Salmon änä'na Nahason,

³³Nahason änä'na Aminadab, Aminadab änä'na Admin,

Admin änä'na Arni, Arni änä'na Hezron, Hezron änä'na Peres, Peres änä'na

Yehuda, ³⁴Yehuda änä'na Yakub, Yakub änä'na

Ishak, Ishak änä'na Abraham, Abraham änä'na

Terah, Terah änä'na Nahor, ³⁵Nahor änä'na

Serug, Serug änä'na Rehu, Rehu änä'na Peleg, Peleg änä'na Eber, Eber änä'na Salmon,

³⁶ Salmon äinä'na Kenan, Kenan äinä'na Arpakhsad, Arpakhsad äinä'na Sem, Sem äinä'na Nuh, Nuh äinä'na Lamekh, ³⁷Lamekh äinä'na Metusalah, Metusalah äinä' Henokh, Henokh äinä'na Yared, Yared äinä'na Mahalaleel, Mahalaleel äinä'na Kenan, ³⁸Kenan äinä'na Enos, Enos äinä'na Set, Set äinä'na Adam, Adam äinä'na Puang Allataala.

Puang Yesus napa'sändä'i tomahajanna setam

4:1-13

Mat. 4:1-11; Mrk. 1:12-13

4 Puhai ditedo' Puang Yesus, iya umpelleim Salu Yordan. Wattu eta too naponnoi Penaba Maseho anna natettei lako pohiallasam. ²Iya tohhom dio appa' pulo allona appa' pulo benginna napa'sändä'i tomahajanna setam. Padam too masäena dio tä' deem manggande lambi' tadea'um nasi'dim.

³Iya ma'kadam indo tomahajanna setam lako Puang Yesus naua: "Maka' Äinä'na tongangko Puang Allataala, suai inde batu mendadi hoti!"

⁴Natimba'um naua: "Tää', aka puha tisuha' illaam Battakada Debata naua: "Taia kinande mandi la napotubo hupatau.""^f

⁵Iya umbabaim Puang Yesus indo tomahajanna setam längäm ongeam malangka' anna napaitai säppälli' ingganna kapahentaam illaam inde lino, ⁶anna nauaanni: "Kakuasaanna anna kamatandeanna ingganna inde kapahen-

taam balim dipadokkoannä' lisu pala'ku. Anna kuasää' la umpebeenni situhu' pa'elo'ku. ⁷Dadi maka' umpenombaiä', la iko asam umpuänganni."

⁸Natimba' naua: "Tää', aka tisuha' illaam Battakada Debata naua: 'Penombaiko Puang Allataala Debatammu anna anggam pa'elo'na la mala umpalako.'"⁸

⁹Puhai, iya umpasolam Puang Yesus lako Yerusalem anna napayaboi bubunganna Banua Debata anna nauaanni: "Maka' Äinä'na tongangko Puang Allataala, tobängangko kalemu inde dokko, ¹⁰aka deem tisuha' illaam Battakada Debata naua:

'Puang Allataala la ussua malaika'na unjagai manappako, ¹¹anna la natahimaiko anna mala moi bitti'mu tala tihuai lako batu.'"^{**}

¹²Natimba' pole oom Puang Yesus naua: "Tää', aka puha tisuha' illaam Battakada Debata naua: 'Daa umpa'sändä'i Puang Allataala Debatammu.'"^{††}

¹³Puha asanni napalako ingganna indo pa'sändäsam lako Puang Yesus indo tomahajanna setam, iya napelleim lao anna muumpai polei wattu mapia.

Puang Yesus umpahandu' pengkähänganna dio Galilea

4:14-15

Mat. 4:12-17; Mrk. 1:14-15

¹⁴Iya ma'pasulem Puang Yesus lako lembäna Galilea naponnoi kakuasaanna Penaba Maseho. Iya kaissangammi lako mobotto-bottoam dio pa'lembängam ia too. ¹⁵Iya si ulleleim pa'sambajangganna

^f4:4 *napotubo hupatau*, katuboam sule lako salako-lakona nauaam, batai Mat. 4:4, Pass. 8:3.

§4:8 Pass. 6:13.

**4:11 Puj. 91:12.

††4:12 Pass. 6:16.

to Yahudi naongeti ma'pa'guhu anna tä' deem pada sanapohäe ingganna hupatau.

**Ditumpu pala' Puang
Yesus dio Nazaret**

4:16-30

Mat. 13:53-58; Mrk. 6:1-6

¹⁶ Puhai ia too, le'ba'um Puang Yesus lako Nazaret ongeanna dipalobo'. Tappana lambi' allo Katohhoam, iya le'ba'um tama pa'sambajanganna to Yahudi umba susi si napogau'. Ilaanni, ke'de'um aka la umbata Battakada Debata. ¹⁷ Iya dibeemmi suha'na nabi Yesaya. Naalam indo suha' anna nabukkai, iya nalambi'um tisuha' naua:

¹⁸ “Kao to nasahum Penabanna Debatanta;

aka puhämä' nalanti' la umpa'paissangam Kaheba Katilallasam lako to mase-mase.

Anna nasua tooä' umpa'paissangam kalappasanna to disakka,

kabonosanna to buta, kalondaanna to dianda'i ongo'-onggo'na,

¹⁹ anna umpa'paissangam diua lambi'um wattunna la umpa'patandaam pa'kamasena Debata lako hupatau.”^{††}

²⁰ Puhai, nalulummi sule Puang Yesus indo suha' anna nabeenni lako indo to si mengkähä illaam pa'sambajangam mane muokko'i. Ingganna tau illaam indo pa'sambajangam unnenne'i asam Puang Yesus. ²¹ Mane ma'kadai Puang Yesus naua: “Ingganna indo issinna Battakada Debata diganna'im allo temo tappana uhhingngia'.”

²² Sangngim mängä-mängä anna napohäe nahingngi indo tula'na aka tä'

deem pada samapia. Iya nauaim: “Taia haka tia änä'na Yusuf inde tau?”

²³ Iya ma'kadam Puang Yesus naua: “Tä' mala tala deengkoa' umpahuaiä' inde pehapangam naua: ‘O tuandotto' kalemum too pabono! Anna indo tanda memängä-mängä umpadadi dio Kapernaum, pogau'i duka' inde botto litä'mu.’” ²⁴ Mane naua polei Puang Yesus: “Pengkilalaia', setonganna tä'pi deem mesa nabi la dipa'kasallei illaam botto litä'na. ²⁵ Pailaam penabaia' inde tula'ku: wattunna anna mendadi nabii Elia, deem buda to balu-balu baine illaam Israel. Wattu eta too kulla' tallu taum anna annam bulanna lambi' kende' kakobeam lako mobotto-bottoam.

²⁶ Sapo' tä' tia deem nasua Debata Elia la umpellambi'i indo to balu-balu baine illaam Israel, anggam tia lu lako mesa to balu-balu baine dio Sarfat, illaam lembäna Sidon. ²⁷ Susi toi duka' indo anna mendadi nabii Elisa, buda to dolengam illaam Israel tä' duka' deem moi podo la mesa napabono' sulibanna Naaman to Siria.”

²⁸ Iya ingganna tau illaam indo pa'sambajangam tä' deem pada sakeaha' nahingnginna indo tula'na, aka sangngim moka untahima Puang Yesus.

²⁹ Pada-padam ke'de' anna umbussunni Puang Yesus lako sulibam tondä' anna naphissinni lako ulu kumila' dio ampe' tondä'na la nasulungam dokko. ³⁰ Sapo' napa'tängäi bäbä Puang Yesus indo tau buda, le'ba' napellei.

To napentamai setam

4:31-37

Mrk. 1:21-28

³¹ Puhai ia too, le'ba'um Puang Yesus dokko kota Kapernaum dio Galilea. Tappana lambi' allo Katohhoam, iya

^{††}4:19 Yes. 61:1-2.

umpa'guhūm tau. ³²Sangngim mǎngǎ-mǎngǎ tau uhhingngi pepa'guhūanna Puang Yesus aka naponnoi kakuusaam pa'tula'na.

³³Illaam indo pa'sambajangam deem mesa tau napentamai setam. Indo tau kaoli-oli naua: ³⁴“O Yesus to Nazaret, la muaka hakam kami'? Abana isanga suleko la ungdakeikam? Aka kuissam kuaa iko To Masehoko buttu di Puang Allataala.”

³⁵Sapo' tappa nakuapai Puang Yesus naua: “Pengkamma'ko, pessubungko illaam mai kalena itim tau.” Iya ussǎmbǎsammi yolo indo tau dokko litǎ' indo setam dio olona tau buda mane messubunni, sapo' tǎ' siam nasǎgǎi.

³⁶Tǎ' deem pada sanakamǎngǎ-mǎngǎi tau buda, napolalam sipa'tula'-tula' naua: “Aka hia isanga indea'i anna malai umpahe' ingganna setam nasua lao? Inde tula'na ponno kakuusaam anna kamatohoam!” ³⁷Iya kaissangammi indo pa'pogau'na Puang Yesus illaam indo pa'lembǎngam ia too.

**Puang Yesus umpabono'
buda to masaki**

4:38-41

Mat. 8:14-17; Mrk. 1:29-34

³⁸Puhai ia too, messubummi Puang Yesus illaam mai pa'sambajangam anna le'ba'i lako banuanna Simon. Wattu eta too mahassam lumalla' pasananna Simon baine. Iya nauaim lako Puang Yesus: “Mala haka umpabono'?” ³⁹Iya le'ba'um lako sa'de petindoanna indo baine ke'de' anna nasuai lao sakinna. Iya tappa masapu eta siaham sakinna lambi' bangommi malǎppu' anna tappa nabela ma'tahia.

⁴⁰Tappana lendu' allo, sulem buda tau umpasola solana to

ussi'dim ma'hupa-hupa saki, iya napasibala'-bala'um Puang Yesus naanda'i lambi' sangngim bono' eta siaham. ⁴¹Susi toi to napentamai setam, sangngim mǎlǎi setanna napasindum kumissǎ' naua: “ǎnǎ'na tongangko Puang Allataala!” Sapo' sangngim nakuapai Puang Yesus anna tǎ'um napǎbǎi ma'kada-kada, aka sangngim naissam naua Puang Yesus-um too indo To dilanti' la mepasalama'.

**Puang Yesus ullelei
pa'sambajanganna to
Yahudi ma'pa'guhu**

4:42-44

Mrk. 1:35-39

⁴²Makale'na, mebengngi'-bengngi'pi anna bangommi Puang Yesus anna le'ba'i lako ongeam mabuni-buninna. Sapo' nasipeǎ-peǎi tau buda. Tappana nalambi', nauaim: “Kela mala anna tǎ'kam umpellei.”

⁴³Sapo' natimba' naua: “Kaheba Kati-lallasam diona kapahentaanna Puang Allataala pahallu la kupa'paissangam lako kota senga', aka inna ia hi Kao nasuaannǎ' Puang Allataala mentama lino.” ⁴⁴Iya ulleleim pa'sambajanganna to Yahudi Puang Yesus dio lembǎna Yudea ma'pa'guhu.

**Uhu-uhuna untambai
passikolanna Puang Yesus**

5:1-11

Mat. 4:18-22; Mrk. 1:16-20

5 Pissam wattu ke'de' Puang Yesus dio bihinna le'bo' Genesaret ma'pa'guhu.[¶] Iya ma'silullu'um tau ullombai aka maelo' umpehingngii Battakadanna Puang Allataala. ²Iya muitam dua lopi dio bihim le'bo' lo'bǎ,

[¶]5:1 le'bo' Genesaret: tontǎm ke diuai le'bo' Galilea.

aka mahassam umbase-basei dalana indo puäna. ³Indo lopi mesa, lopinna Simon. Iya längämmi Puang Yesus anna napelaui lako Simon anna nabussunni tama le'bo' saidi'. Iya muokko'um Puang Yesus anna umpa'guhui tau buda.

⁴Puhai ma'pa'guhu, ma'kadam lako Simon naua: "Palutamai mandalanna lopimmu anna umpessämbäsanni dalamu anna mala deem bau muala."

⁵Sapo' natimba' Simon naua: "O Tuangguhu, kipesabengiim mengkähä kahha' ma'pemälä, sapo' moi mesa bau tadeenni kiala. Sapo' aka iko ussuakam, iya päbäi kipessämbäsam pole dalaki."

⁶Napalutamam duka' mandalanna anna umpessämbäsanni dalana. Iya tandana buda bau naala, napahandu'um sesse' dalana. ⁷Iya ungka'bi'um solana lako lopi senga' anna sulei nabalii. Iya suleim indo solana nabalii. Tandana buda bau nasakka, bassim ponno indo lopinna sampe saidi' tatallam.

⁸Tappana naita Simon Petrus kaha-kaha ia too, iya ma'balinguntu'um dio olona Puang Yesus anna ma'kadai naua: "O Debata, pelieä' lao aka kao to madosä!" ⁹Aka tä' deem pada sanakapilla'i Simon Petrus sola ingganna solana muita indo bau pada budanna nasakka. ¹⁰Mängä-mängä toi duka' indo solana Simon isanga Yakobus anna Yohanes bassim änä'na Zebedeus.

Iya nauam Puang Yesus lako Simon: "Pomahannui penabammu, daa ummahea', aka mengkalao temo la mendadiko to undala hupatau anna mala natuhu'ä." ¹¹Iya bassim napalängämmi galantangam lopinna Simon sola indo solana anna umpellei ingganna akaakanna mane le'ba'i untuhu' Puang Yesus.

Puang Yesus umpabono' to dolengam

5:12-16

Mat. 8:1-4; Mrk. 1:40-45

¹²Pissam wattu, illaam oom mesa kota Puang Yesus, iya sulem duka' mesa to dolengam mentu' kalena. Tappana muita Puang Yesus, sule siahanni napellambi'i anna mendu'dunni dio olona anna mengkahumase-masei melau naua: "O Tuam, kuissam kuua malaä' umpabono' ke umpoelo'i."

¹³Iya uhhaka'um indo tau napasindum naua: "Maelo'ä, bono'ungko!" Lambi' masapu eta siaham indo sakinna.

¹⁴Iya napakahi'dim Puang Yesus naua: "Moi la menna tala untulasanni inde kupogausangko. Anggam ia la laoko umpa'paitaam kalemu lako sando anna la umbabako bua pemala'mu umba susi puha napepaondongam Musa. Aka la mendadi tanda lako tau buda diona kabonosammu." ¹⁵Sapo' tuttuam kaissangam di lako mobotto-bottoam, nasuhum buda tau sule aka maelo' napehingngii pepa'guhuanna anna la dipabono' sakinna. ¹⁶Sapo' Puang Yesus Ia si bassa' lao lako ongeam kasala-salaanna ma'sambajam.

Puang Yesus umpabono' to mate kalena

5:17-26

Mat. 9:1-8; Mrk. 2:1-12

¹⁷Pissam wattu ma'pa'guhu oom Puang Yesus. Eta too dio duka' heem sanaka-naka to illaam kakalebuanna Parisi anna to ullatta' Pepaondonganna Musa. Tau ia too buttu yabo mai Yerusalem anna buttu dio mai ingganna tondä' dio lembäna Galilea anna lembäna Yudea. Puang Yesus nasuhum Puang Allataala, nasuhum mala umpabono' to masaki. ¹⁸Iya

sulem sanaka-naka tau umbulle mesa to mate kalena metindo dio ampa'na. Napeä lalanna anna mala tama indo banua aka maelo' umbaba solana lako olona Puang Yesus. ¹⁹Sapo' tä' deem naola aka nalabai tau buda, nasuhum lu längännim ia papa anna naso'boi dokko sipatunna Puang Yesus mane nalollohanni sitonda ampa'na dokko olona Puang Yesus illaam alla'-alla'na tau buda.

²⁰Tappana naita Puang Yesus kamatapannai, iya ma'kadam lako indo to mate kalena naua: "O solaku, diampunnim dosamu."

²¹Iya sangngim nauam illaam penabanna indo to illaam kakalebuanna Parisi anna to ullatta' Pepaondonganna Musa: "Akanna deenni tau muangga' kalena sipadaam Puang Allataala? Aka tä' deem tau moi podo la mesa la mala muampunni dosa, sulibanna Puang Allataala!"

²²Sapo' nalosa Puang Yesus issi penabannai lambi' nauaam: "Akanna ma'pikki' susi hako' iko? ²³Mennaka la madomi' dadi lako inde tau, ke diuaanni: 'Diampunniammoko dosamu,' anna la diuaam: 'Bangongko ammu pellao?' ²⁴Sapo' la kupa'patandaam temo anna malaa' unkgaleso manappa muua illaam inde lino kuasää' To diuaam Änä' Mentolino muampunni dosa." Mane ma'kadai lako indo to mate kalena naua: "Bangongko, babai ampa'mu ammu le'ba' lako banuammu!" ²⁵Iya bangom siahannaita tau buda anna muäkä'i ampa'na messubum ma'pasule lako banuanna napasindum umpa'kasallei Puang Allataala. ²⁶Sangngim pilla' ingganna to dio heem eta too anna umpa'kasallei Puang Allataala. Sapo' mahea' ohi muuai: "Memängä-mängä si'da pole' inde kadadiam taitaa' allo temo."

Puang Yesus untambai Lewi

5:27-32

Mat. 9:9-13; Mrk. 2:13-17

²⁷Puhai ia too, messubummi Puang Yesus, iya muitam mesa tuam passima isanga Lewi muokko' illaam kätto'na. Iya napa'kadaim naua: "Maiko anna untuhu'ä'." ²⁸Iya ke'de'um duka' Lewi umpellei ingganna aka-akanna anna le'ba'i natuhu'.

²⁹Puhai ia too, iya umpadeemmi mesa hame-hame kasalle Lewi dio banuanna umpa'kasallei Puang Yesus. Iya buda tuam passima sola tau senga' napasola mangngande. ³⁰Tappana naita sanaka-naka to illaam kakalebuanna Parisi sola to ullatta' Pepaondonganna Musa to mentama kakalebuanna Parisi, iya sangngim ma'naum-naummi lambi' ma'kada lako passikolanna Puang Yesus naua: "Akanna muaku hia' iko sola-sola mangngande tuam passima anna to madosa senga'?"

³¹Iya natimba'um Puang Yesus naua: "Tä' tia deem to bono' la umpahalluam tuandotto', anggam tia to masaki. ³²Kao-kao suleä' inde lino taia to ussanga kalena malolo la kutambai, sapo' suleä' untambai to madosa anna malai unti-hokongam gau'na."

Puang Yesus ma'tula' diona puasa

5:33-39

Mat. 9:14-17; Mrk. 2:18-22

³³Puhai ia too, ma'kadam sanaka-naka tau lako Puang Yesus naua: "Passikolanna ia Yohanes si bassa' puasa anna ma'sambajam. Susi toi passikolanna to illaam kakalebuanna

Parisi. Sapo' passikolammu iko si mangngande liu, tä' deem puasa.”§§

³⁴Natimba' Puang Yesus umpake pehapangam naua: “La mala haka tia dilaham mangngande to ullomba kakabengam ke diopi heem indo to mane dipakebaine? Mannassam tia anna tä'i!

³⁵Sapo' la deem wattunna indo to mane dipakebaine la diäläi illaam mai alla'-alla'na to ullombai. Iya etapi too pole' mane puasai.”

³⁶Mane muala polei mesa pehapangam senga' naua: “Tä' deem tau la ussesse'i baju bakahu mane natampisanni baju malusa. Aka maka' napateem la situmä bäbä indo baju, sesse'um indo baju bakahu anna tä' siam duka' la mapia diita indo baju malusa ditampi' sampim bakahu. ³⁷Susi toi duka' tä' tia deem tau la muala anggur bakahu anna napatamai pa'ponggeam malusa. Aka indo anggur bakahu la untesseam pa'ponggeam malusa. Iya katampasanna bassim labu' susi anggurna teem pa'ponggeanna.*

³⁸Dadi anggur bakahu manggi' duka' dipalutama pa'ponggeam bakahu. ³⁹Tä' deem tau la maelo' muihu' anggur bakahu ke puham muihu' anggur masäe. Aka naua: ‘Mammi' puha ia anggur masäe.’”†

Puang Yesus napasala to illaam Parisi aka mengkähä passikolanna illaam allo Katohhoam

6:1-5

Mat. 12:1-8; Mrk. 2:23-28

6 Pissam wattu illaam allo Katohhoam umpa'tängäi bela' gandum Puang Yesus sola passikolanna. Mahas-

sam siam mellao napasindum siam ia passikolanna muala gandum anna napuhidi'i kuli'na mane naandei. ²Wattu eta too deem sanaka-naka to illaam kakalebuanna Parisi mekutana naua: “Akanna untekkäia' indo pelahangam illaam peadasam umpogau' tala malanna dikähä illaam allo Katohhoam?”

³Natimba' Puang Yesus naua: “Tä'paka' tiko deem umbata diona pa'pogausanna Daud sola pentuhu'na wattunna anna tadea'i? ⁴Wattu eta too le'ba' Daud tama bahum kapenombaam anna mualai indo hoti puha dipehumalasang anna naandei mane nabeenni duka' lako pentuhu'na, moi kela daa anggum tia sando mala muandei.”* ⁵Mane naua polei Puang Yesus: “Kao hia Änä' Mentolino puäna allo Katohhoam.”

Puang Yesus umpabono' to mate limanna sabali illaam allo Katohhoam

6:6-11

Mat. 12:9-14; Mrk. 3:1-6

⁶Pissam wattu lambi' oom allo Katohhoam. Iya tamam pa'sambajanganna to Yahudi Puang Yesus ma'pa'guhu. Illaam indo pa'sambajangam deem mesa tau mate lima kananna. ⁷Wattu eta too dio duka' heem sanaka-naka to ullatta' Pepaondonganna Musa anna to illaam kakalebuanna Parisi maelo' umpeängam tuntungam su'be' Puang Yesus. Iya sikanapaola mata lium aka naua: “Umba ke toko umpabono'i indo to masaki illaam allo Katohhoam anna mala deem dipa'palu'bi'i.” ⁸Sapo' naissam Puang

§§5:33 puasa: Petua' dioi pemasiä'na Mat. 4:2.

*5:37 Petua' dioi pemasiä'na Mat. 9:17.

†5:39 Kalembasanna: Indo to si untuhu'i issinna Pepaondonganna Musa anna pepa'guhuanna to illaam kakalebuanna Parisi si moka untuhu'i indo pepa'guhuam bakahu nababa Puang Yesus aka nasanga mapia puha ia indo pepa'guhuam masäe.

*6:4 1Sam. 21:1-6.

Yesus pikkihanna, iya ma'kadam lako indo to mate limanna naua: “Maiko anna ke'de'ko eta inde.” Iya ke'de' siahham duka' anna lakoi olona tau buda.⁹ Mane mekutanai Puang Yesus lako tau buda naua: “Deem la kupekutanaam: Umbanna la situhu' peadasam dipogau' ke illaanni allo Katohhoam, kamapiaam daka kakadakeam daka? La umpesäkäi hakika solata la dipatei haka?”¹⁰ Napalelei asammi yolo lao matanna indo tau buda mane ma'kadai lako indo to mate limanna naua: “Äkä'i limammu!” Iya muäkä'um duka' limanna, iya tappa bono' eta siahham.¹¹ Sangngim meali-ali muitai lambi' sipattuju-tuju naua: “Aka hia la dipogausam inde tau?”

**Puang Yesus umpilei
sapulo dua suhona**

6:12-16

Mat. 10:1-4; Mrk. 3:13-19

¹² Puhai ia too, längämmi tanete Puang Yesus aka la ma'sambajam. Yaboi, napesabengiim ma'sambajam längäm Puang Allataala.¹³ Tappana masiä, untambaim ingganna passikolanna anna napilei sapulo dua la mendadi suhona. Indem ia sanga-sanganna:

¹⁴⁻¹⁶ Simon (si nauaam toi Puang Yesus Petrus),
Andreas, siundu'na Simon,
Yakobus anna Yohanes,
Filipus anna Bartolomeus,
Matius anna Tomas,
Yakobus (änä'na Alfeus),
Simon, to illaam kakalebuanna Zelot,[¶]
Yudas änä'na Yakobus,
anna Yudas Iskariot indo to la umbalu'
Puang Yesus.

**Puang Yesus ma'pa'guhu anna
umpabono' buda to masaki**

6:17-19

Mat. 4:23-25

¹⁷ Puhai ia too, ma'pasulem Puang Yesus sola suhona yabo mai indo tanete lu dokko tipahantena. Sulei dokko, ullambi'um buda passikolanna ma'hempum anna buda tau senga' napasola to buttu dio mai lembäna Yudea anna to yabo mai Yerusalem, anna to buttu dio mai kota Tirus sola kota Sidon to bassim dio bihim le'bo'.¹⁸ Sule asam indo tau aka maelo' umpehingngii pepa'guhuanna Puang Yesus anna la napabonosam ingganna sakinna. Susi toi to napentamai setam sulei duka' anna napabono'i.¹⁹ Sangngim napeä lalanna anna malai muanti Puang Yesus aka deem kakuasaam messubum illaam mai kalena umpabono'i.

**Kakehongkosam anna
kada pepakilalaam**

6:20-26

Mat. 5:1-12

²⁰ Iya napalelim lao mata indo ingganna passikolanna anna ma'kadai naua: “Kehongko' anna maupa' inggannakoa' to mase-mase,
aka ikonna' too mendadim umma'na Puang Allataala illaam kapahentaanna.
²¹ Kehongko' anna maupa' inggannakoa' to tadea' temo,
aka ikonna' too to la dipadea'.
Kehongko' anna maupa' inggannakoa' to sumahho temo,
aka la napessulle petaba.
²² Kehongko' anna maupa' inggannakoa' to dikabassi, tä' ditahima, disangai

[¶]6:14-16 kakalebuanna Zelot: mesa kakalebuanna to umbali kapahentaanna Roma.

bäbä tau kadake, anna dikahidi' aka untuhu'ä' to disangai Änä' Mentolino.

²³ Aka susi siam duka' yolona buda nabi nadahha nene to naponene to ungbassikoa' temo. Dadi la kassi mandakoa' anna tilalla' ke nalambi'koa' kaha-kaha ia too, aka la nabeengkoa' Puang Allataala mana' kasalle yabo suhuga.

²⁴ Sapo' la ullambi'koa' iko katilakaam inggannakoa' to makaka temo, aka ussi'dimmokoa' iko kamasannangam.

²⁵ La ullambi'koa' iko katilakaam inggannakoa' to dea' temo, aka la napessulle katadeasam. La ullambi'koa' iko katilakaam inggannakoa' to metaba temo, aka la napessulle pi'di' penaba anna uwai mata.

²⁶ La ullambi'koa' iko katilakaam inggannakoa' to napuji ingganna hupatau temo, aka susim too duka' yolona ingganna tau to ussangai kalena nabi napuji duka' nene to naponene ingganna indo to umpujikoa' temo.”

Pa'kamase lako balinta

6:27-36

Mat. 5:38-48

²⁷ “Sapo' ikoa'-iko inde to uhhingngi tula'ku temo, kupokadaangkoa' kuua: Kamaseikoa' balimmu; Pa'pogau' mapiakoa' lako to ungbassikoa'.²⁸ Pelauanni tamba' to untädokoa', pa'sambajanganni to ma'pogau' kadake tama kalemu. ²⁹ Maka' natampilim tau papomu sabali, beem polepi sabalinna. Anna maka' deem tau muala jubamu,[§] beem polepi duka' bajummu. ³⁰ Anna maka' napelau tau aka-akammu, beenni. Maka' naala bäbä tau aka-akammu,

damom too umpelau sule. ³¹ Iai too umpohäe la napogausangko solamu, iam too duka' la umpogau' lako solamu.

³² Maka' anggam to ungbamaseiko la ungbamasei, iya tä' deem lalanna la dibala'iangko hesomu. Aka moi to kadake gau' si ungbamasei toi duka' to ungbamasei. ³³ Anna maka' angga hi to ma'pogau' mapia tama kalemu la umpa'gau' mapiai, iya tä' deem lalanna la dibala'iangko hesomu. Aka moi to madosa si ma'pogau' susi duka'. ³⁴ Anna maka' la anggam to nabela umbala'i sule la umpahabe'i doi'mu, iya tä' deem lalanna la dibala'iangko hesomu. Aka indo duka' to kadake gau' si umpahabe'i hi tia duka' padanna to kadake gau', aka nahannuam la nabala'i sule.

³⁵ Sapo' ikoa'-iko, pahallukoa' la ungbamasei balimmu, anna ma'pogau' mapia tama kalena. La umbeenna' pehhabesam anna tä'unna' la uhhannuam bala'inna. Aka ke susii tä' deem pada sakasallea' sahomu anna la mendadikoa' änä'na Puang Allataala To Handam Matande. Aka Puang Allataala mapia penaba liu la lako to tä' untilalla'i pa'pebeem anna lako to kadake gau'. ³⁶ Umba susi Ambemu yabo suhuga ma'kamase, la susingkoa' too duka' pahallu ma'kamase.”

Daa umpasala padammu hupatau

6:37-42

Mat. 7:1-15

³⁷ Anna mane naua: “Daa umpasala padammu hupatau indana napasalako duka' Puang Allataala. Daa umpasala padammu hupatau indana dipassalako duka'. Ampunniko padammu anna mala diampunniko duka'. ³⁸ Pa'pebeengko lako solamu, anna dibeengko duka'. Anna indo dibeengko mala dipasihpam bahha' dituntunni

[§]6:29 *juba*: susi jas sapo' kalando.

pegantam anna dihodä' sampe lempam pole. Aka indo pegantam umpake lako solamu, ia siam duka' dipakeangko."

³⁹Puhai, iya mualam mesa pehangam naua: "Maka' to buta la untette to buta, tä' mala tala bassim metobä dokko gahoä. ⁴⁰Mesa passikola tä' tia la matande puha ia anna la tuangguhunna. Sapo' maka' tamma'um mesa passikola, iya sipadaammi tuangguhunna.

⁴¹Akanna la muita leko'ko butanna solamu pada tahubu' kaju anna tä'ko iko la ussi'dim butammu pada talakaju illaam matammu? ⁴²Maakam ia susi la mala muuaangko solamu: 'Maiko solaku anna kuälaiangko itim tahubu' kaju illaam matammu,' moi kela daa pada iko talakaju illaam matammu tä' ussi'dim? O, to ma'dua tambu! Äläi yolo indo butammu pada talakaju anna mala masiä' pennenne'mu muälaiam butanna solamu pada nennu'."

Pehapangam diona kaju sola buana

6:43-45

Mat. 12:33-35

⁴³Puhai ia too, untula' pole oom mesa pehangam Puang Yesus naua: "Tä' tia deem kaju mapia la ungkembuaam bua kadake, battu haka kaju kadake la ungkembuaam bua mapia. ⁴⁴Aka si mesa-mesa kaju diissam ditandai ke diitam buana. Anna tä'pi deem tau la umpuppu' bua ara yabo mai kaju bahani battu haka bua anggur dio mai balambane'. ⁴⁵Susim too duka' lako hupatau. Lako to mapia gau', mannassa anna mapia siam tia duka' pessubungam pudu'na, aka mapia illaam unä' penabanna. Sapo' lako to kadake gau', mannassa anna kadakei pessubungam pudu'na aka kadake illaam unä' penabanna. Aka iai too tianna illaam unä' penaba, ia siam too duka' messubum dio pudu'."

To umpehingngii manappa kadanna Puang Yesus dipasihhapam to umpake'de' banua yabona batu

6:46-49

Mat. 7:24-27

⁴⁶"Akanna si umpa'ua-ua bäbäia' dio pudu'mu: 'O Debatangku, O Debatangku,' moi kela daa tä' sianna untuhu'i indo tula'ku? ⁴⁷Pehapangam aka la dipasusiam indo to sule umpellambi'ia' anna napehingngii pahentaku sola napalako? Pehingngii anna kutulasangkoa'. ⁴⁸Deem tau umpake'de' banua. Indo tau nabo'ba' dokko napellambi'i batu ampam mane napaokko'i batu longkahhinna dio. Tappana sule uwai buda unta'du indo banua, iya tä' mala henggä aka dipake'de' yabona batu ampam. ⁴⁹Sapo' menna-menna uhhingngi gändä-gändä kadangku anna tä'i napaillaam tambu' dapaka ia la nakedoam, tau ia too dipasihhapam ia to umpake'de' banuanna yabo litä' malunä'. Tappana sule uwai buda unta'du indo banua, iya tappa henggä anna tä'um dipohiakanna."

Puang Yesus umpabono' mesa sabua'na punggabana sohodadu

7:1-10

Mat. 8:5-13; Yoh. 4:46-53

7 Puhai ma'tula' lako tau buda diona kaha-kaha ia too, ma'pasulem Puang Yesus lako Kapernaum. ²Eta too deem punggabana sohodadu Roma muampuam mesa sabua', anna tä' deem pada sanapakamaja. Indo sabua'na masaki sampe saidi' mandam penabanna. ³Tappana nahingngi indo punggaba sohodadu diona Puang Yesus, iya ussuam sanaka-naka matua ulunna to Yahudi la umpellambi'i

Puang Yesus la napelauam umba ke malai sule napabonosam indo sabua'na. ⁴Tappana silambi' Puang Yesus, iya mengkahumase-maseim melau naua: “Kela mala ungkamasei indo punggabana sohodadu. Sihatam la dikamasei ⁵aka tä' deem pada sanakamaseikia' kita to Yahudi anna puhangkam kami' napapiaam pa'sambajangangi.” ⁶Iya le'ba'um Puang Yesus sola-sola indo to untambai.

Tappana la landa' kale Puang Yesus lako indo banuanna, ussua pole oom solana indo punggabana sohodadu umpellambi'i Puang Yesus naua: “O Tuam, damom too ade' ussussai kalemu la tahhu' lako banuanna, aka naua: ‘Tä' punala sihatam la tama banuanku. ⁷Aka iam too anna tä'mä' bahani umpellambi'i.’ Dadi ua mammi ade' sabatta kada, iya la bono'um tia indo sabua'na. ⁸Aka naissam ade' duka' diona pampahesam, aka ia duka' mesa to dipahe'. Sapo' deempi ade' duka' tando dokkona to napape'. Aka maka' nauaam: ‘Le'ba'ko,’ iya le'ba' duka'. Anna maka' nauaam: ‘Maiko,’ iya sule duka'. Susi siam too ade' duka' sabua'na ke nauaanni: ‘Kähäi inde,’ iya tä' mala tala nakähä.”

⁹Tappana nahingngi Puang Yesus kada ia too, iya tä' deem pada sanakapilla'i, nasuhum umpenggihi'i indo tau buda untuhu'i anna ma'kadai naua: “Kutulasangkoa', tä' punalapi deem la kulambi' to Israel moi podo la mesam la susi kamatappasanna indo tau!” ¹⁰Tappana landa' sule lako banuanna punggabana sohodadu indo to disua, nalambi'um indo sabua'na bono'um.

Puang Yesus umpatubo sule änä'na to balu baine dio Nain

7:11-17

¹¹Tä' masäe lessu'na ia too, iya le'ba'um Puang Yesus sola passikolanna lako mesa kota isanga Nain, anna budapi tau senga' ma'obim-obim untuhu'i. ¹²Tappana la ullambi'i ba'bana kota, sitammum tau umbulle to mate aka la lao nalamum. Indo to mate, änä' mesa, änä'na to balu baine. Anna buda issinna kota untuhu'i indo to balu baine. ¹³Tappana naita Puang Yesus indo to balu baine, iya tä' deem pada sahantä buana. Iya napa'kadaim naua: “Daa ussaho.” ¹⁴Mane umpenandai indo bulleam naanda'i, iya tohho siaham duka' indo to mamulle. Iya ma'kadam naua: “O, änä' muane, temo kuuaangko, bangongko!” ¹⁵Iya bangom siaham indo tau anna tadongkonni ma'tula'-tula'. Mane nabeenni Puang Yesus lako indona.

¹⁶Ingganna indo tau sangngim mahea' anna umpa'kasallei Puang Allataala naua: “Mesa nabi kasalle kende' illaam alla'-alla'taa! Sulem Puang Allataala umpamoloi umma'na!” ¹⁷Iya kaissangammi indo pa'pogausanna Puang Yesus, susi dio lembäna Yudea, teem lako ingganna botto senga' sikahuku'na.

Pekutanaanna Yohanes to si mantedo' diona kalena Puang Yesus

7:18-35

Mat. 11:2-19

¹⁸Indo Yohanes to si mantedo' puha natulasam passikolanna diona ingganna indo to puha napogau' Puang Yesus. Nasuhum untambai dua passikolanna ¹⁹anna napakahi'dii naua: “Laokoa' pel-lambi'i Puang Yesus anna ungkutanai muua: ‘Ikongka indo To nalanti' Puang

Allataala masäem diampai? Iya la tau senga' daka too?"

²⁰Tappana ullambi' Puang Yesus indo to dua, iya nauam: "Nasuakam Yohanes to si mantedo' sule ungkutanai. Ikongka indo To nalanti' Puang Allataala masäem diampai? Iya la tau senga' daka too?"

²¹Wattu eta too mahassam Puang Yesus umpabono' buda tau to ussi'dim ma'hupa-hupa saki, anna uhambai setam illaam mai kalena to napentamai, anna buda to buta napabono' lambi' mala paita. ²²Iya natimba'im Puang Yesus naua: "Pa'pasulengkoa' anna untulasanni umba susi puhaa' muita anna uhhingngi. Susinna to buta mala paita, to mate kalena mala mellao, to dolengam masapu dolenganna, to binga mala pahingngi, to mate tubo sule, anna Kaheba Katilallasam dipa'pakahebaam lako to handam matuna. ^{**} ²³Kehongko' anna maupa' to tä' bata-bata lako kaleku."

²⁴Tappana le'ba' indo to nasua Yohanes, iya umpa'tula'im tau buda Puang Yesus diona Yohanes naua: "Aka untungkaa' lako pohiallasam umpellambi'i Yohanes? Laokoa' umpetua' to ma'tille tipae'? ²⁵Iya aka hia' maelo' umpetua'? Lao hakoka' too umpetua' to ma'poheba mapi'dä'? Sapo' situhu' Kao pikkihangku dio hi tia banuanna tomahaja indo to ma'poheba mapi'dä' anna to tä'um deem nakasepa-sepai. ²⁶Dadi aka hia' maelo' umpetua'? Lao hakoka' too umpetua' nabi? Maka' iaa' untungka, tappa' ia pole'. Aka kutulasangkoa' temo kuua setonganna indo Yohanes mentondom puha ia anna la nabi senga'. ²⁷Aka

Yohanes-um too indo nauaam illaam Battakada Debata:

'Indem ia pesuaku kupake'de' la umpendioloanganko aka iam too to la umpatokaangko lalam la muola.'††

²⁸Aka kupokadaangkoa', pempom dio mai ingganna hupatau illaam inde lino, tä' deem la untondom Yohanes to si mantedo'. Sapo' mentondom puha ia ingganna to mentamam kapahentaanna Puang Allataala moi anna matunai."

²⁹Ingganna indo tau buda to uhhingngi pa'tula'na Puang Yesus, teem toi duka' tuam passima pada-pada muakui pattujunna Puang Allataala, aka puhaim umbeho kalena natedo' Yohanes. ³⁰Sapo' indo ia to illaam kakalebuanna Parisi anna to ullatta' Pepaondonganna Musa tä' ia untahima pattujunna Puang Allataala, aka tä' naaku umbeho kalena natedo' Yohanes.

³¹Mane ma'kada polei Puang Yesus naua: "Akam la dipasihhapangam inde hupatau lapi' temo? Anna aka la nasusiam? ³²Sihhapam liu indo änä'-änä' si ma'ko'bom-ko'bom lako pasa' anna metambai muuaam solana:

'Kiponiammookoa' sulim sapo' moka hako'a' iko sumajo.

Umpeniammakam kelom bahata, sapo' moka hako'a' iko sumahho.'

³³Aka sule Yohanes to si mantedo' si bassa' ma'puasa anna tä' muihu' anggur. Sapo' si ussangai hia' iko: 'To napentamai setam!'

³⁴Pissananna suleä' Kao to disangai Änä' Mentolino, iya si mangngandä' Kao anna mangngihu' illaam pa'hame-hameam. Sapo' si ussangai bäbä hä: 'To si mangngande sasa anna to si umpamäbo' kalena,

****7:22** Inde tula'na Puang Yesus puha natula' loppo' nabi Yesaya diona To dilanti' la mepasalama'. Yes. 35:5-6, 61:1.

††7:27 Mal. 3:1.

sangkalamma'na tuam passima anna to madosa senga.'³⁵ Moinna anna susi, sapo' tä' mala tala ma'tandaam kamanähänganna anna kakeakasanna Puang Allataala la lemba' illaam pa'palakoanna ingganna to untuhu'i."

Puang Yesus natolloi minnä'-minnä' mesa baine to madosa

7:36-50

³⁶Deem mesa tau illaam kakalebuanna Parisi isanga Simon untambai Puang Yesus lako banuanna mangngande. Iya sulei lako banuanna metindo sapolom aka la mangngande.^{‡‡}

³⁷Dio indo kota deem mesa baine si dipobungam bibi gau' kadakena. Tappana naissam naua dio banuanna to illaam kakalebuanna Parisi Puang Yesus mahassam mangngande, iya lako siaham umbaba mesa buli-buli mapindäm kessi minnä'-minnä' bubanau'.³⁸ Landa'i, iya le'ba'um lako boko'na Puang Yesus ke'de' dio ampe' bitti'na napasindum sumahho. Iya umbossi'im bitti'na Puang Yesus uwai matanna, mane napassiianni beluä'na napasindum naudum bitti'na. Anna mane natolloi indo minnä'-minnä' bubanau' tanda pa'pakasallena.³⁹ Tappana naita indo to illaam Parisi to untambai Puang Yesus, iya nauam illaam penabanna: "Kela nabi tongam inde tau, mannassa anna la muissam inde dio baine anna naissam toi naua mesa to madosa."

⁴⁰Iya ma'kadam Puang Yesus lako naua: "Simon, deem la kukutanaiangko."

Iya natimba'im naua: "Aka la ungkutanaiannä', Tuangguhu?"

⁴¹Iya nauaammi: "Deem dua tau ma'indam lako mesa to si umpa'pandangam doi'na. Mesa ma'indam lima pulo bidä, anna mesa lima bidä."[¶] ⁴²Sapo' bassim tä' nabela nabaja', iya napapa'deam bábäm indanna. Dadi mennannam kabam indo to dua la handam umpohäe indo to umpaindannii doi'na?"

⁴³Natimba' Simon naua: "Indo to buda indanna."

Iya nauaammi: "Tappa' pentimba'mu."

⁴⁴Mane unnenne'i indo baine anna ma'kadai lako Simon naua: "Muita haka inde baine? Kao suleä' inde banu-ammu, sapo' tä' deem umpatokaannä' uwai kubaseiam bitti'ku. Sapo' inde ia baine puham nabaseiannä' bitti'ku uwai matanna anna napassii beluä'na.⁴⁵ Iko-iko tä' deem muudunnä', sapo' ia-ia tamangku inde banua tä'um deem kattu muudum bitti'ku.^{§§} ⁴⁶Anna iko-iko tä' deem untolloi ulungku minnä', sapo' ia-ia natolloiannä' bitti'ku minnä'-minnä' bubanau'.⁴⁷ Dadi setonganna kutulasangko: Pa'kamase kasallena inde baine, iam too umpa'paissanganni diua buda dosana diampunniam. Sapo' to saidi' dosana diampunni, saidi' duka' pa'kamasena."

⁴⁸Mane ma'kadai lako indo baine naua: "Diampunniammoko dosamu."

⁴⁹Ingganna indo to napasola Puang Yesus mangngande sangngim nauai illaam penabanna: "Menna hia isanga inde anna la malai muampunni dosa?"

⁵⁰Mane nauai Puang Yesus lako indo baine: "Salama'ungko aka

^{‡‡}7:36 *metindo sapolom aka la mangngande*: Kabiasaanna tau eta too, si metindo sapolo ke mangngandei.

[¶]7:41 *lima pulo bidä, anna mesa lima bidä*: Indo dituli' illaam basa Yunani, naua ia ke basa Bambanni: *lima hatu' dinar anna lima pulo dinar*. Mesa dinar sipadaam sahona tau sangngallo.

^{§§}7:45 *muudum*: Situhu' kabiasaanna to Yahudi si siudum ia ke silambi'i.

ungkatappa'ia'. Laongko, la naundu'ko kamasakkeam sola kamasannangam."

**Sanaka-naka baine
to si untahiai Puang Yesus**

8:1-3

8 Tä' masäe puhanna ia too, iya le'ba'um Puang Yesus ullelei buda kota anna tondä' umpa'pakahebaam Kahaba Katilallasam naua: "Bambannam umpalako kapahentaanna Puang Allataala." Sapulo dua suhona napasola ²anna sanaka-naka baine to puha napabono' sakinna sola to puha naälaiam setam illaam mai kalena, susinna: Maria to disangai Magdalena to puha naälaiam pitu setam illaam mai kalena; ³anna deem toi isanga Yohana baina Khuza, to muäto' pengkähängam illaam banuanna Herodes; anna Susana sola budapi baine senga'. Ingganna baine ia too si umpake kullena natahiai Puang Yesus sola ingganna to untuhu'i.

**Pehapangam diona
mesa to mangngambo'**

8:4-15

Mat. 13:1-23; Mrk. 4:1-20

⁴Pissam wattu ma'silullu' oom tau buda buttu dio mai mobotto-bottoam umpellambi'i Puang Yesus. Iya untula'um mesa pehapangam Puang Yesus naua: ⁵"Deem mesa tau le'ba' mangngambo'. Tappana naambo' indo bannena, iya deemmi tappa lako lalam sampe nasihondo-hondoi bäbä tau indo bannena anna napuha dassi naande. ⁶Deem tappa lako bobom batu. Iya tubom dio mai, sapo' tä' siam masäe anna malasso bäbäm aka manipi' litä'na. ⁷Anna deem duka' tappa lako alla' kuhha keduhi, iya tubom sola-sola. Sapo' tä' siam masäe tubo

indo tanangam aka tuttuam mahombo indo kuhha umpissii. ⁸Anna sabaheam tappa lako litä' malompo, iya mapi'dä' ia tubona nasuhum kembua tiluppi' sahatu'."

Puhai ia too, napekasalleim ma'kada Puang Yesus naua: "Lako ingganna ma'hupatau pahallu la umpatanam talingganna umpalempe sulim patomalinna anna napailaam penabai inde tula'ku!"

⁹Iya mekutanam passikolanna naua: "Aka hia kalembasanna indo pehapangam inggena?" ¹⁰Iya natimba'im naua: "Angganna' iko dipaissanni indo kada ditambim diona kapahentaanna Puang Allataala. Sapo' ditula' pehapangam ia lako tau senga' aka 'la naita liu, sapo' tä' la naala akkalanna, anna la nahingngi liu, sapo' tä' la naisam kalembasanna.'*

¹¹Indem ia kalembasanna indo pehapangam: Indo banne kalembasanna Battakadanna Puang Allataala. ¹²Indo diuaam banne tappa lako lalam dipasihhapam to uhhingngi Battakadanna Puang Allataala, sapo' naälai siam tomahajanna setam illaam mai penabanna, anna mala tä' matappa' anna tä' dipasalama'. ¹³Indo banne tappa lako bobom batu dipasihhapam ia to umpehingngii Battakadanna Puang Allataala anna tappa natahima sola ponno penaba, sapo' tä' kewwaka' illaam penabanna. Iya tä' siam masäe matappa' aka sulena pa'sändäsam, iya soho' boko' siahanni. ¹⁴Indo banne tappa lako alla' kuhha keduhi dipasihhapam ia to uhhingngi Battakadanna Puang Allataala, sapo' anggam malallam umpikki' salu katuboam di lino, umpakalando puha ham ia kulle, anna sipangngula' pangngua penabanna, nasuhum tä' mala kembua mapia. ¹⁵Anna indo banne tappa lako litä' malompo, dipasihhapam ia to malolo anna mapia penabanna uh-

*8:10 Yes. 6:9.

hingngi Battakadanna Puang Allataala anna napaiillaam penabanna. Tau ia too tontä liu ia manontom manuhu', nasuhum kembua mapia."

Pehapangam diona lampu

8:16-18

Mrk. 4:21-25

¹⁶ "Tä' tia deem tau la umpau' lampu anna nasalongo'i baka battu haka napadio ibi' sahigam. Sapo' napayabo hi tia inna ongeanna anna mala paindo masiä' naita ingganna to mentama indo banua. ¹⁷ Aka ingganna pepa'guhuangku tibunnapi la dipatandaam, anna ingganna indo tisambonapi la dipakaleängam asam anna dipa'paissanganni. ¹⁸ Dadi pehingngii manappaia' inde pepatuduangku! Aka menna-menna umpaiillaam penabai, tau ia too la dihängänniam polepi kapaissanganna. Sapo' to moka umpaiillaam penabai, iya la diäläi pissam ia lao indo kapaissangam nasanga deemmi illaam kalena."

Indona Puang Yesus anna solasubunna

8:19-21

Mat. 12:46-50; Mrk. 3:31-35

¹⁹ Iya sulem indona anna solasubunna Puang Yesus la umpellambi'i, sapo' tä' mala silambi' aka nalabai tau buda. ²⁰ Iya natulasammi tau naua: "O Tuangguhu, illaam sulibam indomu anna solasubummu napeäko!"

²¹ Sapo' natimba' Puang Yesus naua: "Menna-menna umpehingngii Battakadanna Puang Allataala anna napogau'i illaam salu katuboanna, iam too indoku anna solasubungku."

Puang Yesus umpamattam hibü' tatta'

8:22-25

Mat. 8:23-27; Mrk. 4:35-41

²² Pissam wattu längäm lopi Puang Yesus sola passikolanna, iya muuaammi passikolanna: "Talambanna' libam inde le'bo'." Iya mengkalaoim. ²³ Mahassanni mellaö lopinna, iya mamma' ia Puang Yesus. Tappa sule siaham hibü' tatta' illaam indo le'bo' lambi' indo lopi nasopa'i uwai, iya saidi' tatallam. ²⁴ Iya natundam siaham passikolanna Puang Yesus anna nauaanni: "O Tuangguhu, o Tuangguhu, la tallam tau!"

Iya bangommi, napa'kadai indo hibü' sola uwai tibuha', iya tappa mattam siaham indo hibü' tatta' anna malino duka' indo le'bo'. ²⁵ Mane ma'kadai lako passikolanna naua: "Umba hia' iko kamatappasammu?" Iya mahea'im anna mängä-mängä lambi' sipa'tula'tula'i naua: "Tau menna hia isanga inde? Aka moi hibü' sola uwai mala toi napahe'!"

Puang Yesus umpabono' to napentamai setam dio Gerasa

8:26-39

Mat. 8:28-34; Mrk. 5:1-20

²⁶ Puhai ia too, napatahhu'um pa'laoanna lako attasa'na to Gerasa dio tando libanna le'bo' Galilea. ²⁷⁻²⁹ Dio Gerasa deem mesa muane to napentamai setam. Indo tau masäem ma'kambelä anna tä' deem tohho illaam banua, sapo' si tohho lako ku'bu'. Indo setam kapuhaam si umpalilli indo tau lambi' moi dihante bassii limanna anna bitti'na anna dijagai, sapo' si nakattu-kattu siam indo hante bassi, mane nahambai lako pohiallasam. Tappana muita Puang Yesus tuhum yabo mai lopi, iya napellambi'i siaham

anna kumissä'i mane ussämbäsanni kalena dokko litä' muoppä dio olona Puang Yesus. Iya nasuam le'ba' indo setam illaam mai kalena nasuhum meoli naua: "O Yesus Änä'na Puang Allataala To Handam Matande, la muaka hä' kao? Kupelau kela mala anna tä'ä' undahha!"

³⁰ Iya nakutanaim Puang Yesus naua: "Aka sangammu?"

Iya natimba'im naua: "Isangäa' Legion,"† aka napentamai buda setam.

³¹ Iya napa'sule-suleim mengkahumase-mase indo setam lako Puang Yesus naua: "Kela mala anna tä'kam ussua dokko indo gahoä handam mandalam."[‡]

³² Sikahuku' indo ongeam naongei deem buda babi mahassam menduhu' lako pili' tanete. Iya napelaum indo setam lako Puang Yesus naua: "Päbäikam lu tama inde lako babi." Iya napaolaim duka' Puang Yesus pelauanna. ³³ Iya messubum siaham illaam mai kalena indo tau anna umpentamai indo babi buda. Pissananna ham ia sikakondä indo babi buda untobängam bäbä kalena dokko kumila' tahhu' dokko le'bo', lambi' mate asam napusa'i uwai.

³⁴ Naitanna to unjagai indo babi kadadiam ia too, tappa le'ba' siahanni sikakondä napa'paissangam lako kota anna tondä' sikahuku'na. ³⁵ Iya le'ba'im buda tau umpetua'i kadadiam ia too. Sulei lako Puang Yesus, iya ullambi'um indo to bali napentamai setam mahassam muokko' dio ampe' bitti'na Puang Yesus anna ma'pohebam pole' aka malinom. Iya sangngim mahea' tau muitai. ³⁶ Ingganna to muitai umpa'tulasam indo to mane sule maaka susi indo to napentamai setam inggena' dipabono'. ³⁷ Iya napelaum ingganna tau dio atasana to Gerasa umba ke malai le'ba'

Puang Yesus aka sangngim mahea'. Iya längämmi lopi Puang Yesus la ma'pasule.

³⁸ Iya napelaum indo to bali napentamai setam naua: "O Tuangguhu, mala haka ke umpasolaä' kao?" Sapo' tä' napäbäi, anggam nauaam: ³⁹ "Pa'pasulengko lako banuammu anna untula' asanni ingganna indo puha napogausangko Puang Allataala." Iya le'ba'um anna ussambai ingganna lalam dio kota natula' indo pa'pogau'na Puang Yesus lako kalena.

Puang Yesus umpatubo sule änä'na Yairus anna umpabono' mesa baine

8:40-56

Mat. 9:18-26; Mrk. 5:21-43

⁴⁰ Tappana lambanni Puang Yesus ma'pasule, iya ma'silullu' oom buda tau untammui aka inna naampai. ⁴¹ Iya sulem duka' mesa tau isanga Yairus. Tau ia too mesa to pebaba illaam pa'sambajanganna to Yahudi dio kota ia too. Iya menomba siaham dio olona Puang Yesus anna mengkahumase-masei aka naua: "Umba ke malai lako banuangku," ⁴² aka deem änä'na mesa-mesa, baine, umbai' la sapulo duam taunna dadinna mahassam masaki masanta'.

Iya muolai lalam Puang Yesus lako, nasisippi'-sippi'im indo tau buda untuhu'i. ⁴³ Sapo' illaam alla'-alla'na indo tau buda deem mesa baine sapulo duam taunna nahua saki baine tä' deem mondana, anna tä' deem moi podo la mesa tau mala umpabono'i. ⁴⁴ Iya le'ba'um lako boko'na Puang Yesus anna naantii tähämpä' bajunna. Iya naantinna bajunna, tappa monda siaham sakinna.

†8:30 Legion: kalembasanna, Massa'bu.

‡8:31 gahoä handam mandalam: ongeam la naongei tomahajanna setam sola ingganna pentuhu'na, ke natahungkummi Puang Allataala. Batai Los. 9:1, 17:8.

⁴⁵Iya ma'kadam Puang Yesus naua: “Menna hia muantiä?”

Sapo' sangngim tä' deem mangngaku. Iya natimba'im Petrus naua: “Tuang-guhu, inde lako tau buda ulleboko anna nasisippi'-sippi'i.”

⁴⁶Sapo' tontä liu duka' naua Puang Yesus: “Deem tau muantiä' aka kusi'dim deem kuasa messubum illaam mai kaleku.”

⁴⁷Tappana naissam indo baine naua naissam dia Puang Yesus, iya sule sia-hanni lumalla' menomba dio olona. Anna natula'i dio olona tau buda kasuhunganna anna naantii. Anna natula' toi naua: “Bono' eta siahämä' duka'.”

⁴⁸Iya ma'kadam Puang Yesus lako indo baine naua: “O äänä'ku, bono'ungko aka unkatappa'lä'. Laongko, la naundu'ko kamasakkeam sola kamasannangam.”

⁴⁹Mahassampi ma'tula' anna sule hannu to untambai Yairus dio mai banuanna naua: “Indo äänä'mu, matem. Damon too ussussai Tuangguhu.”

⁵⁰Sapo' nahingngi Puang Yesus, iya ma'kadam lako Yairus naua: “Daa ummahea', pomanontoni kamattappasammu aka indo äänä'mu la tubo.”

⁵¹Tappana landa' lako banuanna Yairus, tä' deem tau senga' napäbäi Puang Yesus napasola tama, sulibanna Petrus, Yohanes, Yakobus, anna ambena sola indona indo äänä'-äänä'. ⁵²Wattu eta too ingganna tau to dio heem mahassam sikauhhu' anna umbatim aka matem indo äänä'-äänä'. Iya nauaammi Puang Yesus: “Daa ussikauhhu'a', aka inde äänä'-äänä' tä' tia mate, sapo' mamma' bäbä hi tia!”

⁵³Sapo' sangngim umpetabai mandi Puang Yesus aka naissam naua matem.

⁵⁴Iya naanda'im Puang Yesus limanna anna napa'kadai naua: “O äänä'ku, bangongko.” ⁵⁵Iya menaba siaham sule

anna bangonni ke'de'. Nauam Puang Yesus: “Beennia' kinande.”

⁵⁶Iya mängä-mängä pole' tomatu-anna. Sapo' napakahi'di Puang Yesus naua: “Pissa'-pissa' ahanna' la untula' pole lako tau senga' inde kadadiam.”

Puang Yesus ussua indo sapulo dua suhona

9:1-6

Mat. 10:5-15; Mrk. 6:7-13

9 Pissam wattu untambai indo sapulo dua suhona Puang Yesus anna nabeenni kamatohoam sola kakuasaam la uhhambai ingganna setam anna umpabono' ma'hupa-hupa saki. ²Anna nasuai lao umpa'pakahebaam kapahentaanna Puang Allataala anna la umpabono' to masaki. ³Anna napakahi'dii naua: “Tä'koa' deem la umbaba aka-aka illaam pa'laoammu, susinna tekkem, ongeam tinallo, tinallo, doi', anna poheba pembalagam. ⁴Anna maka' mentamakoa' mesa tondä', iai too banua muongei, iya eta liungkoa' too lambi' umpelleia' indo tondä'. ⁵Anna maka' deem tau tä' untahimakoa', iya pelleia' indo tondä'na sapo' pempassiannia' sobä'na indo tondä' dio bitti'mu, aka la mendadi tanda lako tondä' ia too la natumpu pala' Puang Allataala.” ⁶Iya le'ba'um indo suhona ullelei mobotto-bottoam umpa'pakahebaam Kaheba Katilallasam napasindum umpabono' to masaki lako si mesa-mesa ongeam.

Herodes mängä-mängä diona Puang Yesus

9:7-9

Mat. 14:1-12; Mrk. 6:14-29

⁷Wattu eta too, napelele duka' Herodes indo tomahaja dio lembäna Galilea diona pa'pogausanna Puang

Yesus, nasuhum buntä bäbä pikkihanna aka buda tau muuai: “Indo to diuam Puang Yesus, ia siam tia indo Yohanes to si mantedo' tubo sule.”⁸ Anna deem piha tau muuai: “Nabi Elia hi tia sule sule.” Deem toi muuai: “Mesa hi tia nabi yolona tubo sule.”⁹ Iya nauam Herodes: “Puham tia kupopelemponiam ulunna indo Yohanes to si mantedo'. Dadi, menna amo hi tia isanga indo Yesus si dipelele umpogau' kaha-kaha ia too?” Iya napeäm lalanna anna mala umpellambi'i Puang Yesus.

**Puang Yesus umpande
la'bi lima sa'bu tau**

9:10-17

Mat. 14:13-21; Mrk. 6:30-44; Yoh. 6:1-14

¹⁰Tappana ma'pasulei indo suhona Puang Yesus, iya ma'hempummi anna natulasanni indo puha napogau' lako mobotto-bottoam. Puhai ia too, iya umbabaim indo suhona Puang Yesus lako mesa kota isanga Betsaida aka la ma'hempum paka-paka ia dio. ¹¹Sapo' naissanna tau buda, iya le'ba'im untuhu' Puang Yesus. Iya natahimam Puang Yesus anna natulasanni diona kapahentaanna Puang Allataala anna umpabono' toi to masaki.

¹²Tappana la lendu' allo, napellambi'im indo sapulo dua passikolanna anna nauaanni: “Umbai' la mapia ke ussui inde lako tau buda anna malai lao umpeä kinande anna ongeam ma'bengi lako tondä' anna lako to ma'liangam aka inde ongeam taongeia' pohiallasam.”

¹³Sapo' natimba' naua: “Iko hanna' umpandei.”

Iya nauam passikolanna: “Pusa'kam aka anggam deem kiampuam lima hoti anna dua bau. Anggam ke laoi dipangn-

galliam anna la malai kipande inde tau buda.”¹⁴ (Indo tau buda, kiha-kiha lima sa'bu muane mandipi.)

Iya muuaammi passikolanna: “Suai muokko' si lima pulo sallaoam oi.”¹⁵ Iya nasuam duka' passikolanna, muokko' si lima pulo sallaoam oi. ¹⁶Iya naalam Puang Yesus indo lima hoti anna dua bau, mane mentongai längäm langi' nakuhhu'i sumanga' längäm Puang Al-lataala. Puhai ia too, napiä-piä'um indo hoti mane nabeenni passikolanna natabaam lako indo tau buda. ¹⁷Iya mangngandeim sampe dea'. Tappana puhai mangngande, iya nahempummi passikolanna indo tä'nam naande, iya ponnopi sapulo dua baka.

**Pangngakuanna Petrus diona Puang
Yesus To dilanti' la mepasalama'**

9:18-21

Mat. 16:13-20; Mrk. 8:27-30

¹⁸Pissam wattu mahassam ma'sambajam Puang Yesus mesa-mesanna, iya sulem passikolanna napellambi'i. Iya nauam Puang Yesus: “Situhu' tula'na tau, aka si nasangaiännä?”

¹⁹Iya natimba'im naua: “Deem tau muuai: ‘Yohanes to si mantedo' tubo sule;’ sapo' deem duka' muuai: ‘Nabi Elia sule sule;’ anna piha muuai: ‘Mesa nabi yolona tubo sule.’”

²⁰Iya mekutana oom lako passikolanna naua: “Maka' susi, iya akaa' iko ussangaiännä?”

Iya natimba'im Petrus naua: “Ikom too indo To nalanti' Puang Allataala la mepasalama'.”

²¹Iya umpakahi'dim passikolanna naua: “Tä' si'da-si'daa' too deem la mala untula' lako tau senga' le!”

**Puang Yesus umpa'paissangam
indo pandahhaam la uhhuai**

9:22-27

Mat. 16:21-28; Mrk. 8:31-9:1

²² Mane nauai: “Kao to disangai Änä' Mentolino la ussi'dim ma'hupa-hupa pandahhaam anna la natumpu pala'ä' matua ulunna to Yahudi anna ingganna kapala sando sola to ullatta' Pepaondonganna Musa lambi' la napateiä'. Sapo' ilaam allo katallunna la dipatibangonnä' sule dio mai alla'na to mate.”

²³ Puhai ia too, ma'kadam Puang Yesus lako tau buda naua: “Menna-menna maelo' untuhu'ia' pahallu la ullappa' pa'elo' kalena, anna allo-alloi umpassam kaju sitambenna, anna natuhu'ä'.^f ²⁴ Aka menna-menna umpakalando puha ia katuboam di lino anna la Kao, tau ia too tä' ia la ullambi' katuboam sule lako salako-lakona. Sapo' menna-menna ahu' mate aka natuhu'ä', tau ia too la ullambi' indo katuboam sule lako salako-lakona.

²⁵ Tä' deem gunana lako mesa tau moi la muampuam ingganna issinna lino kela sägä hi sungnga'na. ²⁶ Aka menna-menna umpa'kasihisannä' anna umpa'kasihisam pepa'guhuangku, tau ia too la kupa'kasihisam duka' ke sulemä' to disangai Änä' Mentolino naponnoi kamatandeangku anna kamatandeanna Ambeku sola kamatandeanna ingganna malaika' maseho.

²⁷ Setongam-tonganna, deengkoa' to dio heem temo tä'pi la mate anna muitam Puang Allataala umpalako kapahentaanna.”

**Puang Yesus dipomatande
yabo tanete**

9:28-36

Mat. 17:1-8; Mrk. 9:2-13

²⁸ Umbai' kahuai benginna lessu'na natula' Puang Yesus pepa'guhuam ia too, iya umbabaim Petrus, sola Yohanes, anna Yakobus le'ba' längäm mesa tanete malangka' ma'sambajam. ²⁹ Mahassanni ma'sambajam, iya tieli'um hupanna Puang Yesus anna pangkähhä pohebana. ³⁰ Pissananna, deem dua tau nasipa'tulasam Puang Yesus. Iam too indo nabi yolo isanga Musa sola Elia. ³¹ Indo to dua bassim pangkähhä duka' diita. Iya sipa'tula' loppo'um diona kamateanna Puang Yesus la napasule lako dio Yerusalem. ³² Wattu eta too mahassam ia mamma' Petrus anna indo solana. Tappana milli', iya muitam pangkähhäna Puang Yesus anna indo to dua ke'de' dio ampe'na. ³³ Tappana la le'ba' indo to dua umpellei Puang Yesus, iya ma'kadam Petrus naua: “O Tuangguhu, tä'um deem la susi kamasannangantaa' eta inde. Mapia ke kipake'desangkoa' tallu bahum: mesa Iko, mesa Musa, anna mesa Elia.” Ia anna ma'kada susii Petrus, aka tä' bäbä naissam aka la naua. ³⁴ Mahassampi ma'tula' anna sule ham gabum ussikuku'i indo ongeam. Iya mahea' indo passikola tappana nasikuku'i indo gabum. ³⁵ Iya nahingngim kamaha buttu illaam mai indo gabum naua: “Iam too inde Änä'ku to puha kupilei. Pahallua' la umpehingngii!” ³⁶ Puhai nahingngi indo kamaha, iya muitam Puang Yesus mesa-mesanna ham. Napahandu' etam too indo tallu passikolanna tä' deem

^f9:23 *umpassam kaju sitambenna*: kalembasanna, ahu' muoloi kamasussaam sule lako ahu' la dipatei.

natula' pole lako tau senga' indo kaha-kaha mane puha naita.

**Puang Yesus umpabono' mesa
änä'-änä' to napentamai setam**

9:37-43

Mat. 17:14-21; Mrk. 9:14-29

³⁷Tappana masiä, ma'pasuleim yabo mai indo tanete, iya ma'silullu' oom tau buda sule umpellambi'i Puang Yesus. ³⁸Pissananna metambam mesa tau illaam mai alla'-alla'na indo tau buda naua: "O Tuanguhu, inde änä'ku anggam mesa-mesa! Kela mala ungkamaseiä' anna umpetuasannä'!" ³⁹Si bassa' napentamai setam nasuhum kakissä'-kissä' mane lumalla'i ma'patikingkim, ma'tambuha-buha sädäna. Indo setam undahha liu inde änä'ku anna mallam la napellei. ⁴⁰Anna puhamä' mengkahumase-mase lako inde mai passikolammu anna mala nahambaiam lao setanna, sapo' tä' dia mala."

⁴¹Iya ma'kadam Puang Yesus naua: "Kukapusa'i si'dakoa' pole' inde to tubo lapi' temo, aka kuhäm sugali'a' kamatappasammu! Anna tä' liupia' muissam usse'la kamapiaam anna kakadakeam. La pada polepi isanga umba masäena sola-solakia' anna la pada polepi isanga umba masäena la kusa'bahasangkoa'?" Mane nauai: "Babaannä' mai itim änä'mu!"

⁴²Mahassanni mellao indo änä'-änä' la umpellambi'i Puang Yesus, tappa napatissämbä' oham indo setam dokko litä' lumalla' ma'patikingkim. Iya nakissä'im Puang Yesus indo setam illaam kalena indo änä'-änä' anna napabono'i, mane nabeenni lako ambena. ⁴³Iya sangngim mängä-mängä indo tau buda muita kakuasaanna Puang Allataala tä' deem nasipadaangam.

Kapenduanna napa'paissangam

**Puang Yesus diona
pandahhaam la uhhuai**

9:43-45

Mat. 17:22-23; Mrk. 9:30-32

Mahassampi mängä-mängä indo tau buda muita pa'pogausanna Puang Yesus, iya ma'kadam Puang Yesus lako passikolanna naua: ⁴⁴"Pehingngiia' anna umpaillaam tambu'i inde tula'ku: Kao to disangai Änä' Mentolino la dibeho tama pala' limanna hupatau." ⁴⁵Sapo' tula' ia too tä' natama akkalanna passikolanna kalembasanna. Aka tä'pi dipaissanni indana naissam säkäi. Anna sangngim malaja' umpekutanaanni kalembasanna indo tula'na.

To la disangai handam matande

9:46-48

Mat. 18:1-5; Mrk. 9:33-37

⁴⁶Iya sibetä'-betä'um passikolanna Puang Yesus naua: "Mennakia' handam matande?" ⁴⁷Sapo' naissam Puang Yesus indo lalam penabanna passikolanna, nasuhum muala mesa änä'-änä' bahinni' anna napake'de'i dio ampe'na. ⁴⁸Mane nauai: "Menna-menna untahima inde änä'-änä' aka umpolalam kamatappasanna di Kao, tau ia too sihhapam siam Kao natahima. Anna menna-menna untahimaä', tau ia too untahima duka' To ussuää'. Aka iai too ussanga kalena handam bahinni' illaam alla'-alla'mua', iam too la handam matande."

Iai too tä' umbaliko'a', iam too solamu

9:49-50

Mrk. 9:38-40

⁴⁹Iya ma'kadam Yohanes lako Puang Yesus naua: "O Tuanguhu deem ki-

ita mesa tau uhhambai setam umpake sangammu, sapo' tä' kipäbäi aka taia indo to si tapasolaa."

⁵⁰Sapo' natimba' naua: "Daa ulla-hanni, aka iai too tä' umbalikoä', iam too solamu."

Tä' ditahima Puang Yesus illaam mesa tondä' dio Samaria

9:51-56

⁵¹Tappana la lambi' wattunna la tiäkä' längäm suhuga Puang Yesus, iya napasatutum penabanna lu längäm Yerusalem. ⁵²Iya ussuam sanaka-naka solana mendiolo lu lako mesa tondä' illaam attasa'na to Samaria aka la napatokaam ingganna kapahalluanna. ⁵³Sapo' indo tau illaam tondä' eta too moka untahima Puang Yesus aka la lu längäm Yerusalem. ⁵⁴Tappana naissam indo dua passikolanna isanga Yakobus sola Yohanes naua tä' natahima indo pa'tondä', iya napelaum lako Puang Yesus naua: "O Debata, muaku haka ke kipatuhunganni api yabo mai langi' muä'bäi?"

⁵⁵Sapo' napenggihi'i Puang Yesus nakeaha'i. ⁵⁶Iya umpatahhu'um pa'laoanna muola lako tondä' senga'.

Lalanna la untuhu' Puang Yesus

9:57-62

Mat. 8:19-22

⁵⁷Mahassanni umpatahhu' pa'laoanna Puang Yesus sola passikolanna, iya ma'kadam mesa tau naua: "O Tuangguhu, la kutuhu' liuko illaam pa'laoammu, moi umba ngei muola."

⁵⁸Iya natimba'im Puang Yesus naua: "Asu pangngala' ia deem leäna, anna ingganna dassi yabo lawwa deem sehäna, sapo' Kao to disangai Änä' Men-

tolino tä' Kao deem la manontom kuongei metindo."

⁵⁹Mane ma'kada polei lako mesa tau senga' naua: "Tuhu'ä'."

Iya natimba'im indo tau naua: "Io, sapo' la mala haka ke laopä' yolo ulla-mum ambeku mane suleä' kutuhu'ko?"

⁶⁰Iya natimba'im naua: "Päbäi mammi ia duka' itim matim to mate ulla-mum to matena.⁸ Sapo' iko-iko, laoko pa'paissangam kapahentaanna Puang Allataala."

⁶¹Iya ma'kada pole oom mesa tau naua: "La kutuhu'ko kao Debata, sapo' la umpäbäipä' yolo lao kupasaha' kasahapuangku."

⁶²Sapo' natimba' Puang Yesus naua: "Menna-menna sihhapam napahandu'um massalaga, sapo' messaile ohi lako boko'na, tau ia too tä' deem gunana illaam kapahentaanna Puang Allataala."

Puang Yesus ussua pitu pulo passikolanna

10:1-12

10 Puhai ia too, untuhu pole oom pitu pulo tau senga' Puang Yesus Debatanta anna nasuai lao pantam si dua umpendioloanganni lako si mesa-mesa kota anna ongeam la napellambi'i'. ²Nauaammi Puang Yesus: "Indo tau illaam inde lino sihhapam pahe matäsä'um. Buda indo pahe matäsä', sapo' saidi' to mepahe. Dadi pelauia' längäm puäna indo pepaheam anna mala ussua buda tau umpepaheanni. ³Pengkalaongkoa', sapo' pengkilalai manappaia', la sihhapangkoa' too domba kusua tama alla'-alla'na olo'-olo' to peande. ⁴Daa umbabaa' ongeam doi'mu, ongeam

⁸9:60 Päbäi mammi ia duka' itim matim to mate ulla-mum to matena: kalembasanna, päbäi mammi to mate di ada' battu diua to tamatappa' lako Puang Yesus umpalako indo ingganna si napogau'na inde lino.

tinallo, sapatu, anna tä' tookoa' la tohho lako lalam la sipa'tula' tau.

⁵Maka' mentamakoa' mesa banua, la muuaa' yolo: 'Natamba' dangkoa' Debata.'⁶ Anna maka' mapia penabanna untahima manappakoa' puäna indo banua, iya la natahima si'da too indo pa'lambemua'. Sapo' maka' too tä'koa' natahima, iya la tä' too duka' natahima indo pa'lambemu.⁷ Tohho diokoa' indo mesa banua, tä'koa' la ma'pentieli'-eli' lako banua senga'. Iai too natahiaiangoa' to ma'banua, iam muande anna muihu'. Aka ingganna to mengkähä abana sipäto' la diponnoiam kapahalluanna.

⁸Maka' mentamakoa' mesa tondä' anna natahima manappakoa', iya andei indo kinande natahiaiangoa'.⁹ Pabono'i to masaki illaam indo tondä' anna umpaissanii tau eta too muua: 'La bale' umpalakom kapahentaanna Puang Allataala illaam alla'-alla'mua'.¹⁰ Sapo' maka' mentamakoa' mesa kota anna tä'koa' natahima, iya lu lakokoa' lalam mahoa' anna muuaia':¹¹ 'Moi sobä'na inde tondä'mua' dio bitti'ki, kipempassiam toi lao aka la mendadi tanda diua la natumpu pala'koa' Puang Allataala. Sapo' kipaissanii loppo'koa' kiua la bale' umpalakom too kapahentaanna Puang Allataala.'

¹²Kutulasangoa' temo kuua, maka' too ke lambi'um indo allo la naonget Puang Allataala umpopa'tadongkongam hupatau, la mabanda' puha ia tahungkunna issinna indo tondä' ia too anna la issinna kota Sodom."^{**}

Puang Yesus usosso to Yahudi dio lembäna Galilea to moka matappa'

10:13-16

Mat. 11:20-24

¹³"La tilakakoa' iko ingganna issinna kota Korazim anna kota Betsaida aka mokakoa' muondo' gau' kadakemu. Aka indo tanda memängä-mängä kupadadi illaam alla'-alla'mua', kela kupadadi diom kota Tirus anna Sidon, la masäem untihokonganna gau' kadakena hupatau dio, lambi' muokko' ma'poheba bahata anna umpaponnoi täiabu ulunna aka usosso gau'na.¹⁴ Maka' too ke lambi'um indo allo la naonget Puang Allataala umpopa'tadongkongam hupatau, la mahingngam leko' ia tahungkunna issinna kota Tirus sola Sidon anna la tahungkummua'.¹⁵ Anna ikoa'-iko to Kapernaum, ussanga hia' iko umbai' la dipatiäkä' längängkoa' suhuga? Sapo' setonganna la ditibe tama hako' iko lembä bolom."¹⁶ Mane ma'kada oi lako indo to la nasua naua: "Menna-menna umpehingngiikoa', sihhapam siam tia Kao napehingngii. Menna-menna untumpu pala'koa', Kao siam tia natumpu pala'. Anna menna-menna untumpu pala'ä', untumpu pala' duka' indo To ussuaä'."

Indo pitu pulo passikolanna ma'pasulem

10:17-20

¹⁷Tappana ma'pasule indo pitu pulo passikolanna, iya tä' deem pada satilalla' ma'tula' lako Puang Yesus naua: "O Debata, moi ingganna setam napehingngii tookam ke kisuai lao umpake sangammu."

¹⁸Natimba' Puang Yesus naua: "Kuita tomahajanna setam mehonno' susi

^{**}10:12 Sodom: Kad. 19:24-28.

kila' yabo mai langi! ¹⁹Pehingngiia' aka setonganna puhangkoa' kubeem kakuasaam la ullullu'i ula' sola alipam,†† anna la untaloi kamatohoanna balimmu, nasuhum tä'um deem aka la untilakaikoa'. ²⁰Sapo' moi anna untaloingkoa' setam, tä' la ianna' untilalla'i, sapo' la indo hia tisuha'um sangammua' yabo suhuga."

Katilallasanna Puang Yesus

10:21-24

Mat. 11:25-27; 13:16-17

²¹Wattu eta too naponnoi katilallasam Puang Yesus buttu di Penaba Maseho lambi' ma'sambajam naua: "O Ambe', Puäna langi' anna lino! Ma'kuhhu' sumanga'ä' matim olomu, aka indo kada ditambimmu tä' umpapähänni lako to naangga' manähä anna keaka' hupatau, sapo' umpapähänni leko' ia lako to naangga' matuna hupatau. O Ambe' abana inna ia pa'elo'mu."

²²Puhai ma'sambajam, iya nauam: "Ingganna-ingganna sia puha asammi napadokkoannä' lisu pala'ku Ambeku. Tä' deem moi podo la mesa hupatau la muissam manappai menna Änä'na Puang Allataala sulibanna Ambe', anna tä' toi deem moi podo la mesa hupatau la muissam manappai menna Ambe' sulibanna Änä'na, anna to napoelo' Änä'na, anggam ia la muissam manappa Ambeku." ²³Puhai ia too, umpeng-gihi'im passikolanna Puang Yesus anna nauai: "Kehongko'koa' aka muitaa' inde kaha-kaha. ²⁴Aka kutulasangkoa', buda nabi anna tomahaja yolona maelo' la naita inde to muitaa' temo, sapo' tä'um ia mala naita. Anna maelo' la nahingngi

inde to uhhingngia' temo, sapo' tä'um ia mala nahingngi."

Pehapanganna mesa to Samaria mapia penaba

10:25-37

²⁵Iya ke'de'um mesa to ullatta' Pepaondonganna Musa aka maelo' la umpetidom Puang Yesus ma'kada naua: "O Tuangguhu, aka la kupogau' anna malaä' ullambi' katuboam sule lako salako-lakona?"

²⁶Natimba'i Puang Yesus naua: "Aka naua illaam Pepaondonganna Musa? Aka naua pikkihammu tappana puha umbata?"

²⁷Iya nauam indo tau: "Dituli' naua: 'Kamaseikoa' Debata, Puang Allataala to umpenombai sola sakalebu penabammu anna mentu' pikkihammu anna mentu' kamatohoammu,' anna naua toi 'Kamaseikoa' padammu hupatau umba susi ungamasei kalemu."

²⁸Iya nauaammi Puang Yesus: "Tappa' itim pentimba'mu. Pogau'um too umba susi indo umbata anna malako tubo."

²⁹Sapo' napeä lalanna la ummaloloam kalena lambi' mekutana pole oom lako Puang Yesus naua: "Iya menna isanga padangku hupatau la pahallu kukamasei?"

³⁰Natimba'um Puang Yesus sapo' pehapangam napake naua: "Deem mesa tau mengkalao yabo Yerusalem la lu dokko Yerikho. Muolai lalam, nahappaim to mangngabum pohebana anna ingganna aka-akanna. Anna tä' nahappai mandi sapo' nagasa'i polepi sampe saidi' tamate mane napellei bäbäi lao. ³¹Siampu' eta too deem mesa sando muola eta duka'. Sapo' naitanna indo tau, napengkulio'i mandi muola dio bihim lalam anna

††10:19 *alipam*: naua illaam basa Indonesia *kalajengking*. Indo kalajengking pabalu susi pekeke'na alipam.

tahhu'i. ³²Susi siam duka' deem mesa pessubunna Lewi[‡] liu dio dalam ia too. Tappana naita indo tau, napengkulio'i mandi duka' muola dio bihim dalam anna tahhu'i. ³³Sapo' deem mesa to Samaria muola dio duka' indo dalam ia too. Naitanna indo tau, tappa häntä buana. ³⁴Napenandai siaham indo to sägä anna nabasei anggur basana anna napakulianni minnä' mane naba'basanni. Puhai, naäkä'um längäm keledainna mane nababai lako mesa ongeam si diongei ma'bengi anna nauhusanni kapahalluanna. ³⁵Masiänai, mualam dua doi' peha' anna nabeenni lako indo puäna banua naongei ma'bengi mane nauaanni: 'Jappanniam manappää', anna maka' deempi kapahalluam senga'na, iya ma'pasulepä' mane kubaja'i."

³⁶Puhai ia too, mekutanam Puang Yesus lako indo to ullatta' Pepaondonganna Musa naua: "Inde tallu tau, umbanna iko situhu' pikkihammu mala disangai padanna hupatau indo to nahappai to mangngabum aka-akanna ingngena?"

³⁷Natimba' naua: "To ungkamasei indo to dihapai aka-akanna."

Iya nauaammi Puang Yesus: "Laongko ammu pogau'i susi."

**Puang Yesus dio banuanna
Marta sola Maria**

10:38-42

³⁸Iya umpatahhu' oom pa'laoanna Puang Yesus sola passikolanna sampe landa' lako mesa tondä'. Eta too deem mesa baine isanga Marta untambai tama banuanna. ³⁹Deem solasubunna isanga Maria, muokko' dio olona Puang Yesus Debatanta napehingngii tula'na. ⁴⁰Sapo' Marta ia anggam umpikki' kähänganna

lako dapo' la napake ma'tahia, nasuhum umpellambi'i Puang Yesus anna nauai: "O Tuangguhu, akanna umpäbäi hi iko Maria napamesa-mesää' mealaam lako dapo'? Uaanni anna nabaliä'!"

⁴¹Natimba' Puang Yesus Debatanta naua: "Marta, o Marta! Muaka tiko manangnga anna unguasussaam buda kaha-kaha. ⁴²Anggam mesa handam pahallu. Anna napileim ia Maria indo handam mapianna. Anna ia oom ia duka' la napogau', tä' la mala dilabai."

**Pepa'guhuanna Puang
Yesus diona sambajam**

11:1-13

Mat. 6:9-13; 7:7-11

11 Pissam wattu ma'sambajam Puang Yesus dio mesa ongeam. Puhai ma'sambajam, ma'kadam mesa passikolanna naua: "O Tuangguhu, patudukam duka' ma'sambajam susi Yohanes umpatudu passikolanna ma'sambajam."

²Iya nauam Puang Yesus: "Maka' ma'sambajangkoa', la muuaa': Ambeki, dipa'kasallei sanga masehomu, kela mala Ikom ma'pahenta."

³Beengkanni kinande la sihuanna kiande allo-allo.

⁴Anna muampunniangkanni kasalaangki, aka muampunningkam duka' to kasalaam lako kaleki. Anna daa ullappa'kam tama pa'sändäsam."

⁵Mane ma'kada polei lako passikolanna naua: "Hapanna deengkoa' mesa le'ba' lako banuanna solamu tängä bengi anna muuaanni: 'O solaku, pahabe'ä' kao tallu kalebu hotimmu,

[‡]10:32 *pessubunna Lewi*: indo pessubunna Lewi si umpamoloi sando illaam Banua Debata.

⁶aka deem issanganku lempä sapo' katappusannä.'

⁷Sapo' natimba' di indo issinna banua naua: 'Daa ungganguä' aka puham kukädo' ba'baku anna metindongkam sola änä'ku. Tä'mä' mala la bangom umbeengko aka-aka.'

⁸Kutulasangkoa', moinna anna solamu, tä' siam la naaku bangom la nabeengko kapahalluammu, sapo' aka ungkekke' liu umpelau, iya bangommi duka' anna nabeengko ingganna pelauammu.

⁹Dadi, si pelauia' kapahalluammu längäm Puang Allataala anna naponnoiango. Peäi kapahalluammu anna ullolonganni. De'de'i ba'ba anna mala natungka'iangko. ¹⁰Aka menna-menna melau la diponnoiam pelaunna, anna menna-menna mameä la nalolongam, anna menna-menna unde'de' ba'ba la ditungka'iam.

¹¹Tä' deem mesa ambe la palla' penabanna umbeem ula' änä'na ke umpelau bau. ¹²Susi toi duka' tä' deem tau la palla' penabanna umbeem alipam^{¶¶} änä'na ke umpelau tullu. ¹³Dadi ikoa' duka' to madosa anna muissanni umbeem änä'mu la napomapianna, damo aham Ia Ambemu yabo suhuga la umbeem Penaba Maseho lako si mesa-mesa hupatau to melau dio olona."

Kuasanna Puang Yesus anna tomahajanna setam

11:14-23

Mat. 12:22-30; Mrk. 3:22-27

¹⁴Pissam wattu uhhambai mesa setam Puang Yesus illaam mai kalena mesa to pepe. Messubunna indo setam, iya mala siaham ma'tula'. Nasuhum sangngim nakapilla'i tau buda. ¹⁵Sapo' deem duka' muuai: "Kuasanna hi tia

Beelzebul battu diua tomahajanna setam illaam kalena nasuhum mala uhhambai lao setam."

¹⁶Deem duka' sanaka-naka tau senga' maelo' la umpeängam tuntungam su'be' Puang Yesus, nasuhum napellambi'i anna nauaanni: "Paitaikam tanda memängä-mängä yabo mai suhuga."

¹⁷Sapo' nalosa Puang Yesus pikkihannai, nasuhum ma'kada naua: "Maka' deem mesa kahajaam tä' mala mesa penaba hupataunna illaam, mannassa anna la kahenggängannai dadi. Susi toi duka' ke deenni mesa pandaposam, ke sikabassi-bassii issinna, mannassa anna la titale bangke'i issinna. ¹⁸Susi siam too duka' kapahentaanna setam. Maka' la sianu-anu paka ia illaam kahajaanna, iya iam tia isanga sipobalibali paka ia, nasuhum kende' kahenggänganna. Ma'kada susiä' aka muua hia' iko: 'Kakuasaanna hi tia Beelzebul napake uhhambai lao setam.' ¹⁹Maka' susi, iya kuasanna haka duka' Beelzebul napake pentuhu'mua' uhhambai lao setam? Mannassa anna sala pikki'koa', aka taia duka' kakuasaanna setam napake uhhambai lao setam! ²⁰Sapo' setonganna uhhambaiä' lao setam aka kakuasaanna Puang Allataala muundu'ä'. Dadi mannassa diua umpalakom kapahentaanna Puang Allataala illaam alla'-alla'mua'.

²¹Maka' hapanna deem mesa to matoho anna ganna' pangkakka'na unjagai banuanna, iya la amam asam aka akanna. ²²Sapo' maka' deem to matoho puha ia unkatamai lambi' nataloi, iya la nahappai asam indo pangkakka' to nahannuam anna nabahe-bahei kullena.^{§§}

²³Menna-menna tä' untuhu'ä', tau ia too nabaliä'. Susi toi duka' lako to tä'kam

^{¶¶}11:12 *alipam*: naua illaam basa Indonesia *kalajengking*. Indo kalajengking pabalu susi pekeke'na alipam.

^{§§}11:22 *to matoho anna ganna' pangkakka'na*: tomahajanna setam diuaam; anna indo *to matoho puha ia* Puang Yesus diuaam.

pada kähä mahhempum, tau ia too to mantaleam ia.”

**To kadake gau' dipasihhapam
to napentamai setam**

11:24-26

Mat. 12:43-45

²⁴ Mane naua polei: “Maka' deem mesa setam messubummi illaam mai kalena tau, iya la le'ba' kalao-lao lako ongeam mabanginna umpeä ongeam la naongeti tohho. Sapo' tä' deem nalambi' ongeam la mala naongeti. Iya nauam: ‘La ma'pasuleä' sule lako indo ongeangu inggena.’ ²⁵ Iya le'ba'um sule lako indo ongeanna, iya bahassi liupi nalambi', sihhapam banua bahassi anna tiäto', mapia la naongeti. ²⁶ Iya le'ba' siahham untambai solana pitu, sapo' kadake puha ia indo solana anna la kalena. Anna tohho asanni illaam kalena indo tau. Ma'katampasanna, tau ia too la tuttuam tama kakajuanna indo kakadakeam illaam kalena anna indo anggapi mesa setam umpentamai.”

Diona to handam kehongko'

11:27-28

²⁷ Mahassampi ma'tula' Puang Yesus, iya metambam mesa baine illaam mai alla'-alla'na tau buda naua: “Kehongko' ia indo baine to undadiangko anna napasusu.”

²⁸ Sapo' natimba' Puang Yesus naua: “Kehongko' puha ia to umpehingngii anna umpalako Battakadanna Puang Allataala.”

**Puang Yesus dipelau
la umpadadi tanda**

11:29-32

Mat. 12:38-42

²⁹ Mahassanni nalebo tau buda Puang Yesus, iya umpatahhu' oom pa'tula'na naua: “Ia anna maelo'koa' la kupadadiam tanda memängä-mängä inde to tubokoa' lapi' temo, aka sangngim ma'gau' kadakekoa'. Sapo' tä' la dipadadiangkoa' tanda memängä-mängä senga' sulibanna tanda memängä-mängä la dadi lako kaleku umba susi dadi lako kalena nabi Yunus yolona. ³⁰ Aka umba susi nabi Yunus yolona dipotanda memängä-mängä lako issinna Niniwe, la susimä' too duka' to disangai Änä' Mentolino la mendadi mesa tanda memängä-mängä lako to tubo lapi' temo. ³¹ Anna illaam indo wattu la naongeti Puang Allataala umpopa'tadongkongam hupatau, la dipatibangom indo tomahaja baine to umpahenta paluäna Syeba yolona.* Indo tomahaja ia too la napasalako' inde to tubokoa' lapi' temo aka ahu' ia le'ba' umpehingngii kakeakasanna tomahaja Salomo moi anna mambela lalam naola. Sapo' ikoa'-iko, mokakoa' umpehingngii inde tula'ku sitingngajokia' kita moi kela daa mentondom puha hä' Kao anna la tomahaja Salomo.† ³² Illaam indo wattu la naongeti Puang Allataala umpopa'tadongkongam hupatau, la dipatibangom to Niniwe anna iai umpasalako' to tubo lapi' temo. Aka indo ia to Niniwe untihokongam ia gau' kadakena tappana uhhingngi kadanna Debata napalanda' nabi Yunus. Sapo' mokakoa' iko untihokongam gau'mu,

***11:31** tomahaja baine to umpahenta paluäna Syeba: illaam basa Indonesia naua: *ratu dari selatan*, aka indo Syeba abana dio tandai selatan.

†**11:31** 1Haj. 10:1-10, 2Tul. 9:1-12.

moi kela daa inde to umpa'tula'ikoa' temo mentondom puha Ia anna la nabi Yunus.”[‡]

Kamasiäsam anna kamalillingam

11:33-36

³³Mane naua polei: “Tä' deem tau la umpau' lampu mane nabunii battu haka la nasalongo'i baka. Sapo' napayabo hi tia inna ongeanna anna mala paindo masiä' naita ingganna to mentama indo banua. ³⁴Matammu sihhapam ballo illaam kalemu ma'pomasiä'. Aka maka' masiä' matammu, iya masiä' asam too duka' sakalebu kalemu. Sapo' maka' kadake matammu, iya malillim asam too kalemu. ³⁵Susim too duka' penabammu. Dadi jagai manappai indana indo us-sangai kamasiäsam illaam kalemu, mendadi kamalillingam di. ³⁶Maka' masiä' asam penabammu anna tä' deem malillim sabaheam, iya masiä' asammi too, umba susi paindona lampu ummasiä'i asam kalemu.”

Puang Yesus umpesalaam pa'palakoanna to Parisi sola to ullatta' Pepaondonganna Musa

11:37-54

Mat. 23:1-36; Mrk. 12:38-40; Luk. 20:45-47

³⁷Puhai ma'pa'guhu Puang Yesus, natambaim mesa to illaam kakalebuanna Parisi la mangngande dio banuanna. Iya tamam indo banua anna muokko'i mangngande. ³⁸Mängä-mängä indo to illaam kakalebuanna Parisi aka muita Puang Yesus mangngande tä' umbasei yolo limanna, situhu' peadasanna to Yahudi.

³⁹Iya ma'kadam Puang Yesus naua: “Ikoa'-iko to illaam Parisi sihhapangkoa' to umbasei tangkihi'

anna pihim, nabasei leko' sulibanna anna tä' ia hoäna. Anna hoäna hi naponnoi kakadakeam. Susingkoa' too aka naponnoikoa' kakadakeanna indo pangngala kahha'mua' anna indo pa'pogausam kadakemua'. ⁴⁰Oa' to maho! Tä' daka tia mesam Puang Allataala umpadadi bätä puntimmua' anna penabammu? ⁴¹Indo hia pangngala malussumua' muampuum temo, ia hi tia la ungkamaseianna' lako to mase-mase. Aka iam too pole' la napolalam bahassi asanna' kalemu.

⁴²La ullambi'koa' iko katilakaam inggannakoa' to illaam kakalebuanna Parisi! Aka ikoa'-iko umpa'kasallei leko'a' ia kaha-kaha bahinni' susinna umpatamaa' peadasammu bahe sapulona hampa-hampa indo si tubo bääbä isanga selasih, inggu, anna hampa-hampa senga'na. Sapo' umpa'lembeinna' ia umpalako undu' lollä lako hupatau anna ma'kamase lako Puang Allataala. Moi kela daa iam too inde handam pahallua' la umpalako. Sapo' tä' sianna' duka' la umpa'kalembei indo senga'na.

⁴³La ullambi'koa' katilakaam inggannakoa' to illaam kakalebuanna Parisi! Aka si umpise'ikoa' ongeam dipa'kasalleinna ke illaanni pa'sambajangam. Angganna' si umpohäe ke napa'kasalleikoa' hupatau illaam pasa'.

⁴⁴La ullambi'koa' katilakaam aka mapia bääbäkoa' diita anna kadake hia illaam penabammu, sihhapangkoa' ku'bu' tä' ditandai, dipa'ola-ola yabona aka tä' diissam diua kadake hia dio.”

⁴⁵Deem mesa to ullatta' Pepaondonganna Musa mentimba' naua: “O Tuang-guhu, itim tula'mu, natunaikam duka'!”

⁴⁶Sapo' natimba' Puang Yesus naua: “La ullambi'koa' duka'

[‡]11:32 Yun. 3:5.

katilakaam inggannakoa' to ullatta' Pepaondonganna Musa! Aka si umpapiakoa' pahenta mabanda' illaam peadasam anna umpadudunnii hupatau. Sapo' tä' punala hia' muaku umpamoloi hupatau, moi la sai'di'um, anna mala nabela napalako indo pahenta.

⁴⁷La ullambi'koa' katilakaam aka umpapiaammia' pole' ku'bu'na ingganna indo nabi yolona, sapo' nenemu sianna' umpateii. ⁴⁸Kalembasanna ia too, muakuia' duka' anna ussangaa' hua indo pa'pogau'na nenemu, aka umpapiaammia' ku'bu'na indo to napatei. ⁴⁹Iam too anna nauam kamanähänganna Puang Allataala: 'La kusua sule sanaka-naka nabi anna suho la umpellambi'i. Sapo' deem la napatei anna deem toi la nadahha.' ⁵⁰Nasuhum inde to tubo lapi' temo la untanggum hahana ingganna nabinna Puang Allataala to puha titollo mengkalao uhu dadinna lino sule lako temo, ⁵¹battu diua mengkalao dio Habel sule lako Zakharia. Indo ia Zakharia dipatei illaam alla'na ongeam pehumalasam anna Banua Debata. Ia asanna ia too tä' mala tala umpendudunna' inde to tubokoa' lapi' temo.

⁵²La ullambi'koa' katilakaam inggannakoa' to ullatta' Pepaondonganna Musa! Aka untutusangkoa' lalam hupatau la tama umpengngissanni diona Puang Allataala. Mokakoa' iko tama anna ullabai tookoa' duka' hupatau to la maelo' mentama."

⁵³Tappana napellei Puang Yesus indo ongeam, iya napeä lium lalanna indo to illaam kakalebuanna Parisi sola to ullatta' Pepaondonganna Musa anna mala napetidom, umpake ma'hupa-hupa pekutanaam ⁵⁴aka maelo' la umpeängam tuntungam su'be' Puang Yesus.

Sanaka-naka pepakilalaam

12:1-12

12Wattu eta too massa'bu-sa'bu tau sisippi'-sippi' ma'hempum lambi' silullu'-lullu' bää. Mahassanni ma'silullu' tau, iya nauam Puang Yesus lako passikolanna: "La majaga manappakoa' too indana nakadakeikoa' bibi' hotinna to illaam kakalebuanna Parisi. Indo kuaaam bibi' hotinna, pudu' pandenna anna lila manähäna. ²Sapo' indo pattuju penabanna la kaissangam. Aka ingganna aka-aka disamboi la dipakaleängam asam, anna ingganna aka-aka dibuni, la dipatandaam. ³Anna indo kada ditambim untula' bengia' la dipa'paissangam illaam wattu masiä. Anna indo to umpa'bisissam lako solamu illaam tambim titutu', la dipebangkoam lao.

⁴Pehingngiia' solaku! Daa ungkahea'i indo to anggam mala umpatei bätä punti, aka tä'um ia deem senga'na la mala napogausangkoa'. ⁵La kutulasangkoa' to la pahallu ungkahea'. La mahea' lako hokoa' Ia Puang Allataala to kuasa mampatei anna mane natibe tama nahaka. Abana, la Iaa' pahallu umpengkahea'i. ⁶Taissanna' pada-pada taua lima dena' sai'di' allinna aka anggam dua himi'. Moinna anna susi, sapo' tä' deem moi podo la mesa la nakalembei Puang Allataala. ⁷Senga'unna' tiko, aka meangгаа' beluä'mu puha nahekem asam di tia. Dadi, iam too anna tä'ungkoa' la mahea', aka moi la pada umba budanna dena' tala sipadaannia' angga'mu!

⁸Pengkilalai manappaia' inde tula'ku: Menna-menna muakui kamatappasanna di Kao to disangai Änä' Mentolino dio olona hupatau, tau iam too duka' la kuakui dio olona ingganna malaika'na Puang Allataala kuaa: 'Iam too inde pen-tuhu'ku.' ⁹Sapo' menna-menna umba-

hoiä' dio olona hupatau, tau iam too duka' la kubahoi dio olona ingganna malaika'na Puang Allataala. ¹⁰Deem sia ia paleanna la diampunni to ma'tula' kadake diona Änä' Mentolino. Sapo' tä' si'da-si'da ia deem paleanna la diampunni to untelle Penaba Maseho.

¹¹Maka' dibabako' lako olona to mahhotto' illaam peadasam, battu haka dipopenggolo lako to ma'pahenta battu to kuasa, iya tä'koa' la umpakabeba penabammu la muua: 'Aka amom isanga la diua mentimba?'" ¹²Aka Penaba Maseho la umpatudukoa' indo la pahallunna untula' wattu eta too."

**Pehapangam diona
to makaka sapo' to maho**

12:13-21

¹³Deem mesa tau illaam alla'-alla'na indo tau buda ma'kada lako Puang Yesus naua: "O Tuangguhu, uaanni indo solasubungku anna nabeennä' kao piha indo kulle natampeangkam tomatuangki."

¹⁴Sapo' natimba' Puang Yesus naua: "O solaku, menna hi kao muäkä'ä' la mendadi to mahhotto' battu diua to la untabaangkoa' mana'mu?"

¹⁵Mane ma'kadai lako indo tau buda naua: "Majagakoa' anna mainga', indana lu lakoi kulle penabammu anna ma'podo kao. Aka moi la kende' langi' katomakakaanna mesa tau tala ia sia umbabai lako katuboam mapia."

¹⁶Anna mane untula' mesa pehapangam naua: "Deem mesa to makaka muampuam litä' si naongei kende' bu'dä' bua pengkähäna. ¹⁷Iya mekutanam illaam penabanna naua: 'Aka amom la kupogau' aka pa'de palem naongei inde bua pengkähäku?" ¹⁸Iya nauam: 'O kuissammi. La kuhenggäi asam sule lokoku, anna kupake'de' polei kasallena, anna kupangngannai ingganna gandungku sola kulle senga'ku. ¹⁹Mane la sipa'tula'ä' kaleku

kuua: Kehongko'mä' kao! Kuampuam asammi ingganna mapianna anna moi la ma'taum-taum kupake tala puhai. La tä'mä' mengkähä, angga hamä' la mellube, mangngande mangngihu' anna umpalosso' inabangku.' ²⁰Sapo' ma'kada Puang Allataala lako naua: 'O to maho! La kuäläi siam penabammu inde bengi temo. Iya mennam la muampuanni ingganna indo kulle untombongam kalemu?"

²¹La susim too ullambi'i lako to maelo' uhhempum kulle inde lino, ke tä'i uhhempum kulle di ada' dio olona Puang Allataala."

**Daa ummalallanna' diona
salu katuboam di lino**

12:22-34

²²Puhai ia too, ma'kadam Puang Yesus lako passikolanna naua: "Iam too anna kuuaammokoa': Daa ummalallanna' diona salu katuboammu, la muua: 'Aka amo la diande.' Anna tä' toi la malallangkoa' diona bätä puntimmu, la muua: 'Aka amo la dipa'poheba.' ²³Aka inde katuboam pahallu puha ia anna la kinande, anna inde bätä punti kalando puha ia anna la poheba. ²⁴Penabaam siaia' too indo kadoaja. Tä' deem mangngambo', tä' deem mepahe, tä' toi deem umpuängam loko battu haka talukum. Moinna anna susi, sapo' tontä liu duka' nabanneiam salu katuboanna Puang Allataala. Iya keangga' puha siangkoa' tiko anna la dassi-dassi! ²⁵Akam gunana la malallangkoa' diona kapahalluammu? Mennangka iko tau muita to malallam diona salu katuboanna la mala ullombunni sungnga'na moi podo la saidi'um? ²⁶Dadi maka' tä' muissanna' umpogau' indo kaha-kaha handam bahinni' ia too, iya akanna malallam dako'a' diona kaha-kaha senga'?"

²⁷ Penabaam siaia' too indo bunga-bunga lako kaliane. Tä' deem mengkähä, dapaka ia la umpapia poheba. Sapo' mentondom puha ia mapianna anna la pohebana tomahaja Salomo yolona, moinna anna tä'i deem pada sasugi'.
²⁸ Indo duka' kuhha tubo temo lako bela' la bambanna siam ditibe tama api anna napomapi'dä'i Puang Allataala, damo ahanna' ia iko keangga' puha hakoa' tiko anna la indo kuhha. Kuhäm sugali'a' kamatapassammu!
²⁹ Dadi daa ummalallanna' anna husa' diona la muan-dena anna la muihu'na.
³⁰ Aka ingganna ia too napeä ia to tä' unkaleso manappa Puang Allataala. Sapo' tä' iko la umpasusia', aka inna naissam loppo'um Ia Ambemu ingganna kapahalluammu.
³¹ Ia hia, paitoo'naia' illaam penabammu kapahentaanna Puang Allataala, iya la napasondoingkoa' too ingganna kapahalluammu.

³² O inggannakoa' to kukambi' to saidi' hekengammu! Daa ummahea'a! Aka situhu' pa'elo'na Ambemu puhangkoa' natamba' napopendadi umma'na illaam kapahentaanna.
³³ Balu'i kullemu anna umbeennia' allinna lako to mase-mase. Papia kaleia' osse' la tää'na mala kadake,[¶] indo la umpa'ponggei kulle yabo suhuga. Kulle ia too tä' la mala pa'de aka tä' la mala naboko pa'boko anna tä' la naande bu'bu'.
³⁴ Aka umba-umba naongei kullemu, la eta siam too duka' naongei pikkihammu.”

Diona kamajagaam

12:35-48

Mat. 24:43-51

³⁵⁻³⁶ Mane naua polei Puang Yesus: “La majaga liukoa' sihhapam to

mengkähä muampai puäna la ma'pasule dio mai hame-hame pa'pakabengam. Indo to mengkähäna la makahappi liu pa'pohebana anna lekke' liu lampunna anna mala sulena too indo puäna unde'de' ba'ba, iya tappa natungka' i siaham.
³⁷ Tä' deem pada sakehongko' lako indo to dilambi' mahassam mangngampa wattunna sule puäna. Kutulasangkoa' setonganna sulena too indo puäna tappa umpembeke'um sambu'na anna muuanni indo to mengkähäna: ‘Okko'koa' aka la dipandekoa',’ mane natahiai.
³⁸ Anna tä' deem pada sakehongko' indo to mengkähäna ke tontä liui mangngampa nalambi' puäna, moi anna tängä bengi haka nannahi haka mane sulei.

³⁹ Penabaam siaia' too, maka' hapanna la naissam to ma'banua naua la tette' eta sule to maboko, mannassa anna tä'i la mamma' anna mala tä' tama banuanna indo to maboko.
⁴⁰ Dadi iam too anna la pahallungkoa' duka' majaga liu, aka indo kasuleangu to disangai Änä' Mentolino tä' la umbai-baia'.”

⁴¹ Iya mekutanam Petrus lako Puang Yesus naua: “O Debata, anggangka kami' nahua itim pehapangam, iya ingganna haka hupatau?”

⁴² Natimba' Puang Yesus Debatanta naua: “To nahua inde pehapangam, indo to sihhapam to muäto' pengkähängam illaam banuanna puäna manuhu' anna keaka'. Iya naäkä'um puäna mendadi punggabana ingganna solana, nasuhum ia la si untabaam kinande solana ke lambi' oom wattunna.
⁴³ Kehongko' anna maupa' lako indo to mengkähä ke tontä liui manontom umpalako manappa pengkähänganna nalambi' puäna ke ma'pasulem.
⁴⁴ Setongam-tonganna, tä' mala tala naäkä' puäna sabua' ia

[¶]12:33 *Papia kaleia' osse' la tää'na mala kadake:* kalembasanna, pogau'i pa'pogausam mapia.

too la nalima'iam ingganna kullena. ⁴⁵Sapo' maka' la naua illaam penabanna indo sabua': 'Masäepi mane sulei puäku,' lambi' umpongkoim solana muane anna baine, anna mangngande mangngihu'i anna si umpamäbo' kalena, ⁴⁶iya pissananna sule säkä-säkä ham indo puäna illaam wattu tadibai-bai. Sulena, naala siaham indo sabua'na anna nadahhai napaambi' mate, mane napa'tibeanni tama ongeanna to tä' matappa'.

⁴⁷Lako sabua' to muissam pa'elo'na puäna, sapo' tä' taja anna tä' napalako indo pa'elo'na puäna, iya la ditembe' talukum. ⁴⁸Sapo' lako sabua' to tä' muissam pa'elo'na puäna anna umpalakoi pa'pogausam sala la napolalam la nalambi' pesämbä', iya la disämbä'i duka' sapo' tä' ia la dipekasallei. Aka lako to buda dibeem la buda siam tia duka' napebeem, anna to buda aka-aka dibehoam, la buda siam tia duka' dipemmitai lako."

Puang Yesus umbaba kasipengkaam

12:49-53

Mat. 10:34-36

⁴⁹Mane naua polei: "Kao-kao suleä' umpellebasam api tama inde lino. Anna tä' deem pada sakupohäe kela lekke'um indo api! ⁵⁰Sapo' deempi kamapi'disam mabanda' la pahallu kuola. Lessu'pi kaha-kaha ia too mane tä'i masussa penabangku. ⁵¹Ussanga haka' iko suleä' inde lino la umbaba kasiolaam? Tää'! Taia kasiolaam, sapo' kasipengkaam. ⁵²Napahandu' tentomai, la deem kasipengkaam illaam alla'na lima tau illaam mesa banua, aka tallu la untuhu'ä' anna dua tää', battu haka dua la untuhu'ä' anna tallu tää'. ⁵³Ambe la sipengka änä'na muane. Indo la sipengka änä'na baine. Anna pasanam baine la sipengka mantunna baine."

Diona umpekalebasam tanda napalako Puang Yesus

12:54-56

⁵⁴Mane ma'kadai Puang Yesus lako tau buda naua: "Maka' muitanna' malilim kaliane illau' katampusam, iya tappa muissanna' muua: 'La uham.' Iya uham si'da-sia. ⁵⁵Anna maka' muita hibu' buttu dio mai tandai selatan, iya tappa muissanna' muua: 'La kulla.' Iya kulla' si'da-sia. ⁵⁶O inggammua' to ma'dua tambu' ma'tallu sumusu, akanna muissam leko'ia usse'la tanda inde lino sola yabo langi', sapo' tä' leko' ia muissam umpekalebasam inde tanda dipadadi illaam alla'-alla'mua' tentomai?"

Dilomba ma'gau' mapia sumala deempi wattu

12:57-59

⁵⁷"Akanna tä'ia' umpopa'tantu muua: 'Indem lalam malolo?' ⁵⁸Maka' hapanna deengkoa' la umbaba lako to mahhotto', iya peäia' lalanna anna sikapiaikoa' lako lalam. Aka maka' tä' umpateem, iya la nabehoko lako to mahhotto', mane napatahhu'ko indo to mahhotto' lako pulisi, anna natibeko tama tahungku. ⁵⁹Setongam-tonganna tä' siako la mala dipassubum illaam mai tahungku kela deempi tohho moi podo la himi'um indammu."

Tihokonganni gau' kadakemu

13:1-5

13 Wattu eta too deem sanaka-naka tau dio heem untulasanni Puang Yesus indo kaheba diona sanaka-naka to Galilea napatei Pilatus wattunna mahassam untunu bua pemala'na längäm Puang Allataala. ²Natimba' Puang Yesus naua: "Ussanga haka' iko indo to nalambi' katilakaam tä' nabai-bai anna matei, la kasalle puha ia dosana anna la dosana

ingganna to Galilea senga? ³Tää! Sapo' kutulasangkoa', maka' tä'koa' untihokongam gau' kadakemu, iya la ullambi'koa' duka' katilakaam tä' umbai-bai. ⁴Mane deenni, ussanga haka' iko indo to sapulo kahua tau natappai banua maläkkä' dio Siloam, la kasalle puha ia kasalaanna anna la ingganna tau senga' yabo Yerusalem? ⁵Tää! Sapo' kutulasangkoa', maka' tä'koa' untihokongam gau' kadakemu, iya la ullambi'koa' duka' katilakaam tä' umbai-bai.”

**Pehapangam diona
satoo' ara tä' kembua**

13:6-9

⁶Mane untula' polei mesa pehapangam Puang Yesus naua: “Deem mesa tau umpuängam satoo' ara tubo illaam bela' anggurna. Pissam wattu lao oom lako too'na indo ara napeä buana, sapo' tä' deem nalambi'. ⁷Iya ma'kadam lako to si unghähäi indo bela' anggurna naua: ‘Tallu taummi kuolaam umpeäi buana inde ara, sapo' tä' deem kulambi'. Lellemmi too, aka umpuhai bäbä lompona litä!’

⁸Sapo' natimba' indo to mengkähäna naua: ‘O tuam, päbäipi yolo tubo illaam inde taum, anna kusändä'pi kukumbä lao pali' too'na mane kulompoi, ⁹umba-umba aka kembua taum pole. Anna maka' too tä' liu siam kembua, iya etapa pole' mane dilellenni.”

**Puang Yesus umpabono' mesa
tau illaam allo Katohhoam**

13:10-17

¹⁰Pissam wattu ma'pa'guhu oom Puang Yesus illaam mesa pa'sambajanganna to Yahudi illaam allo Katohhoam. ¹¹Wattu eta too deem mesa baine sapulo kahua taunna napentamai setam, nasuhum masaki sampe bungku' anna tä'um mala malolo

ke'de'. ¹²Tappana naita Puang Yesus indo baine, natambaim anna nauaanni: “O indo', la dilappasammoko dio mai sakimmu.” ¹³Mane naantii, iya tappa malolo siaham ke'de' indo baine, anna umpa'kasalle Puang Allataala.

¹⁴Sapo' tappa keaha' indo to si muäto' pengkähängam illaam pa'sambajangam, aka umpabono' to masaki Puang Yesus illaam allo Katohhoam. Nasuhum ma'kada lako tau buda naua: “Deem annam allona diolaam mengkähä, dadi pise'ia' mesa allo ia too muolaam sule la dipabono'. Sapo' damom tia allo Katohhoam.”

¹⁵Sapo' natimba' Puang Yesus naua: “O inggammua' to ma'dua tambu', tä' daka tia si ullappasam siangkoa' duka' sapimmu battu haka keledaimmu illaam mai balana anna laolia' umpaihu' illaam allo Katohhoam? ¹⁶Dadi, tä' daka tia pahallu dilappasam duka' inde baine, mesa duka' peampoanna Abraham? Aka sapulo kahua taunna napembalokko'i setam sihhapam nasäke', iya tä' daka tia mala la dilappasam duka' illaam allo Katohhoam?”

¹⁷Ingganna to umpobali Puang Yesus sangngim ma'luttu' masihi', sapo' tilalla' asam ia tau buda aka ingganna indo kaha-kaha puha napogau' sangngim matande.

**Dua pehapangam diona
kapahentaanna Puang Allataala
la tuttuam tiballa' kalua'**

13:18-21

Mat. 13:31-33; Mrk. 4:30-32

¹⁸Iya nauam Puang Yesus: “Akam la dipasihhapangam kapahentaanna Puang Allataala? Anna aka la nasusiam? ¹⁹Kapahentaanna Puang Allataala sihhapam mesa lise'na sesawi natanam tau lako bela'na. Lise' ia too tubo mendadi

satoo' kaju anna naongeti dassi täkena ma'sehä."

²⁰ Anna mane muala pole mesa pehapangam senga' naua: "Akapi la kupasihhapangam kapahentaanna Puang Allataala? ²¹ Kapahentaanna Puang Allataala mala duka' dipasihhapam bibi' hoti naala baine anna naboloianni appa' pulo lite' tehigu[§] sampe nasamba asam lambi' sumbakka'."

**Ba'ba masiki' la diola tama
kapahentaanna Puang Allataala**

13:22-30

²² Illaam pa'laoanna Puang Yesus längäm Yerusalem, ullelei mobotto-bottoam ma'pa'guhu. ²³ Iya deemmi mesa tau mekutana lako naua: "O Tuam, saidi' mandaka tau la dipasalama?"

Natimba' Puang Yesus naua: ²⁴ "Peäi lalanna anna malai muola indo ba'ba masiki', dalam kasalamasam! Aka kutulasangka' buda tau umpeäi lalanna la tama sapo' tä' mala. ²⁵ Aka maka' untutu'im ba'bana indo to ma'banua, iya la dio mandangka' too sulibam ke'de'-ke'de' umpasindum ma'de'de' muua: 'O Tuam, tungka'ikam kami!'

Iya la natimba'i mandakoa' too indo to ma'banua naua: 'Aka tä'koa' kuissam, buttu umbakoa' iko ngei?'

²⁶ Iya la untimba'inna' too muua: 'Puhangkia' sola mangngande anna puhangko si ma'pa'guhu lako dalam illaam kotaki.'

²⁷ Sapo' la nauaam mandakoa': 'Aka tä'koa' kuissam anna tä' toi kuissam buttu umbakoa' ngei. Päläikoa' lao inggannakoa' to si umpogau' kakadakeam!'

²⁸ Iya la muitangka' too indo nene to taponene susinna Abraham, Ishak anna Yakub sola ingganna nabi illaammi ka-

pahentaanna Puang Allataala. Sapo' la sumahho lumoa'koa' iko sikekko' isimmu tamate tatubo aka la dipa'tibeangkoa' lao! ²⁹ Anna buda tau taianna to Yahudi la sule illaam mai tandai mata allo, illau' mai katampusam, dio mai utara anna dio mai selatan, anna muokko'i ma'hamehame illaam kapahentaanna Puang Allataala. ³⁰ Anna setonganna la deem too ke dako'i to matande tentomai, la mendadi to madio, anna to madio tentomai la mendadi to matande."

**Mapi'di' penabanna Puang
Yesus muita to Yerusalem
aka umpogau' kakadakeam**

13:31-35

Mat. 23:37-39

³¹ Wattu eta too sule sanaka-naka to illaam kakalebuanna Parisi anna ma'kadai lako Puang Yesus naua: "Le'ba'ko pellei inde ongeam aka maelo' tomahaja Herodes la napateiko."

³² Natimba' Puang Yesus naua: "Laokoa' anna untulasanni itim to si mangkadakei muua: 'Allo temo anna makale' la kupatahhu'pi pengkähängangku uhhambai setam anna umpabono' to masaki. Sapo' allo katallunnai too, kupasuppi'um pengkähängangku.' ³³ Moi anna maelo'mä' napatei, sapo' allo temo, makale', anna dua bengi tä' mala tala umpatahhu'ä' pa'laoangku längäm Yerusalem, aka anggam yabo sihatam naongeti nabi dipatei.

³⁴ O inggannakoa' issinna kota Yerusalem! Palla' dia' iko penabammu umpatei buda nabi, anna ulleba'ia' batu sampe mate to nasua Puang Allataala umpellambi'ikoa'. Si kunaba-naba liu la kuhempungkoa' sihhapam änä'

[§]13:21 *appa' pulo lite' tehigu*: naua illaam basa Yunani: tallu *satas* tehigu, sipadaam *appa' pulo lite' tehigu*.

mäne' napakumbäi pani'na indona, sapo' mokakoa'. ³⁵Patanannia' talinga inde tula'ku anna umpaillaam penabai: la natampeammi Puang Allataala tadongkongammua'. Kutulasangkoa', mengkalao temo tä'mä' deem la muita pole sule lako wattunna suleä' sule lambi' muuaa': 'Katambasam indo To sule illaam sanganna Debata!'"

Puang Yesus umpabono' pole oom to masaki illaam allo Katohhoam

14:1-6

14 Pissam wattu illaam allo Katohhoam le'ba' Puang Yesus lako banuanna mesa to kasalle illaam kakalebuanna Parisi la mangngande eta. Inganna tau to dio heem eta too sangngim umpetua'-tua' liu pa'pogausanna Puang Yesus. ²Wattu eta too sule mesa to kawwa umpellambi'i Puang Yesus anna ke'de'i dio olona. ³Iya nalosa Puang Yesus tama penabanna indo to ullatta' Pepaondonganna Musa sola to illaam kakalebuanna Parisi naua: "Tä' tau si mala mengkähä illaam allo Katohhoam," nasuhum ma'kada naua: "Situhu' peadasam, si mala haka dipabono' to masaki illaam allo Katohhoam, tä' daka?"

⁴Sapo' tä' deem tau mentimba'. Iya nahaka'um Puang Yesus indo to masaki napabono', mane nasuai lao.

⁵Puhai, ma'kadam lako indo to dio heem eta too naua: "Hapanna la deem mesa änä'mua' battu haka sapimmua' mehonna' dokko gahoä, sapo' illaam allo Katohhoam, iya tä' daka tia la umpemäläi dio mai?" ⁶Sapo' moi mesa tadeenni naissam mentimba'.

Popengkadioi kalemu

14:7-14

⁷Tappana naita Puang Yesus indo tosabe sangngim umpise'i

ongeam handam dikasalleam la naongi muokko', iya untula'um mesa pehapangam lako indo tau naua: ⁸"Maka' deem tau untambaikoa' lako hame-hame pa'pakabengam, iya daa tappa muokko' dioa' ongeam handam dikasalleam. Aka deem manii ditambai to kasalle puha ia anna la ikoa'. ⁹Indana nauaangko indo to untambaiko: 'Läbänganni ongeam inde tau.' Iya la masih'ungko too aka tä' mala tala le'ba'ko muokko' lako ongeam handam madio. ¹⁰Sapo' maka' deem untambaiko, lu lakoko ongeam handam madio, aka la napellambi'i hoko tia indo to ma'banua anna nauaangko: 'O solaku, maiko anna muokko' illaangko pengnguluam.' Dadi maka' susi ia too, iya dikasalleammoko naita solamu. ¹¹Aka menna-menna ussanga-sanga kalena la dipomahempo anna menna-menna umpopengkadio kalena la dipomatande."

¹²Puhai ia too, ma'kadam duka' Puang Yesus lako indo to untambai naua: "Maka' umpadeengko hame-hame susi iallo susi bengi, daa untambai sammanemu battu solasubummu, battu kasahapuammu, battu sambanuammu to makaka. Aka la natambai siangko tia duka' ke ma'hame-hamei, iya ullambi' siam bala'na. ¹³Sapo' maka' ma'hame-hameko, tambai to mase-mase, to kempo', to kungku, anna to buta. ¹⁴Aka maka' umpateem, la natamba'ko Debata. Aka moi anna tä' deem akakanna la nabala'iangko, sapo' la ullambi' bala'na ke tibangommi sule dio mai kamateam to malolo gau'."

**To moka untuhu'i Puang
Yesus dipasihhagam to moka
ullomba pa'hame-hameam**

14:15-24

Mat. 22:1-10

¹⁵Tappana uhhingngi tula'na Puang Yesus indo to napasola mangngande, iya ma'kadam mesa lako Puang Yesus naua: "Kehongko' anna maupa' to mangngande sola Puang Allataala ke illaammi kapahentaanna!"

¹⁶Sapo' muala mesa pehapangam Puang Yesus napake untimba'i indo tau naua: "Deem mesa tau umpadeem pa'hame-hameam kasalle mane untambai tau buda. ¹⁷Tappana la dipahandu', iya ussuam sabua'na lao untambai indo to puha diuaam anna nauaanni: 'Maingkoa' aka toka asammi.'

¹⁸Sapo' sangngim taakanna indo to puha diuaam la ungdadioi heem indo hame-hame. Nauam ia indo to uhuna nalambi': 'Issanganni, aka mane puhaä' mualli bela', iya pahallupi la lao kuita. Sa'baha'ko.'

¹⁹Deem muuai: 'Issanganni, aka mane puhaä' mualli lima pasang sapim la dipopengkähä anna pahallu la laoä' temo kusändä'. Dadi sa'baha'ko.'

²⁰Deem mesa muuai: 'Issanganni, aka bakahuä' kebaine, dadi tä'ä' mala lao. Sa'baha'ko.'

²¹Iya ma'pasulem indo sabua' anna natulasanni puäna. Tappa keaha' indo to ma'banua anna muuaanni sabua'na: 'Laoko sambai ingganna dalam kasalle anna dalam bahinni' illaam inde kota anna umpasola asanni sule ingganna to mase-mase, to kempo', to buta, anna to kungku.'

²²Puhai napalako indo pahentana puäna, iya sulem indo sabua' natulasam puäna naua: 'O tuam, moi anna puham kupalako indo pahentamu, sapo' deem liupi ongeam lo'bä.'

²³Iya nauam indo puäna: 'Laoko sambai ingganna dalam kasalle anna dalam bahinni' lako sulibanna kota anna ussuai tau sule inde banua anna mala ponno. ²⁴Aka kutulasangko, tä' deem moi podo la mesa indo to puha diuaam inggena' la mala mangngande illaam pa'hame-hameangku.'"

**Ingganna-ingganna sia
pahallu la ditampeam ke
untuhu'i tau Puang Yesus**

14:25-35

²⁵Tappana buda oom tau ma'obim-obim untuhu' Puang Yesus illaam pa'laoanna, iya napenggihi'im anna ma'kadai naua: ²⁶"Maka' deem tau maelo' untuhu'ä' sapo' umpakalando puha ia ambena, indona, bainena, änä'na, solasubunna, kalena anna la Kao, iya tä' mala la mendadi passikolangku. ²⁷Anna menna-menna tä' umpassam kaju sitambenna** anna natuhu'ä', tau ia too tä' duka' mala mendadi passikolangku.

²⁸Hapanna deem mesa solamua' maelo' la umpake'de' banua maläkkä', iya tä' daka tia la muokko' yolo anna naissa'i la pada umba budanna doi' napake? Aka tä' manii sihua indo doi' sule lako puha indo banua. ²⁹Aka maka' napake'de' bäbä indo banua, sapo' tä' siam mala napatahhu', iya la napetaba-tabai ingganna to muitai ³⁰naua: 'Uuu! Napake'de' bäbä duka' sapo' tä' siam nabela napapuha!'

³¹Susi toi ke deenni mesa tomahaja la mueba tomahaja senga', tä' mala tala

** 14:27 *umpassam kaju sitambenna*: kalembasanna, ahu' muoloi kamasussaam sule lako ahu' la dipatei aka untuhu' Puang Yesus.

muokko' yolo anna napenabaanni naua: 'La nabela haka inde sapulo sa'bu sohodadungku la mueba dua pulo sa'bu sohodadu?' ³²Maka' tä' la nabela, iya la ussua sanaka-naka tau lao napellambi'i nakutanai naua: 'La diaka susi sikapi'ai?' baju anna muolapi lalam indo balinna. ³³Susi siangkkoa' tiko duka' inggammua' to dio heem temo, ke tä'ia' umpellei ingganna aka-akammu, la tä'koa' mala mendadi passikolangku.

³⁴Indo sia abana mapia. Sapo' maka' matämmä'um, la malapaka tia dipamasim sule? ³⁵Tä'um tia deem gunana, aka tala malapi ia dipake lako bela', tala malapi dipolompo. Iya angga ham tia ditibe.

Lako ingganna ma'hupatau pahallu la umpatanam talinganna umpalempesulim patomalinna anna napailaam penabai inde tula'ku!"

Pehapangam diona domba bulim

15:1-7

Mat. 18:12-14

15 Pissam wattu buda tuam passima sola tau senga' ma'hempum la umpehingngii tula'na Puang Yesus. Ingganna tau ia too si nasangai to Yahudi to madosa. ²Tappana naita sanakanaka to illaam kakalebuanna Parisi anna to ullatta' Pepaondonganna Musa, iya sangngim ma'naum-naum naua: "Naaku siam ia duka' inde tau untahima to kadake gau' lambi' mangngande solasola!"

³Iya untula'um mesa pehapangam Puang Yesus naua: ⁴"Hapanna deengkoa' mesa muampuam sahatu' domba. Pissananna bulim mesa, iya aka la umpogau'? Mannassa anna la umpellei dio pohiallasam indo dombamu kaseha pulo kaseha anna le'ba'i uhhuttu' indo to bulim sampe ullambi'. ⁵Ullambi'i too, iya tä' mala

tala tilalla'ko ussompoi ⁶ma'pasule lako banuammu. Iya untambaim ingganna solamu anna sambanuammu anna muuaanni: 'La tilalla'kia' pada-pada aka indo dombaku pa'de sala, kulambi'um sule.' ⁷Kutulasangkoa', setonganna susim too duka' yabo suhuga, maka' deem mesa to madosa untihokongam gau' kadakena ditilalla'i puha ia anna la indo to kaseha pulo kaseha to malolo to tä'um manggi' untihokongam gau'na."

Pehapangam diona doi' pa'de

15:8-10

⁸"Susi toi, hapanna deem mesa baine muampuam sapulo doi' peha', pissananna napa'deam mesa. Aka la napogau'? Mannassa anna la umpau'i lampu, mane ussapui banuanna umpeä indo doi'na sampe nalambi'. ⁹Nalambi'i too, iya untambaim ingganna solana anna sambanuanna anna nauaanni: 'La tilalla'kia' pada-pada aka indo doi'ku pa'de sala kulambi'um sule.' ¹⁰Kutulasangkoa', setonganna susim too duka' katilallasanna ingganna malaika'na Puang Allataala ke deenni mesa to madosa untihokongam gau' kadakena."

Pehapangam diona to lao lampum ma'pasule sule

15:11-32

¹¹Mane untula' polei mesa pehapangam Puang Yesus naua: "Deem mesa tau, dua änä'na bassim muane. ¹²Ma'kadam indo änä' tämpä'na naua: 'O ambe', beemmä' kao indo la ummanasannä'.' Iya bassim nabeemmi tabana indo änä'na dua.

¹³Sanaka amoi benginna lessu'na, iya nabalu'um ia indo änä' tämpä' mana'na, mane le'ba'i lako botto mambela ma'tobosa'-bosa' napuhai indo allinna, ia siam anna ia naua penabanna. ¹⁴Tappana tappu' doi'na, siampu' duka'

nahua kakobeam indo botto naongi lambi' ussi'dim kamasussaam. ¹⁵Iya le'ba'um umpelau pengkähängam lako mesa tau illaam indo botto, lambi' nasua lako bela'na la ma'pande babi. ¹⁶Tandana tadea' sugali' indo änä'-änä', iya mohäem la muande indo kinande babi. Moi anna susi, sapo' tä' deem mesa tau la umbeenni kinande.

¹⁷Katampasanna kilala lambi' ma'kada naua: 'Ingganna to mengkähäna ambeku bosa' kinande, anna etamä' kao inde la mate tadea'. ¹⁸La mengkalao siahämä' umpellambi'i ambeku anna kuaanni: O Ambe', madosää' längäm Puang Allataala anna madosää' matim. ¹⁹Tä'mä' sihatam la umpoänä'. Anggamä' kao la umpadadi to mosahomu.' ²⁰Iya mengkalao siahanni le'ba' umpellambi'i ambena.

Sikambelapi banua, iya naita ham ambena. Tä' deem pada sahäntä buana nasuhum kumondä siaham untammui änä'na. Sitammunna nakalapu'im anna naudunni.

²¹Ma'kadam indo änä'na naua: 'O Ambe', madosää' längäm Puang Al-lataala anna madosää' matim. Tä'mä' sihatam la umpoänä'.'

²²Sapo' untambai siaham sabua'na indo ambena anna nauaanni: 'Kandi'ia' muala poheba handam mapia anna umpabajui, umpasissinni anna umpas-apatui. ²³Puhai too, laongkoa' umpise'i mesa sapim maloppä' ammu tunuia'. Aka la ma'hame-hamekia' ponno kati-lallasam. ²⁴Aka inde änä'ku sihhapam puham mate, sapo' mala tubo sule. Bulim sapo' mala dilambi' sule.' Puhai napogau' asam ia too, iya ma'hame-hamem.

²⁵Mahassanni ma'hame-hame, iya sulem duka' indo änä' uluana dio mai bela'. Tappana dio ampe' banua, nahingngim moni poni-poniam anna to sumajo. ²⁶Iya untambaim mesa

sabua'na anna nakutanai naua: 'Aka hia dipogau' illaam banua?'

²⁷Nauam indo sabua': 'Ma'hame-hame tau aka malam sule sule adimmu. Mesa sapim maloppä' natunuam ambemu aka mala mammi ma'pasule masakke.'

²⁸Tä' deem pada sakeaha' indo änä' ulua nasuhum moka tama banua. Iya messubummi ambena anna nase'de'i anna mala naaku tama banua.

²⁹Sapo' natimba'i mandi indo änä'na naua: 'Ma'taum-taummä' umpengkähä kahhasangko anna tä' toi deem kubali-baliko. Iya tuli tadeempä' kao um-beem moi mesam beke la kupake ma'hame-hame sola solaku. ³⁰Anna indo leko'i änä'mu to puha untallangam kullemu si nabeem baine passunda' mane ma'pasulei, iya untunuam ia sapim maloppä!'

³¹Iya nauam ambena: 'O änä'ku, sola liungki' kita. Ingganna indo kuampuam, iko asam muampuanni. ³²Dadi sihatam di tia ma'hame-hamekia' anna tilalla' aka sihhapam puham mate adimmu, sapo' mala tubo sule. Bulim sapo' mala mammi dilambi' sule.'"

Pehapangam diona mesa to si muanna doi'

16:1-13

16 Mane untula' oi mesa pehapangam Puang Yesus lako passikolanna naua: "Deem mesa to makaka umpopengkähä mesa tau si muannanni doi'na anna naätosam kullena. Sapo' deem sule untulasanni naua: 'Indo to muannaangko doi'mu si beba' bäbä napalusau' napaludekke indo doi'mu anna kullemu.' ²Iya untambaim indo to si muannanni doi'na anna nauaanni: 'Nalambi'ä' kaheba diona pa'palakoammu, akanna ma'pateengko? Dadi temo la untulisam asannä' indo pa'palakoammu muäto' kulleku. Aka tä'ungko la kupopengkähä.'

³Iya ma'pikki'um indo to si muannanni doi'na naua: 'Aka la kupogau' temo? Aka tä'mä' la napopengkähä punggabaku. La ma'bingkunnä' takubela, la kapelau-lauä' masihi'ä'. ⁴O, kuissammi aka la pahallu kupogau' yolo mane dipassubunnä' illaam mai pengkähänganku. La kupeäpi yolo buda sola anna mala buda si kuongeti banuanna.'

⁵Iya untambai asammi ingganna tau to ma'indam lako indo punggabana. Uhuna sule, nakutanai naua: 'Sanaka iko indammu lako punggabaku?'

⁶Iya naua: 'Sahatu' busso minnä' zaitun.'

Iya nauaammi: 'Indem suha' indammu, okko'ko anna ungkandii untuli' lima pulo busso.'

⁷Mane ma'kada polei lako indo kaduanna naua: 'Anna iko, sanaka iko indammu?'

Natimba' naua: 'Sasa'bu kahum gandum.'

Iya nauaammi: 'Indem suha' indammu, tuli' kahua hatu' kahum.'

⁸Nasuhum napekeakasam ohi punggabana indo to si muannanni doi'na, aka moi anna tä' malolo pa'palakoanna sapo' keakkalam unguhänniam indanna to ma'indam anna mala napohäe. Kutulasangkoa' inde pehapangam, aka ingganna to tä' matappa' illaam inde lino keaka' puha ia lako padanna anna la to matappa'.

⁹Iam too anna kuuammokoa': Pakegunaia' pakkulleam di lino anna mala deenna' solamu. Aka ke tä'um keguna indo kulle illaam inde lino, iya la natahima manappakoa' solamu illaam indo ongeam la da'da' sule lako salako-lakona. ¹⁰Aka menna-menna mala dikatappa'i muuhu' kaha-kaha bahinni', tau ia too la mala duka' dikatappa'i muuhu' kaha-kaha kasalle. Sapo' menna-menna tä' malolo muuhu'

kaha-kaha bahinni', tau ia too tä' duka' la malolo muuhu' kaha-kaha kasalle.

¹¹Dadi, maka' tä'koa' mala dikatappa'i muuhu' pakkulleam di lino, iya mennam la unkatappa'ikoa' la muuhu' kulle di ada'? ¹²Anna maka' tä'koa' mala dikatappa'i muuhu' kullena tau senga', iya mennam iko la umbeengkoa' kulle la umpokulle?'

¹³Tä' deem mesa sabua' la nabela umpengkähängam dua puä. Aka la natuhu'i manappam too mesa, anna la napaiboko'na bäbä mesa. Battu diua la napakalando puha ia mesa anna tä' bäbä la napehingngii mesa. La susingkoa' too duka', tä' siaan' la umbela umpalulängäm penabammu Puang Allataala ke anggakoa' umbumbu' kulle di lino."

Sanaka-naka pepa'guhuanna Puang Yesus

16:14-18

¹⁴Ingganna indo tula'na Puang Yesus nahingngi asam to illaam kakalebuanna Parisi, sapo' napetabai aka sangngim anggam lu lako doi' penabanna. ¹⁵Sapo' nauaam Puang Yesus: "Ikonna' too si umpomapia lelem gau'mu ke naitakoa' tau senga'. Sapo' nalosa Puang Allataala tama penabammua'. Anna indo si napuji hupatau, nakahidi' la Puang Allataala.

¹⁶Issinna suha' Pepaondonganna Musa anna suha'na ingganna nabi, ia too dipelhondoi sule lako wattunna ma'pa'guhu Yohanes to si mantedo'. Iya napahandu' etam too Kaheba Katilallasam diona kapahentaanna Puang Allataala dipa'pakahebaam liu. Iya budam tau ma'bumbu' anna mala mendadi umma' illaam kapahentaanna. ¹⁷Sapo' madomi' leko' ia langi' sola lino pa'de, anna la dikuhänni moi podo la satiti'um pahentana Puang Allataala.

¹⁸Menna-menna untibe bainena anna laoi kebaine pole, tau ia too ullullu'

pa'bannetauam. Anna menna-menna umpobaine baine to natibe muanena, tau ia too ullullu' duka' pa'bannetauam."

Lazarus anna mesa to makaka

16:19-31

¹⁹Puhai ia too, ma'kada pole oom Puang Yesus naua: "Deem mesa to makaka umpa'poheba liu poheba masulli' allinna anna katuboanna alloallo tä'um deem nakasepa-sepai. ²⁰Dio indo ba'ba balana, si dipadio mesa to mase-mase isanga Lazarus, kämbä asam kalena. ²¹Anna tandana tadea' sugali' indo Lazarus, iya mohäem la muande indo kinande tikadanna indo to makaka. Tä' anggam ia, sapo' nalebopi asu nalepa'i indo kämbäna.

²²Pissananna mate indo to mase-mase, iya nababam malaika' längäm ongeam matande dio ampe'na Abraham yabo suhuga. Tä' masäe, matem duka' indo to makaka lambi' dilamum. ²³Anna tä' deem pada samadahha illaam lembä bolom indo to makaka. Pissananna mentongam längäm, iya muita mambelam Abraham muokko' sitehe Lazarus. ²⁴Iya kaoli-olim indo to makaka naua: 'O ambeku Abraham, kamaseiä', suai Lazarus untu'do uwai anna maii natu'doannä' lilaku, aka tä' deem pada samadahha' illaam api ma'nala-nala!'

²⁵Sapo' natimba'i Abraham naua: 'O änä'ku, pengkilalai indo anna tubopoko illaam lino tä'um deem ungkasepa-sepai. Sapo' inde ia Lazarus anggam ia kamasussam nasi'dim. Temo ussi'dimmi ia kamasannangam, sapo' iko-iko ussi'dingko kamadahhaam. ²⁶Anna illaam alla'taa' deem lembä mandalam mualla'ikia', nasuhum to maelo' la lambam matim tä' mala. Susi toi duka' to maelo' la lambam mai, tä' duka' mala.'

²⁷Puhai ia too, ma'kada pole oo indo to makaka mengkahumase-mase

naua: 'O ambe', maka' susi kupelau kela mala anna ussuaannä' Lazarus lao lako banuanna ambeku. ²⁸Aka deempi lima solasubungku la napakilalaannä' indana naola pole oi duka' lalangku, nasuhum la tinanda tama inde ongeam kamadahhaam.'

²⁹Sapo' natimba' Abraham naua: 'Kusanga indo solasubummu muampuum duka' suha' Pepaondonganna Musa anna suha'na ingganna nabi. La natuhu' di tia duka' issinna indo tisuha' illaam.'

³⁰Sapo' natimba' indo to makaka naua: 'O ambeku Abraham, tää'. Aka tä'pi la ganna' ke anggam ia nabata, sapo' tappa la untihokongam siaham ia gau' kadakena indo solasubungku ke deenni to puham mate tubo sule lao umpakilalai.'

³¹Sapo' naua Abraham: 'Maka' tä' untuhu'i indo Pepaondonganna Musa anna suha'na ingganna nabi, moi la to mate tubo sule lao umpakilalai, tala nakannanganni.'"

Sanaka-naka

pepa'guhuanna Puang Yesus

17:1-6

17 Ma'kadam Puang Yesus lako ingganna passikolanna naua: "Abana inna la deem kaha-kaha napolalam metobä tau tama dosa, sapo' tilaka lako to umbabai solana umpogau' dosa. ²Aha leko'um ia dipatoke'i batu peepe' bahokona anna dipa'tumbusanni tama le'bo' anna la umpakendesam dosa inde mai to tadihingngiam. ³Dadi la unjagai manappaa!'

Maka' umpogau' dosa solasubummu, pakilalai. Anna maka' untihokongammi gau'na, ampunnii. ⁴Maka' deem solasubummu umpogau' kasalaam lako kalemu pempitu sangngallo, anna pempitu siam duka' sule napellambi'iko naua: 'Ampunniä', iya pahallu la muampunni.'"

⁵Iya sangngim ma'kadam indo suhona lako Puang Yesus Debatanta naua: "Pakatotosangkam kamatappasangki!"

⁶Natimba' naua: "Maka' la deenna' kamatapassammu moi podo padam i'di, iya malanna' la muuaam inde kaju ara: 'Tihebu'ko ammu pentieli' titanam illaam tängä le'bo!' Iya tä' mala tala natuhu'i tula'mu."

Kasa'bahasanna mesa sabua'

17:7-10

⁷Mane naua polei Puang Yesus: "Hapanna deengkoa' mesa muampuam sabua' lao massalaga battu haka lao nakambisangko dombamu. Pissananna ma'pasule lako banua, aka la muuaam? La muuaam daka: 'Maiko ammu pasihha'i mangngande?'⁸Tää', sapo' la muuaam mandi: 'Patokaannä' kinandeku! Pembeke'ko sambu'mu anna untahiaia'. Puhapä' kao mane mangngandeko iko.'⁹Maka' puha pengkähänganna indo sabua', tä'um manggi' la dipuji aka anggam tia untuhu'i indo pahentamu.¹⁰Susingkoa' too duka' ke umpeloloikoa' pengkähängammu indo puha dibeengkoa'. La ma'kadakoa' muua: 'Kami-kami' anggangkam sabua' bäbä. Anggangkam umpalako indo pengkähängam puha dibeengkam.'"

Puang Yesus umpabono' sapulo to dolengam

17:11-19

¹¹Illaam pa'laoanna Puang Yesus längäm Yerusalem muolai katonanna lembäna Samaria anna lembäna Galilea.¹²Tappana mentama mesa tondä', natammuim sapulo to dolengam. Ke'de' mambela¹³napasindum sikatamba naua: "O Puang Yesus, Tuangguhu!

Kamaseikam kami!"¹⁴Tappana naita Puang Yesus, iya ma'kadam naua: "Laongkoa' pa'paitaam kalemu lako sando." Iya mahassanni mellao, tappa masapu eta siaham indo sakinna.

¹⁵Tappana naita indo mesa to masaki bono'um sakinna, iya ma'pasulem katamba-tamba umpuji Puang Allataala.¹⁶Ullambi'i Puang Yesus, iya ma'balinguntu'um dio olona anna nauai: "Kuhhu' sumanga'." Indo tau ia too to Samaria.

¹⁷Ma'kadam Puang Yesus naua: "Tä' daka tia sapulo tau dipabono'? Umba hi kaseha?¹⁸Akanna angga hi mesa tau ma'pasule umpa'kasallei Puang Allataala? Taianna polepi to Yahudi!"¹⁹Mane ma'kadai Puang Yesus lako indo tau naua: "Ke'de'ko ammu le'ba'. Bono'ungko aka unkatappa'ia'."

Diona kasuleanna Puang Yesus ma'penduanna

17:20-37

Mat. 24:23-28, 36-41

²⁰Sanaka-naka to illaam kakalebuanna Parisi mekutana lako Puang Yesus naua: "Pihampi la umpalako kapahentaanna Puang Allataala?"

Natimba' naua: "Tä' deem tanda la diita ke umpalakom kapahentaanna Puang Allataala.²¹Dadi tä' deem tau la ma'kada naua: 'Maiko petua'i, indennä!' battu haka la naua: 'Dipennä!' Aka ma'pahentam tia Puang Allataala illaam alla'-alla'mua'."††

²²Puhai, ma'kadam Puang Yesus lako passikolanna naua: "Dako' la deem wattunna mohäekoa' la muita Änä' Mentolino moi podo sangngallom, sapo' tä' mala la muitaa'.²³Dako'i too nauammokoa' tau: 'Petua'i,

††17:21 illaam alla'-alla'mua': mala duka' dipekalembasam diua: Aka setonganna ma'pahentam tia Puang Allataala illaam kalemu' si mesa-mesa.

indennä!' La deem toi muuai: 'Dionnä!' Sapo' daa umpehingngii! ²⁴Aka kasuleangku to disangai Änä' Mentolino la naissam asam ingganna hupatau aka la sihhapam liu tikiäna kila' yabo langi' mengkalao illaam mata allo sule sau' katampusam pangkähhäna. ²⁵Sapo' la kusi'dim yolo ma'hupa-hupa pandahhaam anna la natumpu pala'ä to tubo lapi' temo.

²⁶Aka umba susi dadi indo anna wattu' Nuh, la susim too duka' wattu' kasuleangku to disangai Änä' Mentolino. ²⁷Wattu eta too ingganna hupatau illaam inde lino ma'masannam-sannam mangngande mangngihu', siala-ala, anna ma'pasiala sule lako wattu' mentama kappala' Nuh. Iya pissananna ham bussu uwai untallanni issinna lino.

²⁸Susi siam too duka' indo anna wattu' Lot, eta too ingganna hupatau anggam mangngande, mangngihu', mangngalli, ma'balu', mantanam, anna ma'pake'de' banua. ²⁹Sapo' messubunna Lot illaam mai kota Sodom, iya tuhummi api sola susi dama' ditunu yabo mai langi' muä'bäi indo tau buda. ³⁰La susim too duka' kasuleangku to si disangai Änä' Mentolino.

³¹Allo eta too to dio sulibam banua tä'um la tama banua muala pahuhunna. Susi duka' to dio bela' tä'um la ma'pasule lako banuanna. ³²Pengkilalaila' indo puha dadi lako bainena Lot!††

³³Menna-menna anggam katuboam bätä puntinna nabumbu', tau ia too tä' ia la ullambi' katuboam sule lako salako-lakona. Sapo' menna-menna ahu' umpellei katuboam bätä puntinna, la

da'da' liu ia katuboanna. ³⁴Katappa'ia', illaam indo bengi kasuleangku maka' deem dua tau mamma' yabo petindoam, iya mesa la dipasola lao anna mesa la dipatohho. ³⁵Susi toi ke deenni dua baine mahassam manggilim, mesa la dipasola lao anna mesa la dipatohho. [†³⁶La susi siam too duka' ke deenni dua tau mahassam mengkähä dio bela'na, iya mesa la dipasola lao anna mesa la dipatohho.]†

³⁷Iya mekutanam indo passikolanna Puang Yesus naua: "O Debata, umba ngei la dadi itim?"

Natimba' Puang Yesus naua: "Umba-umba naongi bakke, etam too duka' naongi dassi peande bakke ma'tombom."††

Pehapangam diona to balu-balu baine anna to mahhotto'

18:1-8

18 Puhai ia too, muala oom mesa pehapangam Puang Yesus umpa'guhu passikolanna naua: "La bassa' liukoa' ma'sambajam, anna tä'koa' la kattu hannu. ²Aka hapanna illaam mesa kota deem mesa to mahhotto' tä' unkahea' Puang Allataala anna umpa'pa'dei hupatau. ³Illaam indo kota deem mesa to balu-balu baine pembudam sule umpellambi'i indo to mahhotto' nauaam: 'Kela mala umpopataloä' lako indo balingku.'

⁴Padam säena naolaam indo baine napelau anna malai napamoloi, sapo' moka liu indo to mahhotto'. Sapo' katampasanna napikki' naua: 'Moi anna tä'ä' unkahea' Puang Allataala anna umpa'pa'dei' hupatau, ⁵sapo' naganggu

††17:32 Indo bainena Lot messaile aka maelo' umpetua' indo puha napellei illaam kota Sodom. Iam too anna napadadim Puang Allataala sia. Kad. 19:26.

††17:37 *Umba-umba naongi bakke, etam too duka' naongi dassi peande bakke ma'tombom:* Inde tula' madomi' mesa tula'na tomatuanna to Yahudi naala pehapangam Puang Yesus. Kalembasanna, maka' sulem Puang Yesus la naissam asam tau.

liuä' indo to balu-balu baine, iya dotam kupopatalo. Aka maka' tää', la sule liuä' nahahu'."

⁶Puhai umpalao indo pehapangam, iya nauam Puang Yesus Debatanta: "Paillaam penaba manappaia' tula'na indo to mahhotto' tä' malolo! ⁷Tä' daka tia duka' Puang Allataala la umpopat-alo hupatau to napilei to tontä liu melau allo anna bengi? La napa'lembe-lembei haka tia umpamoloi tau ia too? ⁸Kutulasangkoa', la masimpammi napopat-alo tau ia too. Sapo' maka' sulemä' to disangai Änä' Mentolino, la deempaka to unkratappa'ia' kulambi' illaam inde lino?"

**Pehapangam diona to illaam
kakalebuanna Parisi
anna tuam passima**

18:9-14

⁹Napahuai duka' Puang Yesus pehapangam lako to ussanga kalena mapia gau' anna umpa'pa'de solana ¹⁰naua: "Deem dua tau le'ba' lako Banua Debata la ma'sambajam. Mesa to illaam kakalebuanna Parisi anna mesa tuam passima. ¹¹Indo to illaam Parisi ke'de' anna ma'sambajanni illaam penabanna naua: 'O Puang Allataala, ma'kuhhu' sumanga'ä' matim aka tä' kao susiä' tau senga' umpogau' ma'hupa-hupa kakadakeam susinna: muakkalanni aka-akanna solana anna malai naala, ma'gau' sengko', anna ullullu' pa'bannetauam. Anna tä' tooä' susi inde tuam passima. ¹²Anna puasaä' penduam saminggu anna kubaba bahe sapulona pallolongangku kupehumalasang dio olomu.'

¹³Sapo' indo ia tuam passima ke'de' mambela tukku-tukku napasindum umbusu'-busu' buana aka untihokongam

gau' kadakena naua: 'O Puang Allataala, kamaseiä' aka mesaä' to madosa.'"

¹⁴Puhai umpalao indo pehapangam, iya nauam Puang Yesus: "Kutulasangkoa' tappana ma'pasule lako banuanna indo to illaam Parisi, tä' napomalolo Puang Allataala. Sapo' indo tuam passima, napomalolo ia Puang Allataala. Aka menna-menna ussanga-sanga kalena la napomadio Puang Allataala, sapo' menna-menna umpopengkadio kalena la napomatande ia Puang Allataala."

Puang Yesus untamba' änä'-änä'

18:15-17

¹⁵Pissam wattu sule sanaka-naka tau umbaba änä'-änä' bahinni'na lako Puang Yesus anna mala natamba'. Sapo' tappana naita passikolanna, iya ungkeaha'im indo tau. ¹⁶Sapo' natambai Puang Yesus indo änä'-änä' mane ma'kadai lako passikolanna naua: "Päbäi mammi napellambi'ia' itim matim änä'-änä'. Daa ullabai, aka tau susim too itim matim la mendadi umma'na Puang Allataala illaam kapahentaanna.^{§§} ¹⁷Aka kutulasangkoa', setongam-tonganna, menna-menna tä' susi änä'-änä' untahima kapahentaanna Puang Allataala, tau ia too tä' la mendadi umma' petauanna."

**To makaka mapahhi'
mendadi umma' illaam
kapahentaanna Puang Allataala**

18:18-30

¹⁸Mesa pepungngu'na to Yahudi mekutana lako Puang Yesus naua: "O Tuangguhu to mapia gau', aka la kupogau' anna malaä' ullambi' katuboam sule lako salako-lakona?"

§§18:16 Mat. 18:2-4.

¹⁹ Natimba' naua: "Akanna muuaännä' to mapia gau'? Tä' deem mesa tau la mapia gau' sulibanna Puang Allataala. ²⁰ Mannassa muissammi ingganna pahentana Puang Allataala naua: 'Daa ul-lullu' pa'bannetauam, daa umpapateam, daa umpaboko, daa ussa'bi tatappa' diona padammu hupatau, pa'kasalleiko indomu sola ambemu.'"^{*}

²¹ Iya natimba'um indo tau naua: "Kutuhu'i asammi pahenta ia too mengkalao bahinni'ku."

²² Tappana nahingngi Puang Yesus tula'na, iya nauaammi: "Deempi mesa tä' umpogau'. Balu' asanni ingganna kullemu anna untabaanni to mase-mase allinna. Aka maka' umpateem, iya la muampuammoko too kulle yabo suhuga. Puhai too, iya sulengko pole' untuhu'ä'."

²³ Sapo' nahingnginna indo tula' ia too, tä' deem pada samasussa penabanna aka mesa to sugi'. ²⁴ Naitanna Puang Yesus tä' deem pada samasussa penabanna, iya ma'kadam naua: "Tä' deem pada samapahhi' to buda kullena la mendadi umma'na Puang Allataala illaam kapahentaanna. ²⁵ Aka madomi' leko'um ia mesa unta muola tama tottä'na dahum, anna la mesa to makaka la mentama kapahentaanna Puang Allataala." ²⁶ Ingganna tau to uhhingngi tula'na Puang Yesus sangngim ma'kada naua: "Maka' susi, iya menna bäbä hi umbai' la mala dipasalama?"

²⁷ Iya natimba'um Puang Yesus naua: "Nakapusa'i ia hupatau diona to la mala dipasalama', sapo' tä' Ia nakapusa'i Puang Allataala."

²⁸ Iya ma'kadam Petrus naua: "Kitam-peammi kami' dapo'ki aka kituhu'ko!"

²⁹ Natimba' Puang Yesus naua: "Kutulasangka', setongam-tonganna menna-menna untampeam banuanna,

battu haka baina, solasubunna haka, tomatuanna haka, battu haka änä'na aka manuhu' lako kapahentaanna Puang Allataala, ³⁰ tau ia too la dibala'iam tiluppi'-luppi' illaam inde lino. Anna illaam wattu la sule la untahima katuboam sule lako salako-lakona."

Kapentallunna Puang Yesus untula' diona la kamateanna

18:31-34

³¹ Iya untambaim indo sapulo dua passikolanna Puang Yesus anna ia mandi napa'tula'i naua: "Inde tentomai la längämmakia' Yerusalem, anna ingganna indo to puha nasuha' ingganna nabi diona Kao to disangai Änä' Mentolino tä' mala tala sule lako. ³² Aka la nabehoä' lako to tamuissam Puang Allataala anna la natelleä' anna natunai. La nasitikkudu-kuduiä' anna nadahha lambi' napateiä'. ³³ Sapo' illaam allo katallunna la dipatibangonnä' sule." ³⁴ Tula' ia too tä' natama akkalanna passikolanna aka tibunipi kalembasanna, nasuhum tä' naissam tungka batunna indo tula'na.

Puang Yesus umpabono' to buta

18:35-43

Mat. 20:29-34; Mrk. 10:46-52

³⁵ Tappana la landa' kale Puang Yesus lako kota Yerikho, iya deemmi mesa to buta muokko' dio bihim lalam kapelaulau. ³⁶ Tappana uhhingngi indo tau buda liu dio ampe'na, iya mekutanam naua: "Aka hia anna budai tau?"

³⁷ Natimba'im indo tau buda naua: "Liu Puang Yesus indo to Nazaret."

³⁸ Iya metambam indo to buta naua: "O Yesus, peampoanna tomahaja

* 18:20 Pass. 5:16-20.

Daud, kamaseiä' kao!"[†] ³⁹Sapo' nakuapai hi indo to mendiolo nua: "Pengkamma'ko!" Sapo' tuttuam napekasallei mandi metamba nua: "O peampoanna Daud, kamaseiä' kao!" ⁴⁰Tappa tohho siaham Puang Yesus anna ussui tau lao untette indo to buta napasola sule. Tappana sule, nakutanaim ⁴¹nua: "Aka umpohäe la kupogausangko?"

Natimba'um nua: "O Tuam, maelo' punalää' duka' la paita."

⁴²Iya ma'kadam Puang Yesus nua: "Paitangko! Bono'ungko aka unkatappa'ia'." ⁴³Iya paita siahanni lambi' untuhu' Puang Yesus napasindum umpa'kasallei Puang Allataala. Tappana naita tau buda bono'um indo to buta, sangngim umpa'kasallei duka' Puang Allataala.

Puang Yesus anna Zakheus

19:1-10

19 Mentamai kota Yerikho Puang Yesus, iya mellao tahu'um muola indo kota ia too. ²Illaam indo kota deem mesa punggabana tuam passima tä' deem pada satomakaka isanga Zakheus. ³Napemulu duka' la muita Puang Yesus, sapo' tä' mala aka patalo budanna tau, la'bi-la'binna mesa to mahempo. ⁴Iya kumondäm umpendiolo tau buda anna unteka'i mesa kaju ara aka nua: "Anna malaä' duka' muita Puang Yesus ke lium."

⁵Tappana nalambi' Puang Yesus indo kaju ara, iya natongaim längäm anna

napa'kadai nua: "O Zakheus, pasihha'i tuhum aka la pahalluä' tohho dio banuammu temo." ⁶Nakandi'i siaham duka' tuhum Zakheus anna untahimai Puang Yesus illaam banuanna sola naponnoi katilallasam.

⁷Ingganna tau to muitai ma'naum-naum lambi' ma'kada nua: "Uuu, akanna naaku'i tohho dio banuanna to madosa?"

⁸Iya ke'de'um Zakheus anna umpa'tula'i Puang Yesus nua: "O Tuam, bahe duanna kulleku la kupa'kamaseam lako to mase-mase. Anna lako to puha kupalängängam bäbä simanna, la kupasuleam pengngappa' tiluppi'."

⁹Natimba' Puang Yesus nua: "Allo temo nalambi'um kasalamasam issinna inde banua. Aka iko duka' ullombungangko kamatappasanna Abraham.[‡]

¹⁰Aka Kao to disangai Änä' Mentolino suleä' umpeä anna la umpasalama' ingganna to bulim."

Pehapangam diona doi' bulabam

19:11-27

Mat. 25:14-30

¹¹Mahassam liupi indo tau buda umpehingngii tula'na Puang Yesus, iya umpalao oom pehapangam diona kapahentaanna Puang Allataala. Aka wattu eta too diom sikhuku' Yerusalem Puang Yesus anna nasanga tau kapahentaanna Puang Allataala la bale' napalakom illaam inde lino susi tomahaja lino ma'pahenta. ¹²Iya ma'kadam Puang

[†]18:38 *peampoanna tomahaja Daud*: Indo anna ma'kadai indo to buta muuaam Puang Yesus: *O peampoanna tomahaja Daud*, indo kada ia too naissam asam to Yahudi napekalembasam nua: *Mesias batu diua To nalanti' Puang Allataala napa'kadai*. Aka indo to Yahudi umpemmitai liu Mesias pessubunna Daud la sule umpabono' ingganna to masaki anna la ma'pahenta umba susi tomahaja Daud ma'pahenta yolona (Puj. 89:3-37; Yes. 35:5-6).

[‡]19:9 *ullombungam kamatappasanna Abraham*: Indo dituli' illaam basa Yunani, nua ia ke basa Bambanni: *iko duka' pessubunnako Abraham*. Ingganna tau to unkatappa'i Puang Allataala disangai pessubunna Abraham. Aka Abraham ambena ingganna to matappa' (batai Rm. 4:12).

Yesus naua: “Deem mesa änä' puä la le'ba' lako botto mambela dilanti' mendadi tomahaja mane ma'pasulei. ¹³La mengkalaoi, untambaim sapulo sabua'na anna natabai sanda si mesa doi' bulabam^f anna nauaanni: ‘Popembea'ia' inde doi' sule lako ma'pasuleä'.’

¹⁴Sapo' buda tau illaam indo botto ungbassii la napotomahaja. Iya, lessu'na indo änä' puä, ussuam tau lao lako indo to la naongei dilanti' nauaam: ‘Inde tau tä' kipohäe la kipotomahaja.’

¹⁵Sapo' dilanti' siam mendadi tomahaja mane ma'pasulei lako bottona. Sulei, untambaim indo sapulo sabua'na aka la sule natulasam sanaka amom pallolonganna. ¹⁶Iya sulem mesa indo sabua'na anna ma'kadai naua: ‘O tuam, indo mesa doi' bulabam umbeennä', iya kupopembea'um lambi' mala tiluppi' sapulo.’

¹⁷Natimba' indo puäna naua: ‘Mapia! Abana si'da sabua' mapiako. Malako dikatappa'i umpalako kaha-kaha bahinni' nasuhum temo la kuäkä'ko la umpahenta sapulo kota.’

¹⁸Puhai, iya sulem duka' indo sabua' kaduanna anna ma'kadai naua: ‘O tuam, indo mesa doi' bulabam umbeennä', iya kupopembea'um lambi' mala tiluppi' lima.’

¹⁹Ma'kada oom indo puäna naua: ‘La kuäkä'ko la umpahenta lima kota.’

²⁰Puhai, sule oom mesa indo sabua'na anna ma'kadai naua: ‘Indo doi' umbeennä', indem. Kuanna kuputu' sampim. ²¹Aka kukahea'ko anu' kuissam kuua mesako to makahha'. Si muala bäbä indo taiko muampuanni anna si umpuppu' bäbäko tanangam moi anna taiko untananni.’

²²Iya nauam indo puäna: ‘Iko mesako sabua' kadake gau! Dadi indo siam tula'mu la umpopetahungkungko. Aka

muissammi le' muua kao mesaä' to makahha' si muala bäbää' indo takao muampuanni anna si umpuppu' bäbää' tanangam moi anna takao untananni. ²³Iya akanna tä'i umbeem inde doi' lako to si umpakeänä' doi', anna mala kutahima sitonda änä'na ke suleä'?’

²⁴Mane ma'kadai indo tomahaja lako indo tau sikadehe nauaam: ‘Alai itim doi' anna umbeem polepi lako indo to muampuam sapulo doi' bulabam.’

²⁵Sapo' sangngim mentimba' indo tau naua: ‘Tuam, kisanga sapulom ia doi'na!’

²⁶Natimba' indo tomahaja naua: ‘Kutulasangkoa', menna-menna mala dikatappa'i umpalako indo puha dibeem, tau ia too la dihängänniam polepi. Sapo' menna-menna tä' mala dikatappa'i umpalako indo puha dibeem, iya la diäläi pissam ia lao illaam mai kalena.

²⁷Anna temo baba asannia' mai itim balingku to moka umpotomahajaä'. Patei asannia' dio oloku.’”

Puang Yesus dipa'kasallei anna dipakahoa' kasuleanna tappana la umpenandai Yerusalem

19:28-40

Mat. 21:1-9; Mrk. 11:1-10; Yoh. 12:12-15

²⁸Puhai ma'tula' Puang Yesus, le'ba'um umpendiolo'i indo tau buda lu längäm Yerusalem. ²⁹Tappana umpenandai tondä' Betfage anna tondä' Betania dio Tanete Zaitun, iya ussuam dua passikolanna mendiolo ³⁰naua: “Pendiolo' lako dio tondä' tapenandaia'. Aka sulekoa' too lako, iya ullambi'unna' mesa keledai lundaha disäke' lombe', tadeempi disäkei. Bukkaia' anna umbabaia' dio mai. ³¹Anna maka' too deengkoa' ungbutanai naua: ‘Akanna umbukkaia'?’ uaanni: ‘Aka napahalluam Debata.’”

^f19:13 doi' bulabam: Mesa doi' bulabam pada angga'na sapulo bidä.

³²Iya le'ba'um indo to dua, sampe nalambi' si'da umba susi indo puha natula' Puang Yesus. ³³Mahassanni nabukkai indo keledai, ma'kadam puäna naua: "Akanna umbukkaia' itim keledai?"

³⁴Natimba'im naua: "Aka napahal-luam Debata."

³⁵Iya nababam indo keledai lako Puang Yesus. Sulei lako, muäläiim jubana anna nalapi'ianni indo keledai, mane muäkä'i Puang Yesus längäm. ³⁶Mahassanni mellao ussäkei indo keledai, iya budam tau muäläi jubana anna naampa'i lako lalam la naolanna Puang Yesus tanda pa'pakasallena.

³⁷Tappana la landa' kale lako Yerusalem Puang Yesus dio indo lalam yabo mai Tanete Zaitun, iya napahandu'um sikatamba indo buda passikolanna umpa'kasallei Puang Allataala ponno katilallasam aka puham muita buda tanda memängä-mängä nakähä Puang Yesus. ³⁸Naua:

"Katambasam tomahaja to sule illaam sanganna Debata!

Masannammi pole' yabo suhuga.

Dipa'kasallei To yabo ongeam handam matande!"

³⁹Sanaka-naka to illaam kakalebuanna Parisi illaam indo alla'-alla'na tau buda ma'kada naua: "O Tuanguhu, popengkamma'i inde lako passikolammu!"

⁴⁰Natimba' Puang Yesus naua: "Tää', aka kutulasangkoa', maka' la mengkamma' inde mai tau, iya inde mai batu la sikatamba!"

Puang Yesus ussahhoi Yerusalem

19:41-44

⁴¹Tappana undundu lako Yerusalem Puang Yesus anna napahandammi

indo kota, iya nasahhoim ⁴²anna ma'kadai naua: "Oa' to Yerusalem pidaha kela muissanna' allo temo lalanna tungka kamasannangam. Sapo' temo tä' mala muita aka tibuni lako kalemua'. ⁴³La deem wattunna sule balimmu umbundu'koa'. Iya la natampoi tembo' kotamu anna naolai naleboko' nasikuku'i. ⁴⁴La napempa'deangkoa', susi issinna teem kotamu lambi' tä' deem mesa batu la tiäto' dio ongeanna. La dadi ingganna ia too aka tä' muissanna' muua wattunnam temo napellambi'ikoa' Puang Allataala."

Puang Yesus uhhambai lao to sibalul-balul illaam Banua Debata

19:45-48

Mat. 21:12-13; Mrk.

11:15-18; Yoh. 2:13-16

⁴⁵Puhai ia too, le'ba'um Puang Yesus tama pa'hanteanna Banua Debata. Sulei tama, tappa uhhambai siaham lao ingganna to si balul-balul illaam. ⁴⁶Anna mane umpa'tula'i indo tau buda naua: "Deem tisuha' illaam Battakada Debata naua:

'Banuangku la naongeti hupatau ma'sambajam,§

sapo' umpadadi hia' iko pa'mesaanna pa'bulele kalasi anna pa'tombonganna to maboko allo."

⁴⁷Allo-allo ma'pa'guhu Puang Yesus illaam Banua Debata. Ingganna kapala sando sola to ullatta' Pepaondonganna Musa anna pepungngu'na to Yahudi sangngim maelo' la napatei, ⁴⁸sapo' tä'pi deem naita lalanna la mala napatei, aka ingganna tau buda lu lako asam penabanna tula'na Puang Yesus.

§19:46 Yes. 56:7.

**Pekutanaam diona
kakuasaanna Puang Yesus**

20:1-8

Mat. 21:23-27; Mrk. 11:27-33

20 Pissam wattu ma'pa'guhu oom Puang Yesus illaam Banua Debata lako tau buda untula' anna umpa'pakahebaam Kaheba Katilallasam. Iya sule ham sanaka-naka kapala sando anna to ullatta' Pepaondonganna Musa sola matua ulunna to Yahudi umpellambi'i ²anna nauai: "Tulasangkanni aka umpolalam anna umpogau'i inde mai ingganna pa'pogausam, anna menna umbeengko kakuasaam?"

³Sapo' natimba' naua: "La kuku-tanaikoa' duka! Tulasannä', ⁴menna umbeenni kakuasaam Yohanes anna si mantedo'i? Puang Allataala haka hupatau haka?"

⁵Iya sipa'tula'-tula'um naua: "Mapahhi' la ditimba'i, aka taua hia' manii: 'Kakuasaanna Puang Allataala,' iya la nauaammakia' too: 'Akanna tä'ia' ungtappa'i?' ⁶Iya la taua hia' manii: 'Kakuasaanna hupatau,' la naleba'ingkia' too batu inde lako tau. Aka indo Yohanes, nakatappa'i asam tau naua: 'Abana mesa nabi.'"

⁷Iya natimba'im naua: "Tä' kiissam menna amo umbeenni kakuasaam Yohanes."

⁸Nasuhum naua Puang Yesus: "Maka' susi, iya tä' duka' kuaku la kutulasangkoa' menna umbeennä' kakuasaam nasuhum kupogau' kaha-kaha ia too."

**To kasallena to Yahudi dipasihhagam
to untesam bela' anggur**

20:9-19

Mat. 21:33-46; Mrk. 12:1-12

⁹Puhai ia too, untula' oom mesa pehapangam Puang Yesus lako indo tau buda naua: "Deem mesa tau untananni bela'na anggur. Puhai natananni, iya napa'petesangammi lako sanaka-naka tau anna mane le'ba' lako botto mambela anna dioi masäe. ¹⁰Tappana naagiam la matäsä' indo bua anggurna, iya ussua mesa sabua'na le'ba' umpellambi'i indo to mantesanna, aka la natahi-maam bahena. Sapo' sulei lako, iya ke natembe' puso hia indo to mantesam mane nasuai ma'pasule ma'pala' lo'bä. ¹¹Iya ussua pole oom mesa sabua'na le'ba' pole lako indo to mantesam. Sapo' sulei lako, natembe' puso pole boom anna napakasih'i-sih'i, mane nasuai lao ma'pala' lo'bä. ¹²Iya ussua pole oom sabua'na katallunna, sapo' napongko pole boo mane natibei lako sulibanna bela'.

¹³Iya ma'kadam indo puäna bela' naua: 'Aka opi umbai' la kupogau'? O, la kusua änä' pangkaha'ku aka tä' mala tala nakalaja' ia pole.'

¹⁴Sapo' naitanna indo to mantesam sule indo änä'na, iya sipattuju-tujum naua: 'Iam too inde to la ullombum kul-lena tomatuanna. Tapateia' anna mala taalaa' inde bela'na.' ¹⁵Nabalesom illaam mai indo bela' mane napatei."

Iya mekutanam Puang Yesus naua: "Akam la napogau' indo puäna bela' ke sulem? ¹⁶Tä' mala tala lao napempa'deam indo to mantesanna anna napa'petesangam polei indo bela'na lako tau senga'."**

**20:16 Petua' dioi pemasiä'na Mat. 21:33-41.

Nahingginna indo tau buda, tappa ma'kadam lako Puang Yesus naua: "Tä' si'da-si'da ia pole' la mala susi!"

¹⁷Nalio-liom Puang Yesus indo tau buda mane ma'kadai naua: "Maka' susi, iya aka kalembasanna indo tula' puha tisuha' illaam Battakada Debata naua:

'Indo batu natibe tukam, ia leko' di diala dipobatu longkahhim?'"††

¹⁸Anna ingganna tau to metobä dokko indo batu la huppu'-huppu' bukunna, anna menna-menna natappai indo batu la dahi kapu.'‡‡

¹⁹Tappana nahinggi ingganna to ullatta' Pepaondonganna Musa sola kapala sando indo tula'na Puang Yesus, iya nauaim: "Kitaa' päläe' napasihim." Iya umpeäim lalam anna malai ussakka Puang Yesus eta too, sapo' sangngim mahea' ohi lako tau buda.

**To Parisi umpalilingam tangnga'
Puang Yesus umpake pekutanaam
diona pamajasam sima**

20:20-26

Mat. 22:15-22; Mrk. 12:13-17

²⁰Ingganna indo to ullatta' Pepaondonganna Musa sola kapala sando umpeä liu lalam anna mala ussakka Puang Yesus. Iya ussuam sanaka-naka tau lao napellambi'i, mato-mato tau mapia la mekutana lako Puang Yesus anna ke napeä hia lalanna umba ke malai napetidom anna mala nasakka anna nabehoi lako pala' limanna gubernur. ²¹Ma'kadam indo to disua lako Puang Yesus naua: "O Tuangguhu, kiissam kiua tula'mu anna

pepa'guhuammu malolo asam. Kiissam toi duka' kiua umpepatuduangko ulalanna Puang Allataala sola undu' lollä lako ingganna hupatau, aka moi Iko menna tala ungalaja'i aka umpapada-pada bäbäko Iko hupatau. ²²Dadi, deem la kipekutanaam: situhu' peadasam tapendudunna', la sipäto' dakika' umbaja' sima lako tomahaja dio Roma, la tä' daka?"

²³Sapo' nalosa Puang Yesus pudu' pandenna anna lila manähäna lambi' ma'kada naua: ²⁴"Paitaipä' mesa doi' peha'!" Naitai, iya mekutanam naua: "Menna kegamba' anna menna kesanga inde dio doi?"

Iya natimba'im naua: "Gamba'na anna sanganna tomahaja dio Roma."

²⁵Iya nauam Puang Yesus: "Maka' susi, iya beennia' tabana tomahaja dio Roma la sipäto'na umbeem, anna beennia' duka' Puang Allataala la sipäto'na umbeem."¶¶

²⁶Iya tä' deem tula'na Puang Yesus la mala napetidom dio olona tau buda, lambi' sangngim mengkamma' mandam tä' naissam mentimba' aka pilla' uh-hingngii pentimba'na.

**To illaam kakalebuanna Saduki
umpekutanaam diona
katuboanna sule to mate aka
umpasändä'i Puang Yesus**

20:27-40

Mat. 22:23-33; Mrk. 12:18-27

²⁷Puhai ia too, iya sulem sanaka-naka to illaam kakalebuanna Saduki battu diua to tä' unkatappa'i katuboanna

††**20:17** *batu natibe tukam:* Puang Yesus diuam aka Ia handam napa'bahinni'i to Yahudi, sapo' ma'katampasanna ia leko' di handam keangga' illaam kapahentaanna Puang Allataala. Puj. 118:11.

‡‡**20:18** Puang Yesus dipasihhapam indo batu. Kalembasanna, menna-menna untumpu pala' Puang Yesus la dipasihhapam to dihuppu'-huppu' bukunna lambi' tä'um ia deem la ullambi' katuboam.

¶¶**20:25** Petua' dioi pemasiä'na Mat. 22:21.

sule to mate umpellambi'i Puang Yesus, ²⁸anna nakutanai naua: "O Tuangguhu puhangkia' nasuhasam Musa illaam suha' pepaondonganna naua: 'Maka' deem mesa muane mate anna tä'i deem änä'na, iya indo siam solasubunna la umpobainei indo baina, anna mala deem pessubunna.' ²⁹Iya la maakam ia susi indee: aka pissam wattu deem pitu muane ma'solasubum. Uhuna kebaine indo handam ulua. Sapo' tä'pi deem änä' nasibalii indo baina anna matem indo muane. ³⁰Iya napobainem huntunna indo baina, sapo' tä' pole oo keänä' lambi' mate. ³¹Iya napobaine pole oom indo katallunna, sapo' susi pole oo sule lako kapitunna sangngim tä' deem keänä' anna matem. ³²Katampasanna, mate duka' indo baine. ³³Dadi, maka' lambi'um wattunna la tubo sule to mate, iya mennannam kabam la napomuane indo baine, aka bali asam di napomuane indo to pitu ma'solasubum?"

³⁴Natimba' Puang Yesus naua: "Ingganna to tubo illaam inde lino temo siala-ala anna ma'pasiala. ³⁵Sapo' dako'i too ingganna to tihekem la sipäto' dipatibangom dio mai kamateanna anna mangngala taba illaam lino bakahu, tä'um tia deem la siala anna tä' toi deem ma'pasiala. ³⁶Aka indo katuboanna la susim malaika', tä'um la mate. Mendadim änä'na Puang Allataala aka puham napatibangom dio mai kamateam. ³⁷Mannassa anna dipatibangonni sule to mate dio mai kamateam aka puha napatandaam Musa illaam tulasanna diona indo api ma'nala-nala illaam sato' kaju-kaju.

Eta too ma'tula' Debata naua: 'Kaom too inde Puang Allataala to napenombai Abraham, Ishak, anna Yakub.' ³⁸Dadi moinna anna puham mate indo to tallu, sapo' mannassa anna tuboi temo aka anggam to tubo mala umpenombai Puang Allataala. Aka situhu' Puang Allataala, ingganna hupatau tubo liu, moi anna matem."

³⁹Iya ma'kadam sanaka-naka to ullatta' Pepaondonganna Musa lako Puang Yesus naua: "Tappa' pentimba'mu, Tuangguhu!" ⁴⁰Lessu'na eta too, tä'um pole' deem tau la bahani umpadeem pole pekutanaam lako Puang Yesus.

Diona kasilombunganna Puang Yesus anna tomahaja Daud 20:41-44

Mat. 22:41-46; Mrk. 12:35-37

⁴¹Iya mekutanam Puang Yesus naua: "Maaka hia anna diuai 'Indo To nalanti' Puang Allataala la mepasalama' peampoanna tomahaja Daud?'^{§§} ⁴²Iya ma'kale hi Daud umpokadai illaam suha' Pampujiam naua:

'Ma'kada Puang Allataala lako Debatangku naua:*

Okko'ko dio tandai kanangku,

⁴³sule lako wattunna la kupopa'bukku ingganna balimmu dio olomu lambi' uhhondoi dokko.'†

⁴⁴Dadi makaleso anna ma'kalei tomahaja Daud muuai: 'Debatangku To nalanti' Puang Allataala.' Iya maaka hi susi anna la ia ohi umpoampoi?"

§§**20:41** *To nalanti' Puang Allataala la mepasalama' peampoanna tomahaja Daud:* Naisam asam to Yahudi naua la pessubunna tomahaja Daud indo to la nalanti' Puang Allataala masäem napemmitai.

***20:42** *Debatangku:* To dilanti' la mepasalama' diuaam, battu diua Mesias.

†**20:43** Puj. 110:1.

**Puang Yesus umpakahi'di
passikolanna indana napabulinni to
ullatta' Pepaondonganna Musa**

20:45-47

Mat. 23:5-7; Mrk. 12:38-40

⁴⁵ Mahassampi napehingngii tau buda tula'na, iya ma'kada pole oom Puang Yesus umpa'tula'i passikolanna naua: ⁴⁶ “Majagako' lako to ullatta' Pepaondonganna Musa indana napabulingko'. Aka anggam napohäe ma'lao-lao tama pasa' ma'baju tihui' anna maelo' napa'kasallei hupatau. Anna si moka muokko' illaam pa'sambajangam ke tä'i dio olo, anna si umpise'i toi ongeam dipa'kasalleinna ke illaanni pa'hame-hameam. ⁴⁷ Anna si umpamasingam tula' to balu-balu baine lambi' sule lako banuanna naala. Si naägä'i umpakalando sambajanna anna mala nauaam tau: ‘Tau mapia’ anna ke tau kadake hia. Nasuhum la nalambi' pesämbä' mabanda'na Debata.”

**Bua pemala'na mesa to
balu-balu baine mase-mase**

21:1-4

Mrk. 12:41-44

21 Tappana mennenne' Puang Yesus illaam indo Banua Debata, iya muitam buda to makaka umpatama patti pehumalasang bua pemala'na. ² Naitam duka' mesa to balu-balu baine anna mase-mase polepi umpatama dua ia doi' gällä handam saidi' angga'na. ³ Iya ma'kadam Puang Yesus naua: “Kutulasangko', buda puha ia bua pemala'na inde to balu-balu baine anna la ingganna tau senga'. ⁴ Aka inde lako tau la'binna ia kullena napatama. Sapo' inde ia to balu-balu baine moi anna mase-mase, nape-beem asam ia indo deenna lako kalena, moi anna anggam ia la napotubo.”

Banua Debata la ditaleam

21:5-6

Mat. 24:1-2; Mrk. 13:1-2

⁵ Deem sanaka-naka tau untula' diona Banua Debata naua: “Tä' deem pada samapia aka dibunga-bungai buda batu maleke anna dibunga-bungai buda baham-baham dipehumalasang längäm Puang Allataala.” Iya ma'kadam Puang Yesus ⁶ naua: “Dako'i too la deem wattunna ingganna inde muitaa' temo tä' deem moi podo la mesa batunna la tiäto' liu sitodo' solana, aka pissam wattu la ditaleam asam.”

Kamasussaam anna pandahhaam

21:7-19

Mat. 24:3-14; Mrk. 13:3-13

⁷ Puhai ia too, mekutanam passikolanna lako Puang Yesus naua: “O Tuanguhu, tulasampakam piham la dadi ingganna indo puha untula' ingngena'? Anna aka la tandana anna diissanni diua lambi'um wattunna la dadi?”

⁸ Natimba' Puang Yesus naua: “Majagako' indana deenni tau la umbaba bulingko!' Aka la buda too tau sule umboko sangangku anna la buda tau nababa bulim aka la naua: ‘Kaom too inde To nalanti' Puang Allataala;’ anna la naua toi: ‘Mahuku'um wattunna allo ma'katampasanna.’ Sapo' daa umpehingngiia'. ⁹ Maka' too uhhingngingko' kaheba diona passibundusam anna to sianu-anu, iya tä'koa' too la mahea' aka abana hi tia inna la dadi yolo kaha-kaha ia too. Sapo' taiapi indo allo ma'katampasanna.”

¹⁰ Mane napatahhu'i tula'na Puang Yesus naua: “Aka la sipate-patei hupatau anna kahajaam pada kahajaam la sibundu'-bundu'. ¹¹ Anna

umba-umba ngei ongeam la dadi lino' kasalle anna la sule kakobeam anna la kende' ma'hupa-hupa saki lele makahha'. La dadi ma'hupa-hupa tanda mepakahea'-hea'na anna mehäntäinna yabo mai langi'. ¹²Sapo' yolo anna la dadii kaha-kaha ia too, la disakkakoa' anna didahha. La dibabakoa' lako to mahhotto' illaam peadasam mane dipatamakoa' tahungkum. Anna la dibabakoa' lako olona tomahaja anna to ma'pahenta aka untuhu'ä'. ¹³Etanna' too la muongei mendadi sa'bingku dio olona hupatau. ¹⁴Sapo' pomanontonna' penabammu temo anna mala tä'koa' mahea' muua: 'Aka amom isanga la diua mentimba'?' ¹⁵Aka la kubeengkoa' tula' sola kakeakasam lambi' tä' deem moi podo la mesa balimmua' la nabela untimba'i tula'mu battu haka la nabahoi. ¹⁶Wattu eta too la dibehokoa' lako pala' limanna balimmu. La nabehokoa' tomatuammu, solasubummu, kasahapuummu, anna solamu lambi' deem la palla' penabanna umpopepateikoa'. ¹⁷Anna la nakabassikoa' ingganna tau aka untuhu'ä'. ¹⁸Sapo' moi la salamba' beluä'mua', tala deenni honno' sule lako olona Puang Allataala! ¹⁹La mentobekoa' manda' anna mengnganti matoto' illaam kamatappasam anna malakoa' ullambi' katuboam sule lako salako-lakona."

**Puang Yesus untula' diona la
katallanganna Yerusalem**

21:20-24

Mat. 24:15-21; Mrk. 13:14-19

²⁰"Maka' muitanna' kota Yerusalem natalibum tama sohodadu, iya muissammia' too muua tä'um masäe anna la dipempa'deammi kota ia too. ²¹Wattu eta too ingganna indo to dio Yudea pahallu la sikalumpa' längäm tanete.

Ingganna to tohho illaam kota la pahallu le'ba' umpellei indo kota, anna to sulibanna kota tä'um la tama kota. ²²Aka wattu iam too indo la naongei Puang Allataala umpabala'i gau' kadakena hupatau anna mala sule lako indo puha tisuha' illaam Battakada Debata. ²³Wattu eta too tä' deem pada sama-sussa lako baine to mahassam kebättä anna to ma'pasusu. Aka inde botto la nalambi' kamasussaam kasalle anna issinna la napahuai aha' kasallena Puang Allataala. ²⁴Buda to Yahudi la dipatei pa'dam dipake anna deem la disakka anna dibabai lako mobotto-bottoam. Anna inde kota Yerusalem la napa'lullu' tau taianna to Yahudi anna nakuasai sule lako wattu puha napa'tantu Puang Allataala."

Kasuleanna Änä' Mentolino

21:25-33

Mat. 24:29-35; Mrk. 13:24-31

²⁵Mane nauai: "La deem kende' tanda memängä-mängä yabo mata allo, bulam, anna ingganna bintä. Anna ingganna hupatau illaam inde lino la mahea' anna mängä-mängä muita bombanna le'bo' anna uhhingngi magahugunna uwai. ²⁶La tisittä' hupatau aka muita indo to la dadi lako lino. Aka ingganna issinna langi' la titähhä' bää. ²⁷Anna wattu eta too ingganna hupatau la naitää' to disangai Änä' Mentolino tuhum yabo mai langi' illaam gabum naponnoi kamatandeam taditondom anna naponnoi toi kakuasaam. ²⁸Maka' too nahandu'um dadi kaha-kaha ia too, iya ke'de'ungkoa' mentonga aka la dipasalama' kalengkoa'."

²⁹Mane untula'i pehapangam Puang Yesus naua: "Petua'ia' kaju ara anna kaju senga'. ³⁰Maka' kendaum häändä oom, iya la muissammia' too muua la bale' sulem kulla' kalando. ³¹La susim

too duka' ke muitanna' dadi asam indo puha kutulasangka', iya la muissammia' too muua la bale' umpalakom kapahentaanna Puang Allataala.

³²Setongam-tonganna, ingganna kaha-kaha ia too la dadi yolo anna mane mate asam ingganna to tubo lapi' temo. ³³Langi' anna lino la pa'de ke dako'i, sapo' kadangu ia, la da'da' liu sule lako salako-lakona."

Pepakahi'di diona kamajagaam

21:34-38

³⁴⁻³⁵Mane nauai: "Majaga manappakoa' indana angga umpasatutui penabammu lako kamahoasam di lino anna si umpamäbo' kalem, sola angga umpikki' anna uhususam salu katuboammu inde lino. Aka maka' susi, iya la lembe bäbäkoa' too, pissananna ham napatikkedu'koa' allo kasuleanguk umbasusi poja lu'bi' umpatikkedu' olo'-olo' nasakka. ³⁶Majagakoa' ammu pa'sambajam liu anna mala matoto'koa' muoloi ingganna indo kaha-kaha la dadi ke dako'i, anna mala ke'de'koa' dio oloku to disangai Änä' Mentolino."

³⁷Wattu eta too si ma'pa'guhu Puang Yesus illaam Banua Debata ke ialloi anna lu libam Tanete Zaitun ma'bengi. ³⁸Mebengngi' oi too, sule asam oom tau illaam Banua Debata umpehingngii Puang Yesus ma'pa'guhu.

Pattujunna to la umpatei Puang Yesus

22:1-2

Mat. 26:1-5; Mrk. 14:1-2; Yoh. 11:45-53

22 Tappana mahuku' allo kasalle Hoti Tä' Diboloi Bibi' Hoti battu diua allo Kalappasam,[‡] ²ingganna kapala sando sola to ullatta' Pepaondonganna Musa umpeä lalam la umpatei

buni Puang Yesus aka sangngim ungkaha' tau buda.

Pattujunna Yudas la umbalu' Puang Yesus

22:3-6

Mat. 26:14-16; Mrk. 14:10-11

³Iya napentamaim ia tomahajanna setam Yudas Iskariot mesa duka' to tihekem sapulo dua passikolonna Puang Yesus. ⁴Nasuhum le'ba' umpellambi'i sanaka-naka kapala sando sola sanakanaka punggabana to si unjagai Banua Debata anna sipattuju-tujui la naaka susi Yudas umbalu' Puang Yesus. ⁵Kattui pattujunna, iya sangngim tilalla'um lambi' ma'dandi la nasahoi doi'. ⁶Iya naioim duka' Yudas lambi' tappa umpeä wattu tala naissanna tau buda la naolaam umbalu' Puang Yesus.

Umpatoka kinande la umpengkilalai allo Kalappasam

22:7-13

Mat. 26:17-19; Mrk. 14:12-16

⁷Pissananna lambi'um allo kasalle Hoti Tä' Diboloi Bibi' Hoti indo si naongei to Yahudi untunu domba la diande illaam allo Kalappasam. ⁸Iya ussuum Petrus sola Yohanes Puang Yesus naua: "Laokoa' patoka indo kinande si diande ke umpengkilalai ongkia' allo Kalappasam."

⁹Iya mekutanam lako naua: "La umbakam ngei umpatoka indo kinande?"

¹⁰Natimba' Puang Yesus naua: "Maka' tamakoa' kota la sitammungkoa' too mesa muane umbaba busso kessi uwai. Tuhu'ia' lako banua naongei ¹¹anna muuaannia' indo to ma'banua: 'Naua Tuanguhu: umbasusi ngei tambim la kiongei mangngande kinande allo

[‡]22:1 *allo Kalappasam*: Petua' dioi pemasiä'na Mat. 26:2.

Kalappasam sola passikolangku?'
¹²La napaitaingkoa' too mesa tambim kalua' tando längäm deem asammi pangkakka' illaam. Etanna' too la muongei ma'patoka."

¹³Iya le'ba'um Petrus sola Yohanes, iya nalambi' si'da susi liu indo tula'na Puang Yesus. Iya napatokam indo kinande si diande illaam allo Kalappasam.

Pa'tosabeam sanda maseho

22:14-23

Mat. 26:20-29; Mrk. 14:17-25;

Joh. 13:21-30; 1Kor. 11:23-25

¹⁴Tappana lambi' wattunna, iya manggandem Puang Yesus sola indo sapulo dua suhona. ¹⁵Iya ma'kadam naua: "Abana kupemulu la ma'mesakia' muande kinande allo Kalappasam yolona anna la untammuä' pandahhaam. ¹⁶Aka kutulasangkoa', diganna'ipi kalembasanna inde allo Kalappasam illaam wattunna ma'pahenta Puang Allataala mane kuande polei inde kinande allo Kalappasam."

¹⁷Iya mualam ihusam Puang Yesus kessi anggur anna nakuhhu'i sumanga' mane nauai: "Alai ammu paleleia' muihu'. ¹⁸Aka kutulasangkoa': Mengkalao temo tä'mä' Kao deem la muihu' pole anggur sule lako sule kapahentaanna Puang Allataala."

¹⁹Puhai, mualam mesa hoti anna nakuhhu'i sumanga' längäm Puang Allataala mane napiä'-piä'i anna nabeenni lako suhona napasindum naua: "Iam too inde baleku kupebeem kahana kusolongkoa'. Pogau' liuia' susi indee anna malaä' ungkilalai."

²⁰Susi siam tappana puha mangngande, muala ihusam kessi anggur anna nabeenni lako suhona napasindum ma'kada naua: "Inde ihusam kessi anggur, iam too dipasihhagam

pa'dandiam bakahunna Puang Allataala lako hupatau. Indo pa'dandiam bakahu, hahaku la dipatitollo la umpomannassai diua dadim indo pa'dandiam. ²¹Sapo' pehingngii manappaia! Indo to la umbalu'ä', indekia' sola mangngande! ²²Abana hi tia Kao to disangai Änä' Mentolino inna la mateä' umba susi puha napa'tantu Puang Allataala. Sapo' tä' deem pada satilaka lako indo to umbalu'ä'." ²³Iya sipa'tula'-tula'um indo suhona naua: "Mennangkia' umbai' la umpogau'i kaha-kaha ia too?"

Sanaka-naka pepakahi'dinna

Puang Yesus illaam

pa'tosabeam sanda maseho

22:24-30

²⁴Iya sibatä'-betä'um passikolanna naua: "Mennakia' la disangai handam matande?" ²⁵Nauaammi Puang Yesus: "Tomahaja inde lino umpake palu-palu bassi umpahenta pakketauanna anna ingganna to kasallena maelo' si disangai to unkgambi' hupatau. ²⁶Sapo' ikoa'-iko tä'koa' la susi. Aka to handam matande illaam alla'-alla'mua', tau ia too la umpopengkadio kalena. Anna to pepunggu' la umpopendadi kalena to ma'tahia. ²⁷Aka mennanna kabam disangai matande, to muokko' daka mangngande dio meja to ma'tahia haka? Mannassa anna indo to muokko'. Sapo' Kao-kao mendadiä' to ma'tahia illaam alla'-alla'mua'. ²⁸Illaam ingganna kamasussaangu tontä liukoa' manontom umpasolaiä'. ²⁹Umba susi nabeemmä' Ambeku kakuasaam la ma'pahenta, susim too duka' la kubeengkoa' kakuasaam ma'pahenta ³⁰anna malakia' sola-sola mangngande anna mangngihu' dio mejaku illaam kapahentaangu. Anna la dipatadongkongkoa' yabo sapulo dua okkosam kahajaam, aka la umpahe'koa'

indo pessubunna sapulo dua too'na to Israel.”

**Natula' loppo' Puang Yesus
diona la nabahoi Petrus**

22:31-38

*Mat. 26:31-35; Mrk.
14:27-31; Yoh. 13:36-38*

³¹Mane ma'kadai lako Simon Petrus naua: “O Simon! Pehingngii! Dibeemmi lalam tomahajanna setam la napa'sändä'ikoa' dipasihhapam pahe ditappi dipasise'la läkko'na anna maläpu'na. ³²Sapo' balingko kupa'sambajangam Simon, indana pa'dei kamatapassammu. Sapo' maka' mengkatoba'ungko, iya la umpakatoto'ko penabanna ingganna solasubummu.”

³³Natimba' Petrus naua: “O Debata, ahu'ä' la ditahungkum lambi' la mateki' sola.”

³⁴Iya natimba'um Puang Yesus naua: “O Petrus, paillaam penabai inde tula'ku: tä'pi la moni mäne' anna pentallummä' umbahoi.”

³⁵Anna mane naua polei: “Indo anna kusuakoa'i indo lessu', tä'koa' kupäbäi umbaba ongeam doi', ongeam tinallo, anna sapatu. Iya deem dakoka' kakuhängam?”

Sangngim mentimba' naua: “Tä' deem.”

³⁶Iya naua oom Puang Yesus: “Sapo' temo kuaangkoa' pole': maka' muampuangkoa' ongeam doi', babaia'. Susi toi ongeam tinallo. Anna maka' pa'de pa'dammu, balu'i jubamu anna muallianni pa'dam. ³⁷Aka kutulasangkoa', puha tisuha' illaam Battakada Debata

diona Änä' Mentolino naua: ‘Disangai Ia mesa to kadake gau'.^{f1} Anna tula' ia too tä' mala tala dadi lako kaleku. Iya indo to puha tisuha' diona kaleku la lambi'um wattu'na temo.”

³⁸Ma'kadam passikolanna naua: “O Debata, petua'i indem dua pa'dam.”

Natimba' Puang Yesus naua: “Sihuam ia untula' liui.”

**Puang Yesus ma'sambajam
yabo tanete Zaitun**

22:39-46

Mat. 26:36-46; Mrk. 14:32-42

³⁹Puhai ia too, iya umpelleim kota Yerusalem Puang Yesus sola passikolanna le'ba' längäm Tanete Zaitun umba susi indo si napogau'.
⁴⁰Yaboi, ma'kadam Puang Yesus lako passikolanna naua: “Pa'sambajangkoa' indana napa'sändä'ikoa' setam.” ⁴¹Mane le'ba'i umpellei passikolanna umbai' la dilambi' dileba' mambelanna, anna ma'balinguntu'i ma'sambajam.

⁴²Naua: “O Ambe', maka' umpoelo' lappasannä' dio mai inde kamasussaam kuoloi temo, sapo' la pa'elo'mu dadi, taia la pa'elo'ku.” ⁴³Iya tappa sule siaham mesa malaika' yabo mai suhuga umpakatoto'i. ⁴⁴Tuttuam masussa nasi'dim Puang Yesus, nasuhum tuttuam umbeho kalena ma'sambajam. Anna to'do appu'na susi haha dokko litä'.

⁴⁵Puhai ma'sambajam, iya ke'de'um anna ma'pasulei lako passikolanna. Sapo' mamma'i hi nalambi' aka masussa penabanna. ⁴⁶Iya nauaammi: “Akanna mamma'koa'? Bangongkoa' ammu pa'sambajam indana napa'sändä'ikoa' setam.”

^{f1}22:37 Yes. 53:12.

Puang Yesus disakka**22:47-53***Mat. 26:47-53; Mrk. 14:43-50; Yoh. 18:1-11*

⁴⁷ Mahassampi ma'tula' Puang Yesus, iya sule ham buda tau nayoloangam Yudas indo to tihekem duka' sapulo dua passikolanna Puang Yesus. Iya tahhu'um ia Yudas umpellambi'i Puang Yesus anna naudunni.[§] ⁴⁸ Sapo' ma'kada hi Puang Yesus naua: "O Yudas, iangka inde pangngudummu umpake umpebeennä to disangai Änä' Mentolino?"

⁴⁹ Tappana naissam ingganna passikolanna naua la disakka Puang Yesus, iya ma'kadam naua: "O Debata, la kitepangka pa'dam?" ⁵⁰ Pahopängam siaham mesa solana Puang Yesus ussintä' pa'danna anna umbattai mesa sabua'na sando too', iya mäläi talinga kananna.

⁵¹ Sapo' ma'kada Puang Yesus naua: "Sihuum!" Mane nahakasanni indo talingganna, iya tappa bono' siaham.

⁵² Puhai, umpatahhu'um tula'na Puang Yesus lako ingganna indo kapala sando, punggabana to si unjagai Banua Debata, sola matua ulunna to Yahudi, indo to sule la ussakkai naua: "Ussangaa' isanga pehampo'ä' anna sulekoa' sanda pa'dam sanda bose la ussakkä'?" ⁵³ Kusanga allo-alkkia' sola illaam Banua Debata anna tä' di ussakkä'. Sapo' temo lambi'um wattunna la ma'palakokoa', aka wattunnam ma'kuasa kamalillingam."

Petrus umbahoi Puang Yesus**22:54-62***Mat. 26:57-58, 69-75; Mrk. 14:53-54, 66-72; Yoh. 18:12-18, 25-27*

⁵⁴ Puhai ma'tula' Puang Yesus, iya nasakkam anna nababai lako banuanna sando too'. Iya natuhu' kalamba'um Petrus. ⁵⁵ Illaam indo tängä' pahanteam deem sanaka-naka tau untubei api. Iya le'ba'um duka' Petrus lako muokko' solasola tau buda mendähä. ⁵⁶ Deem mesa sabua' baine muita Petrus muokko' dio sa'de api. Iya napetua'-tua' lium lambi' ma'kada naua: "Inde tau si sola liu duka' inde dio Yesus."

⁵⁷ Sapo' tappa ma'baho Petrus naua: "Tä' too kao kuissam itim tau!"

⁵⁸ Tä' masäe, naita pole oom mesa tau. Iya nauaammi: "Ikom duka' mesa solana."

Sapo' natimba' Petrus naua: "Tää! Takao hi to kao!"

⁵⁹ Umbai' mesai tette' lessu'na, iya sule oom mesa tau ma'kada kasalle naua: "Mannassa anna solana Yesus inde tau, aka to Galilea duka'!"

⁶⁰ Sapo' natimba' liu Petrus naua: "Tä' kuissam itim tula'mu. Aka hi iko ussanga?" Iya tä'pi teppu' dio pudu'na Petrus tula'na, iya moni siaham mäne'. ⁶¹ Iya ussailem Petrus Puang Yesus, iya tappa nakilalaim pole' indo tula'na Puang Yesus naua: "Tä'pi la moni mäne' anna pentallummä' umbahoi." ⁶² Iya le'ba' siaham Petrus lako sulibam anna ma'pase'go'i sumahho.

§22:47 *naudum*: Situhu' kabiasaanna to Yahudi siudum ia ke silambi'i.

Puang Yesus didahha**22:63-65***Mat. 26:67; Mrk. 14:65*

⁶³ Puhai ia too, iya indo tau buda to unjagai Puang Yesus natelle anna natappai lima. ⁶⁴ Mane nasapu'i matanna anna nauaanni: "O nabi, pentopaipi, menna untappai limako?" ⁶⁵ Anna budapi pan-telle senga'na lako Puang Yesus.

Puang Yesus dio olona kakalebuanna**To Mahhotto' Handam
Malangka' illaam peadasam****22:66-71***Mat. 26:59-66; Mrk.
14:55-64; Yoh. 18:19-24*

⁶⁶ Mebengngi'-bengngi'i, ma'hempummi To Mahhotto' Handam Malangka' illaam peadasam eta too, susinna matua ulunna to Yahudi sola ingganna kapala sando anna to ullatta' Pepaondonganna Musa. Iya dipasolam Puang Yesus lako olona. ⁶⁷ Iya nauaammi: "Tulasangkanni, ikongka indo To dilanti' la mepasalama?"

Natimba' Puang Yesus naua: "Maka' la kutulasangkoa', tä' sianna' la untkat-appa'i. ⁶⁸ Anna maka' kukutanaikoa', tä' siangkoa' duka' la mentimba'. ⁶⁹ Sapo' mengkalao temo Änä' Mentolino la muokko' dio tandai kananna Puang Allataala To Handam Kuasa."

⁷⁰ Iya ma'kadam indo to ma'hempum naua: "Maka' susi, ikongka Änä'na Puang Allataala?"

Natimba' naua: "Susim too itim tula'mua'."

⁷¹ Iya sangngim ma'kadam naua: "Tä'um pahallu deem säbi aka tahingnginna' tula'na buttu subum pudu'na."

**Puang Yesus dio olona
gubernur Pilatus****23:1-7***Mat. 27:1-2, 11-14; Mrk.
15:1-5; Yoh. 18:28-38*

23 Puhai ia too, ke'de' asammi indo to ma'hempum anna umpasolai Puang Yesus lako olona Pilatus. ² Dioi, napahandu'um napakolo'-kolo'i naua: "Inde tau si umpabulim tau buda. Si muuaam tau: 'Daa umbaja'a' sima lako tomahaja dio Roma.' Anna naua toi: 'Kaom too indo To dilanti' la umpasalama' hupatau,' battu diua mesa tomahaja."

³ Mekutanam Pilatus lako Puang Yesus naua: "Ikongka indo tomahajanna to Yahudi?"

Natimba' naua: "Ikom ma'kale muuai."

⁴ Iya ma'kadam Pilatus lako ingganna kapala sando anna lako tau buda naua: "Tä' deem kulambi' kasalaanna inde tau la napolalam dipassala."

⁵ Sapo' sangngim nakekke' liu naua: "Aka indo pepa'guhuanna, umpakende' kahusagam illaam lembäna Yudea, mengkalao dio Galilea anna lambi'um duka' inde."

⁶ Tappana nahingngi Pilatus tula'nai, iya mekutanam naua: "To Galilea si'da haka inde tau?" ⁷ Tappana naissam Pilatus naua to buttu dio mai botto napahenta tomahaja Herodes, iya napopebabam lako aka wattu eta too siampu' dio Yerusalem Herodes.

**Puang Yesus dio
olona tomahaja Herodes****23:8-12**

⁸ Tä' deem pada satilalla' Herodes muitanna Puang Yesus, aka masäem nahingngi kahebana anna lalo mohäena la naita. Anna napemulu umba ke malai naita umpogau' indo tanda memängä-

mängä si napogau'.⁹ Iam too anna umpabudam pekutanaam lako Puang Yesus. Sapo' tuli tadeem natimba'i.¹⁰ Ingganna indo kapala sando sola to ullatta' Pepaondonganna Musa sangngim ke'de' keaha' umpakolo'-kolo'i Puang Yesus.¹¹ Puhai ia too, umpetaba-tabaim Puang Yesus Herodes sola sohodadunna anna natelle-telle mane napapohebai poheba susi bajunna tomahaja, mane napopebabei ma'pasule lako Pilatus.¹² Napahandu' allo eta too sipakamajam pole' Herodes anna Pilatus, moinna anna yolona sikabassi.

Puang Yesus la ditahungkum mate

23:13-25

Mat. 27:15-26; Mrk. 15:6-15;

Yoh. 18:39-19:16

¹³Puhai ia too, nahempummi Pilatus ingganna kapala sando, to pepungngu'na to Yahudi sola tau buda¹⁴ anna napa'tula'i naua: "Sulekoa' umpasola inde tau aka muuaa': 'Si umpakende' kahusagam.' Anna puham kupahessa dio olomua', sapo' tä' deem kulambi' kasalaanna inde tau moi podo la mesam la sihondoi indo si untandasanna'.¹⁵ Susi siam duka' Herodes. Iam too anna napasuleammakia' sule, aka inde tau tä' deem umpogau' kakadakeam napolalam la ditahungkum mate.¹⁶ Anggam ia la kupopehabi' yolo mane kulappasanni."

¹⁷ [Maka' lambi' oom allo Kalappasam pahallu nalappasam Pilatus mesa to ditahungkum situhu' pa'elo'na tau buda.]¹⁸ Tappana nahingngi indo tula'na, iya sikatambam indo to ma'hempum naua: "Patei, anna ullappasangangkam Barabas!"¹⁹ (Indo Barabas ditahungkum aka umbali-bali to ma'pahenta illaam indo kota anna papateam.)

²⁰Mohäe ia Pilatus la ullappasam Puang Yesus, lambi' ma'kada pole lako tau buda napekasallei.²¹ Sapo' sikaoli mandi indo tau buda naua: "Päso'i, päso'i yabo kaju sitambem anna malai mate!"

²²Iya naua pole oom Pilatus kapentallunna: "Anu' aka hia kasalaanna? Tä' kao deem kulambi' kasalaanna inde tau napolalam la ditahungkum mate. Anggam ia la kupopehabi' yolo mane kulappasanni."

²³Sapo' indo tau buda tuttuam sikaoli mandi naua: "Päso'i yabo kaju sitambem anna malai mate!" Katampasanna indo tau buda patalo.²⁴ Iya napatuhu'im Pilatus pelauanna.²⁵ Iya nalappasammi illaam mai tahungkum indo to umbali-bali to ma'pahenta anna papateam, mane umbehoi Puang Yesus lako indo tau buda anna mala ia siam anna ia napogausam situhu' pa'elo'na.

Puang Yesus dipäso' yabo kaju sitambem

23:26-43

²⁶Puhai, iya dibabam Puang Yesus lako sulibam kota. Mahassanni mellao, sitammum mesa tau isanga Simon to Kirene mane sule dio mai sulibanna kota Yerusalem. Iya natähämmi anna napasai umpassam indo kaju sitambem untuhu' Puang Yesus.²⁷ Anna budapi tau untuhu' Puang Yesus, muane anna baine. Sikauhhu' indo baine ussahhoi Puang Yesus.²⁸ Iya nasaiem Puang Yesus ingganna indo baine anna nauaanni: "Oa' baine to Yerusalem daa ussahhoiä', sapo' sahhoikoa' kalemu anna änä'mu aka la nalambi'koa' kamasussaam.²⁹ Aka la deem wattunna ma'kada tau naua: 'Kehongko' ia lako ingganna baine to tämänä anna to tä' deem ma'pasusu!'³⁰ Wattu etam too duka' la ma'kada tau naua: 'O tanete, tambunnikam! O buntu, tampoikam!' ³¹ Aka maka' dipa'kasubu-

subuim kaju tubo, iya senga'um tia ke kaju matei.”**

³²Deem toi dua to kadake gau' di-pasibaba Puang Yesus la lao dipatei.

³³Landa'i lako indo ongeam si di-uaam Kahohä' Ulu, iya silelem umpäso' Puang Yesus yabo kaju sitambem anna indo dua to kadake gau', mesa dio tandai kananna anna mesa dio tandai kaihinna. ³⁴Iya ma'sambajammi Puang Yesus naua: “O Ambe', ampunnianni kasalaanna inde mai tau aka balam tanaissanna too inde napogau'.”

Mane nataba-tabai sohodadu indo po-hebana, sapo' naundi.

³⁵Wattu eta too buda tau ke'de' umpetua'i. Iya budam pepunggu'na to Yahudi untelle Puang Yesus naua: “Maka' tau senga' mala napasalama', sapo' kela to natuho tongam Puang Al-lataala anna To nalanti' la mepasalama', la umpasalama'um duka' kalena.”

³⁶Susi toi duka' ingganna sohodadu to dio heem eta too sangngim untelle Puang Yesus anna nabeenni anggur maissu' ³⁷napasindum ma'kada naua: “Maka' tomahajanna si'dako to Yahudi, iya lappasangko kalemu!”

³⁸Anna deem tisuha' yabo tondom ulunna naua: IAM TOO INDE TOMAHA-JANNA TO YAHUDI.

³⁹Indo mesa to kadake gau' to nasimbahaam dipäso' yabo kaju sitambem untelle duka' Puang Yesus naua: “To dilanti'ko la mepasalama' le'? Iya pasalama'ko kalemu anna kami!”

⁴⁰Sapo' nakeaha'i indo solana naua: “Tä' siapoko isanga mahea' lako Puang Allataala, moi kela

daa pada-padangkia' dipahuai pa'tahungkungam mate? ⁴¹Inna la sipäto'um too kita ditahungkungum mateki' aka situhu' pa'pogausanta. Sapo' inde Ia tau, tä' Ia deem umpogau' kasalaam.”

⁴²Mane ma'kadai lako Puang Yesus naua: “O Puang Yesus, kilalaiä' kao le, ke ma'pahentangko illaam kapahentaammu!”

⁴³Natimba' Puang Yesus naua: “Kutulasangko setonganna allo temo solangki' illaam indo ongeam kamasannangam.”††

Puang Yesus kattu penabanna

23:44-49

Mat. 27:45-56; Mrk.

15:33-41; Yoh. 19:28-30

⁴⁴Wattu eta too umbai' tängäm allo, iya malillim pättäm dio indo pa'lembängam sule lako tette' tallu kahubem, ⁴⁵aka tä' tandaam mata allo. Iya indo sampim pesapa' illaam Banua Debata tappa sesse' tipa'dua. ⁴⁶Iya metambam Puang Yesus naua: “O Ambe', kupaludokko lisu pala'mu penabangku!” Puhai naua, iya kattu siaham penabanna. ⁴⁷Naitanna punggabana sohodadu indo kaha-kaha ia too, iya umpujim Puang Allataala naua: “Abana si'da hia tä' deem kasalaanna inde tau!” ⁴⁸Anna indo tau buda to sule umpetua'i sangngim umbusu'-busu' buana manosso ma'pasule. ⁴⁹Ingganna solana Puang Yesus muane anna baine napahandam mambela kaha-kaha ia too. Indo baine piha, ia siam indo to si untuhu' liui mengkalao dio Galilea.

**23:31 Aka maka' dipa'kasubu-subuim kaju tubo, iya senga'um tia ke kaju matei. Kaju tubo, kalembasanna Puang Yesus anna kaju mate, kalembasanna to madosa.

††23:43 indo ongeam kamasannangam: naua illaam basa Yunani: *Firdaus*, kalembasanna, ongeam kamasannangam la naongi to matappa' ke matem.

**Bakkena Puang Yesus
dipatama lokko'**

23:50-56

*Mat. 27:57-61; Mrk.
15:42-47; Yoh. 19:38-42*

⁵⁰⁻⁵¹ Deem mesa tau isanga Yusuf to buttu dio mai kota Arimatea dio Yudea. Indo Yusuf mesa to mapia gau' anna malolo penaba muampai liu kasuleanna kaphentaanna Puang Allataala. Moi anna mesa duka' to mentama bilangam To Mahhotto' Handam Malangka', sapo' moka ia untahima kattuanna anna pa'palakoanna solana la umpatei Puang Yesus. ⁵² Indo Yusuf le'ba' umpellambi'i Pilatus umpelau bakkena Puang Yesus aka la napatama lokko'. ⁵³ Iya laoim napatuhum indo bakkena Puang Yesus anna nabalunni sampim mabusa mane laoi napandam tama lokko' indo to puha napaia dio mesa tanete batu. Indo lokko', tä'pi deem dipatama to mate. ⁵⁴ Wattu eta too allo pa'patokaam aka la lambi'um allo Katohhoam.

⁵⁵ Tappana nababa Yusuf indo bakkena Puang Yesus tama lokko', iya natuhu'um duka' ingganna indo baine to napasola liu Puang Yesus dio mai Galilea. Sulei lako, iya naitam duka' indo ongeam dipampandanni bakkena. ⁵⁶ Puhai ia too, ma'pasuleim lako banuanna umpatokaam bauam bubanau' anna minnä'-minnä' bubanau' bakkena Puang Yesus. Sapo' illaam allo Katohhoam tää'i mengkähä aka untuhu'i Pepaondonganna Musa.

Puang Yesus tubom sule

24:1-12

Mat. 28:1-10; Mrk. 16:1-8; Yoh. 20:1-10

24 Bengi-bengipi indo allo Minggu eta too, iya le'ba'um sanaka-naka

baine lako indo ku'bu' umbaba bauam bubanau' indo puha napatoka. ² Sulei lako, iya naitam indo batu dilapasam ba'ba lokko' puham dilolim lao. ³ Iya le'ba'im tama indo lokko', sapo' tä'um deem nalambi' indo bakkena Puang Yesus illaam. ⁴ Mahassanni ma'papusa'-pusa' muitai, iya pissananna ham ke'de' dio ampe'na dua tau bassim ma'poheba pangkähä. ⁵ Naitanna, iya sanggim mahea' lambi' muoppä dokko litä' menomba. Sapo' ma'kada indo tau naua: "Akanna umpeäkoa' to tubo illaam alla'-alla'na to mate? ⁶ Pa'dem inde aka tubom sule! Tä' daka unggilalai indo puha natulasangkoa' indo anna diopokoa' Galilea ⁷ naua: 'Änä' Mentolino la dibeho lako pala' limanna to madosa, la napatei yabo kaju sitambem, anna illaam allo katallunna la dipatibangom sule.'" ⁸ Mane nakilalai hi indo tula'na Puang Yesus.

⁹ Tappana sulei dio mai indo ku'bu', iya natula' asammi ingganna indo kaha-kaha naita lako indo to sapulo mesa suhona Puang Yesus sola ingganna to si untuhu'i. ¹⁰ Indo baine to sule untula' indo kaha-kaha ia too isanga Maria Magdalena, Yohana, Maria indona Yakobus, anna deempi sanaka-naka solana. ¹¹ Sapo' indo ingganna suho tä' unggatappa'i indo baine aka nasanga hia ma'tula' sasa bäbä. ¹² Sapo' tappa ke'de' ia Petrus lumumpa' lako indo ku'bu'. Sulei lako, lumukkum naolläi tama indo lokko', iya naitam angga ham pebalunna tihongkä' illaam. Iya ma'pasulem Petrus napasindum napenaba-nabaam kaha-kaha ia too.

**Puang Yesus umpa'paitaam kalena
lako dua tau la lako Emaus**

24:13-35

Mrk. 16:12-13

¹³ Allo eta too deem dua pentuhu'na Puang Yesus lao lako mesa tondä' isanga Emaus, umbai' sapulo mesa kilo alla'na Yerusalem. ¹⁴ Mahassanni mellao, natula'um indo ingganna kaha-kaha to puha dadi. ¹⁵ Mahassanni sipa'tula', sule ham Puang Yesus anna mellaoi sola-sola. ¹⁶ Muita Puang Yesus sapo' deem ullabai matanna nasuhum tä' naissam.

¹⁷ Iya ma'kadam Puang Yesus naua: "Aka hia' iko untula' mahassam mellao?"

Iya bassim tohhom, manabo inabanna diita. ¹⁸ Ma'tula'um indo mesa isanga Kleopas naua: "Ingganna tau to längäm Yerusalem, umbai' anggam iko tä' muis-sanni indo kaha-kaha puha dadi yabo sanaka benginna lessu!"

¹⁹ Nakutanaim Puang Yesus naua: "Kaha-kaha aka hia dadi?"

Natimba' naua: "Diona indo Puang Yesus to Nazaret, mesa nabi to naponnoi kuasa susi illaam tula'na teem pa'palakoanna dio olona Puang Allataala anna ingganna hupatau.

²⁰ Nabeho ingganna kapala sando anna pepungngu'ta lako to ma'pahenta anna mala natahungkum mate. Iya napäso'im yabo kaju sitambem lambi' mate. ²¹ Moi kela daa Ia ha kihannuam la ullappasam to Israel. Anna temo allo katallunnam anna dadii kaha-kaha ia too. ²² Mane deenni, sanaka-naka baine illaam kamesaangki sulekam napatikkedu'. Aka bengi-bengipi anna le'ba'um lako indo ku'bu', ²³ sapo' tä'um deem nalambi' bakkena. Iya ma'pasulem anna natulasangkanni naua: 'Muitakam dua malaika' anna natulasangkam naua: Tubom sule Puang Yesus!' ²⁴ Iya le'ba'

siaham sanaka-naka solaki lako indo lokko' anna nalambi' si'da susi liu indo pa'tula'na baine. Anna pa'dem Puang Yesus nalambi'."

²⁵ Ma'kadam Puang Yesus naua: "Abana mahokoa! Aka tä' liupia' mala unkatappa'i indo tula'na ingganna nabi. ²⁶ Aka tä' daka tia indo To dilanti' la mepasalama' la pahallu ussi'dim yolo ingganna indo pandahhaam mane ullambi'i kamatandeanna?" ²⁷ Mane napomakalesoanni Puang Yesus ingganna indo to puha tisuha' diona kalena illaam Pepaondonganna Musa anna suha'na ingganna nabi.

²⁸ Mahassampi ma'tula', iya la lambi' kalem lako indo tondä' la naongei. Naägä'i lelemmi Puang Yesus la tahhu', ²⁹ sapo' bassim nakekke' naua: "Tato-hhonna' pa'bengi aka la bengim." Iya tohhom duka' Puang Yesus la ma'bengi sola.

³⁰ Tappana muokko'i la mangngande, iya mualam hoti Puang Yesus anna nasambajannii mane napiä'-piä'i nabeem. ³¹ Mane naissam di pole' naua Puang Yesus siam ia, sapo' tappa pa'de bää' naita. ³² Iya sipa'tula'um naua: "Iam päläe' anna susi sugali'um tialanna inabanta indo sipa'tula'kia' muola lalam anna napomakalesoangki' diona issinna Battakada Debata!"

³³ Wattu eta too tappa ke'de' siaham mengkalao längäm Yerusalem indo to dua. Sulei längäm, nalambi'um indo to sapulo mesa passikola anna ingganna solana mahassam ma'hempum. ³⁴ Ma'kada indo to ma'hempum naua: "Abana tubo si'dam sule Debata aka puham umpellambi'i Simon." ³⁵ Iya tappa natula'um duka' indo to dua diona indo puha dadi illaam pa'laoanna. Anna nauapi duka': "Ia ham mane kiissanni kiua Puang Yesus dia, tappana umpiä'-piä' indo hoti."

**Puang Yesus umpa'paitaam
kalena lako passikolanna**

24:36-49

Yoh. 20:19-23

³⁶ Mahassam siapi sipa'tula'-tula', pissananna ke'de'-ke'de' bābā ham Puang Yesus illaam alla'-alla'na anna ma'kadai naua: “Kehongko'koa' anna maupa' nalambi'ungkoa' kamasannangam.”

³⁷ Sangngim tikkedu' anna mahea' aka nasanga anitu. ³⁸ Sapo' ma'kada Puang Yesus naua: “Akanna mahea'koa'? Akanna bata-bataia' penabammu? ³⁹ Petua' siaia' inde limangku sola pala' bitti'ku. Aka Kao hi to Kao. Haka'ā' ammu pengkalesoiā' anna muissam manappaia'. Aka anitu ia tā' deem balena anna tā' deem bukunna. Sisala inde muitaā' temo.”

⁴⁰ Puhai naua, iya umpa'paitaammi limanna sola pala' bitti'na. ⁴¹ Sapo' tangkaam siapi nakatappa'i, napobua' katilallasanna anna kamängä-mängäanna. Iya mekutanam Puang Yesus naua: “Deem daka kinandemua' inde?” ⁴² Iya nabeemmi mesa bau tunu. ⁴³ Naalam Puang Yesus anna naandei dio olona passikolanna.

⁴⁴ Puhai, ma'kada oom naua: “Iam too inde indo kaha-kaha si kutulasangkoa' wattunna anna sola-solapakia', kuua: Ingganna indo puha tisuha' illaam Pepaondonganna Musa, suha'na ingganna nabi, anna illaam suha' Pampujiam diona kaleku tā' mala tala sule lako asam.”

⁴⁵ Mane sangngim naissam manappa hi pole' kalembasanna issinna Battakada Debata aka nabukkaiammi Puang Yesus pikkihanna. ⁴⁶ Mane ma'kada pole oi naua: “Puha tisuha'um illaam Battakada Debata naua: To dilanti' la mepasalama' la ussi'dim pandahhaam anna la tiban-gom sule dio mai kamateam illaam allo katallunna. ⁴⁷ Anna illaam sanganna pahallu duka' dipa'pakahebaam lako ingganna tau illaam inde lino diua pahallu mengkatoba' hupatau anna mala naam-punniam dosana Puang Allataala. Anna ingganna ia too la dipa'pakahebaam napahandu' inde Yerusalem. ⁴⁸ Ikonna' too la mendadi sa'bi diona kaha-kaha ia too. ⁴⁹ Anna la kupasuleangkoa' Penaba Maseho to puha nadandi Ambeku. Sapo' la hapa'pokoia' illaam inde kota sule lako napakatoto'koa' indo kakuasaam yabo mai suhuga.”

Puang Yesus tiäkä' längäm suhuga

24:50-53

⁵⁰ Lessu'i ia too, iya le'ba'um Puang Yesus umpasola passikolanna messubum illaam mai kota anna lakoi mesa ongeam sikahuku' tondä' Betania. Dioi, muäkä'um limanna anna untamba'i passikolanna. ⁵¹ Mahassanni natamba', iya tiäkä'um längäm suhuga umpellei passikolanna. ⁵² Iya sangngim menombam mane ma'pasulei lako Yerusalem naponnoi kakassiam. ⁵³ Anna allo-allo illaam Banua Debata umpuji sanganna Puang Allataala.

Kaheba Katilallasam natuli' Yohanes

Bätäna issinna

Inde suha' natuli' mesa passikolanna Puang Yesus to napakamaja (Yoh. 13:23; 19:26; 20:2; 21:2-7; 21:20-24). Situhu' passangainna to Sahani yolona, Yohanes-um too indo to untuli' inde suha'.

Illaam inde Kaheba Katilallasam, Puang Yesus disangai Kadanna Debata to inna deemmi mengkalao dio mai. Iam too mengkubalim mendadi hupatau anna tohho illaam alla'-alla'taa'. Kasuhunganna anna natuli' Yohanes inde suha' anna mala: "...ungkatappa'ia' muua Puang Yesus-um too indo To dilanti' la mepasalama', Änä'na Puang Allataala; anna la ullambi'koa' katuboam umpolalam indo kamatapassammua' lako kalena" (20:31).

Illaam hondongam 2-12 dituli' diona sanaka-naka tanda memängä-mängä napogau' Puang Yesus sola ingganna pepatuduanna. Ingganna ia too umpa'patandaam kalena anna mala diissam diua: Ia indo To dilanti' la mepasalama', to masäem napemmitai to Yahudi la sule, Änä'na Puang Allataala. Naitanna tau ingganna ia too, iya deem unkatappa'i Puang Yesus, deem umbalii. Illaam hondongam 13-17 dipomakaleso dituli' maaka susi kasipakamajaanna Puang Yesus anna passikolanna illaam indo bengi la disakkam Puang Yesus. Dituli' toi diona kada pepakahanganna Puang Yesus lako passikolanna bengi eta too. Illaam hondongam 18-21 dituli' diona Puang Yesus disakka, dihotto', dipatei yabo kaju sitambem, tubo sule, anna umpa'paitaam kalena lako passikolanna.

Illaam 7:53-8:11 dituli' diona mesa baine to dilambi' ullullu' pa'bannetauam. Indo ingganna issinna balajam ia too dituli' illaam alla'na dua tanda ma'lekko susi inde: [...] aka tula' ia too umbai' tä'pi deem indo anna uhu-uhunai natuli' Yohanes inde suha'. Moinna anna susi, sapo' dipatama siam inde suha' aka masäem anna dipatamai suha' Battakada Debata.

Illaam inde suha', handam napaitoo'na Yohanes diona katuboam sule lako salako-lakona indo talambi' illaam Kristus. Katuboam ia too mala talambi' inde lino, anna mala natahima ingganna to unkatappa'i Puang Yesus abana anggama Ia lalam lako kamaloloam anna katuboam bakahu. Deem pehapangam naala Yohanes susinna uwai, hoti, kamasiäsam, to ma'kambi', domba, bätäna anggur anna täkena anna budapi senga'na. Ingganna pehapangam ia too napake umpepatuduam diona lalam kasalamasam.

Lesoanna issinna

1. Kada passu'bä' (1:1-18)
2. Tanda memängä-mängä napogau' Puang Yesus sola pepatuduanna umpa'patandaam kalena anna mala naissam hupatau naua Ia Änä'na Puang Allataala (1:19-12:50)
 - a. Pa'pahandusanna pengkähänganna Puang Yesus illaam inde lino (1:19-4:54)
 - b. Kadadiam dio Yerusalem illaam allo Katohhoam (5:1-47)
 - c. Kadadiam dio Galilea illaam allo Kalappasam (6:1-71)
 - d. Kadadiam dio Yudea illaam allo kasalle Bahum Daum (7:1-10:21)
 - e. Kadadiam illaam allo Kalappasam katampasanna nakadioi heem Puang Yesus (11:1-12:50)
3. Umpatudu passikolanna Puang Yesus illaam indo bengi la diolaam dipatei ke masiäi (13:1-17:26)

4. Puang Yesus disakka, dipatei, anna tubo sule (18:1-20:29)

5. Kasuhunganna anna dituli' inde suha' (20:30-31)

6. Puhai tubo sule Puang Yesus, iya umpa'paitaammi kalena lako pas-sikolanna (21:1-25)

Puang Yesus diuam Kadanna Debata

1:1-18

1 Wattunna anna tä'pi dipadadi inde lino inna deemmi indo to diuam Kadanna Debata. Indo Kada ia too inna solam Puang Allataala, anna Ia siam Puang Allataala. ²Inna silolemmi Ia Puang Allataala mengkalao dio mai. ³Ia unghähäi anna deenni ingganna-ingganna sia. Tä' deem aka-aka dipadadi ke tä'i Ia unghähäi. ⁴Ia naongi buttu katuboam anna katuboam ia too umbaba kamasiäsam umballoi ma'hupatau. ⁵Kamasiäsam ia too paindo illaam alla'-alla'na kamalillingam anna tä' mala napi'dei kamalillingam.

⁶Iya sulem mesa tau nasua Puang Allataala isanga Yohanes^{††} ⁷Ia mendadi sa'bi ussa'bii diona indo kamasiäsam anna mala nahingngi ingganna hupatau nasuhum matappa'. ⁸Indo Yohanes taia indo diuam kamasiäsam sapo' to ussa'bii diona indo kamasiäsam. ⁹Aka la sule illaam inde lino indo kamasiäsam si'da-sia ummasiä'i ingganna hupatau.

¹⁰Indo Kadanna Debata tohho inde lino anna Ia siam unghähäi indo anna dipadadi inde lino. Sapo' moinna anna susi, tä' di naissam to lino. ¹¹Sule mentama botto litä'na, sapo' natumpu pala' di solana. ¹²Sapo' menna-menna untahimai anna unghatappa'i, tau ia too napadadi änä'na Puang Allataala. ¹³Taia kahana pa'padadinna hupatau nasuhum mendadi änä'na Puang Allataala, anna taia toi kahana pa'elo'na battu haka pat-

tujunna hupatau, sapo' pa'elo'na Puang Allataala nasuhum napadadi änä'na.

¹⁴Indo Kadanna Debata mengkubalimmi mendadi hupatau anna tohhom illaam alla'-alla'taa'. Taitam kamatandeanna. Anna kamatandeam ia too namanasam Puang Allataala aka Ia Änä' mesanna. Iam too taongi unghaleso tongam diona Puang Allataala sola pa'kamasena.

¹⁵Yohanes umpaissanni hupatau diona Kada ia too. Si metamba-tamba naua: "Iam too inde indo si kutula' kuua: 'Deem la sule ibundingku sapo' matande puha Ia anna la kao, aka tä'pä' kao dadi anna inna deemmi Ia.'" ¹⁶Anna tadisihanteam pa'kamasena napolalam tamonda-monda untamba'kia'. ¹⁷Musa Ia napalandasangkia' pahentana Puang Allataala. Sapo' illaam Yesus Kristus taongi unghaleso tongam diona Puang Allataala sola pa'kamasena. ¹⁸Tä'pi deem tau moi podo la mesa muita Puang Allataala. Sapo' malakia' muissam Puang Allataala aka Änä' mesanna umpaissannikia', indo to sipadaam Puang Allataala anna to illaam kalena.

Passa'biinna Yohanes to si mantedo'

1:19-28

Mat. 3:1-12; Mrk. 1:1-8;

Luk. 3:3-6, 15-17

¹⁹Susi inde passa'biinna Yohanes diona Puang Yesus. Deem sanaka-naka sando sola pessubunna Lewi nasua to kasallena to Yahudi dio Yerusalem le'ba' umpellambi'i Yohanes anna nakutanai naua: "Mennako iko isanga indee?" ²⁰Naakui anna nasindohoi Yohanes ma'tula' naua: "Kao-kao taiaä' indo To dilanti' la mepasalama'."

^{††}1:6 Yohanes: Yohanes to si mantedo' diuam.

²¹ Iya natimba'um naua: “Maka' susi, iya menna hako? Elia hakoka tubo sule?”

Natimba' Yohanes naua: “Taia.”

Iya mekutana pole oom naua: “Ikongka indo Nabi to puha didandi?”^{¶¶}

Natimba' oom Yohanes naua: “Taia.”

²² Mane mekutana oi naua: “Menna hako iko setonganna? Tulasangkam anna malai kiissam kitulasam lako to ussuakam. Menna hako iko isanga?”

²³ Natimba'i Yohanes naua: “Kaom too indo puha natula' nabi Yesaya naua: ‘Deem to la metamba-tamba dio pohiallasam naua: hampasanni anna ummaloloanganni lalanna Debata.’”^{§§}

²⁴ Iya mekutana oom sanaka-naka indo pesuana to illaam kakalebuanna Parisi naua: ²⁵ “Maka' taiako indo To dilanti' la mepasalama', taiako Elia, taia toko indo Nabi to didandi, iya aka hi anna mantedo' dako?”

²⁶ Natimba' Yohanes naua: “Kao-kao uwai kupopantedo', sapo' deemmi illaam alla'-alla'mua' tä'pi muissanna' ²⁷ ibundi la umpalako pengkähänganna. Sapo' moi la kubukkaiam pekapu' sapatunna tala sihatannä'.”

²⁸ Ingganna ia too dadi dio Betania tandai mata allona Salu Yordan indo si naonge Yohanes mantedo'.

**Passa'biinna Yohanes diona
Puang Yesus to disangai Änä'
Dombana Puang Allataala**

1:29-34

²⁹ Masiänai, naitam Yohanes sule Puang Yesus la umpellambi'i. Iya ma'kadam Yohanes naua: “Petua'ia' indem dio indo Änä' Dombana Puang

Allataala sule la umpa'dei dosana ma'hupatau. ³⁰ Iam too indo to si kutula' kuua: ‘Deem la sule ibundingku sapo' la matande puha Ia anna la kao, aka tä'pä' kao dadi anna inna deemmi Ia.’ ³¹ Yolona tä' duka' kuissam kuua Iam too indo To dilanti' la mepasalama'. Sapo' ia anna suleä' umpopantedo' uwai, anna mala naissam to Israel naua Iam too indo To dilanti' la mepasalama'.”

³²⁻³³ Ma'tula' polepi Yohanes ussa'bii naua: “Tä'pi duka' kuissam eta too kuua Puang Yesus-um too indo To dilanti' la mepasalama'. Sapo' Puang Allataala to ussuää' untedo'i uwai ma'kada naua: ‘Maka' too muitam Penaba Masehona Puang Allataala tuhum hampo lako mesa tau, iya iam too to la umpopantedo' Penaba Maseho.’” Iya deem siam kuita Penaba Maseho tuhum yabo mai suhuga susi dangam-dangam hampo yabona anna tohho illaam kalena. ³⁴ Ma'kalemä' muitai anna kusa'bii kuua Iam too Änä'na Puang Allataala.”

**To uhu-uhuna mendadi
passikolanna Puang Yesus**

1:35-42

³⁵ Masiäna polei, dio oom indo ongeanna Yohanes sola passikolanna dua. ³⁶ Tappana muita liu Puang Yesus, iya ma'kadam naua: “Petua'i iam too dio indo Änä' Dombana Puang Allataala!” ³⁷ Uhhingginna tula'na Yohanes indo passikolanna dua, iya tappa le'ba' siahanni untuhu' Puang Yesus. ³⁸ Tappana menggihi' Puang Yesus lako boko'na naitam indo to untuhu'i, iya nakutanaim naua: “Aka umpahalluanna'?”

^{¶¶}1:21 Nabi to puha didandi: Pass. 18:15.

^{§§}1:23 Yes. 40:3.

*1:32-33 *umpopantedo' Penaba Maseho*: kalembasanna, mepatamai Penaba Masehona Puang Allataala anna mala mengkähä illaam penaba anna mepa'guhu pa'elo'na Debata.

Iya natimba'um naua: “O Rabi, umbangei si muongei tohho?” (Rabi kalembasanna: Tuangguhu.)

³⁹Ma'kada Puang Yesus naua: “Maikoa' anna ma'kalekoa' muitai.” Iya le'ba'im duka' sola anna napetua'i indo ongeam si naongei Puang Yesus. Wattu eta too tette' appa'um kahubem, iya tohhoi sola Puang Yesus sule lako bengi.

⁴⁰Indo mesa to uhhingngi tula'na Yohanes anna le'ba'i untuhu' Puang Yesus isanga Andreas, solasubunna Simon Petrus. ⁴¹Iya tappa le'ba' siaham Andreas umpeä Simon anna napa'tulasanni naua: “Silambi'ungkam kami' indo Mesias,” (battu diua To dilanti' la mepasalama').[†] ⁴²Iya umpasolam Simon le'ba' umpellambi'i Puang Yesus. Sulei lako, napetua'-tua'um Puang Yesus anna napa'kadai naua: “Iko-iko Simon änä'na Yohanes,[‡] la disangaingko Kepas.” (Kepas illaam basana to Yahudi ditula' Petrus ia illaam basa Yunani. Kalembasanna: batu.)

Filipus anna Natanael natambai Puang Yesus

1:43-51

⁴³Masiänai, mualam kattuam Puang Yesus la lako Galilea. Tä'pi mengkalao anna sitammum Filipus, iya nauaammi: “Maiko tuhu'ä.” ⁴⁴Indo Filipus to buttu dio mai Betsaida kota kadadianna Andreas sola Petrus. ⁴⁵Iya le'ba'um Filipus umpellambi'i Natanael anna natulasanni naua: “Silambi'ungkam kami' indo to si natula' Musa illaam suha' pepaondonganna anna si napa'paissangam duka' ingganna nabi. Iam too indo to buttu dio

mai Nazaret, änä'na Yusuf isanga Puang Yesus.”

⁴⁶Natimba' Natanael naua: “La deem daka tia to mapia buttu illaam mai tondä' Nazaret?”

Nauam Filipus: “Maiko anna ma'kaleko iko duka' muitai.”

⁴⁷Naitanna Puang Yesus sule Natanael umpellambi'i, iya ma'kadam untula' diona Natanael naua: “Petua'ia inde dio, mesa tungka to Israel to malolo penaba.”

⁴⁸Iya tappa mekutana Natanael lako naua: “Maaka hia susi anna malaä' muissam?”

Natimba'i Puang Yesus naua: “Indo anna tä'poko natambai Filipus, iya kuitako illaam kakuasaangku muokko' dio ibi'na kaju ara.”

⁴⁹Mane ma'kadai Natanael lako Puang Yesus naua: “O Tuangguhu, Änä'nako Puang Allataala! Tomahajanna si'dangko to Israel!”

⁵⁰Natimba' Puang Yesus naua: “Matappa' dakoka aka kutulasangko kuua puhangko kuita dio ibi'na indo kaju ara? La deem polepi too muita dako' kaha-kaha memängä-mängä puha anna ia too. ⁵¹Aka setongam-tonganna la muitakoa' langi' tibukka anna buda malaika'na Puang Allataala ma'sinule lu längäm lu yabo mai, Kao Änä' Mentolino napoeham.”

Uhu-uhuna tanda memängä-mängä napogau' Puang Yesus: Uwai napadadi anggur

2:1-12

2 Dua bengii lessu'na ia too deem kakabengam dio Kana, lembäna Galilea. Anna indo kakabengam ia too lao

[†]1:41 *To dilanti' la mepasalama'*: Kristus anna Mesias tontäm: ditula' *Kristus* illaam basa Yunani anna *Mesias* basa Ibrani. Bassim kalembasanna *To dilanti' la mepasalama'*.

[‡]1:42 *Yohanes* illaam basana to Yahudi, sanganna Yona battu haka Yunus (Mat. 16:17).

duka' nalomba indona Puang Yesus.
²Diuaam duka' Puang Yesus sola ingganna passikolanna. ³Tappana naita indona puham anggurna indo puäna saha, iya umpa'tula'im Puang Yesus naua: "Tappu'um anggurna."

⁴Iya natimba'im naua: "Akanna Kaoi muuaam indo? Tä'pi lambi' wattunna la umpa'paissangannä' kaleku."

⁵Iya umpa'tula'im ingganna to ma'tahia indona Puang Yesus naua: "Iai too napahesangkoa', ianna' untuhu'i."

⁶Eta too deem annam busso batu dipatoka si dipa'penggei uwai si napembase to Yahudi situhu' kabiasaanna. Issinna indo mesa busso kiha-kiha la si sahatu' lite'.

⁷Nauam Puang Yesus lako indo to ma'tahia: "Ponnoi asannia' uwai itim matim busso." Iya naponnoi asammi duka'.

⁸Puhai, naua oom Puang Yesus lako indo to ma'tahia: "Seosanni kapalana hame-hame itim uwai anna umbeenni." Iya nababaammi lao indo kapalana hame-hame ⁹anna nasändä'i indo uwai mengkubalimmi mendadi anggur. (Sapo' tä' ia naissam kapalana hame-hame kabuttuanna indo anggur ia too. Anggam to usseo'i indo uwai muissanni). Puhai nasändä', iya untambai siahham indo muane to mahassam dipakebaine ¹⁰anna nauaanni: "Biasanna si napayolo to muola saha anggur handam mapia napaihusam tosabena. Nasanta'pi mane dibeenni anggur biasa. Sapo' iko-iko, deem liupi anggur handam mammi' umpatoka sule lako temo."

¹¹Iam too uhu-uhuna tanda memängä-mängä napogau' Puang Yesus. Kaha-kaha ia too napogau' dio Kana lembäna Galilea. Napateemmi too

umpa'paitaam kamatandeanna anna nakatappa'i ingganna passikolanna. ¹²Puhai ia too, le'ba'um Puang Yesus dokko Kapernaum sola indona, ingganna solasubunna muane, anna ingganna passikolanna. Tohhoim dio sanaka-naka benginna.

Puang Yesus ungkeaha'i to ma'balu' illaam Banua Debata

2:13-22

Mat. 21:12-13; Mrk.

11:15-17; Luk. 19:45-46

¹³Tappana la mahuku'i wattunna napakahoa' to Yahudi allo Kalappasanna dio mai kasabuasam,^f iya le'ba'um Puang Yesus längäm Yerusalem.

¹⁴Sulei längäm ullambi'um Banua Debata naongei buda pa'balu' sapim anna pa'balu' domba, sola pa'balu' dangam-dangam. Buda toi tau muokko' umpa'pesukasam doi'na. ¹⁵Umpapia siahham pesämbä' kahahham Puang Yesus anna nahahi asanni illaam mai Banua Debata indo ingganna olo'-olo' susi sapim teem domba. Anna napembalisanni ingganna mejana to si umpa'pesukasam doi' lambi' titantam asam lao indo doi'na. ¹⁶Mane ma'kadai lako indo pa'balu' dangam-dangam naua: "Baba asannia' lao, daa umpadadi pasa'a' Banuanna Ambeku!" ¹⁷Iya nakilalaim indo ingganna passikolanna issinna Battakada Debata naua: "O Puang Allataala, pangkaha'ku lako Banuammu la umpatatta' penabangu."[§]

¹⁸Iya buda to kasallena to Yahudi umbali-bali Puang Yesus naua: "Paitaipakanni tanda memängä-mängä anna mala tandaam lako kami' kiua abana muampuam si'dako kakuasaam!"

^f2:13 *allo Kalappasam*: Petua' dioi pemasiä'na Mat. 26:2.

§2:17 Puj. 69:10.

¹⁹Natimba'i Puang Yesus naua: "Kadakeannia' inde Banua Debata anna kupake'de'i sule illaam allo katallunna."

²⁰Iya nauaim indo to Yahudi: "Appa' pulo annam taunna diolaam umpapai inde Banua Debata, iya la mala iko tallunggallo muolaam umpake'de' sule?" ²¹Sapo' indo nauaam Puang Yesus Banua Debata kalena hi tia. ²²Puha ham dipatibangom Puang Yesus dio mai alla'-alla'na to mate mane nakilalai ingganna passikolanna naua: "Puha siam tia naua." Mane nakatappa'i hi pole' passikolanna issinna Battakada Debata anna ingganna kada puha natula' Puang Yesus.

Puang Yesus ullosa tama issi penabanna hupatau

2:23-25

²³Mahassanni umpakahoa' allo Kalapasam Puang Yesus yabo Yerusalem, iya buda tau unkatappa'i aka deem tanda memängä-mängä napogau'. ²⁴Sapo' tä' la nakannangam Puang Yesus naua: "Nakatappa'i tongannä' indo tau buda," aka ullosa la tama issi penabanna ingganna hupatau. ²⁵Tä'um pahallu la dipomasiäsam diona hupatau aka nalosam Puang Yesus tama issi penabanna.

Puang Yesus sipa'tula' Nikodemus

3:1-21

3 Deem mesa tau isanga Nikodemus. Indo Nikodemus mesa to illaam kakalebuanna Parisi anna duka' mesa to kasallena to Yahudi. ²Pis-sam wattu bengi le'ba' umpellambi'i Puang Yesus anna nauaanni: "O Tuanguhu, kiissammi kiua Iko to nasuako Puang Allataala aka abana tä' deem moi podo la mesa tau la mala umpogau' tanda memängä-mängä umba

susi puha umpadadi ke tä'i nasahum Puang Allataala."

³Natimba'i Puang Yesus naua: "Setongam-tonganna tä' deem moi podo la mesa tau la mala mendadi umma' petauam illaam kapahentaanna Puang Allataala ke tä'i didadialam pole."

⁴Naua oom Nikodemus lako Puang Yesus: "La maakam ia susi, la mala haka tia mesa tomatua ma'pasule tama tambu'na indona mane disubungam polei!"

⁵Iya natimba'i oom Puang Yesus naua: "Setongam-tonganna maka' deem tau tä' didadialam dio mai uwai** anna Penaba Maseho, tau ia too tä' ia la mala mendadi umma' petauam illaam kapahentaanna Puang Allataala. ⁶Bätä puntinna hupatau nadadialam tomatuanna, sapo' bätä sungga'na nadadialam pole Penaba Maseho. ⁷Tä'ko la mängä-mängä ke kuuaangko: la pahallukoa' didadialam pole. ⁸Aka la susi hibu' ma'simbuhu' le'ba' untuhu'i pa'elo'na. Uhhingngia' uhhunna sapo' tä' muissanna' buttu umba ngei anna la lu umba ngei. Iya susim too duka' lako to nadadialam pole Penaba Maseho."

⁹Iya mekutana pole oom Nikodemus naua: "Akanna la malai dadi susi itim?"

¹⁰Natimba'im Puang Yesus naua: "Iko mesako duka' tuanguhu malangka' dio Israel, akanna la tä' di iko muissam?"

¹¹Kutulasangko setonganna, anggam kitula' anna kisa'bii indo kiissanna anna kiitanna. Sapo' mokakoa' unkatappa'i tula'ki. ¹²Kutulasammokoa' diona kaha-kaha inde lino anna tä' siam unkatappa'ia'. Iya la maakam ia susi la unkatappa'ia' ke kutulasangkoa' kaha-kaha diona suhuga? ¹³Tä'pi deem mesa hupatau puha längäm suhuga, sapo' Kao, Änä' Mentolino, buttu yaboä' mai suhuga mentama

****3:5** *didadialam dio mai uwai*: Tä' makaleso kalembasanna inde tula'. Deem muuai didadialam dio mai uwai kalembasanna *ditedo' tau*, deem toi muuai kalembasanna *disubungam illaam mai tambu'na indona*.

lino. ¹⁴Umba susi ula' gällä puha natandeam Musa yabo mesa kaju naosä' dio pohiallasam, la susimä' too duka' Kao, Änä' Mentolino la ditandeam,^{††} ¹⁵anna mala ingganna hupatau to unkatappa'ia' la ullambi' katuboam sule lako salako-lakona." ¹⁶Aka tä' deem pada sakasalle pa'kamasena Puang Allataala lako ma'hupatau illaam inde lino nasuhum umpebeem Änä' mesanna, anna mala ingganna to unkatappa'i tä'um la mate sungnga'na, sapo' la ullambi' katuboam sule lako salako-lakona. ¹⁷Aka taia pattujunna Puang Allataala ussua Änä'na mentama inde lino la umpassala hupatau, sapo' sule hi tia la mepasalama'. ¹⁸Ingganna to matappa' lako Änä'na Puang Allataala tä' ia la dipassala. Sapo' ingganna to tä' matappa' napassalam ia Puang Allataala aka tä' ia matappa' lako Änä' mesanna. ¹⁹Ia anna dipassalai tau ia too aka mentamam inde lino indo Kamasiäsam sapo' umpohäe leko' ia kamalillingam aka pa'palakoanna hupatau kadake. ²⁰Menna-menna umpogau' kakadakeam, tau ia too unghahidi' kamasiäsam anna moka lako, indana tandaanni gau' kadakena. ²¹Sapo' lako hupatau to manontom umpogau' pa'elo'na Puang Allataala, lu tama ia kamasiäsam anna mala tandaam diua situhu' ia pa'elo'na Puang Allataala pa'pogausanna.

**Tula'na Yohanes to si mantedo'
diona Puang Yesus**

3:22-36

²²Puhai ia too, le'ba'um lako Yudea Puang Yesus sola ingganna passikolanna anna tohhoi masäe-säe dio napasindum mantedo'. ²³Anna Yohanes ia mantedo' duka' dio Ainon sikahuku' Salim aka

buda uwai eta. Sule liu buda tau anna natedo'i. ²⁴(Tä'pi ditahungkum Yohanes wattu eta too.)

²⁵Wattu eta too deem sanaka-naka passikolanna Yohanes sipengka mesa to Yahudi diona kabiasaam kamapattingam illaam peadasam. ²⁶Iya umpelambi'im Yohanes anna nauaanni: "O Tuangguhu, unghilalaipaka Puang Yesus indo to umpasola dipe lambam libanna Salu Yordan, indo untulasangkam? Iya si mantedo'um duka' temo anna budam tau le'ba' lako."

²⁷Natimba'im Yohanes naua: "Tä' deem aka-aka la mala dadi ke tä'i buttu yabo mai Puang Allataala. ²⁸Puha sianna' uhhingngi indo kuaa: kao-kao taiaä' indo To dilanti' la mepasalama', sapo' disuaä' mendiolo la umpatokaanni lalam. ²⁹Aka sihhapam to dipakabem: Indo baine to mahassam dipakabem, muanena muampuanni. Anna sammuanena indo muane anggam tia ke'de' dio ampe'na ma'pehingngi. Anna tä' deem pada satilalla' uhhingngi tula'na indo sammuanena to mahassam dipakabem. Iya susimä' too duka' temo aka sihhapannä' sammuanena indo muane to dipakabem, sumpu katilallasangu. ³⁰Temo la lam dipaitoo'na anna kao-kao la tuttuam tä'um."

³¹Puang Yesus buttu yabo mai suhuga kasalle puha Ia anna la ingganna-ingganna sia. Anna iai too buttu illaam mai inde lino iam disangai to lino. Si ma'tula' ia diona kaha-kaha di lino. Puang Yesus buttu yabo mai suhuga untodom ingganna-ingganna sia. ³²Natula' asammi ingganna naitanna anna nahingnginna, sapo' tä' deem moi podo la mesa tau unkatappa'i indo tula'na. ³³Menna-menna unkatappa'i indo tula'na Puang Yesus, tau

^{††}**3:14** Napateem Musa anna mala si nanenne'i to Israel ke natombo'i ula', iya mala bono' (batai illaam Pah. 21:5-9). Susim too duka' Puang Yesus dipäso' yabo kaju sitambem anna mala ia too unkatappa'i, iam salama'.

ia too muangga' malolo Puang Al-lataala, ³⁴ aka Puang Yesus puha nasua Puang Allataala umpalanda' kadanna. Ia anna napalanda'i aka napaponnoi Puang Allataala Penaba Masehona. ³⁵ Puang Allataala Ambeta ungkamasei Änä'na anna puham napadokkoam asam lisu pala'na ingganna kakuasaam. ³⁶ Menna-menna matappa' lako Änä'na Puang Al-lataala, ullambi'um ia katuboam sule lako salako-lakona. Anna menna-menna tä' manuhu' lako, tä' ia la ullambi' indo katuboam. Sapo' tontä liu ia nahua aha'na Puang Allataala.

**Puang Yesus sipa'tula'
baine to Samaria**

4:1-42

4 Napekaheba asam to illaam kakale-buanna Parisi naua tuttuam buda tau umpellambi'i Puang Yesus anna natedo'i lambi' buda puha ia passikolanna anna la Yohanes. ² (Setonganna tä' deem ma'kale Puang Yesus mantedo', sapo' passikolanna mandi mantedo'.) ³ Tappana naissam Puang Yesus naua napekahebam to illaam kakalebuanna Parisi diona kaha-kaha ia too, iya umpelleim lembäna Yudea anna ma'pasulei lako lembäna Galilea.

⁴ Indo illaam pellaonna Puang Yesus tä' mala tala muolai lembäna Samaria. ⁵ Iya dioi Samaria ullambi'um mesa kota isanga Sikhar sikahuku' indo litä' napa'manasam Yakub lako änä'na isanga Yusuf. ⁶ Dio ongeam eta too deem mesa bujum disangai bujunna Yakub. Tä' deem pada samalupu'um Puang Yesus mellao, iya muokko'um dio ampe'na indo ba'ba bujum. Wattu eta too umbai' la tette' sapulo duam iallo. ⁷⁻⁸ Tahhu' ia passikolanna lako kota mualli kinande.

Pissananna sulem mesa baine to Samaria la tumimba. Ma'kadam Puang Yesus naua: "Indo', mala haka umbeennä' itim uwai kuihu'?"

⁹ Natimba'um indo baine naua: "O Tuam, iko to Yahudiko anna kao to Samariaä', akanna umpelau hä' kao uwai?" (Ia anna ma'kada susii aka si moka to Yahudi la deem kasilombun-ganna to Samaria.)

¹⁰ Natimba'im Puang Yesus naua: "Setonganna kela muissangko indo pa'pebeenna Puang Allataala anna menna umpelauiko uwai, tä' mala tala iko umpelauä' uwai anna la kubeengko uwai katuboam."

¹¹ Natimba'i indo baine naua: "O Tuam, tä' deem pese'omu anna inde bujum tä' deem pada samandalam. Iya la muala umbam iko ngei indo uwai katuboam? ¹² Yakub nene to kipunene iam too umbeengkanni inde bujum. Si naala eta duka' inde uwai naihu', susi ingganna änä'na teem olo'-olo'na. Us-sanga haka too kasalle puhako iko anna la Yakub?"

¹³ Iya nauam Puang Yesus: "Menna-menna muihu'i inde uwai bujum la tontä liu ia ussi'dim kamabähhängam. ¹⁴ Sapo' iai too muihu' indo uwai la kubeem tä'um ia deem la ussi'dim kam-abähhängam sule lako salako-lakona. Aka indo uwai la kubeem la mendadim kalimbuä tamatti' illaam kalena la umbeenni katuboam sule lako salako-lakona."

¹⁵ Natimba' indo baine naua: "O Tuam, beennä' kao indo uwai anna mala tä'mä' si mabähhä, anna tä'mä' manggi' sule liu tumimba eta inde."

¹⁶ Ma'kada oom Puang Yesus naua: "Laoko tambai muanemu ammu sulea' eta inde."

¹⁷ Iya nauam indo baine: "Aka tä'um deem muaneku."

Ma'kada pole oom Puang Yesus naua: "Tappa' tula'mu. ¹⁸ Aka iko pellimangko kemuane, anna indo muane umpasola temo taia muanemu. Dadi indo tula'mu inggena' tappa'."

¹⁹Iya nauam indo baine: “O tuam, kuissammi pole' kuua Iko mesako nabi. ²⁰Indo nene to kipunene sangngim umpenombai Puang Allataala eta inde tanete. Sapo' ikoa'-iko to Yahudi si muuaa': ‘Anggam yabo Yerusalem mala naongi hupatau menomba längäm Puang Allataala.’”

²¹Ma'kada pole oom Puang Yesus naua: “O indo', katappa'ä' aka pisham wattu tä'um la angga eta inde tanete la naongi hupatau umpenombai Ambeta, anna tä' toi la anggam yabo Yerusalem. ²²Ikoa'-iko to Samaria umpenombaiko' to tamuissam, sapo' kami'-kami' to Yahudi si umpenombaikam to kiissam, aka kasalamasam buttu dio mai to Yahudi. ²³Sapo' la deem wattunna ingganna tau to menomba si'da-sia la umpenombai Ambeta sola unä' penabanna[‡] situhu' kamaloloam. Anna wattu ia too sulem. Aka abana inna to menomba susi ia too napohäe Ambeta Puang Allataala. ²⁴Abana Puang Allataala Ia mempenaba.[¶] Dadi ingganna tau to la menomba lako, pahallu menomba sola unä' penaba situhu' kamaloloanna Puang Allataala.”

²⁵Iya naua oom indo baine: “Kuisam duka' kuua la sule To dilanti' la mepasalama', indo si diuam Kristus. Maka' sulem, la napaissanni asangkia' ingganna-ingganna sia.”

²⁶Iya nauam Puang Yesus: “Kaom too inde, to umpa'tula'iko.”

²⁷Iya sulei siaham duka' passikolanna. Sangngim mängä-mängä muita Puang Yesus sipa'tula' baine. Sapo' tä' deem moi podo la mesa ungkutanai naua: “Aka umpahalluam?” battu haka la naua: “Akanna sipa'tula'koa' inde dio baine?” ²⁸Iya umpellei bábäm tim-

baanna indo baine dio ampe' bujum, anna le'ba'i lako kota umpa'tulasam ingganna solana naua: ²⁹“Maikoa' talao pelambi'i indo tau to untulasam asannä' pa'pogausangku lessu'. Umbai' la iangka indo To dilanti' la mepasalama'?” ³⁰Iya le'ba'im indo issinna kota lao umpelambi'i Puang Yesus.

³¹Tappana le'ba' indo baine lako kota, iya nauaammi passikolanna: “O Tuangguhu, maingko tapangngandea'.”

³²Sapo' naua hi Puang Yesus: “Deem siam Kao duka' kinandeku tä' muissanna.”

³³Iya sipa'tula'-tula'um indo passikolanna naua: “Deem siangka tia umbai' umbabaanni sule kinande?”

³⁴Naua oom Puang Yesus: “Indo Kao kinandeku, la untuhu'ä' pa'elo'na To ussuaä' anna la kupasuppi' indo pengkähängam puha nabeennä'. ³⁵Si naua tau: ‘Appa'pi bulanna mane pepaheanni,’ sapo' kutulasangkoa': pahandannia' ingganna uma sangngim matässä'um pahena la malam dipepahe. ³⁶Napahandu'um to mepahe la untahima sahona nasuhum ingganna to mangngambo' anna to mepahe pada-pada masannam nalambi' bua pengkähäna. Indo bua pengkähä kalembasanna to ullambi' katuboam sule lako salako-lakona.

³⁷Abana tappa' indo tula'na tomatua naua: ‘Senga' to mangngambo' senga' to umpepahei.’ ³⁸Kusuakoa' lao umpepahe uma taikoa' muambo'i. Aka tau senga' unγκähäi anna mala ikoa' nalambi' bua pengkähäna.”

³⁹Dadi buda to Samaria issinna indo kota matappa' lako Puang Yesus aka naua indo baine: “Natulasannä' ingganna pa'pogausangku indo puha ku-

[‡]4:23 *sola unä' penabanna*: mala duka' kalembasanna *sola kuasanna Penaba Maseho*.
[¶]4:24 *Puang Allataala Ia mempenaba*: kalembasanna, tä' deem bätä puntinna Puang Allataala anna muongi asam ingganna ongeam.

pogau'." ⁴⁰Nasuhum silambi'i indo to Samaria Puang Yesus, iya napelaum anna mala tohhopi. Lambi' tohhopi duka' dua bengi eta too. ⁴¹Iya tuttuam budam tau matappa' lako Puang Yesus aka nahingngim indo pepa'ghuanna.

⁴²Sangngim naua pole' lako indo baine: "Temo matappa'kam taia kahana indo mandi pa'tula'mu. Sapo' aka kihingngim sola talingangki, kiita sola matangki, anna kiissammi kiua abana la To la umpasalama' issinna inde lino."

**Puang Yesus umpabono'
änä'na mesa to dipake**

4:43-54

⁴³Tappana dua bengi tohho Puang Yesus dio Samaria, iya le'ba'um lako Galilea. ⁴⁴(Abana deemmi naua Puang Yesus: "Mesa nabi tä' si dipa'kasallei illaam botto litä'na.") ⁴⁵Sulei lako Galilea Puang Yesus, iya sangngim tilalla' to dio untahima manappai aka naita asammi indo napogau' yabo Yerusalem wattunna allo Kalappasam. Aka längänni duka' indo tau ma'pakahoa'.

⁴⁶Iya ma'pasulem Puang Yesus lako Kana dio Galilea indo naongeti umpopengkubalim uwai mendadi anggur. Wattu eta too dio kota Kapernaum deem mesa to dipake mahassam masaki änä'na. ⁴⁷Tappana nahingngi diua sulem Puang Yesus dio mai Yudea, iya le'ba' siahham napellambi'i anna mengkahumase-masei melau naua: "Kela mala, ullobbannä' änä'ku lako Kapernaum anna umpabonosannä' aka diampaim penabanna."

⁴⁸Iya ma'kadam Puang Yesus lako indo tau naua: "Maka' tä'koa' si muita tanda memängä-mängä, iya si tä'koa' matappa'."

⁴⁹Iya naua oom indo to dipake: "O Tuam kamaseiä', lombannä' änä'ku sumala illaampi penaba."

⁵⁰Iya naua pole oom Puang Yesus: "Laongko, aka bono'um indo änä'mu."

Sampe unगतappa'i tula'na Puang Yesus indo tau anna le'ba'i. ⁵¹Mane muola lalam anna sitammum sanakanaka sabua'na, iya nauaammi: "Bono'um indo änä'mu."

⁵²Iya mekutanam lako indo to untamui naua: "Tette' sanaka anna bono'i?"

Nauaim: "Tette' mesa loe allo isamai anna bono'i lalla'na." ⁵³Nakilalai siahham ambena indo änä'-änä', aka wattu etam too anna nauaanni Puang Yesus: "Bono'um änä'mu." Nasuhum matappa' asam sahapunna lako Puang Yesus.

⁵⁴Iam too tanda memängä-mängä kapenduanna napogau' Puang Yesus dio Galilea sule polena dio mai Yudea.

**Puang Yesus umpabono' mesa
tau dio limbä Betesda**

5:1-18

5 Puhai ia too le'ba'um Puang Yesus längäm Yerusalem aka la unगतadioi heem mesa allo kasallena to Yahudi.

²Yabo Yerusalem sikahuku' Ba'ba Domba deem mesa limbä disangai illaam basa Ibrani Betesda, lima sahia'na. ³Dio indo sahia'na buda to masaki metindo; deem to buta, deem to kempo' anna deem to mate kalena. [Indo to masaki muampai passe'bo'na indo limbä. ⁴Aka si deem wattunna sule mesa malaika'na Puang Allataala dio indo limbä anna napopasse'bo'i uwainna. Anna iai too yolo indo to masaki dokko ke passe'bo'um, iya iam bono' moi maaka susi sakinna.]

⁵Dio indo ampe' limbä deem mesa muane tallu pulom kahua taunna masaki. ⁶Tappana naita Puang Yesus indo to masaki anna naissam toi naua masäem masaki, iya nakutanaim naua: "Maelo'ko la bono'?"

⁷Natimba'im indo to masaki naua: "O Tuam, aka tä' deem tau umpadokkoä'

inde dio limbä ke passe'bo' oom. Aka mane si kupenandai la dokko anna nay-oloi ohamä' tau senga'."

⁸Iya naua oom Puang Yesus lako indo tau: "Bangongko, babai ampa'mu ammu pellao." ⁹Iya tappa bono' siaham indo tau. Iya umbabam ampa'na anna mellaoui.

Kaha-kaha ia too dadi illaam allo Katohhoam ¹⁰nasuhum nauaam to kasallena to Yahudi indo to mane bono': "Tentomai allo Katohhoam. Dadi tä'ko mala umbaba ampa'mu."

¹¹Sapo' naua indo tau: "Aka indo hi tia to umpabono'ä' ingngena' ussuaä' naua: 'Babai ampa'mu ammu pellao.'"

¹²Nakutanaim naua: "Menna indo ussuako naua: 'Babai ampa'mu ammu pellao?'"

¹³Sapo' tä' naissam indo to mane bono' menna indo to umpabono'i, aka mengkapa'de bäbäm Puang Yesus illaam alla'-alla'na tau buda. ¹⁴Dako'i, sitammum Puang Yesus indo tau illaam Banua Debata, iya nauaammi: "Temo bono'ungko. Dadi tä'ungko la umpogau' pole dosa, indana deenni napolalam nahua poleko mabanda' puha ia anna indo sakimmu lessu'." ¹⁵Iya le'ba' siaham indo tau anna natulasanni to kasallena to Yahudi naua: "Puang Yesus dia indo to umpabono'ä'." ¹⁶Napolalam sangngim napahandu'um pole' undahha Puang Yesus aka keaha' umpabono' tau illaam allo Katohhoam.

¹⁷Iya ma'kadam Puang Yesus naua: "Ambeku mengkähä liu sule lako temo anna mengkähä liuä' duka'." ¹⁸Tula' iam too napolalam to kasallena to Yahudi tuttuam umpeä lalam la umpatei Puang Yesus. Anu' tä' angga mandi indo untekka kabiasaam illaam peadasam diona allo Katohhoam nasuhum keaha', sapo' indo naua polepi: "Ambeku Puang Allataala," aka kalembasanna ussanga kalena sipadaam Puang Allataala.

Kakuasaanna Puang Yesus, Änä'na Puang Allataala

5:19-29

¹⁹Iya natimba'im Puang Yesus lako indo to kasallena to Yahudi naua: "Setongam-tonganna tä' tia deem aka-aka la mala kupogau' kela kakuasaam kalekui. Anggam mala kupogau' indo si kuitanna napogau' Ambeku. Iai too napogau' Ambeku, ia siam too duka' kupogau'. ²⁰Aka napakamajää' Ambeku anna napaitai asannä' ingganna si napogau'na. La kasalle puhapi too napaitaiä' Ambeku lambi' mängä-mängäkoa'. ²¹Umba susi Ambeku umpatubo sule to mate anna nabeenni katuboam, susimä' too duka' umpebeem katuboam lako to maelo' kubeem. ²²Taiam Ambeku la umpopa'tadongkongam hupatau. Sapo' Kaom nabeem kakuasaam la umpopa'tadongkongam hupatau. ²³Napateem Ambeku anna mala ingganna hupatau napa'kasalleiä' umba susi umpa'kasallei Ambeku. Menna-menna tä' umpa'kasalleiä', tau ia too tä' duka' umpa'kasallei Ambeku to ussuaä'.

²⁴Setongam-tonganna ingganna to umpehingngii manappai inde tula'ku anna matappa' lako Puang Allataala to ussuaä', ullambi'um ia katuboam sule lako salako-lakona. Tä' la nalambi' pesämbä', sapo' lappa'um dio mai kamateam anna ullambi' katuboam. ²⁵Setongam-tonganna la sule wattunna anna abana wattunnam temo to mate la uhhingngi kamahanna Änä'na Puang Allataala. Anna lako to uhhingngii la ullambi' katuboam. ²⁶Umba susi Ambeku naongeti buttu katuboam, iya susimä' too duka' napadadiä' to la naongeti buttu katuboam. ²⁷Nabeennä' kakuasaam la umpopa'tadongkongam hupatau aka Kaom too Änä' Mentolino.

²⁸Tä'koa' la mängä-mängä uhhingngii ia too aka la sule wattunna ingganna to illaammi ku'bu' la uhhingngi kamahangku, ²⁹anna la messubum illaam mai ku'bu'. Ingganna to ma'gau' mapia la tibangom anna la ullambi' katuboam sule lako salako-lakona. Sapo' to ma'gau' kadake la tibangom anna la nalambi' ia pesämbä'."

Kasa'biam diona Puang Yesus

5:30-47

³⁰"Tä' deem aka-aka mala kupogau' kela situhu'i kakuasaam di kaleku. Anggamä' mala umpopa'tadongkongam hupatau la situhu'na pahentana Puang Allataala. Anna ingganna kattuangku malolo aka taia pa'elo' di kaleku kutuhu', sapo' pa'elo'na To ussuaä'. ³¹Kela Kao mandi umbeengkoa' kasa'biam diona kaleku, iya la mala tä' unkatappa'ia'. ³²Sapo' deempi sa'bi senga' to umpaissaniko' diona kaleku anna kuissam kuaa indo passa'biinna tappa'. ³³Puhangkoa' ussua tau umpellambi'i Yohanes anna natulasammokoa' passa'biinna diona kaleku. Indo passa'biinna tappa'. ³⁴Setonganna taia passa'biinna hupatau kupahalluam, sapo' kupokada diona passa'biinna Yohanes aka kuaa anna malakoa' dipasalama'. ³⁵Indo Yohanes sihhapam lampu lekke' umballoikoa' anna umpohäenna' ia umballoi salakoa'. ³⁶Sapo' deem Kao kasa'biangku kasalle puha ia anna la indo passa'biinna Yohanes. Aka indo kasa'biangku? Indo diuaam kasa'biangku, inde pengkähängam kukähä temo nabeenna' Ambeku anna la kupasule lako. Aka etam too naongei tandaam diua Ambeku ussuaä'. ³⁷Ambeku ussuaä' Ia siam duka' ussa'bii diona kaleku. Tuli tadeempi uhhingngia' kamahanna battu haka la muitaa' hupanna, ³⁸anna kadanna tä' deem

tohho illaam penabammua', aka tä'koa' unkatappa'ia' inde mesaa' to nasua. ³⁹Si bassa'koa' umpe'guhui issinna Battakada Debata aka ussanga' iam la umpolanna' ullolongam katuboam sule lako salako-lakona. Anna tileta' illaam indo Battakada Debata kasa'biam diona kaleku. ⁴⁰Moinna anna susi sapo' moka hako' sule umpellambi'ia' to la muongeia' untammu katuboam sule lako salako-lakona. ⁴¹Taia Kao pa'pakasalle hupatau kupeä. ⁴²Aka kuissam asammokoa'. Kuissammi kuaa tä' deem la kende'a' illaam penabammu la ungamasei Puang Allataala. ⁴³Aka suleä' Kao sola kakuasaanna Ambeku, iya untumpu pala'ä'. Pissananna sule tau senga' sola kakuasaam kalena, iya untahima leko'a' ia. ⁴⁴Maakam ia susi, la malakoa' matappa' ke anggam pa'pakasalle hupatau umpeä, anna mokakoa' umpeä pa'pakasalle dio mai Puang Allataala Debata mesa?"

⁴⁵Daa ussangaia' Kao la umpasalakoa' dio olona Ambeku, sapo' Musa hia la umpasalakoa' indo to uhmannuanna'. ⁴⁶Sapo' maka' unkatappa'ikoa' Musa, setonganna la unkatappa'ia' duka' anna mane aka diona kaleku natuli'. ⁴⁷Sapo' maka' tä' unkatappa'ia' indo to natuli' Musa, iya la maakam ia susi la unkatappa'ia' tula'ku!"

Puang Yesus umpande la'bi lima sa'bu tau

6:1-15

*Mat. 14:13-21; Mrk.
6:32-44; Luk. 9:10-17*

6 Masäe-säei puhanna ia too, le'ba'um Puang Yesus sola passikolanna lambam libam le'bo' Galilea (battu diua le'bo' Tiberias). ²Tä' deem pada sabuda tau muula'i libam, aka muitam indo tanda memängä-mängä puha napadadi Puang Yesus umpabono' buda

to masaki. ³Iya le'ba'um Puang Yesus längäm tanete-nete anna muokko'i yabo sola ingganna passikolanna. ⁴Eta too mahuku'um wattunna la napakahoa' to Yahudi indo allo Kalappasanna dio mai kasabuasana.^{§§} ⁵Tappana mennenne' Puang Yesus lao pali', iya muitam tau bu'dä' sule umpellambi'i. Iya ma'kadam lako Filipus naua: "La lu umbakia' ngei mualli kinande anna mala dipande inde lako tau?" ⁶(Illaam siam penabanna Puang Yesus indo la napogau', sapo' ia anna ma'kada susi aka la umpangngitai Filipus.) ⁷Natimba' Filipus naua: "Moi la pa'duapuloam bidä* dialliam hoti, tala sihuai naande inde lako tau pada buda, moi la ditaba si sai'di."

⁸Ma'kada mesa passikolanna Puang Yesus isanga Andreas, solasubunna Simon Petrus naua: ⁹"Deem inde änä'-änä' muane muampuam lima hoti anna dua bau. Sapo' la dipoakam ia duka' pada, la naande tau pada budanna!"

¹⁰Ma'kada oom Puang Yesus naua: "Uaanni itim matim tau anna muokko'i." Iya muokko'im indo tau lako humpu', aka indo ongeam naongeti kehumpu'. Budanna indo tau, muane mandipi ia anna lima sa'bui. ¹¹Mane naalai Puang Yesus indo hoti anna nakuhhu'i sumanga' längäm Puang Allataala. Puhai ia too, natabam indo hoti lako tau buda. Susi siam duka' indo bau. Iya sangngim mangngandeim, lambi' tanapuha-puha.

¹²Puha asanni mangngande, iya ma'kada pole oom Puang Yesus lako passikolanna naua: "Hempum asannia' indo tää'nam diande indana deenni ditibe bäbä." ¹³Nahempummi la'binna indo lima hoti tää'nam naande tau buda, iya sapulo duapi baka ponno.

¹⁴Tappana naita tau buda indo tanda memängä-mängä puha napogau' Puang Yesus, iya ma'kadaim naua: "Setonganna iam too inde indo Nabi to dipemmitai la sule inde lino." ¹⁵Sapo' nalosa Puang Yesus naua: "Inde mai tau buda sulei la naalää' aka la napassaä' napotomahaja." Nasuhum le'ba' membuni längäm tipatanetena.

Puang Yesus mellao yabona uwai

6:16-21

Mat. 14:22-33; Mrk. 6:45-52

¹⁶Tappana la bengi kale, iya le'ba'um ia passikolanna Puang Yesus dokko bihim le'bo'. ¹⁷Pissananna la malillinni, tä' liu siam Ia sule Puang Yesus umpellambi'i. Iya längännim lopi passikolanna anna lambanni le'bo' lu libam Kapernaum. ¹⁸Mahassanni illaam le'bo' lopinna, iya napahandu'um tilulum bombanna le'bo' aka hibu' kasalle. ¹⁹Umbai' annanni kilo naola, muitam Puang Yesus mellao yabona uwai napenandai lopinna. Iya sangngim mahea'um. ²⁰Sapo' ma'kada Puang Yesus naua: "Daa ummahea'a' aka Kao siam too Kao." ²¹Iya sangngim tialam pole' inabanna umpalängäm lopi Puang Yesus, anna wattu eta siam too anna landa'i lopinna lako indo ongeam la naongeti.

Buda tau umpeä Puang Yesus

6:22-24

²²Masiäi, nakilalaim indo tau buda, tohhonapi dipe tando libanna le'bo', naua sabengi anggum mesa lopi eta. Naissam toi naua le'ba'um indo lopi napake passikolanna Puang Yesus, sapo' tä' sola Puang Yesus. ²³Pissananna, sulem

§§6:4 *allo Kalappasam*: Petua' dioi pemasiä'na Mat. 26:2.

*6:7 *pa'duapuloam bidä*: illaam basa Yunani sipadaam dua hatu' dinar. Mesa dinar pada sahona tau sangngallo mengkähä.

sanaka-naka lopi buttu dio mai kota Tiberias anna tisampoi dio sikahuku' indo naongi tau buda muande hoti puha napelauam tamba' Puang Yesus Debatanta. ²⁴Tappana naita tau buda pa'dem Puang Yesus sola passikolanna, längäm asammi indo lopi anna le'ba'i lako Kapernaum umpeä Puang Yesus.

Puang Yesus Ia Kinande Di Ada'

6:25-59

²⁵Tappana silambi' Puang Yesus anna indo tau buda dio tando libanna indo le'bo', iya nakutanaim naua: "O Tuangguhu, piham ammu sule?"

²⁶Iya natimba'im naua: "Setongam-tonganna kuissam kuua ia anna uh-huttu'ä' taia kahana muissanna' kalem-basanna indo tanda memängä-mängä puha kupadadi, sapo' uhhuttu'ä' aka nadea'ingkoa' indo hoti puha muande. ²⁷Daa ungdähää' kinande la puha anna la bosu. Indo hia kinande la sule lako salako-lakona la ungdähää'. Kinande ia too la buttu di Kao, Änä' Mentolino to puha natuho anna nabeem kakuasaam Ambeta Puang Allataala."

²⁸Mekutana oom lako naua: "Aka la kipogau' la situhu'na pa'elo'na Puang Allataala?"

²⁹Natimba' Puang Yesus naua: "Indo la naphäena Puang Allataala, iya la matappa'koa' di Kao to nasua Puang Allataala."

³⁰Iya nauaim: "Maka' susi, la tanda memängä-mängä aka la umpadadi anna mala kikatappa'iko? Aka la umpogau'?"

³¹Aka indo nene to kipunene puham muande indo kinande isanga manna dio pohiallasam. Iam too indo tisuha' illaam Battakada Debata naua: 'Nabeemmi kinande buttu yabo mai suhuga naande.'"

³²Natimba' Puang Yesus naua: "Setongam-tonganna taia Musa umbeengkoa' kinande yabo mai suhuga, sapo' Ambeku hi too Kao umbeengkoa'

kinande taditondom buttu yabo mai suhuga. ³³Aka indo kinande nabeem Puang Allataala iam too indo to buttu yabo mai suhuga umpatubo hupatau illaam lino."

³⁴Iya nauaim: "O Tuangguhu la um-beem liukam indo kinande."

³⁵Natimba' Puang Yesus naua: "Kaom too indo kinande katuboam. Menna-menna sule umpellambi'ia' anna nakat-appa'ia', tä'um ia deem la tadea' anna mabähäm sule lako salako-lakona.

³⁶Puhangkoa' kuuam: 'Moinna anna balimä' muita, sapo' tä' liu siangkoa' matappa'.'

³⁷Ingganna indo tau nabeennä' Ambeku la sule napellambi'ia'. Anna tä' la kutumpu pala' ingganna indo to sule umpellambi'ia'. ³⁸Aka buttu yaboä' mai suhuga tä' la ma'palako situhu' pa'elo'ku, sapo' la pa'elo'na To ussuää'. ³⁹Anna indem ia pa'elo'na to ussuää': ingganna to puha nabeennä', tä' deem la kupäbäi pa'de moi podo la mesam. Anna la kuäkä' asam längäm indo tau illaam allo ma'katampasanna. ⁴⁰Aka tungka iam too inde pa'elo'na Ambeku: ingganna to muitai Änä'na anna nakat-appa'i, la ullambi' katuboam sule lako salako-lakona, anna la kuäkä' längäm ke allo ma'katampasannai."

⁴¹Sangngim ma'naum-naum to Yahudi aka indo naua Puang Yesus: "Kaom too kinande tuhum yabo mai suhuga." ⁴²Nauaim: "Aka taia haka tia inde Yesus änä'na Yusuf! Taissam dia' ia indona sola ambena. Maaka anna mala ohi naua: 'To buttu yaboä' mai suhuga!'"

⁴³Natimba' Puang Yesus naua: "Daa umpa'naum-naunna'. ⁴⁴Tä' deem mesa tau la sule umpellambi'ia' ke taiai pahhuntu'na Ambeku to ussuää'; anna iam too la kuäkä' längäm ke allo ma'katampasannai. ⁴⁵Deem tisuha' illaam suha'na nabi naua: 'La sangngim

napa'guhu Puang Allataala.[†] Dadi lako si mesa-mesa tau to puha uhhingngii anna untuhu'i pepa'guhuanna Ambeku la napellambi'ia'.⁴⁶ Indee tä' diua deemmi tau muita Ambeku sapo' anggam Kao deemmi muita Ambeku aka buttu yaboä' mai Puang Allataala.⁴⁷ Setongam-tonganna menna-menna matappa'um, tau ia too muampuammi katuboam sule lako salako-lakona.⁴⁸ Kaom too indo kinande katuboam.⁴⁹ Nene to umponenea' puha muande indo kinande isanga manna dio pohiallasam, sapo' matei siam duka'.⁵⁰ Sapo' tä' ia la susi indo kinande buttu yabo mai suhuga. Aka ingganna to muandei kinande ia too tä'um la mate.⁵¹ Kaom too indo kinande to umbaba katuboam, buttu yabo mai suhuga. Menna-menna muandei kinande ia too la tubo sule lako salako-lakona. Indo kinande kupebeem kalembasanna baleku kupebeem anna mala hupatau illaam inde lino ullambi' katuboam."

⁵² Tappana nahingngi to Yahudi kada ia too, sipengka-pengkam naua: "Maaka hia inde tau anna la mala hia balena mebeem diande?"

⁵³ Natimba' Puang Yesus naua: "Setongam-tonganna maka' tä'koa' muande baleku anna muihu' hahaku to disangai Änä' Mentolino, tä' si'dakoa' too la muampuam katuboam.⁵⁴ Sapo' menna-menna muande baleku anna muihu' hahaku muampuammi ia katuboam sule lako salako-lakona, anna la kupatiäkä' längäm ke allo ma'katampasannai.

⁵⁵ Aka baleku kinande si'da-sia, anna hahaku uwai ihu' si'da-sia.⁵⁶ Menna-menna muande baleku anna muihu' hahaku, la tontä liu tohho illaam kaleku anna Kao la tontä liuä' duka' tohho il-

laam kalena.⁵⁷ Ambeku to ussuää' too'na katuboam. Anna ia angku tubo aka Ambeku. Susim too duka' lako ingganna to muande baleku la tubo aka Kao.⁵⁸ Kaom too kinande buttu yabo mai suhuga. Tä' susi indo kinande naande nenemua'. Aka moi anna naandei sapo' sangngim matei siam. Sapo' ingganna to muandei indo kinande to buttu yabo mai suhuga, iam too la tubo sule lako salako-lakona."

⁵⁹ Ingganna ia too natula' Puang Yesus indo anna ma'pa'guhui illaam pa'sambajanganna to Yahudi dio Kapernaum.

Puang Yesus napellei buda passikolanna

6:60-66

⁶⁰ Tappana uhhingngi kadanna Puang Yesus, iya budam passikolanna muuai: "Inde pepa'guhuam mabanda'. Deem daka tia la nabela muabihanni!"

⁶¹ Sapo' nalosa siam Puang Yesus indo ma'naum-naum passikolanna diona indo pepa'guhuanna. Iya ma'kadam naua: "Napohusa' daka' too penabammu inde tula'ku? ⁶² La maakangkoa' iko ke muitangkoa' Änä' Mentolino[‡] la ma'pasule längäm ongeam kabuttuanna? ⁶³ Kaha-kaha mehhipataunna tä' mala umpatubo hupatau. Sapo' Penaba Maseho hia to umpatubo hupatau. Inde tula'kua' matim buttu di Penaba Maseho anna iam too la umbabakoa' lako katuboam si'da-sia. ⁶⁴ Moinna anna susi ia too deem siangkoa' tä' matappa'." (Aka naissam loppo'um Puang Yesus mengkalao dio mai to tä' matappa' anna indo to la umbalu'i.)

⁶⁵ Mane naua polei Puang Yesus: "Iam too anna kupaissanningkoa' kuua tä'

[†]6:45 Yes. 54:13.

[‡]6:62 Änä' Mentolino: Kalena Puang Yesus nauaam.

deem mesa tau la mala umpellambi'ää' ke taiai pantuhona Ambe'."

⁶⁶ Etam too pahandu'na buda passikolanna umpellei anna mokam untuhu'i.

Pangngakuanna Simon Petrus

6:67-71

⁶⁷ Iya mekutanam Puang Yesus lako indo to sapulo dua passikolanna naua: "Maelo' dakoka' duka' umpelleiä'?"

⁶⁸ Natimba' Simon Petrus naua: "O Debata! La lu umba polengkam kami' ngei ke taikoi kitinandai? Aka anggam ia tula'mu mebaba lako katuboam sule lako salako-lakona. ⁶⁹ Kikatappa'im anna ki-issammi kiua Ikom too indo To Maseho buttu yabo mai Puang Allataala."

⁷⁰ Mentimba'um Puang Yesus naua: "Ke Kao hia umpileikoa' inde to sapulo dua. Moi anna susi sapo' deem dia mesa solamua' mendadi setam." ⁷¹ Inde nauaam Puang Yesus, Yudas änä'na Simon Iskariot. Aka moi anna tihekem duka' Yudas to sapulo dua passikolanna, sapo' ia hi la umbalu' Puang Yesus ke dako'i.

Puang Yesus sipa'tula' siundu'na

7:1-9

7 Puhai ia too ma'lao-lao oom Puang Yesus ullelei tondä' dio Galilea. Moka ia lako Yudea aka ma'pattuju to kasallena to Yahudi la napatei. ² Wattu eta too mahuku'um allo kasallena to Yahudi isanga allo kasalle Bahum Daum.[¶] ³ Dadi sangngim ma'kada siundu'na Puang Yesus naua: "Tapelleia' inde ongeam anna laokia' lako Yudea anna mala naita pengkähängammu ingganna passikolammu. ⁴ Aka tä' tia deem tau la umbuni pa'pogausanna ke maelo'i la kaissangam. Si umpogau' siangko tanda memängä-mängä, dadi

pa'paitaanni lako ingganna issinna lino kaha-kaha ia too anna malako kaissangam!" ⁵ Susim too tula'na siundu'na aka tä' nakatappa'i.

⁶ Iya mentimba'um Puang Yesus naua: "Aka tä'pi Kao lambi' wattungna la umpa'paissangannä' kaleku. Sapo' ikoa' iko wattungna liu. ⁷ Tä' iko deem lalanna la nakabassikoa' inde lino, sapo' Kao-kao inna la nakabassiä' aka si kutulasam liu gau' kadakena. ⁸ Laokoa' iko lombai indo allo dipakahoa' temo. Tä'pä' Kao la mala ullombai aka tä'pi lambi' wattungku." ⁹ Susim too inde tula'na Puang Yesus lako siundu'na, anna tohhopi ia dio Galilea.

Puang Yesus ma'pa'guhu illaam allo kasalle Bahum Daum

7:10-24

¹⁰ Lessu'i indo siundu'na Puang Yesus längäm Yerusalem ullomba indo allo kasalle, iya le'ba'um duka' Puang Yesus mesa-mesanna mellao buni, tä' deem tau muissanni. ¹¹ Mahassanni dipakahoa' allo kasalle ia too, iya ingganna to kasallena to Yahudi sangngim ma'peninim liu umpeä Puang Yesus anna napekutanaanni naua: "Deem daka' muita?"

¹² Buda tau sipa'bisi'-bisi' diona Puang Yesus. Deem muuai: "To mapia hi tia." Sapo' deem siam duka' muuai: "Tää', aka to umpabulim bäbä hi tia hupatau." ¹³ Sapo' tä' deem tau bahani umpekasallei ma'tula' aka ungkahea' to kasallena to Yahudi.

¹⁴ Tappana matängä-tängäi indo hame-hame, iya le'ba'um Puang Yesus längäm Banua Debata ma'pa'guhu. ¹⁵ Sangngim mängä-mängä to kasallena to Yahudi lambi' naua: "Maaka hia susi inde tau anna tä'i deem tanaissam anna tä' da deem massikola malangka'!"

[¶]7:2 Sand. 23:34; Pass. 16:13.

¹⁶Natimba'i Puang Yesus naua: "Inde kupa'patuduam taia pepatuduam kaleku sapo' pepatuduanna To usuaä'.

¹⁷Menna-menna maelo' untuhu'i pa'elo'na Puang Allataala la naissam inde kupa'patuduam buttu di Puang Allataala haka buttu di Kao haka.

¹⁸To umpa'patuduam pepatuduam kalena umpeä kamatandeam kalena. Sapo' to umpeängam kamatandeam to usuai, iam too muundu' lollä, tä' deem tä' tappa' illaam kalena. ¹⁹Tä' daka too deem napalandasangkoa' Musa pahentana Puang Allataala? Iya deem dakoka' too moi podo la mesa untuhu'i pahenta ia too? Akanna maelo' dakoa' la umpateiä'?"

²⁰Natimba'i tau buda naua: "La tatta'ko! Menna hiko la umpateiko?"

²¹Mentimba'um duka' Puang Yesus naua: "Anggam mesa pengkähängam kupalako illaam allo Katohhoam, iya ungkambahoam dia' iko. ²²Sapo' si mengkähä siangkoa' duka' illaam allo Katohhoam ke ussunna'koa' änä'-änä'.[§] Si umpateenna' aka situhu' Pepaondonganna Musa diona sunna'. (Setonganna tä' buttu dio mai Musa pepaondongam ia too, sapo' buttu dio mai nene to naponene.) ²³Dadi maka' umpalako' ia too indana utekkako' Pepaondonganna Musa diona sunna', iya akanna keaha' dakoa' iko ke kupabono' mentu'i kalena mesa tau illaam allo Katohhoam? ²⁴Daa ussangaia' tau situhu' diitanna, sapo' la ussangaia' situhu' tungka ianna."

**Tappa' daka diua Puang Yesus
To dilanti' la mepasalama'?**

7:25-31

²⁵Puhai ia too mekutanam sanaka-naka to Yerusalem naua: "Iangka umbai' inde indo to mahassam dipeängäm lalam la dipatei? ²⁶Ita siaia' too ma'tula' us-

sangka' elo'na dio olona tau buda anna tä' deem tau umpa'kadai. Naissammaka too umbai' to pebabantaa' naua: 'Iam too inde indo To dilanti' la mepasalama'?' ²⁷Sapo' maka' tia la sulem indo To la mepasalama', iya tä' tia deem tau moi podo la mesa muissanni kabuttuanna. Anna inde dio tau taissanna' kabuttuanna."

²⁸Mahassam siam Puang Yesus ma'pa'guhu illaam Banua Debata, pissananna ma'kada kasalle lao naua: "Muissam si'da haka' muua mennaä' anna umba ngei kabuttuangku? Kao tä' suleä' situhu' pa'elo' kaleku bäbä. Sapo' nasuaä' to la sipäto' dikatappa'i. Tä' iko muissanna', ²⁹sapo' kuissam Kao, aka Ia kuongei mengkalao anna Ia usuaä'."

³⁰Wattu eta too maelo'im la ussakka Puang Yesus sapo' tä' deem mala nasakka aka tä'pi lambi' wattunna. ³¹Sapo' buda siam tau unkatappa'i anna sipa'tula-tula'i naua: "Mannassa indem Ia indo To dilanti' la mepasalama' aka taitanna' budam tanda memängä-mängä napogau'."

Pattuju la ussakka Puang Yesus

7:32-36

³²Deem sanaka-naka to illaam kakalebuanna Parisi uhhingngi tau buda sikabisi' diona Puang Yesus. Iya ma'pattujum sola ingganna kapala sando anna usuai to si unjagai Banua Debata la lao ussakka Puang Yesus.

³³Iya ma'kadam Puang Yesus lako tau buda naua: "La säpäi' mandangkia' sola aka dako'i too ma'pasulemä' längäm To usuaä'. ³⁴La sikapeäkoa' umpeää', sapo' tä'mä' la ullambi', aka tä'koa' mala lako indo ongeam la kuongei."

³⁵Nasuhum sipa'tula-tula' to kasalena to Yahudi naua: "La lu umba hia umbai' ngei inde dio tau anna tä'ia' la mala talambi'? La lao haka umbai'

[§]7:22 *disunna'*: kalembasanna *ditille*. Petua' dioi pemasiä'na Luk. 1:59.

umpellambi'i solataa' to Yahudi indo to tohho dio botto senga' si naongei to Yunani anna umpa'guhui to Yunani?³⁶ Aka hia nasanga anna nauai: 'La umpeää' sapo' tä'ä' la ullambi,' anna nauapi: 'Tä'koa' mala lako indo ongeam la kuongei?'

Uwai katuboam

7:37-44

³⁷ Allo katampasannai hame-hame ia too, etam pole' naongei handam mahoa'na, iya ke'de'um Puang Yesus anna metambai naua: "Menna-menna mabäh-häm la napellambi'ia' anna mangngihu'."³⁸ Aka lako to unkatappa'ia' naua illaam Battakada Debata: Buttu illaam mai bätä penabanna lolä uwai katuboam."³⁹ Inde nauaam, diona Penaba Maseho la natahima ingganna to matappa' lako Puang Yesus. Aka wattu eta too tä'pi dibeem Penaba Maseho aka tä'pi puha dipomatande Puang Yesus.

⁴⁰ Buda tau umpehingngii pepa'guhuanna Puang Yesus lambi' deem piha muuai: "Iam too inde indo Nabi masäem dipemmitai."

⁴¹ Naua piha: "Iam too inde To dilanti' la mepasalama!"

Sapo' deem duka' muuai: "Tää! Aka la deem daka tia la buttu dio mai Galilea To dilanti' la mepasalama?"

⁴² Aka inna tisuha' illaam Battakada Debata naua: To dilanti' la mepasalama' peampoanna Daud anna la buttu dio mai Betlehem, botto litä'na Daud."⁴³ Dadi sipengka-pengkam indo tau diona Puang Yesus. ⁴⁴ Deem siam maelo'um la ussakka Puang Yesus, sapo' tä' deem moi podo la mesa lako uhhaka'i.

To kasallena to Yahudi tä' unkatappa'i Puang Yesus

7:45-52

⁴⁵ Tappana ma'pasule indo to si unjagai Banua Debata to disua la ussakka

Puang Yesus, iya nakutanaim ingganna kapala sando sola to illaam kakalebuanna Parisi naua: "Sapo' akanna tä' dia' umbaba sule?"

⁴⁶ Iya natimba'im naua: "Aka tä'pi deem kiita tau la susi manähäna ma'tula!"

⁴⁷ Iya nauaim indo to illaam Parisi: "O, iya napabulimmokoa' duka' päläe!"

⁴⁸ Deemmaka too to pebabantaa' battu haka to illaam Parisi matappa'um lako?

⁴⁹ Sapo' tää! Inde hi tia mai tau buda tä'pi ungleso Pepaondonganna Musa, dadi moi tia la diaka susi aka abana inna to nahua tädo."

⁵⁰ Deem duka' mesa to illaam kakalebuanna Parisi isanga Nikodemus, indo to puha umpellambi'i Puang Yesus, umpa'tula'i solana naua: ⁵¹ "Situhu' kabi-asaam tä' mala dipassala mesa tau ke tä'pi puha dihingngi tula'na anna tä' deem dipahessa pa'gau'na."

⁵² Iya nauaammi solana: "Aka to Galilea hakoka tiko duka'? Pahessai yolo Battakada Debata! La muitam too illaam, aka tä' tia deem nabi la buttu dio mai Galilea!"

Baine to ullullu' pa'bannetauam

7:53-8:11

⁵³ [Puhai ia too, iya ma'pasuleim lako banuanna si mesa-mesa.

8 Sapo' le'ba' längäm Ia Tanete Zaitun Puang Yesus. ² Mebengngi'-bengngi'pi anna sule oom Puang Yesus tama Banua Debata, iya sule oom duka' tau buda umpellambi'i. Muokko'um anna ma'pa'guhui. ³ Sulem sanaka-naka to ullatta' Pepaondonganna Musa anna to illaam kakalebuanna Parisi umpasola mesa baine nalambi' ullullu' pa'bannetauam. Nasuam indo baine ke'de' dio olona tau buda anna ⁴ ma'kadai lako Puang Yesus naua: "O Tuangguhu, inde baine kilambi' mahassam ullullu' pa'bannetauam.

⁵Sapo' situhu' Pepaondonganna Musa inde baine la disileba'-leba'i batu sampe mate. Dadi maaka Iko susi pikkihammu?" ⁶Naägä'i mekutana susi aka umpalilingam tangnga' Puang Yesus. Sapo' mengkamma' mandi Puang Yesus, anggam lumukku umpopassuha'-suha' tahunona dokko litä'.

⁷Sapo' aka takattu mekutana indo tau buda, iya umbangongammi ulunna Puang Yesus anna ma'tula'i naua: "Menakoa' ussanga kalemu tä' madosa, iya iam too handam la mendiolo ulleba'i itim baine."⁸ Puhai ia too, lumukku oom sule Puang Yesus massuha'-suha' dokko litä'.

⁹Tappana uhhingngii tula'na Puang Yesus, iya le'ba' si mesam umpellei indo ongeam napahandu' handam tomatua mendiolo le'ba'. Katampasanna angga ham Puang Yesus sola indo baine ke'de'-ke'de' liu ia dio ongeanna. ¹⁰Iya umbangongam oom ulunna Puang Yesus anna mekutanai lako indo baine naua: "Umbaim indo tau? Tä' ohi deem napassalako le?" ¹¹Natimba' indo baine naua: "Io Tuangguhu, tä' mammi deem."

Iya nauam Puang Yesus: "Kao duka' tä'ko la kupassala. Le'ba'ungko, sapo' tä'ungko la umpogau' pole dosa."]

Kamasiäsam to mebaba lako katuboam

8:12-20

¹²Iya ma'kada oom Puang Yesus lako tau buda naua: "Kaom too kamasiäsanna lino. Ingganna to untuhu'ä' tä' la kaputu-putu illaam kamalilingam, sapo' la muampuam kamasiäsam to umbabai lako katuboam."

¹³Iya nauam indo to illaam kakalebuanna Parisi: "Temo ussa'biiko kalemu, sapo' tä' mala dikatappa'i aka tä' deem tau senga' sa'bimmu."

¹⁴Natimba'um Puang Yesus naua: "Moi anna ussa'biiä' kaleku, sapo' inde tula'ku mala dikatappa'i aka kuissam Kao umba ngei kuongei buttu anna la lu umbaa' ngei. Sapo' tä' iko muissanna' buttu umbaa' ngei anna la lu umbaa' ngei. ¹⁵Pangngoko di tambu'mua' iko umpake uhhotto' hupatau, sapo' Kao-kao tä' deem la uhhotto'ä' hupatau moi podo la mesam. ¹⁶Sapo' maka' Kao uhhotto'ä' hupatau la malollä aka tä' mesa-mesanguku, sapo' napolaiä' Ambeku to ussuaä'. ¹⁷Illaam Suha' Pahentamua' tisuha' naua: 'Malolo passa'biinna ke nasa'biim dua tau.' ¹⁸Anna duam Kao sa'bingku, Ambeku to ussuaä' anna kalekum."

¹⁹Iya natimba'im indo tau naua: "Aka umba ngei ambemu?"

Iya nauaam Puang Yesus: "Aka tä'koa' muissannä', anna tä' tookoa' muissam Ambeku. Aka kela muissannä', iya muissangkoa' duka' Ambeku." ²⁰Ia asanna inde natula' Puang Yesus indo anna ma'pa'guhui illaam Banua Debata sikahuku' patti doi' pehumalagam. Sapo' tä' deem moi podo la mesa tau la mala ussakkai aka tä'pi lambi' wattunna.

Ongeam la kuongei tä'koa' deem la ullambi'i

8:21-30

²¹Ma'kada pole oom Puang Yesus naua: "La le'ba'ä' anna la umpeää', sapo' la matekoa' iko sitonda dosamu. Indo ongeam la kuongei lao, tä' siaan' la ullambi'."

²²Mane sipa'tula'-tula' oi to Yahudi naua: "Umbai' la mentujo anna nauai: 'Indo ongeam la kuongei lao, tä' siaan' la ullambi'.'"

²³Iya ma'kadam Puang Yesus naua: "Ikoa'-iko buttu di ongeam madiogam, sapo' Kao-kao buttu yaboä' mai ongeam handam mayaboam. Buttu di linokoa' iko, sapo' Kao-kao buttu yaboä' mai

suhuga. ²⁴ Iam too anna kuuaammokoa: 'La matekoa' sitonda dosamu.' Aka maka' tä' unkatappa'i indo kuua: 'Kaom too indo to diuaam Inna Deem,' abana inna la matekoa' sitonda dosamu."

²⁵ Iya mekutanai pole oom naua: "Aka menna si'da hako iko isanga?"

Natimba' Puang Yesus naua: "Tä' deem gunana la sipa'tula' liukia'.** ²⁶ Budapi mala kutula' diona kalemua' anna budapi mala kupasala. Sapo' anggam kupa'paissangam lako hupatau indo tula' kuhingginna dio mai To ussuaä'; anna indo To ussuaä' mala dikatappa'i."

²⁷ Sangngim tä' naissam napekalem-basam naua Ambena hia nauaam. ²⁸ Iam too anna ma'kadam Puang Yesus naua: "Maka' too untandeammokoa' längäm Änä' Mentolino, mane muissam dia' indo Kuua: 'Kaom too indo to diuaam Inna Deem.' Anna la muissanna' duka' muua tä' deem kupalako la buttu di kaleku bäbä. Anggam kutula' indo puha napa'guhuannä' Ambeku. ²⁹ Anna indo To ussuaä', sola siangkam. Tä' deem la napamesa-mesaä' aka si kupogau' liu indo napomasannanna penabanna."

³⁰ Mahassanni natula' Puang Yesus kaha-kaha ia too, iya buda tau unkatappa'i.

Pepa'guhuam kamaloloam dipolalam dilappasam

8:31-47

³¹ Mane ma'kadai Puang Yesus lako ingganna to Yahudi to matappa'um naua: "Maka' muanda'i tongangkoa' pepa'guhuangku, iya la pentuhu'ku si'da-siangkoa' too. ³² La muissammia' too pole' pepa'guhuam kamaloloam anna ianna' umpolalam dilappasam."

³³ Iya nauaim: "Kami'-kami' pessubun-nakam Abraham. Tä'pakam deem la naposabua' tau senga'. Akanna muua hiko: 'La dilappasangkoa'?"

³⁴ Ma'kada oom Puang Yesus naua: "Setongam-tonganna menna-menna ungkähä dosa, iam too naposabua' dosa. ³⁵ Anna mesa sabua' tä' tia tontä okkosanna illaam kasahapuanna puäna. Sapo' änä' ikale, deem ia okkosanna illaam kasahapuanna sule lako salako-lakona. ³⁶ Dadi maka' Änä'na Puang Allataala ullappasangkoa', iya mannassa anna tä' mala tala beba'ungkoa'. ³⁷ Abana kuissam kuua ikonna' too pessubunna Abraham. Sapo' moi anna susi, mohäe hakoa' la umpateiä', aka mokakoa' la umpaillaam penaba pepa'guhuangku. ³⁸ Indo kuitanna lako Ambeku, iam too kutulasangkoa'. Sapo' ikoa'-iko, pepa'guhuanna ambemua' si untuhu'i."

³⁹ Natimba'im naua: "Abraham ambeki."††

Naua oom Puang Yesus: "Kela änä'na si'dakoa' Abraham, iya la untuhu'i si'da-si'daa' indo gau'na. ⁴⁰ Kupalambisangkoa' indo pepa'guhuam kamaloloam puha kuhingngi yabo mai Puang Allataala, sapo' maelo' dakoa' la umpateiä'. Tä' tia susi gau'na Abraham! ⁴¹ Untuhu'i siangkoa' ia gau'na ambemu!"

Natimba'i naua: "Taiakam änä' bule. Anggam mesa Ambeki, Puang Allataala."

⁴² Iya nauam Puang Yesus: "Maka' la änä'na si'dakoa' Puang Allataala, la ungkamaseimä' tia aka Kao buttu yaboä' mai Puang Allataala. Taia pa'elo' kaleku anna suleä', sapo' pa'elo'na Puang Allataala to ussuaä'. ⁴³ Ia anna tä'ia' muis-

**8:25 Tä' deem gunana la sipa'tula' liukia', mala duka' kalembasanna: *Indo puha kutulasangkoa' mengkalao dio mai.*

††8:39 Abraham ambeki: Indo Abraham nene to naponene to Yahudi, sapo' si nasangai ambena.

sam kalembasanna tula'ku aka tä'koa' umpaillaam penaba pepa'guhuangku. ⁴⁴Tomahajannaa' iko setam ambemu! Anna anggam pa'elo'na umpohäea' untuhu'i. Mengkalao dio mai, indo setam inna to si papateam ia. Tä' deem umpogau' kamaloloam aka inna pa'de kamaloloam illaam kalena. Maka' kaägä'-ägä', iya sihatam aka abana inna sipa'na mengkalao dio mai. Aka indo setam si kaägä'-ägä' anna ambena tula' tatappa'. ⁴⁵Dadi tä' unगतappa'ia' tula'ku, aka tappa'na kutula'. ⁴⁶Mennakoa' la mala untuhoannä' dosaku? Maka' untula'ä' kada tongam akanna tä'ia' unगतappa'i? ⁴⁷Menna-menna änä'na Puang Allataala napehingngii tula'na. Sapo' ikoa'-iko, ta-iakoa' änä'na Puang Allataala. Iam too anna mokangkoa' umpehingngii."

**Matande puha Ia Puang
Yesus anna la Abraham**

8:48-59

⁴⁸Iya untimba'im Puang Yesus indo to Yahudi naua: "Abana to Samariako iko! ^{††}Napentamaiko setam, umba susi si kitula'."

⁴⁹Natimba' Puang Yesus naua: "Tä' napentamaia' setam. Umpa'kasalleia' Ambeku. Sapo' ikoa'-iko, tä' umpa'kasalleia'. ⁵⁰Taia kupeä diona la dipomatandä'. Aka Puang Allataala la unगतähäi diona la dipomatandä', anna Ia to la umpopa'tadongkonganni. ⁵¹Setongam-tonganna ingganna to untuhu'i tula'ku tä'um ia la mate." ⁵²Ma'kada oom indo to Yahudi naua: "Kiissammi temo kiua napentamai si'dako setam. Aka Abraham duka' puham mate, susi siam duka' ingganna nabi. Sapo' muua hiko: 'Ingganna to untuhu'i tula'ku tä'um ia la mate.' ⁵³Kuasa puha hakoka tiko anna la ambeki Abraham?

Matem ia sola ingganna indo nabi. Ussanga-sangamako iko kalemu!"

⁵⁴Natimba'i pole oom Puang Yesus naua: "Maka' hapanna la kupomatande kaleku, iya tä' deem gunana. Sapo' Ambeku hi Ia umpomatandä'. Si muuaa' dio pudu'mu: 'Iam too Puang Allataala to si kipenombai.' ⁵⁵Sapo' setonganna tä'pia' muissam. Anna Kao-Kao, kuissammi. Aka maka' hapanna la kuaa tä'pi kuissam, abana kaägä'-ägä'ä' susi si umpogau'a'. Aka kuissam Puang Allataala anna kutuhu'i tula'na. ⁵⁶Masanam si'da-si'da ia penabanna ambemua' Abraham aka naissam naua: 'La kuita allo kasuleanna.' Temo naitamä' pole' sule nasuhum tilalla'."

⁵⁷Iya ma'kada pole oom indo to Yahudi naua: "Akanna malako muita Abraham anna tä'pi lima pulo taunna dadimmu?"

⁵⁸Natimba' oom Puang Yesus naua: "Setongam-tonganna tä'pi subum Abraham anna inna deemmä' Kao!"

⁵⁹Tappana nahingngi indo tula'na, iya mualaim batu ingganna indo to Yahudi aka la umbatui Puang Yesus. Sapo' tappa mengkapa'de anna le'ba'i umpellei Banua Debata.

To buta mengkalao dadinna

9:1-41

9 Mahassanni mellao Puang Yesus, iya muitam mesa to buta mengkalao dio dadinna. ²Mekutanam passikolanna naua:

"O Tuangguhu mennanna madosa, kalena haka inde tau, tomatuanna haka nasuhum buta ia disubungam?"

³Natimba' Puang Yesus naua: "Taia dosana kalena, taia toi dosana tomatuanna. Sapo' inde tau buta aka la naongeti lembe' kakuasaanna Puang Allataala mengkähä illaam kalena

^{††}8:48 to Samariako iko: To Samaria si naangga' to Yahudi tau kadake.

inde tau. ⁴Aka pahallukia' unγκähä pengkähänganna Puang Allataala to ussuaä' sumala masiäpi, aka la sule bengi anna tä'um deem la mala tau mengkähä. ⁵Inde illaannä' lino, Kaom too kamasiäsanna."

⁶Puhai ma'tula', untikkuduim litä' anna nagahui mane nasussuianni matanna indo to buta. ⁷Puhai ia too nauaammi: "Le'ba'ko pendau' lako limbä Siloam." (Siloam kalembasanna "Disua'.) Tappa le'ba' siaham duka' indo tau mendau' lako indo limbä Siloam, mane ma'pasulei, iya paita siaham matanna.

⁸Sapo' ingganna sambanuanna anna to si biasa muitai anggam si kapelau-lau, ma'kada naua: "Taia haka tia iam inde dio indo to si muokko' kapelau-lau?"

⁹Deem muuai: "Tappa', iam too inde dio." Deem piha muuai: "Taia, sapo' susi hupanna."

Sapo' ma'kada indo tau naua: "Io tappa', kaom too."

¹⁰Iya ma'kadam indo tau buda naua: "Maaka hia susi anna malai paita matammu?"

¹¹Natimba'im naua: "Indo tau isanga Puang Yesus umpapia hossä' anna napasussuiannä' matangku mane nauai: 'Le'ba'ko pendau' lako limbä Siloam.' Iya kutuhu'im tula'na lambi' malaä' paita."

¹²Mane nakutanai oi naua: "Iya umbam indo tau?"

Natimba' oom naua: "Tä' kiissam."

¹³⁻¹⁴Indo anna umpapiai hossä' Puang Yesus anna umpabono' to buta, iya sipatu allo Katohhoam. Iam too anna indo to dipabono' nababa tau lako sanaka-naka to illaam kakalebuanna Parisi. ¹⁵Iya nakutanaim duka' to illaam Parisi naua: "Maaka susi anna malako paita?"

Natimba'im naua: "Napasussuiannä' matangku hossä' mane kudau'i, iya malaä' paita."

¹⁶Sapo' deem sanaka-naka to illaam Parisi naua: "Tandana taia to buttu yabo mai Puang Allataala tau ia too, iya mengkähä ia illaam allo Katohhoam."

Sapo' deem duka' sanaka-naka solana muuai: "Aka tä' deem leleanna to madosa la mala umpadadi tanda memängämängä susi indee." Lambi' sipengkapingka pole' indo to illaam kakalebuanna Parisi.

¹⁷Iya ma'kada oom indo to illaam Parisi lako indo tau naua: "Maaka iko susi passangaimmu diona indo to umpabono' matammu?"

Natimba'im naua: "Tau ia too mesa nabi."

¹⁸Sapo' indo to pebabanna to Yahudi tä' liu kannam illaam penabanna naua indo to puha dipabono' inna buta mengkalao dadinna. Nasuhum natambai tomatuanna ¹⁹anna nakutanai naua: "Änä'mu si'da haka inde tau? Tappa' si'da haka natimä buta subum illaam mai tambu'? Anna mane deenni, umba susi anna malai paita temo?"

²⁰Iya nauam indona sola ambena: "Anggam kiissam kiua abana änä'ki si'da anna abana sitimä buta disubungam.

²¹Sapo' indo muuaa: "Maaka susi anna malai paita temo," iya tä' kiissam. Anna tä' toi duka' kiissam menna napolalam anna malai paita. La kalena hi tia duka' ungkutanaia' aka kasallem anna mala ia untulasangkoa'."

²²Susim too pentimba'na indona sola ambena, aka mahea' lako to pebabanna to Yahudi. Aka baliim nakattu naua: "Menna-menna muakui naua Yesus-um too indo To dilanti' la mepasalama', iya tau ia too tä'um ia dipäbäi tama pa'sambajanganna to Yahudi." ²³Iam too anna nauam ambena sola indona: "La kalena hi tia duka' ungkutanaia' aka kasallem."

²⁴Iya natambai pole oom indo to buta ingngena' anna nauaanni: "La un-

tulasangkam indo setappa'na indana naitako Debata, aka kiissam siam kiua indo tau to madosa.”

²⁵ Iya natimba'um naua: “To madosa haka, tä' daka, takuissam. Anggam kuisam: yolona butaa' sapo' temo malamä' paita!”

²⁶ Mekutana pole oom naua: “Iya aka napogausangko? Naakako susi anna malako paita?”

²⁷ Natimba'i oom naua: “Puhangkoa' kutulasam, sapo' tä' umpehingngii'. Akanna la maelo'ia' uhhingngi pole? La maelo'ungkoka' too duka' mendadi pentuhu'na?”

²⁸ Tappana nahingngi indo tula'na, iya sangngim ungkeaha'i indo tau anna mane nauaam: “Ikom tiko pentuhu'na. Sapo' kami'-kami', pentuhu'nakam Musa.

²⁹ Kiissam kiua Puang Allataala puham ma'kada lako Musa. Sapo' tau ia too, tä' ia kiissam umba amo ngei naongeti buttu.”

³⁰ Iya natimba' pole oom indo to dipabono' naua: “Senga'-senga' punalamakoa' iko muua: ‘Buttu umba hia ngei.’ Anna balimä' kao napabono' lambi' paitamä'! ³¹ Sangngim taissanna' taua Puang Allataala tä' umpehingngii pelauanna to madosa. Sapo' anggam napehingngii to umpa'kasallei Puang Allataala anna to si umpalakoi pa'elo'na. ³² Pempom dadinna inde lino tä'pi deem dikaheba tau la mala umpopaita to sitimä buta subum illaam mai tambu'na indona. ³³ Maka' la taia to buttu yabo mai Puang Allataala tau ia too, iya tä' la mala umpogau' aka-aka.”

³⁴ Iya natimba'im naua: “Aka muua? Iko hi ia naponnoi dosa mengkalao dadimmu. Maelo' pole ohako la umpa'guhukam!”

Iya nasuam le'ba' anna tä'um napäbäi tama pa'sambajanganna to Yahudi.

³⁵ Napekahebai Puang Yesus diona indo tau dilahammi tama

pa'sambajanganna to Yahudi, iya umpellambi'im indo tau anna napa'tula'i naua: “Ungkatappa'i hakoka Änä' Mentolino?”

³⁶ Iya mentimba'um indo tau naua: “O Tuam, menna hia diuam? Paissanniä' anna mala kukatappa'i.”

³⁷ Natimba' Puang Yesus naua: “Aka balim muita, mahassammoko sipa'tula' temo.”

³⁸ Iya nauam indo tau: “Kukatappa'iko, Debata!” Anna mane menomba dio olona Puang Yesus.

³⁹ Ma'kada pole oom Puang Yesus naua: “Mentamaä' inde lino sule umpopa'tadongkongam hupatau anna mala paita to buta, sapo' to ussanga kalena to paita la dadi buta.”

⁴⁰ Sanaka-naka to illaam kakalebuanna Parisi dio heem eta too uhhingngi tula'na Puang Yesus wattunna anna ma'kada susii. Nasuhum mekutana lako naua: “Muua le', inde mai tau to buta duka'.”

⁴¹ Natimba' Puang Yesus naua: “Maka' la sihhapangkoa' to buta tä' muita lalam umba la naola, iya tä'koa' la dipasala. Sapo' aka muua hia': ‘Paitakam kami’,’ iya mannassa anna tontä liupakoa' madosa.”

Pehapangam diona to dikambi' anna to ma'kambi'

10:1-21

10 Anna mane ma'kada Puang Yesus naua: “Setongam-tonganna maka' deem tau unteka'i bäbä bala domba tä' muola tama ba'bana, tau ia too pa'boko anna pehampo'. ² Sapo' to muola ba'ba, iam too to ungkambi' domba. ³ Indo to manjaga ba'ba la untungka'ianni ba'ba anna natuhu'i ingganna dombana napehingngii kamahanna. Natambai si mesa-mesa sanganna anna napasolai messubum. ⁴ Puhai too napassubum asam ingganna

dombana, iya nayoloangammi indo to ma'kambi' mellao. Mentuhu' asam duka' dombana aka naissammi kamahanna. ⁵Maka' deem tau senga' untambai, la sangngim moka untuhu'i, sapo' lumumpa' mandi lao napellei aka tä' naissam kamahanna."

⁶Pehapangam ia too natula' Puang Yesus lako indo to illaam kakalebuanna Parisi, sapo' tää'i naissam napekalebasam.

⁷Nasuhum ma'kada pole Puang Yesus naua: "Setongam-tonganna Kaom too ba'bana bala domba. ⁸Ingganna to sule umpendioliä', iam too pa'boko anna pehampo'. Sapo' indo dombaku tä' naaku napehingngii pa'kadanna. ⁹Kaom too indo ba'ba. Menna-menna muolaiä' mentama, tau ia too la salama'. La beba'um mentama anna messubum anna ullambi' ongeam kehumpu'. ¹⁰Sapo' pa'boko anggam tia sule maboko, papateam, anna mantallangam. Anna Kao-kao suleä' anna mala ullambi' katuboam hupatau sanda silapi'.

¹¹Kaom too to ma'kambi' mapia. Mesa to ma'kambi' mapia ahu' umpebeem kalena dipatei anna mala tubo dombana. ¹²Anna to mosaho ia taia to ma'kambi' tongam anna taia puäna indo domba. Dadi maka' muita sule olo'-olo' to peande, iya tappa kumondä lao umpellei indo domba, nasuhum nasakka anna napatiseham olo'-olo' to peande indo dombana. ¹³Le'ba' ia lumumpa' mahea' indo to mosaho aka angga ia sahona napikki'. Taumposamele anna taunjapanni indo domba ia too. ¹⁴⁻¹⁵Kaom too to ma'kambi' mapia. Umba susi naissannä' Ambeku anna Kao muissam Ambeku, susim too duka' kuissam ingganna dombaku anna naissannä' duka'. Anna ahu'ä' umpebeem kaleku dipatei anna mala tubo dombaku. ¹⁶Deempi duka' domba senga' kuampuam sapo' taia sababanganna indo domba illaam

pa'kambisangku temo. La pahallu duka' kubaba tama pa'kambisangku. Anna la naissam duka' kamahangku lambi' ingganna domba la ma'mesa nakambi' mesa to ma'kambi'. ¹⁷Nakamaseiä' Ambeku aka la umpopepateiä' kaleku anna mala kulambi' sule katuboangku. ¹⁸Tä' deem tau mala umpateiä' ke taiai pa'elo'ku. La umpebeennä' kaleku dipatei aka situhu'um pa'elo'ku. Kao kuasaä' umbeho kaleku dipatei, anna kuasaä' duka' la umpatubo sule kaleku. Iam too pengkähängam nabeennä' Ambeku la kukähä."

¹⁹Tappana ma'kada susi Puang Yesus, iya sipengka-pengka oom indo to Yahudi. ²⁰Buda tau muuai: "Napentamai setam anna tatta'. Daa umpehingngiia!" ²¹Sapo' deem duka' muuai: "Tä' tia susi tula'na to napentamai setam. La mala haka tia setam umpopaita to buta!"

To Yahudi moka untahima Puang Yesus

10:22-42

²²Lessu'i ia too, dipakahoa'um dio Yerusalem allo kasalle Ussehoi Sule Banua Debata. Eta too wattu kamadingingam. ²³Mahassanni mellao Puang Yesus muola Tädo' Salomo illaam Banua Debata, ²⁴iya suleim buda to kasallena to Yahudi ulleboi. Iya ma'kadam indo tau naua: "La pihampi isanga mane untulasam manappakam diona kalemu? Pandanniangkam ke ikom indo To dilanti' la mepasalama'."

²⁵Natimba' Puang Yesus naua: "Puhangkoa' kutulasam sapo' tä' unkatappa'ia'. Aka ingganna indo kupogau' illaam sanganna Ambeku, iya iam too ussa'bii diona kaleku. ²⁶Sapo' tä' unkatappa'ia' aka taiakoa' dombaku. ²⁷Ingganna dombaku umpehingngii tula'ku. Kuissam dombaku anna natuhu'ä'. ²⁸La kubeem

katuboam sule lako salako-lakona anna tä'um la mate. Tä' deem la mala moi podo la mesam uhhappaiä' dombaku illaam mai lisu pala'ku. ²⁹Tä' deem pada kasallena kuasanna Ambeku, anna iam too umbeennä' dombaku. Tä' deem moi podo la mesam la mala uhhappaiä' dombaku illaam mai lisu pala'na Ambeku. ³⁰Kao anna Ambeku to mesakam."

³¹Napolalam to Yahudi muala pole oom batu la ulleba' Puang Yesus. ³²Sapo' ma'kada Puang Yesus lako indo tau buda naua: "Puhanna' muita umpalakoä' buda pengkähängam mapia indo puha nasuaannä' Ambeku. Ingganna indo pengkähängam ia too, umbanna kabam la umpolalanna' ulleba'ä' batu?"

³³Mentimba' indo to Yahudi naua: "Taia indo pengkähängam mapia umpogau' napolalam la kileba'iko batu, sapo' aka untelleko Puang Allataala. Aka iko, mesako duka' hupatau biasa, iya ussangi hako kalemu Puang Allataala."

³⁴Natimba' oom Puang Yesus naua: "Puha siam tisuha' tula'na Puang Allataala illaam Suha' Pahentamua' naua: 'Ikoa'-iko sangngim debatakoa' duka'." ³⁵Ingganna indo puha tisuha' illaam Battakada Debata la da'da' liu sule lako salako-lakona. Dadi maka' indo to puha untahima Battakada Debata nasangi Puang Allataala debata, ³⁶iya akanna muuaannä': 'Untelleko Puang Allataala,' ke kuuai: 'Änä'naä' Puang Allataala?' Aka Kao to napasähä'ä' Ambeku anna nasuaä' tama lino. ³⁷Aka maka' tä' la kupalako pengkähänganna Ambeku, iya tä' manggi' unkatappa'ia'. ³⁸Sapo' maka' kupalako, iya tä' mala tala unkatappa'ia' aka indo

pengkähäku. Moinna anna tä'ia' muaku unkatappa'ia', sapo' la pahallu unkatappa'i inde pengkähäku. La unkatappa'ia' anna mala muissanna' anna unkaleso diua Ambeku illaam kaleku anna Kao illaannä' Ambeku."

³⁹Iya nasändä'i pole oom la ussakka Puang Yesus, sapo' tappa le'ba' untässu'i kalena.

⁴⁰Mane le'ba' oi Puang Yesus lam-bam libanna Salu Yordan lako indo ongeam si naongi Yohanes mantedo' yolona, anna tohhoi eta. ⁴¹Iya budam tau sule umpellambi'i naua: "Abana tä' ia deem mesa tanda memängä-mängä napogau' Yohanes, sapo' ingganna indo kaha-kaha puha natula' diona inde tau, abana sangngim tappa'." ⁴²Iya buda tau unkatappa'i Puang Yesus eta too.

Kamateanna Lazarus

11:1-16

11 ¹⁻²Deem mesa tau isanga Lazarus si tohho dio tondä' Betania sola solasubunna isanga Maria anna Marta. (Indo Maria iam too indo baine to untolloi minnä'-minnä' bubanau' bitti'na Puang Yesus mane napassii beluä'na.) Pissam wattu masaki indo Lazarus. ³Iya umpepasannim Puang Yesus indo solasubunna baine naua: "O Tuam, indo to umpakamaja mahassam masaki."

⁴Tappana nahingngi Puang Yesus kaheba ia too, iya nauam: "Tä' tia la nababa indo sakinna. Sapo' ia too la naongi la umpa'patandaam kamatandeanna Puang Allataala anna mala indo saki napolalam la dipomatande Änä'na Puang Allataala."

⁵Indo Marta sola Maria anna Lazarus tä' deem pada sanapakamaja Puang Yesus. ⁶Tappana nahingngi diua masaki Lazarus, iya tä'pi le'ba' sapo' tohhoi

^{¶¶}10:34 *Ikoa'-iko sangngim debatakoa' duka'*: Inde tula' diala illaam mai Puj. 82:6. Illaam Pampujiam ia too ma'tula' Puang Allataala ussangi to mahhotto'na to Yahudi *debatakoa'* aka ia ma'kuasa.

duangngallo dio indo ongeam naongeti.
⁷Lessu'i ia too, ma'kadam lako passikolonna naua: "Maikoa' tapa'pasule lako lembäna Yudea."

⁸Sapo' natimba' passikolonna naua: "O Tuangguhu, bakahupi anna la nasileba'-leba'iko batu to Yahudi. Akanna la ma'pasule ohako lako?"

⁹Iya natimba'um Puang Yesus naua: "Kusanga deem sapulo dua tette' illaanna sangngallo. Menna-menna mel-lao iallo tä' ia la titedo aka masiä' lao naita. ¹⁰Sapo' menna-menna mel-lao bengi la titedo ia, aka tä' mellao illaam kamasiäsam." ¹¹Susim too tula'na Puang Yesus. Puhai, ma'kada oom lako passikolonna naua: "Indo solasubuntaa' Lazarus mahassam mamma', sapo' la lakoä' angku tundanni."

¹²Iya nauam passikolonna: "O Tuam, maka' mamma', iya la bono'um tia sule." ¹³Sapo' indo nauaam Puang Yesus mamma', kalembasanna mate; nasanga ia passikolonna mamma' si'da-sia. ¹⁴Iam too anna napandanniammi Puang Yesus naua: "Indo Lazarus, matem tia. ¹⁵Sapo' indo kamateanna la keguna lako kale-mua'. Iam too anna tilalla'mä' tä' dio heem anna matei, aka la umpolalanna' unkatappa'ia'. Tapengkalaonna' anta le'ba'a' lako."

¹⁶Iya ma'kadam lako solana passikola indo Tomas, si diuam to Hendu,^{§§} naua: "Maikoa' duka' talao anna malakia' sola-sola Puang Yesus mate."

Puang Yesus katibangonganna sule to mate anna to umpebeem katuboam

11:17-27

¹⁷Tappana landa' Puang Yesus lako Betania, iya ullambi'um Lazarus appa'um benginna dipandam illaam lokko'. ¹⁸Indo tondä' Betania sikahuku' Yerusalem, umbai' tallu kilo

mambelanna alla'na. ¹⁹Iya budam to Yahudi sule ullomba Marta sola Maria la napakahanga aka mate solasubunna.

²⁰Tappana naissam Marta naua sulem Puang Yesus, iya tappa le'ba' siahm natammui. Sapo' tohho ia Maria dio banua. ²¹Iya ma'kadam Marta lako Puang Yesus naua: "O Tuam, kela indeko indo eta, inna tä' sia la mate solasubungki. ²²Sapo' kuissam kuua moi temo ia mammo anna ia umpelau, la nabeengko Puang Allataala."

²³Iya natimba'im Puang Yesus naua: "La tubo sule solasubummua'."

²⁴Naua pole oom Marta: "Io, kuissam kuua la tubo sule ke tibangommi sule ingganna to mate illaam allo ma'katampasanna."

²⁵Natimba' oom Puang Yesus naua: "Kaom too katibangonganna sule to mate anna to umpebeem katuboam. Menna-menna unkatappa'ia' la tubo moi anna matem. ²⁶Anna lako to tubo anna nakatappa'ia', iya tä'um ia la mate sule lako salako-lakona. Unkatappa'i haka kaha-kaha ia too?"

²⁷Natimba' Marta naua: "Io Debata, kukatappa'i kuua lkom too indo To dilanti' la mepasalama'; Änä'nako Puang Allataala to masäem dipemmitai la mentama lino."

Sumahho Puang Yesus

11:28-37

²⁸Puhai ma'tula' Marta, iya le'ba'um untambai Maria solasubunna anna napa'bisi'i naua: "Sulem Tuangguhu anna natambaiko." ²⁹Tappana nahingngi tula'na, iya ke'de' siahm Maria anna laoi napellambi'i. ³⁰(Wattu eta too tä'pi lambi' Puang Yesus tama indo tondä', dio liupi indo ongeam naongeti Marta untammui.) ³¹Ingganna indo to Yahudi to

§§11:16 to Hendu: naua illaam basa Yunani *Didimus*, kalembasanna, To Hendu.

mahassam umpakahanga Maria illaam banua muita Maria ke'de' anna ma'sihha'-sihha'i le'ba', iya le'ba'im natuhu' aka nasanga la lao sumahho lako ku'bu'.

³²Tappana nalambi' indo ongeam naongi Puang Yesus, iya ma'balinguntu'um Maria dio olona anna nauai: "O Tuam, kela indeko indo eta, inna tä' sia la mate solasubungki."

³³Tappana muita Maria sola indo to Yahudi sikauhhu', iya tikkedu' Puang Yesus anna suhhä' buana anna ma'kadai naua: ³⁴"Umba ngei ullaunna'?"

Natimba'im naua: "O Tuam, maiko anna umpetua'i."

³⁵Iya sumahhom Puang Yesus.

³⁶Iya ma'kadam indo to Yahudi naua: "Tä' deem pada saumpakamaja Lazarus."

³⁷Sapo' deem sanaka-naka tau ma'kada naua: "Tä' daka tia si umpopaita to buta; la tä' daka tia umbai' nabela napeä lalanna anna tä'i mate Lazarus?"

Puang Yesus umpatubo sule Lazarus

11:38-44

³⁸Iya suhhä' oom buana Puang Yesus anna le'ba'i lako indo ku'bu'. Indo ku'bu' mellokko', dilapa' batu kasalle.

³⁹Nauam Puang Yesus: "Behoia' itim batu."

Iya ma'kadam Marta solasubunna indo to mate naua: "O Tuam, la bubosim tia aka appa'um benginna matena."

⁴⁰Natimba' Puang Yesus naua: "Kusanga puham kuuaangko: Maka' matappa'ko, la muitako kamatandeanna Puang Allataala."

⁴¹Iya sikanabehoim indo batu. Mentongam Puang Yesus anna ma'kadai naua: "O Ambeku, ma'kuhhu' sumanga'ä' matim aka uhhingngiammä'.

⁴²Abana kuissam kuua si uhhingngiam tula'ku, sapo' ma'tula'ä' matim anna

mala nahingngi inde mai tau buda mahassam ke'de' napali'ä', napolalam la matappa'i naua Iko siam to ussuaä'."

⁴³Puhai, metambam Puang Yesus naua: "O Lazarus, pessubungko mai!"

⁴⁴Tappa messubum eta siaham indo to puham mate sitonda pebalunna, anna ti-sapu'pi duka' lindona.

Iya nauam Puang Yesus: "Bukkaia' pebalunna anna mala mellao."

Ussahandanni kada to Yahudi la umpatei Puang Yesus

11:45-57

Mat. 26:1-5; Mrk. 14:1-2; Luk. 22:1-2

⁴⁵Indo to Yahudi to lao ullomba Maria, buda matappa' lako Puang Yesus aka muita indo kadadiam puha napogau'. ⁴⁶Sapo' deem sanaka-naka tau lao umpellambi'i to illaam kakalebuanna Parisi anna natulasanni indo kadadiam puha napogau' Puang Yesus. ⁴⁷Iam nasuhum sanaka-naka to illaam Parisi sola ingganna kapala sando uhhempum to si mahhotto' illaam peadasanna to Yahudi. Iya sipa'tula'-tula'um naua: "Akanna' la tapogau'? Aka inde tau umpogau' buda tanda memängä-mängä. ⁴⁸Maka' la tapäbäi liua' ma'pateem, la nakatappa'i asammi too ingganna tau, napolalam la sule to Roma uhhappaikia' inde Banua Debata anna botto litä'taa'."

⁴⁹Sapo' ma'kada mesa tau isanga Kayafas indo to diposando too' illaam taum eta too, naua: "Sangngim tä' deem aka muissanna!' ⁵⁰Tä' daka muissanna' muua dotam tia mesa tau mate dibala'iam tau buda anna la dappo' asam tau illaam inde botto litä'taa'." ⁵¹Indo tula'na Kayafas, setonganna taia tula' buttu di kalena. Sapo' mala umpa'paissangam loppo' kadanna Debata diona la kamateanna Puang Yesus ussolom to Yahudi aka ia sando too' illaam taum eta too. ⁵²Anna taia

angga mandi to Yahudi la nasolom Puang Yesus, sapo' kamateanna la napolalam dihempum ingganna änä'na Puang Allataala to tisembu' illaam lino lambi' la dipamesa.

⁵³Iya napahandu' eta too, umpasahandammi kadanna indo to Yahudi la umpatei Puang Yesus. ⁵⁴Iam nasuhum tä'um naaku Puang Yesus ma'lao-lao illaam alla'-alla'na to Yahudi. Sapo' le'ba' muäläi kalena umpellei Yerusalem lu lako mesa kota isanga Efraim dio sikahuku' pohiallasam. Iya tohho etaim sola passikolanna.

⁵⁵Eta too mahuku'um wattunna napakahoa' to Yahudi allo Kalappasanna dio mai kasabuasam. Iya buda tau längäm Yerusalem buttu dio mai mobotto-bottoam la lao umpepattinni kalena situhu' kabiasaam illaam peadasam, aka la mentamam allo kasalle ia too. ⁵⁶Indo tau buda umpeä Puang Yesus. Tappana tihempunni illaam Banua Debata, iya sipa'tula'-tula'um naua: “Maaka iko susi pikkihammu? La sule haka umbai' umpakahoa' allo kasalle?” ⁵⁷Aka puham napa'pahentaam ingganna kapala sando sola to illaam kakalebuanna Parisi naua: “Maka' deengkoa' muissanni ongeanna Puang Yesus, la umpaissannikam anna mala disakka.”

**Puang Yesus natolloi minnä'-minnä'
Maria aka napa'kasallei**

12:1-8

Mat. 26:6-13; Mrk. 14:3-9

12 La annampi benginna mane lambi'i wattunna napakahoa' to Yahudi allo Kalappasanna dio mai kasabuasam, iya le'ba'um Puang Yesus

lako Betania, tondä'na Lazarus to napatibangom sule Puang Yesus dio mai alla'na to mate. ²Eta too ma'hame-hame tau untosabe Puang Yesus. Natahaii Marta anna dio duka' heem Lazarus mangngande sola. ³Iya naalam Maria setangnga lite' minnä'-minnä' bubanau' isanga narwastu, si masulli' allinna, mane natolloianni bitti'na Puang Yesus, anna napassii beluä'na. Iya titumpammi bubanau' ponno indo banua.

⁴Sapo' ma'kada mesa passikolanna Puang Yesus isanga Yudas Iskariot (to la umbalu' Puang Yesus) naua: ⁵“Akanna tä'i dibalu' itim minnä'-minnä' bubanau' si tallu pulo bidä allinna anna dibeenni to mase-mase?”* ⁶Setonganna taia to mase-mase napikki' Yudas. Sapo' ma'kada susi aka mesa pa'boko. Biasa si muala bäbä doi' illaam mai pa'ponggeam doi', aka ia si muannai.

⁷Sapo' ma'kada Puang Yesus naua: “Päbäi napateem itim baine. Aka napogau' loppo'um ia indo la dipogau' ke dipatamaä' ku'bu'. ⁸Aka to mase-mase ia sola-sola liukoa', sapo' Kao-kao tä'kia' la sola liu.”

**Nakattu to kasallena to Yahudi
la umpatei Lazarus**

12:9-11

⁹Buda to Yahudi umpekahebai diua diom Betania Puang Yesus. Iam too anna le'ba'im lako. Tä' angga mandi Puang Yesus natungka, sapo' maelo'pi duka' la muita Lazarus indo to napatubo sule Puang Yesus. ¹⁰Iam too anna nakattum ingganna kapala sando la umpatei Lazarus, ¹¹aka katibangongannam too Lazarus nasuhum buda to Yahudi tä'um untuhu'i indo kapala sando anna matappa'i lako Puang Yesus.

***12:5** tallu pulo bidä allinna: Indo dituli' illaam basa Yunani, naua ia ke basa Bambani: tallu hatu' dinar; mesa dinar pada sahona mesa tau mengkähä sanggallo.

**Puang Yesus natammui tau
buda dio Yerusalem**

12:12-19

*Mat. 21:1-11; Mrk.
11:1-11; Luk. 19:28-40*

¹²Tappana makale'na mebengngi', napekahebam indo tau buda to sule umpakahoa' allo kasalle diua illaammi pangngola-lalangam Puang Yesus lu längäm Yerusalem. ¹³Iya mualaim palapa andulam[†] anna mane le'ba'i mentammu napasindum sikaahhe naua: "Tapujia' Puang Allataala!

Katambasam to sule illaam sanganna Debata!

Katambasam Tomahajanna to Israel!"

¹⁴Iya mualam mesa keledai mangnguha Puang Yesus anna nasäkei. Iya sule lakom pole' indo deem tisuha' illaam Battakada Debata naua:

¹⁵"Daa ummahea' inggannakoa' issinna Sion!

Petua'i, tomahajammua' sule ussäkei mesa keledai mangnguha."[‡]

¹⁶Wattu eta too tä'pi napähäm tongam ingganna passikolanna kalembasanna indo kaha-kaha ia too. Puha ham diäkä' längäm ongeam kamatandeanna Puang Yesus, mane naalai pole' pikkihanna naua: "Indo napogausam to Yerusalem abana inna tisuha' loppo'um tia illaam Battakada Debata."

¹⁷Ingganna to dio heem indo anna untambai Lazarus Puang Yesus mesubum illaam mai ku'bu' napatubo sule, silele tamonda-monda natula' indo kakuasaanna. ¹⁸Iam too kasuhunganna anna buda sugali'um tau untammui

Puang Yesus aka naissam naua la umpogau'i indo tanda memängä-mängä.

¹⁹Iya sipa'tula'-tula'um indo to illaam kakalebuanna Parisi naua: "Tä'um pole' diissam aka amom la dipogau! Aka taitanna' natuhu' asammi tau buda."

**Puang Yesus umpa'paissangam
diona la kamateanna**

12:20-36

²⁰Indo tau buda to längäm Yerusalem lao umpenombai Puang Allataala watunna dipakahoa' indo allo kasalle, deem duka' sanaka-naka to Yunani. ²¹Indo to Yunani umpellambi'i Filipus anna nauaanni: "O Tuam, maelo'kam la silambi' Puang Yesus ke malai." (Indo Filipus to buttu dio mai Betsaida illaam lembäna Galilea.) ²²Iya umpellambi'im Andreas Filipus anna solai le'ba' umpa'tula'i Puang Yesus.

²³Natimba'im Puang Yesus naua: "Lambi'um wattunna la dipomatandé' indo to diuaam Änä' Mentolino.

²⁴Setongam-tonganna maka' tä' dilalum dokko litä' salise' gandum sihhapam to mate, iya la tontä liu salise'. Sapo' maka' dilalum indo salise' gandum, iya etam too pole' la tubo dio mai anna buda buana. ²⁵Menna-menna umpakalando puha ia katuboam di lino, katampasanna la pa'dem ia katuboanna. Sapo' menna-menna tä' umpakalando ia katuboam di lino, la da'da' liu ia katuboanna sule lako salako-lakona.

²⁶Menna-menna naaku umpamoloiä', la natuhu'ä' anna mala sola liungkanni umba-umba ngei kuongi. Anna la napa'kasallei ia Ambeku.

²⁷Husa' penabangku temo. Aka amo la kuua? La kuua haka: 'O Ambe',

[†]12:13 *mualaim palapa andulam*: deem napa'bandeha, deem napengngampasam lako dalam tanda pa'pakasallena anna katilallasanna.

[‡]12:15 *issinna Sion*: Indo dituli' illaam basa Yunani, naua ia ke basa Bambanni: *änä' daha illaam Sion*. Sion mesa sanganna Yerusalem. Ingganna issinna Yerusalem si bassa' disangai änä' daha illaam Sion. Za. 9:9.

lappasannä' dio mai inde kamasussaam la ullambi'ä' temo'? Sapo' ia hi kusuhum sule inde lino, anna mala nalambi'ä' kamasussaam ia too. ²⁸O Ambeku, pa'patandaanni kamatandeanna sangammu!"

Iya tappa dihingngim kamaha yabo mai langi' naua: "Puham kupa'patandaam kamatandeangu anna la kupa'patandaam polepi."

²⁹Ingganna indo to ma'hempum eta too sangngim nahingngi indo kamaha. Iya deemmi muuai: "Guntu' umbai'!" Sapo' deem duka' muuai: "Taia! Malaika' umpa'kadai."

³⁰Iya ma'kadam Puang Yesus lako indo tau buda naua: "Indo kamaha uhhingngia', setonganna taKao napahalluam, sapo' ikoa' napahalluam.

³¹Tentomai lambi'um wattunna la dipopa'tadongkongam issinna lino. Anna lambi'um duka' wattunna indo tomahajanna setam to unguasai lino la ditibe ia lao. ³²Anna Kao-kao, maka' too balimä' ditandeam yaboanna inde lino,[†] iya ingganna hupatau[§] la kuhuntu' lako kaleku."³³ Ia anna ma'kada susii Puang Yesus aka napa'paissangam la maaka susi kamateanna.

³⁴Natimba'im indo tau buda naua: "Illaam Suha' Pahenta tisuha' naua: Indo To dilanti' la mepasalama' la tubo liu ia sule lako salako-lakona. Iya akanna muua hiko: 'Änä' Mentolino la ditandeam yaboanna lino?'"^{**} Aka hiko ussanga Änä' Mentolino?"

³⁵Natimba'i Puang Yesus naua: "Indo kamasiäsam la säpäi' mandam illaam alla'-alla'mua'. Dadi lombaia' mellao sumala deempi kamasiäsam, indana nakuasaikoa' kamalillingam. Aka menna-menna mellao illaam kamalillingam tä' ia naissam lalam umba la naola. ³⁶Katappa'ia' indo kamasiäsam sumala solapokoa' inde lino anna mala mendadikoa' änä'-änä' to tubo illaam kamasiäsam."

Puhai ma'tula' Puang Yesus, le'ba'um umpellei indo ongeam ia too anna tä' opi si tama alla'-alla'na tau buda.

To Yahudi tä' matappa' lako Puang Yesus

12:37-43

³⁷Moinna anna budam tanda memängä-mängä napogau' Puang Yesus dio olona indo to Yahudi, sapo' sangngim moka siam unkatappa'i ³⁸anna mala sule lako indo tula'na nabi Yesaya naua:

"O Debata, mennam unkatappa'i indo kaheba kipengkadaam?

Menna bäbä hi puha dipaitai indo kakuasaammu Debata?"^{††}

³⁹Iam too kasuhunganna anna sangngim tä'um mala matappa' aka inna puham duka' natula' loppo' nabi Yesaya kadanna Puang Allataala naua:

⁴⁰"Sangngim kubutai matanna anna mala tä' paita, kupomakahha' penabanna anna mala tä' deem aka naala penabanna.

[†]12:32 Kao-kao, maka' too balimä' ditandeam yaboanna inde lino: Puang Yesus ditandeam wattunna dipatei yabo kaju sitambem, anna wattunna diäkä' längäm ongeam kamatandeanna yabo suhuga. Petua'i duka' Yoh. 3:14 sola 18:32.

[§]12:32 ingganna hupatau: kalembasanna, to buttu dio mai ingganna botto, taia angga mandi to Yahudi.

^{**}12:34 la ditandeam yaboanna lino: situhu' to Yahudi, kalembasanna la dipatei yabo kaju sitambem.

^{††}12:38 Yes. 53:1.

Aka indana ma'pasulei-sule lako Kaleku nasuhum kupabono'.^{¶¶}

⁴¹ Ia anna ma'kada susii Yesaya aka puham muita loppo' kamatandeanna Puang Yesus anna puham duka' natula' loppo' diona Puang Yesus.

⁴² Moinna anna susi, buda siam duka' to kasallena to Yahudi matappa' lako Puang Yesus. Sapo' moka ohi umpel-lampasanni indo kamatappasanna aka mahea'i lako to illaam kakalebuanna Parisi. Aka naua tä'um la mepäbäi tama pa'sambajanganna to Yahudi ke matappa'i tau lako Puang Yesus. ⁴³ Aka sangngim napakalando ia napuji hupatau anna la napuji Puang Allataala.

Tula'na Puang Yesus la umpassala hupatau

12:44-50

⁴⁴ Pissam wattu napekasallei ma'kada Puang Yesus naua: "Menna-menna unkatappa'ia', takao mandi nakatappa'i, sapo' setonganna unkatappa'i duka' indo to usuaä'.

⁴⁵ Anna menna-menna muitaä', muitam indo To usuaä'. ⁴⁶ Suleä' tama inde lino sihhapam kamasiäsam anna mala ingganna to unkatappa'ia' tä' la tohho illaam kamalillingam.

⁴⁷ Maka' la anggam napehingngii bäbä tau tula'ku, sapo' tä' napogau', iya takao la umpassalai. Aka tä' suleä' la umpassala lino, sapo' la kupasalama'. ⁴⁸ Menna-menna untumpu pala'ä' anna tä' umpail-laam penaba tula'ku, deem ia to la umpassalai. Indo kada puha kutula', iam too la umpassalai ke illaammi allo ma'katampasanna. ⁴⁹ Aka ma'tula'ä' tä' situhu' pa'elo' ikaleku bäbä, sapo' pa'elo'na Ambeku to usuaä'. Aka nasuaä'

untula'i indo la pahallunna kutula' anna kupalambi'. ⁵⁰ Anna kuissam kuua indo to napapahentaam la umbabakoa' lako katuboam sule lako salako-lakona. Dadi ingganna tula'ku kupalanda' umba susi puha napokada Ambeku."

Puang Yesus umbaseiam bitti'na indo sapulo dua passikolanna

13:1-20

13 La mahukku'um wattunna napakahoa' to Yahudi allo Kalappasanna dio mai kasabuasam. Iya naissam loppo'um Puang Yesus naua lambi'um wattunna la umpellei inde lino la ma'pasule längäm Ambena. Puham ungamasei ingganna to naampuammi inde lino, anna tontä liu nakamasei sule lako ma'katampasanna pengkähänganna inde lino.^{¶¶}

² Mahassanni mangngande Puang Yesus sola passikolanna indo bengi eta too, iya inna napengkähäm ia tomahajanna setam penabanna Yudas la umbalu' Puang Yesus. (Indo Yudas Iskariot änä'na Simon). ³ Naissammi Puang Yesus naua: "Napadokkoammä' lisu pala'ku ingganna kakuasaanna Ambeku." Naissam toi naua: "Kao buttu yaboä' mai Puang Allataala anna abana inna la ma'pasuleä' sule längäm Puang Allataala." ⁴ Nasuhum ke'de' Puang Yesus muäläi jubana^{§§} anna umpembeke'i handu'. ⁵ Puhai ia too, mualam uwai anna natolloi dokko lojam anna mane napahandu' umbaseiam bitti'na passikolanna. Puhai, napassihammi indo handu' napembeke'.

⁶ Ullambi'i Simon Petrus, iya nauam ia: "O Debata! Akanna la ikoi umbaseiannä' bitti'ku?"

¶¶12:40 Yes. 6:10.

¶¶13:1 tontä liu nakamasei sule lako ma'katampasanna pengkähänganna inde lino: mala toi duka' diua: tä' deem nasipadaangam indo pa'kamasena napa'paitaam.

§§13:4 juba: susi jas sapo' kalando ia.

⁷Mentimba'um Puang Yesus naua: “Inde kupogau' tä'pi muissam kalembasanna temo, sapo' dako'i too muissammi pole'.”

⁸Ma'kada pole oom Petrus naua: “Daa Debata! Damon tia pole' la umbaseiannä' bitti'ku!”

Sapo' natimba'i pole oom Puang Yesus naua: “Maka' tä'ko la kubaseiam bitti'mu, iya tä'um kita deem kasilombunganta.”

⁹Ma'kada pole oom Simon Petrus naua: “Maka' susi, iya tä' la bitti'ku mandi umbasei, sapo' limangkupi duka' anna ulungku.”

¹⁰Naua oom Puang Yesus: “Ingganna to puham mendio', bahassi asammi kalena. Tä'um manggi' dibasei sulibanna bitti'na. Mapattimmokoa', sapo' tä' ia asammu'.” ¹¹Aka naissam loppo'um Puang Yesus indo to la umbalu'i. Iam too anna nauam: “Mapattimmokoa', sapo' tä' ia asammu'.”

¹²Tappana puha asam nabaseiam bitti'na, iya ma'jubam sule anna lakoi sule ongeanna. Mane ma'tula'i naua: “Muissam asam maka' inde kupogausangkoa' temo? ¹³Si muuaannä' Tuanguhu anna Debata. Anna abana susi si'da. ¹⁴Moinna anna Kao Debatammua' anna tuanguhummu, sapo' puhangkoa' kubaseiam bitti'mu. Iya tä' mala tala sibase-baseiangkoa' duka' bitti'mu. ¹⁵Puham kupogau' la umpotandenganna', anna si umpogau'ia' duka' susi ia too. ¹⁶Setongam-tonganna mesa sabua' tä' tia matande puha ia anna la puäna; anna mesa to disua tä' matande puha ia anna la to ussui. ¹⁷Muissammia' kalembasanna inde ingganna tula'ku, iya tä' deem pada sakehongko'koa' ke umpogau'.

¹⁸Tä'koa' la nahua asam inde tula'ku. Aka kuissam asam ingganna to puha kupilei. Sapo' tä' mala tala sule lako indo puha tisuha' illaam Battakada Debata naua: ‘Indo to kupasola mangngande, iam too umpobaliä.’ ¹⁹Kutulasmal loppo'ungkoa' temo anna mala dadii too, iya unkatappa'inna' inde kua: ‘Kaom Too indo to diuaam Inna Deem.’ ²⁰Setonganna menna-menna untahima pesuaku, sihhapam siam tia Kao ma'kale natahima. Anna menna-menna untahimaä', sihhapam siam tia duka' indo To ussuaä' ma'kale natahima.”

Puang Yesus umpa'paissangam loppo' mesa passikolanna to la umbalu'i

13:21-30

Mat. 26:20-25; Mrk.

14:17-21; Luk. 22:21-23

²¹Puhai ma'tula' Puang Yesus diona kaha-kaha ia too, iya hossom penabanna. Anna mane napa'paissanganni naua: “Setongam-tonganna deem mesa solamua' la umbalu'ä.”

²²Iya sinenne'-nenne'im passikolanna anna sangngim mängä-mängä, aka tä' naissam menna indo nauaam. ²³Indo mesa passikolanna to napakamaja,* dio ia ampe'na Puang Yesus. ²⁴Iya naadoim Simon Petrus nauaam battuam: “Kutanai, menna amo kabam nauaam?”

²⁵Iya umpa'bisi'im Puang Yesus nakutanai naua: “O Debata, mennangki kabam?”

²⁶Natimba'im Puang Yesus naua: “Iai too kubeem dako' hoti ke puhai kuduho dokko lojam-lojam, iya iam too.” Iya mualam hoti anna naduhoi dokko lojam-lojam mane nabeenni Yudas Iskariot, änä'na Simon. ²⁷Puhai natahima Yudas

***13:23** mesa passikolanna to napakamaja: Situ' passangainna to Sahani yolona, Yohanes-um too indo diuaam to napakamaja Puang Yesus.

indo hoti, iya napentamaim ia tomahajanna setam.

Iya ma'kadam Puang Yesus lako Yudas naua: "Pogau'um too pole' indo la umpogau'na." ²⁸Sapo' pada indo to napasola mangngande tä' deem moi podo la mesa muissanni kalembasanna indo tula'na Puang Yesus lako Yudas. ²⁹Deem ussangai nasua Puang Yesus la mualli kaphalluam la dipake illaam hame-hame. Deem duka' ussangai nasua lao unt-abai doi' to mase-mase aka Yudas to si muanna doi'. ³⁰Puhanna naande Yudas indo hoti, messubum siaham umpellei solana. Wattu eta too malillimmi.

Pahenta bakahu

13:31-35

³¹Le'ba'i Yudas, ma'kadam Puang Yesus lako passikolanna naua: "Tentomai Kao Änä' Mentolino dipomatandemä'. Anna ingganna inde kupogau', iam too napolalam la dipa'patandaam kamatandeanna Puang Allataala. ³²Maka' inde kupogau' napolalam dipa'patandaam kamatandeanna Puang Allataala, iya Puang Allataala siam too duka' la umpomatandemä'. Anna tä'um la masäe anna napomatandemä'. ³³O inggannakoa' änä'ku, tä'um la masäe anna silappa'ungkia'. La umpeää' sapo' umba susi puha kupokadaam lako to kasallena to Yahudi, iya susim too duka' kupokadaangkoa' kuua: Indo ongeam la kuongei lao, tä'pia' duka' la ullambi'.

³⁴Kubeengkoa' temo pahenta bakahu: La sikamasekoa' mesa sola mesa. Umba susi kukamaseikoa', la susim too duka' tä' mala tala sikamasekoa' mesa sola mesa. ³⁵Maka' sikamasekoa' mesa sola mesa, iya la naissam asammi tau naua passikolannakoa' Puang Yesus."

Natula' loppo' Puang Yesus la nabahoi Petrus

13:36-38

*Mat. 26:31-35; Mrk.
14:27-31; Luk. 22:31-34*

³⁶Iya mekutanam Simon Petrus lako Puang Yesus naua: "O Debata, la lu umbako ngei?"

Natimba' Puang Yesus naua: "Tä'pi mala solaki' lako indo ongeam la kuongei temo. Dako'pi anna mane muula'ä'."

³⁷Mekutana pole oom Simon Petrus naua: "O Debata, akanna tä'ki' la mala sola temo? Ahu'ä' mate aka kutuhu'iko."

³⁸Natimba'i oom Puang Yesus naua: "Ahu' si'dakoka mate aka untuhu'ia'? Setongam-tonganna tä'pi la moni mäne' anna pentallummä' umbahoi."

Anggam umpolalam sanganna Puang Yesus mala tau landa' längäm Puang Allataala

14:1-14

14 Mane ma'kadai Puang Yesus lako passikolanna naua: "Daa umpasahubeba'a' penabammu! Pomanontonna' kamatapassammu lako Puang Allataala anna ungtappa'ia' duka'. ²Yabo banuanna Ambeku buda ongeam. La laomä' kupatokaangkoa' ongeam. Aka inna tä' siakoa' la kuuaam ke tä'i la susi. ³Puhaä' too lao umpatokaangkoa' ongeam, ma'pasulemä' sule mualakoa' anna mala iai too kuongei, etanna' duka' la muongei. ⁴Indo la kuongei lao, muitanna' lalam längäm."

⁵Iya ma'kadam Tomas naua: "O Debata, tä' kiissam indo ongeam la muongei lao. La mala haka tia kiita indo lalam?"

⁶Natimba' Puang Yesus naua: "Kaom too indo lalam anna kamaloloam anna

katuboam. Tä' deem mesa tau la mala landa' längäm Ambeku ke takaoi napolalam. ⁷Maka' unkgalesomä', la muissammokoa' too duka' Ambeku. Temo muissammia' anna muitanna' pole'."

⁸Ma'kada duka' Filipus lako naua: "O Debata, paitaikam Ambemu anna mala tiala inabangi."

⁹Sapo' natimba' Puang Yesus naua: "O Filipus, masäe punalangia' sola, sapo' tä' liu siamä' muissam. Aka iai too muitaä', iam too duka' muitam Ambeku. Maakam ia susi la muua: 'Paitaikam Ambemu?' ¹⁰Tä'paka tiko unkatappa'i muua Kao illaannä' Ambeku anna Ambeku illaam kaleku? Ingganna indo to puha kuuaangko tä' buttu di kaleku bäbä, sapo' Ambeku to tohho illaam kaleku unkgähäi. ¹¹Katappa'ia' indo si kuua: illaannä' Ambeku anna Ambeku illaam kaleku. La handam tää'munna' too matappa', ke indo mandi tanda memängä-mängä puha kupadadi unkatappa'ia'.

¹²Setongam-tonganna, iai too unkatappa'ia', iam too duka' la si umpalakoi indo si kupogau'. Tä' anggam ia sapo' la la'bi puhapi ia anna indo si kupogau', aka la laomä' längäm Ambeku. ¹³Ingganna aka-aka ke umpelauia' umpolalam sangangu la kubeengkoa', anna malai pa'palakoangu la umpatandaam kamatandeanna Ambeku. ¹⁴Ingganna aka-aka ke umpelauia' umpolalam sangangu la kupangngissi."

Puang Yesus umpa'paissangam la kasuleanna Penaba Maseho to la mepamoloi

14:15-31

¹⁵"Maka' too unkgamasei si'da-si'dää', iya la untuhu'ia' too ingganna pahentaku. ¹⁶La kupelau lako Ambeku anna nabeengkoa' To la umpamoloikoa' anna mala napasolaikoa' sule lako salako-lakona. ¹⁷Indo diuuaam To la

umpamoloikoa', ia siam Penaba Maseho to la umpa'paissangam kamaloloam. Tä' ia la natahima to tamatappa' inde lino, aka tä' ia naita anna tä' naissam. Sapo' ikoa'-iko muissanna' aka napasolaingkoa' temo anna la tohho illaam penabammua'. ¹⁸Tä'koa' la kupellei liu sihham to bium, sapo' la suleä' sule. ¹⁹Tä'um masäe anna kupelleim inde lino, nasuhum tä'mä' la naita lino. Sapo' ikoa'-iko, la muitaä'. Anna la tubokoa' aka Kao tuboä'. ²⁰Maka' too lambi'um allo ia too, iya la muissammia' muua Kao tohhoä' illaam Ambeku anna ikoa' tohho illaam kaleku, anna Kao tohhoä' illaam kalemua'. ²¹Iai too umpaillaam penaba pahentaku anna napalakoi, tau iam too unkgamaseiä'. Anna iai too unkgamaseiä' la nakamasei Ambeku. Anna Kao duka' la kukamasei tau ia too anna la umpa'paitannä' kaleku lako."

²²Mekutana Yudas (taia Yudas Iskarot) lako Puang Yesus naua: "O Debata, akanna la kami' mandi la umpaitai kalemua anna tä' ia lako lino?"

²³Natimba' Puang Yesus naua: "Iai too unkgamaseiä' la untuhu'i pepa'guhuangu. Tau ia too la nakamasei Ambeku, anna la solakam Ambeku umpellambi'i anna la tohhongkam sola tau ia too. ²⁴Indo to tä' unkgamaseiä', tä' siam tia duka' untuhu'i pepa'guhuangu. Anna indo pepa'guhuangu si uhhingngia', taia tula' ikaleku, sapo' buttu yabo mai Ambeku to ussuää'.

²⁵Ingganna ia too kutulasangkoa' sumala solapakia'. ²⁶Sapo' Penaba Maseho Ia la umpatudukoa' anna napakilala ingganna indo puha kupaissaniangkoa', aka Ia siam indo To la umpamoloikoa' la nasua sule Puang Allataala la umbala'ä'. ²⁷La kutampeangkoa' kamasakkeam. Kamasakkeam buttu di Kaleku, iam too

la kubeengkoa'. Indo la kutampeangkoa' tä' la susi pa'pebeenna lino. Daa umpasahubeba'a' penabammu anna tä' tookoa' la mahea'.

²⁸ Puhanna' uhhingngi anna muisam indo kuua: 'La le'ba'ä' sapo' la ma'pasuleä' sule.' Maka' too ungmamaseiä', iya la tilalla'koa' ke le'ba'ä' umpelambi'i Ambeku, aka matande puha la Ambeku anna la Kao. ²⁹ Kupaissanni loppo'koa' temo sumala tä'pi dadi, anna mala dadii too, la tontä liukoa' matappa'. ³⁰ Tä'ungkoa' la kupabudaam tula' aka tentomai wattunnam la sule tomahajanna setam to unguasai lino. Tä' Kao mala nakuasaiä', ³¹ sapo' la kuola siam ingganna inde la ullambi'ä' anna mala naissam hupatau naua: 'Ungkamasei Ambena anna napalako liu ingganna pahentana.'

Maingkoa' tapellei inde ongeam."

Puang Yesus sihhapam bätäna anggur anna passikolanna sihhapam täkena

15:1-17

15 Anna mane umpatahhu' tula'na Puang Yesus naua: "Kaom too bätäna anggur tongam anna Ambeku to ungmähäi. ² Ingganna täkeku tää'na kembua näälai lao, anna ingganna kembuanna napetähe'i nasuhum tuttuam buda buana. ³ Mapattimmokoa' kahana indo pepa'guhuam puhakoa' kubeem. ⁴ La tontä liukoa' tohho illaam kaleku anna Kao duka' la tohho liu illaam kalemu'. Aka tä' tia deem mesa täke la mala kembua ke säppe'i lao. Anggam mala kembua ke mendekke' liui lako bätäna. La susingkoa' too duka', anggam malakoa' kembua ke tohho liukoa' illaam kaleku.

⁵ Kaom too bätäna anggur anna ikoa' täkena. Menna-menna tontä liu tohho

illaam kaleku, anna Kao duka' tohho illaam kalena, la tahha' buana.† Sapo' maka' tä'koa' tohho illaam kaleku, iya tä' deem aka-aka la mala umpogau'. ⁶ Menna-menna tä' tohho illaam kaleku, sihhapam ia täke disäppe'i lao la mabangi. Mabangii too, dihempummi anna ditibe'i tama api ditunu. ⁷ Maka' tontä liukoa' tohho illaam kaleku, anna tula'ku tohho liua' illaam kalemu, iya pelauia' längäm Puang Allataala indo umpahalluam anna la naponnoi pelauammu. ⁸ Maka' budaa' buamu, iya la tandaammi too kamatandeanna Ambeku, anna tandaam toi diua abana passikolangku si'dakoa'.

⁹ Umba susi nakamaseiä' Ambeku, susimä' too duka' kukamaseikoa'. Tohho liukoa' illaam kaleku anna mala tontä liua' ussi'dim pa'kamaseku. ¹⁰ Umba susi tontä kusi'dim pa'kamasena Ambeku aka kupalako ingganna pahentana, susingkoa' too duka' la tontä liukoa' ussi'dim pa'kamaseku ke tontä liukoa' umpalako pahentaku.

¹¹ Kupaissanni asangkoa' ingganna ia too anna mala katilallasangku tohho illaam penabammua', nasuhum katilallasammua' la sundum anna sule lako. ¹² Indem ia pahentaku: La sikamasekoa' mesa sola mesa umba susi kukamaseikoa'. ¹³ Iai too handam ungmamasei solana, iam too umpebeem kalena dipatei anna mala tubo ia solana. ¹⁴ Ikonna' too solaku ke umpalako ingganna pahentaku. ¹⁵ Tä'ungkoa' kusangai sabua', aka mesa sabua' tä' ia muissam pattujunna puäna. Sapo' kusa'bu'ungkoa' solaku, aka ingganna kuhingnginna lako Ambeku puhangkoa' kupaissanni asam. ¹⁶ Taikoa' umpileiä', sapo' Kao umpileikoa'. Kusuakoa' lao anna malakoa' kembua buda. Anna bua

†15:5 *tahha' buana*: kalembasanna, la buda pa'palakoanna sola tula'na situhu pa'elo'na Debata. Susim too duka' kalembasanna illaam 15:8 anna 15:16.

ia too la da'da' liu. Maka' umpateenna', iya iai too umpelaua' längäm Ambeku umpolalam sanganku, tä' mala tala nabeengkoa'.¹⁷ Indem ia pahentaku: La sikamasekoa' mesa sola mesa."

Ikonna' too to nakabassi lino

15:18-16:4

¹⁸"Maka' too nakabassikoa' lino, la unglilalaia' indo tula'ku kuua: 'Yolo puhaä' Kao nakabassi anna ikoa'.¹⁹ Maka' hapanna la mesa penabakoa' to tamatappa' inde lino, iya abana la napohäekoa' aka solanakoa'. Sapo' puhangkoa' kupilei anna kupasähä' illaam mai alla'-alla'na, nasuhum taiangkoa' solana. Iam too anna nakabassingkoa'.²⁰ Pengkilalaia' indo puha kupokadaangkoa': Mesa sabua' tä' tia matande puha ia anna la puäna.[‡] Maka' too nadahhaä', iya la nadahhako' too duka'. Maka' too natuhu'i pepa'guhuangku, iya la natuhu'ia' too duka' pepa'guhuammu.²¹ Ingganna ia too la napogausangkoa' aka untuhu'ia'. Aka tä' muissam Puang Allataala to usuaä'.

²²Maka' hapanna tä' la suleä' anna tä'pi kutulasam asam, iya tää'i la napokasalaam. Sapo' temo tä'um pole' deem lalanna la ummaloloam kalena diona kasalaanna.²³ Menna-menna unglabassiä', unglabassi duka' Ambeku.²⁴ Indo kela tä'pi deem kupogau' illaam alla'-alla'nai tanda memängä-mängä indo täänapi deem napogau' tau senga', iya tää'i la napokasalaam. Sapo' moinna anna deemmi naita ingganna indo puha kupogau', iya nakabassi liu siangkam sola Ambeku.²⁵ Sapo' abana inna la susi anna mala sule lako indo puha tisuha' illaam Suha' Pahenta naua: 'Nakabassiä' moi anna tä'i deem lalanna.'[¶]

²⁶La kusuaangkoa' sule To la umpamoloikoa' buttu yabo mai Ambeku. Indo kuaam To la umpamoloikoa', ia siam Penaba Maseho to umpa'paissangam kamaloloam. Sulei too, iya napaissanningkoa' diona Kaleku.²⁷ Anna ikonna' too duka' pahallu la umpa'paissangam diona Kaleku, aka pahandu'napi anna sola liungkia'."

16 "Ta asanna inde kutulasangkoa' anna mala tä'koa' soho' boko' ke nalambi'ungkoa'.² Aka la dipassubungkoa' too illaam mai pa'sambajanganna to Yahudi aka untuhu'ia'. Tä' anggam ia too, sapo' la sule wattunna la deem tau umpateikoa' aka nasangam ia duka' umpalakom pengkähänganna Puang Allataala.³ Kaha-kaha ia too la napogausangkoa' aka tä'pi muissam Ambeku anna tä' tooä' naissam.⁴ Kutulasangkoa' temo anna mala dadii too unglilalaiana' muua: 'Inna puha siangkam napaissanni loppo'."

Pengkähänganna Penaba Maseho

16:4-15

"Kaha-kaha ia too tä'koa' kupaissanni loppo' inde dio mai aka sola-solapakia'.⁵ Sapo' temo la le'ba'mä' umpellambi'i To usuaä', anna tä'ungkoa' deem moi podo la mesa umpekutanaanni indo la kuongei le'ba'.⁶ Anna inde tula'ku napomanabo inabammua'.⁷ Sapo' setongam-tonganna kutulasangkoa' la umpomapia puhaa' ia ke le'ba'ä'. Aka maka' tä'ä' le'ba', iya tä' duka' la sule indo To la umpamoloikoa'. Sapo' maka' le'ba'ä' la kusua sule napellambi'ikoa'.⁸ Maka' too sulem, la umpakilalam hupatau diona dosana, kamaloloam, anna pa'tahungkunganna

[‡]15:20 susi siam indo natula' illaam Yoh. 13:16.

[¶]15:25 Puj. 35:19, 69:5.

Puang Allataala. ⁹La napomakaleso naua madosa aka tä' nakatappa'ia'. ¹⁰Anna la napomakaleso naua maloloä' aka la yabomä' sola Ambeku anna tä'mä' la muita pole. ¹¹Anna la napomakaleso naua hupatau ia la ullambi' pa'tahungkunganna Puang Allataala aka indo tomahajanna setam to unguasai lino ditahungkummi ia.

¹²Budapi la pahallu kutulasangkoa', sapo' temo tä'pia' la umbela untahima. ¹³Sapo' maka' too sulem indo Penaba Maseho to la umpa'paissangam kamaloloam, iya la natettekoa' lako ingganna kamaloloam buttu di Puang Allataala. Indo tula'na tä' la buttu di kalena, sapo' la indo nahingnginna lako Ambeku natulasangkoa'. Anna la napaissanni loppo'koa' kaha-kaha mane la sulena. ¹⁴Anna la napomatandä', aka la napaissannikoa' ingganna indo puha kubeem. ¹⁵Ingganna indo naampuanna Ambeku, iam too duka' kuampuam. Iam too anna kuaaam: la napaissannikoa' Penaba Maseho ingganna indo puha kubeem."

Kamasussaam anna katilallasam

16:16-24

¹⁶Mane naua polei: "Tä'um la masäe anna tä'mä' muita pole. Sapo' tä' siam la masäe anna muitamä' sule." ¹⁷Iya sikutana-tana pole oom passikolanna naua: "Aka hia kalembasanna indo tula'na lako kitaa' naua: "Tä'um la masäe anna tä'mä' muita pole. Sapo' tä' siam la masäe anna muitamä' sule;" anna indo naua: "La le'ba'ä' umpellambi'i Ambeku?" ¹⁸Aka hia umbai' kalembasanna indo naua: "Tä'um la masäe?" Tä' taissanna' aka amo nauaam!"

¹⁹Naissam Puang Yesus naua maelo'i la mekutana nasuhum ma'kada naua: "Inngena' kuaa 'Tä'um la masäe anna tä'mä' muita pole. Sapo' tä' siam la masäe anna muitamä'

sule.' Iangka ussitimba'-timba'ia'? ²⁰Setongam-tonganna la sumahhokoa' anna umbatim sapo' la tilalla' ia to tamatappa'. La manabo inabammua' sapo' indo kamanaboam inabammu la napembala' katilallasam. ²¹Sihhagam mesa baine mahassam mangnguhiba', tä' deem pada samapi'di'. Sapo' tappana subum änä'na, iya tä'um nakilalai indo kamapi'disanna aka tilalla'um anu' tamam lino änä'na. ²²Susingkoa' too duka' temo sangngim manaboa' inabammu. Sapo' maka' sitammu polengkia', la tappa tialaa' inabammu anna tä' deem tau la mala umpa'dei katilallasammu. ²³Allo eta too tä'ungkoa' deem la ungkutanai poleä'. Setongam-tonganna, iai too umpelaua' lako Ambeku umpolalam sangangku, iam too la nabeengkoa'. ²⁴Sapo' meangga temo tä'poko' deem umpelaua' aka-aka umpolalam sangangku. La si umpelaua' anna mala untahima, nasuhum sundum katilallasammua'."

Puang Yesus untaloi kakadakeanna lino

16:25-33

²⁵"Ingganna inde tula'ku kualaangkoa' pehapangam. La deem wattunna tä'ungkoa' la kualaam pehapangam, sapo' la kubatotäiammoko' diona Ambeku. ²⁶Wattu eta too la melaukoa' längäm Ambeku umpolalam sangangku. Tä' kuaa la manggi' Kao umpelauangkoa' lako Ambeku, ²⁷aka sangngim nakamaseikoa' Ambeku aka ungkamaseiä' duka' anna unngkatappa'ia' indo kuaa: 'Sule yaboä' Kao mai Puang Allataala.' ²⁸Abana buttu yaboä' mai Ambeku sule mentama inde lino. Anna temo la kupelleim inde lino ma'pasule längäm Ambeku."

²⁹Nasuhum ma'kada passikolanna naua: "Temo umbatotäim pole' untula', taiam pehapangam. ³⁰Iya temo

kiissammi pole' kiua Iko to muissam asam ingganna-ingganna sia. Tä'um tau pahallu mekutana liu matim. Iam too anna kikatappa'im kiua: Iko to buttu yaboko mai Puang Allataala."

³¹Natimba' Puang Yesus naua: "Matappa' si'dangkoka' temo? ³²Sapo' la sule wattunna, anna abana wattunnam, la dipatisehangkoa' ma'pasule lako banu-ammu si mesa-mesa umpelleiä' mesa-mesangu. Sapo' tä' siamä' mesa-mesa aka napasolaiä' Ambeku. ³³Ia asanna inde kutula' anna malakoa' masannam aka deemmi kasilombungantaa'. Ilaam inde lino abana inna la masussakoa', sapo' pomatohioia' penabammu aka kutaloim ingganna kakadakeam illaam inde lino!"

Sambajanna Puang Yesus

17:1-26

17 Tappana puha ma'tula' Puang Yesus, iya mentongam längäm langi' anna ma'kadai naua: "O Ambe', lambi'um wattunna la kuola indo la ullambiä'. Pomatandei Änä'mu anna mala napa'patandaam kamatandeammu. ²Aka puhama' untuho la unguasai ingganna hupatau, anna mala indo ingganna to bali umbeennä' la kubeem duka' katuboam sule lako salako-lakona. ³Indem ia indo katuboam sule lako salako-lakona: ke naissammoko hupatau naua anggam Iko Puang Allataala Debata, anna Yesus Kristus pesuamu. ⁴Kusuppi'um indo pengkähängam puha umbeennä' la kukähä illaam inde lino napolalam kupa'patandaammi kamatandeammu. ⁵O Ambe', pomatandeiä' temo dio olomu, susi indo kamatandeam inna taampuam yolona indo anna tä'pi dipadadi inde lino.

⁶Anna puhangko kupa'paissangam lako inde mai hupatau to puha umbeennä' illaam inde lino. Sangngim

petauammu yolona, sapo' umbeemmä' anna sangngim untuhu'im tula'mu. ⁷Naissannim temo naua ingganna indo puha umbeennä' abana inna buttu di Iko. ⁸Aka puham kupalandasam tula'mu anna natahimam. Naissam tongam-tongammi abana inna buttu di Ikoä' anna nakatappa'im Iko ussuaä' mentama inde lino. ⁹Kupa'sambajangam inde mai tau. Sapo' tä' kupa'sambajangam asam ingganna hupatau illaam inde lino, anggam indo to puham umbeennä', aka tau ia too petauammum. ¹⁰Ingganna petauangku, ia too petauammu duka'; anna petauammu, petauangku siam duka'. Anna iam too umpa'patandaam kamatandeammu. ¹¹Tä'mä' la tohho illaam inde lino aka la matimmä' umpellambi'iko. Sapo' inde mai tau la tohhoi ia illaam inde lino. O Ambe' To maseho, kambii' inde mai hupatau illaam sanga kakuasaammu, indo sanga puhama' umbeem. Anna mala umba susi kita to mesaki', la susiim too duka' la mendadi to mesa. ¹²Padam säena solakanni, iya sanga kakuasaammu kupake unguambi' anna unjagai inde mai solaku. Indo sanga puhama' umbeem, iam too kupake anna mala tää'i deem pa'de, sulibanna indo to mesa inna la pa'de ia, anna mala sule lako indo tisuha' illaam Battakada Debata.

¹³Temo la matimmä' umpellambi'iko. Sapo' kutulasampi yolo ingganna inde tula'ku sumala illaampä' inde lino, anna mala sangngim naponnoi katilallasangu. ¹⁴Puham kupalandasam tula'mu, nasuhum nakabassi to tamatappa' aka taia solana. Anna Kao duka' taiaä' solana to tamatappa'. ¹⁵Tä' kupelau la muäläi illaam mai inde lino, sapo' kupelau la unjagai indana nakadakei tomahajanna setam. ¹⁶Umba susi

taiaä' solana to tamatappa', susim too duka' inde mai solaku taia solana to tamatappa'.¹⁷ Kamaloloammu la umpolalam umpasähä' mendadi umma'mu. Aka kadammu, iam too kamaloloam.¹⁸ Umba susi puhaä' ussua mentama inde lino, susim too duka' kusuai la lako inde lino.¹⁹ Umbehoä' kaleku matim anna mala keguna lako passikolangku, anna mala kamaloloammu la umpolalam umpasähä' duka' mendadi umma'mu.

²⁰ Anna tä' angga mandi inde mai kupa'sambajangam, sapo' duka' lako ingganna indo to la unkatappa'ia' umpolalam passa'biinna inde mai la napa-landasam diona Kaleku.²¹ O Ambe', kupa'sambajangam anna mala mendadii to mesa, umba susi tohhoko illaam Kaleku anna tohhoä' illaam Kalemumu. Kupelau umba ke malai susi duka' ingganna to matappa' mendadikia' to mesa anna mala nakatappa'i ingganna tau naua Iko ussuaä'.²² Puhaim kubeem kamatandeam indo puha umbeennä', anna mala mendadi to mesa anna sakutu' susiki' inna to mesa.²³ Kao illaannä' kalenai, anna Iko illaangko Kaleku anna mala sundum kamesaanna, napolalam naissam asam hupatau naua Ikom too ussuaä'; anna la naissam toi naua ungkamasei duka' susi pa'kamasemu lako Kaleku.

²⁴ O Ambe', maelo'ä' anna mala ingganna indo to umbeennä' la solakam illaam ongeam la kuongi, anna mala naita kamatandeam, indo puha umbeennä' aka inna ungkamasei' yolo mane dipadadii inde lino.²⁵ O Ambe' to muundu' lollä, tä'ko naissam inde lino, sapo' Kao-kao kuissangko Iko. Anna naissammi inde mai naua Ikom too ussuaä'.²⁶ Puham kupa'paissanganko lako indo to umbeennä' anna la tontä liu kupasusi, anna mala pa'kamasemu indo kusi'dim illaam Kaleku la nasi'dim duka'

illaam penabanna, anna la tohhoä' illaam kalena."

Puang Yesus disakka

18:1-11

Mat. 26:47-56; Mrk.

14:43-50; Luk. 22:47-53

18 Puhai ma'sambajam Puang Yesus, iya messubummi illaam mai kota Yerusalem sola passikolanna anna ullambanni salu Kidron. Eta too deem mesa bela'. Iya le'ba'im tama indo bela'.² Ongeam ia too naita Yudas indo to umbalu' Puang Yesus aka eta si naongi Puang Yesus ma'mesa sola passikolanna.³ Iya le'ba'um duka' Yudas lako indo bela' umpasola to si unjagai Banua Debata indo pesuana kapala sando sola to illaam kakalebuanna Parisi, natuhu' salengkoam sohodadu Roma. Sangngim umbaba ballo anna pangkakka' mataham.⁴ Naissam asammi Puang Yesus indo la ullambi'i, nasuhum umpengkahuku'i indo tau buda sule anna nakutanai naua: "Mennaa' umpeä?"

⁵ Iya natimba'im naua: "Yesus to Nazaret."

Iya nauam Puang Yesus: "Kaom too inde." (Dio duka' heem Yudas to umbalu' Puang Yesus.)⁶ Tappana naua: "Kaom too inde," iya sangngim ma'saha boko'im anna tissämbä'i dokko litä'.

⁷ Nakutanai pole oom Puang Yesus naua: "Mennaa' umpeä?"

Mentimba'i pole oom naua: "Yesus to Nazaret."

⁸ Iya nauaammi: "Kusanga puhangkoa' kuaam: 'Kaom too inde.' Maka' Kao si'daa' umpeä, iya päbäim ia le'ba'i inde mai tau."

⁹ (Napokadanna ia too, iya sule lakom indo puha natula' loppo' lako Ambena naua: "Lako ingganna to puha umbeennä', tä' deem kupäbäi pa'de moi

podo la mesam.”) ¹⁰Iya ussintä'um pa'danna Simon Petrus anna umbattai Malkus sabua'na sando too', iya mäläi talinga kananna.

¹¹Iya ma'kadam Puang Yesus lako Petrus naua: “Patamai sule banuanna pa'dammu! Aka ussanga haka iko tä' la kupendudum indo kamapi'disam puha napadudunniä' Ambeku?”⁸

Puang Yesus dibaba lako olona Hanas

18:12-14

¹²Iya silelem ussacka Puang Yesus indo sohodadu Roma sola pangngulunna anna to manjaganna to Yahudi anna nasäke'i. ¹³Uhuna yolo dibaba Puang Yesus lako olona Hanas, pasananna Kayafas to muanda'i sando too' illaam taum eta too. ¹⁴Kayafas-um too indo puha umpakilala ingganna to kasallena to Yahudi, naua: “Dotam tia mesa tau mate dibala'iam tau buda.”

Petrus umbahoi Puang Yesus

18:15-18

Mat. 26:69-70; Mrk. 14:66-68; Luk. 22:55-57

¹⁵Wattu eta too natuhu' dua passikolanna Puang Yesus: Simon Petrus anna mesapi solana. Indo solana Petrus siissam ia sando too', nasuhum mala ia sola Puang Yesus tama pa'hanteanna sando too'. ¹⁶Anna Petrus ia mangngampa illaam sulibam dio ba'ba. Mane messubunni sule indo solana lako sulibam umpellambi'i mesa baine to manjaga ba'ba umpelauam Petrus umba ke malai sola tama. Iya solam Petrus tama. ¹⁷Iya ma'kadam lako Petrus indo baine to manjaga ba'ba

naua: “Taiakoka duka' passikolanna itim dio tau o?”

Iya natimba'um Petrus naua: “Taia!”

¹⁸Eta too umpopehobaja api napendähäi indo sanaka-naka to manjaga anna sabua' aka masäkke' kaliane. Iya le'ba'um duka' lako Petrus ke'de'-ke'de' mendähä sola indo tau.

Puang Yesus napahessa sando too'

18:19-24

Mat. 26:59-66; Mrk. 14:55-64; Luk. 22:66-71

¹⁹Iya ungkutanaim Puang Yesus indo sando too' diona passikolanna anna pepa'guhuanna.

²⁰Natimba'i Puang Yesus naua: “Kao-kao, tä' deem kubuni tula'ku dio olona tau buda. Si ma'pa'guhu liuä' illaam pa'sambajanganna to Yahudi anna illaam Banua Debata, indo ongeam si naongi to Yahudi ma'mesa. Tä'pi deem indo si kupokadanna la kubuni-buni. ²¹Iya akanna Kao ungkutanaia'? Laokoä' kutanai indo to puha uhhingngi tula'ku. Aka naissanni hi tia indo puha kupokada.”

²²Tappana napokada Puang Yesus ia too, iya deemmi mesa to manjaga untampilinni lindona anna nauaanni: “Akanna bahaniko ma'kada susi lako sando too'?”

²³Natimba'im Puang Yesus naua: “Maka' sala inde tula'ku, tulasannä' salanna. Sapo' maka' tappa', akanna untampilim bäbää'?”

²⁴Mane ussuai tau Hanas umbaba Puang Yesus puha dipungo lako sando too' isanga Kayafas.

⁸**18:11** *ussanga haka iko tä' la kupendudum indo kamapi'disam puha napadudunniä' Ambeku?*: Indo dituli' illaam basa Yunani, naua ia ke basa Bambanni: *ussanga haka iko tä' la kuihu'i indo ihusam pandahhaam puha nabeennä' Ambeku?*

Petrus umbahoi liu Puang Yesus**18:25-27***Mat. 26:71-75; Mrk.
14:69-72; Luk. 22:58-62*

²⁵Tontä liupi ke'de'-ke'de' Simon Petrus mendähä eta too. Iya nauaanniim tau: "Taiakoka duka' passikolanna indo tau?"

Sapo' nabahoi liu naua: "Taia."

²⁶Deem mesa sabua'na sando too', sahapunna indo to nabatta talinganna Petrus ma'kada lako naua: "Taiko haka tia indo kuita napasola illaam indo bela?"

²⁷Nabahoi pole oom Petrus naua: "Takao." Iya tappa moni siaham mäne'.

Puang Yesus napahessa Pilatus**18:28-38***Mat. 27:1-2, 11-14; Mrk.
15:1-5; Luk. 23:1-5*

²⁸Mebengngi'-bengngi'pi anna dibabam Puang Yesus dio mai banuanna Kayafas dibaba lako ongeanna Gubernur. Ingganna indo to Yahudi tä' ia tama indo ongeanna Gubernur, indana ungkussi'i kalena. Aka situhu' peadasanna tä' la mala naande indo kinande si diande illaam allo Kalappasam ke makussi'i kalena.**

²⁹Iam too anna messubummi Gubernur Pilatus umpellambi'i anna nakutanai naua: "Aka hia' iko untandasam inde tau?"

³⁰Natimba'im naua: "Indo tia kela taia tau kadake, tä'um tia la kibabaangko sule!"

³¹Iya nauaammi Pilatus: "Babaia' lao ammu hotto'i situhu' peadasammu."

Sapo' silele natimba'i naua: "Tä'kam mala umpassala tau la dipatei."³²(Susim too inde anna mala sule lako indo puha natula' loppo' Puang Yesus la maaka susi kamateanna.)†† ³³Iya tamam sule ongeanna Gubernur Pilatus anna untambai Puang Yesus nakutanai naua:

"Ikongka tomahajanna to Yahudi?"

³⁴Iya natimba'um Puang Yesus naua: "Buttu di kalemu haka inde pekutanaammu, deem daka tau senga' umpaissanniko diona kaleku?"

³⁵Natimba' Pilatus naua: "Aka to Yahudiä' isanga? Aka solamu siam too indo umbabako sule sola-solai ingganna kapala sando. Aka hia indo puha umpogau?"

³⁶Iya natimba'um Puang Yesus naua: "Kaphentaangku tä' buttu illaam mai inde lino. Aka indo kela buttu illaam mai inde lino, la manggeba ingganna pentuhu'ku indana dibehoä' lako to kasallena to Yahudi. Sapo' abana inna tä' buttu illaam mai inde lino kaphentaangku."

³⁷Mekutana pole oom Pilatus lako naua: "Maka' susi, tomahaja si'da hakoka?"

Natimba' Puang Yesus naua: "Ikam muuai tomahaja. Iam too anna disubungammä' illaam inde lino aka la kupa'paissangam kamaloloam lako hupatau. Iai too tohho illaam kamaloloam, iam too umpehinggii tula'ku."

³⁸Iya mekutana pole oom Pilatus lako naua: "Aka isanga kamaloloam?"

****18:28** Indo Gubernur taia to Yahudi. Situahu' peadasanna to Yahudi nasanga makussi' ke tamai ongeanna taianna to Yahudi.

††**18:32** Puang Yesus dipatei yabo kaju sitambem situhu' kabiasaanna to Roma. Tä' ia disileba'-leba'i batu situhu' kabiasaanna to Yahudi. Batai 12:32-33; Mat. 20:18-19.

**Pilatus umpebeem
Puang Yesus dipatei**

18:38–19:16

*Mat. 27:15-31; Mrk.
15:6-20; Luk. 23:13-25*

Puhanna ma'kada susi Pilatus, iya messubum oom sule illaam mai ongeanna anna ma'kadai lako ingganna indo to Yahudi naua: “Tä' deem kulambi' kasalaanna inde tau moi podo la mesam. ³⁹Sapo' situhu' kabiasaammua' si kulappasangangkoa' mesa to ditahungkum illaam allo Kalappasam. Dadi muaku haka' ke kulappasangangkoa' inde tomahajanna to Yahudi?”

⁴⁰Sapo' sikaoli mandi naua: “Tää', taia la dilappasam, sapo' la Barabas dilappasam.” (Indo Barabas to si mahhampo'.)

19 Iya ussuam sanaka-naka sohodadu Pilatus uhhabi' Puang Yesus. ²Puhai ia too umpapiam songko' indo sohodadu susi songko' tomahaja sapo' keduhi, anna napasongko'ianni Puang Yesus. Puhai, iya umpabajuim Puang Yesus juba mellolo pao susi juba si napake tomahaja, ³mane sibala'-bala'i lako olona naua: “O tomahajanna to Yahudi, kipa'kasalleiko!” Anna mane natampilinni.

⁴Puhai ia too, messubum oom Pilatus anna ma'kadai lako tau buda naua: “Petua'i, kubabaangkoa' subum anna mala muissanna' muua tä' si'da-si'da deem kulambi' kasalaanna moi podo la mesam.” ⁵Iya messubummi Puang Yesus ma'songko' keduhi anna ma'juba mellolo pao. Iya ma'kadam Pilatus lako indo tau buda naua: “Petua'ia', indem indo tau!”

⁶Tappana muita Puang Yesus indo ingganna kapala sando sola to si unjagai Banua Debata, iya sikaolim napa'sule-

sulei naua: “Päso'i, päso'i yabo kaju sitambem anna malai mate!”

Iya natimba'im Pilatus naua: “Pa'kalengkoa' alai anna umbabaia' lao kela umpäso'ia' yabo kaju sitambem. Aka kao-kao, tä' deem kulambi' kasalaanna moi podo la mesam.”

⁷Mentimba'um indo to Yahudi naua: “Situhu' peadasangki, tau ia too la pahallu dipatei. Aka ussangai kalena Änä'na Puang Allataala.”

⁸Tappana nahingngi Pilatus pentimba'nai, iya tuttuam mahea' nasi'dim, ⁹lambi' tama sule ongeanna Gubernur anna mekutana oi lako Puang Yesus naua: “Aka buttu umba si'da hako iko ngei?” Sapo' tä'um natimba'i Puang Yesus.

¹⁰Naua pole oom Pilatus: “Mokako isanga untimba'ia'? Aka kao anna dilappasanko, kao anna dipäso'ko yabo kaju sitambem.”

¹¹Natimba' Puang Yesus naua: “Kela tä'ko nabeem Puang Allataala kakuasaam ia too, inna tä' sia deem kakuasaammu lako kaleku. Iam too anna mabanda' puham ia dosana indo to umbehoä' matim.”

¹²Tappana nahingngi Pilatus kada ia too, iya napeäm lalanna anna mala dilappasam Puang Yesus. Sapo' sikaoli mandi indo to Yahudi naua: “Tää', aka maka' la ullappasam, iya taiangko too sassipakamajanna tomahajanna Roma! Aka iai too ussanga bäbä kalena tomahaja, iam too balinna tomahajanna Roma.”

¹³Tappana nahingngi Pilatus kada ia too, iya ussuam Puang Yesus messubum anna muokko'i ia Pilatus yabo okkosam pahhottosam illaam mesa ongeam isanga Sali Batu (disangai illaam basa Ibrani Gabata). ¹⁴Wattu eta too umbai' la tette' sapulo dua kalem sipatu duka' pa'patokaam allo Kalappasam. Iya

ma'kadam Pilatus lako indo to Yahudi naua: "Ianna' too inde tomahajammu!"

¹⁵ Iya sikaoli oom naua: "Päso'i! Päso'i! Päso'i yabo kaju sitambem anna malai mate!"

Nakutanaim Pilatus naua: "Aka la kupäsosangkoa' isanga tomahajammu yabo kaju sitambem anna malai mate le!"

Natimba' indo kapala sando naua: "Aka tä' deem tomahaja senga'ki sulibanna tomahajanna Roma." ¹⁶ Iya umpebeemmi Puang Yesus Pilatus lako indo tau buda, la lao napatei yabo kaju sitambem.

Puang Yesus dipalängäm kaju sitambem

19:16-27

Mat. 27:32-44; Mrk.

15:21-32; Luk. 23:26-43

Iya deemmi sanaka-naka sohodadu muala Puang Yesus anna napasolai lao. ¹⁷ Dibabam Puang Yesus messubum kota umpassam kaju sitambem, iya sulem lako mesa ongeam isanga Ongeam Kahohä' Ulu (disangai illaam basa Ibrani Golgota). ¹⁸ Etam naongeti dipayabo kaju sitambem sola dua tau; mesa dio tandai kananna, mesa dio tandai kaihinna. Dadi illaam la tängä Puang Yesus.

¹⁹ Yaboi kaju sitambem Puang Yesus, ussuam tau Pilatus umpadekke' pantuli' naua: PUANG YESUS TO NAZARET, TOMAHAJANNA TO YAHUDI. ²⁰ Buda to Yahudi umbatai indo pantuli' ia too, aka indo ongeam naongeti Puang Yesus dipatei yabo kaju sitambem tä' sikambela kota. Indo pantuli' dituli' illaam tallu basa: basa Ibrani, basa Latin, anna basa Yunani. ²¹ Iya ingganna kapala sando ma'kada lako Pilatus naua: "Daa untuli'i naua: 'Tomahajanna to Yahudi,'

sapo' la untuli' dia naua: 'Tau iam too inde si muuai: Kaom too tomahajanna to Yahudi.'"

²² Sapo' natimba' Pilatus naua: "Indo puha tituli', iam too la tituli' liu."

²³ Tappana yabo kaju sitambem Puang Yesus, naalam sohodadu indo pohebana anna nabahe appa'i. Tungga' naala sandai si sabaheam. Naala duka' bajunna. Indo bajunna tä' deem dasi'na, anggam salamba' ditannum mengkalao yabo sule dokko. ²⁴ Iya sipa'tula'-tula'um indo sohodadu naua: "Tä' la tapolo-poloa' inde bajunna, sapo' taundiia', battu mennantaa' mualai." Kaha-kaha ia too dadi anna mala sule lako indo puha tisuha' illaam Battakada Debata naua: "Nabahe-bahe pohebaku, anna naundi bajungku."††

Iya napateem si'da indo appa' sohodadu.

²⁵ Sikahuku' indo kaju sitambem naongeti Puang Yesus, ke'de'-ke'de' indona sola indouhena tandai indona, Maria baina Klopas, anna Maria Magdalena. ²⁶ Tappana muita indona sola indo passikolanna to napakamaja ke'de'-ke'de' eta, iya ma'kadam Puang Yesus lako indona naua: "O mama', iam too itim la umpoänä'." ²⁷ Mane ma'kadai lako indo passikolanna naua: "Iam too itim la umpoindo." Napahandu'um eta too, indo passikolanna untahima indona Puang Yesus tohho dio banuanna.

Kamateanna Puang Yesus

19:28-30

Mat. 27:45-56; Mrk.

15:33-41; Luk. 23:44-49

²⁸ Puhai ia too, naissam Puang Yesus naua ingganna aka-aka suppi' asammi. Iya ma'kadam Puang Yesus naua: "Mabähhännä'," anna mala sule lako ingganna indo puha tisuha'

††19:24 Puj. 22:19.

illaam Battakada Debata. ²⁹Eta too, deem mesa pa'pongngeam kessi anggur maissu', iya dihammem bunga karang^{¶¶} tama indo anggur anna dipadekke'i lako bätä hisop mane dipalängänni dipatu'doi sädäna Puang Yesus. ³⁰Puhai naihu' indo anggur, iya ma'kadam naua: "Sule lakom." Puhai ia too lumukkum anna umbehoi sungnga'na.

Puang Yesus dibuno

19:31-37

³¹Allo eta too allo pa'patokaam la mentama allo Katohhoam. Situ' kabi-asaanna to Yahudi pemali la tontä liu tipäso' bakkena to dipatei yabo kaju sitambem illaam allo Katohhoam. La'bi-la'binna allo eta too sipatu allo Kalapasam. Iam too anna le'ba'um sanakanaka to kasallena to Yahudi lako Pilatus napelau la diheppo' asam bitti'na ingganna indo to dipäso' yabo kaju sitambem anna mala bale' mate, mane dipatuhunni yabo mai indo kaju sitambem. ³²Iya le'ba'im sohodadu uhheposam bitti'na indo to dua solana Puang Yesus dipäso' yabo kaju sitambem. ³³Sapo' tappana ullambi'i Puang Yesus, naita matem, iya tä'um ia naheposam bitti'na. ³⁴Sapo' deem di mesa sohodadu umbunoi sa'dena, iya tappa messubum haha sola uwai. ³⁵Indo mesa tau dio duka' heem naita kadadiam ia too, iam too ussa'bii anna mala matappa'koa' duka'. Aka malolo passa'biinna anna naissam naua tappa'. ³⁶Kaha-kaha ia too dadi anna mala sule lako indo puha tisuha' illaam Battakada Debata naua: "Tä' deem moi podo la mesa

bukunna diheppo'."§§ ³⁷Anna tisuha' toi duka' illaam Battakada Debata naua: "La sangngim napahandam indo to puha nabuno."*

Bakkena Puang Yesus dipatama lokko'

19:38-42

*Mat. 27:57-61; Mrk.
15:42-47; Luk. 23:50-56*

³⁸Puhai ia too, deem mesa tau isanga Yusuf to buttu dio mai Arimatea napelau lako Pilatus naua: "La mala haka kupatuhum bakkena Puang Yesus?" (Indo Yusuf mesa duka' passikolanna Puang Yesus, sapo' tä' napa'paissangam aka mahea' lako to kasallena to Yahudi.) Tappana napäbäi Pilatus, iya le'ba'um muala bakkena Puang Yesus. ³⁹Eta too Yusuf napasolai Nikodemus indo to puha umpellambi'i Puang Yesus wattu bengi. Indo Nikodemus umbaba bauam bubanau' isanga mur anna gaharu dipasihau-hau, umbai' tallu pulo kilo budanna. ⁴⁰Iya mualam sampim mabusa anna natantannii indo bauam bubanau' mane nabalunganni indo bakkena Puang Yesus, umba susi ada' kabiasaanna to Yahudi kela ullamunni to mate. ⁴¹Indo naongi Puang Yesus dipatei yabo kaju sitambem, deem mesa bela' nasikahukusam. Illaam indo bela' deem mesa lokko', tä'pi deem to mate dipatama. ⁴²Iya napatamam indo lokko' aka mahuku' anna la lambi'um allo Katohhoam.

¶¶19:29 *bunga karang*: mangnguhanna batu panga' si tubo dio le'bo', susi lomo' malunä'na.

§§19:36 Täss. 12:46, Pah. 9:12, Puj. 34:21.

*19:37 Za. 12:10.

Lo'bäm indo lokko'**20:1-10***Mat. 28:1-8; Mrk. 16:1-8; Luk. 24:1-12*

20 Bengi-bengipi indo allo Minggu eta too anna le'ba'um Maria Magdalena lako indo ku'bu'. Sulei lako, iya naitam indo batu dilapasam ba'ba lokko' tibehom. ²Iya tappa lumumpa' siaham lao umpellambi'i Simon Petrus anna indo passikola to napakamaja Puang Yesus nauaam: "Naalam tau indo bakkena Puang Yesus illaam mai ku'bu', sapo' napaumba amo ngei." ³Iya tappa le'ba' siaham Petrus sola indo mesapi solana passikola lako ku'bu'. ⁴Bassim lumumpa' sapo' mäläpu' puha ia indo solana Petrus nasuhum ia yolo landa' lako ku'bu'. ⁵Lumukkum naolläi tama indo lokko', iya angga ham pebalunna naitam tihongkä' illaam, sapo' tä' ia le'ba' tama. ⁶Meula' siam duka' Simon Petrus, tappa tahhu' ia tama indo lokko', iya naita indo pebalum tihongkä'. ⁷Sapo' indo sampim disapusam ulunna, tä' sikahuku' indo pebalum sapo' lao senga' ia tilulum. ⁸Iya le'ba'um duka' tama indo solana Simon Petrus to yolo landa' lako ku'bu', iya naitam, nasuhum natappasam. ⁹(Aka sule lako allo eta too tää'i liupi nakaleso indo puha tisuha' illaam Battakada Debata naua: "Tä' mala tala tubo sule.") ¹⁰Puhai ia too, iya ma'pasuleim lako banuanna.

Puang Yesus umpa'paitaam kalena lako Maria Magdalena**20:11-18***Mat. 28:9-10; Mrk. 16:9-11*

¹¹Sapo' ke'de' ia Maria Magdalena dio olona ba'ba lokko' wattu eta too

sumahho. Napasindum sumahho, lumukkum anna naolläi tama indo lokko'. ¹²Iya naitam dua malaika', bassim ma'poheba mabusa, muokko' dio indo ongeam puha naongei bakkena Puang Yesus, mesa dio tandai pengnguluanna anna mesa dio tandai pempollosanna. ¹³Iya mekutanam indo malaika' naua: "O indo', akanna sumahhoko?"

Iya natimba'im Maria naua: "Naalam tau Debatangku anna napaumba amo ngei." ¹⁴Puhai ma'tula', menggihi'um lako boko'na, iya muitam Puang Yesus ke'de' dio, sapo' tä' naissam naua Puang Yesus dia.

¹⁵Nakutanaim Puang Yesus naua: "Indo', akanna sumahhoko? Menna umpeä?"

Nasanga Maria to ma'bela', nasuhum ma'kada lako naua: "O tuam, maka' iko mualai, kamaseiä' anna untulasannä' umba ngei umpa'pongngai anna mala lao kualä."

¹⁶Iya ma'kada oom Puang Yesus naua: "O Maria."

Iya menggihi'um lako Puang Yesus anna ma'kadai illaam basa Ibrani naua: "Rabuni!" (kalembasanna "Tuangguhu").

¹⁷Iya nauaammi Puang Yesus: "Daa muanda'ia' aka tä'pä' deem längäm Ambeku. Sapo' le'ba'ko lako ingganna solasubungku anna umpaissannii muua: Naua Puang Yesus: 'La längännä' Ambeku anna Ambemua'; Puang Allataala to kupenombai anna Puang Allataala to umpenombaia'." ¹⁸Iya le'ba'um Maria Magdalena umpellambi'i ingganna passikolanna Puang Yesus anna natulasanni naua: "Siitangkam Debata." Anna napalandasam duka' indo tula'na Puang Yesus.

**Puang Yesus umpa'paitaam
kalena lako passikolanna**

20:19-23

*Mat. 28:16-20; Mrk.
16:14-18; Luk. 24:36-49*

¹⁹Tappana bengi indo allo Minggu eta too, iya ma'mesam indo passikolanna illaam mesa banua dikädo' ba'bana, aka unkahea' to kasallena to Yahudi. Pissananna ke'de'-ke'de' bäbäm Puang Yesus illaam alla'-alla'na anna ma'kadai naua: “Kehongko'koa' anna maupa' nalambi'ungkoa' kamasannangam.” ²⁰Puhai ma'kada susi, iya umpa'paitaammi limanna sola sa'dena. Iya tä' deem pada satilalla' indo passikolanna muitanna Debata.

²¹Iya ma'kada pole oom Puang Yesus naua: “Kehongko'koa' anna maupa'. Umba susi nasuaä' Ambeku, susimä' too duka' kusuakoa'.”

²²Puhai, nasimbuhu'im anna nauai: “Tahimaia' Penaba Maseho. ²³Maka' muampunnikoa' dosana tau, iya la diampunni too. Anna maka' tä' muampunnia' dosana, iya la tä' too diampunni.”

**Puang Yesus umpa'paitaam
kalena lako Tomas**

20:24-29

²⁴Indo Tomas, si diuaam to Hendu,† mesa duka' to tihekem sapulo dua passikolanna Puang Yesus, sapo' tä' ia dio heem sola solana wattunna anna sulei Puang Yesus. ²⁵Iya nauaammi solana: “Tomas, puhangkam kami' siita Debata.”

Sapo' natimba' Tomas naua: “Tä'pi kao kukatappa'i ke tä'i kuita sola matangku anna kutu'doi indo pampäsosam dio limanna anna indo bila'na dio sa'dena.”

²⁶Pitu bengii lessu'na, iya ma'mesa oom passikolanna Puang Yesus illaam indo banua. Eta too diom pole' heem Tomas. Moinna anna tikädo' asam ba'ba, sapo' sule Puang Yesus ke'de'-ke'de' oo illaam alla'-alla'na anna ma'kadai naua: “Kehongko'koa' anna maupa' nalambi'ungkoa' kamasannangam!”

²⁷Mane ma'kada polei naua: “Tomas, petua'i inde limangku anna tu'doi tahunomu. Kokoi limammu tama inde sa'deku ammu kaka'i bila'ku. Tä'ungko la bata-bata liu, sapo' katappa'i!”

²⁸Iya tappa natimba'i Tomas naua: “O Debatangku anna Puang Allataala to kupenombai!”

²⁹Iya ma'kada oom Puang Yesus naua: “Mane matappa' dako le', aka muitamä'? Kehongko' anna maupa' lako ingganna tau to matappa' moi anna tä'ä' naita.”

Kasuhunganna anna dituli' inde suha'

20:30-31

³⁰Budapi senga'na tanda memängä-mängä napogau' Puang Yesus dio olona passikolanna, sapo' tä'um dituli' asam illaam inde suha'. ³¹Sapo' ia asanna ia too disuha' anna mala unkatappa'ia' muua Puang Yesus-um too indo To dilanti' la mepasalama', Änä'na Puang Allataala; anna la ullambi'koa' katuboam umpo-lalam indo kamatappasammua' lako kalena.

**Puang Yesus umpa'paitaam
kalena lako pitu passikolanna
dio bihim le'bo'**

21:1-14

21 Puhai ia too, umpa'paitaam oom kalena Puang Yesus lako passikolanna dio bihinna Le'bo' Tiberias. Susi ia inde tulasanna: ²Pissam wattu ma'hempunna' Simon Petrus, Tomas

†20:24 to Hendu: naua illaam basa Yunani *Didimus*, kalembasanna, To Hendu.

(si diuam to Hendu),[‡] Natanael (to buttu dio mai Kana, lembäna Galilea), indo dua änä'na Zebedeus, anna duapi passikola senga'na Puang Yesus. ³Iya ma'kadam Simon Petrus lako solana naua: "La laoa' kao mebau."

Iya nauam solana: "La laokia' sola." Iya le'ba'im längäm lopi. Sapo' pusam bengi eta too, tä' deem aka nalolongam. ⁴Tappana bihha' allo indo masiäna, iya ke'de'-ke'de'um Puang Yesus dio indo bihim le'bo', sapo' tää'i naissam naua Puang Yesus dia.

⁵Ma'kadam Puang Yesus naua: "Oa' änä'ku deem daka bau mualaa'?"

Iya natimba'im naua: "Tä' deem."

⁶Iya nasuam Puang Yesus naua: "Pessämbäsannia' dalamu lako tandai kananna itim lopi anna mala ullolongango' bau." Iya umpessämbäsannim duka' dalana, iya tä' nabela nahuntu' aka buda punala bau naala.

⁷Iya ma'kadam lako Petrus indo mesa solana passikola to napakamaja Puang Yesus naua: "Debata dipe ä." Tappana nahinggi Simon Petrus indo tula'na naua: "Debata dipe ä," iya mualam bajunna napa'baju (aka tä' ma'baju) anna mekkattibe'i dokko le'bo' anna mengkajai libam. ⁸Anna indo passikola senga' umpasohe ia lopinna längäm galantangam napasindum umbeso dalana ponno bau. Aka tä' siam sikambela bihinna le'bo', umbai' angga hi mesa hetto alla'na. ⁹Tappana tuhunni yabo mai lopi, iya muitam hoti anna api pehobaja, bau yabona.

¹⁰Iya nauam Puang Yesus: "Babaia' mai si sanaka-naka itim bau mane puhaa' ussukka." ¹¹Le'ba'um Simon Petrus längäm lopi anna nabesoi indo dalana längäm galantangam. Indo dala ponno bau si kasalle, sahatu' lima pulo

tallu budanna. Moi anna pada budanna, sapo' tä' mammi sesse' indo dalana.

¹²Iya natambaiim Puang Yesus naua: "Maikoa' pa'loppo." Sapo' tä' deem moi podo la mesa passikolanna la bahani mekutana naua: "Mennako isanga?" Aka naissannim naua Debata hia päläe'. ¹³Iya napengkahuku'im Puang Yesus, naala indo hoti anna nabeenni, susi siam duka' indo bau. ¹⁴Iam too inde kapentallunna umpa'paitaam kalena Puang Yesus lako passikolanna puhanna dipatibangom sule dio mai alla'na to mate.

Puang Yesus sipa'tula' Petrus

21:15-19

¹⁵Puhai mangngande, ma'kadam Puang Yesus lako Simon Petrus naua: "Simon, änä'na Yohanes, mentondom puha haka iko pa'kamasemu lako kaleku anna la pa'kamasena inde mai solamu?"

Natimba'im naua: "Tappa' Debata. Aka inna muissammi kukamaseiko."

Iya nauam Puang Yesus "Tahinanaannä' ingganna änä' dombaku."

¹⁶Mane ma'kada polei Puang Yesus kapenduanna naua: "Simon, änä'na Yohanes, ungkamasei hakä'?"

Natimba'i oom duka' naua: "Tappa' Debata. Aka inna muissammi kukamaseiko."

Iya nauaammi Puang Yesus: "Kambisannä' ingganna dombaku."

¹⁷Mekutana pole oom kapentallunna naua: "Simon, änä'na Yohanes, ungkamasei hakä'?"

Iya manabo inabanna Petrus aka kapentallunnam nakutanai Puang Yesus naua: "Ungkamasei hakä'?"

Iya natimba'i pole oom naua: "O Debata, Iko ullosa ingganna-ingganna sia. Dadi muissammi kukamaseiko."

[‡]21:2 to Hendu: naua illaam basa Yunani *Didimus*, kalembasanna, To Hendu.

Iya nauaammi Puang Yesus
 “Tahinanaannä' dombaku.
¹⁸Setongam-tonganna wattunna
 mangnguhapoko ma'kaleko umbeke'
 äbä'mu anna ma'lao-laoko situhu'
 pa'elo'mu. Sapo' maka' matuangko, la
 mangngundappako anna nasäke'ko tau
 senga' anna nababako lako ongeam
 tää'na umpohäe.” ¹⁹(Ma'kada susi
 Puang Yesus lako Petrus aka natulasam
 loppo' la maaka susi kamateanna dako'.
 Anna kaha-kaha ia too la napolalam
 dipa'kasallei Puang Allataala.) Mane
 ma'kada oi Puang Yesus lako Petrus
 naua: “Tuhu'ä.”

**Indo passikola to
 napakamaja Puang Yesus**

21:20-24

²⁰Tappana messaile Petrus, iya
 naitam mentuhu' indo mesa passikola
 to napakamaja Puang Yesus. (Ia siam
 indo to puha umpa'bisi'i Puang Yesus
 nakutanai wattunna anna mangngandei
 sola-sola naua: “O Debata, mennangki
 kabam la umbalu'ko?”) ²¹Tappana
 naita Petrus, iya mekutanam lako

Puang Yesus naua: “O Debata, la umba
 ia susi inde tau?”

²²Natimba' Puang Yesus naua: “Maka'
 kupoelo' inde tau la tubo liu sule
 lako kasuleangku ma'penduanna, taia
 iko issammu. Anggam iko muissam un-
 tuhu'ä.” ²³Iya napeleleim to matappa'
 naua: “Indo passikola ia too, tä' la
 mate.” Anna tä' di deem naua Puang
 Yesus: “Tau ia too tä' deem la mate.”
 Anggam ia naua: “Maka' kupoelo' inde
 tau la tubo liu sule lako kasuleangku
 ma'penduanna, taia iko issammu.”

²⁴Iam too indo passikola to napaka-
 maja Puang Yesus, puha ussa'bii ing-
 ganna kadadiah ia too, anna ia toi
 ussuha'i. Anna taissanna' taua tappa'
 tula'na.

Kada pebubum

21:25

²⁵Budapi senga'na napogau' Puang
 Yesus. Maka' hapanna la dituli' asam ing-
 ganna pa'palakoanna, naua inabangku
 tä' la sihua inde lino ingganna suha' ia
 too.

Pa'palakoanna Suho

Bätäna issinna

Inde suha' Pa'palakoanna Suho kasitahhusanna issi suha' Kaheba Katilallasam diona Puang Yesus nasuha' Lukas. Issinna inde suha' Pa'palakoanna Suho umpomakaleso diona pengkähänganna pentuhu'na Puang Yesus natette Penaba Maseho umpa'pakahebaam Kaheba Katilallasam diona Puang Yesus dio Yerusalem, lembäna Yudea, anna Samaria, sule lako lili'-lili'na lino (1:8). Anna untula'pi duka' diona katiballasanna peadasam kasahaniem napahandu' illaam alla'-alla'na to Yahudi lambi' tiballa' kalua' napopeadasam issinna lino. Indo to untuli'i inde suha' pahallu nasi'dim napomakaleso lako ingganna to umbatai anna naissanni naua tä' deem pattujunna to Sahani la umbali to ma'pahenta Roma, sapo' ia hia la ussundunni peadasanna to Yahudi.

Inde suha' Pa'palakoanna Suho tibahe tallu issinna. Illaam inde tallu baheanna natula' umba susi tiballa' kalua'na Kaheba Katilallasam diona Puang Yesus anna tibangonna kamesapenabaanna to matappa': Dadi uhu-uhuna tiballa' kasahaniem dio Yerusalem puhanna tiäkä' Puang Yesus längäm suhuga; Kapenduanna tiballa' lako lembä senga' dio Palestina; Anna kapentallunna tiballa' kalua'na Kaheba Katilallasam lako mobotto-bottoam indo sikahuku'na Le'bo' Itängä mengkalao dio Palestina sule lako Roma.

Diona pengkähänganna Penaba Maseho mesa kaha-kaha handam too'na illaam inde suha' Pa'palakoanna Suho. Sule Penaba Maseho sola kakuasaanna uhhampoi to matappa' dio Yerusalem illaam allo kasalle Pentakosta. Ingganna

indo kaha-kaha tituli' illaam inde suha' umpa'patandaam maaka susi Penaba Maseho umpatette liu anna umpakatoto' ingganna to matappa' sola pebabanna.

Kaheba Katilallasam dipepa'guhuam illaam ada' kasahaniem wattu eta too tipungngu' tannum illaam sanaka-naka pa'tula'na suho.

Ingganna indo kaha-kaha tituli' illaam inde suha' umpa'patandaam umba susi kakuasaanna Kaheba Katilallasam umpatigaha' ingganna to Sahani anna umpamesa penaba mentu'na to matappa'.

Lesoanna issinna

1. Dibukka lalam anna mala dipa'pakahebaam lako lino Kaheba Katilallasam (1:1-26)

a. Ma'dandi Puang Yesus la umpasule Penaba Maseho anna ussua pentuhu'na la umpa'pakahebaam Kaheba Katilallasam (1:1-14)

b. Matias dituhu umbala' Yudas (1:15-26)

2. Kaheba Katilallasam dipa'pakahebaam dio Yerusalem (2:1-8:3)

3. Kaheba Katilallasam dipa'pakahebaam dio lembäna Yudea, anna Samaria, anna lako sanaka-naka ongeam senga' (8:4-12:25)

4. Pengkähänganna Paulus umpa'pakahebaam Kaheba Katilallasam (13:1-28:31)

a. Uhuna pa'laoanna Paulus (13:1-14:28)

b. Pa'hempunganna pebaba ada' dio Yerusalem (15:1-35)

c. Kapenduanna pa'laoanna Paulus (15:36-18:22)

d. Kapentallunna pa'laoanna Paulus (18:23-21:16)

e. Paulus ditahungkum dio Yerusalem, Kaisarea, anna Roma (21:17-28:31)

Didandi kasuleanna Penaba Maseho**1:1-5**

1 O Teofilus, illaam indo uhuna suha'ku kupomakalesom ingganna pa'palakoanna Puang Yesus susi pengkähängam nakähä, susi pepa'guhuan napalanda' ²sule lako allo naonpei tiäkä' längäm suhuga. Wattunna anna tä'pi längäm suhuga, sola kakuasaanna Penaba Maseho umpakahi'di ingganna suhona to puha napilei indo la napogau'na. ³Puhai mate, kapuhaammi umpa'paitaam kalena lako ingganna suhona. Anna umpogau' toi buda tanda anna makalesoi diua tubo sule. Aka appa' pulopi allona naolaam si umpellambi'i suhona anna natulasanni diona kapahentaanna Puang Allataala.

⁴Pissam wattu ma'hempum oom mangngande sola suhona anna napakahi'di naua: “Daa umpelleia' Yerusalem. Ampaia' pa'dandianna Ambeku umba susi puha kutulasangkoa'. ⁵Aka Yohanes uwai ia napake mantedo', sapo' ikoa'-iko tä'um la masäe anna dipatamaingkoa' Penaba Maseho susi ditedo'.”

Puang Yesus tiäkä' längäm suhuga**1:6-11**

⁶Wattunna anna ma'hempunni Puang Yesus sola suhona, mekutanam suhona naua: “O Debata la temongka umpake'de' sule kapahentaantaa' to Israel-kia?”

⁷Natimba' Puang Yesus naua: “Aka anggam Ambeku umpa'tantui, tä' iko manggi'a' muissam aka ia too kakuasaanna Ambeku. ⁸Sapo' ikoa'-iko la dibeengkoa' kakuasaam ke sulem Penaba Maseho la unguasaikoa' anna la mendadikoa' sa'bingku dio Yerusalem, lembäna Yudea, lembäna Samaria, anna sule lako lili'-lili'na lino.”

⁹Puhanna ma'tula', tiäkä'um längäm lawwa naita suhona lambi' nahehunni gabum sampe tä'um landa' naita. ¹⁰Mentongaipi längäm langi' indo suhona ma'petua', iya muita ham dua tau ma'poheba mabusa dio ampe'na. ¹¹Iya tappa ma'kadam indo tau naua: “O to Galilea akanna sikadehekoa' ma'petua' längäm langi'? Indo Puang Yesus tiäkä' längäm suhuga napelleikoa', la siam la ma'pasule sule yabo mai susi inde muitaa' temo.”

Matias dituho umbala' Yudas**1:12-26**

¹²Iya ma'pasuleim indo suhona le'ba' lako Yerusalem mengkalao dio mesa tanete disangai Tanete Zaitun sikahuku' siam Yerusalem. ¹³Iya landa'i, le'ba'im längäm mesa lotem, ongeam si naonpei tohho Petrus anna Yohanes, Yakobus anna Andreas, Filipus anna Tomas, Bartolomeus anna Matius, Yakobus änä'na Alfeus anna Simon (to mentama kakalebuanna to umbali kapahentaanna Roma) anna Yudas änä'na Yakobus. ¹⁴Sangngim manontom umpamesa penaba ma'sambajam sola sanaka-naka baine, sola Maria indona Puang Yesus, anna solasubunna Puang Yesus.

¹⁵Allo eta too ke'de' Petrus illaam alla'-alla'na solana to ma'hempum, umbai' la si sahatu' dua pulo tau budanna, anna ma'kadai naua: ¹⁶“O ingganakoa' solasubungku, ganna'um issinna Suha' Maseho, indo napalambi' Penaba Maseho napalombum Daud, diona Yudas to ummatalalanni to ussakka Puang Yesus, ¹⁷moi anna yolona to dihekem duka' solaki anna to mangngala taba duka' illaam pengkähängangki.” ¹⁸(Indo doi' sahona Yudas umpogau' kakadakeam puham naalliam sangngenam litä'. Iya etam naonpei tappa lumbä lambi' tigontam tambu'na. ¹⁹Anna kaha-kaha ia too naissam asam tau dio

Yerusalem lambi' indo litä' nasangai situhu' tula'na “Hakal Dama” kalem-basanna Litä' Haha.)²⁰ “Aka puha tisuha' illaam suha' Pampujiam naua:

‘Päbäi mammi lo'bä ongeanna anna päbäi memase-mase;’

anna:

‘La naala tau senga' babanganna.’[¶]

^{21–22} Dadi la pahallu diala mesa tau la uhhängännikam illaam mai alla'-alla'na indo to si kipasola liu indo anna solapakam Puang Yesus napahandu' dio pantedosanna Yohanes, sule lako allo naonangi tiäkä' Puang Yesus längäm suhuga napelleikam, anna mala pada-padakam ussa'bii diona katuboanna sule.”²³ Iya sikanatuhom dua tau isanga Yusuf si diuaam toi Barsabas (anna si diuaampi liu Yustus) anna kaduanna isanga Matias.²⁴ Iya ma'sambajannim anna melaui naua: “O Debata, iko ullosa tama penabanna si mesa-mesa tau. Tuhoi mennanna la umpoelo' inde dua tau²⁵ la umpake illaam inde pengkähängam la mendadi suhomu la umbala' Yudas to untampe inde pengkähängam, aka lakom ia lembä bolom la sipäto'na naonangi.”²⁶ Sikanaundim indo dua tau, iya Matias nahua la uhhängänni indo to sapulo mesa suhona Puang Yesus.

Katuhunganna Penaba Maseho

2:1-13

2 Tappana lambi' allo kasalle Pen-takosta, ma'hempummi indo ing-ganna to matappa'um dio mesa ongeam.² Pissananna nahingngim moni susi uh-hunna hibuh' kasalle tuhum yabo mai langi' umponnoi indo banua naonangi ta-dongkom ma'hempum.³ Iya naitaim ti-tantam api susi lila tungga' uhhampoi indo tau illaam banua.⁴ Silele dipata-mai Penaba Maseho nasuhum manähä

asam umpake ma'hupa-hupa basa situhu' kada napalosaam Penaba Maseho la napotula'.

⁵ Dio Yerusalem eta too tohho to Yahudi buttu dio mai ma'hupa-hupa botto illaam inde lino. Tau ia too si untuhu'i si'da-si'da Puang Allataala.

⁶ Nahingnginna tau buda indo moni ma'uhhum, ma'silullu' siaham sule sisippi'-sippi'. Sangngim pusa' aka tungga' uhhingngi basana napake indo ingganna to matappa'um ma'kada-kada.

⁷ Sangngim pilla' lambi' sipa'tula'-tula' naua: “Taia haka tia to Galilea inde lako ma'kada-kada? ⁸ Maaka hia susi anna malai tungga' uhhingngikia' basata napotula'? ⁹ Susinna kita' to Partia, to Media, to Elam, issinna Mesopotamia, Yudea anna Kapadokia, Pontus anna Asia, ¹⁰ Frigia anna Pamfilia, Mesir anna lembäna Libia sikahuku' Kirene; anna to sule dio mai Roma ¹¹ (susi to Yahudi teem to mentama peadasanna to Yahudi), to Kreta anna to Arab; tahingngi asammi' ma'kada-kada situhu' tula'taa' si mesa-mesa diona kaha-kaha memängä-mängä napogau' Puang Allataala.” ¹² Sangngim pilla' anna mängä-mängä napasindum sipa'tula'-tula' naua: “Aka hia kalembasanna indea'i?”

¹³ Sapo' deem siam duka' tau piha mantelle-telle naua: “Inde lako tau mäbö'i aka buda sugali' anggur naihu.”

Pa'tula'na Petrus

2:14-40

¹⁴ Sapo' tappa ke'de' Petrus sola indo to sapulo mesa solana napekasallei ma'kada naua: “O to Yahudi anna ing-gannakoa' issinna Yerusalem, pengngis-sannia' anna umpaillaam penaba man-appaia' inde kadangku. ¹⁵ Inde mai tau tä' tia mäbö' susi passangaim-

[¶]1:20 Puj. 69:26, 109:8.

mua' aka temo mane tette' kaseha mebenggi'.¹⁶ Sapo' iam too indee indo puha napa'paissangam Puang Allataala napalobum nabi Yoel naua:

¹⁷ 'La dadi illaam allo ma'katampasanna susim too kadanna Puang Allataala: La kutolloi Penaba Maseho ingganna hupatau, nasuhum pessubummua' la umpalom-bum kadangku.

Susi duka' lako ingganna to mangn-guhammua' la kulipi, anna mala naita indo kaha-kaha la kupaitai.

Anna lako ingganna tomatua ulummua' la si kupalosai illaam tindo.

¹⁸ Susi duka' ingganna sabua'ku muane anna baine, la kutolloi Penaba Maseho illaam allo ia too

anna umpalanda'i ingganna kaha-kaha indo la kupaissanniam.

¹⁹ Anna la kupadadi buda tanda memängä-mängä yabo langi' anna ma'hupa-hupa tanda illaam lino susinna haha, api, sola hambu pelamboho.

²⁰ La pi'de mata allo lambi' la malillim pättä

anna bulam la malea susi haha anna mane lambi' allo kasuleanna Debata.

Allo kasalle ia too la ponnom pole' kamatandeam.

²¹ Menna-menna mengkaala längäm De-bata illaam wattu eta too,

iam too to la untahima kasalamasam.[§]

²² O inggannakoa' to Israel, patanannia' talinga inde kadangku: Indo to nahua inde tula'ku Puang Yesus to Nazaret, mesa to natuho Puang Allataala. Aka umpogau' ma'hupa-hupa tanda illaam alla'-alla'mua' kahana

kakuasaanna Puang Allataala anna nakamängä-mängäi asam ingganna hupatau susi puha muissanna'.²³ Ia toi puha dibeengkoa' anna umpebeenna' dipatei yabo kaju sitambem nakähä to kadake gau' situhu' pattujunna Puang Allataala.²⁴ Sapo' napatibangom anna nalappasam Puang Allataala dio mai kamateam aka tä' Ia la mala nataloi kamateam.²⁵ Aka puha natula' loppo' Daud tula'na Puang Yesus naua:

'Puang Allataala liu kupahandam anu' ia passappi' matoto'ku dio tandai kanangku,

nasuhum tä'ä' la mala tige'ge'.

²⁶ Nasuhum ponno kakassiam illaam penabangku

anna lemba' katilallasam dio pudu'ku, susi duka' bätä puntingku la masannam anna ponno pahhannuam

²⁷ aka tä'ko umpäbäi sungnga'ku la to-hho illaam kamateam,

anna tä' toi la umpäbäiä' Kao inde To Masehomu la bosu.

²⁸ Iko puha umpatuhoiä' lalam lu lako katuboam sule,

anna tiala inabangku aka Iko tontä umpasolaiä'.^{**}

²⁹ Dadi inggannakoa' solasubungku, kupassubungangkoa' issi penabangku untula' diona Daud nene to taponene puham mate anna puha dilamum, anna ku'bu'na da'da' liupi taitaa' sule lako temo.³⁰ Sapo' indo Daud mesa duka' nabi, dadi naissam naua puha ma'pinda Puang Allataala la napatadongkongam mesa pessubunna la untadongkonni okkosam kahajaanna.

³¹ Puha naissam Daud aka la napogau' Puang Allataala lambi' natula' loppo'um diona katuboanna sule To puha dilanti' la mepasalama'. Indo anna natula'i inde naua:

§2:21 Yl. 2:28-32.

**2:28 Puj. 16:8-11.

'Aka tä' Ia la napäbäi tohho illaam kamateam

anna tä' duka' la bosu bäbä.^{††}

³² Puang Yesus-um too indo napatibangom sule Puang Allataala anna kami'um too to ussa'bii.

³³ Anna naäkä'um Puang Allataala untadongkonni ongeam kamatandeam sola kakuasaam nabeem Ambena anna untahima Penaba Maseho indo puha didandiam. Iam too natolloam yabo mai, indo puhaa' taita anna tahingngi.

³⁴ Aka taia Daud längäm suhuga sapo' Daud dia ma'kada naua:

'Ma'kada Puang Allataala lako Debatangku naua:

Okko'ko dio tandai kanangku

³⁵ sule lako wattunna la kupadadi pehhondoammu ingganna balimmu.^{‡‡}

³⁶ Dadi pahallu muissam si'da-si'da inggammua' to Israel muua indo Puang Yesus to puhaa' umpatei yabo kaju sitambem naäkä'um Puang Allataala mendadi Debata anna To puha dilanti' la mepasalama'."

³⁷ Tappana nahingngi kaha-kaha ia too tappa tillä'bä' buana ingganna tau to dio heem lambi' mekutana lako Petrus anna ingganna solana naua: "Akam la kipogau?"

³⁸ Natimba' Petrus naua: "Tihokongam asangka' gau'mu ammu behoia' kalemu ditedo' sola sanganna Yesus Kristus anna mala diampunniangka' dosamu anna la nabeengkoa' Penaba Maseho Puang Allataala. ³⁹ Aka ikonna' too sola pessubummu anna ingganna tau taianna to Yahudi nahua pa'dandiam ia too. Anna la budapi tau natambai situhu' pattujunna Puang Allataala."

⁴⁰ Iya budapi tula' senga' napakaingasam indo tau buda anna napa'sule-sulei napakilala naua: "Äläi'koa' kalemu

illaam mai alla'-alla'na inde mai to kadake gau' anna malakoa' salama'."

Pa'palakoanna jumaa' uhu-uhuna

2:41-47

⁴¹ Ingganna to untahima indo tula'na Petrus umbeho asam kalena ditedo', lambi' allo eta too kehängäm to matappa' kiha-kiha tallu sa'bu tau budanna.

⁴² Iya sangngim manontom muanda'i pepa'guhuanna suhona Puang Yesus, anna tontä liu umpasakalebu kalena. Anna si ma'mesa liu dio mesa ongeam umpiä'-piä' hoti naande pada-pada anna ma'sambajam.

⁴³ Mahea' asam ingganna to dio heem tappana muita buda tanda memängämängä anna ma'hupa-hupa tanda napa'dadi Puang Allataala nakähä suhona.

⁴⁴ Anna ingganna indo to matappa' tontä liu ma'mesa anna ingganna aka-akanna naampuum pada-pada. ⁴⁵ Susi toi ke deenni to umbalu' aka-akanna nataba-taba indo allinna lako solana situhu' kapahalluanna si mesa-mesa.

⁴⁶ Sola kamanontongam umpamesa penaba si ma'hempum allo-allo illaam Banua Debata anna umpasibala'-bala' banuanna naongeti umpiä'-piä' hoti anna mangngande pada-pada sola katilallasam anna sakalebu penabanna, ⁴⁷ napasindum umpuji sanganna Puang Allataala. Napohäe asam tau anna allo-allo tuttuam buda aka nahängänni liu Puang Allataala bilangganna to la salama'.

Petrus umpabono' mesa to kempo'

3:1-10

3 Pissam kahubem la tette' tallu kalem, iya le'ba' oom Petrus sola Yohanes längäm Banua Debata aka la lambi' wattunna ma'sambajam. ² Eta too deem mesa muane dibulle sule

^{††}2:31 Puj. 16:10.

^{‡‡}2:35 Puj. 110:1.

aka kempo' inna susi disubungam. Allo-allo si dipadio ampe' ba'ba balana Banua Debata isanga Ba'ba Mapi'dä' anna mala si umpelau aka-aka lako to si sule ma'sambajam. ³Tappana muita Petrus sola Yohanes la tamam Banua Debata, iya tappa melaum indo to kempo' lako. ⁴Iya nalio-liom Petrus sola Yohanes mane ma'kadai Petrus naua: "Nenne'ikam mai." ⁵Unnenne'im Petrus sola Yohanes indo to kempo' aka naua illaam penabanna: "Aka amo la nabeennä."

⁶Ma'kadam Petrus naua: "Bulabam sola peha' tä' deem kuampuam sapo' indo deenna illaam kaleku, iam too la kubeengko. Sola sanganna Yesus Kristus to Nazaret, pellaoko!" ⁷Naanda'im lima kananna anna nahuntu'i längäm napake'de', iya tappa matoho siaham bitti'na. ⁸Tappa ke'de' mekkattibe-tibe anna kalao-laoi lako dio mai mane untuhu'i Petrus sola Yohanes tama pa'hanteanna Banua Debata napasindum mellao kabuä-buä anna umpuji sanganna Puang Allataala. ⁹Anna naitanna ingganna tau ma'ilo-ilo indo to dipabono' umpuji Puang Allataala, ¹⁰tappa naissanni naua ia indo to si muokko' dio ampe'na Ba'ba Mapi'dä'na Banua Debata si kapelau-lau. Iya sileleim pusa' anna mängä-mängä muitai indo puha dadi lako kalena indo tau.

**Pa'tula'na Petrus dio tädo'
Salomo illaam Banua Debata**

3:11-26

¹¹Mengnganda' liupi lako Petrus anna Yohanes indo tau dio mesa ongeam si diuam Tädo' Salomo, iya sulem tau buda sangngim mängä-mängä anna pusa' tangnga'na ma'silullu' lako umpellambi'i. ¹²Naitanna Petrus indo tau buda, iya ma'kadam naua: "O to Israel akanna pilla'koa' muita

inde kadadiam anna maaka anna ullio-liokanni mato-mato inde tau mala mellao aka kakuasaam anna kamasehoam buttu di kaleki? ¹³Puang Allataala to napenombai Abraham, Ishak, Yakub, anna nene to taponene puha umpomatande Sabua'na isanga Puang Yesus to balim umpembeenna' lako Pilatus anna untumpu pala'dio olona, moi anna mohäe Pilatus ullappasanni. ¹⁴Sapo' untumpu pala'dakoa' iko To Maseho anna To Malolo, anna umpelaukoa' to papateam lako Pilatus la dilappasam. ¹⁵To mebaba lako katuboam sule lako salako-lakona puhaa' iko umpatei sapo' napatibangom Puang Allataala dio mai alla'na to mate, anna diona kaha-kaha ia too kami' ussa'bii. ¹⁶Aka kamatappasam illaam sanganna Puang Yesus napolalam maläppu' inde to masaki susi muitaa' anna inde tau to muissanna'. Bono'um sakinna aka kamatappasanna lako sanganna Puang Yesus.

¹⁷O inggannakoa' solasubungku, kuissammi kuua ia anna umpogau'ia' aka balam tamuissannaa' susi ikoa' teem to pebabammua'. ¹⁸Sapo' lalam ia too napake Puang Allataala ungganna'i indo puha napokada loppo' napalombum ingganna nabi naua: 'To puha kulanti' la mepasalama' la ussi'dim kamapi'disam.' ¹⁹Dadi tihokongannia' ingganna dosamu, pa'pasulekoa' lako Puang Allataala, anna mala nasapuiangkoa' dosamu. ²⁰Anna mala napatialaangkoa' inabammu Puang Allataala anna nasuaam polekia' sule Puang Yesus battu diua To nalanti' Puang Allataala la napasalama'kia'. ²¹Puang Yesus la tohho yabo suhuga sule lako wattunna naongeti umpaspoleam ingganna aka-aka, umba susi puha nadandi Puang Allataala napalombum ingganna nabinna yolona. ²²Anu' puha napaondom Musa naua: 'Puang

Allataala Debatammu la umpakende' mesa Nabi susiä' to la buttu illaam mai alla'-alla'na kasahapuantaa'. Pehingngii manappaia' ingganna tula'na. ²³Anna menna-menna tä' umpehingngii tula'na indo nabi la diäläi ia illaam mai alla'-alla'na umma' petauanna anna dipa'dei.'[¶]

²⁴Susi toi ingganna nabinna Puang Allataala to puha umpalanda' kadanna, napatahhu' mengkalao Samuel sisolom-solom untula' loppo' pa'palakoanna Puang Yesus. ²⁵Indo kada napalanda' nabi, ia too la mana'mua'. Anna la mangngala tabakoa' duka' illaam pa'dandianna Puang Allataala lako nenetaa'. Aka puha ma'battakada Puang Allataala lako Abraham naua: 'Mesa pessubummu la napolalam ingganna hupatau illaam inde lino la kutamba'.^{§§} ²⁶Iam too anna umpake'de'um Sabua'na Puang Allataala anna nasuai tama alla'-alla'mua', ikoa' handam yolo napalambi'i la natamba'. Indo diuam natamba', la natettekoo' messubum illaam mai lalam kakadakeam."

**Petrus anna Yohanes dio
olona kakalebuanna
To Mahhotto'na to Yahudi**

4:1-22

4 Mahassampi umpa'tula'i tau buda Petrus sola Yohanes, iya sule siaham napellambi'i sanaka-naka sando sola to illaam kakalebuanna Saduki anna kapalana to si unjagai Banua Debata. ²Indo tau sule silele meali-ali aka indo napepa'guhuam Petrus sola Yohanes naua: "Tandana deem katuboam sule dio mai kamateam, iya puham tibangom sule Puang Yesus dio mai kamateam."

³Iya silelem ussakka Petrus sola Yohanes anna napatamai tahungkum. Iya dipaillaampi tahungkum sule lako masiä' aka bengim. ⁴Sapo' buda tau to uhhingngi pepa'guhuanna unkatappa'i. Iya kehängäm oom bilanganna, muane mandipi anna lima sa'bui.

⁵Tappana masiä', ma'hempummi to pepungngu'na to Yahudi sola matua ulunna anna to ullatta' Pepaondonganna Musa dio Yerusalem. ⁶Wattu eta too dio heem sando too' isanga Hanas sola Kayafas, Yohanes, Aleksander anna ingganna tau senga' to tihekem pessubunna sando too'. ⁷Iya dibabam Petrus sola Yohanes lako olona indo to ma'hempum anna napahessai naua: "Kamatohoam aka illaam kalemu, menna haka umbeengkoa' kakuusaam anna malai umpogau' kaha-kaha ia too?"

⁸Tappa natimba' Petrus naponnoim Penaba Maseho naua: "O inggannakoo' pepungngu'na anna matua ulunna to Yahudi: ⁹Kasuhunganna dipahessakam inde allo temo aka umpamoloikam mesa to kempo' anna la maelo'koa' umpengngissannii aka umpabono'i. ¹⁰Pahallu umpengngissanni manappaa' inggannakoo' to Israel susi to dio heem temo teem to tä' dio heem: Sola sanganna Yesus Kristus to Nazaret, to puha umpateia' yabo kaju sitambem sapo' napatibangom sule Puang Allataala dio mai alla'na to mate, nasuhum inde tau bono' anna ke'de' dio olomua'. ¹¹Yesus Kristus iam too indo nauaam illaam Battakada Debata: 'Indo batu untibe inggammua' tukam, sapo' ia hia diala dipobatu longkahim.'^{*}

¹²Anggam umpolalam Puang Yesus mala tau salama' aka illaam inde lino tä'

[¶]3:23 Pass. 18:15,18-19; Sand. 23:29.

^{§§}3:25 Kad. 22:18.

^{*}4:11 Puj. 118:22.

deem tau senga' nabeem kuasa Puang Al-lataala la umpasalama' hupatau.”

¹³Tappana naita indo to ma'hempum kabahanianna Petrus sola Yohanes, iya pilla' asam aka naissam naua tau biasa to tä' deem massikola. Iam too anna nais-sammi naua pentuhu'na Puang Yesus. ¹⁴Sangngim tä' naissam ma'kada la umbahoi aka indo to bali napabono' dio siam ampe'na Petrus sola Yohanes ke'de'-ke'de'.

¹⁵Iya nasuaim indo to dua mes-subum anna mane sipattuju-tuju indo to ma'hempum ¹⁶naua: “Aka la tapogau-sanna' inde tau? Aka naissam asammi issinna inde Yerusalem naua inde mai tau puham umpadadi tanda memängä-mängä anna tä' deem lalanna la diba-hoi. ¹⁷Sapo' la dipakahea' anna mala tä' tuttuam buda tau muissanni inde pä'pogau'na anna tä'um ma'tula'-tula' liu lako tau, la untula' sanga ia too.”

¹⁸Puhai sipa'tula'-tula' natambaim sule tama indo to dua anna nauaanni: “Tä'ungkoa' mala la untula' liu sanganna Yesus anna tä' toia' la mala umpepa'guhuam liu lako tau.” ¹⁹Sapo' natimba'i Petrus sola Yohanes naua: “Penabannia', menna mapia dio olona Puang Allataala, matinuhu' di ikoa' anna matinuhu' lako Puang Allataala? ²⁰Aka inna tä' mala takitula' liu ingganna kaha-kaha to puha kiita anna kihingngi.”

²¹Sapo' moi anna napakahea', katampasanna nasua lao aka tää'i deem naita lalam la naaka susi anna mala di-tahungkum. Aka mahea'i lako tau buda to umpuji sanganna Puang Allataala muita kaha-kaha mane bali dadi napogau' suhona. ²²Aka indo to kempo' la'bim appa' pulo taunna dadinna, napabono' umpolalam tanda memängä-mängä.

Ma'sambajam jumaa' umpelau kabahaniam

4:23-31

²³Tappana dilappasam Petrus sola Yohanes iya le'ba'um umpellambi'i solana anna natulasanni ingganna tula'na kapala sando sola matua ulunna to Yahudi. ²⁴Tappana nahingngi solana tula'na indo to dua, iya umpamesam kalena anna muäkä'i penabanna ma'sambajam naua: “O Puäki Iko puha umpadadi langi' sola lino, le'bo' anna ingganna issinna. ²⁵Puhako ma'battakada napalombum sabua'mu Daud neneki to nasahum Penaba Maseho muua:

‘Maaka anna mahusa'i to tamuissam Puang Allataala;
maaka anna umpattujui kaha-kaha tä' deem gunana hupatau?

²⁶Tomahaja inde lino ma'patoka anna ma'hempum ingganna pekutu'na umbali-bali Debata anna To puha nalanti' la mepasalama'.†

²⁷Aka setonganna puham ma'hempum tomahaja Herodes anna Pilatus sola to tamuissam Puang Allataala anna to Israel illaam inde kota umbali-bali Sabua'mu Puang Yesus to maseho anna to puha ullanti'. ²⁸Aka la umpasule lako mentu'na kaha-kaha to puha umpa'tantu mengkalao dio mai situhu' kakuasaammu anna pa'elo'mu. ²⁹O Debata, petua'i umba susi napakahea'kam temo. Beengkanni inggannakam sabua'mu kabahaniam anna mala bahanikam umpa'pakahebaam kadammu.

³⁰Tandoikam pala' pa'kamasemu la umbaba kabonosam lako hupatau anna la umpa'patandaam ma'hupa-hupa tanda anna tanda memängä-mängä sola

†4:26 Puj. 2:1-2.

sanganna sabua'mu Puang Yesus to maseho.”

³¹Puhai ma'sambajam, iya tappa pahodo indo ongeam naongi ma'hempum. Iya silelem naponnoi Penaba Maseho napolalam sangngim ponno kabahaniem umpa'pakahebaam Battakadanna Puang Allataala.

Kakalebuanna jumaa'

4:32-37

³²Ingganna to matappa' mesa penaba anna tä' deem mesa la ma'kada naua: “Inde kuampuan anu mesangku.” Sapo' ingganna aka-akanna naampuan pada-pada. ³³Sola ponno kakuusaam indo suho tamonda-monda umpa'pakahebaam katibangonganna Puang Yesus dio mai kamateam anna natamba' ponno Puang Allataala. ³⁴Tä' deem moi podo la mesa ussi'dim kakuhängam aka to muampuan litä' battu haka banua si nabalu' anna indo allinna nababa anna ³⁵nabehoi lako suho la natabaiam lako si mesa-mesa tau to kakuhängam.

³⁶Susi duka' Yusuf indo to si nasangai suho Barnabas (kalebasanna to mepakahanga) pessubunna Lewi buttu dio mai Siprus. ³⁷Umbalu' duka' bela'na anna indo allinna nababa anna nabehoi lako suho.

Pa'palakoanna Ananias sola Safira napokadake

5:1-11

5 Deem duka' to sipobaine isanga muanena Ananias anna bainena isanga Safira umbalu' duka' litä'na. ²Indo allinna litä'na napatohho sabaheam Ananias nababa lao sabaheam nabehoi lako suho, anna nauaanni: “Anggam inde allinna litä'ki.” Indo pa'palakoanna naissam duka' bainena.

³Sapo' ma'kada Petrus naua: “O Ananias akanna nakuasai penabammu tom-

ahajanna setam nasuhum kaägä'-ägä'ko lako Penaba Maseho lambi' umpato-hho sabaheam indo allinna litä'mu? ⁴Indo anna tä'poko umbalu' litä'mu, iya anummu. Pissananna puha umbalu', iya indo allinna tontä illaam kakuusaammu. Dadi akanna ma'pattuju susiko illaam penabammu? Tä'ko anggam kaägä'-ägä' lako hupatau sapo' lu lakopi Puang Allataala.”

⁵Nahingnginna Ananias tula' ia too tappa tissämbä' siahannu anna kattui penabanna. Ingganna to uhhingngii tula' ia too sangngim lumalla' mahea'. ⁶Tappa sule siahannu sanaka-naka änä' muane umbalunni anna nabullei lao nalamum.

⁷Umbai' tallu tette'i puhanna, sulem duka' bainena sapo' tä' naissam indo mane puha dadi. ⁸Nauaammi Petrus: “Tulasannä' pada si'da haka inde umbalusanna' indo litä'mu?” Iya natimba'um indo baine naua: “Io pada si'da.”

⁹Ma'kada pole oom Petrus naua: “Akanna sipattujukoa' umpa'sändä'i Penaba Maseho? Petua'i lako tau diopi ba'ba mane sule ullamum muanemu, iam too duka' la umbulleko lao nalamum.”

¹⁰Tappa tissämbä' siahannu duka' dio ampe' bitti'na Petrus tahhu' kattu penabanna. Sulei tama indo änä' muane nalambi'um mate. Iya nabulle pole boom le'ba' nalamum napasiampe' muanena. ¹¹Tä' deem pada samahea' ingganna to matappa' anna to uhhingngii kaha-kaha ia too.

Ma'hupa-hupa tanda anna tanda memängä-mängä

5:12-16

¹²Ma'hupa-hupa tanda anna buda tanda memängä-mängä napadadi ingganna suhona Puang Yesus illaam alla'-alla'na tau buda. Ingganna indo to matappa' ma'mesa dio Tädo' Salomo. ¹³Anna tä' deem tau senga' la bahani

umpentappai moi anna si napa'kasallei tau buda. ¹⁴Tuttuam masäe tuttuam kehängäm to matappa' längäm Puang Yesus, susi muane teem baine. ¹⁵Lambi' buda tau umbaba to masakinna lako lalam anna napopetindoi yabo sahigam battu ampa' dio ampe' lalam aka naua: "Liu' too Petrus moi podo kalibajonam uhhuai sala' mennanna inde mai to masaki mala bono'." ¹⁶Susi duka' issinna sanaka-naka kota sikhaku'na Yerusalem sule ma'obim-obim umbaba to masakinna anna to napentamai setam. Anna ingganna tau ia too dipabono'.

Didahha ingganna suho

5:17-42

¹⁷Aka buda tau untuhu' pepa'guhuanna Puang Yesus napolalam mengke'de' sando too' sola pentuhu'na to mentama kakalebuanna Saduki anu' sangngim husa' aka kembuhu ¹⁸lambi' ussukka ingganna suho anna napatamai tahungkum. ¹⁹Sapo' tappana bengi, iya sulem mesa malaika'na Debata untungka'ianni ba'ba tahungkum anna napassubunni napasindum nauaam: ²⁰"Le'ba'koa' tama Banua Debata anna ke'de'koa' umpa'pakahebaam kada umbaba katuboam bakahu lako tau buda."

²¹Iya natuhu'im duka' indo kadanna malaika'. Lambi' mebengngi'na tappa le'ba'i tama Banua Debata ma'pa'guhu.

Mahassam ia too metamba sando too' sola pentuhu'na lako ingganna solana To Si Mahhotto'na to Yahudi, battu diua ingganna pepungngu'na to Israel ma'hempum. Tappana tihempum, iya ussuam tau le'ba' muala indo ingganna suho tama tahungkum. ²²Sapo' tappana sule lako tahungkum, iya pa'deim indo suho illaam, sampe ma'pasuleim anna ma'tula'i naua: ²³"Kilambi' ba'ba tahungkum tontä manda' tikädo' anna indo to manjaga tontä dio olona ba'ba

tahungkum. Tappana kitungka'i ba'ba, iya pa'de asammi indo tau illaam." ²⁴Nahingnginna indo kapalana to si unjagai Banua Debata sola ingganna kapala sando tula'na indo tau, tappa mängämängä naua: "Aka amo bäbä isanga dadi lako indo tau to ditahungkum! Battu tä mammi deem aka-aka la mehua!"

²⁵Iya sule siaham mesa tau umbaba kaheba naua: "Pehingngiia' le, indo tau to umpatamaa' tahungkum, illaam asammi Banua Debata ma'pa'guhu lako tau buda." ²⁶Iya mengkalao siaham indo kapalana to si unjagai Banua Debata sola sanaka-naka änä'-änä'na le'ba' muala indo suho, sapo' napasola manappa tä' nakeaha'i aka mahea' lako tau buda anu' naua meleba'i manii batu. ²⁷Napasolaim tama umpellambi'i kakalebuanna To Mahhotto'na to Yahudi, iya nakutanaim sando too' naua: ²⁸"Kusanga puhangkoa' kikeaha'i aka tä'ungkoa' la lao liu umpepa'guhuam sanganna Puang Yesus. Sapo' eta hia' iko muongei tuttuam umpatiballa' kalua' inde Yerusalem anna mohäekoa' la kami' umpaalinni indo kamateanna tau ia too."

²⁹Natimba' Petrus anna ingganna solana naua: "Aka tä' mala tala manuhu' puhakia' lako Puang Allataala anna la lako hupatau. ³⁰Aka Puang Allataala to napenombai nene to taponenea' umpatubo sule Puang Yesus dio mai alla'na to mate to puha umpateia' yabo kaju sitambem. ³¹Anna iam too puha napomatande Puang Allataala untadongkonni ongeam kamatandeam aka mendadi To Pebaba anna To Mepasalama'. Anna la umbabakia' kaleta inggannakia' to Israel lako katihokongam anna malakia' naampunniam dosata. ³²Kami'um too ingganna suho mendadi sa'bi illaam ingganna kaha-kaha ia too. Susi toi Penaba Maseho la napatamaiam Puang Allataala ingganna to manuhu' lako

Puang Yesus.”³³ Nahingnginna kada ia too, iya sangngim meali-ali, lambi' ma'pattuju la umpatei indo suho.

³⁴Sapo' dio duka' heem mesa to illaam kakalebuanna Parisi isanga Gamaliel tihekem duka' mesa To Mahhotto'na to Yahudi. Indo Gamaliel mesa to ullatta' Pepaondonganna Musa anna tä' deem pada sanapa'kasallei tau buda. Ke'de' anna nauai: “Passubunnia' yolo säpäi' itim matim tau.”³⁵ Lessu'i iya ma'kadam lako indo to ma'hempum naua: “O to Israel, pikki' manappaia' aka la tapogausanna' inde tau.”³⁶ Aka yolona kende' Teudas mesa to ussanga-sanga kalena. Iya buda to untuhu'i, umbai' appa' hatu' tau, sapo' dipatei lambi' sisähä'-sähä' bäbä indo pentuhu'na anna katampasanna tä' mammi deem aka-aka.³⁷ Lessu' ia too wattunna anna dihekenni hupatau, kende' pole oom Yudas to Galilea anna buda tau mentuhu' lako la umbali to ma'pahenta. Sapo' katampasanna dipatei anna sisähä'-sähä' bäbä duka' ingganna pentuhu'na.³⁸ Dadi susi duka' inde kadadiam tentomai kupakilalako' kuua tä'kia' la umpogau' aka-aka lako inde tau. Päbäi mammi ia duka', aka maka' buttu di hupatau inde pat-tujunna anna gau'na anu' la pa'de bäbä hi tia duka'.³⁹ Sapo' maka' gau' ia too buttu di Puang Allataala moi la taakaa' susi tala malaia' tataloi. Anna la kallekia' to pole' diua kitaa' umbali Puang Allataala.” Iya sikanatahima indo pepakialaanna Gamaliel.

⁴⁰Puhai ia too untambaim sule indo suho anna napopetembe' talukunni mane nauaanni: “Tä'ungkoa' la umpepa'guhuam liu kadanna Yesus.” Anna mane nalappasam.

⁴¹Indo suho naponnoi katilallasam umpellei pa'hempunganna To Mahhotto'na to Yahudi aka nasi'dim naua: “Natuhokia' Puang Allataala la sihatam duka' muola pandahhaam aka

sanganna Puang Yesus.”⁴² Allo-allo tamonda-monda umpepa'guhuam Kaheba Katilallasam illaam Banua Debata anna lako banuanna tau naua: “Puang Yesus-um too indo To puha dilanti' la mepasalama’.”

Pitu tau dipilei la si muäto' pantabaam kinande

6:1-7

6 Wattu eta too tuttuam budam kehängäm to matappa'. Iya kende'um pa'menu-menu illaam alla'-alla'na to Yahudi to ma'basa Yunani lu lako to Yahudi senga' to ma'basa Ibrani aka si dikalembei ia to balu-balu baina dipalambi'i katabaam kinande.² Napolalam indo sapulo dua suho uhhempum ingganna to matappa' anna napa'tula'i naua: “Tä' sihatam la kitampeam pengkähängangki umpa'pakahebaam Battakadanna Puang Allataala anna la muuhu'kam pantabaam kinande.”³ Dadi kipelau matim inggannakoa' solasubungki anna umpileia' pitu tau illaam alla'-alla'mua' to muissam muua tau ia too naponnoi Penaba Maseho anna keaka'. Anna tau iam too la kiäkä' la si muäto' pantabaam kinande.⁴ Aka kami'-kami' la kipasatutu penabangki lako sambajam sola umpa'pakahebaam Battakada Debata.”

⁵Pattuju ia too napohäe ingganna to ma'hempum, iya umpileim Stefanus mesa duka' to unngkatappa'i si'da-si'da Puang Yesus anna nakuasai Penaba Maseho, sola Filipus, Prokhorus, Nikanor, Timon, Parmenas, anna Nikolaus to Antiokhia mentama peadasanna to Yahudi.⁶ Anna mane napasola mengngolo lako ingganna suho indo to pitu iya napa'sambajangammi anna napakumbäi pala'na.

⁷Iya tuttuam tiballa' kalua' Battakadanna Puang Allataala anna

tuttuam kehängäm to matappa' dio Yerusalem anna bu'dä' duka' sando unkatappa'i Puang Yesus.

Disakka Stefanus

6:8-15

⁸Stefanus natamba' ponno Puang Allataala anna naponnoi kakuasaanna napolalam umpadeem ma'hupa-hupa tanda anna tanda memängä-mängä illaam alla'na tau buda. ⁹Pissananna mengke'de' sanaka-naka tau sule maelo' la sitelä Stefanus. Tau ia too si ma'sambajam illaam mesa pa'sambajanganna to Yahudi isanga Pa'sambajanganna To Dipalappa' dio mai Kasabusanna, to buttu dio mai Kirene, Aleksandria, Kilikia anna Asia. ¹⁰Sapo' tä' nabela umbali Stefanus aka to keaka' anna nasahum Penaba Maseho napolalam manähä ma'kada-kada lako indo tau.

¹¹Iya le'ba'im ussasungam sanaka-naka tau anna umpakolo'-kolo'i Stefanus naua: "Puham kihingngi tula'na inde tau untelle Musa sola Puang Allataala."

¹²Iam napolalam umpakende' aha'na tau buda sola matua ulunna to Yahudi anna to ullatta' Pepaondonganna Musa lambi' le'ba' ullebo Stefanus anna nasakkai, nababa lako olona kakalebuanna To Mahhotto'na to Yahudi. ¹³Anna umpasola sanaka-naka sa'bi tatappa' napopengngolo ma'tula' naua: "Inde tau angga nakähä untunai inde Banua Debata anna Pepaondonganna Musa. ¹⁴Puha kihingngi naua: 'Indo Yesus to Nazaret la uhhompoam inde Banua Debata anna la umbanga' pole sangka' tala situhu'na Pepaondonganna Musa lako kita.'"

¹⁵Ingganna tau to muokko' illaam indo pa'hempunganna To Mahhotto'na to Yahudi sangngim ullio-lio Stefanus, iya naitam lindona anggasanna hupanna malaika'.

Tula'na Stefanus

7:1-53

7 Iya mekutanam sando too' lako Stefanus naua: "Susi si'da haka panta'da'na inde mai tau?"

²Iya ma'tula'um Stefanus naua: "Ingannakoa' solasubungku anna to kupo-tomatua, pehingngiia' inde tula'ku: Wattu'na anna diopi Mesopotamia Abraham nene to taponene tä'pi tohho dio Haran, umpa'paitaam kalena Puang Allataala To Handam Matande lako ³anna ma'battakadai naua: 'Pelleiko bottomu anna kasahapuammu ammu le'ba' lako mesa botto la kupatuhoiko.'

⁴Iya mengkalao siam Abraham umpellei lembäna Kasdim anna mentieli'i lako Haran anna tohhoi dio. Tappana mate ambena, nasua pole oom Puang Allataala umpellei Haran sule eta inde botto taongeia' tentomai. ⁵Wattu eta too, tä'pi deem nabeem Puang Allataala litä' la mendadi mana'na moi podo la sadäkämmi. Sapo' ma'dandi Puang Allataala naua: 'Pissam wattu inde litä' la kubeengko muampuanna' sola ingganna pessubummu.' Ma'dandi susi, moi anna wattu eta too tä'pi deem änä'na Abraham. ⁶Mane ma'kada oi Puang Allataala lako Abraham naua: 'Ingganna pessubummu la mendadi to sule dio bottona tau senga', la naposabua' anna la nadahha appa' hatu' taunna. ⁷Sapo' la kupalambi'i pesämbä'ku indo to umposabua'i napolalam la lappa' dio mai ongeam ia too, anna la sule napenombaiä' eta indee.' ⁸Anna mane napaondom Puang Allataala pa'dandiam sunna'. Iya dadii Ishak änä'na Abraham nasunna'um tappana kahua benginna dadinna. Ishak undadiam Yakub anna Yakub undadiam to sapulo dua to taongeia' buttu inggantaa' to Yahudi.

⁹Indo to sapulo mesa umbalu' solasub-unna isanga Yusuf mendadi sabua'na tau dio Mesir aka nakembuhui. Sapo' indo Yusuf naolaam Puang Allataala ¹⁰lambi' si nalappasam dio mai ingganna kamasussaam. Wattunna anna mellambi' Yusuf lako Firaun tomahajanna Mesir, iya natamba' Puang Allataala nabeem lalam penaba mapia anna kakeakasam. Nasuhum naäkä' tomahaja Firaun mendadi bække'na muanda'i kakuasaam dio lembäna Mesir anna unkapalai polepi to mengkähä illaam banuanna Firaun.

¹¹Iya dadim kakobeam illaam lembäna Mesir anna lembäna Kanaan napolalam ussi'dim kamapi'disam kasalle nene to taponene aka tä'um deem napanggalai kinande eta too. ¹²Tappana naissam Yakub naua deem gandum dio Mesir, iya ussuam änä'na lako. Etam too uhuna le'ba' nene to taponene lako Mesir. ¹³Tappana le'ba' pole lako kapenduanna, iya umpa'paissangammi kalena Yusuf lako siundu'na. Napolalam naissammi pole' Firaun kasahapuanna Yusuf. ¹⁴Iya mesuam Yusuf lao muala Yakub ambena mentieli' lako Mesir sola ingganna kasahapuanna. Sahapunna Yakub eta too pitu pulo lima tau ia asanna. ¹⁵Iya le'ba'um Yakub lako lembäna Mesir, iya mate diom sola nene to taponene. ¹⁶Anna indo bukunna dieli' lako Sikhem dipatama lokko' indo puha naalli doi' peha' Abraham lako peänäsanna Hemor dio Sikhem.

¹⁷Wattunna anna mahuku'um la ungganna'i pa'dandianna Puang Allataala lako Abraham diona indo litä' la dibeem pessubunna, iya tuttuam kembea'um indo nene to taponene dio Mesir. ¹⁸Pissananna längäm polei mesa tomahaja senga' ma'takka' dio Mesir, iya tä'um ia muissam diona Yusuf. ¹⁹Tomahaja ia too umpa'tomaho-mahoi nene to taponene lambi' nadahha anna napa'pahentaam naua: 'Ingganna

änä'-änä' mane subummua' la untibe asanna' anna mala mate.'

²⁰Wattu etam too naongei dadi Musa, anna tä' deem pada samapia naita Puang Allataala. Tallu bulam illaam banua naampai tomatuanna ²¹anna mane ditibe. Sapo' nahuhu' änä'na Firaun baine anna napaliahai napasusi änä' ikalena. ²²Indo Musa dipa'guhu ingganna kamanähänganna to Mesir, nasuhum kahingngiam susi tula'na teem pa'palakoanna.

²³Tappana appa' pulo taunna dadinna, kende' illaam penabanna mohäe la lao umpellambi'i solasubunna to Israel. ²⁴Pissananna muita mesa to Israel nadahha mesa to Mesir, iya napamoloim anna natunduum, lambi' umpatei indo to Mesir. ²⁵Nasanga Musa la naissammi indo solana to Israel naua ia la napake Puang Allataala ullappasanni dio mai kasabuasam, sapo' tä' dia naissam. ²⁶Makale'i sule pole oom, iya muitam dua tau bassim to Israel mahassam sipongko paka ia. Iya napellambi'im Musa aka mohäe la napasikipiai anna nauaanni: 'O solasubungku, akanna sianukoa?' Paka iko sianna!'

²⁷Sapo' indo to pasala lako solana ussulungam Musa anna nauai: 'Menna muäkä'ko mendadi to pebangki anna la umbisahakanni?' ²⁸Umbai' umpattuju la umpateiä' duka' susi indo to Mesir umpatei isamai'. ²⁹Nahingnginna Musa tula' ia too, tappa lahi lao anna le'ba'i lako Midian. Iya etam naongei tohho sala, dadi diom änä'na dua bassim muane.

³⁰Lessu'i appa' pulo taunna silambi'um mesa malaika' dio pohiallasam sikahuku' Tanete Sinai illaam lelona api ma'nala-nala illaam satoo' kaju-kaju. ³¹Mängä-mängä Musa muita kadadiam ia too, lambi' le'ba' lako napengkahuku'i, iya uhhingngim

kamahanna Puang Allataala naua:
³²'Kaom too inde Puang Allataala to napenombai nene to umponene, Debatanna Abraham, sola Ishak anna Yakub.' Iya lumalla' siaham Musa mahea' anna tä' nasaha nanenne'i.

³³Iya ma'battakadam Puang Allataala naua: 'Tässu'i sapatummu illaam mai bitti' mu aka itim litä' muongei ke'de' litä' maseho aka dio oloku. ³⁴Puham kukan-nassai tongam kamapi'disanna umma' petauangku dio Mesir anna kuhingim pengkaloa'na, nasuhum sulemä' la kulappasam. Dadi maingko anna kusuako sule lako Mesir.'

³⁵Iam too inde Musa puha natumpu pala' to Israel indo anna nauai: 'Menna muäkä'ko mendadi to pebabangki anna la umbisahakanni?' Ia siam puha nasua Puang Allataala, napalandasam malaika'na indo puham umpa'paitaam kalena illaam satoo' kaju-kaju, mendadi pebabanna anna la ullappasam to Israel. ³⁶Anna ia siam umpatette to Israel messubum illaam mai Mesir umpogau' ma'hupa-hupa tanda anna tanda memängä-mängä dadi dio Mesir, dio Le'bo' Malea anna lako pohiallasam appa' pulo taunna. ³⁷Musa siam duka' puha ma'tula' lako to Israel naua: 'Puang Allataala la umpakende' mesa Nabi susiä' to la buttu illaam mai alla'-alla'na kasahapuammua'.' ³⁸Anna ia siam illaam alla'-alla'na umma' petauanna Puang Allataala dio pohiallasam umpalombum tula'na malaika' lako nene to taponene wattunna anna napa'kadai yabo Tanete Sinai. Anna iam too to untahima Battakada tubo puha napaondongangkoa'.

³⁹Sapo' tä' naaku nene to taponene untuhu'i Musa, sapo' natumpu pala' di anna maelo'i ma'pasule lako Mesir. ⁴⁰Napelau lako Harun naua: 'Gaha-

gangkam sanaka-naka debata to la dio oloki umpatettekam, aka tä' kiissam aka amom dadi lako kalena Musa to umpatettekam illaam mai Mesir.'

⁴¹Lambisam wattu eta too unggahagaim to la napa'debatai, susi tampana änä' sapim, mane umbabai tunuam lako anna ma'hame-hamei untilalla'i pa'papia kalena. ⁴²Nasuhum napemboko'i Puang Allataala anna napatiolai umpenombai bintä' susi puha tisuha' illaam suha'na nabi naua:

'O to Israel tuli tadeempä' Kao umpenombai anna umbabaam tunuam anna bua pemala' illaam appa' pulo taunna diokoa' pohiallasam.

⁴³Aka umpakalando puhaa' ia bahum kapenombaanna to umpenombai Molokh umpa'baba-babaa' sola bintäna debata Refan, tau-tau pang-gahaga limammua' umpenombai.

Iam too anna la kuhambaingkoa' lao mambela lako tandai lakona lembäna Babel.³

⁴⁴Bahum kapenombaam si naongei Puang Allataala umpellambi'i umma' petauanna nababa lelem nene to taponene dio pohiallasam. Umba susi puha napa'pahentaam anna napa'paitaam Puang Allataala lako Musa iam too napa'pasusii. ⁴⁵Bahum kapenombaam iam too puha natahima nene to taponene anna natette Yosua nababa tama inde litä' tappana natadongkonni aka untaloi ingganna to ma'botto anu' nahambaiam lao Puang Allataala. Bahum kapenombaam ia too da'da' liu sule lako wattunna naongei Daud ma'takka'. ⁴⁶Natamba' ponno Puang Allataala Daud, dadi napelau umba ke malai ia umpake'de' banua la naongei Puang Allataala to

napenombai to Israel. ⁴⁷Sapo' Salomo ham umpake'de'i indo banua ia too.

⁴⁸Sapo' tä' mala la diua Puang Allataala battu diua To Handam Matande la tohho illaam ongeam pangahaga hupatau, susi natula' nabi naua:

⁴⁹'Ma'kada Puang Allataala naua:

Suhuga Kao unguasai,
anna issinna lino Kao untakka'i.

Maaka hia susi tampana banua la
umpake'desannä',

anna ongeam aka la kuongei mellube?

⁵⁰Taia haka tia pa'papia limangku asam
siam?''^f

⁵¹O inggannakoa' to kahha' ulu
to tama'pehingngi anna makahha'
penaba! Anggakoa' umbali-bali
Penaba Maseho. Umba susi nene to
taponene, susi siangkoa' too duka'.

⁵²Mennangka nabi tä' nadahha nene
to taponene? Silele umpatei pesuana
Puang Allataala, to umpa'pakahebaam
kasuleanna To Malolo. Temo iko
sianna' to puha umbalu'i anna umbahoi
lambi' umpopepatea'i. ⁵³Puhangkoa'
uhhingngi kada Pepaondonganna Musa
napalambisangkoa' malaika', sapo'
mokakoa' untuhu'i."

Stefanus dipatei

7:54–8:1

⁵⁴Tappana nahingngi indo To
Mahhotto'na to Yahudi ingganna tula'
ia too, iya sangngim tikilli-killi atena
meali-ali anna tikahikki' isinna lako
Stefanus. ⁵⁵Sapo' sola ponno Penaba
Maseho Stefanus mentonga längäm
suhuga anna muita kamatandeanna
Puang Allataala sola Puang Yesus ke'de'
dio tandai kananna Puang Allataala
battu diua ongeam kamatandeam.
⁵⁶Lambi' tappa ma'kada naua:
"Nenne'ia' tibukka suhuga kuita anna

Änä' Mentolino ke'de' dio tandai
kananna Puang Allataala."

⁵⁷Sapo' sangngim untimpim mandi
talinganna anna sikaolii pada-pada
mekkattibe ullebo Stefanus. ⁵⁸Mane
uhhui'i Stefanus lako sulibam kota anna
nasileba'-leba'i batu. Indo ingganna
to ussa'bii sangngim umpaokko'
jubana dio olona mesa to mangnguha
isanga Saulus. ⁵⁹Indo mahassammi
nasileba'-leba'i, ma'sambajam Stefanus
meoli, naua: "O Puang Yesus,
tahimannä' sungnga'ku!" ⁶⁰Napasindum
ma'balunguntu' anna metamba
napekasallei naua: "O Debata daa
umpatumäi dosana inde mai tau." Puhai
naua, iya kattum penabanna.

8 Iya naakui duka' Saulus indo dipatei
Stefanus.

Pandahhaam kasalle lako to matappa' dio Yerusalem

8:1-3

Wattu etam too anna napahandu'i
dadi pandahhaam kasalle lako to
matappa' dio Yerusalem. Napolalam
le'ba'i ingganna to matappa', sulibanna
suhona Puang Yesus, tiseмбу' dalle
batte ussambai lembäna Yudea anna
Samaria. ²Indo bakkena Stefanus naala
sanaka-naka to meimam nalamum anna
sikaolii nauhu'i. ³Eta too maelo' Saulus
la umpempa'deam kapeimanganna
ingganna to matappa' nasuhum
ullelei banua anna uhhui'i subum susi
baine teem muane to matappa' anna
napopetahungkunni.

Filipus dio Samaria

8:4-25

⁴Indo to le'ba' tiseмбу' umpesambai
mobotto-bottoam umpa'pakahebaam
Kaheba Katilallasam. ⁵Anna indo
ia Filipus, lu lako ia mesa kota

^f7:50 Yes. 66:1-2.

dio Samaria umpa'paissangam To puha dilanti' la mepasalama' lako hupatau dio kota ia too. ⁶Tappana uhhingngi tula'na Filipus indo tau buda, anna muita ma'hupa-hupa tanda napogau', iya natahima sola sakalebu penabanna. ⁷Aka buda setam messubum napasindum kumissä' illaam mai kalena buda tau, anna buda toi to mate kalena sola to kempo' napabono'. ⁸Nasuhum kende' katilallasam kasalle illaam kota ia too.

⁹Mengkalao dio mai deem mesa tau illaam indo kota isanga Simon si ma'issam-issam umpapilla' asam to Samaria, anna si ussanga-sanga kalena mato-mato tä'um deem untondonni. ¹⁰Ingganna hupatau basisi kasalle nakannangam asam anna nauai: "Iam too inde kuasanna Puang Allataala indo si disangai 'Kuasa Kasalle'." ¹¹Mentuhu' asam tau lako aka masäem napapilla' indo pa'issam-issanna. ¹²Sapo' tappana sule Filipus umpa'paissangam Kaheba Katilallasam diona kapahentaanna Puang Allataala anna Yesus Kristus, iya buda tau unkatappa'i anna umbehoi kalena ditedo' susi muane teem baine. ¹³Tappa matappa' duka' Simon lambi' umbeho kalena ditedo'. Puhai, sola lium Filipus anna si pillai' muita ma'hupa-hupa tanda anna tanda memängä-mängä napadadi.

¹⁴Tappana napelele suhona Puang Yesus dio Yerusalem naua untahimam Battakadanna Puang Allataala issinna lembäna Samaria, iya ussua siaham Petrus sola Yohanes le'ba' lako. ¹⁵⁻¹⁶Sulena lako indo to dua, tappa umpa'sambajangammi indo to Samaria aka mane angga ditedo' sola sanganna Puang Yesus, sapo' tä'pi deem untahima Penaba Maseho moi podo la mesa. Iya napa'sambajangammi naua: "O Puang Allataala beenni inde mai tau Penaba

Masehomu." ¹⁷Napakumbäim pala'na indo to dua, iya napentamaim pole' Penaba Maseho indo to eta.

¹⁸Tappana naissam Simon naua mala sule Penaba Maseho ke mepakumbäi pala'na suho, iya umbabam doi'na lako suho ¹⁹anna nauai: "Beennä' kao duka' indo kakuasaammua' kualli anna mala napentamai Penaba Maseho tau ke deenni kupakumbäi pala'ku."

²⁰Sapo' natimba' Petrus naua: "La sägä hi too itim doi'mu sola kalemu, aka ussanga hi iko mala dialli doi' kakuasaanna Puang Allataala. ²¹Tä' iko deem tabamu illaam pengkähängangki aka tä'ko malolo penaba dio olona Puang Allataala. ²²Dadi tihokongangko gau'mu anna ma'sambajangko längäm Debata, anna mala naampunni indo pat-tuju kadake illaam penabammu, ²³aka kuita kadake tambu'ko anna napungoko kakadakeam."

²⁴Natimba' Simon naua: "La umpa'sambajangannä' längäm Debata anna mala umba-umba aka indo tula'mu tä' la dadi lako kaleku."

²⁵Tappana puha ussa'bii diona Puang Yesus anna umpalambi' Battakada Debata, ma'pasulem indo to dua lako Yerusalem, anna illaam indo pangngolalalanganna budapi tondä' naola illaam lembäna Samaria untula' Kaheba Katilallasam lako pa'tondä'.

Filipus sola mesa to kasallena to Etiopia

8:26-40

²⁶Pissananna sule mesa malaika'na Debata ma'kada lako Filipus naua: "Ke'de'ko anna le'ba'ko uhuttu' lalam yabo mai Yerusalem lu lako Gaza." (Indo lalam ia too, tä'um si buda tau muolai.) ²⁷Iya mengkalao siaham duka' Filipus. Indo eta too deem mesa to Etiopia, to tala malam kebaine aka napasalaam

tau senga',⁸ buttu yabo mai Yerusalem soho' lao menomba. Indo to Etiopia mesa duka' to kasalle illaam banu-anna Kandake tomahaja baine dio kaha-jaam Etiopia si unkapalai ingganna to muanda'i doi'na sola kullena tomahaja.²⁸ Muolam lalam ma'pasule lako Etiopia, ma'oko'-oko' yabo bendinna napasindum umbata suha'na nabi Yesaya.²⁹ Iya ma'kadam Penaba Maseho lako Filipus naua: "Lakoko kahuku'i dio bendi!"

³⁰ Napisihha' siaham Filipus lako, iya nahingngim indo tau mahassam umbata suha'na nabi Yesaya. Tappa nakutanai Filipus naua: "Muissam daka kalem-basanna itim to umbata?"³¹ Natimba' indo tau naua: "Umba kao ngei la kuis-sam ke tä'i deem tau untulasannä' kalem-basanna?" Anna mane untambai Filipus längäm bendinna muokko' dio ampe'na.³² Issinna indo suha' Battakada Debata nabata naua:

"Sihhapam mesa domba dibaba lako petunuum,
anna susi liu änä' domba mengkamma'
dio olona to unggontinnii bulunna.
Susi oo Ia duka' tä' deem podo la tiku'mi'
pudu'na.

³³ Dipakamase-mase anna dipaolai taia lalam.

Tä' deem tau la untula'i diona pessubunna
aka diäläi sungnga'na illaam mai inde lino."^{**}

³⁴ Iya mekutanam lako Filipus indo tau naua: "Mala haka untulasannä'? Menna isanga nahua inde tula'na nabi? Kalena haka nauaam domba? Tau senga' daka?"³⁵ Iya etam pole' naongei Filipus ma'tula' lako, natahangkangam diona Puang Yesus dipasihhapam domba mengkalao dio indo issinna suha'na nabi Yesaya nabata inggena'

sule lako natulasam diona Kaheba Katilallasam illaam Puang Yesus.

³⁶ Napatahhu'i lium mellao sampe ullambi' uwai. Iya nauam indo tau lako Filipus: "Petua' siai too deemmi inde dio uwai. Naua inabangku malam tia untedo'ä'."³⁷ Natimba' Filipus naua: "Maka' too sakalebu tongammi pen-abammu matappa', iya la malangko ditedo'." Natimba' naua: "Kukatappa'im kuaa Yesus Kristus Änä'na Puang Al-lataala."]³⁸ Anna mane ussua indo to umpalaoanni bendinna napatohho anna tuhunni le'ba' dokko uwai duai, iya natedo'um Filipus.³⁹ Kende'i dio mai uwai, iya sule siaham Penaba Masehona Debata muala Filipus nababa lao. Iya tä'um naita indo to natedo'. Iya umpatahhu'um pa'laoanna naponnoi kakassiam.⁴⁰ Iya pissananna ham ia di-issam lembe' dio Asdod Filipus. Tahhu' umpa'paissangam Kaheba Katilallasam lako ingganna kota illaam lembä ia too lambi' tihutu' lako Kaisarea.

Saulus napa'kadai Puang Yesus yabo mai suhuga

9:1-19

9 Wattu eta too mahassam ia Saulus maelo' liu umpakahea' anna la umpatei ingganna to unkatappa'i Puang Yesus. Nasuhum le'ba' umpellambi'i sando too' dio Yerusalem² umpelau suha' pahenta aka la napa'paitaam lako pebaba ada' illaam ingganna pa'sambajanganna to Yahudi dio Damsyik anna mala dipäbäi ussakka tau anna nababai lako Yerusalem susi baine susi muane to muola Lalanna Puang Yesus.

³ Tappana la landa' kalei lako Damsyik umbaba indo suha', iya pangkähäm yabo mai langi' umpali'

⁸8:27 *napasalaam tau senga'*: kalem-basanna, dibuto anna mala tä'um kebaine.

^{**}8:33 Yes. 53:7-8.

Saulus. ⁴Iya tissämbä' siaham dokko litä' anna uhhingngii kamaha ma'kada naua: "Saulus, O Saulus, aka kasuhunganna anna undahhaä'?"

⁵Natimba'um Saulus naua: "Aka menako Debata?" Nauaam: "Kaom too inde Puang Yesus to undahha. ⁶Sapo' bangommoko ammu tama Damsyik, aka diopi anna mane ditulasangko aka la umpogau'."

⁷Sangngim mängä-mängä indo to napasola Saulus aka nahingngi duka' indo kamaha sapo' tä' ohi deem muita tau moi podo la mesa. ⁸Bangommi duka' Saulus anna ke'de'i umbukkai matanna mennenne' lao sapo' tä'um landa' naita, iya natettem solana landa' lako Damsyik. ⁹Tallungngallo tä' mala paita, anna tamangngande tamangngihu'.

¹⁰Illaam indo Damsyik deem mesa to unkatappa'im Puang Yesus isanga Ananias. Nalipi Debata anna napa'kadai naua: "Ananias!" Iya natimba'um naua: "Kuhingngim Debata!"

¹¹Iya ma'kada pole oom naua: "Maiko ammu lako mesa dalam isanga Lalam Malolo anna umpekutanaanni dio banuanna Yudas mesa to Tarsus isanga Saulus. Mahassam ma'sambajam ¹²anna bali napalosai Debata naita sule mesa tau isanga Ananias naanda'i anna mala paita sule."

¹³Sapo' natimba' Ananias naua: "O Debata aka budam tau untula'i naua tau ia too si undahha ingganna to unkatappa'iko dio Yerusalem. ¹⁴Anna inde kasuleanna tentomai nasituhu'i anna napakuasa kapala sando la ussakkai tau to unkatappa'iko, Debata."

¹⁵Sapo' naua Debata lako Ananias: "Lao mammoko, aka tau ia too la kutuho mendadi pesuaku la umpa'pakahebaam sanganku lako tau taianna to Yahudi, anna lako tomahajanna susi toi lako to Israel. ¹⁶Aka Kao siam la umpa'issannii diona kamasussaam

anna kamapi'disam la natammu anna nasi'dim aka unkatappa'i sanganku."

¹⁷Iya le'ba'um Ananias lako banuanna Yudas umpellambi'i Saulus. Sulei lako muanda'im Saulus anna nauaanni: "O solasubungku Saulus, Debatanta Puang Yesus puha umpa'paitaam kalena matim wattunna anna muolako lalam la sule inde Damsyik. Iam too ussuaä' umpellambi'iko anna malako paita sule anna la naponnoiko Penaba Maseho." ¹⁸Iya nasi'dim siaham Saulus angga' sissi' mäläi illaam mai matanna lambi' naita siaham mennenne' lao. Iya bangommi anna umbehoi kalena ditedo'. ¹⁹Puhai mangngande, iya maläppu' siaham nasi'dim.

Ma'pa'guhu Saulus dio Damsyik anna dio Yerusalem

9:19-31

Iya tohhopi dio Damsyik Saulus sanaka-naka benginna sola to matappa'. ²⁰Anna umpa'pakahebaam siaham sanganna Puang Yesus illaam sanaka-naka pa'sambajanganna to Yahudi si naua: "Puang Yesus-um too Änä'na Puang Allataala." ²¹Pilla' asam to uhhingngii pepa'guhuanna anna naua: "Taia haka tia iam indo to dio Yerusalem mohäe la umpempa'deam to unkatappa'i Puang Yesus? Anna tä' daka tia iam nasuhum sule aka pattujunna la ussukka ingganna to unkatappa'i Puang Yesus anna la nababa mengngolo lako ingganna kapala sando?" ²²Tuttuam buda tau nahuntu' pepa'guhuanna Saulus anna saundu' duka' umpapusa' pikkihanna to Yahudi dio Damsyik, aka mala ia napomasiä' anna napomakaleso si'da-si'da Saulus naua Puang Yesus-um too indo To puha dilanti' la mepasalama'.

²³Lessu'i sanaka amo benginna, iya sipa'tula'-tula'um sanaka-naka to Yahudi

ma'pattuju la umpatei Saulus. ²⁴Sapo' tappa naissam Saulus pattujunnai. Allo bengi uhhonda ba'ba kota indo to Yahudi anna mala umpatei Saulus ke messubummi. ²⁵Moi anna susi mala siam nalappasam to matappa' eta too aka napaiillaam buhia' mane nalollohanni dokko sulibam tembo' tappana bengi.

²⁶Le'ba' Saulus muäläi kalena lako Yerusalem. Iya mohäe umpentappai ingganna to matappa' eta too, sapo' mokai umpasolai aka sangngim tä'pi nakatappa'i naua matappa'um duka'. ²⁷Anggam Barnabas untahimai iya napasolam umpellambi'i ingganna suho mane natulasanni maaka susi Saulus muita anna napa'tula'i Puang Yesus dio tängä lalam. Susi toi diona kabahani-anna umpepa'guhuam sanganna Puang Yesus dio Damsyik. ²⁸Iya tohhom duka' pole' sola-solai dio Yerusalem anna tä' deem mahea' ma'pa'guhu diona kamattappasam illaam sanganna Debata. ²⁹Si sipa'tula' anna si sitelä indo to Yahudi to ma'basa Yunani, lambi' napeäi lalanna la umpatei Saulus. ³⁰Sapo' tappana nais-sam solana to matappa' pattuju ia too, iya le'ba'im umpasola Saulus dokko Kaisarea anna mane nasua lako Tarsus.

³¹Indo eta too ingganna to matappa' dio lembäna Yudea, Galilea anna Samaria, sangngim masannam anna malino illaam katuboanna. Matoto' illaam kapeimangam passahunna Penaba Maseho anna ponno pengkahea' längäm olona Debata. Lambi' tuttuam kehängäm budanna anna ussi'dim liu pepakahangaanna Penaba Maseho.

**Petrus umpabono' Eneas
anna umpatubo sule Dorkas**

9:32-43

³²Le'ba' Petrus ullelei mobotto-bottoam umpellambi'i ingganna to matappa', iya lempäm duka' dio Lida. ³³Eta too ullambi' mesa tau

isanga Eneas kahuam taunna masaki, metindo liu aka mate kalena. ³⁴Tappa napa'kadai Petrus naua: “O, Eneas napabono'ungko Yesus Kristus, bangongko, ammu lulunni ampa'mu.” Iya mellimbangom eta siahm Eneas. ³⁵Tappana naita issinna Lida anna Saron bono'um Eneas, iya sangngim matappa'um lako Puang Yesus.

³⁶Indo eta too deem duka' mesa baine to matappa' dio Yope isanga Tabita, nasangai ia to Yunani Dorkas (kalem-basanna “jonga”). Indo baine mesa to si ma'pogau' mapia liu anna budam to mase-mase napamoloi si nabeem aka-aka. ³⁷Pissananna natappai ia saki lambi' mate. Puhai didio', dipopetindom illaam tambim yabo lotem. ³⁸Indo Yope anna Lida sikahuku' siam. Iya tappana napekaheba ingganna to matappa' dio Yope naua dio Lida Petrus, iya us-suam dua tau lao untambai. Nalambi'na nauaammi: “La mai siahangko ade' masihha'.”

³⁹Iya ke'de' siam Petrus anna le'ba'i sola indo to metamba. Tappana landa' lako, dipasola siam längäm indo tambim yabo lotem naongei indo to mate. Sikasahhom indo to balu-balu baine ullebo Petrus, iya napaitaim ingganna juba sola poheba senga' pandasi'na Dorkas indo anna tubopi.

⁴⁰Iya nasua asammi Petrus le'ba' messubum anna mane ma'balinguntu' ma'sambajam. Puhai ma'sambajam, menggihi'um untingngajoi indo to mate anna ma'kadai naua: “O Tabita, bangongko!” Iya umpamilli' siahm matanna Tabita. Iya muitanna Petrus, bangommi anna tadongkonni. ⁴¹Tappa naanda'i limanna anna napake'de'i. Mane untambai asanni indo ingganna to matappa' sola indo ingganna to balu-balu baine anna nauaanni: “Tubom sule Tabita!” ⁴²Tappana napelele issinna Yope kaha-kaha ia too, iya

buda tau unkatappa'i Puang Yesus. ⁴³Iya tohhopi eta Petrus sanaka amo benginna, si dio banuanna pa'jama lollo' isanga Simon.

Petrus sola Kornelius

10:1-48

10 Dio Kaisarea deem mesa tau isanga Kornelius, mesa punggabana sohodadu to disangai sohodadu Italia. ²Tau ia too to meimam anna mengkahea' längäm Puang Allataala, susi duka' ingganna kasahapuanna. Si umpamoloi to Yahudi nabeem akaka anna ma'sambajam liu. ³Pissam wattu umbai' la tette' tallum kahubem makaleso naita sule mesa malaika'na Puang Allataala tama banuanna anna ma'kadai naua: "O Kornelius!"

⁴Iya ullio-liom indo malaika' sitonda kamaheasam anna ma'kadai naua: "Kuhingngim Debata!" Natimba'im indo malaika' naua: "Ingganna sambajammu sola pa'pebeemmu sulem längäm olona Puang Allataala anna nakilalaingko. ⁵Temo la ussua sanaka-naka tau le'ba' lako Yope la untambai mesa tau isanga Simon si diuaam Petrus. ⁶Tohho dio banuanna pa'jama lollo', isanga Simon, dio bihim le'bo'."

⁷Tappana le'ba' indo malaika', untambaim dua sabua'na anna mesa sohodadunna handam to meimam illaam alla'-alla'na solana pada indo passappi'na. ⁸Natulasammi ingganna indo nauaam malaika' mane nasuai lako Yope.

⁹Masiäna umbai' tängä allo, iya la landa'um lako Yope indo to tallu. Wattu eta too längäm papa banua Petrus ma'sambajam.†† ¹⁰Tä' deem pada satadea', mohäe la mangngande, sapa' mane mahassam dipatoka kinande, pissananna nasi'dim dilipi.

¹¹Iya naitam tibukka langi' anna tuhunni yabo mai susi sampim kallu'bä' dipetoke'i appa' sikunna, dilolloham tihandu' dokko olona. ¹²Iya naitam dio ma'hupa-hupa olo'-olo' ma'bitti' appa', olo'-olo' tissollo' anna ma'hupa-hupa dassi. ¹³Nahingngim kamaha naua: "O Petrus, bangongko, tunui anna muande asanni."

¹⁴Sapo' natimba' Petrus naua: "Tä' sugali' ia pole' Debata, aka pempom dadingku tä' punalapi deem kuande kinande indo dipemaliinna la diande."

¹⁵Iya nahingngi pole oom kapendunna naua: "Ingganna napemapiaanna Puang Allataala tä' mala la napemalii hupatau."

¹⁶Pentallum nasulei ma'pateem, anna mane tiäkä'i sule längäm langi' indo sampim.

¹⁷Mahassampi ma'papusa'-pusa' Petrus napasalu-salui penaba aka amo kalembasanna indo naita, iya sule ham indo to nasua Kornelius dio ba'ba bala banuanna aka balim napekutanaam indo banua. ¹⁸Iya umpa'kadaim tau illaam indo banua naua: "Iangka inde banua si naongi Simon indo si diuaam Petrus?" ¹⁹Mahassam liupi napasalui penaba Petrus indo puha naita, iya ma'kada ham Penaba Maseho naua: "O Petrus deem tallu tau sule umpeäko. ²⁰Ke'de'ungko, tuhungko dokko ammu pengkalao le'ba' sola, daa umpomabanda' penabammu moi anna muissam muua taia to Yahudi aka Kao ussui sule indo tau."

²¹Iya tuhummi Petrus dokko anna ma'kadai lako indo to sule naua: "Kaom too indo to umpeäa'. Aka untungkaa' sule?"

²²Natimba'im naua: "Pesuanakam Kornelius mesa punggabana sohodadu to meimam anna to mengkahea' längäm

††10:9 Papa banuanna to Yahudi abana si mahante yabona.

Puang Allataala anna napa'kasallei asam to Yahudi. Puham napa'tula'i mesa malaika' masehona Puang Allataala nasa sua umpopetambaiko lako banuanna, anna malai nahingngi pa'tula'mu." ²³ Iya nauaammi: "Lu maikoa' banua aka la in-depakia' manii bengi."

Masiäi bangonnim anna mengkalaoui sola indo to sule untambai anna sanakanakapi to Yope to matappa' napasola. ²⁴ Masiä polei suleim lako Kaisarea, iya ullambi'um Kornelius sola sahapunna anna sanaka-naka solana to natambai mahassam ma'mesa mangngampa. ²⁵ Sulena Petrus natammuim Kornelius anna ma'balinguntu'i dio olona napenombai. ²⁶ Sapo' tappa napake'de' Petrus anna nauaanni: "Ke'de'ko, aka kao duka' mesaä' tau biasa."

²⁷ Napasindum ma'tula'-tula' le'ba' siaham tama banuanna, iya ullambi'um buda tau ma'hempum. ²⁸ Iya ma'kadam lako indo tau buda naua: "Puha muissanna' muua napemalii punala to Yahudi la silombam tau taianna to Yahudi dapaka ia la tama banuanna. Sapo' puhama' napaitai anna napa'tula'i Puang Allataala tä'mä' kao la mala ussangai tau senga' kadake battu tä' maseho. ²⁹ Iam too anna ahu'mä' sule tentomai. Dadi la kukutanaikoa' temo: Aka kasuhunganna anna untambaiä'?"

³⁰ Natimba'im Kornelius naua: "Appa'um benginna temo, katenanna inde tette' tallu kahubem, mahassannä' ma'sambajam illaam banua. Iya pissananna deem mesa tau ke'de' dio oloku pangkähä pohebana ³¹ napa'kadaiä' naua: 'Kornelius, nahingngiammi Puang Allataala sambajammu anna nakilalainko aka pa'pebeemmu lako to mase-mase. ³² Suai sanaka-naka tau le'ba' lako Yope la untambai mesa tau isanga Simon si diuam Petrus. Tohho dio banuanna pa'jama lollo', isanga

Simon, si dio bihim le'bo.' ³³ Iam too anna tappa kusuam inde tau napellambi'iko. Iya ahu'ungko sule tentomai sola kamasannangam penaba. Temo ma'mesangkam inde dio olona Puang Allataala la umpehingngii tula' nabeengko Debata la untulasangkam."

³⁴ Iya napahandu'um Petrus ma'tula' naua: "Setonganna mane kupähäm si'da hi pole' temo kuuu Puang Allataala tä' deem usse'la hupatau. ³⁵ Aka lako si mesa-mesa tau yabona inde lino ke mengkahea'i lako Puang Allataala anna umpogau' kamaloloam, natahima Puang Allataala. ³⁶ Iam too Battakada puha napesuaam dipalambi'ikam kami' to Israel, Battakada umpa'pakahebaam kasilombungam illaam Yesus Kristus, Debatanna ingganna ma'hupatau. ³⁷ Muissanna', indo puha napogau' Puang Yesus illaam lembäna Yudea napahandu' dio Galilea puhanna pantedosam indo napa'pakahebaam Yohanes. ³⁸ Indo Puang Yesus to Nazaret puha nalanti' Puang Allataala anna nabeem Penaba Maseho anna kakuasaam. Muissam toia' diona Puang Yesus si ma'lao-lao umpogau' kamapiaam anna umpabono' ingganna to napentamai setam aka naolaam Puang Allataala.

³⁹ Anna kami'um too sa'binna ingganna indo puha napogau' illaam lembäna to Yahudi anna Yerusalem. Napatei hia yabo kaju sitambem. ⁴⁰ Illaam allo katallunna napatubo sule Puang Allataala mane napa'patandaanni lako hupatau. ⁴¹ Tä' Ia dipa'patandaam lako ingganna tau senga', sapo' anggam lu lako kami' inggannakam sa'binna to puha natuho Puang Allataala. Anna solakanni Puang Yesus mangngande puhanna tibangom dio mai alla'na to mate. ⁴² Anna nasuakam naua: 'La umpa'pakahebaangkoa' Kaheba Katilallasam anna ussa'bii lako

ingganna hupatau muua: Iam too to puha natuho Puang Allataala mendadi To Mahhotto'na ma'hupatau to tubo anna to mate.' ⁴³Aka iam too nasa'bii ingganna nabinna Puang Allataala naua: 'Menna-menna unkgatappa'i Puang Yesus iam too to la diampunni umpolalam kakuasaam illaam sanganna.'"

⁴⁴Mahassanni ma'tula' Petrus, iya napatamaim Penaba Maseho Puang Allataala ingganna to umpehingngii kasa'biam ia too. ⁴⁵Ingganna to Yahudi to matappa'um indo napasola Petrus eta too, sangngim pilla' muita Penaba Maseho natolloam duka' Puang Allataala lako tau taianna to Yahudi ⁴⁶aka uhhingngi indo buda tau umpake ma'hupa-hupa basa napalosaiam Penaba Maseho anna umpomatande Puang Allataala.

Iya ma'kadam Petrus naua: ⁴⁷"Inde mai tau naponnoi Penaba Maseho susikia', dadi la deempaka la mala ullabai ke ditedo'i sola uwai?" ⁴⁸Iya nasuaim Petrus ditedo' sola sanganna Yesus Kristus. Puhai, melauim lako Petrus anna mala tohhopi sanaka-naka beginna sola.

Umpomakaleso pa'palakoanna Petrus dio olona jumaa' dio Yerusalem

11:1-18

11 Tappa nahingngi duka' kaheba ingganna suhona Puang Yesus sola to matappa' dio lembäna Yudea naua budam tau taianna to Yahudi untahima Battakadanna Puang Allataala. ²Sapo' sipengka Petrus anna to Yahudi to matappa'um sulena längäm Yerusalem. ³Keaha'i lako Petrus naua: "Akanna tama hako iko banuanna tau taia to Yahudi anna sola-solako'a' manggande?"

⁴Nasuhum napahandu' pole' Petrus ma'tula' napomakalesoam indo puha

dadi mengkalao dio pa'pahandusanna naua: ⁵"Mahassannä' ma'sambajam dio Yope, pissananna kusi'dim dilipi anna kuita tuhum yabo mai langi' susi sampim kallu'bä' dipetoke'i appa' sikunna, dilolloham yabo mai tihandu' dio oloku. ⁶Tappa kulio-lio, iya kuitam ma'hupa-hupa olo'-olo' ma'bitti' appa', olo'-olo' malaiha, olo'-olo' tissollo' anna ma'hupa-hupa dassi. ⁷Iya kuhingngim kamaha naua: 'O Petrus, bangongko, tunui anna muande asanni.' ⁸Sapo' kutimba'i kuaa: 'Tä' sugali' ia pole' Debata, aka pempom dadingku tä' punalapi deem kuande kinande indo dipemaliinna la diande.' ⁹Iya kuhingngi pole oom indo kamaha yabo mai langi' naua: 'Ingganna napemapiaanna Puang Allataala, tä' mala la napemalii hupatau.' ¹⁰Pentallum nasulei ma'pateem, anna mane tiäkä' asam sule längäm langi'.

¹¹Wattu eta too, sule siaham duka' tallu tau dio indo olo banua to kiongei tohho to mengkalao inde Kaisarea, indo to disua untambaiä'. ¹²Kuhingngi kamaha ma'kada naua: 'Le'ba'koa' sola, daa umpomabanda' penabammu moi anna muissam muua taia to Yahudi.' Iya indem annam solaku kupasola indo anna le'ba'kam tama banuanna Kornelius. ¹³Iya natulasammakanni indo puha muita mesa malaika' ke'de' illaam banuanna anna nauaanni: 'Suai tau lako Yope la untambai mesa tau isanga Simon si diuam Petrus. ¹⁴Aka la natulasangkoa' kaheba la umpasalama'ko sola ingganna sahapummu.'

¹⁵Kupahandu'na ma'tula', iya tuhummi Penaba Maseho umponnoi asanni susi duka' indo uhuna nalambi'kia'. ¹⁶Iya tappa kukilalai tula'na Debata indo anna si nauai: 'Yohanes uwai ia napake mantedo', sapo' ikoa'-iko la ditedo'koa' Penaba Maseho.' ¹⁷Dadi maka' la namana'

duka' Penaba Maseho Puang Allataala tau taianna to Yahudi susi kita' anna uhunai unkatappa'ikia' Debatanta Yesus Kristus, iya tä' deem lalanna la kulabai."

¹⁸Iya tappana nahingngi kaha-kaha ia too sangngim mengkamma'um anna umpa'kasallei Puang Allataala naua: "Nabeem dia duka' lalam Puang Alataala tau taianna to Yahudi la untihokongam gau'na anna mala ullambi' katuboam."

Jumaa' uhu-uhuna dio Antiokhia

11:19-30

¹⁹Indo puhanna dipatei Stefanus iya kende'um pandahhaam napolalam tisebu' ingganna to matappa'; deem lu lako Fenisia, deem lu lako Siprus, anna deem lu lako Antiokhia. Iya tontä liu duka' umpa'pakahebaam Kaheba Katilallasam sapo' anggam lu lako to Yahudi.

²⁰Sapo' illaam alla'-alla'na indo to matappa' deem duka' to buttu dio mai Siprus anna Kirene. Indo tau, le'ba' lako ia Antiokhia untulasam Kaheba Katilallasam tau taianna to Yahudi naua: "Indo Puang Yesus iam too Debata." ²¹Iya natette liu anna naolaam Debata nasuhum tuttuam buda tau matappa' anna untuhu'i Puang Yesus.

²²Tappana napelele ingganna to matappa' dio Yerusalem kaheba ia too, iya ussua siaham Barnabas le'ba' lako Antiokhia. ²³⁻²⁴Indo Barnabas mesa tau mapia anna to matappa' si'da-si'da naponnoi Penaba Maseho. Iya sulena lako, tappa tilalla' muita ingganna to matappa' dio natamba' ponno duka' Puang Allataala. Iya napakahi'di asammi naua: "La tontä liukoa' manontom lako Debata sola sakalebu penabammu." Napolalam tuttuam buda tau mentuhu' lako Puang Yesus.

²⁵Le'ba' lako Tarsus Barnabas umpeä Saulus. ²⁶Tappana silambi', iya napasolam lako Antiokhia. Dio Antiokhia sa- taum naolaam si ma'hempum liu sola ingganna to matappa' anna umpa'guhu tau buda. Iya diom too Antiokhia uhu-uhuna to matappa' disangai "to Sahani".

²⁷Wattu eta too sule dio Antiokhia sanaka-naka nabi buttu yabo mai Yerusalem. ²⁸Indo Mesa isanga Agabus napalosai Penaba Maseho lambi' ke'de' ma'kada naua: "La kende' kakobeam lako lino." Kaha-kaha ia too dadi wattunna Klaudius ma'takka' dio kahajaam Roma. ²⁹Iya eta too muala kattuam ingganna to matappa' la uhhempum aka-aka situhu' kapallambisanna aka la napamoloiam solasubunna to matappa' dio Yudea. ³⁰Tihempunni, iya nabehom lako Barnabas sola Saulus aka ia la umpalambi'i lako pebaba ada'na to matappa' dio Yudea.

Yakobus dipatei - Petrus dilappasam illaam mai tahungkum

12:1-19

12 Umbai' la etam too duka' anna napahandu'i tomahaja Herodes ungkaha'i sanaka-naka to matappa'. ²Susinna umpesuaammi Yakobus kakanna Yohanes naälaiam ulunna, pa'dam napake. ³Tappana naissam tomahaja Herodes naua napohäe to Yahudi indo gau'na, iya napatahhu' lium lambi' umpesuaam pole oom duka' Petrus disakka. Wattu eta too allo kasalle Hoti Tä' Diboloi Bibi' Hoti. ⁴Tappana disakka Petrus, iya napesuaammi ditahungkum. Anna dibehoi lako appa' laoanna sohodadu la sibala'-bala' unjagai, sallaoam oi appa' oom sohodadu. Pattujunna la dihotto' dio olona tau buda ke lessu'i allo Kalappasam. ⁵Dadi ditähämmi Petrus illaam tahungkum.

Sapo' tontä liu ingganna to matappa' umpa'sambajanganni längäm Puang Allataala.

⁶Indo bengi naolaammi la nababa Herodes ke masiäi lako olona tau buda, iya mamma'um Petrus napaitängä dua sohodadu, anna dihante bassii dua limanna; senga'pi to manjaga dio olona ba'ba tahungkum. ⁷Pissananna ke'de' dam mesa malaika'na Debata dio ampe'na Petrus anna pangkähä illaam tahungkum. Ussappa sa'dena Petrus indo malaika' natundam napasindum naua: "Pasiha'hi bangom!" Iya lappa' siaham indo hante bassi dio limanna Petrus.

⁸Iya ma'kadam indo malaika' naua: "Pa'beke'ko ammu pa'sapatu." Iya tappa napogau' siaham duka'. Mane ma'kada polei naua: "Pa'jubako anna untuhu'ä."

⁹Tappa untuhu' siaham indo malaika' messubum sapo' tä'pi naissam naua dadi si'da-sia indo napogausam malaika' aka nasangapi mangngimpi. ¹⁰Iya ullebanni ongeanna to manjaga uhuna anna kaduanna, ullambi'um ba'ba ditutu'i bassi lu tamanna kota. Tappa titungka' kalena indo ba'ba lambi' mala messubum illaam mai tahungkum. Ullambi'i mesa lalam nahuttu', iya pa'de bäbäm ia indo malaika' naita.

¹¹Tappana kilala pole' Petrus ia nauam: "Mane kuissam di pole' temo kuua Debata ussua malaika'na nalappasannä' dio mai pala' limanna Herodes anna ingganna pattujunna to Yahudi."

¹²Tappana naissam si'da-sia kadadiah ia too, iya tahhu'um lako banuanna Maria indona Yohanes si diuam Markus. Buda tau ma'hempum anna ma'sambajam illaam indo banua. ¹³Mahassanni unde'de' ba'ba bala, iya sule ham mesa sabua' baine isanga Rode la umpengngissannii menna sule unde'de' ba'ba. ¹⁴Naissanna naua Petrus sule aka nahingngi kamahanna, iya tä' bäbäm un-

tungka'i ba'ba aka tilalla' sugali'. Lambi' lumumpa' tama umpa'tulasam solana naua: "Sulem Petrus dio ba'ba bala."

¹⁵Iya silelem naua: "Tatta'ko!" Sapo' tontä liu naua: "Abana sule si'da-sia Petrus." Sapo' nauai mandi: "Umbai' malaika'na hi tia."

¹⁶Mahassam liupi unde'de' ba'ba Petrus, iya suleim buda solana untungka'i. Tappana muita Petrus iya sangngim mängä-mängä. ¹⁷Muäkä' limanna Petrus napopengamma' mane ma'tula'i naua: "Natetteä' Debata messubum illaam mai tahungkum! Tulasam dam ia Yakobus sola ingganna solasubuntaa' to matappa' inde kaha-kaha puha dadi." Puhai ma'tula', iya messubummi le'ba' lako ongeam senga'.

¹⁸Tappana mebengngi', mahambam indo sohodadu to manjaga illaam tahungkum indo bengi lambi' pusa' anna sikakutanai naua: "Aka amo bäbä isanga dadi lako Petrus?" ¹⁹Iya ussuam tau tomahaja Herodes umpeä Petrus sapo' tä'um deem nalambi'. Iya indom to manjaga dipahessa si mesa-mesa mane napesuaanni Herodes dibaba lao dipatei. Lessu'i ia too mengkalaom Herodes dio Yudea le'ba' lako Kaisarea anna tohhoi dio.

Kamateanna Herodes

12:20-23

²⁰Wattu eta too tä' deem pada sakeaha' tomahaja Herodes lako to Tirus anna to Sidon moi kela daa inde dua kota bassim attasa'na Herodes to si uhhannuam tomahaja napangngalai kinande. Nasuhum silele usse'de' Blastus kapalana to mengkähä illaam banuanna tomahaja. Iya iam umbabai mengngolo lako tomahaja umpeä kasiolaam situhu' kattuanna to Sidon anna to Tirus.

²¹Pissananna lambi'i indo allo puha natandai, iya umpatamam poheba kaha-

jaanna Herodes anna tadongkonni yabo okkosam kahajaam mane ma'tula'i lako indo tau. ²²Mahassanni ma'tula' tomahaja, iya sikaolim indo tau naua: "Inde kamahanna debata taia kamahanna hupatau." ²³Iya nalambi' siaham pesämbä' Debata Herodes umpolalam malaika'na Debata aka tä' umpa'kasallei Puang Allataala nasuhum kalindohoam lambi' mate.

**Barnabas sola Paulus
dipilei anna diposuhu**

12:24–13:3

²⁴Anna tuttuam tiballa' kalua' Battakadanna Puang Allataala lambi' tuttuam buda kehängäm to matappa'. ²⁵Puhai napadokkoam lisu pala'na pebaba ada' indo kapahalluanna to matappa' dio Yerusalem, iya ma'pasulem Barnabas sola Saulus umpasola Yohanes battu diua Markus.

13 Illaam indo jumaa' dio Antiokhia wattu eta too deempi sanaka-naka nabi anna tuangguhu solana Saulus: Barnabas, Simeon indo si diuaam Malotä, Lukius (to Kirene), anna Menahem si dipasiampaipi gubernur Herodes.

²Pissam wattu indo tau mahassam umpalako kapenombaam längäm Debata anna puasa, iya ma'kadam Penaba Maseho naua: "Paseheannä Barnabas sola Saulus aka la unγκähä pengkähängam puha kupa'tantuan."

³Puhai puasa anna ma'sambajam napakumbäim pala'na indo dua tau mane nasuai le'ba'.

**Saulus anna Barnabas
dio leutam Siprus**

13:4-12

⁴⁻⁵Situhu' pesuana Penaba Maseho mengkalaom Barnabas anna Saulus napasolai Yohanes aka la napamoloi, dokko Seleukia mane

tahhu'i ma'kappala' lako Siprus. Sulei lako Salamis umpa'pakahebaammi Battakadanna Puang Allataala illaam pa'sambajanganna to Yahudi.

⁶Iya nasambaim naola indo leutam sule lako Pafos. Dioi, sitammum mesa to Yahudi isanga Bar-Yesus mesa to ma'issam-issam to ussangi kalena nabi sapo' naägä'i. ⁷Si sola lelem gubernurna leutam eta too isanga Sergius Paulus mesa to manähä. Iya untambaim Barnabas sola Saulus indo gubernur aka mohäe la uhhingngi Battakadanna Puang Allataala. ⁸Sapo' indo to ma'issam-issam (isanga Elimas situhu' basa Yunani) ullammai tula'na Barnabas sola Saulus aka naua: "Indana matappa'i gubernur." ⁹Sapo' indo Saulus battu diua Paulus naponnoim Penaba Maseho ullio-lio Bar-Yesus ¹⁰anna ma'kadai naua: "O solana setam! To angga manipu anna to si umpogau' liu kakadakeam sola umbali ingganna kamapiaam. Tä' liupokoka la monda umpasengko' lalam malolona Debata? ¹¹Temo petua'i limanna Debata sule untappaiko nasuhum la mendadi butako sanaka benginna la tä'ko muita mata allo."

Iya buta siaham indo tau kaputu-putu umpeä tau la untettei. ¹²Naitanna indo gubernur kadadiam ia too, matappa' siaham lako Puang Yesus aka mängämängä uhhingngi pepa'guhuam Debata.

**Paulus sola Barnabas dio
Antiokhia lembäna Pisidia**

13:13-52

¹³Iya umpelleim Pafos Paulus sola solana le'ba' ma'kappala' lako Perga dio Pamfilia. Sapo' umpelleim ia solana Yohanes anna ma'pasulei lako Yerusalem. ¹⁴Mengkalao dio Perga umpatahhu' pellaonna sule lako Antiokhia dio Pisidia. Tappana allo Katohhoanni le'ba'um tama pa'sambajanganna to Yahudi

anna muokko'i illaam. ¹⁵Tappana puha dibata illaam mai suha' Pepaondonganna Musa anna illaam mai suha'na ingganna nabi, iya ussuam tau pebaba ada' illaam pa'sambajangam le'ba' lako Paulus sola solana nauaam: "Oa' solasubum, maka' deem la untula'a' kada pepakanännä' la umpalanda' lako tau buda, iya malanna' umpalako."

¹⁶Iya ke'de'um Paulus anna muäkä'i limanna umpengkamma' tau buda mane ma'kadai naua: "O Inggammua' to Israel anna ingganna to mengkahea' längäm Puang Allataala, pehingngii manappaia' inde tula'ku! ¹⁷Puang Allataala to tapenombai inggantaa' to Israel puha umpilei nene to taponene anna napakembea' wattunna anna tohhoi dio lembäna Mesir messihuhu. Sola kuasa pala' limanna natette messubum illaam mai Mesir. ¹⁸Appa' pulo taunna naolaam Puang Allataala ussa'bahasam pangauanna nene to taponene dio pohiallasam. ¹⁹Tappana puha umpempa'deam issinna pitu kahajaam dio lembäna Kanaan, iya nataba-tabaammi indo litä' la mendadi mana'na nene to taponene. ²⁰Ingganna kaha-kaha ia too umbai' appa' hatu' lima pulo taunna naolaam.

Iya puhai, nabeemmi Puang Allataala to mahhotto' sisolom-solom ma'takka' sule lako wattunna nabi Samuel. ²¹Mane umpelalui mesa tomahaja lambi' nabeem Puang Allataala Saul änä'na Kish pessubunna Benyamin. Appa' pulo taunna ma'pahenta. ²²Tappana naäläi Puang Allataala Saul, iya untuho palem Daud la mendadi tomahaja. Anna diona Daud ma'kada Puang Allataala naua: 'Daud änä'na Isai kupemapiaam aka la iam pole' umpalako pa'elo'ku.'

²³Anna situhu' pa'dandianna Puang Allataala pessubunna Daud naäkä' mendadi To Mepasalama' illaam alla'-alla'na to Israel. Iam too Puang Yesus. ²⁴Tä'pi sule Puang Yesus

anna puham napokada Yohanes lako ingganna to Israel naua: 'Tihokongannia' ingganna kasalaammu ammu behoia' kalemu ditedo.' ²⁵Tappana la suppi' pengkähänganna Yohanes, iya si ma'kadam naua: 'Takao indo si ussangaa' To puha dilanti' la mepasalama' aka mane la sule hi Ia ibundingku. Anna moi la kubukkaiam pekapu' sapatunna tala sihatannä.'

²⁶Dadi, o inggannakoa' solasubungku, susi pessubunna Abraham teem to mengkahea' duka' längäm Puang Allataala, dipalambi'ingkia' kaheba kasalamasam. ²⁷Aka issinna Yerusalem sola ingganna to pebabanna tä' naissam naua Puang Yesus-um too To Mepasalama'. Tä' toi napähäm kalembasanna tula'na ingganna nabi, indo si dibata liu ke lambi' oom allo Katohhoam. Napolalam illaam indo mualai kattuum anna umpopepatei Puang Yesus naonngi ungganna'i tula'na ingganna nabi. ²⁸Moi anna tä'i deem nalambi' kaha-kaha la napolalam umpatei sapo' napelau liu siam lako Pilatus anna mala dipatei. ²⁹Tappana puha ungganna'i indo to puha tisuha' diona Puang Yesus, iya napatuhummi yabo mai kaju sitambem anna napatamai lokko'. ³⁰Sapo' napatibangom sule Puang Allataala dio mai alla'na to mate ³¹anna sanaka-nakapi allona naolaam si umpa'paitaam kalena lako ingganna to untuhu'i mengkalao dio Galilea sule längäm Yerusalem. Anna iam too mendadi sa'binna lako to Israel.

³²Dadi temo kitulasammokoa' Kaheba Katilallasam: Pa'dandianna Puang Allataala lako nene to taponene ³³naganna'im lako kitaa' pessubunna. Aka umpatibangommi Puang Yesus dio mai alla'na to mate. Umba susi Battakadanna Puang Allataala tisuha' illaam suha' pampujianna Daud kaduanna naua:

'Ikom too Änä'ku;
 mengkalao allo temo kupomakaleso,
 Kaom too Ambemu.^{‡‡}

³⁴Puha napatibangom Puang
 Allataala dio mai alla'na to mate
 anna tä'um la napäbäi la muolai pole
 kamateam, umba susi puha natula'
 naua:

'Ingganna pa'tamba' masehoku to mala
 dikatappa'i la kubeengko duka'
 umba susi bali kubeem Daud.^{¶¶}

³⁵Anna naua duka' Daud illaam pam-
 pujiam senga'na:

'Tä' la umpäbäi To Masehomu la bosu
 bäbä.^{§§}

³⁶Sapo' Daud ia puhanna umpalako
 pa'elo'na Puang Allataala, iya matem
 anna dipadioi ampe'na nene to naponene
 anna abana bosu bäbä ia. ³⁷Sapo' Puang
 Yesus Ia to puha napatibangom Puang
 Allataala tä' Ia bosu.

³⁸Dadi pahallua' muissam
 inggannakoa' solasubungku: ia
 anna malai dipakahebaikoa' diona
 kaampunganna dosa aka pengkähäna
 Puang Yesus. ³⁹Aka menna-menna
 unkatappa'i Puang Yesus la lappa'
 dio mai ingganna dosa. Anu' tä' deem
 la dilambi' susi kela mengnganda'
 illaanni tau Pepaondonganna Musa.
⁴⁰Dadi anda'i manappai inde tula'ku,
 majagakoa' indana dadii lako kalemua'
 indo puha napokada nabi illaam
 suha'na naua:

⁴¹'Petua'ia' inggamu to mantelle-telle.
 La pilla'koa' ammu mane mate
 aka kupogau'um mesa pengkähängam
 illaam wattu muongeia' tubo temo.
 Sapo' tä' sianna' la unkatappa'i
 moi la deem tau untulasangka'."^{*}

⁴²Tappana la messubum Barnabas
 sola Paulus napelaum tau buda naua:
 "Kela mala anna ma'tula' polepoko'
 ke lambi' oom allo Katohhoam."⁴³Iya
 soho'i ma'sambajam buda to Yahudi
 anna to mentama peadasanna to Yahudi
 to mengkahea' längäm Puang Allataala
 untuhu' Paulus sola Barnabas napolalam
 napa'guhu anna napakahi'di anna
 tontä liu muanda'i pa'kamasena Puang
 Allataala.

⁴⁴Tappana lambi' polei allo Kato-
 hhoam saidi' tasule asam issinna indo
 kota ma'hempum la umpehingngii Bat-
 takada Debata. ⁴⁵Sapo' naitanna to
 Yahudi indo tau buda, iya tä' deem pada
 sakembuhu lambi' natelle anna nabahoi
 indo tula'na Paulus diona Puang Yesus.

⁴⁶Sapo' ponno kabahaniem ma'kada
 Paulus sola Barnabas naua: "Aka inna
 iko hia' iko la dipayoloam la umpe-
 hingngii inde Battakadanna Puang Al-
 lataala, sapo' moka hakoa' untahimai
 mato-mato muuaa': 'Tä'kam kami' la si-
 hatam untahima katuboam sule lako
 salako-lakona.' Iam too anna menggihi'
 lakongkam tau taianna to Yahudi. ⁴⁷Aka
 nauaangkam Debata:

'Puhakoa' kutuho la mendadi ballo lako
 ingganna tau taianna to Yahudi
 anna malakoa' umpa'pakahebaam
 kasalamasam sule lako lili'-lili'na
 lino."^{††}

⁴⁸Tappana nahingngi ingganna indo
 tau taianna to Yahudi indo tula' ia
 too, iya sangngim tiala inabanna anna
 umpa'kasallei Battakada Debata. Iya
 matappa' asam pole' ingganna tau to
 puha natuho Puang Allataala la un-

‡‡13:33 Puj. 2:7.

¶¶13:34 Yes. 55:3.

§§13:35 Puj. 16:10.

*13:41 Hab. 1:5

††13:47 Yes. 49:6.

tahima katuboam sule lako salakolakona.

⁴⁹Lambi' tiballa' kalua' Battakada Debata illaam paluäna lembä ia too. ⁵⁰Sapo' to Yahudi ia umpentama tambu'i ingganna to kasalle illaam kota ia too sola baine to diangga' to mengkahea' längäm Debata. Napakende' aha'na anna mala undahha Paulus sola Barnabas anna nasuai lao umpellei lembä ia too. ⁵¹Iya umpempassiammi yolo sobä' dio bitti'na Paulus sola Barnabas aka la mendadi tanda lako indo to untumpu pala'i pepa'guhuanna mane le'ba'i lako Ikonium. ⁵²Ingganna to matappa' dio Antiokhia naponnoi katilallasam anna Penaba Maseho.

Dio Ikonium, Listra, anna Derbe

14:1-20

14 Susi siam duka' dio Ikonium le'ba' tama pa'sambajanganna to Yahudi Paulus sola Barnabas anna ma'pa'guhui diona Puang Yesus nasuhum buda to Yahudi anna taianna to Yahudi matappa'. ²Sapo' to Yahudi to moka untahima tula'na indo to dua umpakeaha' tau taianna to Yahudi anna mala unkgabassii to matappa'. ³Iam too anna masäe-säepi tohho Paulus sola Barnabas dio anna si untula' liu Battakada Debata sola ponno kabahaniam aka uhhannuam Puang Yesus. Anna napa'patandaammi Debata ussamba' kaheba pa'kamasena lako hupatau aka umbeem indo to dua kuasa umpadadi ma'hupa-hupa tanda anna tanda memängä-mängä.

⁴Sapo' indo issinna kota sipengka-pengka lambi' deemmi untuhu' to Yahudi anna deem untuhu' indo dua suho. ⁵Iya sipattuju-tujum sanaka-naka to Yahudi anna taianna to Yahudi sola pepungngu'na anna mala undahha indo suho dua anna naleba'i batu. ⁶Sapo' tappa naissam indo to

dua lambi' le'ba' muäläi kalena lako Listra anna Derbe anna ongeam senga' illaam attasa'na Likaonia. ⁷Iya eta oom naongei umpa'pakahebaam indo Kaheba Katilallasam.

⁸Dio Listra deem mesa muane kempo' inna susi disubungam. Indo to kempo' si anggam muokko' liu aka tä' mala mellao. ⁹Sapo' umpehingngii duka' tula'na Paulus. Iya naitanna Paulus indo to kempo' tappa naissam naua inde tau deem kamatappasanna la mala dipabono'. ¹⁰Nasuhum ma'kada Paulus napekasallei naua: "Ke'de'ko längäm!" Iya ke'de' siaham kabuä-buä anna ma'lao-laoui lako dio mai.

¹¹Tappana naita tau buda indo puha napogau' Paulus, iya sikaahhem ma'basa to Likaonia naua: "Tuhum si'dam pole' debata mehupatau tama lino."

¹²Lambi' disangai Barnabas debata Zeus anna Paulus ia disangai debata Hermes anu' ia si umpalao tula'. ¹³Pissananna sulem dio ba'ba kota sando debata Zeus buttu dio mai pa'sambajanganna dio sulibam kota umbaba sanaka-naka sapim laki dibunga-bungai la natunu sola tau buda aka maelo' menomba lako indo suho. ¹⁴Sapo' tappana nahingngi Paulus sola Barnabas pattujunna indo tau buda iya ussesse'-sesse'um pohebana anna lumumpa'i tama alla'-alla'na indo tau napasindum meoli naua: ¹⁵"Tettekede, aka hia' iko umpogau'? Kami' inde bassim hupatau biasakam duka', susi siangkia'! Sapo' sulekan inde la umpa'pakahebaam Kaheba Katilallasam tama alla'-alla'mua' anna malakoa' tä' umpogau' liu kaha-kaha takeguna. Sapo' la mengngolo lako hako' Ia Puang Allataala to tubo to umpadadi langi' sola lino, le'bo' sola ingganna issinna. ¹⁶Aka yolona abana napabe'pi Puang Allataala hupatau pantam muola pattuju penabanna. ¹⁷Sapo' moi anna susi tä' siam lembe

Puang Allataala umpa'patandaam maaka susi kamatandeanna. Aka tontä liu umpogau' ma'hupa-hupa kamapiaanna susinna: umpatuhum liu uham yabo mai langi'; umpakembua manappa tanangammua' ke lambi' oom wattunna; nabeem liukoa' kinande anna kamasannangam penaba." ¹⁸Sapo' moi anna susi tula'na indo to dua, saidi' siam tatä' nabela nalabai indo tau buda la untunu tunuam dio olona.

¹⁹Pissananna sule dio kota Listra sanaka-naka to Yahudi buttu dio mai Antiokhia dio Pisidia anna dio mai Ikonium umpa'tula'i indo tau buda, iya iam sikanatuhu'. Napolalam ussileba'-leba'im batu Paulus anna mane nabalesoi lako sulibam kota aka nasanga matem. ²⁰Iya suleim to matappa' nalomba. Mahassanni napali' nasitingngajo-ajoi iya bangommi sule anna le'ba'i tama kota. Makale'nai le'ba'um lako Derbe solai Barnabas.

**Ma'pasule lako Antiokhia
Paulus sola Barnabas**

14:21-28

²¹Tappana dio Derbe, umpa'pakahebaam oom Kaheba Katilallasam Paulus sola Barnabas nasuhum buda tau matappa'. Puhai, ma'pasulem lako Listra mane lakoi Ikonium anna Antiokhia dio Pisidia. ²²Illaam indo tallu kota umpakatoto' oom penabanna ingganna to untuhu' Puang Yesus anna napakahi'di liu naua: "La tontä liukoa' too matappa' lako Puang Yesus. Anu' abana hi tia inna la buda kamapi'disam taola ke maelo'kia' tama kapahentaanna Puang Allataala." ²³Anna untuhopi to la mendadi pebaba ada' Paulus sola Barnabas lako si mesa-mesa jumaa'. Puhai puasa anna ma'sambajam indo to dua, iya nabehom tama pala' limanna Puang Allataala to nakatappa'i. ²⁴Mane

umpatahhu' oi pa'laoanna muolai lembäna Pisidia anna lako Pamfilia. ²⁵Puhai umpa'pakahebaam Battakada Debata dio Perga, iya le'ba'um dokko Atalia.

²⁶Mengkalao diom, ma'kappala' ma'pasule lako Antiokhia, kota naongei yolona anna uhunai dibeho tama pala' pa'kamasena Puang Allataala anna mala ungkähä pengkähängam indo to nasuppisammi temo. ²⁷Sulei lako Antiokhia untambaim ingganna to matappa' mane natulasam asanni ingganna kaha-kaha puha napadadi Puang Allataala nakähä Paulus sola Barnabas. Napa'tula'i duka' maaka susi nabukkaam lalam Puang Allataala napolalam indo tau taianna to Yahudi mala duka' matappa' lako Puang Yesus. ²⁸Masäepi tohho Paulus sola Barnabas anna ingganna to matappa' dio.

**Pa'hempunganna pebaba
ada' dio Yerusalem**

15:1-21

15 Iya sulem dio Antiokhia sanaka-naka to Yahudi to matappa'um lako Puang Yesus yabo mai Yudea anna ma'pa'guhui lako tau taianna to Yahudi to unngkatappa'i duka' Puang Yesus naua: "Maka' tä'koa' disunna' situhu' kabiasaam napaondom Musa, inna tä' siakoa' la mala dipasalama'." ²Sapo' pepa'guhuam ia too nabahoi puppu' Paulus sola Barnabas. Sampe ingganna to matappa' untuho Paulus sola Barnabas anna sanaka-naka tau dio indo jumaa' la le'ba' umpellambi'i suhona Puang Yesus sola ingganna pebaba ada'na to matappa' dio Yerusalem anna mala napa'hempunni indo kaha-kaha ia too.

³Iya naanta'um jumaa' dio Antiokhia sule lako sulibam kota. Mane le'ba'i ia muola lako lembäna Fenisia anna Samaria. Sulei lako ma'tula'um

naua: “Budam tau taianna to Yahudi mengkaala lako Puang Yesus.” Iya sangngim tiala inabanna to matappa' to uhhingngii. ⁴Tappana landa' längäm Yerusalem natahima manappa to matappa' sola ingganna suho anna pebaba ada' yabo. Iya natulasannim ingganna indo puha napogau' Puang Allataala illaam pengkähänganna duai.

⁵Iya sulem sanaka-naka to illaam kakalebuanna Parisi to matappa'um naua: “Ingganna tau taianna to Yahudi pahallu ia duka' la disunna' anna disuai untuhu'i Pepaondonganna Musa anna mala salama'.”

⁶Iya ma'hempummi ingganna suho sola pebaba ada' dio Yerusalem natula' kaha-kaha ia too. ⁷Tappana masäe nasitimba'-timba'i, iya ke'de'um Petrus naua: “Oa' solasubum, puha muissammia' muua pahandu'napi anna natuhomä' Puang Allataala illaam mai alla'-alla'mua' la umpalanda' indo Kaheba Katilallasam lako tau taianna to Yahudi lambi' nakatappa'i. ⁸Aka Puang Allataala to ullosa tama penabanna hupatau umbeem Penaba Maseho lako indo tau tandana natahima duka' susikia'. ⁹Anna tä'kia' deem naalaangam moi podo la mesa, kitaa' to Yahudi anna indo tau taianna to Yahudi, sapo' nasehoi hia duka' penabanna aka matappa'. ¹⁰Aka maka' susi, iya aka hi anna umpa'sändä'i hakoa' Puang Allataala la umpassa umma' petauanna la umpababai ingganna Pepaondonganna Musa? Moi kela daa babaam ia too tä' siam duka' tabelaa' takedoam mengkalao nene to taponenea' sule lako kita. ¹¹Sapo' inde hia takatappa'ia': Anggam umpolalam pa'kamasena Puang Yesus malakia' salama', susi siam duka' indo tau taianna to Yahudi.”

¹²Iya sangngim mengkamma' pole' indo to ma'hempum anna umpehingngii Paulus sola Barnabas natulasam indo ma'hupa-hupa tanda anna tanda memängä-mängä napadadi Puang Allataala illaam alla'-alla'na tau taianna to Yahudi nakähä indo to dua. ¹³Puhai ma'tula' Paulus sola Barnabas, ma'kadam duka' Yakobus naua: “O inggannakoa' solasubungku, pehingngiia' tula'ku: ¹⁴Mane balinna sia napomasiä' Simon Petrus maaka susi pa'pahandusanna umpa'paitaam pa'kamasena Puang Allataala lako tau taianna to Yahudi. Aka pattujunna, illaam mai alla'-alla'na tau ia too la napilei to la mendadi umma' petauanna. ¹⁵Kaha-kaha ia too sihondoi tula'na Puang Allataala puha natuli' ingganna nabi naua:

¹⁶'Dako'i too la ma'pasuleä' anna indo kahajaanna Daud, la sihhapam banua puha hompo la kupake'de' sule, anna ingganna titaletä'na la kupake'de' sule, anna la kupomakassa'.

¹⁷La kupateem anna mala ingganna hupatau to sulibanna la tinanda lako Debata, anna ingganna tau taianna to Yahudi to balim kutambai la mendadi umma'ku.

Susim too tula'na Debata to umpadadi ingganna kaha-kaha ia too

¹⁸anna puha napa'paissangam mengkalao dio mai.*

¹⁹Dadi situhu' kao pikkihangu, tä'kia' la mala umbanda'i tau taianna to Yahudi, indo to mengkaala lako Puang Allataala. ²⁰Sapo' la tapakatu hia' ia suha' la naua: 'Daa muande ingganna kinande puha dipehumalasang lako debata senga', daa umpa'gau' sessu', daa muande balena olo'-olo'

*15:18 Pep. 9:11-12.

mate ditekke anna haha.' ²¹Iam too la umpogau'a' anna mala mapia liu alla'na to Yahudi anna taianna to Yahudi. Aka mengkalao diopi mai anna dipa'paissangammi Pepaondonganna Musa lako si mesa-mesa kota anna sule lako temo pepaondongam ia too dibata liu ke allo Katohhoam oom lako si mesa-mesa pa'sambajangam."

**Suha' lako taianna to
Yahudi to matappa'um**

15:22-35

²²Iya mualam kattuum ingganna suhona Puang Yesus sola pebaba ada' anna issinna jumaa' dio umpake'de' tau illaam mai alla'-alla'na la napasola Paulus anna Barnabas ma'pasule lako Antiokhia. Iya umpake'de'um Yudas si disangai Barsabas sola Silas, bassim to diangga' illaam alla'-alla'na to matappa'.

²³Iya dibeemmi indo suha' nababa. Issinna indo suha' naua:

"Salama'ki inggannakam solasubummu susi suho teem pebaba ada' matim inggammua' solasubungki taiannakoa' to Yahudi itim Antiokhia, Siria, anna Kilikia. ²⁴Kipekaheba deem to buttu illaam mai alla'-alla'ki, moinna anna tä'i deem kisua, napahusa'koa' tula'na anna napakabebe penabammu. ²⁵Dadi iam too anna kikalebuim umpake'de' dua tau umpasolai Barnabas sola Paulus to bassim kipakamaja ²⁶anna to umpa'bakkei kalena anna mala umpa'pakahebaam sanganna Debatanta Yesus Kristus. ²⁷Dadi kisuum too Yudas sola Silas matim anna mala napa'tulasangkoa' situhu' issinna inde suha'. ²⁸Aka puham nakattu Penaba Maseho anna kiala duka' kattuum anna mala tä'koa' la dipapassanni babaam tala umbelannaa' umbaba. Sapo' la

anggam inde la pahallua' untuhu'i liu: ²⁹Daa muande ingganna kinande puha dipehumalasang lako debata senga'; daa muande haha anna balena olo'-olo' mate ditekke, anna daa umpa'gau' sessu'. Aka maka' umpasikambelanna' kalemu kaha-kaha ia too, iya la mapiam too. Dadi padam too inde anna salama'ki matim."

³⁰Puhai napasaha', mengkalaom indo to disua lako Antiokhia. Tappana landa' lako, untambaim ingganna to matappa' ma'hempum anna nabeenni indo suha'. ³¹Tappana nabata indo suha', tä' deem pada satilalla'i aka tiala inabanna napakahanga indo issinna suha'. ³²Indo Yudas sola Silas nabi duka'. Masäe ma'tula' umpakahi'di ingganna to matappa' anna napakatoto' kamatappasanna. ³³Tappana masäe-säe dio indo to dua, iya la ma'pasulem sule längäm indo to ussua yabo Yerusalem. Nauaammi ingganna to matappa' dio Antiokhia: "Nakambi' dangkoa' Debata lako lalam." [³⁴Sapo' nakattu ia Silas naua: "La indemä' kao."] ³⁵Masäe-säepi duka' tohho dio Antiokhia Paulus sola Barnabas, iya budam solana to matappa' napasola ma'pa'guhu anna umpa'paissangam Battakadanna Debata.

Sisähä' Paulus anna Barnabas

15:36-41

³⁶Tappana masäe-säei dio, iya nauam Paulus lako Barnabas: "Umbai' mapia ke laoki' sule ullelei ingganna solasubuntaa' lako si mesa-mesa kotana indo to puha taongei umpa'paissangam Battakada Debata anna mala taissam maaka amoim susi." ³⁷Natuhu'i duka' Barnabas sapo' mohäe ia umpasola Yohanes indo si diuam Markus. ³⁸Iya etam pole' sisala aka naua ia Paulus: "Tä' la dipasola aka puha mepellei dio Pamfilia lessu' anna tä'um naaku mebalii mengkähä indo

eta.”³⁹ Nasuhum sikalla Paulus anna Barnabas lambi' sisähä'. Iya le'ba'um ia Barnabas umpasola Markus ma'kappala' lu lako Siprus.⁴⁰ Sapo' Paulus ia untuho Silas la napasola. Puhai nabeho ingganna solasubunna to matappa' dio Antiokhia tama pala' pa'kamasena Puang Allataala, iya mengkalaoim.⁴¹ Anna le'ba'i ullelei mobotto-bottoam illaam lembäna Siria anna Kilikia umpakatoto' ingganna jumaa'.

**Timotius sola Silas
naala Paulus napasola**

16:1-5

16 Eta too naola duka' Paulus Derbe anna Listra. Iya etam silambi' mesa to matappa' isanga Timotius, to Yahudi indona mesa duka' to matappa' anna ambena ia taia to Yahudi.² Indo Timotius naissam asam ingganna to matappa' dio Listra anna Ikonium naua: “Tau mapia.”³ Iya maelo' Paulus umpasola lelem lao Timotius umpatahhu' pengkähänganna. Dadi napopesunna' anna mala napohäe to Yahudi aka naissam ingganna to Yahudi eta naua taia to Yahudi ambena.⁴ Illaam pa'laoanna Paulus sola Silas muola mobotto-bottoam si umpalanda' indo kattuanna suho anna pebaba ada' dio Yerusalem, anna mala ingganna to matappa' la natuhu'i.⁵ Iya susim too ingganna jumaa' dipakatoto' kapeimanganna anna tuttuam masäe tuttuam kehängäm to matappa'.

**Paulus nasua Puang
Allataala lako Makedonia**

16:6-10

⁶Sapo' naola lako lembäna Frigia anna Galatia Paulus sola Silas aka tä' napäbäi Penaba Maseho la umpa'pakahebaam Kaheba Katilallasam

dio propinsi Asia.⁷ Tappana ullambi' katonanna lembäna Misia, iya nasändä'um battuam la lu tama attasa'na Bitinia, sapo' tä' napäbäi Penaba Masehona Puang Yesus.⁸ Ungkatembammi lembäna Misia, iya tihubä' dokko Troas.⁹ Bengii dipalosaim Paulus deem mesa to Makedonia naita ke'de'-ke'de' anna melai naua: “Lomba siapakam kami' mai aka la umpamoloikam.”¹⁰ Iya puhanna ia too ma'kalili' siahangkam[¶] la mengkalao lako Makedonia aka kiissam kiuu nasua si'dangkam Puang Allataala la umpa'pakahebaam Kaheba Katilallasam lako to Makedonia.

**Ungkatappa'im Puang
Yesus Lidia dio Filipi**

16:11-15

¹¹Mengkalaokam dio Troas tahhu'kam ma'kappala' lako Samotrake, iya masiänai landa'ungkam lako Neapolis.¹² Iya mengkalao etangkam le'ba' lako Filipi, mesa kota illaam botto uhuna illaam Makedonia natakka' to ma'pahentana kahajaam Roma. Iya etangkam tohho sanaka-naka benginna.

¹³Tappana lambi' allo Katohhoam, messubummakam illaam mai kota anna mehhandam salukam umpeä ongeam indo la deenna kisi'dim to Yahudi ma'sambajam eta. Iya kilambi'um baine ma'hempum, iya muokko'ungkam anna kipa'tula'i.¹⁴ Wattu eta too ma'pehingngi duka' mesa baine pa'balu' sampim mellolo pao isanga Lidia to buttu dio mai kota Tiatira. Indo baine mesa duka' to si impenombai liu Puang Allataala. Nabukkaiam penabanna Debata nasuhum naala penabanna indo ingganna tula'na Paulus.¹⁵ Lambi' ditedo'um Lidia sahapu. Iya puhai ditedo' nababaingkam naua:

[¶]16:10 Wattu eta too sola Lukas to untuli'i inde suha'.

“Maka' ungkannangam tonganna' kamatapangku längäm Puang Yesus, iya talakoa' banua anna tohho diokia'.”
Sampe napeä lalanna anna malai kiioi.

**Ditahungkum Paulus
sola Silas dio Filipi**

16:16-40

¹⁶ Pissam wattu lakongkam indo ongeam si naongi to Yahudi ma'sambajam, iya silambi'ungkam mesa sabua' baine to napentamai setam nasuhum si ma'issam-issam napolalam ingganna puäna sangngim buda pallolonganna. ¹⁷ Iya natuhu' liungkam solakam Paulus napasindum sikaoli-oli naua: “Inde mai tau sangngim sabua'na Puang Allataala To Handam Matande. Anu' iam umpaissanikoa' dalam kasalamasam.” ¹⁸ Tappana sanaka-nakai allona naolaam ma'pateem liu, iya makahing'um talinganna Paulus uhhingngii sampe napenggihi'i anna ma'kadai lako indo setam naua: “Sola sanganna Yesus Kristus kupahentako: pessubungko illaam mai kalena itim baine!” Iya tappa messubum siahanni indo setam.

¹⁹ Tappana naita ingganna puäna indo baine sangngim keaha' aka naua: “La pa'dem pole' pallolongangi.” Tappa us-sakka Paulus sola Silas anna nahui'i lako pasa' aka la nababa lako to kuasa. ²⁰ Dioi olona ingganna to mahhotto' dio indo kota, iya nauaim: “Inde tau dua sule inde kota umpahakka hupatau aka bassim to Yahudi ²¹ anna umpepa'guhuan ada' kabiasaam indo tä' sihondoi pahentana to ma'pahenta kahajaam Roma. Dadi tä' la mala tatahimaa' dapaka ia la tatuhu'i.”

²² Sule duka' tau buda ullebo Paulus anna Silas nasitungo-tungoi. Iya napesuaammi ingganna to mahhotto' dilälä'iam pohebana illaam mai kalena anna mane ussua tau natembe' talukum. ²³ Puhai bassim ditembe' talukum, iya

napesuaammi ditibe tama tahungkum anna umpahentai panjaga tahungkum naua: “Jagai manappaia'!” ²⁴ Dadi situhu' indo pahenta, iya natibe tama tambim tängä indo panjaga tahungkum anna nasangkalai bitti'na.

²⁵ Kiha-kiha tängäi bengi ma'sambajammi Paulus sola Silas anna menanii umpuji Puang Allataala. Iya sikanapehingngii duka' ingganna solana to ditahungkum indo penanianna. ²⁶ Pissananna ham ia lino' kasalle sampe ingganna batu longkahhinna indo tahungkum pahodo anna tappa tibukka asam ba'ba anna lappa' asam duka' sangkalanna ingganna to ditahungkum. ²⁷ Tappana milli' indo panjaga tahungkum anna muitam ba'ba titungka' asammi, iya tappa ussintä' pa'danna la mentujo aka nasanga kumondä asammi lao to ditahungkum. ²⁸ Sapo' metamba siaham Paulus naua: “Daa ussägäi kalemu aka inde asam siangkanni!”

²⁹ Iya umpelau siaham ballo indo pan-jaga tahungkum anna kumondäi tama napasindum lumalla'-malla' aka mahea' anna menombai dio olona Paulus sola Silas. ³⁰ Mane umpasolai Paulus sola Silas messubum anna nauai: “Oa' tuam aka la pahallu kupogau' anna malaä' salama?”

³¹ Iya natimba'um naua: “Katappa'iko Puang Yesus anna malako salama' susi iko susi ingganna sahapummu.” ³² Iya natulasammi Battakada Debata sola ingganna to illaam banuanna. ³³ Tette' eta siam indo bengi anna umbabai Paulus sola Silas lao nabaseiam basana anna mane umbeho siaham kalena sola sahapunna ditedo'. ³⁴ Puhai, nababaim lako banuanna anna natahiai anu' tä' deem pada satilalla' aka matappa'um sahapui lako Puang Allataala.

³⁵ Masiäi, ussuam pulisi indo ingganna to mahhotto' naua: “Pellambi'i panjaga

tahungkum anna muuaanni: Lappa'um too ade' indo to dua.”³⁶ Le'ba' siaham duka' indo panjaga tahungkum umpel-lambi'i Paulus sola Silas anna nauaanni: “Nalambi'ä' pahentana ingganna to mah-hotto' la kulappasammokoa' ade'. Dadi pessubummokoa' ammu le'ba'; pengnganda' manappa hangkoa.”

³⁷ Sapo' ma'kada Paulus lako indo panjaga tahungkum sola pulisi naua: “Kami' to Romakam duka', tä'pi deem dihotto' gau'ki anna tappa ditembe' talukum-makam dio olona tau buda mane ditibekam tama tahungkum. Iya pisananna temo la ullappa' teem bábäkam, tä' ia pole' kiaku. Angga hia pole' tambaiangkam indo ingganna to mah-hotto' sule inde. Anna ia ullappasam manappakam.”

³⁸ Iya le'ba'im indo pulisi umpalanda' kadanna Paulus lako ingganna to mah-hotto'. Tappana naissanni naua indo to dua to Roma hia duka', iya sangngim häntä pole'.³⁹ Iya sulei siaham umpel-lambi'i Paulus sola Silas anna muakui kasalaanna dio olona. Mane napasolai messubum anna napelau liui naua: “Kela mala anna umpelleia' inde kota.”⁴⁰ Iya le'ba'im umpellei indo tahungkum tahhu' lako banuanna Lidia. Sulei lako silambi'um ingganna to matappa' dio, iya napakahi'dim mane napellei.

Kahusasam dio Tesalonika

17:1-9

17 Iya umpatahhu'um pa'laoanna Paulus sola Silas naola lako Amfipolis, le'ba' lako Apolonia mane landa'i lako Tesalonika. Eta too deem pa'sambajanganna to Yahudi.² Susi biasa si le'ba' Paulus tama pa'sambajangam. Pentallum allo Katohhoam nahuntum-huntum naolaam Paulus untula' anna ussitimbam-timbanni Battakada Debata sola tau buda.³ Napomasiä' anna

napomakaleso si'da-si'da situhu' issinna suha' lako tau buda naua: “Indo To puha dilanti' la mepasalama' tä' mala tala ussi'dim kamapi'disam lambi' dipatei anna tibangom sule dio mai alla'na to mate. Indo Puang Yesus to kupakahebaiangkoa', Iam too To puha dilanti' la mepasalama'.”⁴ Iya deem sanaka-naka to Yahudi to dio heem eta too nakannangam sampe umpentappai Paulus sola Silas. Anna budapi tau matappa' eta too susi taianna to Yahudi to mengkahea' längäm Puang Allataala teem baine to diangga'.

⁵ Sapo' buda to Yahudi kembuhu lambi' uhhepump ingganna to salle inaba illaam pasa' anna napopa'mesai umpakende' kahusasam illaam kota. Iya ullebom banuanna Yason umpeä Paulus sola Silas aka la nababa lako olona tau buda.⁶ Sapo' tappana tä' nalambi', iya Yason-mi sola sanaka-naka to matappa' nahui' lako to kasalle illaam indo kota napasindum sikatamba naua: “Iam too inde mai tau si umpakende' kakadakeam lako lino, iya temo sulem duka' inde.⁷ Anna inde Yason untahima indo to sule sampe nabanuai. Iya ingganna gau'na tä' si hondoi pahentana kahajaam Roma aka naua: ‘Deem dia tomahaja senga' isanga Yesus.’”⁸ Tappana nahingngi tau buda anna ingganna to kasalle illaam indo kota, sangngim husa' penabanna.⁹ Iya disuam Yason sola solana umpas-subum doi' tanda pa'dandianna tä'um la umpakende' liu kahusasam. Iya puha ham nabaja' mane dilappasanni.

Dio Berea Paulus sola Silas

17:10-15

¹⁰ Benginna eta too, ussua siahanni Paulus sola Silas ingganna to matappa' dio Tesalonika naua: “Lu lakokoa' Berea.” Landa'na lako le'ba' tamam pa'sambajanganna to Yahudi.¹¹ Ingganna to Berea toka puha ia penabanna

sisala to Tesalonika. Aka untahima ia Battakada Debata sola unä' penabanna napolalam allo-allo umpahessa liu Battakada Debata, aka naua: “Battu tappa' si'da hi inde pepa'guhuanna Paulus.”¹² Sampe buda to Yahudi unkatappa'i Puang Yesus anna taianna to Yahudi susi baine to diangga' teem muane.

¹³Sapo' tappana naissam sanaka-naka to Yahudi dio Tesalonika naua umpa'pakahebaam oom duka' Battakadanna Puang Allataala Paulus dio Berea, le'ba'im lako anna uhusoi tau buda napolalam kabebai penabanna anna masussa. ¹⁴Napasihha' siaham ingganna to matappa' dio Berea ussua Paulus lako bihim le'bo', anggam Silas sola Timotius tohhoi. ¹⁵Ingganna to umpasolai Paulus naanta' sule lako Atena. Tappana ma'pasule, iya napasammi Paulus nauaam: “Uaanni Silas sola Timotius anna bale' sulei napellambi'ä.”

Paulus dio Atena

17:16-34

¹⁶Iya mahassanni muampai Silas sola Timotius Paulus dio Atena, iya tä' deem pada sahäntä buana muita buda debata lino pa'papia kalena hupatau samba lako kota. ¹⁷Sampe anggam ia si natula' anna nasitimba'-timba'i illaam pa'sambajangam sola to Yahudi anna tau senga' to mahea' längäm Puang Allataala. Susi duka' allo-allo sola ingganna to si nasilambisam dio pasa'. ¹⁸Anna nasitimba'-timba'i duka' sanaka-naka tuanguhu illaam indo kakalebuam isanga Epikuros anna Stoa. Deem muuai: “Aka hia natula' inde to si buda kada bäbä?” Deem piha muuai: “Umbai' to umpa'paissangam pepa'guhuam debatanna to tadiita hambu apinna.” Aka Paulus umpa'paissangam Kaheba Katilallasam diona Puang Yesus sola

katibangonganna sule dio mai alla'na to mate. ¹⁹Nasuhum umpasola Paulus lako ongeanna ma'hempum to mahhotto' isanga Areopagus anna nauaanni: “Maelo'kam la umpengngissanni indo pepa'guhuam bakahu si umpa'pakahebaam. ²⁰Aka indo pepa'guhuam umbaba senga'-senga' kihingngi, dadi maelo'kam la kiissam aka kalembasanna.” ²¹(Ingganna to dio Atena susi inna to dio, teem to sule si napedotaam untibe wattunna la umpehingngii anna la untula' diona kaha-kaha bakahu.)

²²Iya ke'de'um Paulus illaam alla'-alla'na to ma'hempum dio Areopagus anna ma'kadai naua: “O inggammua' to Atena, kuita ingganna pa'palakoammua' tä' deem pada sameada'koa' lako ingganna debatammu. ²³Aka tappana ma'lao-laoä' illaam kotamua', iya kuitam ingganna ongeam pehumalasammua'. Anna kulambi' toi duka' mesa ongeam pehumalasam dituli' dio naua: ‘Pehumalasam längäm debata to tadiissam.’ Indo Debata to umpenombaia' sapo' tä' muissam, iam too inde kupa'paissanganna' matim.

²⁴Puang Allataala to puha umpadadi lino anna issinna, iam too Debatanna langi' anna lino. Tä' tohho illaam banua pa'papia limanna hupatau, ²⁵anna tä' toi pahallu napamoloi hupatau, mato-mato si deem kakuhänganna. Aka Ia hi Ia umbeem katuboam anna ingganna-ingganna sia lako hupatau. ²⁶Aka mesa hia tau naongi messubum ingganna hupatau anna titabai lao umpangngissi ongeam illaam inde lino. Ia toi puha muäto' loppo' wattunna ingganna hupatau anna unkatonanni ingganna ongeanna. ²⁷Napateem Puang Allataala anna mala tungga' lao hupatau umpeä Puang Allataala umba-umba aka mala nalambi'. Aka setonganna tä' siangkia' sikambela Puang Allataala.

²⁸Aka illaam kakuasaanna malakia' tubo anna malakia' sikakähä. Tä' daka too si natulasam siangkoa' to manähämu naua: 'Kitanna' too duka' pessubunna.'

²⁹Dadi maka' pessubunnakia' Puang Allataala, tä' too mala la taangga'a' la sipadaam debata lino indo bulabam dipapia, peha', battu haka batu. Aka ia too sangngim digahagai situhu' kamanähänganna hupatau. ³⁰Aka yolona, Puang Al-lataala tä' umpatumäi gau'na hupatau aka balam tanaissanna, sapo' tentomai napaissanningkia' pole' naua: 'Ingganna hupatau illaam inde lino pahallu unti-hokongam ingganna dosana.' ³¹Ma'kada susi aka puham napa'tantu loppo' allo la naongi uhhotto' gau'na to lino sola undu' lollä. Pengkähängam ia too la napalako indo to puha napilei. Anna napa'paitaam sola tanda makaleso naita hupatau, napatibangom dio mai alla'na to mate."

³²Tappana uhhingngi tula' diona katuboanna sule to mate, iya deem piha tau muele-elei, sapo' deem piha muuai: "Battu piham opa kipehingngii oi tula'mu." ³³Iya le'ba'um Paulus umpellei indo pa'hempungam. ³⁴Sapo' deem siam duka' sanaka-naka muane mentuhu' lako Paulus anna unkatappa'i Puang Yesus, susinna Dionisius mesa duka' to mahhotto' dio Areopagus. Anna deempi duka' mesa baine isanga Damaris anna sanaka-nakapi tau senga'.

Paulus dio Korintus

18:1-17

18 Puhai ia too umpelleim Atena Paulus le'ba' lako Korintus. ²Dioi Korintus sitammum mesa to Yahudi isanga Akwila dadi dio Pontus. Mane sule dio mai Italia sola Priskila bainena aka napa'pahentaam tomahaja Klaudius naua: "Ingganna to Yahudi pahallu umpellei Roma." Iya lempäm Paulus

lako banuanna ³anna tohhoi dio sola. Si sola liu mengkähä aka bassim nais-sam undasi' bahum lollo'. ⁴Iya lambi' oi too allo Katohhoam, tama oom pa'sambajanganna to Yahudi Paulus ma'tula' aka napeä lalanna anna mala matappa' ingganna to Yahudi sola ta-ianna to Yahudi.

⁵Tappana sule Silas sola Timotius yabo mai Makedonia, iya napasatutuim pole' wattunna Paulus umpa'pakahebaam Battakada Debata. Napa'pasa'biam lako ingganna to Yahudi naua: "Puang Yesus lam too indo To puha dilanti' la mepasalama'." ⁶Sapo' silele hia umbali Paulus anna natelle, iya umpentantangami sobä' bajunna aka la mendadi tanda pepakilalaam lako indo ingganna tau diona kasalaanna. Mane nauai: "Päbäi kalemua' umpendudum kasalaammu. Maka' nalambi'koa' pesämbä' Debata lendu'um kao dudunganku. Yaboä' tanahambui, dioä' tanato'doi. Temo, la lu lakomä' taianna to Yahudi."

⁷Iya messubummi anna le'ba'i lako banuanna Titius Yustus mesa to si umpenombai Puang Allataala. Indo banuanna sitehe pa'sambajanganna to Yahudi. ⁸Sapo' kapalana indo pa'sambajangam isanga Krispus unkatappa'im Puang Yesus sola sahapunna. Anna budapi to Korintus to uhhingngi Paulus umpa'paissangam pepa'guhuam diona Puang Yesus tappa matappa' lambi' umbeho kalena ditedo'.

⁹Pissam wattu bengi nalipi Debata Paulus lambi' naita sule anna napa'tula'i naua: "Daa ummahea'; pa'tula' liuko, daa unghanonnä. ¹⁰Aka la kupasolai liuko anna tä' deem mesa tau la umpahuaike kakadakeam. Aka buda umma' petauangku illaam inde kota." ¹¹Iya hapa'um Paulus dio sataum anna annam bulanna umpa'pa'guhuam Bat-

takadanna Puang Allataala illaam alla'-
 alla'na to dio.

¹²Sapo' tappana diäkä' Galio mendadi gubernur dio Akhaya ke'de' pole' sanaka-naka to Yahudi ma'mesa umbali Paulus sampe nasakka anna nababai lako olona to si mahhotto'. ¹³Anna ma'kadai naua: "Inde tau napeä lalanna umpatudui tau anna malai umpenombai Puang Allataala sulibanna Pepaondonganna Musa."

¹⁴Sapo' tappana la napahandu' Paulus ma'tula', ma'kadam Galio lako indo ingganna to Yahudi naua: "O to Yahudi maka' untanda'a' inde tau umpogau' pelahangam daka, kakadakeam daka, sipäto' la kutahima pa'pahapa'mua'. ¹⁵Sapo' maka' inde ussipengka-pengkaia' anggam tula' bäbä, sanga haka, battu haka ke deennia' kabiasaammu ussala, iya papuha illaammia' iko duka' alla'-alla'mu. Takao la uhhotto'i aka tä' kuaku kuuhu' susinna." ¹⁶Sampe nahambai illaam mai indo ongeam si diongei ungkattu kaha-kaha. ¹⁷Iya le'ba'im indo tau ullebo Sostenes kapala pa'sambajanganna to Yahudi anna nasidänggu'-dänggu'i dio olona indo to si mahhotto', sapo' tä' napaalai mata Galio.

Ma'pasule Paulus lako Antiokhia

18:18-23

¹⁸Puhai ia too, masäe-säepi tohho Paulus dio Korintus mane umpellei indo ingganna to matappa' ma'kappala' lako Siria sola Priskila anna Akwila. Sulei lako Kengkrea ma'gontimmi situhu' peadasanna to Yahudi aka deem samajanna dio olona Puang Allataala. ¹⁹⁻²¹Landa'i lako Efesus le'ba'um Paulus tama pa'sambajanganna to Yahudi anna ussitimpä-timpäi indo Kaheba Katilallasam sola to Yahudi. Iya sikanapelaum indo to Yahudi anna

mala masäe-säepi tohho Paulus dio. Sapo' mokapi lambi' naua: "Päbäipä' le'ba'. Sule pole hämä' ke nauai Debata." Iya mengkalao siam umpellei to Efesus sapo' umpatohhom Priskila anna Akwila. ²²Sulei lako Kaisarea le'ba'um längäm Yerusalem umpessitai ingganna to matappa' mane tahhu' dokkoi Antiokhia.

²³Tappana masäe-säe dio, iya mengkalao oom muola lako lembäna Galatia anna Frigia ullelei ingganna to matappa' napakatoto'.

Dio yolo Efesus Apolos mane le'ba'i lako Korintus dio Akhaya

18:24-28

²⁴Wattu eta too sulem mesa to Yahudi dio Efesus isanga Apolos to buttu dio mai Aleksandria. Mesa duka' to manähä ma'tula' anna to muissam si'da-si'da issinna Battakada Debata. ²⁵Aka puham dipa'guhu manappa diona Puang Yesus. Tä' mali-malisam ma'tula' anna manäntä umpepa'guhuam diona Puang Yesus, moi anna mane angga pantedosanna Yohanes naissam. ²⁶Sola ponno kabahaniem napahandu' ma'pa'guhu tama pa'sambajanganna to Yahudi. Sapo' tappana nahingngi Priskila sola Akwila, nababaim lako banuanna anna napomasiäsam manappai diona lalanna Puang Allataala.

²⁷Tappana maelo' mengkalao Apolos lako Akhaya, iya umpa'pakatuammi suha' ingganna indo to matappa' dio Efesus aka naua anna mala untahima manappa Apolos ingganna indo to matappa' dio. Sulei lako, tä' deem pada sakasalle gunana lako ingganna tau to puha matappa' aka pa'kamasena Debata. ²⁸Aka tä' deem moho' penabanna umbaho to Yahudi dio olona tau buda umpomasiä' anna umpomakaleso issinna Battakada Debata naua: "Puang Yesus-um too indo To puha dilanti' la mepasalama'."

Paulus dio Efesus

19:1-10

19 Mahassampi ia dio Korintus Apolos, iya nasambam ia Paulus naola ingganna tondä' tipatanetena illaam lembäna Frigia anna Galatia sampe landa' lako Efesus. Iya nalambi'um dio sanaka-naka to matappa'. ²Iya nakutanaim Paulus naua: "Deemmokoka' untahima Penaba Maseho tappana matappa'koa?" Sikanatimba'im naua: "Tä'pi, aka moi ditula' tadeempi kihingngi indo diuam Penaba Maseho." ³Iya nauam Paulus: "Maka' susi, pantedosam aka puha ditedosangkoa?" Natimba'um naua: "Pantedosanna Yohanes." ⁴Iya ma'tula'um Paulus naua: "Indo pantedosanna Yohanes anggam dipotanda diua unti hokongammi gau'na indo to ditedo'. Si naua Yohanes lako tau buda: 'Pahallukoa' matappa' lako to la sule ibundingku,' aka iam too Puang Yesus." ⁵Tappana uhhingngi tula' ia too, iya umbeho siaham kalena ditedo' sola sanganna Puang Yesus. ⁶Mahasanni naanda'i Paulus tappa napentamai siaham Penaba Maseho napolalam sangngim manähä pole' umpake ma'hupa-hupa basa napalosa iam Penaba Maseho anna manähä umpalombum kada Debata. ⁷Tau ia too sapulo dua ia asanna.

⁸Tallu bulam naolaam tama pa'sambajanganna to Yahudi Paulus anna ma'tula'i sola ponno kabahaniam. Si ussitimpä-timpäi pepa'guhuam diona Puang Yesus sola to Yahudi aka napeä lalanna umba-umba aka indo tau dio unkatappa'i diona kapahentaanna Puang Allataala. ⁹Sapo' deem duka' sanaka-naka tau tontä makahha' penaba, moka unkatappa'i kaheba ia too. Napolalam mandi natelle illaam alla'na tau buda indo Lalam Kasalamasam illaam Puang Yesus.

Iam nasuhum ussähä'i kalena Paulus sola ingganna to matappa' umpellei tau buda lu lako tambim passikolaam Tiranus. Iya etam pole' naongei Paulus sola to matappa' allo-allo ussitimpä-timpäi kaha-kaha mendiada'. ¹⁰Dua taum naolaam Paulus ma'pateem liu lambi' ingganna issinna propinsi Asia nahingngi asam pepa'guhuanna diona Puang Yesus, susi to Yahudi teem taianna to Yahudi.

Änä'na Skewa

19:11-20

¹¹Buda tanda memängä-mängä napadadi Puang Allataala nakähä Paulus, ¹²lambi' buda tau si muala saputangam battu haka sampim senga' indo balinna napake Paulus nababaam to masakinna. Iya mala tappa bono' indo to masaki anna messubum setam illaam mai kalena.

¹³Indo eta too deem sanaka-naka to Yahudi si ma'issam-issam ma'lao-lao ullelei duka' botto, si uhhambai duka' lao setam illaam mai kalena tau. Iya si nasändä'um duka' napalako sola sanganna Puang Yesus. Si naua lako indo setam: "Kuhambaiko sola sanganna Yesus indo to si natula' Paulus." ¹⁴Iya deem duka' pitu to ma'solasubum, änä'na mesa kapala sandona to Yahudi isanga Skewa, si lao ma'pateem. ¹⁵Sapo' natimba'i mandi indo setam illaam mai indo tau naua: "Yesus sola Paulus bassim kuissam, sapo' ikoa', mennakoka' tiko? Aka iko kuasammu?" ¹⁶Napolalam indo to napentamai setam uh-hopäi anna umbobo'i pada indo to ma'solasubum, iya natalo asam lambi' kumondäi lao ma'kambelä bäbä anna basa-basa kalena.

¹⁷Kaha-kaha ia too napekaheba asam ingganna tau illaam Efesus, susi to Yahudi teem taianna to Yahudi napolalam mahea' asam tau. Iya etam pole'

tuttuam dipa'kasallei sanganna Puang Yesus. ¹⁸Buda to matappa' eta too sule dio olona tau buda muakui pole' ingganna indo gau' salanna lessu'-lessu'na. ¹⁹Susi toi lako buda to si ma'issam-issam uhhempum asam suha'na anna natunui dio olona tau buda. Iya dihekem allinna indo ingganna suha' ditunu kiha-kiha lima pulo sa'bu doi' peha'.[§] ²⁰Napolalam pole' napahandu' eta too tiballa' kalua' Battakada Debata illaam botto ia too anna tuttuam buda tau tigaha' aka tandaam tongam kuasaanna Puang Allataala.

**Demetrius umpakende'
kahusam dio Efesus**

19:21-41

²¹Tappana puha dadi ingganna kaha-kaha ia too, ma'pattujum Paulus la le'ba' längäm Yerusalem muola lako Makedonia anna Akhaya. Aka naua: “Puhai too kuola ingganna botto ia too la pahallupä' duka' lao lako Roma.” ²²Iya ussuam dua änä'-änä'na isanga Timotius sola Erastus mendiolo lako Makedonia aka la tohhopi ia masäe-säe dio Asia.

²³Umbai' la etam too anna kende'i kahusam kasalle illaam Efesus diona Lalanna Puang Yesus. ²⁴Aka wattu eta too deem dio Efesus mesa tau isanga Demetrius mesa pa'tampa peha', si umpapia banua-nua peha' angga' ongeam pehumalasam lako debata baine Artemis. Illaam pengkähängam ia too buda tau napake. Ingganna pa'tampa peha' eta too tä' deem pada sabuda pallolonganna. ²⁵Iam too anna untambaim ingganna solana pa'tampa peha' sola mentu' to mengkähäna ma'hempum. Tihempum asanni, iya ma'tula'um Demetrius naua: “Inggannakoa' solasubungku,

tasi'dimmia' pada-pada umba susi kamasannangantaa' illaam inde pengkähänganta aka buda pallolongantaa'. ²⁶Sapo' tentomai tahingnginna' anna taita diona pepa'guhuam napalao Paulus. Uhhuntu' anna umpabulim buda tau susi inde Efesus teem illaam lili'na propinsi Asia, aka si naua: ‘Indo panggahaga limanna hupatau tä' mala dipa'debatai.’ ²⁷Dadi dako'i too inde pengkähängantaa' la mendadi petabaam tau, anna sulibanna ia too indo ongeam pehumalasanta lako debata Artemis to tapa'kasalleia' la bambannam dipa'pa'dei. Susi toi kalena Artemis to napenombai ingganna to Asia anna mentu' lino, la dadi matuna.”

²⁸Tappana nahingngi solana Demetrius tula' ia too, iya sangngim hede-hede aha'na lambi' sikaoli naua: “Matande Artemis, debatantaa' inde Efesus!” ²⁹Nasuhum kende' pole' indo kahusam kasalle anna mellala' illaam kota ia too sampe umpamesa kalena indo to keaha' anna uhhui'i Gayus sola Aristarkhus tama ongeam pa'hempungam, indo bassim to Makedonia, solana Paulus. ³⁰Mohäe Paulus la mentama alla'na indo tau buda sapo' tä' napäbäi ingganna to matappa'. ³¹Susi duka' sanaka-naka to kasalle issanganna Paulus illaam propinsi Asia mepasam naua: “Tä' sugali'-gali' too la tamako indo ongeam pa'hempunganna tau buda.”

³²Ingganna to ma'hempum illaam indo ongeam pa'hempungam ma'ahhe-ahhe sikaoli sanda-sanda tanaua. Tuttuam mahusa' pa'hempungam ia too anna buda tanaissam aka indo napa'hempunni. ³³Pissananna deem mesa to Yahudi isanga Aleksander uhhingngi katähängam dio mai buda

§19:19 lima pulo sa'bu doi' peha': tandana buda allinna indo suha', iya mesa doi' peha' si sangngallo nasaho mesa tau.

tau diona kadadiah ia too. Nabussum solana to Yahudi lako olona tau buda anna mala ma'tula'. Iya muäkä'um limanna umpopengkamma' tau buda aka maelo' battuam la ma'tula' naua: "Taia solaki inde to sule umbaba pepa'guhuam bakahu." ³⁴ Sapo' tappana naita indo tau buda to Yahudi hia, iya sikaoli siaham anna pada-pada naua: "Matande Artemis debatantaa' inde Efesus!" Umbai' deem dua tette' naolaam sikaoli napa'sule-sulei tula' ia too.

³⁵ Tappa ke'de' siaham to unkgona indo kota muappa tau buda mane nauai: "O to Efesus, tä' deem tau illaam inde lino la tä' muissanni naua Efesus ongeanna to unjagai susi ongeam pehumalasang lako debata Artemis to dipomatande, teem duka' tau-taunna to honno' yabo mai langi'. ³⁶ Aka kaha-kaha ia too tä' mala la dibahoi. Dadi la malinokoa' anna tä'koa' la ma'palako sihha' umpogau' mesa kaha-kaha, ³⁷ anu' balingkoa' umbaba inde to dua solana Paulus sule eta inde, moi anna tä'i deem unkgadakei ongeam pehumalasang, anna tä' deem untelle debatanta. ³⁸ Dadi maka' deem kaha-kahana Demetrius sola ingganna sababanganna lako inde tau, babai lako ongeam si diongei unkgattu kaha-kaha. Aka deem dia to si uhhotto' kaha-kaha, dadi pahallukoa' lako umbaba kaha-kahamu tessoladua. ³⁹ Anna maka' deempi pattuju penabammua', mala umbaba tama handangam pudu'na pa'botto anna dipapuha illaanni. ⁴⁰ Aka inde tentomai manete tondom pisokia' too aka malakia' ditanda' la umpakende' kakadakeam illaam kota. Anu' tä' deem mannassa la mala tapengnganda'ia' aka kasuhunganna ma'hempungkia' umpadeem inde kahusasang." ⁴¹ Puhai

ma'tula' indo to unkgona indo kota, iya ussuam ingganna indo tau le'ba'.

Paulus lako Makedonia anna Yunani

20:1-6

20 Tappana malino sule to Efesus, iya uhhempummi ingganna to matappa' Paulus dio anna nabeenni kada pepanännä' anna mala tuttuam matoto' anna tigaha' liu. Puhai, iya ma'pasaha'um Paulus, aka la le'ba'um lako Makedonia. ² Landa'i lako, iya ullelei asammi tondä' illaam pa'lembängam ia too anna si nabeem liu kada pepakatoto' lako ingganna to matappa' dio. Puhai ia too, iya tahhu'um lako Yunani. ³ Tallu bulanni dio Yunani, iya mohäem Paulus la ma'kappala' battuam lambam libam Siria. Sapo' pissananna naissam deem dia pattujunna to Yahudi eta, maelo' la umpatei Paulus. Nasuhum naeli' pattujunna la naola lako ohi sule Makedonia. ⁴ Iya sola-solam mengkalao Sopater änä'na Pirus to Berea sola Aristarkhus anna Sekundus bassim to Tesalonika, anna Gayus to Derbe anna Timotius anna duapi solana bassim to Asia, isanga Tikhikus anna Trofimus. ⁵ Sapo' mendioloim ia ma'kappala' lako Troas aka la naampai diokam.** ⁶ Iya lessu' dam allo kasalle Hoti Tä' Diboloi Bibi' Hoti mane längängkam kappala' dio Filipi. Lima benginna mane malakam landa' lako Troas, iya eta ham mane silambi'-lambi'kam indo solaki to mendiolo. Iya tohhopakam pitu benginna eta too.

Paulus dio Troas

20:7-12

⁷ Indo benginna allo Minggu ma'mesakam dio mesa ongeam umpiä'-piä' hoti. Iya ma'tula'-tula' oom

**20:5 Wattu eta too sola Lukas to untuli'i inde suha'.

Paulus sola ingganna to matappa' dio Troas, aka ma'pattuju oom la mengkalao ke masiäi. Masäe ma'tula' aka sule lako tängä bengi. ⁸Indo yabo lotem diongei ma'mesa buda lampu dipalekke'. ⁹Sapo' deem mesa änä' muane muokko' yabo ia suleba', isanga Eutikhus. Nataloim matanna aka masäe sugali' ma'tula' Paulus, toko mamma' bábäm ia. Iya pissananna tau kilala, melläppä' ia dokko litä' metobä mengkalao yabo indo katadam katalunna banua. Le'ba' dilomba sapo' tä'um dilambi' dikutanai. ¹⁰Iya tuhum siaham Paulus nalomba anna nahopäi dokko indo to mate anna nakalapu'i mane ma'kadai naua: "Daa ummanangгаа' aka illaampi penaba." ¹¹Anna mane längäm sule indo tambim Paulus umpiä'-piä'um hoti nataba anna naandei pada-pada. Puhai mangngande napalaona oom ma'tula'-tula'. Iya tibukka'na baja mengkalaongkam. ¹²Le'ba' siaham duka' indo to ma'hempum muanta' indo to metobä lako banuanna aka nabelam. Iya sangngim losso' inabanna aka ussi'dim pepakahangam kasalle.

Buttu dio mai Troas lu lako Miletus

20:13-16

¹³Iya mendiolongkam kami' le'ba' mane längängkam kappala' lu lako Asos. La diopi mane solakam ma'kappala' aka lumingka ia mangngola galantangam situhu' pattujunna. ¹⁴Tappana silambi'kam Paulus dio Asos kipsalam pole' längäm indo kappala', iya solangkam tahhu' lako Metilene. ¹⁵Mengkalao dio Metilene tahhu' liu kappala'ki, iya masiänai sitingngajongkam mesa leutam isanga Khios. Masiä polei landa'ungkam lako Samos, iya sangngallo polepakam ma'kappala' mane landa'kam lako Miletus. ¹⁶Puham nakattu Paulus tä'um la lempä lako Efesus indana masäe

sugali'i tohho dio Asia. Aka ma'lomba liu la lako Yerusalem anna mala diom ke lambi'um allo kasalle Pentakosta.

Kada pepakatoto'na Paulus lako pebaba ada'na to Efesus dio Miletus

20:17-38

¹⁷Iam too anna tappana dio Miletus ussuam tau Paulus lako Efesus untambai ingganna pebaba ada' illaam jumaa' dio sule untammui. ¹⁸Iya tappana sulei indo to napesuai napa'tula'im Paulus naua: "Puhanna' muita indo lessu' kuaka susi ma'palako illaam alla'-alla'mua', mengkalao dio allo pa'pahandusanna suleä' inde Asia. ¹⁹Sola kamahempoam penaba, mengkasabua'ä' lako Debata sitonda uwai mata muita sussana hupatau anna ussi'dinnä' ma'hupa-hupa kamasussaam napobua' pattujunna to Yahudi lako kaleku. ²⁰Muissam toia' duka' muua tä'ä' mahea' umpa'tulasangkoa' indo la kegunanna tama kalemua'. Sapo' kupa'guhukoa' susi dio olona tau buda teem illaam pa'hempungam lako banuammua'. ²¹Kupalao liu kada pepanännä' anna pepakilalaam lako ingganna to Yahudi anna taianna to Yahudi umba ke malai untihokongam ingganna dosana anna tinanda lakoi Puang Allataala sitonda kamatappasam lako Debatanta Yesus Kristus.

²²Sapo' tentomai nadakka' bata' ulungku Penaba Maseho nahendennä' lako Yerusalem anna tä' kuissam aka la dadi lako kaleku ke diomä', ²³sulibanna indo puha napalosaiä' illaam si mesa-mesa kota to puha kuolai naua: 'Pandahhaam anna tahungkum iko muampaiko.' ²⁴Sapo' moi anna susi, tä' ia deem kupikki' diona kaleku moi la saidi'um. Assala'na hia mala kupasuppi' manappa inde pengkähängam puha napapassanniä' Puang Yesus la

umpa'pakahebaam Kaheba Katilallasam diona pa'kamasena Puang Allataala.

²⁵Puhangkoa' kuola umpa'pakahebaam kapahentaanna Puang Allataala. Anna tentomai kutulasangkoa' matim aka kuissammi kuua anggannam to inde siitakia'. ²⁶Iam too anna pahallum kunännä'koa' anna kupakilala allo temo kuua, yaboä' too tanahambui dioä' tanato'doi ke deengkoa' tä' ullambi' kasalamasam. ²⁷Aka tä' deem lembeä' anna tä' malaja' untulasangkoa' ingganna pa'elo'na Puang Allataala tama kalemua'. ²⁸Dadi jagai manappakoa' kalemua, anna kambi' manappaia' ingganna dombana. Aka ikonna' too to bali natuho Penaba Maseho mendadi to ma'kambi' la unjagai jumaa'na Puang Allataala, indo to puha naalli sola haha titollona Änä'na. ²⁹Aka puha kuissam kuua lessu'ä' too la napentama alla'ikoa' to kadake gau' uhusa' jumaa' sihhapam olo'-olo' to peande usseham ke'de' pa'kambi'mua'. ³⁰Anna la kende' illaam siam liu mai alla'-alla'mua' to la umbaba pepa'guhuam sala la maelo' uhhuntu' to matappa' umpellei dalam kamaloloam anna natuhu'i lako dalam kakadakeanna. ³¹Iam too anna la majaga si'da-si'dangkoa'. Pengkilalaia', tallu taum too kuolaam tä' deem tohho allo bengi sitonda uwai mata unnännä' si mesa-mesakoa'.

³²Anna inde temo kubehokoa' lako Puang Allataala. Anna la muanda'i liua' Battakadanna Debata indo to umpomakalesoangkoa' diona indo pa'kamasena. Aka ia kuasa la umpakatoto'koa' illaam kapeimangam anna la umbeengkoa' mana' pa'tamba'na Puang Allataala indo inna puha natandaiam lako ingganna umma'na to puham nasehoi. ³³Tä' mammipi too

deem la kende' illaam penabangku mailu anna matinna lako kullena tau senga', peha'na haka, bulabanna haka, battu haka pohebana. ³⁴Aka muitanna' kuaka susi muasai pala'ku mengkähä anna malaä' umpatubo kaleku sola ingganna sababanganku to si kupasola lelem. ³⁵Puhangkoa' kupaitai tandengam illaam mentu'na kaha-kaha diaka susi mengkähä manappa, aka la pahallukia' umpamoloi to kakuhängam. Aka la taanda'i liua' indo tula'na Puang Yesus, ma'kale muuai: 'Kehongko' puha ia to ma'pebeem anna la to dibeem.'"

³⁶Tappana teppu' tula'na Paulus, iya ma'balinguntu' asammi anna pada-pada' ma'sambajam. ³⁷Iya sisahho-sahhoammi indo eta too ussikalapu'-lapu'i Paulus napasindum nasiudum-udunni. ³⁸Sangngim manabo inabanna la'bi-la'binna aka nauaam Paulus: "Anggantanna' la siita." Iya le'ba'im naanta' sule lako kappala'.

Katampasannam Paulus lako Yerusalem

21:1-16

21 Tappana sisähä'-sähä'kam^{††} iya ma'kappala'ungkam tahhu' lu lako Kos. Iya masiä pole ham mane sulekam lako Rodos. Mengkalaongkam eta, tahhu'kam lako Patara. ²Sulekam lako Patara siampu' duka' deem kappala' la mengkalao lako Fenisia. Längämmakam indo kappala', iya mengkalao siaham. ³Pissananna diitam Siprus dio tandai kaihi sapo' dipengkulio'i tahhu' lako Siria. Iya landa'kam lako Tirus tohhom indo kappala' kiongei aka eta la dipatuhum ingganna baham-baham nababa. ⁴Tohhopakam eta saminggu, iya le'ba'ungkam umpellambi'i ingganna to matappa' dio. Anna situhu'

^{††}21:1 Wattu eta too sola Lukas to untuli'i inde suha'.

pa'palosainna Penaba Maseho lako to matappa' eta, ma'pakahi'di lako Paulus naua: “Dotam tä'ko lako Yerusalem.”⁵ Sapo' tappana teppu' wattunna tohhokam dio, iya kipatahhu' oom pa'laoangki. Le'ba'i naanta'kam to matappa' eta too sola bainena anna änä'na messubum illaam mai kota. Tappana kilambi' bihim le'bo', iya pada-padangkam ma'balinguntu' anna ma'sambajangkanni. ⁶Puhakam ma'sambajam, iya sisähä'-sähä'ungkam. Längämakam kami' kappala' anna ma'pasulei ia lako banuanna si mesa-mesa.

⁷Mengkalaokam dio Tirus kipatahhu' oom pa'laoangki sule lako Ptolemis. Silambi'ungkam duka' ingganna to matappa' dio, iya sisalama'-lama'ungkam anna tohhopakam eta sabengi. ⁸Makale'na mengkalao ongam tahhu' lako Kaisarea. Iya sulekam lako, melolo lakokam banuanna Filipus mesa duka' to si umbebehäm Kaheba Katilallasam anna mentama bilangam to pitu indo to dipilei si untaba kinande dio Yerusalem. Iya etam kiongei tohho. ⁹Indo Filipus appa' änä'na, änä' daha asam, sangngim nabi aka si umpalombum kada Debata.

¹⁰Mane sanaka-naka benginna etakam, iya deemmi sule mesa nabi buttu yabo mai Yudea isanga Agabus. ¹¹Tappa napellambi'ikam anna mualai beke'na Paulus anna umpungoi kalena, susi limanna teem bitti'na anna nauai: “Susim too situhu' kadanna Penaba Maseho naua: ‘La dipateemmi too inde puäna inde beke', la napungo to Yahudi yabo Yerusalem aka la nabeho tama pala' limanna taianna to Yahudi.’”

¹²Tappana kihingngi tula' ia too, pada-padakam sola to matappa' dio melau lako Paulus anna tä'i lao längäm Yerusalem. ¹³Sapo' natimba' Paulus naua: “Daa ussahhoa' aka indana

umpomanabokoa' penabangku. Aka kao ahu'mä' untahimai, tä' la angga mandi dipungo, moi matemä' duka' dio Yerusalem aka sanganna Debatanta Puang Yesus.”¹⁴ Sapo' aka tä' nabollim tula'ki, iya mengkatalokam angga ham kiuu: “Iai too pa'elo'na Debata iam dadi.”

¹⁵Tappana lessu' sanaka-naka benginna kiolaam tohho dio Kaisarea, iya ma'kalili'ungkam mengkalao la lako Yerusalem. ¹⁶Napasolakam sanaka-naka to matappa' dio Kaisarea. Naanta'kam lako banuanna mesa tau isanga Manason to Siprus. Masäem duka' mendadi to matappa'. Iya tohho diongam banuanna.

Paulus umpellambi'i Yakobus dio Yerusalem

21:17-26

¹⁷Tappana sulekam längäm Yerusalem, iya tä' deem pada satilalla' ingganna to matappa' yabo sule natammuikam. ¹⁸Iya makale'i, le'ba'ungkam sola Paulus umpellambi'i Yakobus. Sulekam lako, iya dio asammi duka' heem pebaba ada' kilambi'. ¹⁹Nasalama'i asammi Paulus anna mane natula' nalise-lisesanni indo ingganna kaha-kaha puha napadadi Puang Allataala lako tau taianna to Yahudi anna mala ullambi' kasalamasam kahana pengkähänganna Paulus.

²⁰Tappana uhhingngi tula'na Paulus sangngim umpa'kasallei Puang Allataala anna mane umpa'tula'i Paulus naua: “O solasubungki, massa'bu-sa'bu duka' to Yahudi inde unkatappa'i Puang Yesus anna sangngim bassa' illaam ungkambi' kada Pepaondonganna Musa. ²¹Sapo' napekaheba to inde Yerusalem diona pepa'guhuam umbeem to Yahudi lako botto senga' si muua: ‘Tä'koa' la untuhu'i Pepaondonganna Musa.’ Aka umpa'guhuko tau tä' la ussunna' änä'-

änä'na anna tä' la untuhu' kabiasaanna to Yahudi. ²²Dadi la taakaa' susi temo? Anu' la naissammi too inde kasuleammu. ²³Dadi illaam kaha-kaha ia too deem inde tula'ki la umpehingngii anna umpogau', aka deem appa' solaki inde puha ma'samaja. ²⁴Dadi iam la umpasola umpasule lako samaja ia too anna malakoa' maseho. Sapo' iko la umpendudunni ingganna kapahalluam illaam pa'palakoam ia too, anna mala silele unkgällu'i asam beluä'na. Aka la etam too pole' naongei tandaam tä' tappa' indo kaheba nahingngi to Yahudi inde. Aka tontäko iko duka' muanda'i kada Pepaondonganna Musa. ²⁵Anna susinna lu lako taianna to Yahudi to unkgatappa'im duka' Puang Yesus, balim kipakatu suha' diona kattuantaa' tä' la muande ingganna kinande puha dipehumalasang lako debata senga', tä' la muande haha anna balena olo'-olo' mate ditekke, anna tä' la ma'gau' sessu'."

²⁶Masiäi, napasolam Paulus indo to appa' umpalako situhu' kabiasaam ussehohi kalena. Puhai, tamaim Banua Debata la umpa'paissangam wattunna la mala diangga' maseho, anna wattunna la dipalako pemala'na si mesa-mesa.

Disakka Paulus illaam Banua Debata 21:27-36

²⁷Tappana la suppi' pitu benginna wattu pa'pomasehoam, deem sanakanaka to Yahudi to buttu dio mai Asia muita Paulus illaam pa'hanteanna Banua Debata. Iya silelem naägä'i umpakeaha' tau buda solana to Yahudi anna mane ussakka Paulus. ²⁸Sikaoli naua: "O inggannakoa' to Israel, pamoloikam kami! Aka iam too inde to si lao ullelei botto umpa'guhu tau la umbalikia' anna umbali-bali kada Pepaondonganna Musa anna susi toi lako inde ongeam taongeia'. Anna deemmi umpasola sule to Yunani tama Banua Debata ussahupu'i inde

ongeam maseho." ²⁹Aka puham muita Trofimus to Efesus sola Paulus illaam kota, dadi nasanga napasola tama Banua Debata.

³⁰Iya tiguhihi' siaham ingganna tau illaam Yerusalemm sule ma'silullu' ullebo Paulus nasakka anna nahui'i illaam mai Banua Debata. Iya ditutu'i asam siaham ba'bana balana Banua Debata eta too. ³¹Mane mahassam ma'pattuju la umpatei Paulus, iya landa' siaham duka' kaheba lako pangngulunna sohodadu kahajaam Roma naua mahamba asam issinna Yerusalemm. ³²Nalambi'na kaheba, mengkalao siaham indo pangngulunna sohodadu sola sanaka-naka saba-banganna umpasola sohodadunna le'ba' lako indo ongeam naongei tau buda. Naitanna indo tau buda sule sohodadu, iya mondai siaham untappai lima Paulus.

³³Sulena lako indo pangngulunna sohodadu tappa umpellambi'i Paulus anna naanda'i. Mane ussuai sohodadunna nahante bassii, dua indo hante bassi anna napekutanaanni naua: "Menna inde tau? Aka napogau'?" ³⁴Sapo' aka heppe' bäbä mentimba' sikaoli sanda-sanda tanaua, dadi tä' deem ma'lesoam nahingngi indo pangngulunna sohodadu aka setonganna dadi. Napolalam napasuaam dibaba Paulus lako ongeam sohodadu. ³⁵Tappana dilambi' eham, iya sibussumbussum bäbä indo tau buda umpa'dallo'i Paulus nasuhum nasiapum-apunni sohodadu naäkä'. ³⁶Iya massahussum liu siam indo tau buda napasindum sikaoli naua: "Pateia!"

Napelau Paulus la ma'tula' 21:37-40

³⁷Tappana la tama ba'bana indo ongeam sohodadu Paulus, iya ma'kadam lako indo pangngulunna sohodadu naua: "Mala haka kupa'tula'iko, aka deem mohäe la kutula' matim." Iya natimba'um

naua: “Aka muissam ma'basa Yunani le! ³⁸Dadi taiako indo to Mesir puha umpasola appa' sa'bu tau to salle in-aba lako pohiallasam aka la umbali to ma'pahenta?”

³⁹Iya natimba'im Paulus naua: “To Yahudiä' dadi dioä' Tarsus, mesa kota kesanga dio Kilikia. Kupelau kela mala anna dipäbäiä' ma'tula' lako inde tau buda.”

⁴⁰Napatiolai indo pangngulunna sohodadu. Iya ke'de'um Paulus yabo eham anna muäkä'i limanna umpopengkamma' tau buda.

Tula'na Paulus lako to Yahudi

21:40–22:22

Tappana hapai naita, iya ma'tula'um ma'basa Ibrani naua:

22 “O inggannakoa' solasubungku anna mentu'na tomatua, pehingngiia' inde tula' la kupalanda' tama alla'-alla'mua' tentomai aka la mendadi kamakalesoanna diona kaleku.” ²Tappana nahingngi indo tau buda ma'tula' Paulus ma'basa Ibrani, iya tuttuam mattam pole'.

Ma'kadam Paulus naua: ³“Kao to Yahudiä', dadi dioä' Tarsus lembäna Kilikia. Sapo' lobo' indeä' Yerusalem dipanännä'ä' illaam pepa'guhuanna tuanguhu Gamaliel situhu' hettenna nene to taponene. Napolalam dadiä' duka' mesa to handam bassa' illaam pengkähänganna Puang Allataala susi umpogau'a' tentomai. ⁴Anna baliä' duka' undahha buda tau to untuhu' Lalanna Puang Yesus lambi' mate, susi muane teem baine kusakka anna kupopetahungkuni. ⁵Diona kaha-kaha ia too sando too' sola ingganna To Mahhotto' mala mendadi sa'bi. Aka ia umbeennä' indo suha' pahenta kubaba lao umpellambi'i battuam pebaba ada' dio Damsyik. Aka la kusakka ingganna

pentuhu'na Puang Yesus kubaba sule inde Yerusalem aka la didahha.

⁶Sapo' tappana illaannä' pangngola-lalangam katängäanna allo la umpenandai Damsyik, pissananna pangkähhä mesilo yabo mai langi' umpali'ä'. ⁷Iya tissämbä' siahämä' dokko litä' anna kuhingngi kamaha ma'kada naua: ‘Saulus, O Saulus, aka kasuhunganna anna undahhä?’

⁸Kutimba'um kuua: ‘Aka mennako Debata?’ Nauaammä': ‘Kaom too inde Puang Yesus to Nazaret to undahha.’ ⁹Indo to kupasola naita duka' pangkäh-häna, sapo' tä' ia naissam napekalem-basam indo kamahanna to umpa'tula'ia'.

¹⁰Iya ma'kadama' kuua: ‘O Debata, aka la sipäto'na kupogau?’ Iya nauaammä': ‘Bangommoko anna laoko lako Damsyik. Diopa mane dipaissanniko ingganna indo puha nääto' Puang Allataala la unghähä.’ ¹¹Sapo' wattu eta too, tä'um landa' kuita napobua' passilona indo pangkähhä kuita eta too. Dadi natetteä' pole' solaku tahhu' lako Damsyik.

¹²Dioi Damsyik, deem mesa tau isanga Ananias, mesa duka' to meada' anna to meimam manuhu' muanda'i ingganna Pepaondonganna Musa. Anna napa'kasallei ingganna to Yahudi illaam kota ia too. ¹³Sule dio oloku anna ma'kadai naua: ‘O solasubungku Saulus, paitako sule!’ Iya paita siahämä' sule anna tappa ia kuita.

¹⁴Mane ma'kada polei naua: ‘Puang Allataala to napenombai nene to taponene puha untuhoko la mendadi to muissam pattujunna. Anna la muitako To Malolo anna la uhhingngi kadanna messubum illaam mai pudu'na. ¹⁵Aka la mendadiko sa'binna lako ingganna hupatau diona indo kaha-kaha puha muita anna uhhingngi. ¹⁶Dadi akapi muampai? Simpanii umbeho kalemu ditedo' anna mengkaalako längäm

Debata anna mala napa'dei ingganna dosamu.'

¹⁷Tappana suleä' sule inde Yerusalem eta too, mahassam omä' ma'sambajam illaam Banua Debata, kusi'dim dilipiä'.

¹⁸Iya kuita siahm Debata ma'kada naua: 'Pasihha'i le'ba' umpellei Yerusalem aka tä' deem tau illaam la untahima passa'biimmu diona kaleku.' ¹⁹Sapo' kutimba'i hi kuua: 'O Puang Yesus, sangngim naissam manappa tau eta inde into anna kulelei ingganna pa'sambajangam ussakka to unngkatappa'iko kupatama tahungkum anna kutembe'i. ²⁰Susi duka' indo wattunna anna dipatei Stefanus mesa sa'bimmu. Kukadioi heem anna kuakui duka' gau' ia too anna kaopi unjagai jubana ingganna to umpatei.'

²¹Sapo' ma'kada Puang Yesus naua: 'Laoko, aka la kusuako lako ongeam mambela umpellambi'i ingganna tau taiana to Yahudi.'

²²Tappana nahingngi indo tau buda tula'na Paulus naua la lako tau taianna to Yahudi, iya sikaoli ham moka umpelingngii tula'na anna nauai: 'Pateia' inde tau! Daa umpäbäia' tubo!'"

Paulus illaam ongeam sohodadu

22:23-29

²³Iya sikaolim indo tau buda napasindum umpempapisam jubana anna umpessembusam sobä' längäm lawwa. ²⁴Napolalam napa'pahentaam indo pangngulunna sohodadu la dibaba Paulus tama ongeanna sohodadu anna napesuaanni dipahessa dipasindum dihabi' anna mala diissam aka kasuhunganna anna sikaolii tau buda unngaali-alii. ²⁵Mahassanni disäke' Paulus la dihabi', iya ma'kadam lako mesa punggabana sohodadu to ke'de' dio ampe'na naua: "Situhu' daka pahentana to ma'pahenta kahajaam Roma la tappa dihabi' bäbä mesa

to Roma ke tä'pi deem dihotto' kaha-kahana?"

²⁶Nahingnginna indo punggabana sohodadu tula'na Paulus, iya le'ba' siahm umpa'tula'i pangngulunna sohodadu naua: "Akam la umpogau', anu' indo tau to Roma hia päläe?"

²⁷Tappa le'ba' indo pangngulunna sohodadu umpellambi'i Paulus nauaam: "Tula' manappai, to Roma si'dako?" Natimba' Paulus naua: "Io, to Romaä'!"

²⁸Iya nauam indo pangngulunna sohodadu: "Masuli' kao kualliam mane malaä' mendadi to Roma." Natimba' oom Paulus naua: "Abana inna to Roma kao undadiannä'."

²⁹Ingganna indo to disua la uhhabi' Paulus soho' boko' asam aka mahea'. Susi duka' indo pangngulunna sohodadu aka mane naissam di naua to Roma hia indo napesuaam dipungo.

Paulus dio olona kakalebuanna To Mahhotto'

22:30-23:11

³⁰Sapo' moi anna susi, mohäe indo pangngulunna sohodadu la umpengissanni manappai aka kasuhunganna anna napassalai to Yahudi. Iya masiäi napesuaam siahm dilappa' Paulus illaam mai tahungkum, anna untambai ma'hempum ingganna kapala sando sola To Mahhotto'na to Yahudi. Tappana tihempum, iya umpasolam Paulus illaam mai ongeanna sohodadu anna le'ba'i napopengngolo tama indo pa'hempungam.

23 Iya ulläntu'-läntu'um indo To Mahhotto'na to Yahudi Paulus anna ma'kadai naua: "O inggannakoa' solasubungku, sule lako allo temo tontäpi mahändä penabangku dio olona Puang Allataala." ²Iya ussua siahm tau sando too' Ananias to ke'de' dio ampe'na Paulus ussappaam sädäna Paulus. ³Puhai napateem ma'kadam

Paulus lako naua: “Puang Allataala ham umpabala'i inde pa'pogausammu, aka si umpa'paitaangko kalemu mato-mato to maseho. Anna muokko'ko eta inde umpahessaä' situhu' Pepaondonganna Musa, sapo' setonganna tä' di situhu' Pepaondonganna Musa indo ussuako tau ussappa sädäku.”

⁴Iya ingganna to dio heem eta too ma'kada lako naua: “Akanna untelleko sando too'na Puang Allataala?”

⁵Natimba'im Paulus naua: “O inggannakoa' solasubungku, tä' kuissam kuua sando too'. Abana deem tisuha' illaam Battakada Debata naua: ‘Daa umpassubum kada tamendiada' lako to pebabammu.’”

⁶Sapo' naissam Paulus naua inde lako To Mahhotto'na to Yahudi deem to illaam kakalebuanna Saduki anna deem to illaam kakalebuanna Parisi. Napolalam ma'kada Paulus napekasallei lako naua: “O inggannakoa' solasubungku, kao duka' to Parisiä' anna änä'nä' duka' to Parisi. Sapo' kao dihotto'ä' aka kukatappa'i kuua deem katibangonganna sule to mate.”⁷ Tappana ma'kada susi Paulus, iya kende' kasipengkaam illaam alla'-alla'na to illaam Saduki anna to illaam Parisi. Napolalam sipa'ampihingam indo to ma'hempum. ⁸Aka to illaam Saduki naua ia: “Tä' deem katibangonganna sule to mate, tä' deem malaika' anna anitu.” Sapo' nakatappa'i asam ia to illaam Parisi.

⁹Nasuhum kende' kasikallaam kasalle. Iya sanaka-naka to ullatta' Pepaondonganna Musa to mentama kakalebuanna Parisi ke'de' napasindum sikehasam naua: “Setonganna tä' deem kilambi' la kasalaanna inde tau, aka umbai' deem anitu battu haka malaika' umpa'tula'i.”¹⁰ Tuttuam dadi kasipengkaam kasalle,

iya mahea'um indo pangngulunna sohodadu aka naua ussibessui aham Paulus. Lambi' ussua sohodadunna lao muala kabahaniem Paulus tama alla'-alla'na tau buda, anna nababai lako ongeam sohodadu.

¹¹Pissananna bengi polei, iya sulem Puang Yesus ke'de'-ke'de' dio ampe'na Paulus anna napa'tula'i naua: “Pomato-hoi penabammu, aka umba susi kabahaniem illaam inde Yerusalem ussa'bii diona kaleku, la susim too duka' la le'ba'ko mendadi sa'bingku lako Roma.”

Ungkalebui tula' to Yahudi la umpatei Paulus

23:12-22

¹²⁻¹³Iya tappana masiä, la'bi appa'pulo to Yahudi ma'mesa unkkalebui tula' anna ma'pindai naua: “Tä' tau deem la mangngande battu muihu' ke tä'pi tau bali umpatei Paulus.”¹⁴ Mane le'ba'i umpellambi'i ingganna kapala sando anna matua ulunna to Yahudi nauaam: “Puhangkam unkkalebui tula' anna kipa'pindai kiua: ‘Tä' tau deem la mangngande anna muihu' ke tä'pi tau bali umpatei Paulus.’”¹⁵ Dadi pa'mesakoa' ingganna To Mahhotto' anna muuaannia' pangngulunna sohodadu la umpopengngolo pole Paulus tama pa'hempungammua', mato-mato la dipengkalesoi pole kaha-kahana anna mala kiabunni tä'pi landa' tama pa'hempungammua' anna kipateim.”

¹⁶Sapo' nahingngi änä' uhena Paulus änä'na solasubunna baine naua la diabunni, iya le'ba'um lako ongeanna sohodadu anna natulasanni Paulus.

¹⁷Lambi' untambai mesa punggabana sohodadu Paulus anna nauaanni: “Pasolai inde tau lako pangngulunna soho-

dadu aka deem pahallu la natulasam.”¹⁸ Iya le'ba'um napasola lako. Tappana silambi', iya nauaammi: “Natambaia' Paulus indo to ditähäm naua: 'Laoko pasolai inde tau umpellambi'i panggulunna sohodadu aka deem pahallu la natulasam.’”

¹⁹ Iya natettem lako sa'dena ongeam sohodadu anna nakutanai naua: “Aka la untulasannä?” ²⁰ Natimba'im naua: “Buda to Yahudi ungkalebui tula' la napelauko anna mala umpopengngolo pole Paulus makale' lako ingganna To Mahhotto', mato-mato la dipengkalesoi pole kaha-kahana. ²¹ Sapo' tä' la umpatiolai aka la'bi appa' pulo tau manggabum la umpatei Paulus. Aka balim ungkalebui tula' anna ma'pindai naua: ‘Tä' tau deem la manggande battu muihu' ke tä'pi tau bali umpatei Paulus.’ Angga ham naampai kattuammu.”

²² Iya nasuam indo panggulunna sohodadu ma'pasule sapo' nauaam: “Anggam ia, aka tä' si'da'-si'da la mala untulasam moi la menna la muua: ‘Deem lao kutulasam pattuju ia too.’”

Dieli' Paulus lako Kaisarea

23:23-35

²³ Anna mane untambai dua punggaba sohodadu napa'tula'i naua: “Patokaia' dua hatu' sohodadu aka la lako Kaisarea kiha-kiha tette' kaseha inde bengi, la umpasolaa' pitu pulo to ma'daham anna dua hatu' to ma'doke. ²⁴ Patokanni duka' Paulus sanaka-naka daham säkeam, ammu pasola manappaia' lako gubernur Feliks.”

²⁵ Iya umpapiam suha' indo panggulunna sohodadu naua:

²⁶ “Buttu di kao Klaudius Lisias umpalanda' salama'ku lako

gubernur Feliks to kupa'kasallei. ²⁷ Inde tau nasakka to Yahudi la napatei. Sapo' wattunna la napatei, iya umpasolamä' sule sohodadu ullabai anna dilappasanni aka kuhingngi diua to Roma. ²⁸ Iya kupasolam lako kakalebuanna To Mahhotto'na to Yahudi anna mala diissam aka kasuhunganna anna ditanda'i. ²⁹ Lambi' kuissammi pole', ia anna ditanda'i aka naangga' untekkä issinna Pepsaondonganna Musa. Sapo' pada indo ditandasam tä' deem la napolalam la dipatei battu la ditahungkum. ³⁰ Anna diuaannä' deem kamesaanna to Yahudi ma'pattuju la napatei nasuhum kusua siahanni napellambi'iko. Mane kusuai ingganna to patanda' umpellambi'iko anna natulasangko aka kasuhunganna anna napateenni.”

³¹ Iya mualam Paulus indo sohodadu umbä susi dipahentaam, anna nababa bengii lako Antipatris. ³² Pissananna masiä, ingganna to ma'daham anna Paulus dipäbäim umpatahhu' pa'laoanna. Anna ma'pasulei ia to tä' ma'daham lako ongeanna sohodadu. ³³ Tappana landa' lako Kaisarea indo ingganna to ma'daham, iya umbeho siaham Paulus sola indo suha' katähängam tama pala' limanna gubernur. ³⁴ Puhai nabata indo suha' ungkutanaim Paulus naua: “Propinsi aka muongei buttu?” Nauam Paulus: “Buttu dioä' mai Kilikia.” ³⁵ Iya nauaammi: “La kupahessa kaha-kahamu ke suleim ingganna to untanda'ko.” Mane ussui Paulus lako banua kahajaam si diuaam Istana Herodes ditähäm dio.

¹⁸23:17 *Punggabana sohodadu*: umpahenta sahatu' sohodadu. *Panggulunna sohodadu* umpahenta sasa'bu sohodadu.

Tula'na Paulus lako Feliks

24:1-27

24 Tappana lima benginna, iya sulem sando too' Ananias sola sanaka-naka matua ulunna to Yahudi anna mesa to ullatta' ätoham isanga Tertulus. Umpellambi'i gubernur anna natulasanni kasuhunganna anna untanda'i Paulus. ²⁻³Iya ditambaim Paulus menggolo lako gubernur Feliks, iya napahandu'um Tertulus untula' pantanda'na naua: “Feliks to kipa'kasallei, kahana pengkähämu anna kamanähängammu lambi' tontä liukam ussi'dingam kamasannangam anna buda aka-aka tipalako napotibangom bottoki. Iya ia too moi umba ngei kiongei tontä liu kikuhhu'i sumanga'. ⁴Sapo' indana buda wattummu dilabai, kupelau anna mala sa'baha'ko säpäi' umpehingngii inde tula'ku.

⁵Mannassa inde tau mendadi hasum aka umbaba liu kahenggängam tama alla'-alla'na ingganna to Yahudi illaam inde lino. Anna mesa to pebaba illaam kakalebuanna to Nazaret. ⁶Anna deemmi nasändä' ungdakei kamasehoanna Banua Debata. Iam too kasuhunganna anna kisakkam [aka la dihotto' situhu' peadasangki. ⁷Sapo' sule pangngulunna sohodadu isanga Lisias anna naala kabahanianni dio mai pala' limangki. ⁸Mane ussuai ingganna to patanda' menggolo matim.] Maka' too umpahessa asam kaha-kaha ia too, iya la muissammi too ingganna aka-aka kitandasam.”

⁹Susi toi duka' to Yahudi nasa'bii naua: “Tappa' si'da indo tula'na Tertulus diona pa'palakoanna Paulus.”

¹⁰Iya ungdodem Paulus indo gubernur napäbäim ma'tula'. Iya ma'tula'um duka' Paulus naua: “Kuissam kuua ma'taum-taummi muolaam si uhhotto' kaha-kaha illaam inde botto.

Iam too anna losso'um inabangku aka tä' la malaja'ä' umpomakaleso kaha-kahaku dio olomu. ¹¹Mala umpengngissanni tä'pi la'bi sapulo dua benginna lessu' anna laoä' ma'sambajam längäm Yerusalem. ¹²Anna tä' deem la nalambi'ä' tau la mahassam sipengka tau battu haka la umpakende' kakadakeam, susi illaam Banua Debata teem illaam pa'sambajangam battu haka lako ongeam senga' illaam kota. ¹³Tä' toi mala napomakaleso indo natandasannä' temo. ¹⁴Sapo' setonganna kuakui matim: Kao umpenombaiä' Puang Allataala to napenombai nene to kiponene situhu' Lalanna Puang Yesus indo sikanasangai lalam sala. Anna kukatappa'ipi ingganna indo tisuha' illaam Pepaondonganna Musa sola suha'na ingganna nabi. ¹⁵Anna susi siangkam inde mai tau kukatappa'i duka' längäm Puang Allataala kuua deem katibangonganna sule to mate, susi lako to mapia gau' teem lako to kadake gau'. ¹⁶Iam too anna si kupeä lium lalanna anna mala tä' deem ma'gau' kadakeä' dio olona Puang Allataala anna dio olona padangku ma'hupatau indana deenni napolalam hosso penabangku.

¹⁷Tappana sanaka-naka taunna tä' dioä' Yerusalem, iya ma'pasulemä' lako umbaba doi' la dipamoloiam to Yahudi illaam botto litä'ku sola bua pemala'ku lako olona Puang Allataala. ¹⁸Mahassanni kupalako ia too illaam Banua Debata anna puhämä' ussehoi kaleku, iya nalambi'mä' sanaka-naka to Yahudi buttu dio mai Asia. Tä' buda tau kupa-sola anna tä' deem to bokä' wattu eta too. ¹⁹Setonganna ia hi tia la sipäto' umpellambi'iko natulasam ke deenni lalanna natanda'ä'. ²⁰Sapo' päbäi natula' inde lako to dio heem tentomai kakadakeam aka nalambi' wattunna anna napahessaä' ingganna To Mahhotto'na to Yahudi.

²¹ Battu indo hi kadangku sabatta indo anna dipahessaä' kuaa illaam alla'-alla'na: 'Dihotto'ä' allo temo aka kukat-appa' i kuaa deem katibangonganna sule to mate.'"

²² Sapo' naissam tongam-tongam Feliks diona Lalanna Puang Yesus, nasuhum napatohho salapi indo kaha-kaha aka naua: "Sulepi pangngulunna sohodadu Lisias mane kualai kattuanna inde kaha-kahamua'." ²³ Mane ussui punggabana sohodadu untähäm Paulus, sapo' tä' la napomabanda' anna tä' toi nalabai ingganna solana nabeem ingganna kapahalluanna.

²⁴ Iya sanaka amoi benginna, sulem Feliks sola bainena isanga Drusila to Yahudi. Iya umpopetambaim Paulus aka la napehingngii diona dalam kamatap-pasam lako Kristus Yesus. ²⁵ Sapo' tap-pana natula' Paulus diona kamaloloam penaba, unguasai kale, anna diona wattu la naongi ingganna hupatau muoloi pahhottosanna Puang Allataala, iya mahea' Feliks lambi' ma'kada naua: "Pada salapi too inde, laopoko sule anna battu piham opa mane kupopetambai oko." ²⁶ Sapo' setonganna napemmitai Feliks la deem doi' nabeem Paulus. Iam too anna pembudam si umpopetambai Paulus sipa'tula'.

²⁷ Tappana dua taum lessu'na, iya diäk'um Perkius Festus umbala' Feliks mendadi gubernur. Sapo' maelo' Feliks muala penabanna to Yahudi nasuhum napäbäi liupi ditahungkum Paulus.

**Tula'na Paulus dio olona
Festus napelau dihotto' dio
olona tomahaja Roma**

25:1-12

25 Tallu bengii sulena Festus illaam propinsi ia too, iya mengkalao siaham dio Kaisarea la längäm Yerusalem. ² Dioi, suleim ingganna kapala sando anna to pebaba senga'na

to Yahudi umpellambi'i Festus anna natulasanni duka' indo pantanda'na lako Paulus. ³ Anna usse'de' liu Festus umba-umba aka mala napatiolai anna ussui Paulus sule dio Yerusalem. Aka napattujum la naabunni lako dalam la napatei. ⁴ Dadi natimba' Festus naua: "Aka ditähäm dio Kaisarea anna la bale' ma'pasule siamä' dokko. ⁵ Sapo' la susi hia inde ä: Maka' la deem si'da-sia ussi'dinna' kasalaanna, iya la laokam sola to keaka'mua' dokko anna diopa mane natula'i indo ditandasam."

⁶ Battu kahua hi battu sapulo hi benginna tohho Festus yabo Yerusalem anna mane ma'pasule dokko Kaisarea. Masiäi, le'ba'um tama ongeam pahhottosam Festus aka la mahhotto'um. Iya dipopetambaim pole' Paulus. ⁷ Sulei Paulus, iya napali' tintimmi to Yahudi buttu yabo mai Yerusalem anna untula'i buda gau' kadakena Paulus sapo' abana inna tä' deem la mala napa'paitaam tanda kamakalesoanna.

⁸ Iya untula'um duka' kamaloloanna Paulus naua: "Kao-kao tä' deem untekkäi' pepaondonganna to Yahudi, tä' deem untkadakeiä' Banua Debata, anna tä' tooä' deem untekkä pahentana tomahaja Roma."

⁹ Sapo' maelo' muala penabanna to Yahudi Festus lambi' mekutana lako Paulus naua: "Dadi la muaku haka längäm Yerusalem anna kukattu yaboi inde kaha-kahamu?"

¹⁰ Sapo' natimba' Paulus naua: "Temo diomä' olona mesa to mahhotto' to nabeem kakuasaam tomahaja Roma anna tä' mala tala dikattu kaha-kahaku eta inde. Aka muissam dia tä' deem kasalaangku lako to Yahudi moi podo la pada i'di'. ¹¹ Sapo' maka' deem gau' kadakeku anna la sihatammä' dipatei, iya ahu'mä' duka' mate. Sapo' maka' tä' di tappa ingganna indo pantanda'na, iya tä' deem tau la sihatam umbehoä' tama

pala' limanna inde mai tau. Dadi kupelau matim anna dihotto' dioä' olona tomahaja Roma.”

¹²Iya sipa'tula'-tula'um indo to si napasola Festus ungkattu kaha-kaha mane ma'kadai naua: “Puham umpelau la nahotto'ko tomahaja Roma, dadi la lu lakongko tomahaja Roma.”

**Dipopengnolo Paulus lako
Agripa anna Bernike**

25:13-27

¹³Lessu'i sanaka-naka benginna, iya sulem tomahaja Agripa sola Bernike dio Kaisarea umpessitai anna ussalama'i Festus. ¹⁴Tappana sanaka-naka benginna dio, iya natulasammi Festus indo kaha-kahana Paulus lako tomahaja naua: “Setonganna deem di tia to ditähäm inde, natampe Feliks indo anna le'ba'i. ¹⁵Iya indo yaboä' Yerusalem natulasammä' ingganna kapala sando sola matua ulunna to Yahudi naua: ‘Setonganna buda punala kakadakeam napogau' indo Paulus. Kela mala anna umpassalai.’

¹⁶Sapo' kuaaam: ‘Setonganna taia kabiasaanna to ma'pahenta Roma la dipebeem bäbä mesa tau ke tä'i dipahessa yolo kasalaanna dio olona to untanda'i anna mala untula' ia duka' kamaloloanna.’ ¹⁷Iya solaingkam sule inde. Masiäna indo sulekam, tama siahämä' ongeam pahhottosam anna kupopetambai Paulus. ¹⁸Sapo' tappana ke'de'i ma'tula' indo ingganna to untanda'i, tä' punala deem la natula' gau' kadake napogau' Paulus la situhu' indo kupemmitai. ¹⁹Sapo' angga hi kuhingngi indo nasibaho-bahoi diona peadasanna anna mesa tau isanga Yesus to puha mate. Sapo' natittinni liu duka' Paulus naua: ‘Tubo hi tia sule.’ ²⁰Anna pusaä' muoloi inde kaha-kaha aka tä'

deem lalam kuita la ungkattui. Napo-lalam kuaaammi Paulus: ‘Maelo' dakoka längäm Yerusalem anna dikattu yaboi kaha-kahamu?’ ²¹Sapo' napelau la dihotto' dio olona tomahaja Roma anna ditähämpi sampe mala dihotto'. Dadi kusua ditähäm inde sampe mala dipalulako tomahaja Roma.”

²²Iya nauam tomahaja Agripa lako Festus: “Maelo'ä' ma'kale umpehingngii tula'na indo tau.” Nauam Festus: “Makale'pa umpehingngii tula'na.”

²³Makale'na, iya sulem Agripa sola Bernike tä' deem pada sadipa'kasallei kasuleanna. Le'ba'im tama indo pahhottosam sola ingganna pangngulunna sohodadu anna to diangga' illaam indo kota. Iya ussuam tau Festus lao untambai Paulus dipopengnolo. ²⁴Ma'kadam Festus naua: “O tomahaja Agripa sola inggammua' to dio heem: Petua'ia' inde tau. Iam too inde indo to puha natanda' ingganna to Yahudi, susi yabo Yerusalem teem inde Kaisarea sulei napa'pahapa'ia'. Anna sikatamba naua: ‘Daa umpäbäi liui tubo!’ ²⁵Sapo' tä' punala deem kulambi' pa'pogausanna la napolalam la mala dipatei. Anna iam umpelau la dihotto' dio olona tomahaja Roma, dadi kukattu mandam kuaa: ‘La dipalulakoko tomahaja Roma.’ ²⁶Sapo' tä'pi deem ma'tantu kuanda'i aka la kuaa illaam suha'ku lako tomahaja Roma. Iam too anna kupopengngolom illaam inde alla'-alla'mua' tentomai la'bi-la'binna lako tomahaja Agripa anna mala maka' lessu'um dipahessa, la deemmi pole' kaha-kaha la mala kutuli'. ²⁷Anu' situhu' pikkihangku tä'pi sihatam la dibeho lako to mahhotto' senga' mesa to ditähäm ke tä'pi dipomakaleso aka kasuhunganna anna ditanda'i.”

**Untula' kamaloloanna
Paulus dio olona Agripa**

26:1-11

26 Iya ma'kadam tomahaja Agripa lako Paulus naua: “Dibeemmoko wattu la untula' katähängammu.”

Tappa muäkä' limanna Paulus mane untula'i kaha-kahana naua: ²⁻³“O tomahaja Agripa, napaboboia' tula' to Yahudi, sapo' iko to ullatta'ko ingganna ada' kabiasaanna to Yahudi sola ingganna kaha-kaha to si nasipengka-pengkai. Dadi kehongko'a' kusi'dim allo temo aka malaä' sule dio olomu la untula' katähänganku. Sapo' kupelau kela mala sa'baha'ko säpäi' umpehingngii pa'tula'ku.

⁴Ingganna to Yahudi naissam asam pa'palakoangku, mengkalaopi mangn-guhangku susi dio botto litäku teem yabo Yerusalem. ⁵Aka setonganna kela naaku, la malaä' nasa'bii aka mengkalao diopi mai anna kaom duka' mesa to mentama kakalebuanna Parisi to matuhhum si'da-si'da illaam peadasangki. ⁶Sapo' temo ke'de'a' dio olomua' dipahessa aka unkatappa'ia' indo pa'dandiam puha nabeem Puang Allataala lako nene to taponene. ⁷Pa'dandiam ia too napemitai liu duka' to Israel pessubunna to sapulo dua. Napolalam menomba liu lako Puang Allataala allo anna bengi. Dadi iam nasuhum, tomahaja Agripa, napasalaä' to Yahudi aka kukatappa'i pa'dandiam ia too. ⁸Akana la tä'i tama akkalamua' ke napatuboi sule Puang Allataala to mate?

⁹Setonganna kao duka' yolona kuua: ‘La mengke'de'a' sola sumpu kamatohoangku umbali pengkähänganna Puang Yesus to Nazaret.’ ¹⁰Anna kaha-kaha ia too puham kupalako yabo Yerusalem. Aka tappana puhaä' untahima suha' pahenta dio mai kapala sando, tä' angga

mandi kupopetahungkum to untuhu' Puang Yesus sapo' kusituhu'i duka' ke dipatei. ¹¹Sule lako si bassa'a' tama pa'sambajangam undahha ingganna to untuhu' Puang Yesus. Anna kusuai umbahoi Puang Yesus. Tandana meali-aliä' wattu eta too si laopi kupeä lako kota senga'.

**Paulus untula' lalanna anna naäkä'i
Puang Yesus mendadi suho**

26:12-23

¹²⁻¹³O tomahaja, tappana mahasannä' muola dalam la lako Damsyik aka napakuasaä' anna nasua ingganna kapala sando la kupateem duka' to eta, iya muolaä' dalam katängäanna allo, pissananna kuita pangkähä ma'bulo-bulo yabo mai langi' masissä' puha ia anna la mata allo, napali' asangkam pada indo to kupasola. ¹⁴Tappa songkakam dokko litä', iya kuhingngim kamaha napa'kadaiä' ma'basa Ibrani naua: ‘Saulus, O Saulus, aka kasuhunganna anna undahhaä’? Aka la ussägäiko kalemu kela umbaliko pattujunna Debata.’ ¹⁵Kutimba'i kuua: ‘Aka mennako Debata?’ Natimba'ia' naua: ‘Kaom too inde Puang Yesus to undahha. ¹⁶Sapo' bangongko ammu ke'de'. Umpa'paitaannä' kaleku matim aka la kuäkä'ko mendadi pesuaku anna sa'bingku. Aka ingganna kaha-kaha puha muita allo temo anna indo mane la kupaitaiko la untulasam asam tau senga'. ¹⁷Aka la kutässu'iko illaam mai alla'-alla'na to Yahudi anna taianna to Yahudi. Anna la kusuako lao ¹⁸umbukkai matanna hupatau anna mala messubum illaam mai kamalillingam mentama kamasiäsam, messubum illaam mai kakuasaanna tomahajanna setam mentama kakuasaanna Puang Allataala. Anna mala diampunniam dosana anna la untahima mana' pa'tamba'na

Puang Allataala indo la nabeem ingganna umma'na to puha nasehoi aka kamatappasanna lako kaleku.'

¹⁹Nasuhum tomahaja, tä' mala tala kutuhu'i indo pahenta napalosaiä' Debata to puha kuita anna kuhingngi yabo mai suhuga. ²⁰Uhu-uhuna kupa'pakahebaam lako to Yahudi dio Damsyik, mane yaboi Yerusalem, anna lembäna Yudea; duka' lako taianna to Yahudi, kuaaam: 'Tihokongangkoa' gau'mu ammu pa'pasule lako Puang Allataala anna ma'pogau'koa' la situhu'na indo katihokongammu.' ²¹Iam too nasuhum nasakkaä' to Yahudi illaam Banua Debata anna saidi'ä' tanapatei. ²²Sola pa'kamasena Puang Allataala malapä' tubo, sule lako temo untula' diona Puang Yesus susi lako to bahinni' teem lako to kasalle. Aka indo kupa'pakahebaam tä' deem alla'na indo puha natula' loppo' Musa sola ingganna nabi ²³naua: 'To puha dilanti' la mepasalama' la ussi'dim pandahhaam anna la handam la yolo tibangom dio mai alla'na to mate anna malai umpa'pakahebaam lalam kamasiäsam, battu diua kasalamasam, susi lako to Yahudi teem lako taianna to Yahudi.'"

**Maelo' Paulus uhhuntu' Agripa
anna mala matappa'**

26:24-32

²⁴Mahassampi ma'tula' Paulus umpo-makaleso kamaloloanna, iya nakua-pai ham Festus napekasallei ma'kada naua: "Tatta'ko Paulus! Napatatta'ko kamanähängammu."

²⁵Sapo' natimba'i Paulus naua: "O Festus to kipa'kasallei, tä'ä' tatta' aka inde kutula' tappa' anna masannannä' ma'tula', masissä' pikkihangku. ²⁶Napolalam bahaniä' untula'i inde kaha-kaha aka naissammi duka' tomahaja

Agripa. Aka mannassa inde kaha-kaha naissam asam anna nahingngi duka', aka tä' dadi dio ongeam kabuniam. ²⁷O tomahaja Agripa, ungkatappa'i haka tula'na ingganna nabi? Aka kuissam kuaa ungkatappa'i."

²⁸Natimba' tomahaja Agripa naua: "Ussanga haka la malaä' masimpam uhhuntu' mendadi taunna Kristus?"

²⁹Natimba' pole Paulus naua: "Setonganna la ma'sambajannä' längäm Puang Allataala anna mala battu la maela' di battu la masimpam di, tä' la iko mandi sapo' ingganna to uhhingngii inde kadangku temo la mala duka' susiä', sapo' angga ham tä' ia la dihante bassii."

³⁰Iya ke'de'um tomahaja anna gubernur sola Bernike anna ingganna tau to dio heem wattu eta too. ³¹Tappana dioi sulibam sipa'tula'-tula'um naua: "Inde tau tä' deem umpogau' mesa kaha-kaha la napolalam ditahungkum battu la dipatei."

³²Iya ma'kadam tomahaja Agripa lako Festus naua: "Setonganna inde tau malam la dilappasam kela daa napelau ohi la dipalulako tomahaja Roma kaha-kahana."

**Mengkalao Paulus
ma'kappala' lako Roma**

27:1-12

27 Tappana kattu la ma'kappala'kam^f lako Roma, iya dibehom Paulus sola sanaka-naka to ditahungkum tama pala' limanna Yulius, mesa punggabana sohodadu to disangai sohodadu tomahaja Roma. ²Iya deem mesa kappala' buttu dio mai Adramitium la lao ullelei sanaka-naka katisampoam kappala' dio Asia. Iya iam kiongei lao. Anna deem mesa to Makedonia buttu dio mai Tesalonika isanga Aristarkhus umpasolaikam.

^f27:1 Wattu eta too sola Lukas to untuli'i inde suha'.

³Masiäna, iya landa'ungkam lako Sidon. Indo Yulius umpakamaja Paulus nasuhum umpäbäi Paulus umpellambi'i ingganna issanganna napangngalai kapahalluanna. ⁴Mengkalao ongam eta membihim le'bo' liu kappala'ki muolai Siprus aka metammui hibu'. ⁵Puhai kilambam indo bihim le'bo' natingngajoi Kilikia anna Pamfilia, iya landa'ungkam lako Mira attasa'na Likia. ⁶Etam too indo punggabana sohodadu ullambi' mesa kappala' buttu dio mai Aleksandria la lu lako Italia. Iya dieli'ungkam lako kappala' ia too. ⁷Sanaka-naka benginna naolaam maellä' kappala'ki aka tä' mala tilao manappa. Iya napempahhi' mane malakam undundu Knidus. Aka metammui liu hibu' nasuhum membihim le'bo' okam dio leutam Kreta umpelebanni galantangam mehhusum tama le'bo' isanga Salmone. ⁸Tä' deem pada samasussakanni uhhuttu' bihim le'bo' ia too mane malakam ullambi' mesa ongeam isanga Katisampoam Mapia sikahuku' kota Lasea.

⁹Iya masäekam tohho eta too, lambi' buda wattu hugi. Lessu'um duka' allo kasallena to Yahudi si diuaam allo Sikapiai. Wattunnapi duka' kasalle liu hibu', dadi kasägängam kela umpalaoi tau kappala'. Nasuhum napakilala mandam Paulus naua: ¹⁰“Oa' solasubungku, situhu' pikkihangku maka' la tapatahu'a' inde pa'laoanta iya la silambi'kia' kasägängam anna kahugiam kasalle. Tä' la anggam kappala' sola baham-baham sapo' sala saidi' la nalambannipi duka' sungnga'taa'.” ¹¹Sapo' indo punggabana sohodadu unkatappa'i puha ia indo to umpalao kappala' sola puäna kappala' anna la tula'na Paulus. ¹²Anna indo katisampoam kappala' eta too tä' mapia diongei tohho ke wattu kamadinginganni aka nahua

hibu' kasalle. Nasuhum buda maelo' ke umpellei indo katisampoam eta too, umba-umba aka mala ullambi' katisampoam kappala' dio Feniks la naongei tohho masäe mangngampa sampe lessu' wattunna kamadingingam. Indo Feniks mesa katisampoam kappala' dio Kreta biasa nasala hibu' kasalle.

Tiandanga' kappala' napobua' talimpuhu'

27:13-44

¹³Wattu eta too hibu' bahinni' opi buttu dio mai tandai kaihinna kappala' lambi' sikanasanga la mala sule lako pattujunna. Iya uhhuntu'im dio mai sampahajanna anna umpalaoi kappala'na sikahuku' bihim le'bo' dio Kreta. ¹⁴Sapo' tä' masäe anna sulem talimpuhu' tibussau buttu yabo mai galantangam si disangai Hibu' tandai kananna mata allo ¹⁵sampe untumpu kappala'ki. Iya tä' mala mellao untammui hibu' dadi kipäbäi bähäm nasuhum ia siam naola anna ia kappala'ki napahe' hibu'. ¹⁶Iya le'ba' liungkam untuhu' lamba-lamba nababa hibu' sule lako bihim le'bo' tää'na nahua sugali' hibu' dio mesa leutam bahinni' isanga Kauda. Sulekam lako tä' deem pada samasussakanni aka massä'di' mane malai dihuntu' tama kappala' indo lopi si dipake tuhum. ¹⁷Puhai dipalängäm kappala' indo lopi, dikassa'im indo kappala' diba'ba'i lao uli'. Anna mane dipatuhum somba'na, aka naua indo to yabo anna mala muäbä bähä aka mahea' la tiandanga' lako tamungku dio le'bo' sikahuku' Sirtis. ¹⁸Masiä polei ditibeim babaam dokko le'bo' aka tä' deem pada sakasalle hibu' untappi kappala'ki. ¹⁹Tappana allo katallunna, ma'kaleim pole' untibe'i lao pangkakka' kappala'na. ²⁰Aka sanaka amom benginna tala bintä tala mata allo diita anna tuttuam masanta' talimpuhu' tä' deem kattunna mepaka-

hea'. Iya sangngim tä'um deem pahhanuangi la mala salama'.

²¹Tappana tä' deem mangngande indo tau pada masäe, iya ke'de'um Paulus illaam alla'-alla'na solana naua: "Oa' solasubum, kela tula'kum dituhu' kuua: 'Tä'kia' la umpalao kappala'ta umpellei Kreta,' mannassa anna tä' la deem kasägängam anna tä'kia' la hugi. ²²Sapo' inde illaangkia' kamasussam kupakahi'dikoa' anna umpomatohokoa' penabammu, aka tä' mammikia' deem la pa'de sulibanna inde kappala'. ²³Aka sabengi napellambi'ä' malaika'na Puang Allataala to kupenombai anna to kupepuäi, ke'de' dio ampe'ku ²⁴anna nauai: 'O Paulus daa ummahea' aka tä' mala tala siitako tomahaja Roma. Anna ingganna inde tau yabo kappala' tä' deem la pa'de aka iko napessai'i Puang Allataala.' ²⁵Inggannakoa' solasubungku, iam too kasuhunganna anna kuuaammokoa': Pomatohoia' penabammu aka kukatappa'i Puang Allataala kuua tä' mala tala napadadi umba susi indo natulasannä'. ²⁶Sapo' moinna anna susi, la tipa'sampeho inde kappala' lako bihinna mesa leutam."

²⁷Kasapulo appa'nai benginna, tontä liupakam napalulako napaludio mai hibü' dio Le'bo' Adria. Tappana kiha-kiha tängä bengi nasi'dimmi to mengkähä illaam kappala' naua mahuku'um galantangam. ²⁸Iya ullollohammi batu dokko le'bo' anna mane nahuntu' dio mai anna napajui. Iya dua pulo dappanna mandalanna. Napalao oom saidi' anna mane napaju oi, iya sapulo lima ham dappanna mandalanna. ²⁹Sapo' mahea'kam la tipa'sampeho lako batu panga', iya nalollohammi sampahaja appa' dokko pollo' kappala' anna kipemulu baju-baju masiä bábäm. ³⁰Indo to si mengkähä yabo kappala' silele ma'akkalam maelo' la lahi umpellei

kappala'. Umpatuhunnim lopi dokko le'bo' mato-mato la lao ullolloham sampahaja tandai ulunna kappala'. ³¹Sapo' ma'kada Paulus lako indo punggabana sohodadu sola ingganna sohodadu naua: "Maka' la le'ba'i inde lako to si mengkähä illaam kappala', iya la sägä asangoa'." ³²Iya nahatta'i siaham sohodadu indo pesäke'na lopi anna napäbäi bábäi le'ba' naábängam uwai.

³³Tappana la masiä kale, ussuam indo tau buda Paulus mangngande naua: "Sapulo appa'um benginna untähängkia' katadeasanta, tä'kia' deem mangngande, anggam ma'tumba-tumbaa' penabanta mangngampa aka amo la dadi. ³⁴Sapo' kupakilalakoa' kuua pangngandekoa' aka la matekkoa' tadea'. Aka tä' deem la honno' moi podo bulu salamba'mua'." ³⁵Puhai ma'tula', mualam hoti anna nakuhhu'i sumanga' längäm Puang Allataala dio olona indo tau buda anna mane napiä'i naande. ³⁶Iya matohom pole' penabanna ingganna indo tau anna mangngande asam duka'. ³⁷Indo to yabo kappala' dua hatu' pitu pulokam annam ia asanna. ³⁸Tappana dea'i, untibeim gandum indo babaanna kappala' dokko le'bo' aka naua anna mala mahingngam kappala'.

³⁹Iya masiäi naitaim le'bo' mehhusum tama galantangam, mahante bihinna. Moinna anna tä' naissam naua galantangam umba ngei, sapo' sikanaua: "Maka' malam dipasohe längäm galantangam inde kappala'." ⁴⁰Iya dihatta'i asammi pesäke'na indo sampahaja anna dipäbäi bábä tallam. Puhai, dibukkaim pesäke'na pegihi' kappala' anna dipalängänni somba' dio olona aka diua anna mala nabussum hibü' lu lako galantangam. ⁴¹Sapo' tiandanga' ulunna indo kappala' lako tamungku anna henggä pollo'na natumpu bombam kasalle.

⁴²Iya maelo'i indo sohodadu la umpatei ingganna indo to ditähäm aka naua inabanna mengkaja manii lao lahi. ⁴³Sapo' nalabai indo punggabana sohodadu aka maelo' umpesäkäi Paulus. Napolalam umpahenta indo tau buda naua: "Ingganna to naissam mengkaja pendiolokoa' dokko pekkattibe anna mengkajakoa' libam galantangam. ⁴⁴Anna to tä' naissam mengkaja alakoa' papam battu haka kapiäsanna kappala' umpake lambam libam." Iya kipateemmi too anna malakam salama' sule längäm galantangam.

Dio Malta Paulus

28:1-10

28 Kende' dangkanni längäm galantangam mane kiissam di kiua leutam Malta inde. ²Sangngim madota' indo pa'botto eta too aka natammuikam nasalama'i anna tä' deem pada sanapakamajakam. Silele ma'hompom anna natambaikam mendähä aka napahandu'um uham anna masäkke' toi kaliane. ³Iya le'ba'um Paulus uhhuhu'i hängkä napatamaiam api. Mahassanni napatamai, iya tillo'do' ula' illaam mai indo alla' hängkä aka malussum, anna ungeke'e'i limanna Paulus. ⁴Tappana naita indo pa'botto mendekke' dio limanna Paulus indo ula', iya sipa'tula'-tula'um naua: "Si papateam päläe' inde tau aka moinna anna malam lappa' illaam mai tängä le'bo', sapo' abana inna tä' napäbäi indo debata baine to si muundu' lollä la tubo." ⁵Sapo' napempippisam mandi tama api Paulus tä' deem aka nasi'dim. ⁶Iya laonam sikanaampai liu naua la sukka'um too battu haka la songka mate, iya tä' mandi deem maaka Paulus. Katampasanna nauai pole': "Debata hia päläe'!"

⁷Indo kiongei tohho sikahuku' litä'na Publius, gubernurna leutam

ia too. Tä' deem pada samadota' natahimakam sampe tallungngallo tallu bengi natosabekam. ⁸Wattu eta too metindo ambena Publius aka lumalla' anna metäi haha. Iya le'ba'um Paulus tama tambinna indo to masaki. Napa'sambajangam anna napakumbäi pala'na. Iya bono' eta siaham. ⁹Tappana napekaheba tau kaha-kaha ia too, iya suleim duka' ingganna to masaki senga' dio indo leutam, iya sangngim napabono'um duka'. ¹⁰Tä' deem pada sanapa'kasalleikam anna buda aka-akanna si nabeenni bäbakam. Tappana la le'ba'kam napatokaam ongkanni ingganna kapahalluangki.

Landa' Paulus lako Roma

28:11-16

¹¹Tappana tallu bulangkanni dio leutam Malta, iya mengkalao ongam. Deem mesa kappala' buttu dio mai Aleksandria tohhona liupi duka' dio pada masäena wattu kamadingingam aka kadake hibu'. Kappala' ia too disangai Dioskuri battu diua debata To Hendu. Iya iam kiongei. ¹²Sulekam lako Sirakusa iya tohhongkam dio tallu bengi. ¹³Mane kupalao oi kappala'ki uhhuttu' bihim le'bo', iya sulekam lako kota Regium. Tappana masiä, sule hibu' buttu dio mai tandai boko'na kappala', iya dua bengi mane sulekam lako Putioli. ¹⁴Eta too sitammukam buda to unगतappa'i Puang Yesus. Napelau anna tohhopakam dio, iya etapakam duka' saminggu. Mane tahhu'kam pole' lako Roma. ¹⁵Naissanna to matappa' dio Roma naua la sule, iya mengkalao siam sule natammuikam dio Pasa' Apius anna lako Banua Tallu. Tappana sitammukam, iya ma'kuhhu' sumanga'um Paulus längäm Puang Al-lataala anna tä' deem pada sakasalle pen-abanna. ¹⁶Tappana diokam Roma, iya dipäbäim Paulus ma'banua senga' sola mesa sohodadu unjagai.

**Paulus sipa'tula' to Yahudi dio Roma
28:17-29**

¹⁷Tappana tallu bengikam dio, untambaim ingganna pebabanna to Yahudi Paulus. Iya tihempunni ma'kadam Paulus naua: “O inggannakoa' solasubungku, setonganna tä' deem umpogau'ä' kakadakeam lako solataa' anna umpa'pa'de ada' kabiasaanna nene to taponene. Sapo' moinna anna susi disakka siamä' dio Yerusalem anna nabehoä' lako to ma'pahenta Roma. ¹⁸Puhaä' dipahessa iya maelo' indo to umpahessaä' la nalappasammä' aka tä' deem kasalaangu la sihatanna dipateiä'. ¹⁹Sapo' aka moka punala to Yahudi dio la dilappasannä', tehepassa kupelau anna inde kaha-kahaku dihotto' dio olona tomahaja Roma, tä' diua suleä' inde anna la umpahapa'ä' solata to Yahudi. ²⁰Iam too kasuhunganna anna kutambaingkoa' anna malakia' siita aka la kupa'tula'ikoa'. Temo dihante bassiiä' aka unkatappa'ia' indo to masäem tapemmitaia' inggantaa' to Israel.”

²¹Sapo' natimba' to Yahudi naua: “Tä'kam deem untahima suha' dio mai Yudea diona kalemu. Tä' toi deem sule solataa' dio mai natulasangkam kakadakeammu. ²²Sapo' maelo' kihingngi issi penabammu, aka kiissam kua inde peadasam umpepa'guhuam buda tau umbahoi.”

²³Iya untandaim mesa allo la naongei sitammu pole. Tappana lambi'i tempona, tä' deem pada sabuda tau sule dio ongeanna Paulus. Iya mengkalao mebengngi' sule lako mahammo untahangkam anna umpa'pakahebaam diona kapahentaanna Puang Allataala Paulus. Anna natulasanni duka' issinna Pepaondonganna Musa sola suha'na ingganna

nabi anu' napeä lalanna anna mala uhuntu' indo to Yahudi matappa' lako Puang Yesus. ²⁴Sapo' indo pa'tula'na, deem unkatappa'i anna deem moka unkatappa'i. ²⁵Sapo' aka tä' pada-pada unkatappa'i tula'na Paulus, iya le'ba'im indo tau buda umpellei banua tappana puha ma'kada Paulus naua: “Abana tappa' di tia indo puha natula' loppo' Penaba Maseho napalombum nabi Yesaya lako nene to taponene inggantaa' to Yahudi naua:

²⁶‘Lakoko alla'-alla'na inde tau anna muuaanni:

La uhhingngi liua', sapo' tä' la mala naala pikkihammu,
anna la umpetua' liua', sapo' tä' la mala naala akkalammu.

²⁷Aka inde mai tau makahha'um penabanna,

anna si ma'binga-binga
sola ma'buta-buta.

Napateem indana paitai matanna,

pahingngi talinganna,

anna indana naalai penabanna,

lambi' ma'pasule sule lako Kaleku nasuhum kupabono'.^{§§}

²⁸Iam too anna pahallupia' la umpengngissanni muua: Kasalamasam buttu di Puang Allataala puha dipalandasam duka' lako tau taianna to Yahudi anna la natahima manappa.”[²⁹Tappana puha ma'tula' Paulus, iya le'ba'im indo to Yahudi anna sipengka-pengkai aka tä' mala mesa penaba.]

**Umpa'pakahebaam kapahentaanna
Puang Allataala Paulus dio Roma**

28:30-31

³⁰Dua taum tohho Paulus illaam indo banua naseba dio Roma anna si untahima mapia ingganna tau to sule umpellambi'i. ³¹Sola ponno kabaha-

§§28:27 Yes. 6:9-10.

niam umpa'pakahebaam kapahentaanna diona Debatanta Yesus Kristus anna tä'
Puang Allataala anna umpepa'guhuam deem tau ullabai.

Suha'na Paulus lako Jumaa' dio Roma

Bätäna issinna

Inde suha' natuli' Paulus napakatuum jumaa' dio kota Roma. Indo kota Roma mesa kota kasalle anna kaissangam yolona. Ia anna kaissanganni aka naongi ma'tadongkongam tomahajanna kahajaam Roma wattu eta too. Indo anna natuli' Paulus inde suha', tä'pi deem lako Roma. Sapo' natuli' anna napakatui lako jumaa' dio Roma aka naua anna mala naissam tongam indo to matappa' dio pepa'guhuam illaam kasahaniem. Anna natuli' toi anna mala naissam to matappa' dio Roma naua: "Ma'pattujum Paulus la sule inde Roma napellambi'ikam." Aka situhu' pattujunna la lempä salapi dio Roma ke le'ba'um lako Spanyol umbaba Kaheba Katilallasam.

Too'na issinna inde suha'na Paulus naua: "Illaam indo Kaheba Katilallasam dipa'paissangam lalanna anna mala mepomalolo Puang Allataala. Lalanna mepomalolo, tä' duanna tä' tallunna, anggam kamatappasam lako Kristus" (1:17). Diona indo too'na napomakaleso Paulus illaam inde suha'na, diua ingganna hupatau susi to Yahudi teem taianna to Yahudi sangngim pahallu napomalolo Puang Allataala aka sangngim nakuasai dosa. Anggam mala mapia sule kasilombunganna hupatau anna Puang Allataala, battu diua napomalolo Puang Allataala hupatau, ke matappa'i lako Yesus Kristus. Naua toi: "Taia kamanuhusanta lako Pepaondonganna Musa nasuhum napomalolokia' Puang Allataala, sapo' ia anna napomalolokia' aka kamatappasanta lako Kristus" (3:27-28). Napomalolongkia' Puang Allataala aka nasolongkia' Yesus

Kristus wattunna anna matei yabo kaju sitambem (3:22-25, 5:8). Dadi, maka' takatappa'i Puang Yesus la naangkahangkia' Puang Allataala dio mai kakuasaanna dosa lambi' tä'ungkia' la nalambi' pa'tahungkunganna aka napomalolongkia' (3:22, 26; 4:24-25; 5:1). Iam too indo diuaam Kaheba Katilallasam!

Natuli' toi Paulus diona pattujunna Puang Allataala lako to Yahudi battu diua to Israel (hondongam 9-11). Indo to Yahudi pessubunna Abraham, anna ia siam puha napilei Puang Allataala la mendadi umma'na. Sapo' tappana mentamai inde lino Puang Yesus, tappa natumpu pala' buda to Yahudi. Dadi, taiam pole' umma'na Puang Allataala aka moka untkatappa'i Puang Yesus (9:31-10:4). Tappana moka matappa', iya tibukkam pole' lalanna ingganna hupatau inde lino anna mala mapia sule kasilombunganna Puang Allataala. Dadi mala diua indo natumpu pala' to Yahudi, iya tibukkkaa' kita pole' lalanta taianakia' to Yahudi la ullambi' pa'tamba' kasallena Puang Allataala battu diua kasalamasam (11:11-15, 30-31). Ingganna ia too abana tisuha' loppo' illaam Battakada Debata (9:25-29; 10:19-21). Moi anna moka salapi ia to Yahudi matappa' lako Puang Yesus, sapo' tä' la moka liu (11:25-26).

Illaam inde suha', natuli' toi Paulus diona indo la sihatanna napogau' to Sahani, battu diua to matappa' (12:1-15:13), susinna: pahallu si'da-si'dakia' sikamase mesa sola mesa umba susi to siundu'-undu'; pahallu toi tapalako manappa pengkähängam puha nabeengkia' Puang Allataala; pahallukia' duka' manuhu' lako to ma'pahenta; anna pahallukia' untahima manappa solata to matappa' to malammapi kamatappasanna anna

tä' mala la ussipengkaia' indo issi penabanna.

Lesoanna issinna

1. Kada passu'bö' (1:1-15)

2. Punggu' tannunna inde suha' (1:16-17)

3. Ingganna hupatau sangngim madosa anna dihekem tä' malolo dio olona Puang Allataala (1:18-3:20)

4. Lalanna hupatau mendadi malolo dio olona Puang Allataala (3:21-5:21)

5. Kasilombunganta Yesus Kristus nasuhum lappa'ungkia' dio mai kakuasaanna dosa (6:1-8:39)

6. Pattujunna Puang Allataala lako to Yahudi (9:1-11:36)

7. La sihatanna napogau' to Sahani (12:1-15:13)

8. Napomasiä' Paulus kasuhunganna anna natuli'i inde suha' anna pattujunna la lako Roma (15:14-33)

9. Kada salama' sola katampasanna pepakilalaam (16:1-27)

1 Inde suha' buttu di kao Paulus mesää' duka' sabua'na Kristus Yesus. Natuhoä' mendadi suhona anna natodinni la umpa'pakahebaam indo Kaheba Katilallasam buttu yabo mai Puang Allataala. ²Kaheba Katilallasam ia too inna puha nadandi loppo'um Puang Allataala yolona napalombum ingganna nabi tisuha' illaam Suha' Maseho. ³⁻⁴Inde Kaheba Katilallasam, Änä'na Puang Allataala diuam, battu diua Yesus Kristus Debatanta. Di sesena mehupatauanna tihekem pessubunna Tomahaja Daud, anna di sesena menDebatanna anna kamasehoanna mannassa anna Änä'nai Puang Allataala, ma'tandaam aka puha dipatibangom dio mai alla'na to mate naponnoi kakuasaam. ⁵Kahana pengkähäna Kristus napolalam napadokkoannä' lisu pala'ku Puang Allataala mana' pa'kamasena mendadi suhona la umpatette ma'hupatau, susi

to Yahudi teem taianna to Yahudi, anna mala matappa' anna manuhu' lambi' dipa'kasallei sanganna Kristus. ⁶Inde diuam to matappa' anna manuhu', ikonna' too duka' to tihekem illaanna. Aka ikonna' too to puha ditambahi mendadi umma'na Yesus Kristus.

⁷Inde suha' kutuli' lu lako ingganakoa' to Roma to nakamasei Puang Allataala anna to puha napasähä' mendadi umma'na. Handandanni Puang Allataala Ambetaa' sola Debatanta Yesus Kristus la untamba'koa' anna namana' kamasakkeam sola kamasannangam.

Napemulu Paulus la lako Roma

1:8-15

⁸Uhu-uhuna sihatam anna sipäto' ma'kuhhu' sumanga'ä' längäm olona Puang Allataala umpolalam Yesus Kristus, aka molele-lele lako lino diona kamatappasammua' lako Yesus Kristus. ⁹Kupalako liu pengkähänganna Puang Allataala sola ponno penaba umpa'pakahebaam Kaheba Katilallasam diona Änä'na. Anna Puang Allataala muitaä' keta ma'sambajam oä' too kupa'sambajangam ongkoa' duka'. ¹⁰Si ma'sambajam liuä' längäm Puang Allataala umba ke napelo'i anna nabukkaannä' lalam la umpellambi'ikoa'. ¹¹Ia anna maelo' punalaä' la matim umpellambi'ikoa', aka maelo'ä' la kupasandaikoa' pa'mana' di ada' buttu di Penaba Maseho anna mala matoto' kamatappasammua'. ¹²Ia anna ma'pattuju susiä', aka kuua anna mala sipakatoto'kia' mesa sola mesa ingganta to matappa' lako Yesus Kristus.

¹³O ingganakoa' solasubungku, pahallukoa' kupaisanni kuua pembuda punalamä' ma'tamba la matim, sapo' sule lako temo buda liupi laba-labaangku. Maelo'ä' la matim anna mala deem buana pengkähäku illaam alla'-alla'mua', umba susi lako ongeam

senga' deemmi buana pengkähäku illaam alla'-alla'na taianna to Yahudi. ¹⁴Aka kusi'dingam kuua kaindangam dalam penabä' lako ingganna ma'hupatau situhu' pa'padudunninna Puang Allataala lako kaleku, susi to Yunani teem taianna to Yunani, susi to massikola teem to tä' deem massikola. ¹⁵Iam too kasuhunganna anna maelo' punalamä' la umpa'pakahebaam indo Kaheba Katilallasam illaam alla'-alla'mua' to tohho itim kota Roma.

**Kaheba Katilallasam kuasa
umpasalama' ma'hupatau**

1:16-17

¹⁶Kao-kao kukatappa'i si'da-si'da kuua inde Kaheba Katilallasam diona Kristus kuasanna Puang Allataala umpasalama' ingganna ma'hupatau to unkatappa'i, mengkalao to Yahudi sule lako taianna to Yahudi. ¹⁷Aka illaam indo Kaheba Katilallasam dipa'paissangam lalanna anna malai mepomalolo Puang Allataala. Lalanna mepomalolo, tä' du-anna tä' tallunna, anggam kamatap-pasam, tä' deem dalam senga', umba susi puha tisuha' illaam Battakada Debata naua: "Iai too kusangai malolo iam too la untahima katuboam bakahu kahana kamatap-pasanna."*

**Ingganna hupatau sangngim
madosa anna tä' malolo
dio olona Puang
Allataala (1:18-3:20)**

**To tama'Debata la nahua
aha'na Puang Allataala**

1:18-32

¹⁸Puang Allataala yabo suhuga umpahuai aha' lako hupatau to tama'Debata anna to kadake gau'.

Aka tau susi ia too ma'gau' kadake liu, nasuhum indo gau' kadakena ullabai hupatau la muissam kaheba kamaloloanna Puang Allataala. ¹⁹Setonganna kapaissangam diona Puang Allataala mala naissam hupatau, aka ma'kale Puang Allataala umpatitananni illaam penabanna ma'hupatau. ²⁰Pempom dadinna inde lino, mala ungkaleso manappa Puang Allataala hupatau. Moinna anna tä'i diita Puang Allataala, sapo' anggam diita pa'padadonna anna makalesom kapendebataanna anna kakuasaanna to la tontä liu sule lako salako-lakona. Dadi, tä' tia mala la naua hupatau: "Tä' kuissam diona Puang Allataala." ²¹Moi anna naissam siam hupatau naua: "Deem Puang Allataala," sapo' tä' punala deem la naaku napa'kasallei anna napenombai anna tä' toi deem la ma'kuhhu' sumanga' dio olona. Sapo' buta hi pikkihanna anna anggam napikki' tää'na deem gunana. ²²Ussangai kalena manähä, sapo' setonganna to maho! ²³Moka umpenombai Puang Allataala to inna deemmi pempom dio mai anna la da'da' liu sule lako salako-lakona. Sapo' sanda-sanda bäbä hi tanapenombai susinna: tau-tau anna pa'pasusiam senga', deem ma'hupa dassi, olo'-olo' ma'bitti' appa'na anna susi toi tissollo'na dio litä', moi kela daa tä' ia la da'da' liu hupatau anna olo'-olo'.

²⁴Iam too kasuhunganna anna napäbäi bäbäm Puang Allataala untuhu'i kamohäeam sugali'na umpogau' gau' sessu', lambi' si sola-sola umpogau' indo dipa'kasihisanna. ²⁵Palla' ia penabanna hupatau deem siam Puang Allataala, iya napabala'i hi ia siam anna ia. Taia To ma'padadi napenombai, sapo' to dipadadi hi

*1:17 Hab. 2:4.

napenombai anna natuhu'. Moi kela daa indo hia To ma'padadi la sihatam dipuji anna dipa'kasallei sule lako salako-lakona! Abana inna la diual![†]

²⁶Dadi, kahana inde hupatau untuhu'i kamohäeam sugali'na, nasuhum nalamba' bábäm Puang Allataala lambi' napäbäi bábäm untuhu'i kamohäeam sugali'na umpogau' indo la diposihina. Lambi' susinna baine taiam muane nasigausam, sapo' sabainenam nasi-gausam. ²⁷Susi siam duka' muane, taiam baine nasigausam, sapo' kende' lu lako hi samuanena kamohäeanna. Muane ia too ma'gau' dipomasihi'na sola samuanena nasuhum napalambi'i duka' Puang Allataala bala'na la sihatanna gau' kadakena.

²⁸Mane deenni, kahana mokam hupatau la umpengkalesoi manappa Puang Allataala, nasuhum illaam ia too napäbäi bábäm Puang Allataala kadake pikkihanna lambi' umpalako gau' tala sihatanna dipogau'. ²⁹Anggam kende' illaam penabanna tau ia too ma'hupa-hupa gau' tää'na malolo anna kakadakeam senga'. Aka angga ma'podo kao, ma'penaba kadake, mailu anna matinna, angga maelo' la papateam, umpakende' kasipengkaam, manipu, anna si ma'pabali-ali kadake illaam penabanna lako solana. Susi toi angga untula'-tula' solana, ³⁰angga ma'pakolo'-kolo'i, unglabassi Puang Allataala, moka umpehingngii pepatuduam, umpa'bahinni'i solana, malangka' penaba, anna ussanga-sanga kalena. Si manähä umpakende' kakadakeam, tä' manuhu' lako tomatuanna, ³¹tä' naissam usse'la kamapiaam anna kakadakeam, tä' umpasule lako pa'tula'na, tä' deem pa'kamasena anna tä' pa'häntängam bua. ³²Tau susi ia too naissammi diona

pahentana Puang Allataala indo naua: "To umpogau' gau' susi ia too la sipäto' dipalambi'i kamateam." Sapo' moi anna susi, tontä liu siam ma'gau' kadake. Anna tä' angga mandi ia too, sapo' natilalla'ipi duka' ke deenni tau senga' umpogau'i kaha-kaha ia too.

Tä' deem ma'se'la-se'la Puang Allataala illaam pahhottosanna

2:1-16

2¹⁻²Anna taissanna' pada-pada taua maka' napassala Puang Allataala indo to umpogau' kakadakeam, iya setonganna muundu' lollä illaam pahhottosanna. Anna ikoa'-iko, si umpasalakoa' solamu, sapo' setonganna tä' sihatam la umpateenna' aka indo gau' kadakena, iko sianna' duka' si umpogau'i. Dadi maka' umpasalakoa' solamu, iya kalembasanna ia too umpasalakoa' duka' kalemu. Dadi, tä' siakoa' la mala ummaloloam kalemu. ³Maka' umpasalakoa' solamu, sapo' iko sianna' duka' ma'pogau' susi ia too, iya ussanga haka tä'koa' la napassala Puang Allataala? ⁴Daa muula'-ula' solo'a' Puang Allataala, aka muua mapia penaba anna sa'baha' sola tä' deem pada sakasalle kamahammesanna! Pengkilalaia', ia anna umpa'patandaanni kamapiaam penabanna Puang Allataala aka pa'elo'na anna malakoa' untihokongam ingganna dosa budammu. ⁵Sapo' aka makahha' penabakoa' anna mokakoa' untihokongam ingganna dosamu, lambi' la sasua'koa' nahua aha' kasallena Puang Allataala illaam indo allo ma'katampasanna. Illaam allo ia too la mahhotto' Puang Allataala sola undu' lollä anna la umpassala ingganna to kadake gau'. ⁶Aka wattu eta too la napalambi'i Puang Allataala

[†]1:25 *Abana inna la diual!*: naua illaam basa Yunani, *Amin*.

buana situhu' pa'pogausanna hupatau si mesa-mesa. ⁷La napalambi'i ia Puang Allataala katuboam sule lako salako-lakona lako hupatau to tontä liu manontom umpogau' kamapiaam, aka maelo' la napomatande Puang Allataala anna napuji anna maelo' la ullambi' katuboam sule lako salako-lakona. ⁸Sapo' lako to ma'podo kao anna moka manuhu' lako kamaloloam anna angga untuhu'i kakadakeam, tau ia too la nalambi' aha' kasallena Puang Allataala. ⁹Menna-menna napohäe umpogau' kakadakeam, la ullambi' ia kamasussaam anna kamapi'disam, mengkalao to Yahudi sule lako taianna to Yahudi. ¹⁰Sapo' menna-menna umpogau' kamapiaam, la napomatande ia Puang Allataala anna napuji anna nabeem kamasannangam, mengkalao to Yahudi sule lako taianna to Yahudi. ¹¹Aka ingganna ma'hupatau napapada-pada bäbä Puang Allataala.

¹²Ingganna hupatau to umpogau' dosa sapo' tä' muissam Pepaondonganna Musa, tau ia too la napahuai pa'tahungkungam sule lako salako-lakona. La natahungkum Puang Allataala aka ma'gau' kadake, taia kahana untekkä Pepaondonganna Musa. Susim too duka' to muissam Pepaondonganna Musa sapo' umpogau' siam duka' dosa, tau ia too la napahuai duka' pa'tahungkungam aka untekkä Pepaondonganna Musa. ¹³Aka taia tia to umpehingngii bäbä Pepaondonganna Musa napomalolo Puang Allataala, sapo' indo hi tia tau to untuhu'i asanni issinna paondom ia too. ¹⁴Ingganna tau taianna to Yahudi tä' ia dibeem Pepaondonganna Musa. Sapo' deem si gatti kalena bäbä ma'pogau' sihondoi issinna Pepaondonganna Musa. Moinna anna tä' dibeem Pepaondonganna Musa, sapo' issi penabanna mato-mato napähe'um Pepaondonganna Musa.

¹⁵Diissammi diua issi penabanna napähe'um paondom ia too, aka diita dio pa'palakoanna tubo illaam mai kalena. Ia anna diissanni diua buttu illaam si'da mai unä' penabanna aka maka' sala gau'na, iya naua: "Sala gau'ku," anna maka' hua gau'na, iya naua: "Hua gau'ku." ¹⁶La susim too kadadiam illaam allo ma'katampasanna. Wattu eta too Kristus Yesus la umpalako pahhottosanna Puang Allataala, la uhhotto' ingganna indo tibuninna illaam issi penabanna hupatau. Ingganna ia too situhu' issinna Kaheba Katilallasam indo si kupa'pakahebaam.

Sunna' anna Pepaondonganna Musa tä' la mala umpasalama' hupatau

2:17-3:8

¹⁷Sapo' maakaa' iko susi diona kalemu solakukoa' to Yahudi? Aka anggakoa' iko si uhhannuam Pepaondonganna Musa anna si ussengkengangkoa' kasilombungammu Puang Allataala. ¹⁸Muissanna' usse'la umbanna kamapiaam anna umbanna kakadakeam, anna muissam tookoa' pa'elo'na Puang Allataala aka muita illaanna' mai paondom ia too. ¹⁹Si ussangaikoa' kalemu to mantetena to buta di ada' anna si ussangaikoa' tookoa' kalemu ballona to naluä kamalillingam. ²⁰Anna si ussangaikoa' duka' kalemu to mepatudunna to maho anna tuangguhunna to tä' muanda'i tongam pepatuduam, aka si muuaa': "Illaam Pepaondonganna Musa dilambi' ingganna kamanähängam anna pepatuduam tongam." ²¹Muissam lekoa' ia si umpatudu tau senga', sapo' tä' leko'a' ia muissam umpatudu kalemu! Si umpatudukoa' tau senga' muua: "Daa umpaboko," moi kela daa iko sianna' duka' si maboko! ²²Si muuaangkoa' tau senga': "Daa ullullu' pa'bannetauam," anna iko

sianna' duka' si ullullu' pa'bannetauam. Si unghahidi'koa' indo pa'pasusiam si napenombai tau, moi kela daa iko sianna' duka' si umbokoi indo pangkakka' illaam banua si naongeti menomba. ²³Si ussengkengangkoa' Pepaondonganna Musa, moi kela daa si umpa'basisii leko'a' Ia Puang Allataala aka tä' si untuhu'ia' pahentana. ²⁴Abana sihondoi pa'palakoammua' indo puha tisuha' illaam Battakada Debata naua: "Pa'palakoammua' inggannakoa' to Yahudi nasuhum untelle Puang Allataala taianna to Yahudi."

²⁵Maka' untuhu'i manappakoa' Pepaondonganna Musa, iya deem too duka' gunana indo disunna'koa'! Sapo' maka' tä'koa' untuhu'i issinna paondom ia too, iya moi too la saidi' tala deenni gunana indo disunna'koa'.[‡] ²⁶Maka' hapanna deem taianna to Yahudi tä' disunna' sapo' untuhu'i issinna Pepaondonganna Musa, mannassam tia anna la naangga'um Puang Allataala sihhapam puham disunna'. ²⁷Maka' susi, iya indo kamanuhusanna to tä' disunna' la umpakaleänganna' kasalaammu inggannakoa' to Yahudi lambi' dipassalakoa'. Aka deenna' iko pepaondongam sola sunna' la mala umpehhondoi, sapo' tä' dia' untuhu'i issinna. Anna tä' ia deem disunna' taianna to Yahudi, sapo' ia leko' di untuhu'i issinna Pepaondonganna Musa. ²⁸⁻²⁹Aka indo to Yahudi si'da-sia, battu diua umma'na Puang Allataala, taia tia la sanganna bäbä nakaeto-etongam, sapo' indo diuaam to Yahudi si'da-sia to malolo penaba dio olona Puang Allataala. Susi toi duka' indo diuaam disunna' si'da-sia, taia tia indo disasa' bäbä bale diuaam, sapo' disunna' illaam penaba battu diua puham ditandai

mendadi umma'na Puang Allataala. Anna iam too pengkähäna Penaba Maseho, taia kahana untuhu'i indo Pepaondonganna Musa to puha tisuha'. Tau susi ia too moi anna tä' la napuji padanna hupatau, sapo' la napuji ia Puang Allataala.

3 Maka' susi, iya akam la kagunaanna ke to Yahudii tau? Anna deem daka gunana disunna'? ²Mannassa anna budai gunana! Uhu-uhuna, inde kita' to Yahudi, inna to nahannuangkia' Puang Allataala la muanda'i anna umpalako Battakadanna. ³Sapo' maaka susi, aka deem to Yahudi tä' manuhu' lako Puang Allataala? La nasuhungam daka tä' umponnoi pa'dandianna Puang Allataala? ⁴Mannassa anna tä'i! Aka moi anna ingganna hupatau illaam inde lino tä' deem la tappa' tula' natula', sapo' mannassa anna tontä liu Ia Puang Allataala siampuam kamaloloam, umba susi puha tisuha' illaam Battakada Debata naua:

"La makaleso diua naponnoiko kamaloloam ke ma'tula'ko, anna pataloko ke napesalaangko hupatau."^f

⁵Maka' ma'gau' kadakekia', iya la tuttuam tandaam kamaloloanna Puang Allataala. Dadi maka' nakeaha'ikia' Puang Allataala ke ma'gau' kadakekia' moi kela daa indo gau' kadaketa umpatandaanni kamaloloanna, iya la sihatam daka ke tauaia: "Tä' malolo Puang Allataala?" Abana susi ke pikki' hupataui! ⁶Sapo' setonganna mannassa anna tä'i susi lalanna! Aka maka' hapanna tä' la siampuam kamaloloam Puang Allataala, iya mannassa anna tä' la mala uhhotto' ingganna hupatau, aka tä' tia deem lalanna la mala mahhotto' to tä' siampuam kamaloloam. ⁷Sapo' deem

[‡]2:25 *disunna'*: kalembasanna, *ditille*. Petua' dioi pemasiä'na Luk. 1:59.

^f3:4 Puj. 51:4-6.

too duka' to sala pähäm la naua: "Maakam ia susi la napasalaä' Puang Allataala anna napahuai aha' kasalena susi to madosa senga' kahana gau' kadakeku, aka ia hi nasuhungam tutuam makaleso kamaloloanna Puang Allataala lambi' napuji hupatau?"⁸ Maka' la susi, iya iam tia isanga malaa' taua: "Päbäikia' ma'pogau' kadake anna mala kende' kamapiaam." Anna abana deemmi duka' tau umpakolo'-kolo'ia' nasanga deem kuubum kada ia too. Ingganna tau susi ia too abana la sihatam napahuai pesämbä'na Puang Allataala sule lako salako-lakona.

**Ingganna hupatau dadi illaam
dosa bakka' illaam kasalaam**

3:9-20

⁹Iya la mala haka taua: "Napohäe puhakia' kita Puang Allataala to Yahudikia' anna la taianna to Yahudi?" Mannassa anna tä'i susi! Aka inna puha kupayolo lambammi kuua: Ingganna hupatau susi to Yahudi teem taianna to Yahudi sangngim to dadi illaam dosa to bakka' illaam kasalaam. ¹⁰Umba susi puha tisuha' illaam Battakada Debata naua:

"Tä' punala deem la malolo hupatau moi podo la mesam.

¹¹Tä' punala deem diita hupatau moi podo la mesam la keakkalam dio olona Puang Allataala, anna tä' toi deem diita moi podo la mesa la umpeä Puang Allataala.

¹²Ingganna hupatau umpemboko'im Puang Allataala

lambi' tä' keguna dio olona.

Anna tä' punala deem hupatau moi podo la mesam la umpogau' kamapiaam anna kamaloloam.[§]

¹³Pessubungam pudu'na ingganna hupatau kadake sihhapau' bauanna to mate diudu' dio mai ku'bu' so'bo, anna lilana naponnoi tula' tatappa'.

Ingganna pessubungam pudu'na umpi'di' penaba solana,

sihhapam liu pantombo'na ula' pabalu.**

¹⁴Angga pantunda sola passassai buttu illaam mai pudu'na.††

¹⁵Anggam anna tibalikka' lelenni kela undahhai solana anna la papateam.

¹⁶Angga katilakaam anna kamasussaam napakende' lako lino.

¹⁷Silele tä' muita lalam kasiolaam,‡‡

¹⁸anna tä' naissam ungkahea' anna umpa'kasallei Puang Allataala.™™

¹⁹Mane deenni, taissammia' pada-pada taua ingganna tisuha'na illaam Pepaondonganna Musa dipalulako to Yahudi to nakuasai pahenta ia too. Nasuhum illaam ia too, tä'um pole' deem hupatau moi podo la mesa la sihatam manteäi naua: "Maloloä' kao," anna ingganna issinna inde lino la sipäto' asam nahua pa'tahungkunganna Puang Allataala. ²⁰Aka ingganna hupatau illaam inde lino tä' punala deem moi podo la mesa la napomalolo Puang Allataala kahana untuhu'i Pepaondonganna Musa.§§ Aka indo Pepaondonganna Musa angga bábäm tia mala mepaissanni dosata.

§3:12 Puj. 14:1-3, 53:2-4.

**3:13 Puj. 5:10, 140:4.

††3:14 Puj. 10:7.

‡‡3:17 Yes. 59:7-8.

™™3:18 Puj. 36:2.

§§3:20 Indo diuam *Pepaondonganna Musa*, ingganna pahenta illaam peadasanna to Yahudi, taia angga mandi Sapulo Pahenta.

**Lalanna hupatau mendadi
malolo dio olona Puang
Allataala (3:21-5:21)**

**Anggam anna mepomaloloi
Puang Allataala ke
matappa'i tau lako Kristus**

3:21-31

²¹Sapo' tentomai napa'paitaammi Puang Allataala mesa lalam la naola hupatau anna mala napomalolo. Anna illaanna ia too, taia kahana umpalako tau Pepaondonganna Musa, umba susi tisuha' illaam issinna Pepaondonganna Musa sola suha'na ingganna nabi. ²²Aka anggam anna malai mepomalolo Puang Allataala ke unkatappa'i tau Yesus Kristus. Napadadi Puang Allataala kaha-kaha ia too anna mala ingganna hupatau taditole mesa taditandu-tandunganni la mala ullambi' kasalamasam umpolalam Yesus Kristus. ²³Aka ingganna hupatau puha metobä tama dosa mehonno' tama kasalaam, nasuhum pa'dem angga'na dio olo kamatandeanna Puang Allataala. ²⁴Sapo' tentomai kahana pa'kamasena taditondom, nasuhum napomalolongkia' Puang Allataala aka nasolongkia' Kristus Yesus. ²⁵Puang Allataala umpebeem Kristus Yesus dipatei anna dipatitollo hahana anna mala umpembala' dosana ma'hupatau, nasuhum tä'ungki' pole' la nahua aha'na Puang Allataala ke matappa'ungki' lako Kristus. Ma'pogau' susi Puang Allataala anna mala tandaam diua umpalako undu' lollä. Aka indo anna tä'pi mate Kristus, tä'pi umpahuai aha' hupatau tanda kasa'bahasanna. ²⁶Ia anna dipatei Puang Yesus anna mala tandaam diua umpalako undu' lollä Puang Allataala, anna la makaleso toi duka' diua malolo Puang Allataala,

aka ingganna dosana hupatau pahallu la dipabala'i. Anna duka' umpomalolo hupatau to unkatappa'i Puang Yesus.

²⁷Dadi, tä'kia' la mala ussengkengam diona napomalolongkia' Puang Allataala, aka taia kamanuhusanta lako Pepaondonganna Musa nasuhum napomalolokia'. Sapo' ia anna napomalolokia', aka kamatappasanta lako Kristus. ²⁸Pungngu' tannunna inde tula' susi indee: "Anggam mala napomalolo Puang Allataala hupatau ke matappa'i lako Yesus Kristus, taia kahana untuhu'i Pepaondonganna Musa." ²⁹Anggangka to Yahudi la mala umpenombai Puang Allataala? Mannassa anna tä'i angga! Aka susi to Yahudi teem taianna to Yahudi pada-pada mala umpenombai Puang Allataala. ³⁰Aka anggam mesa Puang Allataala! La umpomalolo to Yahudi ke matappa'i lako Yesus Kristus. Susi siam too duka' taianna to Yahudi la napomalolo Puang Allataala ke matappa'i lako Yesus Kristus. ³¹Iya la mala haka diua: "La dipa'pa'deim ia pahentana Puang Allataala aka matappa'ungki' lako Kristus?" Mannassa anna tä'i, aka kamatappasanta nasuhum tapalakom pole' indo pahenta.

**Abraham napomalolo Puang
Allataala kahana kamatappasanna**

4:1-12

4 Dadi, tentomai la mualää' mesa pehapangam diona maaka susi anna malai malolo Abraham nene to taponene dio olona Puang Allataala. ²Aka maka' hapanna la pa'pogausanna Abraham nasuhum naangga' malolo Puang Allataala, iya la deem lalanna ussengkengam kalena. Sapo' tä' mala la ussengkengam kalena dio olona Puang Allataala aka taia pa'pogausanna nasuhum diangga' malolo. ³Aka illaam Battakada Debata deem tisuha' naua: "Unkatappa'i Puang

Allataala Abraham nasuhum nasangai to malolo.”*

⁴Maka' deem mesa to mengkähä anna dibeenni sahona, iya indo sahona tä' dibeem bäbä, sapo' setonganna kulle mammi'na aka to'doam appu'nam.

⁵Sapo' kasilombunganta Puang Allataala tä' susi indo to mengkähä. Aka menna-menna tä' uhhannuam pa'palakoam kalena, sapo' angga matappa' längäm Puang Allataala to umpomalolo to kadake gau', tau ia too la napomalolo Puang Allataala kahana kamatappasanna. ⁶Susi siam duka' tula'na tomahaja Daud. Aka ussangai kehongko' indo to napomalolo Puang Allataala taia kahana pa'pogausanna, ⁷susi naua:

“Kehongko' anna maupa' lako hupatau to diampunniam pa'pogausam kadakena,

anna to tä' dipahandam dosa budanna.

⁸Kehongko' anna maupa' lako hupatau to tä' nahekem Debata ingganna dosana.”†

⁹Inde kakehongkosam tä' la lu lako mandi to disunna' battu diua to untuhu'i peadasanna to Yahudi, sapo' duka' la lu lako to tadisunna'. Aka inna puha kipayolo lambammi kiua: “Napomalolo Puang Allataala Abraham kahana kamatappasanna.” ¹⁰Iya umba wattunna anna napomaloloi Puang Allataala Abraham? Inna puhangka disunna' Abraham, tä'paka! Abana mannassa wattu eta too tä'pi deem disunna'. ¹¹Aka inna puham napomalolo Puang Allataala Abraham anna mane disunna'. Aka diona sunna'na anggam mendadi mesa tanda diua napomalolom Puang Allataala kahana kamatappasanna. Tä'pi deem disunna' anna inna natahimam Puang Allataala. Iam too anna disangaim Abraham ambe di

ada'na ingganna to matappa' moi anna tä'i deem disunna'. La mala duka' napomalolo Puang Allataala ingganna änä' di ada'na Abraham kahana kamatappasanna, umba susi Abraham matappa'. ¹²Indo Abraham ambe di ada'napi duka' ingganna to disunna' battu diua to Yahudi ke matappa'i. Napekaambe taia kahana anggam disunna', sapo' duka' kahana unkatappa'i Puang Allataala, umba susi Abraham matappa' wattunna anna tä'pi disunna'.

**Pa'dandianna Puang Allataala
ditahima umpolalam
kamatappasam, taia kahana untuhu'i
tau Pepaondonganna Musa**

4:13-25

¹³Ma'dandi Puang Allataala lako Abraham sule lako pessubunna la napadokkoam lisu pala'na inde lino. Ia anna ma'dandi susii Puang Allataala lako Abraham, aka kamatappasanna lako Puang Allataala, taia kahana untuhu'i Pepaondonganna Musa. Anna kamatappasannam too nasuhum napomalolo. ¹⁴Aka maka' hapanna la mala tau untahima pa'dandianna Puang Allataala ke untuhu'i tau Pepaondonganna Musa, mannassa anna tä'i deem gunana kamatappasam lako Puang Allataala, anna indo pa'dandianna tä' toi duka' deem gunana. ¹⁵Pepaondonganna Musa umpasule aha' kasallena Puang Allataala, aka si ditekka siam pahenta ia too. Pissananna anna pa'dei indo pahenta ia too, mannassa anna tä'i duka' deem la natekka hupatau.

¹⁶Dadi, kamatappasam nasuhum dibeem tau pa'dandiam ia too. Pa'dandiam ia too mendadi mana' pa'kamasena Puang Allataala lako

*4:3 Kad. 15:6.

†4:8 Puj. 32:1-2.

hupatau, taia kahana pengkähäna hupatau, anna mala mannassa diua tä' mala tala natahima Abraham sule lako ingganna pessubunna. Indo pa'dandiam dipalulako ingganna hupatau to matappa' umba susi Abraham matappa', susi to Yahudi to untuhu'i Pepaondonganna Musa, teem taianna to Yahudi. Aka inde Abraham ambe di ada'taa' inggannakia' to matappa'.¹⁷ Aka deem tisuha' illaam Battakada Debata naua: "La kupadadiko pentoosanna hupatau to la umpangngissi lao mobotto-bottoam."[‡] Indo Abraham mendadi ambetaa' pada-pada dio olona Puang Allataala, aka matappa' Abraham lako kalena Puang Allataala to kuasa umpatubo sule to mate anna to umpadeem pa'de umpake kadanna.

¹⁸Tontä liu matappa' anna mahannu Abraham moi anna tä'um deem paleanna la dadi kaha-kaha ia too aka matusse' sugali'um. Iam too anna mendadim pentoosanna buda hupatau lako lino, umba susi puha nadandi Puang Allataala naua: "Padai too budanna bintä, la padam too duka' budanna pessubummu."[¶] ¹⁹Wattu eta too, tä'um deem nalambi' pikkihanna Abraham la deem pessubunna aka matusse' sugali'um, kiha-kiha la nalambi' kalem sahatu' taunna dadinna. Dipala'bi indo Sara baina Abraham mesa to tämänä. Moi anna susi, sapo' tontä liu mahannu Abraham längäm Puang Allataala. ²⁰Tä' deem la bata-bata lako pa'dandianna Puang Allataala, sapo' tontä liu matappa' nasuhum indo kamatappasanna umpomatohoi penabanna lambi' umpuji anna umpakasallei Puang Allataala, ²¹aka nakatappa'i si'da-si'da naua kuasa Puang Allataala umpasule lako pa'dandianna.

²²Iam too anna deemmi tisuha' illaam Battakada Debata naua: "Napomalolo Puang Allataala Abraham," aka kamatappasanna. ²³Inde kada naua: "Napomalolo Puang Allataala," dituli' tä' lu lako mandi Abraham, ²⁴sapo' nahuaki' duka' to napomalolo aka unगतatappa'iki' Puang Allataala to umpatubo sule Puang Yesus Debatanta dio mai alla'na to mate. ²⁵Dipopepatei Puang Yesus kahana dosata, anna mane napatubo sule Puang Allataala anna malaki' napomalolo Puang Allataala.

Kasilombunganna sule hupatau anna Puang Allataala

5:1-11

5 Inde tentomai puhangkia' napomalolo Puang Allataala kahana kamatappasanta, nasuhum mapiam sule kasilombunganta Puang Allataala kahana pengkähäna Debatanta Yesus Kristus. ²Pengkähäna siam duka' napolalam malangkia' mangngala taba illaam ussi'dingam pa'kamasena Puang Allataala aka matappa'ungkia'. Anna si tilalla'ungkia' aka deem pahhannuanta la mangngala taba illaam kamatandeanna Puang Allataala. ³Sapo' sulibanna ia too la tontä liukia' duka' tilalla' illaam ussi'dingam kamapi'disam, aka taissanna' pada-pada taua kamapi'disam umpakende' kamanontongam illaam kaleta, ⁴anna maka' manontongkia', iya la tuttuam matoto'kia' muoloi pa'sändäsam. Anna maka' matoto'kia' illaam indo pa'sändäsam, la tuttuam mahannukia' längäm Puang Allataala. ⁵Anna maka' mahannukia' längäm Puang Allataala, tä' siakia' la salanduum aka napaponnoi illaam penabanta pa'kamasena

[‡]4:17 Kad. 17:5.

[¶]4:18 Kad. 15:5.

umpolalam pengkähänganna Penaba Maseho to puha nabeengkia'.

⁶Tappana lambi'i indo wattu puha napa'tantu Puang Allataala, indo wattunna anna malammapakia' aka nakala'pakia' dosa, iya mate Kristus nabala'kia' inggantaa' to madosa. ⁷Maka' hapanna deem to meada' la dipatei, madähä dalle busa la deem tau la maelo' umbala'i. Anna maka' hapanna la deem to mapia gau' la dipatei, la si messä' tau la ahu' umbala'i. ⁸Sapo' Puang Allataala Ia umpa'patandaam pa'kamasena lako kita wattunna anna tubopakia' illaam dosa. Aka eta too umpebeem Kristus nabala'kia' dipatei.

⁹Puhangkia' napomalolo Puang Allataala kahana kamateanna Kristus. Iam too anna mannassam diua lappa'ungkia' dio mai aha' kasallena Puang Allataala kahana pengkähäna Kristus. ¹⁰Wattunna anna umpobalipakia' Puang Allataala, iya illaam indo kamateanna Änä'na napapiaim sule Puang Allataala kasilombunganta anna kalena. Temo mapiam sule kasilombunganta, dadi mannassa anna tä' mala tala lappa'kia' dio mai aha' kasallena Puang Allataala aka tubom sule Kristus. ¹¹Anna sulibanna ia too, iya untilalla'ikia' duka' kamapiaam penabanna Puang Allataala tasi'dim kahana Debatanta Yesus Kristus. Aka umpolalam pengkähäna Kristus, nasuhum mapiam sule kasilombunganta Puang Allataala.

Adam nasuhum mehonno' hupatau tama dosa lambi' mate, sapo' Kristus naongi hupatau ullambi' katuboam

5:12-21

¹²Mesai Adam untekka pelahänganna Puang Allataala nasuhum mentama dosa inde lino, anna indo dosa ungkembuaam kamateam. Nasuhum ingganna hupatau illaam inde lino nahua asam kamateam

aka silolem loppo'um dosa. ¹³Wattunna anna tä'pi deem Pepaondonganna Musa, inna madosa loppo'um hupatau illaam inde lino. Sapo' tä'pi dihekem si mesamesa dosana hupatau eta too aka tä'pi deem pahenta ditekka. ¹⁴Sapo' moi anna susi, mengkalao dio Adam sule lako Musa nahua asam kamateam ingganna hupatau. Moi anna tä' deem untekka mesa pahentana Puang Allataala susi indo natekka Adam, sapo' tontä siam duka' nalambi' kamateam.

Buana pa'pogausanna Adam eta too mala dipasibandim bua pa'pogausanna mesa tau to tä'pi mentama inde lino eta too, iam too indo diuaam Yesus Kristus. ¹⁵Sapo' sisala pengkähäna Yesus Kristus anna pengkähäna Adam, aka indo pa'mana'na Puang Allataala lako kita mambela alla'na dosana Adam. Abana inna dosana mesa tau napolalam mate asam ingganna hupatau. Sapo' kasalle puha ia pa'kamasena Puang Allataala lako hupatau umpolalam pa'kamasena mesa tau, indo diuaam Yesus Kristus. ¹⁶Mambela sisala pa'kamasena Puang Allataala anna la indo buana dosana pamula tau. Aka mesa tau untekka pahentana Puang Allataala napolalam napasala asam Puang Allataala ingganna hupatau lambi' la ditahungkum. Sapo' tappana tuttuam buda hupatau umpogau' dosa, iya sulem pa'kamasena Puang Allataala umpomalolokia'. ¹⁷Kahana pa'pogau' kadakena indo pamula tau, nasuhum nakuasai asam kamateam ingganna ma'hupatau aka pessubunna indo pamula tau. Sapo' kasalle puha ia buana pa'pogausanna indo mesa tau diuaam Yesus Kristus! Aka menna-menna untahima indo pa'kamasena Puang Allataala tadisihanteam anna napomalolo toom, tau ia too la ullambi' katuboam ponno kakuasaam kahana indo puha napogau' Yesus Kristus.

¹⁸Dadi umba susi indo pamula tau untekka pahentana Puang Allataala lambi' sipäto' ditahungkum ingganna ma'hupatau, iya susi siam too duka' indo mesa tau diuaam Yesus Kristus puha umpogau' kamaloloam lambi' la deemmi pole' lalanna ingganna hupatau la mala napomalolo Puang Allataala anna ullambi' katuboam sule lako salako-lakona. ¹⁹Ia anna mendadi to madosa asanni ingganna hupatau, aka tä' manuhu' lako Puang Allataala indo mesa tau isanga Adam. Susim too duka', ia anna deenni lalanna napomalolo Puang Allataala ingganna hupatau aka kamanuhusanna indo mesa tau diuaam Kristus Yesus.

²⁰Indo Pepaondonganna Musa dibeem hupatau anna mala tuttuam makambam kasalaanna hupatau. Sapo' moi anna tuttuam madosa hupatau, sapo' tuttuam napaponnoi mandi pa'kamasena Puang Allataala. ²¹Aka umba susi yolona nakuasai asam dosa ingganna hupatau nasuhum tä' mala tala mate, susim too duka' tentomai nakuasaikia' pa'kamasena Puang Allataala nasuhum napomalolokia', lambi' malakia' ullambi' katuboam sule lako salako-lakona. Ia asanna ia too mala dadi aka indo nakähä Yesus Kristus Debatanta.

Kasilombanganta Yesus Kristus nasuhum lappa'ungkia' dio mai kakuasaanna dosa (6:1-8:39)

Kakuasaanna dosa napa'dei Kristus

6:1-14

6 Puha diua tuttuam madosa hupatau, iya tuttuam nakamasei mandi duka' Puang Allataala. Maka' susi, iya la sihatam dakika umpogau' liu dosa anna mala tuttuam nakamaseikia' Puang Allataala? ²Mannassa anna tä'i sihatam!

Aka tä'ungkia' la sihatam umpogau' dosa aka tä'ungkia' nakuasai dosa. ³Muisam daka' muua kitaa' to bali ditedo' sakalebungkia' Kristus Yesus? Kalem-basanna matekia' duka' sola Kristus. ⁴Indo ditedo'kia', mala diua matekia' duka' anna dilamum sola Kristus anna mala umba susi Kristus napatibangom kuasa kamatandeanna Puang Allataala dio mai alla'na to mate, susingkia' too duka' mala tubo bakahu.

⁵Aka maka' sakalebungkia' Kristus illaam kamateanna, iya mannassa anna sakalebungkia' duka' illaam katibangonganna aka la dipatibangongkia' duka' dio mai alla'na to mate umba susi Kristus dipatibangom. ⁶Taissanna' pada-pada taua indo sipa' dosata puham ia mate sola Kristus yabo kaju sitambem anna mala dipa'dei kuasanna dosa illaam kaleta lambi' tä'ungkia' kita la napos-abua' dosa. ⁷Aka umba susi mesa tau ke matem, dipasitäntängammi ia kuasanna dosa. ⁸Iya maka' sakalebungkia' Kristus illaam kamateanna, takatappa'ia' duka' taua la tubongkia' sola Kristus. ⁹Taissanna' duka' pada-pada taua puham dipatibangom sule Kristus dio mai alla'na to mate anna tä'um deem la mate pole; tä'um la mala nakuasai kamateam. ¹⁰Anggam pissam mate Puang Yesus, anna indo kamateanna untaloi kakuasaanna dosa sule lako salako-lakona. Anna inde tubo Puang Yesus tentomai yabo suhuga satutu umpalako pa'elo'na Puang Allataala. ¹¹Susim too duka' la pahallua' naua illaam penabanta: "Diona ia dosa tentomai, sihhammä' to mate aka tä'mä' nakuasai. Tentomai tubomä' la umpasatutui penabangku pa'elo'na Puang Allataala aka kasilombanganku Kristus Yesus."

¹²Dadi, daa umpäbäi dosa la unguasai katuboammu inde lino indana untuhu'iko pa'elo'na sipa' dosamu. ¹³Daa umpäbäi bätä puntimmu madosa la um-

pogau' kakadakeam. Sapo' la umbehokoa' sakalebu bätä puntimmu lako olona Puang Allataala, aka puhangkoa' nalappasam dio mai kamateam anna nabeem katuboam bakahu. Anna umbehokoa' sakalebu kalemu napopangakka' la umpalako pa'pogausam malolo.¹⁴ Aka tä'unna' nadakka' bata' ulummu dosa aka tä'ungkoa' nakuasai Pepaondonganna Musa. Sapo' tubongkoa' nakuasai pa'kamasena Puang Allataala.

**To matappa' dilappasam
dio mai passabua'inna dosa**

6:15-23

¹⁵ Maka' susi, iya la sihatam daka ke tauaia': "Malakia' umpogau' dosa aka tä'ungkia' nakuasai Pepaondonganna Musa?" Mannassa anna tä'i sihatam!
¹⁶ Mannassa anna muissannia' muua, maka' hapanna umbehoki' kaleta lako mesa tau la naposabua'ki, tä' mala tala tatuhu'i asam ingganna pa'elo'na. Susi siam too duka' ke untuhu'ikoa' pa'elo'na sipa' dosamu, iya la naposabua'koa' duka' dosa. Katampasanna la nababakoa' lako kamateam sule lako salako-lakona. Sapo' maka' manuhu'koa' längäm Puang Allataala, iya la naposabua'koa' nasuhum umpalako' kamaloloanna.
¹⁷ Yolona abana naposabua'koa' dosa. Dadi sihatam anna sipäto' dipakende' kuhhu' sumanga' längäm olona Puang Allataala, aka tentomai mengkalao illaammia' unä' penabammu untuhu'i indo pepa'guhuam kamaloloam puha dipatuduangkoa'.
¹⁸ Tentomai dilappasammokoa' dio mai passabua'inna dosa, anna mendadingkoa' sabua'na Puang Allataala la umpalako kamaloloanna.
¹⁹ Kahana tä'koa' madomi' si ussakka tula', nasuhum umpakeä' pehapangam diona kasabusam anna mala madomi'a' umpähäm. Yolona umbehokoa' sakalebu kalemu naposabua' ingganna

hupanna gau' sessu' anna pa'pogausam kadake, nasuhum tuttuam nababakoa' lako kakadakeam. Sapo' tentomai, la umbehokoa' sakalebu kalemu lako kamaloloanna Puang Allataala anna malakoa' naposabua' anna tubo maseho.

²⁰ Wattunna anna naposabua'pokoa' dosa, mannassa anna tä'koa' nakuasai pa'elo'na Puang Allataala.
²¹ Iya kauntungan akanna' muala illaam mai? Mannassa anna tä'i deem! Aka indo pa'pogausammua' lessu-lessu'na la masihi' mandakoa' ke unglilalai, aka buana ia too anggam nababakoa' lako kamateam sule lako salako-lakona.
²² Sapo' tentomai, lappa'ungkoa' dio mai passabua'inna dosa anna naposabua'ungkoa' Puang Allataala. Anna kagunaanna ia too, la tubo masehokoa' anna ma'katampasanna la ullambi'koa' katuboam sule lako salako-lakona.
²³ Aka buana dosa la ullambi' tau kamateam sule lako salako-lakona, sapo' mana' pa'kamasena Puang Allataala katuboam ia sule lako salako-lakona la talambi' kahana kasilombunganta Kristus Yesus Debatanta.

**Tä'ungkia' nakuasai Pepaondonganna
Musa aka silobummakia' Kristus**

7:1-6

7 O inggannakoa' solasubungku, muis-sammia' diona ätoham. Iya muis-sam toia' muua anggam anna mekuasai ätoham ke tubopi tau.
² Mala di-ala mesa pehapangam: mesa baine ke mahassampi kemuane, situhu' ätoham pa'bannetauam tä' mala kemuane senga' ke tubopi muanena. Sapo' maka' matem muanena, iya lappa'um dio mai ätoham ia too battu diua malam pole' kemuane senga'.
³ Maka' tubopi muanena baine ia too anna kemuane senga'i, baine ia too ullullu' pa'bannetauam. Sapo' maka' matem muanena, iya beba'um,

tä'um tisäke' anna tä' toom la disan-gai ullullu' pa'bannetauam ke kemuane polei. ⁴O inggannakoa' solasubungku, susi liungkia' too. Aka yolona tisäke'kia' duka' lako Pepaondonganna Musa, sapo' tentomai puhangkia' mate sola Kristus, nasuhum kattum kasilombunganta Pepaondonganna Musa. Lambi' naam-puammakia' pole' Kristus to puha dipatibangom dio mai alla'na to mate anna malakia' ungkembuaam kamapi-aam dio olona Puang Allataala. ⁵Aka indo anna nakuasaipakia' pa'elo' sipa' dosana hupatau, iya si kende' liu illaam kaleta kamohäeam la umpogau' dosa. Ia anna si kende' liu illaam kaleta maelo' la umpogau' dosa, aka nalaham Pepaondonganna Musa. Katampasanna indo pa'pogausanta napatinandaki' lako kamateam. ⁶Sapo' tentomai tä'ungkia' tisäke' lako Pepaondonganna Musa. Aka matengkia' sola Kristus nasuhum sitän-tängammakia' ätoham ia too, moi anna nakuasaikia' yolona. Tä'ungkia' untuhu'i indo ätoham tisuha' illaam Pepaondonganna Musa susi indo yolona. Sapo' tentomai lalam bakahunna' taola, umpalako pa'elo'na Puang Allataala sola pantet-tena Penaba Maseho.

**Pepaondonganna Musa
umpatandaam sipa' dosa**

7:7-13

⁷Maka' susi, iya la mala haka diua: “Kadake hia päläe' indo Pepaondonganna Musa?” Mannassa anna tä'i la mala diua! Aka indo Pepaondonganna Musa, ia umpaissaniki' dosata. Anu' maka' hapanna la tä' deem pahenta naua: “Daa ummailu anna matinna,” iya mannassa anna tä' kao la kuis-sam kuua kadake hi ia päläe' indo si mailuä' anna matinna. ⁸Tappana kuis-sam indo pahenta, iya mengkähä dosa illaam penabangku, nasuhum tuttuam kende' kamailuam anna kamatinnaam

illaam kaleku. Aka maka' hapanna tä' deem Pepaondonganna Musa, iya man-nassa anna tä'i duka' deem kuasanna dosa. ⁹Indo anna tä'pi kuissam Pepaondonganna Musa, iya malinoä' kusi'dim illaam katuboangku. Sapo' tappana kuis-sam, iya kende'um pole' indo dosa illaam penabangku ¹⁰lambi' sihhapam matemä' dio olona Puang Allataala. Indo Pepaondonganna Musa dihannuam sala la mepatinanda lako katuboam, iya ke mebaba lako hia kamateam. ¹¹Aka tap-pana kuissam Pepaondonganna Musa, iya deemmi pole' naola sipa' dosaku nababa bulinnä' lambi' napatinandaä' lako kamateam sule lako salako-lakona. ¹²Dadi indo Pepaondonganna Musa buttu yabo mai Puang Allataala anna ingganna pahenta illaam paondom ia too maseho, malolo, anna mapia.

¹³Maka' susi, iya la mala haka diua napatinanda lakoä' kamateam indo Pepaondonganna Musa moi kela daa mapia ha? Mannassa anna tä' mala diua! Sapo' indo pahenta mapia, ia napake sipa' dosaku umbabaä' lako kamateam sule lako salako-lakona. Lambi' illaam indo Pepaondonganna Musa masiä'um pole' diita kakadakeanna sipa' dosaku anna ma'tandaam toi diita kakadakeanna dosa.

**Pahentana Puang Allataala
anna kuasanna dosa**

7:14-25

¹⁴Taissanna' pada-pada taua Pepaondonganna Musa buttu yabo mai Penaba Masehona Puang Allataala. Sapo' kao-kao hupatau biasä' to napasabua' dosa. ¹⁵Aka indo kamapiaam maelo'ä' la kupogau', iya iam tä' kupogau'. Sapo' indo kakadakeam kukahidi'na la kupogau', iya ia hi kupogau'! Maaka amo bäbä isanga illaam pikkihangku anna si kupateenni! ¹⁶Maka' ma'gau' kadakeä' battu diua kupogau' indo tää'na kupo-

hæe, sapo' kuakui kuua tä' mapia ke kupogau'i, iya mannassa anna makalesoi diua kuakui kamapiaanna indo Pepaondonganna Musa. ¹⁷ Dadi mannassa anna indo pa'pogausangku taia gatti kaleku bäbä umpogau'i, sapo' indo dosa illaam kaleku unguasaiä'. ¹⁸ Kuissam kuua indo sipa' dosa unguasai kaleku tä' punala deem kamapiaanna. Aka maelo'ä' la umpogau' kamapiaam, sapo' tä' kubela kupogau'. ¹⁹ Aka maka' maelo'ä' la umpogau' kamapiaam, iya taia hi si kupogau'. Anna maka' kupeä oom lalanna anna tä'i umpogau'ä' kakadakeam, iya iam pole' si kupalako. ²⁰ Dadi, maka' umpogau' omä' indo kukahidi'na, mannassa anna taia gatti kaleku bäbä umpogau'i, sapo' indo dosa unguasai kaleku.

²¹ Dadi iam too inde si dadi illaam katuboangku: si kupeä liu lalanna anna indoi kamapiaam kupogau', sapo' angga liu hi kakadakeam si kupogau'. ²² Illaam kao duka' unä' penabangku tä' deem pada sakupohæe pahentana Puang Allataala, ²³ sapo' abana deem kusi'dim illaam kaleku kuasa senga' si mengkähä. Aka maelo'ä' la untuhu'i pahentana Puang Allataala, sapo' indo kuasa senga' si sipengka kusi'dim indo pa'elo'na unä' penabangku, nasuhum nasäke'mä' indo kakuasaanna dosa to unguasai kaleku. ²⁴⁻²⁵ Dadi maelo'ä' la manuhu' lako pahentana Puang Allataala, sapo' sipa' hupataungku hi manuhu' lako sipa' dosa. Abana inna hupatau to tilakaä' kao, nasuhum ma'kada illaam penabangku kuua: "Mennam la mala ullappasannä' dio mai inde pa'elo'na bätä puntingku to la umbabaä' lako kamateam sule lako salako-lakona?" Sapo' sihatam anna sipäto' umpakende'ä' kuhhu' sumanga' längäm olona Puang Allataala, aka Ia ullappasannä' dio mai katilakaangku umpolalam Debatanta Yesus Kristus!

Penaba Maseho melappasam dio mai kuasanna dosa

8:1-17

8 Dadi tentomai mannassa anna tä'um deem la nahua aha'na Puang Allataala lako hupatau to sakalebun Kristus Yesus. ² Aka illaam kasilombunganta Kristus Yesus, iya indo kakuasaanna Penaba Maseho to mebeem katuboam bakahu, iam too ullappasangkia' dio mai kakuasaanna dosa anna kamateam. ³ Indo Pepaondonganna Musa tä' mala ullappasangkia' dio mai kakuasaanna dosa, aka kitaa'-kita hupatau inna tä' sia la tabela taponnoi. Sapo' umpadadi lalam senga' Puang Allataala umpasalama' ma'hupatau ussua Änä' mesanna mentama inde lino mendadi hupatau, anggam alla'na aka tä' Ia madosa. Anna indo Änä'na mate ussolom hupatau dio mai dosana lambi' napa'deim Puang Allataala indo kakuasaanna dosa. ⁴ Nakähä Puang Allataala kaha-kaha ia too anna malakia' malolo dio olona umba susi dituntu' illaam Pepaondonganna Musa. Aka kitaa'-kita tä'ungkia' untuhu'i kamohæeanna sipa' dosata, sapo' untuhu'ingkia' pa'elo'na Penaba Maseho. ⁵ Menna-menna untuhu'i liu sipa' dosana hupatau, tau ia too angga ia pa'elo'na hupatau napaillaam penaba. Sapo' menna-menna untuhu'i liu pa'elo'na Penaba Maseho, tau ia too angga ia pa'elo'na Penaba Maseho napaillaam penaba. ⁶ Maka' anggam sipa' dosana hupatau unguasai pikkihammu, ma'katampasanna la ullambi'ko kamateam sule lako salako-lakona. Sapo' maka' pa'elo'na Penaba Maseho unguasai pikkihammu, ma'katampasanna la ullambi'ko katuboam bakahu anna kamasannangam penaba.

⁷Menna-menna anggam nakuasai sipa' dosana, tau ia too umpobali ia Puang Allataala. Tä' manuhu' lako pahentana Puang Allataala, aka abana inna tä' la mala manuhu' lako pahenta ia too. ⁸Menna-menna angga untuhu'i sipa' dosana hupatau, tau ia too tä' ia umpomasannam Puang Allataala.

⁹Sapo' ikoa'-iko, ke tohho si'da-siai Penabanna Puang Allataala illaam kale-mua', tä'koa' si untuhu'i sipa' dosana hupatau, sapo' si untuhu'ikoa' pa'elo'na Penaba Maseho. Sapo' menna-menna tä' deem Penabanna Kristus illaam kalena, tau ia too taia ia umma' petauanna Kristus. ¹⁰Sapo' maka' tohhom Kristus illaam penabammua', tä' mala tala ullambi' katuboam bätä sungnga'mua' aka napomalolongkoa' Puang Allataala, moi anna la ullambi' ia kamateam bätä puntimmu kahana dosa. ¹¹Puang Yesus puha napatibangom kuasanna Penaba Masehona Puang Allataala dio mai alla'na to mate, anna indo Penaba Maseho iam too tohho illaam penabanta. Dadi, moi anna la mate bätä puntinta, sapo' mannassa anna la napatuboi duka' sule Puang Allataala umpolalam kakuasaanna Penaba Maseho to tohho illaam penabanta.

¹²Dadi, inggannakoa' solasubungku, tä' mala tala untuhu'ikia' Puang Allataala. Tä'kia' pahallu la untuhu'i sipa' dosata. ¹³Aka maka' untuhu'ikoa' sipa' dosana hupatau, katampasanna la ullambi'koa' kamateam sule lako salakolakona. Sapo' maka' pantakka'na Penaba Maseho umpopatalo illaam kalemu lambi' la napa'dei indo pa'pogausam kadakemu, iya mannassa anna la ullambi'ko katuboam bakahu. ¹⁴Menna-menna umbeho kalena napatette Penaba Masehona Puang Allataala, tau ia too änä'na Puang Allataala. ¹⁵Aka yolona sihhapangkoa' sabua' to mahea' lako aha'na Puang Allataala. Sapo' tentomai aka indo Penaba Maseho napatama-

iangkoa' kalemu Puang Allataala, nasuhum tä'ungkoa' pole' la si mahea', aka napopendingkoa' Penaba Maseho änä'na Puang Allataala. Anna umpolalam Penaba Maseho malangkia' pole' metamba längäm Puang Allataala taua: "O Papa', O Ambeku!" ¹⁶Penaba Maseho sola penaba kaleta umpomannassai diua änä'ngankia' Puang Allataala. ¹⁷Dadi, maka' änä'ngankia' Puang Allataala, iya mannassa anna la tatahima duka' indo mana' puha nadandi dipatokaam Kristus. Mana' ia too la tatahimaa' sola Kristus, aka ussi'dimmakia' duka' pandahaam susi indo puha naola Kristus anna mala untahimakia' duka' kamatandeam susi kamatandeanna Kristus.

Kamatandeam la natahima umma'na Puang Allataala

8:18-30

¹⁸Situhu' kao pikkihangu, ingganna inde kamasussaam tasi'dinganna' tentomai, tä' pada umba ke dipasibandinni indo kamatandeam la dibeengkia' ke lambi'um wattunna la dipa'patandaam. ¹⁹Ingganna pa'padadinna Puang Allataala tä' deem pada saumpemmitai wattunna la napopa'lesoam Puang Allataala kamatandeanna ingganna änä'na. ²⁰Aka indo lessu' inde pa'padadinna ditädo aka natumä gau' kadakena hupatau. Taia pa'elo' kalena inde pa'padadinna nasuhum ullambi' kakadakeam, sapo' abana ma'kale Puang Allataala umpateenni. Moinna anna susi, sapo' deempi duka' kapahhannuanna la mapia sule ke lambi'um wattunna. ²¹Aka pissam wattu inde pa'padadinna Puang Allataala la nalappasam dio mai indo kuasanna to la mangkadakei lambi' la londa sola-sola ingganna änä'na Puang Allataala. Anna tä' deem la susi mapianna indo kalondaanna. ²²Aka taissanna' pada-pada taua sule

lakom tentomai ingganna pa'padadinna Puang Allataala silele mengkalao' muampai wattunna la ullambi' indo kalondaam, sihham mesa baine mahassam mangnguhiba' umpemmitai kasubunganna änä'na. ²³Anna taia angga mandi pa'padadinna Puang Allataala mengkalao', sapo' kitaa' duka' to matappa' mengkalao'kia' duka' illaam penabanta. Puha salangkia' kita nabeem Penaba Masehona Puang Allataala. Moi anna susi sapo' tapemmitai sianna' duka' temo wattunna la napasitäntängam dosa inde bätä puntinta anna la tepum mendadikia' änä' ikalena. ²⁴Aka indo kasalamasam inna silolemmi pahhannuam. Sapo' maka' taitam indo to la tapemmitai, iya tä'um tia la mala taua: "Dipemmitai," aka diitam. Aka tä' tia deem tau la ma'pemmita liu ke naitam indo to napemmitai. ²⁵Sapo' aka uhhannuangki' indo tää'napi deem taita, nasuhum la tapemmitaia' sola ponno kasa'bahasam.

²⁶Susi siam duka' tontä liuki' napamoloi Penaba Maseho illaam kamalammaanta. Aka kitaa'-kita setonganna tä' taissam aka la sihatanna taua ma'sambajam. Sapo' Penaba Maseho illaam kaleta ma'tula'-tula' nababaangki' pelauanta längäm Puang Allataala. Indo tula'na Penaba Maseho tä' ia naisam natula' hupatau. ²⁷Puang Allataala ullosa tama penabanna ma'hupatau. Anna muissam toi pattujunna Penaba Maseho, aka indo Penaba Maseho umpa'sambajangam umma'na Puang Allataala situhu' pa'elo'na Puang Allataala.

²⁸Taissanä' pada-pada taua ingganna kaha-kaha Puang Allataala muäto'i, nasuhum ungkembuaam kamapiaam lako hupatau to ungkamasei, battu diua to napilei mendadi umma'na situhu' pattujunna. ²⁹Aka tä'pi dadi inde lino anna naissam loppo'um Ia Puang Allataala ingganna hupatau indo to inna

la napilei. Anna mengkalao eta toi anna napa'tantu loppo'i la mendadi susi Puang Yesus anna mala Puang Yesus mendadi Änä' ulua anna ingganna indo to dipilei la mendadi ia adinna. ³⁰Anna ingganna indo to puha napa'tantu Puang Allataala mengkalao dio mai, iam too indo to inna natambai la mendadi änä'na. Anna ingganna indo to natambai, tau ia siam too duka' napomalolo. Anna indo to napomalolo, tau ia siam too duka' napomatande.

**Tä' deem aka-aka la
mala umpasilappa'ki'
pa'kamasena Puang Allataala**

8:31-39

³¹Maka' tapenabaam ingganna kaha-kaha ia too, iya mala diua: "Maka' naundui'kia' Puang Allataala, iya mennam la umbelai umbalikia'?"

³²Änä'napa duka' anna naahusanni tä' nakaha'i nasua mentama inde lino lambi' dipatei kahana nasolongkia', damoaham ia aka-aka senga' mannassa anna tä'i deem la nakaha'iangkia'.

³³Mennangka la mala untula' kasalaanta inggantaa' to puha napilei Puang Allataala? Mannassa anna tä'i deem, aka ma'kalem Puang Allataala umpomalolokia'. ³⁴La deem daka tau la mala umpassalakia'? Mannassa anna tä'i deem! Aka la ma'kalem Kristus Yesus umbala'kia' ma'tula' dio olona Puang Allataala. Aka Kristus puha mate yabo kaju sitambem ussolongkia', sapo' dipatibangom sule dio mai alla'na to mate lambi' tiäkä' längäm ongeam kamatandeam dio tandai kananna Puang Allataala. ³⁵Iya la deem daka aka-aka la mala umpasilappa'kia' pa'kamasena Kristus? Moinna anna nalambi'kia' kamasussaam, battu haka kamapi'disam, battu haka pandahhaam, battu haka katadeasam, battu haka kapemase-maseam, battu

haka katilakaam senga', battu haka la dipateikia', sapo' setonganna tä' deem aka-aka la mala umpasilappa'kia' pa'kamasena. ³⁶Aka inna puha tisuha' illaam Battakada Debata naua:

“Allo-allokam nahua kamasussaam ma-banda' kahana kituhu'ko.

Dipasingkam kami' domba la ditunu.”[§]

³⁷Sapo' moi aka la uhhuakia', aka illaanna ia too ullambi'ungkia' kapat-aloam kasalle aka napamoloikia' Kristus to ungkamaseikia'! ³⁸⁻³⁹Aka kukatappa'i si'da-si'da kao kuaa tä' deem aka-aka la mala umpasilappa'kia' pa'kamasena Puang Allataala. Moi la matekia' battu haka la tubokia', tontä liukia' nakamasei. Moi la malaika' battu haka kakuasaanna setam, moi aka la uhhuakia' temo battu haka illaam wattu mane la sulena, anna teem toi kakuasaam senga' susi yabo langi' teem illaam inde lino sola ingganna issinna, inna tä' sia la nabela napasilappa'kia' indo pa'kamasena Puang Allataala to puha napa'patandaam illaam kalena Kristus Yesus Debatanta.

To Israel anna Kaheba Katilallasam (9:1-11:36)

Kuasa Puang Allataala umpilei to la mendadi umma'na

9:1-29

9¹⁻²Inde tula'ku kada tongam tä' kuaa bäbä, aka pentuhu'naä' Kristus. Penaba Maseho unguasai unä' penabangku, nasuhum kuissam kuaa tappa' inde tula'ku kuaa: Tä' deem pada samasussa penabangku umpikki'i diona solaku to Israel. ³Tandana masussa penabangku diona solaku

to Israel, iya meangga la nahuaä' tädona Debata sule lako salako-lakona anna la dipasitäntängannä' Kristus, iya la ahupä', assala'na mala ullambi' kasalamasam to Israel. ⁴Aka abana inna to puha napilei Puang Allataala napopendadi änä' ikalena. Anna umpa'paitaam kamatandeanna anna napadeengam pa'dandiam la mendadi umma'na anna nabeem Pepaondonganna Musa. Anna napaissanni toi Puang Allataala lalanna diona mehumala' anna nabeempi ingganna pa'dandiam senga'na. ⁵Inde to Israel pessubunna Abraham, Ishak, anna Yakub, kabuttuanna duka' tandai mehhupataunna To dilanti' la mepasalama'.** Anna indo To dilanti' la mepasalama' Ia handam matande yabona ingganna-ingganna sia. Ia siam ma'kale Puang Allataala anna sihatam dipuji anna dipa'kasallei sule lako salako-lakona. Abana inna la diua!

⁶Tentomai buda to Yahudi taia umma'na Puang Allataala. Tä' diua tä' napasule lako Puang Allataala indo pa'dandianna. Sapo' abana hi tia inna tä' napilei asam Puang Allataala to Israel la mendadi umma'na. ⁷Tä' tia diua ingganna pessubunna Abraham la mendadi asammi umma'na Puang Allataala. Aka ma'kale Puang Allataala ma'dandi lako Abraham naua: “Ishak la naongi buttu pessubummu situhu' pa'dandiangku.”^{††} ⁸Kalembasanna ia too, tä' diua ingganna pessubunna Abraham la disangai asammi änä'na Puang Allataala. Sapo' indo pessubunna Abraham, anggam mala diuaam pessubunna indo dadi kahana situhu' pa'dandianna Puang Allataala. ⁹Aka

[§]8:36 Puj. 44:23.

**9:5 *To dilanti' la mepasalama'*: illaam basa Yunani diua *Kristus*; illaam basa Ibrani diua *Mesias*.

^{††}9:7 Kad. 21:12.

puha nadandi Puang Allataala diona kadadianna Ishak naua: “Katenanna inde taum pole la suleä', iya wattu eta too la deemmi änä'na Sara muane-ane.”

¹⁰ Mane deenni, Ribka duka' undadiam dua muane-ane, mesa ambena isanga Ishak. Ishak mesa duka' nene to taponene inggannakia' to Yahudi. ¹¹⁻¹² Sapo' tä'pi subum indo dua änä'-änä' anna naua loppo'um Puang Allataala lako Ribka: “Indo kakanna la napahē' leko' adinna.” Wattu eta too, indo dua änä'-änä' tä'pi deem ma'pogau' mapia haka kadake haka, aka illaampi tambu'na indona. Sapo' inna natuho loppo'um Puang Allataala mesa to la untahima pa'tamba'na, anna mala tontä' liu sule lako pattujunna la umpilei hupatau situhu' pa'elo'na Puang Allataala taia kahana pa'palakoanna hupatau. ¹³ Umba susi puha tisuha' illaam Battakada Debata naua: “Kukamasei ia Yakub anna tä' ia kukamasei Esau.”

¹⁴ Maka' susi, iya la mala haka diuam Puang Allataala tä' malolo aka ma'se'la-se'la? Mannassa anna tä'i mala, ¹⁵ aka inna puhām ma'battakada Puang Allataala lako Musa naua:

“La ma'kaleä' ungamasei to la kukamasei, anna la ma'kale tooä' uhhäntängam bua to la kuhäntängam bua.”^{††}

¹⁶ Dadi, hupatau napilei Puang Allataala taia kahana pa'elo'na hupatau battu haka pengkähäna, sapo' ia too mesa-mesanna pa'kamasena Puang Allataala. ¹⁷ Aka maka' moka ungamasei mesa tau, iya tä' too nakamasei, umba susi puha napogau' lako Firaun indo tomahaja Mesir yolona. Tä' nakamasei Puang Allataala, sapo' nauaam: “Ia anna kuäkä'ko mendadi tomahaja, aka la kupa'paolai kupatandaam kakuasaangku, anna mala

kaleleam sangangku illaam inde lino.”^{†††}

¹⁸ Dadi, Puang Allataala ungamasei mesa tau ke abanai napoelo', anna Puang Allataala toi duka' umpomakahha' penabanna mesa tau ke abanai inna napoelo' la susi ia.

¹⁹ Umbai' la muuaännä' tentomai: “Maka' susi, iya maaka hi anna la umpasala liupi hupatau Puang Allataala? Aka mennam la mala ullabai pa'elo'na?” ²⁰ Akaa' la ussanga iam kalemu anna la bahanikoa' umbali-bali Puang Allataala? Moi kela daa hupatau biasa hako! La mala haka to dipapai ma'kada lako to umpapai naua: “Akanna umpateenni kao tampaku?” ²¹ Tä' daka tia la mala beba' mesa pa'tampa kuhim muala litä' pulu' sabokkom anna natampai dua kuhim situhu' pa'elo'na, mesa napapi'dä' anna mesa napapia susi biasa?

²² Susim too duka' Puang Allataala kuasa ma'pogau' lako hupatau situhu' pa'elo'na. Aka maelo' la umpa'paitaam kakuasaanna anna umpahuai aha'na lako ingganna tau to sihatammi napahuai aha' kasallena sule lako salakolakona. Moi anna susi, sapo' tontä' liupi sa'baha' lako tau ia too. ²³ Ponno sa'baha'pi Puang Allataala anna malai umpa'patandaam kamatandeanna tadtontodom lako inggannakia' to nakamasei battu diua to napatoka la mangngala taba illaam kamatandeanna. ²⁴ Kitanna' too indo to napilei, deem diala dio mai to Yahudi anna deem diala dio mai taianna to Yahudi. ²⁵ Umba susi indo puha napayolo lambam Puang Allataala napa-landa' nabi Hosea naua:

“Indo taianna umma' petauangku yolona anna to tä' kukamasei, iam too pole' la kupopendadi umma'ku,

^{††}9:15 Täss. 33:19.

^{†††}9:17 Täss. 9:16.

anna la kukamasei.^{§§}

²⁶ Anna dio indo ongeam naongi Puang Allataala ma'kada naua:

‘Taiakoa' umma'ku,’

iya ongeam eta siam too la naongi hupatau disangai,

‘änä'nam Puang Allataala Debata tubo.’^{***}

²⁷ Naua toi duka' nabi Yesaya yolona lu lako to Israel:

‘Moi anna pada budanna bungim dio bihim le'bo' to Israel,

sapo' anggam saidi' la dipasalama'.

²⁸ Aka abana inna la sule Puang Allataala

anna sulena too tappa untahungkum ingganna hupatau to la sihatam natahungkum.’[†]

²⁹ Anna napayolo lambam polepi nabi Yesaya naua:

‘Maka' hapanna tä' la napada'dasangkia' Puang Allataala Debata To Handam

Kuasa sanaka-naka pessubuntaa',

iya mannassa anna la pa'de asammi duka' pessubuntaa' umba susi issinna kota Sodom anna Gomora.’[‡]

**Anggam mesa-mesanna
kamatappasam mala
mepomalolo Puang Allataala**

9:30–10:4

³⁰ Dadi illaam inde tula'ku susi inde punggu' tannunna: Indo taianna to Yahudi tä' ia si napeä lalanna anna mala napomalolo Puang Allataala. Sapo' ia leko' di napomalolo Puang Allataala ka-

hana kamatappasanna. ³¹ Anna to Israel ia, si untuhu'i liu Pepaondonganna Musa aka napeä lalanna anna mala napomalolo Puang Allataala, sapo' ia leko' di tä' napomalolo. ³² Akanna tä' ia mala? Tä' mala, aka indo pa'palakoam kalena nahannuam, tä' unkatappa'i Puang Allataala. Nasuhum illaam ia too, titedo lako mesa “Batu Katitedoam”.[¶] ³³ Inna puham tisuha' illaam Battakada Debata naua:

‘Paalaia' penaba inde tula'ku:

Kupaokko' mesa Batu dio Sion[§]

nasuhum buda tau la untitedoi.

Sapo' menna-menna unkatappa'i, tä' ia la salanduum.’^{**}

10 Inggannakoa' solasubungku, tä' deem pada sakupemulu kela mala ullambi' duka' kasalamasam solaku to Yahudi. Iam too anna si kupelau lium längäm Puang Allataala. ² Kusa'bii kuua indo solaku to Yahudi abana tontä liu umpalako kapenombaam längäm Puang Allataala sola ponno penaba, sapo' tä' di naissam untuhu'i lalam pa'elo'na Puang Allataala. ³ Tää'i naissam naaka susi Puang Allataala umpomalolo hupatau. Anna pa'palakoam kalena hi nahannuam, nasuhum tä' untuhu'i lalanna Puang Allataala la umpomalolo hupatau. ⁴ Sapo' setonganna anggam mesa-mesanna Kristus umbala' Pepaondonganna Musa, lambi' ingganna hupatau to unkatappa'i la napomalolo Puang Allataala.

^{§§}9:25 Hos. 2:23.

^{*}9:26 Hos. 1:10.

[†]9:28 Yes. 10:22-23.

[‡]9:29 Yes. 1:9.

[¶]9:32 *titedo lako mesa Batu Katitedoam*: kalembasanna, moka matappa' lako Puang Yesus nasuhum ullambi' katilakaam.

[§]9:33 *Sion*: mesapi sanganna kota Yerusalem.

^{**}9:33 Yes. 28:16.

**Kasalamasam dipatokaam lako
hupatau to unगतappa'i Puang Yesus
10:5-21**

⁵Puha natuli' nabi Musa la dituhu'i issinna Pepaondonganna Musa anna mala malolo katuboam dio olona Puang Allataala naua: "Menna-menna untuhu'i asam issinna Pepaondonganna Musa la ullambi' katuboam mapia."^{††} ⁶⁻⁷Sapo' diona ia napomalolokia' Puang Allataala kahana kamatappasanta puha tisuha' naua:

"Tä' la mekutana illaam penabammua' muua:

'Menna la längäm suhuga?'

battu haka la muua: 'Menna la dokko ongeanna to mate?'"

(Kalembasanna, tä'koa' pahallu la längäm suhuga umpeä Kristus anna umpasolaia' sule inde lino. Anna tä' tookoa' manggi' la dokko ongeanna to mate umpeä Kristus la umpatibangom.)

⁸Ia anna tä'i la mekutana susi illaam penabammua' aka deem tisuha' naua:

"Kaheba Katilallasam buttu di Puang Al-lataala mahuku' siam, aka dio sianna' pudu'mu anna illaam sianna' penabammu."^{‡‡}

Iam too indo kaheba puha kipa'pakahebaam kiua: "Ingganna hupatau pahallu la matappa' lako Kristus."⁹ Maka' lemba' dio pudu'mua' muua: "Debata si'da-sia Puang Yesus," anna matappa' illaam penabammua' muua: "Puang Allataala puha umpatibangom Puang Yesus dio mai alla'na to mate," iya mannassa anna la ullambi'koa' kasalamasam. ¹⁰Aka

kamatappasam lako Puang Yesus illaam penaba nasuhum mepomalolo Puang Allataala, anna pangngakuam lemba' dio pudu' nasuhum mepasalama'. ¹¹Aka illaam Battakada Debata deem tisuha' naua: "Lako hupatau to matappa', inna tä' sia la salanduum."^{¶¶} ¹²Ingganna hupatau tä' deem se'lana nahua asam kaha-kaha ia too, susi to Yahudi, teem taianna to Yahudi. Aka anggama mesa Puang Allataala Debatanna ingganna ma'hupatau, Ia toi umbeem pa'tamba' di ada'na tadisihanteam lako hupatau to mengkaala dio olona umpelau kasalamasam. ¹³Aka deem tisuha' illaam Battakada Debata naua: "Menna-menna mengkaala längäm Debata, tau ia too la salama'."^{§§}

¹⁴Sapo' maakam ia susi la mala mengkaala längäm Debata ke tä'i deem kamatappasanna? Sapo' la mala haka tia unगतappa'i Debata ke tä'i deem nahingngi ditula'? Anna la mala haka tia naissam diona Kaheba Katilallasanna Debata ke tä'i deem umpaissanii? ¹⁵Sapo' la mala haka tia umpa'pakahebaam bäbä Kaheba Katilallasam mesa tau ke tä'i deem disua? Aka puha tisuha' illaam Battakada Debata naua: "Tä' deem pada samapia kasuleanna to umbaba Kaheba Katilallasam."^{*} ¹⁶Sapo' tä' la natahima asam hupatau Kaheba Katilallasam ia too, umba susi puha natuli' nabi Yesaya yolona naua: "O Debata, si messä' tau unगतappa'i inde tula' kipalanda'."[†] ¹⁷Dadi, deem kamatappasanna hupatau kahana uhhingngi Kaheba Katilallasam. Ia anna malai nahingngi aka deem tau

^{††}10:5 Sand. 18:5.

^{‡‡}10:8 Pass. 30:12-14.

^{¶¶}10:11 Yes. 28:16.

^{§§}10:13 Yl. 2:32.

^{*}10:15 Yes. 52:7.

[†]10:16 Yes. 53:1.

umpa'pakahebaanni indo kaheba diona Kristus.

¹⁸Sapo' la deem pekutanaangku: "Abana si'da haka inna tä'pi deem nahingngi to Israel kaheba ia too?" Tä' mala tala deemmi nahingngi! Aka illaam Battakada Debata deem tisuha' naua:

"Nahingngi asammi lako lino kamahanna,

anna ingganna pa'tula'na nasambai asammi ingganna tadongkongam."[‡]

¹⁹Deem polepi la kuua: Tä' la mala tauaa' tä' napähäm to Israel pattujunna Puang Allataala! Aka mengkalao diopi nabi Musa anna natula' loppo'um naua: "Susi inde kadanna Puang Allataala lako to Israel:

'La ma'kaleä' umpakende' kakembuhamua' aka pa'kamaseku la kupalulakom to tadihekem umma'ku,

anna la kupasule aha'mua' aka indo to si disangai to tamuissannä' la untahimam pa'kamaseku."[¶]

²⁰Anna makahha' puha ia kadanna Puang Allataala lako to Israel napalombum nabi Yesaya naua:

"Indo hupatau to tä' umpeää' yolona, iya iam pole' ullambi'ä' temo,

anna ma'kalemä' umpa'paitaam kaleku lako to tä' umpengngissanniä' indo lessu'."[§]

²¹Anna diona ia to Israel, naua Puang Allataala napalanda' nabi Yesaya:

"Tontä liu tibukka ba'ba penabangku la untahima ingganna to moka manuhu' anna to matoho tambu'."^{**}

Puang Allataala tontä umpailaam penaba umma'na

11:1-10

11 Dadi, deem la kupekutanaam temo: natumpu pala'ungka Puang Allataala to Israel, indo diuuaam yolona umma'na? Mannassa anna tä'i! Aka mala hi tia umpaalaia' penaba, kao duka' mesaä' to Israel peampoanna Abraham to buttu illaannä' mai pessubunna Benyamin. ²Tä' sia la untibe bääbä umma'na Puang Allataala indo to inna napilei mengkalao dio mai. Mannassa anna muissammia' indo tisuha' illaam Battakada Debata diona nabi Elia ussalla solana to Israel dio olona Puang Allataala naua: ³"O Debata, petua'i inde mai hupatau, buda punalam nabimmu napatei anna buda toi ongeam pehumalasang matim olomu nataleam. Angga hamä' mesa-mesa manuhu' dio olomu, sapo' napeä' siam duka' lalanna la napateiä'!"^{††}

⁴Sapo' aka pentimba'na Puang Allataala lako nabi Elia? Naua: "Tä'ko angga mesa, aka deempi pitu sa'bu tau tontä manontom dio oloku anna tä'pi deem moi podo la pissammi umpenombai Baal."^{‡‡} ⁵Indo puha dadi wattunna nabi Elia, susim too duka' dadi temo: aka temo saidi' tamoka asammi to Yahudi matappa', sapo' deem siapi to matappa' aka napilei Puang Allataala kahana pa'kamasena. ⁶Puang Allataala umpilei to Israel kahana pa'kamasena taia kahana pa'pogausanna to Israel. Aka maka' tia la pa'pogausanna hupatau na-

[‡]10:18 Puj. 19:5.

[¶]10:19 Pass. 32:21.

[§]10:20 Yes. 65:1.

^{**}10:21 Yes. 65:2.

^{††}11:3 1Haj. 19:10, 14.

^{‡‡}11:4 *Baal*: sanganna debata si napenombai to Kanaan yolona. Indo anna tamai lembäna Kanaan to Yahudi, iya si umpenombai duka' Baal nasuhum nakeaha'i Puang Allataala. 1Haj. 19:18.

suhum la napilei Puang Allataala, iya tä' tia la mala disangai pa'kamase indo pampileinna Puang Allataala.

⁷Dadi, iam too anna budam to Israel tä' ullambi' indo maelo' la napomalolo Puang Allataala, aka pa'palakoam kalena nahannuam. Anggam sanakanaka to inna puha napilei Puang Allataala ullambi'i, anna sulibanna ia too nalabai asam kamakahhasam penabanna. ⁸Aka inna deem tisuha' illaam Battakada Debata naua:

“Ma'kale Puang Allataala
umpomakuhibo-hiboi pikkihanna,
anna nabutai mata di ada'na lambi' tä'
paita,
napabinga talinga di ada'na lambi' tä'
pahingngi,
sule lako temo.”^{¶¶}

⁹Deem toi duka' natula' tomahaja Daud naua:

“Kupelau anna mala indo hame-hamena
la mendadi tolombunna anna tendam
lendu'na,
lambi' nahonnosam anna mendadii
bala'na gau' kadakena.

¹⁰Pabutai mata di ada'na anna malai tä'
muita lalam malolo,
anna pahussu'i babaam anna mala
bungku'.”^{§§}

Taianna to Yahudi dipasihhagam täke dipopendekke'

11:11-24

¹¹Iya, la susi liungka ia ingganna to Yahudi? Mannassa anna tä'i la susi liu. Sapo' puha umpogau' dosa, nasuhum indo kasalamasam napalulako duka' taianna to Yahudi Puang Allataala anna mala kende' kakembuhuanna lako taianna to Yahudi nasuhum maelo'

pole' matappa'. ¹²Dadi, indopa duka' umpogau' kasalaam to Yahudi sola moka untuhu'i pa'elo'na Puang Allataala, nasuhum lu lako taianna to Yahudi pa'tamba'na, iya senga'um tia kasallena pa'tamba'na Puang Allataala lako hupatau ke mengkatoba'i to Yahudi!

¹³Inde tula'ku kupalumatim ingganakoa' solasubungku taianna to Yahudi. Kaom too suhona Puang Allataala nasua umbaba Kaheba Katilallasam lako taianna to Yahudi. Dadi illaanna ia too sihatam anna sipäto' kupa'kasallei inde dudunganku. ¹⁴Aka kuua umba ke malai umpakende' kakembuhuanna solaku to Yahudi lako ikoa' taiannakoa' to Yahudi umba-umba aka la mala duka' ullambi' kasalamasam moi podo sabaheammi ke mengkatoba'i. ¹⁵Aka tapana natumpu pala' Puang Allataala to Yahudi, iya tibukkam pole' lalanna ingganna hupatau illaam inde lino anna mala mapia sule kasilombunganna Puang Allataala. Iya maka' natahimam sule Puang Allataala to Yahudi, iya tä' deem pada samapia aka la sihhagam to mate tubom sule.

¹⁶Maka' dibeho lako Puang Allataala pangkahingi', kalembasanna ingganna bua pengkähä naampuam asam Puang Allataala. Susim too duka', ke naampuanni Puang Allataala mesa waka' kaju, kalembasanna naampuam asam sule lako ingganna täkena.* ¹⁷To Yahudi dipasihhagam täkena kaju zaitun pantanam. Indo täkena kaju napoloi lao piha Puang Allataala anna mualai täkena kaju zaitun tubo bäbä anna napopendekke'i lako, lambi' indo täke dipadekke' la ussi'dim duka' kamapiaam buttu dio mai waka'na indo kaju zaitun pantanam.

^{¶¶}11:8 Pass. 29:4; Yes. 29:10.

^{§§}11:10 Puj. 69:23-24.

*11:16 mesa waka' kaju: indo nene to naponene to Yahudi dipasihhagam mesa waka' kaju, anna täkena pessubunna, battu diua to Yahudi.

Indo täke to dipopendekke', ikonna' too taianna to Yahudi diuaam. ¹⁸Sapo' ia hi ia, aka tä'koa' la mala umpa'bahinni'i indo täke kaju to dipoloi lao. Aka pahallua' muissam inggannakoa' täke to dipopendekke', tä' la ikoa' umpande waka', sapo' waka' di tia la umpandekoa'. ¹⁹Madomi' muuaa': "Akapia, kusinga diäläim ia lao anna kami'um umpembala'i ongeanna." ²⁰Abana hua hi tia duka' ke muuaia! Sapo' ia hi tia anna diäläi lao, aka tää'i matappa', anna ikoa'-iko tubo matoto'ungkoa' illaam kahana kamatappasammu. Dadi, tä' la malaa' ussengkengam kaha-kaha ia too, sapo' la pahallu hakoa' ia mengkahea' längäm Puang Allataala. ²¹Aka maka' napoloi lao Puang Allataala indo täke inna tubo illaam mai kaju ia too, iya senga'unna' tiko to dipasihpam täke dipopendekke' ke tä'koa' matappa'. ²²Dadi penabaam siaia' too maaka susi kamakahhasanna Puang Allataala anna maaka susi kamapi-aam penabanna. Makahha' untinggajo to mehonna' tama dosa, sapo' tä' deem pada samapia penaba untinggajokoa' assala'na tontä liukoa' manontom tubo illaam pala' pa'kamasena. Sapo' maka' tä'koa' ma'pateem, mannassa anna la naäläikoa' duka' lao. ²³Anna indo ia to Yahudi, to dipasihpam täke dipoloi lao, la mala duka' napopendekke' sule Puang Allataala, ke ussoi kalena indo tä' matappa'. Aka naponnoi kakuasaam Puang Allataala la untahimai sule. ²⁴Inggannakoa' to buttu dio mai sulibanna to Yahudi, sihhapangkoa' iko täkena kaju zaitun tubo bäbä, tä' nakala' bela' di ada'na Puang Allataala. Iya mala hakoa' duka' napopendekke' lako kaju pantananna, iya senga'um tia la natahimananna sule Puang Allataala indo inna

täke kajunna battu diua to Yahudi to puha napoloi lao.

**Pa'kamasena Puang Allataala
lako ingganna ma'hupatau**

11:25-32

²⁵Anna mane deenni inggannakoa' solasubungku, tä' too mapia ke tä'ia' muissam manappa indo to napokada ditambim Puang Allataala inde dio mai. La kutulasangkoa' temo indana malangka' penabakoa'. Indo kada ditambinna susi indee: buda to Yahudi kahha' ulu, sapo' ia too tä' la susi liu anu' anggam la naolaam Puang Allataala umpilei taianna to Yahudi sampe ganna' napopendadi umma'na. ²⁶Iya etam too pole' naongi dipasalama' ingganna to Israel umbasusi puha tisuha' illaam Battakada Debata naua:

"To dilanti' la mepasalama' la buttu dio mai Sion,
anna la ussapui ingganna kakadakeanna
pessubunna Yakub.†

²⁷Anna indem ia pa'dandiangku lako
pessubunna Yakub,
ke wattunnam la kuampunni asam
dosana."

²⁸Tentomai umpobalim Puang Allataala to Yahudi aka moka untahima Kaheba Katilallasam. Sapo' ia too mendadi kakehongkosammua' iko inggannakoa' solasubungku taianna to Yahudi. Moi anna susi, sapo' inde to Yahudi tontä liu nakamasei Puang Allataala, aka abana inna umma' to napilei mengkalao dio nene to naponene. ²⁹Aka maka' alu' umpileim hupatau Puang Allataala anna natamba'um tau ia too, mannassa anna tä'um la nahuntu' sule indo puha napogau'. ³⁰Yolona tä'koa' manuhu' lako Puang Allataala. Sapo' tentomai nalambi'ungkoa' pole'

†11:26 Sion: mesapi sanganna kota Yerusalem; *pessubunna Yakub*, kalembasanna to Yahudi, battu diua to Israel. Yes. 59:20-21.

pa'kamasena Puang Allataala, kahana tä' manuhu' to Yahudi. ³¹Susim too duka' to Yahudi. Tentomai tä' manuhu' lako Puang Allataala anna malakoa' nalambi' pa'kamasena Puang Allataala. Sapo' dako'i too, la nalambi' duka' sule pa'kamasena Puang Allataala, umba susi puha ussi'dinna'. ³²Aka napäbäi bäbä Puang Allataala ingganna hupatau nakuasai kamakahhasam penabanna nasuhum tä' manuhu', anna mala deem napa'paolai Puang Allataala umpatandaam pa'kamasena lako ingganna hupatau.

Pampujiam längäm Puang Allataala

11:33-36

³³Taditondom kamapiaam
penabanna Puang Allataala!
Tadilantum kakeakasanna anna tadilosa
kamanähänganna. Tadilambam si'da
ulu salunna kattuanna anna taditekka
ba'ba minanganna dalam pikkihanna.
³⁴Aka illaam Battakada Debata deem
tisuha' naua:

“Mennangka la muissanni diona pikki-
hanna Debata?

Anna mennangka la mala umpatudui?[‡]

³⁵Mennangka la deem umbeem aka-aka
Debata

nasuhum la natuntu' sule bala'na?”[¶]

³⁶Aka ingganna-ingganna sia, Puang Al-
lataala umpadadii anna nalima'i lambi'
umpuji Puang Allataala. Dipuji anna
dipa'kasallei Puang Allataala sule lako
salako-lakona! Abana inna la diua!

La sihatanna napogau' to Sahani (12:1-15:13)

Behoia' kalemu mendadi
bua pemala' tubo

12:1-8

12O inggannakoa' solasubungku,
kahana pa'kamasena Puang Al-
lataala tadisihanteam lako kita, na-
suhum kupelau si'da-si'daa' matim anna
mala umbekokoa' sakalebu kalemu men-
dadi bua pemala' tubo to dipasähä' men-
dadi umma' la umpomasannam pena-
banna Puang Allataala. La susim too um-
pogau'a', aka iam too diuaam kapenom-
baam si'da-sia dio olona Puang Al-
lataala. ²Tä' si'da-si'dakoa' mala la un-
tuhu'i sipa'na hupatau to tä' muissam
Puang Allataala. Sapo' behokoa' kalemu
lako olona Puang Allataala anna mala
Ia umbakahui liu pikkihammu lambi'
tä'koa' la satontä-tontäna. Aka maka'
umpateemmia', la malangkoa' too muis-
sam pa'elo'na Puang Allataala, indo
la mapianna, la napomasananna pena-
banna, anna tää'na deem sassainna.

³Puhamä' napadudunni mana'
pa'kamasena Puang Allataala mendadi
suhona nasuhum kupanännä'koa'
kua: Tä'koa' la mala ussanga-sanga
kalemu, sapo' sangai mammokoa'
kalemu si mesa-mesa indo setappa'na
sihondoi indo kapeimangammu puha
napatamaangkoa' kalemu Puang
Allataala. ⁴Aka inde bätä puntinta,
buda pangkakka'na. Sähupa oi too,
deem oom ia duka' pengkähänganna.
⁵Susingkia' too duka' to unkatappa'i
Kristus. Moi anna budakia', sapo'
napasakutu'kia' kalena Kristus mendadi
sihhapam mesa bätä puntinna hupatau.

[‡]11:34 Yes. 40:13.

[¶]11:35 Ayb. 41:11.

Anna tungga'kia' si pahalluam mesa sola mesa umba susi pangkakka'na mesa bätä kalena hupatau. ⁶Pantangkia' muampuum pengkähängam indo namanasangkia' Puang Allataala. Iam too anna la pahallunna' tapalako manappa pengkähängam ia too. Susinna to dimana' la umpalombum kadanna Puang Allataala, la pahallu napalako manappa ia duka' situhu' indo kapeimangam naampuum. ⁷Lako to dimana' la umpamoloi padanna, pahallu la napalako manappa ia duka' pengkähängam ia too. Lako to dimana' la ma'patudu, la pahallu ia duka' ma'patudu manappa. ⁸Lako to dimana' la umpakatoto' penabanna padanna, la pahallu ia duka' umpakatoto' manappa penabanna padanna. Lako to dimana' la umpebeem aka-akanna lako padanna, la pahallu ia duka' napalako sola ponno penaba. Lako to dimana' la mampahe', la pahallu bassa' umpalakoi. Lako to dimana' la ma'kamase, la pahallu napalako sola masannam penaba.

Pepatuduum diona pa'kamase

12:9-21

⁹Palakoa' pa'kamase sola unä' penabammu. Pahallu si'da-si'dakoa' unghahidi' kakadakeam anna anggai kamapiaam la umpaillaam penaba. ¹⁰La pahallu si'da-si'dakoa' sikamase mesa sola mesa umba susi to siundu'-undu'. Anna pahallu toia' umpeä lalanna anna sipa'kasalleikoa' mesa sola mesa. ¹¹Tä'koa' mala la mali-malisam, sapo' la pahallukoa' bassa' umpalako pengkähängammu. Palakoa' pengkähänganna Debata sola ponno penaba. ¹²Pomasannannia' penabammu aka to mahannukoa'

längäm Debata. La sa'baha'koa' muoloi kamasussaam, anna tä' la unghattui ma'sambajam. ¹³Pamoloikoa' padammu to matappa' to ussi'dim kakuhängam, anna la untahima manappakoa' to liu lalam.

¹⁴Pelauanni tamba' längäm Puang Allataala to undahhako'. La pahallu umpelauam tamba', tä' mala la untädo. ¹⁵La pahallukoa' tilalla' sola to tilalla', anna la sumahho sola to sumahho. ¹⁶Pahallukoa' la siala penaba padammu. Tä'koa' la malangka' penaba, sapo' la pahallua' duka' umpasola to handam madio. ⁸Anna tä' tookoa' la mala ussanga-sanga kalemu.

¹⁷Daa umpabala'i to umpogausangkoa' kakadakeam. Pogau'koa' kamapiaam umba susi napohäena ingganna hupatau. ¹⁸Peä si'da-si'daia' lalanna anna malakoa' siolaam asam ingganna hupatau. ¹⁹O inggannakoa' solasubungku, tä' si'da-si'dakoa' too la mala ma'gau' situmpu, anna Puang Allataala ham umpabala'i gau' kadakena indo balimmu. Aka illaam Battakada Debata deem tisuha' naua: "Kao ham umpabala'i! Kao ham umpahuai pa'tahungkungam. Susim too kadanna Debata." ²⁰Sapo' la untuhu'i hia indo issinna Battakada Debata naua: "Maka' tadea' balimmu, beenni naande. Anna maka' mabähäm, beenni naihu'. Aka maka' ma'pogau' susikoa', iya etam too pole' la naongei masihi' balimmu."**

²¹Daa umpabala'i lako to umpogausangkoa' kakadakeam, aka iam tia isanga nataloikoa' kakadakeam. Sapo' la umpogau' dakoa' ia kamapiaam lako to umpogausangkoa' kakadakeam, anna mala kamapiaam untaloi kakadakeam.

§12:16 *umpasola to handam madio*, mala duka' kalembasanna, la *ahu'koa' unghähä pengkähängam handam madio*.

**12:20 *etam too pole' la naongei masihi' balimmu*: Indo dituli' illaam basa Yunani, naua ia ke basa Bambanni: *Dipadudunni hobaja*. Pep. 25:21-22.

Kamanuhusam lako to ma'pahenta

13:1-7

13 Si mesa-mesa tau pahallu la manuhu' lako to ma'pahenta, aka ingganna to ma'pahenta ma'kale Puang Allataala umpatadongkonni. Anna Puang Allataala toi umbeenni kakuasaam la ma'pahenta. ²Dadi menna-menna umbali-bali to ma'pahenta, setonganna tau ia too umbali-bali indo pa'patadongkonna Puang Allataala. Anna menna-menna ma'pogau' susi, tau ia too tä' mala tala ullambi' pa'tahungkungam. ³Aka menna-menna umpogau' kamapiaam, tau ia too tä' ia la mahea' dio olona to ma'pahenta. Aka anggam tia to umpogau' kakadakeam sihatam la mahea'. Maka' maelo'koa' tä' la mahea' dio olona to ma'pahenta, iya pa'gau' mapiakoa' anna malakoa' napuji. ⁴Aka inde to ma'pahenta to tihekem duka' pesuana Puang Allataala anna ia toi mengkähä anna mala ullambi'koa' kamapiaam. Sapo' maka' umpogau'koa' kakadakeam, abana sihatangkoa' la mahea' dio olona, aka abana inna kuasa napahuaikoa' pa'tahungkungam. Aka abana inna to puha natuho Puang Allataala la umpahuai pa'tahungkungam lako hupatau to kadake gau'. ⁵Iam too anna la pahallungkoa' manuhu' si'da-si'da dio olona to ma'pahenta. Tä' anggam anna la manuhu'koa' aka muua: "Mahea'kam la ditahungkum," sapo' la'bi-la'binna, la manuhu'koa' mengkalao illaam unä' penabammu.

⁶Iam too anna la pahallungkoa' duka' umbaja' manappa simammu. Aka inde to ma'pahenta, abana inna sabua'na duka' Puang Allataala la umbännäi kapahentaam. ⁷Dadi, pahallua' umpebeem

asam indo la sihatanna umpebeem, susinna sima anna tuntusam senga' pahallua' la umbaja' manappa. Anna la ahu'koa' umpa'kasallei to la sihatam dipa'kasallei, anna la muangga'a' to la sihatam diangga'.

Pepaondonganna Musa tipungngu' tannum illaam pa'kamase

13:8-14

⁸Tä'koa' la mala katondoam aka-aka senga' lako padammu ma'hupatau sulibanna pa'kamase. Aka menna-menna ungamasei padanna, tau ia too untuhu'i asammi issinna Pepaondonganna Musa. ⁹Aka illaam indo Pepaondonganna Musa deem tisuha' naua: "Daa ullullu' pa'bannetauam, daa umpapateam, daa umpaboko, daa ummailu anna matinna." Ingganna pahenta ia too anna budapi senga-senga'na ungamaseim tau padanta ke dituhu'i, anna ia too puha tipungngu' tannum illaam mesa pahenta naua: "Kamaseiko padammu hupatau umba susi ungamasei kalemu."^{††}

¹⁰Menna-menna ungamasei padanna hupatau, mannassa anna tä'i la ma'gau' kadake lako padanna. Dadi, menna-menna ungamasei padanna, tau ia too untuhu'i asammi issinna Pepaondonganna Musa.

¹¹Ingganna ia too pahallu umpogau'a', aka muissammia' kalembasanna inde wattu taongi tentomai. Lambi'um wattunna la pahallukoa' bangom dio mai kamammasammu, aka temo tuttuam mahuku'um wattunna la dipasalama'kia'. Mahuku' puham ia anna la indo wattunna mane tapahandu'a' matappa'. ¹²Tentomai sihhapam bengi la masiä kalem. Dadi, la pahallua' taäläi illaam mai kaleta indo pa'pogausam si tapogau' indo anna nakuasaipakia' kamalillingam, anna

^{††}13:9 Täss. 20:13-15, 17, Sand. 19:18, Pass. 5:17-19, 21.

tapabala'ia' indo ingganna pangkakka' si dipakena illaam pa'bundusam di ada' la situhu'na kamasiäsam. ¹³La pahallukia' umpogau' pa'pogausam mapia umba susi si biasa napogau' hupatau illaam wattu kamasiäsam. Tä'koa' mala la ma'mahoa'-hoa' ma'doä battu haka la si umpamäbo' kalemu. Daa ullullu' pa'bannetauam anna daa untuhu'i panggua penabammu. Daa umpakende' kasipengkaam anna tä' tookoa' la mala ma'kembuhu. ¹⁴La pahallukoa' untuhu'i pa'elo'na Debatanta Yesus Kristus illaam mentu'na pa'palakoammu. Tä'koa' la mala untuhu'i pa'elo'na sipa' dosana hupatau la umponnoi panggua penabammu.

**Tä' tau mala umpasala
padanta hupatau**

14:1-12

14 La untahima manappaa' indo solata to matappa' to malammapi kamatappasanna, anna tä' mala la ussipengkaia' indo issi penabanna. ²Aka deem tau matoto'um kamatappasanna, lambi' naua: “Mala asam diande ingganna hupanna kinande.” Sapo' deem duka' solata to malammapi kamatap-pasanna si naua ia: “Pemali diande bale, anggam utam mala diande.” ³Maka' deem tau tä' umpise'i kinande, tä' la mala umpa'basisii to umpise'i kinande. Anna indo to umpise'i kinande, tä' duka' la mala umpasala to muande asam ingganna hupanna kinande. Aka tau ia too inna natahimam duka' Puang Allataala. ⁴Pasalui siaia' too penaba diona kalemu. Akanna bahanikoa' la umpasala indo sabua'na Debata? La hua haka la sala haka, tä' iko pahallu ullambanni, aka deem siam ia duka' puäna umpoissanni.

Anna tä' mala tala matoto' kamatap-pasanna aka kuasa Debata umpakatoto'i.

⁵Deem tau muuai: “Deem allo maseho puha ia anna la allo senga'.” Anna deem duka' tau muuai: “Tontä bábäm tia allo, sangngim mapia.” Sapo' handam mapia lako si mesa-mesa tau la ma'palako ia duka' situhu' kamahingngangam penabanna.

⁶Menna-menna umpise'i allo, tau ia too napateem aka umpa'kasallei Debata. Anna menna-menna tä' umpise'i kinande, napasusi anna mala umpa'kasallei Debata ke nakuhhu'i sumanga' längäm olona Puang Allataala kinande ia too. Susi toi to umpise'i kinande, napateem anna mala umpa'kasallei duka' Debata anna ma'kuhhu' sumanga' längäm olona Puang Allataala. ⁷Aka kitaa'-kita to matappa', tubo hakika' mate hakika', tä'kia' la untuhu'i pa'elo' kaleta. ⁸Aka tubokia' la umpalako liu pa'elo'na Debata, anna maka' matekia' la situhu' duka' pa'elo'na Debata. Aka susi tubota teem mateta Debata muampuanni. ⁹Aka iam too kasuhunganna anna matem Kristus lambi' tubo sule anna mala ia mendadi Debatanna to tubo anna to mate.

¹⁰Dadi tä' deem lalanna la malakoa' umpasala padammu to matappa'. Anna tä' toi la mala umpa'basisii. Aka la pada-padakia' tinanda lako olona Puang Allataala dihotto'. ¹¹Aka puha tisuha' naua:

“Susi inde Battakadanna Debata:
Ma'dandiä' kuua:

Si mesa-mesa hupatau la ma'balinguntu' dio oloku menomba,
anna ingganna hupatau la naakuiä' naua: ‘Anggam Iko Puang Allataala.’”^{††}

¹²Dadi, la pantangki' mengngolo lako Puang Allataala untula' ingganna pa'palakoanta.

Daa umpogau'i indo la napotitedona solasubummu to matappa'

14:13-23

¹³Iam too kasuhunganna anna la tä'ungki' mala la sipasala mesa sola mesa. Sapo' la umpëä hia' ia lalanna anna malaa' tä' umpogau' indo la nasuhunna metobä tama dosa padammu to matappa'. ¹⁴Kao-kao aka sakalebümü' Puang Yesus Debatanta, nasuhum kukatappa'i si'da-si'da kuua tä' deem moi podo la mesa kinande la pemali diande. Sapo' maka' deem padangku to matappa' muuai: "Pemali hi tia diande kinande ia too," iya mannassa anna la madosai ke naandei. ¹⁵Maka' muandeko mesa kinande anna deenni solamu ma'tula'-tula' penabanna kahana manipi'pi kamatap-pasanna, iam tia isanga tä'ko ma'palako situhu' pa'kamase. Iam too anna ku-uam: tä' tau mala muande mesa kinande kela napolalanni masapu kamatap-pasanna solata to matappa'. Aka indo solata to matappa' naangkaham duka' Kristus dio mai dosana umpo-lalam kamateanna. ¹⁶Daa umpalako mesa pa'palakoam, moi la umpemapi-aam iko, ke napekadakeanni ia solamu, indana iai pole' napolalam nasas-saiko. ¹⁷Aka maka' tuboki' illaam kapahentaanna Puang Allataala, taia kaha-kaha kinande sola ihu' dipaitoo'na. Sapo' handam dipaitoo'na illaanna: kamaloloam penaba, kasiolaam, anna kati-lallasam. Ia asanna ia too buttu dio ia mai Penaba Maseho. ¹⁸Menna-menna umpalakoi inde pa'elo'na Kristus puha ditula', tau ia too umpomasannammi ia penabanna Puang Allataala anna la napa'kasallei padanna hupatau.

¹⁹Iam too anna la tapeä liunna' lalanna anna mala umpadeem liukia'

kasiolaam anna la sipakatoto'kia' mesa sola mesa. ²⁰Daa muandeia' indo kinande napemaliinna solamu indana napolalanni kadake indo puha nakähä Puang Allataala ke umpogau'i. Moi anna taissammia' pada-pada taua ingganna hupanna kinande mala asam diande, sapo' maka' la muandeki' mesa kinande anna la iai nasuhungam mesa solata mehonno' tama dosa, mannassa anna umpogau'ki' kasalaam. ²¹Dotam tia tä'ki' muande bale anna tä'ki' muihu' anggur battu haka la umpogau'ki' pa'palakoam senga', kela umpakendesanni dosa padanta to matappa'. ²²Handam mapia hia ke taanda'-anda'i kita duka' indo la mahingnganna penabanta, anggam Puang Allataala la muissanni. Kehongko' anna maupa' lako to tä' umpasala kalena ke umpogau'i mesa pa'palakoam indo tää'na napesalaam ke napogau'i. ²³Sapo' menna-menna ma'tula'-tula' penabanna kela muandei mesa kinande anna naande siam, mannassa anna napassalai Puang Allataala tau ia too aka indo pa'pogaussanna tä' situhu' kamahingngangam penabanna. Aka ingganna-ingganna sia ke tä'i situhu' kamatap-pasanta sola kamahingngangam penabanta anna tapogau'i, iya mannassa anna dosai kakendesanna.

Pahallu tapikki' indo la napomasannanna penabanna padanta to matappa'

15:1-6

15 Lako kita to matoto'um kamatap-pasanta, la pahalluki' sa'baha' illaam muoloi kamabandasam penabanna padanta to matappa' to malammapi kamatap-pasanna. Tä' la mala angga kamasannangam kaleta tapikki', ²sapo' la pahallu hakia' ia ma'palako indo la napomasannanna

penabanna padanta to matappa' anna napomapianna, lambi' tuttuam matoto' duka' kamatappasanna. ³Aka napateemmi la Kristus tä' deem umpikki' kamasannangam kalena umba susi tisuha' illaam Battakada Debata naua: "Ingganna passassai tama Kalem, Kao asammi umpendudunni."[¶] ⁴Ingganna indo tisuha' illaam Battakada Debata dituli' anna mala mendadi pepatuduam lako kita. Aka maka' mala tatahima indo pepatuduam, iya la malakia' too sa'baha' muoloi kamasussaam anna matoto' lambi' mahannuki' längäm Puang Allataala. ⁵Handandanni Puang Allataala kabuttuanna kasa'bahasam anna kamatosam penaba la umpaponnoikoa' kasiolaam illaam untuhu'i pa'palakoanna Kristus Yesus, ⁶nasuhum la malakoa'i mesa penaba anna mesa kada umpuji Puang Allataala Ambena Debatanta Yesus Kristus to napenombai.

**Kaheba Katilallasam lako
tau taianna to Yahudi**

15:7-13

⁷Iam too anna pahallungkoa'i la sitahima mesa sola mesa sola masannam penaba umba susi Kristus masannam penaba untahimakoa'i. Aka maka' umpateemmia', iya la dipuji Puang Allataala. ⁸Pailaam penabaia' inde tula'ku: Puha mentama inde lino Kristus umpamoloi to Yahudi anna mala tandaam diua manontom Puang Allataala illaam umponnoi pa'dandianna lako nene to diponene. ⁹Anna umpopendadipi duka' taianna

to Yahudi umpuji Puang Allataala aka untilalla'i pa'kamasena, umba susi puha tisuha' illaam Battakada Debata naua:

"Kahana ingganna indo puha umpogau' lako kaleku,

nasuhum umpakende'ä' pampujiam matim olomu

illaam alla'alla'na hupatau taianna to Yahudi;

anna sule sumanga'ku kende' pahajangku menani umpuji sangammu."^{§§}

¹⁰Anna deem toi tisuha' naua:

"O inggannakoa' taianna to Yahudi, pakende'koa' katilallasam kasalle längäm Puang Allataala sola-sola umma' to puha napilei."^{*}

¹¹Anna naua polepi:

"O inggannakoa' taianna to Yahudi, pa'kasalleikoa' sanganna Debata; inggannakoa' ma'hupatau äkä'koa' pampujiam längäm Debata!"[†]

¹²Anna nauapi duka' nabi Yesaya yolona:

"Pessubunna Isai la naongi kende' mesa tau"[‡]

to la umpahenta ingganna hupatau taianna to Yahudi,

anna anggam la la naongi pahhannuanna hupatau."

¹³Handandanni Puang Allataala kabuttuanna pahhannuam la umpaponnoikoa' katilallasam anna kamasakkeam sola kamasannangam kahana kamatappasammua' lako kalena, anna mala kakuasaanna Penaba Maseho la umpaponnoikoa' pahhannuam lako Puang Allataala.

[¶]15:3 Puj. 69:10.

§§15:9 2Sam. 22:50, Puj. 18:50.

*15:10 Pass. 32:43.

†15:11 Puj. 117:1.

‡15:12 Indo *Isai* ambena tomahaja Daud. Yes. 11:10.

**Napomasiä' Paulus kasuhunganna
anna natuli'i inde suha'**

15:14-21

¹⁴Inggannakoa' solasubungku, kukatappa'i kuua abana ma'gau' mapia liungkoa'. Anna kuissam toi duka' kuua muissam asammia' indo pahallunna la muissanna', anna abana la malangkoa' sipatudu mesa sola mesa. ¹⁵Moi anna susi, sapo' illaam inde suha'ku tä'a' malaja' umpakilalakoa' diona sanaka-naka kaha-kaha, aka abana inna napadudunniä' Puang Allataala mana' pa'kamasena ¹⁶la mendadi to mengkähäna Kristus Yesus lako hupatau taianna to Yahudi. Anna illaam inde pengkähänganku malaä' dipasihpam mesa sando, aka kupa'pakahebam Kaheba Katilallasam lako taianna to Yahudi anna mala ingganna tau ia too mendadi sihhipam mesa bua pemala' natahima Puang Allataala, aka puha nasehoi Penaba Maseho. ¹⁷Dadi, kao-kao aka sakalebumä' Kristus Yesus, iya yabomä' pangka-pangka bulabam kusi'dim tentomai inde napadudunniä' pengkähängam Puang Allataala. ¹⁸Anggam kao bahani untula'i diona indo pengkähänganna Kristus to puha kukähä, aka kakuasaanna mengkähä illaam kaleku, lambi' deemmi tau taianna to Yahudi manuhu' lako Puang Allataala, aka nahingngi pa'tula'ku anna naita pa'palakoangku ¹⁹anna naita toi indo buda pa'pogausam mepilla'-pilla' anna tanda memängä-mängä kukähä kahana kakuasaanna Penaba Maseho. Illaam pellaoam mambela mengkalao dio Yerusalem sule lako Ilirikum puha kupa'pakahebam indo Kaheba Katilallasam diona Kristus takukuhänni anna takuhängänni. ²⁰Si kupeä liu lalanna la kuaka susi anna

mala umpa'pakahebaannä' Kaheba Katilallasam lako ingganna ongeam tää'napi deem ditula' diona Kristus. Aka mokaä' kao la umpake'de' banua yabona batu longkahhim pa'paokko'na solaku, ²¹umba susi puha tisuha' illaam Battakada Debata naua:

"Lako hupatau to tuli tadeempi napekaheba, la naissammi pole'.

Anna lako hupatau to tuli tadeempi nahingngi, la napähämmi pole'."[¶]

Pattujunna Paulus la lako Roma

15:22-33

²²Ia anna tä' liupä' mala matim umpellambi'ikoa', aka la matim oä' too, iya nalabai omä' inde pengkähänganku. ²³Sanaka amom taunna lessu' anna kupahandu'i ma'pattuju la matim umpellambi'ikoa', sapo' aka mane puha hi pole' pengkähänganku inde temo. ²⁴Dadi situhu' pattujungku, maka' too lakomä' Spanyol, iya la muola matinnä', aka kupemulu punala kela mala silambi'kia' moi podo säpäi'um anna mala sule lako katilallasantaa' pada-pada. Sapo' illaanna ia too, kupelau anna malakoa' umpamoloiä' ke umpatahhu'mä' pa'laoangku lako Spanyol. ²⁵⁻²⁶Sapo' inde temo, la lu längäm salapä' yolo Yerusalem umpellambi'i umma'na Puang Allataala yabo. Aka deem doi' pepakatunna ingganna jumaa' dio propinsi Makedonia sola jumaa' dio propinsi Akhaya la kubabaam längäm. Anu' puham nakattu sola masannam penaba maelo' la umpamoloi to mase-mase indo solasubuntaa' to matappa' yabo Yerusalem. ²⁷Sangngim masannam penaba ussama-sama uhu'i nakattu diona kaha-kaha ia too. Aka setonganna abana sihatam si'da-si'da duka' inde taianna to Yahudi

[¶]15:21 Yes. 52:15.

umpamoloi solana to Yahudi, aka abana kaindangam lalam penaba lako. Aka to Yahudi napolalam mala duka' nalambi' mana' pa'kamasena Puang Allataala taianna to Yahudi. Iam too anna sihatammi la umpamoloi to mase-mase yabo Yerusalem ma'hupa baham-baham kapahalluanna bätä puntinna. ²⁸ Maka' too ke puhamä' längäm Yerusalem anna malam natahima inde to la kubaba, iya la le'ba'mä' pole' lako Spanyol, sapo' kupattuju la lempäpä' yolo itim bottomua'. ²⁹ Kukatappa'i si'da-si'da kuua, maka' sulemä' matim tä' mala tala naponnoikoa' pa'tamba' buttu yabo mai Kristus indo la kupalandasangkoa'.

³⁰ O inggannakoa' solasub-ungku, kupelau si'da-si'da anna umpa'sambajangannä' kao duka' längäm olona Puang Allataala, aka ma'mesangkia' illaam Debatanta Yesus Kristus anna sikamasengkia' aka indo pengkähäna Penaba Maseho. ³¹ La umpa'sambajangannä' anna mala napasikambelaä' Debata pattuju kadakena indo to täpi matappa' dio Yudea. Anna umpa'sambajangam tooä' duka' anna mala maelo' solasubunta to matappa' yabo Yerusalem untahima manappai inde kapahalluanna la kubabaam. ³² Maka' sule lako indo sambajammua', iya la malaä' too le'ba' matim umpellambi'ikoa' sola masannam penaba ke nauai Debata. Ma'katampasanna la tipakahangää' pole' illaam alla'-alla'mua'. ³³ Handandanni Puang Allataala kabuttuanna kamasakkeam sola kamasannangam la tontä liukoa' naundu' anna naolaam. Abana inna la diua!

Kada salama'

16:1-16

16 Illaam inde suha'ku la kupa'paissangam inde solasubunta isanga Febe mesa baine to

si umpamoloi jumaa' dio kota Kengkrea. ² Kupelau anna untahima manappaia', umba susi la sihatanna untahima umma' to matappa' längäm Debata. Aka abana inna la sihatam hupatau to matappa'um lako Puang Allataala la untahima manappa padanna to matappa'. Anna la umpamoloiä' ke deenni kapahalluanna. Aka si napamoloiä' anna buda toi duka' tau senga' si napamoloi.

³ Palandasannä' salama'ku lako Priskila anna Akwila indo sababanganku illaam umpalako pengkähänganna Kristus Yesus.

⁴ Bassim umbotoham sungnga'na aka napa'kadua-duai la umpesäkai sungnga'ku. Sihatam anna sipäto' kukuhhu'i sumanga', anna tä' angga mandi kao tilalla', sapo' tilalla' asam duka' ingganna jumaa'na taianna to Yahudi. ⁵ Palandasannä' duka' salama'ku lako issinna jumaa' indo to si ma'hempum dio banuanna indo to dua.

Salama'ku duka' lako Epenetus to kupakamaja, indo to handam yolo matappa' lako Kristus illaam propinsi Asia. ⁶ Salama'ku duka' lako Maria indo to ullämmä' kalena napamoloi'koa'. ⁷ Palandasannä' duka' salama'ku lako Andronikus anna Yunias. Bassim solaku to Yahudi, anna puhangkam sola-sola ditahungkum. Tä'pä' kao matappa' lako Kristus anna matappa'um ia mendiolo, anna tä' deem pada sakaissangam anna napa'kasallei ingganna suho.

⁸ Salama'ku duka' lako Ampliatius to kupakamaja aka sakalebungkam illaam sanganna Debata. ⁹ Palandasannä' duka' salama'ku lako Urbanus indo sababanganta illaam pengkähänganna Kristus. Susi toi duka' salama'ku lako Stakhis to kupakamaja. ¹⁰ Salama'ku duka' lako Apeles, to tontä manontom lako Kristus moi anna nahuai kamasussaam. Salama'ku duka' lako sahapunna Aristobulus, ¹¹ anna lako duka' Herodion indo

solaku to Yahudi. Anna salama'ku duka' lako Narkisus sahapu, solasubunta to matappa'.

¹²Salama'ku duka' lako Trifena anna Trifosa to ullämmä' kalena unγκähä pengkähängam Debata, anna duka' lako Persis to kupakamaja, to angga duka' ullämmä' kalena unγκähä pengkähängam Debata.

¹³Palandasannä' duka' salama'ku lako Rufus anna indona to sihhapam indo dadiangku. Rufus, mesa umma' petaunna Debata to meada' si'da-si'da.

¹⁴Palandasannä' duka' salama'ku lako Asinkritis, Flegon, Hermes, Patrobas, Hermas anna ingganna solasubunta to matappa' to si napasola itim.

¹⁵Salama'ku duka' lako Filologus anna Yulia, susi toi duka' lako Nereus anna indo solasubunna baine, anna susi toi duka' lako Olimpas anna lako ingganna to matappa' indo si napasola itim.

¹⁶Sisalama'-lama'koa' mesa sola mesa sola ponno penaba umba susi la sihatanna napogau' to matappa'um. Anna salama'na duka' matim ingganna to matappa' lako Kristus to kupasola illaam si mesa-mesa jumaa' inde.

Katampasanna pepakilalaanna Paulus lako jumaa' Roma

16:17-24

¹⁷O inggannakoa' solasubungku, kupelau si'da-si'da kuua, jagai manappaia' indo to la umpakende' kasipengkaam anna indo to la umpakabebe kamatappasanna hupatau lako Debata, aka indo pepatuduanna sikampeä indo to puha dipatuduangkoa'i. Pasikambelaia' kalemu tau ia too! ¹⁸Aka ingganna to ma'pogau' susi ia too, mannassa anna taiai pengkähänganna Kristus Debatanta napalako, sapo' napalako aka deem pattujunna la umponnoi pa'lalam penabanna. Manähhä-nähhä umpomatannim tula'

lako ingganna hupatau to la mala napa'tomaho-mahoi. ¹⁹Sapo' ikoa'-iko naissam asammi tau naua manuhu' si'da-si'dakoa' lako pepatuduanna Puang Allataala, nasuhum tä' deem pada samasannam penabangku diona indo pa'palakoammua'. Kupelau anna umpaillaam penabaia' ingganna hupanna kamapiaam, anna umpa'talinga lenda'ia' ia ingganna hupanna kakadakeam. ²⁰Puang Allataala kabuttuanna kamasakkeam sola kamasannangam la bale' umpadahi abum tomahajanna setam lambi' uhhondoi dokkoa'.

Handandanni Puang Yesus Debatanta untamba'koa' pada-pada.

²¹Kupalandasam duka' matim salama'na Timotius, indo sababanganku illaam pengkähängam di ada'. Salama'na toi duka' matim Lukius, Yason anna Sosipater, sangngim solaku to Yahudi.

²²Kao Tertius untulisanni inde suha'na Paulus. Kupopentunalla' duka' tula'ku saidi': salama'ku matim inggannakoa' solasubungku itim.

²³Kupalandasam duka' matim salama'na Gayus. Banuanna si kiongei tohho inde, anna banuanna toi si kiongei ma'sambajam solakam issinna jumaa' inde. Kupalandasam toi duka' salama'na Erastus indo kapalana to si muanna doi' illaam inde kota. Anna salama'na duka' Kwartus mesa solasubuntaa' to matappa'. [²⁴Handandanni Debatanta Yesus Kristus untamba'koa' pada-pada. La sule lako hi too!]

Kada pebubunna Paulus

16:25-27

²⁵Dipuji anna dipa'kasallei Puang Allataala! Anggam Ia kuasa umpakatoto' kamatappasammua' umpolalam indo Kaheba Katilallasam

to puha kupa'pakahebaam diona Yesus Kristus. Inde Kaheba Katilallasam to kupa'pakahebaam, iam too indo pattuju kada ditambinna Puang Allataala mahhatu'-hatu'um taunna tä' deem napelabillo hupatau. ²⁶Sapo' tentomai pattuju ia too dipa'patandaammi illaam suha'na ingganna nabi situhu' pahentana Puang Allataala to tubo liu sule lako salako-lakona. Pattuju ia too dipa'patandaammi anna

dipa'pakahebaam lako ingganna hupatau anna mala matappa' anna manuhu' lako Puang Allataala. ²⁷Anggam mesa-mesanna Puang Allataala anna angga toi Ia ullosa limbä anna untahhu' mandalam. Sihatam anna sipäto' la angga Ia dipa'kasallei sule lako salako-lakona umpolalam sanganna Yesus Kristus. Abana inna la diua!
Padam too.

Uhuna Suha'na Paulus lako Jumaa' dio Korintus

Bätäna issinna

Inde suha' natuli' Paulus napakatuum jumaa' dio Korintus, mesa kota kasalle dio propinsi Akhaya. Buda to Korintus tä'pi muissam Puang Allataala wattunna anna natuli'i Paulus inde suha'. Indo tau ia too umpenombai debata lino pa'papia kalena anna ma'gau' kadake liu. Paulus handam yolo umpa'pakahebaam Kaheba Katilallasam lako to Korintus lambi' deem sanaka-naka tau unkatappa'i Puang Yesus. Wattu eta too tohhom Paulus dio sataum anna annam bulanna umpa'pa'guhuam Battakada Debata illaam alla'-alla'na to Korintus (Suho 18:1-11). Masäe-säei lessu'na Paulus umpellei Korintus lu lako kota senga', iya sulem mesa to matappa' isanga Apolos to buttu dio mai Aleksandria. Mesa duka' to manähä ma'tula' anna to muissam si'da-si'da issinna Battakada Debata (Suho 18:24-19:1). Indo Apolos umpatahhu' pengkähänganna Paulus umpatudu to matappa' dio Korintus (1Kor. 3:6).

Sanaka amoi bulanna lessu'na Paulus, iya napakatuum suha' to Korintus. Inde Uhuna Suha'na Paulus lako Jumaa' dio Korintus, iam too suha'na Paulus umbala' indo suha'na to Korintus. Illaam inde suha'na Paulus untimba'i sanaka-naka pekutanaanna to Korintus (7:1,25; 8:1; 12:1; 16:1,12) anna napatudupi diona gau' tää'na sihatam la dipogau' (5:1; 11:18; 15:12). Ia anna napatudui aka napelele deem si ma'gau' kadake anna tä' ma'mesa penaba. Aka deem muuai: “Paulus kao kutuhu'i,” deem muuai: “Apolos kao,” lambi' kende' kasipengkaam illaam jumaa' (1:10-12; 3:1-6).

Illaam inde suha'na Paulus napatudu duka' diona kasialaam (hondongam 7), diona muande bale puha dipehumalasam lako debata lino (hondongam 8-10), diona kabiasaam ussapu'i ulu illaam pa'sambajangam (11:2-16), diona sihatanna dipogau' illaam pa'tosabeam sanda maseho (11:17-34), diona kapaissangam namanasangkia' Penaba Maseho (hondongam 12, 14), anna diona katibangonganna sule to mate (hondongam 15). Illaam hondongam 13, napomakaleso Paulus diona handam pahallu la dipogau': sikamase mesa sola mesa.

Lesoanna issinna

1. Kada passu'bi' anna katilallasanna Paulus napakende' längäm Puang Allataala (1:1-9)

2. Sanaka-naka pepakilalaanna Paulus (1:10-6:20):

a. Kasipengkaam illaam jumaa', anna deem to Korintus untumpu pala' Paulus (1:10-4:21)

b. To matappa' tä' la mala sola indo to ma'gau' sessu' illaam jumaa' (5:1-13)

c. Issinna jumaa' tä' la mala umbaba solana to matappa' lako to tä' matappa' la ia uhhotto'i (6:1-11)

d. Bätä puntinna to matappa' tä' mala dipake ma'gau' sessu' (6:12-20)

3. Kasialaam (7:1-40)

4. Bale puha dipehumalasam lako debata lino (8:1-11:1)

5. Kabiasaam ussapu'i ulu illaam pa'sambajangam (11:2-16)

6. Sihatanna dipogau' illaam pa'tosabeam sanda maseho (11:17-34)

7. Kapaissangam memanasam Penaba Maseho (12:1-14:40)

8. Katibangonganna sule to mate (15:1-58)

9. Doi' nahempum to Korintus la napamoloiam jumaa' dio Yerusalem (16:1-4)

10. Kada pebubunna Paulus (16:5-24)

1 Inde suha' buttu di kao Paulus to puha ditambai mendadi suhona Kristus Yesus aka situhu' pa'elo'na Puang Allataala. Duka' buttu di solasubuntaa' Sostenes ²lu lako inggannakoa' solasubungki umma'na Puang Allataala itim jumaa' Korintus. Puhangkoa' napasähä' anna nasehoi Puang Allataala mendadi umma'na aka kasilombungammua' Kristus Yesus, susi toi ingganna hupatau lako ongeam senga' to mengkaala längäm Debatantaa' Yesus Kristus indo to tapa'Debataia' pada-pada. ³Handandanni Puang Allataala Ambetaa' sola Debatanta Yesus Kristus la untamba'koa' anna namana' kamasakkeam sola kamasannangam.

**Katilallasanna Paulus diona
pa'mana' di ada'na Puang
Allataala lako jumaa' Korintus**

1:4-9

⁴Tä' deem kattunna umpakende'ä' katilallasam längäm Puang Allataala aka malangkoa' nakamasei nabeem pa'mana' di ada'na kahana kasilombungammua' Kristus Yesus. ⁵Aka pentuhu'nangkoa' Yesus Kristus, nasuhum puhangkoa' nabeem ingganna pa'mana' di ada'na illaam jumaa'mu susinna kamanähängam ma'tula' anna kapaissangam illaam ingganna kaha-kaha diona Puang Allataala. ⁶Kaha-kaha iam too umpomannassai diua titanam tongammi illaam penabammua' indo kapaissangam diona Kristus, ⁷nasuhum sundum illaam jumaa'mua' ingganna pa'mana' di ada' illaam inde wattu umpemmitai kasuleanna Debatanta Yesus Kristus ma'penduanna. ⁸La napakatoto'koa'

Debatanta Yesus Kristus sule lako allo ma'katampasanna anna mala tä' deem sassaimmua' nalambi' ke sulem ma'penduanna. ⁹Puang Allataala tontä manontom umpasule lako pa'dandianna to puha untambaikoa' napasakalebu Änä'na, battu diua Yesus Kristus Debatanta.

Kasipengkaam illaam jumaa'

1:10-17

¹⁰O inggannakoa' solasubungku, sola sanganna Debatanta Yesus Kristus, kupelau anna sambätu'koa' anna mesa pengngolo illaam ingganna kaha-kaha. Daa umpakende'a' kasipengkaam illaam alla'-alla'mu, sapo' la mesa penaba hako' ia anna mesa pattuju. ¹¹Ia anna ma'kada susiä' matim inggannakoa' solasubungku, aka deem sanaka-naka tau sahapunna Kloe sule umpa'tulasannä' naua: "Deem kende' kasipengkaam dio." ¹²Indo kuaaam kasipengkaam, deem muuai: "Paulus kao kutuhu'i," deem muuai: "Apolos kao," deem toi duka' muuai: "Petrus kao kutuhu'i"⁸ anna deem piha muuai: "Pentuhu'naä' kao Kristus." ¹³Moi kela daa tä' kao deem kuissam dibahe-bahe Kristus! Tä' toi deem dipäso'ä' yabo kaju sitambem la umpendudungangkoa' dosamu! Tä' tookoa' deem ditedo' sola sangangku, le'? ¹⁴Mapianna hia aka padakoa'i, iya anggam Krispus sola Gayus kao untedo'i, ¹⁵nasuhum tä'koa' deem la mala muuai: "Natedo'ä' Paulus anna malaä' mendadi pentuhu'na." ¹⁶(O Stefanus-pi toda' sahapu kutedo' bale! Sapo' situhu' pa'kilalaangku, tä'um deem tau senga' kutedo' sulibanna ia too). ¹⁷Aka kao-kao tä' deem nasuaä' Kristus la mantedo', sapo' nasuaä' la umpa'pakahebaam indo Kaheba

§1:12 *Petrus*: illaam basa Yunani naua: *Kefas*. Batäi duka' 3:22; 9:5 anna 15:5. Petrus battu diua Simon Petrus si disangai duka' *Kefas*.

Katilallasam buttu yabo mai Puang Allataala. Anna taia kamanähängam hupatau kupake umpa'pakahebaam indo Kaheba Katilallasam lako hupatau. Aka maka' la ia nasuhum matappa' hupatau, iya la labu' bábä indo kakuusaanna kamateanna Kristus yabo kaju sitambem.

**Kaheba Katilallasam diona
Kristus naongei ma'tandaam
kakuusaanna Puang Allataala**

1:18–2:5

¹⁸Anna maka' dipa'pakahebaam kaheba diona kamateanna Kristus yabo kaju sitambem, iya nasangai ia to inna la ullambi' katilakaam: “Tula'na to maho.” Sapo' lako kita to dipasalama', taissanna' kita pada-pada taua kaheba ia too naongei Puang Allataala umpa'patandaam kakuusaanna. ¹⁹Aka deem tisuha' illaam Battakada Debata naua:

“Indo kakeakasanna to ma'keaka'-aka' la kusapui,
anna indo kapaissanganna
to ma'manähä-nähä la
kupempa'deam.”**

²⁰Iya akam gunana indo to manähä? Akam gunana indo to ullatta' Pepaondonganna Musa? Anna akam gunana indo to manähä ma'tula'? Iya mannassa anna napa'patandaammi Puang Allataala indo kamanähänganna hupatau tä' deem gunana! ²¹Aka moi la umba susi kakeakasanna hupatau, tala malai umpengngissanni Puang Allataala kela kakeakasam di kalenai. Sapo' situhu' kakeakasanna Puang Allataala nakattu naua menna-menna unkatappa'i indo Kaheba Katilallasam kipa'pakahebaam, tau ia too la salama', moi anna nasangai hupatau indo kaheba ia too: “Tula'na to maho.” ²²To Yahudi

ia moka matappa' ke tä'i deem tanda memängä-mängä naita. Anna to Yunani ia, moka matappa' ke taiai to manähä umpa'tula'i. ²³Sapo' kami'-kami', anggam diona kamateanna Kristus yabo kaju sitambem kipa'pakahebaam. Sapo' tä' ia naala akkalanna to Yahudi, anna nasangai ia to Yunani katomahoam. ²⁴Sapo' indo ia to puha natambai Puang Allataala, susi to Yahudi teem taianna to Yahudi, dibukkaiaam ia mata di ada'na anna mala naissam naua indo kaheba diona Kristus naongei ma'tandaam kakuusaanna anna kakeakasanna Puang Allataala. ²⁵Aka indo kakeakasanna Puang Allataala to nasangai hupatau: “katomahoam,” setonganna keaka' puha ia anna la kakeakasanna hupatau. Susi toi pa'palakoanna Puang Allataala to nasangai hupatau: “kamalammaam,” setonganna matoho puha ia anna la kamatohoanna hupatau.

²⁶O inggannakoa' solasubungku, la ungilalai hia' tia katuboammu indo anna wattunnai natambaikoa' Puang Allataala. Wattu eta too, anggam saidi' illaam alla'-alla'mua' indo to disangai to keaka', to kasalle, anna änä' puä. ²⁷Aka naägä'i hi tia Puang Allataala umpilei to nasangai hupatau to maho, anna mala masihi' ingganna to keaka'. Anna naägä'i toi duka' Puang Allataala umpilei to naangga' hupatau malamma, anna mala masihi' ingganna to ussangai kalena matoho. ²⁸Napilei Puang Allataala to nasangai hupatau tä' keangga', to napa'pa'dei solana, susi toi duka' to nasangai hupatau tä' deem gunana anna mala napa'dei Puang Allataala indo to nauaam hupatau to la dipa'kasallei. ²⁹Napateem anna mala tä' deem moi podo la mesa hupatau ussanga-sanga kalena dio olona Puang Allataala. ³⁰Aka ma'kale Puang Allataala unghähäi lambi'

**1:19 Yes. 29:14.

malakoa' dipasakalebu Kristus Yesus, nasuhum malaa' taissam kakeakasanna Puang Allataala. Ia toi napolalam anna malakia' napomalolo Puang Allataala anna napasähä' mendadi umma'na anna nalappasam dio mai kakuasaanna dosa. ³¹Dadi, "Menna-menna la tilalla', taia kalena la nasanga-sanga, sapo' indo to puha napogau' Puang Allataala, ia hi tia pahallu napa'kasallei," umba susi puha tisuha' illaam Battakada Debata.††

2 O inggannakoa' solasubungku, indo anna itinnä' umpa'pakahebaam diona pattujunna Puang Allataala, iya tä' deem ma'tula'ä' la umpake kada ada' battu haka la kamanähänganna hupatau. ²Aka abana inna kuua, tä' kao kuaku la untula' aka-aka senga' illaam alla'-alla'mua' sulibanna Yesus Kristus, la'bi-la'binna indo kamateanna yabo kaju sitambem. ³Wattunna anna kupellambi'ikoa', iya malammaä' kusi'dim anna lumalla'ä' mahea'. ⁴Indo pepatuduam kutulasangkoa' anna indo kaheba kupalandasangkoa' tä' deem kutula' umpake kamanähängam hupatau anna tä' toi deem kupamammisangkoa' tula', sapo' mesa-mesanna kakuasaanna Penaba Maseho umpomakalesoi diua tappa' indo kaheba ia too. ⁵Susim too anna mala matappa'koa' lako Kristus kahana kakuasaanna Puang Allataala, taia kahana kamanähängam hupatau.

Kakeakasanna Puang Allataala

2:6-16

⁶Moi anna susi, sapo' maka' illaangkam alla'-alla'na to matappa' indo to matoto'um kapeimanganna, abana ma'tula'kam ia pole' umpake kada naponnoi kakeakasam. Sapo' kakeakasam ia too, taia kakeakasam

di lino battu haka kakeakasanna ingganna to ma'kuasa illaam inde lino, indo to la dipa'dei kakuasaanna. ⁷Indo kipepatuduam, iam too indo kakeakasanna Puang Allataala to napokada ditambimpi mengkalao dio mai. Sapo' setonganna tä'pi dadi inde lino anna nakattu loppo'um Puang Allataala naponnoi indo kakeakasanna la malakia' mangngala taba illaam kamatandeanna. ⁸Tä' deem moi podo la mesam to kuasa illaam inde lino la umpelabilloi indo kakeakasam ia too. Aka indo kela deenni umpelabilloi, iya mannassa anna tä'i la umpäso' Debatanta to handam matande yabo kaju sitambem. ⁹Sapo' inna puha tisuha' di tia illaam Battakada Debata naua: "Lako to ungkamasei Puang Allataala puha napatokaam kaha-kaha handam mapia

indo to tää'napi deem diita sola mata, anna tää'napi deem dihingngi sola talinga, anna tää'napi nalambi' suhi'na hupatau."‡‡

¹⁰Sapo' inna napalosaingkia' kita Puang Allataala umpolalam Penaba Masehona. Aka Penaba Maseho ia ullosa ingganna aka-aka, sule lako ingganna pattujunna Puang Allataala moinna anna tibuniangam pih'i'. ¹¹Aka umba susi hupatau anggam ia duka' kalena muissanni issi penabanna, susim too duka' diona Puang Allataala, anggam tia duka' Penaba Masehona muissanni tama penabanna! ¹²Kitaa'-kita tä'kia' dibeem pikkiham hupatau, sapo' indo dibeengkia' ma'kale Penaba Maseho indo to napatamaangkia' kaleta Puang Allataala anna mala takaleso manappaa' indo ingganna mana' pa'kamasena Puang Allataala

††1:31 Yer. 9:24.

‡‡2:9 Yes. 64:4.

lako kita. ¹³Anna maka' kipepatuduum ingganna ia too, tä'kam kami' ma'pa'guhu situhu' kamanähängam hupatau. Sapo' kada napatuduangkam Penaba Maseho kipake umpomasiä' kaha-kaha mendebatanna lako to puha untahima Penaba Maseho. ¹⁴Lako to tä'pi napentamai Penaba Masehona Puang Allataala, mannassa anna moka untahimai indo to buttu dio mai Penaba Maseho. Aka nasangai manditia kaha-kaha ia too, katomahoam. Lako tau susi ia too, mannassa anna tä'i naala pikkihanna, aka anggama to tibukka mata di ada'na mala natama pikkihanna. ¹⁵Lako to napentamai Penaba Maseho, mannassa anna naissanni umpikki' ingganna kaha-kaha mendebatanna. Sapo' lako to tä' muissam Puang Allataala, tä' ia deem moi podo la mesa muissanni pikkihanna indo to napentamai Penaba Maseho. ¹⁶Umba susi tisuha' illaam Battakada Debata naua: "Mennangka la muissanni diona pikkihanna Puang Allataala? Anna mennangka la mala umpatudui?"^{¶¶} Sapo' kitaa'-kita siampuammakia' pikkihama susi pikkihanna Kristus!

Diona kasipengkaam illaam jumaa'

3:1-23

3 Setonganna inggannakoa' solasub-ungku, indo lessu' anna itinnä' tä'koa' mala kupa'tula'i susi to puham napentamai Penaba Maseho. Sapo' anggama kupa'tula'i susikoa' to untuhu'pi sipa' dosana hupatau battu diua to manipi'pi kamatappasanna lako Kristus, aka sihhapampokoa' änä'-änä' malea illaam kamatappasam. ²Umba susi änä'-änä' sumusupi tä'pi mala dibeem kinande makahha', susingkoa' too duka' wattu eta too, kupatudukoa' pepatuduum la si-

hatanna dipatuduum lako tau to tä'pi matoto' kamatappasanna, aka abana tä'pi umbelaa' untahima pepatuduum mandalam. Anna sule lako temo tä' liupia' umbela untahima, ³aka nakuasai liupokoa' sipa' dosana hupatau. Aka maka' deem liupia' illaam alla'-alla'mu to si ma'kembuhu anna to sipengka, mannassa ia umpatandaanni diua tubo liupokoa' situhu' sipa' dosana hupatau, susi to tä'pi unkaleso Puang Allataala. ⁴Aka maka' deengkoa' muuai: "Pentuhu'naä' kao Paulus," anna piha muuai: "Pentuhu'naä' kao Apolos," iya mannassa anna iai umpatandaanni diua susi liupia' pa'palakoammu to tä' unkaleso Puang Allataala.

⁵Aka setonganna, Apolos anna kao tontä bábäm. Bassim sabua'na bábäkam Puang Allataala to umpatettekoo' anna mala matappa'koa' lako Kristus. Anggangkam bassim umpalako pengkähängam puha napapassanniangkam Debata. ⁶Aka kutanam kao sihhapam tanangam anna nalima'i ia Apolos, sapo' ma'kale Puang Allataala umpatuboi anna napalobo'. ⁷Dadi, taia tia to mantanam anna to mallima'i la dipaitoo'na sapo' Puang Allataala hia pahallu dipaitoo'na, aka Ia to umpatuboi anna umpalobo'i. ⁸To mantanam anna to mallima'i pada bábäm. Anna bassim la untahima sahona situhu' kamahesoanna. ⁹Kami'-kami' bassim to mengkähänakam Puang Allataala. Anna ikoa'-iko bela' di ada'nakoa' Puang Allataala.

Anna mala toi kakalebuammua' dipasihpam banuanna Puang Allataala napake'de'. ¹⁰Aka pa'kamasena Puang Allataala nasuhum namana'ä' kao kamanähängam umpaokko' batu longkahhim la

^{¶¶}2:16 Yes. 40:13.

dipa'pake'de'i banua ia too. Anna tau senga' pole' umpake'de' banua yabona indo batu longkahhim. Sapo' anggam ia, aka pahallu napetua' manappa to la unghähäi indo banua la naaka susi anna mala sihondoi indo batu longkahhim ia too. ¹¹Aka anggam mesa-mesanna Yesus Kristus napadadi Puang Allataala batu longkahhinna banua di ada' ia too. Dadi tä' la mala deem batu longkahhim senga' dipaokko'. ¹²Indo to umpake'de' banua yabona indo batu longkahhim ia too, deem tau umpake pangkakka' mapia susinna bulabam, peha', anna batu masuli'. Anna deem toi duka' umpake pangkakka' tää'na mapia susinna kaju, humpu', anna dalame. ¹³Illaampi tia allo kasuleanna Puang Yesus ma'penduanna mane dipangngitai pengkähäna si mesa-mesa tau sihhapam disudi tama api. Etapi too pole' mane diissanni diua mapia haka indo pengkähäna, kadake haka. Dadi maka' too tä' naande api indo banua, iya pangkakka' mapia too napake umpake'de'i. Anna maka' too naande api, iya pangkakka' kadake too napake. ¹⁴Maka' too tä' naande api indo pengkähäna mesa to mengkähä, iya mannassa anna tau ia too la untahima sahona. ¹⁵Sapo' maka' naande api pengkähäna ke puham nasudi Debata, iya la ussi'dim too kahugiam. Kalembasanna, moi anna la salama' ia kalena, sapo' tä' ia la disahoi. Aka la sihhapam mesa tau to naande api banuanna: ingganna pohebana pa'de, sapo' salama' ia kalena.

¹⁶Tä' isanga muissanna' diona kalemu? Kakalebuammunna' too banuanna Puang Allataala anna Penaba Masehona tohho illaam kalemua'!

¹⁷Menna-menna unghadakei indo banuanna Puang Allataala, mannassa anna la nakadakei duka' Puang Allataala tau ia too. Aka maseho indo banuanna Puang Allataala, anna kakalebuammunna' too indo banuanna Puang Allataala.

¹⁸Daa umpasalanduanna' kalemu la anggam uhhannuam kamanähängam di lino. Aka maka' deem illaam alla'-alla'mua' ussangai kalena to manähä situhu' passangainna hupatau, iya pahallu la natampeam ia too lambi' mendadi to maho situhu' passangainna hupatau anna mala mendadi manähä situhu' passangainna Puang Allataala.

¹⁹Aka indo to nasangai hupatau kamanähängam, nasangai Ia Puang Allataala katomahoam, umba susi puha tisuha' illaam Battakada Debata naua:

“Kamanähänganna siam hupatau napake Puang Allataala umpatumäi.”^{§§}

²⁰Anna naua polepi illaam Battakada Debata:

“Naissam Debata naua pikkihanna ingganna hupatau to manähä di lino tä' deem gunana.”*

²¹Iam too anna tä'ungkoa' la mala umpakate'de' padammu hupatau. Aka ingganna kaha-kaha umpahalluanna' abana inna dipadokkoammokoa' lisu pala'mu la muampuam. ²²Aka susi kami' sola Apolos anna Petrus, teem inde lino sitonda issinna, katuboam anna kamateam, wattu temo anna wattu mane la sulena, ia asanna ia too dipadokkoam asammokoa' lisu pala'mu la muampuam. ²³Anna ikoa'-iko, ampuannakoa' Kristus anna Kristus Ia ampuanna Puang Allataala.

§§3:19 Ayb. 5:13.

*3:20 Puj. 94:11.

Suhona Kristus la dipotandengam

4:1-21

4 La uhhekem sabua'nakam kami' Kristus to dipapassanni babaam la umpa'paissangam kada ditambinna Puang Allataala indo tä'pi deem napelabillo hupatau. ²Inde isanga to disua tau, pahallu iannapi anna ia dipalako situhu' pa'elo'na to ussuaki'. ³Maka' deem illaam alla'-alla'mua' to umpasalaä', iya tä' maaka aka tä' siam la kupehingngii. Moi menna la umpasalaä' tä' manggi' kupehingngii. Susi toi duka' kaleku, tä' bahaniä' la ussangai inde pengkähängangku mapia haka, kadake haka. ⁴Sapo' anggam ia, aka maka' kupasalui penaba, iya tä'pi deem kasalaangku kusi'dim. Sapo' ia hia, takao la ussangai kaleku, Debata ham ussangai inde pengkähäku, mapia haka, kadake haka. ⁵Dadi, daa um-masimpanna' ungkattui kamapiaanna anna kakadakeanna pengkähäna mesa tau, aka taiapi wattunna. Sulepa Debata mane Iai ungkattui kamapiaanna anna kakadakeanna pengkähäna si mesa-mesa hupatau. la ham umpa'patandaanni ingganna tibuninna illaam kamalillingam anna la umpakaleängam ingganna pattuju penabanna hupatau. Wattu etapi too mane napujii Puang Allataala ingganna to la sihatam napuji.

⁶O inggannakoa' solasubungku, inde kaha-kaha kutuli' illaam suha'ku, kao nahua anna Apolos. Malakam umpehapani aka kami'-kami' kituhu'im indo paondom naua: "Antii manda' tobei matoto' indo to puha tisuha'." Aka maka' umpehapannikam, iya tä'koa' deem moi podo la mesa malangka' penaba la umpakate'de' mesa tau anna muita dokkoa' mesa tau. ⁷Menna ussangai' mentando längäm puhakoa' iko anna la solamu? Tä' daka tia ingganna aka-

aka illaanna' kalemu buttu yabo asam mai Puang Allataala? Sapo' akanna malangka' penaba hako'? Mato-mato indo muampuanna' illaam kalemu deem bää, tä'koa' dibeem!

⁸Ussanga haka' iko tä'um deem kakuhängammua'? Umbai' malangkoa' disangai to makaka! Anna umbai' mala toongkoa' mendadi tomahaja! Anna kami'-kami' tä' bää deem aka. Mala hi tia kela mendadi tomahaja si'da-siakoa' anna malakia' pada-pada ma'pahenta! ⁹Ia anna ma'kada susiä' matim aka situhu' kao pikkihangu, kami'-kami' inggannakam suhona Yesus Kristus abana napadadikam Puang Allataala hupatau to handam matuna. Napasusikam to handam matuna to la dipahuai pa'tahungkungam sampe mate napengkitai tau buda anna ingganna malaika'. ¹⁰Nasangaikam kami' hupatau to maho aka unkatappa'ikam Kristus, anna ikoa'-iko ussangai' kalemu to matappa' keaka! Malammakam kami' anna umbai' matohokoa' iko! Naita dokkokam kami' hupatau anna umbai' napa'kasalleikoa' iko! ¹¹Sule lako temo sitammu liupakam kami' kakobeam anna kamabähhängam, angga ham illaanna kaleki poheba kadäkke' anna diuai deem siapi pa'sampingangki. Si nadahha polepakam liu tau anna tä' toi deem ongeam ma'lesoam si kiongei tohho. ¹²Anna si mengkähä kahha' liukam kami' umpeä kapahalluangki. Maka' deem tau umpetunakam, iya si kipelauam mandi pa'tamba'. Maka' didahhakanni, iya anggangkam sa'baha'. ¹³Susi siam ke deenni tau umpakolo'-kolo'ikam, si kipabala'i mandi tula' bulabam. Sule lako temo dipasihpam bääkam kami' humpä, anna bubosinna inde lino.

¹⁴Inde kuuaangkoa' temo, tä' kuua anna malakoa' masihi', sapo' inde pepakilalaangku matim kupasusikoa'

änä' to kupakamaja. ¹⁵ Aka moinna anna deem massa'bu-sa'bu tuangguhummua' to umpatettekoea' illaam kamanuhusam lako Kristus, sapo' anggamä' mesa ambe di ada'mua'. Aka anggamä' mesa uhuna umpaissannikoea' Kaheba Katilallasam lambi' matappa'koa' lako Kristus Yesus. ¹⁶ Iam too kasuhunganna anna kupelau si'da-si'danna' matim anna umpotandengam manappaä'. ¹⁷ Iam too anna kusuam Timotius matim umpellambi'ikoa'. Mesa duka' to untuhu'i Kristus, sihhapam änä' ikaleku to kupakamaja, anna ia toi to mala dihannuam. La napakilalakoea' diona maaka susi pa'palakoangu illaam untuhu'i Kristus Yesus, indo sihindoinna pepatuduangu lako ingganna jumaa'.

¹⁸ Deem sanaka-naka tau illaam alla'-alla'mua' malangka' penaba, aka nasanga tä'mä' la matim. ¹⁹ Sapo' maka' naua Debata, tä'um la masäe anna matimmä' umpellambi'ikoa'. Etapi too mane kuitai aka amo la napogau' indo to malangka' penaba, battu la deem si'da hi kakuasaanna, battu la kadanna bäbä hi. ²⁰ Aka maka' la kakuasaanna Puang Allataala illaam kalena tau ia too, mannassa anna la napatandaanni illaam pa'palakoanna, tä' la angga tula'na bäbä. ²¹ Dadi la umpise'ia' umpohäena! La matim däkä' anna kukeaha'ikoa', la matim däkä' anna kupatudukoea' memmaja-maja?

Diona dosa illaam jumaa'

5:1-13

5 Kukapilla'i si'da-si'da gau'mua', aka deem kutahima kaheba diona gau' sessu' liba' sugali' kadakena kende' illaam alla'-alla'mua'. Ditula' diua deem illaam alla'-alla'mua' umpasola metindo

pohona battu diua baina ambena. Tandana kadake gau'na tau ia too, moi to tä' ungalleso manappa Puang Allataala tä' toi napogau' gau' susi ia too. ² Sapo' ikoa'-iko, tontä liupokoea' malangka' penaba, moi kela daa la sihatangkoa' masussa penaba umpikki'i kaha-kaha ia too. Aka setonganna la pahallua' muäläi illaam mai alla'-alla'mu tau ia too anna mane hua. ³⁻⁴ Maka' di sesena mehhiputaunna, sikambelakia', sapo' maka' dipikki' di sesena mendiada'na, mala diua illaam siamä' alla'-alla'mua' nasuhum kao la ungtattui kaha-kaha ia too, mato-mato itim siamä'. Dadi sola sanganna Puang Yesus Debatanta kukattum temo kuua indo tau to umpalako gau' sessu' liba' sugali' kadakena, pahallu la dipahuai pa'tahungkungam. Dadi maka' ma'hempungkoa', la muangga'a' mato-mato dio siamä' heem. Sola sanganna Puang Yesus Debatanta ⁵ la muäläia' tau ia too illaam mai kakalebuanna jumaa' anna umbehoia' tama pala' limanna tomahajanna setam anna mala nalambi' katilakaam bätä puntinna, umba ke malai untihokongam gau'na anna salama' ia sungnga'na ke sulem Debatanta ma'penduanna.

⁶ Tä'koa' sihatam la malangka' penaba ussangai kalemu mapia. Aka umbai' ungtikalalai hia' tia indo deem mesa kada naua: "Sai'di' bibi' hoti mala ussamba buda tappum lambi' ma'pakembea' kela dipapai hoti."[†] ⁷ Umba susi to Yahudi si muäläi illaam mai banuanna ingganna bibi' hoti masäem ke lambi' oom allo Kalappasam, iya la susingkoa' too duka' anna mane. La muäläia' duka' illaam mai kakalebuanna jumaa' indo to madosa anna mala masehoa' katuboammu sihhapam hoti bakahu tä' diboloi bibi',

[†]5:6 Sai'di' bibi' hoti mala ussamba buda tappum lambi' ma'pakembea' kela dipapai hoti: susi ke diuai: Mesa tedom ma'tombä ullelei solana saballa galum.

aka abana to puhangkoa' nasehoi Puang Allataala. Aka Yesus Kristus puha dipatei aka nalappasangkia' dio mai dosata sihapam änä' domba si natunu to Yahudi la diande illaam allo Kalappasam. ⁸Dadi la tontä liukia' allo-allo tilalla' illaam penabanta umpengkilalai kalappasanta. La tatibeä' indo bibi' hoti masäem, kalembasanna gau' kadaketa anna gau' bubosinta. Anna la taandea' indo hoti bakahu to tä' diboloi bibi', kalembasanna ingganna pa'palakoanta la tapalako sola unä' penaba sambulo-bulo.

⁹Kupaillaangangkoa' suha'ku indo lessu' kuua: "Tä'koa' la mala ma'mesa sola indo to ma'gau' sessu'." ¹⁰Indo to kuuaam tä'koa' la mala ma'mesa sola, taia indo ingganna to tä' ungkaleso Puang Allataala anna ma'gau' sessu'i battu haka ma'podo kao battu haka manähhä-nähhä battu haka umpenombai debata lino pa'papia kalena. Aka maka' hapanna la ia kuuaam, iya anggam tia anna la malakoa' sisähä' ke mäläikoa' illaam mai inde lino. ¹¹Sapo' inde kuuaam tä'koa' la mala ma'mesa sola, indo to ussangai kalena to matappa' duka' lako Kristus sapo' ia hi umpogau' gau' sessu', ma'podo kao, umpenombai debata lino pa'papia kalena, battu haka napohäe si untula'-tula' kadake solana, battu haka to si umpamäbo' kalena battu haka to manähhä-nähhä. Moi la solakoa' mangngande tau susi ia too, tä' toi la mala! ¹²⁻¹³Setonganna, taia kao uhusangku la umpassala mesa tau ke taiai solata to matappa'. Puang Allataala ia la umpopa'tadongkonganni kasalaanna. Sapo' diona jumaa'mua' setonganna pahallukoa' la ma'kale umpassalai indo to ma'gau' kadake illaam. Aka deem tisuha' illaam

Battakada Debata naua: "Äläia' illaam mai alla'-alla'mu indo to ma'gau' kadake."[‡]

**Kaha-kahana to matappa'
tä' mala la dipalulako to
tä' matappa' la ia uhhotto'i**

6:1-11

6Maaka anna deenni illaam alla'-alla'mua' palla' penabanna umbaba kaha-kahana lako to tä' matappa' la nahotto'? Akanna tä'i ma'kalekoa' to matappa' umpapiäi ke deenni kende' kaha-kaha illaam alla'-alla'mua'? ²Tä' daka' tiko muissam muua inde issinna lino abana inna umma'na Puang Allataala la uhhotto'i? Maka' ikoa' la uhhotto' issinna inde lino, iya maaka hi anna tä'ia' umbela la uhhotto' kaha-kaha bahinni'? ³Tä' daka' tiko muissam muua malaika' duka' anna la kitaia' uhhotto'i? Damoa-ham ia kaha-kaha katuboam allo-allo! ⁴Maka' deem kende' mesa kaha-kaha illaam jumaa', iya akanna manggi' ohi dibaba lako to mahhotto' taia issinna jumaa'?[†] ⁵Ia anna ma'tula' susiä' aka kuua anna malakoa' masihi! Tä' daka' tia deem siam illaam alla'-alla'mua' to manähä la uhhotto'i ke deenni sisala bingkum bassim to matappa'? ⁶Sapo' deem di to matappa' palla' ia penabanna umpahapa' padanna to matappa' lako to tä' matappa'!

⁷Maka' deem liupi kende' kasipengkaam illaam alla'-alla'mua', iya iam tia isanga to talongkoa'. Aka setonganna aha leko'um tia ia siam anna ia napogausangkoa' padammu to matappa', battu haka nahugiangkoa' anna la umbaba lako olona to mahhotto'. ⁸Moi kela daa iko sianna' duka' si ma'pateem ia siam anna ia umpogausam padammu anna

[‡]5:12-13 Pass. 13:5, 17:7.

[†]6:4 taia issinna jumaa': Deem duka' muuai: to tä' deem okkosanna illaam jumaa'.

uhhugiam, moi kela daa padammu sianna' to matappa' umpateem.

⁹Tä' daka' tiko muissam muua tä' sia ia la mala mangngala taba illaam kapahentaanna Puang Allataala ingganna to kadake gau'? Daa umbulinna! Aka ingganna to ma'gau' sessu', to umpenombai debata lino pa'papia kalena, to ullullu' pa'bannetauam, susi toi duka' muane to kende' penabanna la sigau' samuanena, ¹⁰to kaboko-boko, to ma'podo kao, to si umpamäbo' kalena, to si untula'-tula' kadake solana, anna to manähhä-nähhä, ingganna tau susi ia too tä' sia ia la mala mangngala taba illaam kapahentaanna Puang Allataala. ¹¹Setonganna deem siangkoa' duka' ma'gau' susi indo yolona. Sapo' temo puham nabasei Puang Allataala indo dosamua' anna napasähä'ungkoa' mendadi umma'na anna napomalolo. Kaha-kaha ia too napogau' Puang Allataala umpolalam pengkähäna Debatanta Yesus Kristus sola kakuasaanna Penaba Maseho.

**Kabebasanna to Sahani tä'
diua la beba' umpogau' dosa**

6:12-20

¹²Ingganna-ingganna sia mala asam kupogau'. Sapo' ia hia aka tä' la keguna asam tama kaleku. Dadi kao-kao, moi anna la mala asanni kupogau', sapo' tä' kuaku la nakuasai mesa pa'pogausam. ¹³Deem tau muuai: "Dipadeem kinande kahana tambu' anna tambu' duka' dipadeem kahana kinande." Sapo' inde kinande anna tambu' tä' la da'da' liu, pissam wattu la napa'dei siam Puang Allataala. Inde bätä puntinta napadadi Debata tä' la dipake ma'gau' sessu', sapo' anggam la dipake umpalako pa'elo'na, anna Debata ham umponnoiangki' kapahalluam bätä puntinta. ¹⁴Puang

Allataala puha umpatibangom sule Puang Yesus Debatanta dio mai alla'na to mate. La napasusingkia' too duka' Puang Allataala umpake kakuasaanna. ¹⁵Mannassa anna muissannia' muua bätä puntinta pangkakka'na duka' bätä puntinna Kristus. Dadi la sihatam daka tapake inde pangkakka' bätä puntinna Kristus umpasola baine passunda'? Mannassa anna tä'i sihatam! ¹⁶Tä' daka' tiko muissam muua menna-menna sola metindo baine passunda', mannassa anna mendadi mesam indo baine passunda'? Aka puha tisuha' illaam Battakada Debata naua: "Duai la mendadi mesa illaam ingganna-ingganna sia."[§] ¹⁷Sapo' menna-menna umpamesa kalena Debata, mannassa anna sihindäm ia penabanna tau ia too anna Penabanna Debata.

¹⁸Pasikambelaia' kalemu gau' sessu'. Ingganna hupanna dosa napogau' hupatau sulibanna gau' sessu', tä' ia madosa lako bätä puntinna. Sapo' ma'gau' sessu' ia madosa lakoki' bätä puntinta. ¹⁹Tä' daka' tiko muissam muua bätä puntimmua' banua di ada'na Penaba Maseho to tohho illaam kalemua'? Ma'kale Puang Allataala umpatamaangkoa' kalemu Penaba Maseho. Anna kalemua' taikoa' umpuänganni, sapo' Puang Allataala umpuänganni. ²⁰Aka puhangkoa' naalli ponno Puang Allataala. Dadi pakeia' bätä puntimmu umpuji sanganna Puang Allataala.

Kasialaam

7:1-16

7 Tentomai la kutimba'i indo pekutanaammua' illaam suha'mu. Mapia duka' ke tä'i kebaine mesa muane. ²Sapo' aka buda tau si

[§]6:16 Kad. 2:24.

ma'gau' sessu', dadi mapia puha ia ke kebainei mesa muane, battu kemuane mesa baine. ³Sapo' anggam ia aka mesa muane pahallu la sola metindo bainena, battu haka baine la pahallu sola metindo muanena. Aka bassim pahallu la napalako indo si biasanna dipogau' illaam kasipobaineam. ⁴Aka bätä puntinna mesa baine taia kalena unguasai, sapo' setonganna muanena unguasai. Susim too duka' bätä puntinna mesa muane taia kalena unguasai, sapo' setonganna bainena unguasai. ⁵Lako ikoa' to sipobaine, tä'koa' la mala masäe sisähä' metindo. Mala ia ke si sanaka-nakai benginna anna mala umpasatutuikoa' penabammu sambajam, sapo' la sipattujukoa' yolo. Puhai too, iya sola ongkoa' sule metindo indana deenni naola tomahajanna setam napa'sändä'ikoa' aka tä' sianna' la umbela unguasai kalemu. ⁶Inde kuuaangkoa' taia pahenta, sapo' pepakilalaam. ⁷Setonganna kupohäe puha ia ke napasusiiä' ingganna tau tä' duka' mandapo'. Sapo' tä'kia' susi-susi aka pantam namana'kia' Puang Allataala. Deengkia' dimana' la mandapo' anna deengkia' dimana' la masannam disi'dim ke tä'i tau mandapo'.

⁸Indo to tä'pi mandapo' battu haka to balu baine matem muanena kupakilala kuua: mapia puha ia ke tä'um manggi' mandapo', susiä'. ⁹Sapo' maka' tä' la ussahaa' untähäm kamohäeam sugali'mu, iya aha pissammokoa' mandapo' anna la nakadakeikoa' kamohäeam sugali'mu.

¹⁰Lu lako to mandapo'um la napailaam tambu' inde pahentaku (setonganna taia pahenta kaleku, sapo' pahenta buttu yabo mai Debata): mesa baine ke kemuanem, tä' mala untibe muanena. ¹¹Sapo' maka' deem baine untibe muanena, tä'um mala la kemuane

pole. Anggam mala ke ussulei sule muanena. Susi siam duka' muane tä' si'dasi'da mala la untibe bainena.

¹²Anna mane deenni, pepakilalaangu ia (taia paondom Debata) la lu lako ia solata to siala taianna to matappa'. Lako muane indo to tä' matappa' bainena, sapo' naakupi indo bainena siala, iya tä' mala la natibe indo baine ia too. ¹³Susi siam duka' lako baine indo to tä' matappa' muanena, sapo' naakupi indo muanena siala, iya tä' mala la natibe indo muane ia too. ¹⁴Aka indo muane to tä' matappa' la ussi'dim duka' pa'kamasena Puang Allataala kahana siala baine to matappa'um. Susi siam duka' baine to tä' matappa' la ussi'dim toi duka' pa'kamasena Puang Allataala kahana siala indo muane to matappa'um. Hapanna tä' la susi, iya indo pessubunna la dihekem änä'na to tä' matappa', anna setonganna to nakamaseim Puang Allataala indo änä'na.

¹⁵Sapo' tä' la ullabaia' indo to tä' matappa' ke maelo'i untibe muanena battu haka bainena indo to matappa'um. Maka' susi, iya indo to matappa' baine haka muane haka beba'um ia, tä'um tisäke'. Sapo' pa'elo'na Puang Allataala la tubokia' illaam kasiolaam. ¹⁶Aka tä' diissam umba ke toko mala hi indo baine to matappa'um umbaba muanena lako kasalamasam. Anna tä' toi duka' diissam umba ke toko mala hi indo muane to matappa'um umbaba bainena lako kasalamasam.

La tubokoa' umba susi inna susinna wattungna anna natambaikoa' Puang Allataala mendadi umma'na

7:17-24

¹⁷Si mesa-mesa tau pahallu la tontä liu tubo umba susi inna susinna lako kalena indo puha nabeem Debata wattungna anna natambai Puang Allataala la

mendadi to matappa'. Iam too inde ätoham la dipehhondoi si kupepatuduam lako si mesa-mesa jumaa'.¹⁸ Susinna to inna balim disunna' battu diua to Yahudi indo anna natambai Puang Allataala la matappa', tä'um pahallu la napa'dei sule indo sunna'na. Susi toi duka' ke deenni to tä' disunna' battu diua taiana to Yahudi wattunna anna natambai Puang Allataala la mendadi to matappa', tä'um duka' pahallu la naua: "La manggi'ä' disunna'."¹⁹ Aka dituhu'i haka ätoham sunna' tä' daka, tontä bábäm anu' bassim tä' deem gunana lako to matappa'. Anggam pahallu, untuhu'i tau pahentana Puang Allataala.²⁰ Si mesamesa tau pahallu la tontä liu tubo umba susi inna susinna lako kalena wattunna anna natambai Puang Allataala la matappa'.²¹ Maka' deengkoa' mahassam illaam kasabuasam wattunna anna natambaikoa' Puang Allataala mendadi umma'na, tä' la umpomasussaa' penabammu umpikki'i kaha-kaha ia too. Sapo' maka' toko malakoa' lappa' illaam mai kasabuasammu, iya mapiam too.²² Aka lako sabua' to natambai Debata la matappa', tau ia too lappa'um dio mai passabua'inna dosa, aka mendadim umma'na Debata. Anna lako ia taianna sabua' to natambai Debata la matappa', mendadim ia sabua'na Kristus.²³ Puhangkoa' naalli ponno Puang Allataala. Iya daa ummaelo'a' la naposabua' pa'elo'na hupatau illaam inde lino.²⁴ Dadi inggannakoa' solasubungku, si mesa-mesa tau la pahallu tubo dio olona Puang Allataala umba susi inna susinna wattunna anna ditambai la mendadi to matappa'.

To tä'pi mandapo' anna to balu baine

7:25-40

²⁵ Mane deenni, diona ia to tä'pi mandapo', tä' ia deem nabeennä' pahenta Debata. Moi anna susi, sapo' la kubeem

siangkoa' duka' pepakilalaam situhu' issi penabangku. Aka pa'kamasena Debata mesaä' duka' to mala dikatappa'i.²⁶ Susi kao inde pikkihangu: pahallu dikilalai diua inde tentomai buda kamasussam ditammu. Dadi, kuua kao, mapia puha ia lako mesa tau ke tontä lium tubo umba susi tentomai.²⁷ Lako to puham kebaine, kupelau anna tä'i untibe bainena. Anna lako to tä'pi kebaine, la napeä lalanna anna tä' lium kebaine.²⁸ Sapo' maka' deem maelo' kebaine, ia too setonganna tä' la madosa. Susi siam duka' ke deenni änä' daha maelo' la kemuane, tä' duka' la madosa. Anggam ia aka buda too kamasussam disitammuum ke mandapo'i tau. Ia hi kao kupemulu kela tä'koa' deem sitammu sussa.

²⁹ Kalembasanna inde tula'ku ingganakoa' solasubungku kuua: illaam inde lino saidi' mandam wattuntaa'. Dadi, mengkalao temo, lako to kebainem, la pahallu mato-mato tä' kebaine battu diua taia pandaposanna la napaitoo'na;³⁰ to sumahho la tubo mato-mato tä' matussa penaba battu diua taia sussana la napikki'; lako tau to metaba la mato-mato tä' tilalla'; lako tau to deem mangngalli, la mato-mato tä' deem muampuum aka-aka;³¹ anna lako to umpeä kapahalluanna illaam inde lino, la pahallu illaam katuboanna mato-mato tä' napalulako napaludio mai kaha-kaha ia too. Aka tä'um la masäe anna pa'dem inde lino.

³² Ia hi kao pa'elo'ku kela mala anna tä'koa' deem nakakende'i kamalallangam penaba. Aka indo to tä'pi kebaine umpasatutui ia pikkihanna pengkähänganna Debata, aka naua: "Anna mala masannam penabanna Debata."³³ Sapo' indo ia to kebainem, si lu lako liu ia penabanna kaha-kaha lino, aka naua: "Anna mala masannam penabanna baineuku,"³⁴ ma'katampasanna

illaam ia too ma'dua penaba. To balu baine ia battu haka änä' daha, anggam ia pengkähänganna Debata napasatutui pikkihanna, aka napemulu ke naampuanni Puang Allataala mengkalao bätä puntinna sule lako sungnga'na. Sapo' indo ia baine to kemuanem, si lu lako ia kaha-kaha lino pikkihanna, aka naua: "Anna mala masannam penabanna muaneku."

³⁵Inde ma'kada susiä' tentomai setonganna kuua anna malakoa' ullambi' kamapiaam. Aka tä' kuaku kela tisäke'koa' lako ma'hupa-hupa pahenta. Anggam kao kupohäe ke gau' maloloia' umpalako anna sihatanna dipogau', anna la umpasatutua' pikkihammu lako Debata.

³⁶Sapo' maka' hapanna deem tau situnangam anna nauai illaam penabanna indo muane: "Tä' sihatam ke tä'i kupobaine indo tunanganku, aka tutuam matuam anna tä' toi la kubela untähäm liu kamohäeanku," iya aha pissammi napobaine, aka tä' tihekem umpogau' dosa. ³⁷Sapo' maka' deem mesa muane nakattu sola unä' penabanna naua: "Tä' ohi la kupobaine indo tunanganku," anna tä' toi deem tau umpasai sapo' ma'kale ia duka' muuai, setonganna mapia ke tä'i kebaine. ³⁸Dadi, mapia ke deenni tau umpobaine tunanganna, sapo' mapia puha ke deenni tau tä' umpobaine tunanganna.

³⁹Mesa baine ke tubopi muanena mannassa anna tisäke'i. Sapo' maka' matem muanena, iya malam kemuane pole assala'na to matappa' indo la napomuane. ⁴⁰Sapo' situhu' kao pikkihanku, la kehongko' puha ia ke tä'um kemuane pole. Moi anna kuua inde tula'ku situhu' pikkiham kaleku, sapo' setonganna naua inabanku kupengkadaam sola kakuasaanna Penaba Masehona Puang Allataala.

Diona bale puha dipehumalasangam lako debata lino

8:1-13

8 Mane deenni, la kutulasangkoa' diona muande bale puha dipehumalasangam lako indo to napa'debatai taianna to matappa'. Si tauaa': "Deemmi kapaissangantaa' inggannakia' to matappa'." Abana deemmi, sapo' anggam ia, aka deem illaam alla'-alla'mua' si umbaba malangka' penabai indo kapaissanganna. Moi kela daa anggam pa'kamase umpakatoto' kakalebuanna to matappa'. ²Maka' deem tau ussangai kalena manähä, setonganna tau ia too anggam umpomasikki' bää pennenne'na. ³Sapo' menna-menna ungkamasei si'da-sia Puang Allataala, tau ia too naissam lalam penabanna Puang Allataala.

⁴Indo pekutanaammua' diona muande bale puha dipehumalasangam lako indo to napa'debatai taianna to matappa', setonganna taissam asammia' pada-pada taua indo to napenombai mannassa anna taiyai debata, aka anggam mesa Puang Allataala Debata. ⁵Abana deem ma'hupahupa indo si napa'debatai anna napepuäi to umpenombai, susi yabo langi' teem illaam inde lino. ⁶Sapo' taissanna' kita pada-pada taua anggam mesa Puang Allataala, tä' deem Debata senga'. Iam too Ambeta to umpadadi ingganna-ingganna sia. Anna iam too anna napadadingkia' anna mala tapenombaia'. Taissam toia' taua anggam mesa Debata, indo diuam Yesus Kristus. Anna Kristus ungkähäi indo anna napadadii Puang Allataala ingganna aka-aka, anna pengkähänam too anna malangkia' tubo.

⁷Sapo' deem duka' piha solata to matappa' tä' napähäm manappa' diona inde kaha-kaha. Aka indo anna tä'pi matappa', si umpenombai debata lino pa'papia hupatau nasuhum

ussosso kalena, aka nasangai ia madosa ke naandei indo kinande puha dipehumalasang lako debata lino, aka nasanga debata si'da-sia dibeem. Aka indo tau ia too, malammapi kamatappasanna. ⁸Setonganna, taia kinande la umpasilombungkia' Puang Allataala. Aka maka' taande indo kinande ia too, tä' deem la kauntunganta dio olona Puang Allataala; anna maka' tä' taande, iya tä' siam duka' deem la kahugianta.

⁹Moi anna mala asanni kita taande ingganna kinande aka tä' kita taangga' madosa ke diandei, sapo' pahallu la tajagai indo solasubunta to tä'pi matoto' kamatappasanna. Aka maka' naitaki' taande nasuhum naande duka', katampasanna napomadosa ia aka naua illaam penabanna: "Madosaä' aka kuande." ¹⁰Kalembasanna inde tula'ku kuua: ikoa'-iko to matoto'unna' kamatappasammu muissammia' muua tä' maaka ke diandei indo kinande to puha dipehumalasang lako debata lino. Sapo' maka' hapanna mahassangkoa' mangngande illaam banua si diongei umpenombai debata lino pa'papia hupatau anna naitakoa' to malammapi kamatappasanna, iya la umpobahanim too duka' kalena muande indo kinande moi anna bata-bata ia penabanna. ¹¹Maka' umpateenna', iya iam tia isanga indo kapaissangammua' la umpatinanda lako katilakaam solamu to bata-batapi illaam penabanna, moi kela daa nakala' da duka' kamateanna Kristus. ¹²Pissananna anna ma'pogau' susikoa' lako padammu to matappa' indo to bata-batapi illaam penabanna, mannassa anna kasalaangkoa' lako Kristus, aka unkadakeikoa' kamatappasanna padammu. ¹³Dadi, kaha-kaha iam too nasuhum tä'

kao kuaku si muande bale kela iai nasuhungam metobä tama dosa indo padangu to matappa', indana kao untumäi.

Paulus duka' abana mesa suho anna anggam ia napeä lalanna anna mala buda tau napatette lako Kristus

9:1-27

9 Tä' daka beba'ä' duka'? Ussanga haka' taiaä' mesa duka' suhona Puang Yesus? Ussanga haka' tä'pä' deem muita Puang Yesus Debatanta sola matangu? Taia hakoka' too bua pengkähäku indo unghähä' pengkähänganna Debata? ²Moi anna tä'i naakuiä' tau piha naua: "Mesa duka' suhona Puang Yesus Paulus," sapo' ikoa'-iko mannassa anna muakuiä', aka kao umpatettekoa' lako Kristus nasuhum matappa'koa'. Iya kamatappasammunna' too umpomannassai diua mesaä' duka' suhona Puang Yesus.

³Maka' deem tau umpesalaannä', iya la kutimba'i kuua: ⁴Tandana suhonakam Puang Yesus, iya la sihatangkam dipande anna dipaihu' kahana pengkähäki kela kiakui. ⁵Hapanna la kiaku duka' kebaine anna umpobainekam to matappa', iya sihatam duka' la kipaola lelem umbasusi napogau' Petrus **anna suho senga', anna napogau' toi duka' indo solasubunna Puang Yesus. ⁶Anggangka too kami' sola Barnabas la dipapasai umpeä ikale kapahalluangki? ⁷Sapo' situhu' kao pikkihangu, tä' tia deem mesa sohodadu la muanggosoi kalena illaam panggebaam. Anna tä' tia deem mesa to mengkähä la untanam anggur illaam bela'na tä' la mala muande indo bua anggurna. Tä' toi deem mesa to ma'kambi' domba tä' la mala muihu' indo bumbunganna dombana.

**9:5 Petrus: basa Yunani, diua Kepas: illaam basa Ibrani; kalembasanna, batu.

⁸Inde pehapangam, kuala dio mai indo si dipogau' allo-allo, sapo' abana inna Battakada Debata muuai. ⁹Aka deem tisuha' illaam Pepaondonganna Musa naua: "Daa ungkambu pudu'na sapim mahassam mengkähä anna mala napasindum ia duka' mangngande-ande."^{††} La anggangka sapim nauaam Puang Allataala inde illaam Battakadanna, ¹⁰iya la nahua hakika' duka'? Abana inna kita' duka' nahua indo kada dituli' yolona. Aka si mesa-mesa tau to disua ma'tengko la umpemmitai katabaanna buana indo pengkähäna. Anna susi siam duka' lako to disua ullullu' gandum, la sihatam duka' umpemmitai katabaanna. ¹¹Iya ikoa'-iko dipasihhapangkoa' bela', puhangkoa' kiambo'i banne di ada'na Puang Allataala. Dadi, tä' daka la sihatam kipemmitai la umbeengkam kapahalluanna bätä puntingki? ¹²Maka' sihatanna' umbeem aka-akammu lako tau senga' to umpatudukoa', iya senga'um too kami'!

Sapo' tä' kami' kituntu' kaha-kaha ia too. Aka dotam kami' buda kamasussaam kipendudum anna la ullabaikam katiballasanna Kaheba Katilallasam diona Kristus. ¹³Tantu muisammia' muua indo to mengkähä illaam Banua Debata mannassa anna la tubo eta ia duka'. Anna ingganna sando mannassa anna la sihatanni duka' naala sabaheam indo to dipehumallasam yabo ongeam pehumallasam. ¹⁴Susim too duka' puha napa'pahentaam Debata naua: "Lako tau to umpa'pakahebaam Kaheba Katilallasam, sihatam la diitaam katuboanna."

¹⁵Moi anna sihatanni la muiitaannä' katuboangku, sapo' mokaä'. Inde kuaaangkoa' temo, tä' kuaa anna mala umbeennä' aka-akammua'. Aka ahamä' mate anna la kuala dio mai

inde pengkähängangku katuboam. Aka anggamm anna la malai tontä liu sundede buaku kusi'dim ke taiai inde pengkähängangku kuhannuam la kupangngalai katuboam. ¹⁶Mala ia kutilalla'i, sapo' tä' ia la sihatam umpujjä' kaleku inde umpa'pakahebaannä' Kaheba Katilallasam, aka tä' kuala ikale sapo' napadudunniä' Puang Allataala. Setonganna la ullambi'ä' katilakaam ke tä'i kupalako. ¹⁷Aka maka' hapanna la gatti kaleku bää umpa'pakahebaam Kaheba Katilallasam, abana la sihatannä' umpemmitai sahoku. Sapo' aka tä' susi laoanna. Aka inde umpa'pakahebaannä' Kaheba Katilallasam, setonganna Puang Allataala umpadudunniä' babaam ia too, anna tä' mala tala kukähä. ¹⁸Maka' susi, iya aka hi kao la sahoku? Sahokum too kao, ke malamä' umpa'pakahebaam Kaheba Katilallasam tä' disahoi. Inde umpa'pakahebaannä' Kaheba Katilallasam, abana sihatannä' la diitaam katuboangku, sapo' mokaä' la untuntu'i kaha-kaha ia too.

¹⁹Kao-kao, to beba'ä' tä' deem moi podo la mesa tau unguasaiä'. Sapo' moi anna susi, umpadadiä' kaleku sihhapam sabua' anna mala kupeä liu lalanna umpatette buda tau lako Kristus. ²⁰Maka' solää' to Yahudi, iya mentoYahudi opä', anna mala kupatette lako Kristus. Maka' solää' to manuhu' lako Pepaondonganna Musa, iya si kutuhu'i duka' mato-mato nakuasaiä' duka' indo paondom. Aka moi anna tä'ä' nakuasai Pepaondonganna Musa, sapo' kutuhu'i siam aka kuaa: "Assala'na mala kupatette indo tau ia too lako Kristus." ²¹Maka' solää' taianna to Yahudi, iya indo pa'palakoangku si kupasusii to tä' nakuasai Pepaondonganna Musa. Ma'pogau' susiä' aka kuaa anna mala

^{††}9:9 Pass. 25:4.

deem taianna to Yahudi kubaba lako Kristus. Sapo' tä' mala diua tä' kutuhu'i pahentana Puang Allataala indo kupateem, aka illaam ia too si untuhu'i liu siamä' pahentana Kristus. ²² Susim too ke solaa' to malammapi kamatap-pasanna, iya kupasusii pa'palakoanna aka kuua anna mala deem kupatette lako kasalamasam. Kada kapodi'na, lako ingganna hupanna tau kuägä'i kupasusii pa'palakoanna umba-umba aka deem la mala kupatette lako kasalamasam. ²³ Ia asanna ia too kupalako anna mala tut-tuam buda tau unkatappa'i indo Ka-heba Katilallasam, anna malaä' duka' nalambanni indo pa'tamba'na Debata.

²⁴ Mannassa anna muissammia' muua indo tau to tama passilumbaam pada-pada lumumpa', sapo' anggam tia mesa tau to lamoho' mesa nasuhum la ullambi' songko' tanda kapataloam. Dadi umba susi to silumba lumumpa' umpasumpu läpu'na, la susingkoa' too duka' illaam ingganna pa'palakoammu la umpeä liua' lalanna anna malakoa' untuhu'i pa'elo'na Puang Allataala lambi' untahima indo songko' tanda kapataloam. ²⁵ Si mesa-mesa tau to mahassam umpakabiassa kalena la massilumba, napeä hi tia lalanna anna mala unguasai si'da-si'da kalena illaam ingganna-ingganna sia. Napogau' susi, aka naua: "Anna malaä' dipasongko'i songko' tanda kapataloam," moi kela daa bambannam la malasso bäbä indo songko' bunga-bunga. Sapo' kitaa'-kita, pahallukia' la unguasai kaleta illaam ingganna-ingganna sia, anna malakia' dipasongko'i songko' tanda kapataloam tä' la malasso, la da'da' liu sule lako salako-lakona. ²⁶ Kaha-kaha iam too nasuhum illaam inde pengkähänganku iannapi anna ia kupalako sihhamam to silumba lumumpa' umpasatutuä' pennenne'ku lako indo to la dipenandai anna malaä' patalo. Tä'

tooä' susi indo to padänggu' ia siam anna ia nadänggu' tä' napenoto la sihatanna. ²⁷ Sapo' kupakabiassa kao madahha anna unguasai kaleku indana puhaä' too umpa'pakahebaam Kaheba Katilallasam, iya kao leko' di nauaam Puang Allataala: "Tä'ko iko la sihatam untahima songko' tanda kapataloam."

Pepakilalaam diona to umpenombai debata lino

10:1–11:1

10 O inggannakoa' solasubungku, tä' too mapia ke tä'ia' ungilalai liu diona maaka susi nene to taponene napalullunni gabum Puang Allataala wattunna anna dioi pohiallasam anna napomabangiampi le'bo' sampe mala nalambam sola kamasakkeam. ² Indo dipalullunni gabum anna muola le'bo' nene to taponene mala dipasihhamam ditedo' mendadi tanda diua pentuhu'na si'da-si'da Musa. ³ Ingganna indo nene to taponene pada-pada si muande sah-hupa kinande nabeem Puang Allataala, ⁴ anna susi toi duka' si pada-pada muihu' sahhupa uwai nabeem Puang Allataala. Indo uwai naihu' buttu illaam mai batu tonggo napadeengam Puang Allataala, anna indo batu tonggo mala dipasihhamam Kristus aka si naolaam lelem. ⁵ Moi anna susi wattu eta too, sapo' sabaheam kasalle siam to Israel tä' napohäe Puang Allataala pa'palakoanna, nasuhum tiseham bäbä bakkena dio pohiallasam.

⁶ Ia asanna ia too la mendadi pepakilalaam lako kita pada-pada indana tapolai indo gau' kadakena nene to taponene yolona. ⁷ Tä'kia' la mala umpenombai debata lino pa'papia kaleta susi napogau' sabaheam kasalle nene taponene, umba susi puha tisuha' illaam Battakada Debata naua: "Pada-pada mangngande mangngihu' anna sikasajo umpenom-

bai indo to napa'debatai.”^{‡‡} 8 Tä' si'da-si'dakia' kita la mala ma'gau' sessu' susi indo napogau' sabaheam to Israel, nasuhum napissanni mate illaam allo sangngallo dua pulo tallu sa'bu tau budanna.^{¶¶} 9 Anna tä' si'da-si'da tookia' la mala umpa'sändä'-sändä'i Debata susi indo napogau' to Israel yolona, nasuhum sabaheam mate natombo' ula' pabalu.^{§§} 10 Anna duka' tä' si'da-si'dakia' la mala ma'menu-menu dio olona Puang Allataala susi indo napogau' to Israel yolona, nasuhum sabaheam napatei indo malaika' to si umbaba kamateam.*

¹¹ Ingganna kaha-kaha ia too dadi anna mala napehapanni tau senga'. Ia asanna ia too tisuha' illaam Battakada Debata anna mala mendadi pepakilalaam lako kita to tubo illaam inde la kapuhaanna lino. ¹² Lako to ussangai kalena matoto'um kamatappasanna, la pahallu majaga si'da-si'da indana mehonno'i tama dosa susi indo nene to taponene. ¹³ Ingganna pa'sändäsam indo si ussi'dinna', abana sangngim si nasi'dim asam duka' ingganna tau illaam inde lino. Sapo' tontä liu Puang Allataala umponnoi pa'dandianna, nasuhum la najagaikoa' indana nahuakoa' pa'sändäsam la'bi ia anna indo kamatohoammu. Illaam wattu nahuakoa' pa'sändäsam, Ia la ma'kale umbukkaangkoa' lalam la muola ullappasam kalemu anna mala tontä liukoa' ke'de'-ke'de' matoto'.

¹⁴ Dadi inggannakoa' solasubungku to kupakamaja, la umpasikambela si'da-si'dakoa' kalemu kapenombaam lako debata lino pa'papia hupatau. ¹⁵ La pahallua' umpaela' umpenabaam inde tula'ku, aka sangngim kusangaingkoa' to manähä. ¹⁶ Maka' muihu'kia'

anggur illaam pa'tosabeam sanda maseho takuhhu'i sumanga' längäm Puang Allataala, kalembasanna umpengkilalaikia' katitolloam hahana Kristus. Iam too tapotanda diua petauannangkia' Kristus indo to ussolongkia' umpolalam kamateanna. Susi siam duka' ke umpiä'-piä'kia' hoti illaam pa'tosabeam sanda maseho mendadi tanda diua sakalebungkia' illaam bätä puntinna Kristus. ¹⁷ Kahana deem mesa hoti, iya moi anna budakia' sapo' malakia' sakalebu aka pada-padakia' mangngala taba muandei indo hoti ia too.

¹⁸ Penabaam siaia' too kabiasaanna to Israel. Indo to muande bale dipehumalasang dio ongeam pehumalasang, mannassa tau ia too anna mangngala tabam duka' illaam kapenombaam ia too. ¹⁹ Mannassa anna muissannia' muua indo debata lino pa'papia limanna hupatau taia debata si'da-sia, anna muissam toia' duka' muua tä' deem kalembasanna indo olo'-olo' dipehumalasang dio olona. ²⁰ Aka indo olo'-olo' dipehumalasang lako debata lino pa'papia limanna hupatau, tä' napehumalasang längäm Puang Allataala sapo' setonganna napehumalasang lako hi tia setam. Anna tä' kao kuaku kela ma'mesakoa' setam. ²¹ Tä' si'da-si'dakoa' la mala umpatakai pata' kalemu la umpasibala' muihu' anggur dipake umpenombai Puang Yesus anna anggur puham dipake umpenombai setam. Susi siam duka', tä'koa' la mala umpasibala' mangngala taba muande hoti illaam pa'tosabeam sanda masehona Debata anna mangngala taba illaam muande hoti puha dipehumalasang lako setam.

^{‡‡}10:7 Täss. 32:1-6.

^{¶¶}10:8 Pah. 25:1-18.

^{§§}10:9 Pah. 21:5-6.

*10:10 Pah. 16:41-49.

²²Iya la umpakende' dakoka' too kakembuhuanna Puang Allataala? Ussanga haka' too matoho puhakia' kita anna la Puang Allataala?

²³Deem tau muuai: "Ingganna-ingganna sia mala asam dipogau." Tappa! Sapo' ia hia, tä' la keguna asam tama kaleta. Ingganna-ingganna sia mala asam dipogau', sapo' tä' diua pada indo tapogau'na la mala asam umpakatoto' penabanna solata. ²⁴Kita hupatau tä'ki' la mala umpikki' kaleta, sapo' la pahalluki' umpikki' solata.

²⁵Ingganna bale dibalu' tama pasa' mala asanna' muande. Tä'unna' manggi' la umpekutanaam muua: "Bale dipehumalasang lako haka debata lino inde, taia haka?" Tä'um manggi' umpengngissannia' indana deenni napolalam ma'tula'-tula'a' penabammu.

²⁶Aka illaam Battakada Debata deem tisuha' naua: "Inde lino sola ingganna issinna, Debata umpuänganni."†

²⁷Maka' natambaikoa' mesa tau taianna to matappa' anna ullombaia', iya ande mamma' indo to nabeengkoa'. Tä'unna' manggi' umpekutanaam muua: "Bale dipehumalasang lako haka debata lino inde, taia haka?" Tä'um manggi' umpengngissannia' indana deenni napolalam ma'tula'-tula'a' penabammu. ²⁸Sapo' maka' deem solamua' muuaangko: "Inde bale puham dipehumalasang lako debata lino," iya daa muandei indana masussai penabanna. ²⁹Kalembasanna inde tula'ku, taia la kamabandasanna penabammu kuuaam la napolalam tä' muande, sapo' kamabandasanna penabanna indo solamu.

Madomi' deem muuai: "Akanna la kamabandasam penabannai solaku la ullabaiä' ke mahingngammi kao penabangku la muandei? ³⁰Maka' muandei'

mesa kinande ke ma'kuhhu' sumanga' siaä' längäm olona Puang Allataala, maaka anna la deem ohi tau umpasalaä', moi kela daa puham kutilalla'i längäm Puang Allataala?"

³¹Sapo' situhu' kao pikkihangku, la umpeä' liua' iko lalanna anna malakoa' umpomatande sanganna Puang Allataala moi akaa' la umpogau', susinna la mangngande hakoka', battu haka la mangngihu'koa', battu haka aka-aka senga' la umpogau'. ³²Pahallukoa' ma'palako umba susi la sipäto'na anna mala taikoa' napolalam metobä tama dosa padammu hupatau, susi to Yahudi, teem taianna to Yahudi, anna susi toi solata to matappa' lako Puang Allataala, ³³umba susi si kupogau'. Aka illaam ingganna kaha-kaha si kupeä' liu kao lalanna anna mala masannam asam penabanna hupatau. Mokaä' la umpeä' kamasannangam kaleku, sapo' indo la kegunanna lako tau senga' si kupogau', aka kuua anna mala ullambi' duka' kasalasang tau buda.

11 Potandengannia' pa'palakoangukku umba susi umpotandengammä' kao Kristus.

Kabiasaam ussapu'i ulu illaam pa'sambajangam

11:2-16

²Sihatam anna sipäto' kusangakoa' anna kutilalla'i, aka tontä' liukoa' duka' untkilalaiä', anna untuhu'i liua' indo pepa'guhuam puha kupalandasangkoa'.

³Sapo' deempi mesa kaha-kaha pahallua' muissam: lako si mesa-mesa muane Kristus umpahe'i sihhapam ulu ullumbäi kale, anna baine ia muanena umpahe'i, anna Kristus la Puang Allataala umpahe'i. ⁴Maka' deem mesa muane ma'sambajam battu haka untula' kada napa'palosam Puang

†10:26 Puj. 24:1.

Allataala anna tä'i muäläi pesapu' ulunna, iya tau ia too umpa'bahinni'i Kristus to umpahe'i. ⁵Anna baine ia ke ma'sambajanni battu haka untula' kada napa'palosaam Puang Allataala anna tä'i ussapu'i ulunna, mannassa anna umpa'bahinni'i muanena aka indo muanena sihhapam ulunna baine ia too, anu' ia umpahe'i. Indo baine ia too sihhapammi dikalapesei ulunna. ⁶Aka maka' deem mesa baine moka ussapu'i ulunna, indo baine ia too aha pissammi ma'gontim. Sapo' maka' la masihi' indo baine ke digontinnii beluä'na battu haka la dikalapesei, iya dotam si ussapu'i ulunna. ⁷Muane ia tä' la mala ussapu'i ulunna ke ma'sambajanni, aka abana napadadi Puang Allataala susi kalena anna ia siam umpa'patandaam kamatandeanna Puang Allataala. Sapo' baine ia, indo ia pa'palakoanna umpa'patandaam angga'na muanena. ⁸Aka muane ia tä' diala illaam mai kalena baine ditampa, sapo' baine hia diala illaam mai kalena muane ditampa. ⁹Mane deenni, tä' dipapia muane kahana la umpamoloi baine, sapo' baine hia dipapia kahana la umpamoloi muane. ¹⁰Iam too anna pahallum baine la ussapu'i ulunna anna mala tandaam diua umpa'kasallei muanena, anna mala toi masannam duka' ingganna malaika' yabo suhuga muitai. ¹¹Moi anna susi, sapo' illaam kamesaanna umma'na Debata muane anna baine tä' mala silappa' salu katuboanna, aka abana sipahallum mesa sola mesa. Anu' mesa oi too tä' oom mala tubo kaju-kaju bäbä. ¹²Aka umba susi diala illaam ia mai kalena muane indo anna dipapiai baine, susim too duka' muane, baine siam duka' undadianni. Anna ingganna-ingganna sia buttu yabo mai Puang Allataala.

¹³Penabaam siaia' too: La sihatam daka' iko ussi'dim ke ma'sambajanni

mesa baine längäm Puang Allataala anna tä'i ussapu'i ulunna? Mannassa anna tä'i sihatam. ¹⁴Situhu' kabiasaanna hupatau, tä' sihatam kela kalandoi beluä'na muane. ¹⁵Sapo' keangga' ia baine ke kalandoi beluä'na. Anna abana dimana' beluä' baine aka ia la ussapu'ianni ulunna. ¹⁶Sapo' maka' deem tau ussipengkai inde tula'ku, iya anggam too kao kuissam kuua: ia lium too inde si dipehhondo si kami' teem ingganna jumaa'na Puang Allataala.

**Sihatanna dipogau' illaam
pa'tosabeam sanda maseho**

11:17-34

¹⁷Deempi kaha-kaha senga' pahallu la kutulasangkoa', anna illaam ia too tä' mala kupujikoa' aka tä' kuakui pa'palakoammua'. Aka deem kupelele diona indo pa'hempungammua' tä' umpakende' kamapiaam, sapo' buda puha ia kakadakeanna anna la kamapi-aanna. ¹⁸Uhu-uhuna kupekaheba diua deem si kende' kasipengkaam illaam alla'-alla'mua' ke ma'hempungkoa', aka ma'sapa'-sapa'koa'. Anna madomi' tappa' si'da indo kaheba. ¹⁹Abana inna la deem kende' kasipengkaam illaam jumaa'mua', anna mala ma'lesoam pissam diua iai too sipengka iam too tä' matappa' si'da-sia, anna iai too tä' sipengka iam too disangai to matappa' si'da-sia. ²⁰Sapo' indo illaam wattunna ma'mesakoa' la umpalako pa'tosabeam sanda maseho, setonganna taia pa'tosabeam sanda maseho si'da-siaa' umpalako, aka taia diona kamateanna Kristus umpaitoo'naa'. ²¹Aka illaam wattunna mangngandekoa', tä'koa' deem umpenabaam solamu. Sapo' silomba-lomba bäbäkoa' mangngande anna muihu' lambi' mäbo'koa' piha anna kamata-mata bäbä solamua' piha tadea'. ²²Akana malai susi? Kusanga deem sianna' toda' banuammu la

muongei mangngande anna muihu! Iya abana haka too muägä'ia' umpa'basisii kakalebuanna umma'na Puang Allataala anna umpakashi'koa' to mase-mase? Aka amo iko la disangaiangkoa'? Umbai' la ussanganna' too la kupujikoa'. Sapo' mannassa anna tä'koa' mala kupuji.

²³Kusanga puhangkoa' kupatudu diona indo pa'tosabeam sanda maseho! Anna indo kupa'guhuangkoa', setonganna ma'kale Debata umpaissanniä'. Aka wattunna anna la dibalu'i Puang Yesus Debatanta lako balinna, iya bengi eta too muala hoti Puang Yesus ²⁴anna mane nakuhhu'i sumanga' längäm Puang Allataala mane napiä'-piä'i anna nauai: "Iam too inde baleku kupebeem kahana kusolongkoa'. Pogau' liuia' susi indee anna malaä' ungilalai."

²⁵Susi siam tappana puha mangngande, muala ihusam kessi anggur anna nabeenni lako suhona napasindum ma'kada naua: "Inde ihusam kessi anggur, iam too dipasihpam pa'dandiam bakahunna Puang Allataala lako hupatau. Indo pa'dandiam bakahu, hahaku la dipatitollo la umpomannassai diua dadim indo pa'dandiam. Ia anna la umpogau'ia' aka la umpengkilalaiä'. Dadi umpogau' oia' too, ungilalai omä'." ²⁶Aka muande okoa' too hoti anna muihu' anggur susi inde, iya umpa'pakahebaam onggkoa' kamateanna Debata sule lako kasuleanna ma'penduanna.

²⁷Dadi, menna-menna muande hotinna Debata anna naihu' anggurna ke tä'i situhu' indo la sihatanna dipogau', tau ia too madosa lako Debata, aka tä' umpa'kasallei balena anna hahana Debatanta. ²⁸Dadi, si mesa-mesa hupatau pahallu la ungakempei yolo kalena anna mane mala muande indo hoti anna muihu' indo anggur. ²⁹Aka menna-menna muande indo hoti anna muihu' anggur ia too ke

tä'i umpa'kasallei bätä puntinna Debata, tau ia too umpasuleam kalena pa'tahungkunganna Puang Allataala. ³⁰Iam too kasuhunganna anna budangkoa' nahua saki lambi' tä' umbelaa' maaka anna deem toom solamua' mate. ³¹Sapo' maka' ungakempei' yolo kaleta, iya mannassa anna tä'ki' la napahuai pa'tahungkunganna Puang Allataala. ³²Sapo' maka' nahuakia' pa'tahungkunganna Debata, setonganna ia too pepakilalaam lako kita anna malakia' tä' napasitahungkum to tamatappa' illaam inde lino.

³³Iam too kasuhunganna ingganakoa' solasubungku anna kuuam: maka' too ma'hempum onggkoa' la mangngande illaam pa'tosabeam sanda maseho, la si muampaikoa' solamu anna malakoa' simbaha-baha mangngande. ³⁴Maka' deem illaam alla'-alla'mua' tadea', la pahallu mangngande yolo dio banuanna indana umpogau' indo tää'na sihatam illaam pa'hempungammua', napolalam la umpasuleam kalena pa'tahungkunganna Puang Allataala. Anna sulibanna ia too sulepä' ia matim mane kupomasiäsangkoa'.

**Namana'kia' Penaba Maseho
kapaissangam anna malakia'
sipakatoto' mesa sola mesa**

12:1-11

12 Mane deenni ingganakoa' solasubungku, la kutulasangkoa' diona indo kapaissangam namanasangkia' Penaba Maseho si mesa-mesa. Aka abana tä' too mapia kusi'dim ke tä'ia' muissam manappa diona kaha-kaha ia too. ²Ungkilalainya' tia ingganakoa' solasubungku, indo anna tä'pokoa' matappa' dibaba bulingkoa' nasuhum umpenombaikoa' debata lino pa'papia kalem, moi kela daa moi ma'kada tanaissanni. ³Iam too anna kutulasammokoa' kuu: lako

to umbeho kalena napatette Penaba Masehona Puang Allataala, tä' sia la naaku naua: “To nahua tädo Puang Yesus!” Susim too duka' tä' deem moi podo la mesa tau la naaku naua: “Debata si'da-sia Puang Yesus,” ke tä'i napatette Penaba Maseho.

⁴Ma'hupa-hupa kapaissangam namanasangkia' Penaba Maseho, sapo' mesa Penaba Maseho naongi buttu. ⁵Deem ma'hupa-hupa pengkähängam di ada'na Puang Allataala dikähä, sapo' anggam mesa Debata dipengkähängam. ⁶Ma'hupa-hupa toi lalanna napake Puang Allataala umpa'patandaam kakuasaanna illaam pa'palakoanta. Sapo' anggam mesai Puang Allataala unghähä asanni ingganna ia too illaam kalena si mesa-mesa to matappa'.

⁷Ingganta to matappa' nabeengkia' Penaba Maseho kapaissangam tanda kakuasaanna anna malakia' sipamoloi mesa sola mesa illaam kakalebuanta. ⁸Aka deem tau namana' Penaba Maseho kapaissangam ma'tula' ponno kakeakasm, anna deem siam duka' namana' Penaba Maseho kapaissangam la manähä untula' diona Puang Allataala. ⁹Anna Penaba Maseho Ia siam ummana' tau senga' kamatapassam matoto' lako Kristus. Anna Penaba Maseho Ia siam too duka' ummana' tau senga' kakuasaam la mala umpabono' to masaki. ¹⁰Anna deem toi dimana' kakuasaam la umpadadi tanda memängä-mängä, anna deem piha dimana' la untula' kada napa'palosaam Puang Allataala. Anna deem dimana' kapaissangam diona la usse'laam hupatau, umbanna kapaissangam buttu di Penaba Maseho, anna umbanna taia. Deem duka' dimana' ma'tula' umpake ma'hupa-hupa basa memängä-mängä pa'palosainna Penaba Maseho, anna deem toi duka' dimana' kamanähängam la umpomasiä' kalembasanna basa ia

too. ¹¹Dadi, si mesa-mesa to matappa' dimana' kapaissangam situhu' pa'elo'na Penaba Maseho. Ia asanna ia too, mesa Penaba Maseho unghähäi.

Kakalebuanna to matappa' sihhapam bätä puntinna hupatau

12:12-31

¹²Kakalebuanna ingganna to matappa' lako Kristus mala dipasihapam bätä puntinna hupatau. Inde bätä puntinna hupatau mesa diita, sapo' setonganna buda pangkakka'na. Moi anna susi sapo' tontä siam sakalebu. ¹³Susim too duka' lako kita, mengkalao to Yahudi sule lako taianna to Yahudi, susi sabua' teem taianna sabua', mesa Penaba Maseho ditedosangkia' lambi' mendadikia' mesa bätä punti di ada', anna pada-padakia' dipatamai Penaba Maseho Ia too.

¹⁴Indo bätä puntinta, tä' angga mesa pangkakka'na, sapo' buda hupanna. ¹⁵Maka' hapanna la naua bitti': “Taiaä' kao lima, dadi tä' kao tihekem illaam bätä,” ia too tä' susi, aka tontä liu tihekem illaam bätä. ¹⁶Susi toi duka' hapanna la naua talinga: “Taiaä' kao mata, dadi tä' kao tihekennä' illaam bätä,” iya tä' duka' susi ia too, aka tontä liu tihekem illaam bätä. ¹⁷Maka' hapanna la angga mandi mata inde bätäta, iya akam la ma'pehingngi? Battu haka la angga mandi talinga, iya akam la ma'peudu'? ¹⁸Sapo' abana inna naäto' susi Puang Allataala bätäna hupatau lambi' ma'hupa-hupa pangkakka' illaam. Ingganna hupanna pangkakka' napaokko'i ongeanna situhu' pa'elo'na Puang Allataala. ¹⁹Maka' hapanna la sahhupa mandi pangkakka', iya taia hi tia isanga bätä. ²⁰Sapo' abana inna buda pangkakka', sapo' anggam mesa bätä kale.

²¹Dadi tä' la mala naua mata: “Tä'ko kupahalluam, lima!” Battu haka ulu

la muuai: "Tä'ko kupahalluam, bitti!"
²²Sapo' susi hia inde, indo pangkakka'na bätä to si disangai handam malamma, ia hia handam pahallu. ²³Anna indo pangkakka' lako bätäta to disangai tä' keangga', ia leko' di si dipa'kasallei. Anna indo pangkakka' lako bätäta to disangai tä' dipohäe diita, ia leko' dipohäe bai mapia. ²⁴Anna indo pangkakka' lako bätäta dipohäena diita, tä'um pahallu dipapia liu. Ingganna pangkakka' illaam bätäta puha naäto' Puang Allataala anna mala indo pangkakka' to tangkaam keangga' dikasahaam puha ia anna la pangkakka' to si diangga'. ²⁵Napateem Puang Allataala anna mala tä' deem pa'sapa'-sapa' illaam inde bätäta, sapo' ingganna pangkakka'na la sipenabaam mesa sola mesa. ²⁶Maka' hapanna deem mesa pangkakka' illaam bätäta mapidi', la nasi'dingam asam duka' solana. Susi toi duka' ke deenni mesa dipa'kasallei, la pada-pada duka' tilalla' solana.

²⁷Susim too duka' kakalebuammua' sihhapam bätäna Kristus, anna si mesa-mesakoa' sihhapam pangkakka'na. ²⁸Anna illaam inde kakalebuanta to matappa' ma'kale Puang Allataala umpopa'tadongkongam si mesa-mesa hupatau: uhuna naposuhu, kaduanna naponabi, katallunna napadadi tuanguhu. Deem duka' to dimana' la umpalako tanda memängä-mängä, deem to dimana' la umpabono' to masaki, deem la mampamoloi, deem la mendadi pekutu'na hupatau anna mala mesa pa'palakoam, anna deem toi dimana' ma'tula' umpake ma'hupa-hupa basa memängä-mängä pa'palosainna Penaba Maseho. ²⁹Tä' mendadi suho asam, tä' mendadi nabi asam anna tä' toi mendadi tuanguhu asam. Tä' dimana' asam kuasa la umpogau' tanda memängä-mängä, ³⁰battu haka la umpabono' to masaki,

battu haka dimana' ma'tula' umpake ma'hupa-hupa basa memängä-mängä pa'palosainna Penaba Maseho, battu haka dimana' kamanähängam la umpomasiä' kalembasanna basa ia too. ³¹Iam too kasuhunganna anna la umpeä si'da-si'danna' lalanna anna malakoa' nahampoi indo sanaka-naka kapaissangam handam keguna lako jumaa'.

Moi anna susi, inde la sitahhu'na tula'ku deempi la kutulasangkoa' la handam mapia la umpogau'a'.

Pa'kamase handam pahallu dipogau'

13:1-13

13 Moi la maaka susi kamanähängangu umpake ma'hupa-hupa basana hupatau battu basana malaika', sapo' tä' dä' ungamasei padangu, iya indo tula'ku sihhapam moninna balle' lo'bä, tä' deem gunana. ²Moi la dimana'ä' kapaissangam la untula' kada napa'palosaam Puang Allataala anna kulosa indo kada ditambinna to tä' nalambam pikkihanna hupatau, anna tä' toi deem kuhä'dä' ingganna indo la malanna dipengngissanni, anna unkatappa'i si'da-si'da tooä' Puang Allataala lambi' malaä' ussua buntu mentieli' lako ongeam senga', sapo' tä' dä' ungamasei padangu, mannassa anna tä'i deem gunana ingganna ia too. ³Moi la kubeem asam to mase-mase ingganna aka-akangku anna la umbehopä' kaleku ditunu mampu' dio olona Puang Allataala tanda kamanuhusangu, sapo' tä' dä' ungamasei padangu, ia asanna ia too tä' deem gunana lako kaleku.

⁴Iya aka hi indo diuam pa'kamase? Indo diuam pa'kamase: la sa'baha', mapia penaba, tä' bassa' umpakende' kakembuhuam illaam penaba, tä' ussanga-sanga kale, tä' malangka' penaba, ⁵tä' umpalako indo pa'palakoam tää'na la sihatam dipogau',

tä' angga kale dipikki', tä' madomi' keaha', anna tä' umpaillaam penaba kasalaanna sola. ⁶To ma'kamase tä' untilalla'i kakadakeam, sapo' anggam kamaloloam. ⁷To ma'kamase tontä manontom, tontä unkatappa'i padanna, tontä mahannu, anna sa'baha' liu umpendudum ingganna-ingganna sia.

⁸Indo kapaissangam la untula' kada napa'palosaam Puang Allataala, pissam wattu la pa'de. Susi toi kapaissangam ma'tula' umpake ma'hupa-hupa basa memängä-mängä pa'palosainna Penaba Maseho, pissam wattu la pa'de. Teem toi indo kapaissangam ma'tula' ponno kamanähängam, pissam wattu la pa'de. Sapo' pa'kamase ia la tontä liu sule lako salako-lakona. ⁹Aka tentomai tä'pi tepu indo kamanähängam namanasangkia' Puang Allataala. Susi toi indo kapaissangam la untula' kada napa'palosaam Puang Allataala, tä'pi duka' tepu. ¹⁰Sapo' maka' lambi'um wattunna la napatepu Puang Allataala ingganna-ingganna sia, iya ingganna indo kapaissangam tä'pi tepu la napa'dei aka tä'um pahallu. ¹¹Umba susi wattunna anna bahinni'pä', ma'tula' änä'-änä'ä', ma'gau' änä'-änä'ä', anna ma'pikki' änä'-änä' tooä'. Sapo' tappana kasalleä', iya kutampeam asammi pole' gau'ku indo anna änä'-änä'pä'. ¹²Susim too duka' tentomai tä'pi taissam manappa ingganna-ingganna sia, aka sihhapam taita tama dahammim buta. Sapo' pissam wattu la taissam asammi pole' aka la sitingngajongki' indo tungka ianna. Tentomai tä'pi kuissam asam ingganna-ingganna sia, sapo' pissam wattu la kuissam asammi pole' umba susi Puang Allataala nakalesoä' mengkalao dio pala' bitti'ku sule längäm lamba' beluä'ku.

¹³Dadi tentomai tallu kaha-kaha pahallu la tontä liu tapogau': matappa',

mahannu, anna ma'kamase. Sapo' ma'kamase handam pahallu dipogau' inde tallu kaha-kaha.

**Indo kapaissangam namanasangkia'
Penaba Maseho la dipake
sipakatoto' mesa sola mesa**

14:1-25

14 La pahallua' umpeä si'da-si'da lalanna anna malakoa' ungmakasei padammu hupatau. La umpemulu toia' indo kapaissangam namanasangkoa' Penaba Maseho, la'bi-la'binna kapaissangam untula' kada napa'palosaam Puang Allataala. ²Aka indo to dimana' ma'tula' umpake ma'hupa-hupa basa memängä-mängä pa'palosainna Penaba Maseho, tau ia too tä' ma'tula' lako hupatau, sapo' ma'tula' längäm Puang Allataala. Mannassa ma'tula' längäm, aka indo tula'na tä' ia nalambam pikkihanna hupatau. Pengkähängannam too Penaba Maseho illaam kalena nasuhum untula' kada tää'na mala napähäm hupatau. ³Sapo' menna-menna untula' kada napa'palosaam Puang Allataala, abana padanna ia hupatau napa'tula'i. Anna indo tula'na umpomatoho, umpatigaha', anna umpakahanga padanna. ⁴Lako to ma'tula' umpake ma'hupa-hupa basa memängä-mängä pa'palosainna Penaba Maseho, tau ia too anggam kalena napakatoto'. Sapo' indo ia to untula' kada napa'palosaam Puang Allataala, tau ia too umpakatoto' ia kakalebuanna to matappa'.

⁵Tä' deem pada samapia ke mala asangkoa' ma'tula' umpake ma'hupa-hupa basa memängä-mängä pa'palosainna Penaba Maseho. Sapo' handam mapia ke malakoa' untula' kada napa'palosaam Puang Allataala. Aka keguna puha ia indo to untula' kada napa'palosaam Puang Allataala anna la indo to ma'tula' umpake ma'hupa-hupa

basa memängä-mängä, sulibanna ke malai napomasiä' kalembasanna indo basa ia too anna mala umpakatoto' ingganna issinna jumaa'.

⁶O inggannakoa' solasubungku, maka' hapanna la matinnä' anna ma'tula'ä' illaam alla'-alla'mua' umpake ma'hupa-hupa basa memängä-mängä napalosaianä' Penaba Maseho, setonganna tä' deem gunana ia too moi podo la sai'di'um ke tä'i muissanna' kalembasanna. Sapo' maka' indo la kupais-sannikoa' tula' napalosaia' Puang Allataala, battu haka umpomakalesoä' kaha-kaha tää'napia' muissam diona Puang Allataala, battu haka umpalanda'ä' tula'na Puang Allataala, battu haka ma'pa'guhuä', ia hi tia la kegunaa' tama kalemu.

⁷Mala diala pehapangam dio mai pangkakka' tää'na menaba, susinna sulim anna katapi. Indo sulim anna katapi ke tä'i diponi manappa tä' deem gunana aka tä' diissam dipebattuum moninna. ⁸Mala polepi duka' diala pehapangam diona sangkakala. Indo sangkakala ke tä'i diponi manappa, mannassa anna tä'i la naissam taja sohodadu lao ma'bundu'. ⁹Iya susingkoa' too duka': aka maka' ma'tula'koa' umpake basa tää'na mala naissam tau, iya mannassa anna la tä'i napähäm kalembasanna. Katampasanna la susi bäbäkoa' to umpa'tula'i loa. ¹⁰Illaa inde lino abana tä' deem pada sabuda basa, anna si mesa-mesa basa tä' punala deem la tä' ma'kalembasam. ¹¹Sapo' maka' tä' kuissam kalembasanna tula'na mesa tau, tau ia too sihhapam to sule. Susi siam duka', la nasangaiä' to sule indo tau ke tä'i naissam tula'ku. ¹²Susi siangkoa' too duka'. Aka maelo' sugali'koa' muampuam kapaissangam pa'mana'na Penaba Maseho, sapo' peäia' lalanna anna mala umpalako indo sanaka-naka kapaissangam handam

la kegunanna illaam umpakatoto' ingganna issinna jumaa'.

¹³Iam too kasuhunganna anna ingganna to dimana' la ma'tula' umpake ma'hupa-hupa basa memängä-mängä pa'palosainna Penaba Maseho la pahallu ma'sambajam längäm Puang Allataala, anna mala nabeem kapaissangam la umpomasiä' kalembasanna kada ia too lako padanna. ¹⁴Aka maka' ma'sambajannä' umpake indo ma'hupa-hupa basa memängä-mängä, setonganna anggam penabangku ma'sambajam, sapo' tä' ia naissam pikkihangku. ¹⁵Dadi, akam la kupogau? La ma'sambajannä' illaam penabangku umpake indo basa memängä-mängä anna la ma'sambajam tooä' duka' umpake basa la diissanna kalembasanna. Anna la menaniä' illaam penabangku anna menani tooä' duka' umpake basa la diissanna kalembasanna. ¹⁶Aka maka' hapanna la umpakende'ko pa'kuhhusam sumanga' längäm Puang Allataala anna la umpakeko indo basa memängä-mängä, anna deenni tau senga' uhhingngii sapo' tä' naissam kalembasanna, mannassa anna tä'i la mala naua: "Kuuu duka'," aka tä' naissam kalembasanna indo tula'mu. ¹⁷Moinna anna tä' deem pada samapia indo pa'kuhhusam sumanga'mu längäm Puang Allataala, sapo' tä' di mala umpakatoto' penabanna padammu, aka tä' ia naissam kalembasanna.

¹⁸Ma'kuhhu' sumanga'ä' längäm Puang Allataala, aka la'bi puha kao indo kapaissangam ma'tula' umpake ma'hupa-hupa basa memängä-mängä pa'palosainna Penaba Maseho anna la ikoa'. ¹⁹Sapo' maka' mahassam menomba jumaa', aham tia lima mandi battana kada kutula' ke malai diissam kalembasanna, nasuhum mendadi pepatuduam lako padangku anna la

sapulo sa'bu battana kada umpake basa memängä-mängä ke tä' di la diissam kalembasanna.

²⁰O inggannakoa' solasubungku! Ilaam ia too daa umpa'pikki' susia' änä'-änä'. Anggam diona kakadakeam la pahallukoa' sihhapam änä'-änä' sumusu, tä'pi naissam umpogau' kakadakeam. Sulibanna ia too la pahallukoa' ma'pikki' umba susi sihondoinna pikkihanna tomatua. ²¹Ilaam Battakada Debata deem tisuha' naua:

“Basana to sule la kupake umpa'kadai umma'ku, pudu'na tau senga' la kupa'passubunni tula'ku lako pakketauangku; Moi anna susi, sapo' tä' la naaku napehingngiä'.”[‡]

²²Dadi, susim too duka' indo kapaissangam umpake ma'hupa-hupa basa memängä-mängä namanasam Penaba Maseho lako to matappa', ia too umpa'patandaam kakuasaanna Puang Allataala lako taianna to matappa', tä' ia lako to matappa'. Sapo' indo ia kapaissangam untula' kada napa'palosaam Puang Allataala mendadi tanda lako to matappa', taia lako to tä' matappa'. ²³Iya maka' hapanna ma'mesakoa' issinna jumaa' anna sangngim ma'tula'koa' umpake basa memängä-mängä, sapo' deem to tä'pi muissam manappa Battakada Debata sule battu haka taianna to matappa' napehingngiikoa', tä' mala tala naua: “Tatta' inde mai tau.”

²⁴Sapo' maka' sangngim untula'koa' kada napa'palosaam Puang Allataala anna sulei mesa tau taia to matappa' battu haka to tä'pi muissam manappa Battakada Debata anna nahingngi asanni tula'mua', iya la tappa naissam anna naakui illaam penabanna naua: “Abana mesaä' to madosa. Ingganna

indo tula'na, kao asam nahua.” ²⁵Lambi' ingganna tibuninna illaam penabanna sihhapam dikaleäi asam, nasuhum ma'balinguntu' menomba dio olona Puang Allataala anna nauai: “Abana tappa' si'da tohho Puang Allataala illaam alla'-alla'mua'!”

Katiätosam illaam kapenombaam

14:26-40

²⁶Dadi illaam inde tula'ku susi inde punggu' tannunna: Ilaam wattunna ma'mesakoa' la menomba, la pahallu si mesa-mesa tau deem napogau': deem to la menani, deem to la ma'patudu, deem to la untula' kada napalosaam Puang Allataala, deem to la ma'tula' umpake basa memängä-mängä pa'palosainna Penaba Maseho, anna deem toi la untula' kalembasanna indo basa memängä-mängä ia too. Sapo' ingganna ia too pahallu la dipakeguna illaam umpakatoto' penabanna issinna jumaa'. ²⁷Maka' deem tau la ma'tula' umpake basa memängä-mängä, handam budannam ke duai battu haka tallu tau sibala'-bala'. Sapo' la pahallu deem tau umpomasiä'i kalembasanna kada ia too. ²⁸Sapo' maka' tä' deem tau la muissanni umpomasiä'i kalembasanna lako issinna jumaa' kada ia too, iya dotam mengkamma' indo to muissanni untula' basa memängä-mängä wattunna ma'hempungkoa' menomba. Tä' mala la natula' kada ia too sapo' mala illaam mandi penabanna ma'tula' längäm Puang Allataala.

²⁹Indo tau to si untula' kada napa'palosaam Puang Allataala, handam budannam ke duai battu haka tallu tau sibala'-bala', anna senga'na la napenabaam ia indo tula'na. ³⁰Sapo' maka' deem illaam alla'-alla'na indo to muokko' napalosaibattu duka' Puang Allataala maelo' la

[‡]14:21 Yes. 28:11-12.

ma'tula', mapia ke mengkamma' salapi ia indo to mahassam ma'tula' anna mala ma'tula' ia duka' indo solana. ³¹Maka' umpateenna', iya la mala asangkoa' too sibala'-bala' umpalanda' indo kada napalosaiangkoa' Puang Allataala, nasuhum mala asangkoa' pole' untahima pepa'guhuam anna la dipakatoto'a' penabammu. ³²Indo to dimana' kapaissangam untula' kada napa'palosaam Puang Allataala tä' mala tala nabela muoppo' penabanna muampai wattu la dibeem ma'tula'. ³³Aka Puang Allataala abana Debata to umpohäe ke tiäto'i ingganna aka-aka. Tä' napohäe kela tä'i tiäto'.

Umba susi si napogau'um lako ju-maa' senga', ³⁴ingganna baine pahallu la mengkamma' wattunna ma'mesakoa' menomba. Tä' ia la mala ma'tula' illaam kapenombaam anna la ahui' dilumbäi, umba susi inna puha tisuha' illaam Pepaondonganna Musa. ³⁵Maka' deem la maelo' napengngissanni, la ungkutanai muanena dio banuanna. Aka diposih'i kela bainei ma'tula' illaam kapenombaam.

³⁶O ussangaa' umbai' ikoa' naongei buttu indo Battakadanna Puang Allataala! Ussangaa' umbai' angganna' iko untahima Battakada Debata ia too! ³⁷Maka' deem tau illaam alla'-alla'mua' nasi'dim naua: "Mesaä' to dimana' si untula' kada napa'palosaam Puang Allataala," battu haka naua: "Namana'ä' Penaba Maseho kapaissangam senga'," iya tau ia too tä' mala tala naakui naua: "Inde issinna suha'na Paulus taia tula' kalena bäbä sapo' pahentana Debata napalanda'." ³⁸Sapo' maka' deem tau untumpu pala'i inde tula'ku, pa'talinga lenda'i mamma' tula'na.

³⁹Dadi inggannakoa' solasubungku, la umpeä' si'da-si'daa' lalanna anna mala nahampoikoa' indo kapaissangam la untula' kada napa'palosaam Puang

Allataala. Anna tä' la ullabai ke deenni tau maelo' ma'tula' umpake ma'hupa-hupa basa memängä-mängä pa'palosainna Penaba Maseho. ⁴⁰Sapo' ia asanna ia too pahallu la dipalako umba susi la sipäto'na anna la tiäto'na.

Katibangonna sule Kristus dio mai alla'na to mate

15:1-11

15 O inggannakoa' solasubungku, maelo'ä' la umpakilala polekkoa' diona indo Kaheba Katilallasam to puha kupakahebaiangkoa' lessu'. Wattu eta too untahimanna' indo Kaheba Katilallasam anna sule lako temo tontä liu mendadi pennumpuammua'. ²Maka' mala siakoa' mentobe manda' anna mengnganti matoto' illaam indo Kaheba Katilallasam to puha kutulasangkoa', manassa anna la iai umpasalama'koa', assala'na mengkalao illaanna' unä' penabammu tä' dio bäbäa' pudu'mu.

³Indo kaheba kutulasangkoa', ia siam too indo to puha kutahima. Anna indem ia handam too'na la dipengngissanni: Kristus puha umpebeem kalena dipatei anna mala nasolongkia' dio mai dosata, umba susi inna puha dipayolo lambam illaam Battakada Debata. ⁴Puhai dipatei, dipatamam lokko', sapo' illaanni allo katallunna dipatibangommi sule dio mai alla'na to mate, umba susi inna puha dipayolo lambam illaam Battakada Debata. ⁵Puhai dipatibangom sule, iya umpa'paitaammi kalena lako Petrus mane lakoi indo suho senga'na. ⁶Puhai ia too, umpa'paitaam oom kalena lako pentuhu'na la'bi lima hatu' tau budanna illaam mesa ongeam. Tau ia too budapi tubo sule lako temo, anggam sanaka-naka puham mate. ⁷Mane umpa'paitaanni duka' kalena lako Yakobus anna mane umpa'paitaam oo kalena lako ingganna suhona. ⁸Katampasanna umpa'paitaam kalena

lako kaleku. Kao-kao tä' susi indo suho senga', aka indo anna mendadi suhoä' sihhapannä' kao äinä'-änä' to subum taiam wattunna kasubunganna.[¶]

⁹Aka kao handam madiongam padakam suhona Kristus. Tä' kao sihatannä' la diuam suho, aka puhaä' undahha umma'na Puang Allataala. ¹⁰Sapo' pa'kamasena Puang Allataala tama kaleku nasuhum malaä' susi inde tentomai. Anna tä' labu' bäbä indo pa'kamasena tama kaleku, aka mengkähä kahha' puha hä' kao anna la ingganna solaku suho. Sapo' taia kamatohoam kaleku nasuhum mala kupateem, sapo' pa'kamasena Puang Allataala muundu' liuä'. ¹¹Dadi, ia mammo anna ia indo to puha umpatudukoa' indo Kaheba Katilallasam, battu la kao hi, battu la solaku hi, tontä bäbäm aka sahhupa hia indo Kaheba Katilallasam kipaissanniangoa' anna iam too unkatappa'ia'.

Katibangonganna sule to mate

15:12-34

¹²Indo lessu' kitulasangoa' kiua: "Puham dipatibangom sule Kristus dio mai alla'na to mate," iya akanna deem ohi solamua' muuai: "Tä' la dipatibangom sule to mate?" ¹³Indo kela tappa' tä' la dipatibangom sule to mate, iya tä' di tia duka' isanga dipatibangom sule Kristus dio mai alla'na to mate. ¹⁴Maka' hapanna la tappa' diua tä' tibangom sule Kristus dio mai alla'na to mate, iya tä' di tia isanga deem gunana kitulasangoa' indo Kaheba Katilallasam, anna tä' toi deem gunana matappa'koa'. ¹⁵Mane deenni, kaägä'-ägä' dakam too kami' duka' isanga indo kitulasangoa' diona Puang Allataala. Aka balikoa' kipatudu

kiua puha napatibangom sule Puang Allataala Kristus dio mai alla'na to mate. Aka maka' tappa' si'da diua tä' la dipatibangom sule to mate, iam tia isanga tä' duka' napatibangom sule Puang Allataala Kristus. ¹⁶Aka maka' tä' la dipatibangom sule to mate, iya tä' duka' la dipatibangom sule Kristus dio mai alla'na to mate. ¹⁷Hapanna tä' la dipatibangom sule Kristus dio mai alla'na to mate, iya tä' tia isanga deem gunana indo kamatappasammua' anna la tontä liupokoa' nalumbäi kakuasaanna dosa. ¹⁸Maka' la susi, iya la tilaka hi tia isanga ingganna pentuhu'na Kristus to matem. ¹⁹Maka' hapanna anggama la puha illaam lino indo kapahhannuanta lako Kristus, iam tia isanga ingganna pa'padadinna Puang Allataala kitanna' handam memase-mase.

²⁰Sapo' mannassa anna puhai tibangom sule Kristus dio mai alla'na to mate. Iam too umpomannassai lako ingganna to mate indo pentuhu'na Kristus la dipatibangom duka' sule dio mai alla'na to mate. ²¹Aka umba susi pa'pogau' kadakena mesa tau isanga Adam napolalam mate hupatau, susim too duka' pa'pogau'na mesa tau isanga Puang Yesus napolalam mala tibangom sule hupatau dio mai alla'na to mate. ²²Umba susi ingganna hupatau mate kahana kasilombunganna Adam, susim too duka' hupatau dipatibangom sule kahana kasilombunganna Kristus. ²³Sapo' si mesa-mesa tau la dipatibangom sule situhu' wattunna: uhuna Kristus yolo mendadi pebate lalanna ingganna to unkatappa'ia'. Sulei too ma'penduanna, iya umpatibangommi sule ingganna pentuhu'na. ²⁴Puhai too, sulem allo ma'katampasanna. Wattu eta too Kristus la umpempa'deam asam ingganna

[¶]15:8 Suho 9:3-6.

to ma'pahenta, tomahaja, anna ingganna to kuasa senga'. Mane umbehoi kapahentaanna Kristus lako Puang Allataala Ambeta. ²⁵Aka la tontä liupi ma'pahenta Kristus sule lako wattunna la napopa'bukku Puang Allataala ingganna balinna dio olona Kristus lambi' nahondoi dokko. ²⁶Pada indo balinna Kristus, kamateammi handam katampasam la napempa'deam. ²⁷Aka puha tisuha' illaam Battakada Debata naua: "Puang Allataala la umpopa'bukku ingganna-ingganna sia dio olona lambi' nahondoi dokko."²⁸ Moi anna susi, sapo' mannassa anna tä' Ia la dipopa'bukku Puang Allataala dio olona Kristus aka Ia siam indo to umpopa'bukku ingganna-ingganna sia dio olona Kristus. ²⁸Puhai too dipopa'bukku ingganna-ingganna sia dio olona Kristus, iya Ia opi umpopengka-dio kalena dio olona Ambena To puha umpopa'bukku ingganna-ingganna sia dio olona. Nasuhum Puang Allataala opi la unguasai ingganna-ingganna sia.

²⁹Maka' tä' la dipatibangom sule to mate, iya aka hi anna deenni tau si ditedo' umbala' indo to puham mate? Aka gunana napogau' kaha-kaha ia too kela tä' siam la dipatibangom sule? ³⁰Tä' deem naondai balingki nadahhakam allo-allo. Sapo' maka' hapanna tä' la dipatibangom sule to mate, iya akam gunana ahu'kam untingngolo indo pandahhaam ia too? ³¹Si'da-si'danna ingganakoa' solasubungku tä' kuua bäbä, allo-alloä' muoloi pandahhaam to la mala umbaba kamateam. Ia anna ma'tula' susiä', aka yabomä' pangka-pangka bulabam muita kamatapassammua' lako Kristus Yesus Debatanta. ³²Indo kela pikki' hupataui, iya aka la kauntungangku mengkähä susi illaam inde kota Efesus sihhapannä' sidallo' olo'-olo' to

peande? Aka indo kela tä'i tibangom sule to mate, iya aha leko'um tia ke tatuhu'ia' indo deem tula' naua: "Maikoa' tapomasannam-sannam kaleta mangngande anna mangngihu', aka tontänna' mateta makale'."³³ Anna abana deem tau ma'pikki' susi ia too.

³³Daa umma'dinna' nababa bulim tau susi ia too. Aka indo pa'pogausam kadakena la unkladakei indo kamapi-aam puha titanam illaam kalemua'. ³⁴Pengkilalai manappaia' indo la sihatanna dipogau', anna tä'ungkoa' la umpogau' liu dosa. Aka deem liupia' illaam alla'-alla'mu to tä' muissam menna setonganna diuam Puang Allataala. Ia anna ma'tula' susiä' aka kuua anna malakoa' masihi'!

Katibangonganna sule bätä puntinna to mate

15:35-58

³⁵Sapo' madomi' deem mekutana naua: "La maakam ia susi to mate la mala tibangom sule? La maaka susi hupanna indo bätä puntinna ke tibangommi sule?" ³⁶Tä' deem pada satomaho to ma'pikki' susi! Aka tanangam dio bela' tä' tia mala tubo ke tä'i ditanam yolo lise'na dokko litä' sihhapam to mate dilamum. ³⁷Anna indo to ditanam dio bela', la gandum daka la tanangam senga' daka, taia hi tia indo tanangam ia too ditanam, sapo' lise'na hi tia ditanam anna mane tubo dio mai indo tanangam. ³⁸Puhai too ditanam, iya Puang Allataala la umbeenni hupa situhu' pa'elo'na. Sakhupa oi too lise' ditanam, iya tubo oom ia duka' situhu' hupanna nabeem Puang Allataala. ³⁹Anna mane diona menabanna illaam inde lino, sahhupa oi too, senga' oom ia duka' tampana.

§15:27 Puj. 8:7.

**15:32 Yes. 22:13.

Hupatau senga' ia duka' tampana, olo'-olo' senga' oom ia duka', dassi senga' oom ia duka', anna bau senga' ia duka' tampana. ⁴⁰ Anna maka' tapetua' duka' ingganna issinna langi' anna issinna inde lino, issinna langi' senga' oom ia duka' kamapiaanna, anna issinna lino senga' oom ia duka' kamapiaanna. ⁴¹ Susi siam duka' kamapiaanna mata allo sisala kamapiaanna bulam. Susi toi duka' bintä, senga' oom ia duka' kamapiaanna. Anna indo duka' bintä, tungga' senga' kamapiaanna.

⁴² La susim too duka' katibangonganna sule to mate. Aka bätä puntinna hupatau inde lino la bosu ke dilamunni. Sapo' la tä'um susi indo bätä puntinta ke dipatibangommakia' sule aka tä'um ia pole' la mala bosu. ⁴³ Wattunna dilamum inde bätä puntinta abana kadake anna malu'bä', sapo' maka' dipatibangommi sule, iya la mapindämmi pole' anna la matohhä. ⁴⁴ Indo bätä punti to dilamum, bätä punti inde lino. Sapo' maka' dipatibangommi sule, iya la mengkubalimmi mendadi bätä punti buttu yabo mai suhuga. Aka umba susi deem bätä puntinna hupatau sihatanna dipake illaam inde lino, susim too duka' la deem bätä puntinna hupatau sihatanna dipake illaam suhuga. ⁴⁵ Umba susi puha tisuha' illaam Battakada Debata naua: "Indo pamula tau diuaam Adam dipenabai nasuhum tubo."†† Sapo' Kristus to diuaam Adam ma'katampasanna, mebeem ia penaba mepatubo sule lako salakolakona. ⁴⁶ Taia indo bätä punti buttu illaam mai suhuga yolo mebeem Puang Allataala. Aka uhuna mebeem indo bätä punti la sihatanna dipake illaam inde lino. Dako'pi mane mebeenni indo bätä punti buttu yabo mai suhuga. ⁴⁷ Indo Adam uhuna, litä' ditampa, sapo' indo ia

Adam kaduanna battu diua Kristus buttu yabo ia mai suhuga. ⁴⁸ Inde hupatau tentomai susi liu Adam, litä' ditampa. Sapo' hupatau to la tama suhuga la susi liu bätä puntinna indo to buttu yabo mai suhuga. ⁴⁹ Umba susi bätä puntinta tentomai susi bätä puntinna Adam litä' ditampa, la susim too duka' bätä puntinta dako', la susi bätä puntinna Kristus to buttu yabo mai suhuga.

⁵⁰ Kalembasanna inde tula'ku ingganakoa' solasubungku kuua: inde bätä puntinta to dipapia dio mai bale anna haha tä' la mala tama kapahentaanna Puang Allataala yabo suhuga. Battu diua inde bätä puntinta to la mala bosu, abana inna tä' mala sola indo to la da'da' liu sule lako salakolakona.

⁵¹ Pehingngiia' anna umpaillaam penabaia' inde kada ditambinna Puang Allataala: Tä'kia' la mate asam yolo, mane sulei Puang Yesus ma'penduanna. Sapo' la dipopengkubalim asangkia', susi to tubo teem to mate. ⁵² Kaha-kaha ia too tä' tau la bali mekkappi'de anna dadi bábäm ke monim sangkakalana Puang Allataala ma'katampasanna. Wattunna moni indo sangkakala, ingganna to mate la tibangom asam sule ma'bätä punti bakahu la da'da' liu sule lako salakolakona, anna kitaa'-kita to tubopi la dipopengkubalingkia' duka'. ⁵³ Aka inde bätä puntinta to la mate anna to la bosu, la dibala'i bätä punti tala deem mate anna tala deem bosu. ⁵⁴ Maka' puham dibala'i inde bätä puntinta to la mate anna la bosu, la dibala'i bätä punti tala mate anna tala bosu, iya etapi too mane ganna'i indo puha tisuha' illaam Battakada Debata naua: "Kende'um kapataloam aka dipa'deim kamateam."‡‡

⁵⁵ "O kamateam, umbangka kapataloammu?"

††15:45 Kad. 2:7.

‡‡15:54 Yes. 25:8.

O kamateam, umbangka ipomu?"^{¶¶}

⁵⁶Indo diuam ipona kamateam, dosana hupatau. Anna Pepaondonganna Musa naongi kuasanna dosa, aka maka' ditekka indo pahenta, iya mebaba lako kamateam. ⁵⁷Sapo' sihatam anna sipäto' umpakende'kia' pa'kuhusam sumanga' längäm olona Puang Allataala, aka nabeengkia' kapataloam untaloi dosa anna kamateam umpolalam Debatanta Yesus Kristus!

⁵⁸O inggannakoa' solasubungku to kupakamaja, iam too kasuhunganna anna la tontä liungkoa' mentobe manda' anna mengnganti matoto' illaam kamatap-pasam. La pahallukoa' ma'kadua-dua liu umpalako pengkähänganna Debata, aka muissanna' muua lupu' hesomu lako Debata tä' la labu' bäbä.

Doi' nahempum to Korintus la napamoloiam jumaa' yabo Yerusalem

16:1-4

16 Mane deenni, la kutu-lasangka' diona indo doi' la umpamoloiana' solata to matappa' yabo Yerusalem. Kupelau anna umpasusii' indo puha kupatuduam ingganna jumaa' dio lembäna Galatia. ²Allo minggu oi too umpasehe onna' piha doi'mu situhu' indo pallolongammua'. Annaia' indo doi' anna mala tihempum loppo' ke suleä' matim. Landa'ku too, iya tappa umbeemmä', tä' mane la dihepump. ³Anna suleä' too matim, iya umpapiamä' suha' diona indo doi' anna kusuai sanaka-naka tau indo to uhhannuanna' anna unkatappa'i le'ba' längäm Yerusalem nababa indo suha' sola indo doi' la umpamoloiana'. ⁴Anna maka' umpenabaanna' anna

la pahallupä' duka' le'ba', iya la laoa' kupasolai längäm.

Pattujunna Paulus

16:5-12

⁵Puhapä' lako propinsi Makedonia mane matinnä' kupellambi'ikoa', aka abana inna la lakoä' yolo. ⁶Maka' too ke sulemä' matim, iya la tohhopä' itim masäe-säe, umbai' la puhapi wattu kamadingingam mane le'ba'ä'. Lessu'i too wattu kamadingingam, iya umpamoloimä' anna mala deem kupake umpatahu' pa'laoangku lu lako ongeam senga'. ⁷Tä' kuaku matim temo kela kulempäi bäbäkoa' säpäi'. Sapo' maka' naua Debata ke matinnä', iya maelo'ä' la masäepi tohho itim. ⁸Sapo' yolona anna la matinnä', iya la tohho indepä' kota Efesus sule lako allo kasalle Pentakosta,^{§§} ⁹aka tibukkam temo lalam la umpalakoä' pengkähängam la keguna inde, moinna anna buda siam duka' to umbaliä'.*

¹⁰Maka' sule matim Timotius, la untahima manappaa' anna mala tä' deem kamalajasanna illaam alla'-alla'mua', aka mesa duka' sabanganganku to unγκähä pengkähänganna Debata.†

¹¹Tä'koa' deem la umpa'bahinni'i. Anna maka' la ma'pasulem mai, iya la umpamoloia' anna mala deem napake anna masannanni lako lalam. Aka kiampai lium kasuleanna solakam sanaka-naka solasubunta inde.

¹²Mane deenni, diona solasubuntaa' Apolos, pembuda punalam kusua matim umpasolai sanaka-naka solasubunta napellambi'ikoa'. Sapo' sule lako temo moka liupi matim. Battu pihampa

^{¶¶}15:55 Hos. 13:14.

^{§§}16:8 Sand. 23:15-21; Pass. 16:9-11.

*16:9 Suho 19:8-10.

†16:10 1Kor. 4:17.

ke deemmi wattunna mane matinni napellambi'ikoa'.

Kada pebubunna Paulus

16:13-24

¹³La pahallu si'da-si'dakoa' majaga! Anna la tontä liungkoa' mentobe manda' anna mengnganti matoto' illaam kamatappasammu! La bahanikoa' anna matoho muanda'i liui. ¹⁴Ingganna pa'palakoammua' la pahallua' umpalako sola pa'kamase.

¹⁵Muissanna' muua indo solasubuntaa' Stefanus sahapui handam yolo matappa' lako Kristus dio propinsi Akhaya, anna puha umbeho ponno kalena umpamoloi umma'na Puang Allataala. ¹⁶Kupelau si'da-si'daa' matim anna manuhu'koa' lako tau susi ia too. Susi siam duka' la manuhu'koa' lako ingganna indo sababanganna to mangngala taba ullämmä' kalena illaam pengkähänganna Debata.

¹⁷Tä' deem pada satilalla'ä' tappana sule Stefanus sola Fortunatus anna Akhaikus aka mala napamoloiä' unγκähäi indo tää'na mala unγκähäa'.

¹⁸Tilalla'ä' aka napatialaannä' inabangku umba susi puha napatialaangkoa' inabammu. Tau susi ia too pahallu la dipa'kasallei.

¹⁹Kupalandasam salama'na ingganna jumaa' inde propinsi Asia. Kupalandasam duka' salama' pa'pakamajanna illaam sanganna Debata Akwila sola Priskila anna ingganna indo to matappa' to si ma'sambajam dio banuanna indo to dua.

²⁰Kupalandasam toi duka' salama'na ingganna solasubuntaa' inde. Sisalama'-lama'koa' mesa sola mesa sola ponno penaba umba susi la sihatanna napogau' to matappa'um. ²¹Salama' buttu di kao, Paulus. Ma'kalem too pole' limangku untuli'i inde kada salama'ku.

²²Lako to tä' unγκamasei Debata la tilaka! *Maranata*, battu diua o Debata bale' sulengko!

²³Handandanni Puang Yesus Debatanta untamba'koa' pada-pada.

²⁴Tä' deem pada sakukamaseikoa' anna kupakamaja illaam sanganna Kristus Yesus.

Padam too.

Kapenduanna Suha'na Paulus lako Jumaa' dio Korintus

Bätäna issinna

Inde suha' natuli' Paulus napakatuum jumaa' dio Korintus, mesa kota kasalle dio propinsi Akhaya. Paulus-um handam yolo umpa'pakahebaam Kaheba Katilallasam lako to Korintus (Suhu 18:1-7). Tappana le'ba' Paulus umpellei Korintus lu lako kota senga', iya kende'um illaam jumaa' Korintus sanaka-naka to ussasai Paulus lambi' naua: "Taia suhona Puang Yesus indo Paulus." Iam too anna ussuam Titus Paulus lako Korintus napalandasam kada makahha'na lako to Korintus. Tappana ma'pasule Titus dio mai Korintus le'ba' lako Makedonia, iya sitammum Paulus dio. Iya natulasammi naua: "Nakamalli'iko to Korintus, maelo' punala la silambi'koa'" (2Kor. 7:6-7). Sapo' deem siapi to kahha' ulu moka lipi ia untahima anna untuhu'i Paulus.

Tappana naissam Paulus, iya umpakatum suha' to Korintus. Inde Kapenduanna Suha'na Paulus lako Jumaa' dio Korintus, iam too indo suha' napakatuum to Korintus wattu eta too. Illaam inde suha'na natula' diona pengkähänganna mendadi suho anna umpa'pakahebaam Kaheba Katilallasam (2:14-6:10). Natula' duka' diona maaka susi pa'pakamajanna lako to Korintus (6:11-13; 7:2-4, 13-16). Anna natula' toi duka' diona katilallasanna tappana naissam naua budam to Korintus untihokongam ingganna gau' kadakena, lambi' ungkamalli'im pole' Paulus (7:5-13). Deem duka' pelauanna Paulus lako to Korintus diona la umpamoloi solana to mase-mase dio Yudea (8:1-9:15). Anna katampasanna, nakahha'i Paulus indo to ussangai kalena suho taditondom sola pentuhu'na, anna to tä' muakui Paulus naua mesa duka' suhona Kristus (10:1-13:10).

Lesoanna issinna

1. Kada passu'bä' anna diona Puang Allataala la mepakahanga illaam kamasussaam (1:1-11)

2. Kasilombunganna Paulus anna jumaa' Korintus (1:12-7:16):

a. Napomakaleso Paulus kasuhunganna anna tä'i danum indo pattujunna lessu' la lako Korintus

b. Natula' diona indo pengkähänganna mendadi suho la umpa'pakahebaam Kaheba Katilallasam

c. Napelau la tibukka penabanna to Korintus untahima Paulus sola sababanganna

3. Pampamoloinna to Korintus lako to matappa' dio Yudea (8:1-9:15)

4. Paulus umpasala indo to untula'tula' kadakei anna napomasiä' toi diona alla'na kalena anna suho tatappa' (10:1-13:10)

5. Kada pebubunna Paulus (13:11-13)

1 Inde suha' buttu di kao Paulus mesää' suhona Kristus Yesus aka situhu' pa'elo'na Puang Allataala. Duka' buttu di solasubuntaa' Timotius,

lu lako inggannakoa' solasubungki umma'na Puang Allataala itim jumaa' Korintus, anna lu lako duka' ingganakoa' umma'na Puang Allataala itim propinsi Akhaya. ²Handandanni Puang Allataala Ambetaa' sola Debatanta Yesus Kristus la untamba'koa' anna namana' kamasakkeam sola kamasannangam.

Puang Allataala la mepakahanga illaam kamasussaam

1:3-11

³Dipuji sanganna Puang Allataala, Ambena Debatanta Yesus Kristus to napenombai. Puang Allataala Ambeta to ponno pa'kamase anna kabuttuanna pepakahangaam. ⁴Illaam untammukam kamasussaam Puang Allataala umpakahanga penabangki, anna mala indo pepakahangaanna kitahima la kipake

umpakahanga penabanna solaki to untammu kamasussaam. ⁵Aka umba susi puhangkam duka' ussi'dim kamasussaam tä' deem pada budanna susi indo puha nasi'dim Kristus, susim too duka' tä' deem pada budanna pepakahangaam kilambi' illaam kasilombungangi Kristus. ⁶Ia anna untammukam kamasussaam anna mala dipakahangaa' penabammu anna duka' malakoa' ullambi' kasalamasam. Maka' dipakahangakam, iya la dipakahanga siangkoa' tia duka' nasuhum malakoa' tontä liu manontom muoloi ingganna kamasussaam susi indo kisi'dim. ⁷Tontä liukam mahannu kiua la tontä liukoa' manontom illaam muoloi kamasussaam. Aka kiissam kiua umba susi pada-padangkia' untammu kamasussaam, susim too duka' pada-padangkia' untammu pepakahangaanna Puang Allataala.

⁸Inggannakoa' solasubungki, kipohäe ke muissannia' diona indo kamasussaam mabanda' kisi'dim dio propinsi Asia. Tandana tä' deem pada samabanda', iya tä'um deem kiua la malapakam tubo, ⁹susi liu indo ke nauai to mahhotto: "La dipateingko." Ia anna kitammui, aka la mendadi pepatuduam lako kami' anna mala tä'kam uhhanuam kamatohoam kaleki, sapo' la mahannu lakokam Puang Allataala to kuasa umpatibangom sule to mate. ¹⁰Puang Allataala puha ullappasangkam dio mai kamasussaam mepaambi' mate, anna la tontä liukam nalappasam dio mai kamasussaam. Anna kihannuam la tontä liukam nalappasam illaam allo la kitingngajona, ¹¹ke tontä liukoa' umpamoloikam illaam sambajam. Dadi kahana buda tau umpa'sambajangankam anna natahima Puang Allataala sambajanna, nasuhum la buda siam duka' tau tilalla' längäm aka indo pa'kamasena Puang Allataala lako kaleki.

Kasuhunganna anna tieli'i pattujunna Paulus

1:12-2:4

¹²Sundede buaki kisi'dim, aka kipikki' anna kipenabaam indo ingganna pa'palakoangki illaam inde lino lako ingganna hupatau, la'bi-la'binna lako ikoa', kupalako asam sola unä' penaba sambulo-bulo anna penaba mahändä indo bali napatamaiangkam Puang Allataala. Kaha-kaha ia too kupalako taia kahana kamanähängam hupatau sapo' sola kamatohoam namanasangkam Puang Allataala. ¹³⁻¹⁴Ingganna indo kitulisangkoa' sangngim kaha-kaha la malannaa' tappa umpähäm ke umbatai. Temo tä'pi muissam tongangkam, sapo' kuhannuam dako'i too, iya muissam si'da-si'dangkam pole'. Aka maka' susi, sulei too Debatanta Puang Yesus ma'penduanna la umpa'kassiangkam umba susi kipa'kassiangkoa'.

¹⁵Ponnoä' pahhannuam kuua la muissam manappakam ke dako'i, nasuhum kupattuju sala la penduangkoa' battuam kupellambi'i anna mala penduam tiluppi' pa'tamba' ullambi'koa'. ¹⁶Aka kupattuju sala kuua la lempää' itim indo anna lakoä' propinsi Makedonia anna ma'pasuleä' too dio mai, iya lempä omä' itim anna malakoa' umpamoloia' anna mala deem kupake umpatahhu' pa'laoangku lako Yudea. ¹⁷Sapo' tieli' ohi indo pattujungku. Iya mala haka disangaiä' to kapendo-pendo? Ussanga haka' pattuju hupatau indo pattujungku, pissam kuua: "Io, la laoä'," pissam kuua: "Tä' ohä' la lao?" ¹⁸Sapo' tä' susi! Aka umba susi Puang Allataala mala dikatappa'i, susim too duka' indo dandingki matim tä' kipakaeli'-eli' bäbä pissam kiua: "Io," pissam kiua: "Tää'." ¹⁹Aka tä' Ia kapendo-pendo Yesus Kristus Änäna Puang Allataala to kipaka-

hebaiangkoa' solakam Silas anna Timotius. Tä' napakaeli'-eli' bäbä pattujunna la pissam naua: "Io," anna pissam naua: "Tää'." Sapo' to manontom Ia umpasule lako pa'dandinna. ²⁰Mannassa anggam "Io" dilambi' illaam Yesus Kristus aka ingganna pa'dandinna Puang Allataala napasule lako asam umpolalam Änä'na. Anna indom too pa'palakoanna Yesus Kristus nasuhum mala tapomatande Puang Allataala taua: "Amin, takatappa'i la napasule lako." ²¹Ma'kale Puang Allataala umpakatoto' kamesaantaa' Kristus anna Ia siam duka' ullanti'kia' mendadi umma'na, ²²anna natandaikia' anna mala diissam diua naampuangkia' anna napatamaangkia' penabanta Penaba Masehona mendadi tanda lako kita diua tä' mala tala nabeem asangkia' ingganna indo puha nadandiangkokia'.

²³Nasa'biää' Puang Allataala aka nalosa penabangku. Naissam Puang Allataala kasuhunganna anna tä'ä' danum matim Korintus wattu eta too, aka tä' kuaku la mapi'di'a' penabammu ke kukeaha'ikoa'. ²⁴Tä'koa' manggi' kipassa diona sihatanna la unkatappa'i, aka matappa' si'da-si'dangkoa' lako Kristus. Angga ham kipeä liu lalanna anna malakia' mesa penaba anna malai tuttuam masannanna' penabammu.

2 Iam too kasuhunganna anna kukat-tum indo lessu' kuua tä' salapä' la matim aka indana mapi'di' pole oia' penabammu susi indo yolona. ²Aka maka' la kupi'di' penabakoa', iya mennapi la umpakahangää'? Tä'um tia deem, aka di sesena mehupataunna anggam tia ikoa' la umpakahangää', sapo' akapia ke puhangkoa' kupi'di' penaba! ³Iam too anna kupakatungkoa' indo suha'ku lessu'. Kupasusi anna mala tä' umpi'di' penabaä' ke matimmä'. Aka setonganna la umpatialaam dä' ia inabangku mane sipäto'i. Aka kukatappa'i kuua maka' tilalla'ä' tä' mala tala tilalla'koa' duka'.

⁴Indo anna kupakatukoa' indo suha'ku lessu' abana masussaä' kusi'dim anna malallam penabangku lambi' sumahhoä'. Tä' kuua la kupakatukoa' indo suha' anna mala masussa penabammua', sapo' kuua anna mala muissanna' muua: "Napakamaja si'da-si'dakam Paulus."

To kasalaam pahallu diampunni

2:5-11

⁵Mane deenni, diona indo tau to umpakende' pi'di' penaba itim, iya setonganna tä' anggam kao napi'di' penaba sapo' ikoa' handam. Sapo' indana makahha' sugali'i tula'ku la dotam kuua, tä' ia asammua' napi'di' penaba, sapo' piha mandakoa'. ⁶Budakoa' itim Korintus puha umpahuai pa'tahungkungam tau ia too. Anna indo pa'tahungkungam abana la padam ia. ⁷Dadi tentomai pahallunna' la muampunni anna umpakahanga tau ia too indana mapi'di' sugali'i penabanna lambi' kattu hannu. ⁸Iam too anna kupelau si'da-si'danna' matim anna mala ungkamaseinna' sule. ⁹Ia anna kupakatukoa' indo suha'ku lessu' aka kupangngitaikoa' kuua: "Battu la natuhu'i liu hi indo ingganna pepatuduangu, battu la tä' di." ¹⁰Maka' muampunnikoa' to kasalaam lako kalem, iya la kuampunni duka' tau ia too. Aka maka' deem to kasalaam pahallu la diampunni, iya la kuampunni dio olona Kristus aka la kamapiaammua' kupikki'. ¹¹Kupasusi ia too aka kuua indana deenni naola tomahajanna setam mengkähä' illaam alla'taa' aka inna taissammia' pattuju kadakena.

Tä' hapa' penabanna Paulus dio Troas aka tä' silambi' Titus

2:12-13

¹²Tappana landa'ä' lako Troas la umpa'pakahebaam Kaheba Katilallasam diona Kristus, iya nabukkaammä' lalam Debata la umpalako pengkähängangu dio ongeam ia too. ¹³Sapo' tä' hapa' pen-

abangku aka tä' liupi sule solasubuntaa' Titus dio. Iya kuuaammi to Troas: "La tahhu' lakoä' Makedonia."

**Paulus napopangkakka' Puang
Allataala umpa'pakahebaam
kaheba diona Kristus**

2:14-17

¹⁴ Sihatam anna sipäto' dipakende' kuhhu' sumanga' längäm olona Puang Allataala! Aka tontäkam napatette illaam uhame-hamei kapataloanna Kristus aka ma'mesangkam Kristus. Napopangkakka'kam Puang Allataala anna mala indo kaheba diona Kristus tiballa' kalua' sihhapam bauam bubanau' titumpam lao. ¹⁵ Aka kami'-kami' sihhapangkam tunuam bubanau' napehumalasang Kristus längäm Puang Allataala naudü' asam tau, susi to dipasalama' teem to la tinanda lako katilakaam. ¹⁶ Lu lako to dipasalama' sihhapangkam bauam bubanängngä' aka kibabaam kaheba la mepatubo. Sapo' lu lako ia to la tinanda lako katilakaam sihhapangkam ia bauanna to mate, aka tä' naaku natuhu'i indo kaheba nasuhum la tinanda ia lako kamateam. Dadi mennam la umbelai umpalako inde pengkähängam kikähä temo? ¹⁷ Tä'kam kami' susi indo buda tau to umpeä kauntungam umpasusi buleleam kahebana Puang Allataala. Sapo' kami'-kami' mendadingkam pentuhu'na Kristus to nasua Puang Allataala la umpalanda' kaheba ia too sola unä' penaba sambulo-bulo dio olona.

**Pa'dandiam bakahu matande puha ia
anna la indo pa'dandiam yolo**

3:1-18

3 Sapo' inde ma'kada susikam tä' mala disangai umpuji pole ongkam kaleki. Tä'kam susi indo tau senga' sule umpellambi'ikoa'. Aka si umbaba ia suha' katähängam anna mala untahima manappaa'. Anna si napelaua' matim anna umpapiaanni suha' katähängam la nababa lako kota senga'. Tä' kami' kipa-halluam la umbaba suha' susi ia too, aka ² ikonna' too sihhapam suha' katähängangki. Aka sihhapangkoa' mesa suha' tituli' illaam penabangki. Aka kitula' oi too indo pa'palakoammua', iya mala oom naissam anna napähäm ingganna hupatau naua: "Mapia pengkähänganna Paulus-a'." ³ Aka tandaam illaam ingganna pa'palakoammua' diua mendadingkoa' to matappa' si'da-si'da, buana pengkähäki. Iam too anna malam diua ikonna' too sihhapam suha' katähängangki natuli' Kristus. Indo suha' tä' dituli' umpake petuli' anna tä' toi dituli' dokko batu. Sapo' indo suha', natuli' Kristus illaam penabanna hupatau umpolalam kuasanna Penabanna Puang Allataala Debata tubo.

⁴ Ia anna bahanikam ma'kada susi, aka matappa' si'da-si'dakam lako Puang Allataala kahana Kristus mengkähä illaam kaleki. ⁵ Tä' deem lalanna la mala kiuu kamatohoangki anna kamanähängam kaleki nasuhum kibela kipalako inde pengkähängam, sapo' Puang Allataala umbeengkam kamatohoam anna kamanähängam. ⁶ Puang Allataalam too mengkähä illaam kaleki, nasuhum kibela mengkähä umpa'pakahebaam pa'dandiam bakahunna lako hupatau.

³3:2 Indo dituli' illaam basa Yunani, naua ia ke basa Bambanni: *ikonna' too suha' katähängangki tituli' illaam penabangki nabata anna napähäm ingganna hupatau.*

Indo pa'dandiam bakahu taia ätoham tituli' sapo' pengkähänganna Penaba Maseho lako hupatau. Indo ätoham tituli' battu diua Pepaondonganna Musa mebaba ia lako kamateam ke iai dihannuam la mepomalolo dio olona Puang Allataala. Sapo' indo Ia Penaba Maseho mebaba lako ia katuboam bakahu.

⁷Indo anna natuli'i Puang Allataala pepaondonganna dokko batu mane nabeenni Musa, wattu eta too tandaam kamatandeanna Puang Allataala dio lindona Musa lambi' pangkähhä mesilo. Tandana pangkähhä, iya tä' natua to Israel unnenne'i lindona Musa, moi anna tuttuam moho'um indo pangkähhäna dio lindona. Indo sia duka' pepaondongam to mebaba lako kamateam anna pangkähhäi kamatandeanna Puang Allataala wattu eta too, ⁸iya senga'um tia indo pa'dandiam bakahu nakähä Penaba Maseho! ⁹Susi siam duka', maka' matande indo pa'dandiam to la umbaba hupatau lako pa'tahungkungam, iya senga'um tia matandena indo pa'dandiam bakahu to umbukkaam lalam la naola hupatau anna malai napomalolo Puang Allataala! ¹⁰Moi anna matande indo pa'dandiam yolo, sapo' maka' dipasiita indo pa'dandiam bakahu, iya tä'um ia la matande diita. ¹¹Maka' matande indo pa'dandiam yolo moi anna anggam la säpäi' da'da', iya senga'um tia matandena indo pa'dandiam bakahu to la da'da liu sule lako salako-lakona.

¹²Kahana mahannu si'dakam lako indo pa'dandiam bakahu nasuhum bahanikam umpa'pakahebaanni. ¹³Tä'kam kami' susi Musa ussapu'i lindona anna mala tä' naita to Israel moho' indo pangkähhäna kamatandeanna Debata dio lindona. ¹⁴Sapo' abana titutu' pikkihanna indo

to Israel lambi' tä' nakaleso manappa gunana indo Pepaondonganna Musa. Anna sule lako temo maka' nabata issinna indo pa'dandiam yolo, mala diua sihhapam deem liupi pesapu' untutu'i pikkihanna, aka tä' liupi naissam aka gunana. Anggam anna malai diäläi indo pesapu' ia too battu diua tibukka pikkiham ke ma'mesam tau Kristus. ¹⁵Sule lako temo maka' umbata oom Pepaondonganna Musa, iya sihhapam deem liupi untutu'i pikkihanna. ¹⁶Sapo' maka' mengkatoba' tau anna untuhu'i tau Debata, tä' mala tala mäläi indo pesapu' battu diua tibukka pikkiham. ¹⁷Indo diuaam Debata eta inde, Ia siam Penaba Maseho. Anna menna-menna tohho Penaba Maseho illaam penabanna, tau ia too ullambi'um kalondaam dio mai ingganna to la ullabai kasilombunganna Puang Allataala. ¹⁸Tentomai tä'unna' kita nalabai pesapu' pikkihanta, nasuhum tandaammi kamatandeanna Debata illaam pa'palakoanta. Indo kamatandeam buttu di Debata, anna indo diuaam Debata Ia siam Penaba Maseho to tohho illaam kaleta. Anna Penaba Maseho unggahagai liukia' napopendadi susi kalena Kristus, nasuhum tuttuam masäe tuttuam tandaam kamatandeanna Debata illaam kaleta.

**Kamasiäsam illaam penabanta
dipasihhapam bulabam
dianna illaam kuhim litä'**

4:1-15

4 Pa'kamasenam too Puang Allataala anna napapassanningkam inde babaam kikähä temo. Iam too anna tä'ungkam deem si kattu hannu. ²Tä'kam umpogau' indo gau' mesihi'-sihi'na si napogau' membuni hupatau. Tä'kam duka' untipuu tau anna tä' tookam umpalulako

lu dio mai Battakadanna Puang Allataala. Dio olona Puang Allataala kipomakaleso manappa tungka ianna, anna mala nasangai mapia asangkam tau mengkalao illaam unä penabanna. ³Indo Kaheba Katilallasam kipa'pakahebaam abana titutu'pi lako tau piha, sapo' angga ham tia titutu' lako indo to inna la ullambi' katilakaam sule lako salako-lakona. ⁴Ingganna indo to tä' matappa' nabutai pikkihanna tomahajanna setam indo to unguasai tau illaam inde lino. Napa'laba-labai indo tomahajanna setam, aka naua indana malai naballoi kamasiäsanna Kaheba Katilallasam to untula' diona kamatandeanna Kristus. Indo Kristus susi siam sipa'na anna pa'pogausanna Puang Allataala. ⁵Indo kaheba kipalanda' taia kaheba diona kaleki. Sapo' indo kipa'pakahebaam kiua: Yesus Kristus Ia Debata. Anna kami'-kami' sabua'mukam aka maelo'kam umpalako pa'elo'na Puang Yesus. ⁶Puang Allataala puha ma'battakada naua: "Illaam mai kamalillingam la kende' kamasiäsam." Anna Puang Allataala ia siam umpadelle' kamasiäsam illaam penabantaa' anna mala masiä'a' pikkihanta, nasuhum tapähänna' kamatandeanna Puang Allataala pangkähhä dio lindona Kristus.[¶]

⁷Indo kamasiäsam illaam penabanta mala dipasihhapam bulabam dianna illaam kuhim litä', aka indo kuhim litä' madommi' huppu' anna kaleta ia ponno kamalammaam. Napateem Puang Allataala anna mala makaleso diua indo kakuasaam taditondom kipogau' tä' buttu di kaleki, sapo' buttu di Puang Allataala. ⁸Si bassa'kam

nasihimpi'-himp'i kamapi'disam, sapo' si mala mammakam lappa'. Si pusa'um tangnga'ki, sapo' tä' mammakam si kattu hannu. ⁹Si didahhakam, sapo' tä' mammakam deem natampeam Debata. Pembudakam dipongko sampe malimpä, sapo' tä' mammakam mate. ¹⁰Ussi'dim liukam kamasussaam anna kamapi'disam susi indo nasi'dim Puang Yesus wattunna didahha la dipatei, anna mala makaleso diua tubo sule Puang Yesus aka tandaam lako kaleki. ¹¹Aka inde tubopakam, iya deem liu tau maelo' la umpateikam kahana untuhu'ikam Puang Yesus. Susim too anna mala makaleso diua tubom sule Puang Yesus, aka tandaam kuasanna lako inde bätäki to tä' la da'da' liu. ¹²Dadi allo-allokam si saidi' tamate anna mala ullambi'koa' katuboam bakahu sule lako salako-lakona.

¹³Illaam Battakada Debata deem tisuha' naua: "Kahana matappa'a' nasuhum bahaniä' ma'tula'."[§] Susim too duka' kamatappasangki. Aka unkatappa'ikam Puang Allataala nasuhum bahanikam untula' indo Kaheba Katilallasam, ¹⁴aka kiissam kiua Puang Allataala puha umpatubo sule Puang Yesus, anna ia siam too duka' la umpatibangongkam susi Puang Yesus anna nababakia' sule dio olona. ¹⁵Ingganna inde kamasussaam kisi'dim keguna lako kalemua'. Aka maka' tuttuam buda tau uhhingngi indo Kaheba Katilallasam kipa'pakahebaam nasuhum ussi'dim pa'kamasena Puang Allataala, iya tuttuam buda siam tia duka' tau ma'kuhu' sumanga' dio olona, nasuhum dipomatande Puang Allataala.

[¶]4:6 kamatandeanna Puang Allataala pangkähhä dio lindona Kristus: Umba susi kamatandeanna Puang Allataala pangkähhä dio lindona Musa yolona, susim too duka' kamatandeanna Puang Allataala tandaam dio Kristus.

[§]4:13 Puj. 116:10.

Tubo situhu' kamatappasam

4:16–5:1-10

¹⁶Iam too kasuhunganna anna tä'ungkam deem si kattu hannu. Moi anna tuttuam malamma bätä puntingki sapo' dibakahui liu ia penabangki allo-allo. ¹⁷Aka inde kamasussaam kisi'dim illaam inde lino setonganna mabanda' sapo' kiangga' tä' pada umba anna anggam säpäi' la diola. Aka ingganna kamasussaam ia too la ungkembuaam kamatandeam lako kaleki sule lako salako-lakona. Anna kamatandeam ia too kasalle puha ia anna la inde kamasussaam kisi'dim. ¹⁸Aka taia kami' diitanna kipaitoo'na sapo' tää'na diita. Aka indo diitanna anggam ia säpäi' la da'da', sapo' indo ia tää'na diita la da'da' liu ia sule lako salako-lakona.

5 Inde bätä puntinta mala dipasihpam bahum taongei illaam inde lino. Anna taissammia' taua maka' dihenggäim inde bahunta, la nabeengkia' Puang Allataala bätä punti bakahu mendadi banuanna sungnga'ta yabo suhuga, taia pa'papianna hupatau, anna la da'da' liu sule lako salako-lakona. ²Inde tohhopakia' illaam inde lino mengkaloa'kia', aka mamali' sugali'ungkia' muampai wattunna la tohhokia' illaam indo bätä punti bakahunta yabo suhuga. ³Aka maka' talambi'um indo bätä punti bakahu, la sihhapangkia' ma'poheba sule anna mala tä'kia' ma'kambelä. ⁴Aka maka' tohhopi sungnga'taa' illaam inde bätä punti tapake illaam inde lino, iya mengkaloa'kia' aka mabanda' indo kamasussaam umpipi'ikia'. Tä' diua maelo'kia' la tapellei siaham inde bätä puntinta illaam inde lino, sapo' maelo'kia' la tappa umpelhondä indo bätä puntinta to buttu yabo mai suhuga, anna mala inde bätä puntinta to inna

la mate napessulle indo bätä punti to la tubo liu sule lako salako-lakona. ⁵Ma'kale Puang Allataala mengkähä illaam kaleta anna mala sediakia' la untahima indo bätä punti bakahu, anna la siam puha umpatamaangkia' kaleta Penaba Maseho mendadi tanda lako kitaa' diua tä' mala tala nabeem asangkia' ingganna indo puha nadandiangkokia'.

⁶Iam too anna matohom penabangki moi anna kiissam kiua maka' tohhopakam illaam inde bätä punti illaam inde lino, iya tä'pakam tohho sola Debata. ⁷Aka inde tubopakam illaam inde lino ma'palakokam situhu' kamatappasangi lako Kristus tä' situhu' indo tandaanna diita. ⁸Iam too anna matohom penabangki anna kipohäe puha ia ke kipelleim inde bätä puntingki anna le'ba'kam umpellambi'i Debata anna tohhokam sola. ⁹Iam too kasuhunganna anna si kipeä si'da-si'dam lalanna anna malakam ma'pogau' la napomasannanna penabanna Debata, susi inde tubopakam illaam inde lino, teem ke kipelleim inde bätä punti kipake temo. ¹⁰Aka tä' mala tala dibaba asangkia' lako olona ongeam pahhottosanna Kristus, aka la napahessakia' anna tungga' tatahimaia' la sihatanna tatahima situhu' pa'pogausanta wattunna tubopakia' illaam inde lino, ma'pogau' mapia hakika ma'pogau' kadake hakika.

Kasikapiaanna hupatau anna Puang Allataala umpolalam Kristus

5:11–6:1-13

¹¹Dadi, aka kiissam kiua pissam wattu la sitingngajokia' Debata, nasuhum mahea'kam kami' la umpogau'i indo tää'na naphäe. Iam too anna kipeä lium lalanna anna mala nakatappa'i hupatau tula'ki. Nalosa Puang Allataala tama penabangki,

anna kupemulu punala duka' la muissam si'da-si'dakam nasuhum täkam umbata-batai. ¹²Inde ma'kada susiä' tä' kuua anna mala umpuji pole ongam kaleki. Sapo' maelo'kam umbeengkoa' lalam la umpa'kassiangkam, anna mala muissanna' untimba'i indo to si angga diitanna lako solana napaitoo'na, taia indo illaanna penabanna. ¹³Deem tau ussangaikam to tatta'. Sapo' ia anna angga' to tatta'kam diita, aka kipasatutui kami' penabangki lako Puang Allataala. Sapo' maka' sitontongampi pa'palakoangki, iya ia too aka la kamapiaammua' kipikki'. ¹⁴Pa'kamasenam Kristus ma'kuasa illaam kaleki aka kiissammi kiuu indo mesa tau mate umbala' asam ingganna hupatau, kalembasanna ingganna hupatau bali asammi mate. ¹⁵Ia anna matei Kristus umbala' asam hupatau, anna mala ingganna hupatau to tubopi tä'um la untuhu'i pa'elo' kalena, sapo' la untuhu'im pa'elo'na Kristus to puham mate umbala'i anna puha dipatubo sule.

¹⁶Iam too anna tä'ungkam pole' si ussagai tau senga' situhu' passangai hupatau. Abana yolona si ussangaikam Kristus situhu' passangai hupatau sapo' temo tä'um. ¹⁷Dadi kuissammi pole' kuua ingganna tau to ma'mesam Kristus mendadim tau bakahu. Pa'dem indo katuboam yolona, aka nabala'um katuboam bakahu. ¹⁸Ingganna ia too Puang Allataala ungmähäi. Kahana pengkähäna Kristus nasuhum malakia' napasikapai sule kalena Puang Allataala, anna mane napadudunnikam pengkähängam la umpaitai lalam tau senga' anna mala sikapai duka' sule Puang Allataala. ¹⁹Indem ia indo kaheba kipa'pakahebaam: Puang Allataala umpasikapai sule kalena anna hupatau kahana pengkähäna Kristus.

Tä'um untuntu' kasalaanna hupatau indo puha napogau' dio olona. Anna puhangkam nabeem pengkähängam Puang Allataala la umpa'pakahebaam diona maaka susi lalanna anna mala sikapai sule Puang Allataala anna hupatau.

²⁰Dadi, kami'-kami' pesuanakam Kristus. Iam too anna maka' kipa'tula'ikoa', mato-mato Puang Allataala ma'kale umpa'tula'ikoa'. Sola sanganna Kristus, kipelau matim anna umbehokoa' kalemu la napasikapai sule kalena Puang Allataala. ²¹Tä' Ia madosa Kristus, sapo' nasua Puang Allataala umbala'kia' umpendudum dosata anna malakia' napomalolo Puang Allataala umpolalam Kristus.

6 Dadi kahana mangngala tabakam duka' illaam pengkähänganna Puang Allataala, nasuhum kipelau si'da-si'da kiuu: daa ullabusam bäbäia' indo pa'kamasena Puang Allataala to puhaa' untahima. ²Aka ma'battakada Puang Allataala naua:

"Illaam indo wattu puha kupa'tantu, kuhingngiammia' sambajammu, anna illaam indo wattu kupasalama' hupatau, kupamoloingkoa'."**

Patananni manappaia' talinga inde tula'ku: tentomaim too indo diuam wattu napa'tantu Puang Allataala! Anna tentomai toom duka' indo wattunna la ma'pasalama'.

³Kipeä lalanna indana deenni pa'palakoangki la natitedoi hupatau, napolalam deem tau ussagai kadake inde pengkähängangki. ⁴Sapo' illaam ingganna pa'palakoangki kipeä hia lalanna anna mala tandaam diua sabua'nakam Puang Allataala. Aka tontä liukam manontom muoloi ingganna hupanna kamasussaam anna kamapi'disam. ⁵Ditembe' talukungkam,

**6:2 Yes. 49:8.

ditahungkum, anna nasilebo-leboikam tau la naanu. Mengkähä kahha'kam, pembudakam tä' deem mamma', anna pembuda tookam kobe. ⁶Anna ma'penaba mahändäpakam, ma'palakokam sola ponno kakeakasam, sa'baha' liukam, anna mapia penaba. Duka' tontä liukam nakuasai Penaba Maseho, anna ma'kamasekam sola unä' penabangki. ⁷Umpa'pakahebaangkam indo kaheba kamaloloam, tandaam kakuasaanna Puang Allataala illaam kaleki, ma'gau' malolokam anna indo kamaloloangki sihham pa'dam anna unta' dipopangkakka' illaam pa'bundusam di ada'. ⁸Deengkam dipa'kasallei, sapo' deem toi duka' dipa'bahinni'ikam. Deengkam dipuji, sapo' deem toi duka' disassaikam. Moi anna iannapi anna ia kitula', sapo' si disangai siangkam to kaägä'-ägä'. ⁹Disangaikam tä' kaissangam, sapo' buda ohi tau muissangkam. Disanga matengkam sapo' tubo hakam. Ditembe' pusokam sapo' tä'kam mate. ¹⁰Moi anna dipi'di' penabakam, sapo' tilalla' liu siangkam. Mase-masekam diita sapo' buda hi tau kipatomakaka kulle di ada'. Tä' deem aka-akangki diita sapo' setonganna kiampuam asam ingganna-ingganna sia. Ingganna ia too, ia umpa'patandaanni diua sabua'nakam Puang Allataala.

¹¹O inggannakoa' solasubungki itim Korintus! Kipandanniam asammokoa' anna tibukka asammi pa'pakamajangki matim muitaa'. ¹²Tä'um kami' deem kuhäm pa'pakamajangki matim, sapo' kuhämpia' iko pa'pakamajammu lako kami'. ¹³La kupa'tula'ikoa' sihham pa' umpa'tula'ia' änä' ikaleku: kupelau

anna umpakamajakam duka' umba susi kipakamajakoa'.

Pepakilalaam diona tä' tau la mesa pa'palakoam to tä' matappa'

6:14-7:1

¹⁴Daa ummaelo'a' la mesa pa'palakoam to tä' matappa' lako Puang Yesus. Aka la maakam ia susi la mala sola kamaloloam anna kakadakeam! La mala haka tia sola kamasiäsam anna kamalillingam! ¹⁵La mala haka tia sihondä penaba Kristus anna tomahajanna setam! Deem daka tia la susi to matappa' anna to tä' matappa'! ¹⁶La mala haka tia sitappa Banua Debata anna debata lino pa'papia hupatau! Aka kitaa'-kita banuannakia' Puang Allataala Debata tubo, umba susi puha ma'kada Puang Allataala naua: "La tohhoä illaam alla'-alla'na anna kuolaam lelenni.

La mendadiä' Debatanna anna la mendadi ia umma'ku.††

¹⁷Iam too anna la umpelleinna' anna untampeam tau ia too.

Tä' si'da-si'dakoa' la mala moi podo la siissom indo ingganna kakadakeam. Maka' umpateemmia', iya la kutahimangkoa' too.‡‡

¹⁸Kao la mendadi Ambemua' anna ikoa' la mendadi änä'ku. Susim too kadanna Puang Allataala Debata To Handam Kuasa."¶¶

7 O inggannakoa' solasubungku to kupakamaja, nakala'kia' duka' ingganna pa'dandi ia too. Iam too anna la umpomasehongkia' kaleta dio mai ingganna to la ungdakei penabanta anna bätä puntinta. Anna pahallu duka' la tapasatutua' anna tapatepu katuboanta,

††6:16 Sand. 26:12, Yeh. 37:27, 1Kor. 3:16, 6:19.

‡‡6:17 Yes. 52:11.

¶¶6:18 2Sam. 7:14, 1Tul. 17:13, Yes. 43:6, Yer. 31:9.

aka mengkahea'kia' dio olona Puang Allataala.

**Katillallasanna Paulus umpelele
pa'palakoanna to Korintus**

7:2-16

²Kupelau la tibukkaa' penabammu untahimakam. Tä' deem kasalaangki lako moi podo la mesam tau, anna tä' toi deem tau la kihugiam. Tä' tookam deem umpangngala sahoi tau. ³Ia anna ma'tula' susiä', taia kahana kupasalakoa'. Aka umba susi puha kuuangkoa' indo lessu', tä' deem pada sakupakamajakoa', anna kitaa'-kita matekia' samateam tubo satuboam. ⁴Kuhannuam si'da-si'dakoa'. Anna yabomä' pangka-pangka bulabam kahana ikoa'. Moi anna nalambi'kam ma'hupa-hupa kamasussaam, sapo' tipakahangää' ke kukilalai onkkoa' anna tä' deem pada satiala inabangku.

⁵Moi indo landa'ungkam inde propinsi Makedonia tä' toi deem malakam mellube-lube. Aka ullambi' liukam ma'hupa-hupa kamasussaam, susi kasipengkaam kitammu, teem kamaheasam buttu illaam mai penabangki. ⁶Sapo' Puang Allataala to umpakahanga liu ingganna to masussa penaba, iam too duka' umpakahanga penabangki, aka napasitammukam Titus.^{§§} ⁷Tä' angga kasuleanna mai Titus nasuhum tipakahangakam, sapo' tipakahangakam duka' aka natulasampakam maaka susi indo si umpakahangaa'. Natulasampakam duka' naua: "Nakamalli'iko to Korintus maelo' punala la silambi'koa'." Anna natulasam tookam duka' indo ussossokoa' gau'mu anna maelo' si'da-si'dangkoa' pole' untuhu'ia'. Kaha-kaha iam too tuttuam umpatilalla'ä'.

⁸Moi anna indo suha' yoloku umpomapi'di'a' penabammu, sapo' tä'mä' usosso liu kaleku temo diona indo suha' kupakatukoa'. Abana usosso-sosso salaä' kaleku diona indo suha' kupakatukoa' tappana kuissam kuuu napomapi'di'a' penabammu. (Sapo' tä' siam masäe anna molem indo mapi'di'a' penabammu.) ⁹Sapo' tilalla'ä' sule temo. Taia kahana mapi'di'a' penabammu nasuhum tilalla'ä', sapo' ia anna tilalla'ä' aka indo kamapi'disam penabammua' napolalam untihokongammia' ingganna indo gau' kadakemu, anna ia too situhu' pa'elo'na Puang Allataala. Dadi mesa hia kauntungammua'. ¹⁰Aka indo kamapi'disam penaba situhu'na pa'elo'na Puang Allataala, iam too mengkähä illaam kaleta napolalam untihokongangkia' ingganna gau' kadaketa, nasuhum malakia' dipasalama'. Anna tä' deem tau la ussoi indo kamapi'disam penaba situhu'na pa'elo'na Puang Allataala. Sapo' indo kamapi'disam penaba tää'na mebaba lako katihokongam, anggam ia kamateam nakembuaam. ¹¹Penabaam siaia' too buana lako kalemua' indo kamapi'disam penaba situhu'na pa'elo'na Puang Allataala! Buana, si maelo' si'da-si'dangkoa' pole' umpogau' la sihatanna dipogau'. Sulibanna ia too mokangkoa' duka' disangai to ma'gau' kadake. Anna unghahidi'unna' pole' ingganna dosa, muissammia' pole' mengkahea' dio olona Puang Allataala, unghamalli'imä' pole', tuttuam tigaha'ungkoa', anna maelo'ungkoa' pole' untahungkam to kasalaam. Illaam inde ingganna kaha-kaha ma'tandaammi pole' diua tä'ungkoa' iko kasalaam. ¹²Dadi, ia anna kupakatukoa' indo suha'ku lessu'

§§7:6 2Kor. 2:12-13.

taia kahana la indo mandi to kasalaam kupasala. Taia toi lako mandi indo to masussa kahana pa'pobua'na indo to kasalaam. Sapo' kupakatukoa' indo suha', aka kuaa anna mala tandaam lako kalemua' diua abana umpakamaja si'da-si'dakam dio olona Puang Allataala. ¹³Iam too kasuhunganna anna tipakahangam pole' penabangki.

Sulibanna tipakahangakam, tä' duka' deem la susi katilallasangki muita katilallasanna Titus indo ussi'dim pentammumua'. ¹⁴Indo anna tä'pi le'ba' matim Titus, si kutula' mapia liukoa' lako. Anna tä' mämmä' kasihisam. Aka umba susi ingganna indo to puha kipokadaangkoa' sangngim tappa', susim too duka' indo to puha kitulasam Titus diona ikoa' sangngim tappa'. ¹⁵Anna tuttuam napakamajangkoa', aka nakilalai liu maaka susi kamanuhusammua' lako, pengkahea'mua', anna pa'pakasallemua'. ¹⁶Tä' deem pada satiala inabangku aka malangkoa' dihannuam illaam ingganna-ingganna sia.

Pelauanna Paulus lako to Korintus la umpamoloi solana to mase-mase

8:1-15

8 Mane deenni, o inggannakoa' solasubungku, pahallua' muissam indo to puha dadi inde propinsi Makedonia kahana pa'kamasena Puang Allataala mengkähä illaam kalena issinna ingganna jumaa' inde. ²Aka moi anna puham muoloi pa'sändäsam mabanda' anna sangngim to handam mase-mase, sapo' sangngim ponno mandi katilallasam anna matutu umpassubum doi'na la dibeem to mase-mase senga'. ³Kuita sola matangku buda punala aka-akanna napassubum, moi indo la napakena. Tä' deem disua, ⁴sapo' nakekke' bäbäkam naua: "La mala hakakam

duka' mangngala taba umpamoloi solasubunta to matappa' dio Yudea?" ⁵Indo napogau' la'bi ia anna indo kipemmitai. Aka handam uhuna silele umbeho kalena lako Debatanta, mane lakoi kami', aka situhu' pa'elo'na Puang Allataala. ⁶Dadi tappana muitakam kamapiaam penabanna to Makedonia, tappa kisua pole oom Titus matim. Aka Titus-um too umpahandu'i indo lessu' uhhempum doi' itim la dipamoloiam to matappa' dio Yudea. Iam too anna kisuum matim la umpatahhu' indo pa'pogausam mapia itim jumaa'mua'. ⁷Mentondom puhakoa' iko illaam ingganna-ingganna sia, susinna: matoto' kamatappasammua', manähäkoa' ma'tula', mandalam kapaissangammua' diona Puang Allataala, maelo' si'da-si'dangkoa' umpogau' la sihatanna dipogau', anna tä' deem la pada pa'kamasemua' lako kami'. Iam too anna kiuam: handam mapia ke mentondom puhakoa' duka' illaam umpamoloi padammua' to matappa'.

⁸Tä' diua kupassakoa' la umpalako kaha-kaha ia too. Sapo' kutulasangkoa' indo kamelosanna to Makedonia umpamoloi padanta anna mala umpotandenganna' umpalako. Iya la kuissammi too kuaa mengkalao illaam si'daa' unä' penabammu indo pa'kamasemu. ⁹Aka muissammia' muua nakamasei si'da-si'dakia' Debatanta Yesus Kristus. Aka moi anna to makäkkä'i, sapo' ahu' umpopemase-mase kalena aka la napamoloikoa' anna mala indo kapemase-maseanna nasuhum malakoa' mendadi to makaka di ada'. ¹⁰Situhu' kao pikkihangku diona indo uhhempum doi' la dibeem lako to mase-mase, la mapia ke umpatahhu' mandanna' indo to umpahandu'a' taum lessu'. Aka abana ikoa' handam yolo muinaba-nabai anna umpahandu'i indo kaha-kaha

ia too. ¹¹Dadi mapia ke umpasuppi' mandanna' indo pengkähängammu lessu'. Umba susi deenna' kamelosammu umpahandu'i, susim too duka' la pahallu deenna' kamohäeammu umpasuppi'i situhu' kapa'belaammua'. ¹²Maka' mengkalao illaanna' unä' penabammu maelo' ma'pebeem, iya la natahima Puang Allataala indo pa'pebeemmu situhu' deenna lako kalemua', tä' situhu' pa'dena lako kalemua'.

¹³Tä' kuua la dibanda'ikoa' iko anna dihingnganni ia solamua'. Sapo' kuua la mapia ke pada-pada katuboammua'. ¹⁴Illaangkoa' iko wattu kabosasam tentomai, dadi la umbelaa' iko umpamoloi indo to kakuhängam. Maka' hapanna deengkoa' duka' kakuhängam dako' anna bosa' opi ia, iya napamoloingkoa' duka'. Maka' susi, iya la pada timbammokoa' sipamoloi anna pada timbam toi katuboammu. ¹⁵Dadi indo to buda pallolonganna tä' la napopela'bi bäbä, sapo' la umpamoloi solana anna mala tä' kakuhängam umba susi tisuha' illaam Battakada Debata naua:

“To buda pallolonganna tä' la mela'bi, anna to saidi' pallolonganna tä' la kakuhängam.”*

**Paulus ussua Titus anna duapi
solana lako Korintus**

8:16-24

¹⁶Dipuji Puang Allataala aka umpatigaha' duka' penabanna Titus susikam maelo' si'da-si'da la napamoloikoa'! ¹⁷Aka tä' angga maelo' matim aka kisua, sapo' abana mengkalao illaam ia duka' unä' penabanna maelo' la napamoloikoa' lambi' nakattum la matim. ¹⁸Deempi

duka' mesa solasubuntaa' kisua matim la umpasolai Titus. Tä' ia deem pada sanapa'kasallei ingganna jumaa' kahana umpalako manappa indo pengkähänganna umpa'pakahebaam Kaheba Katilallasam. ¹⁹Tau ia too tä' angga la napamoloikoa' itim, sapo' puham duka' napilei ingganna jumaa' inde la napasolaikam illaam pa'laoangki lako Yudea. Aka la lakokam umbaba indo ingganna doi' la dipamoloiam lako to mase-mase dio anna mala dipa'kasallei Debata, anna duka' mala tandaam diua maelo' si'da-si'dakam umpamoloi solata to matappa'. ²⁰Kipaellä' kihempum sampe kipalanda' manappa indo doi' pada budanna la dipamoloiam lako to mase-mase. Aka kiua indana deenni napa'polalanni tau napasalakam. ²¹Aka kipeä lalanna anna ma'palako malolokam tä' angga mandi dio olona Debata sapo' duka' dio olona hupatau.

²²Deem polepi mesa solasubuntaa' kisua matim la umpasolaia' Titus. Pembudam si kipangngitai, iya abana bassa' si'da umpalako pengkähänganna Puang Allataala. La'bi-la'binna temo mohäe la napamoloikoa', aka nahannuam si'da-si'dakoa' la muaku umpamoloi solata to mase-mase. ²³Indo Titus abana saba-bangangku ia, si napasolaiä' mengkähä umpamoloikoa'. Anna indo ia solasubuntaa' dua to umpasolai Titus, iya pesuana ia ingganna jumaa' inde. Anna tau ia too umpa'kasallei Kristus illaam ingganna pa'palakoanna. ²⁴Dadi, kipelau la untahima manappaa' indo to tallu anna mala naissam ingganna jumaa' naua to ma'kamase si'dakoa', anna mala ingganna indo si kitula' mapiaangkoa' ma'tandaam diua tappa'.

*8:15 Täss. 16:18.

Kamatutum umpamoloi solata to matappa'

9:1-15

9 Setonganna tä'um pahallu la kutuli' illaam inde suha'ku diona indo doi' la dipamoloiam solata to matappa' dio Yudea. ²Aka kuissammi kuua kasalle kamelosammua' la umpamoloi solata, anna si kutula' mapia liukoa' lako to Makedonia. Si kuuaam: "Taum lessu'pi anna napattujum ia solasubuntaa' dio propinsi Akhaya la umpamoloi to mase-mase." Anna indom too kamelosammua' nasuhum buda to Makedonia tigaha' duka' penabanna la napotandangkoa'. ³Moi anna susi, sapo' kusua siam matim Titus temo napasolai indo dua solasubuntaa' anna mala napamoloikoa' uhhempum indo doi'. Kupasusim too anna mala tokam indo doi' kilambi' ke matimmakam umba susi indo puha kutulasam to Makedonia. La tokam indo doi' eta anna mala indo si kupa'kassiangkoa' lako to Makedonia tä' kuua bäbä, sapo' tappa' si'da. ⁴Aka maka' deem to Makedonia kupasola matim anna tä'pi toka indo doi', iya la masihi' punalakam too aka kihannuam salangkoa'. Anna la susi sianna' iko duka' la masihi'koa'. ⁵Iam too anna pahallum kusi'dim la kusua yolo indo to tallu matim anna mala naäto' la diaka susi dihempum indo doi' puhaa' undandi la dipamoloiam to mase-mase. Kupasusi ia too anna mala matinnä' too, iya tokam kulambi'. Aka maka' tokam kulambi', iya la ma'tandaammi too pole' diua indo doi' la umpopampamoloia' setonganna umpalako' sola unä' penaba taia kahana dipassa.

⁶Paalai manappaia' penabammu indee: To saidi' banne naambo', la

saidi' siam tia duka' napepahe. Sapo' to buda banne naambo', la buda siam tia duka' napepahe. ⁷Aka si mesa-mesa tau pahallu la ma'pebeem sola unä' penabanna. Tä' la mabanda' penabanna ma'pebeem anna tä' toi kahana dipassa. Aka napohäe Ia Puang Allataala indo to ma'pebeem sola masannam penaba. ⁸Anna Puang Allataala kuasa la umbeengkoa' mana' tiluppi'-luppi' nasuhum la tontä liukoa' muampuam asam ingganna umpahalluanna lambi' la'bi pole, anna mala umpakea' umpalako ingganna hupanna pengkähängam mapia lako tau senga'. ⁹Umba susi puha tisuha' illaam Battakada Debata naua:

"Ussebu' pa'tamba'na lako to mase-mase;

Pa'palakoam mapianna la tontä liu sule lako salako-lakona."[†]

¹⁰Puang Allataala umpatokaam banne lako to la mangngambo' anna kinande la naande. Ia toi la umpabudaangkoa' aka-akammu anna mala tuttuam kehängäm duka' pa'pogausam mapiammua'. ¹¹La natabungkoa' Puang Allataala ingganna-ingganna sia, nasuhum mala liukoa' ma'pebeem sola masannam penaba. Anna indo doi' uhhempunna' la kitabaam lako to mase-mase, iam too la nasuhum buda tau ma'kuhhu' sumanga' längäm Puang Allataala.

¹²Inde pa'palakoam mapia la umpogau'a', tä' angga mandi la umponnoi kakuhänganna umma'na Puang Allataala, sapo' la umpopendadi polepi duka' buda tau ma'kuhhu' sumanga' längäm Puang Allataala. ¹³Anna la buana indo pa'pogausam mapiammua', tä' mala tala umpuji Puang Allataala to Yudea, aka la naissam naua untuhu' si'da-si'dakoa'

[†]9:9 Puj. 112:9.

indo Kaheba Katilallasam diona Kristus to muakuia' la untuhu'i. La umpuji Puang Allataala aka tä' deem pada samatutukoa' umpebeem aka-akammu lako kalena anna lako tau senga'.¹⁴ Anna la napa'sambajangangkoa' sola ponno pa'pakamajanna matim, aka tä' deem pada sakasalle pa'kamasena Puang Allataala mengkähä illaam kalemua'.¹⁵ Sihatam anna sipäto' umpujikia' Puang Allataala aka tä' la diissam disangai indo mana' pa'kamasena!

Paulus umpasala indo to untula'-tula' kadakei

10:1-18

10 Mane deenni, kao, Paulus, deem la kuuaangkoa'. Deem tau muuai: "Indo Paulus si malamma tula'na ke sitingngajoi tau, sikambela opi tau mane bahani oi." Iya umba susi mahempona anna malunä'na penabanna Kristus, susim too duka' penabangku temo,² kupelau si'da-si'daa' matim kuaa: papiiaia' pa'palakoammu indana deenni napolalam kukeaha'ikoa' ke matimmä' umpellambi'ikoa'. Aka inna sediamä' la ungkeaha'i indo ingganna to si muuai: "Ma'palako Paulus sola sababanganna aka deem pattuju senga'na."³ Abana tappa' hupatau biasakam duka' tubo illaam inde lino, sapo' illaam inde pa'bundusam di ada', tä'kam ma'bundu' situhu' kamanähänganna hupatau.⁴ Aka indo pangkakka' kipake illaam inde pa'bundusam di ada' taia pangkakka'na hupatau, sapo' pangkakka' ponno kakuasaam nabeengkam Puang Allataala kipake uhhu'pu' huppu' bettena balinna Puang Allataala.⁵ Kitaloi ingganna indo tula'na to umbali kamaloloam, anna kipapässä' penaba malangka'na hupatau to melabai la muissam Puang

Allataala. Kitaloi pikkihanna hupatau anna kipopengkubalinni manuhu' lako Kristus.⁶ Anna maka' manuhu' si'da-si'dangkoa', iya la kitahungkummi pole' ingganna to tä' manuhu' illaam alla'-alla'mua'.

⁷ Pikki' manappaia' pada indo deenna dadi illaam alla'-alla'mua'! Maka' deem illaam alla'-alla'mua' ussangai kalena pentuhu'na si'da-si'da Kristus, la pahallu ma'pikki' pole diona kaleki anna mala naissam naua: "Pentuhu'na duka' Kristus Paulus sola sababanganna susikam."⁸ Maka' kupa'kassiam sugali' indo kakuasaam nabeengkam Debata, tä' siamä' la masihi'. Aka indo kakuasaam nabeengkam kipake umpakatoto' kamatappasammua', tä' kipake ungdakei kamatappasammua'.⁹ Tä' kuaku ke deenni tau muuai: "Makahha' tula'na Paulus illaam indo suha'na aka maelo' napakahea'-hea'kam."¹⁰ Aka si naua tau: "Indo suha'na Paulus makahha' anna ponno kuasa, sapo' maka' kalena sule inde, si malamma diita anna tä' deem ma'kalembasam tula'na!"¹¹ Indo to ma'kada susi la pahallu naissam naua: "Indo si natula' Paulus illaam suha'na, ia siam la napalako ke sitingngajongkia'."

¹² Abana hi tia toda' tä'kam la bahani umpasibandim kaleki anna umpempadai indo to ussanga-sanga kalena itim. Aka setonganna sangngim to maho! Aka anggam pikkiham kalena napaju.¹³ Tä'kam kami' susi. Maka' umpujikam kaleki, iya tä'kam kami' la liba' sugali', sapo' la anggam diona indo to puha napapassanniangkam Puang Allataala. Anna nakala'koa' duka' illaam indo pengkähängangki, aka nasuakam Puang Allataala umpaissannikoa' indo Kaheba Katilallasam.¹⁴ Dadi tä' mala diua taia pengkähängangki kikähä ke kipatudukoa'. Aka maka' abana tä' si'dakam deem matim

umpa'pakahebaam Kaheba Katilallasam diona Kristus, umbai' la deem lalanna diua taia pengkähängangi kikähä temo. Sapo' tä' susi, aka abana kami'um too handam yolo umpaissannikoa' indo Kaheba Katilallasam. ¹⁵Täkam deem umpuji kaleki diona pengkähänganna tau senga' sulibanna indo pengkähängam puha napa'tantuangkam Puang Allataala. Sapo' inde hia kihannuam: maka' tuttuam matoto'a' kamatappasammu lako Kristus, la tuttuam tiballa' kalua' duka' pengkähängangi illaam alla'-alla'mua'.[‡]

¹⁶Maka' susim, iya la malangkam too duka' umpa'pakahebaam indo Kaheba Katilallasam lako botto mambela, indana umpujikam kaleki diona indo pengkähängam kikähä lako mesa botto naongeim tau senga' mengkähä, ke etakam. ¹⁷Deem tisuha' illaam Battakada Debata naua: “Menna-menna la tilalla', taia kalena la nasanga-sanga, sapo' indo to puha napogau' Puang Allataala, ia hi tia pahallu napa'kasallei.”[¶]

¹⁸Aka to mannassam dipuji, iya indo to napuji Debata, taia to umpuji kalena.

Napomasiä' Paulus diona kalena anna suho tatappa'

11:1-15

11 Sa'baha'koa' la ma'tula' to maho salapä' yolo, aka la umpujiä' kaleku. Mala le'? ²Kupa'kembuhuangkoa' umba susi Puang Allataala napa'kembuhuangkoa', aka deem tau senga' maelo' umpalempä senga'koa'. Aka sihhapangkoa' mesa änä' daha puham kupasianda'i mesa änä' muane. Aka kaom too

umpasilombungkoa' Kristus anna kupemulu la tontä liukoa' manontom lako. ³Sapo' malallam penabangku aka toko dibaba bulingkoa' manii, nasuhum tä'ungkoa' manontom sola ponno penaba untuhu'i Kristus, umba susi Hawa yolona nababa bulim kamanähhä-nähhänganna indo ula'.[§] ⁴Aka puhangkoa' kitulasam diona Puang Yesus, anna puhangkoa' untahima Penaba Maseho anna unkatappa'inna' indo Kaheba Katilallasam kibaba. Sapo' temo masannam pole oo hakoa' untahima tau senga' sule napatudukoa' pepatuduam tatappa' diona Puang Yesus. Anna maelo'koa' duka' untahima indo penaba taia Penaba Maseho, anna kaheba senga' to nasangai tau kaheba katilallasam anna taia hia. ⁵Maka' umpehingngiia' indo tau, iya la pahallu umpehingngiia' duka', aka tä' deem moi podo la sai'di'um kusi'dim la natondongannä' indo to si disangai “suho taditondom.” ⁶Moi anna tä' manähä gegeä' ma'tula', sapo' taiaä' to maho aka kuissam asam indo pepatuduam tongam. Anna ia too, puham kipa'patandaam illaam ingganna pa'palakoangki anna si muita sianna'.

⁷Wattunna anna kupakahebaikoa' indo Kaheba Katilallasam buttu yabo mai Puang Allataala, tä'koa' deem kupelau anggoso' moi podo la sai'di'um. Ia too mala disangai umpopengkadioä' kaleku anna mala dipomatandekoa'. Iya mala haka la diua umpogau'ä' kasalaam matim aka mokaä' disahoi? ⁸Indo anna kupaissannikoa' Kaheba Katilallasam si nabeennä' sanaka-naka jumaa' senga' anggoso' kupake anna mala kupamoloikoa'. Mala diua sihhapannä'

[‡]10:15 tuttuam tiballa' kalua' duka' pengkähängangi illaam alla'-alla'mua', mala duka' diua, la tuttuam umpujikam aka indo pengkähängangi kipalako illaam alla'-alla'mua'.

[¶]10:17 Yer. 9:24.

[§]11:3 Kad. 3:1-13.

pehampo', aka kualala doina anna täsiam deem kupamoloi indo jumaa' ia too.⁹ Wattu eta too maka' kakuhängam omä', tä'koa' deem si kusussai. Aka ingganna kapahalluangku si naponnoi asam solasubunta to Makedonia. Si kupeä liu lalanna anna tä'koa' deem kusussai illaam ingganna kaha-kaha, anna la kupateem lium too.¹⁰ Indo kamaloloanna Kristus illaam kaleku, iam too umpopa'kadaä' kuua: tä' deem moi podo la mesam tau itim lembäna Akhaya la mala ullabaiä' umpa'kassiam inde mokaä' la ussahoi.¹¹ Akanna ma'kada susiä'? Mala haka diua tä'koa' kukamasei anna ma'kada susiä'? Nalosa tama penabangku Puang Allataala keta kukamaseikoa'.

¹²Iai too kupogau' temo, iya ia lium too la kupogau' anna mala ingganna indo to ussangai kalena "suhotaditondom" tä'um deem lalanna la mala umpuji kalena anna tä' toi la mala naua: "Susi pengkähängangki Paulus sola sababanganna."¹³ Ingganna tau susi ia too sangngim ussangai bäbä kalena suho, anna suho tatappa' dia. Si mengkähä illaam jumaa'mua' matomato suhona si'da-sia Kristus, anna to mebaba bulim dia.¹⁴ Tä' tia dikamängämängäi to ma'pogau' susi, aka susi siam tia duka' tomahajanna setam si umpasusii kalena malaika' kamasiäsam.¹⁵ Dadi tä' duka' la dikamängämängäi indo to mengkähäna tomahajanna setam ke umpasusii kalena to unγκähä kamaloloanna Puang Allataala. Sapo' katampasanna la sangngim dipabala'isiam tia duka' situhu' pa'pogausam kadakena.

**Kamasussaanna Paulus
umpatandaanni diua suho si'da-sia**

11:16-33

¹⁶La kusulei polepi pissam kuua: päbäiä' umpuji kaleku sapo' tä'koa'

la ussangaiä' to maho. Sapo' maka' deengkoa' ussangaiä' to maho, päbäi mammi aka abana la umpuji salapä' kaleku.¹⁷ Inde ma'tula'ä' la umpuji kaleku, setonganna taia pahentana Debata. Sapo' si'da-sianna ma'kada susiä' to maho umpuji kaleku.¹⁸ Abana buda tau si umpa'kassiam indo to nakähä illaam inde lino. Dadi la susimä' too duka' umpujiä' kaleku.¹⁹ Tontäm umpehingngiinnaa' tula'ku aka si masannam bäbäkoa' ussa'bahasam to maho, aka ussangai'koa' kalemu to manähä!²⁰ Si masannam bäbäkoa' ussa'bahasam ingganna indo to umposabua'koa'. Susi toi duka' ke deenni tau ussusu'a' kullemu anna natipukoa', battu haka naitaita dokkokoä', battu haka natappai limakoa'. Iya manähä haka tia susi!²¹ Umbai' la sihatannä' masihi' kusi'dim, aka tä' kami' toda' kibela la kipogau' gau' susi ia too!

Sapo' iai too natua napa'kassiam itim matim tau, iam too duka' kutua kupa'kassiam. (Ma'tula' to mahoä' aka umpujiä' kaleku!)²² Si umpuji kalena itim matim tau naua: "To Ibranikam." Iya to Ibrani siamä' duka'. Si naua liu: "To Israel-kam." Iya to Israel siämä' duka'. Anna si nauapi liu: "Pessubunnakam Abraham." Iya senga' pa kao!²³ Si nauapi duka': "To mengkähänakam Kristus." Iya setonganna mengkähä kahha' puhaä' kao anna la indo to ussangai bäbä kalena suho! (Maka' dihingngi inde tula'ku angga' to maho sabakaä'!) Kao-kao pembuda puhaä' ditibetama tahungkum anna la tau ia too, pembuda puhaä' kao ditembe'talukum, anna pembudaä' saidi'tadipatei!²⁴ Pellimamä' nadahha to Yahudi natembe' talukum si pentallu pulo kaseha pissam oi.²⁵ Pentallummä' napongko to Roma, anna pissammä' nasileba'-leba'i batu.

Pentallummi tallam kappala'ki illaam le'bo', anna pissammä' kaäbä-äbä bäbä dio le'bo' sangngallo sabengi. ²⁶Pembudamä' ussi'dim kamasussaam anna katilakaam illaam pellaolangku, susinna: liu salu kulambam, naabunniä' pa'boko, maelo' la napateiä' solaku to Yahudi anna duka' taianna to Yahudi, nalambi'ä' kamasussusaam illaam kota, kamasussaam dio sulibanna kota, kamasussaam dio le'bo', anna napakapi'di'ä' to ussangai bäbä kalena solata to matappa' anna taia hia. ²⁷Muasaiä' pala'ku mengkähä, pembudää' tä' deem mamma', pembudää' taakangku bäbä mangngande sola mangngihu'. Anna pembudää' kobe anna pembudää' madingim anna tä' ganna' pohebaku. ²⁸Sulibanna ia too masaha liupi duka' penabangku umpenabaam ingganna jumaa'. ²⁹Maka' deem solata to matappa' malamma, si malammaa' duka' kusi'dim. Maka' deem tau metobä tama dosa, iya si masussa penabangku.

³⁰Maka' pahalluä' la umpuji kaleku, iya la indo kamalammaam kuampuam kupake umpuji kaleku. ³¹Naitaä' Puang Allataala Ambena Debatanta Yesus Kristus to napenombai keta kada tonganni inde tula'ku. Dipuji sanganna sule lako salako-lakona! ³²Mane deenni, wattu'na dioä' Damsyik, indo gubernur to napatadongkom tomahaja Aretas dio ussua sohodadu muampai ba'ba kota aka la nasakkaä'. ³³Sapo' dipatamaä' buhia' anna dilollohannä' dipaola tama mesa suleba'na tembo' kota. Susim too anna malaä' lappa' illaam mai pala' limanna indo gubernur.

Paulus untula' pa'palosainna Debata sola kamapi'disanna

12:1-10

12 Abana tä' deem gunana ke umpujii tau kale. Sapo' moi anna susi, maelo'ä' la untula' indo puhanna kuhingngi anna kuita pa'palosainna Debata lako kaleku. ²Sapulo appa'um taunna lessu' anna tiäkä'ä' längäm ongeam handam matande yabo suhuga. (Sapo' tä' pole' kuissam battu tiäkä' sola kale hä' isanga, battu penabangku mandi. Kaha-kaha ia too anggam Puang Allataala muissanni).^{**} ³⁻⁴Kusulei polepi pissam kuua, diäkä'ä' längäm indo Ongeam Kamasannangam.^{††} (Sapo' tä' pole' kuissam battu tiäkä' sola kale hä' isanga, battu penabangku mandi. Kaha-kaha ia too anggam Puang Allataala muissanni). Yaboä', iya uhhingngimä' kamaha ma'tula' sapo' tä' diissam la dipalombum anna tä' toi dipäbäi hupatau la umpengkadaanni. ⁵Setonganna la malaä' umpuji kaleku diona kaha-kaha ia too. Sapo' tä' kuaku aka anggam si kuaku umpuji kaleku diona ingganna kamalammaangku. ⁶Setonganna maka' tia la kuaku duka' umpuji kaleku, iya tä' la mala disangai ma'tula' to mahoä'. Aka indo la kutula' battuam, abana tappa' dadi. Sapo' mokaä' untula'i aka kuua indana deenni napa'polalanni tau napujiä' ke nahingngii kaha-kaha ia too. Aka dotam napujiä' hupatau situhu' pa'palakoangku sola tula'ku allo-allo.

⁷Sapo' anna mala tä' malangka' penabaä' diona indo pa'palosainna Puang Allataala lako kaleku, iya dipasuleannä' sahhupa kamapi'disam

^{**}12:2 Illaam basa Yunani ma'tula' Paulus diona mesa to matappa' tiäkä' längäm suhuga. Sapo' situhu' issinna 2Kor. 12:7, mannassa anna kalenai Paulus nauaam, taia tau senga'.

^{††}12:3-4 indo Ongeam Kamasannangam: naua illaam basa Yunani: *Firdaus*, kalem-basanna, ongeam kamasannangam la naongei to matappa' ke matem.

sihhapam duhi illaam kaleku battu diua sihhapam pesuana tomahajanna setam undahhaä' anna mala tä' malangka' penabaä'.⁸ Pentallummä' ma'sambajam melau längäm Debata aka kuua umba ke malai naäläiannä' indo kamapi'disam illaam mai kaleku.⁹ Sapo' natimba'i hä' Debata naua: "Tä' la diäläi, aka anggam pa'kamaseku la umpahalluam, taia indo kamapi'disam la diäläi. Aka setonganna matoho puha ia kakuasaangku illaam kalemu ke malamako." Iam too anna kupohäe puham umpa'kassiam ingganna kamalammaangku, aka maka' malammaä', eta hi naongi matoho kakuasaanna Kristus illaam kaleku kusi'dim.¹⁰ Dadi tilalla'ä' ke malammaä', ke dipakamase-maseä', ke nahuaä' kamasussaam, ke didahhaä' battu haka nalambi'ä' kamapi'disam aka untuhu'ä' Kristus. Aka wattungku malamamma, etam too kuongi matoto'.

Kamalallanganna Paulus lako to Korintus

12:11-21

¹¹ Abana inde umpujiä' kaleku mala disangai ma'gau' to mahoä', sapo' ikoa' nasuhum anna ma'pateennä'. Setonganna iko hia' ia la umpujiä' anna mane. Aka moi anna tä' deem hubä'ku kusi'dim, sapo' inna tä' siaä' la natondom ingganna indo to si disangai "suho taditondom."¹² Indo anna solakia', umpogau'ä' buda tanda anna mala makaleso diua mesäi' duka' suhona Kristus. Aka ponnoä' kasa'bahasam umpa'patandaam ma'hupa-hupa tanda anna tanda memängä-mängä.¹³ Piham dia anna tä'koa' kuita manappa? Aka kupasusi siangkoa' too ingganna jumaa' senga! Anggam too ke indoi tä'koa' si kusussai kupelau anggoso'. Iya panampum damä' ke sala hi ia too!

¹⁴ Tentomai la kapentallunnam la matinnä'. Anna tä' kuaku la kusussaikoä'

aka taia aka-akammua' maelo' la kualä, sapo' kasilombungam mapiantaa' kupahalluam. Aka taia tia änä'-änä' la umpeäm kinande tomatuanna, sapo' tomatua hi tia umpeäm kinande änä'na.¹⁵ Iam too anna losso'um penabangku umbeengkoa' ingganna aka-akangku anna moi la kalekupi kubeho aka ikoa' kupa'kadua-duai. Iya maka' kupakamäjjäkoa', akanna kuhäm dia' iko pa'pakamajammu lako kaleku?¹⁶ Moi anna muakuia' abana tä'koa' deem kusussai, sapo' deem ohi muuai: "Si manähhä-nähhä Paulus." Diuaannä' liu to si mantipu anna muala kauntungam illaam mai alla'-alla'mua'.¹⁷ La maakam ia susi! Deemmaka too natipukoa' indo ingganna to kusua matim anna nabeennä'?¹⁸ Puham kusua matim Titus napasolai indo mesa solasubuntaa'. Iya deem daka natipukoa'? Mannassa anna tä'i deem, aka muissanna' muua sahhupa kami' lalam penabangki Titus anna mesa pa'palakoangki.

¹⁹ Ussanga haka' la ummaloloangkam kaleki dio olomua'? Sala pähängkoa' ke ussangaia'. O inggannakoa' solasubungku to kupakamaja, naitakam Puang Allataala keta ingganna tula'ki taia pangngoko di tambu'ki bäbä sapo' kitula' aka untuhu'ikam Kristus, anna ingganna pa'palakoangki kipogau' anna mala umpakatoto'kam kamatappasammua'.²⁰ Malallam penabangku mase manii kulambi'koa' ma'palako tä' situhu' indo kuhannuam la umpalakoä' ke suleä' matim, anna deem duka' manii kupogau' tää'na la situhu' pa'elo'mua'. Aka suleä' manii matim anna deengkoa' kulambi' sipengka-pengka, si ma'kembuhu, buhassuam, anggam kalena napikki', sipakolo'-kolo'i, si untula'-tula' solana, malangka' penaba, anna umpakende' kahakkaam.²¹ Anna malallannä' duka' aka suleä' manii matim anna muiä'

sumahho anna napakasihi'ä Puang Al-lataala to kupenombai aka tä' liupi naaku untiokongam gau' kadakena indo tau buda to madosa yolona illaam alla'-alla'mua'. Aka deem liupi manii ullullu' pa'bannetauam, ma'gau' sessu', anna anggam untuhu'i pangngua penabanna.

Sanaka-naka pepakilalaam

13:1-10

13 Inde temo kupattuju la kapentallunnam matinnä' umpellambi'ikoa'. Illaam Battakada Debata deem tisuha' naua: "Maka' duam tau battu haka tallu sisa'bi-sa'biam diona mesa kaha-kaha, iya tä'um too la dibata-batai"†† 2 Ingganna to umpogau' dosa indo lessu' puha asammi kupakilala indo anna matinnä' kapenduanna. Sapo' inde tentomai kupakilala pole ongkoa' moi anna sikambelakia' kuua: suleä' too matim, iya tä' deem moi podo la mesa indo to ma'gau' susi la tä' kupassala. 3 Maka' kupassalam indo to madosa illaam alla'-alla'mua', iya tä'um too pole' la umbata-batai liuä', aka tandaammi diua pelobum pudu'na si'daä' Kristus. Anna la muissanna' duka' muua tä' malamma Kristus ma'palako, sapo' ma'palako sola ponno kakuasaam illaam alla'-alla'mua'. 4 Abana malamma wattunna dipäso' yabo kaju sitambem, sapo' temo tubom sule umpolalam kakuasaanna Puang Allataala. Malammakam duka' diita aka untuhu'ikam Kristus. Sapo' maka' matingkam, la tandaam illaam pa'palakoangki illaam alla'-alla'mua' diua tubongkam sola Kristus kahana kakuasaanna Puang Allataala mengkähä illaam kaleki.

5 Tungga' pesi'dinniiä' tama kalemu, matappa' tongam dakoka' lako Kristus tä' daka. Maka' matappa' tongangkoa', tä' mala tala ussi'dinna' anna la muua: "Abana illaam si'da kaleki Kristus Yesus." Anggam anna la tä'i, ke tä'koa' matappa' tongam. 6 Anna maka' puhangkam umpangngitai, kuhannuam la muissammia' muua: "To matappa' tonganna' duka' Paulus." 7 Kipa'sambajangam liukoa' längäm Puang Allataala anna mala napakato'koa' indana deengkoa' umpogau' kakadakeam. Tä' kiua la umpateenna' anna mala tandaam diua manähäkam umpalako pengkähängangki, sapo' kiua anna malakoa' umpalako kamapiaam. Aka moi anna tä' sule lako pattujungki, sapo' tä' maaka assala'na ma'gau' mapiakoa' iko. 8 Iam too anna tä'ungkoa' la kipassala ke ma'gau' malolokoa'. Aka tä'kam la mala ma'palako kela sipengkai indo kamaloloam. Anggam mala kupalako indo la situhu'na kamaloloam. 9 Tilalla'kam ke dipemalammaangkam assala'na matoto'koa' iko. Ma'sambajam liukam anna mala tepukoa' dio olona Puang Allataala. 10 Iam too kasuhunganna anna kupakatungkoa' yolo inde suha' anna mane matinnä'. Aka suleä' too matim, iya tä'um manggi' kukahha'ikoa' umpake indo kakuasaam nabeennä' Debata. Aka nabeennä' kakuasaam ia too la kupake umpakatoto' kamatappasammua', tä' la kupake ungdakeikoa'.

Kada pebubunna Paulus

13:11-13

11 Katampasanna inggannakoa' sola-subungku, kupelau matim anna tontä' liukoa' la tilalla', anna la umpeäa' lalanna anna tepukoa' dio olona Puang

††13:1 Pass. 17:6, 19:15. Indo nauaam Paulus *maka' duam tau battu haka tallu sisa'bi-sa'biam*, indo la kapentallunna lako Korintus aka sihhapam lao ussa'bi pa'palakoanna to Korintus.

Allataala. Paillaam penaba manappaia' ingganna pepakilalaangku! La mesa penaba liukoa' anna sikamase mesa sola mesa. Handandanni Puang Allataala kabuttuanna pa'kamase anna kamasakkeam sola kamasannangam la tontä liukoa' naundu' anna naolaam.

¹²Sisalama'-lama'koa' mesa sola mesa sola ponno penaba umba susi la si-

hatanna napogau' to matappa'um. Kupalandasam salama'na ingganna umma'na Puang Allataala to kupasola inde.

¹³Handandanni Debatanta Yesus Kristus untamba'koa' pada-pada anna pa'kamasena Puang Allataala umpasolaikoa', anna tontä liukoa' naolaam Penaba Maseho.

Padam too.

Suha'na Paulus lako ingganna Jumaa' dio Galatia

Bätäna issinna

Inde suha' natuli' Paulus napakat-uam ingganna jumaa' dio Galatia. Indo Galatia mesa propinsinna kahajaam Roma dio Asia Kecil. Issinna Galatia taia to Yahudi. Yolona indo to Galatia sangngim umpenombai debata lino. Sapo' tappana napa'pakahebaam Paulus indo Kaheba Katilallasam diona Puang Yesus, iya deemmi matappa'. Iya le'ba'i Paulus, deemmi kende' peku-tanaam diona lalanna mendadi to Sahani battu diua to matappa'. Aka tä' naissam indo tau naua battu la pahallu hi tau untuhu'i Pepaondonganna Musa,^{¶1} battu la tä' di. Sapo' situhu' tula'na Paulus tä' manggi' dituhu'i ingganna ia too, aka anggam kamatappasam lako Kristus la mebaba lako kasalamasam. Tä' deem senga'na pahallu la dihängänniam. Aka maka' matappa'um tau, iya la mepomalolom Puang Allataala, battu diua la malam tau ullambi' kasalamasam. Sapo' deem sanaka-naka tau ullelei jumaa' ma'patudu umbaho tula'na Paulus. Naua indo tau la pahallu dituhu'i asam ingganna Pepaondonganna Musa ke maelo'i tau la mepomalolo Puang Allataala. Aka yolona anggam to Yahudi, battu diua pessubunna Abraham, mala mendadi umma'na Puang Allataala. Dadi nasanga la pahallu tau untuhu'i asam ingganna kabiasaanna to Yahudi ke maelo'i tau mendadi umma'na Puang Allataala.

Dadi natuli' Paulus inde suha' anna napakatui lako ingganna jumaa' dio Galatia aka la umpamoloi indo tau to nababa bulim pepa'guhuam ia too, anna mala ma'pasule sule untuhu'i pepatudum

malolo. Situ' Paulus, kamatappasanta lako Kristus nasuhum mendadikia' änä'na Abraham. Kalembasanna, kamatappasanta nasuhum napomalolokia' Puang Allataala umba susi umpomalolo Abraham kahana kamatappasanna.

Illaam pa'pahandusanna inde suha' napomakaleso Paulus diona lalanna mendadi mesa suhona Yesus Kristus, susi naua: "Mendadi suhoä' taia kahana pantuhona hupatau, taia toi hupatau muäkä'ä, sapo' Puang Allataala Ambeta anna Yesus Kristus untuhoä'." Natulasam toi duka' Paulus diona indo anna natambai Puang Allataala anna mala indo Kaheba Katilallasam diona Änä'na napa'pakahebaam lako tau taiana to Yahudi (hondongam 1-2). Puhai ia too natula' polepi duka' Paulus diona kasilombunganna hupatau anna Puang Allataala, naua: tä' deem moi podo la mesa tau napomalolo Puang Allataala kahana untuhu'i Pepaondonganna Musa. Sapo' anggam mala mepomalolo Puang Allataala ke matappa'i tau lako Kristus Yesus (hondongam 3-4). Tappana illaam inde katampasanna suha'na (hondongam 5-6), napomasiä' Paulus diona pa'kamase kende' illaam kalena si mesamesa to Sahani kahana kamatappasanna lako Kristus la ma'tandaam lemba' illaam pa'palakoam mapianna.

Lesoanna issinna

1. Kada passu'bä' (1:1-10)

2. Inde Kaheba Katilallasam tä' buttu di hupatau bäbä, sapo' natahima Paulus yabo mai Yesus Kristus. (1:11-2:21)

3. Napomalolokia' Puang Allataala taia kahana untuhu'ikia' Pepaondonganna Musa, sapo' kahana unkgatappa'ikia' Yesus Kristus. (3:1-4:31)

4. Tä'kia' pahallu untuhu'i Pepaondonganna Musa, aka puhangkia' nalap-

^{¶1:0} Indo diuaam *Pepaondonganna Musa*, ingganna pahenta illaam peadasanna to Yahudi, taia angga mandi Sapulo Pahenta.

pasam Puang Yesus. Tä' diua la beba'kia' umpogau' dosa, sapo' la pahallukia' untuhu'i pa'elo'na Penaba Maseho. (5:1-6:10)

5. Kada pebubum (6:11-18)

1 Inde suha' buttu di kao Paulus mesaä' suhona Yesus Kristus. Mendadi suhöä' taia kahana pantuhona hupatau, taia toi hupatau muäkä'ä', sapo' ma'kale Yesus Kristus untuhoä' anna Ambeta Puang Allataala to puha umpatibangonni dio mai alla'na to mate. ²Salama'ki inggannakam solasub-ummua' to matappa' inde, lu lako ingganna jumaa' itim lembäna Galatia.

³Handandanni Puang Allataala Ambetaa' sola Debatanta Yesus Kristus la untamba'koa' anna namana' kamasakkeam sola kamasannangam.

⁴Yesus Kristus-um too puha umpebeem kalena dipatei anna mala nasolongkia' dio mai dosata anna nalappasangka' dio mai kakuasaanna inde lino ponno kakadakeam. Napateem aka situhu' pa'elo'na Ambeta Puang Allataala to tapenombai. ⁵Dipuji anna dipa'kasallei Puang Allataala sule lako salako-lakona. Abana inna la diua.^{§§}

Anggam sahupa Kaheba Katilallasam

1:6-10

⁶Kukamängäikoa' pole', akanna malakoa' masimpam umpemboko'i Puang Allataala to untambaikoa' mendadi umma'na kahana pa'kamasena Kristus? Anna mentuhu' lako hakoa' indo kaheba senga' to nasangai hupatau "kaheba katilallasam".

⁷Anna setonganna tä' deem Kaheba Katilallasam senga' sulibanna indo puha kipatuduangka' itim. Sapo' ia anna ma'pateengkoa', aka deem tau itim umpahusa'a'

penabammu ullemba'i senga' ia Kaheba Katilallasam diona Kristus. ⁸Sapo' menna-menna umpa'pakahebaam "kaheba katilallasam" senga' sulibanna indo Kaheba Katilallasam to puha kipakahebaiangka', iya la Puang Allataala umpahuai katilakaam illaam allo ma'katampasanna! Moi la kami' umbaba kaheba senga' battu haka la malaika' yabo mai suhuga, tontäm duka' la napahuainna asam katilakaam Puang Allataala! ⁹La kusulei pole indo puha kutulasangka' kuua: menna-menna umpa'pakahebaam "kaheba katilallasam" senga' sulibanna indo puha untahimaa', la Puang Allataala umpahuai katilakaam illaam allo ma'katampasanna!

¹⁰La ussangai haka' too ke ma'kada susiä' mato-mato kuua: "Anna malaä' napuji hupatau?" Sapo' tää'. Aka anggam sahupa kuhannuam: la napujiä' Puang Allataala. Aka maka' tia la kupeä lalanna la kuaka susi anna mala napohäeä' hupatau, iya taia hä' tia isanga sabua'na Kristus.

Paulus mendadi suho aka natuho Puang Allataala

1:11-24

¹¹O inggannakoa' solasubungku pahallua' muissam muua inde Kaheba Katilallasam kupa'pakahebaam taia kaheba buttu di hupatau bäbä. ¹²Aka tä' kutahima dio mai hupatau Kaheba Katilallasam ia too, battu haka la diua deem mesa tau umpatuduä'. Sapo' ma'kale Yesus Kristus umpalosaia' issinna indo Kaheba Katilallasam.

¹³Abana deemmia' uhhingngi diona pa'palakoongku yolona indo anna untuhu'ipä' peadasanna to Yahudi. Eta too tä' deem pada samabanda' pandahaku lako umma'na Puang Allataala to

§§1:5 Abana inna la diua: naua illaam basa Yunani Amin.

ungkatappa'i Kristus. Si kupeä lalanna la kuaka susi anna mala kupempa'deam. ¹⁴Anna illaam umpalako peadasanna to Yahudi, buda pada dadingku to Yahudi kutondom. Anna untuhu'i si'da-si'daä' ada' kabiasaanna nene to kuponene lambi' kupomate ke pahallui.

¹⁵Moi anna susi gau'ku yolona, sapo' inna puhama' natuho Puang Allataala indo illaampä' tambu'na indoku. Anna pa'kamasenam too nasuhum natambaia' la mendadi pesuana. ¹⁶Situhu' pa'elo'na Puang Allataala puha umpa'paissangam Änä'na lako kaleku anna mala indo Kaheba Katilallasam diona Änä'na kupa'pakahebaam lako tau taianna to Yahudi. Wattu eta too tä' deem moi podo la mesa tau lao kupellambi'i kupe'guhui pepatuduanna. ¹⁷Tä' tooä' deem längäm Yerusalem umpellambi'i indo to mendiolo ia anna kao mendadi suho, sapo' lu lako hä' Arab. Iya mengkalao etamä' ma'pasule sule lako kota Damsyik. ¹⁸Tallu taum dam mane le'ba'ä' pole' längäm Yerusalem sipengngissanni Petrus. Sapo' anggam sapulo lima benginna solakam yabo. ¹⁹Anna tä'kam ia deem silambi' suho senga' sulibanna Yakobus solasubunna Yesus Debatanta. ²⁰Inde tula'ku Puang Allataala muitai, tä' kuua bäbä sapo' kada tongam.

²¹Lessu'i ia too, iya le'ba'mä' lako lembäna Siria anna Kilikia. ²²Wattu eta too ingganna jumaa'na Kristus dio lembäna Yudea tä'pä' ia naissam aka tä'pakam deem silambi'. ²³Anggam si napekaheba natula' tau naua: "Indo to si undahhakam yolona, iya

iam pole' temo umpa'pakahebaam kamatappasam lako Kristus, indo kamatappasam la napempa'deam battuam yolona." ²⁴Lambi' sangngim umpa'kasallei sanganna Puang Allataala aka nahingngi indo kaha-kaha dadi lako kaleku.

**Pengkähänganna Paulus lako
taianna to Yahudi naakui
suhu yabo Yerusalem**

2:1-10

2 Sapulo appa'i taunna iya le'ba' omä' längäm Yerusalem sola Barnabas anna kubabaipi duka' Titus. ²Le'ba'ä' längäm Yerusalem eta too aka inna napalosaiä' Puang Allataala naua: "La längängko Yerusalem." Suleki längäm ma'hempummakam, sapo' anggam pebaba ada' yabo kipasola ma'hempum. Iya kutulasammi diona indo pengkähäku umpa'pakahebaam Kaheba Katilallasam lako taianna to Yahudi. Kutulasam aka malallam penabangku, mase manii tä' naakui indo pebaba ada' yabo, iya la labu' bäbäm too indo lupu' hesoku lessu'-lessu'na sule lako temo.* ³Sapo' katampasanna tä' mammi labu' aka indo Titus to umpasolaiä', moi anna mesa to Yunani sapo' tä' mammi dipassa la untuhu'i kabiasaanna to Yahudi disunna.† ⁴Aka abana deem sanakanaka tau muuai: "Pahallu tau disunna." Indo to muuai, mentama bäbä kakalebuanta mengkamma' mato-mato solata anna memata-matai hi ia. Napateem anna mala naissam aka kita si tapogau' to tä' tisäke' illaam ada' kabiasaanna to Yahudi aka mesangkia' kita Kristus

***2:2** Aka nakasahaam Paulus mase manii indo to Yahudi to matappa'um tä' la muakui taianna to Yahudi to matappa'um ke tä'i untuhu'i duka' ingganna pahentana to Yahudi susinna disunna'.

†**2:3 disunna'**: kalembasanna, *ditille*. Situhu' pepaondonganna to Yahudi pahallu disunna' asam tau dipotanda diua mendadim umma'na Puang Allataala. Maka' tä' naakui pebaba ada' indo tula'na Paulus, iya umbai' la umpassa Titus sola ingganna taianna to Yahudi disunna' mane malai naangga' duka' umma'na Puang Allataala.

Yesus. Aka napeä lalanna anna mala napatisäke'kia' duka' la manuhu' lako ingganna pahenta illaam peadasanna to Yahudi sihhapam sabua', tä' beba'.⁵ Sapo' moi la sai'di' tala kipatamai indo tula'na, aka unjagaikanni kamaloloanna indo Kaheba Katilallasam anna mala tontä liu umba susi inna susinna anna keguna lako kalemua'.

⁶Anna indo pebaba ada' yabo Yerusalem to disangai to kasalle eta too, tä'um deem nataba'i indo pepa'guhuangku. (Aka kao-kao tä' deem alla'na kusi'dim to dipa'kasallei anna tau biasa. Aka tä' deem ma'se'la-se'la Puang Allataala.)⁷Tä' deem aka nahängänniam pepa'guhuangku, sapo' nakaleso hi naua kao nahannuam Puang Allataala umpa'pakahebaam Kaheba Katilallasam lako taianna to Yahudi umba susi uhhannuam Petrus umpa'pakahebaam Kaheba Katilallasam lako to Yahudi.⁸Aka Puang Allataala umbeem kamatohoam Petrus mendadi suhona Puang Yesus lako to Yahudi, anna kao-kao nabeennä' kamatohoam mendadi suhona Puang Yesus lako taianna to Yahudi.⁹Dadi naakui Yakobus, Petrus, anna Yohanes indo to diangga' andihi matoto'na ingganna to matappa' naua: "Abana dimana' Paulus pengkähängam ia too." Lambi' bassim nasalama'ikam Barnabas mendadi tanda kasilombungangi. Mane sipattuju-tujukam, iya kikattum kiua, kami'-kami' sola Barnabas la mengkähä lakokam taianna to Yahudi, anna Yakobus ia sola Petrus anna Yohanes la mengkähä lako ia to Yahudi.

¹⁰Anggam sahhupa napelau naua: "La si umpaillaam penaba liua' kapahal-luanna to mase-maseki." Anna abana

kaha-kaha iam too duka' kupohäe si'da-si'da la kupalako.

**Paulus untappakadai
Petrus dio Antiokhia**

2:11-14

¹¹Sapo' tappana sule Petrus dio Antiokhia, iya kutappakadai dio olona tau buda aka sala pa'palakoanna.¹²Yolona si naakupi mangngande sola to matappa' taianna to Yahudi. Sapo' tappana sule sanaka-naka solana Yakobus yabo mai Yerusalem, iya umpelleim taianna to Yahudi anna tä' toom naaku sola-sola mangngande aka mahea' lako indo to Yahudi to si muuai: "Manggi' tau dis-unna' asam."¹³Anna susi siam duka' to Yahudi senga' indo to matappa'um, sangngim ma'dua tambu' moka duka' mangngande sola taianna to Yahudi susi Petrus lambi' umbaba bulim duka' Barnabas aka napolai.¹⁴Tappana kuita Petrus tä'um ma'palako situhu' indo pepa'guhuam malolo talambi' illaam Kaheba Katilallasam, iya kupapähännim dio olona tau buda kuaa: "Iko-iko mesako to Yahudi sapo' tubongko angga' taia to Yahudi si untuhu'i pa'palakoanna tau taianna to Yahudi. Dadi, akanna palla' dako iko la umpassa to matappa' untuhu'i pa'palakoanna to Yahudi?"

**Anggam mala mepomalolo
Puang Allataala ke
ungkatappa'i tau Kristus Yesus**

2:15-21

¹⁵Kami'-kami' didiangkam inna to Yahudi taiakam to sulibam, battu diua to madosa.¹⁶Sapo' moi anna susi, ki-issam kiua tä' deem moi podo la mesa tau napomalolo Puang Allataala kahana

³2:15 Situ' peadasanna to Yahudi anggam to Yahudi mala dihekem umma'na Puang Allataala. Ingganna tau senga' nahekem to sulibam battu diua to madosa. Nakatappa'i naua: maka' dituhu'i ingganna Pepaondonganna Musa mala mepomalolo Puang Allataala.

untuhu'i Pepaondonganna Musa.[¶] Sapo' anggam mala mepomalolo Puang Allataala ke matappa'i tau lako Kristus Yesus. Dadi matappa'kam kami' lako Kristus Yesus anna malakam napomalolo Puang Allataala kahana indo kamatapasangki, taia kahana untuhu'ikam Pepaondonganna Musa. Aka tä' deem moi podo la mesa tau dipomalolo kahana untuhu'i Pepaondonganna Musa.

¹⁷ Mane deenni, maka' kami' to Yahudi maelo'kam napomalolo Puang Allataala umpolalam kasilombungangi Kristus, sapo' naita hakam tau tä' untuhu'i ingganna Pepaondonganna Musa susi indo taianna to Yahudi (si diuaam to madosa), iya la mala haka diua Kristus umbabakam lako kamadosaam? Sapo' mannassa anna tä'i susi! ¹⁸ Maka' la ma'pasuleä' sule untuhu'i Pepaondonganna Musa indo to puha kupellei, sihhapam puha kuhenggäi anna mane la kupake'de' sule, iya iam tia isanga mannassa anna madosaä'. ¹⁹ Aka illaam indo si kupe'guhui issinna Pepaondonganna Musa, kuissammi kuua tä'um pahallu la kutuhu'i liu. Dadi kattum kasilombunganku Pepaondonganna Musa anna malaä' untuhu'i pa'elo'na Puang Allataala.

Indo anna dipatei Kristus yabo kaju sitambem, naangga' Puang Allataala mateä' duka' sola Kristus.[§] ²⁰ Anna taiam kale-kaleku bäbä inde tubo temo, sapo' Kristus-um tubo illaam kaleku. Inde katuboangku temo kulingkai sola ponno kamatappasam lako Änä'na Puang Allataala to ungkamaseiä' anna puha umbeho kalena nabala'ä' dipatei. ²¹ Tä' kao untumpu pala'ä' mana' pa'kamasena Puang Allataala. Aka maka' diua Puang

Allataala umpomalolo hupatau kahana umpalako ingganna Pepaondonganna Musa, iya labu' bäbä hi tia isanga indo kamateanna Kristus, aka sule Kristus dipatei anna mala mapia sule alla'na hupatau anna Puang Allataala.

Mepomalolo Puang Allataala kahana unkatappa'i tau Kristus, taia kahana untuhu'i tau Pepaondonganna Musa

3:1-14

3 Sangngim to mahokoa' inggannakoa' to Galatia! Akanna ma'pateengkoa'? Menna umpatuduikoa' maho? Kusanga balingkoa' kupomasissäsam diona kalembasanna kamateanna Yesus Kristus yabo kaju sitambem. ² Deem kaha-kaha pahallu si'da-si'da la kukutanaiangkoa': ussanga haka' iko napentamaikoa' Penaba Masehona Puang Allataala kahana untuhu'ikoa' Pepaondonganna Musa? Sapo' tää', aka napentamai hakoa' ia kahana uhhingngikoa' anna unkatappa'i indo Kaheba Katilallasam. ³ Akanna susi sugali'ia' katomahoammu? Aka indo uhuna matappa'koa', pengkähäna Penaba Maseho umbakahui katuboammua'. Sapo' akanna maelo' dakoa' la umpalempä senga' katuboammu? La mala haka pa'pogausam kalemu umpatepukoa' dio olona Puang Allataala? ⁴ Tä' daka too deem gunana indo to puhaa' ussi'dingam? Tä' ia pole' la malaa' muua: "Tä' deem gunana." ⁵ Ussanga haka' iko nabeengkoa' Puang Allataala Penaba Masehona anna umpadadi tanda memängä-mängä illaam alla'-alla'mua' kahana untuhu'ikoa' Pepaondonganna Musa? Tä' susi! Aka ia anna napateenni kahana uhhingngikoa'

¶2:16 Indo diuaam *Pepaondonganna Musa*, ingganna pahenta illaam peadasanna to Yahudi, taia angga mandi Sapulo Pahenta.

§2:19 Umba susi mesa to mate tä'um nakuasai pahenta inde lino, susim too duka' to matappa' tä'um nakuasai Pepaondonganna Musa aka puham mate sola Kristus.

anna unkatappa'i indo Kaheba Katilallasam.

⁶Susi siam duka' Abraham yolona indo tisuha' illaam Battakada Debata naua: unkatappa'i Puang Allataala Abraham nasuhum nasangai to malolo.** ⁷Dadi pahallu: a' muissam muua: iai too matappa' längäm Puang Allataala, iya iam pessubunna si'da-si'da Abraham. ⁸Tisuha' loppo'um illaam Battakada Debata naua la napomalolo Puang Allataala taianna to Yahudi kahana kamatappasanna. Kaheba Katilallasam ia too puham napaissanni loppo' illaam kadanna lako Abraham naua: "Iko napolalam la ditamba' ingganna hupatau illaam inde lino."†† ⁹Dadi ingganna hupatau to matappa' la ditamba' umba susi Abraham to matappa' ditamba'.

¹⁰Dadi menna-menna uhhannuam kamanuhusanna lako Pepaondonganna Musa ia la umpomaloloi, tau ia too napassala Puang Allataala. Aka tä' deem moi podo la mesa tau napomalolo Pepaondonganna Musa umba susi tisuha' illaam Battakada Debata naua: "Menna-menna tä' umpalako asam ingganna indo tisuha' illaam Pepaondonganna Musa, ingganna tau ia too napassala Puang Allataala."‡‡

¹¹Dadi mannassa diua tä' deem moi podo la mesa tau la napomalolo Puang Allataala kahana umpalako Pepaondonganna Musa. Aka ia too inna tisuha' illaam Battakada Debata naua: "Iai too kusangai malolo iam too la

untahima katuboam bakahu kahana kamatappasanna."¶¶

¹²Kamanuhusam lako Pepaondonganna Musa sihhapangki' uhhannuam kamatohoam kaleta sapo' sisala hi kamatappasam lako Puang Allataala. Aka deem tisuha' illaam Battakada Debata naua: "Menna-menna untuhu'i asam issinna Pepaondonganna Musa la ullambi' katuboam mapia."§§

¹³Moi anna sihatam la napassalakia' Puang Allataala, sapo' Kristus ussolongkia' nasuhum malakia' kita lappa' dio mai indo pa'tahungkunganna. Aka deem tisuha' illaam Battakada Debata naua: "Menna-menna mate dipäso' yabo kaju sitambem, tau ia too to napassala Puang Allataala."* ¹⁴Nabala'kia' Kristus anna mala indo pa'tamba' to puha nadandi Puang Allataala lako Abraham la dibeem duka' lako tau taianna to Yahudi kahana pengkähäna Kristus Yesus. Anna la untahimakia' Penaba Maseho indo to puha nadandi Puang Allataala ke unkatappa'ikia' Yesus Kristus.

Wattunnam temo matappa' hupatau lako Kristus, dadi tä'um la mepatette liu Pepaondonganna Musa

3:15-25

¹⁵O inggannakoa' solasubungku, mapia ke mualää' mesa pehapangam indo si dipogau'na allo-allo: Maka' deem tau umpadeem pa'dandiam anna naakuim teem patomali pa'dandiam ia too, iya tä'um deem moi podo la mesa tau la mala umpasalai, battu

**3:6 Abraham: Indo Abraham nene to naponene to Yahudi. Situ' tulasanna to Yahudi anggam pessubunna Abraham to untuhu'i Pepaondonganna Musa mala mendadi umma'na Puang Allataala. Kad. 15:6, Rm. 4:3.

††3:8 Kad. 12:3; 18:18; 22:18.

‡‡3:10 Pass. 27:26.

¶¶3:11 Hab. 2:4.

§§3:12 Sand. 18:5.

*3:13 Pass. 21:23.

haka la nahängänni. ¹⁶Susim too duka' ingganna pa'dandianna Puang Allataala puha nadandiam lako Abraham sule lako pessubunna. (Illaam Battakada Debata tä' deem naua lako Abraham: "ingganna pessubummu," mato-mato la buda tau nauaam. Sapo' naua hia: "lako pessubummu," kalembasanna anggam mesa pessubunna Abraham nahua pa'dandiam ia too, iam too Kristus). ¹⁷Dadi, susi inde kalembasanna indo tula'ku ingngena': indo pa'dandianna Puang Allataala lako Abraham puham nakattu. Appa' hatu' tallu pulo ham taunna lessu'na mane nabeenni duka' Puang Allataala Pepaondonganna Musa lako hupatau. Dadi tä' deem lalanna Pepaondonganna Musa la mala umpasala battu diua ussapui pa'dandiam ia too. ¹⁸Aka maka' hapanna manggi' tau la untuhu'i Pepaondonganna Musa mane malai tau ullambi' indo pa'mana'na Puang Allataala, iya iam tia isanga taia pa'dandianna Puang Allataala napolalam dibeem tau indo mana'. Sapo' pa'dandianna hi tia Puang Allataala lako Abraham nasuhum nabeem situhu' pa'kamasena.

¹⁹Dadi maka' susi, iya aka hi gunana dipadeem Pepaondonganna Musa? Indo Pepaondonganna Musa dihängänniam anna mala ia pole' umpomakaleso kasalaanna hupatau untekka pa'elo'na Puang Allataala. Pepaondonganna Musa anggam tia meangga dipake sule lako kasuleanna indo mesa pessubunna Abraham to puha nadandi Puang Allataala.† Indo Pepaondongam buda malaika' umpalanda'i lako Musa.

Anna Musa ham pole' mendadi to dialla' umpalanda'i lako hupatau. ²⁰Mannassa deem yolo to sisabaliham mane dipahalluanni to dialla'. Sapo' indo anna ma'dandii Puang Allataala lako Abraham, iya tä' ia umpahalluam to dialla' aka ma'kalem ungkattui.

²¹Dadi maka' susi, iya sipengka haka Pepaondonganna Musa anna pa'dandianna Puang Allataala? Mannassa anna tä'i! Aka maka' tia la mala dibeem katuboam hupatau situhu' Pepaondonganna Musa, iya tä'um tia manggi' la dipadeem indo pa'dandiam, aka la malam indo pa'palakoanna hupatau untuhu'i Pepaondonganna Musa napolalam napomalolo Puang Allataala. ²²Sapo' tä' susi, aka illaam Battakada Debata deem tisuha' naua: "Ingganna hupatau nadakka' bata' ulunna kakuasaanna dosa." Anna mala naongi pole' Puang Allataala umbeem pa'dandiam lako to matappa'um indo puha nadandi la dibeem to unkatappa'i Yesus Kristus.

²³Indo anna tä'pi lambi' wattunna deem kamatappasam lako Kristus, iya tisäke' si'da-si'dakia' illaam Pepaondonganna Musa. Sihhapangkia' to dikuhum aka nasäke'kia' ingganna pahenta ia too. Anna susi liu sule lako wattunna napa'patandaam Puang Allataala indo kamatappasam lako Kristus. ²⁴Dadi indo Pepaondonganna Musa napatetekia' sule lako kasuleanna Kristus anna mala unkatappa'ikia' Kristus nasuhum napomalolokia' Puang Allataala. ²⁵Iya wattunnam pole' temo mala matappa' hupatau lako Kristus, dadi tä'ungkia' la napatette liu Pepaondonganna Musa.

†3:19 indo mesa pessubunna Abraham to puha nadandi Puang Allataala: Kristus diuaam.

**Nalappasangka' Kristus dio
mai Pepaondonganna Musa
nasuhum mendadingkia'
änä'na Puang Allataala**

3:26–4:7

²⁶Dadi kahana kamatappasammua' lako Kristus Yesus nasuhum mendadi änä'na asamkoko' Puang Allataala. ²⁷Aka inggannakoa' to balim ditedo' mendadi pentuhu'na Kristus, illaammia' kalemu ingganna sipa'na Kristus. ²⁸Dadi tä'um pole' deem se'lana hupatau dio olona Puang Allataala, to Yahudi anna taianna to Yahudi, sabua' anna taianna sabua', muane anna baine, aka ia asanna mesam illaam Kristus Yesus. ²⁹Dadi kahana umma'ngkoa' Kristus, iya ikonna' too pessubunna Abraham anna to namana' Puang Allataala indo to puha nadandi.

4 Diona indo tula'ku inggena', la mualää' mesa pehapangam: Mesa änä'-änä' namana' kulle ambena tä'pi mala unguasai indo kulle ia too aka bahinni'pi. Moi anna ia muampuam asanni indo kulle, sapo' sihhapampi sabua' aka nakuasaipi tau senga'. ²Aka deem tau senga' muuhusanni kapahalluanna anna nalima'iam indo kullena sule lako lambi' wattunna indo napa'tantuam ambena. ³Susim too duka' lako kitaa' indo anna tä'pakia' matappa', sihhapangkia' indo änä'-änä' bahinni' aka nakuasaipakia' ingganna kakuasaam inde lino.[‡] ⁴Sapo' tappana lambi' indo wattu puha napa'tantu Puang Allataala, iya ussuam Änä'na mentama inde lino. Indo Änä'na nadadiam mesa baine anna mendadi to Yahudi manuhu' lako Pepaondonganna Musa ⁵anna

mala ussolom to nadakka' bata' ulunna Pepaondonganna Musa, nasuhum malakia' pole' ditahima mendadi änä'na Puang Allataala. ⁶Iya ussuam Penaba Masehona Änä'na tohho illaam kaleta, aka änä'ngkoa' Puang Allataala. Mengkähä indo Penaba Maseho illaam penabanta lambi' metambakia' taua: "O Papa', O Ambeku!" ⁷Dadi tentomai taiangkoa' sabua', sapo' mendadingkoa' änä'na Puang Allataala. Kahana änä'ngkoa' Puang Allataala, dadi to nahuangkoa' duka' pa'mana'na indo puha napatokaam lako to mendadi änä'na.

**Kamalallangam penabanna
Paulus diona to Galatia**

4:8-20

⁸Yolona tä'koa' muissam Puang Allataala nasuhum nakuasaikoa' to disangai debata sapo' setonganna taia Debata si'da-sia. ⁹Sapo' temo muissammokoa' Puang Allataala, setonganna mapia puha ia ke diuai naissammokoa' Puang Allataala. Iya akanna maelo' ohakoa' iko la ma'pasule sule lako kakuasaam di lino to tä' deem kamatohoanna anna to tala mala dihannuam la mepamoloi?[¶] Akanna maelo'koa' la napasabua' sule? ¹⁰Ia anna kuuai maelo'koa' la napasabua' sule, aka si ma'hettemmkokoa' untuhu'i ada' kabiasaanna to Yahudi susinna: umpakaho'koa' allo ma'tantu, bulam ma'tantu, wattu ma'tantu, anna taum ma'tantu. ¹¹Nasuhum malallam penabangku aka labu' bäbä manii indo kamahesoangku umpa'kadua-duaikoa'.

¹²O inggannakoa' solasubungku, kupelau si'da-si'da anna umpasusiiä'. Aka kao-kao balimä' umpellei indo ada' kabiasaanna to Yahudi anna kupasusiikoa'

[‡]4:3 *ingganna kakuasaam inde lino*: deem tau muuai: debata lino battu diua setam, anna deem duka' muuai: kabiasaanna anna pahentana hupatau.

[¶]4:9 *kakuasaam di lino*: susi *kakuasaam inde lino*: illaam 4:3.

ingganna taianna to Yahudi. Anna tä mammi deem kusi'dim kakadakeam umpogau'a' lako kaleku indo anna solapakia'. ¹³La ungilalaipia' tia indo anna masakiä', nasuhum iam kupa'pahandu'i kupaissannikoa' indo Kaheba Katilallasam. ¹⁴Indo sakingku eta too nasussaikoa' nasuhum mendadi pa'sändäsam kasalle lako kalemua'. Moi anna susi ia too, tä' mammokoa' unghahi'di'ä' sapo' untahima hä' ia sihhapam untahima mesa malaika' buttu yabo mai Puang Allataala battu diua sihhapangkoa' untahima kalena Kristus Yesus. ¹⁵Wattu eta too masannam si'da-si'dakoa'. Sapo' akanna tä'i mala sule lako temo indo kamasannangammua'? Kuissam si'da-si'da kuua indo wattu eta too tandana unghamaseiä', kela mala unghalesu'ia' matammu, iya la umbeempä'. ¹⁶Iya la ussangai hakä' too temo balimmua' aka kutulasangkoa' setappa'na?

¹⁷Ingganna indo to mueli' issinna Kaheba Katilallasam napeä si'da-si'da lalanna anna mala nahuntu'koa'. Sapo' tä' mapia pattujunna, aka maelo'i la unghattui kasilombungantaa' anna mala ia untuhu'ia' sola ponno penaba. ¹⁸Abana mapia ke ma'kadua-duai tau uhhuntu' solata, assala'na lu lako kamapiaam. Sapo' la umpasusi liua' tä' angga mandi ke dioä' heem. ¹⁹O inggannakoa' änä'ku to kukamasei, tentomai masussa pole omä' umpenabaangkoa' aka inde ussi'dim omä' kamapi'disam temo, sihhapannä' mesa baine mapi'di' ke mangnguhiba'i. Anna la tontä liupä' ussi'dim kamapi'disam lambi' kewwaka' manappa sipa'na Kristus illaam kalemua'. ²⁰Kupemulu si'da-si'da kela malaä' illaam alla'-alla'mua' temo anna mala kueli' opi pa'tula' makahha'ku

matim aka tä' bäbäm pole' kuissam aka amo opi la kupogausangkoa'.

Pehapangam diona Hagar anna Sara

4:21-31

²¹O inggannakoa' to maelo' nadakka' bata' ulummu Pepaondonganna Musa, deem la kukutanaiangkoa': Tä' isanga unghaleso manappaa' indo tisuha' illaam Pepaondonganna Musa? ²²Illaam ia too tisuha' diona deem dua änä'na Abraham: indo mesa änä'na nasibalii sabua'na isanga Hagar anna indo mesa nasibalii ia inna bainena isanga Sara, taia ia sabua'. ²³Indo baine sabua' undadiahm änä' situhu' pattujunna hupatau. Sapo' indo bainena taia sabua' undadiahm ia änä' aka situhu' pa'dandianna Puang Allataala. ²⁴Dadi indo dua hupa mala diala pehapangam. Aka indo dua baine mala bassim dipasihhapam pa'dandianna Puang Allataala lako hupatau. Hagar ia sihhapam indo pa'dandiam puha dibeem Musa yabo Tanete Sinai. Uмба susi ingganna änä'na Hagar inna dio pala'na didadiahm la mendadi sabua', susim too duka' ingganna tau to untuhu'i indo pa'dandiam dibeem Musa aka napatisäke' Pepaondonganna Musa. ²⁵Dadi indo Hagar dipasihhapam Tanete Sinai dio Arab. Anna dipasihhapam toi duka' kota Yerusalem[§] tentomai aka issinna Yerusalem tubo sihhapam sabua' nasabua'i Pepaondonganna Musa. ²⁶Sapo' indo ia baine taia sabua', sihhapam ia Yerusalem bakahu yabo suhuga. Anna ianna' too kita tapekaindo aka kitaa'-kita to beba'ungkia', tä'kia' nasabua'i Pepaondonganna Musa. ²⁷Aka illaam Battakada Debata deem tisuha' naua:

Kassiko ammu tilalla' o baine to tämänä;

[§]4:25 kota Yerusalem: kota handam kasallena to Yahudi.

Sikaoliko tilalla' to tadeem ussi'dim pi'di' kakeänäsam;

Aka baine to tadeempi keänä',
anna baine to napellei muanena,
la buda puha ia änä'na anna la baine to
tohho sola muanena.**

²⁸Dadi umba susi Ishak änä'na Sara didadiam situhu' pa'dandianna Puang Allataala lako Abraham, iya susingkoa' too duka' inggannakoa' solasubungku, änä'ngakoa' Puang Allataala aka situhu' pa'dandianna. ²⁹Wattu eta too indo Ishak änä' to didadiam situhu' pengkähäna Penaba Maseho nadahha indo Ismael änä' to didadiam situhu' pattujunna hupatau. Susim too duka' temo, indo to si uhhannuam Pepaondonganna Musa undahha to napentamai Penaba Maseho. ³⁰Sapo' aka too indo tisuha' illaam Battakada Debata? Tisuha' illaam naua: "Hambai lao itim baine sabua' sola änä'na, aka itim änä'na sabua' tä' ia la mala untahima mana' dio mai ambena, aka indo mana' la dibeem asam lako indo änä' to nasibalii baine taia sabua'."††

³¹Dadi inggannakoa' solasubungku to matappa', kitaa'-kita, tä'kia' sihhapam änä'na baine sabua' sapo' sihhapangkia' änä'na baine taia sabua'.

**Pahallu dianti manda' anna ditobe
matoto' indo kalondaam
puha nakähä Kristus**

5:1-12

5 Tentomai beba'ungkia' aka nalappasammakia' Kristus. Dadi la pahallua' muanti manda' untobe matoto' indo kalondaammu, daa ummaelo'a'

la dipatisäke' sule. ²Pehingngii manappaia' inde tula'ku! Aka kao Paulus ma'kale muuai: maka' muuaa': "Manggi'kam la disunna' situhu' Pepaondonganna Musa," iya iam tia isanga tä' deem gunana Kristus lako kalemua'. ³Anna kupakilala polepi lako to umpelau'i la disunna' kuua: tau ia too pahallu la untuhu'i asam duka' ingganna Pepaondonganna Musa sulibanna disunna'. ⁴Anna inggannakoa' to umpeäi lalanna la untuhu'i Pepaondonganna Musa aka muuaa': "Anna malaä' naangga' malolo Puang Allataala," iya iam tia isanga ungkattuikoa' kasilombungammu Kristus anna umpemboko'ikoa' mana' pa'kamasena Puang Allataala. ⁵Sapo' kami'-kami', kahana pantetena Penaba Maseho anna kamatappasangki lako Kristus, nasuhum kihannuam anna kipeemmitai sola ponno penaba la napomalolokam Puang Allataala.

⁶Aka maka' ma'mesangkia' Kristus Yesus, iya disunna' daka tau tä' daka tau disunna', setonganna tontä bábäm dio olona Puang Allataala. Aka anggam unkatappa'i tau Kristus, ia hi tia mendadi too'na. Anna indo kamatappasanta la ma'tandaam illaam pa'kamase lako padanta hupatau.

⁷Yolona manontom liukoa' umpalako kamatappasammu sihhapam to silumba lumumpa'. Sapo' menna hi ullabaikoa' nasuhum tä'ungkoa' pole' manuhu' lako kaheba kamaloloam? ⁸Mannassa diua indo pepatuduanna tau ia too tä' buttu yabo mai Puang Allataala to puha untambaikoa'

**4:27 Yes. 54:1: Yesaya ma'tula' diona issinna Yerusalem dibaba lako Babel. Naua battu piham la ditamba' pole Yerusalem nasuhum la ma'pasule indo to Israel lambi' la buda puha issinna Yerusalem anna la indo lessu'. Susim too natula' Paulus diona taianna to Yahudi aka yolona sihhapam baine to tämänä aka tä'pi mendadi umma'na Puang Allataala. Sapo' la budam pole' taianna to Yahudi mendadi umma'na Puang Allataala temo anna indo to Yahudi yolona aka unkatappa'im Yesus Kristus.

††4:30 Kad. 21:10.

mendadi umma'na. ⁹Pepatuduanna sihhapam bibi' hoti aka deem tula' naua: Sai'di' bibi' hoti mala ussamba buda tappum lambi' ma'pakembea' kela dipapiai hoti. ¹⁰Moi anna susi, sapo' kahana kasilombunganta Debata nasuhum kuhannuam kuua tä' siakoa' la umpehngngii liu indo to la umbaba bulingkoa'. Anna moi la menna indo to umpahusa' pikkihammua' tä' mala tala nalambi' pesämbä'na Debata.

¹¹O inggannakoa' solasubungku deem tau muuai: "Paulus umpepatuduanni diona pahallu tau disunna'." Maka tappa' si'da la deem kupepatuduam, mannassa anna tä'ä' la nadahha indo to Yahudi. Sapo' ia napolalam keaha', aka indo kupepatuduam diona kamateanna Kristus yabo kaju sitambem. ¹²Mapia leko'um tia itim matim tau to umpatudu mahokoa' ke tä'i angga bäbä la disunna' sapo' la ussasa'i pissam ia lao pambabanna!

**Pa'elo'na Penaba Maseho anna
pa'elo'na sipa' dosana hupatau**

5:13-26

¹³O inggannakoa' solasubungku, balingkoa' natambai Puang Allataala la mendadi to beba'. Sapo' tä' la mala umpakea' indo kabebasammu umpalako gau' situhu'na sipa' dosana hupatau. Sapo' ia hia, la sipamoloikoa' mesa sola mesa kahana pa'kamasemua'. ¹⁴Aka ingganna issinna Pepaondonganna Musa tipungngu' tannum illaam mesa pahenta naua: "Kamaseiko padammu hupatau umba susi ungkamasei kalemu." ¹⁵Sapo' tä'koa' la sianu-anu sihhapam olo'-olo' siande-ande. Aka maka' sikallakalla liukoa', la pada-padakoa' ullambi' katilakaam.

¹⁶Dadi inde tula'ku susi inde kalembasanna: ingganna pa'palakoammua' la umpalako situhu' pantetena Penaba Maseho. Aka maka' ia liunna' untuhu'i, iya tä'um la untuhu'i pa'elo'na sipa' dosana hupatau. ¹⁷Aka pa'elo'na sipa' dosana hupatau umpobali pa'elo'na Penaba Masehona Puang Allataala. Anna pa'elo'na Penaba Maseho umpobali sipa' dosana hupatau. Dadi inde dua kaha-kaha sipobali illaam penabanna hupatau nasuhum tä' deem la mala tipalako indo la maelo'na la umpogau'. ¹⁸Sapo' maka' umbehokoa' kalemu napatette Penaba Maseho, iya tä'ungkoa' la manggi' untuhu'i Pepaondonganna Musa.

¹⁹Pa'palakoanna hupatau to untuhu'i sipa' dosana lampa'-lampa' diita susinna: ullullu' pa'bannetauam, ma'gau' sessu', anggam untuhu'i pangngua penabanna, ²⁰umpenombai kaha-kaha di lino, umpake issam-issam, sipobali-bali, sikalla-kalla, kembuhu, pa'keaha', ma'podo kao, hakka, anna umpakende' pa'sapa'-sapa'. ²¹Susi toi duka' masihi ate, umpamäbo' kalena, ma'mahoa'-hoa' ma'doä, anna senga'-senga'napi gau' kadake napogau'. Diona gau' susi ia too kupakilala polekoa' temo umba susi indo balingkoa' kutulasam yolona kuua: Menna-menna umpogau' liui kaha-kaha ia too, inna tä' sia ia la mangngala taba illaam kapahentaanna Puang Allataala.

²²Sapo' pengkähäna Penaba Maseho illaam kaleta la ungkembuaam pa'pogausam mapia susinna: pa'kamase, katilallasam, kamasannangam penaba, kamahammesam, kamapiaam penaba, pa'pogausam mapia, mala dikatappa'i, ²³kamalunäsam penaba, ungkuasai kale. Tä' deem moi podo la mesa pahenta ullahanni pa'palakoam susi ia too. ²⁴Anna ingganna umma'na

§5:9 Sai'di' bibi' hoti mala ussamba buda tappum lambi' ma'pakembea' kela dipapiai hoti: susi ke diuai: Mesa tedom ma'tombä ullelei solana saballa galum.

Kristus Yesus sihhapam puham duka' dipatei yabo kaju sitambem sola Kristus, kalembasanna, tä'um nakuasai pangngua penabanna, anna kamohäeam sugali'na to buttu dio mai sipa' dosana. ²⁵Dadi, aka puhangkia' nabeem katuboam bakahu Penaba Maseho, nasuhum illaam ingganna pa'palakoanta la pahallu sihondoi pantetena. ²⁶Tä'kia' kita la mala malangka' penaba, sipi'di-pi'di' penaba anna masihi ate lako solata.

Sipamoloi mesa sola mesa

6:1-10

6 O inggannakoa' solasubungku, maka' deenna' ullambi' padammu to matappa' umpogau' dosa, indo to tubongkoa' situhu' pantetena Penaba Maseho la umpakilalaa' anna mala ma'pasule sule lako lalam kamaloloam. Sapo' la umpakilalaa' sola kamalunäsam penaba anna kasa'bahasam. Anna la unjagaikoa' kalemu indana iko sianna' duka' la maelo' ma'pogau' susi. ²Anna la sipamoloikoa' mesa sola mesa umpassam kamabandasam. Aka maka' umpateemmia', iya untuhu'ingkoa' too pahentana Kristus. ³Sapo' maka' deem tau ussanga-sanga kalena anna setonganna tä' sihatam, tau ia too umpasalandum kalena. ⁴Si mesa-mesa tau pahallu la umpesi'dinni pa'palakoanna. Aka maka' mapia, iya mala napotilalla'. Sapo' tä'um manggi' napasipetua' pa'palakoanna tau senga'. ⁵Aka si mesa-mesa tau la ma'kale ia duka' umpalako oloanna.

⁶Menna-menna deemmi untahima pepa'guhuam diona Battakada Debata, la pahallu duka' tau ia too muitaam katuboanna indo to umpatudui battu diua la nabeem ia piha indo to naampuam.

⁷Daa umbulinna'. Aka Puang Allataala tä' mala dipopaningoam.

Aka iai too tatanam, ia siam tia duka' tapuppu' buana. ⁸Susinna ke ma'pogau'ki' untuhu'i sipa' dosata, iya buana ia too la ullambi'ki' kamateam, anna maka' ma'pogau'ki' situhu' pa'elo'na Penaba Maseho, iya buana ia too la ullambi'ki' katuboam sule lako salako-lakona, kahana nabeengkia' Penaba Maseho. ⁹Dadi daa ummali-malisanna' umpogau' kamapiaam. Aka maka' tä'ungki' deem monda umpogau' kamapiaam, iya la nalambi'kia' duka' buana illaam wattu puha dipa'tantu. ¹⁰Dadi sumala deempi wattu, iya la pahallu' tapake wattu ia too umpogau' kamapiaam lako ingganna hupatau, la'bi-la'binna lako solasubunta to matappa'.

Pepakilalaam anna kada salama'

6:11-18

¹¹Pengkalesoi manappaia' inde kasallena pantuli' aka ma'kalemä' pole' untuli'i.

¹²Indo to maelo' umpatenggem kalena diona kaha-kaha di lino, tau iam too indo maelo' la umpassakoa' disunna'. Ia anna napateenni aka mahea' la nadahha to Yahudi, indo si keaha' ke diuai anggam mala tau dipomalolo ke unngkatappa'i tau Kristus to puha mate yabo kaju sitambem. ¹³Anna indo tau susi ia too moi anna untuhu'i diona sunna', sapo' tä' siam duka' untuhu'i asam ingganna issinna Pepaondonganna Musa. Sapo' napeä lalanna la disunna'koa' anna mala deem napa'polalanni tenggem nasi'dim ke untuhu'ia' pepatuduanna. ¹⁴Sapo' di kaona kao mannassa anna tä' kuaku la kutenggengam aka-aka senga' sulibanna indo puha napogau' Debatanta Yesus Kristus yabo kaju sitambem, iam too la kupa'kasallei. Indo anna dipatei Kristus yabo kaju sitambem, sihhapannä' duka' mate sola Kristus nasuhum tä'um

deem kupailaam penaba pole indo si napohäena to tamuissam Kristus; anna susi siam duka' tä'um deem napaillaam penabaä'. ¹⁵Aka disunna' daka tau tä' daka tau disunna', setonganna tontä bäbäm dio olona Puang Allataala aka taia dipaitoo'na. Sapo' anggam pahallu dipaitoo'na la mendadi tau hupatau bakahu. ¹⁶Anna ingganna tau to untuhu'i pepatuduam indo to dipaitoo'na la namana' Puang Allataala kamasan-nangam anna pa'kamase. Ingganna tau

ia too sipäto' disangai to Israel si'dasia, battu diua umma' to napilei Puang Allataala.

¹⁷Mane deenni kuua: tä'um mala moi podo la mesa tau la umpomasussa poleä'. Aka budam bila' lako kaleku tandana pentuhu'naä' Puang Yesus.

¹⁸O inggannakoa' solasubungku, handandanni Debatanta Yesus Kristus untamba'koa' pada-pada. La sule lako hi too.^{¶¶}

Padam too.

Suha'na Paulus lako Jumaa' dio Efesus

Bätäna issinna

Inde suha' natuli' Paulus napakatuum to matappa' dio kota Efesus wattunna anna ditahungkunni kahana umpa'pakahebaam Kaheba Katilallasam diona Kristus (3:1,13; 4:1). Issinna kota Efesus buda taia to Yahudi (2:11-12).

Illaam inde suha'na Paulus napomakaleso diona pattujunna Puang Allataala naua: "Ingganna-ingganna sia, susi yabo suhuga teem illaam inde lino la napasakutu' nalumbäi Kristus" (1:10). Inde suha' natuli' la napepatuduam lako ingganna umma'na Puang Allataala anna mala mesa penaba liu aka inna ia pattujunna Puang Allataala la umpakalebu ingganna to matappa' illaam Yesus Kristus.

Sabaheam illaam inde suha'na Paulus napomakaleso diona la diaka susi dipakalebu hupatau illaam Puang Yesus. Napomasiä' anna napomakaleso naaka susi Puang Allataala Ambetaa' puha umpilei umma' petauanna. Natula' toi duka' naaka susi muampunni dosana ingganna umma'na anna nalappasam dio mai dosa umpolalam Yesus Kristus, Änä'na. Anna naua duka' puhangkia' nabeem Puang Allataala Penaba Masehona la mendadi tanda lako kita diua la naponnoi anna la napasule lako indo pa'dandianna.

Anna sambaheam diona pepatuduanna Paulus naua la pahallu sisa'bahasam to matappa' mesa sola mesa sola ponno pa'kamase anna mala tontä liu kalebu (4:2).

Illaam inde suha' lako to Efesus deem sanaka-naka pehapangam napake Paulus, aka naua anna mala makaleso diua umma'na Puang Allataala sakalebun illaam kalena Kristus. Kakale-

buanna ingganna to matappa' napasihhapam kalena Kristus anna Kristus Ia sihhapam ulunna (1:22-23; 4:4, 15-16; 5:23-32). Anna Kristus dipasihhapam toi batu longkahhinna mesa banua anna ingganna to untuhu'i dipasihhapam poheba banua la dipake umpapia indo banua (2:20-21).

Katampasanna inde suha'na Paulus diona to matappa' dipasihhapam sohodadu aka la pahallu matoto' illaam mueba tomahajanna setam.

Lesoanna issinna

1. Kada passu'bä' (1:1-2)

2. Pattujunna Puang Allataala lako ki-
taa' to Sahani (1:3-3:21)

a. Pa'tamba' nabeengkia' Puang Allataala kahana sakalebungkia' Kristus (1:3-23)

b. Nabeengkia' Puang Allataala katuboam bakahu, anna umpamesa to Yahudi anna taianna to Yahudi (2:1-3:13)

c. Sambajanna Paulus; anna mala pada-padakia' umpähäm manappa maaka susi pa'kamasena Kristus lako kita (3:14-21)

3. Pa'pogausam la sihatanna napogau' to Sahani (4:1-6:9)

a. La mesa penaba illaam salukatuboanna anna la sipakatoto' mesa sola mesa (4:1-16)

b. Tä'um la si ma'gau' kadake to Sahani sapo' la pahallum ma'gau' mapia liu (4:17-5:20)

c. Sanaka-naka handanna kada pepakilalaam (5:21-6:9)

4. To Sahani dipasihhapam sohodadu umpake ma'hupa-hupa pangkakka' illaam pa'bundusam (6:10-20)

5. Kada pebubum (6:21-24)

1 Kao Paulus mesaä' duka' suhona Kristus Yesus aka situhu' pa'elo'na Puang Allataala. Inde suha' kutuli' lu lako ikoa' umma'na Puang Allataala to puha napasähä' itim Efesus.

Oa' to manontom illaam unkatappa'i Kristus Yesus, ²handandanni Puang Allataala Ambetaa' sola Debatanta Yesus Kristus la untamba'koa' anna namana' kamasakkeam sola kamasannangam.

Pa'tamba' nabeengkia' Puang Allataala kahana pengkähäna Kristus 1:3-14

³Dipuji sanganna Puang Allataala Ambena Debatanta Yesus Kristus to napenombai. Puha nabeengkia' ingganna pa'tamba' di ada'na yabo suhuga aka sakalebungkia' Kristus. ⁴Aka tä'pi deem dipadadi inde lino anna puhangkia' napilei la sakalebu Kristus anna malakia' napasähä' mendadi umma'na to maseho, la tä'um deem sassainta. Kahana pa'kamasena Puang Allataala, ⁵lambi' puha napa'tantum mengkalao dio mai la napopendadikia' änä' ikalena umpolalam pengkähäna Yesus Kristus aka abana inna la napogau'. ⁶Dipuji Puang Allataala kahana kamatandeanna pa'kamasena; aka tä' deem pada sanakamaseikia' umpolalam pengkähäna Änä' pa'pakamajanna. ⁷⁻⁸Katitolloanna hahana Kristus napolalam nalappasangkia' Puang Allataala, battu diua ingganna dosata naampunni. Napogau' ia too aka nakamasei si'da-si'dakia', anna napaponnoipakia' duka' kamanähängam sola kakeakasam. ⁹Pa'elo'na Puang Allataala nasuhum napaissanningkia' pattuju kada ditambinna. Pattuju ia too puha nakattu la naganna'i illaam pengkähäna Kristus. ¹⁰Issinna indo pattujunna: ingganna-ingganna sia, susi yabo suhuga teem illaam lino la napasakutu' nalumbäi Kristus. Kaha-kaha ia too la napasule lako Puang Allataala ke lambi'um wattunna.

¹¹Mengkalao diopi mai anna napileingkam kami'^{§§} Puang Allataala situhu' pa'elo'na la mendadi umma'na, aka la sakalebu tau Kristus. Anu' ingganna-ingganna sia nakähä situhu' pattujunna. ¹²Napileingkam kami' to Yahudi to mendiolo mahannu lako Kristus anna mala umpujikam kamatandeanna Puang Allataala. ¹³Anna ikoa' duka' dipasakalebungkoa' Kristus wattunna anna uhhingngikoa' indo kaheba kamaloloam, battu diua Kaheba Katilallasam to umpatinandakoa' lako lalam kasalamasam. Tappana matappa'koa' lako Yesus Kristus, iya nabeemmokoa' Puang Allataala Penaba Masehona, indo puha nadandiangkoa'. Indo Penaba Maseho nabeengkoa' dipotanda illaam kalemu diua mendadingkoa' umma'na Puang Allataala. ¹⁴Anna manassai diua tä' mala tala tatahima asanna' ingganna indo puha nadandiangkia' Puang Allataala, aka nabeemmakia' Penaba Masehona la umpasolaikia' sule lako wattunna la nalappasangkia' kita umma'na illaam mai inde lino ponno kakadakeam. Dadi la sipäto'kia' umpuji kamatandeanna Puang Allataala.

Diona issinna sambajanna Paulus 1:15-23

¹⁵Kahana ingganna indo puha napogausangkia' Puang Allataala nasuhum kupelelena diua matappa'ungkoa' lako Yesus Debatanta, anna si ma'kamasengkoa' lako ingganna to napasähä' Puang Allataala mendadi umma'na, ¹⁶iya tamonda-mondamä' umbaba pa'kuhhusam sumanga' längäm olona Puang Allataala kahana ullambi'ungkoa' lalam kasalamasam. Anna si kupakala'i liukoa' duka' sambajangku ke ma'sambajam omä',

§§1:11 *napileingkam kami'*: to Yahudi to matappa' lako Kristus nauaam.

¹⁷ si kupelau längäm Puang Allataala to napenombai Debatanta Yesus Kristus, battu diua Ambetaa' to handam matande, anna mala nabeengkoa' tanangam penaba ponno kakeakasm anna kapaissangam diona Puang Allataala nasuhum la unkaleso manappaa' pole'. ¹⁸ Anna si kupelaupi duka' längäm Puang Allataala anna mala napomasiäsangkoa' pikkihammu, nasuhum umpähäm manappaa' indo pa'tamba' uhhannuam la nabeengkoa' Puang Allataala aka natambaingkoa' mendadi umma'na. Anna mala muissampia' duka' muua abana indo pa'tamba' tadisihanteam napatokaam Puang Allataala lako umma' petauanna; ¹⁹ anna la umpähäm toia' duka' muua tä' deem pada sakasalle kakuasaanna Puang Allataala mengkähä illaam kaleta inggannakia' to matappa'. Indo kakuasaanna mengkähä illaam kaleta, ia siam too duka' indo kuasa tadisihanteam napake ²⁰ indo anna umpatibangonni sule Kristus dio mai alla'na to mate, mane napatadongkonni yabo ongeam kamatandeam sipadaam kalena yabo suhuga. ²¹ Matande puha ia katadongkonganna Kristus anna la katadongkonganna ingganna to ma'pahenta, tomahaja, anna ingganna to kuasa senga'. Anna matande puha ia kuasanna anna la ingganna kuasa malanna ditula', susi to tubo lapi' temo teem inde la ditingngajona. ²² Puang Allataala umpopatalo Kristus illaam ingganna aka-aka. Anna naäkä' la ullumbäi ingganna-ingganna sia. Aka sihhapam ulu ullumbäi kale, susim too duka' Kristus umpahe' ingganna-ingganna sia ullumbäi kakalebuanna to matappa'. ²³ Kakalebuannam too ingganna to matappa' sihhapam bätä puntinna Kristus. Anna bätä punti iam too sakalebu Kristus, nasuhum tepu

Kristus anna Kristus siam umpatepu ingganna-ingganna sia.

Sumpu pa'kamasena Puang Allataala umpatubokia' sule sola Kristus

2:1-10

2 Yolona mate di ada'koa' battu diua matea' sungnga'mu aka madosakoa' anna untekkä pahentana Puang Allataala. ² Si ma'pogau' susikoa' indo anna si untuhu'ipokoa' kakadakeanna lino anna tomahajanna setam. Indo tomahajanna setam unkuasai ingganna setam yabo lawwa, anna tontä liupi duka' temo unkuasai penabanna ingganna hupatau to tä' untuhu'i Puang Allataala. ³ Susi siangkia' too duka' yolona si ma'palakokia' untuhu'i sipa' dosata; anu' moi aka la dipogau' assala'na sumpu panggua penabanta anna masannam bätä puntinta. Wattu eta too la sipäto'kia' duka' battuam nahua aha' kasallena Puang Allataala, susi tau senga' to tamatappa'. ⁴ Sapo' tä' deem pada sahäntä buana Puang Allataala! Anna sumpu pa'kamasena lako kita, ⁵ lambi' napatubokia' sule sola Kristus indo anna mate di ada'pakia' aka tatekka pahentana. Pa'kamasenam too Puang Allataala anna napasalama'ungkia'. ⁶ Anna kasakalebuantam too Kristus Yesus, nasuhum napatibangongkia' sule Puang Allataala sola Kristus dio mai alla'na to mate, anna napatadongkongkia' sola Kristus yabo ongeam kamatandeam illaam suhuga. ⁷ Susim too napogau' Puang Allataala anna mala illaam wattu la ditingngajona la umpa'patandaam pa'kamasena tadisihanteam lako kitaa', tandaam illaam kamapiaam penabanna kahana kasilombunganta Kristus Yesus. ⁸⁻⁹ Pa'kamasenam too Puang Allataala nasuhum napasalama'ungkoa' aka kamatappasammua' lako Kristus. Taia kahana pa'pogausammu nasuhum

dipasalama'koa', sapo' ia too kahana mana' pa'kamasena Puang Allataala. Dadi tä' deem mesa tau la mala muuai: "Pa'pogausangkum too anna malamä' salama'." ¹⁰Aka Puang Allataalam too undadiam polekia'. Nadadiam polekia' umpolalam Kristus Yesus anna malakia' umpalako ingganna pa'pogausam mapia indo puha napatokaangkia'.

Kamesaam illaam Puang Allataala

2:11-22

¹¹Inggannakoa' solasubungku to inna dadimmu taia to Yahudi, pahallua' ungilalai indo anna tä'pokoa' matappa', nasangaikoa' to Yahudi: "to tadisunna',"* battu diua "taia umma'na Puang Allataala," aka ussagai ia kalena to disunna', indo tanda nakähä hupatau dio kalena. ¹²Wattu eta too tä'pokoa' sakalebu Kristus anna disangai to sulibam, taia to Israel battu diua taia umma'na Puang Allataala. Tä'koa' iko nakala' pa'dandiam indo nadandi Puang Allataala lako umma'na. Tubokoa' illaam inde lino tä' deem pahhannuammu anna tä' deem kasilombungammua' Puang Allataala. ¹³Sapo' temo, ikoa'-iko to sakalebungkoa' Kristus Yesus. Moi anna yolona sikambelakoa' Puang Allataala sapo' temo sikahuku'ungkoa' kahana katitolloanna hahana Kristus. ¹⁴Aka Kristus-um too umpapiai alla'na to Yahudi anna taianna to Yahudi nasuhum ma'mesam pole'. Moi anna yolona sipobali sihhapam naalla'i hindim batu, sapo' puham napa'dei Kristus umpolalam kamateanna. ¹⁵Kamateannam too nasuhum tä'um tau pahallu la untuhu'i ingganna pahenta sola pepaondongam illaam

peadasanna to Yahudi. Napateem anna mala to Yahudi anna taianna to Yahudi napadadi mesa to bakahu ma'mesa illaam kalena. Dalam iam too napogau' umpadeem kasilombungam mapia. ¹⁶Kamateanna Kristus yabo kaju sitambem umpamesa to Yahudi anna taianna to Yahudi, anna umpapiai sule kasilombunganna hupatau anna Puang Allataala nasuhum mapia pali'. ¹⁷Iam too anna sulem Kristus umpa'pakahebaam diona la mala dipapua sule alla'na hupatau anna Puang Allataala. Illaam ia too napaissannikoa' susi ikoa' taianna to Yahudi to diangga' yolona sikambela Puang Allataala, teem to Yahudi to diangga' sikahuku' Puang Allataala.† ¹⁸Aka pengkähänam too Kristus nasuhum malangkia' sule dio olona Ambeta, susi to Yahudi teem taianna to Yahudi. Malakia' sule dio olona aka sahhupa Penaba Maseho ussahungkia'.

¹⁹Dadi taiangkoa' pole' to sulibam battu haka to sule. Sapo' temo pada-padangkoa' mendadi umma'na Puang Allataala, anna mesa banua Puang Allataala. ²⁰Kakalebuanta kita to matappa'kia' sihhapam mesa banua napake'de' Puang Allataala yabona ingganna suho sola nabi. Aka suho sola nabi sihhapam longkahhim. Anna Kristus Yesus Ia, sihhapam batu longkahhinna. ²¹Kahana kasilombunganta Kristus, tidampulu'kia' to dipasihhapam banua dipake'de' anna mala tuttuam kasalle kakalebuanta la mendadi ongeam masehona Puang Allataala. ²²Kahana sakalebungkoa' Kristus, dadi mahassangkoa' duka' digahagai la mendadi ongeanna Puang Allataala naongei Penaba Masehona.

*2:11 *disunna'*: kalembasanna, *ditille*.

†2:17 *to diangga' sikahuku' Puang Allataala*: Yolona napilei Puang Allataala to Yahudi la mendadi umma'na, iam too anna diangga'um to sikahuku' Puang Allataala.

Pengkähänganna Paulus lako taianna to Yahudi

3:1-13

3 Kahana ingganna indo puha napogausangkoa' Puang Allataala nasuhum kupa'sambajammokoa'. Kao Paulus, to ditahungkum aka umpalakoä' pengkähänganna Kristus Yesus illaam umpamoloi inggannakoa' taianna to Yahudi. ²Tä' mala tala muissammia' aka puhanna' uhhingngi diua nakamaseiä' Puang Allataala nabeennä' inde pengkähängam anna mala kupamoloikoa'. ³Napalosaiä' Puang Allataala pattuju kada ditambinna, lambi' kuissammi. Diona indo kaha-kaha ia too puham kutuli' sala saidi'. ⁴Maka' too umbatanna', iya la muissammia' pole' anna umpähäm muua: "Naissam si'da Paulus indo kada ditambinna diona Kristus." ⁵Yolona pattuju ia too napokada ditambimpi, tä'pi deem dipaissanni hupatau. Sapo' temo napa'paissangammi Penaba Masehona Puang Allataala lako ingganna to napasähä' mendadi suhona sola nabinna. ⁶Indo diuaam kada ditambim, kalembasanna: susi taianna to Yahudi teem to Yahudi la pada-pada untahima pa'mana'na Puang Allataala, mendadim to mesa, anna untahima indo to puha nadandi Puang Allataala kahana pengkähäna Kristus Yesus. Ia asanna ia too mala dadi kahana unkatappa'i tau Kaheba Katilallasam. ⁷Pa'kamasenam too Puang Allataala anna malamä' nasua umpa'pakahebaam Kaheba Katilallasam ia too. Aka kakuusaanna Puang Allataala mengkähä illaam kaleku, nasuhum mala kutahima indo pengkähängam ia too. ⁸Ingganna umma'na Puang Allataala kao handam matuna. Moi anna susi, sapo' nabeennä' Puang Allataala mana' pa'kamasena la umbaba

Kaheba Katilallasam lako ingganna tau taianna to Yahudi diona pa'kamasena Kristus tadisihanteam. ⁹Anna kupomasiäsam toi duka' ingganna tau maaka susi Puang Allataala to umpadadi ingganna-ingganna sia umpalako pattuju penabanna indo napokada ditambim mengkalao dio mai. ¹⁰Indo pattujunna Puang Allataala umpasakalebu ingganna to matappa' anna mala naissam pole' ingganna malaika' anna kakuusaam senga' yabo lawwa naua: "Naissam asam Puang Allataala ingganna-ingganna sia." ¹¹Ia too mengkalao diopi mai anna napattujum Puang Allataala la nakähä umpolalam Kristus Yesus Debatanta. ¹²Aka kamatappasammi too anna kasakalebuanta Kristus, nasuhum tä'ungkia' la mahea' anna bata-bata sule dio olona Puang Allataala. ¹³Iam too anna kupelaunna' matim kuua: Tä'koa' la umpobahinni' penabammu diona kamasussaangku, aka ia too la nababaangkoa' kamapiaam.

Sambajanna Paulus anna mala kewwaka' to matappa' anna mennumpu illaam pa'kamase

3:14-21

¹⁴⁻¹⁵Nasuhum menombaä' anna ma'sambajam längäm Ambeta to napoambe ingganna kasahapuan, susi yabo suhuga teem illaam lino, kahana ingganna indo puha napogausangkoa'. ¹⁶Kupelau längäm Puang Allataala anna mala kamatandeanna sola kakuusaanna tadisihanteam la umpomatohoangkoa' penabammu umpolalam Penaba Masehona, ¹⁷anna mala tohho liu Kristus illaam bätä penabammua' kahana kamatappasammua'. Anna ma'sambajam tooä' anna mala ingganna pa'palakoammua' la kewwaka' anna mennumpu illaam pa'kamase, ¹⁸nasuhum inggannakoa' umma'na

Puang Allataala la mala pada-pada umpähäm manappa maaka susi kalua'na, kalandona, malangka'na, anna mandalanna pa'kamasena Kristus. ¹⁹Moi anna tä' mala nalosa manappa akkalam pikkihanna hupatau, sapo' kupelaupi längäm olona Puang Allataala anna mala ussi'dinna' pole' indo pa'kamasena anna mala ponnoa' illaam kalemu sipa'na Puang Allataala.

²⁰Indo kakuasaanna Puang Allataala illaam kaletaa', iam too mengkähä nasuhum nabeengkia' pa'lalam penabanta la'bi puha ia anna indo pelauanta moi anna tää'napi nalambi' pikkihanta.

²¹Dadi sihatam anna sipäto' ingganakia' to matappa' la umpa'kasallei Puang Allataala umpolalam sanganna Kristus Yesus mengkalao lapi'taa' sule lako salako-lakona! Abana inna la diua.

Kakalebuanna ingganna to matappa'

4:1-16

4 Kaha-kaha iam too indo puha kutula' inggena' nasuhum kupelaua' matim kuua illaam katuboammua' anna pa'palakoammu la sihatannapi umpogau' aka puhangkoa' natambai Debata la mendadi umma'na. Anna la umpehingngii manappaa' inde tula'ku aka kao Paulus mahassannä' ditahungkum aka umpalakoä' pengkähänganna Debata. ²La ponnokoa' kamahempoam penaba, kamalunäsam penaba anna kamahammesam. La sisa'bahasangkoa' mesa sola mesa sola ponno pa'kamase. ³Peä si'da-si'daia' lalanna la muakaa' susi anna mala tontä liukoa' mesa penaba. Aka puhangkoa' napamesa penaba Penaba Maseho, anna la tontä liukoa' sakalebu ke mesa penabakoa'. ⁴Inggannakia' to matappa' sakalebum

sihhapam mesa bätä punti, anna anggam deem mesa Penaba Maseho; umba susi deem mesa pahhannuam dibeengkia' indo anna ditambaikia'. ⁵⁻⁶Anggam deem mesa Debata, mesa kamatappasam, mesa pantedosam anna mesa Puang Allataala Ambena ingganna hupatau. Iam too unguasai ingganna-ingganna sia anna ia siam to mengkähä illaam ingganna-ingganna sia. Ia toi tohho illaam kaletaa'.

⁷Sapo' pantam namana'kia' pengkähängam di ada' situhu' pa'pebeenna Kristus. ⁸Aka illaam Battakada Debata deem tisuha' naua:

“Tappana längäm ongeam matande buda to natalo nababa[‡] anna ma'hupa-hupa pa'pebeenna nabeem lako hupatau.”

⁹Ia anna diuai: “Kristus längäm ongeam handam matande,” aka balim tuhum mentama inde lino, ongeam handam madio. ¹⁰Anna indo to bali tuhum, ia siam too duka' puha längäm ongeam handam matande tando längänna polepi langi' anna mala ingganna-ingganna sia napatepu.

¹¹Ia siam umbeengkia' pa'pebeenna. Deem nabeem pengkähängam mendadi suhona, deem nabeem pengkähängam mendadi nabi, anna deem toi umpa'pakahebaam indo Kaheba Katilallasam. Senga'na mendadi to ma'kambi' anna tuanguhu illaam jumaa'. ¹²Nabeengkia' indo pengkähängam anna mala ingganna umma'na Puang Allataala dipatudu manappa, nasuhum mala sangngim mengkähä illaam bela' di ada'na Debata anna mala umpomatoto' bätä puntinna Kristus battu diua kakalebuanna to matappa', ¹³lambi' mesa penabakia' illaam kamatappasanta

[‡]4:8 to natalo nababa: Yolona mendadi tanda kapataloanna mesa tomahaja ke umbabai to natalo tama bottona. Puj. 68:19.

anna kapaissanganta diona Änä'na Puang Allataala. Anna la sikatubo issiikia' laoam kapeimangam lambi' tepukia' susi Kristus. ¹⁴Maka' susingkia', iya tä'ungkia' too la susi änä'-änä', kapendo-pendo anna katuhu'-tuhu' bäbä, la napalulako napaludio mai pellaona ma'hupa-hupa pepa'guhuanna ingganna to manähhä-nähhä. Si napake indo kamanähhä-nähhänganna umbaba bulim hupatau. Tä'ungkia' kita la nababa bulim. ¹⁵Sapo' kitaa'-kita la umpalako si'da-si'da hafia' ia kamaloloam sola ponno pa'kamase, anna mala illaam mentu'na kaha-kaha tuttuam masäe tuttuam susikia' Kristus. Anna Kristus Ia ullumbäi kakalebuanna to matappa' sihhapam ulu ullumbäi kale. ¹⁶Anna kitaa'-kita tungga' mendadingkia' pangkakka' illaam kalena Kristus. Aka umba susi kalena hupatau tiäto' dipasidekke'-dekke' ingganna pangkakka'na anna mala ganna' mendadi mesa kale, susim too duka' muampuangka' tadongkongam illaam kakalebuanna to matappa'. Anna illaam kasilombunganta Kristus malakia' silombum solata. Aka maka' tungga' mengkähäkia' situhu' pengkähänganta, iya indo kakalebuam la tuttuam lobo' aka si ma'kamasekia'.

Katuboam bakahu illaam Kristus

4:17-32

¹⁷Dadi sola sanganna Debata kutulasangka' inde tula' la umpehingngii manappaa': Tä'ungkoa' la tubo anna ma'palako susi to tä'pi muissam Puang Allataala, ma'pikki' takeguna. ¹⁸Indo tau ia too buta pikkihanna. Tä' muampuam katuboam indo mebeem Puang Allataala, aka tä' deem kapaissanganna diona Puang Allataala. Ia anna ma'pateenni aka sangngim kahha' ulu. ¹⁹Sangngim tä'um muissam sihi' anggam untuhu'i

panggua penabanna, umpabeba' bäbä kalena ullullu' pa'bannetauam. ²⁰Sapo' ingganna ia too tä' susi indo dipatuduangka' diona Kristus. ²¹Aka puha sianna' uhhingngi diona kalena. Anna illaam kasilombungammua' Kristus puhangkoa' dipatudu indo kada kamaloloam dilambi' illaam Puang Yesus. ²²Dadi la untampeam asanna' indo sipa' kadakemu yolona indo anna tä'poko' unkatappa'i Kristus. Indo sipa' ia too nakadaeki kamohäeam sugali' to mebaba bulim. ²³Anna la pahallua' umbakahui susi penabammu teem pikkihammu. ²⁴Anna la umpabala'ia' sipa' bakahu to napadadi Puang Allataala umba susi sipa' kalena, malolo si'da-si'da anna maseho.

²⁵Dadi la untampeammia' indo gau' si kaägä'-ägä'. Sapo' la iannapi anna ia untula'a' lako padammu mesa sola mesa. Aka kitaa'-kita sangngim tamangkia' kakalebuanna to matappa'. ²⁶Maka' too deengkoa' keaha', la unjagai manappa indana nababakoa' aha'mu lako kama-dosaam. Anna indo aha'mu tä'pi la lendu' allo anna umpa'deim, ²⁷indana deenni naongei mengkähä tomahajanna setam. ²⁸Susi toi duka' to si biasa maboko tä'um mala la si maboko. Sapo' la muasai hia pala'na mengkähä anna mala deem napamoloiam to kakuhängam. ²⁹Susi duka' pudu'mua' tä' la mala umpassubum tula'-tula' kadake. Sapo' passubunni tula' mapia la umpakatoto' penabanna solamu anna la sipäto'na nahingngi. La umpateem anna mala keguna tula' ia too lako to uhhingngii. ³⁰Tä' tookoa' la mala umpomasussa Penaba Masehona Puang Allataala to puha napatamaiangkoa' kalemu dipotanda diua mendadingkoa' umma'na Puang Allataala, anna mala mannassa diua la nalappasangka' kita illaam mai inde lino ponno kakadakeam illaam allo ma'katampasam. ³¹Pa'deia' ingganna pi'di' penabammu, tä'koa' mala

ma'kasubu-subu bábä anna keaha'. Tä' tookoa' la sikalla-kalla anna si untunai solamu. Anna tä'ungkoa' duka' la sikabassi-bassi liu. ³²Sapo' la pahal-lukoa' mapia penaba anna sikamase mesa sola mesa anna siampunni, umba susi Puang Allataala puhangkoa' naam-punni aka pengkähäna Kristus.

Tubo illaam kamasiäsam

5:1-20

5 Tentomai aka disa'bu'ungkoa' änä' pa'pakamajanna Puang Allataala, dadi la pahallukoa' umpehapani Puang Allataala. ²Ingganna pa'palakoammua' la umpalako sola ponno pa'kamase lako solamu, umba susi Kristus nakamaseikia'. Anna puham umpebeem kalena dipatei mendadi mesa pemala' bubanau' umpomasannam penabanna Puang Allataala anna mala lappa'kia' kita. ³Ikoa'-iko umma'nangkoa' Puang Allataala to disehoi. Dadi ingganna panggauam kadake susinna: lullusam banne tau, ingganna hupanna gau' sessu', anna ma'podo kao, tä' si'da-si'da la sihatam ditula', dapaka ia la dipogau' illaam alla'-alla'mua'. ⁴Susi toi duka', tä'koa' la sihatam umpassubum tula' kadake, tula' takeguna, anna ingganna tula' tää'na sipäto' ditula'. Sapo' la pahallu hia pudu'mua' umpassubum pa'kuhhusam sumanga' längäm olona Puang Allataala. ⁵Penabaam siaia' too: to ullullu' pa'bannetauam, to umpogau' gau' sessu', anna to ma'podo kao; to umpogau' liui gau' ia too tä' la mala mendadi umma' petauanna Kristus sola Puang Allataala. [†]Aka indo to ma'podo kao anggam umpenombai kaha-kaha di lino. ⁶Majaga manappakoa' indana nababa bulingkoa' tula'na to si ma'tula' takeguna. Aka ingganna gau' susi ia

too umpakende' aha' kasallena Puang Allataala lako to tä' untuhu'i pahentana. ⁷Dadi tä' si'da-si'dakoa' la mala siala penaba ingganna tau susi ia too. ⁸Aka ikoa' duka' yolona illaangkoa' kamalillingam battu diua naponnoikoa' kakadakeam, sapo' temo illaammokoa' kamasiäsam aka kasilombungammua' Debatanta. Dadi, la ma'palakokoa' umba susi la sipäto'na napogau' to illaammi kamasiäsam. ⁹(Aka kamasiäsam iam too naongi kende' ingganna hupanna pa'palakoam mapia, kamaloloam, anna tula' sihondoi pa'palakoam.) ¹⁰Anna la umpeäa' duka' lalanna anna mala muissam manappakoa' pa'palakoam umba la napomasannanna penabanna Debata. ¹¹Daa untuhu'ia' pa'pogausam takeguna umba susi si napogau' to illaampi kamalillingam, sapo' la pahallu hia' ia umpakaleängam kakadakeam ia too. ¹²Aka pa'pogausam ia too si napogau' membuni tau kadake, meangga ditula' bábä diposihipi. ¹³Sapo' ingganna pa'pogausam kadake la makaleso pole' diita ke nakaleäi gau' mapianna to illaam kamasiäsam. Aka gau' mapia ungleäi gau' kadake lambi' masiä' diita. ¹⁴Iam too anna deemmi tula' naua:

“Bangongkoa' inggamu to mamma', tibangongko dio mai kamateam! Anna napomasiäsangkoa' penabammu Kristus.”

¹⁵Dadi la unjagai manappakoa' pa'palakoammu. Tä'koa' la mala ma'gau' susi to maho, sapo' la tubo hako' ia sola ponno kakeakasam. ¹⁶Pakeguna manappaia' wattummu umpogau' kamapiaam, aka tentomai wattunna liupi kende' kakadakeam. ¹⁷Tä'koa' mala matomaho-maho, sapo' la umpeä manappa hia' ia lalanna

[†]5:5 mendadi umma' petauanna Kristus sola Puang Allataala: battu diua tama kapahentaanna Kristus sola Puang Allataala.

anna mala muissanna' umpogau' la napohäena Debata. ¹⁸Tä'koa' mala la napamäbo' anggur, aka la nababakoa' lako kakadakeam. Sapo' ia hia la tontä liukoa' naponnoi Penaba Masehona lambi' ¹⁹tontä liukoa' sipakatoto' umpakende' pampujiam anna penaniam. La umpenanianna' pampujiam ia too sola kakassiam anna ponno penaba längäm olona Debata. ²⁰Moi la maaka susi untammua', la tontä liukoa' too ma'kuhhu' sumanga' illaam sanganna Yesus Kristus Debatantaa' längäm olona Puang Allataala Ambeta.

**To titanam ambe anna to titanam
indo illaam mesa pandaposam**

5:21-33

²¹La pahallukoa' siolaam manappa, aka umpengkahea'ingkoa' anna umpa'kasallei Kristus. ²²Inggannakoa' to titanam indo la manuhu'koa' lako muanemu umba susi kamanuhusammu lako Debata. ²³Aka muane abana la ullumbäi bainena sihhapam ulu ullumbäi kale. La ma'pogau' susi muane, umba susi Kristus ullumbäi kakalebuanna ingganna to matappa'. Anna Kristus siam duka' mendadi To Mepasalama'na to disangai bätäna, battu diua kakalebuanna ingganna to matappa'. ²⁴Dadi umba susi kakalebuanna ingganna to matappa' manuhu' lako Kristus, la susi siam too duka' baine illaam ingganna kaha-kaha la pahallu manuhu' lako muanena.

²⁵Inggannakoa' to titanam ambe, kamaseikoa' bainemu umba susi Kristus ungamasei kakalebuanna ingganna to matappa' lambi' umpebeem kalena dipatei anna malakia' salama'. ²⁶Ia anna napateenni Kristus, aka la napa'polalanni umpasähä'

kakalebuanna ingganna to matappa' mendadi umma'na. Uwai pantedosam sola kada pepa'guhuanna napake Kristus umbasei umma'na ²⁷anna mala mapidä' anna mahändä, tä' deem kakadakeanna anna sassainna napadio olona. ²⁸La susim too duka' muane la pahallu ungamasei bainena susi ungmaha'i bätä puntinna. Menna-menna ungamasei bainena, hapam siam tia ungmasei kalena. ²⁹Aka tä' tia deem tau la ungmahidi' bätä puntinna. Sapo' ungmähänni mandi tia kalena anna najagai manappa, umba susi Kristus ungmähänni anna umpaliaha kakalebuanna ingganna to matappa'. ³⁰Ia anna napateenni, aka sihhapammakia' bätä puntinna Kristus. ³¹Illaam Battakada Debata deem tisuha' naua: "Iam too anna mesa muane la umpellei indona sola ambena anna sialai mesa baine, nasuhum duai la mendadi mesa illaam ingganna-ingganna sia."[§] ³²Battakada ia too mandalam kalembasanna. Kupasihhapam lium too kasilombunganna Kristus anna kakalebuanna ingganna to matappa'. ³³Sapo' Battakada ia too nahuakoa' duka': La pahallu ingganna to titanam ambe ungmasei bainena susi ungmasei kalena anna la pahallu duka' ingganna to titanam indo la umpa'kasallei muanena.

Laoam saha' illaam mesa banua

6:1-4

6 Inggannakoa' änä'-änä', la manuhu'koa' lako ambemu sola indomu aka abana inna la sipäto' napogau' to ungmatappa'im Debata. ²⁻³La umpa'kasalleikoa' ambemu sola indomu. Iam too uhuna pahentana Puang Allataala napsitonda

[§]5:31 Kad. 2:24.

pa'dandiam naua: “Anna malakoa' kehongko' anna mahendem tubo illaam inde lino.”

⁴Inggannakoa' solasubungku to titanam ambe, daa umpomasussa penabanna änä'mu. Sapo' la umpaliaha hia sola pepatuduam anna pepakilalaam dilambi' illaam Battakada Debata.

La sipäto'na napogau' to diposabua' anna to dipopuä

6:5-9

⁵Inggannakoa' to diposabua' la untuhu'i manappakoa' pahentana puämu illaam inde lino, anna la umpengkahea'i anna umpa'kasallei. Ingganna pahentana la umpalako sola unä' penaba sambulo-bulo mato-mato Kristus umpengkähängam. ⁶Tä' anggam anna la majulu'koa' ke sitingngajokoa' aka muua: “Anna malaä' napuji puäku.” Sapo' aka sabua'ngakoa' Kristus, dadi la untuhu'ikoa' pa'elo'na Puang Allataala sola ponno penaba. ⁷La umpalako manappakoa' pengkähängammu mato-mato Debata umpengkähängam, tä' angga mandi hupatau. ⁸Aka muissanna' muua ingganna hupatau, susi sabua' teem taiana sabua', la tungga' nabeem Debata sahona situhu' pa'palakoam mapia puha napogau'. ⁹Anna inggannakoa' to dipopuä, la ma'pogau' mapiakoa' duka' ke muoloikoa' sabua'mu. Anna tä'unna' la si umpakahea'-hea', sapo' la ungkilalai hia' ia muua: “Mengkalao kao sule lako sabua'ku, deem mesa puäki yabo suhuga, tä' ia deem pa'se'la-se'lana.”

Pangkakka'na Puang Allataala la dipake illaam pa'bundusam di ada'

6:10-20

¹⁰Mane deenni, la pahallukoa' matoto' illaam kamatohoam buttu di Debata sola kakuasaanna tadisihanteam. ¹¹Pakeia' indo ingganna pangkakka' si dipakena illaam pa'bundusam di

ada', indo puha nabeengkoa' Puang Allataala. Aka maka' too ianna' umpake, la tontä liukoa' matoto' mueba kamanähhä-nähhänganna tomahajanna setam. ¹²La umpake ia too aka kitaa'-kita tä'kia' manggeba umbali hupatau, sapo' muebakia' ingganna setam to ma'kuasa illaam inde lino kamalillingam battu diua inde lino ponno kakadakeam. Muebakia' kakuasaanna ingganna debata kadake to unguasai lawwa. ¹³Iam too anna la umpake asammia' ingganna pangkakka' di ada'na Puang Allataala ma'bundu', anna mala illaam wattu kakadakeam malakoa' matoto' mueba balimmu. Nasuhum, maka' puhangkoa' ma'bundu' la tontä liupokoa' matoto' anna matitta. ¹⁴La tontä liukoa' ke'de'-ke'de' matoto' mangngampa. La tuttuam manontongkoa' lako Puang Allataala, anna mala kamanontongammu sihhapam beke' umpomakahappi to ma'bundu'. Anna ingganna pa'pogausammu la tuttuam malolo, anna mala kamaloloammu sihhapam babu' kaha ullabai pangkakka'na balimmu. ¹⁵Anna la ahu'koa' umpa'pakahebaam Kaheba Katilallasam to umpapia alla'na hupatau anna Puang Allataala, anna mala kaahusammu sihhapam sapatu la umpatigaha' to ma'bundu'. ¹⁶Anna kamatapassammu lako Puang Allataala la umpake liu sihhapam unta'mu, aka anggam kamatapassammu la mala untippa' anna umpi'dei batu bälä'du' sitonda apinna indo napake tomahajanna setam. ¹⁷Anna kasalamasammu la uhmannuam sihhapam saludum yabo ulummu, anna untahimai Battakadanna Puang Allataala puha nabeengkoa' Penaba Maseho la mendadi pa'dammu. ¹⁸Illaam ingganna ia too la ma'sambajngkoa' anna umpelaui pepamolona Puang Allataala. Pa'sambajam liukoa' situhu'

pengkähänganna Penaba Masehona Puang Allataala. La tontä liukoa' majaga anna la umpa'sambajangam liuia' duka' ingganna umma'na Puang Allataala. ¹⁹Anna la umpa'sambajangannä' duka' anna mala la ma'tula' oä' too, iya nabeem omä' tula' Puang Allataala nasuhum bahaniä' umpa'paissangam Kaheba Katilallasam, indo to napokada ditambimpi inde dio mai. ²⁰Tentomai mahassannä' ditahungkum aka umpa'pakahebaannä' Kaheba Katilallasam ia too, aka pesuanaä' Puang Allataala. Pa'sambajangannä' anna mala bahaniä' umpengkadaanni, aka abana inna la sipäto' kukähä.

Kada pebubunna Paulus

6:21-24

²¹Tikhikus solasubuntaa' to tapakamaja, ia la umpa'paissannikoa' ingganna

kaha-kaha diona kaleku, anna mala muissanna' diona kaleku anna duka' pengkähänganku. Indo Tikhikus mesa sababanganku to manontom mendadi sabua'na Debata. ²²Kusua matim temo aka kuuu anna mala muissanna' kahebaki lambi' matohoa' penabammu.

²³Handandanni Puang Allataala Ambetaa' anna Yesus Kristus Debatanta la umpamesa penaba ingganna to matappa' anna la tuttuam umpakende' kasikamaseammua' sola kamatappasammu lako Kristus. ²⁴Handandanni Puang Allataala la untamba' ingganna to tä' deem pi'de pa'kamasena lako Debatantaa' Yesus Kristus.

Padam too.

Suha'na Paulus lako Jumaa' dio Filipi Bätäna issinna

Inde suha' natuli' Paulus napakatuum jumaa' dio Filipi. Indo jumaa' Filipi mesa jumaa' handam yolo napake'de' Paulus dio Eropa. Indo Filipi mesa kota illaam paluäna Makedonia mesa propinsinna kahajaam Roma. Tappana sule Paulus dio Makedonia, iya napahandu'um umpa'pakahebaam Kaheba Katilallasam dio kota Filipi. Moi anna buda to Filipi umbahoi Paulus, sapo' deem siam duka' tau matappa' lako Puang Yesus (Suhu 16:11-40). Tappana umpellei Filipi Paulus, iya pessenaka-nakam napakatu doi' to Filipi aka naua: "Anna mala deem napake illaam pengkähänganna." Masäei puhanna umpa'pakahebaam Kaheba Katilallasam Paulus dio Filipi, iya ditahungkummi dio Roma. Tappana napekaheba to Filipi naua illaam tahungkum Paulus, iya napakatu pole oom doi'. Indo doi' nababa mesa to Filipi isanga Epafroditus. Landa'na Epafroditus lako Roma, iya nabeemmi Paulus indo doi' anna tohhoi dio sola, aka inna nauaam to Filipi: "La umpamoloi ke landa'ko lako." Sapo' nasua Paulus ma'pasule lako Filipi la umbaba suha', iam too inde suha' lako jumaa' dio Filipi (2:25-30). Dadi, inde suha'na Paulus natuli' anna napakatu lako jumaa' Filipi wattunna anna illaanni tahungkum.

Illaam issinna inde suha' deem sanakanaka handanna natula' Paulus susinna: Napelau lako to Filipi anna mala illaam ingganna pa'palakoanna la sihatannapi napogau', umba susi si napogau' to Sahani. Naua la pahallu ingganna to matappa' la tontä mesa penaba anna mesa pattuju illaam kakalebuam, anna mala

tuttuam kehängäm to unkatappa'i indo Kaheba Katilallasam (1:27-2:18; 4:2-3). Natula' toi duka' Paulus naua: "Ditahungkunnä' aka umpa'pakahebaannä' diona Kristus." Moi anna ditahungkunni, sapo' tontä liu kehängäm to unkatappa'i indo Kaheba Katilallasam (1:12-26). Napelau duka' lako to Filipi anna mala mahempo penaba si'da-si'da susi Kristus. Anna tä'i nakuasai kamalangkasm penaba anna ma'podo kao (2:3-4). Natulasam toi duka' kasuhunganna anna ussui Epafroditus ma'pasule lako Filipi, anna napaissanni pattujunna la ussua duka' Timotius lako Filipi (2:19-30). Napakainga' toi duka' diona la pahallu to matappa' unjagai indo to si umbaba pepa'guhuam la mebaba bulim (3:1-2, 17-19). Napakilala polepi naua: Anggam kamatappasam lako Kristus napolalam mala tau malolo dio olona Puang Al-lataala, taia kahana pa'palakoam kalena hupatau untuhu'i ingganna kabiasaam illaam peadasam (3:1-11). Anna natulasampi duka' katilallasanna diona indo pepakatunna nababa Epafroditus (4:10-18). Anna deempi duka' senga'na natula'.

Moi anna mahassam illaam tahungkum Paulus wattunna anna natuli'i, sapo' situhu' moninna inde suha'na mala diissam diua naponnoi kakassiam anna katilallasam sola ponno pahhannuam. Ia anna susii aka tä' deem pada samatappa' Paulus lako Kristus.

Too'na issinna inde suha'na Paulus diona katilallasam, kamanontongam penaba, kamesaam, anna kasa'bahasanna to Sahani illaam muanda'i si'da-si'da kamatappasam lako Kristus anna ullingakai salu katuboam illaam kasahaniem. Inde suha' umpomakaleso maaka susi pa'pakamajanna Paulus lako jumaa' dio Filipi.

Lesoanna issinna

1. Kada passu'bä' (1:1-2)

2. Ma'kuhhu' sumanga' Paulus längäm Puang Allataala anna umpa'sambajangam to Filipi aka mesa penaba illaam pengkähänganna (1:3-11)

3. Moi anna ditahungkunni Paulus, sapo' tuttuam buda hia tau unkatappa'i indo Kaheba Katilallasam (1:12-26)

4. To matappa' la tontä liu mesa penaba anna la ma'gau' mapia anna mala tuttuam kehängäm to unkatappa'i indo Kaheba Katilallasam (1:27-18)

5. Timotius anna Epafroditus dipuji aka umpalako si'da-si'da indo pengkähängam nabeem Puang Allataala (2:19-30)

6. Naua Paulus la pahallu dijagai manappa indo to si umbaba pepa'guhuam la mebaba bulim (3:1-4:1)

7. Napelau Paulus la mesa penaba tau anna la dipaillaam penaba ingganna hupanna kamapiaam (4:2-9)

8. Natilalla'i Paulus diona indo doi' napatuam to Filipi (4:10-20)

9. Kada pebubum (4:21-23)

1 Inde suha' buttu di kao Paulus anna Timotius, bassim sabua'nakam Kristus Yesus,

lu lako ingganna umma'na Puang Allataala illaam kota Filipi to mesam Kristus Yesus. Susi toi duka' ingganna to ma'kambi' illaam jumaa' anna pebaba ada' to si umpamoloi to masussa.**

²Handandanni Puang Allataala Ambeetaa' sola Debatanta Yesus Kristus la untamba'koa' anna namana' kamasakkeam sola kamasannangam.

**Sambajanna anna pa'kuhhu'
sumanga'na Paulus längäm Puang
Allataala diona jumaa' Filipi**

1:3-11

³Kukilalai okoa' too, iya ma'kuhhu' sumanga' omä' längäm Puang Allataala

to kupenombai. ⁴Ma'sambajam oä' too kupa'sambajangam ongkoa' sola katilallasam, ⁵aka mesa penaba liukia' umpatiballa' kalua' indo Kaheba Katilallasam mengkalao diopi mai pahandu'na anna matappa'koa' sule lako temo. ⁶Puang Allataala puha umpahandu'i inde pengkähängam mapianna illaam penabammua'. Anna ponnoä' pahhanuam kuua la tontä liu napatahhu' Puang Allataala sule lako la nasuppisam illaam allo kasuleanna Kristus Yesus ma'penduanna.

⁷Abana sihatam anna sipäto' ma'pikki' susiä' kusi'dim aka tontä liukoa' illaam penabanku. Aka mangngala tabangkoa' duka' illaam indo pengkähängam namanasannä' Puang Allataala. Tontä liukoa' umbaliiä', susi inde tentomai mahassannä' illaam tahungkum, teem indo wattunna kupomasiäsam manappa lako hupatau to umbahoi indo Kaheba Katilallasam anna kupapähänni manappa lambi' naissam anna natappasam. ⁸Puang Allataala muitai maaka susi kamamallisangku anna pa'pakamajangku matim, umba susi pa'pakamajanna Kristus Yesus lako ikoa'.

⁹Anna indem ia issinna sambajangku: kupa'sambajangangkoa' anna mala tuttuam ponnokoa' pa'kamase sitonda kapaissangam diona pa'elo'na Puang Allataala anna kakeakasam. ¹⁰Kupelau ia too anna mala muissanna' usse'la indo handam mapianna la dipogau' anna la maseho katuboammua', tä' deem nahua pambasa'-basa' penaba, sule lako kasuleanna Kristus ma'penduanna. ¹¹Anna la ponnoa' salu katuboammu ingganna pa'pogausam malolo kahana pengkähäna Yesus Kristus, napolalam dipa'kasallei anna dipomatande Puang Allataala.

**1:1 to si umpamoloi to masussa: naua ia basa Indonesia *diaken* battu diua *syamas*.

**Kamasussaanna Paulus ia hi
napolalam tuttuam tiballa'
kalua' Kaheba Katilallasam**

1:12-26

¹²O inggannakoa' solasubungku, kupa'kalandoim ke muissammia' muua inde illaannä' tahungkum temo, ia hi napolalam tuttuam tiballa' kalua' indo Kaheba Katilallasam. ¹³Nasuhum ingganna to si unjagai banuanna tomahaja anna ingganna tau illaam inde kota, naissam asammi kasuhunganna anna ditahungkunnä' aka umpa'pakahebaannä' diona Kristus. ¹⁴Mane deenni, buda solasubunta to matappa' illaam inde kota tuttuam mahannu lako Debata aka naissam naua napamoloiä' Debata inde ditahungkunnä' temo, nasuhum tä' deem kamaheasanna sapo' sangngim tuttuam bahani mandi umpa'pakahebaam Battakadanna Puang Allataala.

¹⁵Abana deem sanaka-naka tau maelo' duka' umpa'pakahebaam diona Kristus aka kembuhu anna masihi ate lako kaleku.†† Sapo' deem duka' tau senga' umpa'pakahebaam diona Kristus aka pattuju mapia si'da-sia ia. ¹⁶Inde mai tau to ma'pattuju mapia ma'pogau' susi aka nakamaseiä' anna ungamasei Puang Allataala. Aka naissammi naua nasuaä' Puang Allataala sule inde umpomasiäsam manappai lako to umbahoi diona Kaheba Katilallasam ia too. ¹⁷Sapo' indo to masihi ate, umpa'pakahebaam duka' diona Kristus aka deem pattuju penabanna maelo' ia la dipa'kasallei. Ma'pogau' susi aka maelo' la tuttuam masussaä' illaam tahungkum.

¹⁸Sapo' päbäi mammi. Aka moi la deem tau napalako ia too kahana pattuju mapia, battu haka deem tau napalako ia kahana pattuju kadake, sapo' bassim Kristus siam duka' napa'pakahebaam. Dadi illaanna ia too tontää' tilalla'.

Anna la tontä liuä' tilalla' ¹⁹aka kuissam kuua pa'sambajammua' anna panto'lonninna Penaba Masehona Yesus Kristus nasuhum la malaä' dilappasam.‡‡ ²⁰Aka kuhannuam si'da-si'da anna kupemulu kuua la tä' deem kupomasihi'na kupogau' dio olona Kristus illaam inde pengkähänganku. Sapo' umba susi indo si kupogau' liu, la tontä liu hä' too bahani umpa'tulasam hupatau diona Kristus, anna mala susi tuboku teem mateku Kristus dipomatande kahana pengkähäku. ²¹Aka kao-kao tuboä' anna mate tontä bäbäm. Tuboä' umpasatutui penabangku Kristus, mateä' iya kakehongkosangku. ²²Sapo' tä' bäbäm pole' kuissam kupise'i. Aka maka' tuboä' illaam inde lino, malapä' umpalako pengkähängam keguna. Iam too anna tä'um kuissam umbannam la kuola ²³aka nasihuntu'ia' inde dua kaha-kaha. Maelo'ä' la umpellei inde lino le'ba' tohho sola Kristus, aka abana ia handam mapia. ²⁴Sapo' aka pahallupokoa' la kupamoloi, dadi ahamä' tohhoi inde lino. ²⁵Kukatappa'i kuua la mapia ke tohhopä' inde lino, nasuhum kuissam kuua la tubopä' anna la sola-solapakia' lambi' malakoa' kupamoloi, nasuhum la tuttuam manda'a' kamatappasammu anna la tuttuam kasalle katilallasammua' illaam matappa' lako Kristus. ²⁶Dadi maka' too ma'pasulemä' matim, iya la tuttuam sundedeä' buamu umpa'kasallei Kristus Yesus aka Ia unjagaiä'.

††1:15 Indo tau ia too kembuhu anna masihi ate aka maelo' duka' kaissangam susi Paulus.

‡‡1:19 malaä' dilappasam: kalembasanna, (1) mala dilappasam illaam mai tahungkum, battu haka (2) mala dilappasam illaam mai inde lino ponno kakadakeam.

**Kamanontongam illaam
muoloi panggebaam**

1:27-30

²⁷ Mane deenni, handam too'na illaam ingganna pa'palakoammua' la sihatan-napi umpogau' umba susi si napogau' to untuhu'im indo Kaheba Katilallasam diona Kristus. Aka maka' ma'pogau' susikoa', susi ke silambi'kia' teem ke tä'kia' silambi', inna la kuissam liu kuua tontäkoa' mesa penaba anna mesa patuju illaam kakalebuam ke'de' matoto' anna matitta manggeba umpasatutui penabammu lako indo Kaheba Katilallasam anna mala tuttuam kehängäm to matappa'. ²⁸ Anna moi aka la napogausangkoa' ingganna balimmu, tä'koa' la mahea'. Aka maka' tä'koa' mahea', iya la tandaammi too diua la ullambi' ia kati-lakaam, sapo' ikoa'-iko la ullambi'koa' iko kasalamasam. Ia asanna ia too Puang Allataala unghähäi. ²⁹ Aka taia angga mandi kamatappasam lako Kristus namanasangkoa', sapo' dipadudunnipokoa' duka' pandahhaam inde lino anna mala dipa'kasallei sanganna Kristus. ³⁰ Tentomai manggala tabangkoa' duka' illaam indo panggebaangu umba susi puhaa' muita indo kuoloi, anna muissanna' muua tontä liupi kukähä sule lako temo.

**Kristus mahempo penaba la
napotandengam hupatau**

2:1-11

2 Aka kamesaammua' Kristus nasuhum matoto'a' penabammu. Kahana pa'kamasena Kristus nasuhum mala liukoa' tipakahanga. Anna tontä liukoa' naolaam Penaba Masehona Puang Allataala. Anna siampuammokoa' pa'hängam bua sola pa'kamase. ² Dadi la sundum anna sule lako katilallasangu ke umpasahandangkoa' penaba, la sikamasekoa' mesa sola

mesa, anna la mesa pangnginaba-naba. ³ Illaam ingganna pa'palakoammua' tä' si'da-si'dakoa' la mala ma'podo kao, anna tä' tookoa' la malangka' penaba. Sapo' ia hia, la umpomahempokoa' penabammu la siangga' mesa sola mesa. ⁴ Penabannia' duka' kapahalluanna solamu, daa angga kalemu umpikki'.

⁵ Anna lalam inabammua' la susi Kristus Yesus:

⁶ Aka moi anna Debata duka' Yesus Kristus susi siam Puang Allataala, sapo' tä' muanti puli kapendebataanna.

⁷ Sapo' untampeam kamatandeanna sule inde lino mehupatau anna mendadi sihhapam mesa sabua'.

⁸ Tappana mendadi hupatau, iya umpomahempom kalena anna tuboi untuhu'i pa'elo'na Puang Allataala, lambi' mate yabo kaju sitambem.

⁹ Iam too anna napomatandem Puang Allataala

anna nabeem kakuasaam la unguuasai asam ingganna kuasa senga',

¹⁰ anna mala ingganna-ingganna sia susi issinna suhuga, susi issinna inde lino,

teem tando dokkona lino, la sangngim menomba dio olona Puang Yesus,

¹¹ anna la sangngim naaku hupatau naua: "Yesus Kristus abana Debata si'da-sia,"

nasuhum dipomatande Puang Allataala Ambeta.

**To matappa' la mendadi ballo lako to
tamuissam Kaheba Katilallasam**

2:12-18

¹² Dadi inggannakoa' solasubungku to kupakamaja, umba susi kamanuhusammua' lessu'-lessu'na, la susi siam too duka' la ditingngajona. Tä' angga mandi indo anna dioä' heem, sapo' la la'bi puha ia inde temo tä'ä' dio heem. Kähä liuia' indo la sihindoinna kasala-

masam to puha nabeengkia' Puang Allataala. Palakoaia' ia too sola mahea' anna masihi' dio olona. ¹³Aka ma'kale Puang Allataala mengkähä illaam penabammua', nasuhum deem kamelosammua' umpogau'i indo pa'elo'na anna umbelaa' umpalako.

¹⁴Illaam ingganna pa'palakoammu tä'koa' la mala ma'menu-menu anna tä' tookoa' la sipengka-pengka, ¹⁵anna mala masehokoa' tä' deem nahua pambasa'-basa' penaba, anna tandaanni diua änä'na si'dangkoa' Puang Allataala, tä' deem sassaimmu illaam alla'-alla'na to pengko' penaba anna kadake gau'. La pahallukoa' sihhapam pangkähänä bintä ummasiä'i kamalillingam ¹⁶ke umpa'tulasangkoa' indo to kadake gau' diona Battakada Debata to la mebaba lako katuboam. Aka maka' malangkoa' ma'pogau' susi, iya la deemmi too napolalam sundede buaku ke sulem Kristus ma'penduanna. Aka la tandaammi too diua indo lupu' hesoku tä' labu' bäbä, sapo' la mala sule lako.

¹⁷Puhangkoa' unkatappa'i Puang Allataala anna indo kamatappasammu mendadim mesa pehumala' dio olona, tandaam illaam ingganna pa'palakoammua'. Maka' dipateiä' kahana inde pengkähängangu umpatudukoa' lalam kasalamasam, iya indo hahaku sihhapam la ditolloam yabona pehumala'mua' battu diua kamatappasammua'.^{¶¶} Maka' abana inna la susi, iya la ma'kuhhu' sumanga'ä' anna la pada-padakia' kassi anna tilalla'. ¹⁸Susi sianna' iko duka' la pahallukoa' ma'kuhhu' sumanga', anna la pada-padakia' kassi anna tilalla'.

Timotius anna Epafroditus

2:19-30

¹⁹Inggannakoa' solasubungku, deem pattujungku ke nauai Debatanta Puang Yesus, diona maelo'ä' la ussua matim Timotius napellambi'ikoa' anna mala tiala inabangku ke ma'pasulem mai natulasannä' kahebammua'. ²⁰Aka angga si'da-si'dam Timotius kusiala-penabaam anna si napikkisam si'da-si'dakoa' kamasannangammu. ²¹Anna ingganna tau senga' sangngim angga pengkähängam kalena nabumbu' anna umpaiboko'na ia pa'elo'na Yesus Kristus. ²²Sapo' Timotius ia, muissammia' muua abana to la mala dihannuam. Puhangkam sola mengkähä kahha' sihhapam to sipoänä' umpa'pakahebaam Kaheba Katilallasam. ²³Dadi kattupi inde kaha-kahaku mane kusuai matim ke nauai Debata. ²⁴Anna ponno pahhannuannä' längäm Debata la Ia mengkähä anna mala tä' masäe anna matimmä' kao duka' umpellambi'ikoa'.

²⁵Anna diona ia Epafroditus to kuangga' solasubum, indo to puha ussua' mai napamoloiä', sijokakanni illaam pengkähängangu anna mendadim sababangangu illaam pa'bundusam di ada'. Sapo' pahallum la kusua sule matim ²⁶aka nakamalli'i punalakoa', la'bi-la'binna tä' masannam penabanna tappana naissam naua umpelelea' masaki. ²⁷Moi anna tappa' si'da masaki anna saidi' tamate, sapo' pa'kamasena Puang Allataala lambi' bono'um. Tä' ia mandi nakamasei Puang Allataala, sapo' nakamaseiä' duka' anna mala tä' tuttuam masussa penabangku. ²⁸Iam too anna tigaha' sugali'um penabangku kuua: "Mapia ke bale' ma'pasulei matim." Aka kuua anna mala tilalla'koa' ke silambi'koa',

^{¶¶}**2:17** Hahana Paulus ke dipatei napasihhapam anggur indo si natolloiam yabona pehumala'na to Yahudi yolona. Anna kamatappasanna to Filipi napasihhapam ia bale dipake mehumala'. Batai Täss. 29:38-41.

anna kuua toi anna mala kuhäm duka' sussa penabangku ke tä'ungkoa' unguasahaam liu Epafroditus. ²⁹Dadi tahimaia' sola ponno katilallasam umba susi la sihatanna untahima solasubunta to matappa' lako Debata. Pa'kasalleia' ingganna tau to susi Epafroditus ³⁰aka saidi' tamate umpalako indo pengkähängam nabeem Kristus. Umbotoham sungnga'na anna mala napamoloiä' unghähä indo tää'na mala unghähäa'.

**Anggam kamatappasam lako
Kristus mala tau malolo dio
olona Puang Allataala**

3:1-11

3 Sulibanna ia too, inggannakoa' solasubungku, sihatam anna sipäto' la tilalla'koa' aka sakalebungkoa' Debata. Tä' maaka kusulei pole indo puha kutasangkoa' aka kujagai indana nababa bulingkoa' pepa'guhuam senga'. ²Jagai manappaia' indo to si uhhängänni pehhondoam illaam peadasam. Indo tau ia too kuangga' asu aka mebaba bulim. Daa umpehingngiia' tula'na indo to ma'gau' kadake aka si naua: "Tä' mala tala disunna' to la mendadi umma'na Puang Allataala."^{§§} Sapo' indo diuaam sunna', ussasa'-sasa' bähä hi tia tau kale. ³Aka kita hia' ia mala disangai to puha disunna' si'da-sia aka angganna' kita mendadi umma'na Puang Allataala.* Malakia' kita umpenombai Puang Allataala aka pantettena Penaba Masehona, anna kita'-kita tilalla'kia' umpuji Debata aka sakalebungkia' Kristus Yesus. Taiakia' kita to uhhannuam pa'pogau' kaleta. ⁴Kela deem gunana ia too, se-

tonganna kao hia la mala uhhannuam pa'pogau' kaleku. Aka maka' deem tau muangga' kalena to la sihatam uhhannuam pa'pogau' kalena, iya kaom-kao handam. ⁵Aka kao-kao mane kahua benginna subungku anna disunna'mä' aka situhu' Pepaondonganna Musa. Kao duka' didadiam inna to Israel, buttu illaannä' mai pessubunna Benyamin, poko' to Ibraniä'. Diona hi manii kamanuhusam lako ingganna pahenta illaam peadasanna to Yahudi, kao duka' mesa to illaam kakalebuanna Parisi battu diua to manuhu' si'da-si'da lako ingganna pahenta ia too. ⁶Kao handam to matuhhum illaam peadasanna to Yahudi lambi' si undahhäa' kakalebuanna to matappa'. Maka' ma'tula' tau diona kamanuhusam lako Pepaondonganna Musa, kao duka' mesa to tadeem sassaingku. ⁷Ingganna ia too kuangga' mapia yolona, sapo' temo tä'um aka kuua mehugiam mandi, aka silobummä' Kristus. ⁸Tä' angga ia too, sapo' ingganna-ingganna sia illaam inde lino, sangngim kuangga' mehugiam bähä, aka tä' deem pada angga'na kusi'dim ke kuissam si'da-si'dai Kristus Yesus Debatangku. Kutampeam ingganna-ingganna sia kahana Kristus. Aka ingganna ia too sangngim kuangga' humpä, aka kuua anna malaä' mendadi pentuhu'na Kristus ⁹anna malakam sakalebu. Tä' mala diua pa'palakoam kaleku untuhu'i Pepaondonganna Musa nasuhum maloloiä' dio olona Puang Allataala. Sapo' ia anna napomaloloiä' Puang Allataala, aka matappa'ä' lako Kristus. Dadi kamaloloangku buttu di Puang Allataala aka unghatappa'ia' Kris-

^{§§}**3:2** *disunna'*: kalembasanna, *ditille*. Indo disunna' mesa kabiasaanna to Yahudi. Anna nasanga ia to Yahudi la pahallu tau untuhu'i asam ingganna kabiasaam illaam peadasanna to Yahudi ke maeloi' tau mendadi umma'na Puang Allataala.

^{*}**3:3** Eta too to Yahudi si diuaam *to disunna'* aka tandana diua umma'na Puang Allataala. Sapo' naua Paulus: tontä bähäm disunna' tau anna tää', aka indo diuaam umma'na si'da-si'da Puang Allataala to unghatappa'i Yesus Kristus.

tus. ¹⁰ Anggam kuinaba-naba kuua kela malaä' muissam manappa Kristus anna kusi'dim toi indo kakuasaanna to umpat-ibangonni dio mai kamateam. Kupohäe ke didahhaä' duka' umba susi nasi'dim Kristus lambi' mateä' duka' umba susi Kristus mate, ¹¹ anna mala dipatibangonnä' duka' sule dio mai kamateam.

**Umpa'kadua-duai
dalam kasalamasam**

3:12-4:1

¹² Tä' kuua kulambi'um kao indo kuinaba-naba la susi Kristus, battu haka la kuua tepumä' kao. Sapo' la tontä liuä' ma'kadua-dua umpellambi'-lambi'i kamasehoanna Kristus. Aka iam too kasuhunganna anna napellambi'imä' Kristus Yesus napileiä' mendadi umma'na. ¹³ O inggannakoa' solasubungku, setonganna tä' deem kuua kulambi'um kao indo kamasehoam la susi Kristus. Sapo' ia hia deemmi kupogau': kao-kao kutampeam asammi ingganna indo pa'palakoangku puha kuboko'inna anna kupasatutui penabangku indo to la kupellambi'i. ¹⁴ Sihhapam mesa to lumumpa' illaam passilumbaam, susim too duka' pa'palakoangku tamessaile kanannä' anna tamessaile kaihi anna malaä' ullambi' songko' kapataloam yabo suhuga. Aka iam too kasuhunganna anna natambaimä' Puang Allataala umpolalam Kristus Yesus.

¹⁵ Dadi kitaa'-kita to matoto'um kapeimanganta, la tapasatutua' penaba kaha-kaha ia too. Sapo' maka' deem illaam alla'-alla'mua' tä' ma'pikki' susi, sapo' senga' ia pikkihanna, la ma'kale Ia Puang Allataala umpapähännii. ¹⁶ Sapo' anggam sahhupa la pahallu dipaalai liu penaba: Illaam ingganna pa'palakoanta

la ma'pogau' susi liukia' umba susi indo si tapogau'um.

¹⁷ O inggannakoa' solasubungku, potandengannia' pa'palakoangku. Anna la umpetua' manappaa' ingganna tau to malam umpotandengangkam anna umpasusiia'. Si ma'pogau' mapiakam aka kiua anna mala muissanna' indo la sihatanna dipogau'. ¹⁸ Aka pembudam kupaissannikoa' lessu'-lessu'na. Sapo' tentomai la kusulei pole oom kupasindum sumahho kuua buda tau illaam salu katuboanna ungdakei kalembasanna kamateanna Kristus yabo kaju sitambem.† ¹⁹ Tau susi ia too ma'katampasanna la lu tama ia nahaka aka moka untuhu'i pa'elo'na Debata, sapo' nakuasai leko' ia kamohäeam bätä puntinna. Ingganna pa'palakoam kalena, indo setonganna la dipa'kasihisam, ia hi nasengkengam. Anna anggam kaha-kaha inde lino napikki'. ²⁰ Sapo' tä'kia' kita la ma'pogau' susi aka issinnangkia' suhuga. Etam too la naongeti buttu Debatantaa' Yesus Kristus To Mepasalama'taa'. Kristus-um too indo to tapemmitai liua'. ²¹ Wattu eta too la napapaii pole inde kaletaa' to buda sassainna, la napopendadi susi kalena, tä' Ia deem sassainna. La nakähä ia too aka abana muampuam kakuasaam unguasai ingganna-ingganna sia.

4 Dadi la susi inde inggannakoa' solasubungku to kupakamaja anna to kukamalli': illaam salu katuboammua' la tontä liukoa' umpomatoto' kapeimangammu lako Debatanta. Inggannakoa' to kupakamaja, ikonna' too umpakassiä' anna tilalla' umpayaboä' pangka-pangka bulabam.

†**3:18** buda tau illaam salu katuboanna ungdakei kalembasanna kamateanna Kristus yabo kaju sitambem: indo to ussangai kalena to Sahani sapo' ma'gau' kadake hi.

**Sanaka-naka handanna
kada pepatuduam**

4:2-9

²Mane deenni, kupelau si'da-si'da lako solasubungku Euodia anna Sintikke kuua: "La mesa penabakoa' umba susi la sipäto'na napogau' to matappa'um lako Debata." ³Anna kupelau duka' lako sababanganku[‡] to tontä manontom anna mala umpasikipiai sule indo dua baine. Aka bassim si nabaliiä' mengkähä kahha' indo lessu' umpa'pakahebaam Kaheba Katilallasam, susi duka' Klemens anna ingganna tau senga' to umpasolaiä' mengkähä. Tituli' asammi sanganna illaam Suha' Katuboam yabo suhuga.[¶] ⁴Sihatam anna sipäto' kassikoa' anna tilalla' liu aka sakalebungkoa' Debata. Kusulei pole kuua la tontä liukoa' too kassi anna tilalla'! ⁵Anna mapia duka' ke naissam asanni tau naua mapia penabakoa'. Aka mahuku'um la kasuleanna Debata. ⁶Tä'koa' la malallam diona ingganna kaha-kaha. Sapo' illaam ingganna kaha-kaha la tontä liukoa' ma'sambajam umpakende' pelauam längäm Puang Allataala. Iai too umpahalluam pelau' längäm Puang Allataala sitonda ma'kuhhu' sumanga'. ⁷Maka' umpateemmiä', iya la napomasannammi too penabammu Puang Allataala. La tontä najaga penabammua' anna pikkihammu aka mesangkoa' Kristus Yesus. Indo kamasannangam penaba nabeengkoa' Puang Allataala la nakamängäi hupatau anna tä' ia mala napähäm.

⁸Mane deenni inggannakoa' solasubungku, kupelau matim anggam mapianna la umpaillaam

penabaa' susinna: kada tongam, gau' tongam, kamaloloam, kamasehoam, indo la mapianna dipikki', anna sihatanna dipuji. Susi toi duka' ke deenni aka-aka mapi'dä'na battu haka sihatanna la dipa'kasallei, iam too duka' la umpaillaam penabaa'. ⁹Pahallu la umpalakoä' ingganna indo puha kupatuduangkoa' anna kupepaondongam. Anna ingganna pa'palakoammu la situhu' indo tula'ku puhaa' uhhinggi anna panggauangku puhaa' muita. Maka' umpateenna', iya la tontä liukoa' naundu' anna naolaam Puang Allataala kabuttuanna kamasakkeam sola kamasannangam.

**Katilallasanna Paulus diona
pa'pebeenna to Filipi**

4:10-20

¹⁰Tilalla' punalää' kusi'dim temo lambi' ma'kuhhu' sumanga'ä' längäm olona Debata, aka mala pole ongkoa' umpamoloiä' ma'hupa anggoso' temo illaam inde kamasussaangku susi indo lessu'. Tä' kuua umpa'lembeimä', sapo' taakammu bäbää' umpalakoi. ¹¹Taia kakuhängangku nasuhum ma'kada susiä' indo inggenä', aka kupakabiasam kao kaleku kuangga' sundummi pada deenna. ¹²Illaam salu katuboangku bassim kusi'dimmi kakuhängam anna kabosasam. Kuissam toi umpomasannam penabangku muoloi ingganna kaha-kaha, susi dea'ä' teem tadea'ä', susi katomakakaam teem kapemase-maseam. ¹³Kubela muoloi ingganna kaha-kaha uhhuaä' aka napakatoto' penabangku Kristus. ¹⁴Sapo' abana mapia indo umpamoloiä' illaam inde kamasussaangku.

[‡]4:3 *sababanganku*: illaam basa Yunani naua *Sunsugos*, mala ma'kalembasam *sababanganku* mala ma'kalembasam sanga tau.

[¶]4:3 Tituli' sanganna ingganna to matappa' illaam Suha' Katuboam aka ullambi'um kasalallasam. Batai Los. 20:11-15.

¹⁵Inggannakoa' solasubungku itim jumaa' Filipi, tappana la umpelleiä' propinsi Makedonia yolona, indo anna uhuna umpa'pakahebaannä' Kaheba Katilallasam itim, muissammia' muua angganna' iko mesa-mesanna jumaa' to umbeennä' anggoso'. ¹⁶Anna tä' angga ia too sapo' pembudaä' umpakatu indo wattunna anna kakuhängannä' dio Tesalonika. ¹⁷Taia kahana mohäeä' untahima pa'pebeem nasuhum ma'kada susiä', sapo' kupohäe ke tuttuam kehängänni buana pa'palakoam mapiammua' yabo suhuga. ¹⁸Mane deenni, indo pa'pebeemmua' puha asammi kutahima. Anna mala diua la'bi pole ia anna indo kupahalluaanna. Tä' deem kakuhängannä' aka ingganna pepakatummuä' kutahima asammi indo nababa Epafroditus. Ingganna indo pa'pebeemmua' sihhapam tunuam bubanau' dipehumalasang dio olona Puang Allataala. Napohäe anna masannam penabanna untahimai.

¹⁹Anna Puang Allataala to kupenombai la umpaponnoi ingganna kapahal-luammua' situhu' katomakakaanna tadisihanteam aka silobummokoa' Kristus Yesus. ²⁰Dipa'kasallei sanganna Puang Allataala Ambetaa' mengkalao temo sule lako salako-lakona! Abana inna la diua.[§]

Kada pebubunna Paulus

4:21-23

²¹Palandasannä' salama'ku lako ingganna umma' to napasähä' Puang Allataala to matappa' lako Kristus Yesus. Anna salama'na duka' matim ingganna solasubunta to kupasola inde. ²²Kupalandasam asam duka' salama'na matim ingganna umma'na Puang Allataala to tohho illaam inde kota Roma, la'bi-la'binna to si tohho dio banuanna tomahaja.

²³Handandanni Debatanta Yesus Kristus untamba'koa' pada-pada. Padam too.

§4:20 *Abana inna la diua:* naua illaam basa Yunani Amin.

Suha'na Paulus lako Jumaa' dio Kolose

Bätäna issinna

Inde suha' natuli' Paulus napakatuum jumaa' dio Kolose. Indo Kolose mesa kota dio Asia Kecil disangaim temo Turki. Kota ia too tandai mata allona kota Efesus, indo naongi Paulus dua taum ma'pa'guhu. Alla'na Kolose anna Efesus, kiha-kiha 160 kilomete' mambelanna. Setonganna tä'pi deem lako Kolose Paulus ke'de'na jumaa' dio. Sapo' deem mesa tau isanga Epafra, iam too umbabaam Kaheba Katilallasam to Kolose, nasuhum ke'de' mesa jumaa' dio. Moi anna taia kalena Paulus umbabaam Kaheba Katilallasam to Kolose, sapo' nasi'dim la pahallu siam duka' umpikki' diona jumaa' ia too. Aka napekaheba Paulus naua illaam jumaa' ia too kende' buda tuanguhu umbaba ma'hupa-hupa pepa'guhuam sala. Indo tuanguhu ia too napapahentaam naua: "Illaam la umpengngissanni manappa tau Puang Allataala anna mala mepasalama' si'dasia, la pahallu tau umpenombai ingganna debata lino to ma'kuasa." Anna budapi pemali senga' nahängänniam, susi naua: "Pahallu tau disunna', pemali diande ia too, pemali diihu' ia too, pemali ditumbu ia too anna budapi senga'senga'na."

Inde suha'na Paulus lako jumaa' Kolose dituli' diona too'na pepa'guhuanna to Sahani. Anna ullabai pepa'guhuanna to ussanga kalena tuanguhu mapia sapo' setonganna taia, aka si umbaba pepa'guhuam sala. Dadi punggu' tannunna inde suha'na Paulus diona Yesus Kristus kabuttuanna kasalamasam. Anna indo to umbaba ingganna pepa'guhuam senga' anggam tia napeä lalanna umpasikambela hupatau anna Kristus.

Kristus unγκähäi indo anna napadadii Puang Allataala inde lino, anna Kristus siam duka' unγκähäi indo umpasalama' hupatau Puang Allataala. Anggam illaam kamesaam Kristus la muampuum pahhannuum hupatau la dipasalama'.

Natula' duka' Paulus diona la maaka susi gau'na to untahima indo pepa'guhuam diona Kristus.

Lesoanna issinna

1. Kada passu'bä' (1:1-2)

2. Pa'kuhhusam sumanga'na Paulus längäm Puang Allataala anna umpa'sambajangam to Kolose (1:3-14)

3. Kamatandeanna Kristus untodom asam ingganna-ingganna sia (1:15-23)

4. Pengkähänganna Paulus umpa'pakahebaam indo Kaheba Katilallasam (1:24-2:5)

5. Too'na tula'na lako kitaa' to matappa'um: Illaam ingganna pa'palakoanta la sipäto'napi dipalako umba susi pa'palakoanna to matappa'um lako Kristus (2:6-7)

6. Tä' mala la dipehingngii pepatuduam senga' sulibanna indo pepatuduam diona kamatappasam lako Kristus (2:8-23)

7. La tapa'dei sipa' dosa illaam kaleta anna umpalakoki' pa'palakoam bakahu (3:1-17)

8. Kada penännä' lako to mandapo', lako änä'-änä' sola tomatuanna, lako to diposabua' anna lako to dipopuä (3:18-4:1)

9. Pepakahi'di diona ma'sambajam anna pa'palakoanta lako to tä'pi unγκatappa'i Puang Yesus (4:2-6)

10. Kada pebubum (4:7-18)

1 Inde suha' buttu di kao Paulus mesaä' suhona Kristus Yesus aka situhu' pa'elo'na Puang Allataala. Duka' buttu di solasubuntaa' Timotius,

²lu lako umma'na Puang Allataala itim Kolose to puha napasähä'.

O solasubungki to manontom illaam kasilombangammua' Kristus, handandanni Puang Allataala Ambetaa' la untamba'koa' anna namana' kamasakkeam sola kamasannangam.

**Sambajanna anna pa'kuhhu'
sumanga'na Paulus**

1:3-14

³Ma'sambajam okam too kipa'sambajangam ongkoa' duka' anna ma'kuhhu' sumanga'kam längäm Puang Allataala, Ambena Debatanta Yesus Kristus, ⁴aka kipekaheba diua matappa'ungkoa' lako Kristus Yesus anna si ma'kamase lako ingganna to napasähä' Puang Allataala mendadi umma'na. ⁵Ia anna matappa'koa' sola si ma'kamase aka mahannukoa' lako kasalamasam indo puhangkoa' napatokaam Kristus yabo suhuga. Puhaa' uhhingngi diona ia too indo anna untahimakoa' kaheba kamaloloam battu diua Kaheba Katilallasam ⁶to puha dipalambisangkoa'. Anna tiballa' liu indo Kaheba Katilallasam lako lino lambi' ungkembuaam kamapiaam. Susi tandaam duka' illaam kalemua' napahandu'na uhhingngia' anna ungkaleso si'da-si'da indo diuaam mana' pa'kamasena Puang Allataala. ⁷Ingganna ia too muissam dioa' mai Epafras sababangangi to kipakamaja. Mesa duka' to mengkähäna Kristus to mala dihannuam umpamoloikoa'. ⁸Ia siam too duka' umpa'tulasangkam maaka susi pa'kamasemua' kahana pengkähäna Penaba Maseho.

⁹Iam too anna kiissanna diua matappa'ungkoa', iya tamondamondangkam umpa'sambajangangkoa' melau längäm olona Puang Allataala anna mala napaponnoikoa' Penaba Maseho kamanähängam anna kakeakasam la umpomasia' pikkihammua' ungkaleso manappa pa'elo'na

Puang Allataala. ¹⁰Nasuhum indo pa'palakoammua' la sipäto' dio olona anna la umpomasannam penabanna Debata illaam ingganna kaha-kaha. Anna la umpalakoa' ingganna hupanna pa'palakoam mapia, anna la tuttuam muissangkoa' anna ungkaleso Puang Allataala. ¹¹Handandanni Puang Allataala umpakatotosangkoa' penabammu umpolalam kuasanna to taditondom, nasuhum malakoa' manontom anna mahamme' muoloi ingganna kaha-kaha. Anna la ponnokoa' kakassiam ¹²ma'kuhhu' sumanga' längäm Puang Allataala Ambeta. Aka iam too to unggahagaikoa' anna mala sipäto'koa' duka' untahima mana' to puha napatokaam lako umma' petauanna illaam kapahentaam kamasiäsam. ¹³Puhangkia' nalappasam dio mai kakuusaanna kamalillingam anna nababakia' tama kakuusaanna Änä' pa'pakamajanna naongi ma'pahenta. ¹⁴Pengkähänam too Kristus nasuhum malangkia' dilappasam battu diua diampunni ingganna dosata.

Kamatandeanna Kristus

1:15-23

¹⁵Kristus susi siam sipa'na anna pa'pogausanna Puang Allataala to tä' Ia diita. Kristus inna deemmi Ia anna umpahandu'i ingganna pa'padadonna Puang Allataala. Anna mentondom puha Ia anna la ingganna ia too. ¹⁶Aka Kristus ungkähäi indo anna napadadii Puang Allataala ingganna-ingganna sia susi yabona suhuga teem illaanna inde lino, susi tandaanna teem tää'na diita. Illaam indo tää'na diita deem ma'kuasa anna deem ma'pahenta. Kristus umpadadi ingganna-ingganna sia anna iam too napolalam dipa'kasallei. ¹⁷Inna deemmi Ia indo anna tä'pi deem dipadadi ingganna aka-aka, anna Ia siam kuasa umpaliahai ingganna ia too.

¹⁸Anna Kristus ullumbäi kakalebuanna ingganna to matappa' sihhapam ulu ullumbäi kale. Ia kabuttuanna katuboam aka Ia handam yolo dipatibangom dio mai kamateam, anna mala illaam ingganna kaha-kaha Ia handam matande. ¹⁹Aka inna pa'elo'na Puang Allataala naua: "Ingganna illaanna kaleku, illaam asam duka' kalena Kristus." ²⁰Anna pengkähänam too Kristus anna malam umpapai sule kasilombunganna kalena Puang Allataala anna ingganna-ingganna sia, susi illaanna lino teem yabona suhuga. Kasilombungam ia too mala napapia sule Puang Allataala aka indo katitolloam hahana Kristus yabo kaju sitabem.

²¹Yolona sikambelakoa' Puang Allataala anna si pabali-balikoa' lako, aka kadake gau'koa' anna kadakea' pikkihammu. ²²Moi anna susi sapo' illaam indo kamateam bätä puntinna Änä'na, napapai sule Puang Allataala kasilombungammua' kalena. Nasuhum malakoa' maseho, tä' deem sassaimmu anna tä'um deem tau la untula' gau' kadakemu ke dipopengngolongkoa' lako olona Puang Allataala. ²³La susim too ke tontä liukoa' manontom anna matoto' illaam kamatappasammu anna mahannu liu lako indo puha untahima indo anna uhhingngikoa' Kaheba Katilallasam. Kaheba ia too dipa'pakahebaammi lako lino anna kaom too Paulus mesa to disua umpa'pakahebaanni.

**Kamapi'disanna Paulus
umpa'kadua-duai to matappa'**

1:24-2:5

²⁴Tentomai tilalla'ä' ussi'dim kamapi'disam aka kuissam kuua keguna tama kalemua'. Inde kamadahhaanna bätä puntingku kusi'dim temo, iam too la ungganna'i indo kamapi'disam napapassanniannä' Kristus anna malaä'

umpamoloi kakalebuanna ingganna to matappa', indo to dipasihhapam bätä puntinna Kristus. ²⁵Anna natuhomä' Puang Allataala mendadi sabua'na la umpamoloi kakalebuanna ingganna to matappa'. Anu' napapassannimä' la kupalandasam asangkoa' ingganna issinna kaheba katilallasanna. ²⁶Kaheba katilallasam ia too mahhatu'-hatu'um taunna naolaam napokada ditambim Puang Allataala lako hupatau, sapo' tentomai napa'paissangammi pole' lako ingganna to napasähä' mendadi umma'na. ²⁷Anu' maelo'um Puang Allataala napa'paitaam maaka susi mapianna anna matandena issinna indo kada ditambinna lako tau taianna to Yahudi. Susi inde issinna indo kada ditambinna: Kristus tohho illaam kalemua' nasuhum uhhannuanna' la malakoa' mangngala taba illaam kamatandeanna Puang Allataala. ²⁸Kristus-um too indo kipa'pakahebaam lako ingganna hupatau. Kipopannännä' anna kipepa'guhuam lako ingganna tau sola ponno kakeakasam illaam kaleki. Ia anna kipateenni anna mala si mesa-mesa tau to illaam Kristus la sundummi anna tä' deem sassainna kibaba mengngolo lako Puang Allataala ke allo ma'katampasannam. ²⁹Iam too anna ma'kadua-dua liumä' muasai pala'ku mengkähä sola kamatohoam nabeennä' Kristus mengkähä illaam kaleku.

2 Kupa'kalandoim ke muissammia' kuaka susi ma'bumbu' umpa'kadua-duaiko' solakoa' to Laodikia anna ingganna to tä'pä' muissam. ²Ma'pateennä' anna mala matoho penabammua' anna la sikamasekoa' mesa sola mesa, nasuhum matoto'koa' illaam kakalebuammu. Napolalam la ungka'da' si'da-si'daa' ingganna uhhingnginna lambi' muissanna' indo kada ditambinna Puang Allataala

diona kalena Kristus. ³Kristus-um too umpa'patandaam kakeakasanna anna kamanähänganna Puang Allataala indo masäem tibuni nasuhum naissam pole' hupatau.

⁴Kutulasangkoa' indee, indana napabulingkoa' tau ke napamamisangkoa' tula'. ⁵Aka moi anna sikambelaa' ongeanta, sapo' la muangga'a' illaam siamä' alla'-alla'mu, aka kupenabaam liu siangkoa'. Anna tiala inabangku umpelelekoa', aka tontä liukoa' mesa penaba anna matoto' liu kamatappasammua' lako Kristus.

Kristus too'na katuboam

2:6-15

⁶Puhangkoa' untahima Kristus Yesus umpodebata. Iam too anna pahallu si'da-si'danna' illaam pa'palakoammu la sipäto'napi umpalako', umba susi pa'palakoanna to matappa'um lako Kristus. ⁷Anna la kewwaka'koa' illaam kalena anna ingganna pa'palakoammua' la mentoko yabona Kristus. La tuttuam mengnganda' matoto'koa' lako pepatuduam la situhu'na indo puha dipa'guhuingkoa'. Anna la tontä liukoa' ponno pa'kuhhusam sumanga'.

⁸Pahallu unjagai manappaa' indana nahuntu'koa' kamanähängam takeguna dio mai pepaondonganna hupatau. Ia too la mebaba bulim bäbä. Aka manassa tä' buttu dio mai Kristus sapo' buttu dio mai hupatau anna debata lino.

⁹Anu' ingganna sipa'na Puang Allataala illaam asammi duka' kale mehupataunna Kristus. ¹⁰Anna kamesaam penabammua' Kristus naongeti sundum anna ganna' katuboanna bätä sungnga'mua'. Anna Kristus-um too ullumbäi ingganna debata lino to ma'kuasa. ¹¹Kahana mesa penabangkoa' Kristus kalembasanna

puham naäläi illaam mai kalemua' indo dosa silolemmua' sihhapangkoa' disunna'.** Taia sunna' bätä punti nakähä hupatau muäläi bale saidi' sapo' sunna' bätä sungnga' puha nakähä Kristus muäläi dosa. ¹²Indo anna ditedo'koa', etam too anna sihhapangkoa' dilamum sola Kristus. Eta siam too duka' anna dipatibangongkoa' sule sola Kristus aka uhhanuanna' anna unkatappa'i kakuasaanna Puang Allataala to umpatibangom sule Kristus dio mai alla'na to mate. ¹³Yolona indo tä'poko' matappa', tihekem matea' sungnga'mu kahana si umpogau'koa' dosa anna sipa' kadakemua' tä'pi disunna', battu diua nakuasaipoko' dosa. Sapo' tentomai puhangkoa' napatubo sule Puang Allataala sola Kristus anna naampunnim ingganna dosata. ¹⁴Nasapuim indo suha' naongeti tituli' ingganna kasalaantaa' anna ingganna indo la sipäto'na dipogausangkia'. Napa'deim Puang Allataala illaam indo kamateanna Kristus yabo kaju sitambem. ¹⁵Naäläi asammi Puang Allataala kakuasaanna ingganna debata lino to ma'kuasa. Sihhapam napungo asam anna napopa'lilim-lilinni anna mala näita tau buda mendadi tanda kapataloanna. Patalom Puang Allataala aka puham mate Kristus yabo kaju sitambem.

Palulakoia' penabammu kaha-kaha passuhugaam

2:16-3:4

¹⁶Iam too anna tä'unna' la umpehingngii ke deenni tau ullahangkoa' diona mengkinandena anna la diihu'na, battu haka napasalako' diona hettem allo kasalle illaam peadasanna to Yahudi, allo kasallena pa'pahandusanna bulam, anna allo Katohhoam. ¹⁷Anu'

**2:11 *disunna'*: kalembasanna, *ditille*.

ingganna pahenta si napogau' indo lessu', kalibajona bábä hi tia lalam kasalamasam, sapo' Kristus di tia tungka ianna. ¹⁸Tä' toi la umpehingngii ke deenni to si naägä'i mengkadio-dio lelem mato-mato to mahempo penaba anna si umpenombai malaika' naua: "Tä'koa' la salama' ke tä'i umpasuiikam." Aka tau ia too si kaita-ita ade', iya iam too si napa'kassiam anna angga hi sipa' dosana napolalam malangka' penaba. ¹⁹Anna tä' dia mengnganda' lako Kristus. Kristus to ullumbäi kakalebuanna ingganna to matappa' nasuhum tuttuam manda' anna lobo' situhu' pa'elo'na Puang Allataala sihhapam ulunna tau ullumbäi kalena nasuhum lobo' anna tontä kalebu ingganna lesoanna anna uha'na.

²⁰Kamateanna Kristus napolalam lappa'ungkoa' illaam mai kakuasaanna ingganna debata to unguasai lino aka mesangkoa' Kristus illaam kamateanna, nasuhum tä'ungkoa' nakuasai aka-aka inde lino. Dadi daa muanda'ia' ma'hupa-hupa paiham anna pemali susinna: ²¹pemali dianda'i inde, pemali diande ia too, anna pemali diisso inde. ²²Aka ingganna ia too susi mengkinandena teem membaham-bahanna puhai too dipake, pa'dei bábäm. Aka paiham anna pemali ia too hupatau bábä umpapiai. ²³Abana paiham anna pemali susi ia too tä' siam nabela umpahe' penaba kadakena hupatau, moi anna nasangai hupatau ponno kakeakasam. Aka ingganna ia too umpa'pahentaam kapenombaam to napapiai hupatau, susinna naua: "Manggi' tau la si mengkadio-dio lelem mato-mato to mahempo penaba, anna la si umpi'di'-pi'di' tau kale aka diua anna mala tau salama'."

3 Puhangkoa' dipatubo sule sola Kristus, dadi palulakoa' pen-

abammu kaha-kaha passuhugaam indo naongi Kristus untadongkonni ongeam kamatandeam sola kakuasaam nabeem Puang Allataala dio tandai kananna. ²Palulakoaia' pikkihammu kaha-kaha ia too, daa umpa'kadua-duaia' kaha-kaha di lino. ³Aka indo katuboammua' yolona ponno dosa diangga' matem ia, anna katuboam bätä sungnga'mua' tibunipi sola Kristus dio olona Puang Allataala. ⁴Maka' umpa'paitaammi kalena Kristus to umbeengkoa' too'na katuboam, iya la tandaammokoa' pole' sola-sola Kristus mangngala taba illaam kamatandeaanna.

Katuboam masäe la napessulle katuboam bakahu

3:5-17

⁵Kahana matengkoa' sola Kristus, iya la umpa'deinna' sipa' dosa illaam kalemu susinna: lullusam bannetau, gau' sessu', kamohäeam sugali', kamohäeam ma'gau' kadake, sola mailu anna matinna. Aka mailu anna matinna sihhapam tau umpenombai kaha-kaha di lino. ⁶Gau' susi ia too umpakende' aha' kasallena Puang Allataala la melambi' ke dako'i [lako to tä' untuhu'i].^{††} ⁷Ikonna' too duka' si umpogau'i indo anna nakua-saipokoa' sipa' dosamu.

⁸Sapo' temo la muäläi asanna' illaam mai kalemu ingganna kakadakeam. Tä'ungkoa' la si keaha' battu haka la ma'kasubu-subu bábä, ma'pakolo'-kolo'i, anna tä' mala messubum illaam mai pudu'mu kada kadake la'bi-la'binna la untunai solamu. ⁹Tä'koa' mala la si pa'ägä'-ägäsam mesa sola mesa, aka indo sipa' kadakemua' yolona sola ingganna pa'palakoammu puham muäläi asam, ¹⁰anna puhangkoa' umpehhondä sipa' bakahu nasuhum mendadingkoa' hupatau bakahu. Anna

^{††}3:6 Illaam sanaka-naka suha' yolona tä' deem dituli': lako to tä' untuhu'i.

la nabakahui liu dalam penabammua' Puang Allataala to umpadadikoa' lambi' susikoa' kalena anna mala unkgaleso si'da-si'dakoa' Puang Allataala. ¹¹Aka tau bakahungkoa' nasuhum pa'dem pole' pa'se'la-se'la illaam alla'-alla'na to Yahudi anna taianna to Yahudi, to disunna' anna to tadisunna', sabua' anna taianna sabua', to sule, anna to tamuissam peadasam. Sapo' Kristus dia to handam dipaitoo'na, anna to illaammi kalena ingganna to matappa'.

¹²Puhangkoa' napilei Puang Allataala. Napasähä'ungkoa' mendadi umma' to nakamasei. Iam too kasuhunganna anna la si ponngkoa' pa'kamase, mapia penaba, mahempo penaba, madota', anna mahamme'. ¹³Pahallukoa' la sisa'bahasam mesa sola mesa anna tä'koa' la umpalao gau' situmpu, sapo' la muampunni hia' ia ke deenni solamu ma'gau' kadake lako kalemu. Umba susi masannam penabanna Debata muampunnikoa', la susingkoa' too duka' la siampunni mesa sola mesa. ¹⁴Anna handam too'-too'na la sikamaseikoa', aka kasikamaseam iam too la umpadadikoa' kalebu tullu.

¹⁵Anna indo kamesaam penaba napatamaangkoa' kalemu Kristus la ma'kuasa liu illaam alla'-alla'mu. Aka Puang Allataala umpasähä'koa' anna mala umpa'patandaanna' indo kamesaam penaba illaam kakalebuammua'. Anna la si ma'kuhu' sumanga' liukoa'i längäm olona Puang Allataala. ¹⁶Ingganna pepa'guhuan diona Kristus la umpatitananna' illaam penabammu. Anna la sipa'guhukoa' anna sipakilala sola ponno kakeakasam umpasindum si umpakende'koa' ingganna pampujiam anna penaniam längäm Puang Allataala sola ponno pa'kuhusam sumanga' mengkalao illaam penabammua' lemba' dio pudu'mu.

¹⁷Ingganna aka-aka umpogau' battu haka untula', pogau'i ia too la sihatanna anna sipäto'na napogau' to untuhu'im Debatanta Puang Yesus, umpasindum ma'kuhu' sumanga' illaam sanganna Puang Yesus längäm Puang Allataala Ambeta.

Okkosanna si mesa-mesa tau illaam banua

3:18-4:1

¹⁸Inggannakoa' to titanam indo, la manuhu'koa' lako muanemu aka abana inna la susi pa'palakoanna to unkgatappa'i Debata.

¹⁹Inggannakoa' to titanam ambe, kamaseikoa' bainemu daa umpi'di' penabai.

²⁰Inggannakoa' änä'-änä', la manuhu'koa' lako ambemu sola indomu illaam ingganna kaha-kaha, aka iam too napohäe Debata.

²¹Anna inggannakoa' ambe, daa umpomasussa penabanna änä'mu indana kattu hannui.

²²Inggannakoa' to diposabua', la manuhu'koa' illaam ingganna kaha-kaha lako puämu illaam inde lino. Tä' anggam anna la majulu'koa' ke sitingngajokoa' aka muua: "Anna mala napujiä' puäku." Sapo' la umpasule tama hia' ia indo kamajulusammu. Aka maka' umpateenna', iya unkgaha'ungkoa' too Debata anna umpa'kasallei. ²³Ia mammo anna ia pengkähängam nabeengko, la unkgähä sola ponno penaba, sihhapam Debata untingngajoa' taia anggam mandi hupatau. ²⁴Aka puha muissammi muua la buttu yabo iko mai Debata sahomu, anu' indo mana' puha nadandiangkoa' iam too la nabeengkoa'. Aka setonganna Kristus dia puämu mahassam umpengkähängam. ²⁵Sapo' menna-menna si umpogau' kakadakeam

la dipabala'i situhu' pa'pogausanna. Aka tä' ia deem ma'se'la-se'la Debata.

4 Inggannakoa' to dipopuä, la unt- ingngajo mapiakoa' sabua'mu la umpalakoa' situhu' sipäto'na anna ian- napi anna ia. Aka la umpengkilalai man- appaa' muua: "Deem duka' Puäki yabo suhuga."

Sanaka-naka pepakahi'di

4:2-6

²La tontä liukoa' manontom ma'sambajam umpasindum ma'kuhhu' sumanga' längäm Puang Allataala.

³Anna la umpa'sambajangankam kami' duka' anna mala nabukkaankam dalam mapia Puang Allataala la umpa'pakahebaam Kaheba Katilallasam diona Kristus indo to napokada ditambim inde dio mai. Iam too kasuhunganna anna illaammä' tahungcum temo, aka umpalanda'ä' indo kaheba ia too. ⁴Pa'sambajangam liuä' anna mala kupomakaleso manappa indo Kaheba Katilallasam, aka kaheba ia too abana inna la sipäto' kukähä.

⁵Pa'pogau'koa' sola ponno kakeakasam lako to tä'pi unkatappa'i Puang Yesus, daa ullabusam bäbää' wattummu sapo' la umpalako manappaa' ia too. ⁶Maka' ma'tula'koa', la umpeäa' lalanna anna mala tula'mua' la napemapiaam hupatau anna mala tigaha' penabanna. Maka' too si umpateemmia', iya la muissammia' too untimba'i umba susi la sipäto'na lako si mesa-mesa tau ke deengkoa' nakutanaiam.

Kada pebubunna Paulus

4:7-18

⁷Tikhikus solasubuntaa' to tapaka- maja la umpaissannikoa' ingganna indo kaha-kaha dadi lako kaleku. Ia mesa to mengkähä to mala dihannuam, anna sababanganku mendadi sabua'na De-

bata. ⁸Kusua matim temo aka kuua anna mala muissanna' kahebaki, anna mala napomatohoa' penabammu. ⁹Napasolai Onesimus mesa duka' solamua' to Kolose, solasubuntaa' to tapakamaja anna mala duka' dihannuam. Kusua ma- tim anna mala duai umpaissannikoa' ingganna indo kaha-kaha dadi inde ongeangki.

¹⁰Salama'na duka' matim Aristarkhus to kupasola ditahungcum. Salama'na toi duka' Markus indo sampo pissanna Barnabas. Anna kupelau, maka' sule matim Markus la muita manappaa', umba susi indo puha kutulasangka'. ¹¹Salama'na duka' Yesus indo biasa duka' si diuam Yustus. Pada budanna to Yahudi to unkatappa'im Puang Yesus, iya anggam inde to tallu umpasolaiä' mengkähä umpakilala hupatau anna malai men- tama kapahentaanna Puang Allataala. Anna inde to tallu tä' deem pada sanapakahangaä'.

¹²Anna salama'na duka' Epafras, solamu toia' duka' to Kolose anna mesa duka' sabua'na Kristus Yesus. Si napa'kadua-duai liukoa' napa'sambajangam, napelau längäm Puang Allataala anna mala tuttuam matoto' kapeimangammua', anna uhhannuam sola unkatappa'i ingganna pa'elo'na Puang Allataala. ¹³Kusa'bii si'da-si'da napa'kadua-duaikoa' sola to Laodikia anna to Hierapolis. ¹⁴Salama'na duka' Lukas tuandotto'ki to kipakamaja anna Demas.

¹⁵Palandasangkam duka' salama'ki lako ingganna solasubunta dio Laodikia sola lako solasubunta Nimfa anna lako jumaa' to si ma'sambajam dio banuanna.

¹⁶Puhai too dibata inde suha' illaam alla'-alla'mua', iya umpakatunna' lako indo jumaa' dio Laodikia anna mala nabata duka'. Susi siam duka' indo

suha' puha kupakatu to Laodikia la napakatukoa' dio mai anna mala umbataa'.

¹⁷Anna la muuaanna' Arkhipus: "La umpeä ade' lalanna anna mala umpapuha indo pengkähängam napapassaniangko Debata."

¹⁸Salama' buttu di kao, Paulus. Ma'kalem too pole' limangku untuli'i

inde kada salama'ku. Anna la ungilalai liuä' kao aka tontä liupä' too illaam tahungkum.

Handandanni Debatanta untamba'koa' pada-pada.

Padam too.

Uhuna suha'na Paulus lako Jumaa' dio Tesalonika

Bätäna issinna

Inde suha' natuli' Paulus napakatuum jumaa' dio Tesalonika. Indo Tesalonika kota naongeti ma'tadongkongam gubernur dio mesa propinsi isanga Makedonia illaam kahajaam Roma. Issinna indo kota kiha-kiha dua hatu' sa'bu tau budanna. Taianna to Yahudi umpanggis-sii, sapo' deem duka' to Yahudi illaam. Indo taianna to Yahudi buda debata lino si napenombai.

Indo dio kota Tesalonika puham dipa'pakahebaam Kaheba Katilallasam napa'pakahebaam Paulus sola Timotius anna Silas, nasuhum deemmi to eta unkatappa'i Yesus Kristus (Suhu 17:1-4). Sapo' tä' masäe puhanna ia too, iya deemmi to Yahudi keaha' aka ungkembuhui Paulus lambi' pabali anna ullabai Paulus umbaba kasahaniam lako tau taianna to Yahudi. Napolalam le'ba' Paulus umpellei Tesalonika lu lako Berea (Suhu 17:5-10).

Lessu'i eta too, mamalli' sugali' Paulus lako solasubunna to matappa' dio Tesalonika, nasuhum maelo' la napellambi'i sule. Sapo' aka tä' mala lao kalena umpellambi'i, nasuhum ussua Timotius lako Tesalonika aka la napenggissanni maaka amoim kamatappasanna, battu la tontä liupi matoto' battu la tä'um (1Tes. 3:1-2).

Sulena Timotius dio mai Tesalonika umbaba kaheba lako Paulus dio Korintus, tappa napapia inde suha' Paulus solai solana.

Dadi iam too inde uhuna suha'na Paulus natuli' mendadi pesasum anna pepakatoto' lako jumaa' dio Tesalonika. Tilalla' Paulus tappana uhhingngi kaheba diona kamatappasanna anna pa'kamasena jumaa' eta. Illaam

inde suha' napakilala oo sule diona pa'palakoanna Paulus indo si illaampi alla'-alla'na. Puhai natula' asam ia too, natula'um Paulus pentimba'na lako to Tesalonika diona kasuleanna Yesus Kristus ma'penduanna. Aka deem pekutanaanna to Tesalonika susinna naua: la maaka ia susi mesa to matappa' ke matem mane sulei Puang Yesus ma'penduanna, la mala haka untahima kasalamasam dio mai Puang Yesus? Anna pihampi la sule pole Yesus Kristus?

Dadi illaam inde suha', nanännä' Paulus anna mala sangngim matana liu mengkähä anna ponno pahhannuam muampai kasuleanna sule Puang Yesus.

Lesoanna issinna

1. Kada passu'bä' (1:1)

2. Tulasanna diona Paulus anna to Tesalonika (1:2-3:13)

a. Ma'kuhhu' sumanga' Paulus längäm olona Puang Allataala kahana pa'palakoanna anna kamatappasanna to Tesalonika (1:1-10)

b. Pengkähänganna Paulus dio Tesalonika (2:1-12)

c. Ma'kuhhu' sumanga' Paulus längäm olona Puang Allataala aka mala untahima kadanna Puang Allataala to Tesalonika (2:13-16)

d. Napemulu Paulus la umpessitai pole to Tesalonika (2:17-3:13)

3. Papanännä'na Paulus anna pepatuduanna lako to Tesalonika (4:1-5:24)

a. Nanännä' diona panggauam mapia la napomasannanna penabanna Puang Allataala (4:1-12)

b. Kasuleanna sule Puang Yesus (4:13-5:11)

c. Sanaka-naka kada pepakilalaam (5:12-24)

4. Kada pebubunna Paulus (5:25-28)

1 Inggannakoa' solasubungki jumaa' Tesalonika umma'na Puang

Allataala Ambeta anna Debatantaa' Yesus Kristus. Inde suha' buttu di kami', Paulus sola Silas^{‡‡} anna Timotius. Handandanni Puang Allataala untamba'koa' anna namana' kamasakkeam sola kamasannangam.

**Pa'palakoanna anna
kamatappasanna to Tesalonika**

1:2-10

²⁻³ Si kipa'sambajangam liukoa' anna ma'kuhhu' sumanga'kam längäm olona Puang Allataala Ambeta aka kikilalai umba susi pa'palakoammua' kahana kamatapassammua' lako Puang Yesus, anna pa'kamasemua' lako tau senga' napolalam ullämmä'koa' kalemu mengkähä umpamoloi, sola kamanontongammua' kahana pahhannuammua' lako Debatantaa' Yesus Kristus.

⁴ O solasubungki to nakamasei Puang Allataala, kiissammi kiuwa napileikoa' la mendadi umma'na.

⁵ Aka sola kakuasaanna Penaba Maseho kikalambi'ikoa' Kaheba Katilallasam taia tula' buttu di hupatau bäbä, anna kiissam si'da-si'da kiuwa mepomahannu aka mannassa. Anna muissanna' iko duka' kiaka susi tubo indo anna illaampakam alla'-alla'mua' umpa'kadua-duaikoa'.

⁶ Anna umbelanna' umpehapannikam anna umpa'sangka'i Debatanta Puang Yesus. Aka moi anna sitammukoa' kamapi'disam mabanda', sapo' tontä liukoa' untahima Kaheba Katilallasam sola ponno kakassiam aka pengkähänganna Penaba Maseho.

⁷ Lambi' napotandengammokoa' ingganna to matappa' illaam paluäna propinsi Akhaya anna Makedonia. ⁸ Aka indo kaheba diona Debatanta Puang Yesus mengkalao illaam alla'-alla'mua' samba lako kota senga', tä' illaam

mandi paluäna Makedonia anna Akhaya, sapo' ussamba duka' lako ongeam senga' molele-lele kaheba diona kamatapassammua' längäm Puang Allataala lambi' tä'um manggi' kitulasam diona kaha-kaha ia too. ⁹ Aka iaim ma'kale umpa'tulasangkam muakaa' susi untahimakam anna muakaa' teem untampeam debata lino, anna ullentem palibukoa' kalemu umpalako pengkähänganna Puang Allataala to tubo anna tungka ianna, ¹⁰ anna muampai kasuleanna sule Puang Yesus änä'na yabo mai suhuga to puha napatibangom dio mai alla'na to mate. Anu' Ia ullappasangkia' dio mai aha' kasallena Puang Allataala la melambi' ke dako'i.

**Pengkähänganna
Paulus dio Tesalonika**

2:1-16

2 Inggannakoa' solasubungku muissammia' muua tä' labu' kasuleangki tama alla'-alla'mua', aka malakoa' untahima Kaheba Katilallasam. ² Aka setonganna muissanna' duka' muua puhakam didahha anna dipakamase-mase dio Filipi yolona anna la kilambi'koa'. Moi anna mabanda' kisi'dim aka buda ullabaikam, sapo' malapakam bahani sule umpakahebaikoa' Kaheba Katilallasam aka napamoloikam Puang Allataala. ³ Aka indo kada penännä'ki tä'kanni sala tula', tä' toi lembe' illaam mai pattuju kadake anna tä' deem pattuju la mangkeloi. ⁴ Sapo' kitula' aka naangga'ungkam Puang Allataala la sihatam anna nahannuam umbebehkam Kaheba Katilallasam. Dadi kitula' tä' la umpatialaam inabanna hupatau sapo' la umpatialaam inabanna Puang Allataala to umpangngitai

^{‡‡}1:1 Basa Yunaninna *Silas*: Silwanus.

penabanna hupatau. ⁵Anna muissanna' duka' muua tä' mammapakam too la deem ma'lila manähä battu la illaam penabangi mohäe ma'pikki' kadake la umpohuginnaa'. Illaam kaha-kaha ia too Puang Allataala ussa'bii. ⁶Anna tä' mammi deem ma'palakokam aka kiua anna mala napujikam hupatau, susi ikoa' teem tau senga'. Moi anna kaha-kaha ia too sihatam duka' kitahima suhonakam Kristus. ⁷Sapo' anggangkam too ma'penaba mahamme' anna ma'lindo malute illaam alla'-alla'mua' umba susi mesa indo untahinana äinä'-änä'na. ⁸Susingkam too kahana pa'pakamjangki matim, nasuhum kibeengkoa' sola kakassiam Kaheba Katilallasam buttu yabo mai Puang Allataala. Tä' angga mandi ia too sapo' ahu'pakam duka' umbeho sakalebu salu katuboangki moi aka la dipogausangkam kahana kikamaseikoa'. ⁹Aka ungkilalai liupia' tia inggannakoa' solasubungku kiaka susi muasai pala'ki mengkähä allo bengi, aka kiua deem manii tau kisussai ke natahiaikanni indo anna mahassangkam ma'kadua-dua umpaissanikoa' Kaheba Katilallasam buttu yabo mai Puang Allataala.

¹⁰Tubo masehokam anna malolo, tä' deem sassaingki dio olomua' inggannakoa' to matappa' lako Kristus anna ussa'bii asanna' susi duka' Puang Allataala. ¹¹⁻¹²Muissanna' maaka susi pengngoloki matim si mesa-mesakoa' susi pengngolona mesa ambe lako äinä'na. Susingkam too duka' kinännä'koa' sola kipomatohoangkoa' penabammu anna kisasungangkoa' anna malakoa' tubo situhu' pa'elo'na Puang Allataala to untambaikoa' tama kapahentaanna anna kamatandeanna.

¹³Anna takattukam duka' ma'kuhhu' sumanga' längäm olona Puang Allataala anu' untahimangkoa' kadanna indo kibebehäm, tä' muangga'a' kadanna

to lino sapo' muangga'a' kadanna Puang Allataala, anna abana si'da hi tia kadanna indo si napopengkähä liu Puang Allataala illaam kalemua' to unkatappa'i Puang Yesus. ¹⁴Aka inggannakoa' solasubungku, umba susi indo puhaa' ussi'dim, susi siam too duka' indo puha nasi'dim ingganna jumaa'na Puang Allataala dio Yudea, petauanna Kristus Yesus. Indo kamasussaam ussi'dinna' napahuaikoa' solamu to Yahudi, susi siam too duka' nasi'dim ingganna jumaa'na Puang Allataala dio Yudea, to Yahudi siam duka' umpogau'i. ¹⁵Sangngim ia siam too indo puha umpatei Debatantaa' Puang Yesus sola ingganna nabi, anna ia siam duka' undahhakam. Anna tä' umbollim pa'elo'na Puang Allataala anna umpobali ingganna hupatau, ¹⁶aka nalabaikam umbebehäm Kaheba Katilallasam lako tau buda taianna to Yahudi anna mala salama'. Susim too indo ingganna to Yahudi umpa'hängäm-hängänni liu dosana lambi' lempam polem. Nasuhum nalambi'um pole' temo pesämbä'na Puang Allataala.

Napemulu Paulus la umpessitai pole to Tesalonika

2:17-3:13

¹⁷Sapo' mamalli' sugali'kam kami' matim inggannakoa' solasubungki, mengkalao indo dipasisähä' salakia' säpäi'. Dadi ma'kadua-dua liukam kipeä lalanna anna malai kipessitaikoa'. Moi anna sisähä'ia' bätä puntinta sapo' tontäkia' mesa lalam penaba.

¹⁸Aka balingkam ma'tamba la matim umpellambi'ikoa'. Aka Kao Paulus pesanaka amomä' umpeä lalam sapo' nalabaikam pengkähänganna tomahajanna setam. ¹⁹Aka ikoa' natisäke'i anna napotiala inabangki. Anu' dako'i too ke sulem Debatantaa' Puang Yesus anna sitingn-

gajongkia', iya ikonna' too tanda kapat-aloangki to la napokasalle penabangki. ²⁰ Abana ikonna' too la napokasalle penabangki anna naposadekem buaki.

3 Dadi anu' aka mamalli' sugali'ungkam, iya kikattu la tohhokam kami' duakam Silas dio Atena ² anna kisuai ia matim solasubunta Timotius. Aka iam too inde sababangangi sabua'na Puang Allataala umpa'pakahebaam Kaheba Katilallasam diona Kristus. Kisuai matim umpellambi'ikoa' anna mala napakatoto'koa' anna nanännä' la tontä liu matappa' lako Kristus ³ indana deengkoa'i manenne kamatappasammu kahana inde mai kamapi'disam. Aka muissanna' muua abana inna puha napa'tantu Puang Allataala la nahuakia' kaha-kaha ia too. ⁴ Aka si kitulasam siangkoa' indo anna solapakia' kiua la ullambi'kia' too kamapi'disam. Anna muissammia' muua abana tasi'dimmia' susi indo tula'ki. ⁵ Iam too anna kusuam Timotius matim aka tä' hapa' penabangku umpikki' maaka amo bäbäm susi kamatappasammua', aka malallam penabangku mase manii nahuakoa' pa'sändäsanna tomahajanna setam napolalam labu' bäbä kami' lupu' hesoki.

⁶ Sapo' mane sule mai Timotius natulasangkam kaheba mapia diona kamatappasammua' anna pa'kamasemua'. Natula' toi naua si ungilalai mapia liukam anna umpemulua' la silambi'kia', iya susi siangkam duka' kipemulu la silambi'kia'. ⁷ Napolalam inggannakoa' solasubungki, illaam kamapi'disam anna kamasusaangki tipakahangakam anna matoho sule penabangki aka kiissam kiua tontä liu kamatappasammua'. ⁸ Iya temo matohom sule penabangki ke manontom liuia' kapeimangammu lako Debata. ⁹ Tä' deem pada sakasalle pa'kuhhusam sumanga'ki längäm olona Puang Al-

lataala aka ussi'dingkam katilallasam dio olona kahana kapeimangammua'. ¹⁰ Allo bengi ma'sambajam liukam sola ponno penaba, kipelau umba ke malai silambi' polekia' anna kipatudu polepoko' indo la pahallunnapi anna mala tuttuam matoto' kamatappasammua'.

¹¹ La ma'kale hi too Puang Allataala Ambeta sola Debatantaa' Puang Yesus la umpasikambelakam ingganna to la melaba-labai anna malakam matim umpellambi'ikoa'. ¹² Anna kihannuam Debata la umpaponnoikoa' pa'kamase anna malakoa' tuttuam sikamase mesa sola mesa, anna susi duka' ma'kamase lako ingganna tau senga' susi kikamaseikoa'. ¹³ Maka' susi ia too, iya la napakatoto'a' penabammu Debata nasuhum tä' deem sassaimmu anna la masehokoa' dio olona Puang Allataala Ambeta ke sulem Debatantaa' Puang Yesus sola ingganna to masehona.

Panggauam mapia umpomasannam penabanna Puang Allataala

4:1-12

4 La sitahhu'na inggannakoa' solasubungki puhangkoa' kipanännä' anna kipaitai tandengam diaka susi tubo anna mala umpomasannam penabanna Puang Allataala. Moinna anna si umpateemmia' sapo' temo kipelau polepi matim anna kisasungangkoa' sola sanganna Debatantaa' Puang Yesus la tuttuam umpa'kadua-duai liua' kaha-kaha ia too. ² Aka muissammia' ingganna pepatuduam indo puham kitulasangkoa' illaam sanganna Debatantaa' Puang Yesus.

³ Aka situhu' pa'elo'na Puang Allataala la ma'gau' masehokoa'. Tä'koa' la si ullullu' pa'bannetauam. ⁴ Lako si mesa-mesa muane la unguasai kalena, la'bi-la'binna ke mandapo'um la pahallu tubo maseho solai bainena anna mala kesanga mapia lako padanna hupatau sola lako Puang Allataala. ⁵ Anu' tä'koa'

la untuhu'i kamohäeam sugali'mu susi to tama'Debata tä' untuhu'i Puang Allataala ⁶indana kasalaangkoa' anna umpa'tomaho-mahoikoa' solamu. Aka lako ingganna to ullullu' pa'bannetauam la nahua aha'na Debata, susi indo puha kitula' anna kipakaingasangkoa'. ⁷Aka tä'kia' natambai Puang Allataala la tubo ma'gau' sessu', sapo' la tubokia' illaam kamasehoam. ⁸Iam too anna menna-menna untumpu pala' inde pepatuduangki tä' untumpu pala' hupatau sapo' untumpu pala' Puang Allataala to umbeengkoa' Penaba Masehona.

⁹Tä'um manggi' kipailaam inde suha'ki la umba susi ungamaseikoa' ingganna solasubummu to matappa' aka balingkoa' napa'guhu Puang Allataala diaka susi ia too. ¹⁰Abana si ungamaseingkoa' ingganna solamu to matappa' illaam paluäna Makedonia. Sapo' moi anna susi kisasungam polepokoa', inggannakoa' solasubungki, anna mala tuttuam umpadelle'a' pa'kamasemu.

¹¹Peäia' lalanna la muakaa' susi anna malakoa' sangngim malino illaam katuboammu anna daa ullambannia' solamu. Anna la muasaikoa' pala'mu mengkähä umpeä katuboammu umba susi indo puha kipatuduangkoa'. ¹²Aka maka' umbelaa' ma'pateem, iya la napemapiaammokoa' too to tä' unkatappa'i Puang Yesus anna tä'ungkoa' la si uhhannuam liu pengkähäna solamu.

Kasuleanna sule Puang Yesus

4:13-18

¹³Anna mane deenni inggannakoa' solasubungki, tä' too mapia ke tä'ia' muis-sam manappa diona laonna to mate illaam Puang Yesus indana nababa sugali'koa' nabo inabammu susi tau senga' to tä' deem pahhannuanna. ¹⁴Aka takat-

appa'ia' taua Puang Yesus puha mate anna tubo sule, nasuhum takatappa'i toia' duka' taua Puang Allataala la umpatubo sule ingganna to mate to unkatappa'i Puang Yesus anna la naäkä' Puang Allataala längäm napasilambi' Puang Yesus. ¹⁵Diona kaha-kaha ia too, situhu' pepatuduam puha nabeengkam Debata kitulasangkoa' temo kiua: ing-gantaa' to tubo liupi inde lino sule lako kasuleanna Puang Yesus, inna tä' siakia' kita la umpendiolo'i to puham mate umpellambi'i Puang Yesus. ¹⁶Aka la ma'kale Puang Yesus tuhum yabo mai suhuga sola petamba kasalle anna kama-hanna pangngulunna malaika' anna la moni sangkaka'anna Puang Allataala. Nasuhum ingganna to matem to unkatappa'i Kristus la tubo sule yolo. ¹⁷Puhai too, iya kitaa' to tubo liupi inde lino la tiäkä' sola-sola indo to mate längäm gabum anna mala silambi'kia' Puang Yesus yabo lawwa. Lambi' la sola-solakia' Debata sule lako salako-lakona. ¹⁸Dadi iam too inde tula' la umpakea' si sipakahanga-hanga.

Kamajagaam la muampai kasuleanna sule Puang Yesus

5:1-11

5 Inggannakoa' solasubungki, tä'um manggi' kipailaangangkoa' inde suha'ki diona tungka wattunna la dadi inde kaha-kaha. ²Aka muissam manappaa' iko duka' muua allo kasuleanna Debatantaa' Puang Yesus la sihhapam kasuleanna to maboko ke bengii, tä' deem dibai-bai. ³Aka maka' ma'kada hupatau naua: "Mapi'dä' asam penaba anna malinnom tau," iya tappa sule säkä-säkä kasägängam sihhapam mesa baine ussi'dim säkä-säkä tambu'na la keänä'um. Anna tä' mala tala nahua asam to tä' matappa'.

⁴Sapo' ikoa'-iko inggannakoa' solasubungki, tä'koa' susi tau senga'

tubo illaam kamalillingam. Dadi maka' sulem allo ia too tä'koa' la tikkedu' susi tau to tikkedu' ke sule säkä-säkäi sihhapam kasuleanna to maboko. ⁵Aka ikoa'-iko sangngim to masiä' tubo illaam kamasiäsam. Taiakia' to malillim tubo illaam kamalillingam. ⁶Iam too anna tä'ungkia' kita la susi tau senga' si lembe angga' to mamma' ke bengii. Sapo' la majaga liukia' kita anna mainga', tä' la susi to mäbo'. ⁷Aka to si mamma', mamma' wattu bengi, anna to si umpamäbo' kalena, mäbo' wattu bengi. ⁸Sapo' aka sangngim to masiä'kia' kita, iya pahallukia' la unguasai kaleta. Anna unjagaikia' kaleta la umpa'babu' kaha kamatappasam anna pa'kamase. Anna la umpa'saludum pahhannuam la napasalama' Puang Yesus. ⁹Aka tä'kia' natuho Puang Allataala la nasämbä'i sapo' natuhokia' la namana' kasalamasam illaam Yesus Kristus Debatantaa'. ¹⁰Puang Yesus mate kahana napa'kadua-duaiangkia' kamapiaanta anna mala ke ma'pasulei dako' tontäkia' kita la napasola, battu la tubopakia' nalambi' battu la matengkia'. ¹¹Iam too anna la sipakilala-lalangkoa' anna sipakatoto' liu susi indo inna si umpogau'a.

Sanaka-naka kada pepakilalaam

5:12-28

¹²Anna mane deenni, kipelau matim inggammua' solasubungki, la umpa'kasalleia' to ullämmä' kalena mengkähä illaam alla'-alla'mua'. Tau ia too, ia umpatettekoa' illaam saluam ada'na Debata anna umpakilalako' indana umpogau'koa' kakadakeam. ¹³La muangga'a' anna umpa'kasallei si'da-si'da sitonda pa'kamase aka to maheso illaam alla'-alla'mua'. Anna la tontä liukoa' sipakamaja-maja anna sikamase mesa sola mesa.

¹⁴Anna kisuakoa' duka' kiua pa'kadai solamua' indo to busungam mengkähä anna pakahangai ia to masussa penaba. Pamoloi ia to malamma, anna la mahamme'koa' lako ingganna tau. ¹⁵Pengk-ilalaa' indana sipatumpu-tumpuikoa', sapo' peä liuia' lalanna anna ma'pogau' mapia liukoa' lako padammu mesa sola mesa, susi duka' lako tau senga'.

¹⁶La tontä liukoa' tilalla' illaam muoloi ingganna kaha-kaha. ¹⁷Anna ma'sambajam liukoa'. ¹⁸Pa'kuhhu' sumanga' liukoa' illaam ingganna kaha-kaha, aka iam too pa'elo'na Puang Allataala tama kalemua' anu' to tubokoa' silobum Kristus Yesus. ¹⁹Daa umpi'deanna' Penaba Maseho. ²⁰Daa umpa'basisii tula'na ke deenni to ma'tula' naua: "Umpalanda'ä' kada napalosaiannä' Debata." ²¹Sapo' paela'ia' umpahessa asam yolo anna untuhu'ia' mapianna. ²²Anna la umpasikambela liukoa' kalemu ingganna gau' kadake.

²³Puang Allataala too'na kamasakkeam sola kamasannangam, la Ia hi too umpadadikoa' to ponno kamasehoam. Anna mala susi penabammu, susi sungnga'mu, teem bätä puntimmu la tä' deem sassainna ke sulem Debatantaa' Yesus Kristus. ²⁴Puang Allataala to untambaikoa' la umpadadii kaha-kaha ia too aka Ia to dihannuam.

²⁵Inggannakoa' solasubungki, pa'sambajangam liukam kami'.

²⁶Palandasangkam salama' pa'pakamajangki lako ingganna solasubum illaam Puang Yesus.

²⁷Sola kuasa Debata kupelau punalaa' matim anna inde suha' la dibata nahingngi ingganna solasubuntaa' to matappa'.

²⁸Handandanni Debatanta Yesus Kristus untamba'koa' pada-pada.

Padam too.

Kapenduanna Suha'na Paulus lako Jumaa' dio Tesalonika

Bätäna issinna

Inde suha' natuli' Paulus napakatuum jumaa' dio Tesalonika. Wattu eta too buntä bäbäpi pikkihanna jumaa' dio Tesalonika umpikki' diona kasuleanna Puang Yesus kapenduanna, aka nasanga lambi'um wattunna. Naua Paulus sala punala ke ma'pikki' susii. Iam too napolalam anna natuli' polem inde suha' kapenduanna Paulus anna napakatui lako jumaa' dio Tesalonika, aka la napomakalesoam kaha-kaha ia too anna mala masiä' illaam penabannai, indana sikaputu bäbä liui ma'pikki', nasuhum kabeba penabanna. Anu' la napomakaleso Paulus naua ahena indo kasuleanna sule Puang Yesus kapenduanna la sondä' längäm langi' gau' kakadakeam illaam lino susinna: la deem tau umbahoi sanganna Puang Yesus, anna la deem kende' tau to handam kadake gau' la umbali Puang Yesus.

Nate'geham Paulus illaam inde suha'na lako ingganna to umbatai la mennumpu illaam kamatappasam matoto' lako Puang Yesus moi anna ussi'dim pi'di' muoloi katuboam. Anna nanännä' Paulus diona pahallu bassa' mengkähä umpeä katamaam bahokona, susi indo napogau' Paulus sola ingganna sababanganna. Anna la sangngim manontom anna tä' mali-malisam ma'gau' mapia.

Lesoanna issinna

1. Kada passu'bä' (1:1-2)

2. Pa'kuhhusam sumanga'na Paulus längäm olona Puang Allataala aka tuttuam unkatappa'i Puang Yesus anna tuttuam sikamase-mase to Tesalonika (1:3-12)

3. Pepa'guhuanna Paulus diona kasuleanna Puang Yesus ma'penduanna (2:1-12)

4. Ma'kuhhu' sumanga' Paulus längäm olona Puang Allataala kahana indo to matappa' napilei la napasalama' (2:13-17)

5. Pelauanna Paulus la napa'sambajangam to Tesalonika (3:1-5)

6. Pepakilalaam lako to busungam mengkähä (3:6-15)

7. Kada pebubunna Paulus (3:16-18)

1 Inggannakoa' solasubungki itim jumaa' Tesalonika umma'na Puang Allataala Ambeta anna Yesus Kristus Debatanta. Inde suha' buttu di kami', Paulus sola Silas[¶] anna Timotius.

²Handandanni Puang Allataala Ambeta sola Debatanta Yesus Kristus untamba'koa' anna namana' kamasakkeam sola kamasannangam.

Pa'kuhhusam sumanga' anna sambajam

1:3-12

³Pahallu kisi'dim la umbaba liukam pa'kuhhusam sumanga' längäm olona Puang Allataala kahana ikoa' inggannakoa' solasubungki. Anna sihatam kipateem aka tuttuam unkatappa'ikoa' Puang Yesus anna tuttuam sikamase-masekoa'. ⁴Iam too anna illaam si mesa-mesa jumaa'na Puang Allataala tä' deem pada satilalla'kam untula'i diona kamanontongammua' anna kamatappasammua' illaam pandahhaam anna pa'sändäsam indo umpassanna'.

⁵Indo to umpassangkoa' pandahhaam aka untuhu'ikoa' Puang Allataala naangga'koa' sihatam la tama kapahentaanna. Etam too naongei tandaam anna makaleso diua Puang

[¶]1:1 Silas: naua illaam basa Yunani, *Silwanus*.

Allataala uhhotto' ma'hupatau sola ponno kamaloloanna. ⁶Aka Puang Allataala la ma'palako situhu' kamaloloanna, nasuhum la umpabala'i pandahhaam lako ingganna to undahhako' ⁷anna la nalappasangkoa' iko dio mai ingganna kamapi'disammu susi duka' lako kami'. La napateemmi too ke diitam sule Debatantaa' Puang Yesus yabo mai suhuga illaam alla'na api ma'nala-nala sola buda malaika'na to napakuasa. ⁸Anna Debata la untahungkum to tä' naaku umpengngissanni Puang Allataala anna lako to moka untahima kaheba katilallasam diona Debatanta Puang Yesus. ⁹Tau ia too la natahungkum napasidinni pandahhaam mabanda' sule lako salako-lakona. La dihambai ia illaam mai pangkähäna kakuasaanna Debatanta Puang Yesus ¹⁰ke lambi'um allo kasuleanna la naongi napa'kasallei anna nakapilla'i to matappa', battu diua ingganna umma'na to puha napasähä'. Anna nakala'koa' duka' aka unkatappa'inna' indo puha kisa'bii illaam alla'-alla'mua'.

¹¹Iam too anna kipa'sambajangam liungkoa' umba ke malakoa' napesihatangam Puang Allataala Debatantaa' la disangai to puha natambai. La Puang Allataala hi too sola kakuasaanna la umpasule lako pattujummua' umpogau' kamapiaam anna umpasundum ingganna pa'palakoammua' indo puha umpogau' kahana kamatapassammua'. ¹²Susim too pa'sambajangki anna mala sanganna Debatanta Puang Yesus dipa'kasallei kahana ikoa', anna ikoa' duka' napa'kasallei Puang Yesus kahana pa'tamba'na Puang Allataala to tapenombai anna Debatanta Yesus Kristus.

Kakadakeam ahena kasuleanna Puang Yesus

2:1-12

2 Diona kasuleanna Debatantaa' Yesus Kristus ma'penduanna anna diona la dipatihempungkia' sola Puang Yesus, kipelau matim inggannakoa' solasubungki ²anna tä'koa' la masimpam bähä buntä pikkihammu anna tikkedu' ke deenni kaheba tatappa' diua lambi'um allo kasuleanna Puang Yesus ma'penduanna. Hapam ke deenni kaheba uhhingnia' mato-mato pa'palosainna Penaba Maseho, battu haka pa'tula'na tau, battu haka ussangaa' kami' untuli'i illaam suha'ki, tä'koa' la husa'. ³Moi la maaka susi tula'na tau daa ummaelo'a' la nababa bulim. Aka deem di tia aka-aka la dadi yolo mane sulei allo ia too, susinna: la buda to sahani umbahoi sanganna Puang Yesus anna la deem kende' mesa tau to handam kadake gau'. Indo tau ia too abana inna la napa'dei ia Debata, ⁴anu' la umbali ia ingganna to si napa'debatai anna to si napenombai hupatau anna ussanga kalena mayaboam puha ia anna la ingganna to dipa'debatai. Sulibanna ia too la tamapi Banua Debata anna tadongkonni naua: "Kaom too Puang Allataala."

⁵Tä'ungka' tiko ungililai indo anna sola-solapakia' bassa' kutulasangkoa' kaha-kaha ia too? ⁶Anna temo muissammia' indo to ullabai indo tau kadake, nasuhum muampaipi indo wattu napa'tantu Puang Allataala mane kende'i. ⁷Aka kakuasaanna indo to umpogau' kakadakeam napahandu'um ma'palako membuni anna tä'pi tandaam aka deempi ullabai. Sapo' maka' too diäläim indo to ullabai, ⁸iya etapi too pole' mane tandaanni indo tau kadake. Anna la nasimbuhu'i mandi

Puang Yesus anna matem; anna pangkähhäna mandi uhhuai ke sulem anna pa'dem. ⁹Aka pengkähänganna tomahajanna setam nasuhum indo tau kadake la sule sola kuasa kasalle lambi' umpadadi ingganna hupanna tanda memängä-mängä la umbaba bulim hupatau, ¹⁰anna ingganna hupanna kakadakeam la umbaba bulim indo to abana la dipa'dei, aka moka umpehingngii anna umpatama tambu' kaheba kamaloloam to la mala mepasalama'. ¹¹Iam too anna la napakendesammi Puang Allataala kuasa to mepabulim anna mala unkatappa'i indo tää'na tappa', ¹²nasuhum ingganna to tä' unkatappa'i kaheba kamaloloam sapo' napohäe leko' ia ke madosai, la nahua pa'tahungkungam.

Dipilei aka la dipasalama'

2:13-17

¹³Pahallu kisi'dim la umbaba liukam pa'kuhhusam sumanga' längäm olona Puang Allataala kahana ikoa' inggannakoa' solasubungki to nakamasei Debata, aka mengkalao diopi mai anna napileingkoa' la napasalama'. Napasalama'koa' umpolalam pengkähänganna Penaba Maseho ussehoikoa' anna umpolalam kamatappasammua' lako kamaloloam. ¹⁴Iam too pattujunna Puang Allataala anna natambaingkoa' umpolalam indo Kaheba Katilallasam puha kipakahebaiangkoa' anna malakoa' ussi'dim duka' kamatandeanna Debatantaa' Yesus Kristus. ¹⁵Iam too, inggannakoa' solasubungki, anna la tontä liungkoa' manontom illaam kapeimangammu anna la muanda'i manappaa' kada pepaondongam balim kipalandasangkoa', susi indo si kipengkadaanna teem indo kituli'na illaam suha'ki.

¹⁶Yesus Kristus Debatantaa' sola Puang Allataala Ambeta to ungamaseikia' anna namana'kia' pepakatoto' sule lako salako-lakona anna namana' tookia' pahhannuam mapia, ¹⁷la Ia hi too umpomatohoam liukoa' penabammu anna napakatoto', lambi' mala mapia liu susi gau'mua' teem tappaam pudu'mu.

Pelauanna Paulus la napa'sambajangam to Tesalonika

3:1-5

3 Sitahhu'na inggannakoa' solasubungki, pa'sambajangam liukanni anna mala kada Debata masimpam tiballa' kalua' anna dipa'kasallei susi puha dadi illaam alla'-alla'mua'. ²Anna la umpa'sambajangankam duka' umba ke malakam lappa' dio mai to si mesaha-saha inaba anna to kadake gau', aka tä' tau matappa' asam. ³Sapo' Debata to tahannuam la umpakatoto'koa' anna ungmambi'koa' muoloi indo Tau Kadake. ⁴Nabeengkam Debata kamatappasam, nasuhum kihannuam kiua si umpogau' liunna' anna tontä la umpalako indo puha kisuangkoa'.

⁵La ma'kale hi too Debata umpatetekoa' anna mala tontä liu muissanna' muua Puang Allataala ungamaseikia' anna la manontongkoa' duka' umba susi Kristus manontom.

Pepakilalaam lako to busungam mengkähä

3:6-15

⁶Inggannakoa' solasubungki kisuakoa' illaam sanganna Debatantaa' Yesus Kristus tä'koa' la siala penaba ingganna to si busungam mengkähä anna moka untuhu'i pepatuduam indo puha kipatuduangkoa'. ⁷Aka muissammia' la muaka susi pahallunna umpehappannikam. Anu' tä'kam kami

deem lembe mengkähä indo anna sola-solapakia'. ⁸Anna tä'kam deem si muande kinandena tau ke tä'i kibaja' yolo, sapo' muasaikam pala'ki mengkähä allo bengi aka kiua deengkoa' manii kisussai ke untahiaikanni. ⁹Indo kipateem tä' kiua tä' la sihatngkam ke kisuakoa' untahiaikam, sapo' kipateem anna mala umpehapannikam. ¹⁰Aka si kipahentaam siangkkoa' indo anna solapakia' kiua: "Lako to busungam mengkähä, tä' ia la dibeem kinande."

¹¹Ma'kada susikam inde aka kipelele deem illaam alla'-alla'mua' to busungam mengkähä. Indo tau tä' naaku mengkähä sapo' anggamm naissam kalamba-lamba bäbä lu lako lu dio mai ullambanni oloanna solana. ¹²Tau susi ia too kipakilala anna kisasungam sola sanganna Debatanta Yesus Kristus kiua: "La hapa' anna mengkabassa'i mengkähä anna mala deem ia duka' naala ikale kinande."

¹³Sapo' ikoa'-iko inggannakoa' solasubungki, daa ummali-malisanna' ma'gau' mapia.

¹⁴Maka' deem tau moka untuhu' tula'ki illaam inde suha', tahuno pedollo'ia', anna daa ussitappaa' tau ia too anna mala masihi'. ¹⁵Sapo' tä' la muangga'a' balimmu, ia hia la umpa'kadaia' muangga' susi solasubummu.

Kada pebubunna Paulus

3:16-18

¹⁶La ma'kale hi too Debatantaa' too'na kamasakkeam anna kamasannangam, la tontä liu ummana'koa' kamasakkeam anna kamasannangam illaam ingganna kaha-kaha. La naundu' dako' too anna naolaam Debata.

¹⁷Salama' buttu di kao, Paulus. Ma'kalem too pole' limangku untuli'i inde kada salama'ku. Aka iam too la mendadi tanda illaam si mesa-mesa suha'ku. Susim too inde pantuli'ku.

¹⁸Handandanni Debatanta Yesus Kristus untamba'koa'.
Padam too.

Uhuna Suha'na Paulus lako Timotius Bätäna issinna

Inde suha' natuli' Paulus napakatuum Timotius. Indo Timotius mesa to Sahani si tohho dio Asia Kecil. To Yunani ambena anna to Yahudi indona. Inde suha' natuli' Paulus anna napakatuumni Timotius mesa to mangnguhapi, sababanganna Paulus illaam pengkähänganna. Sanaka amom taunna naolaam Timotius umpasolai lelem Paulus illaam pa'laoanna lao umbebehama Kaheba Kati-lallasam (Suho 16:3; 17:14-15; 18:5; 19:22; 20:1-6).

Indo anna natuli'i Paulus inde suha', wattu eta too mahassam dio kota Efesus Timotius, anna Paulus ia dio propinsi Makedonia. Ia anna natuli'i inde suha' aka nasi'dim Paulus abana inna tä'pi la mala lako Efesus (3:14-15).

Illaam inde Uhuna Suha'na Paulus lako Timotius, tallu kaha-kaha too'na napomakaleso.

Uhu-uhuna pepakilalaanna lako kalena Timotius diona muoloi pepa'guhuam sala indo kende' illaam jumaa' (1:3-11; 4:1-5). Pepa'guhuam iam too napasigoe to umbaba kabiasaanna to Yahudi anna taianna to Yahudi situhu' pangkatappa'inna si naua nakumbäna langi' anna nahandena tana kadake asammi ingganna aka-aka, anna kasalamasam anggam mala dilambi' ke deenni diissam pa'issangam, anna manuhu' lako ingganna hettem kapeadasam susinna pemali siala, pemali muande kinande dipelahangam anna budapi senga'-senga'na. Paulus ussua Timotius la ullaham indo tau si umbaba pepa'guhuam sala.

Kamaduanna, pepa'guhuanna lako Timotius diona: pengngoloanna jumaa' umpalako kapenombaam (2:1-15),

pängngätosam illaam jumaa', anna to la mala mendadi to ma'kambi' anna to si mampamoloi illaam jumaa' (3:1-13, 5:3-16).

Anna katampasanna umpatudu Timotius umpalako babaanna untingngajo sanaka-naka lapi'na hupatau illaam jumaa' (5:3-6:2a) anna la naaka susi umpatandaam kalena mesa sabua' mapi-anna Yesus Kristus (6:11-21).

Lesoanna issinna

1. Kada salama'na Paulus lako Timotius (1:1-2)

2. Pepa'guhuam la mebaba bulim (1:3-11)

3. Pa'kuhhusam sumanga'na Paulus längäm Puang Allataala aka pa'kamasena lako kalena (1:12-17)

4. Babaam dipapassanniam Timotius (1:18-20)

5. Ätoham la napehhondoi issinna jumaa' (2:1-3:16)

6. La pengngolona Timotius lako to la mepabulim (4:1-16)

7. Pa'palakoanna to matappa' illaam jumaa' (5:1-6:2a)

8. Pepa'guhuam sala sola kamauliam anna kamatinnaam lako doi' (6:2b-10)

9. Kada penännä'na Paulus lako Timotius anna kada pebubum (6:11-21)

1 Inde suha' buttu di kao Paulus mesää' suhona Kristus Yesus, situhu' pahentana Puang Allataala To Mepasalama' sola Kristus Yesus To dihannuam.

²O Timotius to kuala änä' ikale kahana kamatapantasanta, handandanni Puang Allataala Ambeta anna Debatanta Kristus Yesus la untamba'ko anna nakamasei sola namana' kamasakkeam anna kamasannangam.

Pepa'guhuam la mebaba bulim

1:3-11

³Susi indo anna mengkalaoä' lako Makedonia kusuako kuua: la tohho li-

upoko itim Efesus anna mala ulla-ham indo deem sanaka-naka tau si umbaba pepa'guhuam sala ⁴aka indana anggam umpasatutu wattunna untula' toiolo-olo takeguna anna anggam ma'hendem nene liu bää. Aka iam indo tula'na si nasitimba'-timba'i hupatau umpalempäi pikkihanna tä' lu lako pattujunna Puang Allataala, indo talambi'unna' umpolalam kamatappas-anta. ⁵Aka pattujungku, inde pepakilalaam la mala umpakende' pa'kamase lemba' illaam mai penaba mahändä anna unä' penaba mapia sola ponno kamatappasam. ⁶Deem sanaka-naka tau tä'um untuhu'i dalam ia too, sapo' bulim ia lu lako pa'tula' takeguna. ⁷Tau ia too maelo' mendadi to ullatta' Pepaondonganna Musa, moi kela daa moi tula'na sola pepatuduam indo to nakatappa'i, tala naissanni napekalembasam.

⁸Taissammia' taua: mapia indo Pepaondonganna Musa ke dipalakoi umba susi la sipäto'na. ⁹Aka taissanna' duka' taua: ingganna kada pelahanganna Puang Allataala taia to malolo gau' dipadeengam, sapo' ia too dipadeem kahana la dipalulako ingganna to ma'gau' kadake susinna: to untekka pelahangam, to moka dipahe', to tä' umbollim Debata, to madosa, to tä' maseho, to tä' ma'debata, lu lako to umpatei ambena battu haka indona anna ingganna to papateam, ¹⁰to ullullu' pa'bannetauam, to si pangngula' kamohäeam sugali'na susinna muane mohäe lako samuanena anna baine mohäe lako sabainena, to umbalu' tau, to kaägä'-ägä', to bahani ma'pinda-pinda bää, anna ingganna to umpogau' kaha-kaha tasituhu'na pepa'guhuam mapia ¹¹indo sihondoinna Kaheba

Katilallasam buttu di Puang Allataala to handam matande anna too'na kamasannangam. Kaheba Katilallasam ia too nahannuammä' Puang Allataala umbebehanni.

Pa'kuhhusam sumanga' längäm olona Puang Allataala aka pa'kamasena

1:12-17

¹²Kubaba pa'kuhhusam sumanga' längäm olona Debatanta Kristus Yesus to umpakatoto'ä', aka naangga'ä' to mala dihannuam anna natuhoä' mendadi to mengkähäna, ¹³moi anna yolona mesää' to mantelle, to mandahha anna to mangkahha'i lako Kristus Yesus sola umma'na. Sapo' nakamaseiä' Puang Allataala aka balam takuissannapi, anu' eta too tä'pä' ungkatappa'i Puang Yesus. ¹⁴Anna sulibanna ia too natambumpä' mana' pa'kamasena Debatanta sola kamatappasam anna pa'kamase illaam Kristus Yesus. ¹⁵Anu' Kristus Yesus tama lino la umpasalama' to madosa. Iam too inde kada tadibala'i sihatam la ditahima ponno. Anna ingganna to madosa kao handam too'na. ¹⁶Moi anna kao handam madosa, sapo' eta hia naongi nakamaseiä' Puang Allataala anna mala umpa'patandaam kamahammesanna Kristus Yesus indo tä' deem kasuppisanna tama kaleku. Anna ia too napogau' Kristus Yesus tama kaleku, aka la napotandengam ingganna hupatau to la ungkatappa'i anna la untahima katuboam sule lako salako-lakona. ¹⁷Puang Allataala to mesa, to tadiita, anna la da'da' liu sule lako salako-lakona, tomahaja illaam ingganna wattu, dipa'kasallei anna dipuji sule lako salako-lakona. Abana inna la diua.^{§§}

§§1:17 *Abana inna la diua*: naua illaam basa Yunani *Amin*.

Babaam dipapassanniam Timotius

1:18-20

¹⁸⁻¹⁹O Timotius äinä'ku, ingganna inde pepakilalaam kupapassanniko, situhu' indo kada puha napa'palosaam Debata diona kalemu. Kada ia too la umpomatohoko anna malako manggeba manappa illaam pa'bundusam mapia sola kapeimangam manontom anna untuhu'i pattuju penaba mapiammu. Aka deemmi sanaka-naka tau tä' untuhu'i pattuju penaba mapianna, nasuhum tallam kapeimanganna, ²⁰susi duka' Himeneus sola Aleksander to balim kubeho tama pala' limanna tomahajanna setam anna mala magahhi' untelle Puang Allataala.

Diona umpa'sambajangam tau senga'

2:1-7

2 Dadi uhu-uhuna, kusua ingganna to matappa' la umpakende' pelauam, sambajam, sola ma'kuhhu' sumanga' anna umpa'sambajangam ingganna tau längäm Puang Allataala, ²susinna ingganna tomahaja sola ingganna to kasalle, anna malakia' tubo malino anna masannam umpalako pa'elo'na Debata anna gau' la sipäto'na dipogau'. ³Pa'palakoam ia too mapia anna napohäe Puang Allataala To umpasalama'kia', ⁴aka mohäe ke dipasalama' asanni ingganna hupatau anna muissam lalam kamaloloam. ⁵Aka anggam mesa Puang Allataala anna mesa to umpapaii alla'na Puang Allataala anna hupatau. Iam too Kristus Yesus to mentolino ⁶umbeho kalena ussolom ingganna ma'hupatau dio mai dosana. Susim too napa'patandaam pa'elo'na Puang Allataala illaam wattu puha napa'tantu. ⁷Kaha-kaha iam too nasuhum natuhomä' la

kao umpa'pakahebaanni, anna mendadi suhona anna tuangguhu to umpepa'guhuam kamatappasam anna kamaloloanna Puang Allataala lako tau taianna to Yahudi. Inde tula'ku kada tongam, tä' kuua bää.

Diona pallaoanna ingganna muane anna baine illaam pehumalasanna jumaa'

2:8-15

⁸Iam too anna kupelaum kuua umba-umba naongi muane ma'sambajam la muäkä' limanna sola kamasehoam penaba tä' la natimbinni aha' anna kasipengkaam.

⁹Susi duka' lako baine kupelau la makandeppa' ma'poheba tipandam anna mendiada'. Tä' manggi' dipopekanini' beluä' anna tä' pahallu ma'poheba bulabam anna umpake mutiara anna poheba masuli'. ¹⁰Sapo' la umpa'patandaam gau' mapianna, indo sipäto'na napogau' baine to unggalla' kalena menomba längäm Puang Allataala. ¹¹Pahallu la mengkamma' baine umpehingngii pepa'guhuam sola kamanuhusam. ¹²Tä' kupäbäi baine la ma'patudu battu haka la umpahe' muane, sapo' la pahallu mengkamma'. ¹³Aka uhu-uhuna Adam ditampa anna mane Hawa. ¹⁴Anna taia Adam natipu tomahajanna setam, sapo' baine hi tia nasuhum metobä tama dosa. ¹⁵Sapo' la dipasalama' duka' baine aka ia undadiah äinä'-änä' ke tontä liui matappa', ma'kamase, tubo maseho anna ma'pogau' la sihatanna dipogau'.

Diona to la mala dituhu mendadi to ma'kambi' illaam jumaa'

3:1-7

3 Iam too inde kada tadibala'i naua: Menna-menna umpemului la men-

dadi to ma'kambi* illaam jumaa', tau ia too umpemulu pengkähängam mapia. ²To ma'kambi' pahallu la tä' deem nahua pambasa'-basa' penaba, anggam mesa bainena, to la mala unguasai kalena, matänä' penaba, to meada', untahima manappa tosabe, manähä umbaba pepa'guhuam, ³tä' si umpamäbo' kalena, taia to si bassa' patappaam lima, sapo' la ma'penaba mahamme' anna si umpeä liu kasiolaam, tä' mailu sugali' lako doi'. ⁴La pahallu to palumbängam mapia illaam dapo'na, la napengkahea'i anna napa'kasallei ingganna änä'na. ⁵Aka mesa tau to tä' mapia pallumbäinna illaam dapo'na, la maakam ia susi la ullumbäi anna untähänä' jumaa'na Puang Allataala? ⁶To mane mangngaku tä' mala la dituhu mendadi to ma'kambi' illaam jumaa', indana malangka' penabai, nasuhum nahua pa'tahungkungam susi tomahajanna setam. ⁷Pahallu kesanga mapia lako to sulibam. Aka maka' tä' susi, la natula'-tula' tau, napolalam naala pa'pemäläanna tomahajanna setam.

Diona to la mala dituhu mendadi to umpamoloi to masussa illaam jumaa'

3:8-13

⁸Susi duka' to si umpamoloi to masussa illaam jumaa',[†] pahallu to kesanga mapia, tä' ma'dua tambu', taia to pa'anggur, anna to tä' mailu anna matinna. ⁹Anna sola penaba mahändä la muanda'i liu pepa'guhuam diona lalam kapeimanganna to matappa' to puha napa'paitaam Puang Allataala. ¹⁰Anna la pahallupi dipetua' manappa yolo pa'palakoanna. Maka' too tä' si'da-sia deem sassainna, iya malam too pole' dituhu la mampamoloi illaam jumaa'.

¹¹Susi siam duka' lako bainena la pahallu to kesanga mapia, taia to si untula'-tula' solana, to mala unguasai kalena anna mala dihannuam illaam ingganna kaha-kaha.

¹²To si mampamoloi illaam jumaa' pahallu la anggam mesa bainena anna to palumbängam mapia illaam panda-posanna anna muäto' manappa änä'na. ¹³Anna maka' nabela umpalako manappa babaanna illaam jumaa', iya la dipa'kasallei anna tuttuam bahanii anna tä' malaja' umpa'patandaam kamatap-pasanna lako Kristus Yesus.

**Jumaa'na Puang Allataala
longkakhinna anna andihi
matoto'na kamaloloam**

3:14-16

¹⁴Moi anna maelo' siamä' la bale' matim umpellambi'iko, sapo' kupakatu siangko inde suha' ¹⁵anna mala maka' maela' dä' sule matim, iya la muissammi ma'palako umba susi la pahallunna dipogau' situhu' gau'na änä'na Puang Allataala battu diua umma'na Puang Allataala to tubo. To matappa' iam too mendadi longkakhinna anna andihi matoto'na kaheba kamaloloanna Puang Allataala. ¹⁶Tä' mala dibahoi maaka susi kamatandeanna pepatuduam diona tubo illaam kamanuhusam lako Puang Allataala susinna:

Umpa'paitaam kalena Kristus Yesus mentolino,

anna natappasam Penaba Maseho ingganna pa'palakoanna, naita toi ingganna malaika'.

Dipa'pakahebaam lako tau to tä' muis-sam Puang Allataala,

*3:1 to ma'kambi': naua illaam basa Indonesia *penatua*.

†3:8 to si umpamoloi to masussa illaam jumaa': naua illaam basa Indonesia: *diaken* battu diua *samas*.

dikatappa'i illaam inde lino, anna pangkähä diäkä' längäm ongeam kamatandeam.

**La penggolona Timotius
lako to la mepabulim**

4:1-16

4 Makaleso napengkadaam Penaba Maseho naua: “Dako'i too, la deem piha to Sahani umbahoi sanganna Kristus Yesus anna la manuhu' lako debata lino to mebaba bulim anna la untuhu'i pepatuduanna setam.”

²Pepatuduam ia too buttu dio mai to ma'dua tambu' to anggam ma'lila manähä. Anna tau ia too pi'dem ia unä' penaba mapianna nasuhum tä'um naissam nase'la mapia anna kadake. ³Sampe ullaham tau siala anna deem duka' kinande napelahangam la diande. Moi anna kinande ia too napadadi Puang Allataala anna malai sola pa'kuhhusam sumanga' naande to matappa' to muissammi kamaloloam. ⁴Aka mapia asam ingganna pa'padadinna Puang Allataala anna tä' deem la pemali diande, assala'na ditahima sola pa'kuhhusam sumanga' längäm Puang Allataala. ⁵Aka kinande ia too la mala naande tau aka puha nasehoi Battakadanna Puang Allataala anna sambajam.

⁶Maka' umpa'patuduam ingganna kaha-kaha ia too lako ingganna solasubummu to matappa', la mendadiko to mengkähä mapianna Kristus Yesus, aka kada Debata to takatappa'i sibabako lobo' sola pepatuduam mapia indo si untuhu'i. ⁷Sapo' pasikambelai kalemu toiolo-olo takeguna anna tää'na situhu' pa'elo'na Debata. Anna la umpakabiasa liu kalemu umpa'kadua-duai pa'elo'na Debata. ⁸Aka umpa'kadua-duai kamatohoam bätä punti saidi' gunana, sapo' maka' umpakatoto'ki' penabanta

manuhu' lako Debata, keguna ia illaam ingganna kaha-kaha, aka la umbaba pa'tamba' illaam katuboam mengkalao temo anna illaam allo ma'katampasanna. ⁹Iam too inde kada tadibala'i, sihatam la ditahima ponno. ¹⁰Iam too anna muasaingki' pala'ta mengkähä, anu' mahannuki' lako Puang Allataala to tubo anna to umpasalama' ma'hupatau, la'bi-la'binna lako ingganna to matappa'.

¹¹Patudui tau ingganna kaha-kaha ia too anna ussuai natuhu'i. ¹²Tä' la umpäbäi tau la napa'basisiiko aka mangnuhapoko, sapo' la umpengngängkinniko gau'mu anna mala napehapanni ingganna to matappa' kadammu, panggauammu, pa'kamasemu, kamatappasammu, anna kamasehoammu. ¹³Ahena suleä' matim, pesatutui umbata Battakada Debata dio olona tau buda anna ussasunni sola umpatudu. ¹⁴Tä'ko la monda umpalako indo pa'mana' di ada' illaam kalemu indo nabeengko Penaba Maseho umpolalam kada puha napa'palosaam Debata diona kalemu sola indo napakumbäiko pala'na pebaba ada'.

¹⁵Ingganna ia too la umpa'kadua-duai liu anna mala tuttuam mapia pa'palakoammu naita ingganna tau. ¹⁶Jagaiko kedomu anna ingganna indo umpepatuduam. Ingganna ia too la manontongko umpalakoi. Aka maka' umpateem lium, iya mengkalao kalemu la salama' sule lako ingganna to umpehinggiiko.

**Pa'palakoanna to
matappa' illaam juma'**

5:1-6:2

5 Daa umpa'kada makahha' lako muane to matuam, sapo' la umpakilala hia sihhapam ambemu. Oloi ingganna to mangnuha muane umba susi lako solasubummu, ²anna baine to

matuam la umpasusi indomu. Susi toi to mangnuha baine la umpasusi siam änä' dahammu sola penaba sambulo-bulo.

³Pa'kasallei anna umpamoloiko to balu-balu baine,[‡] to tä' deem umpamoloi. ⁴Sapo' mesa to balu-balu baine, ke deenni änä'na haka ampona haka, uhu-uhuna la pahallu indo änä'na sola ampona me'guhu umpa'paitaam pa'pakamajanna anna pa'pakasallena lako sahapunna, umba susi la sipäto'na napogau' mesa to matappa'. Aka la umbala'i penaba mapianna anna hojana tomatuanna sola nenena. Anu' pa'palakoam ia too napohäe Puang Allataala. ⁵Mesa to balu-balu baine si'da-sia ke mesa-mesanna mandam, anggam Puang Allataala nahannuam anna allo bengi tontä liu ma'sambajam anna melau längäm Puang Allataala. ⁶Sapo' to balu-balu baine indo anggam kamasannangam kalena napa'kadua-duai, moi anna tubopi bätä puntinna sapo' setonganna matem ia sungnga'na. ⁷La umbeem pepakilalaam ia too anna mala tä' nahua pambasa'-basa' penaba. ⁸Sapo' maka' deem to matappa' tä' ungasahaam kasahapuanna la'bi-la'binna ke solanai lako sali, tau ia too umpesi' kamatappasanna. La kadake puha ia tau ia too anna to tamatappa'.

⁹To mala dihekem to balu-balu baine, anggam to annam pulom taunna längäm anna anggam pissam kemuane, ¹⁰anna tandaam si umpogau' panggauam mapia susinna: si umpaliaha manappa änä'na, untahima manappa tosabe, umbaseiam bitti'na solana to matappa',^f umpamoloi to masussa, anna umpasatutu penabanna lako ingganna panggauam mapia.

¹¹Sapo' to balu-balu baine ke mangnuhapi, tä' ia la uhhekenna' to balu-balu baine la napamoloi jumaa'. Aka maka' kende'um kamohäeanna lako muane, talom ia kamanontonganna lako Kristus aka maelo'um la kemuane pole, ¹²nasuhum dihekemmi to kasalaam, aka tä' nabela umpasule lako indo puha nadandi la umpasatutu penabanna lako Kristus. ¹³Anna mane deenni, umpakabiasa kalena busungam mengkähä, anggam ullelei banuanna solana. Anna tä' anggam ia too, sapo' si untula'tula'pi duka' solana anna kalamba-lamba bää lu lako lu dio mai, ullambanni oloanna solana anna ma'kada bu'busam. ¹⁴Iam too anna kupelaum lako to balu-balu baine to mangnuhapi la kemuane pole, keänä', anna ullumbäi manappa dapo'na, indana deenni napolalam balinta natunaikia'. ¹⁵Aka deemmi to balu-balu baine bulim untuhu'i tomahajanna setam. ¹⁶Maka' deem baine [battu haka muane] to matappa' sipohapu mesa to balu-balu baine, la pahallu ma'kale umpamoloi indana umbanda'i jumaa'. Anna mala indo to balu-balu baine to tä' deem sahapunna umpamoloi, napamoloi ia jumaa'.

¹⁷Pebaba ada' to palumbängam mapia illaam jumaa', sihatam dibala'iam lupu' hesona tiluppi' dua, la'bi-la'binna indo to ullämmä' kalena umpomakaleso anna umpepa'guhuam Battakada Debata. ¹⁸Aka tisuha' illaam Battakada Debata naua: "Daa ungsambu pudu'na sapim mahassam mengkähä," anna nauapi: "Mesa to mengkähä sihatam la disahoi."[§] ¹⁹Daa umpehingngii ke deenni to patanda' lako mesa pebaba ada', ke tä'i deem sa'binna, dua haka

[‡]5:3 to balu-balu baine: indo to balu-balu baine ditula' illaam inde 5:3-16, indo to matem muanena diuam.

^f5:10 umbaseiam bitti'na solana to matappa': Eta too si dibaseiam bitti'na tosabe.

[§]5:18 Pass. 25:4.

tau tallu haka. ²⁰Sapo' maka' tappa' umpogau' dosa la ditappakadai dio olona tau buda anna mala mahea' to uhhingngii.

²¹Dio olona Puang Allataala anna Kristus Yesus sola ingganna malaika'na to napilei kupakahi'di si'da-si'dako la untuhu'i pepakilalaam ia too, anna tä' la deem pambasa'-basa' penabammu lako moi menna anna tä'ko la si mangngalaangam.

²²Daa si umpasihha' gau' madomi' sugali' umpakumbäi pala' lako mesa to la dilanti' ada', aka la unjagai indana nalambanniko dosana. Anu' la unjagai liuko kamasehoammu.

²³⁻²⁵Aka deem tau piha tä'pi dipahessa anna lampa'-lampa'um diita dosana, sapo' deem tau dipahessapi yolo mane diissanni dosana. Susi duka' panggauam mapianna lampa'-lampa' diita. Anna indo tää'na lampa'-lampa' diita pisam wattu la tandaam.

(Tä' la si anggam uwai händä bäbä muihu' liu sapo' la si muihu'ko duka' anggur saidi' anna mala napapiai illaam tambu'mu aka si bassa'ko masaki.)

6 Ingganna sabua' la muangga' puäna sihatam napa'kasallei, indana deenni napolalam tau untelle sanganna Puang Allataala sola pepatuduanta. ²Mesa sabua' ke matappa'um puäna, tä' la napolalam ia too umpa'basisii puäna la naua: "Sipadaammakam aka solasubummakam illaam Kristus Yesus." Sapo' pahallu hia la tuttuam bassa' umpamoloi puäna. Aka indo puäna napamoloi padanna siam to matappa' anna napakamaja.

**Pepa'guhuam sala sola kamailuam
anna kaminnaam lako doi'**

6:2-10

La umpopepatuduam anna umpopassasum ingganna inde pepa'guhuam. ³Maka' deem tau si

umbaba pepa'guhuam sala anna tä'i untuhu' pepa'guhuam diona kamanuhusam lako Debata indo nabeengkia' Debatanta Yesus Kristus, ⁴tau ia too malangka' penaba anna tä' deem aka naissam. Sapo' maelo' umpogau' tää'na sihatam la dipogau' susinna sitimba'-timba' liu anna ussipengka-pengkai liu tula', nasuhum umpakende' penaba pa'kembuhuum, passikallaam, pantelle, pambasa'-basa' kadake illaam penaba, ⁵anna tä' deem kattunna dadi kasipengka-pengkaam illaam alla'-alla'na to ma'pikki' kadake anna to pa'de kamaloloam illaam kalena, anna to sala päham naua: "Kamanuhusam lako Puang Allataala eta la diongei ullolongam katomakakaam."

⁶Sapo' abana hongko' kasalle dilolongam ke manuhu'ki' lako Puang Allataala anna taissam untilalla'i indo pada taampuam. ⁷Aka tä' deem aka-aka tababa tama inde lino, iya tä' duka' deem aka-aka la mala tababa umpellei inde lino! ⁸Anna la tatilalla'im, ke deemmi kinandeta sola pohebata. ⁹Sapo' lako to maelo' to makaka, mehonno' ia tama pa'sändäsam anna naala pa'pemäläanna ma'hupa-hupa kamailuam takeguna anna mekadakei la untallangam ma'hupatau tama kasägängam anna katilakaam. ¹⁰Aka mailu anna matinna lako doi' kabuttuanna ingganna hupanna kakadakeam. Deemmi sanaka-naka tau umpellei lalam kamatappasam aka umpa'kadua-duai sugali' doi', nasuhum umpi'di' kalena aka ullambi' buda kamasussaam.

**Kada penännä'na Paulus lako
Timotius anna kada pebubum**

6:11-21

¹¹Sapo' iko-iko, umma'nako Puang Allataala. Dadi la muäläiko lao kalemu

ungkambela ingganna kaha-kaha ia too anna muula'ko kamaloloam penaba, kamanuhusam lako Debata, kamatappasam, pa'kamase, kamanontongam, anna kamahammesam penaba. ¹²Pa'kadua-dua liuko anna malako tubo umba susi to untuhu'im Kristus. Anda'i manappai indo katuboam sule lako salako-lakona. Aka iam too anna natuhongko Puang Allataala indo anna manggakuko sola penaba mahändä nasa'bii tau buda. ¹³Dio olona Puang Allataala to umpenabai ingganna aka-aka anna Kristus Yesus to untula' pangngakuam mahändä dio olona Pontius Pilatus, kusuako: ¹⁴Ia untuhu'i liu inde pahenta sola mahändä penaba anna sambulo-bulo, indana nahuako pambasa'-basa' penaba, sule lako allo la naongi umpa'patandaam sule kalena Debatanta Yesus Kristus. ¹⁵Indo kasuleanna sule la napadadi illaam wattu puha napatantu Puang Allataala too'na kamasannangam anna To anggam Ia muanda'i kakuasaam; Tomahajanna ingganna tomahaja, anna To napepuäi ingganna puä, ¹⁶anggam Ia la da'da' liu sule lako salako-lakona. Tadongkom sola pangkähhäna anna moi menna tala nasahai naempe'-empe'. Tuli tadeempi moi podo la mesa

tau muitai anna abana tä' deem la mala diita. Anggam Ia kuasa anna dipa'kasallei sule lako salako-lakona. Abana inna la diua.

¹⁷Lako ingganna to siampuum katomakakaam lino la umbeem pepakilalaam indana nababa malangka' penabai indo kullena anna la ia nahannuam aka ia too tä' la da'da' liu. Sapo' la mahannu lako Puang Allataala to untabungkia' ingganna-ingganna sia anna mala tasi'dim mammi'na. ¹⁸La umpakilala duka' anna umpogau' liui kamapiaam, anna iai natomakakai, la ma'penaba matutu anna bassa' ma'pebeem. ¹⁹Anna maka' napateem, la etam too naongi uhhempum kulle mapia la mendadi pennumpuum matoto'na illaam allo ma'katampasanna anna mala ullambi' katuboam si'da-sia.

²⁰O Timotius, kambi' manappai indo puha dipapassanniango. Pasikambelai kalemu tula' takeguna tää'na situhu' pa'elo'na Debata sola tä'ko la si sitelä tau diona pepatuduam sala indo si naägä'i naua mesa kamanähängam. ²¹Aka deemmi tau muuai: "Kianda'i kamanähängam ia too," nasuhum umpellei lalam kamatappasam.

Handandanni Debata untamba'koa'.
Padam too.

Kapenduanna Suha'na Paulus lako Timotius

Bätäna issinna

Inde suha' natuli' Paulus napakatuum Timotius. Indo Timotius mesa to Sahani to mangguha dio Asia Kecil. Ambena Timotius to Yunani anna indona to Yahudi. Sanaka amom taunna naolaam Timotius umpasolai lelem Paulus illaam pa'laoanna lao umbebeham Kaheba Katilallasam (Suho 16:3; 17:14-15; 18:5; 19:22; 20:1-6). Indo anna natuli'i Paulus inde suha', wattu eta too mahasam ia dio kota Efesus Timotius.

Illaam inde Kapenduanna suha'na Paulus lako Timotius buda-buda penännä'na lu lako Timotius. Too'na inde suha' naua: La manontom Timotius illaam kamanuhusam. Timotius nanännä' anna nagaha' anna mala tontä liu umpa'pakahebaam Kaheba Katilallasam diona Debatanta Yesus Kristus anna la muanda'i liu Battakada Debata moi anna ussi'dim pandahhaam.

Dipakilala duka' Timotius diona la umpasikambela kalena kasipengkaam anna tula' takeguna tää'na situhu' pa'elo'na Debata aka anggam umbaba bulim hupatau to uhhingii.

Illaam ingganna kaha-kaha ia too dipakilala Timotius la untuhu'i asam pa'palakoanna Paulus susinna: pepa'guhuanna, pattuju penabanna, kapeimanganna, kamahammesanna, pa'kamasena, anna kamanontonganna.

Lesoanna issinna

1. Kada passu'bö' (1:1-2)

2. Pa'kuhhusam sumanga' anna pepanännä' (1:3-2:26)

a. Pa'kuhhusam sumanga'na Paulus längäm Puang Allataala diona Timotius (1:3-5)

b. Peapanännä'na Paulus lako Timotius anna mala tontä liu manontom

umpalako indo pengkähängam nabeem Puang Allataala (1:6-18)

c. To manontom umpendudum kamadahhaam la ullambi' kapataloam (2:1-13)

d. La sihatanna napogau' to mengkähä mapianna Puang Allataala (2:14-26)

3. Pepakahi'dinna Paulus diona allo di dako'na (3:1-4:8)

a. Pa'palakoanna hupatau illaam la kassuppisanna lino (3:1-9)

b. Battakada Debata pahallu la dianda'i liu moi illaam tau pandahhaam (3:10-17)

c. Ingganna oloanna Timotius la nakähä asam (4:1-8)

4. Katampasanna kada penännä'na Paulus lako Timotius (4:9-18)

5. Kada pebubunna Paulus (4:19-22)

1 Inde suha' buttu di kao Paulus situhu' pa'elo'na Puang Allataala anna malaä' umpa'pakahebaam pa'dandiam diona katuboam illaam Kristus Yesus.

²O Timotius, sihhapangko änä' ikaleku to kupakamaja, la tontä liu hako too natamba' anna nakamasei Ambeta Puang Allataala anna Debatanta Kristus Yesus sola namana' kamasakkeam sola kamasannangam.

Pa'kuhhusam sumanga' anna pepanännä' illaam kamanontongam

1:3-18

³Ma'sambajam oä' too kupa'sambajangam ongko anna ma'kuhhu' sumanga'ä' längäm Puang Allataala to kupenombai sola penaba mahändä, aka kusi'dim tä' deem sassaingku dio olona, umba susi indo si napogau' to kuponene. Anna kupa'sambajangam liuko allo anna bengi. ⁴Anna kukilalai sahhomu indo anna sisähä'ki', nasuhum kupemulu kela malaki' silambi' sule anna malaä' ponno katilallasam.

⁵Kukilalai kamatappasammu susi indo kamatappasanna nenemu Lois anna indomu Eunike. Kamatappasam ia too mengkalao illaam penaba mahändä lambi' ungedoam. Anna kukatappa'i duka' deem kamatappasam susi illaam kalemu. ⁶Iam too anna kupakilalangko la tuttuam bassa'ko umpalako indo pengkähängam nabeengko Puang Allataala indo anna kupakumbäiko pala'. ⁷Aka indo Penaba Maseho nabeengki' Puang Allataala tä'ki' la nababai mahea', sapo' la napadadiki' to matoto', to ma'kamase, anna unguasai kaleta.

⁸Dadi daa ummasihi' mendadi sa'bi diona Kristus Yesus Debatanta. Anna tä' toi la umpa'kasihisannä' moinna anna ditahungkunnä' kahana untuhu'ia' Kristus Yesus. La pahalluko ussi'dim duka' pandahhaam kahana umpa'pakahebaangko Kaheba Katilallasam. Anna Puang Allataala la umbeengko kamatohoam anna mala umbela muoloi pandahhaam ia too. ⁹Ia toi umpasalama'ki' anna umpasähä'ki' mendadi umma'na to maseho. Taia kahana pa'palakoanta nasuhum napateem, sapo' situhu' pattuju kalena anna mana' pa'kamasena. Nabeengki' mana' pa'kamase ia too umpolalam Kristus Yesus mengkalao diopi mai anna tä'pi dadi lino, ¹⁰anna temo dipa'paitaammi illaam kasuleanna Kristus Yesus To umpasalama'kia' to umpa'dei kuasa kamateam anna umbaba Kaheba Katilallasam diona katuboam sule lako salako-lakona. ¹¹Anna natuhomä' Puang Allataala anna mala umpa'pakahebaannä' Kaheba Katilallasam ia too anna mendadiä' suhona anna tuanguhu. ¹²Iam too anna nalambi'mä' inde pandahhaam.

Sapo' tä'ä' masihi', aka kuissam kuua Kristus Yesus to kuhannuam anna kukatappa'i kuua nabela najagai indo puha napapassanniannä'** sule lako allo ma'katampasanna.

¹³La umpaillaam tambu' anna umpotandengam ke ma'pa'guhuko ingganna pepatuduam mapia indo puha kutulasangko. Anna umpalako'i sola kamatappasam anna pa'kamase illaam Kristus Yesus. ¹⁴Sola panto'lonnina Penaba Maseho to tohho illaam kaleta, la unjagai manappa indo kulle di ada' puha napa'manasam Puang Allataala indo umpa'pakahebaam.

¹⁵Muissam muua napellei asannä' ingganna tau illaam propinsi Asia. Susi duka' Figelus anna Hermogenes. ¹⁶Debata hi too la ungamasei sahapunna Onesiforus, aka si bassa' napatialannä' inabangku anu' tä' si masihi' umpellambi'ia' illaam tahungkum. ¹⁷Sapo' sulena inde Roma tappa le'ba' napa'peä-peä' sampe nalambi'ä'. ¹⁸Anna ungalaso maaka susi nabalii si'da-si'daä' illaam pengkähängangku itim Efesus. Debata ham ungamasei Onesiforus ke sulem illaam allo kasuleanna la umpopa'tadongkongam hupatau.

**To manontom umpassam
kamadahhaam la
ullambi' kapataloam**

2:1-13

2O änä'ku, iam too kasuhunganna anna la umpomatoto'ungko penabammu umpolalam mana' pa'kamasena talambi' illaam Kristus Yesus. ²Anna ingganna pepa'guhuan indo puha kutulasangko nasa'bii tau buda, la umpapassanni lako muane to la mala dihanuam umpatudu tau senga'. ³La

**1:12 indo puha napapassanniannä': mala duka' kalembasanna, indo puha kubeho lako kalena.

umpendudungko duka' kamadahhaam susi mesa sohodadunna Kristus Yesus to si manuhu'. ⁴Mesa sohodadu mahasam umpalako pengkähängam dipapasanniam tä' si umpikki' kähängam senga' anna mala tiala inabanna punggabana. ⁵Susi siam duka' mesa to illaam passitendeam, tä' mala ullambi' songko' kapataloam ke tä'i untuhu'i si'da-si'da indo la sipäto'na la dipogau' illaam passitendeam. ⁶Mesa to unghähä litä' ke muasai pala'na mengkähä, pahallu ia siam duka' yolo muala bua pengkähäna. ⁷Paillaam penabai ingganna tula'ku, aka Debata la umpomasiäsangko illaam pikkihammu ingganna inde kaha-kaha.

⁸Pengkilalai Yesus Kristus to puha dipatibangom dio mai alla'na to mate, pessubunna Daud. Iam too Kaheba Katilallasam kupalambi'. ⁹Aka indom too umpa'pakahebaannä' Kaheba Katilallasam nasuhum nalambi'ä' kamapi'disam, la'bi-la'binna disäke'ä' susi tau kadake. Sapo' Battakadanna Puang Allataala tä' ia mala disäke'. ¹⁰Iam too anna sa'baha'mä' illaam ingganna inde kaha-kaha kusi'dim aka kuua anna mala indo to napilei Puang Allataala ullambi' ia duka' kasalamasam illaam Kristus Yesus sola kamatandeam kakuasaanna sule lako salako-lakona.

¹¹Iam too inde kada tadibala'i naua: Maka' matengkia' sola Kristus Yesus, iya la tubokia' duka' sola Kristus.

¹²Maka' manontongkia' illaam kapeimanganta, iya la malakia' ma'pahenta sola Kristus Yesus.

Maka' umbahoikia' Kristus Yesus, la nabahoikia' duka'.

¹³Maka' tä'kia' manontom illaam kamanuhusam,

la tontä liu Ia manontom, aka tä' Ia mala tala umponnoi pa'dandianna.

La sihatanna napogau' to mengkähä mapianna Puang Allataala

2:14-26

¹⁴Pa'pakilalaam liui ingganna inde kaha-kaha lako jumaa'. Pakainga'io dio olona Puang Allataala indana ussipengka-pengkai liui tula'. Aka tä' keguna anna anggam umbaba bulim to umpehingngii. ¹⁵Peäi lalanna anna iannapi anna ia la umpepa'guhuam indo kaheba kamaloloam buttu yabo mai Puang Allataala anna mala naangga'ko mesa to mengkähä mapianna, tala masihi' dio olona. ¹⁶Pasikambelai kalemu tula' takeguna anna tää'na situhu' pa'elo'na Debata, aka tula' ia too tuttuam umpakende' mandi gau' tala situhu'na pa'elo'na Puang Allataala. ¹⁷Indo tula' ia too paleleam sihhapam saki kahha'. Anna indo to si umpepa'guhuanni mentamam duka' Himeneus anna Filetus. ¹⁸Anna inde to dua umpelleim ia lalam kamaloloam aka naua ia: "Puham katibangonganna sule to mate," nasuhum unghadakei kamatappasanna sanaka-naka tau. ¹⁹Sapo' inde ia umma'na Puang Allataala napadadi longkakhim matoto' tatilenggu' anna tatigesse anna nasuha' yabona naua: "Naissam Debata mennanna umma'na," anna "Menna-menna muakui Debata la umpasikambela ia kalena kakadakeam." ²⁰Mesa banua kasalle tä' anggam pangkakka' bulabam sola peha' illaam, sapo' deem duka' pangkakka' kaju sola litä'. Pangkakka' bulabam sola peha' dipake untammu to kasalle, anna pangkakka' kaju sola litä' dipake allo-allo. ²¹Mesa tau ke umpasikambelai kalena kakadakeam la mendadi pangkakka' kasalle gunana, to dipasähä', anna keguna lako Puäta, anna la malam unghähä ingganna pengkähängam mapia. ²²Pasikambelai

kalemu kamohäeam sugali' susi si bassa' natuhu'i to mangnguha. Sapo' la umpeä lalanna anna deenni illaam kalemu kamaloloam penaba, kamatappasam, pa'kamase, anna kasiolaam. La umpateem solakoa' ingganna tau to mengkaala längäm Debata sola penaba mahändä. ²³Anna la umpasikambela kalemu tula' kasipengkaam takeguna si napogau' to tamuisam kalembasanna tula'na. Aka muissam muua umpakende' mandi passikallaam. ²⁴Anu' mesa sabua'na Debata tä' la mala massikalla, sapo' la malute lako ingganna tau, manähä umbaba pepa'guhuam, anna mahamme'. ²⁵La ma'penaba malunä' umpepatuduam ingganna pa'palakoam mapia lako to pabali-bali, umba-umba aka nagaha' Puang Allataala anna mala la untihokongam gau' nasala, nasuhum la mala muissam lalam kamaloloam. ²⁶Lambi' kilala anna lappa' illaam mai pa'pemäläanna tomahajanna setam, aka puham nasakka anna umpassai indo to pabali-bali napalako pa'elo'na.

**Pa'palakoanna hupatau illaam
la kasuppisanna lino**

3:1-9

3 Pengngissannii, illaam inde la kasuppisanna lino la kende' buda kamasussaam. ²Aka la anggam umpikki' kalena hupatau, mailu sugali' lako doi', ussanga-sanga kalena, malangka' penaba, mantelle, tä' la umpehingngii tomatuanna, tä' la naissam ma'kuhhu' sumanga', tä' maseho, ³tä' ma'kamase, moka sikapiai solana, untula'-tula' solana, tä' nabela unguasai kalena, undahha solana, tä' umpohäe kamapiaam, ⁴si umbombäi solana, ma'palako sihha', si umpuji kalena, anna umpakalando puha ia kamasannangam di lino anna la Puang Allataala. ⁵Maka'

diita tau ia too mato-mato meada', sapo' setonganna tau ia too tä' umpäbäi kakuasaanna Puang Allataala mengkähä illaam kalena. Dadi pasikambelai kalemu tau ia too. ⁶Aka illaam alla'-alla'na tau ia too deem si längäm bäbä banuanna tau mangkeloi anna untakka'i bata' ulunna baine malamma to buda dosa napendudum anna to nakuasai ma'hupa-hupa kamailuam takeguna. ⁷Me'guhu liu hia duka' sapo' tä' mala naala penabanna indo lalam kamaloloam. ⁸Indo Yanes anna Yambres umbali Musa^{††} yolona, susim too duka' indo tau to si mangkeloi umbali kamaloloam. Kadake pikkihanna anna tä' deem gunana kamatappasanna. ⁹Sapo' abana la meangga etam ia, tä' la ullambi' pangngua penabanna aka umba susi dadi lako Yanes anna Yambres, la susi duka' la naissam ingganna tau katomahoanna.

**Battakada Debata pahallu la dianda'i
liu moi illaam tau pandahhaam**

3:10-17

¹⁰Sapo' iko-iko muissam asammoko pepa'guhuangku, pa'palakoangku, pattuju penabangku, kamatappasangku, kamahammesangku, pa'kamaseku, anna kamanontongangku. ¹¹Susi toi duka' pandahhaangku anna kamapi'disangku susi indo kusi'dim dio Antiokhia, dio Ikonium anna dio Listra. Ingganna pandahhaam ia too kupassam, sapo' nalappasannä' Debatanta Kristus Yesus dio mai kaha-kaha ia too. ¹²Abana ingganna pentuhu'na Kristus Yesus to maelo' umpogau' pa'elo'na Debata la ullambi' pandahhaam, ¹³sapo' to kadake gau' anna to manähhä-nähhä la tuttuam lako gau' kadake, anna la umbaba bulim tau senga' anna duka' kalena. ¹⁴Sapo' la tontä liuko

^{††}3:8 Täss. 7:11.

iko umpalako indo aka-aka puha dipa'guhuangko anna unkgatappa'i tonganni, aka la unkgilalaiko ingganna to umpa'guhuko. ¹⁵Anna mengkalao dio bahinni'mu muissammi Battakada masehona Debata. Battakada ia too malako nabeem kamanähängam la napatette lako kasalamasam talambi' umpolalam kamatappasam lako Kristus Yesus. ¹⁶Ingganna issinna Battakada Debata buttu di Puang Allataala anna keguna dipopepatuduam, mepaitai kasalaam, umpapaii gau' kadake, anna mepatudu ma'gau' malolo, ¹⁷anna mala ingganna umma'na Puang Allataala dipasundum anna dipatepu la unkgähä ingganna pengkähängam mapia.

Ingganna oloanna Timotius la nakähä asam

4:1-8

4 Kupakahi'di si'da-si'dako dio olona Puang Allataala anna Kristus Yesus to la umpopa'tadongkongam ingganna to tubo anna to mate. Aka la sule Kristus Yesus ma'pahenta. Iam too anna kusuangko kuua: ²La tontä liuko too umpa'pakahebaam Battakada Debata lako tau moi naaku napehingngii moi moka. Anna la untulasam kasalaanna, anna muuaanni: "Daa umpogau' liu kakadakeam," anna ussasunni untuhu'i pa'elo'na Debata. La umpatudu sola ponnoko kamahammesam. ³Aka la deem wattunna moka hupatau umpehingngii pepa'guhuam mapia. Sapo' la untuhu'i kamohäeam kalena uhhempum buda tuangguhu to la umpatudui indo situhu' napohäena nahingngi. ⁴La ma'binga-binga lako kaheba kamaloloam anna umpatananni leko'i talinganna toiolo-olo takeguna. ⁵Sapo' iko-iko la unguasaiko kalemu illaam ingganna kaha-kaha. La tontä liuko too manontom umpassam kamadahhaam.

Palakoi pengkähängammu umbebeham Kaheba Katilallasam. Anna ingganna oloammu la unkgähä asam.

⁶Aka kao-kao illaam inde pengkähängangku sule lako katitolloanna hahaku, mendadi mesam pehumalasangku dio olona Puang Allataala. Aka la bale' lambi'um wattunna la kupellei inde lino. ⁷Puhämä' ma'kadua-dua illaam passitendeam mapia, malam puha manappa ingganna pengkähängangku sihhapam to si lumba lumumpa' landa' manappa lako ongeam kasumpuam, anna tontä' manontom matappa'. ⁸Temo dipatokaammä' songko' kapataloam indo to si dibeem lako to malolo. Indo songko' kapataloam la nabeennä' Debatanta Kristus Yesus battu diua To si muundu' lollä umpopa'tadongkongam hupatau. La nabeennä' ke sulem indo allo la naongi umpopa'tadongkongam hupatau. Anna tä' angga mandi kao la untahimai, sapo' la natahima duka' ingganna tau to unnaba-nabai kasuleanna.

Katampasanna kada penännä'na Paulus lako Timotius

4:9-18

⁹La umpeä si'da-si'da lalanna anna malako bale' mai umpellambi'ia' ¹⁰aka Demas ia napelleimä' le'ba' lako Tesalonika aka umpakalando puha ia kaha-kaha di lino. Anna Kreskes ia lu lako Galatia anna Titus ia lu lako Dalmatia. ¹¹Angga ham Lukas kupasola to hho. Pellambi'i Markus anna umpasolai mai aka napamoloi si'da-si'daä' illaam pengkähängangku. ¹²Anna Tikhikus ia balim kusua matim Efesus. ¹³Maka' maiko, la umbabannä' jubaku indo kupatohho dio Troas illaam banuanna Karpus. Anna la umbabannä' duka' ingganna suha'ku, la'bi-la'binna indo suha' lollo'.

¹⁴Indo Aleksander pande bassi buda kakadakeam bali napogausannä'. Sapo' Debata la umpabala'i situhu'

pa'pogausanna. ¹⁵La unjagai manappako kalemu untingngajo tau ia too, aka umbali-bali sugali' pa'tula'taa'.

¹⁶Indo anna uhuna untula'ä' kaha-kahaku dio olona to mahhotto', tä' deem moi podo la mesa tau umpa-solaiä', aka napellei asannä' ingganna tau. Sapo' la naampunni hi too Puang Allataala. ¹⁷Sapo' naundu'ä' anna napakatoto' Debatanta Kristus Yesus, nasuhum mala kupa'pakahebaam ingganna Kaheba Katilallasam anna malam duka' nahinggi ingganna tau taianna to Yahudi. Anna nalappasannä' Debata dio mai to la umpateiä'. ¹⁸Anna la nalappasannä' duka' Debata dio mai ingganna to umpeännä' kakadakeam, anna nababä'ä' tama kasalamasam illaam kapahentaanna yabo suhuga. Puang Al-

lataala dipa'kasallei mengkalao temo sule lako salako-lakona. Abana inna la diua.‡‡

Kada pebubunna Paulus

4:19-22

¹⁹Salama'ku lako Priska sola Akwila anna sahapunna Onesiforus. ²⁰Tohho ia dio Korintus Erastus anna masaki ia Trofimus kupellei dio Miletus. ²¹La umpeä si'da-si'da lalanna anna malako mai ahena wattunna kamadingingam.

Salama'na duka' matim Ebulus, Pudes, Linus, Klaudia sola ingganna solasubuntaa'.

²²O Timotius, la naundu' dako too Debata. Anna la natamba'koa' pada-pada.

Padam too.

‡‡4:18 *Abana inna la diua*: naua illaam basa Yunani Amin.

Suha'na Paulus lako Titus

Bätäna issinna

Inde suha' natuli' Paulus napakatuum Titus. Indo Titus[¶] taia to Yahudi, unkatappa'im duka' Puang Yesus. Mesa duka' sababanganna Paulus to si umpamoloi illaam pengkähänganna susi dio Kreta teem lako ongeam senga'. Ia anna napatohhoi Paulus dio Kreta indo anna lakoi sola, aka la muäto' indo la pahallunna diäto' illaam ingganna jumaa' dio, susinna la untuho pebaba ada' illaam si mesa-mesa kota, la umpakilala indo to umbaba pepa'guhuam sala illaam alla'-alla'na jumaa', anna la umpapatuduum pepa'guhuam mapia. Napaillaam duka' inde suha'na lu lako Titus tallu kaha-kaha la pahallu napomakaleso:

Uhu-uhuna pepakilalaanna lako Titus diona to la mala mendadi pebaba ada' illaam jumaa'. Ia anna napomakalesoanni ia too aka si bassa' ma'gau' kadake to Kreta. Kamaduanna, penännä'na lako Titus diona la naaka susi umpa'guhu sanaka lapi'na hupatau illaam jumaa', susinna: muane anna baine to matuam, to mangguha muane, anna sabua'. Anna indo baine to matuam la pahallu umpatudu baine to mangguha. Anna katallunna, penännä'na lako Titus diona la umpa'guhu manappa to matappa' diona la maaka susi pa'palakoanna to unkatappa'i Kristus Yesus. Handam pahallu lako to unkatappa'i Kristus, la unguasai kalena, ma'gau' malolo, anna manuhu' lako Debata, anna tä' la sipengka anna massikalla, sapo' la umpeä liu kasiolaam.

Lesoanna issinna

1. Kada passu'bü' (1:1-4)

2. Pengkähänganna Titus dio Kreta (1:5-16)

a. To la sihatam dituho mendadi pebaba ada' (1:5-9)

b. To ma'tula' takeguna tä' la dipäbäi ma'tula' illaam jumaa' (1:10-16)

3. Papatuduum lako sanaka-naka lapi'na hupatau illaam jumaa' (2:1-15)

4. Papatuduum diona la sihatanna napogau' to matappa' (3:1-11)

5. Katampasanna pepakahi'dinna Paulus (3:12-15)

1 Inde suha' buttu di kao Paulus sabua'na Puang Allataala anna mesää' duka' suhona Yesus Kristus. Natuhoä' la umpamoloi to napilei Puang Allataala anna mala matoto' kamatappasanna anna kutettei lako kapaissangam diona indo pepatuduum mapia la umbaba hupatau manuhu' lako Debata. ²Kamatappasam anna kapaissangam diona pepatuduum mapia ia too napolalam deem pahhannuam la ullambi' katuboam sule lako salako-lakona. Aka inna mengkalao diopi mai anna puha nadandim Puang Allataala katuboam ia too, anna ingganna pa'dandianna abana tappa'. ³Anna illaam wattu puha napa'tantu, napa'paissangam Puang Allataala Battakadanna. Napalako umpolalam pa'pakahebaanna Kaheba Katilallasam puha napapassanniännä'. Ma'kale Puang Allataala To Mepasalama' ussuää' la umpa'pakahebaanni.

⁴O Titus, to kualä äinä' ikale kahana mesa kabombongammaki' illaam kamatappasam. Handandanni Ambeta Puang Allataala anna Kristus Yesus To Mepasalama' la untamba'ko anna namana' kamasakkeam sola kamasannangam.

[¶]1:0 Titus 2Kor. 2:13, 7:6, 8:23, 12:18; Gal. 2:1,3; 2Tim. 4:10.

Pengkähänganna Titus dio Kreta

1:5-16

⁵Kasuhunganna anna kupatohhoko itim Kreta, anna malako muäto' indo la pahallunnapi diäto' anna la untuhopoko pebaba ada' illaam si mesa-mesa kota, susi indo puha kupakahi'diangko. ⁶To la mendadi mesa pebaba ada' pahallu tä' deem sassainna, la anggam mesa bainena, anna änä'na pahallu to meimam tä' deem kaissangam angga untuhu'i kamohäeam sugali'na umpogau' kakadakeam battu haka si moka dipahe'. ⁷Aka to ma'kambi' ia too muäto' pengkähänganna Puang Allataala, dadi la manggi' to tä' deem sassainna. Tau ia too tä' la si ma'kada mesa, tä' pa'keaha', tä' si umpamäbo' kalena, taia to la si bassa' patappaam lima, anna taia to mailu sugali'. ⁸Sapo' la pahallu to si untahima manappa tosabe, to unnababana kamapiaam, to la mala unguasai kalena, to ma'gau' malolo, to maseho, to naissam muäto' anna umpikki' ingganna pa'palakoanna, ⁹anna to muanti manda' untobe matoto' pepatuduam malanna dihannuam si'da-si'da situhu' indo puha dipepatuduam. Anna mala nabela ussangam tau umpake pepatuduam mapia anna la umpakilala to umbalii.

¹⁰Aka deem buda to moka dipahe', la'bi-la'binna to Yahudi to matappa'um. Tau susi ia too ma'tula' takeguna nasuhum umbaba bulim hupatau. ¹¹Tau ia too daa umpäbäi ma'tula', aka budam pandaposam nababa bulim umpake pepatuduam tää'na sihatam dipepatuduam. Kasuhunganna anna napateenni, aka mailu sugali' lako kauntungam tää'na sipäto'. ¹²Deemmi duka' mesa to manähäna to Kreta ma'kada naua: "Ingganna to Kreta si kaägä'-ägä' anna susi olo'-olo' to peande, anna to si mangngande sasa, busungam polepi mengkähä." ¹³Tula' ia

too tappa'. Iam too kasuhunganna anna la umpakilala si'da-si'dam anna mala unkatappa'i pepatuduam setappa'na. ¹⁴Anna tä' la umpehingngii toiolo-olo takeguna si natula' to Yahudi anna pahentana hupatau to untumpu pala' kaheba kamaloloam. ¹⁵Ingganna pa'padadinna Puang Allataala, napemasehoam ia to maseho, sapo' tä' ia napemasehoam to kadake gau' anna to tamatappa'. Aka tau ia too kadake pikkihanna anna tamuissam se'la. ¹⁶Naua dio pudu'na: "Kiissam Puang Allataala," sapo' pa'palakoanna tä' siolaam indo tula'na. Tau ia too, tä' deem pada sakadäkke' gau'na, tä' naaku untuhu'i Battakada Debata, anna tä' la nabela umpalako ingganna hupanna gau' mapia.

Pepatuduam lako sanaka-naka lapi'na hupatau illaam jumaa'

2:1-15

2 Sapo' iko-iko la umpepatuduam indo la situhu'na pepa'guhuam mapia. ²Pakilalai muane indo to matuam, la pahallu unguasai kalena, kesanga mapia, matänä' penaba, la unkatappa'i si'da-si'da Puang Allataala, anna la tontä liu illaam pa'kamase anna kamanontongam.

³Susi duka' lako baine to matuam, la pahallu pa'palakoanna sihondoi gau'na to meimam, tä' la si untula'-tula' kadake solana, tä' la pa'anggur, sapo' la umpepa'guhuam pepatuduam mapia, ⁴anna mala unnännä' baine to mangnguha la umpakamaja muanena sola änä'na, ⁵la unguasai kalena, la maseho, bassa' mengkähä illaam banuanna, mapia penaba, anna manuhu' lako muanena. La ma'pogau' susi indana deenni napolalam tau senga' untelle Battakadanna Puang Allataala.

⁶O änä'ku Titus, susi toi duka' lako to mangnguha muane la ussangam unguasai kalena.

⁷Illaam ingganna kaha-kaha la mendadi tandenganko umpalako gau' mapia. La ma'pa'guhu manappako sola pattuju mapia, ⁸anna tula'mu la malolo anna mala tä' deem naola tau untunai, napolalam la masihi' balimmu aka tä' deem lalanna natula' kadakeki'.

⁹Anna sabua' ia la ussasungam anna mala manuhu' lako puäna illaam ingganna kaha-kaha anna la umpomasanam penabanna puäna. Tä' la angga patelä-telä ¹⁰anna tä' toi la maboko. Sapo' la tontä liu umpa'patandaam kamaloloanna, nasuhum naissam puäna naua mala dikatappa'i. Lambi' illaam ingganna pa'palakoanna, pepatuduam diona Puang Allataala To Mepasalama' la napa'kasallei hupatau.

¹¹La umpepatuduam ia too aka puham napa'paitaam Puang Allataala mana' pa'kamasena la umpasalama' ingganna hupatau. ¹²Anna umpolalam mana' pa'kamase ia too napatudukia' anna mala tä'um la sisala pa'elo'na anna katuboantaa'. Anna napatudu tookia', tä' la muula' kamailuam di lino, sapo' la tubokia' illaam inde lino temo la unguasai kaleta, ma'gau' malolo, anna manuhu' lako Puang Allataala. ¹³Anu' mahassangkia' illaam muumpai indo to tahannuam la nababaangkia' ingganna kamasannangam. Wattu eta too la tandaam kamatandeanna Yesus Kristus battu diua Puang Allataala To Handam Matande To umpasalama'kia'. ¹⁴Puha umbeho kalena kahana kitaa' anna mala nalappasangkia' dio mai ingganna kakadakeam anna napasähä' mendadi umma'na to maseho, to maelo' si'da-si'da umpalako pa'palakoam mapia.

¹⁵La umpepa'guhuam asam ia too anna ussasungam sola umpakilala ingganna to umpehingngiiko anna napalako manappai. La umpalako sola ponno kabahaniam aka iko to

dipakuasa. Tä' la umpäbäi tau la napa'basiiko.

Pepatuduam diona la sihatanna napogau' to matappa'

3:1-11

3 Pakilalai ingganna to matappa' itim la manuhu' lako ingganna to kuasa illaam kapahentaam anna la ahui' unghähä ingganna pengkähängam mapia. ²Anna tä' la untelle padanna hupatau, sapo' la umpeä liu kasiolaam, la umpaillaam penaba solana, anna la umpa'patandaam kamahammesam penabanna lako ingganna hupatau.

³Aka yolona kita sianna' duka' to maho, tä' manuhu', anna dibaba bulim. Napahe'kia' ma'hupa-hupa kamohäeam sugali'ta. Si ma'penaba kadakekia' anna si ma'kembuhu. Anna si sikabassikia' mesa sola mesa. ⁴Moinna anna ma'gau' susikia', sapo' tappana umpa'patandaam pa'kamasena anna kamapiaam penabanna Puang Allataala To Mepasalama'taa', ⁵iya napasalama'ungkia'. Taia kahana gau' malolotaa' nasuhum napateem, sapo' aka pa'kamasena lako kita. Napasalama'kia' umpolalam pengkähänganna Penaba Maseho umbasei dosata, nadadiam polekia', anna nabeengkia' katuboam bakahu. ⁶Natabungkia' Puang Allataala Penaba Maseho umpolalam Yesus Kristus To umpasalama'kia', ⁷anna mala namana'kia' Puang Allataala kapahhannuam la ullambi' katuboam sule lako salako-lakona. Napateem aka sola pa'kamasena napomalolokia'. ⁸Iam too inde kada tadibala'i.

Anna kupelau tä'ko la malaja' umpepa'guhuam kaha-kaha ia too anna mala ingganna hupatau to unghatappa'im Puang Allataala la ma'kadua-dua liu umpalako pengkähängam mapia. Aka

pepa'guhuam ia too mapia anna keguna lako ingganna hupatau.

⁹Pasikambelai kalemu kasipengkaam takeguna si napogau' to tamuissam kalembasanna tula'na. Anna tä'ko la massikalla diona pa'hendem-neneam anna Pepaondonganna Musa, aka ia asanna ia too tä' deem gunana, sapo' labu' bäbä. ¹⁰To si umpakende' kahakkaam illaam jumaa' la pahallu umpakilala, pissam daka penduam daka. Sapo' maka' moka umpehingngiiko, pasikambelai kalemu tau ia too. ¹¹Aka muissam muua tau susi ia too puham umpemboko'i pepa'guhuam mapia. Anna gau' kadakena tau ia too ungdakei kalena.

**Katampasanna
pepakahi'dinna Paulus**

3:12-15

¹²Maka' kusuam matim Artemas battu haka Tikhikus, iya la masimpangko

umpeäi lalanna anna malaki' sitammu dio Nikopolis, aka balim kukattu la tohho dioä' ke wattunnai kamadingingam. ¹³La umpeä si'da-si'da lalanna anna malako umpamoloi Zenas, indo to ullatta' ätoham, sola Apolos anna mala tä' deem kakuhängam aka-aka ke mengkalaom. ¹⁴Anna indo solata to matappa' pahallu duka' me'guhu umpa'kadua-duai gau' mapia anna mala umponnoi la dipahalluanna illaam salu katuboam susi kalena teem tau senga', indana tubo takegunai.

¹⁵Salama'na matim ingganna to kupasola inde. Salama'ku duka' lako to ungdamaseikam kahana mesa kabombongammakia' illaam kamatappasam.

Handandanni Debata untamba'koa' pada-pada.

Padam too.

Suha'na Paulus lako Filemon Bätäna issinna

Inde suha' natuli' Paulus napakatuum Filemon. Indo Filemon mesa to Sahani kaissangam anna angga'na ma'jumaa' dio Kolose. Deem sabua'na isanga Onesimus. Sapo' indo Onesimus le'ba' lahi umpellei Filemon. Sapo' maaka amo susi anna malai siissangam Paulus wattunga illaam tahungkum Paulus. Iya napaisannim Paulus lalam kasalamasam lambi' matappa'um Onesimus.

Inde Suha'na Paulus lako Filemon mesa pelauanna anna mala sikapiai sule Onesimus sabua'na, anu' nasuam Paulus ma'pasule lako. Napelau si'da-si'da Paulus lako Filemon anna malai untahima manappa sule Onesimus. Anna tä' angga mandi la naampunni anna natahima sule mendadi sabua'na, sapo' la natahimapi duka' mendadi solasubunna illaam kamatappasam lako Kristus.

Lesoanna issinna

1. Kada passu'ba' (1:1-3)

2. Katilallasanna Paulus aka umpekaheba pa'pogausanna Filemon (1:4-7)

3. Pelauanna Paulus lako Filemon diona Onesimus (1:8-22)

4. Kada salama' (1:23-25)

1 Inde suha' buttu di kao Paulus to ditahungkum aka untuhu'ä Kristus Yesus. Duka' buttu di solasubunta Timotius,

lu lako Filemon sababangangi to kipakamaja ²anna lako duka' Apfia solasubungki baine anna Arkhipus sababangangi sihhapam sohodadu illaam panibiam, sola issinna jumaa' to si ma'hempum illaam banuammu.

³Handandanni Puang Allataala Ambetaa' anna Yesus Kristus Debatanta la un-

tamba'koa' anna namana' kamasakkeam sola kamasannangam.

Katilallasanna Paulus aka umpekaheba pa'pogausanna Filemon

4-7

⁴Ma'sambajam oä' too kupa'sambajangam ongko anna ma'kuhhu' sumanga'ä' längäm Puang Allataala to kupenombai, ⁵aka kupekaheba diua matoto' liu kamatappasammu lako Puang Yesus anna pa'kamasemu lako ingganna to napasähä' Puang Allataala mendadi umma'na. ⁶Ma'sambajannä' anna mala kasilombunganta illaam kamatappasam lako Kristus la taongi tuttuam ussi'dim anna ungkaleso ingganna kamapiaam talambi' aka sakalebungkia' Kristus. ⁷O solasubungku Filemon, indo pa'kamasemu lako solata to matappa'iam too nasuhum kasalle anna tiala inabangku, aka indo pa'palakoam mapiammu umpatipakahanga ingganna to napasähä' Puang Allataala.

Pelauanna Paulus lako Filemon diona Onesimus

8-22

⁸Dadi aka mesaä' duka' suhona Kristus nasuhum bahaniä' umpahentako indo la pahallunna umpogau'. ⁹Sapo' aka indo si pa'kamasemu, lambi' angga hamä' melau matim. Aka kao, Paulus, matuamä' anna temo mahassannä' ditahungkum aka untuhu'ä' Kristus Yesus, ¹⁰suleä' umbaba pelauangku matim diona änä'ku illaam Kristus, aka mendadimä' ambe di ada'na wattungku illaam inde tahungkum, aka kao umpaisannii lalam kasalamasam. Inde kuaaam änä'ku, Onesimus. ¹¹Indo yolona mala diua tä' deem gunana tama kalemu.

§§1:10 Onesimus: kalembasanna, keguna.

Sapo' temo kegunam, tä' anggam lu tama kalemu, sapo' duka' tama kaleku.

¹²Inde Onesimus pa'pakamajanku, kusua ma'pasule matim. ¹³Setonganna maelo' punalää' la umpaindei anna mala nabala'ko umbaliiä', aka illaam liupä' tahungkum temo kahana umbebehannä' Kaheba Katilallasam. ¹⁴Sapo' moka ohä' umpalako bäbäi, ke tä'i muua. Aka ia too mesa pa'pogausam mapia ke umpalakoi, tä'ko la dipassa sapo' la mengkalao illaam unä' penabammu.

¹⁵Umbai' iam tia anna dipasisähä' salangkoa' säpäi' anna mala sola li-ungkoa' pole' sule lako salako-lakona ke ma'pasulem matim. ¹⁶Tä' angga mandi la umposabua', sapo' la umpakamaja susi solasubummu. Aka kupateemmi kao, la'bi-la'binna iko la umpakamäjjäi aka padakoa' bassim ma'hupatau anna solasubummu illaam sanganna Debata.

¹⁷Dadi maka' muangga'ä' sababangammu, iya la untahima manappa too Onesimus, umba susi untahimaä'. ¹⁸Anna maka' deem kasalaanna battu haka indanna matim, kao la umpengngitai tä' la umpabala'i. ¹⁹Aka kaom too inde Paulus ma'kalem limangku untuli'i inde kuaa: kao la umpendudum asanni ia too. Setonganna tä'ungko pahallu

kupakilala kuaa deem katondoammu mai indo kupaitaiko lalam kasalamasam nasuhum ullambi'ko katuboam bakahu. ²⁰O solasubungku, kahana solasubummaki' illaam sanganna Debata, iya la umpalako pa'elo'ku untahima manappako Onesimus. Susim too la umpatialannä' inabanku aka mesangkia' illaam Kristus.

²¹Kutulisanko inde suha' sola ponno pahhannuam la umpalako indo pelauangku. Inna kuissammi tia kuaa la umpogau' la'bi puha ia anna indo pelauangku. ²²Anna mesa polepi pelauangku: la umpatokaannä' tambim illaam banuammu aka kuhannuam la natahima sambajammua' Puang Allataala lambi' la malaä' nalappasam illaam mai inde tahungkum anna malaä' matim.

Kada salama'

23-25

²³Salama'na Epafra matim, solaku ditahungkum aka untuhu'i Kristus Yesus.

²⁴Kupalandasam duka' salama'na saba-banganku Markus, Aristarkhus, Demas, anna Lukas.

²⁵Handandanni Debatanta Yesus Kristus untamba'koa'.

Padam too.

Suha' lako to Ibrani Bätäna issinna

Inde Suha' Ibrani tä' diissam to untuli'i aka tä' natuli' sanganna. Anggam diissam diua indo to untuli'i mesa to pebabanna to Sahani to muissam si'da-si'da issinna Pa'dandiam Yolona Puang Allataala. Sapo' anggam ia aka makaleso taia indo sapulo dua suhona Puang Yesus (2:3).

Inde suha' mengkalao dio mai abana disangai Suha' lako to Ibrani. Indo to Ibrani tontäm ke diuai to Yahudi battu diua to Israel. Setonganna tä' di-issam menna dipakatu inde suha', sapo' mannassa anna to Sahanii to mahassam ussi'dim kamapi'disam anna pandahhaam aka matappa' lako Puang Yesus (10:32-34, 13:3,13). Illaam indo ussi'dim kamapi'disam deemmi piha manenne penabanna anna deem maelo' la soho' boko' illaam mai kasahaniam (12:12). Anna deem duka' tä'um naakulo la ma'sambajam (10:25).

Tallu handanna napaitoo'na to untuli' inde suha': uhuna, la mendadi pepatuduam lako to umbatai, kaduanna la mendadi pepakatoto', anna katallunna la mendadi penännä'.

Uhuna napepatuduam naua: Puang Yesus Änä'na Puang Allataala to puha umpalombangangkia' tula'na Ambena (1:2). Anna Puang Yesus Sando Too' to untodom ingganna malaika' anna untodom toi Musa (1:1-4:13). Anna untodom polepi ingganna sando too' illaam peadasanna to Yahudi (4:14-7:28). Kahana pengkähäna Puang Yesus nasuhum ingganna to matappa' tä'um nakuasai dosa, tä'um mahea' sule dio olona Puang Allataala, anna lappa'um dio mai kakuasaanna kamateam, aka ullambi'um katuboam sule lako salakolakona. Anna napepatuduampi naua:

Puang Yesus mendadim Sando Too' to mebaba lako kasalamasam. Tä' mala dihannuam tunuam anna bua pemala' senga' la mepasalama' dio olona Puang Allataala. Anggam kamateanna Puang Yesus mendadi bua pemala' la umbasei dosa budanna hupatau, battu diua mepasalama'. Iam too anna diissammi diua pengkähäna Puang Yesus mentondom puha ia anna la pengkähäna ingganna sandona to Yahudi. Anna indo pa'dandiam bakahunna Puang Allataala nakähä Puang Yesus mentondom puha ia anna la indo pa'dandiam yolona.

Kaduanna, mepakatoto' anna mala ingganna to Sahani tontä liu manontom lako Puang Yesus, moi anna didahha. Naua tä'ungkia' mahea' le'ba' lako olona Puang Allataala aka napendioloangam-makia' Puang Yesus längäm (4:16; 6:20; 10:19-23). Anna nauapi: ingganna to Sahani tä' mala tala landa' lako indo pel-lubeam la mebeem Puang Allataala aka kamatappasanna (3:10-4:11). Indo di-uaam pellubeam la mebeem Puang Allataala, deem muuai maka' matem to matappa' iya mellubem aka tä'um la mengkähä inde lino. Deem toi duka' muuai indo diuaam pellubeam, kalem-basanna tä'ungkia' pahallu mengkähä illaam lino umpeä ikale kasalamasam, aka napasalama'ungkia' Puang Yesus.

Katallunna, menännä' indana deenni tau soho' boko' illaam mai kasahaniam (2:1-4; 3:7-19; 5:11-6:12; 10:26-39; 12:18-29). Anna nauapi la mabanda' pa'tahungkunganna to umpa'lullu' Änä'na Puang Allataala anna muangga' mesina-sina haha titollona Kristus.

Lesoanna issinna

1. Puang Yesus untodom asam ingganna-ingganna sia (1:1-10:18):

a. Puang Yesus Änä'na Puang Allataala (1:1-3)

b. Mentondom puha ia Puang Yesus anna la ingganna malaika' (1:4-2:18)

c. Mentondom puha ia Puang Yesus anna la Musa (3:1-4:13)

d. Puang Yesus Sando Too' handam matande, mentondom puha ia anna la ingganna to unghähä pa'dandiam yolona Puang Allataala (4:14-7:28)

e. Mentondom puha ia pengkähäna Puang Yesus anna la pengkähäna ingganna sando illaam peadasanna to Yahudi (8:1-10:18)

2. Kamanontongam lako Puang Allataala (10:19-12:29)

3. Pa'palakoam situhu'na pa'elo'na Puang Allataala anna kada pebum (13:1-25)

**Matande puha ia Änä'na Puang
Allataala anna la ingganna malaika'
1:1-14**

1 Indo yolona pembuda ma'battakada Puang Allataala lako nene to taponene napalobum ingganna nabi. Ma'hupa-hupa lalam napogau'. ²Sapo' illaam inde wattu la kasuppisanna lino ma'kale Ia Änä'na Puang Allataala puha umpalobungangkia' tula'na. Indo Änä'na abana inna napa'tantum Puang Allataala la Ia muampuam asam ingganna-ingganna sia. Anna Änä'na siam duka' unghähäi anna napadadi Puang Allataala langi' sola lino. ³Ia naongi tandaam pangkähhä kamatandeanna Puang Allataala, anna susi siam sipa'na anna pa'pogausanna Puang Allataala. Anna Ia toi umpaliaha ingganna-ingganna sia, tula'na ponno kakuusaam napake. Tappana puha umbasei lao dosa budanna hupatau, iya le'ba'um längäm suhuga muokko'

dio tandai kananna To Handam Matande. ⁴Lambi' matande puha ia tadongkonganna anna la ingganna malaika', umba susi matande puha ia indo sanganna to nasangaiam Puang Allataala anna la sanganna malaika'. ⁵Aka tä' tia deem la naua Puang Allataala lako malaika':

"Ikom too Änä'ku;
mengkalao allo temo kupomakaleso kuaa: Kaom too Ambemu."*

Sapo' anggam diona Änä'na naua:

"Kao la mendadi ambena

anna Ia la mendadi Änä'ku."[†]

Tä' ia deem ma'kada susi diona malaika'.

⁶Mane deenni, wattunna anna ussui Änä' uluana Puang Allataala mentama inde lino,[‡] ma'kada naua:

"Ingganna malaika'na Puang Allataala la pahallu menomba dio olona."[¶]

⁷Anna diona ia ingganna malaika', naua Ia:

"Puang Allataala umpopengkubalim malaika'na napadadi susi hibu', anna to si napakasua-sua napopengkubalim napadadi susi lelona api."[§]

⁸Sapo' lako ia Änä'na naua:

"O Puang Allataala, la mentomahaja liuko sule lako salako-lakona!

Ma'pahentako sola undu' lollä.

⁹Umpohäeko kamaloloam anna unghä abassiko kakadakeam.

Iam too kasuhunganna anna Kao, Puang Allataala to umpenombai,

puhako kupopentondom anna la ingganna solamu,

aka kulanti'ko kutolloi minnä'-minnä' tanda dipa'kasalleiko,

*1:5 Puj. 2:7.

†1:5 2Sam. 7:14.

‡1:6 Änä' uluana: Puang Yesus diuam Änä' uluana Puang Allataala aka untondom asam ingganna-ingganna sia.

¶1:6 Puj. 97:7.

§1:7 Puj. 104:4.

anna mala naponnoiko katilallasam.”**

¹⁰Nauapi duka' Puang Allataala lako Änä'na:

“O Debata ikom too umpadadi inde lino, indo anna dipadadii,

anna lako siam duka' umpapia langi'.

¹¹Ingganna ia too la pa'de asam sule, sapo' lako-Iko la tontä liuko.

Langi' anna lino la malusa sihhapam poheba,

¹²la ulluppi'-luppi' susi juba,

anna umpabala'i polei bakahunna.

Sapo' lako-Iko tä' punalako deem la tidende,

anna la tubo batuko.”††

¹³Anna tä' tia deem la naua Puang Allataala lako malaika':

“Okko'ko dio tandai kanangku, sule lako wattunna la kupopa'bukku ingganna balimmu

dio olomu lambi' uhhondoi dokko.”‡‡

¹⁴Dadi, aka ia umbai' indo malaika'? Indo malaika' sangngim mempenaba to napakasua-sua Puang Allataala la umpamoloi hupatau to la dimana' kasalamasam.

Pahallu la ditahima indo kasalamasam taditondom

2:1-4

2 Kahana mentondom puha ia Kristus anna la ingganna malaika', nasuhum la tuttuam tatobe manda' taanti matoto' indo pepa'guhuam puha tahingngi, indana tapellei indo dalam kamatapassanta. ²Aka indo kaheba napalanda' malaika' lako nene to taponene yolona abana tappa' anna tatidende. Anna menna-menna tä' umpehingngii battu haka tä' napalako, tau ia too la dipalambi'i

bala'na la sihatanna gau' kadakena. ³Maka' susi, iya senga'um too kitaa' ke tä'i tatahima indo kasalamasam taditondom anna tä' tapaiilaam penaba! Aka inna tä' siakia' la mala lappa' dio mai pa'tahungkunganna Puang Allataala. Aka uhu-uhuna ma'kale Debatanta Puang Yesus umpa'pakahebaanni kasalamasam ia too, anna mane natahhusam napomannassa to uhhingngii indo tula'na, nasuhum taissanna' taua tappa' indo kaheba ia too. ⁴Anna ma'kalepi duka' Puang Allataala umpakatoto'i indo kaheba kasalamasam umpake ma'hupa-hupa tanda anna tanda memängä-mängä. Anna duka' ummana' hupatau kapaissangam buttu di Penaba Maseho situhu' pa'elo'na.

Puang Yesus umpopehhupatau kalena la umbukka dalam kasalamasam

2:5-18

⁵Taia malaika' nabeem kakuasaam Puang Allataala la ma'pahenta dio lino tando lako, battu diua lino bakahu inde mahassam ditula' temo. ⁶Sapo' hupatau hia nabeem kakuasaam ia too. Aka deem tisuha' illaam Battakada Debata naua: “Aka ia inde hupatau, Debata, nasuhum umpaiilaam penaba?

Menna hia inde to lino, Debata, nasuhum muandaham mata liu?

⁷Umpadiongam salapi ia säpäi' anna la ingganna malaika'.

Puhai too, iya umpatadongkommi yabo ongeam kamatandeam anna malangka'.

⁸Anna umbeenni kakuasaam la unguasai ingganna-ingganna sia.”¶¶

**1:9 Puj. 45:7-8.

††1:12 Puj. 102:25-27.

‡‡1:13 Puj. 110:1.

¶¶2:8 Puj. 8:5-7.

Dadi, maka' diua Puang Allataala umbeem kakuasaam hupatau la unguasai ingganna-ingganna sia, kalembasanna, ingganna-ingganna sia tä' punala deem la tä' nakuasai hupatau. Sapo' moinna anna susi, tä'pi ma'tandaam diita tentomai inde hupatau unguasai ingganna-ingganna sia. ⁹Sapo' Puang Yesus la taitam ma'kuasa temo. Wattunna tohho inde lino, dipadiongam salapi ia säpäi' anna la ingganna malaika' anna mala mate umbala' ingganna hupatau. Temo dipatadongkommi yabo ongeam dipa'kasallei anna handam matande, aka puham muolai kamasussaam lambi' mate. Napogau' ia too kahana pa'kamasena Puang Allataala lako kitaa'.

¹⁰Puang Allataala umpadadi ingganna-ingganna sia anna ia too kalena napapiaam. Pattujunna la buda hupatau to mendadi änä'na la mangngala taba illaam kamatandeanna. Illaam ia too abana inna sipäto' nakattu Puang Allataala la muolai kamasussaam Puang Yesus anna mala mendadi To Mepasalama' tä' deem sassainna, la umbukka lalam kasalamasam, nasuhum mala dipasalama' hupatau.

¹¹Puang Yesus umbasei lao dosa budanna hupatau. Anna mesa Ambe indo to dibasei dosana anna indo To umbasei dosa. Iam too anna tä'um masihi' Puang Yesus muuaam hupatau: "Solasubungku." ¹²Ma'kada Puang Yesus lako Puang Allataala naua:

"La kupa'pakahebaangko lako ingganna solasubungku, anna la kupujiko illaam alla'-alla'na umma'mu."^{§§}

¹³Anna nauapi:

"Anggam Puang Allataala kupassedanni hannu."

Anna naua polepi:

"Indemä' sola-sola ingganna indo änä'-änä' to napadokkoannä' lisu pala'ku Puang Allataala."^{*}

¹⁴Indo to nauaam Puang Yesus änä'-änä', sangngim hupatau inna to la mate. Iam too anna umpopehhupataum kalena Puang Yesus, anna mala illaam kamateanna mala umpempa'deam kakuasaanna tomahajanna setam indo to unguasai kamateam. ¹⁵Napateem anna mala ullappasam hupatau dio mai kamateam. Aka upu' salu katuboanna naposabua' liu kamaheasam lako kamateam. ¹⁶Mannassa anna taia malaika' nakamasei, sapo' pessubunna Abraham. ¹⁷Iam too anna pahallum mendadi hupatau Puang Yesus la susi ingganna solasubunna illaam ingganna-ingganna sia. Aka maka' susi siam hupatau, iya mala Ia mendadi Sando Too' to ponno pa'kamase anna sanda manuhu' umpalako pengkähänganna Puang Allataala, anna mala diampunni dosana hupatau. ¹⁸Aka ma'kalem puha ussi'dim kamapi'disam ke nahua oom pa'sändäsam, nasuhum naissammi umpamoloi hupatau to nahua pa'sändäsam.

Matande puha ia Puang Yesus anna la Musa

3:1-6

3 Dadi, inggannakoa' solasubungku umma'na Puang Allataala to puham duka' natambai, penabaam manappa siaia' too diona Puang Yesus to taakui taua Suhona Puang Allataala anna Sando Too'. ²Manuhu' si'da-si'da lako Puang Allataala to untuhoi, susi Musa yolona manuhu' si'da-si'da

§§2:12 Puj. 22:23.

*2:13 Yes. 8:17-18.

umpalako pengkähänganna illaam banuanna Puang Allataala, battu diua illaam alla'-alla'na umma'na Puang Allataala. ³Sapo' sihatam anna sipäto' dipa'kasallei puha ia Puang Yesus anna la Musa, umba susi dipa'kasallei puha ia to umpake'de' banua anna la indo banua napake'de'. ⁴Abana ingganna banua deem to umpake'de'i. Sapo' to umpapia ingganna-ingganna sia Puang Allataala ia. ⁵Indo ia Musa manuhu' umpalako pengkähänganna illaam alla'-alla'na umma'na Puang Allataala sihhapam mesa sabua' manuhu' umpalako pengkähänganna illaam banuanna puäna. Anna ingganna indo napogau' Musa umpa'paissangam loppo' indo la natula' Puang Allataala illaam allo la ditinggajona. ⁶Sapo' Kristus Ia Änä'na Puang Allataala to manontom unkapalai banuanna Puang Allataala. Menna diuaam banuanna Puang Allataala? Kitaa' diuaam, ke tontä liui matoho penabanta anna ponno pahhannuam muumpai indo tapemmitai la nabeengkia' Puang Allataala.

**Kamalubeam nadandi Puang
Allataala lako to matappa'**

3:7-4:13

⁷Iam too anna la untuhu'inna' inde tula'na Penaba Maseho naua:

“Maka' uhhingngikoa' kadanna Puang Allataala inde allo temo,

⁸daa unghahha' ulua' indana susikoa' nene to umponene kahha' ulu

wattunna moka untuhu'i Puang Allataala,

anna umpa'sändä'i Puang Allataala dio pohiallasam.

⁹Ma'kada Puang Allataala naua:

‘Eta too napa'sändä'ia' nene to umponene anna napangngitaiä',

moi kela daa puham naita pa'pogausangku lako kalena appa' pulo taunna masäena.

¹⁰Iam too umpakende' aha'ku lako tau ia too

anna kuuam: Silele mangngopä', tä' untuhu'i ulalangku.

¹¹Nasuhum keaha'ä' lambi' ma'pindaä' kuaa:

Tä' ia la kupäbäi landa' lako indo pel-lubeam la kubeem.”†

¹²O inggannakoa' solasubungku, jagai manappaia' indana deengkoa' ma'penaba kadake anna tä' matappa' lambi' umpemboko'i Puang Allataala Debata tubo. ¹³Sapo' la allo-allo hakoa' ia sipakilala mesa sola mesa, sumala deempi wattu umba susi indo puha tisuha' illaam Battakada Debata naua: “Inde allo temo.” Iam too anna kuaaammokoa' aka kuaa indana deennia' solamu nababa bulim dosa lambi' kahha' ulu. ¹⁴Aka kitanna' too to sakalebu Kristus ke tontä liukia' matappa' sola ponno penaba umba susi kamanontonganna kamatappasanta pahandu'na. ¹⁵Umba susi indo natula' illaam Battakada Debata inggenä' naua:

“Maka' uhhingngikoa' kadanna Puang Allataala inde allo temo,

daa unghahha' ulua' indana susikoa' nene to umponene kahha' ulu

wattunna moka untuhu'i Puang Allataala.”‡

¹⁶Iya menna diuaam to uhhingngi kadanna Puang Allataala sapo' moka untuhu'i? Lako ingganna hupatau to napatette Musa messubum illaam mai lembäna Mesir. ¹⁷Anna menna diuaam to nahua aha'na Puang Allataala appa' pulo taunna masäena? Lako indo to madosa lambi' mate dio pohiallasam.

†3:11 Puj. 95:7-11.

‡3:15 Puj. 95:7-8.

¹⁸Ma'pinda Puang Allataala naua: “Tä' ia la kupäbäi landa' lako indo pellubeam la kubeem.” Iya menna nauaam? Tä' mala tala indo to moka manuhu' dio olona wattu eta too. ¹⁹Dadi mannassa anna taissannia' tentomai taua tä' mala la landa' lako indo pellubeam la nabeem aka tä' matappa'.

4 Iya da'da' liupi sule lako temo indo pa'dandianna Puang Allataala la mebeem kamalubeam. Iam too anna pahallungkoa' majaga indana deengkoa' tä' ullambi'i ia too. ²Aka puhangkia' duka' dipaissanni indo Kaheba Katilallasam umba susi puha dipaissanniam nene to taponenea'. Moi anna puham ditulasam, sapo' tä' deem gunana lako kalena, aka tappana nahingngi tä' di naaku nakatappa'i. ³Sapo' anggam kitaa' to matappa' la mala ussi'dinni indo kamalubeam. Sapo' lako ia to tä' matappa' tä' ia la mala nasi'dim umba susi puha natula' Puang Allataala naua:

“Keaha'ä' lambi' ma'pindaä' kuua:
Tä' ia la kupäbäi landa' lako indo pel-
lubeam la kubeem.”^{*}

Ma'kada susi Puang Allataala, moi anna silolemmi langi' sola lino indo pel-
lubeam. ⁴Aka deem tisuha' illaam Bat-
takada Debata diona indo allo ka-
pituunna naua: “Allo kapituunna naongei
tohho Puang Allataala aka dadi asammi
pa'padadinna.”[§] ⁵Anna illaam indo Bat-
takada Debata ditula' ingngena' naua:

“Tä' ia la kupäbäi landa' lako indo pel-
lubeam la kubeem.”^{**}

⁶Iya indo to mendiolo uhhingngi indo
Kaheba Katilallasam tä' ia ullambi' indo
pellubeam, aka tää'i manuhu' lako Puang

Allataala. Sapo' abana inna deempi tau
la mala ussi'dim indo kamalubeam la
mebeem Puang Allataala. ⁷Aka inna
puha napa'tantum Puang Allataala allo
senga' la naongei hupatau untahima
indo kamalubeam, indo diuaam: “Inde
allo temo.”^{††} Mahhatu' taunna lessu'na
Musa mane natula'i Puang Allataala
kaha-kaha ia too napalombum tomahaja
Daud. Iam too indo ditula' ingngena'
naua:

“Maka' uhhingngikoa' kadanna Puang
Allataala inde allo temo,
daa unghahha' ulua'.”

⁸Inde kamalubeam ditula' temo taia
indo nasi'dim nene to taponene indo
anna nababai Yosua lako lembäna
Kanaan. Aka maka' la ia diuaam,
mannassa anna tä'um la natula' pole
Puang Allataala diona indo allo senga'.
⁹Dadi deempi kamalubeam la dibeem
umma'na Puang Allataala umba susi
Puang Allataala mellube illaam allo
kapituunna. ¹⁰Aka menna-menna puha
untahima indo kamalubeam nadandi
Puang Allataala, tau ia too tohhom
mellube aka puham pengkähänganna,^{‡‡}
umba susi napogau' Puang Allataala
tappana puha pengkähänganna. ¹¹Iam
too anna la pahallunna' tapeä liu
lalanna anna malakia' ullambi' indo
kamalubeam nadandi Puang Allataala,
aka mase manii deengkia' mehonno'
kahana tä' manuhu' tongam lako Puang
Allataala susi indo nene to taponene.

¹²Aka Battakadanna Puang Allataala
battakada tubo anna ponno kuasa, pata-
ham puha ia anna la pa'dam pata-
ham patomali, aka ullosa sule tama

^{*}4:3 Puj. 95:11.

[§]4:4 Kad. 2:2.

^{**}4:5 Puj. 95:11.

^{††}4:7 Puj. 95:7-8.

^{‡‡}4:10 *tau ia too tohhom mellube aka puham pengkähänganna*: Tä'um pahallu mengkähä umpä kasalallasam, aka napasalama'um Puang Yesus.

tambu' anna penaba. Anna umpahessa sule tama pikkihanna anna lalam penabanna hupatau. ¹³Ingganna-ingganna sia illaam inde lino tä' deem mala la tibuni dio olona Puang Allataala. Aka ingganna-ingganna sia tandaam asam anna makalessu' dio olona. Anna la pahallu tatula'a' anna taakui ingganna pa'pogausanta dio olona.

**Puang Yesus Sando
Too' handam matande**

4:14–5:10

¹⁴Dadi deemmi Sando Too'taa' to handam matande, to puha tinanda längäm olona Puang Allataala yabo suhuga. Puang Yesus-um too Änä'na Puang Allataala diuam. Iam too anna la pahallungkia' la tontä liu manontom unkatappa'i indo to puha taakui. ¹⁵Aka inde Sando Too'taa' tä' mala tala nais-sam indo kamalammaantaa'. Aka abana deemmi duka' ussi'dim ingganna hupanna pa'sändäsam. Anggam alla'taa' aka tä' Ia deem madosa. ¹⁶Iam too anna la pahallungkia' tä' mahea' anna malaja' le'ba' lako olona okkosam kahajaanna Puang Allataala to sanda mamase. La lakokia' olona anna mala napamoloikia' sola nakamasei ke tapahalluam onna' pa'kamasena.

5Ingganna sando too' dipilei dio mai alla'-alla'na hupatau anna dituho la umbäkke'i solana dio olona Puang Allataala. Indo sando too' umpalanda' bua pemala'na hupatau sola tunuanna anna mala diampunniam dosana. ²Indo sando too' hupatau biasa duka', nasuhum naponnoipi duka' kamalammaam. Iam too anna naissammi ma'penaba mahamme' anna sa'baha' untingngajo to

bulim anna tä' polepi muissam se'la. ³Kahana malammapi duka', nasuhum tä' angga mandi tau senga' napalandasam pemala'na, indo pebaja' dosana, sapo' moi duka' kalena pahallu toi deem pemala'na anna mala diampunniam dosana. [¶]⁴Tä' punala deem mesa hupatau la mala muäkä' kalena mendadi sando too'. Anggam mala mendadi sando too' ke natuhoi Puang Allataala, umba susi Harun yolona. ^{§§}

⁵Susim too duka' Kristus tä' umpomatande kalena mendadi Sando Too', sapo' ma'kale Puang Allataala muäkä'i naua:

“Ikom too Änä'ku;
mengkalao allo temo kupomakaleso
kuua: Kaom too Ambemu.”*

⁶Deempi duka' tisuha' illaam Battakadanna Puang Allataala naua:

“Ikom too inde la mendadi sando sule
lako salako-lakona,
susi sando Melkisedek yolona.”†

⁷Wattunna anna tohhoپی Puang Yesus illaam inde lino, si meoli sumahho illaam sambajanna anna pelauanna längäm Puang Allataala to kuasa la ullappasanni indana muolai kamateam. Anna napehingngii indo pelauanna aka manuhu' anna mengkahea' dio olona Puang Allataala. ⁸Moi anna Änä'nai Puang Allataala Puang Yesus anna tontä liu manuhu' lako Ambena, sapo' indo umpendudum kamasussaam mendadi pepa'guhuam lako kalena diona naaka susi manuhu' lako Ambena illaam ussi'dim kamapi'disam. ⁹Tappana mendadi To Mepasalama' tä' deem sassainna, iya mendadim To Mepasalama'na ingganna hupatau to manuhu' dio olona, anna mala

¶5:3 Sand. 9:7.

§§5:4 Täss. 28:1.

*5:5 Puj. 2:7.

†5:6 Puj. 110:4.

ullambi' katuboam bakahu sule lako salako-lakona. ¹⁰Anna Puang Yesus siam natuho Puang Allataala mendadi Sando Too', susi Melkisedek yolona.

Pepatuduam indana deenni tau soho' boko' illaam mai kasahaniem

5:11-6:12

¹¹Setonganna budapi la pahallu kipaissanniangkoa' diona Puang Yesus mendadi Sando Too', sapo' mapahhi' punala kisi'dim la kipomakalesoangkoa', aka si maela' punala natama pikkihamua' ke deenni dipatuduangkoa'. ¹²Setonganna disanga la malangkoa' umpatudu tau senga', aka masäengkoa' unkatappa'i Puang Yesus. Sapo' tä' di, iya la pahallu polepokoa' dipatudu sule indo pepatuduam si handam uhuna dipe'guhui ke matappa'i tau, aka tä' liupia' umpähäm. Sihhapam liupokoa' änä'-änä' malea pahallupi sumusu, aka tä'pi nabela muande kinande makahha! ¹³Menna-menna pahallupi sumusu, mannassa anna tau ia too änä'-änä' bahinni'pi. Tau susi ia too, tä' liupi naissam napasise'la umbanna hua anna umbanna tä' hua. ¹⁴Sapo' menna-menna malam muande kinande makahha', mannassa anna kasallem. Kalembasanna tau ia too biasam anna naissammi umpasise'la kamapiaam anna kakadakeam.

6 Iam too anna tä'um la angga indo pepatuduam si handam uhuna dipe'guhui diona Kristus tatula' liua'. Sapo' la tapeä hia' ia lalanna anna malakia' umpe'guhui indo pepatuduam diona mentomatua illaam kasahaniem. Tä' la angga dipa'sule-sulei liu indo pepa'guhuam uhu-uhuna dipe'guhui, susinna: ingganna hupatau pahallu la naondo' umpogau' kaha-kaha takeguna anna matappa'i lako Puang Allataala. ²Anna tä' toi la angga dipa'sule-sulei liu pepatuduam diona

ingganna hupanna pantedosam, battu haka umpakumbäi pala' tau, battu haka katibangonganna sule to mate, battu haka pa'tahungkungam sule lako salako-lakona. ³Sapo' la indo hia pepa'guhuam sitahhu'na la tape'guhuia', ke napoelo'i Puang Allataala. ⁴Aka maka' deem tau soho' boko' illaam mai kasahaniem, iya tä'um mala dibaba sule lako katihokongam. Aka tau ia too yolona tubo illaam kamasiäsam anna ma'kale toom ussi'dingam mana' pa'kamasena Puang Allataala, anna bali toi mangngala taba illaam ussi'dingam kakuasaanna Penaba Maseho. ⁵Anna ma'kale toi muissanni maaka susi kamapiaanna Battakadanna Puang Allataala, anna balim nasi'dim indo kakuasaam to la disi'dim dio lino tando lako. ⁶Iya maka' puham nasi'dim ingganna ia too anna soho' boko' ohi, iya tä'um la mala dibaba sule lako katihokongam. Aka mala diua sihhapam umpäso' penduam Änä'na Puang Allataala yabo kaju sitambem anna napakasihi'-sihi'i dio olona tau buda.

⁷Aka lako litä' to si bassa' nauhanni anna umpakende' tanangam la ma'gunanna lako to unghähäi, mannassa anna litä' ia too la natamba' Puang Allataala. ⁸Sapo' maka' angga umpakende' ingganna humpu' keduhi, litä' ia too tä' deem gunana anna bambannam natädo Puang Allataala. Ma'katampasanna la ditunu mampu'.

⁹Sapo' ikoa'-iko inggannakoa' solasubungku to kupakamaja, moi anna ma'kada susikam inde, sapo' kikatappa'i si'da-si'da kiua tä' siakoa' iko la susi indo litä' takeguna. Aka pa'pogausammua' sihondoi indo si napogau' to puha dipasalama'. ¹⁰Aka Puang Allataala tä' la mala disangai to tä' naissam muundu' lollä. Aka tä' tia la nakalembei ingganna pengkähämua'

sola pa'kamasemu lako kalena. Indo pa'kamasemu lako Puang Allataala tandaam illaam umpamoloikoa' solamu to matappa' indo si umpogau'a' lessu-lessu'na sule lako temo. ¹¹Kipemulu punala anna bassa' liukoa' umpalakoi kaha-kaha ia too sule lako ma'katampasanna, nasuhum tä' mala tala ullambi'a' ingganna indo to umpemmitai la nabeengkoa' Puang Allataala. ¹²Tä' kipohäe ke tä'koa' bassa' illaam ingganna-ingganna sia. Sapo' potandengannia' indo to unkatappa'i liu Puang Allataala anna ponno kasa'bahasam, lambi' natahima ingganna indo puha nadandiam.

**Tatibeho susu' tatidende katonam
pa'dandianna Puang Allataala**

6:13-20

¹³Wattunna ma'dandi Puang Allataala lako Abraham, iya ma'pinda anna mala mannassa la napasule lako indo pa'dandinna. Sapo' kahana nakumbä langi' nahande tana tä'um deem la matande puha ia anna la kalena, iya kalenam napa'pindai. ¹⁴Naua ma'dandi lako Abraham: "Tä' mala tala kubeengko tamba' sanda silapi' anna la kupalohom banne taummu." ¹⁵Iya sa'baha' lium Abraham muampai indo pa'dandiam la diganna'i lambi' dipadokkoam lisu pala'na. ¹⁶Maka' ma'pinda mesa tau, mannassa anna umpa'pindai to tando längänna. Anna iam too indo pa'pindana umpakatoto' pa'dandinna anna ia toi umpa'dei kasipengkaam. ¹⁷Ma'pinda duka' Puang Allataala lako Abraham sola ingganna pessubunna aka naua anna mala naissam manappa naua tä' mala tala

napasule lako indo to puha nadandiam. ¹⁸Indo pa'pindana anna pa'dandianna inna tä' sia la tieli', aka tä' Ia deem la kaägä'-ägä' Puang Allataala. Ma'dandi anna ma'pinda anna mala dipakatoto' kita penabanta to umpentionganni Puang Allataala anna la tontä liungkia' mahannu anna umpemmitai indo to puha nadandiangkia'. ¹⁹Kapahhannuam ia too sihhapam andihi matoto' kalando tilamum mendadi pengngandasanta anna mala matoho penabanta. Anna indom too kapahhannuanta nasuhum malakia' muola tahhu' pesapa'na suhuga, lambi' landa'kia' lako olona Puang Allataala. ²⁰Puang Yesus umpendioloangankia' längäm ongeam ia too anna mendadi Sando Too' sule lako salako-lakona, susi Melkisedek yolona.

Tulasanna sando Melkisedek

7:1-10

7 Indo Melkisedek mesa tomahaja dio kota Salem yolona anna sandonapi duka' Puang Allataala To Handam Matande. Wattunna anna ma'pasulei Abraham dio mai pa'bundusam puhanna untaloi sanaka-naka tomahaja, iya natammuim Melkisedek anna napa'lambeanni. ²Puhai ia too, naäläim Abraham bahe sapulona indo pamuhunna anna nabeenni Melkisedek. (Indo sanganna Melkisedek kalembasanna: "Tomahaja malolo ma'pahenta". Anna si diuaampi duka' "Tomahaja to mepomasannam," aka tomahajanna kota Salem, anna Salem kalembasanna: "Mepomasannam.")^f ³Situhu' tulasanna, tä' ia deem diissam ambena anna indona anna tä' toi

³6:19 Illaam indo bahum kapenombaam napapia Musa yolona, deem pesapa' ullabai hupatau indana malai tama bäbä indo tambim handam maseho, ongeanna Puang Allataala. Sapo' kitaa'-kita aka mahannungkia' lako Puang Yesus, iya malangkia' tä' mahea' lako olona Puang Allataala, aka tä'um deem ullaibaikia'. Sand. 16:2.

^f7:2 Kad. 14:17-20.

deem diissam nene to naponene. Anna tä' deem muissanni kasubunganna anna kamateanna. Iya mala diua indo Melkisedek susi liu Änä'na Puang Allataala aka bassim mendadi sando sule lako salako-lakona.

⁴Dadi, maka' dipasalui penaba indo Melkisedek, iya tä' deem pada samatande, aka indo Abraham muäläi bahe sapulona ingganna indo pamuhunna anna nabeenni, moi anna Abraham kabuttuanna to Yahudi. ⁵Situhu' ätoham illaam peadasanna to Yahudi, ingganna pessubunna Lewi to mendadi sando pahallu untahima bahe sapulona pallolonganna to Yahudi, moi anna sahapui sangngim pessubunna Abraham. ⁶Sapo' indo ia Melkisedek taia ia pessubunna Lewi. Moi anna susi, sapo' untahima siam duka' bahe sapulona pamuhunna Abraham. Anna moi anna Abraham nabeem pa'dandiam Puang Allataala, sapo' Melkisedek di umpa'lambeam Abraham. ⁷Anna taissanna' pada-pada taua: indo to umpa'lambeam solana, matande puha ia anna la indo to dipa'lambeam. ⁸Ingganna indo sando pessubunna Lewi si untahima bahe sapulona pallolonganna solana to Yahudi. Anna tau ia too sangngim hupatau inna to la mate. Sapo' indo ia Melkisedek to untahima bahe sapulona pamuhunna Abraham, mala diua to tubo batu ia. ⁹Indo ingganna sando pessubunna Lewi to si untahima bahe sapulona pallolonganna solana, mala diua mangngala tabam duka' wattunna Abraham umbeem Melkisedek bahe sapulona indo pamuhunna. ¹⁰Aka moinna anna pa'depi Lewi eta too, sapo' mala diua mangngala tabam duka'. Aka wattunna anna sitammui Abraham nene to naponene anna Melkisedek, eta too

indo Lewi illaampi kalena Abraham aka la mendadi pessubunna ke dako'i.

**Puang Yesus Sando
Too' susi Melkisedek**

7:11-28

¹¹Ia anna napadeenganni Puang Allataala sandona to Yahudi aka anggam anna malai napalako to Yahudi indo pepaondongam illaam peadasanna ke deenni sando umpa'palakoanni. Sapo' indo pengkähänganna sando yolona tä' mala umpomalolo hupatau dio olona Puang Allataala. Iam too anna pahallum la deem sando senga' taia pessubunna Lewi susi indo sando Harun, sapo' la susi Melkisedek. ¹²Iya maka' la dibala'i ingganna sando pessubunna Lewi, iya tä' duka' mala tala dibala'i indo pepaondonganna. ¹³Indo sando senga', Debatanta Puang Yesus diuaam. Mesa to buttu dio mai too' senga', anna pessubunna too' ia too tä'pi ia deem la diäkä' mendadi sando. ¹⁴Aka taissanna' pada-pada taua indo Debatanta buttu dio mai pessubunna Yehuda. Anna situhu' tula'na Musa indo anna ma'tula'i diona to la mendadi sando, tä' ia deem uhambem kada pessubunna Yehuda.

¹⁵Mannassa anna masiä'um pole' diissam kaha-kaha ia too, aka puham sule mesa sando senga' susi Melkisedek, Puang Yesus-um too diuaam. ¹⁶Tä' diäkä' mendadi sando situhu' pepaondongam illaam peadasanna to Yahudi, sapo' mendadi sando Ia kahana naponnoi kakuasaam katuboanna sule lako salako-lakona. ¹⁷Umba susi puha natula' loppo' illaam Battakada Debata naua: "Ikom too inde la mendadi sando sule lako salako-lakona, susi sando Melkisedek yolona."[§]

¹⁸Dadi tentomai ditampeammi indo pepaondongam yolo, aka malamma

[§]7:17 Puj. 110:4.

anna tä' deem gunana. ¹⁹Aka indo pepaondongam ia too tä' la mala umpasilombum manappa hupatau anna Puang Allataala. Iam too anna dibukkaammakia' dalam bakahu la malanna dihannuam la taola lako olona Puang Allataala.

²⁰Tä' anggam ia too, sapo' situhu'pi duka' pa'pindana Puang Allataala la diäkä' Puang Yesus mendadi sando, sisala sando senga'. ²¹Aka diäkä' la Puang Yesus mendadi sando situhu' pa'pindana Puang Allataala indo anna ma'kadai naua:

“Kao Debata ma'pinda,
anna tä'um la kuhuntu' sule inde tula'ku
kuua:

‘Ikom too inde la mendadi sando sule
lako salako-lakona.’^{**}

²²Pa'pinda iam too inde umpadadi Puang Yesus to umpomannassa pa'dandiam bakahunna Puang Allataala to mapia puha ia anna la indo pa'dandiam yolona.

²³Mane deenni, babanganna sando yolona buda tau umbabai. Mate oi mesa, nabala' oom mesa. ²⁴Sapo' Puang Yesus la tubo liu sule lako salako-lakona. Dadi, mannassa anna tä' ia deem la mala lu lako tau senga' babanganna mendadi sando. ²⁵Iam too anna kuasam sule lako salako-lakona umpasalama' ingganna hupatau to sule dio olona Puang Allataala umpolalam sanganna. Aka inde Puang Yesus tubo liu la sule lako salako-lakona la umpelauam liu tau ia too dio olona Puang Allataala.

²⁶Anna Puang Yesus-um too Sando Too' to inna tapahalluanna'. Aka Ia to maseho, tä' deem dilambi' kasalaanna, anna tä' toi deem dosana. Dipasähä'um dio mai to madosa anna diäkä' längäm ongeam handam matande, tando längänna langi'. ²⁷Tä' ia susi sando

too' senga'. Aka sando too' senga' ia allo-allo umbaba tunuam anna mala diampunniam dosa kalena anna dosana tau buda. Sapo' Puang Yesus Ia anggam pissam umpehumalasam kalena, wattunna anna umbehoi kalena dipatei anna mala diampunniam dosana hupatau. Anna indo pehumala'na la da'da' liu sule lako salako-lakona. ²⁸Indo to diäkä' mendadi sando too' situhu' indo pepaondongam illaam peadasanna to Yahudi abana ponnopi ia kamalammaam. Sapo' indo Ia Änä'na Puang Allataala diäkä' mendadi Sando Too'na ma'hupatau situhu' pa'pindana Ambena, tä' Ia deem sassainna sule lako salako-lakona. Puha ham dibeem Musa indo paondom mane diäkä'i indo Änä'na Puang Allataala mendadi Sando Too'.

Puang Yesus Sando Too' illaam pa'dandiam bakahu

8:1-13

8 Dadi illaam inde tula'ku susi inde pungngu' tannunna: Deemmia' Sando Too'ta tadongkom dio tandai kananna Puang Allataala To Handam Matande yabo suhuga. ²Anna umpalakom pengkähänganna illaam ongeam maseho, battu diua bahum kapenombaam tungka ianna napapia Debata yabo suhuga taia hupatau umpapaii.

³Lako si mesa-mesa sando too' diäkä' la umpehumalasam bua pemala'na hupatau anna tunuanna dio olona Puang Allataala. Susim too duka' Puang Yesus Sando Too'taa', pahallu duka' deem napehumalasam. ⁴Hapanna la illaam liupi inde lino, mannassa anna tä'i la mendadi sando, aka deemmi sando si umpehumalasam bua pemala', indo natuntu' pepaondongam illaam peadasanna to Yahudi. ⁵Indo sando

^{**}7:21 Puj. 110:4.

umpalako pengkähänganna illaam ongeam maseho inde lino. Anna ongeam ia too mannassa anna taiapi indo ongeam maseho tungka ianna yabo suhuga, sapo' mane pa'pasusianna bää. Dadi makaleso pa'pasusianna bää anna ia too sihondoi indo puha napokada Puang Allataala lako Musa yolona wattunna anna umpake'de'i bahum kapenombaam naua: "Pengkilalai manappai: la umpasuii indo puha kupaitaiko yabo tanete."^{††} ⁶Sapo' indo ia pengkähänganna Puang Yesus matande puha ia anna la pengkähänganna ingganna sando inde lino. Susim too duka' indo pa'dandiam bakahunna Puang Allataala lako hupatau nakähä Puang Yesus matande puha ia anna la indo pa'dandiam yolo. Aka mapia puha ia indo la talambi' umpolalam indo pa'dandiam bakahu.

⁷Maka' hapanna la tepum indo pa'dandiam uhuna, mannassa anna tä'um la manggi' umpadeem pa'dandiam kapenduanna Puang Allataala. ⁸Sapo' deem kasalaanna umma'na nalambi' Puang Allataala, aka tä' natuhu'i issinna indo pa'dandiam nasuhum ma'kada naua:

"Pissam wattu la kupadeem pole pa'dandiam bakahu lako ingganna to Yahudi, susi to Israel teem to Yehuda.

⁹Tä' la susi indo pa'dandiangku lako nene to naponene wattunna anna kupatettei messubum illaam mai lembäna Mesir.

Tää'i manuhu' lako indo pa'dandiangku, nasuhum tää'im duka' kupailaam penaba.

¹⁰Indem ia indo pa'dandiam bakahungku la kupadeengam to Israel illaam allo la dioloinna:

La kupaalai pikkihanna pahentaku anna la kupatitanam illaam penabanna, lambi' la mendadiä' Debatanna anna la mendadi ia umma'ku.

¹¹Anna tä'um manggi' la umpatudu padanna

battu haka solasubunna la naua: 'Pengkissanniko Puang Allataala.' Aka mengkalao to kasalle sule lako to bahinni',

la sangngim naissammä'.

¹²La kuampunniam kasalaanna, anna la kupa'kalembeim ingganna dosana."^{‡‡}

¹³Puham ma'tula' Puang Allataala naua: "La kupadeem pole pa'dandiam bakahu." Nasangai bakahu aka indo pa'dandiam yolo la ditampeammi. Aka iai too la ditampeammi anna tä'um deem gunana, bambannam tia dipato-hho bää.

Ätoham anna pa'hettengam illaam indo bahum kapenombaam inde lino **9:1-10**

9 Illaam indo pa'dandiam yolona Puang Allataala lako to Yahudi, deem ia duka' pa'hettenganna, anna deem toi duka' ongeam kapenombaam napapia hupatau. ²Indo ongeam kapenombaam mesa bahum dipake'de' dua tambim illaanna. Indo tambim uhuna disangai Tambim Maseho. Illaam tambim ia too deem andihi lampu anna mesa meja si naongei hoti dipehumalasam längäm Puang Allataala. ³Indo tambim tando tama, disangai ia Tambim Handam Maseho. Indo dua tambim disapa' sampim alla'na. ⁴Illam indo Tambim Handam Maseho deem ongeam pehumalasam bulabam dipapia si dipantunui tunuam bubanau'. Deem toi patti disapu'

^{††}8:5 Täss. 25:40.

^{‡‡}8:12 Yer. 31:31-34.

bulabam disangai Patti Pa'dandiam. Indo patti, deem kuhim bulabam illaam kessi manna,^{¶¶} anna illaam toi duka' indo tekkenna Harun to puha kentähe', anna indo dua bebä' batu dipantuli'i sapulo pahentana Puang Allataala. ⁵Yabona indo tutu'na Patti Pa'dandiam dipake'de' dua pa'pasusianna kerub bulabam dipapia.^{§§} Indo kerub umpa'patandaanni diua dio heem kamatandeanna Puang Allataala. Pani'na indo kerub dipatiballa' yabona indo tutu' patti. Indo tutu' patti disangai ongeam diongei diampunni dosana hupatau. Setonganna kalandopi inde tulasam sapo' tä'um pahallu la ditättä' bale mäne' asam temo.

⁶Dipateemmi too diäto' issinna indo bahum kapenombaam yolona. Puhai, iya allo-allom sando mentama indo tambim uhuna umpalako pengkähän-ganna. ⁷Sapo' indo ia tambim kadu-anna, anggam sando too' mala tama. Ia toopa too duka', anggam pissam sa-taum mentama umbaba hahana olo'-olo' napehumalasam anna mala diampun-niam dosa kalena anna dosana tau buda, indo tää'na naägä'i napogau'. ⁸Ätoham iam too naongei Penaba Maseho umpo-makalesoi diua tä'pi deem lalam la tibukka tama indo Tambim Handam Maseho la diongei sipeloloangam Puang Allataala ke deem liupi indo bahum kapenombaam uhuna.* ⁹Ingganna ia too mendadi pehapangam lako kita to tubo wattu temo. Aka moi la tunuam aka, sola bua pemala' senga' napehumalasam hupatau, tala malai ussehoi penabanna

dio olona Puang Allataala. ¹⁰Aka ing-ganna ätoham ia too anggam kaha-kaha diona malanna diande anna diihu', anna tää'na mala diande anna diihu', anna ma'hupa-hupa kabiasaam diona umba-sei kale anna pangkakka'. Ingganna ia too anggam di sesena bätä punti, anna angga mandi dituhu'i sule lako wattunna napadeem Puang Allataala pa'dandiam bakahu.

**Matande puha ia hahana
Puang Yesus dipehumalasam
anna la hahana olo'-olo'**

9:11-28

¹¹Sapo' sulem Kristus mendadi Sando Too' to umbaba ingganna kamapiaam indo puham talambi'.[†] Anna tamam indo bahum kapenombaam yabo suhuga to matande puha ia anna tepu puha anna la indo bahum kapenombaam napapia Musa yolona. Taia pa'papianna hupatau battu diua tä' buttu illaam mai inde lino. ¹²Wattunna mentama Kristus indo Tam-bim Handam Maseho, iya taia hi ha-hana beke laki battu haka hahana änä' sapim nababa la napehumalasam, sapo' haha kalena ia nababa. Anna pissam mandi mentama, tä' pahallu napa'sule-sulei aka indo haha nababa, iam too na-solongangkia' dio mai dosata sule lako salako-lakona. ¹³Situhu' pepaondongam illaam peadasanna to Yahudi, lako to tä' bahassi situhu' peadasam pahallu di-tunu beke laki battu haka sapim laki anna hahana dipippi'iam lako indo tau. Anna deem toi duka' mesa änä' sapim ditunu mampu' anna dialai täiabunna

^{¶¶}9:4 *manna*: Kinande si nabeem Puang Allataala to Israel indo anna illaanni pangngola-lalangam. Täss. 16:32-34.

^{§§}9:5 *kerub*: Sakhupa pesuana Puang Allataala buttu yabo mai suhuga. Indo kerub ma'pani'. Yeh. 1:10, 10:1-17.

*9:8 *ke deem liupi indo bahum kapenombaam uhuna*: kalembasanna, ke tä'pi ditampeam indo pa'dandiam yolo.

[†]9:11 *kamapiaam indo puham talambi'*: illaam sanaka-naka suha' yolona naua ia kamapiaam la dilambi' ke dako'i.

dipasola uwai mane dipippi'ianni lako indo to tä' bahassi situhu' peadasam. Dadi maka' mala haha anna täiabu dipake umbasei hupatau to diangga' tä' bahassi situhu' peadasam, ¹⁴ iya senga'um tia hahana Kristus! Aka pangngundu'na Penaba Maseho to tubo sule lako salakolakona lambi' umbeho kalena Kristus lako Puang Allataala mendadi bua pemala' tä' deem sassainna. Indo hahana Kristus umpomaseho penabanta dio mai ingganna pa'pogausanta tää'na keguna anna malakia' menomba anna umpalako pengkähänganna Puang Allataala Debata tubo.

¹⁵ Iam too kasuhunganna anna Kristus-um unγκähäi indo pa'dandiam bakahunna Puang Allataala. Napateem anna mala ingganna hupatau to natambai Puang Allataala la mala untahima pa'mana' la da'da' sule lako salako-lakona, indo puha nadandi lako umma'na. Ia asanna ia too mala dadi aka puham mate Kristus ussolom hupatau anna mala lappa' dio mai dosana, indo napogau' anna nadakka'pi bata' ulunna indo pa'dandiam yolo.

¹⁶ Maka' deem suha' naongei tadongkonganna kulle la napa'manasam mesa tau ke matei, iya mannassapi mate indo to la ma'mana' mane ditabai indo kulle. ¹⁷ Aka indo suha' tä'pi tia mala dipake ke tubopi indo to la ma'mana'. Matepi tia mane malai dipake. ¹⁸ Iam too anna manggi'um deem hahana olo'-olo' ditunu dipake umpomannassa indo pa'dandiam uhuna. ¹⁹ Umba susi indo napogau' Musa tappana puha umpalambi' ingganna pahentana Puang Allataala lako to Israel. Muala hahana änä' sapim anna hahana beke laki sola uwai anna napasito'bo'-to'bo'i. Puhai, mualam sahhupa humpu' isanga hisop anna

muala polepi duka' bulu domba malea anna mane nahamme dokko indo haha mane napippi'ianni indo suha' naongei tituli' pahentana Puang Allataala anna ingganna tau to dio heem eta too. ²⁰ Napasindum ma'kada naua: "Iam too inde haha umpomannassa pa'dandianna Puang Allataala, indo la pahallua' untuhu'i."[†] ²¹ Napasusi siam duka' muala haha anna napippi'ianni indo bahum kapenombaam anna ingganna pangkakka' si dipake mehumala'. ²² Abana inna situhu' pepaondongam illaam peadasanna to Yahudi saidi' tahaha asam dipake ussehoi ingganna aka-aka. Anna anggam anna malai diampunni dosa ke dipatitolloi haha.

²³ Indo bahum kapenombaam yolona sola ingganna pangkakka'na pa'pasusianna bäbä indo tungka ianna yabo suhuga. Ingganna ia too pahallu hahana olo'-olo' dipehumalasangam Puang Allataala dipake disehoiam. Sapo' indo ia tungka ianna yabo suhuga pahallu la deem bua pemala' matande puha ia anna la hahana olo'-olo'. ²⁴ Aka Kristus Ia tä' lu tama ongeam maseho pa'papianna hupatau illaam inde lino, indo pa'pasusianna bäbä tungka ianna. Sapo' lu tama Ia suhuga umpellambi'i Puang Allataala napa'kadaangkia'. ²⁵ Situ' peadasanna to Yahudi, pissam sataum pahallu mentama Tambim Handam Maseho sando too' umbaba hahana olo'-olo'. Sapo' Kristus Ia tä' napa'sule-sulei mentama umpelumalasangam kalena. ²⁶ Aka maka' la ma'pogau' susi sando too'na to Yahudi Puang Yesus, mannassam tia anna la pembudai umpassam kamapi'disam mengkalao dipadadinna inde lino. Sapo' inde ham la kasuppisanna lino mane sulei pissam umbeho kalena dipatei anna mala disapuiam dosana

[†]9:20 Täss. 24:1-8.

hupatau. ²⁷Inde hupatau inna puha napa'tantum Puang Allataala la anggam pissam mate. Puhai too nahotto'um. ²⁸Susim too duka' Kristus anggam pissam mate mendadi bua pemala' la ussapui asam dosana buda tau. Anna la sule pole ma'penduanna, sapo' taiam dosa la nabumbu' napempa'deam, sapo' la angga ham umpasalama' to umpemmitai kasuleanna.

**Tunuam tä' mala umpa'dei
dosa, anggam sahhupa
hahana Yesus Kristus**

10:1-18

10 Indo pepaondongam illaam peadasanna to Yahudi mala diua gamba'na bäbä hi tia indo kamapiaam la nababa Kristus, aka taiapi tungka ianna. Indo paondom ia too inna tä' sia la mala umpomalolo indo to sule dio olona Puang Allataala umbaba bua pemala'. Moi anna taum-taunni umbaba bua pemala'na susinna siam indo taum lessu' napehumalasam. ²Hapanna la malam masapu dosana indo to mehumala' dio olona Puang Allataala, mannassam tia anna tä'um la umpenaba-nabaam liu dosana anna tä'um la manggi' mehumala' pole. ³Sapo' abana tä' susi. Aka indo taum-taum umbaba bua pemala'na, angga hi umpakilala indo to mehumala' diona dosana. ⁴Aka abana tä' tia deem la mala ussapui dosa hahana sapim anna beke.

⁵Iam too kasuhunganna anna ma'kadam Kristus lako Puang Allataala wattunna anna mentamai inde lino naua:

“Taia tunuam sola bua pemala' senga' umpemmitai,
sapo' indo bätä puntingku to
umpatokaannä',

iam too la dipehumalasam matim.

⁶Taia toi tunuam ditunu mampu' battu haka bua pemala' pebasei dosa la umpomasannam penabammu.

⁷Anna mane kuua: ‘Indemä', Puang Allataala!

Suleä' la umpalako pa'elo'mu umba susi puha tisuha' illaam Bat-takadammu diona kaleku.”[¶]

⁸Indo tula'na Kristus lako Puang Allataala naua: “Taia tunuam sola bua pemala' senga' umpemmitai, anna taia toi tunuam ditunu mampu' battu haka bua pemala' pebasei dosa la umpomasannam penabammu.” Ma'kada susi moi anna ingganna ia too pahallu dipalako situhu' pepaondongam illaam peadasanna to Yahudi. ⁹Puhai, naua pole oom: “Indemä', suleä' la umpalako pa'elo'mu.” Iya napa'dei asammi Puang Allataala indo si dipehumalasam yolona tunuam sola bua pemala' senga', anna napa-bala'i kamateanna Yesus Kristus. ¹⁰Anna abana inna Yesus Kristus umpasule lako pa'elo'na Puang Allataala, lambi' pissam liu umpehumalasam bätä puntinna mendadi bua pemala' dio olona, nashum malakia' mendadi maseho sule lako salako-lakona.

¹¹Ingganna sando illaam peadasanna to Yahudi ke'de' allo-allo dio olona ongeam pehumalasam umpalako pengkähänganna. Napa'sule-sulei umbaba bua pemala' susi siam indo bua pemala'na lessu', moi anna tä' siam la mala umpa'dei dosa indo bua pemala'na. ¹²Sapo' Kristus Ia anggam pissam liu umbeho kalena lako olona Puang Allataala dipatei mendadi bua pemala' ussapui dosata, anna la tontä lium sule lako salako-lakona. Puhai ia too, muokko'um yabo ongeam handam matande dio tandai kananna Puang Allataala. ¹³Anna etam too naongi

[¶]10:7 Puj. 40:7-9.

muampai wattunna ingganna balinna la napopa'bukku Puang Allataala dio olona lambi' nahondoi dokko. ¹⁴Indo pissam liu umbeho kalena dipatei mendadi bua pemala', iam too nasuhum ingganna hupatau to napäsähä' mendadi umma'na to maseho tä'um deem sassainna dio olona Puang Allataala sule lako salako-lakona. ¹⁵Anna nasa'bii toi duka' Penaba Maseho kaha-kaha ia too naua: ¹⁶“Iam too inde pa'dandiam bakahu la kupadadiam lako hupatau illaam allo la dioloinna.

La kupaalai penabanna pahentaku anna la kupatitanam illaam pikkihanna.”

Susim too kadanna Debata.

¹⁷Anna mane naua:

“Tä'um la kupaillaam penaba dosana hupatau anna ingganna gau' kadakena.”^s

¹⁸Dadi, aka diampunnim ingganna dosa sola gau' kadake, nasuhum tä'um manggi' deem aka-aka dipehumalasam la disapuiam dosa.

Kamanontongam lako

Puang Allataala

10:19-39

¹⁹O inggannakoa' solasubungku, kati-olloam hahanam too Puang Yesus nasuhum tä'ungkia' la mahea' anna bata-bata le'ba' tama Tambim Handam Maseho, battu diua mengngolo lako Puang Allataala. ²⁰Malangkia' lako olona Puang Allataala aka nabukkaam-makia' Puang Yesus lalam bakahu taola lako katuboam bakahu. Aka wattunna anna dipatei Puang Yesus, indo bätä

puntinna umpessulle indo pesapa' to melabai, anna mendadii lalam lako olona Puang Allataala. ²¹Anna Ianna' mendadi Sando Too'ta to matande to unkapalai banuanna Puang Allataala battu diua ingganna umma'na. ²²Dadi, tapellambi'inna' Puang Allataala sola sakalebu penaba anna ponno kamat-appasam. Aka penabanta puham naba-sei Puang Yesus nasuhum tä'um la tapenaba-nabaam liu dosata, anna bätä puntinta puham nadio' uwai mahändä.**

²³La pahallukia' tontä liu muanti manda' untobe matoto' indo pahhannuanta to puha taakui, aka tä' mala tala umponnoi pa'dandianna Puang Allataala. ²⁴Anna pahallua' tapenabaam la taaka susi anna malakia' sigaha' mesa sola mesa lambi' la ungkamaseikia' padanta anna la umpalakokia' gau' mapia. ²⁵Tä'kia' la lembe ma'hempum ma'sambajam, indana susikia' indo si napogau' tau piha tä'um lao ma'sambajam. Sapo' la tontä liukia' sipakatoto' mesa sola mesa. Anna la tuttuam bassa'kia' umpalakoi, aka tuttuam mahuku'um kasuleanna Debata ma'penduanna.

²⁶Aka maka' balingkia' dipaissanni indo kaheba kamaloloam buttu yabo mai Puang Allataala anna tontä liu hia' taägä'inna umpogau' dosa, mannassa anna tä'um deem aka-aka pole la mala dipehumalasam la disapuiam dosata.

²⁷Angga mandam tia la mahea'kia' muampai pahhottosanna Puang Allataala anna indo api tapi'de-pi'de to la muä'bäi to umbalii. ²⁸Lako tau yolona to untumpu pala' pepaondongam illaam peadasanna to Yahudi, mannassa

§10:17 Yer. 31:33-34.

**10:22 bätä puntinta puham nadio' uwai mahändä: Indo sando to mengkähä illaam Banua Debata pahallu bahassi situhu' peadasanna to Yahudi. Dadi pahallu membase umpake uwai mahändä anna haha olo'-olo' pahallu dipippi'iam kalena anna mala bahassi. Susim too duka' tentomai ingganna to matappa' nasehoi Puang Allataala umpolalam kamateanna Puang Yesus lambi' mala menomba lako anna ma'sambajam. Batai Täss. 30:19-21; Sand. 8:6, 30; Tit. 3:5; Ibr. 9:13.

anna tä'um diihusam uwai sumule sapo' dipahuai pa'tahungkungam lambi' dipatei ke deenni dua tau battu haka tallu sisa'bi-sa'biam. ²⁹Dadi maka' susi mabanda'na pa'tahungkunganna to untumpu pala' pepaondongam ia too, iya senga'um tia mabanda'na pa'tahungkunganna to umpa'lullu' Änä'na Puang Allataala anna muangga' mesina-sina haha titollona Kristus, indo to umpomannassa pa'dandianna Puang Allataala anna to la umpomaseho tau ia too. Anna untunaipi duka' Penaba Maseho to ma'kamase. ³⁰Aka taissammia' indo to nakabuttui inde Battakada naua: “Kao ham umpabala'i! Kao ham umpahuai pa'tahungkungam.” Anna naua polepi: “Debata la uhhotto' umma'na.”^{††}

³¹Tä' deem pada samapi'di' ke metahungkunni Puang Allataala Debata tubo.

³²Pengkilalai manappaia' maaka susi pa'palakoammua' yolona wattunna anna mentamakoa' kamasiäsanna Puang Allataala. Wattu eta too pembudakoa' nahua kamasussam. Moinna anna susi, sapo' tontä liukoa' manontom lako Debata. ³³Pembudakoa' dipakolo'-kolo'i anna didahha dio olona tau buda, anna deem tookoa' umpasolai to didahha lambi' didahhako' duka'. ³⁴Si kämbää' buamu lako to ditahungkum. Anna si masannam mandia' penabammu ke di-happaikoa' aka-akammu, aka muissanna' muua deempi muampuam mapia puha ia anna la da'da' liu sule lako salakolakona anna la indo aka-akammu inde lino. ³⁵Dadi daa ullappa'ia' indo kamatappassammu, aka la kasallea' sahomu yabo suhuga. ³⁶La pahallukoa' tontä liu sa'baha' muoloi ingganna-ingganna sia. Aka maka' umpateenna',

iya la malakoa' too tontä liu umpalako pa'elo'na Puang Allataala, lambi' la untahimaa' indo puha nadandiangkia'. ³⁷Aka deem tisuha' illaam Battakada Debata naua:

“Tä'um la masäe anna sulem indo to dipemmitai la sule;
tä' la napakadende-dende kasuleanna.

³⁸Anna iai too kusangai malolo iam ullolongam katuboam bakahu kahanana kamatappassanna.

Sapo' maka' deem soho' boko',
tä' la masannam penabangu lako.”^{‡‡}

³⁹Sapo' kitaa'-kita taiakia' to soho' boko' nasuhum ullambi' katilakaam. Sapo' kitaa'-kita to matappa'ungkia' nasuhum ullambi'kia' kasalamasam.

Tulasanna diona to matappa'

11:1-40

11 Indo kamatappassam, kalembasanna dikatappa'i si'da-si'da diua tä' mala tala sule lako indo to dihannuam, anna dihannuam si'da-si'da la dilambi' indo to dipemmitai moinna anna tä'pi deem diita. ²Kamatappasannam too indo nene to diponene yolona, nasuhum masannam penabanna Puang Allataala lako.

³Kamatappasantam too nasuhum taisam taua langi' anna lino sola ingganna issinna kadanna Puang Allataala umpadadii. Iam too anna diissammi diua ingganna inde aka-aka diita tentomai napadadi dio mai indo to tä' diita.

⁴Kamatappasannam too Habel nasuhum mapia puha ia bua pemala'na längäm Puang Allataala anna la Kain. Anna kamatappassanna toi nasuhum mala ia nasangai Puang Allataala to malolo. Ia anna diissanni diua to malolo aka natahima Puang Allataala bua

^{††}10:30 Pass. 32:35-36.

^{‡‡}10:38 Hab. 2:3-4.

pemala'na. Moi anna puham mate Habel, sapo' indo kamatappasanna tontä liu mepakilala sule lako temo.

⁵Kamatappasannam too Henokh nasuhum tä' ia deem muolai kamateam, sapo' tiäkä' tubo ia längäm suhuga. Tä' deem tau moi podo la mesam la ullambi'i, aka ma'kale Puang Allataala muäkä'i längäm suhuga. Wattunna anna indepi lino deem ussa'bii naua: "Mesa to umpomasannam si'da-si'da penabanna Puang Allataala."[¶] ⁶Tä' deem moi podo la mesa tau la mala umpomasannam penabanna Puang Allataala ke tä'i deem kamatappasanna. Aka menna-menna maelo' sule dio olona Puang Allataala, pahallu nakatappa'i naua deem Puang Allataala, anna nakatappa'i toi naua la ma'kale Puang Allataala untamba' ingganna tau to umpeäi sola ponno penaba.

⁷Kamatappasannam too Nuh nasuhum untuhu'i pahentana Puang Allataala wattunna anna natulasam loppo'i indo kaha-kaha tuli tadeempi diita. Sapo' natuhu'i siam Nuh, nasuhum umpapia mesa kappala' lambi' tä' ia tallam sahapui. Kahana kamatappasanna Nuh nasuhum napomalolo ia Puang Allataala anna dipassala ia ingganna issinna lino.

⁸Kamatappasannam too Abraham nasuhum manuhu' lako Puang Allataala wattunna anna natambai anna nasuai lako mesa botto mambela la namanasam ke dako'i. Moinna anna tä'pi deem naita botto ia too, sapo' tontä siam manuhu'. ⁹Anna kamatappasanna toi nasuhum naaku tohho dio indo botto mambela to puha nadandiam Puang Allataala mendadi to messihuhu. Tohho illaam bahum dio, anna susi siam duka' Ishak änä'na anna Yakub ampona. Indo to dua iam too ullombunganni pa'dandiam ia too.

¹⁰Ahu' liu tohho illaam bahunna Abraham, aka umpemmitai indo kota matoto' to napattuju anna napapia Puang Allataala yabo suhuga.

¹¹Anna kamatappasanna toi duka' Abraham nasuhum mala kebättä Sara anna undadianganni Abraham mesa muane-ane, moi anna matusse'um Abraham anna tämänä ia Sara. Mala dadi kaha-kaha ia too aka nakatappa'i si'da-si'da Abraham naua: "Tä' mala tala umpasule lako pa'dandianna Puang Allataala." ¹²Moinna anna sihhapammi diom ba'ba talumbä Abraham wattu eta too, sapo' mentale hi pessubunna susi budanna bintä yabo langi' anna susi budanna bungim dio bihim le'bo'.

¹³Ingganna tau ia too matappa' liu sule lako matena. Tä' ia nalambi' indo pa'dandianna Puang Allataala lako kalena, sapo' sihhapam naita mambelam anna natilalla'i aka naissam naua la napasule lako ke dako'i. Anna naakui naua: "Kami'-kami' messihuhukam inde lino, anggam kiongei bäbä ma'dende." ¹⁴Ingganna to ma'tula' susi ia too, mannassa anna muinaba-nabai ongeam la mendadi botto litä'na la naongeti tohho. ¹⁵Indo botto nainaba-naba taia indo to puha napellei. Aka maka' la ia, mannassa anna tä'i deem la ullabai ma'pasule sule lako. ¹⁶Sapo' mannassa anna botto mapia puha ia nainaba-naba, indom too botto yabo suhuga diuaam. Iam too kasuhunganna anna tä'um masihi' Puang Allataala ke diuaanni Debatanna tau ia too, aka ma'kalem Puang Allataala umpatokaanni mesa kota yabo suhuga la naongeti tohho.

¹⁷⁻¹⁸Kamatappasannam toi duka' Abraham nasuhum ahui' si'da-si'da la untunu Ishak napehumalasam wattunna anna napangngitai Puang

[¶]11:5 Kad. 5:21-24.

Allataala kamatappasanna. Moi anna puham nadandi Puang Allataala naua: “Ishak la naongi buttu pessubummu situhu' pa'dandiangku,”^{§§} sapo' ahu' siam Abraham la untunu änä' mesanna napehumalasang. ¹⁹Nakatappa'i si'da-si'da Abraham naua kuasa Puang Allataala la umpatubo sule Ishak ke balim mate. Anna mala diua sihham naala diom mai kamateam Ishak Abraham.

²⁰Kamatappasannam too Ishak, nasuhum umpa'lambeam Yakub sola Esau diona indo la dadi lako kalena illaam allo la naoloinna.

²¹Kamatappasannam too Yakub indo la mate kalem, nasuhum umpa'lambeam dua änä'na Yusuf. Wattu eta too ke'de' umpendu'dunni tekkenna menomba längäm Puang Allataala.

²²Kamatappasannam too Yusuf indo la mate kalem nasuhum natula' loppo' la katässusanna to Israel illaam mai lembäna Mesir. Anna ma'pakahi'dipi duka' lako solasubunna naua: “La umbabaa' too bukungku ke umpelleinna' inde Mesir.”

²³Kamatappasannam too tomatuanna Musa nasuhum umbuni Musa tallu bulam indo anna subunni. Tä' ungkahea' pahentana tomahaja Mesir anna naita tä' deem pada samapia indo änä'-änä'.

²⁴Kamatappasannam too Musa nasuhum moka diuaam ampona tomahaja Mesir tappana kasalle. ²⁵Napohäe leko' ia ke sola-solai umma'na Puang Allataala umpendudum kamasussaam anna la tubo masannam illaam kamadosaam indo to la anggam säpäi' nasi'dim. ²⁶Napemapiaam puha ia Musa ke ditellei kahana kamatappasanna lako To dilanti' la mepasalama' anna la uhhempum kulle dio lembäna Mesir, aka napemmitai indo saho la nabeem

Puang Allataala ke dako'i. ²⁷Anna kamatappasanna toi Musa nasuhum tä' deem ungkahea' aha'na tomahaja le'ba' umpellei Mesir. Le'ba' tamessaile kanam tamessaile kaihi aka mato-mato muitam Puang Allataala to tadiita. ²⁸Kamatappasanna toi Musa nasuhum umpalako allo Kalappasannam anna ussua to Israel la ussui tondom ba'bana hahana änä' domba anna mala tä' dipatei änä' uluana napatei indo malaika' to umbaba kamateanna änä' ulua.

²⁹Kamatappasannam too to Israel nasuhum mala ullambam Le'bo' Malea mabangi litä' naola aka napasisähä' Puang Allataala uwai le'bo'. Anna indo ia to Mesir, nasikuku'i ia indo uwai sisähä' tappana nasändä' duka' la nalambam.

³⁰Kamatappasannam too to Israel nasuhum hubä'-hubä' bala tembo'na kota Yerikho tappana kapitunna allona si napenggulinni. ³¹Kamatappasannam too Rahab nasuhum tä' dipasipatei to umbali Puang Allataala, aka untahima manappa indo to nasua Yosua le'ba' ma'pesi'dim lako kota Yerikho. (Indo Rahab mesa baine passunda' dio Yerikho.)

³²Setonganna, budapi tau senga' la mala kutula' kamatappasanna kela daa tä'um deem wattungku, susinna Gideon, Barak, Simson, Yefta, Daud, Samuel anna budapi nabi. ³³Kahana kamatappasannam too nasuhum deem mala untaloi sanaka-naka tomahaja, deem ma'pahenta sola undu' lollä, deem untahima pa'dandianna Puang Allataala, deem tikambu bäbä sädäna singa buda naoloi, ³⁴deem umpi'dei hompom ma'nala-nala, deem mala lappa' dio mai pala' limanna to ma'pa'dam, deem malu'bä'um kalena sapo' mala mendadi matohhä, deem matitta illaam pa'bundusam, anna deem untaloi ingganna sohodadunna

§§11:17-18 Kad. 21:12.

balinna. ³⁵Anna kamatappasannam too sanaka-naka baine nasuhum dipatuboam sule to matena.

Sapo' deem toi duka' tau ahu' di-dahha sampe mate kahana kamatap-pasanna. Moka la dilappasam aka ahu' mate anna maelo' la dipatubo sule anna mentamai katuboam mapia puha. ³⁶Deem ditelle anna ditembe' talukum, deem dihante bassii anna dipatamai tahungkum. ³⁷Deem dileba'i batu sampe mate, deem disasa' gahagaji sampe polo tängä, deem toi dibatta pa'dam. Deem kalao-lao angga lollo' domba battu haka lollo' beke napa'poheba, deem mehio-hio katuboanna, deem didahha anna deem dipakamase-mase. ³⁸Deem angga kalao-lao lako pohiallasam, deem längäm tipatanetena, deem si tohho illaam bäbäm leä anna deem lu dokko gahoä. Setonganna inde lino tä' sihatam la naongi aka sangngim to mapia gau' si'da-si'da ia.

³⁹Ingganna tau ia too umpomasannam penabanna Puang Allataala kahana kamatappasanna. Moi anna susi sapo' tä'pi deem moi podo la mesam ullambi' indo puha nadandiam Puang Allataala, ⁴⁰aka deem pattujunna Puang Allataala mapia puha lako kitaa' umma'na. Pattuju ia too puha ham tubo sule Puang Yesus mane tepu asanni umma'na Puang Allataala, susi indo to matappa' yolona teem kitaa' tentomai.

**Puang Allataala unnännä'
to nakamasei anna
ussämbä'i ingganna änä'na**

12:1-13

12 Tä' deem pada sabuda indo ampe'ta ussangangkia' nasuhum kutulasangkoa' kuua: La taäläi asanna' dio mai kaleta ingganna

aka-aka to la ullabaikia' anta tibe ingganna dosa to umputu'kia'. Anna pahallukia' tamessaile kanam tamessaile kaihi umpasatutui penabanta indo passilumbaam di ada' napatokaangkia' Puang Allataala. ²La pahallukia' umpasatutu penabanta lako Puang Yesus to umpadeem kamatappasanta anna to umpatepui. Tä' deem tikamellum Puang Yesus wattunna ussi'dim kamapi'disam yabo kaju sitambem. Anna moi anna tä' deem pada sadipa'kasihisam ke matei tau yabo kaju sitambem, sapo' tä' ia deem napikki'. Aka anggam ia napikki' diona katilallasam la nasi'dim illaam allo di dako'na. Anna tentomai muokko'um yabo ongeam handam matande dio tandai kananna okkosam kahajaanna Puang Allataala. ³Penabaam siaia' too indo kamasussaam nasi'dim Puang Yesus wattunna nabali anna napakamase-mase buda to madosa. Aka maka' umpenabaanna', iya tä' la manennea' penabammu anna tä' tookoa' la kattu hannu. ⁴Aka illaam muebakoa' kamadosaam, tä'pi deem dipatitolloa' hahamu susi Puang Yesus. ⁵Anna daa ungkalembei indo kada pepakatoto'na Puang Allataala lako ikoa' änä'na, naua: "Oa' änä'ku, daa umpa'bahinni'i pepanännä'na Debata, anna tä' tookoa' la kattu hannu ke nasossokoa'.

⁶Aka Debata unnännä' to nakamasei, anna ussämbä'i ingganna to nasangai änä'na."^{*}

⁷La tontä liukoa' manontom muolai kamasussaam aka mesa hi tia pepanännä' anna pesämbä' lako kalemua'. Aka illaam ia too nanännä'koa' anna nasämbä'i Puang Allataala umba susi mesa ambe unnännä' anna ussämbä'i änä'na. Aka

*12:6 Ayb. 5:17, Pep. 3:11-12.

la deem daka tia änä' tä' la napateem ambena!⁸ Aka maka' tä'koa' la nanännä' anna nasämbä'i Puang Allataala susi änä' senga'na, iya iam tia isanga taiakoa' änä' ikalena sapo' änä' bulekoa' dipa'kabuhungam.⁹ Ambetaa' duka' illaam inde lino anna nanännä'kia' sola nasämbä'i lambi' tapa'kasallei, iya senga'um ia Ambetaa' to umpuängam sungga'ta. La pahallukia' manuhu' puha ia dio olona anna mala ullambi'kia' katuboam bakahu.¹⁰ Tomatuanta illaam inde lino anggam sanaka taunna nanännä'kia' anna nasämbä'i, sapo' anggam indo situhu' mapianna nasi'dim napatuduangkia'. Sapo' Puang Allataala la nanännä'kia' anna nasämbä'i situhu' indo la tapomapianna, anna malakia' mendadi maseho susi kalena.¹¹ Abana ke mahassampakia' dinännä' anna disämbä'i tä'kia' masannam, anggam mapi'di' tasi'dim. Sapo' puhakia' too dinännä' anna disämbä'i, iya ungkembuaammi kamasannangam penaba anna pa'palakoam malolo illaam katuboanta.

¹² Iam too anna tä'ungkoa' la mala malamma liu sapo' la umpomatohonna' penabammu anna umpakatoto' kamatapassammu, indana sihhapangkoa' to malu'bä' limanna anna lumalla' guntu'na.¹³ Ola lako liukoa' lalam malolo anna mala natuhu'koa' indo solamu to malammapi kamatapassanna lambi' tä' madomi' metobä, sapo' la matoto'um pole' kamatapassanna.

**Tä' la ditumpu pala' Puang Allataala
to mepa'kadai yabo mai suhuga**

12:14-29

¹⁴ Peäia' lalanna anna malakoa' siolaam liu padammu hupatau, anna

umpeä toia' duka' lalanna anna masehoi katuboammu. Aka tä' tau mala silambi' Debata ke tä'i maseho katuboam.¹⁵ Jagai manappaia' indana deennia' solamu tä' ullambi' mana' pa'kamasena Puang Allataala. Anna la unjagai toia' duka' indana deenni kende' illaam alla'alla'mua' to la umpakende' kahusagam lambi' la ungdakakei buda tau. Aka tau susi ia too sihhapam tanangam pelango tuttuam masäe tuttuam kasalle nasuhum mekadakei.¹⁶ La unjagai manappaa', indana deengkoa' ma'gau' sessu'. Anna la unjagai toia' duka' indana deengkoa' umpa'bahinni'i pa'elo'na Debata, umba susi puha napogau' Esau yolona. Umbalu' kakakaanna, moi kela daa anggam sapihim kinande.¹⁷ Umba susi taissanna' pada-pada taua, lessu'na nabaluh, iya maelo'um la napa'lambeam ambena, sapo' tä'um ia mala. Aka moi anna sumahhoi napeä lalanna la napapiai sule indo kasalaanna, sapo' tä'um deem lalanna.

¹⁸ O inggannakoa' solasubungku, tä'koa' untingngajo kaha-kaha la malanna disi'dim anna mepakahe'na umba susi indo natammu to Israel dio sepponna Tanete Sinai, susinna: hompom ma'nala-nala, malillim pättä mekähhä-kähhä bulu, anna hibu' tatta'.¹⁹ Anna uhhingngipi moninna sangkakala anna kamaha tä' deem pada samepakahe' lambi' tappana nahingngi to Israel, iya mengkahumase-masem melau naua: "Kela mala anna tä'ungkam napa'kadai liu indo kamaha."²⁰ Aka sangngim tä' nasaha nahingngi indo issinna tula'na Puang Allataala naua: "Menna-menna muissoi inde tanete, moi olo'-olo', la disileba'leba'i batu sampe mate."²¹ Tandana mepakahe'

[†]12:20 Täss. 19:12-13.

kadadium ia too, iya moi duka' Musa naua toi: "Lumalla'ä' mahea!"[‡]

²²Sapo' ikoa'-iko landa'ungkoa' lako Tanete Sion battu diua Yerusalem bakahu yabo suhuga, indo kota naongei Puang Allataala Debata tubo. Landa'ungkoa' lako indo pa'hempunganna malaika' massa'bu-sa'bu to ponno katilallasam, ²³anna pa'hempunganna ingganna änä' uluana Puang Allataala,[¶] battu diua to tisuha' sanganna illaam suhuga. Anna landa'ungkoa' lako olona Puang Allataala to mahhotto'na ingganna ma'hupatau, anna silambi' toongkoa' sungnga'na ingganna indo to malolo to puha napatepu Puang Allataala. ²⁴Anna landa' toongkoa' duka' lako olona Puang Yesus to unghä pa'dandiam bakahunna Puang Allataala. Anna ullambi'ungkoa' indo hahana Puang Yesus to puha dipippi'iam umma'na. Illaam hahana Puang Yesus dilambi' kaheba mapia puha ia anna la indo kaheba dilambi' illaam hahana Habel.[§]

²⁵Jagai manappaia' indana untumpu pala'koa' Puang Allataala to umpa'kadaikoa'. Aka maka' tä' deem la mala lappa' dio mai pa'tahungkunganna Puang Allataala indo to Israel yolona aka tä' napehingngii indo Battakadanna napalanda' Musa illaam inde lino, iya senga'unna' too kita ke mokakia' umpehingngii Puang Allataala to umpa'kadaikia' yabo mai suhuga. ²⁶Wattunna anna ma'kadai yabo mai Tanete Sinai, indo kamahanna

umpakakemba-kemba lino, sapo' temo ma'dandi naua: "Pissam polepi la kupakakemba-kemba inde lino, anna tä' la lino mandi, sapo' moi duka' langi'."^{**} ²⁷Inde tula' naua: "Pissam polepi," kalembasanna, ingganna pa'padadinna Puang Allataala la tihodo lambi' pa'de asam. Angga ham la da'da' sule lako salako-lakona indo to inna tatilenggu' anna tatibosso'.

²⁸Dadi, kahana mangngala tabangkia' illaam kapahentaam tatilenggu' anna tatibosso', nasuhum sihatam anna sipäto' umpakende'kia' kuhhu' sumanga' längäm olona Puang Allataala anna tapenombai situhu' la napomasannanna penabanna. Anna illaam kapenombaantaa' la tapengkahea'i sola tapa'kasallei, ²⁹aka Puang Allataala to tapenombai abana sihhapam api mangngä'bäi.

Pa'palakoam situhu'na pa'elo'na Puang Allataala

13:1-19

13 La pahallukoa' sikamase liu mesa sola mesa umba susi si napogau' to ma'solasubum. ²Tä' deem la muondaia' untahima manappa tosabe to tä'pooka' siissangam. La si umpateenna' aka deemmi tau tä' deem napelabillo, iya ke malaika' dia natosabe. ³Si paalai liuia' penabammu to ditahungkum mato-mato mahassangkoa' duka' ditahungkum. Susi toi duka' lako to ia siam anna ia dipogausam, mato-mato mahassangkoa' duka' dipateem.

[‡]12:21 Pass. 9:19.

[¶]12:23 *ingganna änä' uluana Puang Allataala*: Ingganna umma'na Puang Allataala mala disangai änä' uluana aka sangngim dimana' indo si dimanasam änä' ulua, battu diua mana' handam mapia.

[§]12:24 *illaam hahana Puang Yesus dilambi' kaheba mapia puha ia anna la indo kaheba dilambi' illaam hahana Habel*: Hahana Puang Yesus umbaba pa'panampum anna hahana Habel meoli ia längäm olona Puang Allataala aka maelo' ma'gau' situmpu, Kad. 4:8-10.

^{**}12:26 Hag. 2:6.

⁴Pahallu asangkoa' umpa'kasallei kasilumbangam illaam dapu', anna tä'koa' mala ullullu' pa'bannetauam. Aka to ma'gau' sessu' anna to ullullu' pa'bannetauam la natahungkum Puang Allataala.

⁵Pasikambelaia' kalemu kamailuam lako doi', sapo' indo pada deenna lako kalemu la pahallu hia' ia muua anna mane: "Ganna'um." Aka puha ma'battakada Puang Allataala naua:

"Tä'koa' la kupellei, inna tä' siakoa' la kupahandam-handam bäbä."^{††}

⁶Iam too anna bahaningkia' ma'tula' taua:

"Debata to mampamoloingku, tä' deem la kende' kamaheasangku. Aka tä' deem aka la mala napogau' hupatau lako kaleku."^{‡‡}

⁷Daa ungkalembeia' ingganna to pebabammu indo to umpalandasangkoa' Battakadanna Puang Allataala. Pasaluia' penaba maaka susi buana pa'pogausam mapianna anna umpotandengannia' kamatapassanna. ⁸Yesus Kristus tatibehe susu' tatidende katonam mengkalao dio mai sule lako temo anna la da'da' sule lako salako-lakona.

⁹Daa umma'dinna' la nababa bulim ingganna indo pepa'guhuam tä' susi indo pepa'guhuangki. Aka mapi ke anggam pa'kamasena Puang Allataala umpakatoto' penabanta, taia indo pahenta diona kinande la malanna diande anna la tää'na. Aka pahenta ia too tä' ia deem gunana la umpakatoto' penabanna to untuhu'i. ¹⁰Kitaa'-kita

to matappa' deenna' kita ongeam pehumalasantana anna indo bua pemala' yabo^{¶¶} tä' ia mala naande indo sandona to Yahudi to mengkähä illaam bahum kapenombaanna. ¹¹Situhu' peadasanna to Yahudi anggam hahana olo'-olo' si nababa sando too' tama Tambim Handam Maseho napehumalasantana mendadi pebaseinna dosa. Anna indo ia bakkena ditunu mampu' ia dio sulibanna ongeam diongei mebahum.

¹²Iam too kasuhunganna anna dipatei diom duka' sulibanna kota Puang Yesus anna mala hahana umbasei lao dosa budanna hupatau. ¹³Dadi, pahallukia' duka' umpellei indo ongeam diongei mabahum^{§§} anna untuhu'kia' Puang Yesus pada-pada ussi'dim indo pantelle puha nasi'dim. ¹⁴Aka illaam inde lino, tä' deem ongeam la mala taongei tohho sule lako salako-lakona, sapo' muinaba-nabakia' indo ongeam la taongei ke dako'i. ¹⁵Iam too anna la pahallungkia' umpuji liu Puang Allataala umpolalam Puang Yesus. Pampujiam iam too bua pemala'ta längäm Puang Allataala lembe' dio pudu'ta umpa'kasallei sanganna.

¹⁶Tä'koa' deem la monda umpogau' kamapiaam anna la umpamoloikoa' solamu to ussi'dim kakuhängam aka bua pemala' iam too napohäe Puang Allataala.

¹⁷Tuhu'i manappaia' pampahe'na to pebabammu anna mengkahea'koa' dio olona. Aka illaam pengkähänganna, anggam sungnga'mua' napa'kadua-duai, anna tä' mala tala natula' asam indo

^{††}13:5 Pass. 31:6, 8.

^{‡‡}13:6 Puj. 118:6.

^{¶¶}13:10 *ongeam pehumalasantana anna indo bua pemala' yabo*: Deem muuai kaju sitambenna Puang Yesus diuam, anna indo bua pemala' yabo, Puang Yesus ia diuam. Dadi kalembasanna, ingganna to tä' matappa' lako Puang Yesus tä' ia mala mangn-gala taba illaam kasalamasam.

^{§§}13:13 *umpellei indo ongeam diongei mebahum*: La tatampeammia' indo peadasam yolo to si tahannuam la umpomalolokia' dio olona Puang Allataala.

pengkähänganna dio olona Puang Al-lataala ke dako'i. Tuhu'i anna mala masannam penabanna unghäko'a. Aka maka' tä'koa' manuhu' dio olona, iya la mapi'di' penabanna anna ia too tä' la keguna lako kalemua'.

¹⁸ Pa'sambajangam liukam. Abana kikatappa'i kiua maseho penabangki, aka illaam ingganna pa'palakoangki maelo' liukam duka' la umpogau' kamaloloam. ¹⁹ La'bi-la'binna kaleku, kupelau si'da-si'da anna umpa'sambajangannä' umba ke malaä' masimpam matim umpellambi'ikoa'.

Sambajam anna kada pebubum

13:20-25

²⁰⁻²¹ Handandanni Puang Allataala kabuttuanna kamasakkeam sola kamasannangam, anna to puha umpatibangom Puang Yesus To Ma'kambi' Handam Matande dio mai alla'na to mate, la umpaponnoikoa' ingganna kaha-kaha mapia indo la umpahalluam illaam umpalako pa'elo'na. Aka puha dipatitollo hahana to umpomannassa indo pa'dandiam

bakahu to la da'da' liu sule lako salako-lakona. Anna handandanni Puang Allataala la mengkähä illaam kaleta umpadadi indo la napohäena umpolalam Yesus Kristus. Dipuji anna dipa'kasallei sanganna Yesus Kristus sule lako salako-lakona. Abana inna la diua!*

²² O inggannakoa' solasubungku, kupelau si'da-si'da kuaa tahimaia' sola ponno sa'baha' inde kada penännä'ku matim, aka tä' siam kalando issinna inde suha'ku.

²³ Anna la pahallua' muissam muua indo solasubunta Timotius dilappasammi illaam mai tahungkum. Maka' too ke sulem inde napellambi'ia', iya la solakam matim umpellambi'ikoa'.

²⁴ Palandasangkanni salama'ki lako ingganna to pebabammua' anna lako ingganna umma'na Puang Allataala itim. Anna salama'na duka' matim ingganna solasubuntaa' inde Italia. ²⁵ Handandanni Debata untamba'koa' pada-pada.

Padam too.

*13:20-21 Abana inna la diua: naua illaam basa Yunani Amin.

Suha'na Yakobus

Bätäna issinna

Inde suha' natuli' Yakobus napakatuum ingganna to Yahudi to unkatappa'im Puang Yesus. Indo Yakobus sipohapu Puang Yesus. Indo to Yahudi tohho lako botto senga' anna ussi'dim buda kamapi'disam. Illaam inde suha'na muala buda pehapangam Yakobus la umpomasiä' ingganna tula' anna penännä'na lako to Sahani diona tanangam penaba anna pakkedoam tubo illaam kamatappasam. Napomasissä' anna natättä' bale mäne' Yakobus too'na pepa'guhuam la situhu'na lalam kasahaniam susinna: pa'sändäsam, pa'se'la-se'la, kamatappasam anna pa'palakoam mapia, unkuasai lila, kamanähängam, tä' tau mala sipengka-pengka, tä' tau mala sikalla-kalla, tä' tau mala untula'-tula' solata, tä' tau mala ussanga-sanga kale, diona katomakakaam anna kapemase-maseam, kasa'bahasam, sambajam, anna budapi senga'na.

Too'na illaam inde suha'na Yakobus naua: "Kamatappasanna to unkatappa'im Puang Yesus pahallu la tandaam illaam panggauam."

Lesoanna issinna

1. Kada passu'bä' (1:1)

2. Pa'sändäsam (1:2-18)

3. Menna-menna bassa' me'guhu kada Debata anna napalakoi la natamba' Debata (1:19-27)

4. Tä' la dipakende' pa'se'la-se'la (2:1-13)

5. Tä' deem gunana kamatappasam ke tä'i sitonda panggauam mapia (2:14-26)

6. Lila pahallu dikuasai indana mebabai lako lalam kakadakeam (3:1-12)

7. Dua hupa kakeakasam (3:13-18)

8. To untuhu' lino umpadadi kalena balinna Puang Allataala (4:1-10)

9. Tä' tau mala untula'-tula' solata (4:11-12)

10. Tä' tau mala uhmannuam kamato-hoam kaleta (4:13-17)

11. Pepakilalaam lako to makaka (5:1-6)

12. Kasa'bahasam anna sambajam (5:7-20)

1 Salama' buttu di kao Yakobus sabua'na Puang Allataala sola Debatanta Yesus Kristus, lako inggannakoa' pessubunna to sapulo dua änä'na Israel, to tiseumbu' lako botto senga'.

Pa'sändäsam

1:2-18

²Inggannakoa' solasubungku, maka' nalambi'koa' ma'hupa-hupa pa'sändäsam, sangai ia too mesa kakehongkosam kasalle, ³aka muissammia' muua ia too mendadi peuji lako kamatappasammua' anna mala umpakende' kamanontongam illaam kalemua'. ⁴Patubo liuia' indo kamanontongam illaam kalemu sampe kembua mapia, anna mala umpasundum anna umpatepu katuboammua' napolalam tä'um deem sassaimmua'.

⁵Maka' deem tau illaam alla'-alla'mua' tä' naissam aka la dipogau' muoloi pa'sändäsam, la umpelau akkalam längäm Puang Allataala to si ma'pebeem sola kamatuatua anna to tamannau-nau, anna nabeenni kaha-kaha ia too. ⁶Sapo' la napelau sola ponno kamatappasam, tä' deem la bata-bata penabanna, aka to bata-bata penabanna sihhapam ia bombam dio le'bo' napalusau' napaludekke hibu'. ⁷⁻⁸Aka indo to ma'dua penaba anna tä' manontom pa'palakoanna, tä' ia la

nahannuam untahima aka-aka yabo mai Debata.

⁹Inggannakoa' solasubungku to mase-mase, sipäto'koa' la ponno liu katilallasam aka napatadongkommokoa' Puang Allataala yabo ongeam kamatandeam. ¹⁰⁻¹¹Anna ikoa'-iko to makaka, susi liukoa' bunga-bunga la malasso bäbä. Aka maka' delle'um allo malussu, ullasso humpu' napolalam hä'dä' bunganna, iya pa'de siahkamapiana. Susim too duka' lako to makaka, mahassampi illaam pamumbusanna, pisananna pa'de bäbä. Dadi lako ikoa' to makaka, la tilalla'ungkoa' aka dipomahempoammokoa' penabammu.

¹²Kehongko' ia to matoto' muoloi pa'sändäsam, aka maka' patalom illaam panggujiam ia too, iya la untahimam salokokati katuboam indo puha nadandiam Puang Allataala lako to ungkama-sei.[†]

¹³Maka' deem tau nalambi' pa'sändäsam maelo' la umpogau' kakadakeam, tä' la naua: "Napa'sändä'ia' Puang Allataala." Aka Puang Allataala tä' mala napa'sändä'i kakadakeam, anna tä' toi deem la buttu di Ia pa'sändäsam lako hupatau. ¹⁴Sapo' si mesa-mesa tau napa'sändä'i kamailuam sugali' illaam kalena, iam too uhhuntu'i anna nasakkai. ¹⁵Maka' patalom indo kamailuam, iya ungkembuaammi dosa. Pissananna lobo'i indo dosa ungkembuaammi kamateam.

¹⁶Inggannakoa' solasubungku to kukamasei, daa umbulinna' la muua pa'sändäsam ia too buttu yabo mai Puang Allataala. ¹⁷Aka ingganna pa'pebeem mapia anna pa'mana' tä' deem sassainna buttu yabo mai Puang Allataala to umpadeem to ma'pomasiä' yabo langi', anna to manontom tä' susi kalibajo tidende lelem. ¹⁸Pa'elo'na

anna nadadiam polekia' umpolalam kamatappasam lako Battakada kamaloloanna. Napogau' ia too anna malakia' mendadi änä'na to handam ma'kalolosam illaam alla'-alla'na ingganna pa'padadinna.

**Menna-menna bassa' me'guhu
kada Debata anna napalakoi
la natamba' Debata**

1:19-27

¹⁹Inggannakoa' solasubungku to kukamasei, pengkilalai manappaia' muua lako si mesa-mesa tau pahallu si'da-si'da bassa' ma'pehingngi, la unγκambi' pudu'na, anna tä' toi la madomi' keaha'. ²⁰Aka aha'na hupatau tä' la umpadadi gau' malolo la situhu'na pa'elo'na Puang Allataala. ²¹Iam too anna pahallum ditibe ingganna kakadakeam, indo tä' deem pada sabuda illaam kaleta. Anna tatahimai sola penaba malunä' kada Debata napatitanam illaam penabanta aka iam too kuasa umpasalama'kia'.

²²Anna pahallukoa' tandaam unγκedoam kada Debata, tä' angga bassa' bäbä ma'pehingngi. Aka maka' anggangkoa' bassa' bäbä ma'pehingngi, umpasalanduangkoa' kalemu. ²³Lako tau to anggam bassa' bäbä umpehingngii kada Debata sapo' tä' napogau', dipasihhappam to unγκalempei lindona illaam dahammim. ²⁴Puhai umpetua' kalena, le'ba'um. Iya nakalembei siahkam sule maaka susi hupanna.

²⁵Sapo' menna-menna bassa' umpe'guhui manappa pepaondonganna Puang Allataala anna tä' nakalembei indo bali napehingngii sapo' napogau' liu, la natamba' Puang Allataala illaam ingganna pa'palakoanna. Pepaondongam ia too tä' deem

[†]1:12 *salokokati*: tontäm ke diuai songko' kapataloam.

sassainna anna kuasa ullappasam hupatau illaam mai kakuasaanna dosa.

²⁶Maka' deem tau ussangai kalena mesa to manontom illaam peadasam, sapo' tä' nabela ungkambi' pudu'na, tau ia too umpasalanduam kalena, aka labu' indo lupu'na tama peadasam. ²⁷Indo diuaam peadasam mahändä anna tä' deem sassainna dio olona Puang Allataala Ambeta, ke umpamoloiki' änä' bium sola to balu-balü baine illaam kamassusaanna, anna ungkambi'ki kaleta indana nakadakeiki' lino.

Tä' la dipakende' pa'se'la-se'la

2:1-13

2 Inggannakoa' solasubungku, daa umpakende'a' pa'se'la-se'la illaam penabammu lako hupatau, aka to matappa'koa' längäm Yesus Kristus Debatanta to matande. ²Maka' too deem tau sule mentama pa'hempungammua' ma'sissim bulabam anna ma'poheba mapia, mane sulei duka' mesa to mase-mase, kadake ia pohebana, ³anna umpa'kasalleia' ia indo to ma'poheba mapia lambi' muuaanna': "Okko'ko eta inde ongeam mapia." Sapo' muuaam ia indo to mase-mase: "Ke'de'ko eta dipe," battu muuaam: "Okko'ko dio inde ampe'na pehhondoangu." ⁴Tä' daka deemmi pa'se'la illaam penabammu anna tä' daka umpadadingkoa' kalemu to mahhotto' ma'pikki' kadake?

⁵Pehingngiia' inggannakoa' solasubungku to kupakamaja! Aka to mase-mase illaam inde lino napilei ia Puang Allataala mendadi to makaka illaam kamatappasam, anna iam too sihatam untahima mana' illaam kapahentaanna Puang Allataala indo puha nadandiam lako to ungkamasei. ⁶Sapo' ikoa'-iko umpetunakoa' to

mase-mase. Moi kela daa indo hia to makaka umpakamase-masekoa' anna nabahui'koa' lako olona to mahhotto'. ⁷Anna taia haka tia tau iam indo untelle sanga handam matande, to umpolalanna' mendadi umma'na?

⁸Sapo' maka' too ke untuhu'i si'da-siakoa' too'na indo issinna pepaondonganna Puang Allataala tisuha' illaam Battakada masehona naua: "Kamaseikoa' padammu hupatau umba susi ungkamasei kalemu," iya ma'gau' mapiangkoa' too.[‡] ⁹Sapo' maka' deem liupi pa'se'la-se'la illaam pa'palakoammua', ia too unghähäkoa' dosa, anna etam too naongi tandaam diua untekkakoa' pahentana Puang Allataala. ¹⁰Menna-menna untekkapi mesa pahentana Puang Allataala, tau ia too diangga'um untekkä asam indo pahenta natuhu'innam. ¹¹Aka Ia muuai: "Daa ullullu'a' pa'bannetauam," Ia siam duka' muuai: "Daa umpapateanna'." Dadi maka' tä'ungkoa' ullullu' pa'bannetauam sapo' papateam dakoä', tontä siangkoa' too untekkä pahentana Puang Allataala.[¶]

¹²Dadi la umpapia manappa hakoa' ia tula'mu sola pa'palakoammu aka la nahotto'koa' Puang Yesus situhu' pahenta to kuasa ullappasam hupatau. ¹³Aka to tä' ungkamasei solana tä' duka' la nakamasei Puang Allataala ke nahotto'i. Sapo' to ungkamasei solana la umpa'dei pa'tahungkungam lako kalena.

Tä' deem gunana kamatappasam ke tä'i sitonda panggauam mapia

2:14-26

¹⁴O inggannakoa' solasubungku, akam gunana ke deenni tau muuai: "Kao mesaä' to matappa'," sapo' tä' deem tandaam gau' mapia

[‡]2:8 Sand. 19:18.

[¶]2:11 Kad. 20:13-14, Pass. 5:17-18.

napalako? Mala haka naposalama' indo kamatappasanna? ¹⁵ Maka' hapanna deem mesa solata muane haka battu haka baine tä' siampuam poheba anna tä' deem si naande, ¹⁶ akam gunana ke deengkoa' mesa ma'kada lako muuaam: "La naundu'ko masakke naapi' mahuhindim! La deem di too baju makambammu anna la bosa'ko kinande," sapo' tä' deem nabeem kapahalluam ia too lako indo tau? ¹⁷ Susim too duka' diona kamatappasam: Maka' tä' dipasitonda panggauam, iya setonganna indo kamatappasam ia too labu'.

¹⁸ Maka' deem tau muuai: "Deem iko kamatappasammu anna deem kao panggauangku." Iya la kutimba'i kuua: "Paitaipä' kamatappasammu tä' sitonda panggauam, anna kupaitaiko kao kamatappasangku tandaam illaam panggauangku." ¹⁹ Ungkatappa'ia' le' muua anggam mesa Puang Allataala? Mapia duka' ia too! Sapo' nakatappa'i duka' ingganna setam kaha-kaha ia too anna lumalla' mahea'.

²⁰ Oa' to maho, manggi' dakoka' too dipaitai diua kamatappasam tä' sitonda panggauam tä' deem gunana? ²¹ Tä' daka Abraham nene to taponene nasangai Puang Allataala to malolo aka pa'palakoanna wattunna anna umpehumalasanni Ishak änä'na yabo ongeam pehumalasam?[§] ²² Dadi makaleso diua kamatappasam pahallu dipasitonda panggauam. Anna illaam panggauam naongi sundum kamatappasam. ²³ Iya ganna'um too indo tisuha' illaam Battakada Debata naua: "Ungkatappa'i Puang Allataala Abraham napolalam nasangai to malolo." Iam too napolalam anna

digalla'um Abraham sassipakamajanna Puang Allataala. ^{**} ²⁴ Dadi makalesonna' muissam muua disangai malolo hupatau aka panggauanna taia kahana angga mandi kamatappasanna. ²⁵ Susi siam duka' Rahab yolona, mesa baine passunda' sapo' nasangai duka' Puang Allataala to malolo aka pampamoloinna wattunna anna umbabai tama banuanna indo to nasua Yosua ma'pesi'dim anna mane napamoloi napaitai lalam senga' muäläi kalena.^{††}

²⁶ Umba susi bätä puntinna hupatau ke tä'i deem penabanna, ia too mate, susi siam too duka' kamatappasam ke tä'i sitonda panggauam, ia too labu'.

Lila pahallu dikuasai indana mebabai lako kakadakeam

3:1-12

3 Inggannakoa' solasubungku, daa umbudaa' mohäe la ma'pa'guhu, aka muissammia' muua kita to ma'pa'guhu la mabanda' puha kita dudunganta dio olona pahhottosanna Puang Allataala ke dako'i! ² Aka buda kaha-kaha taongi umpogau' kasalaam. Sapo' menna-menna nabela liu ungkambi' pudu'na, tau ia too tepu, aka la nabelam duka' unguasai kalena.

³ Ngangnga' ke dipatamai sädäna daham mala umpahe' indo daham, nasuhum mala dikuasai asam kalena. ⁴ Diala duka' pehapangam mesa kappala'. Moi anna tä' deem pada sakasalle anna nabussum hibu' kasalle, sapo' mala nagihi' pegihi'na pada nennu' situhu' pa'elo'na to umpalaoi. ⁵ Susim too duka' lilana hupatau, mesa pangkakka' bahinni' illaam kaleta, sapo' mala umpakende' kaha-kaha kasalle.

§2:21 Kad. 22:1-14.

**2:23 Kad. 15:6, 2Tul. 20:7, Yes. 41:8.

††2:25 Yos. 2:1-21.

Api duka', moi anna pada nennu', sapo' mala too muä'bäi pangngala' kasalle. ⁶Lilana hupatau sihhapam api, pembanuaanna kakadakeam ma'ongeam illaam kaleta anna paleleam lako ingganna pangkakka' senga' illaam kaleta. Lila ma'nala-nala liu susi api la muä'bäi lalam katuboanta napalekke' pengkähänganna setam.

⁷Ingganna olo'-olo' malaiha ma'bitti' appa'na, dassi-dassi, olo'-olo' tissollo' sola olo'-olo' illaam le'bo' mala asam dipakanaham anna deemmi napomanaham hupatau. ⁸Sapo' lila ia, tä'pi deem mesa tau la unguasai mala napakanaham. Lila ponno kakadakeam tä' mala dipahe' anna mepatei susi ula' pabalu pekeke'na. ⁹Lila tapake umpuji Debata To tapoambe, anna ia siam tapake untädo padanta hupatau to natampa Puang Allataala susi kalena. ¹⁰Dadi mesa pudu' naongeti lemba' pa'kuhhusam sumanga' anna pantädo. Inggannakoa' solasubungku, gau' susi ia too tä' mala dipogau'. ¹¹Aka la deem daka tia mesa kalimbuä naongeti buttu uwai mapia la ia siam naongeti buttu uwai kadake? ¹²Inggannakoa' solasubungku, susi toi duka' deem daka tiko kaju ara la ungkembuaam bua zaitun, battu haka anggur la ungkembuaam bua ara? Iya tä' toi duka' la deem kalimbuäna uwai kadake la umpassubum uwai mapia.

Dua hupa kakeakasam

3:13-18

¹³Maka' deengkoa' to keaka' anna to manähä, pahallu umpa'patandaam kakeakasammu anna kamanähängammu illaam katuboammua' sola kedo mapia anna penaba mahempo lemba' dio mai kakeakasam. ¹⁴Sapo' maka' deem illaam kalemua' penaba pa'kembuham sitonda masihi ate anna ma'podo kao, iya daa umbaba kassii' indo

muangga' kakeakasam aka setonganna muägä'innaa' umbali kamaloloam. ¹⁵Aka kakeakasam ia too tä' buttu yabo mai Puang Allataala sapo' buttu illaam mai lino, kamohäeam sugali'na hupatau, anna setam. ¹⁶Aka umba naongeti deem penaba pa'kembuham anna ma'podo kao, etam too duka' la naongeti kende' kahakkaam anna ingganna gau' kadake.

¹⁷Aka kakeakasam buttu yabo mai Puang Allataala umpakende' penaba mahändä, kasiolaam, umpaillaam penaba solana, matinuhu', mamase, anna ma'gau' mapia. Tä' ma'se'la-se'la anna ia illaam ia sulibam. ¹⁸Anna menna-menna umpeä kasiolaam la muambo' banne kasiolaam anna la ungkembuaam kamapiaam.

To untuhu' lino umpadadi kalena balinna Puang Allataala

4:1-10

4 Umba ngei naongeti buttu kasipengkaam anna passikallaam illaam alla'-alla'mua'? Tä' daka ia too buttu illaam mai kamohäeammu indo sibundu' illaam kalemua? ²Ungkailuikoa' mesa aka-aka sapo' tä' mala ullambi', umpolalanna' papateam. Anna masihi atekoa' sapo' tä' sule lako pa'elo'mua' nasuhum ianna' umpolalam sipengka-pengka anna sikalla-kalla. Sapo' ia hi tia anna tä'koa' mala ullolongam aka-aka, anu' tä'koa' deem si melau längäm Puang Allataala. ³Battu melau siangkoa' duka' sapo' tä' mapia lalam penabammu napolalam tä' sianna' deem ullolongam. Aka indo pelauammua' maelo'a' umpake umponnoi kamohäeam sugali'mu.

⁴O inggammua' to tamanontom, tä' daka muissanna' muua to untuhu'i lino umpobali Puang Allataala? Dadi menna-menna untuhu'i lino umpadadi ia kalena balinna Puang

Allataala. ⁵Pahallua' muissam muua deem kasuhunganna anna disuha'i Battakada maseho naua: "Indo Penaba to napatamaiangkia' Puang Allataala napa'kembuham." ⁶Sapo' mana' pa'kamasena nabeengkia' kasalle puha ia anna la indo pa'pogaustaa'. Iam too anna nauam:

"Puang Allataala umpobali to malangka' penaba, sapo' ungamasei to mahempo penaba."[‡]

⁷Dadi matinu'koa' dio olona Puang Allataala. Ebai tomahajanna setam anna mala lahi lao nakambelako. ⁸Pengkahuku'koa' lako Puang Allataala anna Iai la unkahuku'koa' duka'. Bahassii limammu o inggammua' to madosa, ammu sehoi penabammu o inggammua' to ma'dua penaba. ⁹Sossokoa' gau'mu, sahhokoa', anna muuhhu'. Tä'ungkoa' la tilalla' anna metabu, sapo' la sumahhokoa' anna muuhhu'. ¹⁰Patihokkä'ia' penabammu dio olona Debata anna Iai untandeangkoa'.

Tä' tau mala untula'-tula' solata

4:11-12

¹¹O inggannakoa' solasubungku, daa untula'-tula' solamu! Menna-menna untula'-tula' kadake solana anna umpopahhotto' bäbä kalena lako solana, tau ia too umpesalaam pahentana Puang Allataala. Maka' umpesalaangkoa' pahentana Puang Allataala, taiakoa' to manuhu' sapo' to ussallakoa' pahentana Debata. ¹²Aka anggam mesai Puang Allataala umpapia pahenta anna To la mahhotto'. Iam too to muanda'i kakuasaam mepasalama' anna metallangam. Dadi ikoa'-iko, tä'koa' sipäto' la umpopahhotto' bäbä kalemu lako solamu.

Tä' tau mala uhhannuam kamatohoam kaleta

4:13-17

¹³Pehingngii inde tula'ku lako ikoa' to muuai: "Allo temo battu makale' di, la lakokam kota ia too aka la diokam sataum ma'bulele umpeä kauntungam."

¹⁴Moi kela daa, meangga kaha-kaha la dadi makale' tä'pi muissanna'. Pikki'pia' diona katuboammu. Aka inde katuboammu sihhapam sahobo tandaam säpäi' sapo' tä' masäe anna pa'de bäbäm sule. ¹⁵Setonganna la si muua hia' ia anna mane: "Maka' napoelo' Debata, iya malakam tubo anna la mala tookanni unghähä ma'hupa-hupa kähängam." ¹⁶Sapo' temo ussanga-sanga hakoa' kalemu aka kamalangkassam penabammu, moi kela daa gau' ia too kadake. ¹⁷Dadi lako to muissam pa'palakoam la sihatanna dipogau', sapo' tä' di naaku napogau', tau ia too madosa.

Pepakilalaam lako to makaka

5:1-6

5 O inggannakoa' to makaka, pehingngii': Sahhongkoa' ammu sikauhu' aka la nalambi'koa' kamapi'disam. ²Aka ingganna kullemaa' umpebosii bäbä anna pohebamu umpea'bunganni. ³Bulabam anna peha'mu naandem takka'. Anna indo takka'na la ussa'bii diona gau' kadakemu anna la susi api muä'bäikoa'. Aka balingkoa' iko untombom kulle illaam inde wattu diongei muumpai kasuppisanna lino. ⁴Pikki' siaia' too maaka susi pengkaloa'na ingganna indo to umpopengkhähä umpuppusangkoa' issi bela'mu, aka tä' unghamaloloannia' umbeem sahona. Nahingngim Puang Allataala Debata To Handam Kuasa

[‡]4:6 Pep. 3:34.

indo pengkaloa'na. ⁵Puhangkoa' iko ussi'dim katuboam masannam anna tä'unna' deem aka umpeä illaam inde lino. Sihhapangkoa' olo'-olo' dipelompoi aka la ditunu. ⁶Puhangkoa' umpassala anna umpatei to tä' deem kasalaanna, iya tä'koa' nabali.

Kasa'bahasam anna sambajam

5:7-20

⁷Inggannakoa' solasubungku, abana la nalambi'koa' pandahhaam. Dadi iam too anna la sa'baha'ungkoa' muumpai kasuleanna sule Debatanta Puang Yesus, umba susi to unghähä litä' sa'baha' muumpai bua pengkähänä la kende' mapia. Aka nasa'bahasam muumpai wattunna palauham kela mangngambo'i anna wattunna palauham kela mamuppu'um. ⁸Pomatohoia' duka' penabammu sola ponno kasa'bahasam, aka mahuku'um kasuleanna Debatanta. ⁹Inggannakoa' solasubungku, daa umpadeem pa'hungu-hungu illaam alla'-alla'mua' indana nalambi'koa' pesämbä'. Aka setonganna ke'de'um dio ämpä To mahhotto'.

¹⁰Inggannakoa' solasubungku, ala tandengannia' kasa'bahasanna ingganna nabi illaam kamapi'disanna umpalanda' kada Debata. ¹¹Setonganna tasangai ia kehongko' to tontä liu manontom illaam kamapi'disam. Uhhingnginna' duka' diona kamanontonganna Ayub, anna muissanna' duka' maaka susi natamba' Debata katampasanna. Aka Debata to ponno pa'häntängam bua anna pa'kamase.

¹²Anna handam too'na pole oo inggannakoa' solasubungku, daa umpa'pinda-pinda bäbää', susinna: umpa'pindai suhuga, lino, battu

senga'-senga'na. Sapo' la muua hia' ia: "Io," ke ioi, anna: "Tää'," ke tä'i, indana nalambi'koa' pesämbä'na Puang Allataala.

¹³Maka' deem tau illaam alla'-alla'mua' nalambi' kamapi'disam, mapia ke ma'sambajanni. Maka' deem tau nalambi' kamasannangam, mapia ke umpenianianni pampujiam. ¹⁴Maka' deem to masaki illaam alla'-alla'mua' pahallu la untambai pebaba ada' illaam jumaa' anna mala napa'sambajangam anna nasussui minnä'-minnä' sola sanganna Debata. ¹⁵Aka sambajam ke mennumpui yabona kamatappasam tongam, umpabono' indo to masaki, anna Debata la umpomaläpu'i. Anna maka' deem umpogau' dosa la diampunniam. ¹⁶Dadi la sipangngakuikoa' anna sipa'sambajangam anna malakoa' napabono' Puang Allataala. Sambajanna mesa to malolo dio olona Puang Allataala kasalle kuasanna.

¹⁷Elia mesa hupatau biasa susikia', sapo' ma'sambajam sola sakalebu penabanna anna mala tä' uham. Napolalam tä' deem uham tallu taum anna annam bulanna. ¹⁸Pissananna ma'sambajam oo umpelau uham, iya tuhum sule uham napolalam kembua tanangam.

¹⁹Inggannakoa' solasubungku, maka' deem solamua' umpellei lalam kamaloloam anna deengkoa' mesa umpasulei lako olona Puang Allataala, ²⁰pengngissanniia' muua menna-menna umpopa'pasule to madosa dio mai lalam kabulingam, umpasalama' sungnga'na indo to madosa ia too, anna buda dosana la diampunniam.

Padam too.

Uhuna Suha'na Petrus Bätäna issinna

Inde suha' natuli' Petrus napakatuum to Sahani taianna to Yahudi to tohho dio Asia Kecil, disangaim temo Turki. Indo Petrus mesa duka' suhona Yesus Kristus. Indo to Sahani wattu eta too nahua pandahhaam kahana kamatappasanna lako Puang Yesus. Deem si napakolo'-kolo'i tau senga' (2:11-12; 2:15; 3:16; 4:4), deem duka' sabua' nakahha'i puäna (2:18-20), anna deem baine to matappa' napomasussa muanena aka indo muanena tä' unkatappa'i Puang Yesus (3:1). Napakatu Petrus inde suha' anna mala matoto' kamatappasanna ingganna indo to matappa' dio, lambi' la tontä liu manontom illaam muoloi kamasussaam.

Situhu' issinna inde suha', ia anna nahuakia' pa'sändäsam aka dipangngitai kamatappasantaa' (1:6-7; 4:12-17). Anna maka' nalambi'kia' kamasussaam, la pahallukia' tontä liu umbeho kaleta lako olona Puang Allataala anna tä'kia' la monda umpogau' kamapiaam (4:19). Ma'hupa-hupapi pepakilalaam natula' Petrus la umpatigaha' penabanna to umbatai anna mala tontä liu mahannu längäm Puang Allataala, la ma'gau' mapia liu, anna la tontä liu manontom muoloi kamasussaam.

Lesoanna issinna

1. Kada passu'bü' (1:1-2)

2. Ponno pahhannuam to matappa' aka tontä liu najagai Puang Allataala sule lako natahima ponno indo kasalamasam (1:3-12)

3. To napilei Puang Allataala la pahallu tubo maseho (1:13-2:10)

4. Ma'hupa-hupa pepakilalaam la di-aka susi ma'gau' mapia illaam inde lino ponno kakadakeam (2:11-4:19)

a. Hupatau pahallu matinuhu' lako to ma'pahenta, sabua' pahallu matinuhu'

lako puäna, kasilumbangam mapia illaam dapoi', anna la sihatanna napogau' to matappa' lako padanna (2:11-3:12)

b. Kamanontongam illaam muoloi kamasussaam (3:13-4:6)

c. To matappa' pahallu sipamoloi mesa sola mesa (4:7-11)

d. To matappa' abana inna la ussi'dim kamasussaam (4:12-19)

5. Pepakilalaam lako pebaba ada' sola issinna jumaa' (5:1-11)

6. Kada pebubunna Petrus (5:12-14)

1 Inde suha' buttu di kao Petrus mesaa' duka' suhona Yesus Kristus,

lu lako ingganna to napilei Puang Allataala to tiseмбу' lako mobotto-bottoam mendadi to messihuhu lako propinsi Pontus, Galatia, Kapadokia, Asia, anna Bitinia.

²Ikonna' too umma' to napilei Puang Allataala Ambeta situhu' pattujunna mengkalao dio mai. Napileikoa' umpolalam pengkähäna Penaba Maseho to umpasähä'koa' mendadi umma' to maseho, anna malakoa' manuhu' lako Yesus Kristus anna nabaseikoa' haha titollona.

Handandanni Puang Allataala untamba'koa' anna namana' kamasakkeam sola kamasannangam sanda silapi'.

Pahhannuam matoto' anna kamatappasam

1:3-12

³Dipuji sanganna Puang Allataala Ambena Debatanta Yesus Kristus to napenombai! Tä'um deem la untondonni pa'kamasena lako kitaa' lambi' nadadialam polekia' umpolalam katibangonganna sule Yesus Kristus dio mai alla'na to mate, nasuhum matoto'um pahhannuanta. ⁴Anna tahannuanna' la taampuam indo pa'mana' puha napatokaangkia' Puang Allataala yabo suhuga, tala deem kadake, tala deem bosu, dapaka

ia la malele. ⁵Anna la najagaikoa' kakuasaanna Puang Allataala kahana kamatapassammua' sampe untahima ponno indo kasalamasam to la dipel-latteam illaam allo ma'katampasanna. ⁶Iam too anna la tilalla'ungkoa' moinna anna napomasussa salapokoa' sãpã' indo ma'hupa-hupa pa'sãndãsam. ⁷Ia anna nahuakoa' aka dipangngitai kamatapassammua', battu matappa' si'da hako'a' battu tã' di. Aka bulabam duka' to tã' la da'da' liu anna disudi hi tia yolo tama api, damoaham ia kamatapassammua' to keangga' puha ia anna la bulabam. Anna maka' matappa' tongangkoa' illaam ussi'dim pa'sãndãsam, iya katampasanna pole' la dipujikoa', dipa'kasallei, anna dipomatande illaam allo kasuleanna Yesus Kristus ma'penduanna. ⁸Indo Yesus Kristus, moi anna tã'pia' deem muita, sapo' tontãa' ungkamasei. Susi siam duka', unkatappa'ia' moi anna tã'pia' deem muita. Iam too anna tilalla'ungkoa', anna indo katilallasammua' tã' dibela dipaju anna tã' diissam disangai. ⁹Tilalla'koa' aka untahimangkoa' kasalamasam, buana kamatapassammu.

¹⁰Indo kasalamasam, napahessa anna napetua' manappa ingganna nabi to umpayolo lambanni inde mana' pa'kamase nabeengkoa' Puang Allataala. ¹¹Penabanna Kristus mengkãhã illaam penabanna indo nabi umpaissannii indo ingganna kamasussaam la uhhua Kristus sola indo kamatandeam la natahima ke puham ia too. Sapo' tã' makaleso illaam pikkihanna indo nabi piham la dadi anna kaha-kaha aka la umpadadii ingganna ia too. Iam too anna napahessa manappam. ¹²Napomakaleso Puang Allataala lako ingganna indo nabi diona indo kada napayolo lambam indo nabi

tã' napalako kahana la lu tama kalena, sapo' napalako aka la keguna lako ikoa' to tubo lapi' temo. Temo masiã'unna' uhhingngi kaha-kaha ia too dio mai to umpa'pakahebaam Kaheba Katilallasam diona Yesus Kristus. Napalandasangkoa' kaha-kaha ia too kahana kuasanna Penaba Maseho to dipatuhum yabo mai suhuga. Anna ingganna malaika' mohãe duka' la napengngissanni kaha-kaha ia too.

To napilei Puang Allataala la pahallu tubo maseho

1:13-25

¹³Iam too anna la umpasatutunna' penabammu lako indo la dipogau'na. Majagakoa' anna uhhannuam ponnoi indo mana' pa'kamase la dimanasangkoa' ke sulem Yesus Kristus ma'penduanna. ¹⁴Kahana ãnã'ngangkoa' Puang Allataala to manuhu', iam too anna tã'ungkoa' la tubo untuhu'i pa'elo'na sipa' dosamu umba susi si umpogau'a' indo anna tã'pokoa' muissam Puang Allataala. ¹⁵Sapo' umba susi maseho Puang Allataala to untambaikoa' la mendadi umma'na, susim too duka' la pahallukoa' maseho umpalako ingganna pa'palakoammu, ¹⁶aka deem tisuha' illaam Battakada Debata naua: "La pahallukoa' maseho, aka Kao masehoã'."^{¶¶}

¹⁷Si muuaanna' Puang Allataala "ambe" ke ma'sambjangkoa'. Anna Ia siam to uhhotto' hupatau situhu' pa'pogausanna si mesa-mesa, tã' ma'se'la-se'la. Iam too anna la pahallungkoa' mengkahea' dio olona Puang Allataala anna umpa'kasallei upu' tubomu illaam inde lino to muongeia' messihuhu. ¹⁸Aka muissammia' indo pesolonna Puang Allataala anna malakoa' lappa' dio mai katuboammua'

^{¶¶}1:16 Sand. 11:44-45, 19:2.

yolona to tä' deem gunana indo ullombunganna' dio mai nene to umponene. Taia baham-baham tä' la da'da' liu sule lako salako-lakona nasolongangkoa', susinna bulabam battu haka peha', ¹⁹sapo' Kristus to tä' deem la pada angga'na nasolongangkoa' wattunna dipatitollo hahana. Sihhapam änä' domba tä' deem sassainna dipehumalasang länngäm Puang Allataala. ²⁰Aka tä'pi deem dipadadi inde lino anna puham napa'tantu Puang Allataala Kristus la mendadi To Mepasalama'. Sapo' illaam dam inde wattu la kasuppisanna lino mane dipopellattei anna malakoa' salama'. ²¹Pengkähänam too Kristus napolalam unkatappa'ikoa' Puang Allataala to puha umpatibangonni sule dio mai alla'na to mate anna napomatande. Iam too anna unkatappa'ingkoa' Puang Allataala anna uhhannuam.

²²Puhangkoa' manuhu' lako indo kaheba kamaloloam napolalam umpomasehokoa' penabammu lambi' ungmaseikoa' solamu to matappa' mengkalao illaam unä' penabammu. Iam too anna kuuaammokoa': la sikamasekoa' mesa sola mesa sola ponno penaba. ²³Aka puhangkoa' didadialam pole. Anna indo katuboam bakahu tä' buttu di hupatau to la mate, sapo' nabeengkoa' Puang Allataala to tä' deem la matena. Ullambi'a inde katuboam, aka unkatappa'ikoa' Battakada tubona Puang Allataala indo to la da'da' liu sule lako salako-lakona. ²⁴Umba susi tisuha' illaam Battakada Debata naua:

“Katuboanna ingganna ma'hupatau sihhapam humpu',

anna kamatandeanna sihhapam bunganna.

Humpu' la malasso,

anna bunganna la hä'dä',

²⁵sapo' kadanna ia Debata la da'da' liu sule lako salako-lakona.”^{§§}

Anna indo Kadanna Debata, ia siam indo Kaheba Katilallasam puha dipakahebaiangkoa'.

Puang Yesus dipasihhapam batu tubo anna umma'na mendadi banua di ada'

2:1-10

2Iam too anna la muäläi asammi'a' illaam mai kalemu ingganna hupanna kakadakeam. Anna tä'ungkoa' la manipu, ma'dua tambu', ma'kembuhu, anna ma'pakolo'-kolo'i. ²La maelo' liukoa' muande kinande di ada' to tä' deem sassainna, sihhapam änä'-änä' mane subum maelo' liu sumusu. La umpateenna' anna mala umpolobo'a' sule lako untahima ponno indo kasalamasammua'. ³Aka ma'kalengkoa' ussi'dinni maaka susi kamapiaam penabanna Debata.

⁴Yesus Kristus dipasihhapam batu to natibe hupatau, sapo' ia hi inna to napilei Puang Allataala anna nasangai batu tubo keangga'. Tinandakoa' lako olona Yesus Kristus* ⁵anna malakoa' duka' mendadi batu tubo to dipake umpapia banua di ada'na Puang Allataala. Maka' susi, iya mendadingkoa' too sando to dipasähä' anna umbeho kalemu mendadi bua pemala' tubo länngäm Puang Allataala. Bua pemala' ia too napohäe Puang Allataala aka umpolalam Yesus Kristus. ⁶Umba susi tisuha' illaam Battakada Debata naua:

“Paalaia' penaba inde tula'ku: Kupileim mesa batu tä' deem la pada angga'na,

§§1:25 Yes. 40:6-8.

*2:4 Tinandakoa' lako olona Yesus Kristus: mala duka' kalembasanna: Puhangkoa' tinanda lako olona Yesus Kristus.

angku paokko'i dio Sion[†] mendadi batu longkahhinna.

Menna-menna unkatappa'i, tä' ia la salanduum.”

⁷Batu ia too tä' deem pada sakeangga' lako ikoa' to unkatappa'i. Sapo' lako ia to tä' unkatappa'i, la nahua indo issinna Battakada Debata naua:

“Indo batu natibe tukam, ia leko' di diala dipobatu longkahhim.”[‡]

⁸anna nauapi

“Batu ia too, la natitedoi tau, la umpopetobä hupatau.”[¶]

Natitedoi aka moka unkatappa'i Battakada Debata. Anna abana inna napa'tantu Puang Allataala la susi.

⁹Sapo' ikoa'-iko umma' to napilei Puang Allataala anna to dituhu la mendadi sando to umpalako pengkähänganna Tomahajanta, anna napasähä' tookoa' mendadi umma' petauanna to maseho anna to naam-puam ikale Puang Allataala. Napateem anna malakoa' umpa'pakahebaam indo pa'pogausanna tadisihanteam indo to untässu'ikoa' illaam mai kamalillingam napalutama kamasiäsanna to tä' deem untondonni mapianna. ¹⁰Yolona taiakoa' umma'na Puang Allataala, sapo' temo umma'ngakoa'. Yolona tä'koa' nalambi' pa'kamasena, sapo' temo nalambi'ungkoa' pa'kamasena.

Pa'palakoam la sihatanna napogau' sabua'na Puang Allataala

2:11-17

¹¹O inggannakoa' solasubungku to kupakamaja! Inde tubokoa' illaam lino sihhapangkoa' to messihuhu battu diua

muongei bääbäa' ma'dende, aka tubokoa' illaam alla'-alla'na to tä' matappa'. Iam too anna kupelau si'da-si'danna' matim anna tä'koa' la untuhu'i kamohäeam sugali'mu indo si sibundu' sungnga'mua' aka maelo' la napentaloi. ¹²La pahallukoa' ma'gau' mapia liu illaam alla'-alla'na to tamuissam Puang Allataala. Aka maka' umpateem, moi anna si napakolo-kolo'ikoa' naua: “Si ma'gau' kadake,” sapo' la naita gau' mapiammua', nasuhum usosso kalena lambi' umpuji sanganna Puang Allataala ke illaammi allo kasuleanna.

¹³Matinuhu'koa' dio olona to ullumbäi hupatau aka ia too pa'elo'na Debata. La matinuhu'koa' lako tomahajammu illaam inde lino, aka ia to handam kuasa illaam kapahentaam.

¹⁴Susi toi la matinuhu'koa' lako ingganna gubernur to nabeem kakuasaam tomahaja la umpassala to ma'gau' kadake, anna la umpuji to ma'gau' mapia. ¹⁵Aka iam too inde pa'elo'na Puang Allataala: la ma'gau' mapiakoa' anna mala ma'luttu' ingganna to ma'kada-kada maho, nasuhum tä' deem lalanna la napakolo-kolo'ikoa'.

¹⁶La tubokoa' umba susi to lappa'um dio mai kasabuasam. Sapo' tä' la muuaa': “Malakam ma'gau' kadake aka beba'ungkam.” Sapo' anggam la umpalakoa' indo la sihatanna napogau' sabua'na Puang Allataala. ¹⁷Pa'kasalleikoa' ingganna tau, kamaseikoa' padammu to matappa', pengkahea'ikoa' Puang Allataala, anna pa'kasalleikoa' tomahajammu.

[†]2:6 Sion: mesapi sanganna kota Yerusalem. Yes. 28:16.

[‡]2:7 batu natibe tukam: Puang Yesus diuaam aka Ia handam napa'bahinni'i to Yahudi, ma'katampasanna Ia leko' di handam keangga' illaam kapahentaanna Puang Allataala. Puj. 118:22.

[¶]2:8 Yes. 8:14-15.

Kamasussaanna Kristus la dipotandengam

2:18-25

¹⁸Inggannakoa' to diposabua', la pahallukoa' matinuhu' lako puämu anna umpa'kasallei, tä' angga mandi ke mapia penabai anna malute, sapo' moi makahha', la tontä liukoa' matinuhu'. ¹⁹Aka maka' nadahha bäbäkoa' puämu, tä' deem kasalaammua', anna sa'baha'koa' umpendudunni pandahhaam ia too aka umpaillaam penabakoa' pa'elo'na Puang Allataala, iya la napujikoa' Puang Allataala. ²⁰Ussanga haka tiko la dipujikoa' ke sa'baha'koa' dipongko aka umpogau'koa' kakadakeam? Sapo' maka' sa'baha'koa' nahua kamapi'disam aka umpogau'koa' kamapiaam, iya tä' mala tala napujikoa' Puang Allataala. ²¹Aka abana inna natambaikoa' Puang Allataala la sa'baha' umpendudum kamapi'disam. Aka ma'kalem Kristus umpendudum pandahhaam anna mala keguna tama kalemua'. Anna ia too napogau' Kristus anna mala umpotandenganna' indo to puha napogau'.

²²Tä' punala Ia deem la umpogau' dosa, anna tä' si'da-si'da deem la messubum illaam mai pudu'na tula' la mantipu.[§]

²³Wattunna ditelle, tä' punala deem la napabala'i. Wattunna didahha, tä' deem la ma'pakahea'. Anggam umbeho kalena lako Puang Allataala To muundu' lollä. ²⁴Ma'kale Kristus umpalutama asanni kalena ingganna dosata wattunna dipäso' yabo kaju sitambem anna malakia' tä'um tubo illaam kamadosaam, sapo' tubongkia' situhu' pa'elo'na Puang Allataala. Aka indom too basa-basa kalena Kristus nasuhum bono'koa'. ²⁵Yolona sihhapangkoa' domba bulim. Sapo'

tentomai dipasulengkoa' sule lako To ma'kambi'mu anna To unjagaiangkoa' sungnga'mu.

Pepatuduam lako to silumbangam illaam dapo'

3:1-7

3 Susi siam duka' lako ingganna to titanam indo, pahallukoa' la matinuhu' lako muanemu, nasuhum ke deenni muanemua' tä' unngkatappa'i Batakada Debata, iya umpatettenna' too lako Kristus ke naitai pa'palakoammu. Iya tä'unna' la manggi' umpa'tula'i anna matappa'um, ²aka naitangkoa' ma'gau' maseho anna meada'. ³Maka' maelo'koa' mendadi baine mapia si'da-sia, tä' la sulibanna mandi dipomapia, susinna beluä' dipopekanini', ma'belo-belo bula-bam, anna ma'baju masulli'. ⁴Sapo' la buttu illaam dia mai unä' penabammu indo kamapiaam, susinna malunä' penaba anna matänä' penaba. Iam too diuaam kamapiaam tä' deem la moho'na. Anna iam too nasangai Puang Allataala kamapiaam keangga'. ⁵Aka susim too si napogau' ingganna baine yolona to meada' anna to mahannu lako Puang Allataala, matinuhu' lako muanena nasuhum disangai mapia. ⁶Susi duka' Sara yolona matinuhu' lako Abraham muanena anna napekapuä. Anna malakoa' duka' disangai änä'na Sara ke tontä liukoa' ma'gau' mapia anna tä' deem kende' kamaheasammua'.

⁷Susi toi duka' lako to titanam ambe illaam pandaposam, pahallukoa' la umpaillaam penaba liu bainemu, aka inde bainemu tä' pada kamatohoammua'. Pa'kasalleia' aka padakoa' bassim namana' Puang Allataala katuboam sule lako salako-lakona. Aka maka' tä'koa' ma'pogau' susi, iya tä' la nahingngiam Puang Allataala sambajammua'.

[§]2:22 Yes. 53:9.

Sikamase mesa sola mesa

3:8-12

⁸Dadi la pahallukoa' siala penaba liu mesa sola mesa, sipenabaam mesa sola mesa, anna sipakamaja mesa sola mesa umba susi to siundu'-undu'. Anna la pahallu tookoa' ma'kamase anna mahempo penaba. ⁹Daa umpabala'i to umpogausangkoa' kakadakeam. Anna daa umpabala'i to umpetunakoa'. Sapo' la umpelauam mandia' tamba' längäm Puang Allataala. Aka ia anna natambaikoa' mendadi umma'na aka la natamba'koa'. ¹⁰Aka deem tisuha' illaam Battakada Debata naua:

“Menna-menna umpemulu katuboam mapia anna kamasannangam, tau ia too pahallu la unjagai pudu'na indana nakabuttui kada kadake, anna tä' la umpassubum tula' la mantipu.

¹¹La pahallu umpasikambela kalena kakadakeam anna umpogau'i kamapiaam.

La napeä lalanna anna umpakende'i kasiolaam.

¹²Aka naandaham mata liu ia Debata to umpogau' kamaloloam, anna nahingngiam liu sambajanna.

Sapo' napobali ia Debata to umpogau' kakadakeam.”**

Kehongko' to nahua kamasussaam aka umpogau' kamapiaam

3:13-22

¹³Mennangka la umpogausangkoa' kakadakeam ke tigaha' liukoa' umpogau' pa'palakoam mapia? ¹⁴Sapo' moi la deengkoa' nahua kamasussaam aka umpogau'koa' kamapiaam, iya kehongko'koa' anna maupa'. Daa ummahea' lako tau kadake anna

tä'koa' la husa'. ¹⁵Sapo' la tontä liua' muakui kamasehoanna Kristus anna umpa'debatai mengkalao illaam unä' penabammu. Anna la sedia liukoa' la untimba'i tau ke deengkoa' nakutanai diona indo pahhannuammu längäm Puang Allataala. Sapo' ia too pahallu la umpalako sola malunä' penaba anna meada'. ¹⁶Anna la umpalako toia' sola penaba mahändä, anna mala ia leko' masihi' ke deenni tau umpaboboikoa' kakadakeam, aka ma'gau' mapia liukoa' kahana pentuhu'nakoa' Kristus. ¹⁷Aka mapia puha ia ke ussi'dinni tau pandahhaam illaam umpalako kamapiaam, ke abanai pa'elo'na Puang Allataala, anna la ussi'dim pandahhaam aka umpogau' tau kakadakeam. ¹⁸Aka Kristus duka' puha didahha bäbä. Anggam pissam mate anna indo kamateanna muampunniam dosana hupatau sule lako salako-lakona. Kristus to tä' deem kasalaanna umbala' ma'hupatau to deem ia kasalaanna anna malakoa' napatette lako olona Puang Allataala. Dipatei bätä puntinna sapo' napatibangom sule Penaba Maseho. ¹⁹Anna kakuasaanna siam too indo Penaba Maseho napolalam le'ba' Kristus umpa'pakahebaam kahebana Puang Allataala lako ingganna indo to mempenaba ditahungkum yolona,^{††} ²⁰battu diua lako ingganna indo to mempenaba to tä' manuhu' lako Puang Allataala wattunna Nuh. Wattu eta too sa'baha' liupi Puang Allataala lako indo to tä' manuhu' sampe dadi kappala'na Nuh. Tappana bussu uwai, iya anggam kahua tau illaam indo kappala'. Anna umpolalam indo uwai nasuhum mala dipasalama' indo to kahua aka illaam kappala'. ²¹Dadi

**3:12 Puj. 34:13-17.

††3:19 *indo to mempenaba*: deem muuai, kalembasanna penaba kadake battu diua setam, anna deem toi muuai kalembasanna penabanna to mate.

kalappasanna Nuh dio mai kadadiam ia too dipasihhapam pantedosam tentomai, aka ia umpasalama'kia'. Taia kahana dibasei uwai bätä puntintaa' nasuhum salama'kia', sapo' kahana ditedo'kia' mendadi tanda diua ma'dandikia' dio olona Puang Allataala sola penaba mahändä. Malakia' napasalama' indo pantedosam kahana katibangonganna sule Yesus Kristus dio mai alla'na to mate. ²²Puhai tibangom sule, ma'pasulem längäm suhuga, anna muokko'i dio tandai kananna Puang Allataala, anna ullumbäi ingganna malaika', to ma'pahenta, anna to kuasa senga'.

Tubo bakahu

4:1-6

4 Dadi kahana puham ussi'dim kamasussaam bätä puntinna Kristus, iya la pahallu umpomatohoa' penabammu anna mala susi Kristus pikkihammua' sedia la muoloi kamasussaam. Aka iai too puha ussi'dim kamasussaam, tau ia too tä'um ia naaku la umpogau' dosa. ²Nasuhum inde tubokoa' illaam inde lino, tä'ungkoa' la untuhu'i liu pa'elo'na sipa' dosana hupatau, sapo' la pa'elo'nam Puang Allataala umpalako'. ³Aka sassamam allona muolaanna' umpalako gau' situhu' pa'pohäena to tä' muissam Puang Allataala, susinna: untuhu'i pangngua penabanna, ma'pogau' situhu' kamohäeam sugali'na, si umpamäbo' kalena, ma'mahoa'-hoa' ma'doä, anna umpa'debatai debata lino to mehidi'-hidi'. ⁴Lambi' mängä-mängä asam pole' ingganna to tä' muissam Puang Allataala tentomai muitakoa', aka tä'ungkoa' mesa pa'palakoam umpogau' ingganna dosa handam kadake, nasuhum illaam

ia too natellekoa'. ⁵Sapo' tontäm ia nalambi'na pekutanaanna To la umpopa'tadongkongam ingganna to tubo anna to mate. ⁶Iam too kasuhunganna anna dipakahebaim duka' Kaheba Katilallasam lako indo to puham mate, indo anna tubopi. Ia anna dipateenni anna mala tubo sungnga'na situhu' pa'elo'na Puang Allataala, moi anna matem bätä puntinna buana dosana, umba susi kamateam uhhua asam ingganna hupatau.

Umpakeguna manappa pa'mana'na Puang Allataala

4:7-11

⁷Ingganna-ingganna sia mahuku'um kasuppisanna. Iam too anna la pahallungkoa' unguasai kalemu sola majaga anna malakoa' ma'sambajam. ⁸Anna handam pahallu, la mengkalao illaam si'da-si'daa' unä' penabammu sikamase mesa sola mesa. Aka maka' ungmaseiki' solata, la buda kasalaanna taampunniam. ⁹La untahima manappakoa' solamu ke deenni lako banuammu, tä'koa' la ma'menu-menu. ¹⁰Pantam-makia' namana' Puang Allataala kapais-sangam. Indo kapaissangam ma'hupahupa. Iya la tapakeguna manappaa' indo kapaissangam sipamoloi mesa sola mesa, umba susi si napogau' to umpake manappa pa'mana'na Puang Allataala. ¹¹Indo to dimana' la umpa'pakahebaam Battakada Debata pahallu napeä si'da-si'da lalanna anna mala mato-mato Puang Allataala siam ma'kale ma'tula'. Anna indo to dimana' la umpamoloi solana, mapia ke indoi kamatohoam puha nabeem Puang Allataala napake umpamoloi solana. Anna mala illaam ingganna-ingganna sia dipa'kasallei sanganna Puang Allataala umpolalam Yesus Kristus. Aka Ia to ma'kuasa anna si-

hatam dipuji anna dipa'kasallei sule lako salako-lakona! Abana inna la diua!^{‡‡}

**To matappa' abana inna la
ussi'dim kamasussaam**

4:12-19

¹²Inggannakoa' solasubungku to kupakamaja, daa untikkedusannia' inde nahuakoa' pa'sändäsam mabanda'. Aka inde uhhuakoa', taia kaha-kaha maneanna la dadi. ¹³Sapo' la tilalla' mandakoa' inde ussi'dim kamasussaam, aka ia too mangngala tabangkoa' illaam indo kamapi'disam puha nasi'dim Kristus, anna mala sumpu katilallasammua' ke dipa'patandaammi kamatandeanna Kristus. ¹⁴Kehongko'koa' anna maupa' ke natunaikoa' hupatau kahana untuhu'koa' Kristus. Aka iam too umpa'patandaanni diua illaammia' kalemu indo Penaba to matande, battu diua Penaba Masehona Puang Allataala. ¹⁵Kupelau anna tä'i deem illaam alla'-alla'mua' la ussi'dim kamasussaam kahana papateam battu haka maboko battu kakadakeam senga' napogau', battu haka ullambanni oloanna solana. ¹⁶Sapo' maka' ussi'dingkoa' kamasussaam aka ma'gau' to Sahanikoa', iya tä'koa' pahallu la masihi'. Sapo' la tilalla' dakoa' ia längäm olona Puang Allataala, aka naissam tau naua pentuhu'na si'dakoa' Kristus. ¹⁷Aka lambi'um wattunna umpadadi kamasussaam Puang Allataala illaam inde lino. Anna kitaa' änä'na Puang Allataala handam yolo napahuai. Dadi kita siaan' duka' pentuhu'na anna nahuakia' temo, iya senga'um ia la nahuanna indo to tä' unkatappa'i Kaheba Katilallasanna Puang Allataala illaam allo ma'katampasanna. ¹⁸Umba

susi tisuha' illaam Battakada Debata naua:

“Indo sia duka' to umpogau' kamaloloam anna nahuapi kamasussaam illaam ullingkai kasalamasam, iya senga'um ia la masussanna to madosa anna to tä' umbollim Debata.”^{¶¶}

¹⁹Dadi, inggannakoa' to ussi'dim kamasussaam indo situhu'na pa'elo'na Puang Allataala, la pahallukoa' tontä liu umbeho kalemu lako olona To Ma'padadi to tontä manontom umpasule lako pa'dandinna. Anna tä'koa' la monda umpogau' kamapiaam.

**Pepakilalaam lako pebaba ada'
sola issinna jumaa'**

5:1-11

5 Sitahhu'na, deem la kupelau lako ingganna pebaba ada' illaam si mesa-mesa jumaa'. Inde pelauanguk pahallu napehingngii aka kao mesaa' duka' pebaba ada', anna ma'kaleä' ussa'bii indo kamasussaam nasi'dim Kristus. Anna la mangngala taba tooä' duka' illaam kamatandeanna Kristus ke dipa'patandaammi. ²Kupelau anna uningkambi' si'da-si'daia' ingganna dombana Puang Allataala indo dipadokkoangkoa' lisu pala'mu. La uningkambi' manappaa' sola masannam penaba situhu' pa'elo'na Puang Allataala, tä' la ungapahhisam. Tä' toi la umpalako pengkähängam ia too kahana mailukoa' lako doi', sapo' la mengkalao illaam si'da-si'daa' unä' penabammu umpamoloi solamu. ³Anna tä' tookoa' la mala ma'pahenta susi to ma'pahenta illaam lino lako indo to dipadokkoangkoa' lisu pala'mu, sapo' la ma'gau' mapiakoa' anna mala napehapani issinna jumaa'. ⁴Anna

^{‡‡}4:11 *Abana inna la diua!*: naua illaam basa Yunani, *Amin*.

^{¶¶}4:18 *Pep. 11:31*.

mala sulei too To Ma'kambi' Handam Matande, la napasongko'ikoa' songko' millo' tanda kamatandeam la tä' deem malusanna.

⁵Susi duka' lako ikoa' to mangnguha, la pahallukoa' matinuhu' lako pebaba ada'. Anna la mahempo penabakoa' anna sipamoloi mesa sola mesa. Aka illaam Battakada Debata naua:

“Puang Allataala umpobali to malangka' penaba,
sapo' untkamasei to mahempo penaba.”^{§§}

⁶Iam too anna la pahallungkoa' umpopengkadio kalemu dio olona Puang Allataala to ponno kakuasaam anna malakoa' napomatande ke lambi'um wattunna. ⁷Beho lakoi Puang Allataala kamalallangammua', aka Ia untkambi'koa' anna napaliaha.

⁸Majagakoa' anna mainga', aka indo balimmu tomahajanna setam susi liu singa ma'ehhem kalao-lao lu lako lu dio mai umpeä tau umba ke deenni mala naamma' kalebu. ⁹Ebaia' umpake kamatappasam matoto'. Aka muissammia' muua ingganna solasubummua' to matappa' lako lino nahua asam duka' kamasusaam susi indo to uhhuakoa'.

¹⁰Sapo' puhakoa' too ussi'dim kamasusaam säpäi', iya napatepungkoa' Puang Allataala. La napasondoikoa' kamatotosam, kamatohoam, anna

kamanontongam. Aka Ia kabuttuanna pa'kamase, anna puhakoa' natambai umpolalam Kristus anna malakoa' mangngala taba illaam indo kamatandeanna to la da'da' liu sule lako salako-lakona. ¹¹Dipuji Puang Allataala aka ma'kuasa sule lako salako-lakona! Abana inna la diua!

Kada pebubunna Petrus

5:12-14

¹²Inde suha' kapodi' kupakatuangkoa', mala dadi aka napamoloiä' Silas* mesa solasubunta to mala dihannuam. Ia anna kupakatukoa' inde suha' aka kusasungkoa' anna kupomasiäsam kuua ingganna inde kutulasangkoa' abana pa'kamasena tongam Puang Allataala. Antia' manda' tobei matoto' inde pa'kamasena.

¹³Salama'na matim ingganna solasubunta' to inde jumaa' Babilon[†] to pada-padakoa' napilei Puang Allataala. Salama'na duka' Markus to kuangga' änä' ikale. ¹⁴Sisalama'-lama'koa' mesa sola mesa sola ponno pa'kamase umba susi la sihatanna napogau' to matappa'um.

Handandanni Puang Allataala ummana'koa' kamasakkeam sola kamasannangam inggammua' to sakalebum Kristus.

Padam too.

§§5:5 Pep. 3:34.

*5:12 *Silas*: naua illaam basa Yunani, *Silwanus*.

†5:13 *Babilon*: kiha-kiha kota Roma diuaam.

Kapenduanna Suha'na Petrus Bätäna issinna

Inde suha' natuli' Petrus napakat-uam to Sahani taianna to Yahudi anna mala naissam to umbatai diona indo to ma'pa'guhu sala. Indo to ma'pa'guhu sala si ma'gau' kadake anna umpalanda' pepatuduam tatappa' to la umpatilaka hupatau. Naua ia Petrus la majaga tau indana mebaba bulinni pepa'guhuam salanna indo to tä' ma'debata (3:17). SITUHU' tula'na Petrus tä' la dipehingngii tau ia too sapo' la pahallu tau maseho umpalako ingganna pa'palakoam anna pahallu toi tau untuhu'i liu pa'elo'na Debata (3:11).

Illaam inde suha' natuli'pi duka' Petrus diona pepa'guhuanna indo to ma'pa'guhu sala, si naua: "Tä' la mala sule sule Puang Yesus" (3:3-4). Sapo' naua ia Petrus: "Ia anna tä'pi sule temo, aka nasa'bahasampokoa'. Aka moka Debata la tilaka hupatau moi podo la mesam, anna napemulu ke untihoekonganni dosana ingganna hupatau" (3:8-9). Sapo' dako'i too, tä' mala tala sule sule Puang Yesus la umpempa'deam inde lino ponno kakadakeam (3:10).

Lesoanna issinna

1. Kada passu'bä' (1:1-2)

2. Kamatappasanna to Sahani pahallu siba'ba' pa'pogausam mapia (1:3-21)

3. Pahallu tau majaga lako to ma'pa'guhu sala indana mebaba bulinni (2:1-22)

4. Pahallu tau ma'pogau' mapia muampai kasuleanna Debata (3:1-16)

5. Kada pebubunna Petrus (3:17-18)

1 Inde suha' buttu di kao Simon Petrus mesaa' duka' sabua'na anna suhona Yesus Kristus,

lu lako inggannakoa' to unkatappa'i Yesus Kristus, battu diua Puang Allataala

to tapenombai anna To Mepasalama'taa'. Ia anna malakoa' matappa' aka malolo Yesus Kristus to ummana'kia' pada-pada sahhupa kamatappasam.

²Handandanni Puang Allataala untamba'koa' anna namana' kamasakkeam sola kamasannangam sanda silapi', aka muissammakoa' Puang Allataala anna Puang Yesus Debatanta.

Kamatappasam pahallu siba'ba' pa'pogausam mapia

1:3-15

³Nabeengkia' Puang Allataala ingganna-ingganna sia tapake tubo illaam kamanuhusam lako kalena umpolalam kuasa kpendebataanna. Mala nabeengkia' ingganna ia too, aka muissammakia' Puang Allataala to puha untambaikia' umpolalam kuasa kamatandeanna anna kamapiaam penabanna. ⁴Lalam iam too napake Puang Allataala umbeengkia' pa'mana' taditondom anna tä' deem la pada angga'na indo puha nadandi. Ia anna mebeenni pa'mana' ia too, anna malakoa' lappa' dio mai pa'elo'na sipa' dosana hupatau indo si ungdakei hupatau illaam inde lino, anna malakoa' duka' ma'sipa' susi Puang Allataala.

⁵Kahana ingganna indo puha napogausangkia' Puang Allataala, nasuhum la umpeä si'da-si'daa' lalanna anna mala sulibanna matappa'koa' la mapia penabapokoa' duka'. Anna sulibanna mapia penaba, la deempi duka' kapaissangammua' diona Puang Allataala. ⁶Anna sulibanna kapaissangam diona Puang Allataala, la pahallupokoa' duka' unguasai kalemu. Sulibanna unguasai kalemu, la pahallupokoa' duka' manontom liu muoloi ingganna-ingganna sia. Sulibanna manontom liu muoloi ingganna-ingganna sia, la pahallupokoa' duka' ma'palako liu situhu' pa'elo'na

Puang Allataala. ⁷Anna sulibanna ma'palako liu situhu' pa'elo'na Puang Allataala, la pahallupokoa' duka' umpakamaja solamu to matappa' umba susi to siundu'-undu'. Anna sulibanna umpakamaja solata to matappa', la pahallupokoa' duka' ungkamasei ingganna hupatau. ⁸Aka maka' muampuummia' ingganna ia too anna tuttuam umpalako' illaam salu katuboammu, iya la keguna anna ungkembuaam kamapiaam indo kapaissangammua' diona Yesus Kristus Debatanta. ⁹Sapo' menna-menna tä' umpogau'i kaha-kaha ia too, tau ia too masiki' pennenne'na anna buta pikkihanna, anna tä' nakilalai naua indo dosana lessu' puham dibaseiam.

¹⁰Dadi inggannakoa' solasubungku, la umpëä si'da-si'daa' lalanna anna mala tuttuam tandaam diua puhangkoa' natambai Puang Allataala anna napilei. Aka maka' umpateemmia', iya mannassa anna tä'koa' deem la mala metobä yabo mai indo pehhondoam matoto'mu, ¹¹anna la natahima manappakoa' Puang Allataala mentama kapahentaanna Debatanta Yesus Kristus, To Mepasalama'taa'. Anna indo kapahentaanna la da'da' liu sule lako salako-lakona.

¹²Dadi moinna anna muissammia' ingganna kaha-kaha ia too anna muantinna' manda' untobe matoto' indo pepatuduam malolona Puang Allataala, sapo' la tontä liu kupakilalako'. ¹³Anna abana pahallu liupi kusi'dim kupakilalako' kaha-kaha ia too sumala tubopä'. ¹⁴Aka kuissam kuua tä'um la masäe anna kupelleim inde lino, aka puhämä' napaissanni Debatanta Yesus Kristus. ¹⁵Iam too anna la kupeä

lium lalanna temo anna mala tontä liu umpaillaam penabaa' kaha-kaha ia too ke matemä'.

Sa'binna kamatandeanna Kristus

1:16-21

¹⁶Wattunna anna kipaissannikoa' diona kuasanna Debatanta Yesus Kristus anna kasuleanna ma'penduanna, tä'kanni ma'toiolo-olo ma'pekaade' indo si biasa napogau' hupatau. Sapo' kiita sola matangki wattunna pangkähä kakuasaanna yabo tanete.

¹⁷Aka diokam heem wattunna napa'kasallei anna napomatande Puang Allataala Ambeta. Wattu eta too, dihingngi kamahanna To taditondom kamatandeanna naua: "Iam too inde Änä' pa'pakamajangu to umpomasannam penabangu." ¹⁸Ma'kalekam uhhingngii indo kamaha buttu yabo mai suhuga wattunna anna yabokam indo tanete maseho sola Puang Yesus.‡

¹⁹Puhanna kiita indo kadadiam ia too, iya tuttuam kikannangammi pole' indo kada napayolo lambam ingganna nabi yolona. Handam mapia ke umpaillaam penaba tongannia' indo kadanna nabi, aka umba susi lampu dipalekke' sule lako tibukka' baja anna paindom bintä pehendem allo, susim too duka' indo kadanna nabi nalloikia' illaam kamalillingam sule lako sule Puang Yesus ummasiä'i penabammua'. ²⁰Anna handam pahallu umpengngissannia', indo kada napayolo lambam Puang Allataala tä' si'da-si'da deem buttu di pikkiham kalena bäbä nabi.¶ ²¹Aka ingganna tula' napayolo lambam ingganna nabi tä' punala deem la pangngoko di tambu'na bäbä, sapo' Penaba Maseho mengkähä il-

‡1:18 Mat. 17:1-5, Mrk. 9:2-7, Luk. 9:28-35.

¶1:20 indo kada napayolo lambam Puang Allataala tä' si'da-si'da deem buttu di pikkiham kalena bäbä nabi: mala duka' dipekalembasam diua: tä' si'da-si'da deem mesa tau la mala ullembä'i indo kada napayolo lambam Puang Allataala situhu' pikkiham kalena.

laam kalena indo nabi, nasuhum mala untula' kadanna Puang Allataala.

Diona to ma'pa'guhu sala

2:1-22

2 Umba susi yolona kende' buda nabi tatappa' illaam alla'-alla'na umma' petauanna Puang Allataala, la susi siam too duka' illaam alla'-alla'mua' la kende' buda to ma'pa'guhu sala. La manähhä umpalanda' pepatuduam tatappa' to la umpatilaka hupatau. Anna la umbahoipi Puäta to ussolonni dio mai dosa, nasuhum iam too la masimpam umpasuleanni katilakaam tama kalena. ²Moi anna susi, sapo' la buda siam duka' tau untuhu'i indo gau' mesihi'-sihi'na, lambi' la natelle tau indo dalam kamaloloanna Puang Allataala. ³Kahana mailu anna matinna indo to umbaba pepa'guhuam sala, nasuhum napamammisangkoa' tula' pangngoko di tambu'na lambi' umbeenna' aka-akammu. Sapo' masäem mangngampa pa'tahungkungam la ullambi'i, anna mali'um katilakaam la uhhuai.

⁴Aka susim ia dadi lako indo ingganna malaika' to umpogau' dosa, tä' napäbäi Puang Allataala la lappa' dio mai pa'tahungkungam sapo' natibe tama nahaka anna natähäm dio ongeam handam malillim sule lako indo allo Pahhottosam la naongeti Puang Allataala umpalambi'i pesämbä' ma'katampasam. ⁵Susi siam duka' inde lino yolona tä' napäbäi Puang Allataala la lappa' dio mai pa'tahungkungam. Wattu eta too napabussu uwai untallanni ingganna to tä' umbollim Puang Allataala. Anggam Nuh dipasalama', indo to umpa'pakahebaam dalam kamaloloam, anna pitupi solana. ⁶Susi siam duka' kota Sodom anna Gomora napempa'deam Puang Allataala battu diua naä'bäi indo kota ia too, anna mala mendadi pa'sangkasam anna pa'palapaam diua: "Susim too la ullambi'

ingganna hupatau to tä' umbollim Puang Allataala." ⁷Sapo' Lot ia natässu'i illaam mai indo kota Sodom. Indo Lot mesa to malolo gau' anna tä' deem pada sama-sussa penabanna muita gau' mesihi'-sihi'na indo to tä' ma'debata. ⁸Aka indo Lot mesa to mapia gau' tohho illaam alla'-alla'na to kadake gau', nasuhum tä' deem pada samapi'di' penabanna aka allo-allo uhhinggi liu anna muita ingganna gau' kadakena indo pa'botto. ⁹Dadi mannassa naissam si'da-si'da Debata ullappasam dio mai pa'sändäsam hupatau to untuhu'i pa'elo'na, anna naissam toi unkuhum to kadake gau' sule lako allo Pahhottosam. ¹⁰La'bi-la'binna lako to untuhu'i kamohäeam sugali'na to mekadakei anna umpa'pa'dei kakuasaanna Puang Allataala.

Bahani si'da-si'da indo to ma'pa'guhu sala anna umpa'mesai kalena, nasuhum tä' deem kamalajasanna untelle ingganna to matande kakuasaanna yabo suhuga. ¹¹Malaika' sia duka' anna tä'i umpassubum tula' pantelle dio olona Debatanta la untelle ingganna indo to matande kakuasaanna, moi kela daa matoho puha ia anna kuasa puha indo malaika' anna la indo to ma'pa'guhu sala. ¹²Sapo' ingganna indo to ma'pa'guhu sala untelle indo kaha-kaha tä' naissam laoanna. Susi liu olo'-olo' malaiha tä' naissam ma'pikki', anggam untuhu'i pa'elo' kalena. Ia anna dipadadii indo olo'-olo' malaiha, aka la disakka anna dipatei. Susi lium too indo to ma'pa'guhu sala la dipempa'deam. ¹³Anna buana indo pampi'di'na, la ussi'dim duka' kamapi'disam. Tandana kadake gau'na indo tau, moi masiä masannam toi penabanna ke ia siam anna ia napogau'. Maka' sola-solakoa' ma'hempum mangngande, la umpa'kasihisanna' pa'palakoanna aka napalilli kamohäeam sugali'na. ¹⁴Anna muitanna too baine maelo' siaham

la ullullu' pa'bannetauam. Tä' deem la nasanta'na umpogau' dosa. Anna si napeäpi lalanna anna umpemäläi to manipi'pi kamatappasanna anna natuhu'i. Anna biasam angga mailu anna matinna. Tau ia too abana inna to nahua tädona Puang Allataala. ¹⁵Le'ba' umpellei lalam kamaloloam anna untuhu'i lalanna Bileam, änä'na Beor yolona. Indo Bileam napohäe ia ke pa'gau' kadakenai napangngalai doi'. ¹⁶Sapo' napopa'kada Puang Allataala indo keledainna Bileam lambi' napakilala kahha' diona gau' kadakena. Indo keledainna, keledai biasa siam duka', sapo' mala ma'tula' nasuhum dilabai pattuju kamahoanna indo nabi ia too.[§]

¹⁷Ingganna indo to ma'pa'guhu sala sihhapam kalimbuä matti', anna sihhapam toi duka' gabum napassii hibu' kasalle nasuhum tä' umpatuhum uham. Iam too anna napatokaammi Puang Allataala ongeam handam malillim. ¹⁸Aka angga nakähä ussengkengam kalena, sapo' indo tula'na tä' deem gunana. Si untula' indo gau' untuhu'i kamohäeam sugali'na anna mala umpemäläi indo to mane lappa' illaam mai alla'-alla'na to bulim. ¹⁹Indo to ma'pa'guhu sala si ma'dandi naua: "Maka' untuhu'i pepatuduangki, la beba'ungkoa'." Moi kela daa ia siam duka' tä' beba', aka tontä liu napos-abua' indo pa'pogausam to la mebaba lako katilakaam. Aka iai too metalo iam meposabua'. ²⁰Menna-menna muissammi Debatanta Yesus Kristus, To Mepasalama'ta, tau ia too lappa'um dio mai kakuasaanna lino, indo to si ungdakei hupatau. Sapo' maka' nahuntu' sule penabanna kakuasaanna lino lambi' nataloi, mannassa anna tau ia too la mabanda' puha ia kamasus-

saanna anna la yolona. ²¹Aha leko'um ia tä' pissam muissam lalam kamaloloanna Puang Allataala tau ia too anna la naisam sala-sala, sapo' ma'katampasanna tä' di naaku untuhu'i pahentana Puang Allataala indo to puha ditulasam. ²²Indo gau'na abana tä' deem nasisalai indo pehapangam naua: "Asu muande sule luanana," anna "Babi puha didio' le'ba' sule ma'tombä."**

Pahallu tau ma'pogau' mapia illaam muampai kasuleanna Debata

3:1-16

3 O inggannakoa' solasubungku to kupakamaja! Inde suha'ku kupakatuangkoa' temo, suha' kapenduannam. Illaam inde suha'ku temo anna indo lessu' kupeä lalanna anna kupakilalakoa' diona pepatuduam malolona Puang Allataala anna mala maseho pikkihammua'. ²Ia anna kupakilala liukoa' anna mala umpengkilalai liua' indo kada natula' ingganna nabinna Puang Allataala anna indo pahentana Debata, To Mepasalama'ta, to napalandasangkoa' ingganna suhona.

³Handam pahallu muissanna' muua, illaam inde wattu la kasuppisanna lino la kende' buda to nakuasai pa'elo'na sipa' dosana. La natellekoa' ⁴naua: "Kusanga ma'dandi indo Puang Yesus naua: 'La suleä sule.' Iya umba hi? Tä' kukatappa'i la mala sule sule. Aka mengkalao diopi nene to taponene indo to masäem matena sule lako temo, iya tontä liu siam ingganna-ingganna sia. Moi mengkalao dipadadonna inde lino sule lako temo, iya tontä liu siam." ⁵Aka indo tau susi sangngim naägä'inna napa'kalembei diona indo anna dipadadii langi' anna lino, kadanna Puang Allataala umpadadii. Inde lino

§2:16 Pah. 22:4-35.

**2:22 Pep. 26:11.

uwai dipadadi anna buttu dio mai uwai.
⁶Anna indo siam uwai napake Puang Allataala untallanni lino yolona, wattu tanna anna bussui uwai. ⁷Anna kadanna siam Puang Allataala unjagai inde langi' sola lino temo anna mala naä'bäi api ke dako'i. Tontä liupi dijagai inde langi' sola lino mengkalao temo sule lako wattu la diongei ditahungku anna dipempa'deam ingganna to tä' umbollim Puang Allataala.

⁸Sapo' ikoa'-iko inggannakoa' solasubungku to kupakamaja, deem mesa kaha-kaha tä' si'da-si'da mala la ungakembeia': situhu' Puang Allataala, tontäm sangngallo anna sasa'bu taunna, battu diua tä' deem alla'na sasa'bu taunna anna sangngallo. ⁹Tä' ia maela' Debata ungganna'i pa'dandianna, moi anna deem tau muuai: "Maela' Debata ungganna'i pa'dandianna." Sapo' ia anna tä'pi sule temo, aka nasa'bahasampokoa'. Aka napemulu Debata ke tä'i deem tilaka hupatau moi podo la mesam, anna napemulu toi ke untihokonganni dosana ingganna hupatau.

¹⁰Sapo' allo kasuleanna Debatantaa' la sihhapam kasuleanna to maboko, tä' deem dibai-bai. Wattu eta too la magahugu yabo langi' lambi' pa'de langi', anna ingganna issinna la pissam pa'dena naä'bäi api. Anna lino sola ingganna issinna la pissam duka' pa'dena.

¹¹Dadi, aka abana inna la pissam pa'dena ingganna-ingganna sia, iya akaa' la pahallu umpogau'? La pahallukoa' maseho umpalako ingganna pa'palakoammu anna pahallukoa' untuhu'i liu pa'elo'na Debata ¹²illaam inde wattu muongeia' umpemmitai kasuleanna indo allo puha napa'tantu Puang Allataala. La umpateenna' anna mala bale' sule allo ia too. Wattu eta too langi' la naä'bäi api anna la mahehe ingganna-ingganna sia napobua'

malussunna. ¹³Sapo' kitaa'-kita umpemmitaikia' langi' bakahu anna lino bakahu, ongeam kamaloloam, aka puham nadandi Puang Allataala.

¹⁴Iam too kasuhunganna, inggannakoa' solasubungku to kupakamaja, anna pahallum illaam inde wattu umpemmitai allo ia too la umpeäa' lalanna anna mala tubo maseho liukoa', la tä' deem sassaimmua', anna la mapia kasilombungammua' Puang Allataala. ¹⁵Sagainna' too inde kasa'bahasanna Debata mebeem wattu anna mala ullambi' tau kasalamasam. Inde kutulasangkoa' susi siam issinna ingganna indo suha' napakatuangkoa' Paulus, solasubunta to tapakamaja. Indo suha'na, natuli' umpolalam kakeakasam nabeem Puang Allataala. ¹⁶Illam ingganna suha'na Paulus natuli' liu diona kaha-kaha ia too. Illam indo suha'na deem sanaka-naka kaha-kaha mapahhi' dipikki'. Kaha-kaha iam too si naägä'i naeli' kalembasanna indo tau to tä' deem aka naissam anna manipi' kamatapassanna, umba susi si naägä'i duka' mueli' kalembasanna issi senga'na Suha' Maseho, nasuhum umpasuleam katilakaam kalena.

Kada pebubunna Petrus

3:17-18

¹⁷Sapo' ikoa'-iko inggannakoa' solasubungku to kupakamaja, muissammia' ingganna indo kaha-kaha ditula' ingngena'. Iam too anna la unjagainna' indana nababa bulingkoa' pepa'guhuam salanna indo to tä' ma'debata, nasuhum metobäkoa' yabo mai indo pehhondoam matoto'mu. ¹⁸Anna la umpeä liua' lalanna anna mala tuttuam muissangkoa' Debatanta Yesus Kristus, To Mepasalama'ta, anna tuttuam ussi'dim pa'kamasena. Dipomatande sanganna mengkalao

temo sule lako salako-lakona. Abana
inna la diua!^{††}
Padam too.

^{††}**3:18** *Abana inna la diua!:* naua illaam basa Yunani, *Amin.*

Uhuna Suha'na Yohanes Bätäna issinna

Inde suha' natuli' Yohanes napakat-
uam to matappa' anna mala tontä liu
manontom lako Puang Allataala sola
Yesus Kristus anna la si ungamasei
solana to matappa', situhu' pepatuduam
puha natahima. Tä' la napalulako pen-
abanna ingganna kakadakeam illaam
inde lino, sapo' la umpalako pa'elo'na
Puang Allataala.

Natula' toi indo la dipangngissanni
diua salama'um tau, naua: "Menna-
menna muakui naua: 'Puang Yesus
Änä'na Puang Allataala,' tau ia too
sakalebum Puang Allataala anna Puang
Allataala tohho illaam kalena." Anna
situhu' issinna inde suha' la tandaammi
too diua manontom liungkia' lako Puang
Allataala ke si ungamaseingkia' solata.
Aka menna-menna ungamasei Puang
Allataala, la ungamasei duka' solana to
Sahani battu diua to matappa'.

Natuli' duka' diona pepatuduanna to
umbali Kristus. Yolona tau ia too us-
sangai duka' kalena to Sahani, sapo'
umbaba hi pepatuduam tää'na sihondoi
pepatuduam illaam kasahaniam. Indo
pepatuduanna naua: "Ingganna aka-aka
illaam inde lino sangngim kadake. Dadi
tä' natama pikkiham kela diuai: 'Kris-
tus puha mehupatau,' aka la nakadakei
kakadakeanna lino."

Indo to umbaba pepatuduam
kadake naua polepi: "Dipasalama'
kalembasanna dilappasam dio mai
kaha-kaha katuboam illaam inde
lino." Napepatuduam toi naua: "Indo
kasalamasam tä' silambangam gau'na
hupatau illaam lino, anna tä' toi tau
manggi' ungamasei solata."

Iya sisala hi pepatuduam natula'
Yohanes illaam inde suha' napomasiä'
naua: "Yesus Kristus sulem inde lino

mehupatau, anna ingganna to unkat-
appa'i la ungamasei ingganna solana to
matappa'."

Lesoanna issinna

1. Kada passu'bä' (1:1-4)
2. Tubo illaam kamasiäsanna Puang
Allataala (1:5-2:27)
 - a. Tubo illaam kamasiäsam kalem-
basanna ma'gau' mapia situhu' pa'elo'na
Puang Allataala (1:5-2:17)
 - b. Menna-menna untumpu pala' Puang
Yesus, tau ia too tä' deem kasilombun-
ganna Ambeta (2:18-27)
3. To disangai änä'na Puang Allataala
(2:28-4:6)
 - a. Menna-menna tä' umpalako ka-
maloloam battu haka tä' ungamasei to
matappa', tau ia too taia änä'na Puang
Allataala (2:28-3:24)
 - b. Menna-menna tä' muakui Puang
Yesus tau ia too tä' napentamai Penaba
Maseho (4:1-6)
4. Pa'kamasena Puang Allataala lako
kita anna pa'kamaseta lako solata (4:7-
5:5)
5. Kasa'biam diona Yesus Kristus (5:6-
12)
6. Katuboam sule lako salako-lakona
(5:13-21)

Yesus Kristus-um too diuaam Kada To Mepatubo

1:1-4

1 Illaam inde suha' kituli' diona To
inna deemmi pempom dio mai.
Puham kiita sola matangki, kihingngi
sola talingangki tula'na. Kianda'im sola
limangki anna kiitam pa'palakoanna.
Iam too Kada To Mepatubo. ²Katuboam
ia too puham dipa'paitaam anna
kiitam kami'. Iya kisa'biim anna
kipa'pakahebaam indo katuboam to
la tontä liu sule lako salako-lakona.
Indo katuboam sitimä sola Ambeta
mengkalao dio mai anna puhangkam
dipaitai. ³Iai too puha kiita anna

kihingngi, iam too kipakahebaiangkoa' anna malakia' mesa illaam kakalebuam. Aka kami'-kami' sakalebungkam sola Ambeta anna Yesus Kristus Änä'na. ⁴Kitulasangkoa' indee anna mala sundum anna sule lako kakassiangki.

**Tubo illaam kamasiäsam
kalembasanna ma'gau' mapia situhu'
pa'elo'na Puang Allataala**

1:5-10

⁵Iam too inde kaheba kihingngi dio mai Yesus Kristus kipakahebaiangkoa': Indo Puang Allataala kamasiäsam battu diua kamapiaam anna tä' deem kamalillingam battu diua kakadakeam illaam kalena. ⁶Maka' taua: "Sakalebungkia' Puang Allataala," sapo' tubo illaam dikia' kamalillingam, iya taägä'i hia' tia isanga aka tä'kia' ma'palako situhu' kamaloloanna Puang Allataala. ⁷Sapo' maka' tubokia' illaam kamasiäsam susi kamasiäsanna Puang Allataala, iya sakalebungkia' too anna ingganna dosata nabaseiangkia' haha titollona Puang Yesus, Änä'na.

⁸Maka' taua: "Tä'ki' deem madosa," iya umbaba bulingki' kaleta anna kamaloloanna Puang Allataala pa'de illaam kaleta. ⁹Sapo' maka' taakui dosata längäm Puang Allataala, la tontä la manontom umpasule lako pa'dandianna anna ma'palako situhu' kamaloloanna, nasuhum la naampunniangkia' dosata anna nabaseiangkia' ingganna pa'pogau' kadaketa. ¹⁰Sapo' maka' taua: "Tä'ki' deem madosa," iya iam tia isanga ussangaiki' Puang Allataala kaua-ua bäbä anna tä' tapailaam penaba kadanna.

**Änä'na Puang Allataala tä' mala tala
ma'pogau' susi Yesus Kristus**

2:1-6

2O inggannakoa' änä'ku, tula' ia too kupailaangangkoa' inde suha' anna mala tä'koa' umpogau' dosa. Sapo' maka'

deem tau umpogau' dosa, tä' la mahea' aka deem Yesus Kristus to malolo la umbala'ki' ma'tula' dio olona Puang Allataala. ²Iya Kristus-um too umbala'kia' dipatei nasuhum malam naampunniangkia' dosata Puang Allataala. Anna tä' angga dosata mandi, sapo' duka' dosana ingganna hupatau illaam inde lino.

³La mannassanna diua muissam tongangki' Puang Allataala ke dituhu'i liui ingganna pahentana. ⁴Maka' deem tau muuai: "Kuissam tongam Puang Allataala," sapo' tä' di si natuhu'i pahentana, mannassa tau ia too kaägä'-ägä' anna tä' deem kamaloloanna Puang Allataala illaam kalena. ⁵⁻⁶Sapo' menna-menna si untuhu'i si'da-si'dai pahentana, tau ia too sundummi pa'kamasena lako Puang Allataala. Menna-menna muuai: "Deem kasilombunganku Puang Allataala," tä' mala tala ma'pogau' susi Yesus Kristus. Susim too la dipangngisanni diua untuhu'iki' Puang Allataala.

Pahenta Bakahu

2:7-17

⁷Oa' solaku to kukamasei, inde kuitulisangkoa' taia pahenta maneanna ditula', sapo' pahenta masäenna' untuhu'i, indo puha ditulasangkoa' pahandu'na anna unngkatappa'ikoa' Puang Yesus. ⁸Moinna anna susi, inde pahenta mala duka' diua bakahu. Aka tandaam si'da-si'dam pole' illaam pa'palakoanna Kristus anna illaam kalemua'. Anu' tuttuam untampeammokoa' kamalillingam anna tuttuam tiballa'um kamasiäsam tongam illaam pa'palakoammua'.

⁹Maka' deem tau muuai: "Tubo illaammä' kamasiäsam, tä' deem sassainna pa'pogausangku," sapo' unngkahidi' di solana to matappa', tau ia too tubo illaampi kamalillingam. ¹⁰Sapo' menna-menna unngkamasei solana to matappa', tau ia too tubo illaammi kamasiäsam, anna tä'um deem katitedoanna la nap-

olalam metobä tama dosa. ¹¹Sapo' menna-menna unghahidi' solana, tau ia too ma'penaba kadake aka illaam liupi kamalillingam anna tä' naissam naua: "La lu umbää' ngei," aka tä' naissam usse'la kamapiaam anna kakadakeam.

¹²Oa' änä'ku, ia anna kupakatukoa' inde suha', aka diampunniammoko' dosamu kahana pengkähäna Yesus Kristus.

¹³Anna lu matinna' duka' inggannakoa' to titanam ambe, aka muissammokoa' Puang Yesus to inna deemmi pempom dio mai.

Anna inggammua' duka' änä' muane, aka untaloingkoa' tomahajanna setam.

¹⁴Iya kutulasammokoa' illaam inde suha' änä'ku, aka muissammokoa' Ambeta.

Anna kuuam polepi lako to titanam ambe,

aka muissammokoa' Puang Yesus to inna deemmi pempom dio mai.

Susi toi duka' inggammua' änä' muane, aka matoto'unna' kapeimangammu, umpaillaam tambu'ungkoa' kadanna Puang Allataala,

anna untaloi tongkoa' tomahajanna setam.

¹⁵Daa umpalulako penabammu ingganna kakadakeam illaam inde lino. Aka maka' umpateem, mannassa anna tä'i la lu lako penabammu Ambeta. ¹⁶Aka indo sipa' kadakena hupatau illaam inde lino tä' buttu yabo mai Ambeta, sapo' dadi illaam lino, susinna: ma'palako situhu' pa'pohäena, mailu sugali', anna saboä.

¹⁷Inde issinna lino sola ingganna kamailuam kadakena, tä' la da'da' liu. Sapo' menna-menna umpalako pa'elo'na Puang Allataala la tubo liu ia sule lako salako-lakona.

Menna-menna untumpu pala' Yesus Kristus, tau ia too tä' deem kasilombunganna Ambeta

2:18-27

¹⁸Oa' änä'ku, wattunnam temo illaam-makia' la kapuhaanna lino. Puhangkoa' dipaissanni diua la sule mesa punggabana to umpobali Kristus. Anna budam temo kende', nasuhum taissammi taua temo la kapuhaannam lino. ¹⁹Indo to umbali Kristus buttu illaam siam mai alla'-alla'taa', sapo' mannassa anna taiaa' solata. Aka kela solata si'da-si'daa', la tontä liukia' sola-sola. Sapo' napelleikia' anna mala tandaam diua ingganna tau ia too taia solata.

²⁰Sapo' ikoa'-iko puhangkoa' dipata-mai Penaba Masehona Puang Allataala napatuhum Yesus Kristus nasuhum muissammia' usse'la pepa'guhuam sala anna pepa'guhuam malolo.

²¹Illaam inde suha' kutulasangkoa', tä' kuuä' tää'napia' muissam indo kaheba kamaloloam, sapo' setonganna muissammia' kaheba kamaloloam ia too. Anna muissam toia' muua tä' deem kaheba tatappa' la buttu illaam mai.

²²Menna diuaam to kaägä'-ägä'? Indo to muuai: "Puang Yesus taia To puha dilanti' la mepasalama'." Tau iam too balinna Kristus, anna untumpu pala' Puang Allataala Ambeta sola Änä'na. ²³Menna-menna untumpu pala'i, tau ia too tä' deem kasilombunganna Ambeta. Sapo' menna-menna manontom liu muakui Änä'na, deem duka' kasilombunganna Ambeta.

²⁴Dadi pahallu umpaillaam penaba liua' indo Kaheba Katilallasam puha uhhingngia' mengkalao pahandu'na anna matappa'koa'. Aka maka' umpateem liua', iya la sakalebu liungkoa' too Änä'na anna Ambeta.

²⁵Anu' ma'kalem Puang Yesus ma'dandi

naua: “La kubeengkoa' katuboam sule lako salako-lakona.”

²⁶Ingganna inde kutulasangkoa' diona to umpeäi lalanna anna malakoa' bulim.

²⁷Sapo' ikoa'-iko puhangkoa' nabeem Puang Yesus Penaba Masehona Puang Allataala. Anna indo Penaba Maseho tontä liu tohho illaam kalemua' nasuhum tä'um pahallu deem tau senga' la umpatudukoa' pepaduduam bakahu. Aka napatudu liungkoa' Penaba Maseho ingganna la pahallunna; anna ia too tappa', tä' diua bäbä. Iam too anna la tontä liungkoa' manontom lako Kristus.

To disangai äinä'na Puang Allataala

2:28–3:10

²⁸Dadi, inggannakoa' äinä'ku, la tontä liukoa' manontom lako Kristus. Aka maka' susi, sulei too Puang Yesus umpa'paitaam kalena tä'ungkia' la mahea' anna masihi' dio olona. ²⁹Dadi aka muissammia' muua Puang Allataala to malolo, nasuhum muissanna' duka' muua ingganna to ma'gau' malolo disangai äinä'na Puang Allataala.

3 Pikki'unna' too pa'kamasena Puang Allataala lako kita, tä' dibela dipaju kalandona lambi' disangaikia' äinä'na. Anna abana äinä'na si'dakia' Puang Allataala. Iam too anna tä'um naissam kalembasanna pa'palakoanta to tamatappa' inde lino, aka tä' muissam Puang Allataala. ²O solasubungku to kukamasei, tentomai äinä'ngkia' Puang Allataala, sapo' tä'pi nalambi' pikkihanta la maakaki' susi ke dako'i. Moinna anna susi, taissammia' taua la susiki' Kristus ke dipa'paitaammi, aka la taitam pole' inna la susinna Kristus. ³Anna menna-menna mahannu lako Kristus tä' mala tala maseho pa'pogausanna illaam inde lino, umba susi Kristus maseho.

⁴Menna-menna si umpogau' dosa, untekka pahentana Puang Allataala; aka pa'pogausam dosa umbali pahen-

tana Puang Allataala. ⁵Muissammia' muua sule Kristus inde lino anna mala umpa'dei ingganna dosa. Anna muissam toia' muua tä' Ia madosa Kristus. ⁶Dadi menna-menna tontä liu manontom lako Kristus tä'um la si umpogau' dosa. Sapo' menna-menna si umpogau' dosa, tau ia too tä' ia muissam Kristus dapaka ia la nakaleso pa'elo'na.

⁷O inggannakoa' äinä'ku, daa umma'dinna' nababa bulim tau. Menna-menna ma'gau' mapia, tau ia too mesa to malolo umba susi Kristus malolo. ⁸Sapo' menna-menna si umpogau' liu dosa, tau ia too äinä'na tomahajanna setam, aka mengkalao diopi mai anna madosa lium ia tomahajanna setam. Iam too anna mentamam lino Äinä'na Puang Allataala, anu' la umpa'dei pengkähänganna tomahajanna setam. ⁹Menna-menna mendadim äinä'na Puang Allataala, tau ia too tä'um la si umpogau' dosa aka sipa'na Puang Allataala illaammi kalena. Anu' Puang Allataala mendadim Ambena, iya tä'um la mala si umpogau' dosa. ¹⁰Dadi mannassa anna tise'lai diita äinä'na Puang Allataala anna äinä'na tomahajanna setam. Aka menna-menna tä' umpalako kamaloloam battu haka tä' ungamasei to matappa', tau ia too taia äinä'na Puang Allataala.

Puang Yesus la dipotandengam ma'kamase

3:11-18

¹¹Indem ia indo kaheba puha uhingngia' mengkalao pahandu'na matappa'koa': Diona pahallukia' la sikamase mesa sola mesa. ¹²Tä' si'da-si'dakia' la mala ma'gau' susi Kain, aka indo Kain mendadim ia äinä'na To handam kadake gau' anna umpatei adinna. Akanna umpatei adinna? Aka si ma'gau' kadake ia Kain anna si ma'gau' mapia ia adinna. ¹³Oa' solasubungku, daa

ungkapilla'i ke nakahidi'koa' to tamatappa' illaam inde lino. ¹⁴Taissammia' taua umpelleingkia' kamateam lu tama katuboam. Tandana umpelleingkia' kamateam, aka si untkamaseingkia' solasubunta to matappa'. Sapo' menna-menna tä' ma'kamase, tontä liupi ia illaam kamateam. ¹⁵Anna menna-menna untkahidi' to matappa', tau ia too sihapam papateam anna mannassa diua indo to papateam tä' ia deem katuboam sule lako salako-lakona illaam kalena. ¹⁶Kristus puha umpopepatei kalena aka nakamaseikia'. Iam too tapotandenganna' ma'kamase. Dadi la ahu'kia' duka' umbeho kaleta la ussi'dim ma'hupahupa kamasussaam kahana untkamaseikia' solasubunta to matappa'. ¹⁷Sapo' tä' ia deem pa'kamasena Puang Allataala illaam kalena mesa to ganna'um katuboanna, ke tä'i häntä buana muita solana tadeem naponnoiam kapahallu-anna. ¹⁸O inggannakoa' änä'ku, indo diuaam pa'kamase si'da-sia tä' la dio bäbä pudu', sapo' la pahallu mengkalao illaam unä' penaba lemba' dio pa'palakoam.

**Tä'ungkia' la bata-bata dio
olona Puang Allataala**

3:19-24

¹⁹Maka' si untkamasei si'da-si'dakia' solata to matappa', taissammi too taua änä'na si'dangki' Puang Allataala to malolo. Anna la masannammi penabanta aka tä'ungki' la bata-bata dio olona. ²⁰Aka moinna anna ma'tula'-tula' penabanta naua: "Tä' ahamä' salama' aka pa'palakoangku," sapo' tä' la dipehingngii aka kasalle puha ia kuasanna Puang Allataala anna la penabanta, aka Ia to ullosa limbä anna untahhu' mandalam. ²¹Oa' solaku to kukamasei, maka' too tä'um bata-bata penabanta, tä'ungki' too la mahea' dio olona Puang Allataala. ²²Anna la nahingngiam ingganna pelauanta,

aka si tapalakom pahentana anna si tapogau'um pa'pohäena. ²³Indem ia pahentana Puang Allataala lako kita: La untkatappa'iki' sanganna Yesus Kristus, Änä'na, anna la sikamaseki' mesa sola mesa susi puha napahentaangkia'. ²⁴Menna-menna si untuhu' pahentana Puang Allataala, tau ia too sakalebum Puang Allataala, anna Puang Allataala tohho illaam kalena. Anna la taissammi taua tohhom illaam kaleta aka puhangki' napatamai Penaba Masehona.

**Penaba Maseho anna
penabanna balinna Kristus**

4:1-6

4 Oa' solaku to kupakamaja, tä'koa' la si masimpam untkatappa'i tau moi la naua: "Nasahunnä' Penaba Maseho." Aka budam nabi tatappa' kende' anna lao ma'patudu lako inde lino. Dadi la pahallua' umpengkalesoi yolo, battu la Penaba Masehona si'da hi Puang Allataala ussahunni ma'patudu, battu la taia hi. ²La mannassanna diua to nasahum Penaba Masehona Puang Allataala ke naakui naua: "Puham sule inde lino Yesus Kristus mehhupatau." ³Sapo' menna-menna tä' muakui, tau ia too tä' napentamai Penaba Masehona Puang Allataala. Sapo' napentamai setam penabanna battu diua balinna Kristus. Puhanna' uhhingngi la sule penaba ia too anna abana sulem inde lino.

⁴Oa' änä'ku, ikoa'-iko änä'ngkoa' Puang Allataala anna puhangkoa' untaloi ingganna nabi tatappa', aka kuasa puha Ia Penaba Maseho ussahungkoa' anna la indo penaba to ussahum to tamatappa'. ⁵Indo ingganna nabi tatappa' buttu illaam mai alla'-alla'na to tamatappa' nasuhum sihondoi tula'na anna pa'pohäena solana anna napehingngii. ⁶Kami'um too änä'na Puang Allataala. Dadi menna-menna muis-

sammi Puang Allataala, tau ia too la umpehingngii pepatuduangki. Sapo' menna-menna taia änä'na Puang Allataala, tau ia too tä' ia umpehingngii pepatuduangki. Susim too tapangngis-sanni alla'na pepatuduam malolona Penaba Maseho anna pepatuduanna penaba la mebaba bulim.

Pa'kamasena Puang Allataala lako kita anna pa'kamaseta lako solata

4:7-21

⁷Inggannakoa' solaku to kukamasei, la sikamasekia' mesa sola mesa, aka indo pa'kamase buttu yabo mai Puang Allataala. Anna menna-menna si ma'kamase, tau ia too mannassa anna änä'nai Puang Allataala anna muissammi Puang Allataala. ⁸Aka sipa'na Puang Allataala ma'kamase. Dadi menna-menna tä' ungamasei solana, tau ia too mannassa anna tä' ia muissam Puang Allataala. ⁹Puang Allataala puha ussua Änä' mesanna mentama inde lino anna mala nakähängangkia' katuboam sule lako salako-lakona. Susim too napa'paitaam diona pa'kamasena lako kita'. ¹⁰Aka diuam pa'kamase? Takitaa' ungamasei Puang Allataala, sapo' Puang Allataala ungamaseikia' anna ussua Änä'na umbala'ki' dipatei nasuhum malakia' diampunniam dosata. ¹¹Oa' solaku to kukamasei, kahana tä' deem napadaam pa'kamasena Puang Allataala lako kita nasuhum pahallukia' duka' sikamase mesa sola mesa. ¹²Moinna anna tä'pi deem tau moi podo la mesa muita Puang Allataala, sapo' maka' sikamaseki' mesa sola mesa, sundummi pa'kamasena Puang Allataala lako hupatau anna tontä' liu tohho illaam kaleta Puang Allataala.

¹³Kasuhunganna anna taissannia' taua sakalebungki' Puang Allataala anna tohho illaam kaleta, aka puhangki' napata-mai Penaba Masehona. ¹⁴Anna puham kiita anna kisa'biim kiua Ambeta ussua Änä'na mentama lino mendadi To Mepasalama'. ¹⁵Menna-menna muakui naua: "Puang Yesus Änä'na Puang Allataala," tau ia too sakalebum Puang Allataala anna Puang Allataala tohhom illaam kalena. ¹⁶Anna taissammi sola takatappa'i taua pa'kamasena Puang Allataala mentama kaleta.

Sipa'na Puang Allataala ma'kamase. Menna-menna ungamasei liu solana, tau ia too sakalebum Puang Allataala anna tohhom Puang Allataala illaam kalena. ¹⁷Dipasundum pa'kamase illaam kaleta anna mala tä'kia' mahea' dio olona Puang Allataala ke lambi'um wattu la naongi umpopa'tadongkongam hupatau. Tä'kia' la mahea' aka susim pa'palakoanta Kristus. ¹⁸Maka' deem pa'kamase illaam kaleta, tä'ungki' la mahea'. Aka maka' sundummi pa'kamase illaam kaleta, iam too la umpa'dei kamaheasam. Aka tä'ungki' la nahua pa'tahungkungam indo si napikki' hupatau. Dadi menna-menna mahea', tau ia too tä'pi sundum pa'kamase illaam kalena.

¹⁹Iam too anna si ma'kamasengkia' aka yolo puha Ia Puang Allataala ungamaseikia'. ²⁰Maka' deem tau muuai: "Ungkamaseiä' Puang Allataala," sapo' ungmahidi' di to matappa', tau ia too kaägä'-ägä'. Aka solana duka' naita ia lako anna tä'i nakamasei, damoaham Ia Puang Allataala tä' diita. ²¹Anna indem ia indo pahenta nabeengkia' naua: "Menna-menna ungamasei Puang Allataala pahallu duka' la ungamasei to matappa'."

**Ingganna änä'na Puang
Allataala untaloi ingganna
kakadakeam illaam lino**

5:1-5

5 Menna-menna unkatappa'i naua: "Puang Yesus To puha dilanti' la mepasalama'," tau ia too änä'nam Puang Allataala. Anna menna-menna ungamasei Ambeta, tau ia too ungamaseim duka' änä'na Ambeta. ²Maka' ungamaseingkia' Puang Allataala anna tapalakoia' pahentana, taissammi taua ungamaseingkia' änä'na Puang Allataala. ³Aka maka' tatuhu'i pahentana Puang Allataala, iya takamaseim too. Anna indo pahentana tä' mabanda', ⁴aka ingganna änä'na Puang Allataala untaloi ingganna kakadakeam illaam inde lino. Kamatappasantam too lako Puang Yesus anna malangki' untaloi kakadakeam. ⁵Mennangka mala untaloi ingganna kakadakeam inde lino? Anggam tia to unkatappa'i naua: "Puang Yesus Änä'na Puang Allataala."

Kasa'biam diona Yesus Kristus

5:6-12

⁶Yesus Kristus-um too sule ditedo' uwai anna umpatitollo hahana. Tä' sule angga mandi la ditedo' uwai, sapo' ditedo' uwai sola umpatitollo hahana. Anna Penaba Masehom too ussa'bii, aka abana malolo sipa'na Penaba Maseho. ⁷Aka deem tallu hupa umpatappa'i diona Yesus Kristus:†† ⁸Penaba Maseho, uwai pantedosanna, anna haha titollona; inde tallu hupa, tä' deem sisala passa'biinna. ⁹Aka passa'biinna duka' hupatau anna dikannanganni, damoaham ia passa'biinna Puang Allataala, aka ma'kalem ussa'bii diona

Änä'na. ¹⁰Menna-menna unkatappa'i liu Änä'na Puang Allataala, tau ia too umpaillaam tambu'um kasa'biam ia too. Sapo' menna-menna tä' unkatappa'i Puang Allataala, tau ia too ussangai Puang Allataala kaua-ua bäbä, aka tä' nakatappa'i passa'biinna diona Änä'na. ¹¹Anna iam too inde passa'biinna naua: Puhangkia' nabeem Puang Allataala katuboam sule lako salako-lakona, anna Änä'nam too kabuttuanna indo katuboam ia too. ¹²Menna-menna deem kasilombunganna Änä'na Puang Allataala, tau ia too ullambi'um indo katuboam. Sapo' menna-menna tä' deem kasilombunganna Änä'na Puang Allataala, tau ia too tä' ullambi' indo katuboam.

Katuboam sule lako salako-lakona

5:13-21

¹³O inggannakoa' to unkatappa'im sanganna Änä'na Puang Allataala, kutulasangkoa' illaam inde suha' anna mala muissam si'da-si'daa' muua: "Ullambi'ungkam katuboam sule lako salako-lakona." ¹⁴Anna tä'kia' la bata-bata lako olona Puang Allataala, aka takatappa'i la nahingngiam pelauanta ke tapelaui situhu'na pa'elo'na. ¹⁵Anna maka' taissammia' taua la nahingngiam ingganna pelauanta, iya la taissammia' too duka' taua taampuummi indo pelauanta. ¹⁶Maka' deengkoa' muita solamu to matappa' umpogau' dosa, la umpa'sambajanganna' längäm Puang Allataala, anna mala Ia umpatepui sule katuboanna. Sapo' tä'koa' kuuuam la pahallu umpa'sambajangam indo tau to umpogau' dosa la mebaba lako kamateam sule lako salako-lakona. Aka deem tau ma'pogau' susi. ¹⁷Ingganna

††**5:7 tallu hupa umpatappa'i diona Yesus Kristus:** Illaam sanaka-naka suha' masäem deem dituli' naua: Sa'bi yabo suhuga tallui: Ambe', Battakada Debata anna Penaba Maseho. Inde tallu hupa mesa passa'biinna. Sa'bi inde lino tallui: ... (balajam 8).

gau' kadake sangngim dosa. Sapo' deem dosa tä' la mebaba lako kamateam sule lako salako-lakona.

¹⁸Taissammia' taua menna-menna mendadim änä'na Puang Allataala, tau ia too tä'um la si umpogau' dosa. Sapo' pengkähänganna tomahajanna setam la najagai liu Änä'na Puang Allataala anna mala tä' nababa bulim.

¹⁹Taissanna' taua änä'nakia' Puang Allataala, anna taissam toi duka' taua ingganna to tamatappa' nakuasai ia tomahajanna setam. ²⁰Taissanna' duka'

taua sulem Änä'na Puang Allataala anna nabukkaiammakia' penabanta, nasuhum malakia' muissam indo Puang Allataala si'da-sia. Iya sakalebungkia' Puang Allataala si'da-sia anna Yesus Kristus Änä'na. Iam too Puang Allataala si'da-sia anna iam too katuboam sule lako salako-lakona.

²¹Oa' änä'ku, la unjagai manappakoa' kalemu indana umpenombaikoa' debata taia Debata si'da-sia.

Padam too.

Kapenduanna Suha'na Yohanes Bätäna issinna

Inde suha' natuli' Yohanes to disangai "Pebaba Ada" napakatuam mesa jumaa'.

Illaam inde suha' dua kaha-kaha napelau to untuli'i. Uhuna, ingganna to umbatai la sikamase mesa sola mesa. Kapenduanna, la unjagai to umbaba pepa'guhuam mebaba bulim, anna ingganna pepa'guhuam tää'na sihondoi pepa'guhuanna Kristus.

Lesoanna issinna

1. Kada passu'bä' (1:1-3)

2. Pa'kamase lako solata anna la dipasikambela kale to umbaba pepa'guhuam sala (1:4-11)

3. Kada pebubum (1:12-13)

1 Kao Pebaba Ada' untuli'i inde suha' lu lako jumaa'[¶] to napilei Puang Allataala. Kukamasei si'da-si'dakoa', tä' kao mandi, sapo' moi duka' ingganna to ungkalesom kamaloloanna Puang Allataala, ² aka kamaloloam ia too tohho illaammi kaleta, anna la tontä lium illaam kaleta sule lako salako-lakona.

³ Handandanni Puang Allataala Ambeta anna Yesus Kristus Änä'na la untamba'kia' anna nakamasei sola namana' kamasakkeam sola kamasannangam. Ingganna ia too tipungngu' anna tandaam illaam kamaloloam anna pa'kamase.

**Pa'kamase lako solata anna
la dipasikambela kale to
umbaba pepa'guhuam sala**

4-11

⁴ Tä'um deem la susi katilallasangku tappana kuissam deemmi illaam alla' alla'mua' ma'palako situhu' kamaloloam, umba susi puha napahentaangkia' Am-

beta. ⁵ Anna temo deem la kupelaua' matim: Kela mala anna sikamase liukia' mesa sola mesa. Inde kutulisangkoa' taia pahenta maneanna ditula', sapo' pahenta puhangkia' ditulasam pahandu'na anna unkatappa'ikia' Puang Yesus.

⁶ Indo diuam pa'kamase, kalembasanna untuhu'i ingganna pahentana Puang Allataala. Iya indo pahenta puhaa' uhhingngi pahandu'na anna unkatappa'ikoa' Puang Yesus naua: La ungamasei liukoa' solamu.

⁷ Aka budam to mebaba bulim kende' anna lao ma'patudu lako inde lino. Indo tau ia too tä' naaku naua: "Puham sule inde lino Yesus Kristus mehhuatau." Tau susi ia too mebaba bulim anna to umpobali Kristus. ⁸ Dadi la unjagai manappakoa' kalemu indana labu'i indo pengkähäki. Anna mala untahima asanna' sahomu indo la nabeengkia' Puang Allataala. ⁹ Menna-menna tä' muanda'i pepatuduanna Kristus, sapo' ia pole hi uhhängännii pikkiham di kalena, tau ia too tä' deem kasilombunganna Puang Allataala. Sapo' menna-menna muanda'i manappai pepatuduanna, la deem ia kasilombunganna Puang Allataala Ambeta sola Änä'na. ¹⁰ Maka' deem sule tau umpellambi'ikoa' umbaba pepa'guhuam sulibanna pepa'guhuanna Kristus, daa untahimai illaam banuammu tau ia too, anna daa umbeennia' lindo malute. ¹¹ Aka menna-menna umbeenni lindo malute, tau ia too mangngala tabam duka' illaam pengkähängam kadakena.

Kada pebubum

12-13

¹² Moinna anna budapi la pahallu kutasangkoa', sapo' mokaä' umpailaam asanni inde suha', aka maelo' siamä' la

[¶]1:1 jumaa': Indo dituli' illaam basa Yunani, naua ia ke basa Bambanni: Indo'... sola änä'mu, kiha-kiha jumaa' nauaam.

matim anna sipekaleangkia' sipa'tula',
anna mala sumpu katilallasantaa' pada-
pada.

¹³Salama'na duka' matim solasub-
ummu inde jumaa'.^{§§}
Padam too.

§§1:13 *solasubummu inde jumaa'*: Indo dituli' illaam basa Yunani, naua ia ke basa Bambanni: *ānā'na solasubummu*, kiha-kiha indo jumaa' naongi Yohanes.

Kapentallunna Suha'na Yohanes Bätäna issinna

Inde suha' natuli' Yohanes to disangai "Pebaba Ada" napakatuam mesa pebaba ada' illaam jumaa', isanga Gayus. Yohanes umpuji Gayus aka si umbalii solana to Sahani indo to si lao umpa'pakahebaam Kaheba Katilallasam lako botto senga'. Anna napakaingapi duka' diona pa'palakoam kadakena mesa tau isanga Diotrefes.

Lesoanna issinna

1. Kada passu'bä' (1:1-4)

2. To umpa'pakahebaam sanganna Kristus pahallu dipamoloi (1:5-12)

3. Kada pebubum (1:13-15)

1 Kao Pebaba Ada' untuli'i inde suha' lu lako Gayus to kupakamaja anna to kukamasei si'da-si'da.

²O solaku to kupakamaja, kupa'sambajanganko anna mala masakke liuko anna masannam illaam ingganna-ingganna sia, la susi mapianna busäsam penabammu.

³Tilalla' punalaä' tappana sule inde sanaka-naka solasubunta natulasannä' diona kamanontongammu muanda'i kamaloloanna Puang Allataala, aka si ma'palakongko situhu' kamaloloam ia too. ⁴Tä'um deem la susi katilallasangu tappana kupelele diua ma'palakom ingganna änä'ku situhu' kamaloloam.

**To umpa'pakahebaam sanganna
Kristus pahallu dipamoloi**

5-12

⁵O solaku to kupakamaja, tä' deem pada samapia kamanontongammu si umbalii solasubunta to matappa', moinna anna tä'pokoa' siissangam.

⁶Anna puham natulasam lako jumaa'ki diona pa'kamasemu. Kela mala tontä liuko umpamoloi itim tau ke mengkalaoim anna mala tä'

deem kakuhängam illaam pa'laoanna. Maka' too umpateemmi, la sipäto'um dio olona Puang Allataala indo pa'palakoammu. ⁷Aka illaam pa'laoanna umpa'pakahebaam sanganna Kristus, tä' deem aka-aka la natahima dio mai to tamuissam Puang Allataala. ⁸Dadi kita to matappa', la pahalluki' umpamoloi tau ia too anna mala mangngala tabaki' duka' illaam umpa'pakahebaam kamaloloam.

⁹Deemmi suha' kutuli' kupakatuam jumaa' itim, sapo' tä' liu si napatama tula'ki indo Diotrefes to si maelo' ia handam kuasa. ¹⁰Dadi sulepä' matim mane kupomakalesoanni jumaa' indo napaboboi bääkam tula'. Anna tä' angga mandi ia too si napogau', sapo' si mokapi untahima solasubunta to matappa' anna tä' umpäbäi jumaa' untahima indo solasubunta to matappa'. Anna maka' deem untahimai, si naäläi illaam mai jumaa'.

¹¹O solaku to kupakamaja, daa umpehapanni to ma'gau' kadake, sapo' la umpehapanniko to ma'gau' mapia. Menna-menna umpogau' kamapiaam, tau ia too änä'nam Puang Allataala. Sapo' menna-menna si umpogau' kakadakeam, tau ia too tä' ia muissam Puang Allataala.

¹²Anna diona ia Demetrius natula' mapia asam tau. Anna pa'palakoanna duka' umpatandaanni kamapiaanna, aka sihondoi kamaloloanna Puang Allataala. Anna kami' duka' umpa'paissanganni diona kamapiaanna, anna muissanni muua tappa' tula'ki.

Kada pebubum

13-15

¹³Moinna anna budapi la pahallu kutasangko, sapo' mokaä' umpailaam asanni inde suha', ¹⁴aka maelo'ä' la bale' matim anna sipekaleangki' sipa'tula'. ¹⁵La naundu' dako too kamasakkeam sola kamasannangam. Salama'na duka'

matim ingganna solata inde. Anna la
umpalambisannä' duka' salama'ku lako
si mesa-mesa solata itim.

Padam too.

Suha'na Yudas Bätäna issinna

Inde suha' natuli' Yudas, solasub-unna Yakobus. Indo to dua, umbai' indom solasubunna Puang Yesus indo ditula' illaam Matius 13:55. Illaam inde suha'na Yudas unnännä' ingganna to umbatai' anna mala majaga lako indo to si ma'pa'guhu sala anna si ma'gau' kadake. Indo to ma'pa'guhu sala us-sangai kalena to Sahani, sapo' indo pepatuduam nababa tä' tappa'. Iam too anna unnännä'um ingganna to Sahani Yudas anna mala tigaha' liu muanda'i indo Kaheba Katilallasam anna unteläi ia pepatuduam sala. Issinna inde Suha'na Yudas saidi' tasusi issinna Kapenduanna Suha'na Petrus.

Lesoanna issinna

1. Kada passu'bö' (1:1-2)

2. Pa'tahungkungam la ullambi' to ma'pa'guhu sala (1:3-16)

3. Sipakatoto' mesa sola mesa illaam kamanuhusam (1:17-23)

4. Kada pebubunna Yudas sola pampujiam längäm Puang Allataala (1:24-25)

1 Inde suha' buttu di kao Yudas solasubunna Yakobus, mesaä' duka' sabua'na Yesus Kristus,

lu lako inggannakoa' to natambai Puang Allataala Ambeta. Napakamaja liukoa' Puang Allataala anna duka' la najagaikoa' sule lako kasuleanna Yesus Kristus.

²Handandanni Puang Allataala umpaponnoikoa' pa'kamasena anna pa'pakamajanna anna namana' kamasakkeam sola kamasannangam sanda silapi'.

To matappa' la pahallu majaga anna pa'tahungkungam la ullambi' to ma'pa'guhu sala

3-16

³O inggannakoa' solasubungku to kupakamaja! Setonganna maelo' sugaliä' la kutulisangkoa' suha' diona indo kasalamasam taampuanna' pada-pada. Sapo' tentomai pahallu puha kusi'dim kutulisangkoa' inde suha' mendadi penännä'ku, anna malakoa' tigaha' liu muanda'i indo Kaheba Katilallasam anna la unteläia' ia pepatuduam sala. Indo Kaheba Katilallasam anggam pissam napa'manasam Puang Allataala lako kita umma'na anna la da'da' liu sule lako salako-lakona. ⁴Ia anna kuuai pahallu puha ia, aka deem sanaka-naka tau to tä' umbollim Debata umpentama-alla'ikoa' mato-mato solamua'. Indo tau ia too si mueli' kalembasanna issinna Kaheba Katilallasam lambi' si naua: "Mala siam tia ma'pogau'kia' situhu' kamohäeam sugali'ta, aka la nakamasei siangkia' tia Puang Allataala." Anna umbahoipi duka' Yesus Kristus Puäta anna Debatanta. Sapo' puham ditula' loppo' illaam Battakada Debata pa'tahungkungam la uhuai tau ia too.

⁵Moi anna muissam asammia' ingganna inde kaha-kaha la kutula', sapo' kupemulu la kupakilala polepokoa' diona indo to Yahudi natässu'i Debata illaam mai lembäna Mesir ongeam kasabusanna. Sapo' puhai ia too, buda napatei Puang Allataala aka tä' nakatappa'i.* ⁶Pengkilalai siaia' too duka' indo ingganna malaika' to ma'palako sulibanna indo kakuusaam puha dibeem, lambi' umpellei indo ongeam si naonpei tohho. Nasuhum nahante bassii Puang Allataala hante bassi la tontä liu sule lako

*1:5 Täss. 12:51, Pah. 14:29-30.

salako-lakona, mane nakuhunni dio ongeam handam malillim. La ditähäm liu ia sule lako allo Pahhottosanna Puang Allataala. ⁷Anna pengkilalai siaia' too duka' indo kota Sodom anna Gomora anna ingganna kota senga' lako sikahuku'na. Taissammia' pada-pada taua indo issinna kota ia too sangngim ma'pogau' susi indo malaika' ditula' inggena'. Indo issinna kota ia too ullullu' pa'bannetauam anna umpogau' gau' sessu', nasuhum nahua pa'tahungkunganna Puang Allataala lambi' napaandei api tapi'de-pi'de sule lako salako-lakona. Indo pa'tahungkunganna la mendadi pa'sangkasam anna pa'palapaam lako ingganna hupatau.

⁸Susim too duka' indo ingganna to ma'pa'guhu sala illaam alla'-alla'mua'. Si untuhu'i pangngimpinna nasuhum ma'gau' sessu' lambi' ungdakei kalena, anna umpa'bahinni'i kakuasaanna Puang Allataala anna untelle ingganna to matande kakuasaanna yabo suhuga. ⁹Mikhael sia duka' mesa pangngulunna malaika' anna tä'i deem la mantelle, damoaham ia mesa hupatau biasa toko la bahani ma'pogau' susi. Aka indo anna siteläi Mikhael anna indo tomahajanna setam ussiäläi bakkena Musa, tä' naaku Mikhael umpassubum tula' pantelle la umpasalai. Sapo' anggam tia naua: "Ma'kale ham Debata ungdakea'iko!" ¹⁰Sapo' indo ia to ma'pa'guhu sala si untelle indo kaha-kaha tä' naissam laoanna. Susi liu olo'-olo', tä' naissam ma'pikki', anggam untuhu'i pa'elo' kalena. Anna indom too pa'palakoanna nasuhum la dipempa'deam. ¹¹Mannassa anna la tilakai! Aka sangngim muola lalanna Kain indo to umpatei adinna. Anna umpempalim gau' kadakena Bileam, ia

siam anna ia napogau' assala'na deem doi'na. Anna susi polepi gau'na Korah. Indo Korah tä' manuhu' lako Puang Allataala nasuhum napempa'deam Puang Allataala, la susim too duka' tau ia too.† ¹²Maka' ma'hempum ondkoa' mangngande anna dioi duka' heem, tä' deem pada sadipa'kasihisam pa'palakoanna. Aka sangngim mangngande ma'poppä'-poppä' anna tä' deem sihi'na, anggam kalena napikki'. Anna tau ia too sihhapam gabum nababa hibu' sapo' tä' di umpatuhum uham. Anna sihhapam toi duka' kaju tä' deem kembua moi anna wattunnai la kembua, anna kaju tibongka' sule lako waka'-aka'na tä'um kembua aka mätte'um. ¹³Anna umba susi bombam kasalle tilulum umpakende' humpä kadake, susim too duka' indo to ma'pa'guhu sala umpakende' gau' kadake mesih'i-sih'i'. Sihhapam toi duka' bintä bulim, tä' muola lalanna. Tau ia too puham napatokaam Puang Allataala ongeam handam malillim la naongei sule lako salako-lakona.

¹⁴Indo Henokh kapitu lapi'nam hupatau mengkalao dio Adam, inna napayolo lambam diona tau ia too, naua: "Patanannii' talinga inde tula'ku: La sule Debata umpasola massa'bu-sa'bu pentuhu' masehona, ¹⁵la uhhotto' ingganna hupatau anna la untahungkum ingganna to tä' umbollinni aka gau' kadakena. Anna la umpassala ingganna to madosa anna tä' pabollim kahana indo tula' kadakena lako Debata."

¹⁶Ingganna tau ia too ma'menu-menu liu anna angga naissam umpasala solana. Angga toi naissam untuhu'i pa'elo'na sipa' dosana. Angga ussenkengam kalena anna umpopeala-ala bakunna lako tau aka naua: "Anna mala ullambi'ä' kauntungam."

†1:11 Kad. 4:3-8, Pah. 16:1-35, 22:1-35.

**Sipakatoto' mesa sola mesa
illaam kamanuhusam**

17-23

¹⁷Sapo' ikoa'-iko inggannakoa' sola-subungku to kupakamaja, la pahallu umpaillaam penaba liua' indo kada nat-ula' loppo' ingganna suhona Debatanta Yesus Kristus. ¹⁸Nauaangkoa': "Illaam inde wattu la kasuppisanna lino la kende' buda to mantelle. Taia pa'elo'na Debata la natuhu'i, sapo' pa'elo'na sipa' dosana la natuhu'i." ¹⁹Tau ia too si umpakende' kahakkaam. Tä' ia napentamai Penaba Maseho sapo' anggam ia pa'elo' hupatau unguasai.

²⁰Sapo' ikoa'-iko inggannakoa' solasubungku to kupakamaja, la pahallu liukoa' sipakatoto' mesa sola mesa illaam kamanuhusammua' lako indo Kaheba Katilallasam maseho. Anna la si ma'sambajam liukoa' umpolalam pantetena Penaba Maseho. ²¹Anna pahallukoa' tubo liu naonganni pa'pakamajanna Puang Allataala illaam umpemmitai indo katuboam sule lako salako-lakona la nabeengkoa' Debatanta Yesus Kristus aka nakamaseikoa'.

²²Maka' deem tau ma'dua penaba, la pahallu ungamaseia' tau ia too. ²³Anna maka' deem tau la tinanda tama api nahaka, la pahallu ullangnga'ia' anna mala ullambi' kasalamasam. Anna lu lako to madosa senga' la pahallu duka' ungamasei, sapo' la unjagaia' indana naleleikoa' dosana. La ungamasei indo tau sapo' moi pohebana indo si napake umpogau' dosa, tala malaia' muisso.

Kada pebum anna pampujiam

24-25

²⁴Dipuji Puang Allataala to kuasa unjagaikoa' anna mala tä'koa' metobä, anna kuasa umbabakoa' lako olo kamatandeanna naponnoi katilallasam anna tä' deem sassaimmua'. ²⁵Anggam Ia Puang Allataala anna To Mepasalama'ta umpolalam pengkähäna Yesus Kristus Debatanta lambi' dipuji Puang Allataala to handam matande, to handam kasalle, to handam matoho, anna to handam kuasa mengkalao dio mai, temo, anna la sule lako salako-lakona! Abana inna la diua!†

Padam too.

†1:25 *Abana inna la diua!*: naua illaam basa Yunani, *Amin*.

Pa'palosainna Yesus Kristus lako Yohanes

Bätäna issinna

Inde suha' natuli' Yohanes napakat-uam pitu jumaa' dio propinsi Asia. Issinna inde suha' diona indo kaha-kaha puha napa'palosaam Yesus Kristus lako Yohanes, suhona (1:1). Illaam indo pa'palosainna napaitai kaha-kaha la dadi ke dako'i. Uhuna Puang Yesus dipa'paitaam susi to lino ke'de' illaam alla'-alla'na pitu andihi lampu (1:12-16). Mane dipa'paitaam polei susi Änä' Domba ke'de' dio ampe'na okkosam kahajaanna Puang Allataala yabo suhuga (5:6-14). Anna mane dipa'paitaam susi mesa to bahani ma'bundu' ussäkei daham mabussä' (19:11-16). Anna katampasanna dipa'paitaam ma'pahenta sola Puang Allataala illaam Kota Maseho battu diua Yerusalem bakahu (21:22-23; 22:1-5).

Inde suha' dituli' indo anna didah-hai to Sahani aka kamatap-pasanna lako Puang Yesus. Wattu eta too ing-ganna to nakala' kahajaam Roma dipassa menomba lako indo tomahaja Roma battu diua Kaisar. Wattu eta too deem to Sahani dipatei aka moka umpenom-bai Kaisar, aka naua: "Puang Yesus Debatangki, taia Kaisar." Sapo' deem siam duka' to Sahani umpellei kamatap-pasanna lako Puang Yesus aka mahea' la dipatei. Dadi inde suha' dituli' anna mala matoto' kamatap-pasanna ingganna to Sahani lako Puang Yesus.

Illaam inde suha', deem sanaka-naka pephangam dipake. Moi anna tä' dipähäm asam kalembasanna, sapo' punggu' tannunna issinna inde suha' mala takaleso: la pahallu matoto' kamatap-pasanta aka illaam inde lino la nahua ma'hupa-hupa kamasussaam ingganna pentuhu'na Puang Yesus.

Sapo' la tontä liukia' manontom, aka illaam allo ma'katampasanna la untaloi asam ingganna balinna Debatanta Yesus Kristus anna la ma'pahenta sule lako salako-lakona (11:15). Anna kitaa'-kita umma'na la mendadikia' duka' tomahaja ma'pahenta sola Kristus.

Illaam inde suha', pembuda napake bi-langam pitu susinna: pitu jumaa', pitu penaba dio olona okkosam kahajaanna Puang Allataala (1:4, 11), pitu andihi lampu (1:12), pitu bintä (1:16); anna bu-dapi senga'na si pitu (5:1,6; 8:2; 12:3; 15:6-7; 17:9). Bilangam pitu si napake, aka bilangam ia too kalembasanna sundum anna tepu.

Lesoanna issinna

1. Kada passu'bä' anna kada salama' (1:1-8)

2. PA'PALOSAI

a. UHUNA DIPAITAI (1:9-3:22):

1. Puang Yesus dipa'paitaam susi änä' to lino ke'de' illaam alla'-alla'na pitu andihi lampu (1:9-20)

2. Pitu suha' dipakatu lako pentuhu'na Puang Yesus dio pitu jumaa' (hondongam 2-3)

b. KADUANNA DIPAITAI (4:1-16:21):

1. Puang Yesus dipa'paitaam susi Änä' Domba ke'de' dio ampe'na okkosam kahajaanna Puang Allataala yabo suhuga (hondongam 4-5)

2. Änä' Domba umbukkai pitu pepanti'na suha' tilulum (6:1-8:5)

3. Pitu sangkakala naponi pitu malaika' (8:6-11:19)

4. Pitu hupanna tanda, untandai indo kaha-kaha la dadi (hondongam 12-16)

c. KATALLUNNA DIPAITAI (17:1-21:8):

1. Kota Babel dipasihhapam passunda' to dipobungam bibi (17:1-19:10)

2. Puang Yesus dipa'paitaam ussäkei daham mabussä' la untaloi ingganna balinna (19:11-21:8)

d. KAAPPA'NA DIPAITAI:

Yerusalem Bakahu dipasihhagam baine la napobaine Änä' Domba (21:9-22:5)

3. Kada pepakahi'di anna kada pebubum (22:6-21)

1 Issinna inde suha' diona indo kaha-kaha puha napa'palosaam Yesus Kristus. Pa'palosai ia too nabeem Puang Allataala lako Kristus anna mala napaissanni loppo' lako ingganna sabua'na Puang Allataala indo tää'na mala tala masimpammi dadi. Kristus usua malaika'na umpellambi'i Yohanes sabua'na la umpa'paitaam ingganna kaha-kaha ia too lako Yohanes.² Napalombum asam duka' Yohanes indo ingganna kaha-kaha puha naita diona indo tula'na Puang Allataala nasa'bii Yesus Kristus. ³ Napohongko' to umbatai inde kada dipa'palosaam. Anna napohongko' toi to umpehingngii anna natuhu'i issinna. Aka kaha-kaha ia too tä' mala tala bale' sule lakom.

**Kada salama'na Yohanes
lako pitu jumaa'**

1:4-8

⁴Inde suha' buttu di kao Yohanes lu lako ingganna solasubungku illaam pitu jumaa' dio propinsi Asia. La nalambi' dakoa' too mana' pa'kamase anna kamasannagam buttu di Puang Allataala to inna deemmi pempom dio mai, anna to tubo sule lako temo, anna to la da'da' liu sule lako salako-lakona. Anna pa'tamba' ia too buttu dio duka' mai indo pitu penaba^f to dio olona okkosam ka-

hajaanna Puang Allataala. ⁵ Anna buttu dio duka' mai Yesus Kristus sa'bi matoto', to handam yolo dipatibangom dio mai kamateam, anna to ullumbäi ingganna tomahaja illaam inde lino.

Ia untkamaseikia' anna katitolloam hahana puha ullappasangkia' dio mai dosata, ⁶ anna napadadikia' mesa kapahentaam, anna naäkä'kia' mendadi sando la mengkähä illaam bela' di ada'na Puang Allataala, Ambena Yesus Kristus. Dadi sihatam anna sipäto' Yesus Kristus dipomatande anna kuasa sule lako salako-lakona! Abana inna la diua.[§] ⁷ Kannassai! La sulem illaam gabum naita ingganna hupatau,^{**} la naita duka' indo to puha umbunoi.^{††} Anna ingganna hupatau illaam inde lino la sikauhhu' ussahhoi.

Iam too la dadi, anna tä' mala tala dadi. ⁸ Makada Puang Allataala Debatanta naua: "Kaom too Alfa anna Omega,^{‡‡} battu diua Pa'pahandusanna anna Kasuppisanna ingganna-ingganna sia. Kaom too to inna deemmi pempom dio mai, anna to tubo sule lako temo, anna la da'da' liu sule lako salako-lakona, anna To Handam Kuasa."

UHUNA DIPAITAI (1:9-3:22)

Yohanes dipalosai diona Kristus

1:9-20

⁹Kao Yohanes solasubummu illaam sanganna Puang Yesus. Pada-padangkia' untuhu'i Puang Yesus, nasuhum

^f**1:4 pitu penaba:** Deem muuai pitu penaba kalembasanna Penaba Maseho sundum; Deem toi duka' muuai pitu penaba kalembasanna pitu malaika' (indo pitu malaika' to ke'de' liu dio olona Puang Allataala; batai 4:5; 5:6; 8:2).

[§]**1:6 Abana inna la diua:** naua illaam basa Yunani *Amin*.

^{**}**1:7 La sulem illaam gabum:** Batai Dan. 7:13.

^{††}**1:7** Za. 12:10; Yoh. 19:34.

^{‡‡}**1:8 Alfa anna Omega:** Alfa huru' uhuna anna Omega huru' katampasanna illaam abjad basa Yunani. Kalembasanna Puang Allataala to untkuasai ingganna-ingganna sia.

sababangammakia' illaam muola pandahhaam anna pada-padangkia' mangngala taba illaam kapahentaanna Puang Yesus, anna pada-padangkia' duka' manontom illaam kamapi'disam. Pissam wattu dibuannä' lako leutam Patmos, aka umbebehannä' Battakadanna Puang Allataala anna indo kaheba si natula' Puang Yesus. ¹⁰Illaam mesa allo pa'sambajangam, iya mengkähä Penaba Maseho illaam kaleku, nasuhum kuhingngi siaham kamaha kasalle susi moninna lalloho' napa'tula'ia' dio mai boko'ku ¹¹naua: "Tuli'i suha' diona ingganna kaha-kaha la muita anna umpa'pakuanni lako pitu jumaa': jumaa' Efesus, Smirna, Pergamus, Tiatura, Sardis, Filadelfia anna Laodikia."

¹²Tappa menggihi' siahama' lako boko'ku anna kupetua'i indo to umpa'tula'ia'. Iya kuitam pitu andihi lampu, bulabam ditampa; ¹³anna illaam alla'-alla'na indo andihi lampu ke'de' mesa susi änä' to lino diita,^f ma'juba tihui,^{§§} dibeke' sampim bulabam dadanna. ¹⁴Beluä'na angga' bulu domba, susi kapa' mabusanna; matanna susi lelo api. ¹⁵Bitti'na millo' susi gällä dilällä. Kamahanna memamba susi pälämpä kasalle. ¹⁶Lima kananna muanda'i pitu bintä anna tidandoham illaam mai sädäna mesa pa'dam pataham patomali. Lindona pangkähä susi mata allo.

¹⁷Kuitanna ia too songka siahama' tappa lumbä susi to mate dio olona. Iya nahaka'mä' lima kananna anna ma'kadai naua: "Daa ummahea', anu' Kaom too indee Uhuna anna la Katampasanna ingganna-ingganna sia. ¹⁸Kaom too To tubo. Puhama' mate sapo' kannassai, tubomä' sule anna la tubo liumä' sule

lako salako-lakona. Kao umpahe' to mate anna Kao unguasai ongeanna to mate. ¹⁹Dadi tuli' asanni ingganna kaha-kaha muita, susi dadinnam temo teem mane la dadinna ke dako'i. ²⁰Anna indo pitu bintä muita dio lima kanangu sola indo pitu andihi lampu bulabam, tä'pi muissam kalembasanna. Dadi la kupomasiäsango: Indo pitu bintä, kalembasanna pitu malaika' to unγκambi' pitu jumaa'; anna indo pitu andihi lampu, kalembasanna indo pitu jumaa'."

Kada dipalulako jumaa' Efesus

2:1-7

2 "Tulisanni suha' lako indo malaika' to unγκambi' jumaa' dio kota Efesus naua:

Indem ia tula'na to muanda'i pitu bintä dio lima kananna anna to mellao illaam alla'-alla'na pitu andihi lampu bulabam. ²Kuissam ingganna pa'pogausammua', kamahesoammua', anna kamanontongammua'. Kuissam toi kuaa unγκahidi'koa' to ma'gau' kadake. Anna muissammia' muua kaägä'-ägä' indo ingganna to ussangai kalena suho aka puham umpangngitaia' penabanna. ³Kuissam kuaa tontä liukoa' manontom muoloi kamapi'disam aka untuhu'ia', anna tä'koa' soho' boko'. ⁴Moi anna susi sapo' deempi kusallaangkoa', aka tä'ungkoa' si muampuam pa'kamase susi indo uhuna. ⁵Dadi pahallua' muissam muua mandalammi too kapetobängammua'! Tihokongannia' gau'mu anna umpogau'ia' sule indo si umpogau' uhu-uhuna. Aka maka' tä'koa' tihokom, iya la suleä' muälai lao indo andihi lampummua' dio mai ongeanna. ⁶Sapo' deem kamapiaammua', aka unγκahidi'koa' gau'na ingganna pentuhu'na Nikolaus indo to kukahidi'

^f1:13 Dan. 7:13.

^{§§}1:13 juba: susi jas sapo' kalando.

duka'. ⁷Lako ingganna ma'hupatau pahallu la umpatanam talinganna umpalempe sulim patomalinna anna napailaam penabai inde tula'na Penaba Maseho lako ingganna jumaa'. Menna-menna patalo, tau ia too la kupäbäi muande bua kaju katuboam illaam bela' kamasannanganna Puang Allataala."*

Kada dipalulako jumaa' Smirna

2:8-11

⁸"Tulisanni suha' lako indo malaika' to unkgambi' jumaa' dio kota Smirna naua:

Indem ia tula'na indo to diuaam Uhuna anna la Katampasanna ingganna-ingganna sia, to puham mate sapo' tubo sule. ⁹Kuissam indo ingganna pandahhaam puha ussi'dinna' anna kapemase-maseammua', sapo' setonganna to sugi'koa' di ada'. Kuissam toi ingganna indo si napakolo'-kolo'iangkoa' to ussangai kalena to Yahudi, anna ke kakalebuanna hia pentuhu'na tomahajanna setam.

¹⁰Daa unkahea'ia' indo kamasussaam la ussitammuanna' dako'. Kannassai, la deengkoa' too sanaka-naka la napatama tahungkum tomahajanna setam aka la napa'sändä'ikoa'. La ussi'dingkoa' pandahhaam sapulo benginna. Sapo' la tontä liukoa' too manontom matappa' sule lako matemu anna la kumana'koa' katuboam sule lako salako-lakona, sahona kapataloammua'. ¹¹Lako ingganna ma'hupatau pahallu la umpatanam talinganna umpalempe sulim patomalinna anna napailaam penabai inde tula'na Penaba Maseho lako ingganna jumaa'. Menna-menna

patalo, tau ia too tä'um ia la muolai pi'di' kamateam ma'penduanna."†

Kada dipalulako jumaa' Pergamus

2:12-17

¹²"Tulisanni suha' lako indo malaika' to unkgambi' jumaa' dio kota Pergamus naua:

Indem ia tula'na indo to muanda'i pa'dam pataham patomali. ¹³Kuissam ongeammua', itingkoa' kota naongi tadongkom tomahajanna setam ma'pahenta. Anna tontä liukoa' unkgatappa'ia', tä'koa' umbahoi sanganku moi anna puham dipatei Antipas, indo sa'bi matoto'ku itim kotamua', indo naongi tomahajanna setam. ¹⁴Sapo' deem sanaka-naka kaha-kaha kusallaangkoa', aka deem piha solamua' untuhu'i pole oom pepa'guhuanna tomatua yolo isanga Bileam. Indo Bileam umpatudui Balak anna mala umbaba to Israel tama dosa. Nababai muande kinande puha dipaisum anna ullullu' pa'bannetauam.‡

¹⁵Susi toi duka' deempi sanaka-naka solamua' untuhu'i pepatuduanna pentuhu'na Nikolaus. ¹⁶Tihokongannia' gau'mu indana bale' matinnä' umbaba indo pa'dam pataham patomali umbundu' tau ia too. ¹⁷Lako ingganna ma'hupatau pahallu la umpatanam talinganna umpalempe sulim patomalinna anna napailaam penabai inde tula'na Penaba Maseho lako ingganna jumaa'. Anna menna-menna patalo la kupande indo manna tibuni.¶ Anna la kumana' toi batu mabusa naongi disuha' sanga bakahu, moi la

*2:7 *bela' kamasannanganna Puang Allataala*: Batai Kad. 2:9; 3:22-24.

†2:11 20:14-15; 21:8.

‡2:14 Pah. 25:1-3; 31:6.

¶2:17 *manna*: Kinande si nabeem Puang Allataala to Israel indo anna illaanni pangngola-lalangam. Batai Täss. 16:32-34; Ibr. 9:4.

menna tala naissanni napekalembasam sulibanna indo to untahimai.”

Kada dipalulako jumaa' Tiatira

2:18-29

¹⁸“Tulisanni duka' suha' lako indo malaika' to untkambi' jumaa' dio kota Tiatira naua:

Indem ia tula'na Änä'na Puang Al-lataala indo ma'mata susi lelo api anna bitti'na susi gällä mane puha dipaillo'.¹⁹ Kuissam ingganna pa'pogausammua'. Kuissam toi pa'kamasemua', kapeimangammua', pampamoloimmua', anna kamanontongammua'. Kuissam kuua buda puha umpogau'a' temo anna indo uhuna matappa'koa'.²⁰ Sapo' deempi kusallaangkoa' aka umpäbäia' indo baine to ussangai kalena nabi ullombangam pepa'guhuanna Izebel.[§] Ma'pa'guhu sala anna budam pentuhu'ku nababa bulim ullullu' pa'bannetauam anna muande kinande dipaisum.²¹ Anna balim kubeem wattu la naolaam untihokongam gau'na, sapo' tä' naaku ullappa' gau' sessu'na.²² Kannassai, la kupahuai saki mabanda' anna mala siotto' petindoanna. Anna ingganna to nasikamahoiam la kupalambi'i duka' sussa mabanda' ke tä'i naaku untihokongam gau' kadakena solai indo baine.²³ Anna ingganna pentuhu'na la kupatei duka' anna mala naissam ingganna jumaa' naua Kao to ullosa issi penabanna hupatau. Anna inggannakoa' issinna jumaa' la kupabala'i situhu' gau'mua' si mesa-mesa.

²⁴Sapo' deempokoa' to Tiatira tä' untuhu'i pepa'guhuam ia too, anna tä' toi umpe'guhui indo diuaam pa'issanganna tomahajanna setam. Iya ikoa'-iko tä'ungkoa' la kupapassanni

babaam senga'.²⁵ Anggam la tontä liukoa' manontom untuhu'i indo puha untahima sule lako kasuleangku.²⁶⁻²⁷ Menna-menna patalo sule lako katampasanna anna tontä liu ma'palako situhu'na pa'elo'ku, la kumana' kakuasaam susi indo nabeennä' Ambeku. Nasuhum la untkuasai ingganna hupatau. La ma'pahenta umpake palu-palu bassi anna la mahhuppu' susi uhhuppu' kuhim litä'.**²⁸ Anna la kumana' bintä pehendem allo, tanda kapataloanna.²⁹ Lako ingganna ma'hupatau pahallu la umpatanam talinganna umpalempe sulim patomalinna anna napailaam penabai inde tula'na Penaba Maseho lako ingganna jumaa'.”

Kada dipalulako jumaa' Sardis

3:1-6

3“Tulisanni duka' suha' lako indo malaika' to untkambi' jumaa' dio kota Sardis naua:

Indem ia tula'na indo to muanda'i pitu penaba dio olona Puang Allataala anna muanda'i pitu bintä. Kuissam ingganna pa'pogausammua'. Kuissam kuua disanga tubokoa', anna setonganna to mate di ada'koa'.² Dadi lombaia' mengkilala anna umpakatoto'i indo deennapi illaam kalemua', sumala tä'pi pi'de. Aka kuita gau'mua' tä'pi sundum dio olona Puang Allataala.³ Dadi pengkilalaia' indo puha dipatuduangkoa' anna indo puha uhhingnia'. Pogau'ia' ia too anna untihokongannia' gau'mu. Aka maka' tä'koa' mengkilala, iya la suleä' susi wattu naolaam to maboko, tä' la muissanna' untajai.⁴ Sapo' deem siapi sanaka-naka solamua' itim Sardis mapia gau'na sihhapam ma'poheba mapattim.

§2:20 Izebel: 1Haj. 16:31; 21:25.

**2:26-27 palu-palu bassi, kuhim litä': Puj. 2:8-9; Los. 12:5; 19:15.

Ingganna tau ia too la sihatam anna sipäto' mellaokam sola umpake poheba mabusa. ⁵Menna-menna patalo, tau ia too la ma'poheba mabussä', tä' la disapui sanganna illaam mai suha' katuboam yabo suhuga,^{††} anna la kusa'bii dio olona Ambeku sola ingganna malaika'na kuua: 'Iam too inde pentuhu'ku.' ⁶Lako ingganna ma'hupatau pahallu la umpatanam talinganna umpalempe sulim patomalinna anna napaillaam penabai inde tula'na Penaba Maseho lako ingganna jumaa'."

Kada dipalulako jumaa' Filadelfia

3:7-13

⁷"Tulisanni duka' suha' lako indo malaika' to ungkambi' jumaa' dio kota Filadelfia naua:

Indem ia tula'na indo to maseho anna to tungka iannam, to unguasai pekädo'na ba'ba tama kahajaanna Daud.^{‡‡} Maka' natungka'i tä' deem tau la muissanni untutu'i, anna maka' natutu'i tä' deem tau la muissanni untungka'i. ⁸Kuissam ingganna pa'palakoammua' anna kuissam toi kuua tä' pada umba kamatohoammua'. Sapo' tontä liukoa' muanda'i kadangkü, tä' tookoa' umbahoi kamatappasammu lako kaleku. Kannassai, kutungka'iammoko' ba'ba anna tä' deem tau la muissanni untutu'i. ⁹Kannassai! Indo to ussangai kalena to Yahudi kaägä'-ägä' hi tia, aka taia to Yahudi si'da-sia pa'palakoanna. Aka setonganna kakalebuanna hi tia pentuhu'na tomahajanna setam. Tau ia too la kupasule dio olomua' menomba

anna naissanni pole' naua iko si'da hia' ia to kupakamaja si'da-sia. ¹⁰Aka malangkoa' untuhu'i pahentaku, indo kuua la tontäkoa' manontom, nasuhum la kukambi'koa' duka' ke sulei indo kamasussaam la uhhua issinna lino. Ia too la dadi aka la dipa'sändä'i issinna lino. ¹¹Tä'um masäe anna sulemä' sule. Dadi tobeia' manda' antii matoto' indo pepa'guhuam puha untahima, indana deenni muala bäbä songko' kapataloammua'. ¹²Menna-menna patalo, tau ia too la kupopendadi sihhapam andihi matoto' illaam Banua Di Ada'na Puang Allataala Debatangku, anna la illaam liu indo ongeam sule lako salako-lakona. Anna lako kalena tau ia too la kutuli' sanganna Puang Allataala Debatangku anna sanganna kotana, isanga Yerusalem bakahu tuhum yabo mai suhuga, napatuhum Debatangku. Anna sanga bakahungku la kutuli' duka' dio kalena. ¹³Lako ingganna ma'hupatau pahallu la umpatanam talinganna umpalempe sulim patomalinna anna napaillaam penabai inde tula'na Penaba Maseho lako ingganna jumaa'."

Kada dipalulako jumaa' Laodikia

3:14-22

¹⁴"Tulisanni duka' suha' lako indo malaika' to ungkambi' jumaa' dio kota Laodikia naua:

Indem ia tula'na indo to disa'bu' 'Tä' mala tala dadi.'^{¶¶} Kaom too sa'bi matoto' to ma'tula' setappa', anna Kao kabuttuanna ingganna pa'padadinna

^{††}3:5 *suha' katuboam*: Illaam indo suha' katuboam tituli' sanganna ingganna to ul-lambi'um katuboam sule lako salako-lakona. Batai: 20:15, 21:27.

^{‡‡}3:7 *pekädo'na ba'ba tama kahajaanna Daud*: Batai Yes. 22:22. Puha nadandi Puang Allataala lako tomahaja Daud la deem pessubunna mendadi tomahaja sule lako salako-lakona. Puang Yesus-um too indo pessubunna mendadi tomahaja nasuhum unguasai pekädo'na ba'ba tama kahajaam, kalembasanna Puang Yesus kuasa umpa'manasam katuboam sule lako salako-lakona.

^{¶¶}3:14 *Tä' mala tala dadi*: naua illaam basa Yunani, *Amin*.

Puang Allataala. ¹⁵ Kuissam ingganna pa'pogausammua'. Tä'koa' malussu anna tä' tookoa' masäkke. Mala kela malussu pissangka masäkke pissangka. ¹⁶ Sapo' alla'na bäbäa' muongei; Tala malussu tala masäkke. Nasuhum la kuluakoa' sule illaam mai sädäku. ¹⁷ Si muuaa': 'To makakakam anna tä'um deem aka kipeä, tä'um deem kakuhängangki;' Sapo' tä' muissanna' muua: 'Mehio-hiokam anna mehätä-hätä bua diita.' Aka setonganna sihhangkoa' to mase-mase, to buta, anna to ma'kambelä. ¹⁸ Dadi kupakilalakoa' kuua: allii bulabam täsä'ku anna malakoa' mendadi to makaka. Allii duka' poheba mabusanku anna malakoa' tä' ma'kambelä mesihi'-sihi'. Anna allia' duka' pakulingku ussussuiam matammu anna malakoa' paita. ¹⁹ Lako ingganna tau to kukamasei, kupakilala anna kusämbä'i. Dadi pahallukoa' tigaha' anna untihokongam ingganna gau' kadakemu. ²⁰ Kannassai! Ke'de'mä' temo dio inde olo ba'ba ma'kada. Iai too uhhingngii anna natungka'iannä' ba'bana, la tamaä' anna mangngandekam sola. ²¹ Menna-menna patalo, tau ia too la kupäbäi muokko' solakam yabo okkosam kahajaanku, umba susi puhämä' patalo anna muokko'mä' sola Ambeku yabo okkosam kahajaanna. ²² Lako ingganna ma'hupatau pahallu la umpatanam talinganna umpalempesulim patomalinna anna napailaam penabai inde tula'na Penaba Maseho lako ingganna jumaa'."

KADUANNA DIPAITAI (4:1-16:21)

To menomba yabo suhuga

4:1-11

4 Puhai ia too, dipaitai pole omä' mesa ba'ba yabo suhuga tibukka. Iya

kuhingngi oom indo kamaha ma'kada susi moninna lalloho' naua: "Maiko eta inde anna kupaitaiko indo la dadi illaam wattu mane la sule." ² Iya tappa mengkähä siaham Penaba Maseho illaam kaleku. Iya kuitam yabo suhuga mesa okkosam kahajaam, anna deem to muokko' yabona. ³ Hupanna indo to muokko', palassinim susi indo batu masuli' isanga yaspis anna sardis. Anna indo okkosam kahajaam naluä sahiha susi indo batu masuli' isanga zamrud, mapi'dä' diita. ⁴ Indo okkosam kahajaam, napali' lao dua pulo appa' okkosam kahajaam senga'. Indo okkosam, pantam naokko'i dua pulo appa' to pebaba sangngim ma'poheba mabussä' anna ma'songko' bulabam. ⁵ Indo okkosam kahajaam to illaam tängä naongei buttu kila' silalle anna guntu' lippä'-lippä'.

Deem toi pitu ballo lekke' dio olona indo okkosam kahajaam. Iam too indo pitu penaba dio olona Puang Allataala. ⁶ Deem toi dio olona indo okkosam angga' sali pada le'bo' kalua'na, silosa susi dahammim.

Anna indo okkosam naposanda sikunna appa' to ma'penaba, naponnoi mata boko'na anna olona. ⁷ Uhuna indo to ma'penaba, susi singa diita; kaduanna susi sapim laki; katallunna ma'lindo tau; kaappa'na susi bunia mentia'. ⁸ Indo appa' to ma'penaba sanda si annam pani'na anna naponnoi mata lako kalena. Deem toi duka' mata dio tandai tamanna pani'na. Allo bengi indo to appa' tä' deem naondai menani naua:

"Maseho, maseho, maseho
Puang Allataala Debata To Handam
Kuasa,

to inna deemmi pempom dio mai,
anna to tubo sule lako temo,
anna to la da'da' liu sule lako salakolakona!"

⁹Indo appa' to ma'penaba menani untilalla'i ingganna pa'kamasena, anna umpuji umpa'kasallei kamatandeanna indo to muokko' yabo okkosam kahajaam, to tubo sule lako salako-lakona. Menani oi too indo to appa', ¹⁰iya ma'balinguntu' oom menomba indo dua pulo appa' to pebaba dio olona indo to muokko' yabo okkosam kahajaam battu diua to tubo sule lako salakolakona. Napasindum muälai songko' bulabanna anna napaokko'i dio olona indo okkosam kahajaam tanda pa'pakasallena lako, anna ma'kadai naua:

¹¹“O Puang Allataala Debatangki,

Anggam Iko sihatam dipuji,
dipa'kasallei, anna diakui
kakuasaammu.

Aka iko umpadadi ingganna aka-aka.

Pa'elo'mu anna mala ingganna-ingganna
sia dipadeem anna dipatubo.”

Suha' tilulum anna Änä' Domba

5:1-14

5 Puhai ia too kuitam salulum suha' dio lima kananna indo To muokko' yabo okkosam kahajaam. Indo suha' ponno patomali passuha' anna tandana tä'pi deem dibukkai, iya tontäpi pepanti'na, pitu laoanna panti' mapulu'.

²Mane kuitai mesa malaika' bomboam katamba-tamba naua: “Mennam la sihatam umbukkai pepanti'na inde suha' mane naballa'i?” ³Sapo' tä' deem moi podo la mesa, susi yabo suhuga susi illaam lino teem tando dokkona lino, la mala umbukkai pepanti'na indo suha' tilulum, battu haka la mala naita tandai tamanna indo suha'. ⁴Iya ma'pase'go'mä' sumahho aka tä' deem moi podo la mesa sihatam umbukkai battu haka la mala naita tandai tamanna. ⁵Iya tappa

napa'kadaimä' indo mesa to pebaba naua: “Daa ussahho! Petua'i! Aka puham patalo indo to disa'bu' Singa pessubunna Yehuda, battu diua peampoanna tomahaja Daud to handam kaissangam.”^{§§} Iam too la sihatam umbukkai indo pitu pepanti' anna naballa'i indo suha'. ⁶Mane kuita polei mesa Änä' Domba ke'de' dio ampe'na indo okkosam kahajaam napaitängä-tängä indo appa' to ma'penaba sola ingganna indo to pebaba. Indo Änä' Domba anggasanna puham dihehe' diita. Pitu tandu'na anna pitu matanna, iam too indo pitu penaba si dio olona Puang Allataala to puha disua tama lino. ⁷Iya le'ba'um lako indo Änä' Domba nakandoi indo suha' tilulum dio mai lima kananna indo to muokko' yabo okkosam kahajaam. ⁸Tappana naala indo suha' tilulum, iya menomba siahham indo appa' to ma'penaba sola indo dua pulo appa' to pebaba dio olona indo Änä' Domba. Umposanda katapi anna tubum bulabam kessi tunuam bubanau'. Indo tunuam bubanau' kalembasanna sambajanna umma'na Puang Allataala. ⁹Iya silelem umpeniam mesa peniam bakahu naua:

“Iko sihatam mualai itim suha' tilulum
anna umbukkai pepanti'na.

Aka Iko puhangko dipatei

anna katitolloanna hahamu napolalam
ussolongko ma'hupatau la umpati-
nanda lako Puang Allataala,
indo to buttu dio mai si mesa-mesa
kabuttuanna, basana, bottona, anna
kahajaanna illaam lino.

¹⁰Puhangko umpamesa umma'mu mendadi mesa kahajaam sangngim mendadi sando to mengkähä illaam

§§5:5 *Singa pessubunna Yehuda*: batai Kad. 49:9-10; *peampoanna tomahaja Daud to handam kaissangam*, indo dituli' illaam basa Yunani, naua ia ke basa Bambanni: *Waka'na Daud*; *kalembasanna*, To dilanti' la mepasalama' buttu illaam mai pessubunna tomahaja Daud; batai 2Sam. 7:12-13; Yes. 11:10; Los. 22:16.

bela' di ada'na Puang Allataala to tapenombai.

Anna duka' umpopendadi tomahajako ingganna umma'mu la mampahe' illaam lino."

¹¹ Mane kuita pole oi malaika' tä' di-bela dihekem budanna, umpali' lao indo okkosam kahajaam anna indo appa' to ma'penaba sola ingganna indo to pe-baba. Anna kuhingngi kamahanna indo malaika' ¹² sikaoli menani naua:

"Indo Änä' Domba to puha dihehe' sihatam untahima kakuusaam, katomakakaam, kakeakasam, anna kamatohoam;

Anna sihatam dipa'kasallei, dipomatande, anna dipuji!"

¹³ Mane kuhingngii ingganna mena-banna susi yabo suhuga, susi illaam lino, teem tando dokkona lino, anna illaam le'bo' menani naua:

"Kipuji anna kipa'kasallei To muokko' yabo indo okkosam kahajaam to illaam tängä, anna Änä' Domba, anna kiakui kamatandeanna sola kakuusaanna sule lako salako-lakona!"

¹⁴ Iya natimba'um indo appa' to ma'penaba naua: "Tä' mala tala dadi." Anna ingganna indo to pebaba sangngim ma'balinguntu' menomba.

Dibukkai pepanti'na indo suha'

6:1-17

6 Puhai ia too, kuitam indo Änä' Domba umbukkai mesa indo pitu pepanti', iya kuhingngim mesa indo appa' to ma'penaba ma'kada susi guntu' kamahanna naua: "Maiko!" ² Iya kuita siahham mesa daham mabussä' disäkei. Anna indo to ussäkei muanda'i bälä'du' anna dibeem songko' kapataloam. Iya le'ba'um sihhapam mesa to si patalo la

lao oom untaloi balinna. ³ Puhai ia too, nabukkai pole oom indo Änä' Domba kaduanna indo pepanti'. Iya kuhingngim kaduanna indo to ma'penaba ma'kada naua: "Maiko!" ⁴ Iya kuita pole oom messubum mesa daham malellä disäkei. Indo to ussäkei dibeem mesa pa'dam kasalle anna kakuusaam la umpakende' kasianu-anuam illaam inde lino, anna mala sipate-patei hupatau.

⁵ Puhai ia too, nabukkai pole oom indo Änä' Domba katallunna indo pepanti', iya kuhingngim katallunna indo to ma'penaba ma'kada naua: "Maiko!" Iya kuita pole oom mesa daham malottä disäkei. Indo to ussäkei muanda'i pegantam.* ⁶ Mane kuhingngii susi kamaha buttu illaam mai alla'-alla'na indo appa' to ma'penaba naua: "La laoko ungdakei bela' gandum, nasuhum salite' gandum mapia sipadaam pa'pesaho pa'sangngalloam, anna tallu lite' gandum senga', pa'sangngalloam siam duka'. Sapo' tä' ia la ungdakei minnä' zaitun anna anggur."

⁷ Puhai ia too, nabukkai pole oom indo Änä' Domba kaappa'na indo pepanti', iya kuhingngim indo to ma'penaba kaappa'na ma'kada naua: "Maiko!" ⁸ Iya kuita pole oom mesa daham maputum disäkei. Indo to ussäkei isanga To meäläi anna dio mai boko'na natuhu' To disangai linona to mate. Iya silelem dibeem kakuusaam la umpatei bahe appa'na issinna lino. Iya deemmi mate illaam pa'bundusam, deem mate illaam kakobeam, deem napatei saki ma'hupahupa anna deem toi napatei olo'-olo' to peande.

⁹ Puhai ia too, nabukkai pole oom indo Änä' Domba kalimanna indo pepanti'. Iya kuitam dio ibi'na indo

*6:5 *muanda'i pegantam*: kalembasanna, la sule kakobeam nasuhum ingganna kinande la digantam ke ditabai lako tau aka saidi' kinande, Sand. 26:26; Yeh. 4:16.

ongeam pehumalasang sungnga'na ingganna to mate dipatei aka muanda'i anna ussa'bii kadanna Puang Allataala. ¹⁰Sikatamba naua: "O Debata To Handam Kuasa, to maseho, anna to malolo. La masäepaka mane umpassalako to lino aka puhangkam kami' napatei?" ¹¹Iya dibeemmi sanda si mesa baju kalando mabusa, mane diuaanni: "Ampaipia' säpäi' sampe puha asam dipatei ingganna sababangammua' anna solasubummua', indo to la mate susikoa'."

¹²Mane kuita pole oi nabukkai Änä' Domba indo pepanti' kaannanna. Iya dadi siahanni lino' kasalle, mata allo malotä susi poheba bahata, anna bulam malea susi haha. ¹³Ingganna bintä mahinä'dä' yabo mai langi', honno' tama lino sihhapam bua ara tä'pi matua napuhidi' hibu' kasalle. ¹⁴Mane tilulunni langi' lambi' pa'de diita. Anna ingganna tanete sola leutam mäläi dio mai ongeanna. ¹⁵Nasuhum ingganna hupatau illaam lino sangngim membuni tama leä anna lako alla' batu yabo tanete, susinna tomahaja, to kasalle, punggabana sohodadu, to makaka, anna to kuasa, sola ingganna tau senga', susi sabua' teem taianna sabua'. ¹⁶Napasindum sikaoli naua: "O tanete, sikuku'ikam! O batu, bunikam, anna mala tä'kam nahua pennenne'na To muokko' yabo okkosam kahajaam, anna tä'kam nahua aha'na Änä' Domba. ¹⁷Aka sulem indo allo katilakaam kasalle la naongeti Puang Allataala sola Änä' Domba umpalippä' aha'na, anna tä' deem mesa tau la umbelai naoloi."

144,000 tau budanna ditandai

7:1-8

7 Puhai ia too kuitam appa' malaika' ke'de' umposanda sikunna lino. Ul-

lapa' appa' lalanna hibu' illaam lino anna mala pa'de hibu' yabo galantangam, illaam le'bo', indana deenni uh-hodo ingganna kaju. ²Mane kuitai mesa malaika' senga' buttu illaam mai tandai mata allo umbaba petandana Puang Allataala to tubo, la ditandaiam umma'na. Iya metambam lako indo to appa' malaika' to puha nabeem Puang Allataala kakuasaam la unkladakei galantangam anna le'bo' naua: ³"Dapa yolo unkladakei galantangam sola le'bo' anna ingganna kaju, ke tä'i puha kitandai yolo kidena ingganna sabua'na Puang Allataala Debatanta." ⁴Iya kuhingngim indo to ditandai sahatu' appa' pulo appa' sa'bu tau budanna. Indo to ditandai, pessubunna sapulo dua pentoosanna to Israel,

⁵susinna pessubunna Yehuda sapulo dua sa'bu ditandai;

pessubunna Ruben sapulo dua sa'bu;

pessubunna Gad sapulo dua sa'bu;

⁶pessubunna Asyer sapulo dua sa'bu;

pessubunna Naftali sapulo dua sa'bu;

pessubunna Manasye, sapulo dua sa'bu;

⁷pessubunna Simeon sapulo dua sa'bu;

pessubunna Lewi sapulo dua sa'bu;

pessubunna Isakhar sapulo dua sa'bu;

⁸pessubunna Zebulon sapulo dua sa'bu;

pessubunna Yusuf sapulo dua sa'bu;

anna pessubunna Benyamin sapulo dua sa'bu.

Tau tä' dibela dihekem budanna

7:9-17

⁹Puhai ia too kuita pole oom tau mepilla'-pilla' budanna, tä' deem mesa tau la umbelai nahekem. Indo tau buda buttu dio mai ingganna kahajaam, kabuttuam, botto, anna basa illaam lino. Sangngim ke'de' dio olona indo okkosam kahajaam anna dio olona indo Änä' Domba. Sangngim majuba

mabusa anna umposanda palapa andulam,[†] ¹⁰ napasindum sikatamba naua: “Kasalamasam buttu di Puang Allataala Debatanta

to muokko' yabo okkosam kahajaam, anna buttu di Änä' Domba.”

¹¹ Ingganna malaika' ke'de' umpali' indo okkosam kahajaam sola ingganna to pebaba anna indo appa' to ma'penaba. Sangngim ma'balinguntu' menomba lako okkosam kahajaam umpenombai Puang Allataala ¹² napasindum naua: “Abana tappa' susi!

Dipuji Puang Allataala Debatanta.

Dipuji kamatandeanna anna kakeakasanna.

Ditilalla'i anna dipa'kasallei

anna dipuji kakuasaanna sola kamatohoanna sule lako salako-lakona.

Abana inna la diua!”[‡]

¹³ Iya nakutanaimä' mesa indo to pebaba naua: “Menna hia inde lako ma'juba mabusa anna buttu umba hia ngei?” ¹⁴ Kutimba'im kuua: “Tä' kuissam tuam, aka iko hia la muissanni.”

Iya natulasammä' naua: “Inde lako tau to puha ussi'dim pandahhaam kasalle. Puhaim umpake hahana Änä' Domba untappa'i jubana lambi' mabussä'. ¹⁵ Nasuhum ke'de'um dio olona okkosam kahajaanna Puang Allataala anna menombai allo bengi illaam Banua Di Ada'na. Anna indo To muokko' yabo okkosam kahajaam, Iam too muongannii ¹⁶ napolalam tä'um la ussi'dim katadeasam anna kamabähhängam, anna tä'um la nadä'dä' allo mapana'.

¹⁷ Aka indom Änä' Domba ke'de' dio ampe'na okkosam kahajaam la ungkambi'i anna la natette lako uwai katuboam. Anna Puang Allataala la umpassianni uwai matanna.”

Pepanti' kapitunna nabukkai Änä' Domba

8:1-5

8 Puhai ia too nabukkai pole oom Änä' Domba indo pepanti' kapitunna, iya mattam siaham issinna suhuga umbai' setangnga tette' masäena. ² Iya kuitam pitu malaika' indo to si ke'de' dio olona Puang Allataala dipasandai si mesa sangkakala. ³ Pissananna sulem mesa malaika' senga' umbaba ongeanna tunuam bubanau', bulabam dipapia, anna ke'de'i dio olona ongeam pehumalasam. Iya dibeemmi bu'dä' tunuam bubanau' la dipasolaam sambajanna ingganna umma'na Puang Allataala, aka la napehumalasam yabo ongeam pehumalasam bulabam, dio olona indo okkosam kahajaam. ⁴ Pada laom sambajanna ingganna umma'na Puang Allataala anna hambunna indo bua pemala' tumbum längäm olona Puang Allataala, mengkalao dio ongeanna tunuam bubanau' indo naanda'i malaika'. ⁵ Puhai ia too mualam api indo malaika' yabo ongeam pehumalasam anna napangngissianni indo ongeanna tunuam bubanau', mane napa'tibeanni tama lino. Iya lippä'-lippä' siaham guntu', silalle kila', anna lino' kasalle.

Sangkakala naponi malaika'

8:6-9:21

⁶ Puhai ia too, sangngim umpatokam sangkakalana indo pitu malaika' la sibala'-bala' mamponi. ⁷ Tappana umponi sangkakalana indo malaika' uhuna, iya tappa tuhum siaham uham batu sola api sihau haha dipatitollo tama lino. Iya mampu'um bahe tallunna

[†]7:9 *umposanda palapa andulam*: tanda pa'pakasalle anna katilallasam.

[‡]7:12 *Abana inna la diua!*: naua illaam basa Yunani, *Amin*.

lino, bahe tallunna kaju, anna ingganna humpu'.

⁸Umponim sangkakalana indo malaika' kaduanna, iya tappa diita siaham susi tanete kasalle sundällä' api ditibe tama le'bo'. Iya tappa mendadi haha bahe tallunna le'bo', ⁹mate bahe tallunna issinna le'bo', anna huppu' bahe tallunna kappala'.

¹⁰Umponim duka' sangkakalana indo malaika' kattallunna, iya tappa mehonno' siaham mesa bintä kasalle sundällä' susi ballo. Indo bintä untappai bahe tallunna salu anna kalimbuä. ¹¹(Indo bintä disangai Mapäi'). Iya mapäi'um bahe tallunna uwai, nasuhum buda tau mate aka muihu' indo uwai mapäi'.

¹²Umponim duka' sangkakalana indo malaika' kaappa'na, iya tappa kadake siaham bahe tallunna mata allo, bulam, anna bintä, nasuhum sangngim malilim bahe tallunna. Iya tä'um masiä' bahe tallunna allo, anna tä'um paindo bulam sola bintä bahe tallunna bengi.

¹³Mane kuitai mesa bunia mentia' yabo langi' anna kuhingngi kaoli-oli naua: "Tettekede! Tilaka, tilaka, tilaka hupatau illaam lino ke nahingngii moninna indo tallupi sangkakala la naponi malaika'!"

9Umponim sangkakalana indo malaika' kalimanna, iya kuitam mesa bintä to puha mehonno' tama lino. Bintä ia too dibeem pegontinna ba'ba gahoä handam mandalam, pangkuhunganna setam. ²Tappana natungka'i ba'bana indo gahoä, tumbummi hambu dio mai susi hambunna hompom kasalle, lambi' malillim kaliame napobua' indo hambu. ³Anna titantam bati' illaam mai indo hambu umponnoi lino. Indo bati' dibeem kakuasaam la mangngipo susi peipona alipam. ⁴Anna diuam: "Tä'koa' la ungdakei humpu' dio lino sola ingganna tanangam anna kaju.

Sapo' anggam indo to tä' deem tandana Puang Allataala yabo kidena, mala undahhaa'." ⁵Indo bati' tä' dipäbäi la umpatei hupatau sapo' anggam la nadahha lima bulam masäena. Indo pandahhaam la susi mapi'di'na peipona alipam. ⁶Illam indo wattu lima bulanna, etam too hupatau la umpeä lalam anna mala mate, sapo' tä' mala mate. Mohäe la mate, sapo' tä' mala.

⁷Anna indo bati' sihhapam daham la dipake ma'bundu'. Yabo ulunna deem susi songko' bulabam. Anna lindona susi lindo tau. ⁸Beluä'na susi beluä' baine. Isinna susi issinna singa. ⁹Anna dadanna nasapu' susi baju bassi. Pengkaluäppä'na magaluntu' susi bendi buda nakondongam daham tama pa'bundusam. ¹⁰Engko'na anna peipona susi engko'na anna peipona alipam. Dio indo engko'na naongi ipo la undahha hupatau lima bulam masäena. ¹¹Anna deem tomahajanna. Indo tomahajanna, mesa malaika' si umpahe' issinna indo gahoä mandalam. Situhu' basa Ibrani indo malaika' isanga Abadon, anna situhu' basa Yunani isanga Apolion, (kalembasanna To Mangkadakei). ¹²Lessu'um sahhupa katilakaam. Anna la meula'pi dua hupa.

¹³Umponim duka' sangkakalana indo malaika' kaannanna, iya kuhingngim kamaha buttu illaam mai indo appa' tandu' dio sikunna ongeam pehumalasam bulabam dio olona Puang Allataala, ¹⁴ma'kada lako indo malaika' kaannanna to muanda'i sangkakala naua: "Lappasanni indo appa' malaika' puha disäke' dio salu Efrat indo salu kasalle." ¹⁵Iya dilappasam siaham indo appa' malaika' to dipatokaam taum eta too, bulam eta too, allo eta too, anna tette' eta too la umpatei bahe tallunna hupatau. ¹⁶Buda sohodadu ma'daham napasola indo appa' malaika'. Ditulasannä' budanna, iya dua hatu'

juta. ¹⁷Illaam indo dipalosaianä', indo daham anna to ussäkei sangngim ma'baju bassi malea susi lelo api, malibulum, anna mahihhim. Indo daham sangngim ma'ulu singa anna illaam mai sädäna messubum api, hambu, anna susi dama' ditunu. ¹⁸Inde tallu hupa kamapi'disam kasalle messubum illaam mai sädäna indo daham umpatei bahe tallunna hupatau. ¹⁹Kakuasaanna indo daham illaam sädäna anna dio engko'na. Indo engko'na ma'ulu susi ula' ussägai hupatau.

²⁰Sapo' indo hupatau tää'na napatei indo kamapi'disam kasalle, tä' liu siam untihokongam gau'na indo si umpenombai pa'papia kalena. Tontä liu siam mehumala' lako setam anna lako ingganna debata lino pa'papia kalena, susinna bulabam, peha', gällä, batu, anna kaju napapia. Sapo' indo to napa-pia tä' di mala paita, tä' pahingngi, anna tä' mala mellao. ²¹Anna tä' liu siam untihokongam gau'na susinna papateam, ma'issam-issam, ullullu' pa'bannetauam anna kaboko-boko.

Malaika' anna salulum suha' bahinni'

10:1-11

10 Puhai ia too, kuita pole oom mesa malaika' bomboam tuhum yabo mai suhuga umpessalindim gabum, anna tindä' sahiha yabo ulunna. Lindona pangkähhä susi mata allo, anna bitti'na anggasanna lelo api. ²Dio pala'na deem salulum suha' bahinni' sapo' tibukka. Bitti' kananna mehhondo illaam le'bo' anna bitti' kaihinna mehhondo yabo galantangam. ³Napekasallei kaoli-oli susi moninna singa. Tappana puha meoli, iya magahugum indo pitu guntu' untimba'i indo peoli. ⁴Lessu'i magahugu indo pitu guntu', iya la kutuli'um battuam indo tula'na, sapo' tappa kuhingngi

hi kamaha yabo mai suhuga ma'kada naua: "Bunianganni tula'na indo pitu guntu'. Daa untuli'i!"

⁵Anna indo malaika' to kuita mehhondo illaam le'bo' sabali bitti'na anna yabo galantangam sabali, muäkä' lima kananna längäm langi'. ⁶Anna umpa'pindai sanganna Puang Allataala to tubo sule lako salako-lakona, anna to puha umpadadi langi' sola lino anna le'bo' sola ingganna issinna, ma'kada naua: "Tä'um la dipadende pattujunna Puang Allataala. ⁷Sapo' maka' umponim sangkagalana indo malaika' kapitunna, iya la sule lakom indo pattuju napokada ditambim Puang Allataala, umba susi puha napa'pakahebaam lako sabua'na battu diua ingganna nabi."

⁸Puhai ia too, kuhingngi pole oom indo kamaha yabo mai suhuga ma'kada naua: "Laoko alai indo suha' salulum tibukka dio pala'na indo malaika' to mehhondo illaam le'bo' anna yabo galantangam."

⁹Iya le'ba' siahämä' lako indo malaika' kupelau indo suha'. Iya nauaammä': "Alai anna muandei. La matannim susi duho ussi'dim ke illaanni sädämu, sapo' la mapäi' ke illaammi tambu'mu."

¹⁰Iya kualam indo suha' dio pala'na indo malaika' anna kuandei. Illaanni sädäku kusi'dimmi matannim si'da susi duho, sapo' tappana puha kuande, iya mapälli'um illaam tambu'ku. ¹¹Iya napa'tula'imä' naua: "Tä' mala tala umpalombum polepi kadanna Puang Allataala indo to la dadi lako ingganna botto, kahajaam, basa, anna tomahaja illaam lino."

Puang Allataala ussua dua sa'binna

11:1-14

11 Puhai, iya dibeemmä' tekkem la dipopepaju, anna nauai: "Laoko paju Banua Di Ada'na Puang Allataala sola indo ongeam pehumalasangam

anna uhhekenni budanna hupatau to menomba illaam. ²Sapo' damom tia umpajui indo pa'hanteam sulibanna indo Banua Di Ada'na, aka ongeam ia too puham dibeem lako hupatau to tä' muissam Debata. Tau ia too la unguasai Kota Maseho appa' pulo dua bulanna. ³Anna la kusua indo dua sa'bingku lao umpalanda' tula'ku. La ma'poheba bahata anna umpalombum tula'ku sasa'bu dua hatu' annam pulo allona." ⁴Indo dua sa'bi, iam too indo dua too' zaitun anna dua andihi lampu^f ke'de' dio olona Debata to unguasai inde lino. ⁵Anna maka' too deem tau mohäe la ussägai indo dua sa'bi, iya la messubum api illaam mai sädäna indo sa'bi anna umpempa'deanni indo balinna. Susim too kamateam la ullambi' ingganna to maelo' la ussägai indo dua sa'bi. ⁶Anna duka' muampuam kakuasaam la umpadadi kulla' kalando anna mala tä' tuhum uham sule lako puha umpalombum kadanna Puang Allataala. Anna muampuam toi kakuasaam la umpopendadi haha ingganna uwai susi salu teem le'bo'. Anna kuasa umpahuai lino ingganna hupanna kamapi'disam kasalle situhu' pa'elo'na.

⁷Puhai too napa'paissangam indo kadanna Puang Allataala, iya la kende' indo mesa olo'-olo' to peande dio mai indo gahoä handam mandalam, la mueba indo dua sa'bi anna la nataloi, lambi' napatei. ⁸Puhai too napatei, iya napalandam-landammi bakkena dio lalam illaam indo kota kasalle. (Indo kota naongeti Debatanna dipatei yabo kaju sitambem. Anna dipasihpam Sodom anna Mesir aka susim gau' kadakena issinna indo ongeam ia too.) ⁹Indo bakkena la nasipetua'-tua'i tau to buttu dio mai ingganna botto,

kabuttuam, basa, anna kahajaam illaam lino. Tallungngallo anna sapolo masäena la nasipetua'-tua'i, anna sangngim naua: "Tä' mala la dilamum." ¹⁰Anna ingganna hupatau illaam lino la natilalla'i kamateanna indo dua nabi, aka puha umpi'di' hupatau illaam lino. Nasuhum la umpadeem hame-hame kasalle anna sipakatu-katui ma'hupa-hupa baham-baham, tanda katilallasanna.

¹¹Tappana tallungngallo anna sapolo, iya napasulem Puang Allataala penaba ma'patubo umpentamai indo dua sa'binna, nasuhum mellimbangom anna ke'de'i. Iya ingganna to muitai sangngim tinggi'gi' mahea'. ¹²Pissananna, uhhingngim kamaha yabo mai suhuga indo dua sa'bi metamba naua: "Diokoa' mai!" Iya le'ba'um längäm suhuga nasapu' gabum nasa'bii ingganna balinna. ¹³Wattu eta too dadi lino' kasalle, nasuhum huppu' bahe sapulona indo kota. Pitu sa'bu tau mate passägäinna indo lino'. Anna indo tubonapi sangngim tinggi'gi' mahea', napolalam umpa'kasallei Puang Allataala to umpuängam suhuga. ¹⁴Lessu'um ia katilakaam kapenduanna. Sapo' kannassai, katilakaam kapentallunna muolam lalam la bambannam sule.

Sangkakala kapitunna

11:15-19

¹⁵Tappana umponi sangkakalana indo malaika' kapitunna, iya dihingngim buda to metamba yabo suhuga naua:

"Kakuasaam la umpahenta issinna lino illaammi lisu pala'na Puang Allataala Debatanta anna To puha nalanti' la mepasalama'!

^f11:4 too' zaitun anna dua andihi lampu: batai Za. 4:1-3, 11-14.

Anna Ia la ma'pahenta sule lako salakolakona!"

¹⁶Iya ma'balinguntu'um menomba indo dua pulo appa' to pebaba to muokko' yabo okkosam kahajaam dio olona Puang Allataala anna ma'kadai

¹⁷naua:

"Puang Allataala Debata To Handam Kuasa,

to inna deemmi pempom dio mai anna to tubo sule lako temo!

Ma'kuhhu' sumanga'kam matim olomu, aka indo kakuasaammu to taditondom puham umpalako,

anna umpahandu'um ma'pahenta!

¹⁸Ingganna hupatau to tamuissam Debata ma'tatta' keaha';

Aka lambi'um wattunna la umpalippä'ko aha'mu.

Anna wattunnam duka' la umpopä'tadongkongangko ingganna to mate,

anna la umbeem sahona lako ingganna sabua'mu, battu diua ingganna nabimmu.

Anna susi toi duka' lako ingganna umma'mu to umpengkahea'i anna umpa'kasallei sangammu, susi to kasalle teem to bahinni'.

Lambi'um duka' wattunna la untal-langam ingganna to ma'dasa-dasa ilaam lino."

¹⁹Puhai ia too, tappa titungka' siahham indo Banua Di Ada'na Puang Allataala yabo suhuga, iya diitam indo patti naongeti pa'dandianna Puang Allataala.[§] Iya tappa silalle siahham kila', lippä'-lippä' guntu', lino' kasalle, anna magaluntu' uham batu.

Baine anna naga

12:1-18

12 Pissananna kuitam yabo langi' mesa tanda memängä-mängä

maneanna diita susi. Deem mesa baine umpenhondoi bulam anna umpa'poheba mata allo. Ma'songko' tomahaja dipadekke'i sapulo dua bintä. ²Indo baine kebättä anna lambi'um wattunna la keänä', nasuhum kaoli-oli aka mangnguhiba'um.

³Mane kuita polei yabo langi' mesa tanda memängä-mängä. Deem mesa

naga malea pada poa, pitu ulunna anna sapulo tandu'na. Yabo indo

ulunna sanda songko' tomahaja.

⁴Umpessämbäsam engko'na, iya umpassii bahe tallunna bintä yabo langi'

nahonnosam tama lino. Mane ke'de'i indo naga mangngampa dio olona

indo baine la keänä' aka pattujunna naua: "Subunna too indo änä'-änä',

tappa kuamma' kalebum." ⁵Pissananna

indo baine ungkeänäsammi mesa muane-ane, to la umpahenta ingganna

hupatau umpake palu-palu bassi. Sapo' tappa diala hi indo änä'-änä' dibaba

lako Puang Allataala anna dipayaboi okkosam kahajaanna. ⁶Iya tappa

muäläi siahham duka' kalena indo baine le'ba' lako ongeam puha napatokaam

Puang Allataala dio pohiallasam. Aka la naongeti ditahinana sasa'bu dua hatu'

annam pulo benginna.

⁷Iya dadim pa'bundusam yabo suhuga. Mikhael sola ingganna

malaika' pentuhu'na sibundu' indo naga sola ingganna malaika' pentuhu'na.

⁸Sapo' tä' mala patalo indo naga, nasuhum tä'um dipäbäi la yabo

suhuga sola malaika' pentuhu'na. ⁹Iya dipa'tibeammi lao indo naga poa. Iam

too indo diuaam nenena naga, ia toi diuaam tomahajanna setam battu diua

setam bulitu' to umbaba bulim issinna lino. Iam too indo to dipa'tibeam tama

lino sola ingganna malaika' pentuhu'na.

[§]11:19 patti naongeti pa'dandianna Puang Allataala: batai 1Haj. 8:1-9.

¹⁰Pissananna, iya kuhingngim to metamba illaam suhuga naua:

“Tentomai lambi'um pole' wattunna Puang Allataala Debatanta la umpasule lako pattujunna mepasalama'.

Anna la ma'kuasa anna ma'pahenta.

Anna lambi' toom duka' wattunna indo To nalanti' Puang Allataala umpasalama' hupatau la umpasule lako kakuasaanna.

Aka puham dipa'tibeam illaam mai suhuga

indo to si angga allo bengi untula' kakadakeanna solasubunta dio olona Puang Allataala.

¹¹Natalo solasubunta aka indo katitol-loanna hahana Änä' Domba, anna indo umpa'pakahebaam diona kasalamasam.

Anna tä' umpakalando katuboam di lino, sapo' sangngim ahu' umbeho kalena dipatei.

¹²Dadi sihatam anna sipäto' muahhe lembäna suhuga

sola ingganna issinna kassi anna tilalla! Sapo' tilaka ia issinna lino sola le'bo' aka tuhummi tomahajanna setam!

Anna ma'tatta' keaha' ma'kasubu-subu aka naissammi naua sai'di' mandam wattu la naolaam.”

¹³Tappana nasi'dim indo naga naua: “Ditibemä' tama lino,” iya tappa umpangngappi' siaham indo baine to unkeänäsam mesa muane-ane.

¹⁴Sapo' indo baine dipapani'i dua pani'na bunia gege, anna mala mentia' lako indo ongeam dipatokaam dio pohiallasam la naonpei ditahinana tallu taum setangnga, anna mala tä' nasägäi indo naga. ¹⁵Tappana naita tä' la mala nalambi', iya umpatibuloso-losom uwai illaam mai sädäna napasopa'i indo baine anna malai naanusam. ¹⁶Sapo'

napesäkäi litä' indo baine. Aka indo litä' mengängngä muamma' indo uwai pada salu buttu illaam mai sädäna indo naga. ¹⁷Iya saundu'um meali-ali indo naga lako indo baine, nasuhum le'ba' umbundu' ingganna pebatisam senga'na indo baine, battu diua ingganna indo to untuhu'i pahentana Puang Allataala anna to tontä liu manontom muanda'i pepa'guhuanna Puang Yesus. ¹⁸Mane ke'de'i dio bihim le'bo' indo naga.

Olo'-olo' to peande buttu illaam mai le'bo'

13:1-10

13 Anna mane kuita mesa olo'-olo' to peande buttu illaam mai le'bo', sapulo tandu'na anna pitu ulunna. Yabo indo tandu'na sanda songko' tomahaja. Anna yabo indo ulunna pitu sangngim tisuha' sanga. Anna kalembasanna indo sanga tisuha' untelle Puang Allataala. ²Indo olo'-olo' to peande kuita, kalena susi macan tutul. Sapo' bitti'na susi bitti' beruang anna pudu'na susi pudu' singa.** Iya nabeemmi duka' indo naga kamatohoam, katomahajaam, anna kakuasaam lako indo olo'-olo' to peande susi indo naampuum. ³Mesa ulunna indo olo'-olo' to peande deem diita susi bila'na basa masambam. Iya mängä-mängä asammi ingganna issinna lino muitai aka naua: “Akanna malapi tubo?” Nasuhum sangngim untuhu'i indo olo'-olo' to peande. ⁴Anna sangngim umpenombai indo naga, aka ia umbeenni kakuasaam indo olo'-olo' to peande. Anna duka' umpenombai indo olo'-olo' to peande, aka naua: “Tä'um deem la untondonni kakuasaanna,” anna “Tä' deem la bahani muebai.”

⁵Indo olo'-olo' to peande dibeem pudu' umpassubum tula' matampo-tampo untelle Puang Allataala. Anna dibeem toi

**13:2 macan tutul, beruang, anna singa: Dan. 7:2-7.

kakuasaam la ma'pahenta appa' pulo dua bulanna. ⁶Iya ma'tula'um untelle Puang Allataala. Natelle sanganna, ongeanna, anna ingganna to tohho yabo suhuga. ⁷Dipäbäipi duka' umbundu' anna mueba umma'na Puang Allataala lambi' nataloi. Anna dibeem kakuasaam la unguasa-sai ingganna kabuttuam, botto, basa, anna kahajaam illaam lino. ⁸Indo olo'-olo' to peande napenombai asam hupatau illaam lino, sulibanna indo to inna tisuha'um sanganna illaam suha' katuboam^{††} yabo suhuga indo anna tä'pi dipadadi inde lino. Indo suha' katuboam, suha'na Änä' Domba to bali dipatei. ⁹Lako ingganna ma'hupatau pahallu la umpatanam talinganna umpalempe sulim patomalinna anna napaillaam penabai inde tula':

¹⁰Aka iai too hupatau abana sissi'na la disakka,

iya abana inna la disakka.

Anna iai too kadona la pa'dam umbabai, iya abana tia inna la pa'dam dipateiam.

Iam too anna la pahallum ingganna umma'na Puang Allataala la tontä liu manontom anna matoto' kamatappasanna.

Olo'-olo' to peande buttu dio mai litä'

13:11-18

¹¹Pissananna kuita pole oom mesa olo'-olo' to peande buttu dio ia mai litä', dua tandu'na, pada tandu'na änä' domba. Sapo' kamahanna susi kamahanna naga. ¹²Indo olo'-olo' to peande kaduanna, mala duka' umpalao kakuasaanna indo olo'-olo' to peande uhuna. Lambi' ingganna issinna lino napassa menomba lako indo olo'-olo' to peande uhuna, indo to masambam basana sapo' bono' di sule. ¹³Indo olo'-olo' to peande kaduanna umpadadi buda

tanda memängä-mängä kasalle, lambi' sule lako umpatuhum api yabo mai langi' naita tau buda. ¹⁴Nasuhum umbaba bulim asam hupatau illaam lino to unkatappa'i indo buda tanda memängä-mängä napadadi umpake kakuasaanna indo olo'-olo' to peande uhuna. Anna usuai issinna lino umpapia pa'pasusianna indo olo'-olo' to peande uhuna, mendadi tanda pa'pakasalle lako indo to bali dibatta pa'dam sapo' tontä hi tubo. ¹⁵Indo olo'-olo' to peande kaduanna dibeem kakuasaam umpenabai indo pa'pasusianna olo'-olo' to peande uhuna, nasuhum mala ma'kada anna mala umpatei ingganna hupatau to moka umpenombai. ¹⁶Ingganna hupatau, susi to bahinni' teem to kasalle, to mase-mase anna to makaka, sabua' anna taianna sabua', napassa asam indo olo'-olo' to peande kaduanna la umpake mesa tanda, dituli' dioka lima kananna, yaboka kidena. ¹⁷Anna iai too tä' umpake indo tanda, iam tä' la mala umbalu' aka-akanna anna tä' mala mualli kapahallu-anna. Indo tanda dituli', sanganna indo olo'-olo' to peande uhuna battu diua budanna hekenganna sanganna. ¹⁸Dadi la pahallu tau keaka' anna manakka. Aka iai too keaka', iya iam too muis-sanni uhhekkem sanganna indo olo'-olo' to peande. Aka indo dipotanda, budanna hekenganna sanganna mesa tau. Budanna, annam hatu' annam pulo annam.

**Änä' Domba anna pentuhu'na
to puha nasolom**

14:1-5

14 Pissananna kupetua' pole oom, iya kuitam indo Änä' Domba ke'de' yabo Tanete Sion sola tau sahatu' appa' pulo appa' sa'bu budanna. Iam too indo to sangngim tisuha'

^{††}**13:8** *suha' katuboam*: Illaam suha' ia too tituli' sanganna ingganna to ullambi'um katuboam sule lako salako-lakona. Anna indo suha' ia too yabo suhuga. Batai: 20:15, 21:27.

yabo kidena sanganna Änä' Domba anna sanganna Ambena. ²Lessu'i, iya kuhingngim kamaha kasalle yabo mai suhuga ma'uhhum susi pälämpä kasalle anna magahugu susi guntu' kasalle. Indo kamaha kuhingngi susi moninna katapi mahassam naponi to ma'katapi. ³Anna indo to sahatu' appa' pulo appa' sa'bu umpeniam mesa peniam bakahu dio olona indo okkosam kahajaam, anna dio olona indo appa' to ma'penaba sola ingganna indo to pebaba. Tä' deem mesa tau la muissanni umpe'guhui indo peniam, sulibanna indo sahatu' appa' pulo appa' sa'bu tau to puha disolom illaam mai lino.

⁴Tau ia too sangngim maseho katuboanna. Tä' deem ullullu' pa'bannetauam, anna tä' toi deem ungdakei kalena.† Sangngim untuhu'i liu indo Änä' Domba moi aka la naoloi. Anna puham nasolom Änä' Domba illaam mai alla'-alla'na hupatau mendadi sihhapam pangkahingi' dipehumalasam lako Puang Allataala anna Änä' Domba. ⁵Tä' ia deem kaägä'-ägä' anna tä' deem sassainna pa'pogausanna.

Tallu malaika'

14:6-13

⁶Iya kuitam mesa malaika' senga' mentia' yabo langi' umbaba Kaheba Katilallasam indo la da'da' liu sule lako salako-lakona. Kaheba ia too la napa'pakahebaam lako ingganna hupatau illaam lino lako ingganna kahajaam, kabuttuam, basa, anna botto. ⁷Iya katamba-tambam indo malaika' naua: “Pengkahea'koa' lako Puang Allataala anna umpujia' kamatandeanna! Aka lambi'um wattunna la umpopa'tadongkongam

hupatau. Anna penombakoa' lako indo to puha umpadadi langi' anna lino, le'bo' sola ingganna kalimbuä!”

⁸Lessu'i indo malaika', iya sulem malaika' kaduanna anna ma'kadai naua: “Huppu'um! Huppu'um Babel indo kota kasalle! Aka issinna Babel puha umpasassa' lalam ingganna hupatau umpogau' gau' sessu', sihhapam umbabai tau senga' muihu' buda anggur lambi' sanda-sanda tanapogau' aka mäbo'.”

⁹Lessu'i indo malaika' kaduanna, iya sulem malaika' katallunna anna katamba-tambai naua: “Iai too umpenombai indo olo'-olo' to peande sola pa'pasusianna, anna napake indo tandana yaboka kidena dioka limanna, ¹⁰iya tau iam too to la napaihu' Puang Allataala anggur makahha' tä' dito'bo' battu diua napahuai aha' kasallena. Kalembasanna, tau ia too la didahha illaam api ma'nala-nala susi dama' ditunu naita ingganna malaika' maseho anna indo Änä' Domba. ¹¹La tontä liu pelamboho indo api pandahhaam sule lako salako-lakona. La didahha liu allo bengi to umpenombai indo olo'-olo' to peande sola pa'pasusianna anna to umpakei indo tanda sanganna.”

¹²Dadi ingganna umma'na Puang Allataala to untuhu'im pahentana anna to tontä liu manuhu' lako Puang Yesus, la pahallu tontä liu manontom.

¹³Lessu'i, iya kuhingngi oom kamaha yabo mai suhuga naua: “Tuli'i: Napa-handu' temo kehongko' anna maupa' lako ingganna to mate illaam sanganna Debata.”

Natimba'i Penaba Maseho naua: “Io tappa! La mellubem ia dio mai hoja hesona, aka ingganna bua pa'pogausam

†14:4 Indo dituli' illaam basa Yunani, naua ia ke basa Bambanni: *to tadeem nakadakei baine, tä'pi deem sola baine.*

mapianna la da'da' liu napasola tama suhuga.”

Pepaheam di ada' illaam lino

14:14-20

¹⁴Puhai ia too, kuitam sallaoram gabum mabusa. Yabo indo gabum muokko' mesa susi tau diita,^{¶¶} ma'songko' tomahaja bulabam dipapia anna untetä kandao pataham. ¹⁵Iya messubummi mesa malaika' illaam mai indo Banua Debata yabo suhuga anna metambai lako indo to muokko' yabo gabum naua: “Pessäesanni itim kandaomu aka lambi'um wattunna pepaheam, aka matäsä'um issinna lino.” ¹⁶Tappa umpessäesam siaham kandaona tama lino indo to muokko' yabo gabum, iya dipepahem issinna lino.

¹⁷Iya messubum pole oom mesa malaika' senga' illaam mai Banua Debata yabo suhuga untetä duka' kandao pataham. ¹⁸Mane sule polei mesa malaika' buttu dio ia mai ongeam pehumalasang. Malaika' ia too unguasai ia api. Metamba lako indo malaika' to untetä kandao pataham naua: “Pessäesanni itim kandao patahammu ammu hatta'i bahutunna anggur illaam lino aka matäsä'um buana.” ¹⁹Iya tappa umpessäesam siaham kandaona tama lino uhhatta'i bahutunna anggur anna natibei tama pahhimpisam kasalle. Indo diuaam pahhimpisam kasalle, kalembasanna aha' kasallena Puang Allataala. ²⁰Iya dihimpi'um indo bua anggur dio sulibanna kota, iya loläm haha illaam mai indo pahhimpisam pada salu kasalle. Tandana buda, iya ullambi'pudu' daham malangka'na indo haha, anna tallu hatu' kilo mambelanna naola.

Dipatoka pitu hupanna kamapi'disam kasalle

15:1-8

15 Puhai ia too, kuita pole oom yabo suhuga mesa tanda memängä-mängä tä' deem la susinna. Pitu malaika' umbaba pitu kamapi'disam kasalle. Iam too inde katampasanna ingganna kamapi'disam, aka puhai too indo pitu hupanna, iya suppi'um ingganna aha'na Puang Allataala. ²Mane kuitai susi dahammim sihau api, pada le'bo' kalua'na. Anna dio bihinna indo dahammim pada le'bo' kuita buda tau ke'de'. Iam too indo to puha untaloi indo olo'-olo' to peande anna tä' deem napenombai susi kalena teem pa'pasusianna, anna tä' toi napake indo tanda bilanganna sanganna. Tau ia too umposanda katapi nabeem Puang Allataala ³anna umpenaniam penanianna Musa,^{§§} sabua'na Puang Allataala, anna penanianna indo Änä' Domba naua:

“O Puang Allataala To Handam Kuasa,
Memämängä-mängä ingganna
pengkähängammu
anna tä' deem la susinna.

O Tomahajanna mentu'na ma'hupatau,
malolo anna mapia ingganna ulalammu.

⁴O Debata, mennangka tä' la unγκαheako,

anna mennangka tä' la umpuji kamatandeanna sangammu?

Aka anggam iko maseho.

Ingganna hupatau illaam lino la sule napenombaiko

aka makalesom naita kamaloloanna ulalammu.”

⁵Puhai ia too, iya kuitam yabo suhuga titungka' ba'bana Banua Debata battu diua indo Bahum si naongeti

^{¶¶}14:14 mesa susi tau diita: Dan. 7:13-14.

^{§§}15:3 penanianna Musa: Täss. 15:1-18.

pa'dandianna Puang Allataala.* ⁶Iya messubummi illaam mai indo Banua Debata indo pitu malaika' umbaba pitu kamapi'disam kasalle. Sangngim ma'poheba mabusa millo' anna mapattim, dibeke' sampim bulabam dadanna. ⁷Iya deemmi mesa indo appa' to ma'penaba untandoi lako indo pitu malaika' sandai si mesa tubum bulabam ponno aha' kasallena Puang Allataala to tubo sule lako salako-lakona. ⁸Iya ponnom hambu indo Banua Debata tanda kamatandeanna anna kakuasaanna Puang Allataala. Anna tä' deem mesa tau la mala tama indo Banua Debata ke tä'i puha asam dadi indo pitu hupanna kamapi'disam kasalle nababa indo pitu malaika'.

**Dipentolloammi indo pitu
tubum naongei aha'
kasallena Puang Allataala**

16:1-21

16 Puhai ia too, kuhingngi pole oom kamaha metamba buttu illaam mai Banua Debata ma'kada lako indo pitu malaika' naua: "Laongkoa' anna umpentolloanni tama lino itim tubum naongei aha' kasallena Puang Allataala."

²Iya le'ba'um indo malaika' uhuna anna napentolloanni indo tubum nababa. Tappa kende' siahanni bundä handam mepakapi'di' anna mepakahea'-hea' lako ingganna tau to umpakei tandana indo olo'-olo' to peande anna to umpenombai pa'pasusianna.

³Puhai ia too, umpentolloammi tubunna indo malaika' kaduanna tama le'bo', iya tappa mendadi haha siaham uwainna, susi hahana to mate, malea-malotä. Nasuhum mate asam ingganna menabanna illaam le'bo'. ⁴Puhai ia too, umpentolloammi

tubunna indo malaika' katallunna tama ingganna salu sola kalimbuä, iya mendadi haha asam duka' uwainna. ⁵Puhai, iya kuhingngim mesa malaika' to unguasai uwai ma'kada naua:

"O Puang Allataala, Iko to Maseho, To inna deemmi pempom dio mai, anna to tubo sule lako temo, inde pesämbä'mu sihatam anna sipäto' umpake.

⁶Aka indo to tä' matappa' puhaim umpatitollo hahana umma'mu sola buda nabimmu.

Nasuhum haha duka' umbeem naihui, aka abana sipäto' la umpalambi'!"

⁷Puhai ia too kuhingngim kamaha buttu dio mai ongeam pehumalasam ma'kada naua:

"O Puang Allataala Debata To Handam Kuasa,

abana malolo anna sipäto' pesämbä'mu."

⁸Iya umpentolloammi duka' tubunna yabo mata allo indo malaika' kaappa'na, nasuhum kehängäm malussunna mata allo ullällä hupatau. ⁹Iya mellui' asammi hupatau napobua' mapana'na mata allo, lambi' untädo sanganna Puang Allataala to unguasai ingganna indo kamapi'disam kasalle. Sapo' moi anna susi, sangngim tä' liu siam naaku untihokongam gau'na anna tä' toi umpa'kasallei Puang Allataala.

¹⁰Puhai ia too, umpentolloammi tubunna indo malaika' kalimanna yabo okkosam kahajaanna indo olo'-olo' to peande, iya tappa malillim siaham kahajaanna, anna ungkekkö' lilana hupatau napobua' kamapi'disanna.

¹¹Kahana kamapi'disanna anna bundä lako kalena, lambi' untädo Puang Allataala to unguasai suhuga. Sapo' moi anna susi, sangngim tä' liu siam untihokongam gau' kadakena.

* 15:5 Bahum si naongei pa'dandianna Puang Allataala: Täss. 25:8-9; 29:44-46.

¹²Puhai ia too, umpentolloammi tubunna indo malaika' kaannanna yabona salu Efrat indo salu kasalle, iya matti' siaham uwainna nasuhum mala naola lambam ingganna tomahaja to buttu dio mai tandai mata allo. ¹³Iya kuitam tallu setam susi tongko' diita, tungga' messubum illaam mai sädäna indo naga, sädäna indo olo'-olo' to peande uhuna, anna sädäna indo olo'-olo' to peande kaduanna battu diua nabi tatappa'. ¹⁴Indo tallu setam sangngim si umpogau' tanda memängä-mängä. Iya le'ba'im umpellambi'i ingganna tomahaja illaam lino la napamesa anna mala ma'bundu' illaam indo allo kasalle la naongei Puang Allataala To Handam Kuasa umpassala hupatau.

¹⁵Pissananna ma'kadam Debata naua: "Kannassai! Kasuleangku la sihhapam wattu kasuleanna to maboko, tä' dibai-bai. La tilalla' ia to majaga anna to toka liu pohebana, aka tä' ia la masihi' mel-lao sihhapam to ma'kambelä naita tau buda."

¹⁶Iya napopa'mesam indo tallu setam ingganna tomahaja dio mesa ongeam isanga illaam basa Ibrani: Harmagedon.

¹⁷Puhai ia too, umpentolloammi duka' tubunna indo malaika' kapitunna yabo lawwa, iya dihingngi siaham illaam mai Banua Debata kamaha kasalle buttu illaam mai indo okkosam kahajaam naua: "Puha asammi!" ¹⁸Iya silalle siaham kila', lippä'-lippä' guntu', anna dadi lino' kasalle. Tandana kasalle indo lino', tä'pi deem la pada kasallena pempom dipadadinna hupatau illaam lino. ¹⁹Iya tappa tipa'tallu siaham indo kota kasalle anna titale ingganna kota lako lino. Iya nakilalaim duka' Puang Allataala dosana Babel indo kota kasalle, nasuhum na-

passa muihu' anggur aha' kasallena. ²⁰Iya sangngim tallammi leutam, anna masapu ingganna tanete. ²¹Dadi toi uham batu kasalle, si lima pulo kilo mabanda'na, honno' yabo mai langi' untappai hupatau. Iya untädöm Puang Allataala hupatau aka indo kamasus-saam uhuuai tä' deem pada samapi'di' nasi'dim.

KATALLUNNA DIPAITAI (17:1-21:8)

Kota Babel dipasihhapam passunda' to dipobungam bibi

17:1-18

17 Iya sulem mesa indo pitu malaika' to umbaba tubum, anna napa'tula'ia' naua: "Maiko angku paitaiko la diaka susi disämbä'i indo passunda' to dipobungam bibi, battu diua indo kota kasalle napaitängä-tängä buda salu. ²Umbabai asam ingganna tomahaja illaam lino napasola ullullu' pa'bannetauam, anna ingganna issinna lino nababa bulim gau' kadakena sihhapam to dibabai muihu' anggur lambi' sanda-sanda tanapogau' aka mäbo'."†

³Iya nasalokko'mä' Penaba Maseho anna nababaa' indo malaika' lako pohial-lasam. Iya kuitam mesa baine ussäkei mesa olo'-olo' to peande. Indo olo'-olo' to peande malellä, pitu ulunna anna sapulo tandu'na. Anna naponnoi kalena pantuli' ma'hupa-hupa sanga pantelle lako Puang Allataala.

⁴Indo baine umpa'poheba sampim mellolo pao sola sampim malellä dibunga-bungai bulabam sola batu masuli' anna mutiara. Muanda'i mesa ihusam bulabam ponno

†17:2 *ullullu' pa'bannetauam*: Illaam suha'na nabi, maka' menomba hupatau lako debata senga', si dipasihhapam ullullu' pa'bannetauam aka tä' manontom lako Puang Allataala umba susi mesa muane tä' manontom lako bainena.

ingganna kakadakeanna anna gau' mesihi'-sihi'na si nakähä illaam lullusam bannetau. ⁵Yabo kidena indo baine tituli' mesa sanga, naua: “Babel, kota kasalle, indona ingganna passunda' sola kabuttuanna ingganna kakadakeam illaam lino.” Sapo' tibunipi kalembasanna. ⁶Kuita indo baine napamäbo' hahana umma'na Puang Allataala, indo to dipatei aka ussabi'i Puang Yesus.

Tappana kuita, iya tä' deem pada samängä-mängää'. ⁷Iya napa'tula'imä' indo malaika' naua: “Akanna mängä-mängäko? La kutulasangko kalembasanna inde baine anna inde olo'-olo' to peande pitu ulunna anna sapulo tandu'na nasäkei. ⁸Inde olo'-olo' to peande muita, tubo yolona sapo' pa'dem temo. Sapo' la bale' buttu sule dio mai indo gahoä handam mandalam anna la nahua katilakaam lambi' mate sule lako salako-lakona. Anna indo issinna lino to tä' inna tisuha' sanganna illaam suha' katuboam indo anna tä'pi dipadadi inde lino, la mängä-mängä muitai. Aka indo olo'-olo' to peande yolona tubo, mane pa'dei, sapo' la tubo sule.

⁹Dadi la pahallu tau keaka' anna manakka. Indo pitu ulu, kalembasanna pitu tanete to naongi muokko' inde dio baine. Ia siam duka' indo pitu tomahaja. ¹⁰Lima indo tomahaja tohhom. Mesa ma'pahenta temo, anna mesa tä'pi sule. Sapo' maka' sulem, anggam ia la säpäi' ma'pahenta. ¹¹Anna indo olo'-olo' to peande to puham kende' sapo' pa'dem temo, la ia siam tomahaja kakahuanna. Anna ia siam mesa indo pitu tomahaja anna la nahua katilakaam lambi' mate sule lako salako-lakona.

¹²Anna itim sapulo tandu' muita, kalembasanna sapulo tomahaja mane la ma'pahenta, sapo' la anggam mesa tette' dibeem kakuasaam mendadi toma-

haja sola itim olo'-olo' to peande. ¹³Inde sapulo tomahaja mesa pattuju umbeho kamatohoanna anna kakuasaanna lako indo olo'-olo' to peande. ¹⁴Aka la umpamesa buku umbali indo Änä' Domba. Sapo' sangngim la natalo Änä' Domba solai ingganna pentuhu'na to puha natambai anna napilei la tontä liu manontom. Aka inde Änä' Domba Debatanna ingganna debata anna Tomahajanna ingganna tomahaja.”

¹⁵Puhai ia too, napa'tula'i pole omä' indo malaika' naua: “Indo ongeam muita napaitängä-tängä buda salu to naongi muokko' indo passunda', kalembasanna ingganna hupatau to buttu dio mai ingganna kabuttuam, pa'lembängam, anna basa illaam lino. ¹⁶Indo sapulo tandu' muita sola indo olo'-olo' to peande la ungnabassi indo passunda'. Anna ingganna aka-aka naampuum la nahappai asam anna nakambeläi. La naande piha balena anna natunu mä'bä tama api piha. ¹⁷Ingganna ia too napateem aka Puang Allataala unggaha'i penabanna indo tomahaja anna mala tipalako pattujunna Puang Allataala. Iam too anna umpamesam pattujunna indo to sapulo umbeho kakuasaanna lako indo olo'-olo' to peande anna mala ia ma'pahenta sule lako wattunna la naongi Puang Allataala ungganna'i ingganna Battakadanna. ¹⁸Anna indo baine muita, kalembasanna indo kota kasalle to umpahenta ingganna tomahaja illaam lino.”

Katallanganna Babel

18:1-24

18 Puhai ia too, kuita pole oom mesa malaika' senga' tuhum yabo mai suhuga. Muampuum kakuasaam kasalle anna pangkähhäna umpomasiä' lino. ²Anna katamba-tambai naua:

“Tilakam! Tilakam Babel indo kota kasalle!

Tentomai mendadim ongeanna ingganna setam anna debata kadake;

anna naongi ingganna hupanna dassi mekussi'-kussi' si nakahidi' hupatau.

³Aka ingganna issinna lino nababa bulim gau' kadakena sihhapam to dibabai muihu' anggur lambi' sandasanda tanapogau' aka mäbö'.

Anna umbabai ingganna tomahaja illaam lino ullulu' pa'bannetauam, anna buda pa'balu' lako lino napatomakaka aka natumä kamohäeam sugali'na to Babel.”

⁴Anna mane kuhingngi pole oi kamaha senga' ma'kada yabo mai suhuga naua:

“O umma'ku, pessubungkoa' illaam mai kota Babel

indana nasussuikoa' dosana anna nalambannikoa' pesämbä'ku.

⁵Aka mentombommi dosana sondä' langi'

anna tä' deem nakalembei Puang Allataala indo gau' kadakena.

⁶Pabala'i indo gau' kadakena; Pabala'i penduam tiluppi' umba susi indo si napogau',

sihhapam anggur dipangngissiam ihusanna, penduam tiluppi' makahha'na anna indo si napebeem.

⁷Palambi'i kamapi'disam anna kamasussaam

la sipadaam indo kamatandeam anna katomakakaam si napomasannangam kalena.

Aka si ussangai kalena naua:

‘Kao tomahajaä' to ma'pahenta, taiaä' to balu-balubaine,

anna to tala deennä' ussi'dim kamasussaam penaba.’

⁸Kaha-kaha iam too nasuhum illaam allo sangngallo la dipalambi'im

ma'hupa-hupa kamapi'disam susinna:

saki mandappo'i, kamasussaam penaba, anna kakobeam.

La naä'bäi api aka tadisihanteam kakuasaanna Puang Allataala Debatanta to umpassalai.”

⁹Ingganna tomahaja illaam lino to napasola to Babel ullulu' pa'bannetauam anna mangngala taba illaam katomakakaanna la sumahho anna ma'bahata ke naitam hambunna indo api ma'nala-nala mangngä'bäi.

¹⁰Ingganna indo tomahaja ke'de' ma'pahandam mambela aka mahea' la nahua pandahhaam ia too. Anna ma'kadai naua:

“Tettekede sägä punalam Babel kota kasalle anna matoho! Maha'um!

Illaam mesa tette' dipalambi'i pesämbä' Debata.”

¹¹Ingganna pa'balu' lako lino sumahho anna ma'bahata ussahhoi kasägänganna Babel, aka tä'um deem moi podo la mesa tau muallii balusanna

¹²susinna: bulabam, peha', batu masuli', mutiara, sampim mapia, sampim mellolo pao, sampim malellä, anna sutera. Susi toi duka' kaju mallam dilambi', anna baham-baham toha dipapiai, anna kaju masuli' allinna, gällä, bassi, anna pualam. ¹³Tä' toi deem la muallii kuli'na kaju matannim, hampa-hampa, tunuam bubanau', dama' si bubanau' isanga mur anna kemenyan, anggur, minnä, tappum anna gandum, sapim, domba, daham sola bendi, sabua' anna to disakka illaam pa'bundusam.

¹⁴La ma'kada ingganna indo pa'balu' lako issinna kota Babel naua: “Ingganna indo aka-aka si umpohäea' la muampuam, pa'de asammi. Anna ingganna indo baham-baham masuli' si umpobunga-bunga bäbäa', pa'de asammi, anna tä'um deem la ullambi'.”

¹⁵Ingganna indo to si umbalu'

baham-baham ia too dio Babel lambi' naposugi' la ke'de' ma'pahandam mambela, aka mahea' la nahua indo pandahhaam. Iya la sangngim sumahho mandam anna ma'bahata napasindum¹⁶ ma'kada naua:

“Tettekede, sägä punalam issinna Babel kota kasalle.

Si umpake sampim mapia susinna sampim millo', sampim mellolo pao, anna sampim malellä.

Anna si umpake poheba bulabam, batu masuli', anna mutiara!

¹⁷ Sapo' anggam mesa tette' anna pa'de asammi indo katomakakaanna!”

Susi toi ingganna to si umpalao kappala', anna to si ma'kappala', anna to mengkähä illaam kappala', sola ingganna to si mappameä tama le'bo', la ke'de' umpahandam mambela¹⁸ indo api tumbum hambunna muä'bäi indo kota anna sikaolii naua: “Tä'um deem la susinna inde kota kasalle.”¹⁹ Iya sangngim ussabu'im sobä' ulunna tanda pa'bahataam, mane sumahhoi napasindum sikatamba naua:

“Tettekede, sägä punalam pole' Babel kota kasalle!

Moi kela daa katomakakaanna si umpatomakaka ingganna to muampuam kappala' le'bo'!

Sapo' angga hi mesa tette' anna pa'de asammi ingganna aka-akanna.”

²⁰ Sapo' ikoa' iko inggannakoa' issinna suhuga, la kassikoa' anna tilalla' muita katallanganna kota ia too.

O inggannakoa' umma'na Puang Allataala sola ingganna suho anna nabi, la kassikoa' anna tilalla' aka napalambi'im pesämbä'na Puang Allataala indo kota kasalle, bala'na indo puha napogausangkoa'.

²¹ Puhai ia too, iya deemmi mesa malaika' bomboam muäkä' mesa batu pada issä gege kasallena anna

napa'lebasanni tama le'bo' napasindum naua:

“La dipasusim too inde kota Babel mesa kota handam kasalle, la ditallangam lambi' tä'um deem la diita pole.

²² Anna tä'um deem la dihingngi pole poni-poniam illaam kota Babel susinna to ma'katapi, to menani, to ma'sulim, anna to ma'lalloho'.

Tä' toom duka' deem la dilambi' moi podo la mesam to manähä kapapia-pia,

anna tä' toi duka' deem la dihingngi to lumambu'.

²³ O to Babel, tä'um deem la naita tau lekke'na lampu illaam kotamu, anna tä' toi deem la dihingngi to umpakahoa' pa'pakabengam.

Indo to ma'balu'mu handam kaissangam illaam lino,

anna pa'issangammua' si umpake umbaba bulim ingganna hupatau illaam lino.

²⁴ Ia anna dipalambi'i pesämbä' kota Babel, aka naongi hahana ingganna nabi anna hahana umma'na Puang Allataala. Battu diua kota Babel tombongam bukunna umma'na Puang Allataala to dipatei illaam lino.”

Pampujianna issinna suhuga

19:1-4

19 Puhai ia too, iya kuhingngim susi kamahanna tau buda muahhe illaam suhuga sikatamba naua:

“Dipuji Debata!

Aka Puang Allataala Debatanta kabutuanna kasalamasam, anna ia to handam matande anna ma'kuasa.

² Dipuji aka abana malolo anna sipäto' pesämbä'na.

Puham umpassala indo baine passunda' to dipobungam bibi,

to unkladakei lino napobua'
passundasanna.

Napassala Puang Allataala aka buda
sabua'na si napatei.”

³Mane dihingngi polei indo kamaha
muahhe naua:

“Dipuji Debata!

Aka indo hambunna api to muä'bäi indo
kota kasalle la tontä liu tumbang
sule lako salako-lakona.”

⁴Iya indo dua pulo appa' to pebaba
anna indo appa' to ma'penaba sangngim
ma'balinguntu' umpenombai Puang Al-
lataala to tadongkom yabo okkosam ka-
hajaam. Anna nauai:

“Abana sipäto' dipuji Debata!”

Allo kakabenganna Änä' Domba

19:5-10

⁵Iya dihingngim kamaha illaam mai
indo okkosam kahajaam ia too naua:

“O inggammua' to mengkahea' lako
Puang Allataala,
susi to bahinni' teem to kasalle,
pujikoä' Puang Allataala Debatanta!”

⁶Puhai ia too, kuhingngim susi ah-
hena tau buda, ma'uhhum susi pälämpä
kasalle anna magahugu susi guntu'
kasalle. Iya kuhingngim ma'kada naua:
“Dipuji Debata!

Aka ma'pahentam Puang Allataala De-
batanta To Handam Kuasa.

⁷Tapada-padaa' kassi anna tilalla'
umpuji kamatandeanna Puang
Allataala!

Aka lambi'um allo kakabenganna Änä'
Domba

anna tadongkommi to la napobaine.

⁸Aka puham dibeem poheba
mabusa millo' anna mapattim la
napa'poheba.”

(Poheba mabusa millo' kalembasanna
pa'pogausam mapianna umma'na Puang
Allataala).

⁹Puhai ia too, napa'kadai omä' indo
malaika' naua: “Tuli'i naua: ‘Napo-
hongko' to ditambahi la mangngala taba
illaam hame-hame kakebaineanna Änä'
Domba!’” Mane nauai: “Inde tula' tappa',
buttu di Puang Allataala.”

¹⁰Iya ma'balinguntu'mä' dio olona
indo malaika' la kupenombai, sapo'
tappa nauaannä: “Daa daa daa, Puang
Allataala hia penombai! Aka kao
sabua'naä' duka' Puang Allataala susi
siangki' anna ingganna solasubummu
to manontom muanda'i pepa'guhuanna
Puang Yesus. Aka pepa'guhuanna Puang
Yesus too'na tula'na ingganna nabi.”[‡]

To ussäkei daham mabussä'

19:11-21

¹¹Mane kuitai titungka' suhuga,
iya tandaammi mesa daham mabussä'
disäkei. Indo to ussäkei isanga To
Manontom anna To Malolo. Si muundu'
lollä illaam pahhottosanna anna malolo
illaam pa'bundusam. ¹²Susi lelo api
matanna, anna yabo ulunna buda
songko' tomahaja. Anna dio kalena
tisuha' mesa sanga, sapo' anggam Ia
muissanni kalembasanna sanga ia
too. ¹³Jubana puha dihamme dokko
haha. Anna disangai “Battakadanna
Puang Allataala”. ¹⁴Anna natuhu'i
ingganna sohodadu yabo suhuga
sangngim ussäkei daham mabussä',
anna ma'poheba mabusa millo'
anna mapattim. ¹⁵Tidandoham
illaam mai sädäna mesa pa'dam
pataham. Iya pa'dam iam too la
napake untaloi ingganna hupatau. La
ma'pahenta umpake palu-palu bassi.
La sihhapam uhhimpi' anggur illaam

[‡]19:10 pepa'guhuanna Puang Yesus too'na tula'na ingganna nabi, mala duka' kalembasanna: pepa'guhuanna Puang Yesus umpatigaha' ingganna nabi.

ongeam pahhimpisam. Indo diuam pahhimpisam, kalembasanna aha' kasallena Puang Allataala To Handam Kuasa. ¹⁶Tisuha' sanga dio jubana anna dio apanna naua: "Tomahajanna ingganna tomahaja anna Debatanna ingganna debata."

¹⁷Mane kuitai mesa malaika' ke'de' yabo mata allo metamba untambai ingganna dassi sikatia' yabo lawwa naua: "Maikoa' pangngalataba umpakahoa' pa'hame-hameam kasalle napadadi Puang Allataala. ¹⁸Maikoa' siande-andei balena ingganna tomahaja, balena pangngulunna sohodadu, balena pa'bahani, balena daham sola to ussäkei, balena ingganna hupatau mengkalao to bahinni' sule lako to kasalle, sabua' anna taianna sabua'."

¹⁹Mane kuitai indo olo'-olo' to peande anna ingganna tomahaja illaam lino sola sohodadunna ma'hempum la umbundu' indo to ussäkei daham mabussä' sola ingganna sohodadunna. ²⁰Iya disakkam indo olo'-olo' to peande sola indo nabi tatappa',[†] battu diua indo to puha umpogau' tanda memängä-mängä umpake kakuasaanna indo olo'-olo' to peande, napolalam umbaba bulim hupatau to umpakei tandana indo olo'-olo' to peande anna to umpenombai indo pa'pasusianna. Puhai disakka indo olo'-olo' to peande anna indo nabi tatappa', iya ditibe tubom tama le'bo' api ma'nala-nala susi dama' ditunu. ²¹Anna ingganna sohodadunna, mesai indo to ussäkei daham mabussä' umpatei asanni, indo pa'dam tidandoham illaam mai sädäna napake. Iya tappa sule siaham buda dassi nalebo napedea'i balena ingganna indo to mate.

Diona indo wattu sasa'bu taunna 20:1-6

20 Puhai ia too, kuitam mesa malaika' tuhum yabo mai suhuga untetä hante bassi kasalle anna pegontinna indo ba'ba gahoä handam mandalam.[§] ²Anna ussakkai indo naga poa, indo si diuam nenena naga, ia toi indo diuam tomahajanna setam battu diua setam bulitu'. Anna nahante bassii sasa'bu taunna masäena, ³mane natibei dokko indo gahoä handam mandalam, mane nagontinni anna nakapu', anna mala tä'um la umpabulim liu ingganna hupatau tando diona mai indo sasa'bu taunna. Sapo' la pahallu dilappasam säpäi' ke puham indo sasa'bu taunna.

⁴Puhai ia too, kuitam buda okkosam kahajaam anna tau muokko' yabona. Tau ia too sangngim dibeem kakuasaam mahhotto'. Kuita toi sungnga'na ingganna to puha diäläiam ulunna aka ussa'bii pepa'guhuanna Puang Yesus anna umpa'pakahebaam Battakadanna Puang Allataala. Tau iam too tä' deem umpenombai indo olo'-olo' to peande anna indo pa'pasusianna. Anna tä' toi deem umpake tandana indo olo'-olo' to peande, tala napayabo kidena, tala napadio lima kananna. Ingganna tau ia too tuboim sule anna mendadi tomahaja solai Kristus ma'pahenta sasa'bu taum masäena. ⁵Iam too inde uhuna hupatau dipatibangom sule dio mai alla'na to mate. (Lessu'pi indo sasa'bu taunna mane dipatibangom asanni sule ingganna hupatau dio mai kamateam.) ⁶Napohongko' ingganna to dipatibangom sule illaam indo uhuna dipatibangom sule to mate. Tau ia too abana umma'na Puang Allataala. Tä'um la nahua kamateam ma'penduanna battu

[†]19:20 *indo nabi tatappa'*: battu diua indo olo'-olo' to peande kaduanna; batai 16:13.

[§]20:1 *gahoä handam mandalam*: batai 9:1, 17:8.

diua kamateam sule lako salako-lakona illaam le'bo' api. ** Sapo' la mendadi sandona Puang Allataala anna Kristus, anna la mendadi tomahaja ma'pahenta sola Kristus sasa'bu taunna.

Tomahajanna setam ditaloi

20:7-10

⁷Lessu'i too indo sasa'bu taunna, iya dilappasammi indo tomahajanna setam illaam mai pa'tahungkunganna, ⁸anna le'ba'i ussambai lino la umpabulim Gog anna Magog,^{††} kalembasanna issinna ingganna botto illaam lino. La napateem anna mala napamesa aka la napasola ma'bundu'. (Indo hupatau to napabulim, pada budanna bungim dio bihim le'bo'.)

⁹Anna mane ma'obim-obim sule dio mai bottona si mesa-mesa ullebo indo kota nakaha'i Puang Allataala, ongeam pa'mesaanna umma'na. Sapo' tuhum api yabo mai langi' muä'bäi.

¹⁰Anna indo tomahajanna setam to umpabulinni, la dipa'tibeam ia tama indo le'bo' api ma'nala-nala susi dama' ditunu, indo ongeam naongeti dipantibe'i indo olo'olo' to peande anna indo nabi tatappa'. Anna illaanni didahha allo bengi sule lako salako-lakona.

Dipopa'tadongkongam to mate

20:11-15

¹¹Puhai ia too, kuitam okkosam kahajaam mabusa anna kasalle, anna indo To muokko' yabona. Iya tappa pa'de siaham langi' anna lino dio olona, nasuhum moi ongeanna tä' toi deem di-ita. ¹²⁻¹³Iya kuitam ingganna to mate susi to bahinni' teem to kasalle ke'de' dio olona indo okkosam kahajaam. Susi to mate illaam le'bo', teem to mate yabo galantangam, pantam sule dio mai ongeanna anna ke'de'i dio olona indo

okkosam kahajaam. Iya dibukkam indo suha' katuboam anna dibukka duka' buda suha' senga', anna dihotto'i indo to mate situhu' pa'pogausanna tituli' illaam indo suha' senga'. ¹⁴⁻¹⁵Menna-menna tä' tituli' sanganna illaam indo suha' katuboam, la ditibe ia tama indo le'bo' api. Susi toi kamateam sola ongeanna to mate, ditibe duka' tama indo le'bo' api. Indo le'bo' api, iam too indo diuam kamateam ma'penduanna.

Langi' bakahu anna lino bakahu

21:1-8

21 Puhai ia too, kuitam langi' bakahu anna lino bakahu, aka indo langi' sola lino yolona anna le'bo', pa'de asammi ia. ²Iya kuitam indo Kota Maseho battu diua Yerusalem bakahu, tuhum yabo mai suhuga napatuhum Puang Allataala. Tä' deem la susi mapianna sihhapam baine dipapohebai la untammui muanena aka la dipakabem. ³Iya kuhingngim kamaha metamba illaam mai indo okkosam kahajaam naua: “Kannassai, Puang Allataala tohho illaammi alla'-alla'na hupatau. La ma'mesa lium sola hupatau, anna hupatau la mendadi umma' petauanna. Ma'kale Puang Allataala la umpasolai anna la mendadi Debatanna. ⁴Ia la umpassiianni uwai matanna. Anna la pa'dem pole' kamateam, tä'um deem pa'bahataam, tä'um deem to la sumahho, anna la pa'dem kamapi'disam. Aka ingganna-ingganna sia yolona pa'de asammi.”

⁵Mane ma'kadai indo To muokko' yabo okkosam kahajaam naua: “Kannassai, ingganna-ingganna sia la kupadadi bakahu.” Mane naua polei: “Tuli'i inde kadangku aka inde kadangku tappa' anna mala dikatappa'i.” ⁶Anna

**20:6 kamateam ma'penduanna: batai 20:14-15.

††20:8 Gog anna Magog: Yeh. hondongam 38-39.

mane naua pole: “Puha asammi! Kaom too Alfa anna Omega,^{‡‡} battu diua Pa'pahandusanna anna Kasuppisanna ingganna-ingganna sia. Menna-menna mabähäm la kubeem bähä uwai dio mai indo kalimbuäna uwai katuboam.⁷ Menna-menna patalo, tau ia too la untahima ponno indo ingganna pa'tamba' ia too. Kao la mendadi Debatanna anna ia la mendadi änä'ku.⁸ Sapo' to mahea' ussa'biiä, to umpemboko'ia, to kadake gau', to papateam, to ullullu' pa'bannetauam, to si ma'issam-issam kadake, to umpenombai debata lino pa'papia kalena, anna to kaägä'ägä', tau susi ia too la ditibe tama ia le'bo' api ma'nala-nala susi dama' ditunu. Iam too diuam kamateam ma'penduanna.”

KAAPPA'NA DIPAITAI (21:9-22:5)

Yerusalem bakahu 21:9-22:5

⁹Puhai ia too, sulem mesa indo pitu malaika' to puha muanda'i indo pitu tubum ponno kamapi'disam kasalle handam katampasanna. Napellambi'ia' naua: “Maiko anna kupaitaiko indo to dipasihhapam baine la napobaine Änä' Domba.”¹⁰ Iya nasalokko'mä' Penaba Maseho anna nababaä' indo malaika' längäm pusu'na buntu maläkkä' anna napaitaiä' Yerusalem battu diua Kota Maseho tuhum yabo mai suhuga napatuhum Puang Allataala.¹¹ Indo kota pangkihha' aka naponnoi kamatandeanna Puang Allataala. Palassinim susi batu masuli' handam

mapia, susi batu yaspis, anna silosa susi dahammim.¹²⁻¹³ Anna ditembo' malangka' anna makambam lao pali', anna sapulo dua ba'bana. Indo ba'bana, tallu dio tandai mata allo, tallu dio tandai utara, tallu dio tandai selatan, anna tallu dio tandai katampusam, anna pantam najagai sanda si mesa malaika'. Anna dio indo tutu' ba'bana mesa oi tituli' oom mesa sanganna indo to sapulo dua pentoosanna to Israel.^{¶¶}¹⁴ Tembo'na indo kota dilangga sapulo dua batu. Anna mesa oi too indo batu, tituli' oom mesa sanganna indo sapulo dua suhona Änä' Domba.

¹⁵Anna indo malaika' to umpa'tula'ia', deem tekkem bulabanna la napajuam indo kota sola ba'bana anna tembo'na.¹⁶ Indo kota pada kalandona anna kalua'na. Napaju indo kota, iya dua sa'bu appa' hatu' kilo kalandona. Anna pada siam duka' kalua'na sola malangka'na.¹⁷ Puhai ia too, napajum duka' indo tembo'na kota, iya sahatu' appa' pulo appa' singkum malangka'na.^{§§} Indo pepajunna malaika', susi siam duka' indo si napopepaju hupatau.¹⁸ Tembo'na indo kota, batu masuli' dipapia isanga yaspis. Anna indo kalena kota sangngim bulabam täsä' dipapia anna silosa susi dahammim.¹⁹ Indo sapulo dua batu pelanggana pantam dibunga-bungai batu masuli'. Uhuna dibunga-bungai batu yaspis, kaduanna batu nilam, katallunna batu mirah, kaappa'na batu zamrud,²⁰ kalimanna batu unam, kaannanna batu sardis, kapitunna batu ratna cempaka, kakahuanna batu beril, kakasehanna batu krisolit, kasapulona

^{‡‡}21:6 *Alfa anna Omega*: Alfa huru' uhuna anna Omega huru' katampasanna illaam abjad basa Yunani. Kalembasanna Puang Allataala to unguksai ingganna-ingganna sia.

^{¶¶}21:12-13 *sapulo dua pentoosanna to Israel*: indo sapulo dua änä'na Yakub diuam, Yeh. 48:30-35.

^{§§}21:17 *malangka'na*: Deem duka' muuai kalembasanna: *makambanna*.

batu krisopras, kasapulo mesanna batu lasuardi, anna kasapulo duanna batu kecubung. ²¹ Anna indo sapulo dua tutu' ba'bana, sapulo dua siam duka' mutiara dipapia. Anna lalanna illaam indo kota sangngim bulabam täsä' dipapia, silosa susi dahammim.

²² Anna tä'um deem Banua Debata illaam indo kota, aka sitingngajom tau kalena Puang Allataala Debatanta To Handam Kuasa anna indo Änä' Domba. ²³ Anna indo kota ia too tä'um umpahalluam mata allo anna bulam, aka pangkähänam kamatandeanna Puang Allataala umpomasiä'i, anna kamasiäsanna indo Änä' Domba mendadi lampunna. ²⁴ Ingganna pa'palakoanna hupatau illaam inde lino la naballoi kamasiäsanna. Anna kakuasaanna ingganna tomahaja illaam inde lino silele la nababa tama indo kota tanda pa'pakasallena lako Puang Allataala sola indo Änä' Domba. ²⁵ Ba'bana indo kota la tibukka liu, aka tä'um ia deem bengi illaam. ²⁶ Kamatandeanna anna katomakakaanna hupatau illaam inde lino la dibaba tama indo kota tanda pa'pakasallena lako Puang Allataala sola indo Änä' Domba. ²⁷ Sapo' ingganna kadakena tä' punala ia la mala tama indo kota. Anna duka' to umpogau' gau' mesihi'-sihi' anna to sikaägä'-ägä' tä' ia la mala tama. Sapo' anggam mala tama to tisuha' sanganna illaam indo suha' katuboam battu diua suha'na Änä' Domba.

22 Puhai ia too, napaitaimä' duka' indo malaika' mesa salu to mepatubo uwainna. Uwainna indo salu silosa susi dahammim tandana mahändä. Salu ia too buttu illaam mai okkosam kahajaanna Puang Allataala anna Änä' Domba, ² anna mellao umpatängäi lalam illaam indo kota. Sipatomaliam bihinna indo salu, deem

diuaam kaju katuboam. Pessapulo dua kembua sataum battu diua pissam sabulam. Anna daunna indo kaju dipake umpakulii ingganna hupatau. ³ Anna illaam indo kota tä' deem dilambi' moi podo la mesa aka-aka nahua tädona Puang Allataala.

Okkosam kahajaanna Puang Allataala anna Änä' Domba, illaam indo kota. Anna ingganna sabua'na la menomba lako, ⁴ anna la muita lindona Puang Allataala, anna la tisuha' yabo kidenan sanganna Puang Allataala. ⁵ Issinna indo kota tä'um la umpahalluam lampu sola delle'na mata allo aka Puang Allataalam umpomasiä'i, nasuhum tä'um deem la bengi illaam. Anna ingganna hupatau illaam la mendadim tomahaja ma'pahenta sule lako salako-lakona.

Diona kasuleanna Puang Yesus ma'penduanna

22:6-17

⁶ Puhai ia too, nauaammä' indo malaika': "Ingganna inde kada, tappa' anna mala dikatappa'i. Puang Allataala Debatanta umpopengkähä Penaba Masehona lako ingganna nabinna anna mala naissam indo to la dadi. Anna puham ussua malaika'na umpellambi'i ingganna sabua'na anna napaitai indo kaha-kaha la masimpammi dadi."

⁷ Anna mane ma'kada Puang Yesus naua: "Kannassai, tä'um la masäe anna sulemä' sule! Napohongko' to untuhu'i ingganna kaha-kaha dipa'palosaam illaam inde suha'."

⁸ Kaom too Yohanes, ma'kale uh-hingngii anna muitai ingganna inde kaha-kaha. Tappana puha kuhingngi anna kuita, iya ma'balinguntu' siahamä' dio olona la kupenombai indo malaika' to umpaitaiä' ingganna kaha-kaha ia too. ⁹ Sapo' tappa napa'kadaiä' naua: "Daa daa, daa umpenombaiä'! Penomba lakoko Puang Allataala, aka

kao duka' sabua'naä', susi siangi' anna ingganna solasubummu, battu diua ingganna nabi anna ingganna tau to untuhu'i issinna inde suha'." ¹⁰Anna mane nauam poleä'i: "Daa umbuni-anganni inde kada dipa'palosaam illaam inde suha', aka mahuku'um watunna la dadi ingganna indo kaha-kaha ia too. ¹¹Menna-menna umpogau' gau' kadake, päbäi mammi napogau' liu; menna-menna umpogau' gau' sessu', päbäi mammi napogau' liu; anna menna-menna umpogau' gau' mapia, päbäi mammi napogau' liu; anna menna-menna maseho salu katuboanna, päbäi mammi umpalako liu gau' maseho."

¹²Mane naua oi Puang Yesus: "Kannassai! Tä'um masäe anna sulemä' sule. Anna la kubabaam sahona ingganna hupatau situhu' pa'pogausanna si mesa-mesa. ¹³Kaom too Alfa anna Omega battu diua Pa'pahandusanna anna Kasuppisanna ingganna-ingganna sia, battu diua Uhuna anna Katampasanna."

¹⁴Napohongko' ingganna to puha umpake hahana Änä' Domba natappa'iam jubana,* nasuhum sihatam la muande buana kaju katuboam anna la muola ba'ba mentama indo kota. ¹⁵Sapo' tä' ia la tama indo kota ingganna to umpogau' gau' sessu' anna to ma'issam-issam kadake, susi toi ingganna to ullullu' pa'bannetauam, to papateam, to umpenombai debata lino pa'papia kalena, anna ingganna to si napohäe kaägä'-ägä' anna napogau'i. Ingganna tau susi ia too la sulibanna ia indo kota naongei.

¹⁶"Kaom too Yesus puha ussua malaika'ku matim umpa'pakahebam

ingganna indo kaha-kaha la pahallu naissam ingganna jumaa'. Kaom too pessubunna tomahaja Daud, anna Kao toi indo diuaam Bintä Pehendem Allo tä' deem pada samasiä.'"†

¹⁷Iya ma'kadam Penaba Maseho anna indo to dipasihhapam baine napobaine Änä' Domba naua: "Maingko!" Anna iai too uhhingngii inde tula' la naua duka': "Maingko!"

Mai asangkoa' ingganna to mabähäm. Aka menna-menna maelo' muihu' la dibeem bäbä indo uwai katuboam.

Kada pebubum

22:18-21

¹⁸Lako ingganna to uhhingngii inde ingganna kada dipa'palosaam illaam inde suha', kupakahi'di kuua: Menna-menna la uhhängännii tula' illaam inde suha' la napalambi'i Puang Allataala indo kamapi'disam puha dipa'paissangam. ¹⁹Anna menna-menna unkuhännii kada dipa'palosaam illaam inde suha', tä' ia la napäbäi Puang Allataala mangngala taba muande buana indo kaju katuboam anna tä' toi la tama indo Kota Maseho to puha dipa'paissangam illaam inde suha'.‡

²⁰Puang Yesus to umpa'palosaam ingganna kaha-kaha ia too, ma'kada naua: "Tappa', la masimpammä' sule!"

Kuhannuam tä' mala tala dadi susi! O Puang Yesus Debatangki, maingko!

²¹Handandanni Puang Yesus Debatanta untamba'koa' pada-pada. La sule lako hi too.

Padam too.

*22:14 *natappa'iam jubana*: batai 7:14.

†22:16 *Bintä Pehendem Allo*: Bintä Pehendem Allo tandana la masimpammi masiä. Susim too duka' kasuleanna Puang Yesus tandana la masimpammi pa'de ingganna kakadakeam.

‡22:19 Pass. 4:2, 12:32.